


Niospa meka fena
Jesucristoõnoa



New Testament in Yaminahua (PE:yaa:Yaminahua)

**Niospa meka fena Jesucristo^{noa}
New Testament in Yaminahua (PE:yaa:Yaminahua)**

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 22 Feb 2024 from source files dated 29 Jan 2022
6c7b7ce2-9d87-5405-91e6-71ce1387adcc

Contents

MATEO	1
MARCOS	61
LUCAS	95
JUAN	153
LOS HECHOS	194
ROMANOS	244
1 CORINTIOS	271
2 CORINTIOS	301
GÁLATAS	318
EFESIOS	328
FILIPENSES	337
COLOSENSES	343
1 TESALONICENSES	349
2 TESALONICENSES	354
1 TIMOTEO	357
2 TIMOTEO	365
TITO	370
FILEMÓN	374
HEBREOS	376
SANTIAGO	397
1 PEDRO	405
2 PEDRO	413
1 JUAN	417
2 JUAN	424
3 JUAN	425
JUDAS	426
APOCALIPSIS	429

Mateo Jesúsnoa Yoikĩ Keneni

Jesucristo ãfe xinifãfe anefo
(Lc. 3.23-38)

¹ Ë mato yoinõ a taeyoi ipaonifo Jesucristo ãfe xinifo. Jesucristo ãfe xini David. Nã David ãfe xini Abraham. Nãfo Jesucristo ãfe xinifo taeyoi iyopaonifo.

² Nã Abraham ãfe fake Isaaca ini. Isaaca ãfe fake Jacobo ini. Jacobo fake Judá ini. ãfe extofori ini. ³ Judapa fake Fares fe Zara ini. ãto afa Tamar ini. Fares ãfe fake Esrom ini. Esrom ãfe fake Aram ini. ⁴ Aram ãfe fake Aminadab ini. Aminadab ãfe fake Naasón ini. Naasón ãfe fake Salmón ini. ⁵ Salmón fake Booz ini. Booz ãfe afa Rahab ini. Booz ãfe fake Obed ini. Obed ãfe afa Rut ini. Obed ãfe fake Isaí ini. ⁶ Isaí ãfe fake xanĩfo David ini. Xanĩfo David ãfe fake Salomón ini. Salomón ãfe ãfa fene fetsaya iyopaoni, Urías.

⁷ Salomón ãfe fake Roboam ini. Roboam ãfe fake Abías ini. Abías ãfe fake Asa ini. ⁸ Asa ãfe fake Josafat ini. Josafat ãfe fake Joram ini. Joram ãfe fake Ozías ini. ⁹ Ozías ãfe fake Jotam ini. Jotam ãfe fake Acáz ini. Acáz ãfe fake Ezequías ini. ¹⁰ Ezequías ãfe fake Manasés ini. Manasés ãfe fake Amón ini. Amón ãfe fake Josías ini. ¹¹ Josías ãfe fake Jeconías ini; ãfe extofori ini. Mã Jeconías rama xanĩfo ikaino, Babilonia anoxõ xanĩfãfe ãfe sorarofo nĩchini israelifo ato ifitanõfo anã ato yonomaxikakĩ. Mã sorarofãfe ato ifitanaifono israelifo Babilonia ano fonifo. Jeconíasri iyonifo. Jeconías ãfe extofori kainifo.

¹² Nãskata Babilonia anoax fake fetsafori kainifo. Jeconías ãfe fake Salatiel ini. Salatiel ãfe fake Zorobabel ini. ¹³ Zorobabel ãfe fake Abiud ini. Abiud ãfe fake Eliaquim ini. Eliaquim ãfe fake Azor ini. ¹⁴ Azor ãfe fake Sadoc ini. Sadoc ãfe fake Aquim ini. Aquim ãfe fake Eliud ini. ¹⁵ Eliud ãfe fake Eleazar ini. Eleazar ãfe fake Matán ini. Matán ãfe fake Jacobo ini. ¹⁶ Jacobo ãfe fake José ini. Nã José ãfe ãfi ini, María. Nã María fake ini, Jesús. Jesús ãfe ane fetsa Cristo ini.

¹⁷ Abraham ãfe fenafo ichapa ini, nã David kainitĩa catorce inifo Abraham ãfe fenafo. Askatari nã David ãfe fenafo ichapa ini. Nãskano David ãfe kaifo yora fetsafãfe Babilonia ano ato iyonifo ato yonomaxikakĩ. Babilonia ano ikanax David ãfe fenafo catorce inifo. Askatari David ãfe fenafo Babilonia anoax anã fenifo ãto mai ano. Mã fenixakakĩ David ãfe fena fetsafori kainifo catorce inifo. Askatari Cristo kaini.

María Jesucristo kãini
(Lc. 2.1-7)

¹⁸ Ë mato yoinõ ea nikakapo afeskax Jesucristo kãinimakĩ. José fe María yoinãyonifo fianãxikakĩ. Fianãyofafomano Niospa Yõshi Sharapa María fake nanemani. ¹⁹ José Nios Ifofasharakõiax sharakõi ini. Nãskaxõ José María yõapainima yorafãfe ferotafi. Fomãxopaoni. Nãskaxõ tosa yoixoma José María enepaini. ²⁰ Nãskano José ãfe namapa õini Niospa ãfe ãjirinĩ yoiaito. Yoikĩ iskafani: “José, rateyamafe María fe fianãxiki. Na fake nanea Niospa Yõshi Sharaõxõ akaki. ²¹ María fake feronãfake fii kiki. Mĩ anekĩ Jesús faxikai. Nãato ato ifipakenakaki. Nãskaxõ afe yorafo ãto chaka soaxoxii kiki ato nimapakexakĩ,” ixõ ãjirinĩ José yoini.

²²⁻²³ Chanĩmakõi nãskakõi nã Nios yoimisto yoini keskarakõi. Iskafakĩ kirika keneyoni Niospa shinãmanaino:

Këro xotofake feronãfake fe imisma fake onixii. Fake feronãfake fixõ anekĩ Emanuel faxii,

ixō yoini. (Akka nōko mekapa Emanuel fakī, “Nios nofe ika,” ixō nō yoimis.)

²⁴ Mā ājirinī yoiano José moinākafani. Nā ājirinī yoia keskafakī, José María fini. Mā fixō āfe pexe ano iyoni. ²⁵ Mā afe fīanāx afe chotanānima āfe fake kāiyonō. Mā fake kāiano anakī Jesús fani.

2

Feronāfakefo fishi tāpikōimisfo a xini oaikirinoax mai fetsa anoax Jesús ōipai fenifo

¹ Herodes xanīfo ikano Jesús kāini Belén pexe rasi anoax, Judea mai anoax. Nāskano a xini oaikirinoax mai fetsa anoax feronāfakefo fishi tāpikōimisfo fenifo Jerusalén ano. ² Nokotoshikaxō yōkanifo: “¿Fanīmē a rama kāia judeofāfe āto xanīfo ikai? Mā nō ōia āfe fishi oaito. Nāskakē nō oa Jerusalén ano xanīfo ōiyoi. Nō akiki inimai nō oa, ‘Mī nōko xanīfokōi,’ ixō yoipaikī,” fanifo.

³ Askafaifono fetsafāfe yoiaito nikakī Herodes shināchakakōini xanīfo iki kiki ixō. Askatari keyokōi Jerusalén anoafāferi shināchakakōinifo. ⁴⁻⁵ Akka Herodes judeo inima. Nāskaxō ato kenamani a ato Nios kīfixomis āfe xanīfofo fenōfo ato yōkaxiki. Askatari a Moisés yoikī kirika keneni keskara ato tāpimamisfo ato kenamani ato yōkaxiki. “¿Fanīax Cristo kāixiimē?” ato faito kemanifo iskafakakī: “Belén anoax iki, Judea mai anoax,” fanifo. “Niospa meka yoimisto nānori kirika keneyoni a inōpokoai yoikī Niospa shināmanaino. Iskafakī keneni:

⁶ Belén, Judá mai anoax pishtakōi. Akka pexe rasi fetsafo efapakōifo. Askafīax Belén sharafinakōia ixii māmāi israelifo āto xanīfo finakōia kāixiaino Belén anoax. Nāskakē āfe inakōifo israelifo āto xanīfokōi ixii, ixō kirikaki keneni Niospa meka yoimisto Niospa shināmanaino,” fanifo.

⁷ Nāskakē Herodes a fishi tāpimisfo ato yōkani onexō tsōa nikayamanō: “¿Afetīa fishi mā ōitamē?” ato fani. ⁸ Nāskaxō ato nīchini Belén ano. Herodes tāpīpaikī, “Belén ano fotakāfe a fake tāpīxīkakī. Mā fichixō ea yoifexīkakī ēri akiki inimaikanō,” ato fani āa ato pārakī.

⁹ Ato askafaino fonifo. Fokakī fishi rekē kaino chīfafainifo. Nāskax fishi nēteni nā fake yome ano. ¹⁰ Nā fishi anā ōikanax inimakōinifo. ¹¹ Nāskakanax pexe mēra ikifaikaxō fake yome fichinifo afa María yafi. Mā fichikaxō ratokonō mai chachipakefofānifo, a fakeki inimakakī. Nāskakaxō āto kafo fēpekaxō afama mīшти sharakōifo Jesús inānifo. Oro minikāta, pirofomāri mininifo a nō koofatiro pirofomā nakas sharakōi. Askatari pirofomā fetsari āfe ane mīra inānifo. ¹² Nāskakē namakē Niospa ato yoiano anā Herodes ano fonifoma. Fai fētsa fonifo āto mai ari.

María feta José Jesús ichokinifo Egipto mai ari

¹³ Askata a fishi tāpimisfo mā foaifono, José namakē, Niospa āfe ājirinī yoini: “Moinākafafe. Mī āfi feta mī fake yome ichokitāfe Egipto mai ari. Nāri ikiyoxiki nā ē mato yoiaino mā anā onō. Herodes na fake yome fenai kiki retepaikī,” Niospa ājirinī José fani namakē.

¹⁴ Nāskata moinākafata, nā fakishi fonifo María fe José āto fake Jesús iyoi fokani Egipto ano. ¹⁵ Egipto ano José fe María ipaonifo mā Herodes naano fexīkakī. Nāskakē Egipto ano iyopaonifo. Niospa meka yoimisto nānorikōi kirika keneyoni Niospa shināmanaino iskafakī: “Ēfe fake ē kena Egipto ano,” ixō Niospa meka yoimisto kirika keneni.

Fakefo retenōfo Herodes ato manamani

¹⁶ Fishi tāpimisfo Herodes fomākani. Fai fētsa foafono nikai, Herodes ōitīfishkikōini. Fishi tāpimisfāfe taeyoi Herodes yoionifo ato yōkaito iskafakakī: “Afetīama nō nā fishi ōikī taefati, mā xini rafe aka,” fanifo. Nāskakē

Herodes sorarofa ato manamani fake feronāfake xini rafe akafo, yome mīshifoya ato retenōfo, Belén anoafu retekāta, a Belén pasotai ikafori ato retenōfo. ¹⁷⁻¹⁸ Nāskara taeyoi Jeremías Niospa shināmanaino kirika keneyoni a inōpokoai yoikī. Iskafakī keneni:

Ramā anoxō nikanifo fāsikōi oiaifono. Raquel oiaito nikanifo āfe fake manoi, mā āfe fake nano. Oiyayamafe fafiaifono nishpanima, ixō Jeremías keneni.

Nā Jeremías yoini keskara mā askakōia.

¹⁹ Mā Herodes naano Niospa ājirinī afianā José yoini namakē iskafakī: ²⁰ “Moinākafe. Mī āfi feta mī fake iyotaxiki Israel mai ano. A fake yomefo retepaimisfo mā naafoki,” fani.

²¹ Nāskafaino moinākafe José. Āfe āfiri mōini āfe fake yafi. Nāskakanax Israel ano anā fonifo. ²² Mā fōkakī nikanifo ato yoiaifono Herodes fake Arquelao mā xanīfokē Judea anoax. Nikai José rateni Judea ano kapai. Nāskaito anā ājirinī José yoini namakē iskafakī: “Galilea mai ano katāfe,” fani. Nāskafaino fonifo Galilea ano āfe āfi fe Jesús iyokani. ²³ Nāskax nokonifo Nazarete pepe rasi ano. Nāno inifo. Nānori taeyoikōi Niospa meka yoimisfāfe yoiyonifo, “Cristo Nazarete ano imis,” fakakī, a inōpokoai yoikakī. Nāskakōini.

3

Juan Maotista tsōa istomaxō ato yoini (Mr. 1.1-8; Lc. 3.1-9, 15-17; Jn. 1.19-28)

¹ Jesús Nazarete ano ikano Juan ato maotisafapani tsōa istoma ixō Judea mai anoxō. Nānoxō Niospa meka ato yoipaoni. ² Nānoxō ato yoipaoni iskafakī: “Yorafāfe, anā Nios shinākāfe. Māto chaka xatekōikāfe, a mā chakafamis shināmakikāfe. Niospa meka nikakōikāfe. Mā chaima nōko Ifo Nios oi kiki nōko xanīfo finakōia ixii kiki,” ixō Juan ato yoipaoni fāsikōi.

³ Isaías kirika kenekī yoiyoni a inōpokoai yoikī Niospa shināmanaino. Iskafakī yoini:

Tsōa istoma anoxō yorafo yoixii akiki feaifono. Iskafaki ato yoixii: “Mā nōko Ifo oi kiki. Nāskakē itipinīsharakāfe. Āfe fai sharafaxokāfe. Māto chaka xatekāfe,” ixō ato yoiaito nikaxikani, ixō Isaías kirika keneyoni Juanoa yoikī.

⁴ Akka Juan āfe rapati kamīcho fichi kishi faxō safepaoni. Āfe sītorari fichi koiro safepaoni. Nāskaxō tseo pipaoni, fonari apaoni. ⁵ Nāskano Jerusalén anoafu yafi Judea anoafu fenifo Juan nikai fekani. A faka Jordán chaima ikafori fenifo. ⁶ Mā fēkaxō Juan yoinifo a afara chakafamisfo. Nāskaxō āto chaka xatepaiyaifono Juan ato maotisafapani faka Jordán anoxō.

⁷ Nāskaifono fariseofo xanīfo metsamafo feaifono, saduceofo xanīfo met-samafori fenifo Juan ano. Ichapakōi fenifo, “Nokori Juan nashimanōra,” ikanax. Juan ato ōikī ato iskafani: “¿Afeskai mā ea ano oimē? ¿Ē mato maotisafapanō mā oimē? ¿Tsōa mato yoiamē? Mā shināiraka nō chiifā mēra katirora ixō nāskax mā maotisapaimē, nō chiifā mēra kayamanōra ikax. Maa, mā kai afaa tāpiama, askax mā maotisatiroma. Mā Nios Ifofaima. Mā oa shano keskara māto ōiti chakakōi. Nāskaxō mā Satanás ifofaa. Nāskakē kaxpa ē mato maotisafatiroma māmāi Satanás fisti shināito. Āa fētsa mato pāratiro nō maotisanō nō chiifā mēra kaimakai Nios nikayamafix ixō mato pārano mā chiifā mēra katiro fetsa afaa tāpiamato mato pārano. Askara Niospa mato ifitiroma mākaikōi shināito, ēroko mato maotisafaano. ⁸ Māto chaka xatekāfe, Nios shinākāfe. Mā Nios shināito ē mato maotisafapakai. ⁹ Ē mato anā yoinō nikakapo. Mā shināitiro: ‘Nā Abraham nōko xini ipaoni,

ōiti sharayaxō Nios shināpaoni.’ Akka mā shinākī: ‘Nōmāi Abraham fenaxō nō shara shināi;’ ixō mā shinākī mā shināsharaima. Askara shināyamakāfe. Akka māto ōitinī mā chaka shināfi mā chanī. Nikasharakōikāfe, ē mato yoinō. Na tokiri Niospa onifaxō nīchikē mā ōitiro Abraham āfe fena inō. Nāskakanax Abraham fakefo itirofo na tokiri ōikī Nios shinākanax. Akka mā kai anori shināima mā mā chanī: ‘Abraham shināpaoni keskara nō shināira,’ ikax. Askara shināyamafi Satanás fisti ifofafiai. ¹⁰ Akka fana fimiyamaito ifāfe reratiro. Āfe tapori tsekaxō koofatiro anā niyamanō. Nāskarifikā mā Nios nikakaspaito a omiskōipakenakafo mēra Niospa mato potaxii mā chaka xateaxma mā isharayamaito. ¹¹ Nāskakē ē mato maotisafai māto chaka mā xatepaiyaito Nios Ifofapaikī. Akka nā ea keskarama mā chaima oi kiki, nā sharafinakōia. Aato afama mīshti fatiro, ē atiroma keskara. Akka ē afaama. Mā Nios chanīmara faino aato āfe Yōshi Shara mato mēra naneyoi. Akka tsōa Nios chanīmara fayamaito, Niospa mato omiskōimaxii. ¹² Akka yōra āfe tarepa aros fanaxō mā pachiano topitiro. Nāskaxō katotiro a sharafo fixō a chakafo potaxō koofatiro. Nāskarifikā a chipo oaito a chanīmara faafo yafi a nikakaspamisfo ato paxkanāfaiyoi. Nāskaxō a chanīmara faifo a ika ano ato iyoxii afe isharapakexanōfo. Akka nā nikakaspamisfo chiifā mēra ato potano anoax omiskōipakenakafo. Chiifā mēranoax omiskōi xatenakafoma,” ixō Juan ato yoini.

Juan Jesús maotisafani faka Jordán anoxō
(Mr. 1.9-11; Lc. 3.21-22)

¹³ Askata Galilea anoax Jesús kani faka Jordán ari Juan maotisafanō. ¹⁴ Akiki nokoaino Juan Jesús iskafani: “Jesús, ¿afeskakī ē mia maotisafatiromē? Akka mīroko ea atironō,” fani.

¹⁵ Askafaino Jesús kemani iskafakī: “Epa Niospa noko yoia keskara keyokōi nō nikakōitiro. Nāskakē ea mā maotisafatiro,” fani.

Jesús askafaino, Juan Jesús maotisafani. ¹⁶ Nāskata Jesús faka mēranoax fininākfānaino nai fepekemetani. Ariax Niospa Yōshi Shara akiki fotoni, oa rifi keskara Jesús ōiaino. ¹⁷ Askaino nai mēraxō Āpa yoiaito nikani iskafaito: “Mī ēfe Fakekōi ē mia noikōi. Ē mikiki inimasharakōi,” ikaito nikanifo.

4

Satanás chakata Jesús afara chakafamapaini
(Mr. 1.12-13; Lc. 4.1-13)

¹ Nāskaino Niospa Yōshi Sharapa Jesús iyoni tsōa istoma anoxō Satanás afara chakafamapainō.

² Mā cuarenta nia oxax Jesús fonāikōini afaa pishta piyamax. ³ Nāno Satanás akiki nokoni. Mā akiki nokoxō ifofamapaini. Askatari chakafamapaini. Iskafakī yoini: “Mī Niospa Fakemākī na tokirifo pāa fapo,” fani.

⁴ Askafaito Jesús kemani: “Maa, na mī ea yoiai keskara ē akima. A nō piafi fisti nō shināima nipaikī. Akka Epa Niospa āfe meka fisti shara nō shinātiro. Nāskara Niospa meka yoimisto kenenī,” Jesús fani.

⁵ Jesús askafaino Satanás iyoni Jerusalén ano a Nios kīfiti pexefā māmākīa. ⁶ Nānoxō yoini iskafakī: “Mī Niospa Fakekōiaxroko mī niriāx ichopakekafanikai. Mī ichopakekafanax mī afeskaimakai. Nā Niospa meka kirikaki keneaki iskai: ‘Niospa āfe ājirifo yoixii mia kexenōfo.’ Askatari kirika keneano iskaki: ‘Mī āto mifiki pakeaito mia achixikani kiki mī tokiriki pakenōma,’ kirika kenea iskaki,” Satanás Jesús fani.

⁷ Askafaito anā Jesús kemani: “Akka na kirika keneano yoinifo iskafakī Niospa meka: ‘Nōa nō meka fetsafaxō nō yoitiro: “Ē afara afeskarafaito,

ea Niospa kexei,” ixõ nõ shinãtiroma. Akka, “Niospa ea amapaiyai keskara nõ fisti ã atiroki Niospa ea kexenõ,” ixõ shinãkãfe, ìkaki na kirika keneano,” Jesús fani.

⁸ Askata Satanás Jesús iyoni mãchifã mãnãñẽ. Arixõ õimani nõ maifo tii sharafinakõia. ⁹ “Õipo. Mĩ ea ratokonõ mai chachixõ, ‘Mĩ ãfe ifoki,’ mĩ ea faito na maitio keyokõi ã mia inãtiro mĩ ãfe ifo inõ,” fani.

¹⁰ Askafaito Jesús kemani: “Satanás. Emakinoax katãfe. ã mia ifofaimakai. Na kirika kenea ano Niospa meka yoimisto iskafani: ‘Nã nõko Ifo Nios fisti nõ ratokonõ mai chachixõ nõ yoitirokĩ, nõ fistimãi nõko Ifokẽ,’ ” fani.

¹¹ Askafaino Satanás Jesús makinoax kaino Niospa ãfe ãjirifo akiki fotonifo pimaxikakĩ.

Galilea anoxõ Jesús ato yoikĩ taefani

(Mr. 1.14-15; Lc. 4.14-15)

¹² Akka mã Juan sorarofãfe karaxa mãra ikimana nikata Jesús Galilea mai ano anã oni. ¹³ Nazarete anoax Capernaúm ano nokoni ano ixiki. Nã Galilea ãa kesemẽ Capernaúm ini. Nãñori yora fetsafori osia ini. Zabulonõfo fe Neftalifo ano ikafo ini. ¹⁴⁻¹⁶ Isaías kirika kenekĩ yoini keskakõi Jesús nãno ipaoni. Isaías kirika kenekĩ iskafani:

Zabulonõfo fe Neftalifo ãto mai ano ikafo ãa Galilea ano. Faka Jordán okiri chai poketa nãno judeofoma fakish mãra ika keskara, Niospa meka nikakatsaxakakima. Fakish mãra ika keskara ifiakaxõ, oa koshi penai keskara õixikani. Fakish mãra ipafikeranaxakakĩ atoki penarisatani, ixõ Isaías a inõpokoai yoikĩ Jesúsnoa keneneni. Nãskarifiai omiskõipakenakafo mãra ikeranafo. Askafikeranafono atoki Jesús nokoaitãa nõ Ifofafo tii ato nimapakenaka.

¹⁷ Anoxõ Jesús ato yoikĩ taefakĩ iskafani: “Mã chaima nõko Ifo Nios xanõfo finakõia oi kiki. Nãskakẽ shinãmitsayanã mãto chaka xatekãfe. Afaa chakafatamaroko Niospa meka nikakõikãfe,” ixõ Jesús ato yoini.

Jesús cuatro feronãfake kenani tarafanãfãñẽ foe fimisfono ãfe inakõi inõfo

(Mr. 1.16-20; Lc. 5.1-11)

¹⁸ Ato yoita Jesús Galilea ãa kesemẽ kani. Kakĩ fichini Simón yafi onefetsa Andrés. Simón ãfe ane fetsa Pedro ipaoni. Nã rafeta tarafanãfãñẽ fimisfo inifo, ãto tarafanãfã faka naki poteaifãfe. ¹⁹ “Efe fokãfe. Mãfi tarafanãfãñẽ fimiskĩ. Mã foe ichapa rasi tarafanãfãñẽ fiai keskari fakĩ iskaratãari mã ekeki yora ichapa efexii ã ãto Ifo inõ,” ixõ Jesús ato yoini. ²⁰ Ato askafaino tarafanãfã fafaikani afe fonifo.

²¹ Askata ori chaimashta kaxõ Zebedeo fake raferi fichini, Santiago yafi Juan. Nã rafeta ãto apa feta kanõa nakixõ tarafanãfã itipinĩ fanifo, kishifakakĩ. Nã raferi, “Efe fokãfe,” Jesús ato fani. ²² Ato askafaino ãto apa kanõa ano nĩchifainifo Jesús fe fokakĩ.

Jesús yora ichapafõ tãpimani

(Lc. 6.17-19)

²³ Mã askafaxõ afe foafono nõ Galilea anoafõ kafãsakĩ Niospa meka ato yoini. Judeofãfe ichanãti pexe mãraxõ Jesús ato Niospa meka shara yoisharakĩ iskafani: “Itipinĩsharakãfe. Nios nonoax mãto xanõfo ipai kikĩ,” ixõ ato yoifofãsafani. Askatari a isinĩ ikaifo fetsa fetsatapafo ato sharafãpani.

²⁴ Askafaano nikakaxõ Siria mai anoafõ isinĩ ikaifo akiki efenifo ato sharafapanõ. Isinĩ ikaifo fetsa fetsatapafo akiki efenifo. A yõshi chaka ãto mãra naneaforti ato sharafani. A nĩsoaifori efeta, a finimismaforti efeta, a chatofori efenifo. Ato keyokõi sharafapani. ²⁵ Askafaito yorafã rasichi chĩfafainifo.

Atiri Galilea anoax fonifo, atiri Decápolis anoax fonifo, atiri Jerusalén anoax fonifo, atiri Judea anoax fonifo, atiri faka Jordán okirinoax fekāta Jesús chīfafainifo.

5

Machi mǎnǎnēxō Jesús ato yoini
(Lc. 6.20-23)

¹⁻² Yorafā rasi akiki feaifono ōi Jesús ato paxafāini kaax, machi pochini tsaoni. Tsaono āfe meka tāpipaimisfo akiki fenifo. Āfe meka nikai fekani. Akiki feafono ato yoikī iscafani:

³ “Fētsa āto shinā mēraxō shinākī iscafax: ‘Ēakai ē isharatiroma. Ē Nios yopakōi,’ ikaito Niospa inimamaxii māmāi Nios Ifo sharafaino āfe fakekōi inō.

⁴ “Fetsa shināmitsakōifiaino chipo Niospa noikī inimamaxii.

⁵ “Fetsa kakapaimisma imisno Niospa inimamasharaxii. ‘Keyokōi maitio atonā ixii,’ ixō Niospa yoyoni keskara atonāri ixii.

⁶ “Fētsa Niospa meka noikōikī Niospa ato imapaiyai keskara shara ipaikōikani, nā keskarafō Niospa ato inimamaxii.

⁷ “Fētsa fetsafori noikī ato sharafaito Niospa tāpia. Nāskakē ari Niospa noikī axosharapakenaka inimamakī.

⁸ “Fētsa Nios shināsharakī, āfe ōiti mēra afaa chaka shinātama Nios fisti shinākī chipo Nios ōixii. Nāskax inimakōixii.

⁹ “Akka noikaspa faatanāifono fētsafāfe ato raenā faano, nāfo Niospa ato yoikī iscafaxii: ‘Mā ēfe fakefo,’ ixō ato yoiaino inimakōixikani.

¹⁰ “Fētsa Nios Ifofasharapaiyaino, fetsafāfe ato omiskōimafiaifono, Epa Niospa kexesharakōiano nāskakē inimakōixii.

¹¹⁻¹² “Mā ea Ifokakē fetsafāfe mato īchakani, mato omiskōimayanā askatari matoōnoa meka chaka yoikani meka fetsa fetsatapafo. Nā mato chakafaifo keskafakīri mato xinifāfe nā Niospa meka ato yoixomisfori ato chakafapaonifo. Nāskakē inimasharakāfe eōxō matori chakafakani kiki. Mā askaito Niospa afara sharafo mato mekexona nai mēranoa mātonā inō,” ixō Jesús afe imisfo ato yoini.

“Mā tashi keskarata askatari mā pena keskara,” ixō a Ifofafo Jesús ato yoini

(Mr. 9.50; Lc. 14.34-35)

¹³ Anā Jesús ato yoini iscafakī: “Māfi nono mai anoax tashi keskaraki. Nāskakē shinākāfe. Tashi sharakē nō meetiro. Akka tashi sharayamakekai nō shara meetiroma. Nāskarakai tsoa pishta fichipaima. Mā paispakē anā nō pitiro. Nāskakē nō potatiro. Nāskarifiāi mā tashi keskara. Mā nono mai ano isharaino yorafāfe mato ōikani inimatirofo. Askafixō mā Nios anā Ifofasharayamaito matoōxō tsōakai tāpitirofoma Niospa meka shara. Mā tashi paispa keskarakē mato potatirofo. Iskafakī yoitirofo: ‘Mā chakafoki nonoax fotakāfe. Mā kai afaama,’ ixō yoitirofo.

¹⁴ “Nāskatari mā oa luz peeikai keskarakī. Akka pexe rasi māchi keya mǎnǎnēnoax onetiro. Chai ixō penakōi nō ōitiro. Nāskarifiāi matoōxō yorafāfe xafakīa eōnoa nikatirofo. ¹⁵ Nāskafakīri tsōakai fakishaino ōipafikī luz fepotiro. Tapo kamaki luz ōtaxō kēsho fepotiro. Askatamaroko tapo kamaki fomākīa nō ōtaxō tsāotiro a pexe mēra ikafāfe ōisharanōfo. ¹⁶ Nāskarifiāi isharakāfe. Mā askaito mato ōikakī tāpitirofo mā eōnoax xafakīa isharakē. Askata māto Epa Nios nai mēra ikano aōnoa yoikī iscafaxikani: ‘¡Aicho! Na yorafo Niosnoax isharakōimisfo. Āto Nios sharakōi,’ ixō yoixikani,” Jesús ato fani yoikī.

Jesús ato yoini a Niospa shināmanaino Moisés keneniōnoa nikasharakōinōfo

¹⁷ Anā Jesús ato yoini: “Mā shināiraka iskafakī: ‘A Moisés Niospa shināmanaino keneni, askatari a Niospa meka yoimis fetsafāferi kirika kenenifo afo Jesús noko nikamakaspai,’ ixō mā shināiraka. Anori shināyamakāfe. Ēkai Moisés feta a Niospa meka yoimis fetsafāfe kenenifo keskara ē potayoi onima. Askatamaroko nā kenenifo keskara ē ato tāpimaxii ē fotoni nai mēranoax. ¹⁸ Akka ē mato xafakīa yoi. Ea nikasharakāfe. Nai fe mai keyoyoamano a Moisés yoini keskara tsōa fetsafatiroma. Askatari afaa nō potatiroma. Akka mā keyokōi mitokomeano, mai fe nai keyoxii. Mā afama mīshtifo keyoano nō anā Moisés mekari nō yopaxima. ¹⁹ Akka fētsa Moisés meka nikasharayamaxō fetsafori ato meka chaka tāpimanaino nikakaspamisfo a Moisés keneni keskara. Nā feronāfake Epa Nios ika ariax anā afaa itiroma. Nāskafekē fētsa Niospa meka nikasharataifakī fetsafori Niospa meka xafakīa yoi ax Epa Nios ika anoax afe xanīfo itiroki. ²⁰ Askano nā fariseofo fe a Moisés yoikī kirika keneni keskara ato tāpimamisfo, ‘Nōfi sharakōi,’ ifiamisxakakī Niospa yoini keskara keyokōi nikafoma. Akka a Moisés yoikī keneni keskara nikakōikanaxma tsoa Epa Nios ika ari nokotirofoma,” ixō Jesús ato yoini.

*“Ōitifishkiyamakāfe,” ixō Jesús ato yoini
(Lc. 12.57-59)*

²¹ Anā Jesús ato yoini iskafakī: “Mā mā nikamiskī a Moisés nōko xinifo ato yoipaoni keskara. Iskafakī ato yoini: ‘Tsoa reteyamakāfe. Mā fetsa retekē xanīfofo ano mato iyotirofo matori kopikiri retematirofo,’ ixō nōko xinifāfe yoinifo. ²² Mēstekōi anori yoifinikē ē mato meka fetsari mēstekōi yoinō. Ea nikasharakāfe. Fētsa fetsa īchaito mī xanīfofo ari iyotiro a omiskōimanō. Askatari fētsa fetsa chakafai iskafakī: ‘Mī afaa tāpiama. Mī tatimakōi,’ faito Niospa a omiskōipakenakafo mēra chiifā mēra potatiromo anoax omiskōipakexanō.

²³⁻²⁴ “Nāskakē mā Nios kīfiti pexefā mēraxō mā kīfipaikī mā iskafaki shināino: ‘Ooa, ē fetsa chakafaa ē raefama,’ ixō shinākī, anā Nios kīfixoma nā mā Nios ināpaifafāinai fetsa ano koshi fotakāfe. Akiki nokoxō yoisharafe anā mikiki raenō. Nāskaxō anā mā Epa Nios kīfitiro.

²⁵ “Mā fetsa nimiano matoki oxō mato iskafatiromo: ‘Mī ea nimia. ¿Afetīa mī ea kopifaimē? Mī ea kopifayamaito ē mia xanīfo ano iyoikai,’ mato faito, xanīfo ano kayoxoma koshi raefakāfe. Akka mā askafayamaino xanīfo ano mato iyotiro. Mā mato iyoano xanīfāfe policia yoitiro iskafakī: ‘Na feronāfāke fetsa nimiakī kopifaamaki, karaxa mēra ikimafe,’ fatiro. ²⁶ Ē mato paraima. Fētsa mato karaxa mēra ikimanano mā fena tseketiroma. Akka nā mā nimia kopifatīa mā tseketiro,” ixō Jesús ato yoini.

“Māto āfikōima chotapaiyamakāfe,” Jesús ato fani

²⁷ Anā Jesús ato yoini: “Mā mā nikamis a nōko xini Moisés yoini keskara. Iskafakī ato yoini: ‘Māto āfima chotayamakāfe. Askatari kēromāri māto fenema chotamayamakāfe,’ ixō ato yoini. ²⁸ Nāskara chanīma. Nāskakē ēri mato yoi, fētsa āfe āfima ōikī āfe shinā mēraxō shināi: ‘Ē na kēro chotapai,’ ixō shinākī āfe shinā mēraxō chotai.

²⁹ “Akka māto fēro ōikī mā chakafatiromo. Nāskakē afara chaka ōiyamakāfe afara chakafaxikakima, nā nōko fero tsekaxō nō ōitiroma keskafakī. Mā māto chaka xateyamax omiskōipakenakafo mēra mā katiro. Akka mā māto chaka xateax mā Nios ika ari kaax mā afe ipaxatiromo. Askara shara. ³⁰ Nāskarifikī māto mēke kayakai aōxori mato afara chakafamakē, mextemekāfe. Mā askafax shara mā itiroki. Nāskarifikī māto chaka xatekāfe nā mā mextemea keskaraxō. Akka mā māto chaka xateyamax, nā omiskōipakenakafo mēra mā

katiro. Akka mā māto chaka xateax, Nios ari mā kaax afe mā ipaxatiro. Askara shara,” ixō Jesús ato yoini.

Feronāfake āfe āfi fe enēnātirofoōnoa Jesús ato yoini
(Mt. 19.9; Mr. 10.11-12; Lc. 16.18)

³¹ Anā Jesús ato yoini: “Nāskatari Moisés nōko xinifo yoini iskafakī: ‘Fētsa āfe āfi potaxikī a potayoxoma iskafatiro kirika kenexō: “Ē anā mia fipaima. Ē mia enekai,” ixō kenexotiro,’ ixō Moisés ato yoini. ³² Akka anori Moisés yoifinikē anā meka fetsari ē mato yoinō. Tsōa āfe āfi chotayamafiano, feronāfake āfe āfi eneano nā kēro feronāfāke fetsa fe chotanāi chakanai. Askatari feronāfake fētsa nā kēro fīax chakanai āfe āfikōima chotai,” ixō Jesús ato yoini.

“A mā yoiyomis keskara akāfe,” ixō Jesús ato yoini

³³ Askata anā Jesús ato yoini: “Mā mā nikamis a Moisés nōko xinifo yoini keskara. Ato iskafakī yoipaoni: ‘A mā Nios yoiyomis keskara axosharakāfe. A mā yoiyomis keskara Epa Niospa mā nikakī akka mā ayamano nā chakakōi itiro,’ ixō Moisés nōko xinifo yoini. ³⁴ Akka nānori ato yoifinikē, ēri mato yoisharanō. Nikakapo. Mā fetsafo yoiyomis keskara axosharakāfe. Iskafakī yoiyamakāfe: ‘A ē mato yoiyoa keskara ē axii. Ē mato yoiyoa keskara ē ayamaino Epa Niospa ea omiskōimatiro,’ ixō yoiyamakāfe. Askatari, ‘A ē mato yoia keskara ē akēma keyokōi nai mēraxō ea omiskōimatiro,’ ixō yoiyamakāfe. Akka nai mēranoax Epa Nios xanīfo finakōia iki. Nāskakē anori nō yoitiro. ³⁵ Askatari, ‘A ē mato yoiyoa keskara ē ayamaino nono mai anoafāfe ea omiskōimatiro,’ ixō anori yoiyamakāfe. Keyokōi mai ano Epa Niosnā. Askatari, ‘A ē mato yoiyoa keskara ē ayamaino a Jerusalén anoafāfe ea omiskōimatiro,’ ixō anori yoiyamakāfe. Nā Jerusalén nōko xanīfo finakōi Niosnā. ³⁶ Askatari, ‘A ē mato yoiyoa keskara ē ayamaino ēfe māpo ea omiskōimatiro,’ ixō yoiyamakāfe. Akka nōa nōko māpo shināxō nōko foo nō fetsafatiroma oxo inō, askatari fiso inō. Epa Nios fistichi askafatiro. ³⁷ Akka fetsafo parayamakāfe. ‘Ē mia axōikai,’ ixō axokāfe. Askatari, ‘Ē mia axōima,’ ixō axoyamakāfe. ‘A ē yoiyoa keskara ē ayamaino afaa ranā ea omiskōimatiro,’ ixō anori yoiyamakāfe. Mā askara yoikī mā chakafai,” ato fani.

“Tsoa kopiyamakāfe,” Jesús ato fani
(Lc. 6.29-30)

³⁸ Anā Jesús ato yoini iskafakī: “Mā mā nikamiski a nōko xinifo Moisés yoini. Iskafakī ato yoini: ‘Fētsa mato fero tsēkaito, kopikiri mā fero tsēkatiro. Askatari mato piti tēkaito, pitiri mā tēketiro,’ ixō Moisés yoini. ³⁹ Akka nōko xinifo anori yoifinifono, ē mato meka fetsa yoinō. Ea nikakapo ē mato yoinō. Fētsa mato chakafayanā mato tapasaito, ‘Takai fetsari ea afe,’ fakāfe mato tāpinōfo mā ato kopiyamaito. ⁴⁰ Fētsa mia xanīfo ano iyoxō mia rapati fīapayaito, ināfe fotanō. Mī chōpari ināfe. ⁴¹ Xanīfo iyamakī soraronō, ‘Ea pisha chaima foxōikafe,’ mato fafiaito, mā chai foxotiro. ⁴² Akka fētsa mato afarafo yōkaito inākāfe. ‘Ea ināyope,’ mato faito ināfe fīshkoyamakāfe,” ixō Jesús ato fani.

“Mato noikaspaifafono māroko ato noikāfe,” Jesús ato fani
(Lc. 6.27-28, 32-36)

⁴³ Anā Jesús ato yoini iskafakī: “Askatari mā mā nikamis a nōko xinifo yoipaonifo keskara. Iskafakī ato yoipaonifo: ‘Māto kaifo noikāfe. Akka a mato noikaspaifo ato kopikiri noikaspakāfe,’ ixō nōko xinifo yoipaonifo. ⁴⁴ Anori yoifinifono, akka ē mato yoi a mato noikaspaifo ato kopikima ato noikāfe. Askatari ato axosharakāfe. Askatari a mato omiskōimamisfo Epa Nios

ato kīfixokāfe. ⁴⁵ Mā askafai Niospa fake mā iki. Akka Niospa xini onifani yora chakafoya, yora sharafo ato chaxanō. Askatari oiri imani nā yora sharafoya a yora chakafori ato onifaxoni. Nāskakē māri a mato chakafaifoya a mato sharafaifo keyokōi ato noikāfe. Nāskax mā Niospa fake ikikai. ⁴⁶ Akka a mato noiaifos mā ato noia fetsafo noiyamata askarakai sharama. Akka yora chakafo a ato paraxō kori ichapa ato fīamisfori aska famis. Mā askaino Nios matoki inima. ⁴⁷ Mato fe yorafos mā noia askarakai afaama. Akka a Nios Ifofaaomari nāskarifiakani aa ranāri noinākani. ⁴⁸ Nāskakē Epa Nios nai mēraxō yorafo noiai keskafakī māri yorafo keyokōi noikāfe. A Epa Niospa shināsharamis keskafakī māri askafakāfe,” ixō Jesús ato yoini.

6

“Afaamaisfori ato noikī afara ato ināsharakāfe,” Jesús ato fani

¹ Anā Jesús ato yoini iskafakī: “Mā fetsafo sharafaino, ‘Nā feronāfake sharakōi ea fanōfora,’ ixō anori shināyamakāfe yorafāfe ferotaifi. Mā askaino yorafāfe, ‘Sharara,’ mato fafiaifono, akka Epa Nioskai matoki inimatiroma. Nāskaxō mato afaa inātiroma. ² Nā āa keparanāmisfo keskara iyamakāfe. Afāfe nōko kaifāfe ichanāti pexe mēraxō afaamaisfo afara ato ināmisfo, ‘Sharara noko fanōfora,’ ikaxō. Askatari fofāsakakī afaamaisfo ato afara ināfofāsafamisfo, ‘Noko yoisharanōfora,’ ikaxō. Akka askafiaifono Niospa ato afaa ināxima. ³ A afara yopaifo mā afara inākī toa yoyamakāfe tsōa tāpiyamanō. ⁴ Akka tsōa ōiyamaino a afaamaisfo mā ato ināino Epa Nios matoki inimani. Nāskaxō mato afara axosharatiro,” ixō Jesús ato yoini.

*“Epa Nios kīfikī iskafakāfe,” ixō Jesús ato fani
(Lc. 11.2-4)*

⁵ Anā Jesús ato yoini iskafakī: “Mā Epa Nios kīfiatīa a chanīmisfāfe kīfimisfo keskara iyamakāfe. Akka afāfe nōko kaifāfe ichanāti pexe mēraxō yorafāfe ferotaifi Epa Nios kīfimisfo: ‘Noko ōinōfora,’ ikaxō. Epa Nios shinātamaro ato ōimapaikani. Yorafāfe ato ōiaifono askamisfo. Akka Epa Nios atoki inima. Nāskakē ato afara shara ināxiima. ⁶ Akka māri ato keskara iyamakāfe. Mā Nios kīfikī tsōa mato ōiyamaino nānoxō Epa Nios kīfikāfe. Māto pexe kene mēra ikixō tsōa mato ōiyamaino nānoxō Epa Nios kīfikāfe. Akka yorafāfe mato ōiyamafaiino Epa Nios fistichi mato nikatiro. Nāskakē matoki inimai. Nāskaxō afara shara mato ināxii.

⁷ “Akka a Nios chanīmara faafāfema kīfimisfo keskayamakāfe. Nāfāfe mēxotaima nā meka fisti yoiri famisfo. ‘Nō na meka fisti yoirifaito noko Epa Niospa nikai,’ ixō shināmisfo. Askafiaifonokai Niospa a keskara meka nikapaima. ⁸ Akka māri ato keskara iyamakāfe. Mā Epa Niospa tāpiakī mā afara yopaito, mā yōkayoamano. ⁹ Akka mā kīfikī iskafatiro:

Epa Niosi, mī fisti sharafinakōia. Mī nai mēra ika. Nō mia noikōi. ¹⁰ Nai mēra mefe ikafo mī ato yoiaito mia nikakōimisfo. Akka nono mai anoxori nā mī noko amapaiyai keskara nō atiro. Na nono mai ano ikafāfe keyokōichi mia Ifofanōfo. ¹¹ Nā pena tii a nō piyai noko ināfafāife nō afaa yopayamanō. ¹² Nō afara chakafaito nōko chaka noko soaxōfe nā noko chakafaifāfe nō ato raefai keskafakī. ¹³ Nokoki Satanás chaka omayamafe, askakimaroko nomakinoa pōtafe nō nikayamanō,
ixō kīfikī iskafakāfe.

¹⁴ “Akka fetsafāfe mato chakafiaifono mā ato raefai keskafakī Epa Nios nai mēranoato mā fetsafo raefai keskafakī matori chaka soaxotiro. ¹⁵ Akka mā fetsafo raefayamaito Epa Niospari mato chaka soaxotiroma,” ixō Jesús ato yoini.

Foni tenemisfoõnoa Jesús ato yoini

¹⁶ Anã Jesús ato yoini iskafakĩ: “Ë mato yoiyonõ. Mã foni tenei oa shinãmitsai keskara mato femãnã iyamakãfe a ãa keparanãmisfo ikaifo keskai. Afãfe foni tenekani ãto femãnã shinãmitsai keskara ikani yorafãfe ato õikani. Askatari foaromekanima yorafãfe ato õinõfo. Nãskakẽ Epa Niosnoa shinãkanima. Askaifono Epa Nios atoki inima. Nãskakẽ ato afaa inãima. Akka mãri foni tenei ato keskara iyamakãfe. ¹⁷⁻¹⁸ Akka mã foni tenei mã Nios shinãyanã mã fechokometiro. Askatari fõxti mã foaromesharatiro. Nãskakẽ Epa Nios fistichi tãpitiro yorafãfe tãpiafomano. Mã askaito yorafãfe tãpitirofoma mã foni teneaito. Akka Epa Nios fistichi tãpitiro. Nãskakẽ Epa Nios matoki inimatiro. Askatari mato afara shara inãxii,” ixõ Jesús ato yoini.

“Epa Nios ika anoxõ afara sharakõifo mato mekexona,” ixõ Jesús ato yoini (Lc. 12.33-34)

¹⁹ Anã Jesús ato yoini iskafakĩ: “Nono mai anoxõ afama mĩshti ichapa mekeyamakãfe. Mato nakaxa pãaino mã fenotiroki. Askatari chakanai fetsetiro. Askatari yometsofo mato pexe mẽra ikixõ mato afama mĩshtifo keyokõi mato fãano mã fenotiro. ²⁰ Akka afama mĩshti noitama Nios noikãfe. Nã mato yoini keskara akãfe. Mã akiki nokoaito nã mato afara sharakõi mekexona mato inãxii. Akka ono nai mẽraxõ afama mĩshti mato mekexona, a nakaxa mato pãatiroma. Askatari chakanaima. Askatari anã mato pexe mẽra ikiax tsoa yometsotiroma. ²¹ Akka mato afama mĩshtifo noikĩ mã shinãfafãini. Nã mato afama mĩshtifo mã shinãfafãinai keskafakĩ Niosri shinãfafãikãfe, a noikĩ yonoxosharakãfe,” ixõ Jesús ato yoini.

“Nõko õiti sharakẽ nõ shinãsharakõitiro. Akka nõko õiti chakakẽ nõ shinãsharatiroma,” ixõ Jesús ato yoini (Lc. 11.34-36)

²² Anã Jesús ato yoini iskafakĩ: “Anã ã mato meka fetsari yoinõ mã tãpikõinõ. Akka nõko fero rafeta nã rãparinĩ chai chaxai keskarakẽ, nõko yora shara itiro. Nãskarifiã nõko fero sharano nõ xafakĩã õisharatiro. Nãskatari nõ isharakõitiro. ²³ Akka nõko fero chakakẽ nõ õisharatiroma. Fakishkõi itiro. Nãskarifiãkĩ nõko õiti mẽraxõ nõ chaka shinãkĩ nõ afara chakafamis nõ itiro. Akka õisharakãfe. Mã Epa Nios shinãi xafakĩã ifiaxõ ãfe meka kachikiri faxõ mã anã xafakĩã shinãtiroma. Fakish keskara mã itiro,” ixõ Jesús ato yoini.

“Nõko afama mĩshti noisharatama nõ Nios noisharakõitiro,” Jesús ato fani (Lc. 16.13)

²⁴ Anã Jesús ato yoini iskafakĩ: “Tsõa ãfe ifo rafe yonosharaxotiroma. Fetsa noikaspata, fetsa noisharatiro, nã yoiã keskarakõi axotiro, akka a fẽtsa amapaiyã keskara axotiroma noikaspatiro. Nãskarifiãkĩ mã kori fisti shinãkĩ mã Nios shinãtiroma. Nãskatari Epa Nios fisti shinãkĩ mã kori noitiroma,” ixõ Jesús ato yoini.

“Epa Niospa ãfe fakefo kexesharamis,” ixõ Jesús ato yoini (Lc. 12.22-31)

²⁵ Anã Jesús ato yoini iskafakĩ: “Anã ã mato yoisharanõ. Ea nikasharakãfe. Shinãchakayamakãfe. Nõ afaa piyamata, afaari nõ ayaima iyamakãfe. Askatari afaari nõ safeima ixõ shinãchakayamakãfe. Akka a nõ piaitokai noko imasharatiroma. Askatari a nõ safeatori nõko yora noko imasharaxotiroma. ²⁶ Akka shinãkapo. Peyafãfe afaa fanamisfoma. Afaari topimisfoma. Askaxori afaa mekemisfoma. Nãskafekẽ Epa Niospa ato pimamis. Akka nã peyafõ afaayamafoiakẽ Epa Nios nai mẽra ikato ato pimamis. Akka Niospa mato noikĩ nã peyafõ finõmainĩfofã mato kexesharakõimis. ²⁷ Nãskakẽ, çafeskakĩ

mã shinãchakaimẽ? A nõ shinãchakaitokai pena fisti noko anã nimatiroma. Nãskakẽ afaa shinãchakayamakãfe.

²⁸ “Askatari iskakĩ shinãyamakãfe: ‘Ooa. ¿Fanã ã rapati fitiromẽ safexiki?’ ixõ anori shinãyamakãfe. Akka shinãkapo afeskax charofo foaikamakĩ. Nã charofãfe yonokanima. Askatari xapo toro atirofoma rapati faxikakĩ. ²⁹ Nãskafiax charofo sharamĩshti foaikani. Nãskarari xanĩfo Salomón rapati sharafinakõia safefixõ nã charofo finõama. ³⁰ Akka Niospa nafefo sharashtafo onifani. Sharafiano nõ sepakĩ xateano natiro. Nãskaxõ nõ koofatiro. Akka Niospa nafefo finõmainĩfofã mato noikĩ mato rapati safematiro mato kexesharaxõ. Akka mã shinãchakakĩ mã Nios chanĩmara fasharaima. ³¹ Nãskakẽ shinãchakayamakãfe. Shinãkĩ iskafayamakãfe: ‘Ooa. Ë fonãiki a ã piã keyoano, a ã ayairi keyoano koriyaxomari ã afaa safeima,’ ixõ anori shinãchakayamakãfe. ³² Akka nã Nios Ifofaifãfema iskara shinãmisfo. A piã fisti shinãkata, a safepaiyaifori shinãmisfo. Akka Epa Niospa mã mato tãpia afarafo mã yopaito. ³³ Nãskakẽ Nios mãto xanĩfoõnoa shinãkãfe. A Niospa mato amapaiyai keskara nãskara fisti shinãkõikãfe. Mã askafaito afara fetsa mã yopaito Epa Niospa mato inãxii. ³⁴ Nãskakẽ shinãchakayamakãfe. Yoi iskayamakãfe: ‘Ooa. Ë tãpiama penama afara chaka afeskara afiaino. Ë nã keskara tenetiroma,’ ixõ shinãyamakãfe. Shinãkĩ iskafakãfe: ‘Epa Niospa na penata ea kexesharamis keskafakĩ penamari ea kexesharai,’ ixõ nãnori shinãkãfe,” ixõ Jesús ato yoini.

7

*“Fetsafo mekafakĩ chakafayamakãfe,” ixõ Jesús ato yoini
(Lc. 6.37-38, 41-42)*

¹ Anã Jesús ato yoini iskafakĩ: “Mẽxotaima fetsafo mekafayamakãfe iskafakĩ yoikĩ: ‘Naato afara chakafakĩ Niospa omiskõimapainõ,’ fakĩ. Akka mã ato askafayamaino Niospari mato mekafatiroma iskafakĩ yoikĩ: ‘Na yorafo chakafo,’ mato fatiroma. ² Akka mãri nãato akai keskafakĩ afara mã chakafaito, matori Niospa omiskõimaxii. Akka mã fetsafo afara inãsharakẽma Niospa matori afaa ichapa inãxima, mã ato afara inãsharakõikẽma. ³ ¿Afeskakĩ ifi pasta pishta fetsa feronaki ikano mã õimẽ, mãroko ifi pasta efapa feostamefixõ? ⁴ Akka, ¿mã shinãimamẽ a mã ifi pasta efapa feostamea? Akka, ¿afeskakĩ mã fetsa iskafaimẽ?: ‘Yamã, ã mia fixonõ a mã ifi pasta pishta fero naki ika,’ fakĩ, mãkõi mã kakamepaimis. Mãkai afaa tãpiama. ⁵ Nãskax mã chanĩkõi mã ato parapaimis. Akka ã mato yoinõ ea nikakapo. Akka mãto fero mẽranoa a ifi pastafã mã feostamea tsekayokãfe. Nãskaxõ õisharakĩ, a fetsafo ifi pasta pishta feronaki ika mã tsekaxotiro. Nãskarifikĩ mãto chaka xateyamaxõ mã fetsafo chaka xatematiroma. Akka mãto chaka xatexõ fetsafo mã chaka xatematiro.

⁶ “Ë meka fetsari mato yoinõ mã tãpinõ. Paxta põfe nõ namĩ shara inãpaiaino noko keyotiro mifiki. Askatari kochi nõ afara shara inãino peama peamakĩ chakana fatiro. Nãskari fakĩ yorafãfe Niospa meka shara nikakaspakĩ chakafatirofo, Epa Nios chakafakĩ mekafakakĩ. Askaifono Epa Niospa meka shara anã ato yoipaiyamakãfe,” ixõ Jesús ato yoini.

*“Nõ Epa Nios afara yõkaito noko inãtiro,” ixõ Jesús ato yoini
(Lc. 6.31; 11.9-13)*

⁷⁻⁸ Anã Jesús ato yoini iskafakĩ: “Nãskakẽ ã mato yoi, afara fichipaikĩ Epa Nios yõkakãfe mato inãi kiki. Fena fena kakĩma manakãfe nã Epa Niospa mato inãitã. Nãskakẽ Epa Nios kĩfifafãikãfe mã kĩfiato mato inãi kiki. Akka nã yõkai Epa Niospa afara shara inãxii. Nãskarifikĩ fẽtsa afara shara fenaito Epa Niospa fichimatiro. Nãskarifikĩ fẽtsa Epa Nios kĩfiato inãsharakõixii.

⁹ “Akka mātō fake mato yoa yōkaito, ĵmā tokiri inātīromē? Maa. Mākai mātō fake mā askafatiroma. ¹⁰ Askatari, ĵmātō fāke mato foe yōkaito mā rono inātīromē? Maa. Mākai mātō fake mā askafatiroma. ¹¹ Akka mā chakafixō mātō fakefo kexesharaxō afara sharafo mā ato inātīro. Nāskarifikā Epa Nios nai mēranoato mā afara yōkaito mato kexesharakatsaxakī afara sharafo mato ināsharaxii nā nai mēraxō mato mekexona.

¹² “Nā mā fichipaiyai keskafakī fetsafāfe mato axosharaifono, nāskarifikā māri fetsafo axosharakāfe. Moisés feta a Niospa meka yoimisfāfe nānori yoinifo kirika kenekakī,” ixō Jesús ato yoini.

Fepoti pishtaōnoa Jesús ato yoini
(Lc. 13.24)

¹³ Anā Jesús ato yoini iskafakī: “Meka fetsa ē mato yoinō. Nikakapo. Fepoti rafe iskarakī: Fepoti fetsa pishtaki nā fepoti pishta ikikāfe. Akka nā fepoti fetsa efapa. Nā fepoti efapato fai efapa kaa. Nāskakē nā fai efapato yora ichapa fomisfo a omiskōipakenakafo mēra. ¹⁴ Akka fepoti pishta ano fai kaa, pishta fekax. Nā fai Nios ano nokoa nā fai atsō pishtakōi. Nāskakē ichapama aō fomisfo,” ixō Jesús ato yoini.

Ifi āfe fimioxō nō tāpitiro afe keskaramākī
(Lc. 6.43-44)

¹⁵ Anā Jesús ato yoini iskafakī: “Ōisharakāfe, a chanīaifāfe mato paratirofokī: ‘Nō Niospa meka yoimis,’ ixō mato paratirofo. Afāfe Niospa meka yoimisfomaki. Akka afofi ovejafo keskarafō fikanax akka āto shinā mēra poomā pōfēfo keskarakōifo. Nāskakē ato fishtayamakāfe. ¹⁶ Akka mā tāpitiro afaa afeskafakanimākai. Akka ifi āfe fimioxō nō tāpitiro afe keskaramākī. Xopa foaikī moxaya foaitiroma. Askatari kachafi moxaya foaitiroma. Nāskaxō nō tāpitiro moxayafo ōikī xopakairokokē. Nāskarifikā nō tāpitiro kachafimāi moxayakē. ¹⁷ Akka ifi shara fimi sharaya itiro. Akka ifi chaka fimi chakaya itiro. ¹⁸ Nāskakē Ifi shara fimi chakaya itiro. Ifi chakari fimi sharaya itiro. ¹⁹ Akka ififo fimi sharaya iyamaito ifāfe reraxō koofatiro. ²⁰ Nāskakē a ato tāpimamisfoōnoa mā ato tāpitiro sharafo iyamakani chakafo itirofo,” ixō Jesús ato yoini.

“Akka keyokōi fotirofoma Epa Nios ika ano. Fisti rasi fotirofo,” ixō Jesús ato yoini

(Lc. 13.25-27)

²¹ Anā Jesús ato yoini iskafakī: “Akka yora ichapato yoimis iskafakakī: ‘Jesús, mī ēfe Ifokōi,’ famisfo. Nāskafikaxō atirito ea Ifofamisfoma. Nāskakē ēfe Epa Nios ika ari nokotirofoma. Ēfe Epa nai mēra ikato nā ato amapaiyai keskara akatsaxakakī nāfo ēfe Epa ari nokotirofo afe ipaxakakī. ²² Akka mā mai keyoaino nā onifanifo tii keyokōi Niospa ichanāfaxii. Nā nikakaspamisfo tii omiskōipakenakafo mēra ato potaxii. Nāskakē yora ichapafāfe ea yoikani iskafakakī: ‘Ifo, shināpo. Nō mī aneōxō nō yorafo yoimis. Mī aneōxori nō a niafaka chakafo yorafo mēra nanea nō ato makinoa potamis. Mī aneōxori nō afama mīshti famis yorafāfe atiroma keskafakī. Noko shināfe, Ifo,’ ixō ea yoixikani. ²³ Askaifono ē ato xafakīa yoixii iskafakī: ‘Mākai efe yorama. Māfi ato pāramiski. Afara chaka fisti mā famiski. Emakinoax fotakāfe,’ ē ato faxii,” ixō Jesús ato yoini.

Pexe rafeōnoa Jesús ato yoini
(Mr. 1.22; Lc. 6.47-49)

²⁴ Anā Jesús ato yoini iskafakī: “Akka nā ea nikaito nā ē yoiai keskara aki, nā yōra pexe fakī tāpixō mai chai pōkixō mai teikī pexe kishi nīchitiro

keskafakī. ²⁵ Akka oi ikaino, pexe nāmā faka faitiro. Askatari nēfefakī pexe afeskafatiroma. Nāskakē pexe paketiroma mā mai teikōikimāi pexe kishi niano. ²⁶ Akka nā ē yoiaito ea nikafikī a ē yoiai keskara nikaima, askara yora nā yora tatimato pexe fakī mashi ano pexe fatiro keskarakōi. ²⁷ Akka oi ikaino faka faitiro. Askatari nēfefakī pexe potatiro. Nāskax pexe chakanatiro. Nāskarifiakī fētsa ēfe meka nikafikī ea nikaima afofi fenoi fetsekani. Nāskakē omiskōipakenakafo,” ixō Jesús ato yoini.

²⁸⁻²⁹ Nāskata mā Jesús mekai xateano yorafāfe nikakaxō, “¡Kee! Nikakapo. Nato tāpikī finakōia, a Moisés yoikī kirika keneni keskara ato tāpimamisfo keskarama, meka sharakōi nato yoi,” fanifo.

8

Jesús yora rashkishiai sharafani

(Mr. 1.40-45; Lc. 5.12-16)

¹ Askata Jesús ato yoikī xateta māchi keya ariax tisirimepakeaito yorafāfe chīfafainifo afe fōkakī. ² Jesús kaino feronāfake isinī iki rashkishi fetseax Jesúski oni. Akiki oxō ratokonō mai chachipakefofā yoini iskafakī: “Ifo, ea sharafapaikī mī ea sharafatiro,” fani. ³ Askafaino Jesús āfe mēkemā ramāyanā yoini iskafakī: “Ē mia sharafanō. Iskaratīa mī sharaikai,” faino, a rashkishi fetseai koshiakōi sharatani. ⁴ Mā sharano Jesús nīchini iskafakī yoianā: “Mī tsoa yoiki. Akka nā ato Nios kīfixomis ispatāfe. Nāskaxō ovejanā fake foxō ināfe mia retexonō Moisés yoini keskafakī. Nāskaxō keyokōichi tāpinōfo a mī isinī imis mā mī sharano,” ixō Jesús yoini.

Jesús sharafani romanō xanīfāfe āfe ina yonaito

(Lc. 7.1-10)

⁵ Askafafāini Capernaúm ano kani. Nāno akiki soraro xanīfo nokoni a yonoxomis sharafamapai. ⁶ Nokoxō yoini: “Ifo, a ea yonoxomis isinī iki. Ēfe pexe ano rakax omiskōiferoikima,” fani.

⁷ Askafaino, “Ē kanōkī sharafaxikī,” fani.

⁸ “Ifo, ēkai afama. Akka mī tsoa keskarama. Mī finakōiakī ēfe pexe ano kayamafe. Mī mekapa a ea yonoxomis ea sharafaxōfe nonoxō. ⁹ Akka eari ēfe xanīfāfe yonomamis. Ēri sorarofō yonomatiro. ‘Katāfe,’ ē faino karisatiro. Askatari, ‘Ekeki ofe,’ ē faino ekeki orisatiro. Nāskakē a ea yonoxomis afara ea axōfe ē faino ea axotiro. Akka mī afama mīshti fatiroki. Mī mekapa a ea yonoxomis ea sharafaxōfe,” ixō yoini.

¹⁰ Askafaito nikakī a afe foafo Jesús ato yoini: “Kee, nikakapo. Na feronāfake israeliyamafixō ea chanīmara fakī finakōi fetsafo keskarama. Akka Israel anoafāfe ea iskafamisfoma chanīmara fakakī. ¹¹ Ē mato xafakīa yoinō. Na maitio ano ikafo Nios chanīmara fakanax nōko xinifo Abrahamnō Isaacnō Jacobonō ichanāxikani Nios yorafo ixikakī. ¹² Akka atiri nōko kaifo nā israelifo Niospa afe yorafo ato imapaiaino chanīmara fakanima. Nāskakanax Nios ika ano nokotirofoma. Niospa ato fakishifā mēra potaxii. Anoax eaiyanā fasi omiskōixikani,” ixō Jesús ato yoini.

¹³ Nāskata Jesús yoini soraro xanīfo: “Mī pexe ano katāfe. Mī ea chanīmara faino a mia yonoxomis mā sharaki,” fani.

Jesús Pedro rayos sharafani

(Mr. 1.29-31; Lc. 4.38-39)

¹⁴ Askata Jesús Pedro pexe ano kani. Nāno Pedro āfe rayos yōxafo yonai oxati kamaki raka ini. ¹⁵ Jesús ōikī āfe mēkemā ramāni. Ramāino āfe yona

matsirisatani. Mā Jesús sharafaano anā yonanima. Mā sharaxō fininākfāta Jesús pimani.

A isinī ikaifo Jesús ato sharafani
(Mr. 1.32-34; Lc. 4.40-41)

¹⁶ Nāskano mā xini kaino a isinī ikaifo Jesúski efenifo ato Jesús sharafapanō. Atiri a niafaka chakafo ato mēra nanea Jesús āfe mekapa ato makinoa pōtapakeni. Keyokōi Jesús ato sharafapani. ¹⁷ Nānōri Niospa meka yoimisto Isaías a inōpokoai yoikī kirika kenekī iskafani: “Nō isinī imisno Cristo mā noko sharafaa. Askatari nā noko pāefaifo nomakinoa mā noko potaxona,” ixō Isaías kirika keneni keskara Jesús ani.

A afe fopaimisfoōna Jesús ato yoini
(Lc. 9.57-62)

¹⁸ Askata Jesús ōini yorafā rasi akiki feaifāfe. Askaifono aōxō tāpimisfo yoini iskafakī: “Okiri nō ĩamāfā pokefainō fokāfe,” ato fani. ¹⁹ Akka Jesús kayoamano a Moisés yoikī kirika keneni keskara ato tāpimamis akiki oxō yoikī iskafani: “Maestro, ěri mefe kapai nā mī kai ari ěri mefe kafāsaxiki,” faito, ²⁰ Jesús kemani: “Akka maxoteneroa kiniya, peyafori naayafo akka ěkai peze yama,” fani.

²¹ Askatari a afe kafāsamis fētsa iskafakī yoini: “Maestro, ea nīchiyofe ěfe epa naito ě maifayotanō. Chipo mia Ifofaxiki,” faito, Jesús kemani: ²² “Iskaratīa ea Ifofafe. Akka nā ea Ifofaafāfema yora nakē maifatirofo,” ixō Jesús yoini.

Jesús nefe yafi ĩamāfā poo iki meseniaito nishpa fani
(Mr. 4.35-41; Lc. 8.22-25)

²³ Nāskata Jesús kanōanāfānē naneinīkfāni aōxō tāpimisfori afe naneinīfofānifo. ²⁴ ĩamāfā pokefainafono atoki nēfefā nokoni. Jesús kanōanāfā xaki mēra rakax oxano nefeyanā ĩamāfā poo ini. Kanōanāfā faka fospikōini. ²⁵ Askaino aōxō tāpimisfāfe mōinifo iskafayanā: “ĭlfo, mā nō āsaikai! ĭNō āsayamanō moife!” fanifo.

²⁶ Askafaifono, Jesús ato yoini: “ĭAfes kai mā rateimē? Mā ea chanīmara fasharama. Nāskakē mā ratei,” ato fani. Ato askafata, fininākfāta fāsikōi, “ĭNēfe, nishpafe!” fata, “ĭĩamā, nishpafe!” fani. Askafaino anā ĩamāfā feroinima. ²⁷ Askafaito ōikani yoinānifo: “ĭKeel! ĭNa feronāfake afe keskaramē na nefe feta ĩamāfānē ato yoiāito nikaifo?” ikanax yoinānifo.

Feronāfake rafeta Gadara mai anoxō niafaka chakafo nanea-fono Jesús ato makinoa potani

(Mr. 5.1-20; Lc. 8.26-39)

²⁸ Askata Jesús okiri ĩamāfā aōxō tāpimisfo feta pokefainax Gadara mai ano nokonifo. Nāno feronāfake rafe niafaka yōshi chaka nanekanax Jesúski nokonifo kinīfā mēranoax. Nā rafe mesekōi ipaonifo. Nāskakē yorafāfe a ikafo ano tsōa ato finōtiroma ipaoni atoki mesekakī. Nā maiyafo ano nā rafe ipaonifo. ²⁹ Nāskakē Jesús fichikanax fāsikōi fiisiyanā yoinifo: “Mīfi Niospa Fakeki. Akka, ĭmī noko afeskafaiyoamē? ĭMī noko omiskōimaniyoamē?” Jesús fanifo.

³⁰ Askafaifono chaimaxō kōchifā rasichi pinifo. ³¹ Nāskakē niafaka chakafāfe Jesús iskafanifo: “Mī nā feronāfake rafe makinoa mī noko potaimākai kochifo mēra noko nīchife,” faifono, ³² “Fotakāfe,” Jesús ato fani. Nāskax niafakafo feronāfake rafe makinoax tsekekanax kochifo mēra iknifo. Nāskakē kochi rasi ichoax ĩamāfā mēra keyopakeni. Nāskax āsai fetseni.

³³ Askaito ōikani a kochifo kexemisfo ichonifo. Mā pexefo tii ano nokokaxō ato yoinifo: “Nā feronāfake rafe nā niafaka naneafo rafe mā Jesús ato

makinoa ni afaka pōta. Askatari nōko kochifo mēra ikimanano keyokōi nāfoya nōko kochifo ĩamāfā mēra keyopakeax āsai fetsea,” ato fanifo. ³⁴ Ato yoiaino nikanax keyokōi nā pexefo tii anoax Jesúski fenifo. Akiki nokokaxō yoinifo: “Na nōko mai anoax katāfe,” fanifo.

9

Jesús yora finimisma sharafani (Mr. 2.1-12; Lc. 5.17-26)

¹ Askata Jesús kanōanāfā mēra nanekaini. ĩamāfā okiri pokefaini kaax āfe mai ano nokoni. ² Nāno ikano a feronāfake finimisma yorafāfe akiki efenifo āfe ratatinī rataxō Jesús sharafanō ikaxō. Jesús ōini shināifāfe iskakakī na finimisma Jesús sharafai kiki ikaxō. Nāskakē a finimisma Jesús iskafani: “Efe yorashta, inimafe. Iskaratīa mē mia chaka soaxonaki,” fani.

³ Askafaino a Moisés yoikī kirika kenei keskara ato tāpimamifāfe atirito nikaxō āto shinā mēraxō shinānifo iskakakī: “Natokai ato chaka soaxotiro. Nios fistichi ato chaka soaxotirokī. Akka nato noko feparapai, ‘Ē Niosra’ noko fapai,” ixō āto shinā mēraxō shinānifo. ⁴ Askaifono Jesús tāpixō a shināifo keskara ato yoini: “¿Afeskakī mātō shinā mēraxō mā chaka shināimē? ⁵⁻⁶ Ēfi Cristokī ē yorafo ato chaka soaxotiro. Akka, ¿ē afaa fatiromē? Mē mia chaka soaxona ē fatiroraka. Askatari ē mia sharafaa ē fatiroraka,” ato fani. “Akka ē mato tāpimanō ē Niosxō mato chaka soaxotiro nono mai anoxō.” Nāskata Jesús a feronāfake finimisma yoini: “Fininākfata mī rakati fifaini mī pe xe ano katāfe,” Jesús fani.

⁷ Jesús askafaino a finimisma fininākfata āfe pe xe ano kani. ⁸ Askaito ōikani yorafo ratei fetsenifo. “¡Kee, ōikapo! Nios tsoa keskarama. Fāsi sharakōi. Nō ōimisma keskara mā noko rama ōimana. Niospa Yōshi Sharaōxō na feronāfake finimisma Jesús āfe mekapa mā sharafaa. Askatari āfe chakari mā soaxona,” ikanax yoinānifo.

Jesús Mateo ifini aōxō tāpimis inō (Mr. 2.13-17; Lc. 5.27-32)

⁹ Jesús nānoax kakī feronāfake fisti fichini, āfe ane Mateo, * āfe xanīfo kori fixōi tsaokē. Nāskaito Jesús yoini: “Efe kofe ē mia tāpimanō,” faino Mateo fininākfā Jesús fe kani.

¹⁰ Nāskafaito Mateo Jesús iyoni āfe pe xe anoxō pikikakī. Askatari a yora chakafori afe inifo a xanīfo kori fixomisfo. Nāfāfe āa chanīxō kori finōmainīfofā fimisfo inifo. Askatari a yora fetsafo chakafamisfori fekanax akairi mīsa ano Jesús fe tsaonifo a feta pixikakī. Jesúsxō tāpimisfori nāno ato fe tsaonifo ato feta pixikakī. ¹¹ Askaito ōikakī fariseofāfe Jesúsxō tāpimisfo yōkanifo: “¿Afeskakī mātō maestro nā ato kori fixomisfo feta piimē, a yora fetsa chakafo fetari pii?” fanifo.

¹²⁻¹³ Askafaifāfe nikakī Jesús ato yoini: “A sharafāfe notoro fenakanima. Akka nā isinī ikaifāfe notoro fenakani. Nāskafakīri yorafāfe yoimisfo iskakakī: ‘Ēkai afaa chakafamisma. Nāskakē ē afaa yopaima ēfe chaka ea soaxonō,’ imisfo. Nāskakē ē ato chaka soaxotiro. Akka fetsafāfe yoikī iskafaifono: ‘Ē afara chakafamis. Nāskakē a ē imis keskara ē anā ipaima,’ ikaifono ē ato chaka soaxotiro. Akka nā nō sharakōi ikaifoōnoax ē onima. Akka ē oni a yora chakafo āto chaka ato soaxoxiki. Akka ē mato yoipai mā tāpinō a Niospa ato shināmanaino iskakakī kenenifo: ‘Mā yoināfo retexō ea ināxiki mā koamis

* 9:9 Mateo ane rafeya ipaoni. Āfe ane fetsa Leví.

māto chaka soapaikī, askara ē fichipaima. Akka ē fichipai fetsafo mā ato noikī mā ato sharafaxōaito, ixō kenenifo.

“Akka ē onima a yora sharafoōnoax. Askatamaroko a yora chakafoōnoax ē oni ato chaka soaxoxiki,” ixō Jesús ato yoini.

Nā foni tenemisfofāfe Jesús yōkanifo
(Mr. 2.18-22; Lc. 5.33-39)

¹⁴ Juan āfe inafō fēkaxō Jesús yoinifo iskafakakī: “Fariseofāfe foni tenekī feyafamisfo Nios shinākakī. Nōri askafamis foni tenekī Nios shinākī. Akka, ĵafeskakī mīōxō tāpimisfāfe foni tenekanimamē?” fanifo.

¹⁵ Askafaifāfe Jesús ato kemani: “Feronāfake āfiyaino, yorafo ano fisti ichanākaxō afara fetsa fetsatapafō afeta pitirofo inimayanā, aicho fakakī akiki inimakakī. Nā kēromā āfe fene ano ato fe ikano tsōa foni tenetirofoma inimakakī. Akka mā fene rēteafono afe yorafāfe shinākakī foni tenetiro,” ixō Jesús ato yoini.

¹⁶ “Tsōa sama fenaya sama xini kishi fatiroma. Nō askafaino sama fena samama chakanatiroma. Nāskatari sama fena fe sama xini isharatiroma. Nāskakēri nā ē mato yoiai keskara mā nikakōixō a mā ipaoni keskara anā mā itiroma māmāi ea nikakōiax. A mā ipaoni keskara shināmakita nāskax māto yora fena keskara shara itiro. ¹⁷ Nāskarifikī tsōa māmā fata koiro pisha xini mēra nanetiroma nā māmānō faraxakaino toxamāiyanō. Nāskakē nā māmā fata fe koiro pisha chakanatiroma. Akka nā māto xinifāfe mato yoimisfo keskara fe nā ē mato yoiai keskara ōsinātiroma. Nā ē mato yoiai keskara Niospa meka sharakōi. Akka a māto xinifāfe mato yoimisfo anori shināx mā isharatiroma. Niospa mekaya meka chaka ōsinātiroma. Nāskakē mā nikapai fi mā shināsharatiroma. Nāskarifikī tsōa māmā fata koiro pisha xini mēra nanetiroma nā māmānō faraxakaino toxamāiyanō. Nāskakē nā māmā fata fe koiro pisha chakanatiroma. Akka nā māto xinifāfe mato yoimisfo keskara fe nā ē mato yoiai keskara ōsinātiroma. Nā ē mato yoiai keskara Niospa meka sharakōi. Akka a māto xinifāfe mato yoimisfo anori shināx mā isharatiroma. Niospa mekaya meka chaka ōsinātiroma. Nāskakē mā nikapai fi mā shināsharatiroma,” ixō Jesús ato yoini.

Jairo fake xotofake mā nakē Jesús otofani. Askatari kēromāri Jesús rapati mēeax sharani
(Mr. 5.21-43; Lc. 8.40-56)

¹⁸ Nānori Jesús ato yoiaino judeofāfe xanīfo nokoni. Jesúski nokoxō xanīfāfe a nāmā ratokonō mai chachipakefōfā yoini: “Ēfe fake xotofake rama naa. Akka mī kaxō mī mēkemā mī ramāino anā ototiro,” xanīfāfe Jesús fani.

¹⁹ Askafaino Jesús finināfata aōxō tāpimisfo fe kani xanīfo acho. ²⁰ Askatari nānori kēro imi nesemisma ini, doce xinia amis imi nesekima. Nā kēromā Jesús kaito acho kaxō a kachikirixori āfe tari kexa ramākani. ²¹ “Ē āfe tari mēeax ē sharatirora,” ixō āfe shinā mēraxō shināni. ²² Akka Jesús ifiakekafāta nā kēro fichini. Fichita yoini: “Yōxashta, rateyamafe. Mī ea chanīmara faax mā mī sharaki,” Jesús faino nā kēro imi nesisatani.

²³ Askata mā Jesús nokoax xanīfāfe pexe mēra ikikaini. Anoxō Jesús ōia yorafāfe āto xāiti manenifo, yora fetsafo oiakani sheesaifono. ²⁴ Askaifono Jesús ato iskafani: “Nonoax fōtakāfe. Na fakekai naamaki. Oxaki,” ato faito Jesús ōsanifo. ²⁵ Ato kāimata xotofake mētsoinīfofānaino koshikōi fininākafani.

²⁶ Nāskata Jesús nā xotofake naa otoakē nikakanax pexefo tii chanifofāsanifo.

Fēxo rafe Jesús sharafani

²⁷ Nāskata Jesús xanĩfāfe pexe anoax kaino fēxo rafetari chĩfafainifo iscafayanā fāsikōi: “Mĩ nõko xini David fenaki, noko noife,” fanifo. ²⁸ Askafaifono Jesús pexe fetsa mēra ikikaini. Nāno afe ikiafono Jesús ato yōkani: “¿Mā chanĩmara faimē a ē mato sharafatiro?” ato faito, “Ēje, Ifo, nõ mia chanĩmara fai,” fanifo. ²⁹ Nāskata ato fero ramākayanā ato yoini: “Ea chanĩmara faaxfi mā sharaikai,” ato fani. ³⁰ Ato askafaino õisharanifo. Nāskakē Jesús ato yoisharani: “Ea nikakapo. A ē mato sharafaa tsoa yoiyamakāfe,” ato fani. ³¹ Akka ato anori yoifekē nā Jesús sharafaa nā ano ikafo ato yoifofāsafainifo nā rafeta.

Feronāfake mekamisma Jesús sharafani

³² Nā fēxo rafe imisfo pexe mēranoax tsekefainafono fetsafāfe feronāfake mekamisma Jesúski efenifo Jesús sharafanō. Niafaka chaka a mēra naneano mekamisma ini. ³³ Jesús mā feronāfake makinoa niafaka chaka potano nā feronāfake mekamisma mekani. Nāskakē nā ano ikafo rateyanā yoinānifo: “¡Kee, õikapo! Na nõko mai Israel anoxō Jesús akai keskara tsōa õimisma,” ikanax yoinānifo. ³⁴ Askafaifono fariseofāfe yoinifo: “Nato nĩafaka xanĩfoõxō niafaka potai,” ikanax yoinānifo chakafakĩ mekafakani.

Jesús yorafo shinākōini

³⁵ Nāskakē Jesús pexefo tii judeofo ikafo ano kafāsani. Judeofāfe ichanāti pexe mēraxō Jesús Niospa meka shara ato yoisharani iskafakĩ: “Isharakāfe. Nios mātō xanĩfokōi ipai kiki,” ixō ato yoifofāsafani. Nāskaxō a isinĩ ikaifo fetsa fetsatapafo ato sharafani. ³⁶ Yorafā rasi akiki feaifono õikĩ Jesús ato shinākōini fekaxteaifāfe õikĩ, nā ovejafo ifomaiskanax tsōa ato kexeyamano fofāsatirofo keskara ato õikĩ. ³⁷ Nāskaxō a aõxō tãpimisfo ato yoini iskafakĩ: “Yora ichapafāfe ea nikayamafiaifono ichapatoma ea yonoxokani eõnoa ato yoikakĩ. Nāskakē mā Epa Nios kĩfikāfe a yonoxomisfo katonō eõnoa ato yoinõfo. ³⁸ Akka Epa Nios kĩfikāfe yorafo nĩchinō ēfe meka ato yoitanõfo ea Ifofanõfo,” ixō Jesús ato yoini.

10

Jesús aõxō tãpimisfo doce feronāfake ifini (Mr. 3.13-19; Lc. 6.12-16)

¹ Askata Jesús aõxō tãpimisfo kenani: “Ekeki fekāfe,” ato faino, akiki foaifono ato yoini aõxō yorafo sharafanõfo, a niafaka chakafo yorafo mēra nanea ato makinoa potanõfo, a isinĩ ikaifo fetsa fetsatapafo aõxō sharafanõfo.

² Nā feronāfake docefāfe āto anefo iskarakĩ: fetsa Simón. Nā Simón āfe ane fetsa Pedro. Āfe exto Andrés. Fetsafori āto ane Santiago, āfe exto Juan, nā rafe Zebedeo fake ini. ³ Felipe, Bartolomé, Tomás, Mateo, nā Mateo Roma anoxō xanĩfo kori fixomis ini. Askatari Santiago fetsa, Alfeopa fake, Tadeori ini. ⁴ Simón fetsa nāato āfe kaifo feta romanõfo potapaini anā israelifo yonomayamanõfo. Askatari Judas Iscarioteri ifini, nāato Jesús chakafakĩ ato achimani Jesús retenõfo. Nā tii Jesús ifini aõxō tãpimiskōi inõfo.

Jesús aõxō tãpimisfo nĩchini Nios Xanĩfoõnoa ato yoitanõfo (Mr. 6.7-13; Lc. 9.1-6)

⁵ Nāskata Jesús aõxō tãpimisfo nĩchini ato iskafakĩ yoivanā: “Nā nõko kaifo-mafāfe āto mai ano foyamakani. Askatari nā samāritanõfo ikafo anoriri foyamakani. ⁶ Akka nā nõko kaifo israelifo ato mēra fotakāfe. Nāfo oveja fenoafo keskarafokĩ. ⁷ Fokaxō ato yoikĩ iskafatakāfe: ‘Mā chaima nõko Ifo Nios oi kiki nõko xanĩfo finakōia ixii,’ ixō ato yoitakāfe. ⁸ A isinĩ ikaifo ēfe sharaõxō ato sharafatakāfe. Askatari naafono ato otofatakāfe. A rashkishii

fetseaifori ato sharafatakāfe. A niafaka chakafori āto mēra naneafō ato makinoa pōtatakāfe. Akka ēfe shara kaxpa ē mato minia afaa ē mato yōkama. Nāskari fakī, ato kaxpa sharafatakāfe.

⁹⁻¹⁰ “Akka mā kakī afaa mā fokiki. Māto kori foyamata, māto rapati fetsa foyamata, māto sapato fetsa foyamata, māto forosa foyamata, māto mēsteti foyamata fakāki, eōxō ēfe meka mā ato tāpimani kaikai. Nāskakē mā afara yopaito mato inātirofo mā pinō a mato nikamisfāfe.

¹¹ “Mā pexe rasi ano nokoxō nā feronāfāke Nios Ifofasharakōia fenakāfe. A keskara fichixō āfe pexe ano iyoxō Niospa meka ato yoisharaxikaki nā mā kaitīa. ¹² Nā pexe mēra ikixō ato yoikī iskafakāfe: ‘Aicho. Nō mato ōiyoa,’ ato fakāfe. ¹³ Akka mato ifisharaino, mā tāpitiro nā pexe ifāfe afe yorafo īkisharamis. Nā mā yoiai keskafakī Epa Niospa axosharai tanaima shara inō. Akka a mato ifisharayamaifo, afāfe afe yorafo īkisharamisfoma. Nāskakē nā mā yoiai keskafakī Epa Niospa ato axosharaima. ¹⁴ Akka pexe fetsa mēraxō mato ifikaspafono, a pexe mēranoax mā tseketiro. Askatari pexe rasi mēraxori mato askafaifono, mā anoax katiro. Mā anoax tsekekaikī māto taekinoa mā mapo taa taa atiro ato ōimakī. Mā askafaino tāpitirofo Nios atoki inimayamaino. ¹⁵ Ē mato paraima yoi. Nā pexe rasi Sodoma anoafō feta Gomorra anoafāfe afara chakakōi fapaonifo. Nāskakē Niospa nā ato omiskōimanaitīa ato omiskōimaxii. Akka nā mato nikakaspafono nāfo ato omiskōimaki finakōixii,” ixō Jesús ato yoini.

“Mato omiskōimakani kiki,” ixō Jesús ato yoini

¹⁶ Anā Jesús ato yoini iskafakī: “Ōikapo. Ē mato nīchikai nā yora chakafo mēra. Akka nā yora chakafāfe nā poomānā ovejafo pipaitiro keskafakani kiki mato. Mato askafaifono nā poomā onāyakōi keskara ikāfe eōxō tāpisharakāfe. Nā rīfi afaa chaka shināmisma keskafakī māri askara shinākāfe. ¹⁷ Ōisharakaki. Nā yora chakafāfe mato achikaxō āto xanīfofo ano mato iyotirofoki. Nāskakaxō āto ichanāti pexe mēraxō mato koshatirofoki. ¹⁸ Nāskakaxō xanīfofo ano mato iyotirofo eōxō. Akka anoxō na meka shara eōnoa mā ato yoixii. Askatari judeofomari māto kaifomafori na meka shara eōnoa mā ato yoixii. ¹⁹ Akka mato achikaxō xanīfofo ano mato ināifono shināchakayamakāfe afeskaxō mā ato yoisharaimākai. Xanīfofo ano mato iyofaifono Epa Niospa mato shināmanaino mā ato yoisharaxii. ²⁰ Akka mā ato yoi mā mekaima Epa Niospa Yōshi Shara mekai mā ato yoiaino.

²¹ “Nāskatari yorafāfe āto extofo ato achimaxikani, yora fetsafāfe ato retenōfo. Askatari ato apafāferi āto fakefo ato achimakani fetsafāfe ato retenōfo. Fakefāferi āto apa yafi āto afaki ōitifishkikakī ato achimakani fetsafāfe ato retenōfo. ²² Mā ea chanīmara fakē nāskakē eōxō mato yorafāfe noikaspakani. Akka mato noikaspafafono mā eōnoax omiskōifikī mā ēfe meka nikasharakōiaito ē mato kexesharakōixii Epa Nios fe mā isharapakexanō. ²³ Akka pexe rasi anoxō mato omiskōimanaifono, pexe rasi fetsa ano ichotakāfe. Akka ē mato yoisharanō. Ea nikasharakāfe. Mā israelifāfe pexe rasi anoxō keyokōi mā ato yoiyoamano, ē orisaxii.

²⁴ “Akka a aōxō tāpimisfāfe a ato tāpimamis finōtirofoma. Askatari a yonoxomisfāfe āfe patoro finōtirofoma. ²⁵ Akka a aōxō tāpimisfo a ato tāpimamis keskara ikani. Askatari a yonoxomisfo āto patoro keskara itirofo. Nāskax māri ea keskara ixii. Nāskakē nā ea chakafamisfo keskafakī matori chakafakakī finakōixikani. Nāfāfe ea noikaspakakī ea yoimisfo iskafakakī: ‘Mī niafaka yōshi chakafāfe xanīfo. Mī Beelzebú,’ ixō ea yoimisfo. Ē māto Ifofekē ea askafamisfo. Akka matori askafakakī finakōixikani,” ixō Jesús ato yoini.

*Akka Nios fistiki nō mesetiro
(Lc. 12.2-7)*

²⁶ Anā Jesús ato yoini iskafakī: “Akka mato omiskōimafiaifono, atoki rateyamakāfe. Akka nā afara one yoifimisfono Niospa ato xafakīa kāimaxoxii, afarari fomāpaimisfono, nāfori Niospa ato xafakīa kāimaxoxii. ²⁷ Akka nā ē mato yoimis yorafāfe ato ferotaifi xafakīa ato yoisharakāfe. ²⁸ Akka mato retepaifiaifono rateyamakāfe. Afāfe mato retetitirofono, akka mātō fero mēsho afeska fatirofoma. Atoki ratetamaroko, Nios fistiki mesekāfe. Nāato noko retexō nōko fero mēsho nā omiskōipakenakafo mēra potatiro.

²⁹ “Nāskakē a yora chakafo retemitsamisfoki atoki rateyamakāfe. Epa Niospa mato kexesharai kiki. Shinākapo. Peya mīshti afaayamafekē Epa Niospa afo shināki. Ato namapayamaino tsōakai nā peya mīshtifo retetiroma. ³⁰ Akka ē mato yoi, Epa Niospa mātō foo fisti rasi mato tāpikakōia. ³¹ Nāskakē rateyamakāfe. Nā peya mīshtifo kexesharamis keskafakī, matori Epa Niospa kexesharakī finakōiakī,” ixō Jesús ato yoini.

*“Akka atiri yorafāfe, ‘Jesús ēfe Ifora’ ea famisfo yorafāfe ferotaifi. Akka atirifāferi, ‘Jesús ēfe Ifomara’ ea famisfo,” ixō Jesús ato yoini
(Lc. 12.8-9)*

³² Anā Jesús ato yoini iskafakī: “Yora fetsafāfe ferotaifi, ‘Jesús ēfe Ifora’ ea faifāfe ēri ēfe Epa Nios nai mēra ika anoxō, ‘Nafo efe yoraki’ ē ato faxii. ³³ Akka nā yora fetsafāfe ferotaifi, ‘Jesús ēfe Ifomara’ ea faifāfe ēri, ‘Nafo efe yorafomara’ ē ato faxii ēfe Epa Nios arixō,” ixō Jesús ato yoini.

*“Akka atirifāfe ea chanīmara faifono, atirifāferi ea chanīmara fakanima,” ixō Jesús ato yoini
(Lc. 12.51-53; 14.26-27)*

³⁴ Anā Jesús ato yoini iskafakī: “¿Mā shināimē maitio anoax keyokōi yorafo eōnoax inimanōfo ē oni? Maa. Anorima. Akka nā ē mato yoiai keskara tsōa anoris shinākanima. Akka nā ea chanīmara faifāfe shara shināifono akka nā ea chanīmara faafāfema afara fetsa chakafo shinākani. ³⁵ Akka āfe apa ea chanīmara faino āfe fāke ea chanīmara fakaspakī āfe apaki ōitifishkitiro. Askatari āfe āfari ea chanīmara faino āfe fake xotofāke ea chanīmara fakaspakī āfe afaki ōitifishkitiro. Askatari āfe fāfafa yōxafāfe ea chanīmara faino, āfe fāfafa naetāfa ea chanīmara fakaspakī, āfe fāfafa yōxafoki ōitifishkitiro. Akka ē nai mēranoax matoki oyamanikē askakeranafoma. ³⁶ Eōxō nānorifos shinākanima. Akka fetsafāfe ea chanīmara faifono eōxō ato fe yorakōifo noikaspatirofo.

³⁷ “Fētsa āfe apa yafi āfe afa noikī finakōixō akka ea noikī finayamax, ea Ifofamis itiroma. Askatari fētsari āfe fake feronāfake yafi āfe fake xotofake noikōixō, akka ea noikī finayamax ea Ifofamis itiroma. ³⁸ Akka fētsa yoitiro iskafakī: ‘Ea omiskōimafiaifono ēfe Ifo ē potatiroma,’ ixō yoitiro. Akka fētsari yoikī iskafatiro: ‘Ea omiskōimanaifono ē Jesús Ifofaima,’ ea askafax efe nīpaxatiroma. ³⁹ Akka fētsa iskafakī shināi: ‘Ē Jesús Ifofaito ea omiskōimakanira,’ ixō shinākī, ēfe meka kachikiri faax, nā keskara yora naax omiskōipakenaka. Akka fetsa eōnoax omiskōifikī ea potaxma nā keskara yora naax efe ishara-pakenaka,” ixō Jesús ato yoini.

*Akka fetsafāfe ato sharafaxōaino, Niospa afara shara ināxii
(Mr. 9.41)*

⁴⁰ Anā Jesús ato yoini iskafakī: “Akka fetsafāfe mato nikakōikakī eari nikakōikani. Askatari fetsafāfe ea nikakōikakī ēfe Epa Niosri nikakōikani nāatomāi ea nono mai ano ea nīchinino. ⁴¹ Akka fētsa shinākī iskafatiro: ‘Nāatofi Niospa meka yoimiski. Nāskakē ē āfe meka nikasharai,’ ixō yoitiro. Akka nā Niospa meka yoimis afara shara ināi keskafakī ari Niospa ināsharaxii.

Nāskakē fētsari shinākī iskafatiro: ‘Nā feronāfake sharaki Niospa meka nikasharamiski. Nāskakē āfe meka ē nikakōi,’ ixō shināino, nā Niospa meka yoimis afara shara ināi keskafakī ari afara shara ināsharaxii. ⁴² Fētsa ea chanīmara faxō ea Ifofakī, aato shināi iskatiro: ‘Ē Jesús Ifofamis. Nāskakē afara shara ē axōi,’ ixō shinākī afara shara axotiro. Nāskakē ē yoinō, ea nikakapo. Faka pishta mā fetsa ayamakē Niospa matori afara shara ināsharaxii,” ixō Jesús ato yoini.

11

Juan aōxō tāpimisfo Jesúsni nīchini (Lc. 7.18-35)

¹ Askata Jesús aōxō tāpimisfo doce ato tāpimaxō ato nīchini yorafo Niospa meka shara ato tāpimatanōfo. Jesús mā ato yoikī keyoax ari kani, fetsafo tāpimanikai a pexe rasi chaimashta ikafo ano.

²⁻³ Askatari Juan Maotista karaxa mēra ixō nikani Jesús Apa Niosxō yorafo sharafaito. Nāskakē tāpisharapaini. Nāskaxō karaxa mēraxō aōxō tāpimisfo nīchini Jesús ano. Mā ato nīchia fōkaxō yōkanifo: “¿Mīmē Cristo nā Epa Niospa nokoki nīchiai, askayamai fetsa nokoki oiraka nā nō manai?” ixō yōkatanōfo Juan ato nīchini.

⁴⁻⁵ Mā Jesús ano nokokaxō yōkanifo. Askafaifono Jesús ato kemani: “Fokaxō Juan yoitakāfe a mā ōiyanā a mā nikaforti. Yoitakāfe, mā fēxofāfe sharakaxō ōisharakani kiki, askatari nā chatofori mā sharakanax niafoki, a rashk-ishiaifori mā sharafokī, a pastofāferi mā nikasharakani kiki, a namisfori mā otoafoki, a afaamaisfāferi Niospa meka shara nikakani kiki afeskaxō Epa Niospa noko ifitiromakī.” ⁶ Nāskaxō ato yoini: “Akka a ea chanīmara fasharakōia afara fetsa shinātama ekeki inimakōitiro,” Jesús ato fani, Juan ina rafe.

Jesús ato yoini Juanoa

⁷ Nā a Juan ato nīchia rafe mā foaifono Jesús yorafo yoikī taefani Juanoa. “¿Afeskakī tsōa istoma anoa Juan ōifokani fonifomē? Juankai nā nēfe tafa pei taka taka akai keskarama. Nāskarifiakī mā mā tāpia Juankai ōiti ranāyama.

⁸ Akka, ¿tsoa ōikai mā kamismē? Ōitsai, feronāfake rapati sharakōi safekē ōikai mā kamisraka. Akka mā mā tāpia a rapati sharakōi safemisfo xanīfofōfāfe āto pexe anoxō rapati sharakōi safetirofo. ⁹ Akka, ¿tsoa ōikai mā kamismē? Nā Niospa meka yoimis ōikai mā kamisraka. Akka chanīma, nā Juan Niospa meka yoimis finakōia, fetsafo keskarama. ¹⁰ Akka nā Juanoa yoikī Isaías kirika keneni iskafakī:

Mī nai ariax mai ano oyoamano, nā ēfe meka yoimis ē nīchi taefakī mīonoa ato yoiano itipinī sharakaxō mia nikakōinōfo, ixō keneni. ¹¹ Akka ē mato yoi ē mato paraima. Tsōakai Juan finōama. Juan yoimis keskara meka shara noko tsōa yoimisma. Juanki Nios ini-makōimis. Akka fetsafāferi afaayamafikaxō ea Ifofaifono Nios atoki ini-makōirikai. Nāskakē Juan Maotista finakōifiano fetsafāfe finōkōiafo Niospa ato ōimis.

¹² “Nā Juan ato matotisa fapanitīa Niospa meka nikanixakakī, iskaratīari yorafo Nios ika ano ikipaikōikani. Iskakī shināmisfo; ‘Nios xanīfo ariax ēri āfe yora ipai afe nīpaxakī. Afaa pishtakai ea nētefatiroma ē āfe yora inō,’ ixō shināmisfo. ¹³ Akka Juan oniyamano taeyoi nā Niospa meka yoimisfo feta Moisésri keneni iskafakī: ‘Nā noko ifimis nōko Xanīfo finasharakōi oxii,’ ixō kenenifo. Akka nā Niospa meka yoimisfāfe kenenifo keskara nānorikōi Juan ato yoini. ¹⁴ Niospa meka yoimisto keneni iskafakī: ‘Ē matoki Elías nīchixii,’

ixō Niospa yoini. Akka mā āfe meka chanīmara fapaikī mā tāpitiro nā Juan Elías keskarari. ¹⁵ Mā ea nikatirokī ea nikakāfe. Ēfe meka māto shinā mēra nanekāfe,” ato fani.

¹⁶ Nāskaxō anā ato yoini: “Iskaratīa na niyoafo afe keskarafomāki ē mato yoinō mā tāpinō. Nā fakefo āto kaxeti anoax kaxekakī āto yamafo kenatirofo tai tai iyanā. Akka mā āto yamafo nokokanax a ato yamafāfe fichipaiyaifo keskai tsoa kaxesharayamaino ato yoitirofo iskafakakī: ¹⁷ ‘Nō nōko xāiti maneaino akka mā mairamisma. Askatari shināmitsayanā nō fanāikaino mā oiamisma,’ ixō ato yoitirofo. Akka māri nāskariai mā tsoaki inimamisma. ¹⁸⁻¹⁹ Nāskafakīri Juan yafi ea mā mekafai. Juankai pikī finapaimisma nā ōiai pishta pimis, askatari fimi ene pae pishta ayamisma. Nāskakē aōnoa mā yoia iskafakī: ‘Nā Juan niafaka yōshi chakaya,’ mā famis. Akka ē yorakōi ē Niospa Fakekōi piyanā ē ayasharamis. Akka mā ea iskafakī yoimis: ‘Jesús ichapakōi piimis, askatari pae ayamis,’ mā ea famis. ‘Nāskax yora chakafo fe rafemis, a romanō xanīfo kori fixomisfo ferī rafemis,’ mā ea famis. Akka ē shara imis ea Niospa ea shināmanaino. Juanri shara imis Niospa shināmanaino. Yorafāfe noko ōikī tāpitirofo,” ixō Jesús ato yoini.

Pexe rasi anoxō Jesús nikakaspanifo
(Lc. 10.13-15)

²⁰⁻²¹ Askata anori ato yoita Jesús nā pexe rasi anoafo ato yōani iskafakī: “Ooa, Corazin anoafāfe Betsaida anoafo fe, mā omiskōi finakōixii. Akka Tiro anoxō Sidón anoxori nā ē mato ōimana keskara, ē ato ōimanano āto chaka xatekaxō Epa Nios Ifofakeranafo. ‘Ooa, nō afara chakafamiskī iskaratīa nō anā Nios Ifofai,’ iyanā rāfikaxō āto rapati chapo safekaxō chii māpo raish akeranafo fetsafāfe ato ōinōfo. ²² Akka Niospa Tiro anoafo yafi Sidón anoafori ato omiskōimafiakī ato omiskōimasharaima, akka matoroko omiskōimakī finakōixii. ²³ Akka, nō Capernaúm anoax nō nai mēra kai Epa Nios ari ixō mā shināimē? Maa. Nā omiskōipakenakafo mēra ē mato potaxii. Akka yōra atiroma keskara afara shara ē mato ispafiano māto chaka mā kai xateama. Akka nā ē mato ōimana keskara Sodoma anoafo ē ato ōimamiskē āto chaka xatekeranafo. Nāskakē keyokeranafoma. Askatari āto pexefā rasi keyokeranama. ²⁴ Ē mato yoinō. Afetīara Epa Niospa nā chanīmara faafoma ato omiskōimani. Nā Sodoma ano ipaonifo omiskōixikani. Akka māfi omiskōi finakōixii,” ixō Jesús ato yoini.

“Ekeki fekāfe ē mato shināmasharanō,” ixō Jesús ato yoini
(Lc. 10.21-22)

²⁵ Ato askafata Jesús Apa kīfini iskafakī: “Epa, ē mia aicho fai. Keyokōi nai mēranoafoya nono mai anoafo mī āto Ifo. Mī sharafinakōi. Akka atirifāfe kirika kene tāpifikaxō mia Ifofakaxoma. Iskafakī shināmisfo: ‘Tsoa fetsakai noko keskarama. Nō tāpikōia,’ ixō shināmisfo. Akka nāfo mī meka mī ato tāpimanima. Akka nā kirika kene tāpikaxoma, mia Ifofaifono nāfo mī meka shara mī ato tāpimani, ²⁶ nā mī fichipaiyai keskafakī,” ixō Jesús yoini.

²⁷ Askata anā Jesús ato yoini iskafakī: “Epa Niospa a tāpia keskara eari keyokōi tāpimani, ēmāi āfe Fakekē. Akka tsōakai ea tāpiama, ēfe Epa fistichi ea tāpikōia. Nāskarifikā tsōa ēfe Epa tāpiama, akka eres fisti ē tāpikōia. Akka nā fetsafori ē ato tāpimanaino nāfāferi Epa Nios tāpitirofo. ²⁸ Akka mā shināchakakōikī ea kīfikāfe. Nāskaxō mā ea chanīmara fasharayanā mā ea nikasharaito a mato fekaxtefai ē mato potaxotiro anā mā shināchakayamanō. ²⁹ Akka ea shinākōikī eōxō mā tāpisharakōitiro. Ē mato noikī fenāmāshta ē mato yonomamis tenemasharayanā. Nāskaxō mā anā shināchakatiroma. ³⁰ Akka a ē

mato amapaiyai keskara anã fekaxma. Nãskakê anã mato õiti fekaxtetiro,“
Jesús ato fani.

12

*Nã judeofãfe pena tenetitã Jesúsxõ tâpimisfãfe aros keskara metesfenifo
(Mr. 2.23-28; Lc. 6.1-5)*

¹ Askata judeofãfe ãto pena tenetitã Jesús aõxõ tâpimisfo fe tarepa kani. Aõxõ tâpimisfãfe fonãikakĩ aros keskara meteskaxõ pii fonifo. ² Fariseofãfe õikakĩ Jesús yoinifo: “Õipo, Jesús. Iskaratã nõko pena teneti. Akka Moisés noko yoini na pena tenetitã tsõa pishta yonotiro. Akka mĩ inafãfe yonokani na aros keskara meteskakĩ,” ixõ yoinifo.

³ Ato askafaifono Jesús ato kemani: “Akka, ¿a nõko xini Davidõnoa kirika kenefo keskara mã õimismẽ David afaa afeska fanimẽ ãfe inafõ feta fonãikõikĩ? ⁴ Nãskaxõ Nios kĩfiti pexefã mẽra ikikaixõ a mẽranoa pãa ato pikĩni fonãikõikĩ ano afaayamano. Akka nã pãa nã judeofo ato Nios kĩfixomisfonã ini. Nãskakê fetsafãfe nã pãa tsõa pitiro ini. Nãnorĩ Niospa Moisés yoifinino akka fonãikõikĩ David pini a afe rafeafo feta. ⁵ Akka, ¿a Moisés keneni keskarari mã tâpiamamẽ? Iskafakĩ yoini: ‘Nios kĩfiti pexefã mẽra a ato Nios kĩfixomisfãfe yonotirofo nã pena tenetitã. Nãskakê afaa chakafakanima,’ ixõ Moisés keneni. ⁶ Nios kĩfiti pexefã sharafiano akka ã na pexefã finõkõia. ⁷⁻⁸ Epa Niospa shinãmanaino Niospa meka yoimisto Oseas kirika keneni iskafakĩ: ‘Mã yoinãfo inafõ retexõ ea inãxikĩ, mã koofamis ea shinãkĩ nã shara. Askafiano fetsafo noikĩ, mã ato sharafaxõaito ã õimis nã sharafinãkõia,’ ixõ kirika keneni Niospa shinãmanaino. Niospa noko yoimis keskara mã tâpisharaxõ, mã ato yoikĩ chakafakeranama. Nãskakê ã mato yoi iskafakĩ, ãfe Epa Niospa ea nãmã nĩchĩni xanĩfofinakõĩ ã inõ. Nãskakê ã yoitiro afaa nõ atiromakĩ pena tenetitã. ã mato yoi na ãfe inafãfe akaifo keskara shara,” ixõ ato yoini.

*Feronãfake mẽke yõshiya Jesús sharafani
(Mr. 3.1-6; Lc. 6.6-11)*

⁹ Nãskata Jesús nãnoax kaax judeofãfe ãto ichanãti pexe mẽra ikitoshini. ¹⁰ Nãno feronãfake ãfe mẽke yõshia ini. Nãskakê fariseofãfe Jesús yõkanifo afara chakafaito yõaxikakĩ. Iskafakĩ yõkanifo: “Maestro, pena tenetitã, ¿nõ yora sharafatiromẽ?” ixõ yõkanifo.

¹¹ Askafaifono Jesús ato kemani iskafakĩ: “Mã ovejayaxõ mato oveja kini mẽra pakeano, ¿mã pena tenetitã mã ifirisafatiromamẽ?” ato fani. ¹² “Akka yorafo sharafinãkõiafo, oveja keskarafoma. Nãskakê yorafo nõ shinãkĩ pena tenetitã nõ ato sharafatiro. Nãskaxõ nõ afaa chakafaima. Na pena tenetitã yorafo nõ sharafakĩ Epa Niospa õia shara,” ixõ Jesús ato yoini.

¹³ Nãskata a feronãfake mẽke yõshiya Jesús yoini iskafakĩ: “Mẽshafe,” faino, nã feronãfake mẽke yõshiya mẽshatanaino ãfe mẽke sharatani. Nã takai fetsa keskara shara ini. ¹⁴ Nãskata fariseofo mã tsekekanax yoinãnifo: “¿Afeskaxõ nõ Jesús ato achimatiro mẽ retenõfo?” ikanax yoinãnifo.

Epa Niospa shinãmanaino Isaías keneni Jesúsnoa a inõpokoai yoikĩ

¹⁵ Jesús nãnoax kani mã tâpiax retapaiyaifono. Nãskakê anoax kaino yorafã rasichi chĩfafainifo. Akka a isinĩ ikaifo Jesús ato sharafapani. ¹⁶ Akka ato sharafaxõ ato yoini: “ã Niospa Fakekĩ toa yoyamakãfe,” ato fani. ¹⁷ Nãskarakõĩ Isaías kirika keneni Niospa shinãmanaino Jesúsnoa. ¹⁸ Iskafakĩ keneni:

Õikapo. Nakã ea yonoxomis ã katonĩ. ã aõ noikõĩ. ã akiki inimakõĩ. ãfe Yõshi Shara ã afe rafemamis. Nã maifotio ano ikafãfe ãfe meka

nikasharaifono ã ato chaka soaxotiro efe yora inõfo. ¹⁹ Nakai yora fetsafo fe feratenãxima. Meka mitsisipato ato yoima. ²⁰ Akka tafa kerexma ã xatexima. Askatari chii ketesharayamaito ã nokafaxima. Askatamaroko ã ketefaxii. Nãskarifikã yorafãfe ãfe meka nikapaifikã nikasharayamaifono ã ato potaima. Ato potatamaroko ã ato axosharai ea Ifo sharafanõfo.

²¹ Nãskakẽ keyokõ maitio ano ikafãfe yoixikani iskafakã: “Nã fistichi noko ifitiro nõ aõnoax Epa Nios fe nãpaxanõ,” ixõ yoixikani. Nãskara Isaías yoikã kirikaki keneni. Nãskarakõ nõ õi Isaías keneni.

Yora fetsafãfe, “Jesús niafakaõxõ ato sharafaira,” fanifo
(Mr. 3.20-30; Lc. 11.14-23; 12.10)

²² Askata Jesúski feronãfake fẽxo efenifo. Askatari mekamisma ini. A mẽra niafaka chaka naneano Jesús sharafanõ akiki efenifo. Nãskakẽ Jesús a fẽxo õimasharani, askatari mekamasharani anã mekanõ. ²³ Askafaito õikani yoinãnifo: “¡Kee! Õikapo. Jesús afama mĩshti shara fatiro. Akka, ¿namẽ David ãfe fena nã Epa Niospa katonu, nãmẽ na nõ manai?” ikax yoinãnifo.

²⁴ Askafãfãfe nikakaxõ fariseofãfe yoinifo: “Maa. Natokai Epa Niosxõ niafaka chaka potatiroma. Akka nã niafaka chakafãfe ato xanifo nã Beelzebúxõ ato makinoa niafaka chaka potai,” ikax yoinãnifo.

²⁵ Askafãfono Jesús tãpini a shinãifo keskara. Nãskaxõ ato yoini: “Yorãfo paxkanãkanax ãa ranã retenã keyotirofo. Askatari pexe rasi anoax ãa ranã retenã keyotirofo. Nãskax isharatirofoma ãa ranã retenãtirofo. ²⁶ Nãskarifikã Satanás ãfe niafaka chakafo potaxõ anã afaa afeska fatiroma. ²⁷ Akka mã ea iskafai: ‘Nato niafaka xanifoõxõ niafaka chakafo ato makinoa potai,’ mã ea fai. Akka ea yoikapo, ¿tsõaõxõ mãto inafãfe niafaka chakafo potafomãkã? Akka, ‘Niosxõ nõko inafãfe niafaka chakafo potafo,’ ixõ mã ea yoitiro. Nãskakẽ mã tãpitiro ãri Niosxõ niafaka chakafo potaino. ²⁸ Akka ã niafaka chakafo Niospa Yõshi Sharaõxõ ato makinoa potaino mã tãpitiro a Niospa matoki nĩchiai mã nokoano. Nãskakẽ yorafãfe ea Ifo sharafaxii.

²⁹ “Ë anã mato yoinõ, nikasharakãfe. Akka, ¿afeskaxõ yorafãfe feronãfake mitsisipakõ ãfe pexe kene mẽranoa ãfe rapatifo fãtirofomẽ? Akka rapati fãakã achixõ metexkere akaxõ ãfe rapati fãtirofo. Askafakaxõ fãifonokai ato afeska fatiroma.

³⁰ “Akka fetsa efe rafepaikima ea nikakaspãtiro. Akka fẽtsa ãfe meka nikakaspai ea noikaspai. Nãskakẽ fetsafãferi ea Ifofãfono fichikaspakani. Askakimaroko emakinoa ato paxkanãfapai Epa Nios Ifofayamanõfo.

³¹ “Nãskakẽ ã mato yoi. Fẽtsa afara fetsafo chakafakẽ Niospa ãfe chaka soaxotiro. Askatari fẽtsa afara chaka yoiaino Niospa ãfe chaka soaxotiro. Akka ãfe Yõshi Shara chakafãkã mekafaito, Niospa ãfe chaka soaxonakama. Ato chaka neepakenaka. ³² Askatari fẽtsa Niospa Fake yorakõ chakafaino Epa Niospa ãfe chaka soaxotiro. Akka fẽtsa Epa Niospa Yõshi Shara mekafãkã chakafaino, Epa Niospa ãfe chaka soaxonakama. Ato chaka neepakenaka. Nã naitãri ãfe chaka aõ neepakenaka,” ixõ Jesús ato yoini.

Ifi ãfe fimioxõ nõ tãpitiro afe keskaramãkã
(Lc. 6.43-45)

³³ Anã Jesús ato yoini iskafãkã: “Akka shinãkapo. Ifi shara ãfe fimi sharakõ itiro. Akka ifi chaka ãfe fimiri chaka itiro. Ififo ãfe fimioxõ nõ tãpitiro afe keskaramãkã. ³⁴ Akka mãfi keyokõ chakakõ, nã rono pae keskarakõ mã. Nãskaxõ meka shara mã yoitiro ma mãmã chakakõixõ. Nã mãto shinãmã mã shinã keskafãkã chakai mã mekamis. ³⁵ Nãskarifikã yora sharapa meka shara yoitiro, ãfe õiti mẽraxomã shara shinãkã. Akka yora chakapari meka chaka

yoitiro, afe òiti mēraxomāi chaka shinākī. Nāskaxō nā afe òiti mēraxō shināi keskara yoitiro. ³⁶ Akka ē mato yoinō. Fatora penata keyokōi Niospa ato ichanāfai tāpikōixō ato yoixiki fatofāfe chanīmara faafomākī, akka fatofāferi nikakaspakanimākī. Nāskatari nā shinātama chaka yoimisfori Niospa ato shināmaxii kiki. ³⁷ Akka mā mātō mekaoxō mā Nios ispatiro mā isharamākī, askayamai mā isharamamākī. Nāskax isharax mā afe nipanaka. Askatari mā meka chaka yoimisno nā omiskōipakenakafo mēra mato potaxii. Mātō mekapa mato omiskōimaxii,” ixō Jesús ato yoini.

Yora chakafāfe, “Tsōa atiroma keskara noko ispafe nō mia chanīmara fanō,” ixō yōkanifo

(Mr. 8.12; Lc. 11.29-32)

³⁸ Askata fariseofo feta a Moisés yoikī kirika kenei keskara ato tāpimamisfāfe Jesús iskafanifo: “Maestro, nō òipai tsōa atiroma keskara mī faito,” ixō yoinifo.

³⁹ Askafaifono Jesús ato kemani: “Māfi afara chaka shināyanā mā Nios kachikiri famis. Nāskakē, ‘A tsōa atiroma keskara noko ispafe,’ mā ea fai. Akka nā Jonás ini keskara nā fisti mā òixii. ⁴⁰ Akka nā Jonás ini keskai ēri askai. Jonás fafīnōa xaki mēra tres nia ini. Nāskarifiāi ēri mai mēra maiax tres nia ixii. ⁴¹ Akka fatora penata nā Niospa yorafo keyokōi ichanāfaitīa ato yoixii fatofāfe chanīmara faafomākī, akka fatofāferi nikakaspakanimākai. Nāskakē nā Nínive anoafāfe mato yoixikani iskafakakī: ‘Jonás noko Niospa meka yoiaito nikaxō nōko chaka xatexō nō Niospa meka chanīmara fani. Akka mā Niospa Fake nikafikī mātō chaka mā xatemisma,’ ixō mato yoixikani. Akka ē Jonás finōfekēkai mā ea nikapaimisma. ⁴² Askatari okirinoax nā nafa kēro āto xanīfo ipaoni nōko xanīfo Salomón òipai chai inoaxkōi oni. Afara sharafo tāpikōia nikaferani oni. ‘Afara shara ea tāpimanō,’ ikax akiki oni. Akka ē nā Salomón ē finōfekē, mākai ea nikapaima. Akka keyokōi mā mai keyoano Niospa noko yoixii fatofomākī sharafo fatoforimākī nikayospafo. Askatari nā kēromā mato yoixii iskafakī: ‘Māfi chakakōifokī. ¿Afeskakī mā Niospa Fake nikakaspamismē? Mātō xanīfo Salomón tāpikōia keskafakī nāato keyokōi tāpikōifiano. Akka ē Salomón nikaikai chaikōi ē kani. Akka mākai nā Jesús mato fe ifiakē mā nikakaspamis nāato tāpikōifekē,’ ixō mato yoixii,” ixō Jesús ato yoini.

Anā niafaka chaka yoraki nanetiro

(Lc. 11.24-26)

⁴³⁻⁴⁴ Anā Jesús ato yoini iskafakī: “Ē mato yoinō meka fetsafaxō. Nīafaka chaka feronāfake makinoax tsekeax kafāsatiro tsōa istoma ano fēnafōfāfōfāitiro ano tsoaxō tenepaikī. Akka tsoa fichixoma niafaka chakata anā shinātiro: ‘A ē anoax tsekeita ano ē anā kapai,’ itiro. Mā nokoxō òia nā feronāfake nā pexe xaka mātosomea keskara shara ini. ⁴⁵ Nāskakē nā nīafaka afe niafaka siete efetiro nā chaka finakōiafo, nāfo nā feronāfake mēra iki fetsenō. Nāskakē nā feronāfake chaka finakōi itiro a iypaoni keskarama,” ixō Jesús ato yoini.

Jesús òifekani āfe afanō āfe extonō fenifo

(Mr. 3.31-35; Lc. 8.19-21)

⁴⁶ Jesús yorafo yoiaino āfe afanō āfe extonō akiki fenifo afe mekapaikani, pexe emāiti nikaxō mananifo. ⁴⁷ Fētsa yoini: “Mī efanō mī extonō emāiti nīafo mēfe mekapaikani,” fani. ⁴⁸ Askafaino kemakī: “¿Fatomē ēfe efa keskarafō ēfe exto keskarafōri?” ato fani.

⁴⁹ Nāskata a aōxō tāpimisfo yoini mētoxō: “Nafo ěfe efafo keskarafō, ěfe exto keskarafōri ě ato ōi. ⁵⁰ Akka nā ěfe Epa nai mēra ikato ato amapaiyai keskara akaifo nāfofi ěfe extofo ěfe chikofori ěfe efafori,” ixō Jesús ato yoini.

13

Jesús ato yoini meka fetsafaxō fimi exe saamisnoa

(Mr. 4.1-9; Lc. 8.4-8)

¹ Askata na pena fisti Jesús pexe mēranoax tsekekaini kaax, ĩamāfā kesemē tsaoni. ² Nāno tsaono yorafā rasi akiki fenifo, āfe meka nikai fekani. Akka Jesús kanōanāfā xaki mēra tsoxō ato yoiaino nikanifo, ĩamāfā kesemēxō. ³ Askata meka fetsafaxō afama mīshti Jesús ato yoini iskafakī: “Feronāfake fistichi fimi exe saafoni āfe nōxati mēra kēchoxō fokī. ⁴ Fimi exe saafōikaino ranāri fai nēxpakīa pakeaino a kachikirixori peyafāfe pini. ⁵ Nāskata fimi exe ranāri makexfoki pakei fetseni mai shara anoma. Nāskakē samamakōi fimi exe foaipaini. ⁶ Akka mā foaipaiyaito xinī namani, yosipanā, āfe tapokairoko mai mēra kasharakē. Foaikax, samama nani xinī tsasifaano. ⁷ Ranāri fimi exefo moxafo mēra pakei fetseni. Moxafo mēranoax moxafoya foaipaiyaito moxafāfe namani. ⁸ Akka fimi exe ranāri mai shara ano pakeni. Nāskax foaisharax fimi ichapayakōi ini. Fetsa cien fimiya ini, fetsari sesenta fimiya ini, fetsari treinta fimiya ini. ⁹ Mā pachoyakī ea nikasharakōikāfe,” ato fani.

Meka fetsafaxō yorafo yoixō a aōxō tāpimisfo xafakīakōi ato yoini

(Mr. 4.10-12; Lc. 8.9-10)

¹⁰ Nāskata Jesúski a aōxō tāpimisfo fēkaxō yōkanifo: “¿Afeskakī meka fetsafaxō mī yorafo yoimē? Meka xafakīa mī ato yoimisma,” ixō yōkanifo.

¹¹ Askafaiāfe Jesús ato kemani: “Akka afeskaxō Epa Niospa afe yorafo ĩkināmakī ě mato fisti tāpimanō. ¹² Akka nā Niospa meka nikasharakōiaifo āfe Yōshi Shara āto mēra naneano nāato ato tāpimasharakōixii kiki. Nāskaxō mā tāpikī finasharakōi. Akka nā nikasharayamaifāfe tāpisharakanamax nāfo fenokōixikani. ¹³ Nāskakē meka fetsafaxō ě ato yoi. Akka ōifikakī tāpikanima. Askatari nikafikakī nikasharakanima. ¹⁴ Nānori a Niospa meka yoimisto Isaías kirika keneni a inōpokoai yoikī. Iskafakī yoini:

Nikataifafafikakī nikakanima. Ōifikakī tāpikanima. ¹⁵ Nā yorafo āto mapo kerekōifo. Askatari āto pacho fēstokōifo. Askatari āto fero fepoa keskarafō.

Nāskaxō ěfe meka chanīmara fakanima. Nāskakē ě āto chaka soaxotiroma, ixō Niospa yoini keskara Isaías kirika keneni.

¹⁶ “Akka māakai ato keskarama. Ĕ mato yoia keskara mā nikasharamis. Ĕ mato tāpimanai keskara mā tāpisharakōia. ¹⁷ Shinākapo. Mā ōimis keskara a Niospa meka ato yoimisfo feta a Nios Ifofamis fetsafāferi ōipaifikakī ōipaonifoma. A ě mato yoimis keskara nikasharapaifikakī nikapaonifoma,” ixō Jesús ato yoini.

Jesús meka fetsafaxō fimi exe saamisnoa ato yoini ato tāpimasharakōixiki

(Mr. 4.13-20; Lc. 8.11-15)

¹⁸ Anā Jesús ato yoini iskafakī: “Nā ě mato meka fetsafaxō yoiāi nā fimi exe saamisfoōnoa ě mato yoikai. Nikasharakāfe tāpixikakī. ¹⁹ Atiri fimi exe fai kesemē pakeaino peyafāfe pinifo. Nāskafakīri fētsa Nios Xanīfoōnoa nikafikī Niospa meka nikasharayamaito, nā Satanās chakata Niospa meka fiatiro. ²⁰⁻²¹ Akka atiri fimi exe makex mēra pakeax, foaipaiāfaiito xinī namani, āfe tapo mai mēra ikikēma. Nāskafakīri fētsa taefakī Niospa meka nikai inimayotiro. Akka afara chaka nokoaino anā inimatiroma, anā Nios Ifofayamaino Niospa meka anā āfe shinā mēra nanetiroma. ²² Akka atiri fimi exe moxafo

mĕranoax foaikax yosinima. Nāskari fakī fĕtsa Niospa meka nikasharamax, nāskaxō afara fetsa shinākī, āfe shinā mĕraxō shināchakakōitiro. Nāskaxō kori ichapakōi noikī, 'Ē kori ichapayax ĕ inimatiro,' ixō shinākī Niospa meka anā shināima. Nāskakē Niospa meka nikafikī afara fetsafo shināino, afaa Niospa axotiro. ²³ Akka atiri fimi exe mai shara anoax foaikax mā yosiax fimi ichapaya ini, āfe fimi cien ini, fetsari āfe fimi sesenta ini, fetsari āfe fimi treinta ini. Nāskafakīri fĕtsa Niospa meka nikakōikī Niospa meka nanexō nikasharakōitiro. Akka fĕtsa Niospa meka nikakōisharakī nā fimi exe cien keskara itiro, fĕtsari nikasharakōi nā fimi exe sesenta keskara itiro, fĕtsari nikakōisharakī nā fimi exe treinta keskara itiro," ixō Jesūs ato yoini.

Meka fetsafaxō afara fetsa ato tāpimaxiki anā Jesūs ato yoini

²⁴ Anā Jesūs meka fetsafaxō afara fetsa ato tāpimaxii ato yoini iskafakī: "Ē mato yoinō nā Nios xanīfokōi ika anoax afe keskara ixikanimākai. Ifokōi faafo afe keskaramākī ĕ mato anā yoinō. Nā yorafāfe Nios Ifokōi faafāfe fimi exe shara fana keskarafo. ²⁵ Akka tare ifo āfe inafō fe oxano, a ato noikaspamis fakishi kaxō a fana shara ano fana chakafanafaini kani. ²⁶ Akka nā fana shara foaikī pei sharayakōi foaini. Askatari fana chakari foaini. ²⁷ Nāskata a tare ifoki āfe inafō fokaxō yoinifo: 'Ifo, fana shara mī tarepa mī fanafiano, akka, ĵfanīax na fana chaka foaikamē?' ixō yōkanifo.

²⁸ "Askafafono nā tare ifāfe ato yoini: 'Nā noko noikaspamisfāfe fanafo rakikīa,' ato faito āfe inafāfe yoinifo: 'ĵNa fana chaka nō tsekatiromē?' fanifo. ²⁹ Akka a tare ifāfe ato yoini iskafakī: 'Maa, fana chaka tsekapaikī fana sharari mā tsekatiro. ³⁰ Nāskanōki. Nā fana sharafoya yosiyonō nā fana shara āfe fimi topiaifotīa, ĕ mato yoixinō iskafakī: "Na fana chakafo xatekāfe. Xatexō mextexō koaxikaki. Nāskata nā fana sharafos ĕfe tapas mĕra ea faxoxikakī,"' ixō a tare ifāfe ato yoitiro keskafakī, nāskarifikī Epa Niospa mato paxkanāfaxii ea Ifofafo ĕ ato ifixii. Akka ea Ifofayamafo chiifā mĕra ĕ ato nīchixii," Jesūs ato fani.

Mostaza exeōnoa yoikī meka fetsafaxō Jesūs ato tāpimani
(Mr. 4.30-32; Lc. 13.18-19)

³¹⁻³² Askata anā Jesūs meka fetsafaxō ato yoini iskafakī: "Afe keskaramākī Nios xanīfāfe noko īkinā ĕ mato yoinō. Nā fimi exe mostaza yōra āfe tarepa fanatiro. Akka nā mostaza exe pishtakōi. Akka mā yosiax efapakōi itiro fana fetsafo keskarama. Nāskakē peyafāfe āfe teshpafo ano naa faxō too fatiro. Nāskari fakī taefakī pishta mā Epa Nios Ifofayotiro. Nāskaxō fisti rasichi mā Ifofayotiro. Akka chipo ichapakōichi atirofo Nios Ifofakakī," ixō ato yoini.

Meka fetsafaxō pāa faraxika keskaraōnoa Jesūs ato yoini
(Lc. 13.20-21)

³³ Askata anā Jesūs meka fetsafaxō ato yoini iskafakī: "Afe keskaramākī Nios xanīfāfe noko īkinā ĕ mato yoinō. Nā kĕromā pāa fakī levduraya arinā osixō kamosakano faraxitiro keskara. Nāskarifiakī nō ōitiro. Yorafāfe Niospa meka āto shinā mĕra naneano nō ōiyamafiaino āto ōiti fetsafakanax Nios keskara shara itirofo," ixō Jesūs ato yoini.

Afama mīstikiri yoikī meka fetsafaxō Jesūs ato yoipaoni
(Mr. 4.33-34)

³⁴ Askatari Jesūs nā yorafā rasi yoini meka fetsafaxō afara fetsa ato tāpimaxii. Akka meka fetsafaxō Jesūs mĕxotaima ato yoipaoni. ³⁵ Akka nā Niospa meka yoimisto a inōpokoai yoikī kirika kenekī keskakōifakī Jesūs nāskakōi fani. Iskafakī keneni Jesūsnoa yoikī:

Ĕ ato meka fetsafaxō yoixii. Niospa keyokōi onifanitīa nāskatari a nikamisfoma ĕ ato tāpimaxii, ixō Jesúsnoa yoikī keneni.

Jesús nā fana chakafoōnoa ato tāpimani

³⁶ Askata yorafā rasi makinoax Jesús pexe mēra ikikaini. Mā pexe mēra kaano, aōxō tāpimisfāfe anā yōkanifo ato yoisharanō. “Ifo, meka fetsafaxō mī noko yoia nā fana chakaōnoa nō tāpīama. Anā noko xafakīa yoife nō tāpisharanō,” ixō yoinifo.

³⁷ Askafaifono Jesús ato kemani: “A fana shara fanamisfo keskara ĕkīa,” ato fani. ³⁸ “Akka a tare ĕ yoiai mā tāpitiro nā maitio ĕ yoi. Akka nā fimi exe shara ĕ yoiai nā Nios Ifofamisfo ĕ yoi. Akka nā fana chakafo ĕ yoiai nā Satanás ifofamisfo ĕ yoi. ³⁹ Akka nā noko noikaspamisto fimi chakafana ĕ yoiai, a Satanás ĕ yoi. Akka nā fimi exe topiaifo ĕ yoiaito mā nikai, mā mai keyoaino ĕ yoi. Akka a fimi exe topimisfo ĕ yoiaito mā nikai, nā Niospa āfe ājirifo ĕ yoi. ⁴⁰ Nā fana chakafo xatekaxō chīi koatirofo keskai, nāskarifiakiani nā omiskōiai nokoaitīa omiskōixikani mā mai keyoaino. ⁴¹⁻⁴² Nāskarifikī ĕfe ājirifo ĕ nīchixii a afara ato chakafamamisfoya a afara chaka tāpimisfori ato chīi xoisai mēra ato potanōfo anoax oiayanā omiskōipakexanōfo. ⁴³ Akka nā Niospa meka nikasharakōiaifo, Epa Nios ika anoax nā xinī chaxai keskara shara ixikani. Mā pachoyakī ĕfe meka nikasharakī mātō shinā mēra nanekāfe,” ato fani.

Afara sharakōi oneaōnoa yoikī meka fetsafaxō Jesús ato tāpimani

⁴⁴ Anā Jesús ato yoini iskafakī: “Ĕ mato yoinō nā Nios xanīfokōi ika anoax afe keskara ixikanimākai. Feronāfāke tare ano yonokī orokī afara sharafinakōia fichixō nā fichia ano anā oneni. Nāskaxō āfe afama mīshti keyokōi ato minixō mā kori fixō nā mai fini nā afara sharakōi āfenā inō. Nāskarifiakī mā Nios Ifokōifapaikī mā fichikōipaitiro,” ixō Jesús ato yoini.

Make oxo fakkai fakkaisai keskaraōnoa āfe ane perlaōnoa, meka fetsafaxō Jesús ato tāpimani

⁴⁵⁻⁴⁶ Anā Jesús ato yoini iskafakī: “Ĕ mato yoinō nā Nios xanīfokōi ika anoax afe keskara ixikanimākai. Yora fistichi fenafofāfofāimis perla ato ināxii. Akka nā perla sharafinakōia mā fichixō āfe afama mīshti keyokōi ato minixō kori fixō nā perla sharakōi fini. Nāskarifiakī nō Epa Nios Ifofasharapaikī nōko afama mīshtifo nō shināmakitiro Epa Niosmāi sharafinakōikē,” ixō Jesús ato yoini.

Anā meka fetsafaxō riniōnoa Jesús ato tāpimani

⁴⁷ Anā Jesús ato yoini iskafakī: “Ĕ mato yoinō nā Nios xanīfokōi ika anoax afe keskara ixikanimākai. Nā rini faka mēra potexō foe fetsa fetsatapapo fitirofo keskara ixikani. ⁴⁸ Akka nā rini mā foe fospikōiano, nā rinipa fimisfāfe faka ketokonō rini ninifotirofo. Faka ketokonō tsaōxō fofo katotirofo. Nā sharafo fēta mēra nanekaxō nā chakafo potatirofo. ⁴⁹ Nāskarifiakī nōko mai keyoaino. Nāskatari Niospa āfe ājirifāfe noko paxkanā faxii nā chakafoya nā sharafo. ⁵⁰ Akka nā chakafo nā chīi xoisai mēra ato potaxii. Nānoax oiayanā omiskōipakenakafo,” ato fani.

Afara fena sharakōi yafi afara shara xiniōnoa Jesús ato yoini

⁵¹ Nāskaxō Jesús ato yōkani: “¿Nā ĕ mato yoiai keskara mā mā nikaimē?” ato faito, “Ĕje, a mī noko yoiai nō nikai,” faifono anā Jesús ato yoini: ⁵² “Akka pexe ifāfe pexe xaki mēra āfe afara shara onekatsaxakī nā fena yafi nā xini ato ispatiro. Nāskarifiakī a Moisés yoikī kirika keneni keskara ato tāpimamisfāfe

mã Nios Ifokõi faifono, Nios xanĩfoõnoa ato yoitirofo. Akka meka xiniõxõ meka fena sharari mã tâpitiro,” ato fani.

Jesús Nazarete anoxõ nikakaspanifo

(Mr. 6.1-6; Lc. 4.16-30)

⁵³ Askata Jesús mã meka fetsafaxõ ato yoikĩ keyoax nãnoax kani. ⁵⁴ Mã kaax ãfe mai anokõi nokoni. A judeofãfe ãto ichanãti pexe mëraxõ ato yoikĩ taefani ano. Nãnoxõ yorafãfe iskafanifo: “¡Kee, nikakapo! ¿Fanĩxõ iskara tâpĩxõ yoimẽ askatari nã tsõa atiroma keskara fai? ¿Fanĩxõ iskara tâpĩamẽ?” fanifo. ⁵⁵ “Nã mĩsa famisto fakeki. ãfe afa María. ãfe extofo mã nõ õimis. Santiago ikaino, José ikaino, Simón ikaino, Judas ikaino, nãfo ãfe extofo,” fanifo. ⁵⁶ “ãfe poifori nofe imisfo. Nõfi Jesús tâpia. Nãkai afama. Akka, ¿afeskaxõ afama mĩshti fatiromẽ?” ikax yoinãnifo.

⁵⁷ Nãskakẽ nikakaspanifo. Akka Jesús ato yoini iskafakĩ: “Keyokõi nã maitio anoxõ Niospa meka yoimis nikatirofo. Akka nã ãfe maikõi anoxõ nikapaitirofoma. Nãskakẽ mã ea nikakaspamis,” ixõ ato yoini.

⁵⁸ Nãskakẽ anoxõ afama mĩshti ato õimanimã tsõakairoko nikaito.

14

Juan Maotista nani

(Mr. 6.14-29; Lc. 9.7-9)

¹⁻² Nãskatari Galilea anoa nã xanĩfo Herodes ini. A Jesús afama mĩshti faito nikaxõ ãfe inafõ yoini iskafakĩ: “Akka nã Juan Maotista ãto textemayamea mã anã otoa. Mã otoxõ tsõa atiroma keskara afama mĩshtifo fai,” ixõ shinãni.

³⁻⁴ Akka Herodes Juan reteyoamano Juan yõani iskafakĩ: “Xanĩfo Herodes, mĩ exto Felipe mĩ ãfe ãfi Herodías mĩ fĩa. Askara chakakõi,” nãskafani. Nãskakẽ Herodes akiki õitifishkini. Nãskaxõ ãfe sorarofõ achimani karaxa mërã ikimaxii.

⁵ Akka Herodes Juan retepaifi yorafoki meseni yorafãfemãni chanĩmara faifono Juanmãni Niospa meka ato yoimiskẽ. Nãskakẽ Herodes shinãni iskafakĩ: “Ë Juan retekẽ eari yorafãfe retetirofo,” ixõ shinãni. ⁶⁻⁷ Akka Herodes ãfe cumpleaño ikaino, yorafo ato ichanãfani. Ichãnfono nã Herodías fake xomaya ares mairani yorafãfe ferotaiifi ato inimamai. Nãskakẽ Herodes yoikĩ iskafani nã xomaya yorafãfe ferotaiifi, “Mĩ afara fichipaiyai keskara ea yõkafe ã mia inãno,” ixõ yoini. ⁸ Nãskakẽ nã kërõ xomayato ãfe afa ano kaxõ yõkani iskafakĩ: “¿Ë afaa Herodes yõkatirofõ?” faito ãfa yoini iskafakĩ: “Juan Maotista ãfe mapo textexõ ea sapaki rataxõ ea fexõfe fafe,” fani.

⁹ Askafaito nikai xanĩfo Herodes shinãmitsani. Shinãmitsayanã ãfe shinã mëraxõ shinãni iskafakĩ: “¡Ooa! Ë Juan ato textemapaima. Akka yorafãfe nikaifono mẽ na kërõ xomaya yoia. Nãskakẽ ã Juan ato textemapaiyamafikĩ ãto textemani,” ixõ shinãni. ¹⁰ Nãskaxõ xanĩfãfe ãfe sorarofõ yoini: “Juan textexõ ãfe mapo ea fixotakãfe,” ixõ yoini. ¹¹ Ato askafaino fõkaxõ sorarofãfe Juan textekaxõ ãfe mapo sapaki ratakaxõ fenifo. Fõkaxõ nã kërõ xomaya inãnifo. Nãatorĩ ãfe afa inãni.

¹² Nãskakẽ Juan inafõ fõkaxõ ãfe yora fõkaxõ maifanifo. Mã askafakaxõ Jesúsni nokokaxõ yoinifo.

Jesús cinco mil feronãfakefo ato pimani

(Mr. 6.30-44; Lc. 9.10-17; Jn. 6.1-14)

¹³ Askata Herodes sorarofõ Juan textemana nikai Jesús ares fisti kani kanõanãfãne tsõa istoma ano. Mã Jesús ato makinoax kaa nikakani pexe rasi anoax yorafã rasi fãni fonifo. ¹⁴ Mã kanõanãfã makinoax fotoxõ akiki

yorafã rasi foaito fichini. Ato õikĩ ato shinãkõini. Nãskaxõ a isinĩ ikaifo ato sharafapani.

¹⁵ Mã yãtapakeaino aõxõ tãpimisfo akiki nokokaxõ yoinifo: “Mã yãtapakei kiki nono afaamakĩ yorafo nĩchife a piaifo fitanõfo pexe rasi anoafõ,” ixõ yoinifo.

¹⁶ Askafaifono Jesús ato kemani: “Maa. Fokanima kiki. Mãroko ato pimakãfe,” ato faito, ¹⁷ kemanifo: “Nõ nono cinco pãaya, askatari foe rafes,” fanifo.

¹⁸ Askafaifono Jesús ato yoini: “Ea fixotakãfe,” ato fani.

¹⁹ Nãskaxõ yorafã rasi yoini fasi ano tsaonõfo. Askata foe rafe yafi cinco pãa tsomaxõ nai foisinĩfofã Apa Nios kĩfina iskafakĩ: “Aicho, Epa, mĩõxõ ã ato pimai. Mĩ sharakõi,” fata, pãa kaxketa foe rafeya osixõ aõxõ tãpimisfo inãni a yorafo ato inãketsanõfo. ²⁰ Nãskax pikanax mãyakõinifo. Akka nã chetefaafõ doce fẽta fospini. ²¹ Nã piaifo cinco mil feronãfakefos ini. Kẽrofãferi fakefo feta pinifo.

Jesús ãamãfã femãkã kani

(Mr. 6.45-52; Jn. 6.16-21)

²² Mã cinco mil yorafo pimata Jesús aõxõ tãpimisfo yoini iskafakĩ: “Kanõanãfã nãnekãfe, okiri ãamãfã pokefaitaxikãkĩ,” ixõ ato yoini. Jesús kayoxoma yorafo nĩchiaino aõxõ tãpimisfo fonifo. ²³ Mã yorafo nĩchita, mãchi keya ari arese kani arixõ Apa Nios kĩfikai. Mã fakishaino, ares fisti ano ini.

²⁴ Akka a aõxõ tãpimisfo kanõanãfã mã chai foafono, nẽfefaino ãamãfã poikĩ ato katimafani. ²⁵ Akka mã penaino Jesús ãa femãkã atoki kaito tsõa tãpinima.

²⁶ Nãskata tãpikanamax aõxõ tãpimisfo Jesús ãamãfã femãkã kaito fichikanax tai tai iyanã ratekõinifo, niafakara ikanax.

²⁷ Askafono Jesús ato yoini: “Rateyamakãfe, ãki,” ato fani.

²⁸ Ato askafaino Pedro kemani: “Ifo, mĩmãkĩ eari kenafe ãri ãamãfã femãkã kanõ mia ari,” Pedro fani.

²⁹ “Ofẽ,” Jesús fani. Nãskakẽ Pedro kanõanãfã makinoax fotopakekafã ãamãfã femãkã Jesús ari kani. ³⁰ Kapaifi nefeaito õi nefe kerexkõi mei mesekõini. Nãskakẽ ãamãfã mẽra ikipakekafakĩ fãsikõi kenani: “¡Ifo, ea ifife!” fani.

³¹ Askaito Jesús koshikõi ãfe mẽke achixõ yoini: “Mĩkai ea chanĩmara fasharama. ¿Afeskakĩ mã chanĩmara faimamẽ?” ixõ Jesús yoini.

³² Askata nã rafe kanõanãfã mẽra naneinĩfofanaifono nefe nishpatani. ³³ Nãskakẽ nã kanõanãfã mẽra naneafãfe Jesús nãmã ratokonõ mai chachipakefõfã yoinifo: “Chanĩma, mĩfi Niospa Fakeki,” ixõ yoinifo.

Jesús Genesaret anoafõ a isinĩ ikaifo ato sharafani

(Mr. 6.53-56)

³⁴ Akka ãamãfã pokefaikani Genesaret mai ano nokonifo. ³⁵ Nãskata nã ano ikafãfe yorafãfe Jesús tãpirisafanifo. Nãskakẽ nã chai ikafori ato yoinifo akairi tãpinõfo. Nãskakẽ a isinĩ ikaifo Jesúski efenifo. ³⁶ Nãskakẽ Jesús yõkanifo: “¿Nõ mia tari kexa maikiri pishta ramãkatirõmẽ nõ sharaxiki?” fanifo. Nãskakẽ Jesús tari ramãkanax sharai fetsenifo.

15

Jesús ato yoini afeskai yorafo chakafomakĩ

(Mr. 7.1-23)

¹ Askata fariseofo fe a Moisés yoikĩ kirika keneni keskara ato tãpimamisfo Jerusalén anoax Jesúski fẽkaxõ yõkanifo: ² “¿Afeskai na mĩõxõ tãpimisfo a nõko xinifo ipaonifo keskakanimamẽ? Akka a nõko xinifãfe yoinifo keskara tãpifikaxõ pixikakĩ mechokomekeranafo,” ixõ yoiãifãfe Jesús ato kemani:

³ “Akka, ¿afeskakī māri mātō xinifo ipaonifo keskara mā tanapaimē? Nāskaxō a Niospa yoini keskara mā nikatama nā mātō xinifāfe yoimisfo keskara mā nikamis. ⁴ Akka Epa Niospa yoikī iskafani: ‘Mātō epa yafi mātō efa nikasharakāfe. Akka a āto apa yafi āto afa chakafaifo ato retemakāfe,’ ixō Niospa yoini. ⁵⁻⁶ Nānori Niospa yoifinikē māfi ato mēstekōi nofe yorafo mā ato tāpimamismaki. Akka mā ato yoimis iskafakī: ‘Mātō epa yafi mātō efa mā yoikī iskafatiro: “Epa, na kori ē mia inākerana. Nāskafixō mē kori keyoa ē Nios inākī. Nāskakē ē mia anā afaa inātiroma,” ixō mā ato yoitiro. Nāskaxō mātō epafo mā shināmākīa keskara mā itiro,’ ixō mā ato yoimis parakī. Askafixō mā ato tāpimasharamisma. A kirikaki yoikī Niospa meka kenenifo anori mā yoimisma. Nā mātō xinifo ipaonifo keskara fisti mā tanamis. A Niospa yoini keskara mā akima. ⁷ Māfi keparanāmiski. Matoōnoa yoikī Niospa meka yoimisto Isaías kirika keneni chanīmakōi iskafakī:

⁸ Nā yorafāfe eōnoa yoisharafikakī āto shinā mēraxō ea shinākōiafoma.

⁹ Āa kaxpa ichanākanax fanāimisfo ea kīfianā. A ato tāpimanaifo yorafāfe shinā keskarafa. Akka askarakai Niospa shināma, ixō Isaías keneni, Niospa shināmanaino.”

¹⁰ Nāskata Jesús yorafo kenaxō ato yoini iskafakī: “Ea nikasharakōikāfe tāpisharakōixikakī ē mato yoinō. ¹¹ Na mā piaito choshta keskara mato imatiroma. Askatamaroko yorafāfe āto shinā mēraxō chaka shinākani, askatari chakai mekaifono choshta keskara Niospa ato ōi,” Jesús ato fani.

¹² Askata aōxō tāpimisfo fōkaxō Jesús yōkanifo: “Ifo, ¿mī tāpimamē fariseofo ōitifishkikani nā mī yoiaito nikakani?” ikaxō yoinifo.

¹³ Askafaifono Jesús ato kemani meka fetsafaxō: “Tare ifāfe afara chakafo fanatiroma. Askatamaroko a chaka foaikaino tsekaxō potatiro. Nāskarifikā ēfe Epa nā nai mēra ikato afarafo fanayamaxō, āfe tapo tsekaxō potaxii anā afaa inōma. ¹⁴ Akka fariseofo nikayamakāfe. Nā fēxo keskarafokī. Akka fēxo afe fēxo iyopai xato mēra paketiro. Nāskarifiakī nā fariseofāfe Niospa meka tāpikaxoma fetsafo tāpimatirofoma. Nāskakē ato fe Nios ari nokotirofoma,” ixō Jesús ato yoini.

¹⁵ Ato askafaito Pedro Jesús yoini: “A na mī yoia keskara meka fetsafaxō noko yoisharafe nō tāpisharanō,” fani.

¹⁶ Askafaito Jesús kemani: “¿Afeskakī māri mā nikasharaimamē? ¹⁷ Akka nō afara piano nōko ato mēranoax payokomeano nō aya safatiro. Nāatokai mato chakana fatiroma. ¹⁸ Akka a mātō shināmā shināxō mā afara chaka yoiaino nāato mato chakana fatiro. ¹⁹ Akka yorafāfe afara chakafakakī āto shinā mēraxō chaka shinātirofo, ato reteti-rofo, askatari āto āfima chotatirofo, askatari kēro fetsa kaxefatirofo, askatari yometsoti-rofo, askatari chanīti-rofo, askatari ato īchatirofo. ²⁰ Akka mechokomexoma mā piaino Epa Niospa choshta keskara mato ōima. Akka yorafāfe āa shinākaxō afara chakafatirofo. Nāskakē Epa Niospa ato ōi choshta keskara,” ixō Jesús ato yoini.

*Xotofake judeoyamafixō Jesús chanīmara fakōini
(Mr. 7.24-30)*

²¹ Askata Jesús aōxō tāpimisfo fe kani nā peXe rasi Tiro fe Sidón chaimashta ano. ²² Askata kēro fisti Canaán mai ano ikatsaxakī judeo kaifoma Jesús ano kani. Kaxō fāsikōi yoikī kenani iskafakī: “Ifo, mī David fenaki, ea shināfe. Ēfe fake xotofakeshta niafaka chakata omiskōimamiski,” ixō yoini.

²³ Askafaito nikafikī Jesús kemanima. Nāskakē āfe inafāfe fōkaxō yoinifo: “Ifo, na kēro yoife katanō. Nocho okī noko fekaxtefafei kiki. Fāsikōi fiisiki kiki,” fanifo.

²⁴ Askafaifono Jesús ato yoini: “Ēfe Epa Niospa ea nīchini judeofos ano, nāfo oveja fenoa keskarafō. Akka yora fetsafō ano ea nīchinima,” ato askafani.

²⁵ Akka nā kēro Jesús nāmā ratokonō mai chachipakefōfāyanā iskafakī yoini: “Ifo, ēfe fake ea sharafaxope,” fani.

²⁶ Askafaino Jesús kemani meka fetsafaxō: “A fakefāfe piāi fīaxō nō paxta inā, askarakai sharama,” fani.

²⁷ Jesús askafaito nā kēromā kemani: “Ēje, Ifo. Akka paxtafāfe pitirofo a ifāfe piāi āfe potofō mīsa nāmā keyo pakeaito,” fani.

²⁸ Askafaito Jesús yoini nā kēro: “Mī ea chanīmara fakōini fetsafō keskarama. Akka nā mī ea yoiai keskara ē mia axonō,” ixō Jesús nā kēro yoini. Askafaino āfe fake xotofake shararisatani.

Jesús yora ichapa sharafani

²⁹ Askata Jesús anoax aōxō tāpimisfo fe kaax ĩa Galilea kesemē nokoni. Nāskata machi keya māpefainax tsaoni. ³⁰ Nāno yorafā rasi akiki fenifo. Nā isinī imisfo akiki efenifo Jesús ato sharafanō. Fetsa chāto ini, fetsari fēxo ini, fetsari mifi yōshia ini, fetsari mekamisma ini. Nāskakē fetsa fetsatapafō a isinī ikaifo Jesús keyokōi ato sharafani. ³¹ Ato sharafaino ōikani yorafō yoinānifo: “ĵKee! Ōikapō. Iskarakai nō ōimisma. Nā mekamisfoma mā mekakani. A mifi yōshiafori mā sharafo. Nā chatofori mā nisharakani. Nā fēxofāferi mā ōisharakani. Jesús afama mīshti fatiro. Akka nōfi israelifokī nōko Nios fāsi sharakōi,” ikanax yoinānifo.

Jesús cuatro mil feronāfakefo pimani

(Mr. 8.1-10)

³² Askata Jesús aōxō tāpimisfo kenaxō yoini: “Ē na yorafō shinākōi, nono tres nia mā efe ikafono, nonoxori afaa pikanima. A piaifo mā keyoa. Akka afaa pimaxoma āto pexe ano ē ato nīchiano fonāikani afaa pikanaxma fai nēxpakīa paketirofo,” ixō Jesús ato yoini.

³³ Akka ato askafaino aōxō tāpimisfāfe kemanifo: “Akka, ĵafeskaxō a nō piāi nō fichitiromē na yorafō ato pimaxikī nono tsoa ikama?” fanifo.

³⁴ Askafaifono Jesús ato yōkani: “ĵAfe tii mā pāayamē?” ato faito, “Siete pāa pishta, foe ichapamashtari,” fanifo.

³⁵ Nāskata nā yorafō nāmā tsaonōfo Jesús aōxō tāpimisfo ato yoini. ³⁶ Nāskata Jesús siete pāa yafi foeri tsoamaxō Apa Nios kīfini: “Aicho Epa, mīōxō ē ato pimaikai. Mī fāsi sharafinākōiaki,” fata, pāa kaxketa, foeri tekenāfaxō aōxō tāpimisfo ato ināni nā yorafā rasi ato miniketsanōfo. ³⁷ Nāskakē keyokōichi pikanax māyakōinifo. A pikī chetefaafo siete fēta fospikōia ini. ³⁸ Akka nā pāa piafo cuatro mil feronāfakefos inifo. Kērofāferi fakefoyaxori ato feta pinifo. ³⁹ Nāskata Jesús yorafō yoini fōtanōfo āto pexe ano. Nāskata Jesús kanōanāfā mēra naneinākafani aōxō tāpimisfo fe. Mā naneinākafāta aōxō tāpimisfo fe mai fetsa ano kani, Magdala ano.

16

Fariseofo feta saduceofāfe, “Tsōa atiroma keskara noko ispafe nō mia chanīmara fanō,” ixō Jesús yōkanifo

(Mr. 8.11-13; Lc. 12.54-56)

¹ Askata Magdala mai ano Jesús nokoano fariseo fe saduceofo Jesús ōifokani fonifo afara chakafamapaikani. Nāskakaxō yoinifo: “Mī Niospa Fakemākī tsōa atiroma keskara noko ispafe nō mia chanīmara fanō,” fanifo. Nāskakaxō Jesús afara chakafamapainifo. ² Askafaifono Jesús ato kemani: “Mā yātapakeaino xini iki sharapakekōikai, ‘Penama oi ikima,’ mā famis.

³ Akka mā penaino nai choshtakōi ōikī, ‘Oi iki kiki,’ mā famis. Akka nai choshtakēma ōikī, ‘Oi ikima,’ mā famis. Nai foiskī mā tāpitiro oi feyamai feima rakikīa mā fatiro. Askafixokai nā Niospa mato yoiai keskara mā chanīmara faima. Nāskakē mā ea tsōa atiroma keskara fafe, nō ōinō mā ea famis. Akka, ¿afeskakī mā tāpīamamē Epa Niospa noko ikīfiano?” ato askafani yoikī. ⁴ “Na yora chakafāfe ea chanīmara faafāfema ōipaikani ē Niosxō afara shara ē ato ispanō. Akka ē ato ōīmanima. Akka Jonás fafīnōfānē xeaitano fafīnōfānē xaki mēra tres nia ini. Nāskakē Niospa Jonás kāimani fafīnōfānē xāki mēranoax tsekeinō. Nāskakē a tsōa atiroma keskara ē mato ispaīma,” ato fata ato makinoax Jesús kani.

“Fariseofo feta saduceofāfe anorima yoimisfoki ato nikayamakāfe,” Jesús ato fani

(Mr. 8.14-21)

⁵ Nāskano Jesúsxō tāpimisfāfe okiri ĩamāfā pokefaini fōkakī a pii foaifo shināmakifainifo. Nāskakaxō shinānifo: “Kee, ¿nō afaa piikaimē? A nō piikai mā nō shināmakikerani,” ikanax yoinānifo. ⁶ Nāskakē Jesús ato yoini iskafakī: “Nā fariseofo feta saduceofāfe āto pāa faraxati keskara fiyamakāfe,” ixō ato yoini.

⁷ Ato askafaito nikakani aōxō tāpimisfo yoinānifo: “¿Afeskakī Jesús noko yoimē fariseofo feta saduceofāfe āto pāa faraxati fiyamakāfe noko fai? Akka nō pāa feama. Nāskakē pāanoa noko yoiraka,” ikax yoinānifo.

⁸ Akka mā tāpixō Jesús ato yoini: “¿Afeskai nō pāayamara mā ikimē? Akka mā ea chanīmara fasharama,” ato fani. ⁹ “Mā kai ea tāpisharama. Akka, ¿mā shināimamē cinco pāa kaxkexō cinco mil feronāfakefo ē ato pimati? Akka, ¿afe tii fēta pāa fospia ikitamē?” ato fani. ¹⁰ “Askatari, ¿mā shināimamē nā siete pāa kaxkexō cuatro mil feronāfakefo ē ato pimati? Akka, ¿afe tii fēta texefafo mā fitamē? ¹¹ Akka, ¿mā tāpīamamē pāanoa ē mato yoīma? Nā fariseofoya saduceofoōnoa ē mato yoi,” Jesús ato fani.

¹² Nāskakē tāpinifo Jesús ato yoiaito. Akka nā pāa faraxitiōnoa Jesús ato yoinima. Nā fariseofāfe saduceofo feta ato anorima tāpimapaiyaito Jesús ato yoini.

“Mī Cristo mia Niospa ifni nokoki nīchixii mī nōko xanīfo finakōia inō,” ixō Pedro Jesús yoini

(Mr. 8.27-30; Lc. 9.18-21)

¹³ Askata Jesús aōxō tāpimisfo fe mai fetsa ari nokoni, Cesarea Filipo mai ano. Nānoxō aōxō tāpimisfo yōkani iskafakī: “Yorafāfe, ¿afaa ea fakanimē ē tsoamē?” ato fani.

¹⁴ Ato askafaito kemanifo iskafakakī: “Fetsafāfe, ‘Juan Maotistara’ mia fakani. Fetsafāferi, ‘Elíasra’ mia fakani. Fetsafāferi mia iskafakani: ‘Nā Niospa meka ato yoimis nā Jeremíaskīa, askayamai nā Niospa meka ato yoimis fetsa rakikīa,’ mia fakani,” fanifo aōxō tāpimisfāfe.

¹⁵ “Akka, ¿mā, ea tsoara faimē?” ato faito, Pedro kemani iskafakī: ¹⁶ “Mīfi Cristoki, nā Nios nīpanakato Fakekōi,” fani.

¹⁷ Askafaito Jesús kemani iskafakī: “Simón, mīfi Jonásfa fakeki. Niospa mia noixō mia sharafaxōa. Akka ē Niospa Fakekē tsōa mia tāpimanama. Ēfe Epa Niospa nā nai mēra ikato āa mia tāpimana. ¹⁸ Ē mia anā yoinō. Mīfi Pedroki,” ixō Jesús yoini. Akka israeli meka Pedro Tokirinīfā nō fatiro. Tsōa tokiri efapa pītsi itiroma. Nāskaxō Jesús anā yoikī iskafani: “Mī ea yoia: ‘Mī Cristo, nā Nios nīpanakato Fakekōi,’ mī ea faa. Nā mī yoia keskaraōxō fetsafāfe arifi chanīmara faxikani. Nāskaifāfe efe yorafo ē ato imaxii. Nāskax ichanāxikani ea fanākani ekeki inimakani. Yōshi chakafāfe

Nios noikaspakakī ato namapayanā ato xatemapaifiaifono tsoa xatetiroma. Nā ea Ifofaafo xatenakafoma ea fanākani. Tokiri efapanāfā pītsikiki tsōa tararatiroma keskara ixikani. ¹⁹ Akka fētsa chamisi fepoti fēpetiro yorafo pexe mēra ikimaxikī. Nāskarifiakī ē mia yoi mī yorafo eōnoa mī ato tāpimaxii ea Ifofanōfo. Akka mī ato yoiaito nikakōikanax efe yora itirofo Epa Nios fe ipaxakakī. Nāskai mī chamis keskara itiro. Nā mī ōiai fato sharakōimākī mī ato yoitiro: ‘Nā sharakōi mā atiro,’ ixō mī ato yoitiro. Nā sharakōi mī ōiai, Epa Niospari sharakōi ōi. Askatari mī ōikai fato chakamakī, mī ato yoitiro: ‘Na chaka mā atiro.’ Nāskara mī yoiaino, Epa Niospari nā chaka ōitiro.”

²⁰ Nāskata Jesús aōxō tāpimisfo yoini: “Tsoa yoiyamakāfe ēfi Cristokī,” ato fani.

“Chipo ea retexikani,” Jesús ato fani

(Mr. 8.31-9.1; Lc. 9.22-27)

²¹ Akka anā meka fetsafaxō Jesús ato yoinima. Xafakīakōi a aōxō tāpimisfo ato yoini achiyoafomano: “Ē Jerusalén ano kai. Nānoxō a ato Nios kīfixomisfāfe āto xanīfofo feta a Moisés yoikī kirika keneni keskara ato tāpimamisfāferi, askatari nōko kaifāfe āto xanīfofofāferi ea omiskōimaxikani. Ea ato retemafiafona, tres nia oxata ē anā otoxii,” ixō ato yoini. ²² Askafaino Pedro Jesús ori iyoxō yoini iskafakī: “Ifo, askayamafe. Miakai retekani kiki,” fani.

²³ Pedro askafaino Jesús texkeakekafāni. Nāskaxō iskafakī yoini: “Satanás, emakinoax katāfe. Mī ea xītipaikai a Niospa ea amapaiyai ē anōma. A Niospa shināi anori mī shināima. Akka nā yorafāfe shināi keskara mī shināi,” fani.

²⁴ Askafata Jesús aōxō tāpimisfo yoini: “Fatora fetsa ēfe inakōi ipaikī āakōi apaiyai keskara anā atiro. Nā ē yoiai keskara nikakōitiro. Nāskakē iskatiro: ‘Ēfe Ifoxō ea retefiaifono ēkai ēfe Ifo ē potapakenakama,’ ixō shinātiro. ²⁵ Akka fētsa āa shinātiro iskakī: ‘Ē Nios Ifofaito ea retetirofo. Nāskakē ē Nios Ifofaima,’ ixō shinātiro mesekī. Askara yora naax ēfe Epa ano katiroma. Akka nā ea Ifofaa, eōxō reteafono ē ifixii efe ipaxanō eamāi Ifofamiskē. ²⁶ Akka fatora fetsa nono mai anoax kori ichapaya ikatsaxakī mā naax aya katiroma. Ea Ifofayamax koriya ifiyakatsaxakī Epa Nios ano katiroma. Nāskakē afama mīshtifoya iyopaofinixakī nā omiskōipakenakafo mēra mā kaax anā aya itiro. Nāskakē āfe afaraforikai Nios inātiro afe ipaxakī. ²⁷ Akka ēfi Niospa Fakekī yorakōiri. Nāskakē sharafinakōia chaxapakefofāxii ēfe ājirifo fe nai mēranoax mai ano okī. Mē oax ē āto xanīfo finakōia ē ixii. Nāskakē nā afara shara famisfo ē ato ināsharakōixii ē atoki inimakōikī. Akka nā afara chakafamisfo afara shara ē ato ināsharakōima. Ē ato omiskōimaxii. ²⁸ Ē mato yoi ē xanīfo finakōia ixii. Akka mā atirito ea Ifofaxō nayoxoma mā ōiyotiro,” ixō Jesús ato yoini.

17

Jesús āfe femānā fetsa keskara ini, fafekōini. Āfe rapatiri oxokōi ini

(Mr. 9.2-13; Lc. 9.28-36)

¹ Askata seis nia mā finōano Jesús aōxō tāpimisfo tres iyoni. Pedro iyota, Santiago iyota, Santiago āfe exto Juanri iyoni. Ranāri ato nīchifaini. Nāskaxō māchi keya māmākīa ato iyoini. ² Nānoax āto ferotaifi Jesús fetsa keskara itani. Āfe femānā fafekōini xini keskara. Āfe rapatiri oxokōi itani oa luzpa chaxa keskara. ³ Nāskakē nānoa Moisés yafi Elías ōinifo Jesús fe mekaifāfe. ⁴ Askaito Pedro Jesús yoini: “Ifo, sharakōi ano nō oa. Akka, ĵmī fichipaimē ē tres tapas fanō? Mia fetsafaxota, Moisés fetsafaxota, Elías fetsafaxota, ē fanō,” ixō Pedro yoini.

⁵ Akka Pedro askafaino kōinī ato keyokōi maipakefōfāni. Nā kōi mēranoax Nios mekaito nikanifo iskaito: “Nafi ēfe Fakeki ē fichisharapaikōi. Ē akiki inimakōi. A nikakōikāfe,” ikaito nikanifo. ⁶ Nikakani Jesúsxō tāpimisfo ratekōiyanā feopakefōfānifo. ⁷ Askaifono Jesús ato ano kaxō ato ramāyanā ato yoini: “Finikāfe. Ratekakima,” ato fani. ⁸ Nāskakē foisinīfōfākakī anoa tsoa ōinifoma, Jesús fisti nikē ōinifo.

⁹ Nāskata machi keya ariax anā tisirimepakenifo mā fekani. Tisirimepakekī Jesús ato yoifeni: “A mā ōia keskara mā tsoa yoiki. Ē naax mē anā otoano mā ato yoitiroki,” ixō Jesús ato yoini.

¹⁰ Nāskakē a aōxō tāpimisfāfe Jesús yōkanifo iskafakakī: “A Moisés yoikī kirika keneni keskara ato tāpimamisfāferi iskafakī yoinifo: ‘Cristo oyoamano Elías rekē oi taexii kiki,’ ixō yoimisfo. Akka, ¿afeskakī iskara yoimē?” fanifo.

¹¹ Askafāifāfe Jesús ato kemani: “Chanīma, Elías rekē oi taei nāato keyokōi itipinīsharafaiyoi āto chaka xatenōfo. ¹² Akka ē mato yoinō mā Elías ifana mākai tāpiama. Nāskakē nā apaiyai keskafakakī chakafanifo. Nāskarīfakī ea omiskōimakani,” ixō Jesús ato yoini.

¹³ Nāskakē aōxō tāpimisfāfe tāpinifo Juan Maotistaōnoa Jesús ato yoiaito.

Jesús feronāfake naetapa niafaka chaka pōtaxoni
(Mr. 9.14-29; Lc. 9.37-43)

¹⁴ Askata Jesús a aōxō tāpimisfo fe mā māchifā ariax fotoano yorafā rasi akiki fenifo. Akka feronāfake fistichi ratokonō mai chachipakefōfā Jesús yoini: ¹⁵ “Ifo, ēfe fake shināfe. Ēfe fake nīsoi omiskōimiski. Nāskakē chii naki pakeyanā faka mēra pakemiski. ¹⁶ Akka mī inafō ano ēfe fake ē efefekē mī inafāfe ēfe fake ea sharafaxomisfoma,” fani.

¹⁷ Askafaito Jesús kemani: “Ooa. Mākai ea tāpisharama. Mā afara shināmis. Akka afetiakai ē matoki onima. ¿Afetiakai mā ea tāpimē? Niri nā fake efekāfe,” Jesús ato fani.

¹⁸ Nāskakē Jesús nā feronāfake naetapa makinoa niafaka chaka potani. Nāskax sharakōi itani nā feronāfake naetapa.

¹⁹ Nāskaxō aōxō tāpimisfāfe Jesús yōkanifo: “Akka, ¿afeskakīri nō niafaka yōshi chaka potatīromamē?” ixō yōkanifo.

²⁰ Askafāifono Jesús ato yoini: “Akka mā ea nikaima. Ē mato yoinō, ea nikakapo. Akka mā ea pishta nikaxō mā na machi, ‘Nonoax tsekekainax mai fetsa ari katāfe,’ mā faino na machi tsekekaitiro. Ea nikakōixō nā mā apaiyai keskara mā atiro. ²¹ Akka na keskara niafaka chaka mā foni tenekī Nios shinākī mā Epa Nios kīfiyanā mā potatiro,” ixō Jesús ato yoini.

Anā Jesús ato yoini: “Chipo ea retexikani,” ixō
(Mr. 9.30-32; Lc. 9.43-45)

²²⁻²³ Askata aōxō tāpimisfo fe Galilea ano ichanāxō ato yoini: “Ea achikaxō āto xanīfofo ano ea iyoxikani, afāfe ea retenōfo. Akka ea retēfiatono tres nia oxata ē anā otōxii,” ixō Jesús ato yoini. Ato askafaito nikakani aōxō tāpimisfo shināmitsakōinifo.

Nā Nios kīfiti pexefā ano yonomisfāfe ato kori yōkanifo

²⁴ Askata Jesús aōxō tāpimisfo fe Capernaúm ano nokoaino a Nios kīfiti pexefā anoxō ato kori fīamisfāfe Pedro ōifokaxō yōkanifo: “¿Mī Ifāfe kopifaimamē na Nios kīfiti pexefā nā ato kori fixomisfāfe?” Pedro fanifo. ²⁵ “Ēje, kopifai,” Pedro ato fani.

Askata Pedro pexe mēra ikikainaito Jesús yoini iskafakī: “Simón, ¿afe keskara mī shināimē? ¿Xanīfāfe nā maitio anoa āfe kaifo kori fīaimē, askayamakī yora fetsafo ato fīairaka?” ixō Jesús Pedro yōkani.

²⁶ Askafaito Pedro kemani: “Yora fetsafo fīatiro,” fani. “Ēje, chanīma,” Jesús ini. “Akka āfe kaifāfe kopifatiroma. ²⁷ Akka nokoki ōitifishkiyamanōfo ĩa ano kaxō mīshkimātāfe. Nā mī fafī mīshkimāna āfe axfa mēranoa mī kori exe fichikai. Nāskakē nā Nios kīfiti pexefā kori fixomisfo nō ato kopifaikai,” ixō Jesús Pedro yoini.

18

“Akka, ĵtsoakaimē sharafinakōia?” inifo

(Mr. 9.33-37; Lc. 9.46-48)

¹ Akka nāskatari aōxō tāpimisfo fōkaxō Jesús yōkanifo: “Akka, nō mia Ifofamiski, ĵfatomē finakōia?” ixō yōkanifo.

² Askata Jesús fake yome kenaxō ato nēxpakīa nīchini. ³ Nāskaxō ato yoini: “Ē mato pāraima. Iskara mā shinātiroma: ‘Ē keyokōi finōfakī,’ mā itiroma. Akka fake yome kakapaitiroma. Akka mā shinā fetsafaax na fake yome keskara mā itiro. Mā askayamaxō mā Nios Ifofatiroma. ⁴ Akka Nios Ifo sharakōi faax nā Nios nikakōiaifo fake yome keskarafō, askatari, ‘Nō tsoama,’ ixō shināifo nāskarafo sharafinakōiafo. ⁵ Akka fatora fētsa ēfe aneōxō na fake yome noikī nāatori ea noisharakōi,” ixō Jesús ato yoini.

Noko fētsa afara chakafamaino āfenā mesekōi itiro

(Mr. 9.42-48; Lc. 17.1-2)

⁶ Jesús anā yoini iskafakī: “Akka nā ea rama Ifofai fetsafāfe ato afara chakafamaino ōikī, nā keskarafō ato achixō tokirinīfāya tenextifaxō fakafā noa mēra potatirofo āsanōfo fetsafo anā ato afaa chakafamayamanōfo. Nā keskara shara ikerana,” ato fani. ⁷ Askafata Jesús aōxō tāpimisfo yoini iskafakī: “Mēxotaima ea chanīmara faafāfema yorafo chakafamapaimisfo. Akka fētsa fetsafo chakafamax omiskōi finakōixikani.

⁸⁻⁹ “Akka mātō mēkemā mato afara chakafamatiro, askayamākī mātō tāe mato afara chakafamatiro, askayamākī mātō fēro mato chakafamatiro. Nāskaino mātō chaka xatekōitakāfe anā chakafayamaxii. Oa mātō mēke xateta pota keskara itaxikakī, oa mātō tae xateta pota keskara itaxikakī, oa mātō fero fetoshimea keskarakōi itaxikakī afaa mā chakafayamanō. Akka mā mā mēke fisti potax anā afaa chakafayamai mā Epa Nios fe isharpakenakaki. Nā keskara sharakōi. Nā mātō mēke mā xateama keskaraxō mā aō chakafaino, nā omiskōipakenakafo mēra mā kanaka ari chiifā nokanakama mēra. Nā mātonā chaka finakōia ixii. Nāskatari mātō tae fisti xatea keskara mā sharafinakōia mā isharpakekōitiro. Nāskax, mā askayamaino nā omiskōipakenakafo mēra mā ipanakaki ari chiifā nokanakama mēra. Nāskatari mātō fēro chakafaino, mā fetoshimeax mā isharpakenakaki. Mā askayamax fero rafeyax nā omiskōipakenakafo mēra mā kaxii nā chiifā nokanakama mēra,” ato askafani.

Oveja fenoaōnoa Jesús meka fetsafaxō ato yoini

(Lc. 15.3-7)

¹⁰ Anā Jesús ato yoini iskafakī: “Nā rama ea Ifofaōnoa fakefo keskara shinākī iskafayamakāfe: ‘Na rama Jesús Ifofaafokai afaafoma,’ ixō yoiyamakāfe. Ē mato mēstekōi yoinō. Epa Niospa āfe ājirifāfe nā rama ea Ifofaafō ato kexesharafafāimis. Nā ājirifo Epa Nios fe imisfo. Nāskakē āfe fakefo kexesharamis. ¹¹ Akka nā yorafo fenoafo ē āto chaka soaxoniyoī ē oni isharpakexanōfo.

¹² “Akka, ĵafaa mā shināimē? Feronāfake fetsa cien ovejaya itiro. Nāskakē fisti a makinoax fenoano nā noventa y nueve anā kāimatiroma nā fenoa fenakī. ¹³ Ē mato chanīma yoinō. Mā oveja fisti fichiax inimaifinakōitiro.

Akka nã fenoamafoki inimatama nã fenoitaki mã fichiãx inimaifinakõitiro. ¹⁴Nãskarifiã Epa Nios nã nai mēranoato nã rama Ifofaifo keyokõi ato noisharai ato õikĩ. Askatari tsoa pishta fenopaima ãfe fakefo,” ato fani.

*Jesús chanĩmara faa fẽtsa mia chakafaito mã raefatiro
(Lc. 17.3)*

¹⁵ Anã Jesús ato yoini iskafakĩ: “Akka meka fetsa ã mato yoinõ. Ea chanĩmara famis fẽtsa mia chakafakẽ mã yoitiro iskafakĩ: ‘Yamã, mã ea chakafaa,’ ixõ mã yoitiro. Mã askafaito mia nikaxõ, ‘Èje. Ea mã chakafa. Ea anã raefafe,’ ixõ mia yoiaito mã afe rae faatanãtiro. ¹⁶ Nã mã askafafaito mia nikakaspaito feronãfake fisti kenafe, askayamakĩ rafe kenafe nã rafetari nikanõfo mia chanĩmara faimãkai. ¹⁷ Nãskatari atori nikayamaito nã ea Ifofaifo ichanãfo anoxõ ato yoife mia tãpinõfo. Nã ichanãfo anoxõ mã yoiaito mia nikayamaito mã iskafakĩ yoitiro: ‘Na feronãfãke Epa Nios Ifofaifãx nã Nios Ifofaafoma keskara ika. Nãskatari nã ato pãraxõ ato kori fiamisfo keskarakõ,’ ixõ mã yoitiro.

¹⁸ “È mato chanĩma yoi. Nã mã õiai fato sharakõimãkĩ mã ato yoitiro: ‘Nã sharakõi. Nãskara nõ atiro,’ ixõ ato yoitiro. Nãskara mã sharakõi õi Epa Niospari shara õi. Askata mã õikai fato chakamakĩ, mã ato yoitiro: ‘Na chaka. Nãskara nõ atiro, mã,’ ixõ ato yoitiro. Nãskara mã õikĩ chakamakĩ, ‘Na chaka nõ atiro, mã,’ ixõ mã yoiaino, Epa Niospari nã chaka õitiro.

¹⁹ “Askatari fetsari ã mato yoinõ, ea nikakõikapo. Fatora mã rafeta nono mai anoxõ mã shinãsharaxõ, mã Epa Nios afara yõkaiyanã mã kifiaito ãfe Epa nai mēranoato mato afara inãsharaxii. ²⁰ Akka rafe iyamakani tres yora ea shinãkani eõnoax ichanãkaxikani ãri ato fe ichanãxii,” ixõ Jesús ato yoini.

²¹ Askata Pedro akiki kaxõ Jesús yõkani: “¿Ifo, oato ea noikaspakĩ ea chakafamis, afe tii fakĩ ã yoitiromẽ ã raefaxiki? ¿Siete fakĩ ã yoitiromẽ?” faito, ²² Jesús kemani: “Maa. Siete fakĩ mã yoitiroma. Mẽxotaima mã yoitiro,” fani.

Jesús anã meka fetsafaxõ ato yoini feronãfake fẽtsa a afeta yonomis raefapainima

²³ Anã Jesús ato yoini: “Nõ Epa Nios Ifofaxõ nõ fetsafo raefatiro, Epa Niospa mato raefamis keskafakĩ. Nã ã mato yoiai keskara nikakapo mã tãpinõ mã rae faatanãino. A xanĩfãfe ato yonomamis kenani ato yoixii afe tii mã nimiamakĩ. ²⁴ Xanĩfãfe taefakĩ afe rafea kenani ichapakõi nimiano. ²⁵ Akka a nimia koriya inima afaa kopifatiroma ini. Nãskakẽ xanĩfãfe iskafani: ‘Mã koriyama mã kori nokotiro ma mã ea kopifapanã. Akka ã mia xanĩfo fetsa inã mã ãfe ina inõ ea kori inã. Mia inãta mã ãfi inãta mã fakefo inãta mã afama mãshtifo keyokõi ea inã mã ea aõ kopifanõ,’ ixõ xanĩfãfe yoini. ²⁶ Nãskakẽ ãfe inapa ratokonõ mai chachipakefõfã yoini: ‘Ifo, ea manayofe. A ã mia nimia ã mia chipo kopifaikai,’ ixõ yoini.

²⁷ “Askafaito nikakĩ xanĩfãfe shinãkõini. Nãskaxõ yoini: ‘Rateyamafe. A mã ea nimia ã anã shinãima. Mã ea nimia ã keyokõi sofai mã anã ea niminõma. Kasharatãfe,’ ixõ yoini. ²⁸⁻²⁹ Nãskakẽ xanĩfãfe pexe mēranoax kakĩ, ãfe yama fichini, nãato ichapama pishta nimia ini. Nãskakẽ fichixõ testopa achixõ temo temosayanã yoini: ‘Mã ea nimia ea kopifarifãfãfe,’ fani. Mã eneano ratokonõ mai chachipafõfã yoini, ‘Ea manayofe ã mia inãno,’ fani. ³⁰ Askafaito nikakaspakĩ karaxa mēra ikimani a mēraxõ kopifanõ. ³¹ Nãskakẽ ranãri shinãmitsakõikakĩ a õiaifo ãto xanĩfo yoifokani fonifo. ³² Nãskakẽ xanĩfãfe kenaxõ mã oano yoini: ‘Mã chaka finakõia. Akka ã mia askafatima mã ea nimifiano, “A ã mia nimia ã mia kopifanõ ea manayofe,” mã ea faito, ³³ akka mãri mã yama mã shinãkerana nã ã mia noikĩ shinãti keskafakĩ,’ ixõ xanĩfãfe

yoini. ³⁴ Nāskax òitifishki finakòikĩ xanifãfe nã ãfe ina karaxa mēra ikimani anoax omiskõi finakòinõ nã nimia kopifayanã.

³⁵ “Èfe Epa nai ari ikato matori askafaxii fetsafo mã raefayamaito mato omiskòimaki,” ixõ Jesús ato yoini.

19

Feronãfake ãfe ãfi fe enēnãtirofoõnoa Jesús ato yoini
(Mr. 10.1-12; Lc. 16.18)

¹ Mã ato yoikĩ keyota Jesús aõxõ tãpimisfo fe Galilea anoax kakĩ faka Jordán pokefainax Judea mai ano nokoni. ² Nāskakē yorafã rasichi chĩfafãinifo. Nārixõ nã isinĩ ikaifo ato sharafapani.

³ Nāskakē fariseofo akiki fēkaxõ chakafakĩ mekamapainifo. Nāskaxõ yõkanifo iskafakĩ: “Nõko xinifãfe Niospa meka yoikĩ kenenifo keskafakĩ, ¿feronãfake ãfe ãfi enepaikĩ enetiromē afeskaraito?” ixõ yõkanifo.

⁴ Askafaifono Jesús ato kemani: “¿A Moisés kirika kenei mã õimismamē? Iskafakĩ kenei: ‘Niospa keyokõi onifani. Feronãfake yafi kēro onifakĩ taefani. ⁵⁻⁶ Mã askafaxõ iskafakĩ yoini: “Feronãfake mã ãfiyax ãfe apa yafi ãfe afa makinoax paxkatiro ãfi fe fianãxiki. Nāskakē ãfe ãfi fe yora fisti keskara itirofo,” ’ ixõ Niospa yoinino Moisés kenei. Nāskakē anã yora rafema, yora fisti keskara ikani ãfe ãfi fe. Nāskakē feronãfake ãfe ãfi enetiroma Niospamãi ato fianãmano,” ixõ Jesús ato yoini.

⁷ Ato askafaino yõkanifo: “Akka, ¿afeskakĩ Moisés yoinimē iskafakĩ? ‘Feronãfake ãfe ãfi eneyoxoma kirika kenexõ yoitiro iskafakĩ: “È anã mia fipaima. È mia enei,” ’ ixõ yoitiro Moisés fani,” fariseofãfe Jesús fanifo.

⁸ Askafaifono Jesús ato yoini: “Akka mãri mãto xinifo keskara mã Niospa meka nikakaspamis. Akka Moisés yoini nõ kēro enetiro. Akka Niospa taefakĩ anori shinãnima. ⁹ È mato yoinõ. Akka fētsa ãfe ãfi enetiroma fetsa fe chotanãyamafiano. Akka fētsa ãfe ãfi enxõ kēro fetsa fia askara sharama, chakafai. Askatari a kēro fenē enea fētsa fia askarari sharama, chakafai,” ixõ Jesús ato yoini.

¹⁰ Askara nikakakĩ Jesús a aõxõ tãpimisfãfe yoinifo: “Akka nã mĩ noko yoiai keskara nikakanax, fianãfoma askara shara itirofo,” ikaxõ yoinifo.

¹¹ Askafaifono Jesús ato kemani: “Na ã yoiai keskara atirifãfe nikasharatirofoma. Akka nã Niospa ato shinãmanai tiitos shinãkanax nãfo shara itirofo fianãkanamax. ¹² Akka yõshikõi kãiax mã yosiax ãfiyatiroma. Akka fetsafori ato oxkofixotirofo ãfiyanõfoma. Akka fetsafãferi Epa Nios fisti nikakõipaikakĩ, nã fisti nikakõitirofo. Nāskakē afo ãfiyapakenakafoma,” ixõ Jesús ato yoini.

Jesús fakefo chishtoxõ ato mãmãyanã Epa Nios kĩfixopakeni
(Mr. 10.13-16; Lc. 18.15-17)

¹³ Ato askafaino yorafãfe ãto fakefo Jesúski efenifo ato mãmãpakeyanã ato Nios kĩfixonõ. Akka a Jesúsxõ tãpimisfãfe ato iskafaino: “Mãto fakefo efexõ nõko Ifo fekaxtefayamakãfe,” ato fanifo.

¹⁴ Ato askafaifono Jesús ato yoini: “Ato enekãfe nã fakefo ekeki fenõfo. Ato nētefayamakãfe. Èfe Epa Nios xanĩfo ika ari na fakefo keskarakõifoki,” ixõ ato yoini. ¹⁵ Nāskaxõ fakefo mãmãpaketa Jesús nãnoax kani.

Feronãfake naetapa kori ichapayax Jesús fe mekani
(Mr. 10.17-31; Lc. 18.18-30)

¹⁶ Feronãfake naetapa fistichi Jesús õikaxõ yõkani: “Maestro, mĩ sharaki, ea yoife afaa shara ã afeska fatiromakĩ Nios xanĩfo fe ipaxaki,” ixõ yõkaito,

¹⁷ Jesús kemani: “¿Afeskakī sharara mī ea faimē? Akka Nios fisti sharafinakōia. Nios xanīfo fe mī ipaxapaikī a Moisés yoini keskara mī nikasharakōitiro,” faito, ¹⁸ “¿Fatomē ē nikanō?” faito, Jesús yoini iskafakī: “Nā Moisés yoini keskarakōi mī nikakōitiro. Iskafakī yoini: ‘Ato reteyamakāfe. Askatari mātō āfima chotayamakāfe. Askatari atoki yometsoyamakāfe. Askatari chanī yoiyamakāfe. Askatari kaxpa ato parayamakāfe. ¹⁹ Askatari mātō epa yafi mātō efa nikasharakōikāfe, ato sharafakāfe. Askatari a mā chaima nikari noisharakōikāfe a mā mā noimeai keskafakī,’” ixō Jesús yoini.

²⁰ Askafaito a kori ichapayato kemakī iskafani: “Nā mīa yoiai keskara mē nikakōimis. Akka, ¿afaa fetsari ē nikamamē?” faito, ²¹ Jesús kemani: “Mī isharakōipaikī, mī afama mīshtifo ato minitāfe. Kori fixō nā afaamaisfo ato ināketsatāfe. Nāskakē nai mēranoax afama mīshtifoya mī ixikai. Mā mī kori ato ināketsata anā oxō ea Ifofasharafe,” ixō Jesús yoini.

²² Askafaito nikai nā feronāfāke shināchakakōi tooxinima kori ichapayamāiyaxō ato inākaspa. Nāskax Jesús makinoax kani.

²³ Nāskaxō Jesús aōxō tāpimisfo yoini: “Ē mato pārāima, fekaxkōi yora kori ichapayato Epa Nios Ifofapaia. ²⁴ Akka anā ē mato yoinō meka fetsafaxō. Camello akoja kini mēra ikipaifi ikitiroma, fekaxkōi, efapamāiax. Nāskarari yora kori ichapayato Nios Ifofapai, fekaxkōi āfe afama mīshtifomāi potakas-pakī,” ixō Jesús ato yoini.

²⁵ Ato askafaito nikakakī a aōxō tāpimisfāfe tāpipainifo. “¡Kee! ¿Afeskax nō Nios fe ipaxatiromē?” ikanax yoinānifo.

²⁶ Askaifāfe ōikī Jesús ato yoini: “Yorafokai āa ifimetirofoma. Nios fistichi yorafo ifitiro. Niospa afama mīshtifo fatiro, yorafāfe atiroma keskara,” ixō ato yoini.

²⁷ Ato askafaito nikakī Pedro yoini: “Ifo, nō mefe okī nōko afama mīshtifo nō ōiferani nō mefe oni. Akka, ¿afaa nō fiimē?” fani.

²⁸ Askafaito Jesús ato kemani: “Ē mato pārāima. Keyokōi ē ato ikināno sharafinakōia ea ōixikani, ēfe Epa Nios keskara sharakōi ē ikaito. Akka māmāi ea Ifofasharakatsaxakī nai mēranoax mā efe xanīfofo ixii. Mā nōko kaifo israelifāfe āto xanīfori mā ixii. Nā doce nofe yorafo israelifo mā ato ikipakenakakī. ²⁹ Akka yora fētsa eōxō ēfe meka sharaōnoa ato yoikakī āfe peze ōifaini, askatari āfe onefetsafori ōifaini, āfe poifori ōifaini, āfe apari ōifaini, āfe afari ōifaini, āfe āfiri ōifaini, āfe fakefori ōifaini, āfe tareri ōifaini, akka nāto afama mīshtifo fixii. Nāskatari mā naax Nios fe ipanaka. ³⁰ Akka iskaratīa yora ichapafāfe ato finōpaikani, nō finakōiara ikaxō, akka chipo fenotirofo. Akka a ato finōpaiyamaifo iskaratīa Niospa ato finakōia imaino Nios fe ipanakafo,” ixō ato yoini.

20

A yonomisfokiri yoikī meka fetsafaxō Jesús ato yoini

¹ Anā Jesús ato yoini: “Afe keskaramākī Epa Niospa keyokōi ato ikinā mā Ifosharafaino, ē anā meka fetsafaxō ē mato yoinō. Ea nikasharakāfe. Nā tare ifo mā fakishparikōi kani yorafo fenaikai āfe tare ano yonoxonōfo.

² Ato fichixō ato yoini iskafakī: “Ē mato pena fisti yonomapai. Akka nā ē ato kopifamis tii mā pena fisti yonoano ē mato kopifai, ¿nāskara sharamē?” ato faito, ‘Eje, shara,’ fanifo. Nāskaxō āfe tare ari ato nīchini. ³ Askata rama xini keyaino tare ifo anā kakī ōia plaza anoxō ranārīto manaifono yonopaikakī tsōa ato yonomayamaino. ⁴ Askaifono tare ifāfe ato yoini: ‘¿Māri ēfe tare ano yonopaimē nā ē ato kopifamis keskafakī ē mato kopifanō?’ ato faito nikakata atiri fonifo yonoi fokani. ⁵ Askata tare ifo anā xini

keya kaxō ōia ranārīto mananifo yonopaikakī. Nāskakē afori nīchini āfe tare ano. Askata mā xini kaino anā kaxō ōia ranārītori manaifono. Nāfori nīchini yonotanōfo. ⁶ Askatari yātapishtakōi plaza ano anā kaxō ōia nānoa ranārī ato fichitoshini yonopaiyaifāfe. Nāskaxō ato yōkani: ‘¿Afaa nonoxō mā afeskafaimē yonokima?’ ato faito kemanifo, ⁷ ‘Tsōa noko yonomayamaino nō iki,’ fanifo. Askafaifono ato yoini: ‘Māri ēfe tare ano yonotakāfe,’ ato fani.

⁸ “Nāskata mā fakishano nā tare ifāfe afe xanīfo yoini iskafakī: ‘Ea yonoxonaifo ato kenafe ato kopifanō. Nā rama ikiafo ato kopifakī taefafe. Askata nā iki taeafō chipo ato kopifaxiki,’ fani. ⁹ Akka yātapishtakōi ikikaxō yonoafo nāfo ato kopifani nā pena fisti yonoafo kopifamis keskafakī. ¹⁰ Akka nā yonoi iki taeafāfe shinānifo: ‘Nō kori ichapa fira,’ ikaxō, askafikaxō nā fetsafāfe fiaitiri finifo. ¹¹ Nāskakē mā ato kopifaino, nā tare ifo mekafakakī yōachēpenifo. ¹² Iskafakī yoinifo: ‘Akka nā rama fēkaxō yonoafo mā ato kopifaa nā mā noko kopifaa keskafakī. Akka nō xini pae meeyanā nō yonoa nīskayanā nā pena tii,’ fanifo. ¹³ Akka nā tare ifāfe fisti kemani: ‘Efe yorashta, ē mia chakafakī mekafaama. Akka mē mia kopifaa nā mī pena fisti yonoa. Nā pena fisti ē ato kopifamis tii ē mato kopifai ē mato faaki. Nā sharaki mā ea faaki,’ fani. ¹⁴ ‘Akka ē mia kopifanō, nakīa mī kori. Katāfe mī pexe ano. Akka nā rama ikikaxō yonoafo nā ē mia ināi keskafakī atori ē ināi. ¹⁵ Nā ē ināpaiyai keska fakī ē ato inātiro, ēfe korimāiyakē. Akka, ¿afeskai mī ekeki ōitifishkikimē ē fetsafo ināsharaino?’ ixō yoini. ¹⁶ Nāskarifikī Epa Niospa nā taefakī chanīmara faafo ato ināi keskafakī nā rama chanīmara faifo nāfori ato ināsharaxii. Akka Epa Niospa yora ichapa kena a ika ano fonōfo. Nāskakē Epa Niospa ato kenafiaito tsōa nikayamaito nā Ifofaafos ato ifixii,” ixō Jesús ato yoini.

*Anā Jesús ato yoini: “Mā chaima ea retekanira,” ixō
(Mr. 10.32-34; Lc. 18.31-34)*

¹⁷ Askata Jesús Jerusalén ari fāi kakī a aōxō tāpimisfo kenaxō ato yoini iskafakī: ¹⁸ “Ea nikakāfe. Mā mā ōikai iskaratīa Jerusalén ano nō māpei kaikai. Nānoxō ea achikaxō ea ato inākani, a Nios ato kīfixomisfāfe āto xanīfofo, askatari a Moisés yoikī kirika keneni keskara ato tāpimamisfo anori ea iyoxikani. Nānoxō, ‘Mā mī naikai,’ ixō ea yoixikani kiki. ¹⁹ Nāskakaxō yora fetsafo nōko kaifoma ea inākani ea kamaketsayanā ea koshaketsakani. Nāskakaxō ifi cruz ikaki ea mastakani. Akka ea askafafono tres nia oxata ē anā otoxii Epa Niospa ea otoaano,” ixō ato yoini.

*Āfa āfe fake rafe Jesús yoixoni
(Mr. 10.35-45)*

²⁰ Zebedeo fake rafe Juan fe Santiago ini. Nā rafe āto afa fe Jesús ano fonifo. Mā Jesúski nokoxō nā kēromā ratokonō mai chachipakefofāni Jesús afara shara yōkapaikī. ²¹ Askafaito Jesús yōkani: “¿Afaa mī fichipaimē ē mia axonō?” faito, nā kēromā yoini: “Ifo, nā mī xanīfo finakōia ikaitīa ēfe fake raferi mefe xanīfo inōfo ato xanīfo imafe. Nā xanīfāfe tsaoti ano mī tsaono ēfe fake rafe takairafe mefe ketaxamei tsaonōfo,” fani.

²² Askafaito Jesús nā kēromā fake rafe yoini: “Mā tāpiama a mā ea yōkai keskara. ¿A ē omiskōixiai keskara māri omiskōitiromē?” Jesús ato faito kemanifo: “Ēje, nōri tenetiro,” fanifo.

²³ Askafaifāfe Jesús ato yoini: “Chanīma, māri mā omiskōixii. Akka ēkai tsoa yoitiro, ‘Efe ketaxamei tsaofe efe rafexii’ ixō. Akka ēfe Epa Nios fistichi yoitiro. Nā Niospa ato katoafos nāfo afe ketaxamei tsaotirofo efe rafexikakī,” ixō ato yoini.

²⁴Nāskakē a aōxō tāpimis rafeta askafakī yōkaifāfe a aōxō tāpimisfo fetsafāferi nikakakī, “¿Afeskai oa iskai rafe mekakanimē?” ikaxō a rafe meepainifo. ²⁵Askaifono Jesús ato kenaxō ato yoini: “Mā mā tāpia yora fetsafāfe āto xanīfofo afe keskarafomākī. Nā xanīfāfe mitsisipakōixō ato yonomamis. A xanīfo fe rafeafāferi ato yoimisfo iskafakakī: ‘Nōri mātō xanīfo. Nō mato yoiaito mā noko afara axorisafatiro,’ ixō fāsikōi ato yoimisfo. ²⁶Akka mā ranā askayamakāfe. Askatamaroko fatora fetsa mā xanīfo ipai ato yonoxomis keskara mā itiro. ²⁷Askatari fatora fetsari xanīfo ipaikī iskafakī shinātiro: ‘Ēkai afaama. Nāskakē ē fetsafo axosharapai. Nā apaiyaifo keskara ē ato axosharai,’ ixō shinātiro. ²⁸Akka ēri anori shināima, ēfe Epa Nios ariax ē nāmā ftoni feronāfakekōi ixiki, ē Niospa Fakefekē ea afara axonōfo ē onima. Askatamaroko fetsafo ē ato afara sharafaxoxiki ē oni. Ē atoōnoax naxiki ē oni Satanás chaka āto ifo inōma,” ixō Jesús ato yoini.

Jesús yora fēxo rafekōi sharafani
(Mr. 10.46-52; Lc. 18.35-43)

²⁹Askata Jericó anoax Jesús aōxō tāpimisfo fe kaino yorafā rasichi chīfafainifo. ³⁰Akka fai kesemē fēxokōi rafe tsaonifo. Nānoxō Jesús fāi kaito nikakaxō nā rafeta kenanifo iskafakakī: “Ifo, David fenapa, noko shināfe,” fāsikōi fanifo.

³¹Askafaifono nā yorafā rasichi ato iskafainifo: “Nōko Ifo fekaxtefayamakāfe,” ato faifono, akka nā fēxokōi rafe fāsikōi kenanifo: “Ifo, David fenapa, ¡noko shināfe!” fanifo.

³²Askafaifono Jesús nēteakekafani. Ato kenaxō ato yōkani nā fēxokōi rafe: “¿Afaa mā fichipaimē ē mato axonō?” ixō ato yōkani.

³³Ato askafaito kemanifo: “Ifo, nō fēro ōisharapaikōi,” fanifo. ³⁴Jesús ato shinākī āto fero mēeni. Āto fero mēeaino nā fēxokōi rafeta āto fēro ōirisafatanifo. Nāskakaxō Jesús chīfafainifo.

21

Jesús nokoni Jerusalén ano
(Mr. 11.1-11; Lc. 19.28-40; Jn. 12.12-19)

¹Nāskata mā Jerusalén chaima fokanax pexe rasi Betfagé ano nokonifo machi Olivos ano. Nānoxō Jesús a aōxō tāpimis rafe nīchini, ²ato iskafayanā: “Mēstekōi fotakāfe oa ono pexe rasi ano. Nānoa burro nexekē mā fichi kaikai āfe fake fe nexekē. Nāskakē tēpexō ea efexotakāfe. ³Anoxō yora fētsa mato yōkaito: ‘¿Afeskakī mā burro tēpeyoamē?’ mato faito, yoikī iskafakāfe: ‘Nōko Ifāfe fichipaiyaito nō ifixoniyoa. Akka samama nō mia nīchixoniyokai,’ fakāki,” a aōxō tāpimis rafe fani.

⁴Nā Niospa meka yoimisto kirikaki kenekī yoini keskakōini Jesús. ⁵Iskafakī keneni:

Pexe rasi Sión anoafō ato yoikāfe iskafakī: “Ōikapo. Mātō xanīfokōi mā matoki oi kiki. Xanīfofiāx afama keskara oi kikī. Burro fake kamaki tsaona feronāfakekai kakapaimisma,” ixō Niospa meka yoimisto kirika keneni.

⁶Nā Jesúsxō tāpimisfāfe mā fōkaxō nā ato yoia keskara fanifo. ⁷Nāskata burro fake yafi āfe afa iyonifo. Nāskaxō burro kate kamaki āto sama fanifo. Nāskakē Jesús a kamaki tsaoinākfāni. ⁸Yora ichapakōi inifo. Nāfāfe āto rapatifo kakafa fonifo fai nēxpakīa. Ranāritori epe pei xatekaxō kakafainifo. ⁹Akka nā rekē foaifo fe a acho foaifo fāsikōi mekafonifo. Tai tai fokani. “¡Aicho! ¡Nōko xanīfo David āfe fena nokoki oi kiki! ¡Sharafinakōia nokoki oi

kiki Niospa nīchiano nai mēraxō! ¡Nōko Ifo Nios sharafinakōia!” ikanax tai taifonifo.

¹⁰ Nāskata Jesús Jerusalén ano kaito ōikani yorafo ratei fetsenifo ōiakefaikani. “¿Tsoamē na?” ikanax āa ranā yōināi fetsenifo. ¹¹ Askaifāfe nā Jesús fe foafāfe ato kemanifo: “Nafi Jesúski Niospa meka ato yoimis. Nazarete anoa Galilea mai ano imis,” ixō ato yoinifo.

*Jesús a Nios kīfiti pexefā mēraxō a ato ināifo ato potani
(Mr. 11.15-19; Lc. 19.45-48; Jn. 2.13-22)*

¹² Mā fotoax Nios kīfiti pexefā mēra Jesús ikitoshini. Ikikaixō ōia a mēraxō yorafāfe āto afama mīshtifo ato miniketsakani inifo kori fikani. Askafaiifāfe ōikī Jesús ato pōtaketsani a ato afama mīshtifo miniaifo, a ato fīaifori potani. A kori fīanōnāifo anoari āto mīsa pōtakī ato nāpakaketsani. Askatari a ato rifi miniaifori āto tsaotifori ato pōtaketsani. ¹³ Askafata ato yoini iskafakī: “Niospa shināmanaino Isaías Niospa meka keneni iskafakī: ‘Mā ēfe pexefā mēraxō mā ea kīfitiro,’ ixō keneni. Akka nā yometsofāfe peke keskara mā famis,” ixō Jesús ato yoini.

¹⁴ Ato askafaino a Nios kīfiti pexefā ano fēxofo, chatofa Jesúski fenifo. Nāskakē anoxō Jesús ato sharafani. ¹⁵ Jesús askarafa ato sharafaino ōikani. Akka nā Nios ato kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe ōinifo afama mīshtifo Jesús akaito. Askatari fakefo Nios kīfiti pexefā mēranoaxri tai tai ikaifāfe nikanifo iskaifāfe, “¡Aicho! ¡Nā Jesús David āfe fena sharafinakōia!” ikaifāfe nikakani ōitifishkinifo.

¹⁶ Nāskakakī Jesús yoinifo iskafakakī: “¿Oaiskai mī nikaimē yoiaifo keskara faifāfe?” Jesús ato kemani: “Ēje, mē nikai,” ato fani. “Akka a kirika keneano, ¿mā ōimismamē? Iskafakī kenenifo, Niospa ato shināmanaino:

Fake yomēfāfe mia fanākani, mī ato fanāimaino,
ixō kenenifo,” Jesús ato fani.

¹⁷ Askafakī ato yoita ato makinoax kani peke rasi ano Betania ano. Nāno oxafistishini.

*“Fana higuera, mī anā fimiyanakama,” Jesús fani
(Mr. 11.12-14, 20-26)*

¹⁸ Mā penano Jerusalén ano anā okī Jesús meea fonāikōini. ¹⁹ Mā anā kakī Jesús ōini a fana higuera fai kesemē nikē. Nāskakē akiki kaxō āfe fimi fenani pipaikī. Akka fimiya inima, āfe pei fisti ini. Nāskakē yoikī iskafani: “Anā mī fimiyanakamaki,” faino koshikōi nā higuera xanarisatani.

²⁰ Askaito ōikakī aōxō tāpimisfāfe yōkanifo: “Kee, ¿afeskai na ifi xanarisatanimē?” ikaxō, ²¹ yōkaifono Jesús ato kemani: “Ē mato pāraima mā ea nikakōixō mārī atiro na ē ifi higuera xanafaa keskafakī. Nāskarifikī na machiri mā yoitiro iskafakī: ‘Nonoax tsekekainax fakafā mēra paketāfe,’ mā faino fakafā mēra paketiro. ²² Mā Epa Nios chanīmara fakōixō mā afara kīfaiato mato inātiro,” ixō ato Jesús yoini.

*“¿Tsōa mia nīchinimē mī xanīfo inō?” ixō Jesús yōkanifo anoxō achipaikakī
(Mr. 11.27-33; Lc. 20.1-8)*

²³ Ato askafata Nios kīfiti pexefā mēra ikikaini. Nā Nios kīfiti pexefā mēraxō ato tāpimanaino, nā ato Nios kīfixomisfāfe āto xanīfofo fe judeo anifofo fonifo. Akiki fōkaxō yōkanifo iskafakakī: “¿Tsōa mia nīchinimē? ¿Tsōa mia yoiamē mī iskafanō?” ixō yōkanifo.

²⁴⁻²⁵ Askafafono Jesús ato kemani: “Ēri mato yōkanō. Ea yoikapo ē nikanō. ¿Tsōa Juan nīchinimē ato maotisafakī ato faka mēra ikimapakenō? Niospa

nīchiyamakī yorafāfe nīchiniforaka. Akka mā ea kemaito, ēri mato yoikai tsōaōxō ē iskafaimākai.”

Ato askafaino, āa ranā mēenāpai fetsayanā. Shinānifo iskakakī: “Niospa Juan nīchini nō faito noko yoikī iskafatiro: ‘¿Akka afeskakī mā Juan nikamis-mamē?’ noko fatiroki,” ikanax yoinānifo. ²⁶ “Akka nō iskafatiroma: ‘Yorafāfe Juan nīchinifo,’ nō fatiroma. Nō yorafoki mesei keyokōichi shinākani Niospa shināmanaino Juan ato yoipaoni,” ikanax xanīfofo yoinānifo.

²⁷ Nāskakaxō Jesús yoinifo iskafakakī: “Nō tāpiama,” faifono Jesúsri ato kemani iskafakī: “Ēri mato yoima tsōa ea nīchinimākī ē iskafanō,” Jesús ato fani.

Meka fetsafaxō feronāfake rafeōnoa Jesús ato yoini

²⁸ Jesús ato yoini: “Meka fetsafaxō ē mato yoinō. Feronāfake fisti fake naetapa rafeya ini. Nāskaxō āfe fake iyoa yoini: ‘Ēfe tare ano kaxō ea yonoxotāfe,’ fani. ²⁹ Askafaito āfe fāke kemani: ‘Ē kapaima,’ fani. Askafiax mā shināx kani.

³⁰ “Askata āfe fake chipokori yoini iskafakī: ‘Mīri kaxō ēfe tare ano ea yonoxotāfe,’ fani. Askafaito nāato kemani iskafakī: ‘Ia, epa. Ē yonotanōkī,’ fafiax kanima. ³¹ Akka, ¿fatoto a āfe āpa fichipaiyai keskafakī axonimē?” ato faito, “Iyoato axoni,” fanifo. Nāskaxō Jesús ato yoini: “Ē mato pāraima. Nā xanīfo kori fīxomisfo fe, nā kēro chotaferomafo āto chaka xatekanax mā Epa Nios Ifofakōikani. Akka mā afaa afeskafaxoma mā Epa Nios Ifofaama. ³² Akka Juan ato maotisafamis oni ato tāpimaxiki afeskax mā itiromāki, Niospa fichipai keskara. Akka mā kai Juan nikamisma. Akka nā xanīfo kori fīxomisfo feta nā kēro chotaferomafāfe nikakōinifo. Akka māto chaka mā xateama mā afara fetsafo shināmis,” ixō Jesús ato yoini.

Meka fetsafaxō Jesús ato yoini a ato yonoxomis chakafoōnoa (Mr. 12.1-12; Lc. 20.9-19)

³³ Anā Jesús ato yoini iskafakī: “Ea nikakapo ē mato meka fetsafaxō yoinō. Tare ifāfe āfe tare ano uva fanani. Fanaxō akiki keneakeni. Nāskaxō mai pōkini a mēraxō uva tsinīxiki. Askatari pexe keya fani anoxō kexexiki tsōa mēeyamanō. Mā askafakī fetsaxō ato ināni nā uva tare kexenōfo. Nāskata mai fetsa ari kani. ³⁴ Akka nā fimimistīa mā āfe fanafo pachiano, a yonoxomisfo nīchini a kexexonafo ato yōkaxō nā āfenā tiiri fixotanōfo. ³⁵ Akka nā tare kexexonafāfe a xanīfo yonoxomis achikaxō fisti seteketsanifo. Askatari fetsari retenifo. Askatari fetsari tokirinī tsakaketsanifo. ³⁶ Nāskakē tare ifāfe anā āfe inafō ichapakōi nīchini. Mā foafono nā tare kexemisfāfe ato askari fanifo.

³⁷ “Mā ato askafapaxō āfe fakekōi nīchini aōnoa shināchakatama, ‘Ēfe fake nikatirofokī,’ ixō. ³⁸ Akka mā āfe fake kaito fichikanax nā tare kexemisfo aa ranā yoinānifo: ‘Nato āfe apa naano na fanafo fixii kiki. A nari retekape na āfe fanafo nōkonā inō,’ inifo. ³⁹ Nāskakata achinifo. Mā achikaxō tare pasotai iyokaxō retenifo. ⁴⁰ Akka, ¿mā tare ifo oxō a tare kexemisfo ato afeskafatiromē?” ixō Jesús ato yōkani.

⁴¹ Ato askafaito kemanifo: “Ato retetiro ato noitama yora chakafokē. Nāskaxō tare ifāfe yora fetsafo āfe tare inātiro, nāfāfe inānōfo nā āfenā tiiri mā āfe fana fimifo pachiano,” ixō yoinifo.

⁴² Nāskata Jesús ato yoini meka fetsafaxō: “¿Na kirika kenea anoa mā anemismamē? Iskafakī kenenifo:

Tokiri pexe fapaikakī nā pexe famisfāfe na tokiri chakara ixō potafifono, fetsafāfe fichikaxō na tokiri sharakōi ikaxō akiki pexe fatirofo. Nāskarifiakī xanīfofofāfe, ‘Nakai afama,’ ikaxō Niospa Fake ōikaspamisfo.

Askafafiaifono Niospa āfe Fake katonī nōko Ifo inō. Nāskakē nō akiki inimakōi,

ixō kirika ano kenenifo,” Jesús ato fani.

⁴³ “Nāskakē ē mato yoi, taeyoi Nios fe rafexō āfe meka mā ato yoiyomis. Askafixō mā ea nikakaspai. Nāskakē Epa Niospa fetsafo yoi āfe meka ato tāpimanōfo afeska faxō Nios Ifo sharakōifatiromakī. ⁴⁴ Akka tokiriki fetsa pakeki aō xao teketiro. Akka tokiri yoraki pakekī yamakōi fatatiro. Nāskarifiakī ē Niospa Fakekōixō a ea nikakaspaiifono ē ato omiskōimaxii,” ixō Jesús ato yoini.

⁴⁵ Akka nā Nios ato kīfixomisfo āto xanīfofo feta fariseofāfe nikanifo Jesús meka fetsafaxō ato yoiāito. Nāskakaxō tāpinifo Jesús atoōnoa yoiāito. ⁴⁶ Nāskakaxō achipainifo. Akka achipaifikani mesenifo yorafāfemāi chanīmara faifono Jesús Niospa meka ato yoimiskē. Nāskakē achinifoma achipaifikakī.

22

Meka fetsafaxō Jesús ato yoini a feronāfake āfiyaino inimayanā piaifoōnoa yoikī

(Lc. 14.15-24)

¹ Anā Jesús meka fetsafaxō ato yoini iskafakī: ² “A Epa Nios xanīfo ika ano iskaraki ē mato yoinō. Nikakāfe. Nā xanīfāfe āfe fake āfi fiaino fista axoxiki. ³ Akka xanīfāfe a yonoxomisfo nīchini ato yoitanōfo fenōfo. Akka mā fōkaxō ato yoiāifono fekaspanifo. ⁴ Nāskaxō anā a yonoxomis fetsafo nīchini ato iskafayanā: ‘Ato yoikī iskafatakāfe: “Mā xanīfāfe āfe fāke āfiyaino mā itipinīsharakōi faa pixiki. Āfe fakka efapa mā ato retemana. Askatari fakka fake xoakōiari ato retemana. Mā keyokōi itipinīsharafakī, kookāfe pixikakī,”’ ato fani. ⁵ Akka ato askafaiifono ato fe fekaspanifo. Fetsa āfe tare ari kani. Fetsari kani āfe afama mīshti minikai. ⁶ Atirifāfe nā xanīfāfe ināfo ato achikaxō ato seteketsayanā ato retenifo. ⁷ Nāskakē xanīfo ōitifishkifinakōini. Nāskaxō āfe sorarofo nīchini a retemitsamisfo ato reteyanā āto pexefori ato kōakī mītōkakōitanōfo. ⁸ Nāskaxō xanīfāfe a yonoxomis fetsafo yoini ato iskafakī: ‘Mē itipinīshara faa ēfe fāke āfiyaino pixiki. Akka nā chakafo ē ato kenamanāfo fekaspakōiafokī. ⁹ Akka māri fotakāfe nā pexe rasi ano. Nāria ato fichixō nā mā ōiaifo ato yoikāfe fenōfo pii fenōfo, ēfe fāke āfiyaino,’ ixō ato yoini. ¹⁰ Nāskakē a yonoxomisfo fai fētsa fonifo. Mā fōkaxō yora ichapafo fichikaxō ato efenifo. Yora sharafo efeta yora chakafori efenifo. Nāskakē xanīfāfe āfe fāke āfiyaino yorafo pexe fospikōinifo.

¹¹ “Nāskakē xanīfo pexe mēra ikikaini yorafo feaito itipinīsharafaxō ato rapati sharakōi ato ināketsani safenōfo āfe fāke fista akaino. Xanīfo ikikaini ato ōikai mā sharakōi safeketsafomakī. Akka fistichi rapati shara safea inima, chapokōi safea fichini. ¹² Akka a rapati shara safeama fichixō yoini: ‘¿Afeskakī mī rapati sharakōi safeax mī oamamē ēfe fāke āfiyafiaino?’ Askafaino nā feronāfake tooxinima. ¹³ Nāskaxō xanīfāfe a yonoxomisfo yoini: ‘Na feronāfake otexkere ata metexkeraxō fakishifā mēra potakāfe, anoax omiskōipakexanō eaiyanā,’ ixō ato yoini. ¹⁴ Nāskarifiāi Epa Niospa yora ichapa kenai a ika ano fenōfo nā āfe Fake Ifofaifo tii afe ipanakafo,” ixō Jesús ato yoini.

“¿Xanīfo nō kori inātiromē noko yōkai?” ixō Jesús yōkanifo

(Mr. 12.13-17; Lc. 20.20-26)

¹⁵ Nāskata mā Jesús ato yoiāito nikakata mā fokanax fariseofo yoinānifo: “¿Afeskakō nō Jesús afara chaka yoimatiromē? Afara chaka noko yoiāito nō yōaxiki,” ikanax yoinānifo. ¹⁶ Nāskafakata āto ināfo nīchinifo, Herodes āfe

inafoya iskafakī yoitanōfo: “Maestro, mā nō tāpia mī chanīmakōi yoimis. Nā Epa Niospa noko shināmapaiyai keskarakōi mī noko yoimis yorafāfe mīōnoa afara chaka yoifiaifono. Afara mī yoipai mī ranomisma. Keyokōi nāskarafos mī ato yoimis. ¹⁷ Nāskakē noko tāpimasharafe. Akka chanīmamakī noko yoife na romanō xanīfo nō kopifatiromakī askayamakī nō kopifatiroma rakikīa,” fanifo. Jesús chakafamapaikakī askafanifo.

¹⁸ Askafaiifāfe ōikī Jesús tāpini feparapaiyaiifāfe. Ato yoini: “Feparamisfāfe, ¿afara chaka mā ea yoimapaimē eōnoa afara chaka yoipaikī? ¹⁹ Akka māto kori exe ea ispakāfe a aō mā xanīfo kopifamis,” ato fani. Ato askafaito kori exe fisti fōxonifo. ²⁰ Nāskaxō Jesús ato yōkani: “¿Tsōa femānā na keskaramē? ¿Tsōa aneri na kori exe ano keneamē?” ixō ato yōkaito, ²¹ kemanifo iskafakakī: “Nōko xanīfo César keskara,” fanifo. Nāskakē Jesús ato yoini: “Akka na kori exe Césarnākē César inākāfe, akka Niosnākē Niosri inākāfe,” ixō Jesús ato yoini.

²² Ato askafaito nikakani, ratekōiyanā. “Kee. Āfe mekakai tsōa finōtiroma,” ikanax a makinoax fonifo ōifaikani.

*“¿Yora naax anā otoax afeskatiromē?” ixō Jesús yōkanifo
(Mr. 12.18-27; Lc. 20.27-40)*

²³ Nāskatari afia pena fisti saduceofo fenifo Jesús ōifekani. Nā saduceofāfe yoimisfo iskafakakī: “Yora naaxkai anā afeskax ototiroma,” ixō shināmisfo. Nāskakaxō Jesús yōkai fekani fenifo iskafakakī: ²⁴ “Maestro, Moisés yoini iskafakī: ‘Feronāfake naano āfe āfi feta fake akamax, one fētsa nā kēro fitiro, āfe āfi inō. Mā fixō afeta fake atiro āfe ōchi fake inō,’ ixō Moisés noko yoikī kenei. ²⁵ Akka nō mia yoikī taefanō. Noko nikafe chipo noko yoixiki. Akka nā nane tii siete inifo, feronāfake. Āto ochi iyoa āfiyai taeni. Mā āfiyax afeta fake akamax nani. Mā āfe ochi naano chipokoto fini. ²⁶ Nāskarifiāi nā chipokori nani afeta fake akamax. Nāskatari chipoko fētsari fini, nāri nani afeta fake akamax. Nāskakanax akikinoax nai keyonifo afeta fake akanamax. ²⁷ Nāskata mā nai keyoafono nā kērori chipo nani. ²⁸ Akka, ¿a yorafo mā otokaxō nai mēraxō, fatoto nā kēro fixiimē, nā fistimāi fīpakaxō?” ixō yōkanifo.

²⁹ Askafaiifono Jesús ato kemani: “Mākai afaa tāpiama. Nā kirika ano Niospa meka yoikī kenenifokai mā tāpiama. Nāskaxori Niospa akai keskara āfe sharaōxō ari mā tāpiama. Na mā ea fanīrira yoiai,” ato fani. ³⁰ “Akka yorafo nakanax anā otokanax anā āfiyatirofoma. Kērofori anā feneyatirofoma. Nāskakanax ājirifo keskara itirofo nai mēranoax. ³¹ Akka, ¿a yorafo naax otokiaifo Niospa yoini keskara, a kirika keneano mā ōimismamē? ³² Iskafakī Niospa yoini: ‘Ēfi mī xinifāfe āto Nioskōiki, Abraham ikaino Isaaca ikaino Jacobo ikaino,’ ixō Niospa yoini. Akka yorafo mā nafiafono naafoma keskara Epa Niospa ato ōimis. Niospa yoini iskafakī: ‘Ēkīa āto Nioskōi,’ ixō Niospa yoini.” Nāskara Jesús keyokōi ato yoini.

³³ Saduceofāfe nikanifo Jesús ato askafaito, “¡Aira! ¡Nikakapo! Jesús sharakōi yoi,” ikanax yoinānifo.

*“Akka, ¿fato meka sharafinakōiamē, nā Niospa shināmanaino Moisés ato yoini-raka?” ikaxō fariseofāfe Jesús yōkanifo
(Mr. 12.28-34)*

³⁴ Nāskakē saduceofo Jesús ato meka xatemanaito nikakaxō fariseofo ichanākanax Jesús ano fenifo. ³⁵ Akka feronāfake fisti a Moisés yoikī kirika kenei keskara ato tāpimamis ini. Nāato Jesús fanīrira kemamapaikī yōkani, ³⁶ “Maestro, ¿fato meka sharafinakōiamē, nā Niospa shināmanaino Moisés keneniraka sharafinakōia?” faito,

37-38 Jesús yoini iskafakī: “Moisés yoikī taefani iskafakī: ‘Nōko Ifo Nios noikōikāfe nōko ōitifoyaxō, nōko māpori shināsharakōita, nōko yōshi sharafoyaxori.’ Nā mekafi sharafinakōiakī nā Moisés yoini keskara. 39 Nāskatari nā ē mato taefakī yoia keskarakōiri nāno fetsari, a mia chaima nikari noisharafe a mīa mī noimeai keskafakī ixō Moisés keneni. 40 Moisés noko yoini keskai afeskax nō shara itiomākī. Askatari a Niospa meka yoimisfāfe yoinifo keskai afeskaxri nō askatiromākī. Akka nō askasharapai nā meka rafe nikakōisharax nō askasharakōitiro,” ixō Jesús ato yoini.

*“Akka, ¿tsōa fenamē Cristo?” ixō Jesús ato yōkani
(Mr. 12.35-37; Lc. 20.41-44)*

41 Fariseofo afe ichanāyoafono, 42 Jesús ato yōkani: “Akka, ¿nā Niospa katoa nā Cristoōnoa, afaa mā shināimē? ¿Tsōa fenamē?” ato faito kemanifo: “David āfe fenakīa,” fanifo. 43 Nāskata Jesús ato yoini: “David Niospa Yōshi Sharapa shināmanaino nōko Ifo Cristoōnoa kirikaki keneni iskafakī Cristo oyoamano. Ē mato yoinō mā shinākōinō:

44 Epa Niospa ēfe Ifo yoini iskafakī: ‘Mī efe xanīfokōi ĩpanakaki. Akka nā mia noikaspaifo mī ato finōkōinō ē ato mīnāmā nīchikai,’ ixō Epa Niospa yoinino David kirika keneni.

45 “Akka, ¿afeskai Cristo David āfe fena itiomē, nā David Cristo ēfe Ifora fafiapaonino?” Jesús ato fani.

46 Ato askafaino nikakakī tsōakai pishta kemanima. Nāskakē akiki ranokakī anā tsōa afaa pishta yōkanima.

23

*Jesús ato yōani fariseofoya a Moisés yoini keskara ato tāpimamisfo
(Mr. 12.38-40; Lc. 11.37-54; 20.45-47)*

1 Mā askafata Jesús yorafo yoini aōxō tāpimamisfoya: 2 “A Moisés yoikī kirika keneni keskara ato tāpimamisfo feta fariseofāfe a Moisés yoini keskara mato tāpimakani. 3 Akka ato nikakāfe. Nā mato yoiaifo keskara akāfe. Akka nāfāfe nā yoiaifo keskara akanima. Nāskakē nā yoiaifo keskara akātama afara fetsafo amisfo. Nāskakē māri ato keskara iyamakāfe. 4 Āto patoronō ato yoitiro iskafakī: ‘Na efekōi pefexō fōtakāfe,’ ato fafiaxō ēri foyoikanō ato fatiroma. Nāskarifiakī a Moisés keneni ato tāpimamisfo feta fariseofāfe mato afara fekaxkōi yoimisfo afeskax Epa Nios fe mā itiomākī Epa Nios matoki inimanō ikaxō. Nāskafikaxō mato afara axosharamisfoma. 5 Afama mīшти sharafo apaikani yorafāfe noko ōinōfora ikaxō kakapaiyanā. Niospa meka kirikaki kenekata koiro kafo pishta fakāta a mēra Niospa meka nanekaxō āto fishpi ano nētamisfo. Askatari āto pōya anori nētamisfo. Askatari tari kepanātia chainipa safemisfo sharakōira noko fanōfo ikaxō. 6 Askatari sharakōi anoxō pipaimisfo, askatari tsaoti sharakōi anori tsaopaimisfo ichanāti pexe anoax, keyokōichi noko ōinōfora ikanax. 7 Nāskakata nā yora ichapa rasi ano fopaikani noko finōkakī noko yoisharakakī, ‘Maestro noko fanōfora,’ ikanax.

8 “Akka mā, ‘Maestro, noko fakāfe,’ ato fayamakāfe. Akka keyokōi mā yora fisti keskara. Tsoa fetsakai finama. Akka mātō Maestro fisti finakōiaki. 9 Nāskakē iskaratīa nono mai anoxō tsoa Ēpa fayamakāfe. Akka nōko Epa Nioskōi nai mēra ikaki. Nā fisti Epa nō fatiroki. 10 Askatari tsoa ifofayamakāfe. Akka nā Epa Niospa katonī fisti na Cristo fisti mā Ifofatiro. 11 Nā fatora fetsa xanīfo ĩpai nā ato yonoxomis keskara itiro. Nāskaxō ato afara axosharatiro. 12 Akka fatora fētsa ato finōpaiyaito a keskara Niospa ato nāmā nīchitiro anā afaa inōma. Akka a shināi iskai: ‘Ēkai afama, ē fetsafo finōpaima,

ē ato keskarama, ixō shināito Niospa fetsafo finōmainīfofā sharakōi nīchitiro,” ixō Jesús ato yoini.

¹³ Nāskata Jesús a Moisés yoikī kirika keneni keskara ato tāpimamisfoya fariseofo yoini iskafakī: “Moisés meka ato tāpimamisfāfe, māri fariseofāfe ea nikasharakāfe. Māfi ato pārapaimiski. Mākai a mā yoia keskara mā ato yoimisma. Mā ato xītimis Epa Nios Ifofayamanōfo. Māri mā Nios Ifofamisma. Nā Nios Ifofapaiyaifo mā ato xītimis. ¡Ooa! Epa Niospa mato fāsi omiskōimaxii.

¹⁴ “¡Ooa! Mā omiskōikai, Moisés meka ato tāpimamisfāfe fariseofo fe. Mā ato yoimiski iskafakī: ‘Nō mato afara shara faxōira,’ ixō mā ato pāramis. Akka kēro ifomafa mā pāraxō mā pexe fīamis. Nāskaxō mā Nios kīfikī mā chaikōi kīfimis yorafāfe sharakōi shinānōfora ixō. Nāskakē Epa Niospa mato fāsi omiskōimaxii.

¹⁵ “¡Ooa, a Moisés yoikī kirika keneni keskara ato tāpimamisfāfe, mā omiskōixii fariseofo fe! Akka mā judeofoma ari kafāsamis ato yoikai noko keskara inōfora ikax, nō mato Niospa meka tāpimanōra ixō. Askafixō mā ato yoisharamisma. Nāskakē mato nikakanax mato keskarari ikani kiki. Mā chakakōifo nāfori chakafinakōia ikani kiki. Nāskakē mā nakanax Epa Nios ari foxikanima. Mato fe nā omiskōipakenakafo mēra foxikani.

¹⁶ “¡Ooa! Niospa mato omiskōimaxii, mā ato mēstekōi yoimiskēma. Mā tāpiamafixō mā ato paramiski ato tāpimapaikī. Mā fēxo keskarakī fēxo afe fēxo iyoikai nā rafe fenotirofo. Nāskarifiakī Niospa meka anoriyamafiano mā ato paramiski iskafakī mā ato yoikī: ‘Ē mato paraima. Nāskakē ē mato yoi, nā ē mato yoioa keskara ē ayamaito Nios kīfiti pexefānē ea omiskōimatiro,’ mā imis. ‘Akka nā Nios kīfiti pexefā aneōxō mā yoioa keskafakī mā ato axoyamaxō shināchakayamakāfe. Askafixō nā Nios kīfiti pexefā mēranoa oro aneōxō mā ato yoioa keskafakī ato axokāfe,’ ixō mā ato yoimis. ¹⁷ Mā tatimakōifo, askatari mā fēxo keskarakōifo. Akka, ¿fato sharafinakōiamē? Nā Nios kīfiti pexefā mēranoa oro raka sharafinakōia, askayamai Nios kīfiti pexefā raka sharafinakōia. Akka oro ares rakax shara itiroma. Akka Nios kīfiti pexefā mēramāi rakax shara itiro.

¹⁸ “Nāskarifiakī, ‘Nā ē mato yoioa keskara ē ayamaito nā a kamakixō yoinā koati mīsamāfānē ea omiskōimatiro,’ ixō yoimisfo. Akka mā fariseofāfe, anorima mā ato yoikī iskafamis: ‘Nā mīsamāfā aneōxō mā ato yoioyomis keskafakī mā ato axoyamafixō shināchakayamakāfe. Askatari nā mīsamāfā kamakixō yoinā koaki nā yoinā aneōxō mā ato yoioyomis keskara akāfe,’ ixō mā ato yoimis.

¹⁹ “Akka mā fēxo keskarakōi. Akka, ¿fato sharafinakōiamē? Nā afarafo mā Nios ināi raka sharafinakōia, askayamai a kamakixō yoinā koati mīsamāfā raka sharafinakōia. Akka nā yoinā ina ares shara itiroma. Askafixō nā shara, māmāi mā Nios ināno mīsamāfā anoxō koakī. Nāskakē nā yoinā inapa nā koati mīsamāfā finōama. ²⁰ Akka nā koati mīsamāfā aneōxō afara yoioaito nā koati mīsafā fistiōnoa aneima. Akka nā mīsamāfā kamaki rakaōnoari yoi. ²¹ Akka nā Nios kīfiti pexefā aneōxō afara yoikī Nios kīfiti pexefā fistiōnoa yoima. Akka Niosri a mēra ikano mā yoi. ²² Akka nā nai aneōxori mā afara yoikī, nai fistiōnoa mā yoima. Nā Nios Xanīfo nai mēra ika anoafori mā yoi.

²³ “¡Ooa, a Moisés yoikī kirika keneni keskara ato tāpimamisfāfe fariseofo feta! Ea nikakapo. Māfi ato parapaimiski. Māto afama mīstiffo mā Nios ināpaifikī a Niospa afara fetsa yoia keskara mā shināmisma. Mā māto fana mīstiffo nā korātorofo fana fetsa mīstiffori mā Nios ināmis. Akka fetsafo mā ato yonomaxō afara fichipaiifaifāfe mā ato noikima mā ato afaa ināmisma. Epa Niospa yoini keskafakī mā ato noima. Akka a mā yoiai keskara tsōa māto meka chanīmara fatiroma. Nāskaxō māto fana mīstiffo mā Nios ināfikī

a Niospa yoia keskara mā shināima. ²⁴ Akka mā nā fēxo afe fēxo iyotiroma keskarrafo. Nāskarifiakī māri mēstekōi shināsharaima yorafo Niospa meka tāpimapaifikī. Nāskaxō afara sharakōifo mā ato tāpimasharamisma. Akka afara sharama mā ato tāpimamis. Akka nāpe pishta mātō kecho mēra naneano, mā fixō mā potamiski. Akka nā camello efapakōi mā potakaspakī mā ayamis.

²⁵ “¡Ooa, a Moisés yoikī kirika keneni keskara ato tāpimamisfāfe fariseofo feta! Mā ato parapaimiskōi. Akka mātō kecho yafi mātō sapa femākīa fisti chokasharafikī, oke mērakai mā chokasharamisma, nachoshtax pisikōi itiro. Nāskarifiakī mā yorafo ōimapai nafo sharafora noko fanōfora ixō. Akka mātō shinā mēraxō mā shara shināyamafikī, oa choshta pisi keskaraxō. Nāskaxō afarafo mā ato fīamis fetsafo ratexō. Askatari mareskōi mā shinākī, ichapakōi fichipaikī mā icha icha famis. Nāskakē Epa Niospa mato omiskōimakōixii. ²⁶ Fariseofāfe, mākai mēstekōi shināsharamisma. Akka iskaratīa mātō shinā mēraxō shināsharakāfe, isharakōixikakī. Anā afaa chaka shinākakima. Nāskaxō mā yorafo ikisharakōitiroki.

²⁷ “¡Ooa, a Moisés yoikī kirika keneni keskara ato tāpimamisfāfe, fariseofo feta! Māfi ato parapaimiski. Māfi nā mafa kini keskaraki. Akka mafa kini femākīa oxo sharakōi nō ōifiaino oke mēra sharama. A namisfāfe āto xaofō fospikōia pisia fetsa fetsatapafō. ²⁸ Nāskarari shara keskara yorafāfe mato ōikani. Akka mātō shinā mēraxō mā shara shināima. Afara chakakōifo mā shināmis, ato mā parakōimis.

²⁹ “¡Ooa, a Moisés yoikī kirika keneni keskara ato tāpimamisfāfe, fariseofo feta! Mā ato parapaimis. Nāskakē Niospa mato omiskōimakī finakōixii. Nā mātō xinifo a Niospa meka yoimisfo fetsafāfe ato retenifo mairafo ano mā tokiri famis a mātō xinifo namisfo ato shināxikī. Nāskaxori a mairafo mānāo charofori mā famis yorafāfe ōikakī na mēra sharakōira fanōfora ixō. ³⁰ Nāskaxō mā yoimis iskafakī: ‘Nōko xinifāfe a Niospa meka ato yoimisfo retenifo keskafakī nōri niyoxō nō ato retereranima,’ ixō mā yoimis. ³¹ Akka nā mā yoiai keskara chanīma. Mātō xinifāfe ato chakafakī ato retenifo. Māri ato keskarakōifo. ³² Nā Niospa matoki nīchiari mā retexii. Akka nā mā apaiyai keskafakī ayotakāfe.

³³ “Mā afara chakafa fafāfāini. Nāskakē mā rono keskarrafo. Mā chakafa fafāfāini. Mā rono paekapato fake keskarakōifo. Nāskakē mā omiskōipakenakafo mēra mā kaxii. Akka afeskax mā faki ichotiroma. Askatari tsōakai mato nētefatiroma. ³⁴ Nāskakē a Niospa meka yoimis ē matoki nīchikai. Askatari a Niospa meka tāpisharakōixō shināsharakōimisno ē nīchikai. Nāskatari a Moisés yoikī kirika keneni keskara ato tāpimamisfori ē matoki nīchixii. Nāskakē atiri mā ato retexii. Askatari fetsafori ifi cruz ikaki mā ato mastaxii nanōfo. Askatari fetsafori mātō ichanāti pexe mēraxō mā ato koshaxii. Nāskakī mā ato omiskōimakōixii. Nāskaxori fetsafori mā ato chīfafofāsa faxii ato omiskōimayanā. ³⁵ Nāskakē Epa Niospa matori omiskōimaxii nā mātō xinifāfe nā yora sharafo retenifono. Akka taefakī nā Abel sharafiano āfe ōchi reteni. Askatari fetsafori sharafiafono ato retenifo. Chipori mā xini ichapa finōano nā Zacarías, Berequías fake, mātō xinifāfe retenifo. Nā Zacarías feronāfake sharafiano Nios kīfiti pexefā chaimashtaxō koati mīsamāfā naki-rafexō retenifo. Nāskakē Niospa atoōxō mato omiskōimaki finakōixii. ³⁶ Akka chanīma ē mato yoinō. Na yorafo iskaratīa niyoafo Niospa ato omiskōimaki finakōixii,” ixō Jesús ato yoini.

*Jesús Jerusalén anoafo ato shināi oiani
(Lc. 13.34-35)*

³⁷ Anā Jesús ato yoini iskafakī: “¡Ooa, Jerusalén ano ikafāfe! Māfi a Niospa meka yoimisfo mā ato retemiski. Askatari aōnoa āfe meka shara yoitanōfo

Niospa mato ano nīchiafori mā ato tokorinī tsakakī retemis. Oa takaranā āfe fakefo āfe pei nāmā onetiro keskafakī ē mato kexepaifiaito mā ea nikakas-pamis. Māfi ekeki omismakī ē mato īkipanā. ³⁸ Akka ōikapo, iskaratīa anā tsōa mato kexeima nā mā imis anoa. ³⁹ Ē mato yoinō, iskaratīakai mā ea anā ōima. Nā ē oaitīa mā ea ōixii. Nā ē nai mēranoax ē oaitīa mā yoikī iskafaxii: ‘Nafi Niospa nokoki nīchia. Fāsi sharafinakōia Epa Niospa na shara fapanaka,’ ixō mā eōnoa yoixii,” ixō Jesús ato yoini.

24

*Jesús ato yoini: “Na Nios kīfiti pexefā pāoixii,” ixō
(Mr. 13.1-2; Lc. 21.5-6)*

¹ Nāskata Jesús Nios kīfiti pexefā mēranoax tsekekainaino, aōxō tāpimisfo akiki fēkaxō yoinifo iskafakakī: “Ifo, ōipo. Nōko Nios kīfiti pexefā sharakōi,” fanifo. ² Askafaifono Jesús ato yoini: “Na mā ōiai, akka ē mato pāraima anākai tokirifo petsanāmēxima, keyokōi pāoixii. Na tokirifori maoui fetsexii,” ato fani.

*Afaa afeskaximākai mā chaima nōko mai keyoaino Jesús ato yoini
(Mr. 13.3-23; Lc. 21.7-24; 17.22-24)*

³ Askata fonifo māchifā Olivos ano. Nāno Jesús tsaoni. Nāskakē aōxō tāpimisfo akiki fonifo yōkaxikakī iskafakakī: “Nō tāpipai mī noko yoinō afetīa iximē a mī yoiai keskai. Afeskaxō nō tāpitiromē a mī anā oxiai mā mai keyoaino noko yoife,” fanifo.

⁴ Askafaifono Jesús ato kemani: “Kexemesharakani mā ato nikaino mato afara chakafamatirofoki. ⁵ Yora ichapa fēkaxō, ‘Ē Cristora,’ ixō mato paraxikani. ⁶ Nāskaxori mā nikaxii yorafo retenāifāfe chai inoax. Nāskatari nonoaxri askaxikani retenākani. Askara ōi, rateyamakāfe. Nā ē mato yoimis keskakōi kiki. Nāskafax nōko mai fena keyoxima kiki, chipo ixii. ⁷ Akka yorafo mai fetsa anoax mēenāpaiyaifono yora fetsafori mai fetsa anoax retenāixikani. Askatari fonāiki finakōixikani afaa pikanima. Nāskatari nā mai fetsa anoax mai naya naya ixii. Askatari pae finakōia fetsa fetsatapapo nokoxii kiki. ⁸ Akka taei nā omiskōiaifo, askai fetsexii.

⁹ “Nāskata mato achikaxō fetsafo mato ināixikani mato omiskōimanōfo. Nāskaxō mato retenōfo. Nāskaxō keyokōi nā mai tio anoxō eōxō mato noikaspaxikani. ¹⁰ Nāskatari yora ichapafāfekai ea anā chanīmara fakanima. Nāskakanax āa ranā noikaspa faatanāixikani. Nāskakaxō yora fetsa yōsixikani ato achinōfo. ¹¹ Nāskatari yora ichapafo āa chanīxikani iskakani: ‘Ea Niospa shināmani kiki ē Niospa meka mato yoinō,’ iki āa chanīxikani. Nāskaxō yora ichapafo ato pāraxikani. ¹² Nāskaxō ato chakakōi faxikani. Ato noimisfo keskafakī atirififāfe anā ato noisharaxikanima. ¹³ Akka nā ea shināmakixoma ea shinākōiai nāfi ēfe Epa Nios fe ipaxatiroki. ¹⁴ Nāskakē na meka shara Jesúsnoa nikaxakani Jesús noko nāxonikē Epa Nios xanīfo anoax nō afe ipaxanō. Na maifo tii ano ato yoiaifono, chipo nōko mai keyoxii.

¹⁵ “Nā Niospa meka yoimisto Daniel a inōpokoai yoikī keneni iskafakī: ‘Nios kīfiti pexefā mēra afara chakakōi faxikani,’ ixō kirika keneni. Nāskakē na kirika kenea anexō tāpikāfe. ¹⁶ Nā chakafinakōia ōikanax, nā Judea anoafu machi keya ano ichorisatakāfe. ¹⁷ Askatari āfe pexe māmākīa tsoaxō ato fichiāx koshikōi fotopakekafā āfe afaa fiamax ichotiro. ¹⁸ Askatari a āfe tare ano yonoaito anā oxō āfe rapati fitiroma. ¹⁹ Askatari a kēro fake naneafu fe a fake yome pishta chocho amaifo omiskōixikani māmāi yorafo omiskōifinakōiaifono. ²⁰ Akka Epa Nios kīfikāfe iskafakī: ‘Epa Niosi, noko omiskōimayamafe nōko pena tenetitīa askayamai yōtaino matsi meexikākīma,’ ixō yoikāfe. ²¹ Askatari a omiskōiaifo nokoxii, taeyoi askakatsaxakīma. Nā

Niospa yora onifakī taefanitīa tsōa askara ōiyomisma. Askatari anā tsoa chipo omiskōinakama. ²² Akka a omiskōiaifo nōko Ifāfe xateyamano, tsoa nikeranama nai keyokeranifo. Akka afe yorafo ato noikī omiskōinōfoma xateni atomāi katonixakī.

²³ “Akka fētsa mato yoikī iskafaino: ‘Ōikapo, nakīa Cristo,’ mato fayanā, ‘Oa onokīa, ōikapo,’ mato faito nikayamakāfe. ²⁴ Akka nā chanīmisfo fekani, ē Cristora ixikani, nāfo nō Niosxō nō mato yoirā ikani. Nāskakaxō tsōa atiroma keskara fakani Satanās yōshixō mato parapaikakī. Nā Niospa ato katoafori nāfo ato parapaikani. ²⁵ Mē mato yoikai iyoamano shināsharakāfe. ²⁶ Nāskakē mato parapaikani: ‘Cristo mā tsōa istoma ano oa,’ ikaxō. Nāskakē ari foyamakāfe. Askatari mato iskafakani: ‘Ōikapo, na Cristo na pexe mēra,’ mato faifāfe ato nikayamakāfe. ²⁷ Akka nā kana peikī fafetanaito nō ōitiro keskara, nāskarifiāi ē oxii xafakīakōi ea ōixikani ē oaito. ²⁸ Akka nā naafo ano ishpifo ichanātiro. Nāskari fakī keyokōichi ea tāpīxikani ē oaito,” ato fani.

*“Niospa Fake fotoaino afe keskara iximākai,” ixō Jesús ato yoini
(Mr. 13.24-37; Lc. 17.26-30, 34-36; 21.25-33)*

²⁹ Anā Jesús ato yoini iskafakī: “Akka nā penatari, nā omiskōiaifo mā keyoano, xini fakishkōi ixii, ōxeri anā chaxaxima. Fishifori nai mēranoax pakei fetsexii, askatari nā nai mēranoafo naya naya iki fetsexii. ³⁰ Nāskatari ōixikani nai mēranoax afara afeskaraito mā tāpinō ē fotoaitīa. Nāskatari keyokōi nā maitio anoax ratei fetseyanā oiaxikani. Nāskatari ea ōixikani ē nai mēranoax nai kōinī fotoiyoaito. Ē sharaḡnakōia ēfe sharaōnoax ē fotoaito ea ōixikani. ³¹ Nāskatari ēfe ājirifori ē yoixii āto maneti fāsikōi manekakī chāi chāisafanōfo a nikakanax efe yorafo a ē ato katoa ichanānōfo. Chai inoax fisti rasi efe yorafo fexikani nāno fistiax ichanāxikakī.

³² “Akka shinākapo ē mato yoinō. Mā yōkkafaiaino mā tāpitiro āfe pei siriki-aito. Nāskakē āfe peifo keyopakeaito ōikī mā tāpitiro māmāi chaima xiniaito. ³³ Nāskarifiakī afarafo afeskaraito ōikī mā tāpitiro mē chaima oaino askai fetsexii. ³⁴ Ē mato pāraima ē mato yoikōi, na ē mato yoiai keskara nono mai anoxō yorafāfe nayokaxoma ōiyokani. ³⁵ Akka nai fe mai keyoi. Akka ēfe meka fisti keyonakama, nā ē mato yoiai keskakōi.

³⁶ “Afetīara nai mēranoax ē oxii tsōakai tāpiama. Nā ājirifāfe nai mēra ifiakaxō tāpiafoma. Ērikai tāpiama. Ēfe Epa Nios fistichi tāpia. ³⁷ Akka nā Noé niyoano ini keskai, nāskarifiāxii ē anā oaino. ³⁸ Nāskata fakafānē ato maiyoamano, Noé kanōanāfā mēra ikini, yorafo pikāta, ayakāta fīanākāta ikaifono. ³⁹ Akka tsōa shināyamaino mā faka faipafaxō keyokōi ato āsakī mitokōini. Nāskarifiāxii ē oaino ea shinātama afara chakafaifono. ⁴⁰ Nāskatari feronāfake rafeta āto tare ano yonokani. Fetsa ea ari kai yamarisatatiro. Akka fetsa nētetiro nā omiskōipakenakafo mēra kaxiki. ⁴¹ Nāskarifiāi kēro rafeta xiki renekani. Fetsa ea ari kai yamarisatanaino akka fetsa nētetiro nā omiskōipakenakafo mēra kaxiki.

⁴² “Nāskakē itipinīsharakāfe oa mā moinākafanai keskakāfe. Akka mā tāpiamaki afetīara ē anā oxikai. ⁴³ Nāskakē māri nā keskara tāpisharakāfe. Akka pexe ifāfe mā tāpīxō afetīa yometso nokoimākai ixō āfe pexe itipinīshara fatiro mā moixō, a mēra ikiax yometsoyamanō. ⁴⁴ Nāskarifiāi māri itipinīsharakāfe. Akka oimara ixō mā ea manayamaino ē matoki nokorisatani,” ixō Jesús ato yoini.

*Ina shara yafi ina chakaōnoa Jesús yoini
(Lc. 12.41-48)*

⁴⁵ Anã Jesús ato yoini iskafakī: “Ē mato yoinō afe keskaramākī a yonoxomis shara mā tāpinō. Xanīfāfe mai fetsa ari kakī, a yonoxomis āfe pexe ano nīchifaini nānoxō a yonoxomis fetsafo a piaifo pena tii ato ināfafainō. ⁴⁶ Mā mai fetsa ari katani oxō ōitoshini a yonoxomisto mā yonoxosharakōiano. Nāskakē akiki inimakōini a yonoxomisri inimakōini māmāi yonoxosharakōiax. ⁴⁷ Ē mato paraima. Nāskaxō āfe xanīfāfe mā xanīfo imaxō āfe afama mīstiffo kexexonō inātiro. ⁴⁸ Akka nā yonoxomis chakapa shinātiro: ‘Ēfe xanīfo fena oimara,’ ixō. ⁴⁹ Nāskaxō a yonoxomis fetsafori ato seteketsani. Askatari nā pāemisfo fe rafexō ato feta piyanā askatari ato feta ayayanā. ⁵⁰ Iskaratīa ēfe xanīfo oimara ixō manasharayamaino nā penata āfe xanīfo nokorisatani. ⁵¹ Mā oxō nā yonoxomis omiskōimaxii. Nā yora keparanāmisfo fomisfo mēra potaxii. Nāskakē anoax oiayanā omiskōipakenaka,” ixō Jesús ato yoini.

25

Meka fetsafaxō Jesús ato yoini diez xotofake xomayaōnoa

¹ Anã Jesús ato yoini iskafakī: “Ē mato yoinō meka fetsafaxō mā tāpinō ě anã oxii a Nios Ifofafoōnoax afe keskara ixikanimākai. Akka nā diez xotofake xomayafāfe āto rāpari fifaikani fonifo. Feronāfāke rama āfiyaino afe fista mēra foxikakī manai fokani fonifo. ² Akka nā cinco xomayafāfe shināsharanifoma, itipinīnifoma. Akka nā cincofāferi shināsharanifo. ³ Akka nā shināsharaifāfema āto rāpari foiyakakī āto kirosī fonifoma anā fospifaxikakima. ⁴ Akka nā shināsharakōiaifāfe āto manishomoki kirosī fonifo. Askatari āto rāpari fonifo. ⁵ Akka feronāfake fena nokoyamaino, mā fakishaino, oxakatsa ikani. Nā kēro xomayafo oxanifo. ⁶ Nāskakē yame nakekafanaino nikanifo kenaiifāfe iskaifono: ‘Mā nā feronāfake oi kiki! Moinīfofākāfe, ifixikaki!’ ato faifono. ⁷ Nāskakē nā kēro xomayafo moinīfofākata itipinī fakī fetsanifo āto rāparifo ōtaketsakakī. ⁸ Nāskata nā cinco xotofake shināsharaifāfema nā cinco xotofake shināsharaifo āto kirosī pishta yōkanifo: ‘Noko kirosī pishta inākāfe. Nōko rāpari otasharaima kiki,’ ato fanifo.

⁹ “Ato askafaifono nā xotofake shināsharaifāfe ato kemanifo ato iskafakakī: ‘Maa. Nō mato inātiro, nōri afaa otatiroma. Akka mā kaxō fitiro a kirosī miniaifo anoa fitakāfe mātonā faxikakī,’ ato fanifo. ¹⁰ Akka nā cinco xotofakefāfe kirosī fiifofāfono nā manaifo feronāfake nokoni. Nāskakē nā cinco xotofakefo shara shināmisfo nā feronāfake mā nokoaino afe pexe mēra ikinifo afeta fista ayanā pixikāki. Nāskakaxō pexe fepoti feponifo. ¹¹ Nāskano nā xotofakefo kirosī fitakani anā fenifo. Mā fēkaxō iskafakī yoitoshinifo: ‘Xanīfo, noko fepoti fēpexōfe nō ikikanō,’ faifāfe, ¹² ato kemani: ‘Maa. Ēkai mato ōimisma, ě mato ikimatiroma,’ ato fani.

¹³ “Nāskarifiakī mări isharakōixō ea manasharakōikāfe. Afetīara ě anã matoki oxikai tsōa tāpamaki,” Jesús ato fani.

Meka fetsafaxō koriōnoa Jesús ato yoini (Lc. 19.11-27)

¹⁴ Anã Jesús ato yoini iskafakī: “Ē anã mato yoinō Nios xanīfo iskaraki. Feronāfake mā mai fetsa ari kakī a yonoxomis kenaxō yoini āfe kori kexexonō. ¹⁵ Akka a yonoxomis fetsa ināni cinco mil. A yonoxomis fetsari ināni dos mil, fetsari ināni mil. Akka nā kori kexekī tāpia ichapa ināni. Akka a kori kexekī tāpisharafomari ichapa ato inānima. Nāskax kani mai fetsa ari. ¹⁶ Akka āfe ina fetsa nā cinco mil fiato nā kōri afama mīshti fini. Nāskaxō anā cinco mil fini āfe afama mīshtiōxō. ¹⁷ Nāskafakīri nā dos mil kori fiato nāatori nāskarifani afianā dos mil kori fikī. ¹⁸ Akka nā mil kori fiato nāato kori oneni āfe xanīfo mekexokī. Mai kini mēra maifani.

¹⁹ “Akka mā samarakax anā oni āto xanīfo. Mā oxō a yonoxomisfo nā tres ato yōkani afe tii kori fixofafomākī. ²⁰ Nāskakē nā cinco mil kori fini akiki oi taeni. Nāskaxō āfe xanīfo kori ināni iskafakī yoiyanā: ‘Xanīfo, mī ea cinco mil kori ināti. Akka ē finōmainīfofā anā cinco mil faxō ē fia. Ōipo. Nakīa mī kori,’ fani.

²¹ “Askafaito āfe xanīfāfe yoini: ‘Aicho, mī ea yonoxomis sharakōi. Nā pishta ē mia ināoxō mī yonosharakōia. Nāskakē ēfe afama mīshtifo ichapakōi ē mia anā ināi mī ea kexexonō. Nāskakē nā ē inimai keskariai mīri inimafe,’ ixō yoini.

²² “Nāskatari a yonoxomis fetsari chipo oni, nā dos mil kori fini. Oxō yoini iskafakī: ‘Xanīfo, mī ea dos mil kori ināni. Akka ē finōmainīfofā anā dos mil faxō ē fia. Nakīa mī kori,’ fani. ²³ Nāatori askafaito āfe xanīfāfe yoini: ‘Aicho, mī ea yonoxomis sharakōi. Nā ē mia ināoxō mī yonosharakōia. Nāskakē ēfe afama mīshtifo ē mia anā kexemani. Nāskax mīri nā ē inimai keskariai mīri inimafe,’ fani.

²⁴ “Nāskata a yonoxomis fetsari oni nā mil kori fini. Mā oxō āfe xanīfo yoini: ‘Xanīfo, ē tāpia mī feronāfake mitsisipakōi. A mī fanama anoa mī fimis. Askatari a mī saakama anoafori mī fimis. ²⁵ Nāskakī ē mesekī ē mia kori maifaxōa. Nakīa mī kori,’ faito āfe xanīfāfe kemani: ²⁶ ‘Mī ea yonoxomis chakakōi. Askatari mī xanikōi. Akka, ĵmī shināmē a ē fanama anoafō fita, a ē saakama anoafori ē fimis? ²⁷ Nāskakī nānori mī shinākī mī kori banco ano ea fāxōama anā oxō ē kori ichapa fikerana mā ēfe kori ichapano ē anā fikerana,’ fani. ²⁸ Nāskaxō nā anoafō ato yoini: ‘Nā feronāfake nā mil kori fīakāfe fetsa ināxikakī nā kori diez milya,’ ato fani. ²⁹ Akka nā afara ichapaya ichapayakōi itiro. Nāskaxori āfe afara ranāri anā meketiro. Akka nā afaa ichapayama āfe afara fīatiro anā afaa ichapaya iyamanō. ³⁰ Nāskata a yonoxomis chaka mā potaxō fakishifā mēra nīchini nā fakishi mēranoax oiayanā omiskōipakexanō,” ixō Jesús ato yoini.

Mā mai keyoaino nā omiskōipakenakafoōnoa Jesús ato yoini

³¹ Anā Jesús ato yoini iskafakī: “Ē mato anā yoinō, ea nikakapo. Ē nai mēranoax oni. Ē Niosfiax feronāfakekōi ē oni. Ē anā nai mēranoax fotoyoi, ē xanīfokōi oxii ēfe ājirifo fe keyokōi ē oxii, ea kemataima mapoi fetsexikani. Askatari efe xanīfāfe tsaoti ano tsaoxikani. Keyokōi sharafinakōia ōixikani. ³² Nāskatari yorafo keyokōi nā maitio anoafō ēfe ferotaifi ichanāxikani. Nāskakē ē ato paxkanā faxii nā oveja kexemisto āfe ovejafōya āfe cabrafo paxkanā fatiro keskafakī. ³³ Nā āfe inafō kexemisto āfe inafō paxkanā fakī āfe ovejafos āfe pōya kayakai aōri nīchixii. Askatari āfe cabrafori āfe pōya mishkiori nīchixii. Nāskarifiakī ē yorafo keyokōi ē paxkanā faxii. Nā ea Ifofaafos ēfe pōya kayakai aōri ē ato nīchixii, akka a ea Ifofaafomafori ēfe pōya mishkiori ē ato nīchixii. ³⁴ Nāskaxō mē xanīfoxō ē ato yoixii nā ēfe pōya kayakai aōrinoafō ekeki fekāfe, ēfe Epa Niospa mato inimamamiski. Nāskakē ēfe Epa Xanīfo anoa mā afara fikai nā mai onifaitīa mato yoiyoni keskara. ³⁵ Akka ē fonāikaito mā ea pimamis; ē nōamāikaitori mā ea ayamamis; ē pexemaisax kafāsaitori, ‘Nono ēfe pexe ano ofe nono oxaxiki,’ mā ea famis. ³⁶ Askatari ē rapatimaiskē mā ea ināmis; ē isinī ikaitori mā ea kexesharamis; ē karaxa mēra ikikēri kaxō mā ea ōimis.

³⁷ “Ē ato askafaito ea yōkaxikani iskafakākī: ‘Ifo, ĵafetīa nō mia ōimismē mī fonāikaito, akka mī fonāikaito nō mia pimamis? Askatari, ĵafetīa nō mia ōimismē mī nōamāikaito, akka mī nōimāikaito nō mia ayamamis? ³⁸ Askatari, ĵafetīa nō mia ōimismē pexemaisax mī kafasaito, akka nō mia pexe ināmis ano mī oxanō, askatari mī rapatimaiskē akka nō mia rapati ināmis? ³⁹ Askatari,

¿afetīa mī isinī ikaito nō mia ōimismē? Askatari, ¿afetīa karaxa mēranoa nō mia ōikamismē? ixō ea yōkaxikani.

⁴⁰ “Ea askafaifono ē ato kemaxii: ‘Ē mato paraima, nā fetsafo omiskōiaino mā tanaima isharaxō eōxō mā axomis.’

⁴¹ “Askatari na ēfe pōya mishkiorinoa ē ato yoikī iskafaxii: ‘Na ēfe pōya mishkiorinoa emakinoax fotakāfe mā chakakōikī. Chii xoisai mēra fotakāfe anoax omiskōixikaki. Nā ē chii xoisai itipinī fani mēranoax Satanás chaka fe āfe yōshi chakafori anoax afe omiskōinakafo. ⁴² Akka ē fonāikaito mā ea pimamisma. Askatari ē nōamāikaito mā ea ayamamisma. ⁴³ Askatari ē pexemaisax kafāsaito, “Nono nōko pexe mēra ife,” mā ea famisma. Askatari mā ea rapati ināmisma. Askatari karaxa mēranoa mā ea ōikamisma. Askatari ē isinī ikaito mā ea ōikamisma,’ ixō ē ato yoixii.

⁴⁴ “Ato askafaito yorafetsafāfe yōkaxikani iskafakakī: ‘Ifo, ¿afetīa nō mia ōimismē mī fonāikaito, askatari a mī nōiamāikaito, askatari mī pexemaiskē, askatari mī rapatimaiskē, askatari a mī isinī ikaito, askatari a mī karaxa mēra ikikē nō mia tanamisma nō mia ōikaspamis?’

⁴⁵ “Ea askafaifono ē Xanīfokōixō ē ato kemaxii iskafakī: ‘Ē mato paraima. Nā omiskōiaifo mā ato tanamisma nafokai afaafoma ixō askatari eari mā tanamisma,’ ixō ē ato yoixii. ⁴⁶ Nāskakē nāfo nā omiskōipakenakafo mēra foxikani. Akka nā ea Ifofafo efe nīpanakafo,” ixō Jesús ato yoini.

26

*“¿Afeskaxō nō Jesús retetiromē?” ixō shinānifo
(Mr. 14.1-2; Lc. 22.1-2; Jn. 11.45-53)*

¹ Nāskata mā ato yoikī keyota Jesús aōxō tāpimisfo yoini: ² “Mā mā tāpiakī oxa rafeta Pascua fista ikiki. Nāskatari Pascua fistatīa ea achikani fetsafāfe ea mastanōfo,” ixō Jesús ato yoini.

³ Nāskakē a Niospa meka yoimis xanīfofo fe a judeo anifofo ichanānifo Caifás pexe anoax. Nā Caifás ato Nios kīfixomisfāfe āto xanīfo ini. ⁴ Nāno ichanākanax yoinānifo: “¿Afeskaxō nō Jesús achitiromē paraxō retexiki?” ikanax yoinānifo. ⁵ Nāskakanax yoinānifo: “Fistatīakai nō achitiroma yorafā rasi mekai fetsekani nokoki ōitifishkitirofo,” ikanax yoinānifo.

*Kēromā Jesús shinākī āfe mapoki pirofomā nachini
(Mr. 14.3-9; Jn. 12.1-8)*

⁶ Nāskata Jesús Betania ano ini Simón pexe ano. Nā Simón “Rashkishiai” fapaonifo. ⁷ Jesús nānoxō piaino kēro fisti akiki kani pirofomā manishomo sharakōikī foikai nā manishomo āfe ane alabastro. Akka nā pirofomā kopikōi ini. Jesús mīsa ano tsoxō piaino, nā kēromā āfe mapoki pirofomā nachini. ⁸ Askafaito ōikani Jesúsxō tāpimisfo ōitifishkiyanā iskanifo: “¿Afeskakī nā pirofomā shara mī nachimē? ⁹ Mī ato minixō mī kori ichapa fixō a afaamaisfo mī ato inākerana,” fanifo.

¹⁰ Askafaiāfe nikakī Jesús ato yoini: “¿Afeskakī na kēro mā fekaxtefaimē? Na ea iskafai sharaki,” ato fani. ¹¹ “Akka nā afaamaisfori mato fe ipanakafo. Akka eakai mēxotaima mā ea anā ōima. ¹² Akka na kēromā ea iskafakī ēfe yoraki pirofomā nachia ea itipinīsharafakī ea iskafa ea maifasharaxinōfo. ¹³ Ē mato pāraima, fanīxōra na meka shara eōnoa yoikakī nā mai tio anoxō na kēromā ea iskafaōnoa yoixikani. Askatari na kēroōnoa shināpakenakafo, shināmakiyamaxikakī,” ixō Jesús ato yoini.

*Judaspa aōxō tāpifikatsaxakī Jesús ato achimani
(Mr. 14.10-11; Lc. 22.3-6)*

¹⁴ Nānori Jesús ato yoiaino a aōxō tāpimis fetsa, āfe ane Judas Iscariote, nā kani nā ato Nios kīfixomis xanīfofo ano. ¹⁵ Mā kaxō ato yoini: “¿Afe tii mā ea kori inātiromē ē mato Jesús achimanō?” ato feito yoinifo: “Treinta nō mia inātiro,” fanifo. ¹⁶ Nāskaxō Judaspa shinākī taefani: “¿Afeskaxomāi ē Jesús ato achimanō?” ixō shināni.

Mā chaima reteaifono Jesús aōxō tāpimisfo feta yātapake pini
(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Akka nā Pascua fistatīa pāa faraxatimais pipaonifo. Nāskata mā fista pakeano aōxō tāpimisfo akiki fokaxō yōkanifo: “¿Fanī mī fichipaimē ano kaxō nō itipinī fanō, anoxō Pascuatīa yātapake pixiki?” fanifo.

¹⁸ Askafaifono Jesús ato kemani iskafakī: “Oa pexe rasi ano fotakāfe. Nānoa feronāfake fetsa fichixō yoitakāfe iskafakī: ‘Nōko Ifāfe noko yoia nō mia yoiyonō iskafaki: Mē chaima naikai. Nōko fistatīa mī pexe anoxō eōxō tāpimisfo feta ē pii kaikai,’ ixō yoitakāfe,” ato faano, ¹⁹ nāskafakī yoinifo nā āto Ifāfe ato yoia keskafakī. Nānoxō itipinī fanifo Pascua fistatīa pixikakī.

²⁰ Jesús mā fakishaino pexe ano nokoax mīsa ano tsaoni a aōxō tāpimiskōifo fe. ²¹ Nānoxō piyanā ato yoini: “Ē mato pāraima, fatora mā fētsa ea mā ato achimafainaka,” ato fani.

²² Ato askafaito nikai shināmitsakōinifo. Nāskaxō yōkaketsanifo: “¿Ēraka, Ifo?” fakī fetsanifo.

²³ Askafaifono Jesús ato kemani: “Nā efeta sapakinoa pāa momoxō piaito nāato ea ato achimaxii. ²⁴ Ē Niospa Fakekōifiax ē yorakōi. Nā eōnoa yoikī kirika kenenifo keskakōi fakī ē asharakōitiro. Akka nā feronāfake ea ato achimafiax akairi omiskōikōixii. Akka nā feronāfake shara ikerana fakeyamanixakī,” ixō Jesús ato yoini.

²⁵ Nāskakē Judaspa nā ato achimanaito yōkani: “Maestro, ¿ēraka?” feito, “Ēje, nā mī yoiai keskarakīa,” Jesús fani.

²⁶ Nāskakaxō piaifono Jesús pāa tsomainīfofā Apa Nios kīfini. Mā Apa kīfita pāa kaxkeketsaxō aōxō tāpimisfo ināni ato iskafayanā: “Na ēfe nami keskara pikāfe,” ato fani.

²⁷ Ato askafata kechokinoa fimi ene tsomainīfofāxō Apa Nios kīfini. Nāskaxō aōxō tāpimisfo ato ayamani ato iskafayanā: “Na fimi ene ayakāfe,” ato fani.

²⁸ Nāskaxō ato yoini: “Nafi ēfe imi keskaraki. Akka nā ē mato yoiyoni keskai mē nai. Nāskakaxō ēfe imi ōikaxō tāpitirofo Epa Niospa yoiyoni keskafakī yora ichapafo ē ato chaka soaxonō. ²⁹ Akka anā ē mato yoinō ē anā mato feta fena na fimi ene ayaima. Mā mā nai mēra kano ē mato feta anā fimi ene yaxii ēfe Epa xanīfo anoxō,” ixō Jesús ato yoini.

“Ē Jesús ōimisma,” Pedro ixiaino Jesús ato yoini
(Mr. 14.26-31; Lc. 22.31-34; Jn. 13.36-38)

³⁰ Nāskakata mā fanāiki xatekata machi Olivos ano fonifo. ³¹ Nānoxō Jesús ato yoini: “A na fakishi keyokōi mā ea shināmaki fetsei. Nānori kirika kenenifo iskafakakī: ‘Āfe ifo reteaifono, āfe ovejafo ichoi fetsetirofo,’ ixō kirika kenenifo,” ato fani. ³² “Akka ea retefiafono ē otoax ē Galilea ano rekē kai mā kayoamano,” ato faino, ³³ Pedro kemani: “Keyokōi shināmakiaifono, akka ēkai mia shināmakima,” fani.

³⁴ Askafaito nikakī Jesús yoini: “Ē mia pāraima na fakishi takara fene keofamano, ‘Ē Jesús ōimismara,’ mī ea fai tres fakī,” fani.

³⁵ Askafaito nikakī anā Pedro kemani: “Maa. Mia retefiafono ē mefe nai. Ē ōimismara ē mia faima,” fani. Pedro askafaito nikakakī keyokōichi aōxō tāpimisfāfe askafakī fetsanifo.

Getsemaní anoxō Jesús Apa Nios kīfini
(Mr. 14.32-42; Lc. 22.39-46)

³⁶ Nāskata Jesús kani aōxō tāpimisfo fe Getsemaní ano. Nānoxō ato yoini: “Nono tsaokāfe onī chaimashta kaxō ē Epa Nios kīfiyotanō,” ato fani.

³⁷ Akka Pedro iyoni, Zebedeo fake rafe yafi. Nāskaxō āfe yora meeni shināmitsakōiyanā fekaxteaito. ³⁸ Anoxō ato yoini: “Ēfe yōshi shināmitsai napaiyaito ē meikai. Nono nētekāfe oxakakima māri efeta ōisharaxikakī,” ato fani.

³⁹ Ato askafata Jesús ares fisti ori chaimashta kani. Nānoax maikiri fepepakekafata āfe fishpi mai tiisani. Nāskaxō Apa kīfini iskafakī: “Epa, na ē omiskōiai ekeki nokoyamafe. Akka nā ē apaiyai keskafakima. Nā mī ea amapaiyai keskafafe,” fani.

⁴⁰ Nāskata anā anoris oni aōxō tāpimisfo ano. Oxō ato ōia oxafo inifo. Nāskaxō Pedro yoini: “¿Mā efeta pishta oxa tenetiromamē?” ato fani.

⁴¹ Nāskafata anā yoini: “Moikaxō Epa Nios kīfikāfe Satanás chakata mato chakafamapaiyai keskara axikakima. Chanīma, nā Epa Niospa mato amapaiyai keskara mātō shinā mēraxō mā apafikī mā atiroma. Akka mātō yora pachikōikī,” ato fani.

⁴² Ato askafata anā kani Apa Nios kīfikai iskafakī: “Epa, ea mīa omiskōimayamakī ea mīa omiskōimatiroma. Akka nā mī ea amapaiyai keskafafe,” fani.

⁴³ Nāskata anā oxō ato fichitoshini aōxō tāpimisfo oxafono, oxa paemei fetsoafono. ⁴⁴ Nānoa ato ōifaini kaxō anā Apa Nios kīfini, afia yoitana keskafakī. ⁴⁵ Nāskata Jesús anā oni aōxō tāpimisfo ano. Mā oxō ato yoini: “¿Aimā oxamē tenekōiyanā? Akka iskaratīa a ea ato achimaniyoai mā chaima oi kiki. Yora chakafāfe ea achifenōfo ato efei kiki. ⁴⁶ Fininīfofākāfe nō kanō. Mā chaima oi kiki a ea ato achimaniyoai,” Jesús ato fani.

Jesús achinifo
(Mr. 14.43-50; Lc. 22.47-53; Jn. 18.2-11)

⁴⁷ Jesús ato yoiaino Judas nokoni, nā Judaspa Jesúsxō tāpifikatsaxakī, yorafā rasifo fe oni. Nā yorafo kenofoya ifi xatefoya fenifo, a ato Nios kīfixomisfāfe āto xanīfofo feta judeofāfe āto xanīfofofāfe ato nīchiafono. ⁴⁸ Judaspa nā ato efeaito ato yoiyoni iskafakī: “A ē kokoki tsoo akaito ōikī achirisafaxikākī,” ato fani.

⁴⁹ Mā Jesús ano nokoxō Judaspa iskafakī yoini: “Maestro, ¿mīmē?” fatishoni. Nāskaxō kokotoshini.

⁵⁰ Askafaito ōikī Jesús kemani: “Efe yora, nā mī apaiyai keska farisafafe,” fani.

Askafaito ōikakī nā Judas fe foafāfe Jesús achinifo. ⁵¹ Akka Jesús achiaifāfe ōikī a aōxō tāpimis fētsa āfe keno chainipa tsekainīfofā a ato Nios kīfixomisfāfe āto xanīfāfe ina paxteni.

⁵² Askaito ōikī Jesús yoini: “Mī keno fafe. Akka nō kenopa retenāino kenopari noko retetirofo. ⁵³ ¿Mī tāpiamamē Epa Nios ē yoiaito iskaratīa āfe ājirifo ichapakōi ea nīchixotiro ea kexei fenōfo?” fani. ⁵⁴ “Ē iskaratīa ājiri kenano ea kexeafono ē naima. Akka nā Niospa meka yoikī kirika kenekī yoinifo keskai ē naikai,” Jesús ato fani.

⁵⁵ Askafono ōikī Jesús yorafo yōkani: “¿Afeskai kenofoya ifixatefoya mā oamē ea achiyoi oa ē yometso keskarakē? Pena tii ē mato fe itiani Nios kīfiti pexefā mēraxō ē mato tāpimani, akka māakai ea achipaimisma. ⁵⁶ Akka nā eōnoa yoikī kenenifo keskafakī mā ea achi,” ixō Jesús ato yoini.

Ato askafaino aōxō tāpimisfo Jesús ōifaikani. Ichoi fetsenifo a makinoax.

*Xanīfo finakōiafo ano Jesús iyonifo**(Mr. 14.53-65; Lc. 22.54-55, 63-71; Jn. 18.12-14, 19-24)*

⁵⁷ Mā Jesús achikaxō a ato Nios kīfixomisfāfe āto xanīfo Caifás āfe peXe ano iyonifo. A xanīfofo fe a Moisés yoikī kirika keneni keskara ato tāpimamisfo fe a judeo anifofo fe nā tsaofafo ano Jesús iyonifo. ⁵⁸ Pedro chai ixō ōini faki Jesús iyoi fokanimākai. Nāskaxō ato chīfafoni. Nāskata nā ato Nios kīfixomisfāfe āto xanīfāfe peXe emāiti ano Pedro nokoni. Mā nokoax nāno tsaoni nā pexefā kexemisfo fe anoxō Jesús afeska fakanimākai ōixiki.

⁵⁹ Nā Nios kīfixomis xanīfofo feta a ato fe rafeafāfe Jesús noikaspakakī, “¿Afaa nō fatiromē Jesús afaa chakakōi faamakī nō retexiki?” ixō shinānifo. ⁶⁰ Akka Jesús afaa chakafayamafiano, yora ichapafāfe āa chakafakakī mekafanifo parakī. Akka aōnoa afaa chaka nikanifoma. Nāskakē feronāfake raferi mekafai fekani fenifo. ⁶¹ Nā rafeta yoinifo: “Mā nō nikaita Jesús iskaito: ‘Ē na Nios kīfiti pexefā ē pāo fatiro. Nāskata tres nia oxata ē anā pexefā fatiro,’ ikaito nō nikaita,” fanifo nā rafeta āa parakakī.

⁶² Askafafono a ato Nios kīfixomis xanīfo fininīkafāta Jesús yōkani: “¿Mī kemamitsaimamē afamē na mīōnoa meka chaka yoiāifo?” ixō yoini.

⁶³ Akka Jesús tooxinima. Nā Nios ato kīfixomis xanīfāfe yoini iskafakī: “Nā Nios nipanakato mia ōi kiki mī yoikai chanīmakōi, noko yoife mīmākī Cristo Niospa Fake,” fani.

⁶⁴ Askafaito nikakī Jesús kemani: “Nā mī ea yoiāi keskarakīa, ēkīa Niospa Fake. Ē mato yoinō. Akka mā ea ōixii ēfe Epa ketaxamei āfe pōya kayakai aōri ē tsāokē xanīfo finakōia ēfe Epa fe. Askatari mā ea ōixii nai kōi mēranoax ē anā fotofaito,” Jesús ato fani.

⁶⁵ Ato askafaito nikakakī a Nios ato kīfixomisfāfe āto xanīfāfe āfe rapati faxteni yorafāfe tāpinōfo Jesús yoiāito nikakaspakī. Askafata yoini: “Na feronāfake āfe meka chakakōi Nios chakafakī mekafai. Mā nōakōi nō nikakī noko anā tsōa yoitiromaki nō tāpinō,” ato fani. ⁶⁶ “¿Afe keskara mā shināimē?” ato faito keyokōichi kemanifo: “¡Nanōki!” fanifo.

⁶⁷ Mā fenexkaxō āfe femānāki kemo mechoketsayanā koshaketsanifo. Atirito fepasketsanifo. ⁶⁸ Iskafakī yoiyanā: “Mīkai Cristomākī, noko yoife tsōa mia koshaketsamakī,” fanifo.

*“Ē Jesús ōimisma,” Pedro ini**(Mr. 14.66-72; Lc. 22.56-62; Jn. 18.15-18, 25-27)*

⁶⁹ Pedro nāno ato fe pexefā emāiti tsaofano, nāno kēro xomaya a xanīfo yonoxomis akiki kaxō yoini: “Mīri Jesús fe kafāsamis Galilea anoax,” faito, ⁷⁰ Pedro kemani, yorafāfe ōiaifono iskafakī: “Ēkai Jesús ōimisma. Ēkai afaa tāpiama tsoaraōnoa mī yoi,” fani.

⁷¹ Nāskafata peXe fepoti ano kani. Nānoa kēro xomaya fētsari fichixō fetsafo yoini: “A nari Jesús fe Nazarete anoax kafāsamis,” fani.

⁷² Askafaino anā Pedro kemani: “Maa, nā mī yoiāi keskara Niospa tāpia ē na feronāfake ōimisma,” fani.

⁷³ Nāskafaino nā anoafāfe Pedro ano fōkaxō yoinifo: “Chanīma, mīri Jesús fe rafemis mā nō mia nikai mī mekaito, nā keskara,” fanifo.

⁷⁴ Nāskafafono Pedro ato yoikī taefani iskafakī: “Ē mato paraima, Niospa ea ōi ē chanīkē Niospa ea omiskōimatiro. Niospa tāpia ē mato yoikōi nā feronāfake ē ōimisma,” ixō ato yoini.

Pedro askaino takara keoinākafani. ⁷⁵ Nāskaino Pedro shināni nā Jesús yoita keskara. “Takara keoyoamano mī ato yoikī tres faxii: ‘Ē Jesús ōimismara,’ mī

ixii,” ixō Jesús yoita keskara Pedro shinātani. Nāskata Caifás pexefā mēranoax kāikainax oiāi finakōini.

27

Pilato ano Jesús iyonifo

(Mr. 15.1; Lc. 23.1-2; Jn. 18.28-32)

¹ Nāskata mā penaino keyokōi a ato Nios kīfixomis xanīfofo fe judeo anifofo yoinānifo: “¿Afeskaxō nō Jesús retetiromē?” ikanax yoinānifo. ² Nāskakaxō metexkere akaxō Jesús iyonifo Pilato ano. Nā Pilato āto xanīfo yora fetsa Roma anoa ini.

Judas nani

³ Judaspa Jesús ato achimaxō reteaifāfe ōikī shināmitsayanā ato treinta kori exe ināni, a ato Nios kīfixomis xanīfofoya judeo anifofo. ⁴ Ato iskafayanā: “Ē chakafaa, Jesús afaa chakafayamafiamiskē. Paraxō ē ato achimana retenōfo,” ato faito kemanifo: “Nōkai aōnoa afaa shināchakaima. Mīa mī shināchakakōi,” fanifo.

⁵ Askafaifāfe nikai nā Nios kīfiti pexefā mēraxō ato nāmā kori exe saafaini kaax āari tenexemeax Judas nani.

⁶ A ato Nios kīfixomis xanīfofofāfe anā kori finifo iskayanā: “Na kori exe imi foano mā chakanaki. Nāskakē a kori fati mēra nō nanetiromaki,” ikax yoinānifo.

⁷ Nāskakanax yoinānifo: “A na kōri nō mai finō ano yora fetsafo maifaxiki. Nā neo kesho fakakī neo fimisfo anoa nā mai nō finō,” ikanax yoinānifo.

⁸ Nāskakē nā mai anakī fetsafanifo. “Imi Mai,” fanifo. Akka iskaratīari, “Imi Mai,” famisfo. ⁹ Nāskakē nā Niospa meka yoimisto Jeremías a inōpokoai yoikī kirika keneni keskakōini. Iskafakī yoikī keneni:

Kori exe treinta fixikani nā israelifāfe yoinifo keskafakī. ¹⁰ Nāskakē nā kōri kesho faxii mai fimisfo anoa nā mai finifo nā Niospa ea yoiyoni keskafakī, ixō Jeremías keneni.

Pilato xanīfāfe Jesús yōkani

(Mr. 15.2-5; Lc. 23.3-5; Jn. 18.33-38)

¹¹ Jesús iyonifo Pilato xanīfo ano. Mā iyoafono nānoxō yōkani iskafakī: “¿Mīmē judeofāfe xanīfo?” faito Jesús kemani: “Ēje, nā mī ea yoiai keskarakīa,” fani.

¹² Akka nā ato Nios kīfixomis xanīfofo feta judeo anifofofāfe, “Mī chakakōi famis,” pārakī fanifo. Askafaifono Jesús ato kemanima. ¹³ Nāskakē Pilato yōkani: “¿Mī nikaimamē mia chakafakī mekaifaifāfe?” fani.

¹⁴ Askafaito nikakī, Jesús kai pishta kemanima. Nāskakē xanīfo Pilato, “Kee, ¿afeskai ea kemaimamē?” ixō shināni.

Pilato ato yoini Jesús retenōfo

(Mr. 15.6-20; Lc. 23.13-25; Jn. 18.38-19.16)

¹⁵ Akka Pascua fistatīa xanīfo Pilato yora fisti karaxa mēranoa kāimapaoni. Nā yorafāfe kāimapaiyaifo ato kāimaxopaoni. ¹⁶ Akka nā karaxa mēra ika feronāfake chakakōi ini, āfe ane Barrabás ini. ¹⁷ Nāskakē yorafo ichanāfono Pilato ato yōkani: “¿Fato mā fichipaimē ē mato kāimaxonō? ¿Barrabás iyamai Jesús nā Cristo nā Niospa nīchini ē kāimatiromē?” ato fani.

¹⁸ Akka mā Pilato tāpia ini judeo xanīfāfe shināchakaito nō anā xanīfo itiromara ixō, a ano Jesús iyoaifono.

¹⁹ Nā xanīfāfe tsaoti kamaki tsoaxō Pilato shināino, āfe āfinī āfe ina nīchini Pilato yoitanō: “Mī āfinī ea yoia ē mia yoinō iskafakī: ‘Na feronāfake afaa

chakafamismakī afeska fayamafe. Ēfe namapa aōxō chakakōi ē namakī, mia faa,” āfe inapa fani.

²⁰ Akka nā ato Nios kīfixomisfāfe āto xanīfofo feta judeo anifofofāfe āfe yorafo ato yoinifo iskafakakī: “Jesús kāiyamanō. Akka Barrabás kāinō. Jesús ato retemanō Pilato yoikāfe,” ato fanifo. ²¹ Askaiifāfe xanīfo Pilato anā ato yōkani: “Fato mā fichipaimē ē mato kāimaxonō ea yoikāfe,” ato faito, “Barrabás kāimafe,” fanifo.

²² Anā Pilato ato yōkani: “Akka, ĵē Jesús nā Cristo famisfo ē afeska faimē?” ato faito, keyokōichi kemanifo: “ĵifi cruz ikaki mastamafe!” fanifo.

²³ Askafaiifāfe nikakī Pilato ato yoini: “Akka, ĵnaato afaa chakafamē?” ato fani.

Ato askafaito nikakakī fāsikōi yoinifo: “ĵMastafe!” fanifo.

²⁴ Akka Pilato ōia tsōa nikakanima inifo. Yorafā rasi fāsikōi mekanifo. Nāskakē āfe ina faka fixotanō nīchini. Askata mechokomeni yorafāfe ferotaifi ōinōfo ato iskafakī yoiyanā: “Ēkai afaamaki na feronāfake ē retepanā. Mā mā apaikai akāfe. Eōnoax naima kiki. Matoōnoax nai kiki,” ato fani.

²⁵ Ato askafaito yorafāfe kemanifo: “Akka nō akikai retekī nō tenetiroma nokoōnoax nai. Nōko fakefoōnoaxri nai,” fanifo.

²⁶ Nāskakē Pilato Barrabás ato kāimaxoni. Nāskata mā Jesús ato koshamata ifi cruz ikaki mastatanōfo ato yoini.

²⁷ Askata sorarofāfe Jesús iyonifo xanīfāfe pexefā ano. Nānoax sorarofa ichanākanax Jesús kemataima niakenifo. ²⁸ Nāskakaxō āfe rapati pēkakaxō, rapati ōshi nana safemanifo, xanīfāfe tari keskara. ²⁹ Nāskatari moxa chainipafo maiti fākaxō maimanifo. Āfe mēke kaiyakai aōriri ifi chati tsoamanifo. Nāskakaxō āfe ferotaifi ratokonō mai chachipakefōfā āto xanīfo feyakanakōi keskarakaxō kaxemetsamakōi fanifo, iskafakī: “Mī sharakōi. Mīfi judeofāfe āto xanīfo,” fanifo kaxefakakī. ³⁰ Nāskakata akiki kemo mechokata, afia ifi xate tsoma fīakaxō aō mapoki koshanifo. ³¹ Mā kaxemetsama fakaxō, tari ōshi fīakata, Jesús āfe rapatikōi safemakaxō iyonifo mā mastai fokakī.

Jesús ifi cruz ikaki mastanifo

(Mr. 15.21-32; Lc. 23.26-43; Jn. 19.17-27)

³² Anoax fōkakī, feronāfake fisti fichinifo āfe ane Simón. Nā Simón Cirene anoa ini. Nāskaxō yoinifo: “Na Jesús ifi cruz ika foxōi afe,” fanifo.

³³ Nāskakata nokonifo machi āfe ane Gólgota ano. (Nā āfe ane fetsa Mapo Xao fanifo.) ³⁴ Nānoxō fimi ene moka osia Jesús ayamapainifo. Akka Jesús mā meexō ayakaspani.

³⁵ Nāskata mā Jesús mastakaxō āfe rapati fīanifo. Sorarofāfe makex tokoronō tsakaketsakaxō nāskakaxō sakka sakka anifo kanānōnākakī. Nā kanāto Jesús tari fōani. Nāskaxō Jesús rapati fetsa fīanifo. ³⁶ Mā Jesús mastakanax nāno tsaonifo anoxō kexexikakī. ³⁷ Nāskaxō āfe mapo mǎnāori tafaraki kenexō mastanifo. Mā retekaxō kenekī iskafanifo: “Jesúsfi judeofāfe xanīfoki,” ikaxō kenenifo.

³⁸ Jesús yafi yometso rafe mastanifo, fetsa āfe pōya kayakai aōri ata, fetsari āfe pōya mishkiori anifo. ³⁹ Nā ano finōfāifāfe ūchayanā āto mapo rafe rafeanifo. ⁴⁰ Iskafakī yoinifo: “Mī yoimis ē Nios kīfiti pexefā pāofaxō ē tres nia oxata ē anā axii pexefā fakī mī imiski, akka mī ifimetiromākī mīa ifimefe. Mī Niospa Fakemākī na ifi cruz ikakinoax fotopakekafāfe,” fanifo.

⁴¹ Nāskariakani akiki kaxemetsamanifo a ato Nios kīfixomisfāfe āto xanīfofo fe a Moisés yoikī kirika keneni keskara ato tāpimamisfo a judeofāfe āto xanīfofori āa ranā yoinānākani iskanifo: ⁴² “Naato fetsafo ififitiroxakī, akka āakai ifimeima. A nafi israelifāfe ato xanīfokī, akka ifi cruz ikakinoax fotoano

nõ chanĩmara fai. ⁴³ A naato Nios shinãmis. Mēxotaima noko yoimis: ‘Epa Nios ěfe Epakõira,’ noko famis. Akka chanĩmamakĩ Niospa noikĩ ifimãkai nõ õinõ,” ixõ mekafakĩ chakafanifo.

⁴⁴ Nãskaxõ nã yometso rafeya mastafono fětsa chakafakĩ mekafakĩ ĩchani.

Jesús nani

(Mr. 15.33-41; Lc. 23.44-49; Jn. 19.28-30)

⁴⁵ Nãskata xini keya nã mai tio fakishifãkõi itani. Nãskax mã xini kaino anã penani. ⁴⁶ Nãskata mã penano Jesús fãsikõi ģfe mekapa kenai iskani: “Elí, Elí, ģlema sabactani?” Nõko mekapa iskafakĩ yoini: “Ĕfe Nios, Ĕfe Nios, ģafeskakĩ mã ea potamě?” fani.

⁴⁷ Nãskaito nã ano niafãfe nikakakĩ iskafanifo: “Nikakapo, nã ato Niospa meka yoipaoni Elías kenai kiki,” fanifo.

⁴⁸ Nãskaito nikafaini fetsa ichoni xapo keskara fiikai. Nã xapo keskara fimi ene kachaki momoxõ tafa xate kaxkexõ akiki aõ nētaxõ ayamapaini.

⁴⁹ Askafaito ranãrito yoinifo: “Enefe. Elías nai mēranoax fotoxõ ifimãkai nõ õinõ,” fanifo.

⁵⁰ Anã Jesús fãsikõi ea ini. Nãskax nani. ⁵¹ Mã Jesús natanaino, sama nami Nios kĩfiti pexefã mēranoax naki rafekõi faxtepakekafãni fomãkĩanoax. Nãskatari mai naya naya ini. Tokirinĩfãfori kaxkei fetseni. ⁵² Nãskakě a mairafo anoax kini fepekemetani. Akka a Nios Ifofaafo nakatsaxakakĩ otoinĩfõfãnifo. ⁵³ Nãskakata mairafo anoax fonifo. Mã Jesús otoitano, Jerusalén ano fonifo. Nãnoxõ yora ichapafãfe õinifo.

⁵⁴ Nãskata soraro xanĩfãfe a afeta Jesús kexeafo feta õinifo mai naya naya ikaito afarafori afeskara ikaito. Nãskakě ratekõiyana yoinãnifo iskayanã: “Chanĩma, na feronãfake Niospa Fake ika,” fanifo.

⁵⁵ Kērofãferi chaimashta nikaxõ õinifo. Kēro ichapafãferi Jesús fe fopaonifo Galilea anoax ato afara axosharamisno. ⁵⁶ Nã tiixõ Jesús õinifo. María Magdalena ikaino María fetsari ikaino, nã María Jacobo feta José ģto afa ini. Askatari kēro fetsari ini Zebedeo ģfe ģfi. ģfe fake rafe Santiago fe Juan ini. Keyokõichi Jesús õinifo chaimashta nikaxõ.

Jesús makex kini mēra maifanifo

(Mr. 15.42-47; Lc. 23.50-56; Jn. 19.38-42)

⁵⁷ Akka mã fakishaino feronãfake kori ichapaya fisti kani ģfe ane José. Nã José Arimatea mai anoa ini. Nãatori Jesús Ifofamis ini. ⁵⁸ Nã José xanĩfo Pilato ano kaxõ Jesús ģfe yora yõkani maifai axiki. Nãskakě Pilato ato yoini Jesús ģfe yora inãnõfo. ⁵⁹ Nãskata José mã Jesús yora fixõ, sama oxosharakõipa rakoni.

⁶⁰ Nãskaxõ makex kini a tsoa maiyomisma mēra ratani. Nã makex kini fakĩ José ayoni. Nãskata nã Jesús maifaa ano makex kini tokirinĩfaně fepofaini kani. ⁶¹ Akka María Magdalena fe María fetsa nãno nētekanax a Jesús maia ano tsaokaxõ õinifo.

Sorarofãfe Jesús maia ano kexenifo

⁶² Mã askaitano, judeofo ģfe pena tenetitĩa a ato Nios kĩfixomisfãfe ģto xanĩfofo fe fariseofo fonifo Pilato õifokani. ⁶³ Mã fõkaxõ yoinifo iskafakakĩ: “Xanĩfo, mã nõ shinã na feronãfake chanĩmisto nayoxoma yoikĩ iskafamis: ‘Ĕ naax tres nia oxata ģ otoxii,’ ixõ yoimis. ⁶⁴ Nãskakě mĩ sorarofõ nĩchife a maia ano kexeyonõfo tres nia aõxõ tãpimisfo fakishi fěkaxõ ģfe yora fiyamanõfo. Fĩakaxõ yorafo yoitirofo iskafakĩ: ‘Mã Jesús otoaki,’ ato fatirofoki. Akka ģ otoxira ikax a chanĩmiskĩ. Nãskakě mã otoara ikaxõ ato parakĩ finakõitirofoki,” fanifo.

⁶⁵ Askafaifono Pilato ato yoini: “Nakīa sorarofa. Ato iyotakāfe. Fokaxō mafa kini kexesharatakāfe nā mā apaiyai keskakakī,” ato fani. ⁶⁶ Nāskakanax fonifo. Mā fōkaxō itipinī fanifo nā mafa kini. Nāskata nā aō fepoa tokirinīfā sichopa marakka fanifo. Nāskakaxō ano sorarofa nīchitakani fenifo anoxō kexesharanōfo.

28

Jesús otoni

(Mr. 16.1-8; Lc. 24.1-12; Jn. 20.1-10)

¹ Judeofāfe āto pena teneti safaro mā finōano, nāskata nomīkonō fakish-parikōi fonifo a Jesús maia ano. María Magdalenanō María fetsanō fonifo a Jesús maia ano ōifokani. ² Nāskata samamakōi fāsikōi mai naya naya ini, nōko Ifo Niospa āfe ājiri nai mēraxō fotomanaino. Mā fotota a Jesús maia ano kaxō, a aō fēpoita tokirinīfā fepeta a kamaki tsaoni. ³ Nā nōko Ifo Niospa āfe ājiri fafekōini, nā kana peeikai keskara. Āfe rapati oxofinakōi ini. ⁴ Askaito ōikani sorarofa choayanā ratekōinifo. Nāskakanax oa naa keskara nāmā pake pakefōfanifo. ⁵ Akka nā nōko Ifo Niospa āfe ājirinī nā kēro rafe yoini: “Rateyamakāfe. Mē tāpiakī mā Jesús fenaiyoaki a mastaitafo,” ato fani. ⁶ “Nonomaki, mā otoaki a mato yoimis keskai. Ōifekapo, a rātaitafo ano. ⁷ Koshikōi fōkaxō aōxō tāpimisfo yoirisafatakāfe iskakakī: ‘Mā otoaki. Galilea ano kai kiki mā kayoamano. Nānoa mā ōikaikai ato yoitakāfe. Mē mato yoikai shināmakiyamakāfe,’” ato fani.

⁸ Ato askafaito nikafaikani nā kēro rafe koshikōi fonifo nā Jesús maita anoax. Ratefianā āto shinā mēra inimakōinifo aōxō tāpimisfo chanifaifokani ichonifo. ⁹ Ichoaifono Jesús atoki nokorisatani nā kēro rafeki. Nāskaxō, “Mē oi,” ato fani. Ato askafaino nā kēro rafe Jesúski fōkaxō akiki inimakakī ratokonō mai chachipakefōfā āfe fitax ano achinifo. “Mī sharakōi,” fanifo. ¹⁰ Nāskaxō ato yoini: “Rateyamakāfe. Fokaxō ēfe extofo ē yoimis keska fakī ea ato yoixotakāfe Galilea ano fotanōfo. Nānoa ea fichifokani kiki,” ixō ato yoini.

Sorarofāfe ato yoinifo

¹¹ Mā nā kēro rafe foaifono, nā Jesús maia ano kexekanax soraro ranāri fonifo pexe rasi ano. Mā fōkaxō a ato Nios kīfixomis āto xanīfofo yoinifo nā ōiafo keskara. ¹² Nā xanīfo ano fonifo. Nā anifofo fe meikai fokani, ato fe yoināsharaxikaki. Nāskakaxō sorarofa kori ichapakōi inānifo. ¹³ Ato iskakfanifo: “Ato iskakakī yoitakāfe: ‘Nō fakishchāi oxano Jesús āfe inafō fēkaxō āfe yora yometsoanafo,’ ato fatakāfe. ¹⁴ Mā ato askafaito xanīfāfe nikaxō mato afara faito, nō yoisharanō mato afeska fanōfoma,” ato fanifo.

¹⁵ Nāskakaxō sorarofāfe mā kori fikaxō, mā fōkaxō nā ato yoiafo keskakakī ato yoinifo. Nāskakē nā maitio anoxō nikaketsanifo. Iskaratīari a keskara chanīmara famisfo judeofāfe.

Jesús aōxō tāpimisfo yoini aōxō keyokōi yoifōfāsafatanōfo

(Mr. 16.14-18; Lc. 24.36-49; Jn. 20.19-23)

¹⁶ Nāskakanax Jesús aōxō tāpimisfo once fonifo Galilea ano, nā Jesús ato yoiyomis keskai fonifo māchifā ari. ¹⁷ Nāskakata Jesús ōikakī, “Aicho, mī nōko Ifo Jesús nō mia noikōi,” fanifo. Akka Jesús otoano ranārīto chanīmara fanifoma. ¹⁸ Nāskaifono Jesús atoki kaxō ato yoini: “Ēfe Epa Niospa ea yoia nai mēranoafoya nono mai anoafori ē ato yoinō. ¹⁹ Akka nā maitio ano yorafoki fotakāfe ato yoixikakī ea Ifofasharanōfo. Nāskaxō ēfe Epa aneōxō ato maotisafapatakāfe. Ēfe aneōxori ato askafatakāfe, āfe Yōshi Sharaōxori ato

askafatakãfe. ²⁰ Nãskaxõ ato yoisharakãfe nikasharakõinõfo nã ã mato yoia keskara. Akka ã mato fe mẽxotaima ipanakaki,” Jesús ato fani.

Marcos Jesúsnoa Yoikĩ Keneni

Juan Maotista tsõa istomaxõ ato yoini
(Mt. 3.1-12; Lc. 3.1-9, 15-17; Jn. 1.19-28)

¹ Ë mato meka shara yoinõ Jesucristoõnoa. Nã Jesucristo Niospa Fakekõi.

² Afetiama nã Isaías Niospa shinãmanaino Jesucristoõnoa yoikĩ kirika keneni iskafakĩ:

Mĩ nai mēranoax nãmã fotoyoamano nã ěfe meka yoimis ě atoki rekē nĩchixii mĩõnoa ato yoinõ, itipinĩsharanõfo chipo mia nikasharaxikani kiki, ixõ Epa Niospa ěfe Fakeõnoa yoinino Isaías keneni. ³ Askatari anã keneni iskafakĩ:

Tsõa istoma anoxõ yorafo yoixii akiki feaifono iskafakĩ ato yoixii nã ěfe meka yoimisto ato yoixii iskafakĩ: “Itipinĩsharakãfe. Mã chaima nõko Ifo oi kiki. Mãto chaka xatekãfe isharaxikãki,” ixõ ato yoixii,

ixõ Juanoa yoikĩ Isaías kirika keneni. ⁴ Nãnorikõi Juan ato yoini tsõa istomaxõ yorafo ato maotisafayanã. Ato iskafakĩ yoianã: “Anã Nios shinãkãfe mãto chaka xateyanã ě mato maotisafanõ Epa Niospa mãto chaka mato soaxonõ,” ixõ Juan ato yoini. ⁵ Nãskakē keyokõi Judea anoax feaifono, Jerusalén anoaxri fenifo, ato yoiaito nikai fekani. Nãnoxõ a afara chakafamisfo yoiaifono, Juan ato maotisafapani faka Jordán anoxõ.

⁶ Akka Juan ěfe rapati kamĩcho fichi kishi faxõ safepaoni. Āfe sītorari fichi koiro safepaoni. Nãskaxõ tseo pipaoni, fonari apaoni. ⁷ Nãskaxõ Juan ato mēxotaima yoipaoni: “Nã ea keskarama mã chaima oi kiki, nã sharafinakõia. Aato afama mĩshti fatiro, ě atiroma keskara. Akka ě afaama,” ixõ ato yoipaoni Jesúsnoa yoikĩ. ⁸ “Akka ě mato fãka mēra ikimapakea maotisafakĩ. Akka nã rama oaito ěfe Yõshi Shara mato mēra naneyoi,” ixõ Juan ato yoini.

Juan Jesús maotisafani faka Jordán anoxõ
(Mt. 3.13-17; Lc. 3.21-22)

⁹ Nãskano Jesús kani Nazarete anoax, Galilea mai ano. Nãnoxõ faka Jordán anoxõ Juan ato maotisafani. ¹⁰ Nãskafaino Jesús fakanakinoax fininãkafã õia nai fepekemeaito õini. Akiki Niospa Yõshi Shara fotoiyoi oa rifi keskara oni.

¹¹ Nãskaino nai mēranoax mekaito nikani iskafakĩ yoiaito: “Mĩ ěfe Fakekõi, ě mia noikõi. Ë mikiki inimasharakõi,” ixõ yoiaito nikani.

Satanás chakata Jesús afara chakafamapaini
(Mt. 4.1-11; Lc. 4.1-13)

¹² Nãskata Niospa Yõshi Sharapa Jesús iyoni tsõa istoma ano. ¹³ Nãri cuarenta nia ini, yoinãfo mēra. Nãrixõ Satanás afara chakafamapaiyaito ěfe ãjirifãfe kexenifo.

Galilea anoxõ Jesús ato yoikĩ taefani
(Mt. 4.12-17; Lc. 4.14-15)

¹⁴ Akka mã Juan karaxa mēra ikimaitafono Jesús kani Galilea ano Niospa meka shara yorafo yoikai. ¹⁵ Ato yoikĩ iskafani: “Nõko Ifo Nios mã chaima matoki oi kiki, xanĩfofinakõi a ixii. Mãto chaka xatekãfe anã Nios nikakõisharaxikakĩ. Āfe meka sharari nikakõikãfe chanĩmara fayanã.”

Jesús cuatro feronãfake kenani tarafanãfãfã foe fimisfono ěfe inakõi inõfo
(Mt. 4.18-22; Lc. 5.1-11)

¹⁶ Ato askafakĩ yoita Jesús Galilea ãa kesemē kani. Kakĩ fichini Simón yafi onefetsa Andrés. Nã rafeta tarafanã fimisfo inifo, ãto tarafanãfã faka naki

poteaifāfe. ¹⁷ Jesús ato yoini iskafakī: “Efe fokāfe. Māfi tarafanāfānē fimiskī. Mā foe ichapa rasi tarafanāfānē fiai keskari fakī iskaratīari mā ekeki yora ichapa efexii ē āto Ifo inō,” ixō Jesús ato yoini.

¹⁸ Ato askafaino tarafanāfā fafaikani afe fonifo.

¹⁹ Anā orishta fāi katapaikī Jesús ōia Santiago onefetsa Juan fe nia ini. Nā rafeta āto apa feta kanōa nakixō tarafanāfā itipinī fanifo, kishifakākī.

²⁰ Nā raferi Jesús ato kenaino nā rafeta āto apa Zebedeo yafi āfe inafoya ato nīchifainifo. Āto kanōari ōifainifo Jesús fe fokākī.

Nā feronāfake niafaka nanea ini

(Lc. 4.31-37)

²¹ Jesús aōxō tāpimisfo fe kaax Capernaúm ano nokoni. Pena tenetitīa nā ichanāti pexe mēra Jesús ikikaixō ato yoikī taefani. ²² Ato yoiaito nikakī yorafā rasichi Jesús ōiketsanifo. “¡Kee! Nikakapo. Nato tāpikī finakōia, a Moisés yoikī kirika keneni keskara ato tāpimamisfo keskarama, meka sharakōi nato yoi,” fanifo. ²³ Judeofāfe ichanāti pexe mēraxō yora mēra niafaka yōshi chaka nanexō Jesús fāsikōi mekafani.

²⁴ Iskafakī yoini: “¿Afeskakī mī noko fekaxtefaiyoamē, Jesús Nazarete anoato? ¿Mī noko a omiskōipakenakafō mēra mī noko potaiyoamē? Ē mia ōimismō, mī sharakōinō Niospa mia nīchiano,” fani.

²⁵ Jesús niafaka yōshi chaka iskafakī yoini: “Askayamafe. Na feronāfake makinoax tsekekaitāfe,” faino, ²⁶ niafaka yōshi chakata feronāfake choamata, fāsikōi mekainākafata a makinoax tsekekaini. ²⁷ Askaito ōikani, yora rasi ratei fetseyanā āa ranā yoināi fetsenifo iskakani: “¿Tsoamē na? Na tāpisharakōixō ato yoiai nā xanīfāfe tāpisharakōixō ato yoiai keskara. Nā niafaka yōshi chakafāferi nikakani ato yoiaito,” ikanax yoinānifo.

²⁸ Nāskakē keyokōichi nikaketsanifo Galilea mai anoxō nā Jesús aka keskara.

Jesús Simón Pedro rayos sharafani

(Mt. 8.14-15; Lc. 4.38-39)

²⁹ Nā ichanāti pexe mēranoax Jesús tsekekaini. Santiagonō, Juannō fonifo, Simón feta Andrés āfe pexe ano. ³⁰ Akka nāno Simón āfe rayos yōxafo yonai raka ini. Nāno rakano Jesús yoinifo. ³¹ Jesús akiki kaxō āfe mīfi fininīfofanaino a yonai koshikōi sharatani. Mā sharaxō pīchani ato pimaxii.

A isinī ikaifo Jesús ato sharafani

(Mt. 8.16-17; Lc. 4.40-41)

³² Mā xini kaino a isinī ikaifoya a niafaka chaka naneafo Jesúski efenifo. ³³ Nāskakē nānoafo keyokōi yorafo ichanānifo nā pexe fepoti anoax. ³⁴ Jesús ato sharafani yora ichapa pae fetsa fetsatapafāfe ikaifonō. Niafaka chakafori ato mēra naneano ato makinoa pōtani. Akka Jesús niafakafo mekamanima māmāi tāpiafāfe Jesúsmai Niospa Fakekē.

Jesús ichanāti pexe mēraxō Apa Niospa mekasharaōnoa ato yoini

(Lc. 4.42-44)

³⁵ Mā chaima penaino, Jesús fininākafā pexe rasi mēranoax tsekekaini tsōa istomaxō Apa Nios kīfikai. ³⁶ Mā Jesús ato makinoax penaino kaano Simón āfe rafeafo fe kani Jesús fenaikai. ³⁷ Mā fichikaxō yoinifo iskafakakī: “Keyokōichi mia fenakani,” fanifo.

³⁸ Askafaiifāfe nikakī Jesús ato kemani iskafakī: “Nō chaima fetsa ano kanō fokāfe, anoxori nō ato Niospa meka tāpimanō. Nāskakē ē oa,” ato fani.

³⁹ Nāskakē Jesús kafāsapaoni nā Galilea pexefo tii ano Niospa meka shara ato yoifofāsafai ichanāti pexe mēraxō. Fanīma mīshtixō niafaka yōshi chakafo ato makinoa ato potafofāsafai.

Jesús yora rashkishiai sharafani

(Mt. 8.1-4; Lc. 5.12-16)

⁴⁰ Feronāfake fetsa isinī iki rashkishi fetseax Jesúski oni. Akiki oxō ratokonō mai chachipakefofā yoini iskafakī: “Ea mīa sharafapaikī, ea mīa sharafatiro,” fani.

⁴¹ Askafaito nikakī Jesús shinākōini, omiskōiaito. Nāskaxō āfe mēkemā ramāyanā yoini iskafakī: “Ē mia sharafanō. Iskaratīa mī sharaikai,” faino, ⁴² a rashkishi fetseai koshikōi sharatani. Nāskax sharakōi ini. ⁴³⁻⁴⁴ Mā sharano Jesús nīchini iskafakī yoiyanā: “Mī tsoa yoiki. Akka nā ato Nios kīfixomis ispatāfe. Nāskaxō ovejanā fake foxō ināfe mia retexonō Moisés yoini keskafakī. Nāskaxō keyokōichi tāpinōfo a mī isinī imis mā mī sharano,” ixō Jesús yoini.

⁴⁵ Jesús askafakī yoifiano, akka nā feronāfake mā kaxō ato yoifofāsafani. “Ōikapo, mā Jesús ea sharafaa,” ixō ato yoifofāsafani. Nāskakē Jesús anā pexe rasi ano ikixō ato yoitiroma ini. Xafakīa nini, tsōa istoma ano. Nāskafiaino pexe rasi anofo akiki fenifo ōifekani.

2

Jesús yora finimisma sharafani

(Mt. 9.1-8; Lc. 5.17-26)

¹ Mā samaraka pishtata Capernaúm ano anā oni Jesús. Mā nokoano, “Mā Jesús anā oa āfe pexe ano,” fanifo. ² Nāskakata Jesús fe anā ichanānifo pexe mēraxō. Jesús nikakani. Pexe ano fospikōikanax āfe emāiti ninifo āfe fepoti ano ikitiroxakākima. Nānoxō Jesús ato tāpimani Niospa meka. ³ Mā ato tāpimanaino feronāfake cuatro nokotoshinifo. Yora finimisma āfe xefapa efenifo. ⁴ Mā xītiafono ikitirofoma, Jesús ano nā yora finimisma efepaiyaifono ikitirofoma ini. A pexe sapa mñānoxori paitinī māpekaxō fotomanifo āfe xefapa rataxō. Risfi rafeta nexati fākaxō a mñānoxori kini fakaxō, nā finimisma fotomanifo, āfe xefapa. ⁵ Jesús ato ōikī tāpikōia ini. “Naato nōko yama noko sharafaxotiroki,” faifono Jesús tāpini. Nāskafaifono a finimisma Jesús yoini iskafakī: “Efe yorashta, mī chaka mē mia soaxona,” Jesús fani.

⁶ A Moisés yoikī kirika keneni keskara ato tāpimamisfāfe ranārīto ano tsoaxō nikakī shinānifo. ⁷ Nānoxō shinānifo: “¿Afeskai Jesús mekaimē iscai? Tsōa noko chaka soaxotiroma. Nios fistichi noko axotiro. ¿Jesús āa shināimē Nios?” ixō shinānifo.

⁸ Askafaifāfe Jesús ato tāpini āto shinā mēraxō shināifāfe. Jesús ato yoini: “¿Afeskai mā iskara shināimē?” ato fani. ⁹⁻¹⁰ “Akka ea Niospa shināmani. Nāskakē ē mato ōimanō Niosxō na feronāfake ē sharafatiro. Tsōa iskara atiroma, Niospa shināmanai fistichi atiro. Nāskakē ē na feronāfake sharafa mā tāpinō Niosxō ēri āfe chaka soaxotiro,” ixō ato yoini. Nāskafata anā yoini feronāfake finimisma, ¹¹ “Fininākafāfe. Mī xefa fifaini, mī pexe ano katāfe,” fani.

¹² Askafaino fininākafani. Fininākafaxō āfe xefa fifaini, āfe pexe ano kaito keyokōichi ōinifo. Nāskakaxō, “¡Aicho, Nios sharakōi! Na keskara nō ōimisma, sharakōi,” fanifo.

Jesús Leví ifni aōxō tāpimis inō

(Mt. 9.9-13; Lc. 5.27-32)

¹³ Nāskax Jesús anā kani ĩa efapa ano. Anoxō yora ichapa rasichi ōinifo. Nānoax Jesúski ichanānifo. Nānoxō ato tāpimani. ¹⁴ Nānoax kakī Jesús finōfāikī Leví* ōini, a yonoai āfe tsaoti mīsa ano tsaoxō, ato keyokōi kori fīaito. Nā Leví āto kori fīamis ini āfe xanīfo minixiki Roma anoa. Leví Alfeo fake ini. Jesús ōixō yoini: “Leví, efe kafe ē mia tāpimanō,” fani. Askafaino Leví afe kani.

¹⁵ Nāskax Jesús aōxō tāpimisfo fe kani Leví ato kenano a anoxō pii fokani. Ato kori fīamisfo fe yora chakafori a Moisés keneni nikamisfomafāferi Jesús feta pinifo. Yora ichapa Jesús fe foafofāinifo. Nāskakē yora ichapakōichi Leví pexe mēraxō pinifo. ¹⁶ Nāskakē a Moisés yoikī kirika keneni keskara ato tāpimamisfo nāfori fariseofo inifo. Afāfe Jesús ōinifo yora chakafo feta piaito. Nāskaxō a Jesúsxō tāpimisfo yōkanifo: “¿Afeskakī mātō maestro na ato kori fīxomisfo feta piimē? Yora chakafo fetari pii,” ato faifono, ¹⁷ Jesús nikaxō ato yoini: “A sharafāfe notoro fenakanima, a isinī ikaifāfemari notoro fenakanima. Akka nā isinī ikaifāfe notoro fenakani. Nāskakēri ē ato yora sharafos kenatapa ikerani ē oama. Nā yora chakafo ē ato tāpimaniyoi ē oanō,” ato fani.

*Nā foni tenemisfofāfe Jesús yōkanifo
(Mt. 9.14-17; Lc. 5.33-39)*

¹⁸ Juan Maotista āfe inafāfe āto feyafati ipaoni fisti rasi pikakī pipaoni-foma foni tenemisfo ipaonifo Nios shara shinākakī. Nā fariseofo nāskarari ipaoni āto feyafati. Nāskakē yora fetsafāfe Jesús yōkanifo tāpipaikakī, “Jesús, ¿afeskakī mī inafāfe mēxotaima piimē? Juan āfe inafāfe foni tenekaninō Nios shināsharakakī. Askatari fariseofāferi foni tenekaninō. Akka, ¿afeskai mīōxō tāpimisfo askaramamē?” fanifo.

¹⁹ Askafāifāfe anā Jesús ato yoini: “Feronāfake āfiyaino, yorafo ano fisti ichanākaxō afara fetsa fetsatapafo afeta pitirofo inimayanā, aicho fakakī akiki inimakakī. Akka feronāfake āfi fikī foni tenetiroma. Askafixō inimakī pitiro. ²⁰ Akka mā fene rēteafono āfe yorafāfe shinākakī foni tenetiromo,” Jesús ato fani. (“Nāskakē ē nono ikano inimakī eōxō tāpimisfāfe efeta pimisfo. Akka mē naano ea shinākakī tsōa pitiroma eō noikakī,” ato fani.)

²¹ Askata anā fetsa ato yoini: “Tsōa sama fenaya sama xini kishi fatiroma. Nō askafaino sama fena samama chakanatiromo. Nāskatari sama fenafe sama xini isharatiroma. Nāskakēri nā ē mato yoiai keskara mā nikakōixō a mā ipaoni keskara anā mā itiroma māmāi ea nikakōiax. A mā ipaoni keskara shināmakita nāskax mātō yora fena keskara shara itiro. ²² Nāskarifakī tsōa māmā fata koiro pisha xini mēra nanetiroma nā māmānō faraxakaino toxamāiyanō. Nāskakē nā māmā fata fe koiro pisha chakanatiromo. Akka nā mātō xinifāfe mato yoimisfo keskara fe nā ē mato yoiai keskara osinātiroma. Nā ē mato yoiai keskara Niospa meka sharakōi. Akka a mātō xinifāfe mato yoimisfo anori shināx mā isharatiroma. Niospa mekaya meka chaka osinātiroma. Nāskakē mā nikapaifi mā shināsharatiroma. Nāskarifakī tsōa māmā fata koiro pisha xini mēra nanetiroma nā māmānō faraxakaino toxamāiyanō. Nāskakē nā māmā fata fe koiro pisha chakanatiromo. Akka nā mātō xinifāfe mato yoimisfo keskarafe nā ē mato yoiai keskara osinātiroma. Nā ē mato yoiai keskara Niospa meka sharakōi. Akka a mātō xinifāfe mato yoimisfo anori shināx mā isharatiroma. Niospa mekaya meka chaka osinātiroma. Nāskakē mā nikapaifi mā shināsharatiroma.”

*Nā judeofāfe pena tenetitīa Jesúsxō tāpimisfāfe aros keskara metesfenifo
(Mt. 12.1-8; Lc. 6.1-5)*

²³ Jesús aōxō tāpimisfo fe kani a judeofāfe tenetitīa. Tarepa kakī āfe inafāfe aros keskara meteskaxō fikaxō pinifo. ²⁴ Nāskafāifāfe fariseofāfe ōikakī ato

* **2:14** Leví ane rafeya ipaoni. Āfe ane fetsa Mateo.

iskafanifo: “Ōipo. ¿Afeskakĩ mĩ inafãfe na aros keskara metesfekanimẽ na pena tenetitĩa tsõa yonotiroma ixõ Moisés noko yoifinino?” fariseofãfe fanifo.

²⁵ Ato askafaifono Jesús ato kemani: “Akka, ¿a nõko xini Davidõnoa kirika kenenifo keskara mã õimismamẽ? ¿David afaa afeska fanimẽ ãfe inafõ feta fonãikõikĩ? ²⁶ Nãskakẽ David Nios kĩfiti pexefã mẽra ikikaini. Akka nã Nios kĩfiti pexefã anoax Abiatar nã ato Nios kĩfixomisfãfe ãto xanĩfo ini. Akka nã Nios kĩfiti pexefã mẽranoa David pãa pini a pãa tsõa pishta pifiatiromano. Akka nã ato Nios kĩfixomisfãfe arese a pãa pimisfo ini. Nãskafekẽ nã pãa David pini a afe foafori ato pikĩni.

²⁷ “A Niospa taefakĩ feronãfake onifani. Askata teneni. Nã feronãfake Niospa tenemani, pena tenetitĩa yonoyamanõ. ²⁸ Nãskakẽ Niosxõ ã yoitiro na pena tenetitĩa ãmãi xanĩfokõixõ afeskaimãkai ã yoitiro. Nãskakẽ ã mato yoi ãfe inafãfe afaa chakafakanima aros keskara meteskakĩ pena tenetitĩa fonãiki finakõikaxõ,” ato Jesús fani.

3

Feronãfake mẽke yõshiya Jesús sharafani (Mt. 12.9-14; Lc. 6.6-11)

¹ Jesús anã ikikaini judeofãfe ãto ichanãti pexe mẽra. Nãno feronãfake mẽke yõshiya ini. ² Aas õinifo, judeofãferi. “Jesús sharafaimãkai nõ õinõ na pena tenetitĩa,” fanifo yõaxikakĩ. ³ Askata Jesús yoini nã feronãfake mẽke yõshiya: “Fininãkafata ano nife nakirafe,” fani.

⁴ Askata yorafo yõkani: “¿Afaa nõ afeska fatiromẽ pena tenetitĩa? ¿Shara nõ atiomẽ? ¿Chaka nõ atiroraka? ¿Nõ ifitiromẽ? ¿Nõ retetiroraka?” ixõ ato yõkani.

Ato askafaito tsõa kemanima. ⁵ Ato feratexõ Jesús ato õini, yora fet-safoõnoax shinãyamaifãfe. Askatari Jesús shinãmitsani. Shinãmitsaxõ yoikĩ iskafani feronãfake: “Mẽshafe,” fani. Askata nikax mẽshatani. Mẽshatanaino sharatani. ⁶ Askaito õikani fariseofo õitifishkinifo. Tsekefainifo ichanãti pexe anoax. Taefakakĩ shinãnifo: “¿Afeskafaxõ na Jesús nõ retetiomẽ?” fanifo. Herodes ãfe inafõ feta shinãnifo.

Yora ichapa ini ãmãfã ano

⁷ Askata Jesús anã kani aõxõ tãpimisfo fe ãmãfã kesemẽ ano. Nãskakẽ Galilea anoafõ yora ichapa rasi fonifo. Jesús chĩfafainifo. ⁸ Mã yorafãfe nikakanax fonifo, nã Jesús ato sharafaino nikafaikani fonifo Jesús ari. Judea anoafori, Tiro yafi Sidón anoafori fonifo. Jesús ano nokonifo.

⁹ “Kayakõi yorafo fei kiki,” ato fani aõxõ tãpimisfo Jesús. “Ea shoi aki fetirofoki, ea kanõa fexokãfe ã nanenõ,” ato fani. ¹⁰ Jesús ichapa yora rasi sharafaino, nãskakẽ na yora isinĩ ikani akiki fenifo Jesús shinãfãikani ramãpaikani ato sharafanõ. ¹¹ Nãskaino a niafaka chakafoyafãfe Jesús õinifo. Nãskakẽ Jesús fichikanax feopakefofãnifo Jesús nãmã. “Jesús mĩ Niospa Fakekõiki,” niafaka naneafãfe fãsikõi fanifo.

¹² Askata Jesús ato yoini: “Tsoa yoiyamakãfe ã Niospa Fakeki,” ato fani.

Jesús aõxõ tãpimisfo doce feronãfake ifini (Mt. 10.1-4; Lc. 6.12-16)

¹³ Nãskata Jesús mãchi keya mãpeni. Ari kakĩ aõxõ tãpimisfo ichapa ato kenani ato yoixiki arixõ tãpinõfo. Askata Jesús ano fonifo aõxõ tãpimisfo. ¹⁴⁻¹⁵ Feronãfake doce faxõ ato ifini, afe rafeafono ato nĩchixiki aõnoa ãfe meka shara ato yoitanõfo, nãfãfe yorafo makinoa niafaka yõshi chakafo ato potaxotanõfo. Nãskata nãfo ato aneni, “Ëfe meka yoimisfo” ato fakĩ. ¹⁶ Nã

tii ato ifipakeni fisti rasi. Taefakĩ Simón ifini. Āfe ane fetsafaxoni, Pedro kenaxiki. Simón ikaino, ¹⁷ Jacobo yafi āfe onefetsa Juan kenani, āto apa Zebedeo ini. Jesús ato ane fetsa kenani Boanerges fakĩ. Nō askafatiro, “Yora finakōia oa nai tiri ikai keskara” fakĩ. ¹⁸ Askatari Andrés kenani, Felipe ikaino, Bartoloméri ikaino, Mateori ikaino, Tomásri ikaino, Jacobo fetsari ikaino, Alfeo fake. Askatari Tadeori ikaino, Simón fetsari ikaino. Na Simón nāskara ipaoni nā yora xanĩfo chakafapaikĩ, potapaikĩ fetsafo feta. Mā ato makinoax ota Jesús fe rafeni. ¹⁹ Askatari Judas Íscarioteri ifini. Nā Judas Iscariote Jesús fe iyopaoni. Nāskaxō chipo chakafakĩ ato achimani Jesús retenōfo. Nā tii Jesús ifini aōxō tāpimiskōi inōfo.

Yora fetsafāfe, “Jesús niafakaōxō ato sharafaira,” fanifo
(Mt. 12.22-32; Lc. 11.14-23; 12.10)

Nāskata māchifā ariax fotota, āfe inafō fe ikikaini pexe mēra. ²⁰ Anā yora rasi ichanāfatishoni. Askaito ōikĩ, yora ichapa ōikĩkakĩ, pitirofoma inifo. ²¹ Jesús afe yorafāfe tāpinifo mā pexe mēra kaano fōkaxō Jesús anoa ifipainifo. Yoiaifāfe nikakakĩ ifipainifo fōkaxō Jesús anā shināsharaima faifāfe.

²² Askatari a Moisés yoikĩ kirika keneni keskara ato tāpimamisfo Jerusalén anoax Jesús ano feafono ato yoini: “Na Jesús nā niafaka chakafāfe āto xanĩfoōxō nā Beelzebú āfe shara miniano aōxō āto niafaka pōtai,” fanifo.

²³ Jesús nikakĩ ato kemani meka fetsafaxō: “¿Afeskax Satanás āa potame-tiromē? Āa itiroma. ²⁴ Nāskakēri yorafo paxkanākanax āa ranā retenāi keyotirofo. Askatari pexe rasi anoax āa ranā retenāi keyotirofo. Nāskax isharatirofoma āa ranā retenātirofoma. ²⁵ Fetsari nā nofe yorafo mīшти paxkanātirofoma. Paxkanāx keyotirofo. ²⁶ Nāskakēri Satanás āfe inafō fe paxkanātiroma. Paxkanāx keyotiro anā xanĩfo itiroma.

²⁷ “Askatari feronāfake mitsisipakōi taefakĩ metexkere akaxoma toa āfe pexe mēra ikitiroma āfe afama mīшти fīaxikakĩ. Nāskarifiakĩ nō yora nexaxō āfe afara nō fīatiro keskafakĩ, nāskarifikĩ ē Satanás nexaxō Niospa Yōshi Sharaōxō ē Satanás āfe ina pōtatiro.

²⁸⁻²⁹ “Chanīma ē mato yoikōi, keyokōi chaka Niospa soaxotiro. Askatari keyokōi meka chakari Niospa soaxotiro. Askafixō fētsa yoixō, ‘Jesús Niospa Yōshi Sharaōxō askara ato sharafatiroma, Satanás āfe yōshioxō ato sharafai,’ askafaito Niospa ato āfe chaka soaxotiroma, āto neepakexanō,” ato fani Jesús.

³⁰ Anori yorafāfe yoini: “Jesús yōshi chakaya,” fanifo. Nāskakē Jesús ato yoini Epa Niospa Yōshi Sharaōxō ato sharafai.

Jesús ōifekani āfe afanō āfe extonō fenifo
(Mt. 12.46-50; Lc. 8.19-21)

³¹ Jesús āfe afanō onefetsanō nokonifo a Jesús ano. Mā nokokanax pexe mēra ikinifoma. Xafakīa ninifo pexe emāiti. Nānoxō yora fetsa nīchinifo Jesús yoitanōfo. ³² A Jesús foaketifaya kekanax tsaoafāfe yoinifo: “Jesús, mā mī efanō mī extonō nokofo. Mia yōkakamekani,” fanifo.

³³ Askafaiifāfe ato Jesús kemani: “Ēfe efanō, ēfe poinō, ē ato fistis shināima. Yora fetsafori ē ato shināi efe yora keskarafo. ¿Tsoamē ēfe efa, ēfe extofori? ¿Mā tāpipaimē tsoamāki ēfe efa, ēfe extofori? Ē mato yoinō,” ato fani.

³⁴ Askafaxō Jesús ōini a tsaofo. Nāskaxō ato yoini: “Nā ea Ifofaifo, ea nikaifo efe yorafo. Nakīa ēfe extofo, ēfe efafo,” nāskafani. ³⁵ “Nā Niospa fichipaiyai mā akaino Niospa mato fichipaiyai keskarifikĩ nā ēfe extofo, ēfe chikofō, ēfe efa keskara,” ato fani Jesús.

4

Jesús ato yoini meka fetsafaxō fimi exe saamisnoa
(Mt. 13.1-9; Lc. 8.4-8)

¹ Nāskata anā Jesús ato tāpimani ĩa kesemēxō. Nāskakē yora ichapa ichanānifo Jesús ano. Nāskaifono Jesús kanōa ĩa ketokonō rakano aō naneinīkafanax tsaoni. Akka yorafo ĩa ketokonō tsaonifo. ² Nāskaxō Jesús ato tāpimani afama mīshti meka fetsafaxō. Ato yoikī iskafani:

³ “Ea nikakāfe ē mato yoinō,” Jesús ato fani. “Feronāfake fistichi fimi exe saafoni āfe nōxati mēra kēchoxō fokī. ⁴ Fimi exe saafokaino ranāri fai nēxpakīa pakeaino a kachikirixori peyafāfe pini. ⁵ Nāskata fimi exe ranāri makexfoki pakei fetseni mai shara anoma. Nāskakē samamakōi fimi exe foaipaini. ⁶ Akka mā foaipaiyaito xinī namani, yosipanā, āfe tapokairoko mai mēra kasharakē. Foaikax, samama nani xinī tsasifaano. ⁷ Akka ranāri fimi exe moxafo mēra pakeni. Nāskakē moxafo foaikī namani. Nāskakē fimi exe foaikax fimiymax nani. ⁸ Akka fimi exe ranāri mai shara ano pakeni. Nāskax foaisharax fimi ichapayakōi ini. Fetsa treinta fimiya ini. Fetsa sesenta fimiya ini. Fetsari cien fimiya ini.”

⁹ Nāskaxō Jesús ato yoini: “Mā pachoyakī ea nikasharakōikāfe,” ato fani.

Meka fetsafaxō yorafo yoixō a aōxō tāpimisfo xafakīakōi ato yoini
(Mt. 13.10-17; Lc. 8.9-10)

¹⁰ Mā yora ichapa rasi foaifono Jesús ares nēteni, akka nā foafāfema a aōxō tāpimisfo docefo fe nēteafāfe yōkanifo. “¿Afaa mī noko yoipaiamē meka fetsafaxō?” faifono, ¹¹⁻¹² Jesús ato kemani, “Epa Niospa a ika anoxō afe yorafo ato ĩkināi afe keskaramākī ē mato xafakīa yoinō. Akka fetsafo meka fetsafaxō ē ato yoiaki. Akka ōifikakī tāpikanima nikafikakīri nikasharakanima. Nios Ifofakaspakani. Nāskakē Niospari ato chaka soaxotiroma.”

Jesús meka fetsafaxō fimi exe saamisnoa ato yoini ato tāpimasharakōixiki
(Mt. 13.18-23; Lc. 8.11-15)

¹³ Nāskata ato yoini: “¿Nā ē ato meka fetsafaxō yoiai mā tāpiamamē? Akka, ¿afeskakī fētsa nikatiromē? ¹⁴ Nā fimi exe fanamis, nā Niospa meka yoimis keskara. ¹⁵ Akka ranāri yora fetsafo fimi exe fai nēxpakīa pakea keskarafo Niospa meka nikafikani. Akka Niospa meka mā nikafiaifono Satanás ato xītitiro peyafāfe fimi exe pitiro keskafakī. ¹⁶ Fetsafo nā fimi exe tokirifo mēra pakeax foaipaiyai keskarafo. Niospa meka nikai akiki inimakōikī nikayotiro. ¹⁷ Akka nā fimi exe foaikax āfe tapo mai mēra ikikēma xinī namatiro keskafakī. Nāskarifikakī fētsa taefakī Niospa meka nikai inimayotiro. Akka afara chaka nokoaino anā inimatiroma anā Nios Ifofatiroma, Niospa meka anā āfe shinā mēra nanekema. ¹⁸⁻¹⁹ Akka atiri fimi exe moxafo mēranoax foaikax yositiroma keskarafo. Nāskariatirofo Niospa meka shara nikasharakanaxma. Akka fētsa afarafo shinākī āfe shinā mēraxō shināchakakōitiro. Nāskaxō kori ichapakōi noikī, ‘Ē kori ichapayax ē inimakōitiro,’ ixō shinākī Niospa meka anā shināima. Nāskakē Niospa meka nikafikī afara fetsafo shināino afaa Niospa axotiroma. ²⁰ Akka atiri fimi exe mai shara anoax foaikax fimi ichaya ini. Āfe fimi treinta ini, fetsari afe fimi sesenta ini, fetsari āfe fimi cien ini. Nāskafakīri fētsa Niospa meka nikakōikī nikasharakōitiro. Akka fētsa Niospa meka nikakōisharakī nā fimi exe treinta keskara itiro, fetsari nikasharakōikī nā fimi exe sesenta keskara itiro, fētsari nikasharakōikī nā fimi exe cien keskara itiro,” ixō Jesús ato yoini.

Meka fetsafaxō rāpariki Jesús aōxō tāpimisfo yoini
(Lc. 8.16-18)

²¹ Nāskatari ato yoini. “Akka tsōa rāpari otaxō kafo mēra nanetiroma, askatari a ika nāmā tsāotiroma chaikairoko chaxanō. Akka nō rāpari fomākia tsōofaano chai chaxatiro. Nāskakē ōisharakōitirofo. ²² Nāskarifiakī nō afaa pishta onetiroma, nō onefiano keyokōichi tāpitirofo. Nāskarifiakī a fomāyomisfo Niospa xafakia faxii. ²³ Mā pachoyakī ea nikasharakōikāfe,” ixō Jesús ato yoini.

²⁴ Nāskaxō anā ato yoini. “Nikakapo, ē mato yoinō. Akka a ea nikakī finasharakōiai, Niospa tāpimasharakōi. ²⁵ Akka nā tāpia nā Epa Niospa tāpimakī finasharakōi. Akka fetsa ē tāpisharakōia ifiaxō nikamiskēma, askara yora nā tāpia pishta Niospa anā fīatiro,” ixō Jesús ato yoini.

Jesús meka fetsafaxō yoini, fimi exe yositiroōnoa

²⁶⁻²⁹ Nāskata Jesús anā ato yoini. “Epa Nios xanīfāfe noko ikinā iskaraki. Nā feronāfāke fimi exe mai shara ano fana keskaraki. Mā fanax oxatiro fakishi, akka penata yonotiro. Nāskakē ifāfe ōiyamaino ares fimi exe yositiro. Nāskakē mai mēranoax fimi exe āfe tapo foaikax yositiro. Mā yosiax efapa itiro, nāskata chipo fimitiro. Nāskata mā fana fimi pachiano, ifāfe topitiro māmāi pachiano,” ixō Jesús ato yoini.

Mostaza exeōnoa yoikī meka fetsafaxō Jesús ato tāpimani (Mt. 13.31-32; Lc. 13.18-19)

³⁰ Askata anā Jesús ato yoini iskakakī: “Afe keskaramākī Nios xanīfāfe noko ikinā ē mato yoinō. ³¹ Nā mostaza exe yōra āfe tarepa fanatiro. Akka nā fimi exe pishtakōi fetsafo keskerama. ³² Akka nā fimi exe fanax, mā yosiax efapakōi itiro fana fetsafo keskarama. Nāskakē mā teshpapafai fetseano peyafāfe āfe teshpafo ano naa fatiro. Nāskarifiakī taefakī ichapatoma Nios Ifofayotirofo. Akka chipo ichapafāfe Ifofakōitirofo,” ixō Jesús ato yoini.

Afama mīshtikiri yoikī meka fetsafaxō Jesús ato yoipaoni (Mt. 13.34-35)

³³ Nāskatari meka fetsafaxō Jesús ato tāpimani Niospa meka shara keyokōi tāpikanimākai. ³⁴ Akka meka fetsafaxō Jesús mēxotaima ato yoipaoni. Akka nā aōxō tāpimisfo xafakīakōi ato yoipaoni.

Jesús nefe yafi ĩamāfā poo iki meseniaito nishpa fani (Mt. 8.23-27; Lc. 8.22-25)

³⁵ Mā yātapakeaino nā pena fisti Jesús aōxō tāpimisfo yoini: “Nō okiri ĩamāfā pokefainikanō, fokāfe,” ato fani.

³⁶ Nāskata nāno yorafo nīchifainifo, Jesús iyoifokakī. Nāskakanax kanoānāfā mēra nanefainifo. Mā foaifono kanōanāfā fētsari fokākī yorafāfe ato chīfafainifo. ³⁷ ĩamāfā pokefainaifono nāno atoki nēfefākōi nokoni. Atoki nēfefākōiaino ĩamāfā pooiyanā kanōanāfā faka fospikōini. ³⁸ Akka Jesús oxano kanōanāfā chipo kamakī rakax, āfe tēkesati kamakī tēkesameax. Oxakē aōxō tāpimisfāfe mōinifo iskakafayanā: “¿Ifo, mī noko shināimamē mā nō āsaikai?” faifono, ³⁹ Jesús fininīkafāta, “Nēfe, nishpafe,” fata, “ĩamā nishpafe,” fani.

Nāskafaino nefe nishpani anā feroinima ĩa fe nefe. ⁴⁰ Nāskata chipo Jesús aōxō tāpimisfo yoini. “¿Afeskai mā rateimē? ¿Mā ea chanīmara fasharamamē?” ato fani.

⁴¹ Ato askafaino, akka aōxō tāpimisfo ratekōiyanā āa ranā yoinānifo iskakani: “¿Kee! ¿Na feronāfake afe keskaramē na nefe feta ĩamāfānē ato yoiāito nikaifo?” ikanax yoinānifo.

5

Gadara anoxō Jesús feronāfake makinoa niafaka rasi potani
(Mt. 8.28-34; Lc. 8.26-39)

¹ Nāskata okiri ĩamāfā pokefaikanax nokonifo, Gadara mai ano. ² Nāskata Jesús kanōanāfā makinoax fotopakekafanaino, nā feronāfake niafaka yōshi chaka nanea nāno akiki oni. Nā feronāfake nā maiāfo kinīfā mēranoax oni. ³ Mai kinīfā mēra ipaoni. Tsōa nexatiroma ipaoni kaninānā nexafiaifono. ⁴ Akka mēxotaima kaninānā otekkere ata metekere ata fafiaifono, kaninā tesa tesa aki fetsapaoni. Tsōakai afeska fatiroma ipaoni. ⁵ Nāskata penata kafāsata fakishchāiri kafāsapaoni, māchifā ariri māpepaoni maiāfo anorī kinīfā mēra kapaoni. Nāskata fiisiyanā tokirinī āa tsakamepaoni. ⁶ Akka chai ixō Jesús fichiāx, akiki farekekeranax aō ferotaifi ratokonō mai chachipakefofāni. ⁷⁻⁸ Fāsikōi yoini fiisiyanā. “ĪEa afeska fayamafe, Jesús! Mī Nios Sharapa Fakekī, ē mia yoi Niospa mia ōi kiki ea omiskōimayamafe,” fani. Nāskai mekani, akka Jesúsmāi iskafakī yoiano: “Niafaka yōshi chakata, na feronāfake makinoax tsekekaitāfe,” māmāi faano.

⁹ Askafaito Jesús yōkani: “ĶMī afe anemē?” faito, nāato kemani: “Ēfe ane Legiōn nōmāi ichapax,” fani.

¹⁰ Nāskaxō nā nīafaka Jesús yoini iskafakī: “Mai fetsa ari noko nīchiyamafe,” fani. ¹¹ Akka nā chaima māchifā mǎnǎnēxō kochifāfe pinifo. ¹² Nāskakē niafaka yōshi chakafāfe iskafanifo: “Kochifo mēra noko nīchife, kochifo mēra nō ikinō,” faifono, ¹³ kochifo mēra Jesús ato nīchini. Nāskakē niafaka yōshi chakafo feronāfake makinoax tsekekainax kochifo mēra iki fetšeni. Nā niafaka chakafo dos mil ini. Nā niafakafo kochifo mēra ikiano kochifo ichoax māfāfā ariax ĩamāfā mēra keyopakeax āsai fetšenifo.

¹⁴ Askaito ōikani nā kochifo kexeāfo ichoi fetšenifo. Mā fokaxō a pexe rasi anoāfo ato yoinifo, a pexe rasi pasotai ikafori ato yoinifo nā ōiafo keskara. Ato askafakī yoiaifono nikakani yōrafā rasi fenifo kochifo āsaito ōipaikani. ¹⁵ Mā nokokaxō ōiafo nā feronāfake tsaoa ini rapati shara safeax, mā shināsharai a makinoax mā niafaka yōshi chaka tsekeano. Nāskaito ōikani yōrafā rasi ratei fetšenifo. ¹⁶ Nā Jesús niafakafo kochifo mēranoa potaito ōikaxō āto kaifo yoifokani fonifo. ¹⁷ Nāskakē yorafāfe yoinifo iskafakakī: “Jesús, nonoax katāfe, nō mia ōipaimakai,” fanifo.

¹⁸ Mā Jesús kanōanāfā mēra naneinākafanaino, nā feronāfake niafakaya ikato, “Ēri mefe kapai,” fani. ¹⁹ Nāskafaino, “Maa, mī efe katiroma. Mī pexe ano katāfe. Mī kaifofo fe kaxō mefe yorafo ato yoitāfe a nōko Ifāfe mia sharafa, mīo noikī mia sharafaki,” ixō Jesús yoini.

²⁰ Askafaito nikafaini nā feronāfake kani. Kaxō nā pexe rasi anoāfo ato yoini, nā Decápolis anoāfo nā Jesús sharafaa keskara. “Airā, nikakapo, Ķafeskax sharamē?” iki fetšenifo.

Jairo fake xotofake mā nakē Jesús otofani. Askatari kēromāri Jesús rapati mēeāx sharani
(Mt. 9.18-26; Lc. 8.40-56)

²¹ Askafata Jesús mā kanōanāfānē ĩamāfā pokeferani oano yōrafā rasi ano ichanānifo. Akka Jesús ĩamāfā ketokonō nēteni. ²² Akka nāno nā ichanāti pexe anoā xanīfo fisti akiki oni, āfe ane Jairo. Jesús fichiāx a nāmā feopakekafani. ²³ Nāskaxō yoini iskafakī: “Mā ēfe fake xotofake nai kiki. Mī mēkemā ea rāmāxoniyofe, sharax ninō,” ixō yoiano, ²⁴ Jesús afe kani, yōrafā rasiri afe fonifo. Afe fokakī shoiakī fetšanifo.

²⁵ Nā yōrafā rasi mēra kēro fisti ato fe kani, doce xinia aka ini isinī iki, imi nesemisma ini. ²⁶ Omiskōitiani sharapai notorofo mēra katiani, mā kori potakī

mitotiani ini. Tsōa pishta sharafatiroma ini, askatamaroko isinī iki finakōini. ²⁷⁻²⁸ Nā kēromā Jesúsnoa yoiāifāfe nikani. Nāskakē yōrafā rasi foaifono ato acho kaxō āfe tari kexa ramākani. “Ē āfe tari kexa ramākax ē sharatiroraka,” ixō āfe ōiti mēraxō shināni. ²⁹ Nāskaxō āfe tari kexa ramākaxō meea āfe imi koshikōi nesetani. Nāskaxō āfe yora meea mā sharakōia meeni. ³⁰ Jesús mā tāpaxō āfe sharaōnoax nā kēro mā sharano, yōrafā rasi mēra fesoakekafā ato yōkani: “¿Tsōa ea tari ramākamē?” ato faito, ³¹ a aōxō tāpimisfāfe yoinifo iskafakakī: “¿Mī meimamē yorafāfe mia shoiakifetsakaxō mia pitsikinaifāfe? ¿Afeskakī mī noko yōkaimē tsōa ea ramāmē?” ixō fanifo.

³² Askafaifono Jesús aa kemataima ōiakeni, tāpaxiki tsōa ramāmākī. ³³ Nāskaino nā kēromā ratei choayanā a sharafaa mā tāpaxō, akiki kaxō ratokonō mai chachipakefōfā yoini: “Ē mia tari kexa ramākax mē shara,” ixō yoita a isinī itianiri yoini. ³⁴ Nāskafaito Jesús yoini: “Yōxashta, mā mī shara ea chanīmara faax. Nāskakē tanaima katāfe a mī isinī imis mā mī sharaki,” fani.

³⁵ Jesús mekai xateamano nā xanīfo Jairo pexe anoax fetsafo akiki fēkaxō yoifekani fenifo. Iskafakī yoinifo: “Mā mī fake naaki anā nōko Ifo fekaxte-fayamafe,” faifono, ³⁶ akka Jesús ato nikakima, iskafakī nā xanīfo Jairo yoini: “Ratekima, ea chanīmara fafe,” ixō yoini.

³⁷ Nāskaxō Jesús, “Tsoa nofe kaima kiki,” ato fani. Pedro iyota, Santiago iyota, āfe exto Juan iyota ato fani. ³⁸ Nāskata mā Jairo pexe ano nokokaxō ōiafo yorafo oiakani fiisinifo nā fake xotofake manokani mā naano. ³⁹ Nāskata pexe mēra ikikaixō ato yoini iskafakī: “¿Afeskai mā oiai fiisikimē? Na fakekai nakeroko oxanō,” ato fani.

⁴⁰ Ato askafaito yorafāfe Jesús ōsaketsanifo. Askafaifono pexe xaki mēranoa keyokōi Jesús ato kāimani. Nāskaxō apa yafi afa iyonī, a afe foafori afe fonifo. Nāskakanax nā fake xotofake raka ano ikifainifo. ⁴¹ Nāskata Jesús mēkemā mētsoinīfōfā yoini: “Xotofakeshta, ē mia yoikai fininīkafāfe,” faino, ⁴² koshikōi fininīkafāni, nā xotofake doce xinia aka ini. Mā fininīkafānax kani. Nāskaito ōikani yorafo ratei fetsenifo. “¡Kee, ōikapo! ¿Afesaxō otōfamē?” fanifo. ⁴³ Nāskaxō Jesús ato yoini: “Mā tsoa yoiki na fake xotofake nakē ē otōfakī,” ato fani. Nāskaxō, “Pimakāfe na fake xotofake,” ato fani.

6

Jesús Nazarete anoxō nikakaspanifo (Mt. 13.53-58; Lc. 4.16-30)

¹ Nāskata Jesús nānoax kani āfe maikōi ano. A aōxō tāpimisfori afe fonifo. ² Nāskata pena tenetiāia ichanāti pexe mēraxō ato yoikī taefani. Anoxō Jesús ato yoiāito nikakani yorafo āa ranā yoinākani iskanifo: “Aira nikakapo, ¿Fanīxō iskara tāpikī finakōiamē? Tāpikī finakōixō afama mīshtifo fai tsōa atiroma keskafai,” ikanax āa ranā yoinānifo. ³ “¿Akka namamē a mīsa famis? María fake Santiagonō Josēnō Judasnō Simónnō āto ochi. ¿Akka mā ōimamē afe chikofori nono nofe ikafo? Nāskakē nō nikapaiyaitoroko,” fanifo. ⁴ Askafaifono Jesús ato yoini iskafakī: “Na mai tio anoxō a Niospa meka yoimis nikakōitirofo aōnoa yoisharakōiyanā. Akka āfe maikōi anoxō nikatirofoma, āfe kaifofo feta afe yorakōifāfe.”

⁵ Nāskakē arixō afama mīshti fapaifikī anima. Akka a isinī ikaifo fisti rasi ato ramāino sharai fetsenifo. ⁶ Nāskata Jesús shināni: “¿Afeskakī ea chanīmara fakanimamē?” ixō tsōa nikayamaino. Nāskakē pexe rasi chaima ano Jesús kafāsani ato tāpimafofāsafai.

Jesús aōxō tāpimisfo nīchini Nios Xanīfoōnoa ato yoitanōfo (Mt. 10.5-15; Lc. 9.1-6)

⁷ Nāskata aōxō tāpimisfo doce kenani. Ato kenaino akiki feafono rafe rasi faxō ato nīchini: “Eōxō niafaka yōshi chakafo ato makinoa pōtatakāfe,” ixō ato yoini. ⁸ Nāskaxō anā ato yoini: “Fāi kakī, mā afaa fokiki, akka māto mēsteti fisti mā fotiro. Māto pishari mā fokiki a mā piari mā fokiki māto koriri mā fokiki. ⁹ Nāskax fotakāfe māto sapato fistiya, māto rapati fetsari mā fokiki.” ¹⁰ Nāskaxō ato yoini: “Mā pexe fetsa mēra ikiax nāno nētekāfe, nā mā anoax kaitīa. ¹¹ Akka fatora pexe rasi anoxō mato ifikaspayanā mato nikakaspafono anoax tsekekāfe māto taekinoa mapo taa taa ayanā. Mā askafaino tāpinōfo Nios atoki inimayamaino. Ē mato parakima yoi. Nā pexe rasi Sodoma anoafō feta Gomorra anoafāfe afara chakakōi fapaonifo. Nāskakē Niospa nā ato omiskōimanaitīa ato omiskōimaxii. Akka nā mato nikakaspafono nāfo ato omiskōimaki finakōixii,” ixō Jesús ato yoini.

¹² Nāskakē Jesúsxō tāpimisfo anoax fonifo yorafo yoifokani. “Māto chaka xatekaxō Nios Ifokakāfe,” ato fayana. ¹³ Ato makinoa ichapa niafaka chakafo potanifo. A isinī ikaifoya ato sharafayanā xiniyaxō ato māmāyanā.

Juan Maotista nani

(Mt. 14.1-12; Lc. 9.7-9)

¹⁴ Xanīfo Herodes nikani Jesúsnoa yoiaifono aōnoa fanīma mīstixō yoifofāsafafono. Nāskakē Herodes shinākī iskafani: “Mā Juan Maotista otoita, nāskakē āfe sharaōxō ato sharafai,” ixō shināni.

¹⁵ Akka fetsafāfe yoikī iskafanifo: “Nā ato Niospa meka yoimis Elīaskīa,” faifono, fetsafāferi yoikī iskafanifo: “Nato Niospa meka ato yoimis, nā afetīama Niospa meka ato yoipaonifo keskakakī,” ixō yoiaifono.

¹⁶ Nāskakē yoiaifāfe nikai Herodes iskani: “Nākīa Juan, mē ato textemafaitano mā anā otoa,” ixō shināni.

¹⁷ Herodes Juan reteyoamano yoikī iskafani: “Mī exto āfi fīayamafe,” faito nikakī, Herodes akiki ōitifishkiki āfe sorarofō yoini achikaxō metexkere akaxō karaxa mēra ikimanōfo. Akka nā Herodías Felipe āfe āfi ini, nā Felipe Herodes āfe exto ini. Akka nā Herodes Herodías fe fīanāni. ¹⁸ Akka Juan Herodes yoini: “Na mī exto āfi mī fīatiroma,” ixō yoiano, ¹⁹ nāskakē Herodías Juan noikaspakōikī retepaini. Akka retepaifīkī retetiroma ini. ²⁰ Akka Herodes Juanki rateni māmāi tāpiax Juanmāi feronāfake sharakōikē Nios Ifofasharakōia. Nāskakē kexesharakōini. Nāskakē āfe āfinī noikaspafaito nikafīkī, “ĴĒ afeskaimē?” ixō shināta, Herodes Juan nikakōini. ²¹ Akka Herodías mā ato Juan retematiro ini, Herodes āfe cumpleaños ikaino. Nāskakē Herodes fista akī afe xanīfofoya soraro xanīfofoya Galilea anoax xanīfofori ato ichanāfani. ²² Nāskaifono Herodías fake xomaya fista ikaino ikikainax ares yorafāfe ōinōfo mairani. Mairaito ōikī Herodes inimani, a afeta piaifori inimanifo askafanifo. Nāskakē nā xanīfāfe nā fake xomaya iskafani: “Ea yōkafe a mī fichipaiyai, Ē mia mininō,” fani. ²³ “Mā na yorafāfe ōikani Ē mia pāraima a mī fichipaiyai keskara ea yōkafe Ē mia mininō,” ixō yoini.

²⁴ Askafaino nā xomaya kāikaixō afa yoini iskafakī: “ĴĒ afaa xanīfo yōkatirōmē?” faito āfa kemakī iskafani: “Juan textexō ea āfe mapo ināfe fafe,” fani.

²⁵ Nāskata nā xomaya anā ikikaixō xanīfo yoini iskafakī: “Iskaratīa sapaki rātaxō Juan Maotista textexō ea āfe mapo ināfe,” fani.

²⁶ Askafaito nikai xanīfo shināmītsakōini, Juan shināni. “Akka na yorafāfe nikaifono mē na kēro xomaya yoia. Nāskakē Ē ato Juan textemapaiyamafīkī Ē ato textemani,” ixō shināni. ²⁷ Nāskakē āfe soraro nīchini, Juan textexō āfe mapo fixotanō. ²⁸ Nāskakē soraro karaxa mēra kaxō, Juan textexō āfe mapo sapaki feni. Nāskaxō nā kēro xomaya ināno, nāatori āfe afa ināni.

²⁹ Nāskakē Juan āfe inafāfe nikanifo mā textefono. Nāskakē āfe yora fonifo maifaxikakī.

Jesús cinco mil feronāfakefo ato pimani
(Mt. 14.13-21; Lc. 9.10-17; Jn. 6.1-14)

³⁰ Mā askano a aōnoa yoimisfāfe afe ichanākaxō yoinifo a atanaifo keskara ato tāpimayanā. ³¹ Askafaifāfe nikakī Jesús ato yoini: “Niri fekāfe tsōa istoma ano nores kaxō nō teneyonō,” ato fani. Yorafo mēxotaima atoki feaifono, nāskakē pitirofoma inifo. ³² Nāskakē Jesús aōxō tāpimisfo fe kanōanāfānē tsōa istoma ano kani. ³³ Akka mā fōkaxō yorafāfe Jesús kaito ōikakī tāpinifo. Nāskakē nā pexe rasi anoafō nā aōxō tāpimisfo fe kai ari ichonifo. Jesús aōxō tāpimisfo fe nokoamatai nokoi taenifo. ³⁴ Mā nokoax Jesús kanōanāfā makinoax fotopakekafā ōia yōrafā rasi ōini. Ato fichixō ato shinākōini, nā oa ovejafō ifomais keskara ato ōikī. Nāskaxō afama mīshtifo ato yoisharakōini. ³⁵⁻³⁶ Nāskakē mā yātapakeaino aōxō tāpimisfo akiki fōkaxō yoinifo: “Mā yātapakei kiki nono tsoa ikamakī. Na yorafo nīchife pexe rasi ari yafi a pexe pasotai ikafo ari fokaxō a piaifo fitanōfo,” faifono, akka Jesús ato kemani: ³⁷ “Askakakīma māroko ato pimakāfe,” ato faito, kemanifo iskafakakī: “¿Mī shināimē na yorafo pimaxiki kaxō a piaifo dos cientos kori exenē pāa nō ato fixotanō?” faifono, ³⁸ Jesús ato yoini: “¿Afe tii mā pāayamē? Fokaxō ōiyotakāpo,” ato faito, mā fokaxō ōitakakī yoinifo iskafakakī: “Nāno cinco pāa yafi foe rafes,” fanifo.

³⁹ Nāskakē ato yoini: “Ichanāfaxō na yorafo yoikāfe fasi ano tsaonōfo,” ato fani. ⁴⁰ Ato yoikī askafaifono keyokōi tsaoui fetsenifo, fetsa ano cien ini, fetsa ano cincuenta ini. ⁴¹ Nāskata Jesús cinco pāa yafi foe rafe tso mainifōfā, nai foisnifōfā Apa Nios aicho fani. Nāskata mā pāa kaxkeketsaxō aōxō tāpimisfo ināni, yorafori ato inānōfo. Askatari foe raferi keyokōi ato inānifo pinōfo. ⁴² Nāskakē mā keyokōichi pikanax māyakōinifo. ⁴³ Nāskakē a chetefaafo pāa yafi foe doce fēta fospikōiya ini. ⁴⁴ A cinco pāa piaifo cinco mil feronāfakefos inifo.

Jesús ĩamāfā femākīa kani
(Mt. 14.22-27; Jn. 6.16-21)

⁴⁵ Mā yorafo pimata Jesús aōxō tāpimisfo yoini iskafakī: “Kanōanāfānē nanekāfe okiri ĩamāfā pokefaitaxikākī Betsaida ano rekē nokotaxikakī. Ĕ fenakaimakai, Ĕ na yorafo nīchyonō,” ixō ato yoini. ⁴⁶ Mā yorafo nīchita māchi keya ari arese kani arixō Apa Nios kīfikai. ⁴⁷ Mā fakishaino ĩamāfā nakirafe kanōanāfā ini. Akka Jesús kanima, ares fisti nēteni. ⁴⁸ Jesús ōini aōxō tāpimisfāfe tōfeafāfe nēfefanē ato katima faino ĩamāfā pooiki mesenikōiaino, mā penaino. Nāskakē Jesús atoki kani ĩamāfā femākīa. Akka ĩamāfā femākīa kakī oa ato finōfainai keskara ini. ⁴⁹⁻⁵⁰ ĩamāfā femākīa kaito ōikakī niafakara ixō shinākani. Tai tai inifo. Nāskakē keyokōichi ōikani rateaifono. Akka Jesús ato yoini iskafakī: “¿Afeskai mā rateimē? Ĕki rateyamakāfe,” ato fani.

⁵¹ Nāskata kanōanāfā mēra naneinākakā, nēfefā nishpafani. Nēfefā nishpafaito ōikakī a aōxō tāpimisfāfe, “¡Keel! ¿Afeskaxō nēfefā nishpafaimē?” fanifo. ⁵² Akka Jesúsnoa tāpiyonifoma, Jesús afama mīshti fatiroxakī cinco pāa cinco mil feronāfakefo ato pimafitano. Niospa Fake fiano āto ōiti mēraxō tsōa shinānima, tāpiyonifoma.

Jesús Genesaret anoafō a isinī ikaifo ato sharafani
(Mt. 14.34-36)

⁵³ Jesús aõxõ täpimisfo feta ïamãfã pokefainax Genesaret mai ano nokoni. Nãno ïamãfã ketokonõ kanõanãfã nexanifo. ⁵⁴ Nã kanõanãfã mëranoax fotopakefofãnaifono, yorafãfe täpinifo. ⁵⁵ Mã täpikanax pexe rasi pasotai ichoi fetsenifo. Nãskakaxõ a isinĩ ikaifo, rãtati kamaki rãtakaxõ ato efenifo Jesús ano. ⁵⁶ Nã Jesús kai ari fanĩma mĩshtixõ, a isinĩ ikaifo fai nẽxpakĩa ato rãtanifo. Nãfãfe, “Noko ramãmafe nõ mia tari kexa ramãkanõ,” fanifo. Nã ramãifo tii sharai fetsenifo.

7

Jesús ato yoini afeskai yorafo chakafomakĩ (Mt. 15.1-20)

¹ Nãskata fariseofo fe a Moisés yoikĩ kirika keneni keskara ato täpimamisfo Jerusalén anoax Jesús ano fenifo. ²⁻³ Nãfãfe õinifo Jesúsxõ täpimisfãfe mechokomexoma piaifãfe, a ãto xinifãfe yoinifo keskayamaifono. Nãskakẽ ato mekafanifo. Akka fariseofãfe keyokõĩ judeofo ãto xinifãfe yoipaoni keska-paonifo. Piamax taeyoi mechomepaonifo chipo pixakakĩ. ⁴ Akka a afarafo ato miniaifo anoax fekanax, a ato xinifãfe yoinifo keskai mechokomekaxoma pitirofoma. ãto xinifãfe afarafo feyafapaonifo keskai nãfori askapainifo. ãto kechofoya, ãto jarafoya ãto ochamefetifoya, ãto rakoti chokapaonifo ãto xinifãfe apaonifo keskara.

⁵ Nãskakẽ fariseofo feta a Moisés yoikĩ kirika keneni keskara ato täpimamisfãfe Jesús yõkanifo: “¿Afskakĩ na mĩõxõ täpimisfãfe a nõko xinifãfe yoinifo keskara nikakanimamẽ na mechokomexoma piaifofaifãfe?”

⁶⁻⁷ Jesús ato kemani iskafakĩ: “Nã Niospa meka yoimisto Isaías matoõnoa yoini iskafakĩ:

Na yorafãfe afaa täpiafoma ato feparapaimisfo. Na yorafãfe eõnoa yoisharafikakĩ, akka ãto õiti mëraxõ ea shinãsharafoma. ãakõĩ ichanãkanax fanãikani ea kĩfiyanã. A yorafo täpimanaifo keskarakai õfe mekama. ãakõĩ shinãkaxõ ato yoikani,

ixõ Isaías Niospa meka keneni. ⁸ Nãskakẽ a Niospa yoini keskara mã shinãkima, a mãto xinifãfe yoini keskara mã shinãmis.

⁹ “Nã mã shinãpaiyai keskara fisti mã shinãpai. Nãskakẽ a Niospa mato yoini keskara mã anã nikapaima. ¹⁰ Akka Moisés yoini iskafakĩ: ‘Mãto epa yafi mãto efa nikasharakãfe. Akka a ãto apa yafi ãto afa chakafaifo ato retekãfe,’ ixõ yoini. ¹¹⁻¹² Anori kenekĩ yoifinino, akka mã yoikĩ iskafamis: ‘Feronãfãke ãfe apa yafi ãfe afa yoikĩ iskafatiro: “Ë mato afaa inãtiroma, nã õfenãfo mẽ Nios inãkĩ ixõ yoitirofo,” ’ mã famis. Nãskata a Niospa yoini anori mã ato yoimisma mãto epa yafi mãto efa kexeshakãfe ifiano. Akka mã ato yoimis iskafakĩ: ‘Anã mãto epa yafi mãto efa mã afaa inãtiroma,’ ixõ mã ato yoimis. Na shara. ¹³ Nãskakẽ a Niospa yoini anori yoitama, a mãto xinifãfe yoipaonifo anori fisti mã ato yoimis. Nãskaxõ afara fetsafo mã famis, Niospa mekakõĩ mã yoimisma,” ixõ Jesús ato yoini.

¹⁴ Nãskaxõ Jesús yorafo kenaxõ ato yoini iskafakĩ: “Keyokõichi ea nikasharakõikãfe täpisharakõixikakĩ õ mato yoinõ. ¹⁵ Nã nõ piatokai noko chakana fatiroma, akka nõko shinã mëraxõ nõ afara chakafo shinãito noko chakanafatiro. ¹⁶ Mã pachoyakĩ nikasharakãfe,” ato fani.

¹⁷ Nãskata Jesús yorafo nĩchifaini pexe mëra ikini, nãnoxõ a aõxõ täpimisfãfe yõkanifo: “A mĩ yorafo yoia keskara nokori yoife nõ täpinõ,” faifono, ato yoikĩ iskafani: ¹⁸ “¿Afskakĩ mãri mã nikasharaimamẽ? ¿Mã täpimamẽ afara nõ piato nõko xaki mëraxõ noko chakafatiroma? ¹⁹ Akka a nõ piat nõko õiti mëra

kaima, nōko āto mēra kai, mā nōko āto mēranoax payokomeano chipo nō aya safatiro.”

“Akka a nō piai chakama, keyokōi shara,” ixō ato yoini. ²⁰ Nāskaxō anā ato yoini: “Akka mātō shināmā shināxō mā afarafo chakafatiro. ²¹⁻²² Nāskakē āto shinā mēraxō shinākakī, yorafāfe afara chakafo shināmisfo. Feronāfakefāfe āto āfima chotaifono, kērofāferi āto fenema chotamamisfo. Nāskata yomet-sokata, ato retemisfo. Askatari kēro fetsafo kaxefakāta, fetsafo chakafakī, mekafakāta; afara fetsafo chakafakāta, ato pārakāta, a afara apaiyaifo fisti akāta, a fetsafāfe fiati fipaikāta, āa chanīkāta, āa kakapaikāta, askatari shināsharamisfoma. ²³ Nā afara chakafo āto shinā mēraxō shināifo keskafakī nāato ato chakafaxii,” ixō ato yoini.

Xotofake judeoyamafixō Jesús chanīmara fakōini
(Mt. 15.21-28)

²⁴ Nāskata nānoax pexe rasi Tiro ano Jesús kani. Mā kaax pexe fetsa mēra ikini, ano ikikē tsōa tāpīamanō. Akka nāno ikiāx onetiroma ini. ²⁵ Nānoa koshikōi tāpinifo, nāskakē nā fake xotofake niafaka naneato āfe afa Jesús ano kaxō a nāmā ratokonō mai chachipakefofāni. ²⁶ Nā kēro xoko fetsa Sirofenicia mai ano ini. Nāskakē Jesús ano kani. Kaxō yoikai iskafakī: “Ēfe fake xotofake makinoa niafaka yōshi chaka potaxōfe,” fani.

²⁷ Askafafiaito nikakī Jesús yoini iskafakī: “Āa fakefāfe pikī taefayonōfo. Enefe, a fakefāfe piai fīaxō nō paxta inā, askarakai sharamaki,” faito, ²⁸ nā kēromā kemani iskafakī: “Ēje Ifo, a mī ea yoiai keskara mē nikai. Akka paxtafāfe pitirofo a fakefāfe piai āfe potofo mīsa nāmā keyo pakeaito,” faito, ²⁹ Jesús yoini iskafakī: “Chanīma, mī ea kemasharakōia. Nāskakē mā mī katiro, mī fake xotofake makinoax mā niafaka yōshi chaka mā tsekeaki,” fani.

³⁰ Nā kēro mā āfe pexe ano nokoxō ōia āfe fake xotofake raka ini, a makinoax mā niafaka tsekeano.

Jesús feronāfake pāstokōi ita mekamisma sharafani

³¹ Jesús Tiro mai anoax tsekekainikakī, Sidón yafi pexe rasi Decápolis finōfaini kaax, Galilea ĩamāfā kesemē nokoni. ³² Nāno yorafāfe feronāfake mekamisma ita pāstokōi iyonifo. Mā iyokaxō yoinifo iskafakakī: “Mī mīfi māmāfe nikamismaki pāstokī,” faifono, ³³ Jesús a fisti ori iyonī, yorafo maki-noa. Nāskaxō āfe mīfi āfe pachō kini mēra meeini. Askafatari āfe mifiki kemo mechota āfe ana ramākani. ³⁴ Nāskafata nai foisnīfofā xakaita yoini iskafakī: “Efata,” fakī. (Akka nōko mekapa nō yoimis iskafakī: “Papeita nikasharafe,” faki.)

³⁵ Nāskafaino, nā pāsto āfe pācho nikasharakōini. Āfe anari sharakōitani, nāskax meka sharakōini. ³⁶ Nāskafata, “Mā tsoa yoiki,” Jesús ato fafi-aino, askatamaroko ato yoikī finakōifofāsa fanifo. ³⁷ Nāskakē, “ĭKee, ōikapo! ¿Afeskaxō iskara sharafaimē?” ikata iskafakī yoinifo: “A pastofo ato sharafaino mā nikakani, a mekamisfomari mā ato sharafaino mā mekakani,” ikanax yoinānifo.

8

Jesús cuatro mil feronāfakefo pimani
(Mt. 15.32-39)

¹ Nāskata pena fetsa yorafā rasi anā Jesúski fenifo āfe meka nikai fekani. Nāskata a piaifori ano afaa inima. Nāskaifono Jesús aōxō tāpimisfo kenaxō yoini iskafakī: ² “Ē na yorafo shinākōi, nono tres nia mā efe ikafono, nonoxori afaa pikanima. A piaifo mā keyoa. ³ Akka afaa pimaxoma āto pexe ano

ē ato nīchiano, fonāikani afaa pikanaxma fai nēxpakīa paketirofo. Atiri chai inoax feafoki,” ato faino, ⁴ a aōxō tāpimisfāfe kemanifo: “Akka, ¿afeskaxō nō ato pimatromē? ¿Fanīa nō afaa fitromē, nonokai tsoa ikama?” faifono, ⁵ anā Jesús ato yōkani: “Akka, ¿afe tii mā pāayamē?” ato faito, “Siete pākīa,” fanifo.

⁶ Nāskakē Jesús, “Yōrafā rasi nāmā tsaokāfe,” ato fata, siete pāa tsomainīfofā. Apa Nios aicho fata, pāa kaxke pakexō aōxō tāpimisfo ināni. Nāfāferi nā yorafo inānifo pinōfo. ⁷ Nāskata foe ichapama ranāri ini. Nāskakē atoōxō Jesús Apa Nios aicho fata, aōxō tāpimisfo foe ināni a yorafori ato inānōfo. ⁸ Nāskakē keyokōichi pikanax māyakōinifo. A pikī chetefaafō siete fēta fospikōia ini. ⁹ A piafo yorafo ichapakōi inifo, cuatro mil inifo. Nāskaxō Jesús ato nīchini fotanōfo. ¹⁰ Nāskata Jesús a aōxō tāpimisfo fe kanōanāfā mēra naneinākafanax Dalmanuta mai ano kani.

Fariseofāfe, “Jesús, tsōa atiroma keskara noko ispafe nō mia chanīmara fanō,” ixō yōkanifo

(Mt. 16.1-4; Lc. 12.54-56)

¹¹ Nāno fariseofo akiki fenifo afe yoināi fekani, feparaxō yōkapaikani. Iskafakī yoinifo: “Tsōa atiroma keskafakī afama mīstifō fakī noko ispafe nō mia chanīmara fanō mī Nios ariax oamāki,” faifono, ¹² Jesús fāsi xakainākafā ato yoini iskafakī: “¿Afeskakī na yorafāfe tsōa atiroma keskafakī noko ispafe ea fakanimē? Ē mato pāraima a Nios fistichi atiro keskara ē mato ispaima,” ixō ato yoini.

¹³ Ato askafata mā ato makinoax kai kanōanāfā mēra naneinākafā okiri ĩamāfā pokefaini kani.

“Fariseofo feta saduceofāfe anorima yoimisfoki ato nikayamakāfe,” Jesús ato fani

(Mt. 16.5-12)

¹⁴ Akka mā fōkakī, a pifofaifo shināmaki fainifo. Akka nā kanōanāfā mēra pāa fisti ini. ¹⁵ Askaifono Jesús ato yoini: “Ōisharakāfe. Fariseofāfe Herodes feta pāa faraxakafo piyamakāfe,” ato fani.

¹⁶ Ato askafaino, a aōxō tāpimisfo āa ranā yoinānifo iskakani: “¿Afeskakī noko iskafaimē? Nōkai pāa yama,” ikanax yoinānifo.

¹⁷ Nāskaifono mā tāpixō Jesús ato yoini iskafakī: “¿Afeskai nō pāayamara mā ikimē, mātō ōiti mēraxō mā shināsharaimamē? ¹⁸⁻¹⁹ Feroyafīaxō mā ōi sharaima, pachoyafīaxori mā nikasharaima. ¿Akka mā shināimamē? A cinco pāa cinco mil yorafo ē ato pimaita akka, ¿a chetefaafō afe tii fēta fospia mā fiitamē?” ato faito kemanifo: “Doce fēta ikita,” fanifo.

²⁰ “Askatari a siete pāa cuatro mil yorafo ē ato pimaita, akka, ¿afe tii fēta fospia mā fiitamē?” ato faito, “Siete ikita,” fanifo. “Askatari, ¿nā siete pāa ē kaxkeketsaxō ē ato minita cuatro mil feronāfake, afe tii fēta texefafo mā fiitamē?” ato fani. “Sietekīa,” fanifo.

²¹ Askafaifono ato yoini iskafakī: “¿Ai mā tāpiamamē?” ato fani.

Jesús yora fēxo Betsaida anoxō sharafani

²² Nāskata mā Betsaida ano nokoafono, yora fēxo Jesús ano iyonifo. Mā iyokaxō iskafakī yoinifo: “Jesús, na feronāfake ramāfe,” faifono, ²³ Jesús āfe mēkemā nā fēxo mētsoinīfofā peke rasi pasoatai iyonī. Nārixō āfe kemō āfe fero mechanafayanā āfe mēkemā ramāni iskafakī yōkayanā: “¿Mā mī afara ōitromē?” faito, ²⁴ nā fēxo mā ōisharaki iskafakī yoini: “Ē ōi na feronāfakefo oa ififo kafanai keskara,” faito, ²⁵ Jesús anā āfe mēkemā fero ramākani. Nāskafaano nā fēxo mā sharaxō ōisharakōini. Nāskaxō keyokōi xafakīakōi

ōisharakōini. ²⁶ Nāskakē Jesús āfe pexe ano nīchini iskafakī yoiyanā: “Mī anā pexe rasi ano kakiki, mī pexekōi ano katāfe, mī tsoa yoikī,” fani.

“Mī Cristo mia Niospa ifini nokoki nīchixii mī nōko xanīfo finakōia inō,” ixō Pedro Jesús yoini

(Mt. 16.13-20; Lc. 9.18-21)

²⁷ Nāskafata Jesús a aōxō tāpimisfo fe pexe rasi Cesarea Filipino pasoato fonifo. Fāi kakī Jesús ato yōkani: “¿Ea afaa yorafāfe faimē?” ato faito, ²⁸ aōxō tāpimisfāfe kemanifo iskafakakī: “Fetsafāfe Juan Maotistara, mia fakani. Fetsafāferi Elíasra mia fakani. Fetsafāferi nā ato Niospa meka yoipaoni fetsa rakikīa mia fakani,” ixō yoinifo.

²⁹ “Akka, ¿mā ea tsoara faimē?” ato faito, Pedro kemani iskafakī: “Mī Cristo mia Niospa ifini nokoki nīchixii mī nōko xanīfo finakōia inō,” faito, ³⁰ Jesús yoini iskafakī: “Eōnoa tsoa yoiyamakāfe,” fani.

“Chipo ea retexikani,” Jesús ato fani

(Mt. 16.21-28; Lc. 9.22-27)

³¹ Nāskata Jesús ato yoikī taefani iskafakī: “Ē chipo omiskōi finakōixii. Askatari ea ōikaspakakī ea potaxikani, judeofāfe āto xanīfofo feta a Nios ato kīfixomis xanīfofāfe a Moisés yoikī kirika kenei keskara ato tāpimamisfāfe. Askatari ea retexikani, akka ea retefiafono tres nia oxata ē anā otoxii,” ato fani. ³² Nāskakē xafakīakōi ato yoini. Ato yoikī askafaito ori iyoxō Pedro yoini iskafakī: “Ifo, askayamafe mia retekanima kiki,” faito, ³³ anā Jesús fesoakekafā aōxō tāpimisfo ōiyanā iskafakī Pedro yoini: “Emakinoax katāfe, Satanás. A Epa Niospa shināi keskara mī tāpiamaki. Akka nā yorafāfe shināifo keskara mī shināikai,” fani.

³⁴ Nāskata Jesús aōxō tāpimisfoya yorafo kenaxō ato yoini iskafakī: “Fatora fetsa ēfe inakōi ipaikī āakōi apaiyai keskara anā atiro. Nā ē yoiai keskara nikakōitiro. ‘Ēfe Ifoxō ea retefiaifono ēkai ēfe Ifo ē potapakenakama,’ ixō shinātiro. ³⁵ Akka fētsa āa shinātiro iskakī: ‘Ē Nios Ifofaito ea retetirofo. Nāskakē ē Nios Ifofaima,’ ixō shinātiro mesekī. Askara yora naax ēfe Epa ano katiroma. Akka nā ea Ifofaa, ēfe meka yoiaito askayamākī eōxō reteafono ē ifixii efe ĩpaxanō eamāi Ifofamiskē. ³⁶ Akka fatora fetsa afara ichapayakōi ikatsaxakī, anā āfenā itiro. Mā naax omiskōipakenaka. ³⁷ Akka, ¿nīpaxakī yorafāfe afe tii kopifatirofomē? Maa, afaa kopifatirofoma. ³⁸ Akka fatora fetsa eō rāfikī, ēfe meka sharari yoikaspai yora chakafāfe ferotaifi ēri aō rāfikī yoikī iskafaxii: ‘Ē na yora ōimisma,’ ē faxii ēfe Ēpa sharafoya fotoxō, ēfe ājiri sharafori efe fotopakefōfāxikani,” ixō ato yoini.

9

¹ Askatari anā Jesús ato yoini iskafakī: “Ē mato pārāima, fatora fētsa nono efe iyoxō nayoxoma ēfe Epa xanīfo finakōia ōiyoxikani āfe sharaōnoax oaito,” ixō ato yoini.

Jesús āfe femānā fetsa keskara ini, fafekōini. Āfe rapatiri oxokōi ini

(Mt. 17.1-13; Lc. 9.28-36)

² Nāskata mā seis nia finōta, Jesús māchi keyakōi ari māpekī āfe ina tiis ato iyoni. Pedro iyota, Santiago iyota, Juan iyota ato fani. Nāriax āto ferotaifi Jesús fetsa keskara ini. ³ Āfe rapati fafekōini oxo finakōia ini, mā patsasharafikakī tsōa askafatiroma ini. ⁴ Nānoa Elías yafi Moisés ōinifo Jesús fe mekaifono. ⁵ Nāskaifono Pedro Jesús yoini iskafakī: “Ifo, sharakōi ano nō oa. Nono nō tres tapas fanō, fetsa mia axota, fetsa Moisés axota, fetsa Elías axota, nō fanō,” fani.

⁶ Akka aōxō tāpimisfo ratekōinifo. Nāskakē Pedro tāpinima a yoiai keskara, shināyamaino yoini. ⁷ Nāskaifono kōinī ato maipakefōfāni. Nā kōi mēranoax mekai iskaito nikanifo: “Nafi ēfe Fakekōiki ē aō noikōi. Nāskakē nikasharakōikāfe,” ikaito nikanifo.

⁸ Askaito nikafikakī, a kemataima ōiafo ano ato fe tsoa inima, Jesús fisti ares ato fe ini.

⁹ Nāskata mā māchi keya ariax fotoxō, “A mā ōia keskara mā tsoa yoiki. Ē naax mē anā otoano mā ato yoitiro,” ixō ato yoini. ¹⁰ Nāskakē tsoa yoitama. Ares fisti āto ōiti mēraxō shinānifo mā tāpifikaxō. Naax ē anā otoxira nokofaito nō tāpiama ikanax yoinānifo.

¹¹ Nāskaxō Jesús yōkanifo, iskafakakī: “¿Afeskakī a Moisés yoikī kirika keneni keskara ato tāpimamisfāfe iskafakī yoimisfomē Elías rekē oi taexii?” ixō yoimisfo faifono, ¹² ato kemakī iskafani: “Chanīma, Elías rekē fotoi taexii, nāato ato yoisharaxii itipinīsharanōfo. Akka, ¿afeskakī kirika ano kenenifomē, a ē omiskōixiai yorafāfe ea chakafakakī ea potaifono? ¹³ Akka ē mato yoinō mā Elías ifana. Nāskakē nā apaiyai keskafakakī chakafanifo. Nānori aōnoa yoikī kirika kenenifo,” ixō ato yoini.

*Jesús feronāfake naetapa niafaka chaka pōtaxoni
(Mt. 17.14-21; Lc. 9.37-43)*

¹⁴ Nāskata mā Jesús fe fōtakakī a Jesúsxō tāpimis fetsafo ano nokokaxō ōitoshinifo yōrafā rasifo fe a Moisés yoikī kirika keneni keskara ato tāpimamisfo fe ato fe feratenāifāfe. ¹⁵ Nāskaifono Jesús oaito fichikanax akiki keyokōi farekefaikaxō, “Kee, mā Jesús oi kiki,” ikaxō yoisharanifo.

¹⁶ Askaifono Jesús ato yōkani iskafakī: “¿Afeskai mā ato fe feratenāimē?” ato faino, fētsa kemani iskafakī: ¹⁷ “Maestro, ēfe fake ē mikiki efea, niafaka chaka a mēra nanexō mekamamismo. ¹⁸ Nā kapaiyai arixō, niafaka chakata achiano paketiani. Āfe axfapa fākokeyopaketiani, askatari āfe piti yeyexamis, askatari charishi fetsemis. Mē mī inafō yoia a makinoa niafaka yōshi chaka pōtanōfo. Akka mī inafāfe atirofoma,” faino, ¹⁹ Jesús kemani: “Mā kai ea chanīmara faima. Mā afara shināmis. Akka afetiakai ē nono mato fe itianima. ¿Afetiakai mā ea nikaimē? Niri nā fake efekāfe,” faino, ²⁰ nāskakē Jesús ano nā fake iyonifo. Akka nā niafaka mā Jesús tāpixō, nā feronāfake anā choamanaino anā nāmā pakeni. Nāskakē tarame tarame iyanā āfe axfapa fākokeyopakeni.

²¹ Nāskaxō Jesús apa yōkani iskafakī: “¿Afetiā fichinimē?” iskaifaito, apa yoini iskafakī: “Afetiā fichinima. Yomeax fichini. ²² Mēxotaima na niafaka chakata iskafaino, chiinaki paketa fakanaki pakemis, retepaikī iskafaino. Nāskakē mī sharafatiromakī sharafafe, noko shinākī ēfe fake ea sharafaxōfe,” faino, ²³ Jesús yoini: “¿Afeskakī ēfe fake mīa ea sharafaxotiromamē mī ea faimē? Ea chanīmara faifono ē ato afama mīshti faxotiro,” fani.

²⁴ Nāskakē nā fake āpa fāsikōi mekani iskafakī yoini: “Ē mīa chanīmara fai, ea axōfe ē mia chanīmara fakī finakōinō,” ixō yoiaino, ²⁵ yōrafā rasi ichanāfono Jesús ōini, Jesús feronāfake makinoa niafaka potaito ōipaikani. Nāskakē Jesús niafaka iskafakī yoini: “Niafaka yōshi chakata, na fake mī mekamatama, mī nikamamismaki, ē mia yoikai na fake makinoax tsekekaitāfe, nāskax mī anā a mēra ikiki,” faino, ²⁶ niafaka yōshi chaka fāsikōi fiisini. Nāskakī nā fake anā choamani. Nāskata mā fake makinoax tsekekaikī oa naa keskara fafāini. Nāskakē iskafakī yoinifo: “Mā naa raka,” faifono, ²⁷ akka Jesús āfe mēkemā mētsota fininīfofanaino nā feronāfake niinākfāni.

²⁸ Nāskafata Jesús peke mēra ikikainano, anoxō a aōxō tāpimisfāfe a fisti yōkanifo: “Akka, ¿afeskakīri nō niafaka yōshi chaka potatiromamē?” ixō yōkaifono, ²⁹ Jesús ato kemani: “Na keskara niafaka mā potakī Epa Nios

kĩfita foni teneyanã Nios shinãkĩ mã potatiro. Akka mã askayamaxõ mã potatiroma,” ato fani.

*Anã Jesús ato yoini: “Chipo ea retexikani,” ixõ
(Mt. 17.22-23; Lc. 9.43-45)*

³⁰⁻³¹ Nãskata Jesús nãnoax a aõxõ tãpimisfo fe kakĩ Galilea finõfaini. Akka Jesús ato tãpimakaspani, “Ea tãpiyamanõfora,” ixõ. A aõxõ tãpimisfoosmãi ato tãpimakĩ iskakakĩ ato yoini: “Ea achikaxõ ãto xanĩfofo ano ea iyoxikani, afãfe ea retenõfo. Akka ea retefiafono tres nia oxata ã anã otoxii,” ato faito, ³² tsõa tãpinima a ato yoiai keskara. Yõkapai akiki ranonifo.

*“Akka, ¿tsoakaimẽ sharafinakõia?” inifo
(Mt. 18.1-5; Lc. 9.46-48)*

³³ Nãskata pexe rasi Capernaúm ano nokonifo. Nã pexe anoxõ Jesús ato yõkani: “¿Afeskai fai anoax mã feratenãmẽ?” ato faino, ³⁴ tsoa tooxinima, akka fai nẽxpakĩanoax feratenãi iskakanax: “¿Tsoakai sharafinakõiamẽ?” ikanax.

³⁵ Nãskakẽ Jesús tsoaxõ a aõxõ tãpimisfo doce kenaxõ ato yoini: “Fatora fẽtsa ato finõpai nã yorafãfe ãto ina keskara itiro, nãskakẽ keyokõi ato axosharakõitiro,” ixõ ato yoini.

³⁶ Nãskata ato nẽxpakĩa fake yome nĩchita, chishtoinĩfofã ato yoini: ³⁷ “Akka fatora fẽtsa ãfe aneõxõ na fake yome noikĩ nãatori ea noisharakõi. Nã ea noisharaito ea fisti noima, nã ea nĩchiniri noisharai,” ixõ Jesús ato yoini.

*Fẽtsa noko noikaspatama noko sharafai
(Mt. 10.42; Lc. 9.49-50)*

³⁸ Ato askafaito Juan yoini: “Maestro, mã nõ õia oa feronãfake fistichi mã aneõxõ niafaka chaka potaito. Nãskakẽ mã nofe rafemismaki, askafayamafe mã yorafo makinoa niafaka potatiromaki nõ faa,” faito, ³⁹ Jesús kemani iskakakĩ: “Askafayamakãfe. Akka mã ãfe aneõxõ afama mĩshtifo faxõ chipo ea chakafakĩ mekafatiroma. ⁴⁰ A noko chakafakĩ mekafaima, nofe rafesharai. ⁴¹ Akka fẽtsa mato shinãkĩ, nato Cristo Ifofaki ixõ mato faka ayamanaito, askara Niospa afara inãsharatiro. Chanĩmakõi ã mato yoi,” ixõ ato yoini.

*Noko fẽtsa afara chakafamaino ãfenã mesekõi itiro
(Mt. 18.6-9; Lc. 17.1-2)*

⁴² Anã Jesús ato yoini iskakakĩ: “Na fakefãfe ea chanĩmara faifono, fatorafãfe ato afara chakafamaifono, tokirinĩfaya tenextifaxõ fakafã nõafã mẽra mã ato potatiro ato anã afaa chakafamanõfoma. ⁴³⁻⁴⁴ Akka mãto mẽkemã mato afara chakafamaino mextemekãfe. Akka mã mã mextemeax Epa Nios ari mã katiro afe nĩpaxakĩ. Akka mifi rafeyaxõ mã afara chakafaax chiifã xoisai mẽranoax mã omiskõipakenaka, a chiifã nokanakama anoax. Anoax xenafo nayamaino, chiiri nokanakama anoax. ⁴⁵⁻⁴⁶ Askatari mã tãe mia afara chakafamaino oxtemeefe. Akka mã mã oxtemeax Epa Nios ari mã katiro afe ãpaxakĩ. Akka mã mã oxtemeamax tae rafeyax chiifã mẽranoax mã omiskõipakenaka, anoax xenafo nayamaino, chiiri nokanakama anoax. ⁴⁷ Askatari mã fẽro mia afara chakafamakẽ tsekafe. Nãskax mã fero fistiax Epa Nios xanĩfo ano mã katiroki. Akka mã fero rafeyax chiifã mẽranoax mã omiskõipakenaka. ⁴⁸ Anoax xenafo nayamaino chiiri nokanakama anoax.

⁴⁹ “Nãskakẽ chiifã mẽranoax keyokõi omiskõipakenakafo. ⁵⁰ Akka tashi shara. Akka mã nami tashiya ayamaxõ, afeska faxõ mã anã sharafatiromẽ, mã anã sharafatiroma, chakanatiro. Nãskakẽ oa tashi keskara ikãfe isharakõiax. Fetsafo ato yoisharaxikakĩ anã afaa chakafanõfoma.”

10

Feronāfake āfe āfi fe enenātirofoōnoa Jesús ato yoini (Mt. 19.1-12; Lc. 16.18)

¹ Nāskata Jesús Capernaúm anoax tsekekainax Judea mai ano kani. Nā Jordán faka ketokonō, nānoxō anā yorafo ichanāfaxō anā ato yoini, ato yoimis keskafakī. ² Ato yoikī askafaino fariseofo Jesús ano fenifo. Akiki fēkaxō chakafakī mekamapaikani. Nāskaxō yōkanifo iskakakī: “Nōko xinifāfe Niospa meka yoikī kenenifo keskafakī, ¿feronāfake āfe āfi enepaikī enetiromē?” ixō yōkaifono, ³ Jesús ato kemani: “Moisés mato kirika kenexokī, ¿fanīri mato yoinimē?” ato faito, iskakakī yoinifo: ⁴ “Moisés kenekī iskakani: ‘Fētsa āfe āfi enepaikī taefakī kirika kenexotiro iskakakī: ‘Ē mia anā fiima, mī anā ēfe āfi ikima,’ ’ ixō mā yoitiro noko fani,” ixō yoiaifono, ⁵ Jesús ato kemani iskakakī: “Moisés iskakakī mato yoini: ‘Mā kai afaa tāpiama māto ōiti kerexkōi,’ ixō mato yoini. ⁶ Akka taekōifakī, Niospa feronāfake yafi kēro onifani. ⁷⁻⁸ Nāskakē feronāfake mā āfiyax āfe apa yafi āfe afa makinoax paxkatiro āfi fe fianāxiki. Nāskakē āfe āfi fe yora fisti keskara itirofo. Nāskakē anā yora rafema, yora fisti keskara ikani āfe āfi fe. ⁹ Nāskakē feronāfake āfe āfi enetiroma Niospamāi ato fianāmano,” ixō ato yoita, ¹⁰ mā pe xe mēra ikiano, anā a aōxō tāpimisfāfe yōkanifo: “A mī yorafo rama yoiai keskara nokori yoife,” faifono, ¹¹ Jesús ato yoini iskakakī: “Akka fētsa āfe āfi enexō kēro fetsa fixō afe ikī a fikī taefani chakafai. ¹² Askatari feronāfake āfe āfi enexō fetsa fixō fetsa fe ikī āfe āfi chakafai,” ixō Jesús ato yoini.

Jesús fakefo chishtoxō ato māmāyanā ato Epa Nios kīfixopakeni (Mt. 19.13-15; Lc. 18.15-17)

¹³ Askatari yorafāfe āto fakefo Jesúski efenifo ato māmāpakeyanā ato Epa Nios kīfixonō. Akka a Jesúsxō tāpimisfāfe ato iskakani: “Māto fakefo efexō nōko Ifo fekaxtefayamakāfe,” ato faifono, ¹⁴ nikakī Jesús ato iskakani: “Ato enekāfe na fakefo ekeki fenōfo, ato nētefayamakāfe. Ēfe Epa Nios xanīfo ika ari na fakefo keskarakōifoki,” ixō ato yoini.

¹⁵ “Ē mato pāraima, mā Epa Nios xanīfo nikayamax na fakefāfe ea nikaifo keskafakī, Epa Nios xanīfo ika ari mā katiroma,” ixō ato yoita, ¹⁶ fakefo chishtoinīfofā ato māmāpakeyanā: “Epa Niospa, na fakefo sharafafe,” fani.

Feronāfake naetapa kori ichapayax Jesús fe mekani (Mt. 19.16-30; Lc. 18.18-30)

¹⁷ Mā askafata mā Jesús kaino feronāfake fetsa ichoax akiki nokoni. Mā akiki nokoxō ratokonō mai chachipakefofā yōkani iskakakī: “Maestro mī sharaki, ea yoife ē afaa afeskatiromakī Nios xanīfo fe ipaxakī,” ixō yōkaito, ¹⁸ Jesús kemani: “¿Afeskakī sharara mī ea faimē? Akka Nios fisti shara. ¹⁹ Niospa shināmanaino a Moisés yoini keskara mā mī tāpia. Iskakakī yoini: ‘Ato reteyamakāfe, askatari māto āfima chotayamakāfe, askatari kēromāri māto fenema chotamayamakāfe, askatari atoki yometsoyamakāfe, askatari chanī yoiyamakāfe, askatari mā kaxpa ato pārayamakāfe, askatari māto epa yafi māto efa nikasharakōikāfe,’ ” ixō Jesús yoini.

²⁰ Askafaito nā feronāfake kemani iskakakī: “Maestro, nā mīa yoiai keskara mē nikamis yomexō,” faito, ²¹ nikakī Jesús ōiyanā aō noiyanā iskakakī kemani: “Nāno afara fisti mī tāpia. Kaxō mī afarafo minixō kori fixō nā afaamaisfo ato ināketsatāfe. Nāskakē nai mēranoax afama mīshtifoya mī ixikai. Mā mī kori ato ināketsata anā oxō ea Ifofasharafe,” ixō yoini.

²² Askafaito nikai nā feronāfake shināchakakōi tooxinima kori ichapayamāiyaxō ato inākaspa. Nāskax Jesús makinoax kani.

²³ Nāskaito Jesús aa kemataima òiakexō, aōxō tāpimisfo yoini iskafakī: “A yora afama mīshti ichapaya Nios xanīfo ano katiroma, fekax pishta,” ixō ato yoiato, ²⁴ nikakakī āfe inafāfe: “Kee, āfe meka nō tāpitiroma,” ixō tāpipainifo. Askaifono anā Jesús ato yoini iskafakī: “Ēfe fakefāfe, fekax pishta afama mīshtifoya ikatsaxakī mā Nios Ifofapaia. ²⁵ Māraki camello akoja kini mēra ikipaifi ikitiro, fekaxkōi efapamāiax. Nāskarari yora afama mīshti ichapayato Nios Ifofapai, fekaxkōi āfe afama mīshtifomāi potakaspakī,” ixō Jesús ato yoini.

²⁶ Ato askafaito nikakakī a aōxō tāpimisfāfe tāpipainifo. “¡Kee! ¿Afeskax nō Nios fe ipaxatiromē?” ikanax yoinānifo.

²⁷ Askaifāfe òikī Jesús ato yoini: “Yorafokai āa ifimetirofoma. Nios fistichi yorafo ifitiro. Niospa afama mīshtifo fatiro, yorafāfe atiroma keskara,” ixō ato yoini.

²⁸ Ato askafaito nikakī Pedro yoini: “Ifo, nō mefe okī nōko afama mīshtifo nō òiferani nō mefe oni,” faito, ²⁹ Jesús kemani iskafakī: “Ē mato paraima, fētsa eōxō ēfe meka sharaōnoa ato yoikakī āfe peke òifaini, āfe onefetsafori òifaini, āfe poifori òifaini, āfe aparī òifaini, āfe afari òifaini, āfe fakefori òifaini, āfe tareri òifaini, ³⁰ nāato niyoxō afama mīshtifo fitiro, Niospa ināino, pexefoya ita, onefetsafoya ita, poifoya ita, afafoya ita, fakefoya ita, tarefoya ita itiro. Nāfo Niospa ināsharafiano omiskōixii. Nāskafiax chipo Epa Nios fe ipanaka. ³¹ Akka iskaratīa yora ichapafāfe ato finōpaikani, nō finakōiara ikaxō, akka chipo fenotirofo. Akka a ato finōpaiyamaifo iskaratīa Niospa ato finakōia imaino Nios fe ipanakafo,” ixō ato yoini.

*Anā Jesús ato yoini: “Mā chaima ea retekanira,” ixō
(Mt. 20.17-19; Lc. 18.31-34)*

³² Askafakī ato yoita Jerusalén ari kani. Jesús rekē kaino aōxō tāpimisfo acho fonifo. “Kee, ¿afeskai nōko Ifo Jerusalén ano kaimē?” ikanax ratekōinifo. Nāskaifono a aōxō tāpimisfo tii ato kenaxō Jesús ato yoini iskafakī: “Iskaratīa afaa afeskaimākai ē mato yoinō. ³³ Mā mā òikai, iskaratīa Jerusalén ano nō māpei kaikai. Nānoxō ea achikaxō a ato Nios kīfixomis xanīfofo yafi a Moisés yoikī kirika kenei keskara ato tāpimamisfo ea ato inākani kiki. Anoxō ea iskafakani: ‘Na Jesús ato chakafamiskī retekāfe,’ ixō ea yoikāta, yora fetsafo ano ea iyokani afāfe ea retenōfo. ³⁴ Nāfāfe ea kaxemetsama fayanā, ekeki kemo mechoketsayanā ea koshaketsakata ea retekani. Akka ea askafafafono tres nia oxata ē otoxii,” ixō ato yoini.

*Santiago feta Juan Jesús yōkanifo afe xanīfo ipaikakī
(Mt. 20.20-28)*

³⁵ Santiago fe Juan, Zebedeo fake rafe ini. Nā rafeta Jesús ano fōkaxō iskafakī yoinifo: “Maestro, na nō mia yoiakī keskafakī noko axōfe, nō mia yōkaikai,” faifono, ³⁶ ato yōkani: “¿Ē mato afaa afeska faxotirofomē?” ato faito, ³⁷ anā yoinifo iskafakakī: “Mī xanīfokōikī nokori xanīfo imafe, nō mefe xanīfo inō. Takai fetsa ē tsaofaino, takai fetsari ēfe ochi tsaonō,” faifono, ³⁸ Jesús ato yoini iskafakī: “Na mā ea yōkai keskara mā tāpiama. ¿Na ē omiskōiai keskai māri mā omiskōitirofomē?” ato faino, ³⁹ kemanifo iskafakakī: “Ēje, nōri nō tenetiro,” faifono, Jesús ato yoini iskafakī: “Chanīma, nā ē teneai keskafakīri, mā tenetiro omiskōifinakōifikī. ⁴⁰ Akka efe ketaxamei tsaopai tsoa efe ketaxamei tsaotirofoma. Ēfe Epa Nios fistichi tāpia. Nā Epa Niospa katoafo ano efe tsaotirofo,” ixō ato kemani.

⁴¹ Askafafāfe nikakani a aōxō tāpimisfo diez atoki òitifishkinifo, Santiago yafi Juan mepaikani.

⁴² Askaifono akka Jesús ato kenaxō ato yoini iskafakī: “Mā mā tāpia, yora fetsafo xanīfokaxō fāsikōi mekayanā ato yonomamisfo. A xanīfo fe rafeafāferi ato yoimisfo iskafakakī: ‘Nōri mātō xanīfo. Nō mato yoiaito mā noko afara axorisafatiro,’ ixō fāsikōi ato yoimisfo. ⁴³⁻⁴⁴ Akka mā ranā askayamakāfe. Askatamaroko fatora fetsa mā xanīfo ipai, ato yonoxomis keskara mā itiro. ⁴⁵ Akka ēri anori shināima, ēfe Epa Nios ariax ē nāmā fotoni feronāfakekōi ixiki, ē Niospa Fakefekē ea afara axonōfo ē onima. Askatamaroko fetsafo ē ato afara sharafaxoxiki ē oni. Ē atoōnoax naxiki ē oni. Satanás chaka āto ifo inōma ē oni,” ixō Jesús ato yoini.

Jesús Bartimeo fēxokē sharafani
(Mt. 20.29-34; Lc. 18.35-43)

⁴⁶ Nāskata Jericó pexe rasi ano nokonifo. Nānoax mā Jesús tsekekainaino, aōxō tāpimisfo fe yōrafā rasi afe fonifo. Fokākī yora fēxo fai ketokonō tsaao fichinifo, āfe ane Bartimeo, Timeo fake ini. Nāno fai ketokonō tsaoxō ato kori yōkatiani ini. ⁴⁷ Nāno fai ketokonō tsaoxō nā fēxo nikani Jesús Nazarete anoa kafani faifāfe. Nāskafaifāfe nikai nā fēxo fāsikōi fiisini, iskafakī yoini: “¡Jesús mīfi David fenaki, ea shināfe!” fani.

⁴⁸ Askafaito, “Nōko Ifo fekaxtefayamafe,” fanifo. Askafafiaifono fāsikōi fiisini, iskanī: “¡David fenapa, ea shināfe!” faito nikai.

⁴⁹ Nāskakē Jesús nēteakekafā ato yoini iskafakī: “Ea kenaxokāfe,” ato faino, kenanifo iskafakī yoianā: “Inimayanā fininākakāfe, Jesús mia kenakī,” ixō yoiaifono, ⁵⁰ nikakī āfe tari rashkita potata koshikōi niinākakāfe ichotiri ichotiri ita Jesús ano oni.

⁵¹ Mā akiki oano Jesús yōkani: “¿Ē mia afeska fanō ea mīa yōkamē?” faito, nā fēxo kemani: “Maestro, ēfe fero ē sharafapai,” faino, ⁵² Jesús yoini iskafakī: “Mā mī katiro, ea chanīmara faax, mā mī sharaki,” fani. Naskafaino nā fēxo ōisharakōitani. Mā sharaxō Jesús fāi kaino chīfafaini.

11

Jesús nokoni Jerusalén ano
(Mt. 21.1-11; Lc. 19.28-40; Jn. 12.12-19)

¹ Nāskata Jesús fe fokakī Jerusalén chaima fonifo. Nāno pexe rasi Betfagé fe Betania chaima ini, machi Olivos ano. Nānoxō Jesús a aōxō tāpimis rafe nīchini. ² Ato iskafakī yoianā: “Mēstekōi fotakāfe oa ono pexe rasi ano. Nāno mā nokoxō mā fichi kaikai burro fake nexekē tsoa aō nimisma. Tēpexō ea efexotakāfe. ³ Anoxō mato yōkaifono iskafakakī: ‘¿Afeskakī mā burro tēpeimē?’ mato faifono, iskafakī ato yoikāfe: ‘Nōko Ifāfe fichipaiyaito nō ifixoniyoa, samama mato nīchixonī kiki,’ ixō ato yoikāfe,” Jesús a aōxō tāpimis rafe fani.

⁴ Askata mā fōkaxō fichitoshinifo burro pexe fepoti ano nexekē emāiti fainaki fichixō tēpexō efenifo.

⁵ Nā ano ikafāfe ato iskafanifo: “¿Afaa mā afeskafaimē? ¿Afeskakī mā burro tēpeimē?” ato faifono, ⁶ nā Jesús ato yoia keskafakī ato kemanifo: “Ia. Iyoxotakāfe,” ato fanifo. ⁷ Nāskata Jesús ano burro efekāta, āfe kate kamaki āto rapati kakafanifo. Nāskafafono a kamaki Jesús tsaoinākakāni. ⁸ Akka mā Jesús kaino yorafāfe āto rapatifoya epe peifo xatekaxō kakafaxō fonifo akiki inimakakī.

⁹ Akka nā rekē foaifāfe a acho foaifo fāsikōi tai taifonifo. Iskafa fonifo: “¡Aicho, nā sharafinakōia nokoki oi kiki, nōko Ifo Niospa nokoki nīchiano! ¹⁰ Nōko xini David xanīfo ipaoni keskai, mīri nōko xanīfo ixiki oa. ¡Aicho! ¡Nios sharakōi!” ixō yoinifo.

11 Nāskata Jesús mā Jerusalén ano nokoax, Nios kīfiti pexefā mēra ikixō, a mēranoafo ōifofāsafani. Nāskata nānoax tsekekaini kaax a aōxō tāpimisfo docefo fe Betania ano kani, mā yātapakeaino.

“Fana higuera, mī anā fiminakama,” Jesús fani

(Mt. 21.18-19)

12 Pena fetsa mā Betania anoax okī Jesús mea fonāikōi fini. 13 Nāskakē chai ixō fana higo nikē ōini, peifoya ini. Kaxō ōini fimiyamakī, akka kaxō ōia fimiya inima āfe peifos ini. Nā fimiyamaitīa ōini. 14 Nāskakē Jesús fana higo yoikī iskafani: “Anā tsōa mī fimi pinakama,” faito, āfe inafāfe nikanifo.

Jesús a Nios kīfiti pexefā mēraxō a ato ināifo ato potani

(Mt. 21.12-17; Lc. 19.45-48; Jn. 2.13-22)

15-16 Nāskata anā Jerusalén ano nokonifo. Nānoax Jesús anā Nios kīfiti pexefā mēra ikitoshini. Ikitoshixō ōia a mēraxō afarafo ato miniaifono xafakīa ato kāimani, a ato fīaifori askafani xafakīa kāimakī. A ato kori ināifo anoari mīsafo ato pōtaketsani, askatari a ato rifi miniaifo anoari āto tsaotifori ato pōtaketsani. “Nā Nios kīfiti pexefā mēraxō tsōa afaa ato inātiroma,” ixō fāsi mekainākafā ato yoini. 17 Ato tāpimakī iskafakī ato yoini: “Niospa meka yoikī iskafakī kirikaki kenenifo: ‘Na ēfe pexefā anoxō keyokōichi nā maitio ano ikafāfe ea kīfitirofo,’ ixō kenefinifono, akka nā yometsofāfe pexe keskara mā famis,” ixō ato yoini.

18 Ato askafaito, a ato Nios kīfixomis xanīfofo feta, a Moisés yoikī kirika keneni keskara ato tāpimamisfāfe nikanifo. Nāskakē afeskaxoma Jesús retepainifo, retepaifikani mesenifo, yorafāfemāi nikakōiaifono a yoiai keskara, “Aira, na keskara meka nō nikamisma, āfe meka sharakōi,” ikaxō.

19 Akka mā fakishaino Jesús a aōxō tāpimisfo fe Jerusalén anoax anā kani.

Fana higuera xanani

(Mt. 21.20-22)

20 Askano anā pena fetsa finōfāikakī ōinifo, nā fana higuera mā xanano āfe tapofoya. 21 Nāskakē Pedro shinākī Jesús yoini iskafakī: “Maestro, ōipo na higuera mī kamafofāita mā xana,” faito, 22 Jesús kemakī iskafakī: “Nios nikakōikāfe,” ato fani. 23 “Akka ē mato pāraima. Māto ōiti mēraxō mā Nios nikakōixō na māchifā mā yoikī iskafatiro: ‘Nonoax tsekekainax fakafā mēra paketāfe,’ mā faino fakafā mēra paketiro. Nā mā yoiai keskai nāskakōitiro.

24 Nāskakē ē mato yoi, afara mā fichipaikī mā Epa Nios chanīmara faxō mā kīfaiito mato inātiroma, mātonā inō. 25 Akka mā Epa Nios kīfikī, fetsaki mā ōitifishki iyoxō ikisi raefayokāfe, Epa Nios nai mēranoato māto chaka mato soaxonō. 26 Akka mā fetsafo raefayamaito, matori Epa Niospa nai mēraxō māto chakafo mato soaxotiroma,” Jesús ato fani.

“¿Tsōa mia nīchinimē mī xanīfo inō?” ixō Jesús yōkanifo anoxō achipaikakī

(Mt. 21.23-27; Lc. 20.1-8)

27 Nāskata Jerusalén ano anā fenifo. Nānoax Nios kīfiti pexefā mēra Jesús kafāsaino, nāno akiki fenifo. A ato Nios kīfixomisfāfe āto xanīfofo fe, a Moisés yoikī kirika keneni keskara ato tāpimamisfo, judeofāfe āto xanīfofori fenifo.

28 Anoxō yōkanifo iskafakakī: “¿Tsōaōxō mī iskafaimē, tsōa mia yoiamē mī iskafanō?” ixō yōkaifono, 29-30 Jesús ato kemani iskafakī: “Ēri mato yōkanō ea yoikapo ē nikanō. Ea mā yoiaito ē mato yoikai tsōaōxō ē iskafaimākai. Akka, ¿tsōa Juan nīchinimē ato maotisafakī ato faka mēra ikimapakenō? Niospa nīchiyamakī yorafāfe nīchiniforaka ea yoikapo,” 31 ato faino āa ranā mēenāpaiyanā iskanifo: “Nō kemakī iskafaino: ‘Niospa nīchini,’ nō faino noko yoikī iskafai: ‘Akka, ¿afeskakī mā Juan nikamismamē?’ 32 Akka nō iskafakī yoitiro: ‘Yorafāfe Juan nīchinifo,’ ixō nō yoitiro, yorafoki nō

mesei nokoki òitifishki itirofo.” Akka yorafāfe keyokōichi tāpiafo Niospa shināmanaino Juan ato yoipaoni.

³³ Nāskakē yoikī iskafanifo: “Nō tāpiama tsōara Juan nīchini,” faifono, Jesúsri ato yoikī iskafani: “Ēri mato yoitiroma tsōaōxō ē iskafaimākai,” ixō ato yoini.

12

Meka fetsafaxō Jesús ato yoini a ato yonoxomis chakafoōnoa
(Mt. 21.33-46; Lc. 20.9-19)

¹ Anā Jesús ato yoini meka fetsafaxō iskafakī: “Feronāfake fētsa āfe tare ano uva fanani. Fanaxō akiki keneakeni. Akiki keneakexō mai pōkini a mēraxō uva tsinīxiki. Askatari pexe keya fani anoxō kexexiki tsōa mēeyamanō. Mā askafakī fetsaxō a ano yonofaifo ato ināyoni. Nāskafata mai fetsa ari kayoni. ² Nā fimimistīa mā āfe fana pachiano, āfe ifāfe a yonoxomis nīchini, a kexexonafo ato yōkaxō āfe fana fimifo fixotanō nā āfenā tiiri. ³ Akka āfe kaifo fichikaxō nā fana kexeafāfe achikaxō seteketsakaxō, afaa inākaxoma afaa-maiskōi nīchinifo. ⁴ Nāskata nā tare ifāfe anā a yonoxomis fetsa nīchini. Akka nāri īchaketsayanā tokirinī mapoki tsakakī imi tofeketsafono oni. ⁵ Nāskano afianā fetsari nīchiano nāa retenifo. Mā reteafono ranāfaxō ato nīchini, nāfori ato seteketsayanā, ranāri ato retenifo.

⁶ “Mā ato askafafono, nāno āfe fake fisti ini, nā aō noikōiai. Nāskakē chipokōi fakī āfe fake nīchini: ‘Ēfe fake nikatirofokī,’ ixō. ⁷ Akka mā āfe fake nīchia kaito fichikanax nā tare kexemisfo yoinānifo iskakani: ‘Nato āfe apa naano na fanafo fixii kiki, a nari nō retenō na tare nōkonā inō,’ ” ikanax yoinānifo. ⁸ Nāskakē achikaxō mā retekaxō tare pasotai potanifo.

⁹ Nāskakē Jesús ato yōkani: “Akka, ¿a tare ifāfe ato afeska fatiromē? Kaxō a tare kexemisfo ato retekī mitoxō fetsafo āfe tare inātiro afāfe kexexonōfo,” ixō Jesús ato yoini.

¹⁰⁻¹¹ “Akka, ¿a kirika kenekī iskafanifo mā anemismamē?:

Tokiri pexe fapaikakī nā pexe famisfāfe na tokiri chakara ixō potafono, fetsafāfe fichixō na tokiri sharakōi ikaxō akiki pexe fatirofo. Nāskarifiakī xanīfofōfāfe, ‘Nakai afama,’ ikaxō Niospa Fake ōikaspamisfo. Askafafiaifono Niospa āfe Fake katonī nōko Ifo inō. Nāskakē nō akiki inimakōi, ixō kirika ano kenenifo,” Jesús ato fani.

¹² Nāskakē Jesús achikaxō karaxa mēra ikimapainifo, mā tāpikaxō meka fetsafaxō atoōnoa yoiaito. Akka achipaifikani yorafoki mesekani a makinoax fonifo.

“¿Xanīfo nō kori inātiro mē noko yōkaito?” ixō Jesús yōkanifo
(Mt. 22.15-22; Lc. 20.20-26)

¹³ Nāskakē chipo fariseofāfe Herodes feta afe yorafo Jesús ano nīchinifo, fanīrira Jesús ato yoiaito afāfe yōanōfo āto xanīfofo yoikakī. ¹⁴ Nāskakē mā akiki fēkaxō nāfāfe yōkanifo iskafakakī: “Maestro, mā nō tāpia a mī yoiai anori chanīmakōi mī yoimis. Epa Niospa noko shināmapaiyai anorikōi mēstekōi mī noko yoimis. Afara yoipai mī ranomisma, afarikai mī fomāmisma, na yorafāfe yoiaifo anori mī nikatama, a shināifo anori mī shināmisma. Askatamaroko Epa Niospa meka shara mēstekōi mī yoimis. Akka chanīmamakī noko yoife na romanō xanīfo nō kopifatiromakī askayamakī nō kopifatiroma rakikīa,” ixō yōkaifono, ¹⁵ Jesús tāpini feparapaiyāifāfe, nāskaxō ato yoini iskafakī: “¿Afeskakī mā ea feparapaimē?” ato fata, “Ea kori exe fisti fēxokāfe, ē ōinō,” ato faino, ¹⁶ kori exe fisti fēxofafono, nā kori exe ōiyanā Jesús ato yōkani: “¿Tsōa femānā na keskaramē? ¿Tsōa aneri na kori exe ano keneamē?” ato faino, kemanifo iskafakakī: “Nōko xanīfo César keskara,” faifono, ¹⁷ Jesús ato yoini

iskafakī: “Akka na kori exe Césarnākē César inākāfe, akka Niosnākē Niosri inākāfe,” ato faino, “¡Kee! ¡Nikakapo! Āfe meka finakōia tsōakai finōtiroma,” ikanax rateyanā yoinānifo.

“Yora naax anā otoax, ¿afeskatiromē?” ixō Jesús yōkanifo

(Mt. 22.23-33; Lc. 20.27-40)

¹⁸ Nāskakē saduceofo Jesús ōifokani fonifo. Nā saduceofāfe yoimisfo iskafakakī: “Yora naaxkai anā afeskax ototiroma,” ixō yoimisfo. Nāskakē mā fokaxō yōkanifo iskafakakī:

¹⁹ “Maestro, Moisés noko kirika kenexoni iskafakī yoikī: ‘Feronāfake fetsa āfiyax natiro afeta fake akamax, akka nā kēro ifomafa onefētsa fitiro, afeta fake axiki nā fake nā onefetsa naitanā inō.’ ²⁰ Akka nā nane tii siete feronāfake inifo. Āto ochi iyoa āfiyai taeni, mā āfiyax afeta fake akamax nani. ²¹ Nāskata nāa chipoko fētsa nā kēro ifomafa fini. Nāskarifiāi nāari nani afeta fake akamax. Afianā chipoko fētsari fini, nāari nani afeta fake akamax. ²² Nāskakē nā siete feronāfakefāfe nā kēro fīpakanax, afeta fake akanamax nai keyonifo. Chipokōitani nā kērori nani.

²³ “Nāskakē mā otokaxō, ¿fatoto nā kēro fiximē, nā fistimāi fīpakaxō?” ixō yōkaifono, ²⁴ Jesús ato kemani: “Māakai afaa tāpiama. Na Niospa meka yoikī kenenifokairoko mā ōikatsaxakī. Niospa āfe sharaōnoari mā ōimisma. ²⁵ Yorafo nakanax mā anā otokanax, anā āfiyatirofoma, anāri āto āfi feta fake atirofoma. Askatamaroko nā ājiri nai mēranoafo keskara itirofo. ²⁶⁻²⁷ Akka, ¿a yorafo nakanax anā otokiaifoōnoa yoikī Moisés kirika kenekī yoiniōnoa mā anemismamē? Niospa fana koofai mēraxō Moisés yoini iskafakī: ‘Ēfi mī xinifāfe āto Nioskōi, Abraham ikaino, Isaaca ikaino, Jacobo ikaino,’ ixō Niospa yoini. Akka Niospa naafoma keskara ato ōi, aōnoax keyokōi niafono. Akka māakai afaa tāpiama mā mā chanīmis,” ixō Jesús ato yoini.

“Akka, ¿fato meka sharafinakōiamē, nā Niospa shināmanaino Moisés ato yoiniraka?” ikaxō fariseofāfe Jesús yōkanifo

(Mt. 22.34-40)

²⁸ A Moisés yoikī kirika keneni keskara ato tāpimamis Jesús ano nokoni, Jesús anoax ato fe yoināino māmāi tāpixō Jesúsmāi ato kemasharakōiaino. Nāskaxō akairi yōkani: “Akka, ¿fato meka sharafinakōiamē, nā Niospa shināmanaino Moisés keneniraka sharafinakōia?” ixō yōkaito, ²⁹ Jesús kemani iskafakī: “Niospa yoini iskafakī: ‘A sharafinakōia ē mia yoinō nikapo. Nā israelifo nikasharafe, nōko Ifo Nios fisti nōko Ifokī anā ano fetsamaki. ³⁰ Nōko Ifo Nios noisharakōikāfe nōko ōitifoyaxō, nōko yōshi sharafoyaxori noikāfe. Nōko mapo mēraxori shināsharakāfe, nōko kerex sharafoyaxō,’ ixō nā meka shara Moisés keneni. ³¹ Nā ē mato taefakī yoia keskarari nāno fetsari. ‘Nā mato chaima nikari noisharakōikāfe a mā mā noimesharakōiai keskafakāfe.’ Na meka rafe sharafinakōia Niospa yoini,” ixō Jesús ato yoini.

³² Naskafaito a Moisés yoikī kirika keneni keskara ato tāpimamisto yoini iskafakī: “Mī yoikōi. Maestro, chanīmakōi mī yoimis. Nāno Nios fisti, anā ano a keskara fetsama. ³³ Askatari iskafakī mī yoia, māto ōitifoyaxō Nios noikōikāfe, māto shinā sharafoyaxori askafakāfe, māto yōshi sharafoyaxori askafakāfe, māto kerexfoyaxori askafakāfe, a mato chaima nikafori noisharakōikāfe, a mā mā noimeai keskafakī askatari a afarafo nō Nios inā, nāfo nō finōinīfōfana sharakōikī. A nō afara koakī nō Nios ināfori nāfori nō finōinīfōfana nōko ōitifoyaxō nō Nios noikōikī,” ixō mī yoia fani.

³⁴ Askafakī yoisharaito nikakī Jesús yoini iskafakī: “Epa Niospa afe yorafo imasharai keskara mīri mī tāpiax mī afe nīpanaka,” ixō yoiaito, nikakakī tsoa anā tooxinima. Askata anā tsōa yōkanima.

*“Akka, ġtsōa fenamē Cristo?” ixō Jesús ato yōkani
(Mt. 22.41-46; Lc. 20.41-44)*

³⁵ Jesús Nios kīfiti pexefā mēraxō ato tǎpimayanā ato yōkani iskafakī: “Akka, ġafeskakī a Moisés yoikī kirika keneni keskara ato tǎpimamisfāfe na Cristo David āfe fenara fakanimē? ³⁶ Akka Niospa Yōshi Sharapa shināmanaino nā David yoini iskafakī:

Epa Niospa ēfe Ifo yoini iskafakī: ‘Mī efe xanīfokōi ĩpanakaki. Akka nā mia noikaspaifo mī ato finōkōinō ē ato mī nāmā nīchikai.’
ixō Niospa yoinino David keneni.

³⁷ “Akka, ġafeskai Cristo David āfe fena itiromē, nā David Cristo ēfe Ifora fafiapaonino?”

Nāskakē yōrafā rasi inimanifo Jesús ato yoiaito nikakani.

*Jesús ato yōani a Moisés yoikī kirika keneni keskara ato tǎpimamisfāfe
anorima ato yoiaino
(Mt. 23.1-36; Lc. 11.37-54; 20.45-47)*

³⁸ Nāskano Jesús ato yoiyanā iskafakī ato yoini: “Ōisharakakī a Moisés yoikī kirika keneni keskara ato tǎpimamisfo tari chainipa safekanax fofāsamisfoki, askatari nafāfe tǎpikōiara noko fanōfora ipaikani. Yora ichapafo ano fofāsapaimisfo noko yoisharakōinōra ikanax, nāfo kakapaimisfo. ³⁹ Nāfāfe ichanāti pexe mēraxō tsaoti sharakōi fenamisfo noko ōinōfora ikaxō. A piaifo anoaxri ano tsaopaikakī sharakōi ano tsaopaimisfo. ⁴⁰ Nāskarafāfe kēro ifomafafo ato pexe fiamisfo, nō mato Nios kīfixonira ikaxō chaikōi Nios kīfimisfo atoki kaxemetsamapaiyanā. Nāfo omiskōi finakōixikani Epa Niospa ato omiskōimanaino,” ixō Jesús ato yoini.

*Kēro ifomafa afaamais fixō Epa Nios ināsharakōini
(Lc. 21.1-4)*

⁴¹ Nāskata Jesús tsaoxō ōini yorafāfe a kori naneti mēra kori naneaifāfe Nios kīfiti pexefā mēraxō. Akka nā afama mīshti ichapayafāfe kori naneti mēra kori ichapa nanenifo. ⁴² Nāskafaifono nāno kēro ifomafa nokoni. Nā kēro ifomafa afaamais fixō āfe kori exe rafe nā kori naneti mēra āfe kori nanekī mitofaito Jesús ōini.

⁴³⁻⁴⁴ Nāskafaito ōikī Jesús aōxō tǎpimisfo kenaxō iskafakī ato yoini: “Chanīma ē mato yoikōi, nā kēro ifomafa afaamaisfixō fetsafo finōmainīfofā āfe kori exe rafe nā kori naneti mēra nanea. Akka nā kori ichapayafāfe nā kori naneti mēra mā āto kori nanefikakī tsōa keyo naneama. Akka nā kēro ifomafa afaamaisfixō nā kori naneti mēra āfe kori nanekī mitokōia. Nāskakē a piai anā afanā fitiroma,” ixō Jesús ato yoini.

13

*Jesús ato yoini na Nios kīfiti pexefā pǎoixii ixō
(Mt. 24.1-2; Lc. 21.5-6)*

¹ Mā Jesús a Nios kīfiti pexefā mēranoax tsekeano, a aōxō tǎpimis fētsa yoini iskafakī: “Maestro, ōipo, nōko Nios kīfiti pexefo tokirifo petsanāmeakea sharashtakōifo,” ixō yoiaito, ² Jesús kemani iskafakī: “ġMā mī ōimē na Nios kīfiti pexefo? Akka, ġna tokirifo anā petsanamexima chipo maoui fetsexii anākai na tokirifo petsanāmexima?” ixō Jesús ato yoini.

*Afaa afeskaximākai mā chaima nōko mai keyoaino Jesús ato yoini
(Mt. 24.3-28; Lc. 17.22-24; 21.7-24)*

³ Nāskakata machi Olivos ano fonifo, anoxō ōiafo Nios kīfiti pexefā chaima ini. Nāno Jesús tsaoano, Pedro ikaino, Santiago ikaino, Juan ikaino, Andrés ikaino one yōkanifo tsōa ato nikayamanō iskakakāi:

⁴ “Nō tāpīpaikai noko yoife. Na mī yoiai keskai afetīa iximākai, afeskaxō nō tāpītiromakī. Askayoamano afaa nō ōitiromakī noko tāpīmafe,” faifono, ⁵⁻⁶ Jesús ato kemani iskakakāi: “Kexemesharakani mā ato nikaino mato afara chakafamatirofokī. Yora ichapafo fekani kiki, ēfe aneōnoa mato yoikī iskakakani kiki. ‘Ē Cristoki,’ ikaxō yora ichapafo ato pārāpaikani kiki.

⁷ “Akka yorafo retenāifāfe nikai rateyamakāfe. Nā ē yoiai keskai nāskakōixii. Akka fena nōko mai keyoima, chipo ixii. ⁸ Akka yorafo mai fetsa anoax mēnāpaiyaifono, yora fetsafori mai fetsa anoax retenāixikani. Nāskaifono mai fetsa anoax mai naya naya ixii. Askatari fonāiki finakōixikani afaa pikanima. Askatari mekai finakōixikani. Nāskai omiskōi taexikani.

⁹ “Akka māroko kexemesharakāfe. Mato achikaxō xanīfofo mato inākani kiki, nāskakaxō mato koshakani kiki ichanāti peke mēraxō. Xanīfofofāfe ferotaifi mato iyoxikani. Eōxō mato askafaifono, mā ato yoisharakōixikani. ¹⁰ Akka a omiskōiaifo nokoyoamano efe īpaxanōfo ēfe meka sharaōnoa ato yoikāfe, nā mai tio anoafō. ¹¹ Akka mato achikaxō mato iyoxikani, xanīfofo mato ināxikakī. Shināchakayamakāfe nō ato afaa faikaimē iyamakāfe. Mā afaa shināpaimakai, nā Niospa mato shināmapaiyai anori mā ato yoikai. Akka mā mekaimakai Niospa Yōshi Shara mekai kiki. ¹² A yorafāfe āto extofo yora fetsafo ato achimaxikani ato retenōfo. Ato apafāferi āto fakefo yora fetsafo ato achimaxikani. Nāskarifiakī āto fakefāfe āto apakōifo ato chakafakī mekafaxikani, yora fetsafāfe ato retenōfo. ¹³ Akka eōxō keyokōichi mato noikaspaxikani. Akka mato noikaspafiaifono mā eōnoax omiskōifiki mā ēfe meka nikasharakōiaito ē mato kexesharakōixii Epa Nios fe mā isharapakexanō.

¹⁴ “Nā Niospa meka yoimisto Daniel a inōpokoai yoikī kirika keneni Nios kīfiti pexefā mēra afara chakakōi faxikani kiki ixō yoikī. (Nāskakē na kirika kenea anexō tāpīkāfe.) Nā chakafinakōia ōikanax, nā Judea anoafō machi keya ano ichorisatakāfe. ¹⁵ Askatari āfe peke māmākīa tsoxō ato fichiax koshikōi fotopakekafā āfe afaa fiamax ichotiro. ¹⁶ Askatari a āfe tare ano yonoaito anā oxō āfe rapati fitiroma. ¹⁷ Askatari a kēro fake naneafō fe a fake yome pishta chocho amaifo omiskōixikani māmāi yorafo omiskōifinakōiaifono. ¹⁸ Askatamaroko mā Epa Nios kīfikāfe mato kexesharanō ichoxō yōtaino matsi mexikakīma. ¹⁹ Askatari a omiskōiaifo nokoxii, taeyoi askakatsaxakīma. Nā Niospa yora onifakī taefanitīa tsōa askara ōiyomisma. Askatari anā tsoa chipo omiskōinakama. ²⁰ Akka a omiskōiaifo nōko Ifāfe xateyamano, tsoa nikeranama nai keyokeranifo. Akka afe yorafo ato noikī omiskōinōfoma xateni atomāi katonixakī.

²¹ “Akka fētsa mato yoikī iskakaino: ‘Ōikapo nakīa Cristo,’ mato fayanā: ‘Oa onokīa, ōikapo,’ mato faito nikayamakāfe. ²² Akka nā chanīmisfo fekani, ē Cristora ixikani, nāfo nō Niosxō nō mato yoirā ikani. Nāskakaxō tsōa atiroma keskara fakani Satanās yōshixō mato pārāpaikakī. Nā Niospa ato katoafori nāfo ato pārāpaikani. ²³ Akka ōisharakāfe afetīama keyokōi mē mato yoiyomiski,” Jesús ato fani.

Niospa Fake fotoaino afe keskara iximākai ixō Jesús ato yoini

(Mt. 24.29-35, 42-44; Lc. 21.25-36)

²⁴⁻²⁵ Anā Jesús ato yoini iskakakāi: “Akka nā penatari, nā omiskōiaifo mā keyoano, xini fakishkōi ixii, oxeri anā chaxaxima. Fishifori nai mēranoax pakei fetsexii, askatari nā nai mēranoafō naya naya iki fetsexii. ²⁶ Askatari

ea õixikani nai mēranoax nai kōifoya ě fotoaito sharafinakōia ěfe sharafoya ě fotoxii. ²⁷ Nāskatari ěfe ājirifo ě nīchixii a ě ato katoafo ato ichanāfatanōfo, a chai ikafo ekeki efenōfo.

²⁸ “Akka shinākapo ě mato yoinō. Mā yōkkafiaino mā tāpitiro āfe pei siriki-aito. Nāskakē āfe peifo keyopaito õikī mā tāpitiro māmāi chaima xiniaito. ²⁹ Nāskarifiakī afarafo afeskaraito õikī mā tāpitiro mē chaima oaino askai fetsexii. ³⁰ Ě mato pāraima ě mato yoikōi, na ě mato yoiai keskara nono mai anoxō yorafāfe nayokaxōma õiyokani. ³¹ Akka nai fe mai keyoi. Akka ěfe meka fisti keyonakama, nā ě mato yoiai keskakōi.

³² “Afetīara nai mēranoax ě oxii tsōakai tāpiama. Nā ājirifāfe nai mēra ifiakaxō tāpiafoma. Ěrikai tāpiama. Ěfe Epa Nios fistichi tāpia.

³³ “Nāskakē mā itipinīsharayanā kexemesharakāfe Epa Nios kīfiyanā. Mā tāpiamaki afetīara ě oxikai. ³⁴ Akka feronāfake fētsa fakira chaikakī, akka kayoxoma a yonoxomisfo yoini āfe pexe kexexonōfo. Nāskaxō ato yono ināketsani yononōfo, akka fētsa āfe pexe fepoti anoxō kexesharayanā mananō yoini. ³⁵⁻³⁶ Nāskarifiakī māri kexemesharakāfe, mā tāpiamaki fatora penata ě matoki nokorisatanikai. Xini kaino nokoyamata, yamenakefanaino iyamata, takaranā akaino iyamata, fakishparikōi ě matoki nokotiroki. Iskaratīa oimara ea faax mā oxakē ě mato fichitoshitiroki, nāskakē itipinīsharaxō ea yonoxosharakāfe isharakōixō. ³⁷ Nā ě mato yoiai keskafakī, keyokōi ě yorafo yoi itipinīsharakāfe ixō ě ato yoi,” Jesús ato fani.

14

*“ĜAfeskaxō nō Jesús retetiromē?” ixō shinānifo
(Mt. 26.1-5; Lc. 22.1-2; Jn. 11.45-53)*

¹ Mā chaima oxa rafeta āto fista Pascua ikaino, nā fistatīa pāa faraxatimais pipaonifo, nā Niospa ājirinī Ejipto anoxō āto fake iyoafo rētenima shinākakī. Nāskaifono a ato Nios kīfixomisfāfe āto xanīfofo feta a Moisés yoikī kirika kenei keskara ato tāpimamisfāfe, afeskaxoma Jesús pārapainifo pārakaxō retexikakī. ² Akka achixō retepaifikani, iskanifo: “Fistatīakai nō achitiro ma yorafā rasi mekai fetsekani nokoki õitifishkitirofo,” ikanax yoinānifo Jesús retepaifikani.

*Kēromā Jesús shinākī āfe mapoki pirofomā nachini
(Mt. 26.6-13; Jn. 12.1-8)*

³ Akka Jesús Betania ano ini, Simón pexe ano. Nā Simón “Rashkishiai” fapaonifo. Nāato pexe ano Jesús mīsa kamaki tsaoano, nāno akiki kēro fisti oni manishomo “alabastro” foikai. Na manishomo mēra xinia pirofomā osia nanea nakas sharakōi ini, āfe ane “nardo.” Nā pirofomā kopipaekōi ini, na manishomo āfe fepoti fepexō maneakefōfā Jesús āfe mapoki nachini, nā kēromā. ⁴ Askafaito õikani nā anoafō õitifishkiyanā āa ranā yoinānifo iskakani: “ĜAfeskakī na kēromā na pirofomā sharakōi chakanafaimē? ⁵ Ato minixō, aōxō kori ichapa fixō a afaamaisfo ato inākerana,” ikaxō nā kēro feratenifo.

⁶ Askafaiāfe õikī Jesús ato yoini iskafakī: “Enekāfe. ĜAfeskafakī na kēro mā fekaxtefaimē? Na ea iskafai sharakī,” ato fani. ⁷ “Akka nā afaamaisfori mato fe ipanakafo, fatora penata mā ato sharafaxopaikī mā ato sharafaxotiro. Akka eakai mēxotaima mā ea anā õima. ⁸ Akka na kēromā ea iskafakī ea sharafa. Ě nayoamano taefakī ěfe yoraki pirofomā nachia. ⁹ Ě mato pāraima, fanīxōra na meka shara eōnoa yoikakī nā mai tio anoxō na kēromā ea iskafaōnoa yoixikani. Askatari na kēroōnoa shināpakenakafo, shināmakiyamaxikakī,” ixō Jesús ato yoini.

Judaspa aōxō tāpifikatsaxakī Jesús ato achimani
(Mt. 26.14-16; Lc. 22.3-6)

¹⁰ Nāskafakī Jesús ato yoiano nā afe rafemis fetsa nā docefo anoa, nā Judas Iscariote a ato Nios kīfixomis xanīfofo fe mekaikai kani. Mā kaxō ato yoini iskafakī: “¿Afe tii mā ea kopifatiromē ē mato Jesús achixonō?” ato faito, ¹¹ nikakani inimakōiyanā yoikī iskafanifo: “Nō mia kori ichapa ināikai,” faifono, nāskakē Judaspa shināni: “Afeskaxomāi ē Jesús ato achimanō,” ixō shināni.

Mā chaima reteafono Jesús aōxō tāpimisfo feta yātapake pini
(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Akka nā fistatīa pāa faraxatimais pipaonifo. Afia penatari Pascua fistatīa ovejanā fake retexō pinifo. Nāskano aōxō tāpimisfāfe Jesús yōkanifo. “¿Fanī mī fichipaimē ano kaxō nō itipinī fanō, anoxō Pascuatīa yātapake pixiki?” ixō yōkaifono, ¹³ nāskakē Jesús aōxō tāpimis rafe nīchini, iskafakī ato yoianā: “Pexe rasi ano fotakāfe. Nānoa feronāfake fisti mā fichikaikai keshoki faka tetsaomexō foikaino, nā feronāfake fe fōtakāfe. ¹⁴ Akka nā feronāfake ikiai ano afe ikixō, nānoa pexe ifo yōkakāfe iskafakī: ‘Nōko Maestro noko yoikī iskafaa: “Nā pexe ifo yōkakāfe, ¿Fato kene mēraxō Pascua fistatīa eōxō tāpimisfo feta yātapake ē pitromākī?” ixō yōkakāfe.’ ¹⁵ Mā askafakī yōkaito pexe kene efapa fomākīanoa mato ispai kiki mā itipinīkōia. Nāno noko itipinīsharafaxokāfe,” Jesús aōxō tāpimisfo rafe fani.

¹⁶ Ato askafaino aōxō tāpimis rafe fonifo. Mā fokanax pexe rasi ano nokonifo. Mā nokokaxō nā Jesús ato yoia keskarakōi fichitoshinifo. Nānoxō itipinī fanifo Pascua fistatīa pixikakī.

¹⁷ Mā fakishaino Jesús aōxō tāpimis docefo fe nokonifo. ¹⁸ Mā fokaxō mīsa ano tsoxō piaifono Jesús ato yoini. “Ē mato pāraima fatora na mā efeta piāi fētsa mā ea ato achimafainaka,” ato faino, ¹⁹ nikakani shināmitsakōiyanā maikiri fepepakefōfanifo. Nāskakanax āa ranā yoinānifo iskakani: “¿Tsoamē, ēraka?” Fetsari iskani: “Ōitsai, ēraka,” iki fetsenifo.

²⁰ Askaifono Jesús ato kemani: “Nā mā docefo anoafāfe, nā mā efeta sapaki piāi fētsa mā ea yōaikai ea achinōfo. ²¹ Nā Niospa meka yoiki, eōnoa yoikī kenenifo keskai ē askakōi. Akka na feronāfake ea ato achimafīax akairi omiskōikōixii. Akka na feronāfake shara ikerana fakeyamanixakī,” ixō Jesús ato yoini.

²² Piaifono Jesús pāa tsomainīfōfā. Apa Nios kīfiki aicho fata, mā kaxkepakexō ato ināni, iskafakī ato yoianā: “Na ēfe nami keskaraki pīkāfe,” ato fani.

²³ Nāskata mā Apa Nios aicho faxō, kecho tsomainīfōfā ato ināni. Nāskakē mā ato ināno keyokōichi ayanifo. ²⁴ Nāskaxō ato yoikī iskafani: “Nafi ēfe imi keskaraki. Mē naino ēfe imi foxii. Keyokōi yorafāfe afara chakafamisfono ē atoōnoax naikai. Ē askaino Niospa ato potapakenakama. Ē ato naxōi āto chaka ato soaxoxiki. ²⁵ Ē mato pāraima. Ē mato yoikōi ē anā mato feta na fimi ene ayaima. Mē nai mēra kai. Nā ēfe Epa Nios xanīfokōi ika anoxō ē anā mato feta na fimi ene shara yaxii,” ixō ato yoini.

“Ē Jesús ōimisma,” Pedro ixiano Jesús ato yoini
(Mt. 26.30-35; Lc. 22.31-34; Jn. 13.36-38)

²⁶ Nāskata mā fanāiki xatekata machi Olivos ano fonifo. ²⁷ Nāskata Jesús ato yoini iskafakī: “A na fakishi keyokōi mā ea shināmakī fetsei. Akka kirika ano kenekī iskafakī yoinifo: ‘Āfe ifo reteafono, āfe ovejafo ichoi fetsetirofo,’ ixō kirika ano kenenifo,” ato fani. ²⁸ “Akka ea retefiyono mē otoax Galilea ano ē noko taexii mā nokoamano,” ixō ato yoini.

²⁹ Ato askafaito nikakī Pedro kemani. “Akka keyokōi shināmakifiaifono ěkai mia shināmakima,” ixō yoiaito, ³⁰ nikakī akka Jesús yoini iskafaki: “Ě mia pāraima na fakish fistichi takara keoi rafeyamano, ‘Ě Jesús ōimismara,’ mī ato fai tres fakī.”

³¹ Askafaito nikakī anā Pedro kemani. “Maa. Mia retefiaifono ě mefe nai. Ě ōimismara ě mia faima,” fani.

Pedro askafaito nikakakī keyokōichi askafakī fetsanifo.

Getsemaní anoxō Jesús Apa Nios kīfīni

(Mt. 26.36-46; Lc. 22.39-46)

³² Nāskakata nā ifi mapoa āfe ane Getsemaní ano nokonifo. Nānoxō Jesús aōxō tāpimisfo yoini iskafakī: “Nono tsaokāfe. Ě Epa Nios kīfiyotanō,” ato fani.

³³ Akka Pedro iyota, Santiago* iyota, Juan iyota ato fani. Nāskaxō āfe yora meeni shināmitsakōiyanā fekaxtekōiaito, ³⁴ nāskakī ato yoini: “Ěfe yōshi shināmitsakōi napaiyaito ě meikai. Nono nētekāfe, akka mā oxaki,” ato fani.

³⁵ Nāato askafata ori chaimashta Jesús ares kani. Nānoxō ratokonō mai chachipakefōfā Apa Nios kīfikī iskafani: “Epa, ea mīa kexetiromakī ea kexefe ea reteaifono ě omiskōinōma. ³⁶ Epa, mī keyokōi tāpiakī. Ea mīa ifipaikī ea mīa ifitiro ě omiskōinōma. Akka nā ě apaiyai keskafakīma nā mī ea amapaiyai keskafafe,” Apa fani.

³⁷ Nāskata mā aōxō tāpimisfo ano oxō ōia oxafo ato fichitoshini. Nāskaxō Pedro yoini: “Simón, ¿mā mī oxamē? ¿Afeskakī mī pishta oxa tenetiromamē?”

³⁸ Moikaxō Epa Nios kīfikāfe Satanás chakata mato chakafamapaiyai keskara axikakima. Chanīma, nā Epa Niospa mato amapaiyai keskara mātō shinā mēraxō mā apaifkī mā atiroma. Akka mātō yora pachikōikī,” ixō Jesús Pedro yoini.

³⁹ Ato askafata anā kani Apa Nios kīfikai a yoitana keskafakī. ⁴⁰ Nāskata anā oxō ato fichitoshini aōxō tāpimisfo oxafono, oxa paemei fetsoafono, a Jesús ato yoiai keskara tāpikaxoma tsōa kermanima. ⁴¹ Nāato askafata anā ato makinoax kani orishtaxō Apa Nios kīfikai. Mā Apa Nios kīfitani oxō ato yoitoshini iskafakī: “¿Ai mā oxamē tenekōiyanā? Moikāfe. Akka iskaratīa a ea ato achimaniyoai mā chaima oi kiki. Yora chakafāfe ea achifenōfo ato efe ikiki. ⁴² Fininīfōfākāfe nō kanō. Mā chaima oi kiki a ea ato achimaniyoai,” Jesús ato fani.

Jesús achinifo

(Mt. 26.47-56; Lc. 22.47-53; Jn. 18.2-11)

⁴³ Jesús ato yoiaino Judas nokoni, nā Judaspa Jesúsxō tāpifikatsaxakī, yorafā rasifo fe oni. Nā yorafo kenofoya ifi xatefoya fenifo, a ato Nios kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe, a xanīfo fetsafāferi ato nīchiafono. ⁴⁴ Judaspa nā ato efeaito iskafakī ato yoiyoni: “A ě kokoki tsoo akaito ōikī koshi achirisafaxikāki metexkere axō iyotaxikāki,” ixō ato yoini.

⁴⁵ Nāskata Judas mā Jesús ano nokoxō iskafakī yoini: “¿Maestro, mīmē?” ixō kokotoshini. ⁴⁶ Nāskafaito ōikakī nā Judas fe foafāfe Jesús achinifo.

⁴⁷ Akka Jesús achiaifāfe ōikī a aōxō tāpimis fētsa āfe keno chainipa tsekainīfōfā, a ato Nios kīfixomisfāfe āto xanīfāfe ina paxteni. ⁴⁸ Nāskakē Jesús yorafo yoini iskafakī: “¿Afeskai kenofoya ifi xatefoya mā oamē ea achiyoi oa ě yometso keskarakē? ⁴⁹ Pena tii ě mato fe itiani Nios kīfiti pexefā mēraxō ě mato tāpimani, akka māakai ea achipaimisma. Akka nā eōnoa yoikī kenenifo keskafakī mā ea achi,” ixō Jesús ato yoini.

* **14:33** Santiago āfe ane fetsa Jacobo ini.

⁵⁰ Ato askafaino aōxō tāpimisfo Jesús òifaikani. Ichoi fetsenifo a makinoax.

⁵¹ Akka naetapa fistichi sabanānā rakoxō Jesús chīfafainaito òikakī achinifo.

⁵² Akka achiaifono āfe sabanā potafaini chitoria ichoni.

Xanīfo finakōiafo ano Jesús iyonifo

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Nāskakē Jesús achikaxō iyonifo a ato Nios kīfixomisfāfe āto xanīfāfe pe xe ano. Nāskakē keyokōi anofistiax ichanānifo a ato Nios kīfixomisfāfe āto xanīfofo fe a judeofāfe āto xanīfofo a Moisés yoikī kirika keneni keskara ato tāpimamisfori ato fe inifo. ⁵⁴ Akka Pedro acho kakī chai ixō òifoni. Nāskata a ato Nios kīfixomisfāfe āto xanīfāfe pe xe emāiti nokoni. Nānoax a Nios kīfiti pexefā kexemisfo fe chii ketefax ato fe yooni.

⁵⁵ A ato Nios kīfixomis xanīfofōfāfe a āto xanīfofinakōiafo fe is kai yoinānifo: “Afes kaxomāi nō pāranō na Jesús afara chakafara ixō retexiki. Akka afaakai chakafa nō nikaima,” inifo. ⁵⁶ Nāskaifono yora ichapafāfe, “Na Jesús afara chakafaito nō òia,” ixō pāraketsanifo. Askafafiakakī anoris yoiketsanifoma. Āa chanī fetsenifo. ⁵⁷ Askafaiyono ranāri fininīfōfākāta āa mekafakakī chakafakī fetsanifo iskafakakī: ⁵⁸ “Nō nikaino na feronāfake iskaita: ‘Na Nios kīfiti pexefā yorafāfe akafo ē pāofaxii. Nāskata tres nia oxata ē anā fetsafaxii, anā yorafāfe efeta akanima, eres fisti ē aki,’ ixō yoiaito nō nikaita.”

⁵⁹ Askafakī yoifīkakī tsōa anoris yoinifoma, āa chanī fetsenifo.

⁶⁰ Nāskafaifono a ato Nios kīfixomisfāfe āto xanīfāfe ato nēxpakīa niinākakā iskafakī Jesús yōkani: “¿Mī kemamitsaimamē afamē na mīōnoa meka chaka yoiaifo?” ixō yoini.

⁶¹ Askafaino akka Jesús tooxinima, pishtakai kemanima. Afianā a ato Nios kīfixomisfāfe āto xanīfāfe iskafakī yōkani: “¿Mīmē Cristo? ¿Nā Nios nipanakato āfe Fakemē, mī?”

⁶² Askafaito nikakī Jesús kemani: “Ēje, ēkīa Niospa Fake. Akka mā ea òixii ēfe Epa ketaxamei āfe pōya kayakai aōri ē tsāokē xanīfo finakōia ēfe Epa fe. Askatari mā ea òixii nai kōi mēranoax ē anā fotofaito,” Jesús ato fani.

⁶³ Askafaito nikakī a Nios ato kīfixomisfāfe āto xanīfāfe āfe rapati faxteni fetsafāfe tāpinōfo nā xanīfo òitifishkikaito. Nāskaxō ato yoini iskafakī: “Mā nōakōi nō nikakī noko anā tsōa yoitromaki nō tāpinō. ⁶⁴ Mā mā nikakī na feronāfake āfe mekapa Nios chakafakī mekafaito. Akka, ¿nō afeskafaimē?” ato faito keyokōichi, “Nanōki,” fanifo.

⁶⁵ Nāskakata mā fenexkaxō āfe femānāki kemo mechoketsayanā koshaket-sanifo iskafakī yoianā: “Tsōa mia koshamakī tāpipō noko yoixiki,” faifono, a Nios kīfiti pexefā kexemisfāferi fepasketsanifo.

“Ē Jesús òimisma,” Pedro ini

(Mt. 26.69-75; Lc. 22.56-62; Jn. 18.15-18, 25-29)

⁶⁶⁻⁶⁷ Pedro pexefā emāiti ato fe tsaoano, nāno akiki a xanīfo yonoxomis xomaya nokoni. Nāno ato fe chii ketefaax tsaoax yooaito òikī, iskafakī yoini: “Mīri Nazarete anoax Jesús fe kafāsamis,” faino, ⁶⁸ akka Pedro iskafakī kemani: “Ēkai Jesús òimisma. Ēkai afaa tāpiama tsoaraōnoa mī yoi,” fata, pexefā kāiti ano Pedro nasteinīfōfānaino, takara keonākakāni.

⁶⁹ Afianā nā xanīfo yonoxomis xomayato Pedro òiki, nānoafo iskafakī ato yoini: “A na feronāfake Jesús fe rafemis òikapo, a nā Jesús Nazarete anoax fe kafāsamis,” fani.

⁷⁰ Akka Pedro anā iskani: “Maa, ēkai Jesús fe rafemisma,” ini. Nāskaino nā anoafāfe anā Pedro yōakakī iskafanifo: “Chanīma, mīri Jesús fe rafemis. Mīri Galilea anoakī mī mekai nā Jesús mekai keskarakī,” faifono, ⁷¹ akka Pedro ato

yoikĩ iskafani: “È mato pãraima, ã chanãaito ea Niospa omiskõimatiro. Niospa tãpia chanĩmakõi ã mato yoi. Èkai na Jesús õimisma tsoaraõnoa mã yoi,” Pedro ato fani.

⁷² Pedro nãskaino anã takara keoinãkafãni. Nãskaino Pedro shinãtani nã Jesús iskafakĩ yoita keskara: “Taeyoi takara keofi rafeamano, ‘È Jesús õimismara, mã ea faxii tres fakĩ,” ixõ yoitano, nã shinãtani Pedro shinãmitsai oiakõini.

15

Pilato ano Jesús iyonifo

(Mt. 27.1-2, 11-14; Lc. 23.1-5; Jn. 18.28-38)

¹ Mã penaino a ato Nios kifixomisfãfe ãto xanĩfofo ichanãnifo, a judeofãfe ãto xanĩfofo fe, a Moisés yoikĩ kirika keneni keskara ato tãpimamisfori ato fe inifo. Nã xanĩfo fetsafori a ato rafeafori ato fe inifo. Nãskakaxõ Jesús metexkere akaxõ iyokaxõ Pilato inãnifo. ² Mã iyoxõ inãfono Pilato yõkani iskafakĩ: “¿Mĩmẽ judeofãfe xanĩfo?” askafaito, Jesús kemani: “Èje, nã mã ea yoiai keskarakĩa,” Jesús fani.

³ Nãskaino nã ato Nios kifixomisfãfe ãto xanĩfofofãfe ãa pãrakakĩ yõaketsanifo. ⁴ Nãskafaifono anã Pilato yõkaxõ iskafakĩ yoini: “¿Mĩ ato kemaimamẽ mĩõnoa afara chakafo yoifiaifono?”

⁵ Askafaito nikakĩ Jesús tooxanima. Nãskakẽ Pilato shinãni iskafakĩ: “Kee, ¿afeskakĩ ea kemaimamẽ?” ixõ shinãni.

Pilato ato yoini Jesús retenõfo

(Mt. 27.15-31; Lc. 23.13-25; Jn. 18.38-19.16)

⁶ Akka Pascua fistatã Pilato karaxa mẽranoa nã xinia tii fisti rasi ato kãimapaoni mãmã askafakĩ feyafakatsaxakĩ. Nã yorafãfe kãimapaiyaifo ato kãimaxopaoni. ⁷ Akka nã karaxa mẽra feronãfake ãfe ane Barrabás ika ini. Nãato fetsafo feta yora retemis ini nã ãto xanĩfo ato põtapaikĩ. ⁸ Akka yorafo fenifo. Mã fẽkaxõ Pilato yõkanifo mãmã askafakĩ feyafakatsaxakakĩ.

⁹ Askafaifono Pilato ato kemani: “¿Mã fichipaimẽ judeofãfe ãto xanĩfo ã kãimanõ?” ato fani.

¹⁰ Akka Pilato tãpini a ato Nios kifixomisfãfe ãto xanĩfofofãfe Jesús chakafakĩ mekafaifono anã yorafãfe noko nikakanimara ikaxõ, nãskakaxomã akiki efekaxõ inãfono. ¹¹ Akka a ato Nios kifixomis ãto xanĩfofofãfe fãsikõi yorafo mekamanifo: “¡Noko Barrabás kãimaxõfe!” ikaxõ Pilato yoinifo.

¹² Askafaifono Pilato ato yõkani: “Akka, ¿na judeofãfe ãto xanĩfora mã fai ã afeska fatiromẽ?” ato faito, ¹³ kemakakĩ fãsikõi iskafanifo: “¡Mastafe!” fanifo keyokõichi.

¹⁴ Askafaifono Pilato ato yoini iskafakĩ: “Akka, ¿na feronãfake afaa chakafamẽ?” ato faino, anã fãsikõi mekainĩfofãnifo: “¡Mastafe!” fanifo.

¹⁵ Nãskafaifono yorafãfe sharakõi fanõfo Pilato ato Barrabás kãimaxoni. Nãskata mã Jesús ato koshamata, ato nĩchixoni ifi cruz ikaki mastatanõfo.

¹⁶ Nãskakẽ sorarofãfe xanĩfãfe pexe emãiti Jesús iyonifo, nãnoax sorarofõ ichanãnifo. ¹⁷ Nãskakaxõ ãfe rapati pẽkakaxõ, rapati õshi nana safemanifo, moxa maiti fakaxori maimanifo. ¹⁸ Nãskakaxõ fãsikõi mekafanifo iskafakakĩ: “¡Aicho, mĩfi judeofãfe ãto xanĩfo!” ikaxõ kaxemetsama fanifo.

¹⁹ Nãskatari tafa xatenẽ mapoki koshaketsayanã akiki kemo mechoketsanifo. Nãskakata akiki ratokonõ mai chachipakefofã kaxemetsama fanifo.

²⁰ Nãskai mã akiki kaxemetsamakaxõ a rapati õshi nana safemanifo fĩakaxõ ãfenãkõi safemanifo. Nãskakaxõ iyonifo mã ifi cruz ikaki mastafokakĩ.

Jesús ifi cruz ikaki mastanifo

(Mt. 27.32-44; Lc. 23.26-43; Jn. 19.17-27)

²¹ Mā Jesús iyoifokakī feronāfake Cirene anoa fichinifo, āfe ane Simón. Alejandro feta Rufo āto apa ini. Pexe rasi pasotai inoax oaito, fichikaxō yoinifo iskafakakī: “Na Jesús āfe cruz foxōikafe,” fanifo.

²² Nāskaxō Jesús iyonifo āfe ane Gólgota ano. Āfe ane fetsa Mapo Xao fanifo. ²³ Nānoxō fimi ene osia mokakōi Jesús ayamapainifo. Akka Jesús ayakaspani. ²⁴ Nāskafakaxō mastanifo. Mā mastakanax sorarofa makex tokoroya kaxenifo. Nā potakī kanāto āfe rapati fīani. Nāskafakaxō keyofīanifo.

²⁵ Rama xini keyaino Jesús mastanifo. ²⁶ Mā mastakaxō a mǎnǎo tafaraki kenenifo iskafakakī: “Judeofāfe āto Xanīfokōi,” ikaxō a mǎnǎo kenenifo. ²⁷ Nāskakaxō Jesús yafi yometso raferi mastanifo, fetsa āfe pōya kayakai aōri ata, fetsari āfe pōya mishkiori anifo. ²⁸ Afetīama aōnoa yoikī keneyonifo iskafakī yoinifo: “Nā yora chakakōifo keskarakōi ixō aōnoa yoixikani,” ikaxō kenenifo. Chanīmakōi. Nāskakōi fanifo aōnoa yoikakī.

²⁹ Nā ano finōfāifāfe ĭchayanā āto mapo rafe rafe ayanā iskafanifo: “Iskafakī mī yoimis: ‘Nā anoxō Nios kīfiti pexefā ě pǎo axii. Nāskaxō tres nia oxata ě anā axii,’ ixō mī yoimis. ³⁰ Mī ifimetromakī mīa ifimefe na ifi cruz ikakinoax fotopakekafāfe,” faifono, ³¹ nāskarifikā a ato Nios kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe askafanifo akiki kaxemetsamapaikakī. Nāskax āa ranā yoinākanani iskanifo: “Nato fetsafo ififikatsaxakī, akka aakai ifimeima. ³² A na Cristo israelifāfe āto xanīfo, iskaratīa nō ōipanā afeskai ifi cruz ikakinoax fotopakekafanimamē, nāskaito nō chanīmara faikai,” ikaxō, nā ayafi mastaforti ĭchaketsanifo.

Jesús nani

(Mt. 27.45-56; Lc. 23.44-49; Jn. 19.28-30)

³³ Nāskata xini keya nā mai tio fakishifākōitani. Nāskax mā xini kaino anā penani. ³⁴ Nāno xini rakano fāsikōi Jesús kenani iskai: “Eloi, Eloi, ¿lema sabactani?” fani. Nōko mekapa iskafakī yoini: “Ĕfe Nios, ěfe Nios, ¿afeskakī mī ea potaimē?” fani.

³⁵ Nāskaito nā ano niafāfe nikakakī iskafanifo: “Nikakapo, nā ato Niospa meka yoipaoni Elías kenai kiki,” fanifo.

³⁶ Nāskaito nikafaini nānoa fetsa ichoni xapo keskara fiikai. Nā xapo keskara fimi ene kachaki momoxō tafa xate kaxkexō akiki nētaxō ayama-paini, iskafakī ato yoiyanā: “Enekāfe nō ōinō Elías oi kiki fotomaniyoi,” ixō ato yoini.

³⁷ Nāskakē Jesús fāsikōi eaita nani. ³⁸ Nāskakē sama nami Nios kīfiti pexefā mēranoax naki rafekōi faxtepakekafāni fomākīanoax. ³⁹ Nāskaito ōikī nā soraro xanīfāfe Jesús eaita naito ōikī chaimashta nīxō iskafakī yoini: “Chanīma, na feronāfake Niospa Fake ika.”

⁴⁰ Askatari kērofāferi chai nikaxō ōinifo. Nāno ato fe María Magdalenari ini, María fetsari ini, Jacobo feta José āto afa ini. Saloméri ato fe ini. ⁴¹ Nā kērofāfe Jesús chīfamisfo inifo, pimaxikakī Jesús Galilea ano ikano. Nānori kēro fetsafo inifo, Jerusalén anoax afe foitaxakakī.

Jesús makex kini mēra maifanifo

(Mt. 27.57-61; Lc. 23.50-56; Jn. 19.38-42)

⁴² Penama safaro ikaino judeofāfe itipinīfapaonifo, nā safaromāi āto teneti penakē, nā yātapake ⁴³ José oni, nā Joséri judeofāfe āto xanīfo. Nāato Nios xanīfo manapaoni, nā José finakōixō Pilato ano ikikaixō Jesús āfe yora yōkani.

⁴⁴ Askafakī yōkaito nikai Pilato rateni, “¿Mā Jesús naamē?” ikax. Nāskaxō

soraro xanīfo kenani yōkaxiki mā Jesús naamakī. ⁴⁵ Nāskafaito soraro xanīfāfe yoini: “Mā naakīa,” faito, Pilato Jesús āfe yora José ināni. ⁴⁶ Nāskakē José sama sharakōi fixō nā samapa Jesús āfe yora rakoni. Nāskaxō a makex kini fanifo mēra rātani. Nāskaxō makexefanē nā kini feponi. ⁴⁷ Akka María Magdalena feta María José āfe afa nā maifaafo anoxō ōinifo.

16

Jesús otoni

(Mt. 28.1-10; Lc. 24.1-12; Jn. 20.1-10)

¹ Mā pena teneti finōano María Magdalena ikaino, María fetsa Jacobo āfe afa ikaino, Salomé ikaino, nā tiito pirofomā fonifo, Jesús āfe yora raish akī foxikaki. ² Fakishparikōi fonifo mā pena teneti finōano nāskanax a Jesús maia ano nokonifo, mā xini keyaino. ³ Mā nokokanax āa ranā yoinākani iskanifo: “¿Tsōa na kini anoa tokiri noko fēpexotiomē?” ikanax yoinānifo.

⁴ Akka ōiafo a kini aō fepoitafo a tokirinīfā, mā fepekemea ini, anā fepoa inima. ⁵ Nāskakē nā kini mēra ikifaikakī ōiafo. Nā kini mēra naetapa tsaoa ini, nā nōko pōya kayakai aōri. Rapati chainipa oxokōi safeax, nāskaito ōikani ratekōinifo. ⁶ Nāskaifono nāato ato yoini iskafakī:

“Rateyamakāfe, Jesús Nazarete anoa mā fenaikai nā ifi cruz ikaki mas-taitafo mā otoaki anā nonomaki. Ōikapo a rātaitafo ano. ⁷ Fokaxō aōxō tāpimisfo yoitakāfe, Pedrori yoikakī mā nokoamano nā Galilea ano nokoi taei kai kiki. Nā mato yoifafaina keskara nārixō mā ōikaikai,” ixō ato yoiaino, ⁸ nāskakē nā kērofo fonifo nā kini anoax ato yoiaito nikafaikani. Ratei choayanā ato yoinifoma, mesemāiakaki.

Jesús María Magdalenaki nokoni

(Jn. 20.11-18)

⁹ Mā pena nomīkonō fakishpari Jesús otoitaxaki, María Magdalenaki nokoi taeni, nā María makinoa siete niafaka yōshi chakafo Jesús pōtani. ¹⁰ Nāato kaxō a afe rafemisfo ato yoikai kani a ōia keskara. Kaxō ato ōia shināmitsakani oiaifāfe ato ōini. ¹¹ “Mā nōko Ifo Jesús otoakī mē ōiaki,” ixō ato yoiaito, tsōa chanīmara fanima.

Jesús aōxō tāpimis rafeki nokoni

(Lc. 24.13-35)

¹² Mā askata fetsa keskarax Jesús aōxō tāpimis rafeki nokoni fāi foaifono. ¹³ Nā rafetari a afe rafemisfo yoifokani fonifo. “Mā nō Jesús ōiaki,” ato faifono, tsōa ato nikanima.

Jesús aōxō tāpimisfo yoini aōxō keyokōi yoifofāsafatanōfo

(Mt. 28.16-20; Lc. 24.36-49; Jn. 20.19-23)

¹⁴ Nāskata chipo Jesús aōxō tāpimis oncefoki nokoni, mīsa ano tsaoxō pi-aifono. Mā atoki nokoxō iskafakī ato yoini: “¿Afeskakī mā ato chanīmara famamē mē otofiano nā ea ōiafāfe mato yoiaino?” ¹⁵ Nāskaxō ato yoikī iskafani: “Nā mai tio ano fokaxō na meka shara eōnoa keyokōi ato yoitakāfe mē otoakī āto chaka ato soaxoxiki efe ipaxanōfo. ¹⁶ Akka na meka shara chanīmara fakanax, faka mēra iki maotissimeax ēfe Epa Nios fe nīpanakafo. Akka na meka shara eōnoa chanīmara fayamakanax, nāfo omiskōipakenakafo. ¹⁷ Akka nā ea chanīmara faifāfe, ēfe aneōxō ato makinoa niafaka yōshi chakafo potatirofo. Nāskakanax meka fena sharapa mekatirofo. ¹⁸ Nāskakaxō rono tsomatirofo nāskakaxori rao paekōi ayakanax afeskatirofoma. A isinī ikaifori ato ramāifono sharatirofo,” ixō Jesús ato yoini.

Jesús nai mēra kani
(Lc. 24.50-53)

¹⁹ Nāskafakĩ ato yoita, nōko Ifo Jesús ronoinākfāni nai mēra kai. Mā nai mēra kaax Apa Nios ketaxamei tsaoni afe xanĩfokōi ixiki. ²⁰ Mā Jesús nai mēra kaano aōxō tãpimisfo fonifo. Nā mai tio anoafu aōnoa meka shara yoifokani afe nĩpaxanōfo. Nōko Ifāfe ato axōfaino aōxō aōnoa meka shara yoikōinifo, tsōa atiroma keskafakĩ aōxō afama mĩshtifori fanifo. Nā tii.

Lucaspa Jesúsnoa Yoikĩ Keneni

Lucaspa kirika keneni Jesús nõko mai ano ipaonino

¹⁻⁴ Teófilo, ẽ mia kirika kenexõ manamani, mĩ tãpinõ. Mã mĩ tãpia Jesús nõko mai ano ipaoni. Nõko mai ano ikano yorafãfe õipaonifo. Akka nã fak-enitĩa õiaifono yosini. Nãfãferi õikaxõ yora fetsafo yoipaonifo akairi Jesúsnoa tãpinõfo. Ato yoiãfãfe nikakakĩ akairi kirika kenepaonifo afeskai nofe Jesús ikimamẽ ikaxõ. Nãskarifiakĩ ẽ mia kirika kenexoni, nã Jesús tãpiafo yõkaxõ. Efe yorashta Teófilo, nãskakẽ ẽ mia kirika kenexõ manamani, nã mia Jesúsnoa yoiãifono nikakĩ mĩ chanĩmara fanõ.

Ãjirinĩ yoini, Juan Maotista kãiyõamano

⁵ Jesús fakeamano Zacarías iyopaoni Judea mai ano ãfe kaifo fe. Ari ikano Herodes ãto xanĩfo finakõia ipaoni. Nã Zacarías ãfe xini ane ipaoni Aarón. Nã Aarón ãfe fena Zacarías ipaoni. Akka ãfe ãfi Elizabetri Aarón fena ipaoni, ãto xinimãi Aarónkẽ. Nã Aarón ãfe fenafãfe ato Nios kifixopaonifo ãto kaifofo. Zacaríasri ato kifixopaoni Aarón ãfe fenamãi axõ. Nã Zacarías ãfe kaifo feta yonopaoni, Nios kĩfiti pexefã mẽraxõ Abíasfo feta. ⁶ Zacarías ãfe ãfi feta Niospa meka nikasharakõipaonifo, nã Niospa meka yoikĩ kenenifo keskafakĩ. Akka nã Niospa yoiãi keskafakĩ nikasharakõiaifono Niospa ato õini, shara shinãi ikafono. ⁷ Akka Elisabet fake fimisma ipaoni. Nãskaxõ mã yõxãfoxõ fake fipaonima fene feta. Nãskax fene anifoaino nãri askani yõxãfoi.

⁸ Nãskakẽ ãto xanĩfãfe ato yoini, Abías yorafo: “Nã Nios kĩfiti pexefã mẽra yonomisfo mã tsekefaini fokani kiki. Mãri ikiferakãfe,” ato fani. Ato askafaino a mẽra ikifaikaxõ yononifo. Zacaríasri a mẽra ato fe ikikaixõ ato feta yononi. ⁹ Nios kĩfiti pexefã mẽra ikifaikanax yoinãnifo iskakani: “¿Iskaratĩa tsõa na pirofomã shara koofaimẽ nõ õinõ?” inifo. Askaifono ãfe xanĩfãfe Zacarías yoini: “Mĩ koofafe na nakas Niospa xeteax inimanõ,” fani. Akka nãskara feyafapaonifo, pirofomã nakas shara koofapaonifo. ¹⁰ Zacarías pirofomã shara koofaino yorafãfe emãiti nikaxõ Nios kĩfinifo. ¹¹ Yorafãfe emãitixõ Nios kĩfiaifono, Zacarías pexefã xãki mẽraxõ pirofomã koofaino ãjiri nĩtani, pexe xaki mẽra pirofomã koofai kesemẽ ãfe põya kayakai aõri. ¹² Nãskakẽ ãjiri nikẽ fichiax Zacarías mesta itani. ¹³ Rateaino Niospa ãfe ãjirinĩ yoini: “Zacarías, rateyamafe. Mã Niospa mia nikakĩ mĩ kĩfiaito mã mĩ ãfinĩ fake feronãfake fii kiki. Mĩ fake kãiano anekĩ Juan mĩ faxikai. ¹⁴ Mã mĩ fakeyax mĩ inimaxikai. Yorãfori akiki inimakõixikani. ¹⁵ Niosri akiki inimasharakõixii. Fãsi finakõia Niospa õixii, Niospa Yõshi Sharapa shinãmanaino. Nãskakẽ afaa pae pishta ayaxima. ¹⁶ Nãskaxõ mã yosixõ Niospa meka ato yoixii ãfe kaifo israelifo ãfe fenafo, Niospa meka ato yoiaino ãto chaka xatenõfo. ãto chaka xatekaxõ Nios fisti nikakõinõfo. ¹⁷ Nõko Ifo oyoamano taeyoi Niospa Juan nĩchixii ãfe meka ato yoinõ. Akka Juan ãfe shara nã Elíasnã ipaoni keskara ixii Niospa Yõshi Sharapa shinãmanaino. Afe yorafo ato tãpimaxii. Nãskaino ãto apafo fe ãto fakefo anã noinãxikani. Askatari nã Niospa meka nikakaspamisfãfe akairi ãto chaka xatekaxõ Nios Ifofaxikani shinãsharaxikakĩ. Nãskakẽ Juanoax ãfe kaifo itipinĩsharaxikani Niospa Fake atoki nokoaitĩa ifisharaxikakĩ,” ixõ ãjirinĩ yoini.

¹⁸ Askafaito nikakĩ yoini: “¿Afeskai ẽ fakeyatiromẽ? Ëkai anã fake atiroma ẽ anifokõi. Ëfe ãfiri nãskarari yõxãfokõi. Afeskaxõ afeta nõ anã fake fitiroma,” fani.

¹⁹ Askafaito nikakī ājirinī kemani: “Ēkīa Gabriel, ē Nios fe ika. Ea nīchiano ē oa. Nikapo, āfe meka shara ē mia yoinō. Mā mī āfinī fake feronāfake fii kiki. ²⁰ Akka, nā ē mia yoiaito mī ea nikakaspax mī anā mekaima. Mā mī fake kāiano mī mekaxii. Nāskax mī mekamais iyoi. Akka Niospa ea fake fimatiroma ēmāi anifokē mī ifiaito Niospa mia fake fimatiro. Nā ē mia yoiai keskafakī Niospa mia askafaxii. Nā Niospa mia apaiyaitīa mia askafaxōi kiki,” ājirinī fani.

²¹ Ājiri fe Zacarías pexe xaki mēranoax yoināino yorafo pexe emāiti nikanax yoinānifo, Zacarías fena kāiyamaino pexe xaki mēranoa. “¿Afeskai Zacarías samarakaimē pexe mēranoax? Afetīakai ikiyama,” faifono ²² Zacarías kainākafani Nios kīfiti pexefā xakī mēranoax anā mekanima yōkapaifaifono. “¿Afaa pexefā mēranoa ōiax mī iskaimē?” fanifo. Askafaifono ato yoipaiifi mekanima. Mekapaikī āfe mīfis ato yoini a ōia.

²³ Nāskai anā mekaima Zacarías āfe xanēnē kani mā yonokī keyoax. ²⁴ Nāskata mā Zacarías āfe pexe ano nokoano āfe āfinī chipo fake naneni. Mā fake naneax faki kafāsapaonima nā āfe xanēnē fisti ipaoni cinco oxe ani āfe xanenēxō. ²⁵ Nāskaxō mā postoxō yoini: “Aicho, mā Niospa ea sharafakī ē fake finō ē yōxafofiakē. Niospa ea fake fima. Aicho, iskaratīa ē anā yorafoki rāfinakamaki mē fakeyakī,” Elizabet ini.

Ājiri fotopakekafāni, María yoioyi

²⁶ Elisabet mā fake nanekī seis oxe akano Galilea mai ano Niospa anā nīchini āfe ājiri Gabriel, Nazarete pexe rasi ano. ²⁷ Nāskakē Niospa āfe ājiri María ano fotopakekafāni yoioyi. Fotopakekafaxō yoini. Nā María fenemais ini. Feronāfake fetsa fe oxamisma. María fenemais ikano José apa yōkani, María fixiki. Nā José āfe xini David ipaoni. Nā David āto xanīfo finakōia ipaoni. Akka José María fiyoamano ājiri fotopakekafāni, María ano. ²⁸ Fotopakekafāxō María yoini: “Mē oi mia yoioyi, Nios mikiki inimai mefe ika,” fani.

²⁹ Askafaino María shināpaini: “¿Afaa ea yoipaimē, na ea iskafai?” ixō shināpaini. ³⁰ Shināpaiyaito anā ājirinī yoini: “Rateyamafe. Mia Niospa noisharai kiki mia sharakōi ōi kiki, mikiki inimasharai kiki. ³¹ Mā mī fake feronāfake fikai. Mā mī fake kāixō anekī Jesús mī faxikai. ³² Mī fake xanīfo finakōia Niospa imaxii. Āfe xini David keskara ixii. Nios nā nai mēra ikato āfe Fakekōi faxii. ³³ Nāskakē mī Fake xanīfo finakōia ixii. Mī kaifāfe xanīfo ipanaka. Anā xanīfoi xatenakama,” fani.

³⁴ Askafaito María kemani: “¿Afeskakī ē fake fitiromē ē feneyaxoma, ea tsōa tanamismano?” María ini.

³⁵ Askafaito ājirinī kemani: “Niospa āfe Yōshi Shara mikiki oxō mia fake nanemaxii. Nāskax nā fake kāiax Niospa Fakera faxikani. Akka na fake kāiax sharafinakōia fisti ixii. ³⁶ Nā mī yaya Elisabet ‘Fake fitiromara’ faflamisfono mā fake nanea seis oxe aka yōxafofiaxō. ³⁷ Nāskakē nā apaiyai keskara fakī Niospa afama mīshti fatiro. Miari fake fimatiro mī fenemaisfikē,” ājirinī fani.

³⁸ Ājirinī askafaino, “Nāskafinō, ē fake finō, ē Nios nikamiskī. Nā ea amapaiyai keskafanō ē Nios itixomafamiski,” nāskafani.

María askafaino ājiri anā nai mēra kani.

María kani Elisabet ōikai

³⁹ Nāskata nā pena fisti mā Niospa ājiri kaano María itipinī fata koshi kani āfe yaya ōikai Judea mai ari. Judea mai ari māchifāfo mēra kaax pexe rasi ano nokoni. ⁴⁰ Mā nokoax Zacarías āfe pexe mēra ikitoshini. Mā nokoxō María āfe yaya yoitoshini. “Yaya, ē oi mia ōioyi,” fatishoni. ⁴¹ Āfe rare askafatishonaito

Elizabet nikani. Āfe rare askafaito nikakī Elisabet xakī mēraxō āfe fake tokko tokko ani. ⁴² Nāskata Niospa Yōshi Sharapa shināmanaino Elisabet onāni mā María fake naneano. Nāskakē fāsi yoini iskafakī: “María, Niospa mia inimamasharakōi. Fato xotofake fetsakai iskafaima mia fisti inimamakōi. Mī fake feronāfake chipo kāiano Apa Niospa akiki inimakōikī kexesharakōixii. ⁴³ Nōko Ifokōi mī fake ixii. Akka, ĵmī ea ano oamē, nōko Ifāfe afaflax ēkai afaakeroko ēakōi ē ikanō? ⁴⁴ Akka mī ea yoiaito nikakī ēfe xakī mēraxō ēfe fake ea tokko tokko aka, mikiki inimakī. ⁴⁵ Niospa meka nikakōikī, ‘Nē askanōki,’ ixō mī yoita. Nāskakē Niospa meka nikai mī inimasharakōi,” ixō Elisabet yoini.

⁴⁶ Nāskafaito María kemani:

Ēfe ōiti mēraxō ē shinākī iskafai, nōko Ifo tsoa keskaramākī. Nōko Ifo Nios fāsi sharakōi. ⁴⁷ Akiki ē inimakōiaino ea anā potanakama, ē afe ipanaka, ea kexepakenaka, ea ifixii ē afe ĩpaxanō. ⁴⁸ Ē nā yonoxomis, ē afaa tāpiamafekē nā Niospa ea noikōi. Nāskakē yorafāfe yoipakenakafo: “Nā María Niospa inimamakōia,” ixō yoipakenakafo. ⁴⁹ Nios fāsi sharafinakōia. Afaa pishta fayamatiroma. Afama mīshti fatiro, ea sharakōi faxōa. Niosfi sharakōiki. Afaa chakafamisma Niosfi nāskarakōi. ⁵⁰ Nāskara yorafāfe yoitirofo: “Ē Nios nikasharapaikōiaino, ē nikakaspaitori ea chakafatiro. Nāskax ē akiki mesetiro. Akiki mesekī ē Nios nikasharakōi,” ixō yoiaito nā keskara yorafo Niospa ato noikī ato shināpakenaka. ⁵¹ Akka Nios nikakaspakī āto ōiti fekaxtefakani, “Tsōa afaa tāpikeroko ē akai keskafakī,” ixō āto ōiti fekaxtefatirofo. Nāskaifono Niospa ato fenomatiro. Nāskara ato ōimatiro afaa tāpiamafāfe. Akka Niospa āfe shināmā afama mīshti famiski. Afaa pishta Niospa fayamatiroma. Nāfi mitsisipakōikī tsoa keskarama. Nāato afara mīshti fatiro. ⁵² Nāato xanīfofo potano anā tsoa xanīfo itiro. Akka nā afaayamafo Niospa ato sharakōi imatiro. ⁵³ Akka fetsafāfe Nios shināifono Niospa ato kexesharatiro. Āfe shināmā āto ōiti mēra ato shināmatiro inimanōfo. Akka fētsa shinākī iskafai: “Ē iskaratīa shara ē afara fetsa anā shināima Niospa afara fetsa ea anā shināanima ē anā Nios fe rafepaima,” ixō shināito askara yora Niospa anā tanaima. Afaa pishta tāpikanamax yorafo askatirofo. ⁵⁴ Niospa noko kexesharapakenaka nōko kaifo israelifāfemāi yonoxomisfono. Noko shināmakinakama mēxotaima noko noipakenaka nā yoini keskafakī. ⁵⁵ Niospa nōko xini Abraham yoikī iskafani: “Mī kaifo efe yorafo ipanakafo. Askatari mī fenafo ē ato kexesharapakenaka,” ixō Niospa nōko xini Abram yoini, ixō María fani.

⁵⁶ Nāskax María Elizabet ano ipaoni tres oxe ani anoxō. Tres oxe ata anā María āfe xanēnē oni.

Juan Maotista kāini

⁵⁷ Mā María āfe xanēnē oano Elisabet fake feronāfake kāini. ⁵⁸ Mā fake kāiano āfe kaifāfe a chaima nikafāfe tāpinifo. “Mā Elisabet fake kāia nōko Ifo Niospa mā Elisabet aō noikī fake fimismo mā fake fima,” nāskafanifo. Askafakanax akiki inimanifo. ⁵⁹ Mā fake kāitaxakī ocho nia oxano Zacarías pexe ano yorafo fonifo. Fake ōikai fokani āfe foshki repa xateyanā nāskaramāi feyafakatsaxakakī. Fokaxō yoinifo: “Āfe apa anekiriri nō anenō Zacarías fakī,” fanifo. ⁶⁰ Nāskafaifono āfa ato yoini: “Maa, ē aō aneima, Zacarías ē faima. Afeskakīkai apa anekiri ē anetiroma. Ēa ē anei Juan fakī,” ato fani.

⁶¹ Ato askafaito yoinifo: “ĴTsōa anekiri mī aneimē? Anokai āfe xinifo Juanma. Āfe apa nō yōkanōki,” fanifo.

⁶² Akka nã fãke apa mekamais ita pastori ini. Nãskakaxõ apa yõkanifo. Mëkemã ato yoini: “¿Afe ane mĩ fake mĩ faimẽ?” fanifo. ⁶³ Askafaifono ato yoini mëkemã: “Ea kirika inãkãfe, ã mato kenexonõ,” ato askafani. Kirika inãfono kirikaki kenekĩ: “Ë ãfe ane Juan fai,” ixõ kirikaki keneni. Mã kirikaki keneano õikaxõ yoinifo: “Õikapo. Mã anea Juan fakĩ. Æfe ane Juan ixii,” fanifo, apa feta ãfe ãfa aneaito shinãpainifo. ⁶⁴ Nãskata ãfe fake ane keneta Zacarías mekani. Anã mekamais inima, mã mekaya ini. Mã mekayaxõ ato yoini: “Nios sharakõi,” ato fani. ⁶⁵ Mã Zacarías mekaito õikani ratenifo. Mã ratekanax fokani yoinãi fetsenifo. Nãskakanax mã fokani Judea mai ari fokani yoinãfonifo: “Mã Zacarías ãfe fake aneax mã mekai. Mã ãfe ãfinĩri fake fikatsaxakima, mã fake fia,” ikanax yoinãi fetsenifo. ⁶⁶ Yoinãi fetsekaxõ shinãnifo: “Nã fake afeskaimãkai nõ õinõ shinãya iki kiki, Niospamãi shinãmasharaino,” ikaxõ shinãnifo.

Zacarías fanãini

⁶⁷ Niospa Yõshi Sharapa shinãmanaino Juan ãfe apa Zacarías yoini:

⁶⁸⁻⁶⁹ Æfe kaifo israelifãfe nõko Niosfi sharakõikĩ, nãfi nõko Ifokõikĩ. Nõko chaka noko soaxoxii. Nõko xini David ãfe fena finakõia ixii. Nã David nõko xinifãfe ãto xanifo ipaoni. Nã ãfe fena Niospa nĩchia noko ifipakexanõ afe nõ ipaxanõ. Nãskakẽ noko shinãmakinakama. ⁷⁰ Nãskakaxõ ato yoipaonifo, nã ato Nios yoixomisfãfe Judea mai anoafõ. ⁷¹ Niospa ato shinãmanaino yoipaonifo noko kexesharano afanã noko afeskafanõma noko õikaspaifono ixõ yoinifo. ⁷² Nã noko yoiaifãfe nõ ato nikapaoni keskafakĩ noko Niospa kexesharapakenaka noko noikĩ. Nã noko yoipaonifo keskai Nios noko shinãmakimisma. ⁷³ Nãskaxõ nõko xini Abraham Niospa yoini iskafakĩ: “Mĩ kaifo efe yorafo ipanakafo. Nãskakẽ mĩ fena ã ato nĩchixonĩ ãto xanifo finakõia inõ. Nãskaxõ keyokõi ato ifixii afe ipaxanõfo. ⁷⁴ Nãato nã mato õikaspaifo ato paxkaxii anã mato afeskafanõfoma,” ixõ Niospa yoini. Noko askafaino nõ ãfe inafõax nõ anã mesetiroma nokomãi nõko Ifãfe ãkikẽ. ⁷⁵ Nõ ãfe ina kayakõikẽ nõko õiti noko shara faxoxii aa noiax nõ isharakõipakexanõ, ixõ Zacarías ato yoini.

⁷⁶ Nãskata Zacarías ãfe fake yome pishta yoini:

Anifoshta, nõko Nios finakõia nõ mãnão nikõina. Akka mĩ yosixõ Niosnoa mĩ ato yoixoxii. Taefakĩ mĩ ato yoixonano chipo nã nõko Ifo finakõia oxii. Nãskakẽ itipinĩkãfe mã nõko Ifo oi kiki mĩ ato faxii. ⁷⁷ Nãskakẽ mĩ ato tãpimaxii mã nõko Ifo oaino afe yorafo ato chaka soaxoniyoi. ⁷⁸ Akka Niospa noko shinãino ãfe Fake finakõia nai mẽranoax nokoki oi nõko õiti noko sharafaxoxiki. Oa fakishpari xini koshi kafanai keskafakĩ nõko õiti xafakĩa sharakõi noko faxoxiki, ⁷⁹ anã fakish keskara nõko õiti inõma. Nãskax nai nõ mesetiroma noko shinãmasharaino, ixõ Zacarías ato yoini.

⁸⁰ Nãskax Zacarías ãfe fake yosini Niospa ãfe shinãmã shinãmasharaino. Nãskax ares tsõa istoma ano ipaoni, nã Niospa meka israelifo ato yoikĩ taefaitĩa.

2

María Jesucristo kãini

(Mt. 1.18-25)

¹ Nã Jesús kãiyaitĩa romanõ ãfe xanĩfãfe César Augusto ãfe yorafo nĩchini nã maitio anoafõ ato tanãkaxõ ãto anefo kenenõfo afe tii yorafomakĩ.

² Taefakĩkõi kirika kenenifo ãto anefo keyokõi. Akka Siria mai anoafãfe ãto

xanĩfãfe ane Cirenio ipaoni. ³ Nãskakẽ keyokõi fonifo ãto mai anoxõ ãto ane kenei fokani. ⁴ Nãskaifono María feri José kani Belén ari, Nazarete ano ikanax. Nã Nazarete pexe rasi Galilea mai anoa ini. Nãnoax José fe María fonifo, José ãfe xini Davidmã Belén anoax kãinino. Nã Belén Judea mai anoa ini. ⁵ Nãskakẽ María fe José fonifo ãto ane kenei fokani. María fe José mã yoinãfo ini fianãxikakĩ. Fianãyokanamax María fe José kani. Nã María tsoa pishta tanamisma ini, akka Niospa Yõshi Sharapa fake nanemani. ⁶ Mã María Belén ano nokoano fãke pãe fani mã kãiki. ⁷ Mã fake kãiax fakeyai taeni. ãfe fake feronãfake ini. Akka ãto fakka inafãfe piai mẽra fonifo. Anoax María fake kãini. Mã fake kãixõ sama faxte pishta rakoni. Askata ãfe fake rãtani a fakkafãfe piai kamaki.

Ãjirifo oveja kexemisfoki nokoni

⁸ Nã María fakishi fake kãiano oveja kexemisfãfe fasifo mẽraxõ ãto ovejafo kexeshinifo pexe rasi pasotaixõ. ⁹ ãto ovejafo kexeshinaifono Nios ariax ãfe ãjiri atoki fotokĩ chaxapakefõfãni. Niospa nĩchiano chaxapakefõfãni. Mã Niospa ãjiri nĩchiakĩ inifo chaxatanaito fichikanax ratekõinifo. ¹⁰ Nãskaifono ãjirinĩ ato yoini: “Rateyamakãfe. Ë mato meka shara yoiyoaki nikax mã inimai finakõinõ. Askatari yorafãferi nikakanax akairi keyokõi inimakõinõfo. ¹¹ Iskaratĩa fotoxõ ã mato yoiyoa. Nã fakishi mã mãto Ifo Cristo mã kãia mãto Ifokõi mato ifixiki mã afe Ipaxanõ. Nã mãto xini David kãini anoaxri kãia mãto Ifokõi. ¹² Ë mato yoinõ nikakapo afeskaxõ mã tãpitiromakĩ nã fake ãfe afa rapatinĩ rakoxõ rãta fakkafãfe piai ano fichixõ mã tãpitiro nã mãto Ifo finakõia,” ixõ ãjirinĩ ato yoini.

¹³ Ato yoikĩ xatetanaino atiri Niospa ãfe ãjiri ichapakõifo atoki fotopakefõfãni. Fotopakefõfãkata inimakõi Nioski fanãinifo. Inimakata iskafakĩ yoinifo:

¹⁴ Nios sharakõi nai mẽra ika. Nã ato fichipaiyai tii nono mai anoax ikafo ato shinãmasharai inimanõfo, ixõ yoinifo.

¹⁵ Mã yoikanax anã nai mẽra fonifo. Mã nai mẽra ãjirifo foafono, “Nõ õinõ,” inifo, “Chanĩmamakĩ nõ õinõ, fokapo Belén ano na nõko Ifo Niospa ãfe ãjirifo nĩchiano noko yoiafo keskara nõ õinõ fokapo,” ixõ yoinifo.

¹⁶ Nãskata nã oveja kexemisfo fonifo. Mã fokakĩ ichokaxõ fichitoshinifo María yafi José. Nãno ãto fake yome rãtafono fakkafãfe piai mẽra fasi mẽra rakakẽ õinifo. ¹⁷ Nã fake yome õiafo tiito ato yoifofãsafanifo. ¹⁸ Nã oveja kexemisfãfe ato yoiaifãfe nikakakĩ, “Aira, ¿afeskakĩ iskara shara noko yoikanimẽ?” inifo. ¹⁹ Nãskakẽ María nã nika keskafakĩ ãfe õitinĩ fãsi shinãfãfãini. ²⁰ Nãskakata nã oveja kexemisfo ato yoitakani anã ato ovejafo ano fenifo. “Aicho, Nios sharakõikĩ nã noko yoia keskafakĩ mã nõ õitanikai,” ikanax ãa ranã yoinãnifo.

Nios kĩfiti pexefã mẽraxõ apa feta ãfa ãto fake Jesús Nios ispanifo

²¹ Mã ocho nia oxano Jesús foshki repa xatenifo. Nãskafakaxõ anenifo Jesús fakakĩ, nã ãjirinĩ yoiyoni keskafakĩ María fake naneyoamano.

²² Moisés israelifo yoini iskafakĩ: “Kẽro fake kãiax fena faki kafãsatiroma. Askatari Nios kĩfiti pexefã mẽra fena ikitiroma cuarenta nia oxa finõaxma,” ixõ ato yoini. Akka mã cuarenta nia oxa finõano José fe María fonifo. Jerusalén ano iyoifokani ãto fake Nios kĩfiti pexefã mẽraxõ Apa Nios ispaxikakĩ. ²³ Nãnori Niospa shinãmanaino Moisés kirikaki kenei iskafakĩ: “Fake kã taexõ feronãfakekẽ mã Nios ispatiro ãfenã inõ,” ixõ ato yoipaonino, José feta María ãto fake Jesús iyonifo Jerusalén ano. ²⁴ Nãskakẽ José fe María

mã fokaxõ a Moisés yoini keskafakĩ a Nios ato kĩfixomis rifi rafe iyamai nopoxpoiki rafe inãnifo retexõ Nios kĩfixonõ nãnorimãi Moisés yoipaonino.

²⁵ Nã Jerusalén anoa feronãfake Nios Ifokõi faa ini, ãfe ane Simeón. Nãato Nios Ifo sharakõi faxõ kĩfitaifapaoni. Niospa Yõshi Sharapa Simeón ikinãno, nãato Cristo manapaoni, ãfe kaifo israelifo ifinõ Niospa Yõshi Sharamãi afe ikano. ²⁶ Niospa Yõshi Shara a mēra naneano a mēraxõ tãpimani iskafakĩ: “Mĩ fena naima na Niospa nĩchiai nõko Ifo Cristo mĩ õiyoi mã mĩ õiax mĩ naxii,” ixõ tãpimani, Niospa Yõshi Sharapa Simeón. ²⁷ Nãskata Niospa Yõshi Sharapa shinãmanaino Nios kĩfiti pexefã mēra ikikaini. Nãnori José fe María ãto fakeya ikifainifo, Moisés yoini keskafakĩ ãto fake ispaxakakĩ. Mã ikiafono, ²⁸ Simeón atoki oxõ inimayanã Jesús yome pishtakē chishtoinĩofãni, mã tãpixõ. Nãskafaxõ Nios yoisharani iskafakĩ:

²⁹⁻³¹ Ifo, ea mã yoisim keskafakĩ mē õi. Aicho, mē akiki inimakõiax mē naikai ěfe Ifo õiax. Nãatofi noko ifixii kiki nõ afe ĩpaxanõ. Keyokõichi nõ Ifofanõ mĩ nokoki nĩchia. ³² Nãskata mĩ nõko kaifo yamafiano mia shinãkatsaxakakĩma mĩ fãkeoxõ mia tãpikõikani. Akka nõ israelifo mefe yorafo nõ tãpikõixii, nã fakeõnoa Niospa nokoya rafemanano. Aõxõ nã noko yoisim keskafakĩ noko axoxii,

Simeón fani.

³³ Ato askafaito nikakĩ María feta José ãto õitinĩ shinãnifo: “Aira, nõkai nafo meka nikamisma,” ixõ shinãnifo. ³⁴ Akka Simeón Niospa Yõshi Sharapa shinãmanaino ato yoisharani. Nãskaxõ ãfe afa yoini: “Nã mĩ fake chanĩmara fakanax nõko kaifofo israelifo inimatirofo. Aõnoax isharapakexakakĩ. Akka nõko kaifo fetsafori afe rafeyamakanax omiskõipakenakafo. Nãskakē yora ichapafãfe chanĩmara fakani. Akka fetsafãferi chanĩmara fakaxõ mã shinãkani. ³⁵ Akka a ãto õitinĩ shinãifo keskafakĩ onetirofoma. Akka fētsa ãa shinãkĩ a shinãi keskara onetirofoma. A shinãyamaifori onetirofoma. Xafakĩakõi ato õitiro. Nãskakē mĩ fake aa noikaspaxõ chakafaxikani. Askafafãfe õi aõnoax mĩ omiskõixii shinãi. Nã kenopa mĩ õiti xatea keskara mĩ meexii omiskõikĩ,” Simeón fani.

³⁶ Nãnori kēro fistiri ini, ãfe ane Anã. Nãatoro Niosnoa yoini, a inõpokoai yoikĩ. Akka nã Anãmã apa Fanuel ini. Āfe kaifo Aser nafafo ini. Akka nã Anã yõxafokõi ini. Xomayakõi feneyayoni, siete xinia afeta akax fene nani. Nãskakē anã Anã feneya ipaonima. ³⁷ Ares ikax yõxafokõi ini ochenta y cuatro xinia ani feneyaxoma. Nãskakē Anãmã mēxotaima Nios kĩfipaoni, pena fisti foni teneyanã. Nios kĩfiti pexefã mēranoax Anã askapaoni. ³⁸ Nãskata María fe José Simeón fe yoinãifono Anãri atoki oni. Oxõ nãnoa Jesús fichini. Fichita akiki inimani. Inimayanã Epa Nios iskafani: “Aicho Epa Niosi, iskaratĩa mĩ Fake mĩ nokoki nĩchiaki nofe rafemis ĩpaxanõ,” ixõ yoini. Mã õixõ Anãmã Jerusalén anoafõ ato yoini a na manamisfoki israelifo ato ifinõ. “Mē nõko Ifo õiaki mã nokoki nokoaki,” Anãmã ato fani.

Nazarete ano anã fenifo

³⁹ Nãskata María feta José Jesús Nios ispatakani, nã Niospa yoipaoni keskai anã ãto mai ano fenifo, Nazarete pexe rasi ano. ⁴⁰ Nãnoax Jesús mitsisipakõi yosini María fake. Afama mĩshti tãpiakõi ini. Niospa aõ noikĩ shinãmasharani.

Jesús Nios kĩfiti pexefã mēra ikini yomeax

⁴¹ Nãskax nã xinia tii Jesús ãfe afa fe apa Jerusalén ano fopaonifo. Pascua fista aki fokani. ⁴² Jesús mã doce xinia akano apa feta ãfa iyonifo, amisfo keskafakakĩ fista akifokakĩ. ⁴³ Mã fista keyoano María fe José fenifo, ãto pexe shinãferakani. Akka Jesús nēteaito apa feta ãfa tãpinifoma, mãmãi ato fe kaira ikaxõ tsõa tãpinima. ⁴⁴ Mã ato fe kaira ikanax tãpimam fãi fonifo. Fãi fokãta

shinānifo akka nōko fake akka inifo. Nāskata apa feta āfa fenani. Fenayanā afe yorafoya a afe rafemisfo yōkani: “¿Mā nōko fake ōimamē?” ato fani. ⁴⁵ “Maa, nō mī fake ōima. Niri oama,” fanifo. Ato askafaifono āfe apa fe āfe afa anā anori nētefaikani anā fonifo. Afianā fōtanifo Jerusalén ari. Mā nokokaxō fenafofāsafanifo.

⁴⁶ Nāskata mā tres nia oxakata fichinifo nā judeofāfe Nios kīfiti pexefā mēranoa nā ato tāpimamisfo fe tsoxō nikaino. Ato nikayanā ato yōkapakeni a ato tāpimamisfo. ⁴⁷ Ato askafaino nikakakī, “Nikakapo, ¿na fāke yomefixō afeskakī mekakī tāpisharakōiamē? Ato kemasharakōi,” fanifo. ⁴⁸ Ato askafaino afa feta āpa fichinifo. “Nono tsofekē nō fenai nōko fake,” fanifo. Nāskata āfa kenatoshini: “Kōkaishta, ¿afeskai mī nēteamē? Mā mī noko ratekōia epa yafi. Afeskara ikara nō mia faa. Nāskakē nō mia fenafei nono ato fe tsoxō mī yoifiaino,” fanifo.

⁴⁹ Askafaifono ato kemani apa yafi afa: “¿Afeskakī mā ea fenaimē? ¿Ea mā tāpimamē nā ēfe Epa Niospa pexe mēra ē ikikē nā ēfe Epa ea yoiai keskara ē faito?” ixō Jesús ato yoini.

⁵⁰ Ato askafaito apa feta āfa tāpinima.

⁵¹ Nāskata apa feta āfa iyonifo Nazarete pexe ari ato xanēnē. Nāskata mā nokoxō María shināni āfe fakeōnoa. Nāskaxō Jesús apa feta āfa yoiaito ato nikakōisharapaoni ato shinākōikī. ⁵² Nāskata Jesús yosikōini, āfe ōiti sharakōia. Mā āfe māpo afama mīshti shinākōi ini. Nāskax yosini. Nāskaito ōikani yorafo akiki inimakōinifo. Niosri akiki inimakōi ini.

3

Juan Maotista tsōa istomaxō ato yoini (Mt. 3.1-12; Mr. 1.1-8; Jn. 1.19-28)

¹⁻³ Akka mā yosixō Zacarías fāke ato Nios yoipaoni tsōa istoma anoxō. Tsōa istoma ano yora ichapa akiki fonifo nikaxikakī, nāskakē Zacarías fāke ato Nios yoiaino. Nānori Tiberio xanīfo finakōia ipaoni, Roma anoax. Nāskakē aa ranā ikanax āto pexefo anoax xanīfo ikaxō ato ikīpaonifo. Pexe fisti rasi anoax xanīfo iki fetsepaonifo. Judeofāfe āto xanīfo ini pexe fetsa anoax āfe ane Poncio Pilato. Askata pexe fetsa anoaxri āto xanīfo fetsa Galilea anoax Herodes ato xanīfo ini. Akka Feliperi xanīfoxō pexe rasi anoa rafe kexepaoni. Itoria ano kexeta Traconite ano kexeta fapaoni. Akka nā Felipe āfe exto ipaoni Herodes. Nāskatari pexe fetsa anori xanīfo fetsa ipaoni āfe ane Lisianas Abilinia anoax. Akka āto xanīfo finakōia ipaoni Tiberio. Nāato keyokōi kexepaoni. Mā xanīfokī catorce xinia akano Zacarías fake Juan tsōa istoma ano ixō Niospa meka yoipaoni. Askatari judeofo yoipaoni āto mai ano ixō, yorafāferi ato Nios kīfixopaonifo. Akka Anás fe Caifás āto xanīfo ipaonifo. Nāskakē nā Zacarías āfe fake Juan Judea mai ano ipaoni. Akka mā yosiax tsōa istoma ikē Niospa yoini aōxō ato yoinō iskafakī: “Māto chaka xatekāfe, a mā afara chaka shināi keskara anā shināyamakāfe. Niospa mato yoiai keskara nikakōikāfe. Mā nikakōiaito Niospa mato chaka soaxotiro. Mā askaito ē mato maotisafatiro, faka mēra ikimapakekī māto chaka mā xatenō ato ispaxiki ixō ato yoitāfe,” ixō Niospa nīchiano Juan ato yoifofāsafani faka Jordán arixō. ⁴ Afia Isaías ato yoipaoni keskafakī Juan yoifofāsafani. Nānorikōi Isaías kirika kenei a Juan mekanōpokofai yoikī:

Tsōa istoma ixō yorafo yoixii akiki feaifono. Iskafakī ato yoixii: “Mā nōko Ifo oi kiki. Nāskakē itipinīsharakāfe, āfe fai sharafaxokāfe. Māto chaka xatekāfe. ⁵ Nā xexa naxpe chakafo ano mai forosharakōi fanōfo. A machifo anori sapa sharakōi fanōfo. Nāskatari āfe fai mēstesharakōi faxonōfo. A xexa naxpefo ano mai forosharafaxonōfo sapa sharakōi inō nōko Ifofai. ⁶ Mā

nōko Ifo Niospa nīchiano oxō a shināifo ato ifiyoi afe ĩpaxanōfo. Nāskakē keyokōichi ōixikani,”

ixō yoinōpokoi kiki nā yōra, ixō Isaías kirika keneyoni, Juannoa yoikī.

⁷ Nāskakē nā Isaías ato yoipaoni keskafakī Juan ato yoipaoni, mā chaima Jesús oaino. Ato Juan yoikī iskafapaoni, a nikakani akiki yora ichapa feafono: “Noko Juan maotisanō faka mēra ikimakī nō chiifā mēra kayamanō,” ikanax akiki feafono Juan ato yoini iskafakī: “¿Afesakai mā ea ano oimē? ¿Ē mato maotisanō mā oimē? ¿Tsōa mato yoiamē? Mā shināiraka nō chiifā mēra katirora ixō nāskax mā maotisapaimē, nō chiifā mēra kayamanōra ikax. Maa, māakai afaa tāpiama, askax mā maotisatiroma. Mā Nios Ifofaima. Mā oa shano keskara mātō ōiti chakakōi. Nāskaxō mā Satanás ifofaa. Nāskakē kaxpa ē mato maotisatiroma māmāi Satanás fisti shināito. Āa fētsa mato pāratiro nō maotisanō nō chiifā mēra kaimakai Nios nikayamafix ixō mato pārano mā chiifā mēra katiro fētsa afaa tāpiamato mato pārano. Askara Niospa mato ifitiro mā mākaikōi shināito, ēroko mato maotisafaano. ⁸ Mātō chaka xatekāfe, Nios shinākāfe. Mā Nios shināito ē mato maotisanō. Ē mato anā yoinō nikakapo. Mā shinātiro: ‘Nā Abraham nōko xini ipaoni, ōiti sharayaxō Nios shināpaoni.’ Akka mā shinākī: ‘Nōmāi Abraham fenaxō nō shara shināi,’ ixō mā shinākī mā shināsharaima. Askara shināyamakāfe. Akka mātō ōitinī mā chaka shināfi mā chanī. Nikasharakōikāfe, ē mato yoinō. Na tokiri Niospa onifaxō nīchikē mā ōitiro Abraham āfe fena inō. Nāskakanax Abraham fakefo itirofo na tokiri ōiki Nios shinākanax. Akka māakai anori shināima mā mā chanī, ‘Abraham shināpaoni keskara nō shināira’ ikax. Askara shināyamafi Satanás fisti ifofafai. ⁹ Akka fana fimiymaito ifāfe reratiro. Āfe taporī tsekaxō kooatiro anā niyamanō. Nāskari fakī mā Nios nikakaspaito a omiskōipakenakafo mēra Niospa mato potaxii mā chaka xateaxma mā isharayamaito,” ixō Juan ato yoini.

¹⁰ Ato Juan askafaito nikakakī kemanifo: “¿Chanīmamē? ¿Na mī yoiai keskara tāpiaxma nō afeskatiromē? ¿Afeskaxō a keskara shara nō shinātiro mē?” faifāfe anā ato yoini: ¹¹ “A yora omiskōiaito afaamais oxō mato rapati yōkatoshiaito mā inātiro mā rapati rafeyaxō. Askatari yora fonāiki oaito mā pimatiro,” ato Juan faito nikanifo.

¹² Xanīfo kori fixomisfāferi Juan yōkanifo: “Maestro, ¿nō afeskatiromē, mī noko maotisanō?” fanifo.

¹³ Askafaifono ato yoini: “Mātō xanīfāfe a tii mato yoiyamafiano finōmainīfōfā mā kori fitiroma,” ato fani.

¹⁴ Nāskatari sorarofāferi yōkanifo: “Akka, ¿nō afeskatiromē?” ixō yōkanifo. Askafaifono ato yoini: “Ato kori fīapiakī shināyamakāfe. Askaxori ato ferateni mitsisipayamakāfe. Ato askafayamakāfe. Mātō xanīfori pārāyamakāfe. Nā xanīfāfe mato inā tiiya inimakāfe,” ixō ato yoini.

¹⁵ Nāskata yorafāfe ōinifo Juan mekaito. “¿A naamē Cristo?” ixō āto ōiti mēraxō shinānifo. ¹⁶ A shināifo keskara mā tāpixō Juan ato yoini: “Ēkai Cristoma. Nāskakē ē mato maotisafapai. Akka nā chipo oaito āfe Yōshi Shara mato mēra naneyoi. Nā sharafinākōia, ea keskarama. Aato afama mīshiti fatiro, ē atiroma keskara. Akka ē afaama,” ixō Juan ato yoini. Mā chaima Jesús oaito yoikī ato askafani. ¹⁷ Nāskaxō ato yoipakeni: “Mā Nios shināito mato ifixii. Akka a shināyamaifo ato ifixiima. Afāfekairoko ifofaifono nāfo chiifā mēra ato potano anoax omiskōipakenakafo” ato fani.

¹⁸ Nāskatari meka shara ato yoini, āto ōiti mēra ato nanemapaikōini āto chaka xatenōfo. “Mā nōko Ifo Jesucristo chaima oi kiki, shināsharakōikāfe,” ixō ato yoitaifapaoni. ¹⁹⁻²⁰ Askatari xanīfo Herodes yoini: “¿Afeskakī mī exto

ãfi fñaitamē? Askatari mĩ ato chakafafofãsafai,” fani Juan. Askafaito nikakĩ Herodes akiki õitifishkixõ achixõ karaxa mēra ikimani.

Juan Jesús maotisafani faka Jordán anoxõ
(Mt. 3.13-17; Mr. 1.9-11)

²¹ Akka Herodes karaxa mēra nĩchiyoamano Juan ato maotisafapani. Jesúsri mã yosiaito nãri maotisafani. Mã maotisafaano fininãkafãta Apa Nios kĩfini. ²² Apa kĩfiaino nai mēranoax oa rifi keskara ãfe Yõshi Shara fotopakekafãni akiki. Fotopakekafanaino nai mēranoax mekaito nikani iskaito: “Mĩ ěfe Fakekõi ě mia noikõi. Ě mikiki inimasharakõi,” ixõ Apa Jesús yoiaito nikani.

Jesucristo ãfe xinifãfe anefo
(Mt. 1.1-17)

²³ Jesucristo mã treinta xinia axõ taefakĩ ato yoini Apa Niospa meka. Yorafãfe José fakera fafiaifono Niospa Fake ini. Nãskafiax nãato chata ipaoni Elí. ²⁴ Elí apa Matat ini. Matat apa Leví ini. Leví apa Melqui ini. Melqui apa Jana ini. Jana apa José ini. ²⁵ José apa Matatías ini. Matatías apa Amós ini. Amós apa Nahúm ini. Nahúm apa Esli ini. Esli apa Nagai ini. ²⁶ Nagai apa Maat ini. Maat apa Matatías ini. Matatías apa Semei ini. Semei apa Josec ini. Josec apa Judá ini. ²⁷ Judá apa Joanán ini. Joanán apa Resa ini. Resa apa Zorobabel ini. Zorobabel apa Salatiel ini. Salatiel apa Neri ini. ²⁸ Neri apa Melqui ini. Melqui apa Adí ini. Adí apa Cosam ini. Cosam apa Elmadam ini. Elmadam apa Er ini. ²⁹ Er apa Josué ini. Josué apa Eliezer ini. Eliezer apa Jorim ini. Jorim apa Matat ini. ³⁰ Matat apa Leví ini. Leví apa Simeón ini. Simeón apa Judá ini. Judá apa José ini. José apa Jonam ini. Jonam apa Eliaquim ini. ³¹ Eliaquim apa Melea ini. Melea apa Mena ini. Mena apa Matata ini. Matata apa Natán ini. ³² Natán apa David ini. David apa Isaí ini. Isaí apa Obed ini. Obed apa Booz ini. Booz apa Sala ini. Sala apa Naasón ini. ³³ Naasón apa Aminadab ini. Aminadab apa Admín ini. Admín apa Arni ini. Arni apa Esrom ini. Esrom apa Fares ini. Fares apa Judá ini. ³⁴ Judá apa Jacobo ini. Jacobo apa Isaaca ini. Isaaca apa Abraham ini. Abraham apa Taré ini. Taré apa Nacor ini. ³⁵ Nacor apa Serug ini. Serug apa Ragau ini. Ragau apa Peleg ini. Peleg apa Heber ini. Heber apa Sala ini. ³⁶ Sala apa Cainán ini. Cainán apa Arfaxad ini. Arfaxad apa Sem ini. Sem apa Noé ini. Noé apa Lamec ini. ³⁷ Lamec apa Musalén ini. Musalén apa Enoc ini. Enoc apa Jared ini. Jared apa Mahalaleel ini. Mahalaleel apa Cainán ini. ³⁸ Cainán apa Enós ini. Enós apa Set ini. Set apa Adán ini. Nãskanifo ãto xinifo. Akka ãto fenafo mã kaiafo. Adán ãfe apa Nios ini, nãatomãi onifakē.

4

Satanás chakata Jesús afara chakafamapaini
(Mt. 4.1-11; Mr. 1.12-13)

¹ Mã Juan Jesús maotisafaano Niospa Yõshi Sharapa iyoaino faka Jordán anoax kani. Tsõa istoma ano kani, Niospa Yõshi Sharapa iyoaino mãmã Niospa Yõshi Shara ãfe õiti mēra naneano. ² Nãskata Jesús ares kafãsani, tsõa istoma ano cuarenta nia oxax afaa pishta piaxma. Nãskakē Satanás akiki kani. Mã akiki nokoxõ ifofamapaini. Nãskaxõ afara chakafamapaini. Nãskata mã cuarenta nia oxax Jesús fonãikõini, afaa pishta piaxma. ³ Nãskaito õiki Satanás yoini iskafakĩ: “Mĩ Niospa Fakemãkĩ na tokiri pãa fapo,” fani.

⁴ Nãskafaito Jesús kemani: “Maa, na mĩ ea yoiyai keskara ě akima. A nõ piiai fisti nõ shinãima nipaikĩ. Akka Epa Niospa ãfe meka shararoko nõ shinãitiro. Nãskara Niospa meka yoimisto kenei,” Jesús fani.

⁵ Nāskata Jesús fe Satanás yamaris iakekēfōfānifo. Māchifā mǎnānē fokani. Nārixō Satanás Jesús nā maitio ispani. ⁶⁻⁷ Nāskaxō Satanás yoini: “Ōipo, ea mǎa ifofaxō mǐ ea yonoxonaito na mǐ ōiaifo keyokōi sharashtakōifo ē mia inātiro. Nāskakē keyokōichi āto ifo mǐ itiro. Nafō ēfenākōifo. Ōipo, na maitio ē ato ināpaiki ē ato inātiro atonā inō,” Satanás fani.

⁸ Nāskafaito Jesús kemani: “Maa, ē mia ifofaima. Nios fisti nōko Ifokōi. Nāskakē nō ratokonō mai chachixō nō yoitiro aato noko shināmanō. Nāskaxō nō yoitiro iskafakī: ‘Mǐfi nōko Ifoki nō mia shināi,’ ixō nō yoitiro. Nāskarafi kirika ano keneakī,” Jesús fani.

⁹ Jesús askafaito Satanás anā Jesús iyoni a Nios kīfiti pexefā māmākīaxō yoixiki iskafakī: “Mǐ Niospa Fakekōi axroko mǐ niri ax ichopakekafanikai. ¹⁰ Mǐ ichopakekafānax mǐ afeskaimakai. Nā Niospa meka kirikaki keneaki isakai: ‘Niospa āfe ājirifo yoixii mia kexenōfo.’ ¹¹ Askatari kirika keneano iskaki: ‘Mǐ āto mǐfiki pakeaito mia achixikani kiki mǐ tokiriki pakenōma,’ kirika kenea iskakī,” Satanás Jesús fani.

¹² Satanás askafaito afianā Jesús kemani: “Nōa nō meka fetsafaxō nō yoitiro ma, ‘Ē afara afeskarafaito, ea Niospa kexei,’ ixō nō shinātiroma. Akka, ‘Niospa ea amapaiyai keskara nā fisti ē atiroki Niospa ea kexenō,’ ixō shinākāfe, ikaki na kirika keneano,” Jesús fani. ¹³ Jesús askafaito nikai Satanás kani, Jesús afeskafatiroma mei. Anā oxō Satanás Jesús afara chaka shināmaniyoxiki ikaini kani. Jesús afara chakafamapaifikī chakafamanima. Akka Jesús finakōia ini Satanás mǎnāo nia.

Galilea anoxō Jesús ato yoikī taefani (Mt. 4.12-17; Mr. 1.14-15)

¹⁴ Nāskata Jesús Galilea ano anā kani, Niospa Yōshi Sharapa shināmanaino. Mā nokokē Galilea anoxō yorafāfe nikanifo mā Jesús nokoa ikaxō. ¹⁵ Nāskata mā nokoxō judeofāfe ichanāti pexe mēraxō ato yoini. Nāskaito ōikani, akiki inimasharakōinifo. “Na feronāfake āfe meka sharakōi,” fanifo.

Jesús Nazarete anoxō nikakaspanifo (Mt. 13.53-58; Mr. 6.1-6)

¹⁶ Nāskata nā yosini ano kani Nazarete ano. Nāskax safaronō judeofāfe ichanāti pexe mēra ikini māmāi askai feyakatsaxakī. Ikikainax tsaoni. Nāskata niinākāfā kirika fita aneni. ¹⁷ Nāskata afia Niospa shināmanaino Isaías kirika kenei inānifo anenō. Nā kirika fepexō aneni iskafakī:

¹⁸ Niospa Yōshi Shara emēra naneano ea nīchini ē ato yoinō āfe meka shara a afaamaisfo, “Niospa mato noisharai,” ixō, “A Satanás chaka ifo-faafo a chaka potakāfe, mato mēra nanepaiyaito anā a chaka nikayamakāfe isharakōixikakī,” ixō ē ato yoinō; askatari nā fēxofori ē ato fero sharafaxonō aō ōisharanōfo: nāskatari nā omiskōikakī afaa shināifoma nāfori ē ato shināmasharanō; ¹⁹ askatari ē ato yoisharanō afetīa Epa Niospa afe yorafo ifimākai, ixō Jesús aneni. ²⁰ Niospa meka mā yoikī xatexō kirika fēpoxō feronāfake fetsa ināni, tsaopakekafāxō ato yoixiki.

Ato askafaito aas ōiketsanifo. ²¹ Nāskata ato yoini: “Ē fakeyoamano Isaías eōnoa yoipaoni keskafakī iskaratīa mē mato kirika anexona,” ato Jesús fani.

²² Ato askafaito nikakakī: “¡Aira! Nikakapo, āfe meka sharakōi. José fakefixō ¿afeskakī iskara yoimē?” fanifo.

²³ Askafafono Jesús ato yoini: “Mā ea iskafairaka: ‘Mǐ ato Capernaúm anoa sharafaito nō nikamiski mǎa anoi sharamefe. Nāskakēri nā mǐ yoiai

keskafakī nonoafari ato sharafafe mia õixõ nõ mia chanĩmara fanõ,' ixõ mã ea yoipairaka," Jesús ato fani.

²⁴ Anã Jesús ato yoini: "Chanĩma ã mato yoikõi. ãto pexekõi anoxõ noko iskafatirofo mã nõ na õimis koshikai afaa tãpiama na Niospa meka yoipaiyai aa chanĩ noko fatirofo. ²⁵ Chanĩma ã mato yoikõi. Kirika kenekĩ nõ anetiro iskafakĩ. Elías nõko mai ano ipaoni. Israel mai ano ari ikano akiki oi inima. Arixõ tres xinia ata seis oxe ani, oi manakĩ. Nãskakẽ israeli yorafo fonãiki finakõinifo, afaa pikanima. Ari kero ifomafa fenemais ichapa inifo omiskõikani. ²⁶ Nãskafixõ Epa Niospa nõko xini Elías ato ano nĩchinima. Askatamaroko Sarepta pexe rasi Sidón mai ano nĩchini kero ifomafa fisti nĩchini pimanõ. Niospa nĩchiaino chai kani. ²⁷ Askatari yora fetsafo israelifãfe mai anoax ichapakõifo rashkishikani inifo. Akka Elías Niospa meka yoimisto aa rashkishiaifo ato sharafapaonima. Askatamaroko nã Siria mai anoa fistikõi sharafani. ãfe ane Naamán. Nã Naamán Siria mai anoa ini, israeli inima," Jesús ato yoini.

²⁸ Jesús ato askafaito nikakani yorafo ichanãti pexe anoax akiki õitifishkinifo. Akiki õitifishkikaki achinifo. ²⁹ Achikaxõ iyonifo Nazarete pasotai mafa keyakõi ano Jesús iyopainifo arixõ potapaikakĩ. ³⁰ Potapaifaifono Jesús ato rãiferani. Nãskax ato makinoax kani.

Nãnori feronãfake niafaka chaka nanea ini

(Mr. 1.21-28)

³¹ Jesús Capernaúm ano kani, Galilea mai ano. Nãnoxõ pena tenetitã Apa Niospa meka ato yoini. ³² Ato yoiato nikai iskanifo: "¡Kee! Nikakapo. Nato tãpikĩ finakõia, meka sharakõi nato yoi," ikanax aa ranã yoinãnifo.

³³ Judeofãfe ichanãti pexe mẽraxõ yora mẽra niafaka yõshi chaka nanexõ Jesús fãsikõi mekafani. ³⁴ Iskafakĩ yoini: "¿Afeskakĩ mĩ noko fekaxte-faiyoamẽ, Jesús Nazarete anoato? ¿Mĩ noko a omiskõipakenakafo mẽra mĩ noko potaiyoamẽ? Ë mia õimismõ, mĩ sharakõinõ Niospa mia nĩchiano," fani.

³⁵ Nãfaka askafaino Jesús yoini: "Mekayamafe. Na feronãfake makinoax tsekekaitãfe," ixõ mitsisipakõikai Jesús niafaka nĩchini.

Jesús askafaino nãfaka yora fia kekẽfofã potafaini yorafãfe ferotaifi nãskax tsekekaikĩ afeskafanima.

³⁶ Askafaito õikakĩ yorafãfe iskafanifo: "Chanĩma, Jesús afama mĩshti fatiro. Iskarakai nõ tsõa õimisma. ¿Afeskaxõ iskafaimẽ, na feronãfake makinoax niafaka potai? Meka finayakõikẽ nãfaka nikafainikai," yorafãfe fanifo.

³⁷ Askafaito õikaxõ yorafãfe pexe tii anofo yoifofãfofãinifo Jesús yora makinoax niafaka potaito õikaxõ.

Jesús Pedro rayos sharafani

(Mt. 8.14-15; Mr. 1.29-31)

³⁸ Askakaini Jesús judeofãfe ichanãti pexe anoax tsekekainax Simón pexe mẽra ikini. Nãnoax Simón rayos yõxafo yonai finakõini. Nãskaito õikakĩ Jesús yoixonifo: "Na yonai sharafafe," fanifo. ³⁹ Askafaifono nã kero yõxafo yonai mãnão kãta Jesús kãtipakekafãta yoini iskafakĩ: "Mĩ yona nishpafe," faino samamakõi ãfe yona nishpatani. Nãskata mã yonai nishpata, fininĩkafãta itipinĩshara fani ato pimaxiki.

A isinĩ ikaifo Jesús ato sharafani

(Mt. 8.16-17; Mr. 1.32-34)

⁴⁰ Akka mã xini kaino nã isinĩ ikaifo fetsa fetsatapafo Jesús ano efenifo. Nãskakẽ Jesús ãfe mẽkemã ato mãmãpakeaino sharai fetsenifo. ⁴¹ Ranãri nã isinĩ ikaifo mẽranoax niafaka chakafo tsekeni. Fãsikõi mekayanã iskafanifo: "Mĩfi

Niospa Fakekĩ,” fanifo. Niafakafãfe askafaifono kerexkai Jesús ato pōtapakeni. Nāskaxō ato mekatima fani māmāi tāpiafãfe nāmāi Cristokē.

Jesús ichanāti pexe mēraxō Apa Niospa mekasharaōnoa ato yoini
(Mr. 1.35-39)

⁴² Mā penaino Jesús tsekekaini, pexefã rasi anoax tsōa istoma ano kai. Nāskaino yorafãfe fenanifo. Nāskakanax akiki nokokaxō nētefapainifo ato makinoax kayamanō. ⁴³ Askafaifono Jesús ato yoini: “Akka, ē Niospa meka shara ato yoifofãfōfãni pexe fetsafo ano afe keskaramākĩ Epa Nios xanĩfãfe noko ĩkinã. Nāskakē Epa Niospa ea nĩchini, ē ato yoinō.”

⁴⁴ Nāskakē kafāsakĩ Jesús Niospa meka ato yoifofãsafani, ichanāti pexe mēraxō Judea mai anoxō.

5

Jesús foe rasi tarafanãfã mēra ato fospi faxoni, tsōa atiroma keskafakĩ
(Mt. 4.18-22; Mr. 1.16-20)

¹ Pena fetsa Jesúsxō foe rasi finifo ĩamãfã ketokonōxō Genesaret anoxō. Askafaito òikani yora rasi akiki fenifo. Niospa meka niakai fekani. ² Jesús nãnoa kanōanãfã rafe rakakē fichini, nã kanōanãfã mēranoax mã fotokaxō ifofãfe ato tarafanãfã chokaifono. ³ Nāskakē nã kanōanãfã fetsa mēra Jesús naneinãkafani, nã Simonã mēra. Nāskaxō yoini: “Eaya fenãmãshita kanōanãfã pitsikife,” fani. Nāskata kanōanãfã mēra tsaoxō yorafo yoikĩ taefani. ⁴ Mā ato yoikĩ xatexō Simón yoini: “Nã ĩa noa ano kanōanãfã fotakãfe. Anoxō mātō tarafanãfã potaxō foe fixikakĩ,” fani.

⁵ Askafaito Simón kemani: “Maestro, fakishchãĩ nõ yonoshina tarafanãfãfã fipaikĩ. Akka nõ fiama. Akka mĩ noko yoikai ē tarafanãfã potenō,” fani.

⁶ Mā ãto tarafanãfã potekaxō foe ichapakõĩ finifo. Oa tarafanãfã faxteai keskara meenifo. ⁷ Nāskakaxō nã ato fe rafeafo ato kenanifo, kanōanãfã fetsaōnoa, ato feta fii fenõfo. Nāskakaxō nã kanōanãfã rafe foe rasi fospikõĩ faafono nã kanōanãfã rafe faka fospikõĩax foefoya ikikerani. ⁸ Nāskara òikĩ Simón Pedro Jesús nãmã ratokonō mai chachipakefõfã yoini: “Ifo, emakinõax katãfe, ē feronãfake chakakĩ,” fani.

⁹ Simón askaito òi a ãfe rafeafori ratekõinifo Jesús foe ichapa tarafanãfã mēra ato nanexonano. ¹⁰ Akka nã Simón fe rafeafo inifo, Santiago fe Juan ãto apa Zebedeo ini. Nāskakē Jesús Simón yoini: “Rateyamafe. Iskaratĩa yorafo ēfe Yõshi Sharaõxō mĩ ekeki efeikai,” fani.

¹¹ Nāskakata ãto kanōanãfã fõkata ĩamãfã kesemē nexakata mã Jesús fe fõkakĩ ãto afama mĩshti õifainifo.

Jesús yora rashkishiai sharafani
(Mt. 8.1-4; Mr. 1.40-45)

¹² Pena fisti pexe rasi ano Jesús ikano nãno feronãfake isinĩ iki rashkishi fetseax akiki oni. Mā akiki oxō ratokonō mai chachipakefõfã yoini: “Ifo, ea sharafapaikĩ mĩ ea sharafatiro,” faito, ¹³ Jesús ãfe mēkemã ramãyanã yoini iskafakĩ: “Ĕ mia sharafanō. Iskaratĩa mĩ sharaikai,” faino a rashkishi fetseai koshikõĩ sharatani. ¹⁴ Mā sharano Jesús nĩchini iskafakĩ yoianã: “Mĩ tsoa yoiki. Akka nã ato Nios kĩfixomis ispatãfe. Nāskaxō ovejanã fake foxō inãfe mia retexonō Moisés yoini keskafakĩ. Nāskaxō keyokõichi tāpinõfo a mĩ isinĩ imis mã mĩ sharano,” ixō Jesús yoini.

¹⁵ Jesús askafaito aōnoa mēxotaima nikakĩ finakõinifo. Nāskakanax yora kaya akiki fenifo nikakani, a isinĩ ikaifori ato sharafapanō. ¹⁶ Nāskax Jesús ato makinoax kani, a tsōa istoma anoxō Apa Nios kĩfikai.

Jesús yora finimisma sharafani
(Mt. 9.1-8; Mr. 2.1-12)

¹⁷ Pena fetsa Jesús ato yoiaino nãno fariseofo tsaofa inifo. A Moisés yoikĩ kirika keneni keskara ato tãpimamisfori inifo. Pe xe rasi Galilea anoax fekãta Judea anoax fẽkata Jerusalén anoax fẽkata inifo. Nãnoxõ Niospa ãfe shara Jesús ato õimani, a isinĩ ikaifo ato sharafapakĩ. ¹⁸ Nãskakata feronãfakefo nokonifo. Feronãfake finimisma ratatinĩ rataxõ iyoifokani. Nãskakata pe xe mẽra ikimapainifo, Jesús ano iyopaikakĩ. ¹⁹ Akka afeskaxma ikitiroma inifo, yorafo ichapakõimãiyakẽ ikipanãfãfe. Nãskakanax pe xe fomãkĩa inanifo. Nãrixõ nã finimisma ratatinĩ rataxõ fotomapakefofãnifo, yorafãfe ferotai fi Jesús nia nãmã. ²⁰ Jesús õini shinãifãfe iskakakĩ na finimisma Jesús sharafai kiki ikaxõ. Nãskakẽ a finimisma Jesús yoini: “Efe yorashta, mẽ mia chaka soaxona,” fani.

²¹ Nãskafaito õikakĩ, a Moisés yoikĩ kirika keneni keskara ato tãpimamisfo feta fariseofãfe shinãnifo iskakakĩ: “Akka, ¿na tsoamẽ na chanãai Nios chakafakĩ mekafayanã? Akka Nios fistichi ato chaka soaxotiro,” fanifo.

²² Akka Jesús tãpini askafaifono. Nãskaxõ ato yõkani: “¿Afeskakĩ iskara mã shinãimẽ? ²³ Akka, ¿ẽ afaa fatiromẽ? Mẽ mia chaka soaxona ẽ fatiroraka, askayamakĩ mẽ mia sharafaa ẽ fatiroraka,” ixõ ato yoini. ²⁴ “Akka ẽ mato tãpimanõ Niosxõ ẽ ato chaka soaxotiroki nono mai anoxõ,” ato fani. Nãskaxõ a finimisma yoini: “È mia yoi, fininĩkafãta mã rakati fifaini mã pe xe ano katãfe,” fani.

²⁵ Nãskafaino a finimisma fininãkafani yorafãfe ferotai fi. Nãskaxõ a kamaki rakamis ãfe rakati fifaini ãfe pe xe ano kani. Epa Nioski inimayanã. “Aicho, Epa Nios sharafinãkõia,” faafoni. ²⁶ Finikainaito õikani ratei fetsenifo. Nãskakanax, “¡Aicho, Epa Nios sharafinãkõia!” inifo. Ratekõiyã iskakakĩ yoinifo: “Akka mã nõ õi afama mĩshti shara fai,” fanifo.

Jesús Leví ifini aõxõ tãpimis inõ
(Mt. 9.9-13; Mr. 2.13-17)

²⁷ Mã askafata Jesús tsekekaikĩ õini, a ãfe xanĩfo Roma anoa kori fixomis. Nã ãfe xanĩfo kori fixomisto ãfe ane Leví* ini. Akka nã ato kori fixomis ano tsaoa ini. Nãskakẽ Jesús yoini: “Efe kafe,” fani.

²⁸ Nãskafaino Leví fininãkafãta ãfe afama mĩshtifo õifaini Jesús fe kani. ²⁹ Nãskata chipo Leví ãfe pe xe anoxõ fista efapa ani Jesús noisharakõiyã. Yora ichapa rasiri afe inifo. Nã xanĩfo Roma anoa kori fixomisfo. Yora fetsafori afe inifo. Nãno ato fe mĩsa ano tsaonifo. ³⁰ Akka nã fariseofo feta a Moisés yoikĩ kirika keneni keskara ato tãpimamisfãfe Jesúsxõ tãpimisfo mekafakĩ taefanifo. Ato iskafanifo: “¿Afeskakĩ ato feta pita ato feta ayata mã faimẽ? Na ato kori fixomisfo feta na yora chakafo fetari mã pii,” ato faifono, ³¹ Jesús ato kemani: “A sharafãfe notoro fenakanima, a isinĩ ikaifãfemari notoro fenakanima. Akka nã isinĩ ikaifãfe notoro fenakani. ³² Akka a yora sharafoõnoax ẽ onima. Nã afara chakafakanax shinãmitsaifoõnoax ẽ oni, ato chaka soaxoxiki Epa Nios Ifofanõfo,” ato fani.

Nã foni tenemisfofãfe Jesús yõkanifo
(Mt. 9.14-17; Mr. 2.18-22)

³³ Iskafakĩ Jesús yoinifo: “Akka Juan inafãfe, fariseofãferi foni tenekõiyã Epa Nios kĩfikĩ chai yoimisfo. Akka mã inafãfe mẽxotaima piyanã ayakani,” faifono,

³⁴ Jesús ato kemani: “Akka yorafo matoki feafono mã ato foni tene-matiroma, feronãfake ãfiyai. Nã feronãfake mato fe ikano inimakõikĩ mã ato

* 5:27 Leví ane rafeya ipaoni. ãfe ane fetsa Mateo.

feta pitiro. ³⁵ Akka nã feronãfake ato makinoa iyoafono ãfe yorafãfe shinãkakĩ foni tenetirofo. Nãskarifiakĩ eõxõ tãpimisfãfe inimakakĩ pitirofo. Akka mẽ ato makinoax kaano ea shinãkakĩ tsõa pitiroma,” ixõ Jesús ato yoini.

³⁶ Nãskafata afianã Jesús ato yoini iskafakĩ, meka fetsafaxõ: “Tsõa sama fenaya sama xini kishi fatiroma. Nõ askafaino sama fena samama chakanatiro. Nãskatari sama fena fe sama xini isharatiroma. Nãskakẽri nã ã mato yoiai keskara mã nikakõixõ a mã ipaoni keskai anã mã itiroma mãmãi ea nikakõiax. A mã ipaoni keskara shinãmakita nãskax mãto yora fena keskara shara itiro. ³⁷ Nãskarifikĩ tsõa mãmã fata koiro pisha xini mẽra nanetiroma nã mãmã nõ farax akaino toxamãianõ. Nãskakẽ nã mãmã fata fe koiro pisha chakanatirofo. Akka nã mãto xinifãfe mato yoimisfo keskara fe nã ã mato yoiai keskara osinãtiroma. Nã ã mato yoiai keskara Niospa meka sharakõi. Akka a mãto xinifãfe mato yoimisfo anori shinãx mã isharatiroma. Niospa mekaya meka chaka osinãtiroma. Nãskakẽ mã nikapaifikĩ mã shinãsharatiroma. ³⁸ Nãskarifikĩ tsõa mãmã fata koiro pisha xini mẽra nanetiroma nã mãmã nõ farax akaino toxamãianõ. Nãskakẽ nã mãmã fata fe koiro pisha chakanatirofo. Akka nã mãto xinifãfe mato yoimisfo keskara fe nã ã mato yoiai keskara osinãtiroma. Nã ã mato yoiai keskara Niospa meka sharakõi. Akka a mãto xinifãfe mato yoimisfo anori shinãx mã isharatiroma. Niospa mekaya meka chaka osinãtiroma. Nãskakẽ mã nikapaifikĩ mã shinãsharatiroma. ³⁹ Akka mãmã pae ayatiakaxõ anã tsõa fata ayapaitiroma. Nãskariai iskatirofo: ‘Nã ã ipaoni keskara afianã ã askapai, ãfe xinifãfe ea yoimisfo keskara shara nã fisti ã shinãi. Akka meka fetsa chaka ã nikapaima. Askatari meka fena chaka ã shinãima,’ ixõ shinãmisfo fariseofãfe,” Jesús fani.

6

Nã judeofãfe pena tenetitã Jesúsõ tãpimisfãfe aros keskara metesfenifo (Mt. 12.1-8; Mr. 2.23-28)

¹ Nã pena tenetitã Jesús aõxõ tãpimisfo fe tarepa kani. Kakĩ aõxõ tãpimisfãfe aros keskara meteskaxõ fonãikakĩ piifonifo. ² Nãskakẽ fariseofãfe ato yõkanifo: “¿Afeskakĩ mã na aros keskara metesfeimẽ na pena tenetitã tsõa yonotiroma ixõ Moisés noko yoifinino?” fariseofãfe ato fanifo.

³ Ato askafaifono Jesús ato kemani, “Akka, ¿a nõko xini Davidõnoa kirika kenefo keskara mã õimismẽ David afaa afeska fanimẽ ãfe inafõ feta fonãikõi? ⁴ Nãskax a Nios kĩfiti pexefã mẽra ikikaini. A mẽra ikikaixõ pãa fichixõ pini, nã pãa Nios inãmisfo. Nãskaxõ ãfe inafõri inãni akairi pinõfo, akka nã Nios ato kifixomisfãfe ares nã pãa pifiamisfono. Akka fonãikĩ finakõikĩ David nã pãa pini ãfe inafõ feta. ⁵ Akka ãfe Epa Niospa ea katonni. Nãskakẽ eres fisti ã yoitiro a nõ atiro keskara na pena tenetitã,” ixõ Jesús ato yoini.

Feronãfake mẽke yõshiya Jesús sharafani (Mt. 12.9-14; Mr. 3.1-6)

⁶ Pena fetsa pena tenetitã Jesús ikikaini judeofãfe ichanãti pexe mẽra anoxõ ato yoixiki. Anoxõ ato yoiaino, nãno ato fe feronãfake ãfe põya kayakai aõri ãfe mẽke yõshiya ini. ⁷ A Moisés yoikĩ kirika keneni keskara ato tãpimamisfo feta fariseofãfe õinifo, na pena tenetitã na mẽke yõshiya Jesús sharafaimãkai ikaxõ, afara chakafaira ixõ yõapaikakĩ.

⁸ Akka Jesús mã tãpia ini a shinãifo keskara. Nãskaxõ a feronãfake mẽke yõshiya yoini: “Fininãkafãta ato nẽxpakã nife,” faino, nã mẽke yõshiya fininãkafãta niini. ⁹ Nãskaxõ Jesús ato yoini: “Ëri mato yõkanõ. Akka, ¿pena tenetitã afaa nõ afeskafatiromẽ, shara fayamakĩ nõ chakafatiroraka?”

Askatari ato ifiyamata, nõ ato retetiroraka,” ato fani. ¹⁰ Nãskaxõ keyokõi ato õiakeni, a kemataima tsaoafo. Nãskata a feronãfake mẽke yõshiya yoini: “Mëshafe,” faino nã mẽke yõshiya meshatani. Nãskax mẽke sharakõia ini. ¹¹ Akka nã fariseofo fe a Moisés keneni tãpimisfo akiki õitifishkinifo. Nãskax ãa ranã yoinãnifo: “¿Nõ Jesús afeskafatiromẽ?” ikanax.

Jesús aõxõ tãpimisfo doce feronãfake ifini
(Mt. 10.1-4; Mr. 3.13-19)

¹² Pena fetsa Jesús kani mãchi keya ano Apa Nios kĩfikai. Arixõ fakishchãi Apa Nios kĩfishini. ¹³ Mã penano a aõxõ tãpimisfo ato kenani. Nãnoxõ doce faxõ ato katonĩ, aõnoa ato yoimisfo inõfo. ¹⁴ Nã feronãfake docefãfe ãto anefo fetsa Simón ini, ãfe ane fetsa Jesús faxoni Pedro fakĩ; fetsari Andrés ini, nã Simón exto; fetsari Santiago ini; fetsari Juan ini; fetsari Felipe ini; fetsari Bartolomé ini; ¹⁵ fetsari Mateo ini; fetsari Tomás ini; fetsari Santiago ini, nã Alfeo fake; fetsari Simón ini. Nãato ãfe kaifo feta romanõfo potapaipaoni, anã israelifo yonomanõfoma. ¹⁶ Fetsari Judas ini, nã Santiago fake; fetsari Judas Iscariote ini, nãato Jesús ato achimani. Nã tii Jesús ifini doce faxõ aõxõ tãpimisfo inõfo.

Jesús yora ichapafõ tãpimani
(Mt. 4.23-25)

¹⁷ Jesús mãchi keya ariax ftoni, aõxõ tãpimisfo fe a mai sapa shara ano. Nãnoax aõxõ tãpimisfo mã ichanãfo inifo. Yora fetsafori ato fe inifo, Judea mai anoax, Jerusalén anoaxri feafo ini fãkafã kesemẽnoaxri. Tiro anoa fekãta Sidón anoaxri fenifo. ãfe meka nikaxikakĩ Jesúski fenifo, aa isinĩ ikaifori ato sharafapanõ. ¹⁸ A niafaka chakata ato fekaxtefai to makinoa Jesús potano sharai fetsenifo. ¹⁹ Nãskakẽ yorafãfe Jesús ramãpaikani, ãfe sharaõxomãi Jesús ato sharafapaino.

Nã inimaifo yafi a inimaifoma Jesús ato yoini
(Mt. 5.1-12)

²⁰ Jesús aõxõ tãpimisfo õikĩ yoini iskafakĩ: “Afaamaisfiãx mã inimakõitiro. Nios Ifofaax afe mã ipaxatiro nõko xanĩfokõimãiyakẽ. Nãskakẽ mã inimatiro.

²¹ “Nã yorafãfe fonãikĩ pipaiyaifo keskafakĩ mãri mã Nios Ifofasharakõipaiyaito mãto õiti mẽra ãfe meka shara nanetiro, mã inimasharakõinõ. Iskaratĩari omiskõi mã oiafiãx chipo mã inimai fitsakõitiro Nios fe ipaxakĩ,” ixõ Jesús ato yoini.

²² Anã Jesús ato yoini: “Inimakõikãfe yorafãfe mato noikaspaifono mato potayanã. Askatari mato ãchaifono, askatari mato õikaspaifono askatari mato anekĩ chakafaifono. nãskakẽ inimakãfe eõxõ mato askafakani kiki. ²³ Nãskakẽ mato askafaifono inimai finasharakõikãfe. Nãskaxõ a nai mẽraxõ Niospa afara sharafo mato mekexona mã fixikai. Akka nã mato chakafaifo keskafakĩ ãto xinifãferi nã Nios ato yoixomisfo chakafapaonifo ato omiskõimayanã,” ixõ Jesús ato yoini.

²⁴ Akka nã kori ichapayafõ Jesús ato yoini iskafakĩ: “Ooa. Iskaratĩa mã kori ichapayax mã inimakõi. Akka chipo naax mã omiskõipakenaka, Nios Ifofamax kori fisti shinãkatsaxakĩ.

²⁵ “Ooa. Iskaratĩa afara ichapayax mã inimakõiyoi; akka chipo mã fonãixii. Askatari iskaratĩa mã fitsakõiyoi; akka chipo shinãmitsai mã oiaxii.

²⁶ “Yorafo sharakõira mato faifono, mã inimakõimis. Mãto xinifori nãskapaonifo, nõ Niospa meka tãpikõikẽ noko yoisharakõikanira ikanax ãa chanĩfikani,” Jesús ato fani.

“Mato noikaspaifafõ mãroko ato noikãfe,” Jesús ato fani
(Mt. 5.38-48; 7.12)

²⁷ Nāskata anā Jesús ato yoini: “Akka mā ea nikaito ē mato yoi. A mato noikaspaifo ato kopikima ato noikāfe. Askatari ato axosharakāfe. ²⁸ Mato chakafaiāferi ato yoisharakāfe. Askatari a mato omiskōimamisfo Epa Nios ato kīfixokāfe. ²⁹ Akka fētsa mato tapasaito, ‘Takai fetsari ea afe,’ fakāfe. Askatari fētsa mato tari fīaino āa fotanō inākāfe, rapatiri mato fīaito inākāfe āa fotanō. ³⁰ Akka fētsa mato afara yōkaito inākāfe. Askatari fētsa mato afara fīaito ferateyamakāfe. ³¹ Nā mā fichipaiyai keskafakī fetsafāfe mato axosharaifono, nāskarifiakī māri fetsafori axosharakāfe.

³² “Akka mā ato noikī nā mato noiaifos mā ato noia, askarakai sharama. Yora chakafori nāskariakani; nā ato noiaifos ato noikanī. Mā askainokai, ‘Mā afarafo shara faa,’ ixō Niospa mato yoima. ³³ Askatari mā ato afara axoshara nā mato afara axosharaifos, askarakai sharama. Nāskariakani yora chakafori. ‘Mā afara sharafo shara faa,’ ixō Niospa mato yoima. ³⁴ Akka mā ato kori ināxō mā ato shinākōimis nokomāi kopifakōikanira ixō; akka na yora fetsafāfe ea afaa kopifatirofoma. Nāskakē ē ato afaa ināpaima ixō mā shinākī mā afaa ināma, askara sharama. Nāskarifiakani yora chakafo kori inānōnāmisfo nokomāi kopifasharakōikanira ikanax. ³⁵ Akka ē mato yoinō, nikakapo. A mato noikaspaifāfe māroko ato noikāfe, ato shara fakāfe. Afara ato ināxō ea kopifafe iyamakāfe. Mā askai Epa Nios ari mā nokoaito matoki inimayanā afara sharafo mato ināxii. Nāskax mā Nios Sharapa fake mā iki. Nāfi tsoa keskaramāki sharafinakōiaki. Epa Nios sharakōi tsōa fayamafaino ato noikōi. Nā yora chakafori ato noi. ³⁶ Nāskakē māri ato noikōikāfe, nā Epa Niospa ato noikōiai keskafakī,” ixō Jesús ato yoini.

*“Fetsafo mekafakī chakafayamakāfe,” ixō Jesús ato yoini
(Mt. 7.1-5)*

³⁷ Anā Jesús ato yoini iskafakī: “Mēxotaima fetsafo mekafayamakāfe iskafakī yoikī: ‘Nato afara chakafakī Niospa omiskōimapainō,’ fakī. Akka mā ato askafayamaino Niospari mato mekafatiroma iskafakī yoikī: ‘Na yorafo chakafo,’ mato fatiroma. Akka yorafo fe rafesharaxō ato raefakāfe. Mā askaino Epa Niospa matori raeshara faxii mā yorafo fe rafesharano. ³⁸ Fetsafo afara ināsharakōikāfe. Mā fetsafo afara ināsharakōikē, matori Niospa afara ichapa sharakōifo ināxii. Akka mā fetsafo afara ināsharakēma Niospa matori afaa ichapa ināxima, mā ato afara ināsharakōikēma,” Jesús ato fani.

³⁹ Jesús meka fetsafaxō ato yoini iskafakī: “Akka yora fēxo afe fēxo iyopaiakī iyotiroma, mai xato mēra paketiro. Nāskari fakī fētsa Niospa meka tāpioxoma mato yoitiro. Askara yorafo yoiyamakāfe, mato anorima yoitirofoki. ⁴⁰ Akka a aōxō tāpimisfāfe a ato tāpimamis finōtirofoma. Akka mā tāpisharakōikanax āto maestro keskara itirofo.

⁴¹ “¿Afeskakī ifi pasta pishta fetsa feronaki ikano mā ōimē, māroko ifi pasta efapa feostamefioxō? ⁴² Akka, ¿mā shināimamē a mā ifi pasta efapa feostamea? Akka afeskakī mā fetsa iskafaimē: ‘Yamā, ē mia fixonō a mī ifi pasta pishta fero naki ika,’ fakī, mākōi mā kakamepaimis. Mākai afaa tāpiama. Akka a mā ifi pastafā feostamea mā tsekayokāfe. Nāskaxō mā mā ōisharakī a fetsa feronaki ika mā fixosharatiro. Nāskari fakī mā chaka xateyamaxō mā fetsafo chaka xatematiroma. Akka māto chaka xatexō fetsafo mā chaka xatematiro,” ixō Jesús ato yoini.

*Ifi āfe fimioxō nō tāpitiro afe keskaramākī
(Mt. 7.17-20; 12.34-35)*

⁴³ Anā Jesús ato yoini iskafakī: “Ifi shara fimi chakaya itiro. Ifi chakari fimi sharaya itiro. ⁴⁴ Akka ififo āfe fimioxō nō tāpitiro afe keskaramākī. Moxaya ōikī nō tāpitiro. Na keoimara nō fatiro. Nāskari fakī nō tāpitiro moxaya

ōikī, nari uvamara nō fatiro. ⁴⁵ Nāskari fakī yora sharapa meka shara yoitiro, āfe ōiti mēraxomāi shara shinākī. Akka yora chakapari meka chaka yoitiro, āfe ōiti mēraxomāi chaka shinākī. Nāskaxō nā āfe ōiti mēraxō shināi keskara yoitiro.”

Pexe rafeōnoa Jesús ato yoini
(Mt. 7.24-27)

⁴⁶ Nāskaxō anā Jesús ato yoini: “Akka, ¿afeskakī mā ea Ifofafiakī, a ē mato yoiai keskara mā akimamē? ⁴⁷ Ē mato yoinō afe keskara fomākī nā ea nikaifo, nāfāfe nā ē ato yoiai keskara amisfo. ⁴⁸ Nā yōra pexe fai keskara, pexe fakī mai chai pōkixō mai teiki nokoxō pexe kishi nīchiano. Mā faka faikī faka poikōikī pexe afeskafatiroma pexemāi kerexkōikē. Nāskarifiakī yōra ea Ifofasharakōixō afara afeskara afiāito shināchakatiroma. ⁴⁹ Akka nā ē yoiaito ea nikaito nā ē yoiai keskara akima, nā yora tatimato pexe fai keskara. Pexe fakī tāpixoma pexe kishi nīchisharamano, a nāmā faka faikī potatiro. Nāskax mā pexe pāoikax chakanakōitiro. Nāskarifiakī fētsa ēfe meka nikafikī ea nikasharaima. Nāskakē omiskōipakenakafo,” ixō Jesús ato yoini.

7

Jesús sharafani romanō xanīfāfe āfe ina yonaito
(Mt. 8.5-13)

¹ Mā Jesús yorafo yoikī xateax Capernaúm ano kani. ² Nāno soraro xanīfo romanō ini. Nāato a yonoxomis fichisharapaikōimis yonai finakōi nakerani. ³ Nānoxō nā soraro xanīfāfe nikani Jesúsnoa yoafono. Nāskaxō judeo anifofo nīchini Jesús yoixotanōfo a yonoxomis sharafaxoyonō.

⁴⁻⁵ Ato askafaino mā fokaxō Jesús yoinifo iskafakakī: “Oa soraro xanīfāfe nofe yora yamafixō noko axosharamis ikaxō chikishta,” fanifo. “Noko keyokōi noikōimis nāato ichanāti pexe noko faxoni. Nāskakē āfe ina mī sharafaxotiro,” judeofāfe Jesús fanifo.

⁶ Askafaifono Jesús ato fe kani. Akka Jesús mā pexe chaima faikaino, nā soraro xanīfāfe afe rafeafo nīchini yoitanōfo iskafakī: “Ifo, ē mia fekaxtefaima. Ēkai afaama. Akka mī tsoa keskarama. Mī finakōiakī ēfe pexe ano kayamafe. ⁷ Akka ēkairoko afaax nāskakē ē mikiki kaama. Akka mī mekapa a ea yonoxomis ea sharafaxōfe nonoxō. ⁸ Akka eari ēfe xanīfāfe yonomamis. Ēri sorafofo yonomatiro. ‘Katāfe,’ ē faino karisatiro. Askatari, ‘Ekeki ofe,’ ē faino ekeki orisatiro. Nāskakē a ea yonoxomisri afara ea axōfe ē faino ea axotiro. Akka mī afama mīshti fatirokī. Mī mekapa a ea yonoxomis ea sharafaxōfe,” ixō yoini.

⁹ Askafaito nikakī a afe foafo Jesús ato yoini: “Kee, nikakapo. Na feronāfake israeli yamafixō ea chanīmara fakī finakōi, fetsafo keskarama. Akka Israel anoafāfe ea iskafamisfoma chanīmara fakakī,” ato fani.

¹⁰ Ato Jesús askafaino a sororo xanīfo fe rafeafo mā āto pexe ano fokaxō ōiafo a yonaito ōifainafo mā shara fichitoshinifo.

Jesús otofani kēro ifomāfa fake

¹¹ Mā askafata Jesús kani pexe rasi āfe ane Nain ano. Āfe inafō fe kaino yora ichapafori afe fonifo. ¹² Mā pexe rasi chaima fāi kakī ōini a naa iyoifofaifono maifai fokakī. Kēro ifomafa nā āfe fake fisti ini. Nā kēro ifomafa fe yora ichapafō afe fonifo. ¹³ Nā kēro ifomafa oiaito ōikī, Jesús shinākōikī yoini iskafakī: “Oiyamafe,” fata, ¹⁴ Jesús kaxō a kamaki rataxō iyoi foaifo ramāni. Akka nā iyoi foaifo nāno nētenifo. Nāskata nā naita Jesús yoini: “Naetapa, ē mia yoi, fininīkafāfe,” faino, ¹⁵ fininīkafāni. Nāskakē a naita fininīkafā tsaota

mekani. Nāskaxō Jesús afa yoini: “Nakīa, mī fake,” fani. ¹⁶ Nā naita Jesús otoa ōikani. Yorafo ratei fetsenifo. Nāskakaxō Nios yoisharakōinifo iskafakakī: “Epa Niosfi finakōiakī āfe meka yoimis nokoki nokoa,” fanifo. Nāskatari yoikī iskafanifo: “Epa Nios nokoki nokokōia, afe yorafo kexesharaxiki,” fanifo. ¹⁷ Nāskakē Judea anoxō keyokōi nikaketsanifo, aa kematai ixori nikaketsanifo a naita Jesús otofakē.

*Juan aōxō tāpimisfo Jesúski nīchini
(Mt. 11.2-19)*

¹⁸ Juan karaxa mēraxō nikani Jesús ato sharafaito Apa Niosxō. Nāskaxō āfe ina rafe kenani. ¹⁹ Nāskaxō ato nīchini Jesús ano fotanōfo mā ato nīchia fokaxō yoinōfo iskafakī: “¿Mīmē Cristo nā Epa Niospa nokoki nīchiai, askayamai fetsa nokoki oiraka nā nō manai?” ixō yoitanōfo Juan ato nīchini. ²⁰ Mā Juan ato nīchia fokaxō Jesús yoinifo: “Juan Maotista noko nīchia nō oa mia yōkaiyoi, mīmakī a Niospa nokoki nīchia, askayamakī fetsa nō manairaka,” fanifo. ²¹ Jesús anoxō yora ichapa sharafapani, a isinī ikanaifo sharafata, a omiskōifinakōiafo sharafata, a niafaka chaka ato mēra nanea ato makinoa potata, a fēxofa ato fero sharafaxōaito ōinifo.

²² Nāfo askafata Jesús ato kemani iskafakī: “Fokaxō Juan yoitakāfe a mā ōiyanā a mā nikafori. Yoitakāfe, mā fēxofāfe sharakaxō ōisharakani kiki, askatari nā chatofori mā sharakanax niafoki, a rashkishiaifori mā sharafokī, a pastofāferi mā nikasharakani kiki, a namisfori mā otoafoki, a afaamaisfāferi Niospa meka shara nikakani kiki afeskaxō Epa Niospa noko ifitiromakī. ²³ Akka a ea chanīmara fasharakōia afara fetsa shinātama ekeki inimakōitiro,” Jesús ato fani, Juan ina rafe.

²⁴ Nā Juan ato nīchia rafe mā foaifono Jesús yorafo yoikī taefani Juanoa, iskafakī ato yoikī: “¿Afeskakī tsōa istoma anoa Juan ōifokani fonifomē? Juankai nā nēfe tafa pei takka takka akai keskarama. Nāskarifiakī mā mā tāpia Juankai ōiti ranāyama. ²⁵ Akka, ¿tsoa ōikai mā kamismē? Ōitsai, feronāfake rapati sharakōi safekē ōikai mā kamisraka. Akka mā mā tāpia a rapati sharakōi safemisfo xanīfofōfāfe āto pexe anoxō rapati sharakōi safetirofo. ²⁶ Akka, ¿tsoa ōikai mā kamismē? Nā Niospa meka yoimis ōikai mā kamisraka. Akka chanīma, nā Juan Niospa ina finakōia fetsafo keskarama. ²⁷ Akka nā Juanoa yoikī Isaiás kirika keneni iskafakī:

Mī nai ariax mai ano fotoyoamano nā ēfe meka yoimis ē nīchiki taefai mīōnoa ato yoiaino itipinīsharakaxō mia nikakōinōfo, ixō keneni. ²⁸ Akka ē mato yoi, ē mato pāraima. Tsōakai Juan finōama. Juan yoimis keskara meka shara noko tsōa yoimisma. Juanki Nios inimakōimis. Akka fetsafāferi afayamafikaxō ea Ifofaifono Nios atoki inimakōi. Nāskakē Juan finōkōiafo Niospa ato ōimis.”

²⁹ Keyokōichi Juan nikanifo, a xanīfo Roma anoa kori fixomisfāferi nikanifo. Nāskakē Juan ato maotisafapani māmāi tāpikōiafāfe Nioskairoko chanīmiskē. ³⁰ Akka nā fariseofo fe a Moisés yoikī kirika keneni keskara ato tāpimamisfo afo maotiskaspanifo Juan yorafo maotisafapaino. Nā Niospa ato yoipaiyai keskara nikakaspanifo.

³¹ Nāskaxō anā ato yoini: “Iskaratīa na niyoafo afe keskarafofomākī ē mato yoinō mā tāpinō. ³² Nā fakefo āto kaxeti anoax kaxekakī āto yamafo kenatirofo tai tai iyanā. Akka mā āto yamafo nokokanax a ato yamafāfe fichipaiyaifo keskai tsoa kaxesharayamaino ato yoitirofo iskafakakī: ‘Nō nōko xaiti maneaino akka mā mairamisma. Askatari shināmitsayanā nō fanāikaino mā oiamisma,’ ixō ato yoitirofo. Akka māri nāskariai mā tsoaki inimamisma. ³³ Akka Juan Maotista oni. Atokai pikī finapaimisma, askatari

afaa pae ayamisma. Akka mā yoimis iskafakī: ‘Juan niafaka yōshi chakaya,’ mā famis. ³⁴ Akka ē Niospa Fakekōi oni. Piyanā ē ayamis. Akka ea mā iskafakī yoimis: ‘Jesús ichapakōi piimis, askatari pae ayamis,’ mā ea famis. ‘Nāskax yora chakafo fe rafemis, a romanō xanīfo kori fixomisfo feri rafemis,’ mā ea famis. ³⁵ Akka ē shara imis Niospa ea shināmanaino. Juanri shara imis Niospa shināmanaino. Yorafāfe noko ōikī tāpitirofo,” ixō Jesús ato yoini.

Jesús Simón pexe ano kani. Nā Simón fariseo ini

³⁶ Fariseo fistichi pikīxiki Jesús iyonī. Afe Jesús kani āfe pexe ano nāno mīsa ano tsoaxō piaino. ³⁷ Nānoa nā kēro chotaferomato nikani nāno ato fe ixō. Nā fariseo pexe anoxō Jesús pii ano, nāno nā kēro nokoni, manishomo oxokōiki pirofomā foikai. ³⁸ Mā nokoax oiayanā Jesús āfe tae resotai nitishota tsoapakekafāni. Tsoax oiaino Jesús āfe tae pichiki āfe fēotoshini. Nāskaxō āfe fōo otekere ayanā āfe tae tsōokakata akiki pirofomā nachini. ³⁹ Nā fariseo a Jesús iyoato na kēro askaito ōikī āfe ōiti mēraxō shināni: “Na feronāfake Niospa meka yoikatsaxakitsi tāpi kiki na kēro afe keskaramakī na āfe tae ramākai, nā kēro chakakōi,” ixō āfe ōiti mēraxō shināni.

⁴⁰ Nāskara āfe ōiti mēraxō shināito Jesús yoini nā fariseo: “Simón, afara fetsa ē mia yoipai,” faito nā Simón fariseo kemani: “Ea yoife, Ifo,” fani.

⁴¹ Askafaito nikakī Jesús yoini feronāfake rafeōnoa meka fetsafaxō: “Nā feronāfake rafeta a ato kori minimis niminifo. Fētsa nimini quinientos nā kori ane denarios. Fētsari nimini cincuenta. ⁴² Afeskaxoma kopifatiroma inifo. Akka nā ato kori minimisto ea kopifakāfe ato fanima. Ato shara fani nā rafe. Akka ea yoife fatoto noikī finasharakōimākai,” faito, ⁴³ Simón kemani: “Ētsa, nā ichapa nimiato noikī finakōi rakikā,” faito, Jesús yoini: “Ēje, mī yoisharakōiaki.”

⁴⁴ Nāskaxō nā kēro ōiyanā Jesús Simón yoini: “¿Mā mī na kēro ōimē? Akka ē mī pexe mēra ikikē mī ea faka ināma, ē aō ochokomepanā. Akka na kēromā oiayanā ēfe taeki āfe fēo tosiyanā ea ōchoa. Nāskaxō āfe fōo ea otekere aka. ⁴⁵ Akka mā nō feyai askafimisno, mī ea tamoki tsoo akama. Akka na kēromā ikitoshixō ēfe tae pemākā tsoo akī xateama. ⁴⁶ Akka mā nō feyai askafimisno mīkai xinī ēfe mapoki mīa matekere akama. Akka na kēromā ēfe taeki pirofomā nachia. ⁴⁷ Akka ē mia yoi, na kēro chaka finakōikē mē āfe chaka soaxona, ea noikōiaito. Akka fētsari afaa chakafai finamano mē āfe chaka pishta soaxofiano ea noisharaima,” ixō Jesús yoini.

⁴⁸ Nāskaxō a kēro yoini: “Mē mia chaka soaxona,” fani. ⁴⁹ A ato feta piaifori nāno ato fe inifo. Nāskax aa ranā yoinānifo. “¿Tsoamē na ato chaka soaxonai?” ikanax yoinānifo. ⁵⁰ Nāskaxō afianā Jesús nā kēro yoini iskafakī: “Ea mīa chanīmara faito ē mia chaka soaxonaki, kasharatāfe,” ixō Jesús yoini.

8

Kērofāfe afara Jesús axosharapaonifo

¹ Mā askafata pexe rasi mēra Jesús kafāsapaoni. Afe keskaramakī Apa Nios xanīfoōnoa ato yoifofāsafai. Nā doce feronāfake aōxō tāpimisfo afe fofāsapaonifo. ² Kēro ranāri Jesús fe fofāsapaonifo, māmāi ato sharafaano ato makinoa niafaka yōshi chaka potakī, a isinī ikaifori ato sharafani. Nānori ato fe ini āfe ane María Magdalena. Nā María Magdalena makinoa Jesús siete niafaka potani. ³ Nāskata Juanāri ato fe ipaoni, Cuzapa āfi. Nā Cuzapa Herodes yonoxopaoni. Susanāri ato fe ipaoni. Nāskatari nā kēro fetsafāferi Jesús yafi aōxō tāpimisfo ato kori ināpaonifo.

Jesús ato yoini meka fetsafaxō fimi exe saamisnoa
(Mt. 13.1-9; Mr. 4.1-9)

⁴ Pe xe rasi anoax yora rasi fenifo, Jesús ōifekani. Nāskakē yora kaya ichanāfono meka fetsafaxō Jesús ato yoipakeni iskafakī: ⁵ “Feronāfake fistichi fimi exe saafoni āfe nōxati mēra kēchoxō fokī. Āfe tarepa āfe fimi exe saakaino ranāri fai nēxpakīa pakeaito peamanifo, ranāri peyafāfe xēani. ⁶ Akka mā foaipaiyaito xinī namani, yosipanā, āfe tapo airoko mai mēra kasharakē. Foaikax samama nani xinī tsasifaano. ⁷ Ranāri fimi exefo moxafo mēra pakei fetseni. Moxafo mēranoax moxafoya foaipaiyaito moxafāfe namani. ⁸ Akka fimi exe ranāri mai shara ano pakeni. Nāskax foaisharax fimi ichapayakōi ini fetsa cien ini,” ixō Jesús ato yoini. Nāskaxō anā fāsi ato yoini: “Mā pachoyakī ea nikasharakōikāfe,” ato fani.

Meka fetsafaxō yorafo yoixō a aōxō tāpimisfo xafakīakōi ato yoini
(Mt. 13.10-17; Mr. 4.10-12)

⁹ A aōxō tāpimisfāfe Jesús yōkanifo: “Noko yoisharafe, nō mia nikasharamakī afaa mī yoiamāki meka fetsafaxō,” faifāfe ¹⁰ ato yoini: “Ē mato yoinō Epa Nios xanīfāfe afeskaxō afe yorafo īkināmāki, ē mato tāpimasharai afe keskaramāki. Akka fetsafo meka fetsafaxō ē ato yoi. Nā ē ato yoiai ōisharafikakī ōisharafoma. Nikafikakīri nikasharafoma,” ixō Jesús ato yoini.

Jesús meka fetsafaxō fimi exe saamisnoa ato yoini ato tāpimasharakōixiki
(Mt. 13.18-23; Mr. 4.13-20)

¹¹ Anā Jesús ato yoini iskafakī: “Na meka fetsafaxō ē mato yoiai iskarakī nikakapo. Na fimi exeōnoa ē mato yoiai, fimi exeōnoa ē mato yoima. Niospa mekaōnoa ē mato yoi. ¹² Akka na fai nēxpakīa fimi exe pakea peamatirofo keskafakī, nāskarifiakī Niospa meka nikapaiyaifono Satanās chakata ato nika-tima fatiro afe iyamapakexanōfo. ¹³ Akka nā fimi exe makex mēra pakeax foaitiro keskariakī, nāskarifiakī fētsa Niospa meka nikapaisharakōiyotiro. Akka nā fana tapo foaisharama keskaraxō nikafikī nikasharaima. Nāskaxō afara afeskaraino samamashta kachikiri fatiro. ¹⁴ Akka nā moxafo mēra fimi exe pakea keskarafori a ea nikaifo. Akka ea nikafikani, nā moxafāfe fanafo namai keskarafō, āto shinā mēraxō afara sharafo shinākakī. Nāskakakī a Niospa ato amapaiyai keskara shinākanima. Nā fimi exemais keskarafō. ¹⁵ Akka nā fimi exe mai shara ano pakea keskara. Nāskarifiakī yora ōiti sharayato itipinīsharaxō ea nikasharai, Niospa meka chanīmara fakōini, nā fimi exe ichapaya keskarakōixō. Nāskasharakōikaxō fetsafo Niospa meka nikamasharakōikani fetsafāfe chanīmara fanōfo,” ixō Jesús ato yoini.

Meka fetsafaxō rāpariki Jesús aōxō tāpimisfo yoini
(Mr. 4.21-25)

¹⁶ Anā Jesús ato yoini iskafakī: “Akka rāpari ōtaxō tsōa kēsho fepotiroma, askatari a ika nāmāri tsōa tsāotiroma. Askakimaroko fomākīa tsāotirofo, chai chaxasharakōikē fetsafāfe ikikaxō ōisharakōinōfo. ¹⁷ Nāskarifiakī a afara oneyomis chipo xafakīakōi ōixikani. Nāskatari a afara fomāyomisfo Niospa xafakīakōi ato faxoxii keyokōichi ōinōfo. ¹⁸ Nāskakē nikakōisharakāfe. Akka a ea nikakī finasharakōiai Niospa tāpimasharakōi. Akka fetsa ē tāpisharakōia ifiaxō nikamiskēma, askara yora nā tāpia pishta Niospa anā fiatiro,” ixō Jesús ato yoini.

Jesús ōifekani āfe afanō āfe extonō fenifo
(Mt. 12.46-50; Mr. 3.31-35)

¹⁹ Jesús yorafo yoiaino āfe afanō āfe extonō akiki fenifo afe mekapaikani. Akka akiki fotirofoma inifo, yora ichapa fospikōimāiyafono. ²⁰ Nānoa fētsa

Jesús yoini: “Mĩ efanõ mĩ extonõ emãiti niafo mia õipaikani.” ²¹ Askafaino Jesús kemani: “Akka nã ěfe Epa Niospa meka nikakõiaifo nãfofi ěfe efafo ita ěfe extofoki,” ixõ ato yoini.

Jesús nefe yafi ãamãfã poo iki meseniaito nishpa fani

(Mt. 8.23-27; Mr. 4.35-41)

²² Pena fetsa Jesús kanõanãfã naneinĩkafã aõxõ tãpimisfo yoini: “Nõ okiri ãamãfã pokefainõ fokãfe,” ato faino afe fonifo. ²³ Mã ãamãfã pokefainaifono kanõanãfã xaki mẽra rakax Jesús oxani. Nãno atoki nẽfefakõiyana ãamãfã poo ini. Nãskaino kanõanãfã faka fospikõini mesekõini mã kanõanãfã ikikerani. ²⁴ Nãskakẽ aõxõ tãpimisfãfe Jesús mõinifo iskafayanã: “Ifo, mã nõ nataramaikai, moife,” faifono, Jesús fininãkafã nefe yafi ãamãfã poo ikaito ãfe mekapa nishpa fani. Nãskax anã ãamãfã poo inima, sharakõini itani.

²⁵ Askafaifono aõxõ tãpimisfo yoini: “¿Afeskaĩ mã rateimẽ? ¿Mã ea chanĩmara faimamẽ?” ato faino, akka aõxõ tãpimisfo rateyanã ãa ranã yoinãnifo iskakani: “¿Kee! ¿Na feronãfake afe keskaramẽ na nefe feta ãamãfã ato yoiãito nikaifo?” ikanax yoinãnifo.

Gadara anoxõ Jesús feronãfake makinoa niafaka rasi potani

(Mt. 8.28-34; Mr. 5.1-20)

²⁶ Nãskata Gadara mai ano nokonifo, nã ãamãfã Galilea okiri. ²⁷ Mã nokoax Jesús kanõanãfã makinoax fotopakekafanaino, pexe rasi makinoax feronãfake niafaka yõshi chaka nanea akiki oni. Rapati safekatsaxakima. Pexe mẽrari ikatsaxakĩma. Akka nã maiafo mafa kini mẽra ano ika ini. ²⁸ Nãskakẽ Jesús fichita a nãmã ratokonõ mai chachipakefofã fãsikõini fiisiyanã yoini: “¿Ea afeska fayamafe, Jesús! Mĩ Nios Sharapa Fakeki ě mia yoi mĩ ea omiskõimayamafe,” fani. ²⁹ Nãskakã yoini mãmãĩ Jesús a makinoa niafaka yõshi chaka potaino, mẽxotaimamãĩ a mẽra niafaka yõshi chaka nanemisno. Nãskaito yorafãfe kaninãnã metexkere ata otekere axõ kexefiafono, nãfo tesaketsafaini ichopaoni. Nãskakẽ niafaka yõshi chakata nã feronãfake tsõa istoma ano iyopaoni.

³⁰ Nãskaito Jesús yõkani: “¿Mĩ afe anemẽ?” faito, nãato kemani: “Ěfe ane Legiõn,” fani, a mẽramãĩ niafaka yõshi chaka ichapa nanekẽ. ³¹ Nãskaxõ niafaka yõshi chakafãfe Jesús yoinifo: “A omiskõipakenakafo kinĩfã mẽra noko potayamafe,” fanifo.

³² Akka nãno mãchi keya anoxõ kochifãfe pinifo. Nãskakẽ niafaka yõshi chakafãfe Jesús yoikakã iskafanifo: “Noko kochifo mẽra nĩchife,” faifono Jesús kochifo mẽra ato nĩchini. ³³ Nãskakẽ niafaka yõshi chakafo feronãfake makinoax tsekefaini kochifo mẽra iki fetseni. Kochifãfe pifiai ãamãfã mẽra keyopakei fetseax ãsai fetseni, keyokõini.

³⁴ Askaito õikani a kochifo kexeafõ ichoi fetsenifo, a pexe rasi anoã ato chanifai fokani. Askatari a pexe rasi pasotai ikafori ato chanifanifo. ³⁵ Askaito nikakani yõrafã rasi fenifo kochifã rasi ãsaito õifekani. Nokokaxõ õiafo Jesús nãmã a feronãfake niafaka yõshi chaka nanea tsaoã ini, mã a makinoa Jesús niafaka yõshi chakafo põtano. Rapati safeta mã shinãsharakõia ini. Nãskakẽ yorafo ratei fetsenifo. ³⁶ Nã feronãfake makinoa Jesús niafaka yõshi chaka potaito, õiafãfe ato yoinifo afeskax sharamãkã a feronãfake niafaka yõshi chaka nanea. ³⁷ Keyokõini yorafãfe nã Gerasa anoafãfe nikakaxõ ratekõiyana. “Nonoax katãfe,” faifono, Jesús kanõanãfã mẽra naneinãkafanax kani. ³⁸ Nã feronãfake a makinoax niafaka yõshi chakafo tsekeato, “Ěri mefe kapai,” faito, akka Jesús, “Mĩ efe katiroma. Nono mĩ nẽtetiro. ³⁹ Akka mĩ pexe ano kaxõ a mia Niospa axõã keskara yorafo yoifotãfe,” fani.

Nāskafaino nā feronāfake kaxō nā pexe rasi anoafō ato yoifofāsafani nā Jesús axōa keskara.

Jairo fake xotofake mā nakē Jesús otofani. Askatari kēromāri Jesús rapati mēeax sharani

(Mt. 9.18-26; Mr. 5.21-43)

⁴⁰ Nāskafaferani Jesús anā oni ĩamāfā pokeferani. Jesús nokoaito fichikaxō akiki inimakōīyanā yorafāfe ifnifo keyokōichimāi manakakī. ⁴¹ Akka nāno feronāfake āfe ane Jairo akiki nokoni. Nā Jairo Niospa meka yoimis xanīfo ipaoni nā judeofāfe ichanāti pexe sināgoga anoax. Nā Jairo Jesús nāmā ratokonō mai chachipakefōfā fāsikōi yoini āfe pexe ano kanō, ⁴² āfe fake xotofake napaiyaino. Akka nā Jairo fake xotofake fisti ini, doce xinia aka. Nā xotofake mā nakerakōini. Jesús Jairo fe kakī meea yorafāfe shoiakī fetsafo meeni afe fokakī.

⁴³ Nānori kēro ato fe kani. Na kēro imi nesekeima, doce xinia amis. Notoro kopifakī āfe kori keyotiani. Tsoa pīshta sharafatiroma ini. ⁴⁴ Nā kēromā aa kachikiri kaxō āfe tari kexa Jesús ramākani. Tari kexa ramākaino koshikōi āfe imi nesetani. ⁴⁵ Nāskakē Jesús ato yōkani: “¿Tsōa ea ramāmē?” ato faito, keyokōichi yoinifo: “Nō mia ramāma,” fanifo. Ato askafaito Pedro yoini: “Īfo, yorafāfe mia shoiaki fetsakaxō mia pitsikinafo,” faito, ⁴⁶ afianā Jesús ato yoini: “Fatora mā fētsa ea ramā. Akka mē tāpia fatora fetsa ēfe sharaōnoax mā shara,” ixō ato yoiano, ⁴⁷ nikai nā kēro ratekōini. “¿Mā ea tāpiaromē?” ikax ratekōīyanā Jesús ano kaxō ratokonō mai chachipakefōfā yoini yorafāfe ferotaifi nāatomāi āfe tari kexa ramākaxō. “Ē mia tari kexa ramākata mē shara,” ixō yoini.

⁴⁸ Askafaito Jesús yoini: “Yōxashta, mā mī shara mīmāi ea chanīmara faax. Nāskakē tanaima kasharatāfe,” fani.

⁴⁹ Jesús nā kēro yoiano, yora fistichi oxō Jairo yoini: “Mā mī fake xotofake naaki. Anā nōko Īfo fekaxtefayamafe,” faito, ⁵⁰ nikakī Jesús yoini: “Ratekima. Ea chanīmara fāfe mī fake naamakī otoi kiki,” fani.

⁵¹ Mā pexe ano nokoxō, tsoa Jesús ikikinima. Akka Pedro kaino Santiago kaino Juan kaino inifo nā fāke apa fe fokani, nā fāke afari ato fe kani. ⁵² Pexe mēra ikifaikaxō ōiafo keyokōi oiakani fiisinifo shinākani nā fake xotofake mā naano. Akka Jesús ato yoini: “Oiyamakāfe. Na fake xotofake naamakī oxaki,” ato faino, ⁵³ keyokōichi ōsaketsanifo, tāpifikaxō nā fake xotofake mā nafiano. ⁵⁴ Nāskaxō Jesús mēkemā mētsoinīfōfā fāsikōi yoini: “Xotofakeshta, fininākafāfe,” faino, ⁵⁵ mā otoax nā xotofake koshikōi fininākafani. Nāskaxō ato yoini nā xotofake pimanōfo. ⁵⁶ Nāskakē apa fe afa ratekōinifo. “¡Kee! ¿Afeskaxō otoamē?” ikanax ĩinimakōīyanā. Nāskaifono ato yoini: “Tsoa yoiyamakāfe nā mātō fake xotofake nakē mē otoaki,” ixō ato yoini.

9

Jesús aōxō tāpimisfo nīchini Nios Xanīfoōnoa ato yoitanōfo

(Mt. 10.5-15; Mr. 6.7-13)

¹ Jesús aōxō tāpimisfo doce ichanāfani. Nāskaxō ato yoini iskafakī: “Ēfe sharaōxō ato makinoa niafaka fetsa fetsatapafo pōtatakāfe, a isinī ikaifo ato sharafayanā. ² Askatari Nios xanīfoōnoa ato yoitakāfe, a isinī ikaifori ato sharafayanā. ³ Afaa mā fokiki, mātō mēstetiri mā fokiki, mātō pishari mā fokiki, a mā piikairi mā fokiki, koriri mā fokiki, rapati fetsari mā fokiki. ⁴ Akka nā mā ōiai pexe fetsa anoxō mato ifiaifono, nāno iyokani, nā mā anoax kaitīa. ⁵ Akka fatora pexe rasi anoxō mato ifikaspaifono, anoax tsekekaikī mātō taekinoa mā mapo taa taa atiro ato ōimaxiki. Mā askafaino tāpitirofo

Nios atoki inimayamaino,” ixō Jesús ato yoini. ⁶ Nāskata Jesúsxō tāpimisfo fonifo, pexe fetsafo mēra ato yoifokani. Fokaxō ato yoisharakōinifo. Nios nikasharakōikāfe ato fayana a isinī ikaifo ato sharafanifo.

Juan Maotista nani

(Mt. 14.1-12; Mr. 6.14-29)

⁷ Xanīfo Herodes nikani Jesúsnoa yoiaifono afama mīshti akaito. ¿Tsoamē a feronāfake? ixō shināni. Akka yoinifo: “Mā Juan afianā mā otoa,” fanifo. ⁸ Fetsafāferi yoinifo: “Nā ato Niospa meka yoipaonikīa Elías,” fanifo. Fetsafāferi yoinifo: “Nā nōko xinifo ato Niospa meka yoipaonikīa afianā mā otoa,” ixō yoinifo. ⁹ Askafaifono Herodes ato yoini: “Maa, akai Juanma. Mē Juan ato textemayamea. Akka na nō nikai tsoamē na aōnoa yoiaifo afama mīshti faito,” ixō Herodes Jesús ōipaikōini.

Jesús cinco mil feronāfakefo ato pimani

(Mt. 14.13-21; Mr. 6.30-44; Jn. 6.1-14)

¹⁰ Nā Jesúsnoa yoimisfāfe mā fēkaxō yoitoshinifo a atanaifo keskara. Askafaifāfe nikakī ato tiis iyoni, pexe rasi āfe ane Betsaida chaima tsōa istoma ano. ¹¹ Akka mā yorafāfe tāpikanax Jesús kaino, nāskakē chīfafainifo. Akiki foafono Jesús ato ifini. Apa Nios xanīfoōnoa ato yoiyanā a isinī ikaifori ato sharafapani.

¹² Mā yātapakeaino, aōxō tāpimisfo doce akiki fēkaxō yoinifo: “Yorafo nīchife fokaxō tenetanōfo a piaifo fenayanā fonāikani kiki, pexe rasi ano fokāta a chaima ikafo anori fotanōfo. Akka nono afaamaki,” faifono, ¹³ Jesús ato yoini: “Ato pimakāfe,” ato faito kemanifo: “Nōko pāa cinco pishta foe raferi,” fanifo. “Akka, ¿mī shināimē na yorafo pimaxiki a piaifo nō ato fixotanō?” ixō yoinifo. ¹⁴ Akka nāno cinco mil feronāfakefo inifo. Akka Jesús aōxō tāpimisfo yoini: “Cincuenta faxō ato tsāoketsakāfe,” ato fani.

¹⁵ Ato askafaifono keyokōi tsoi fetsenifo. ¹⁶ Askata Jesús cinco pāa tso-mainīfofāni foe rafeya. Nāskaxō nai foisnīfofā Apa Nios kīfini iskafakī: “Aicho Epa, mīoxō ē ato pimai. Mī sharakōi,” fata, pāa kaxketa foe rafeya osixō aōxō tāpimisfo ināni a yorafo ato ināketsanōfo. ¹⁷ Nāskakē yorafāfe pikanax māyakōinifo. Akka nā chete faafo doce fēta fospini.

“Mī Cristo mia Niospa ifini nokoki nīchixii mī nōko xanīfo finakōia inō,” ixō Pedro Jesús yoini

(Mt. 16.13-19; Mr. 8.27-29)

¹⁸ Pena fetsa Jesús Apa Nios arese kīfini. Akka aōxō tāpimisfo afe inifo. Nāskaxō ato yōkani: “¿Yorafo afaa ikanimē ē tsoamāki?” ixō āto yōkani.

¹⁹ Ato askafaito kemanifo iskafakakī: “Fetsafāfe Juan Maotistara, mia fakani. Fetsafāferi Elíasra mia fakani. Fetsafāferi mia iskafakani: ‘Nā nōko xinifo ato Niospa meka yoipaonikīa mā otoa,’ mia fakani,” aōxō tāpimisfāfe fanifo. ²⁰ “Akka mā, ¿ea tsoara faimē?” ixō ato yōkani. Ato askafaito Pedro kemani iskafakī: “Mī Cristo nā Niospa mia nīchini mī nōko Xanīfo finakōia inō,” fani.

“Chipo ea retexikani,” Jesús ato fani

(Mt. 16.20-28; Mr. 8.30-9.1)

²¹ Nāskata Jesús aōxō tāpimisfo yoini: “Tsoa yoiyamakāfe ēfi Cristoki,” ato fani. ²² Nāskata aōxō tāpimisfo yoini iskafakī: “Ē chipo omiskōifinakōixii. Askatari ea ōikaspakakī ea potaxikani, judeofāfe xanīfofo feta a Nios ato kīfixomis āto xanīfofōfāfe a Moisés yoikī kirika keneni keskara ato tāpimamisfāferi. Askatari ea retexikani. Ea retefiafano, tres nia oxata ē anā otoxii,” ato fani.

²³ Nāskata keyokōi ato yoini iskafaki: “Fatora fetsa ěfe inakōi ipaikī āakōi apaiyai keskara anā atiroma. Nā ě yoiai keskara nikakōitiro. Pena tii iskatiro, ea Ifofapai: ‘Ěfe Ifoxō ea retefiaifono ěkai ěfe Ifo ě potanakama,’ ixō shinātiro. ²⁴ Akka fĕtsa āa shinātiro iskakī: ‘Ě Nios Ifofaito ea retetirofo. Nāskakē ě Nios Ifofaima,’ ixō shinātiro mesekī. Askara yora naax ěfe Epa ano katiroma. Akka nā ea Ifofaa, eōxō reteafono ě ifixii efe ĩpaxanō eamāi Ifofamiskē. ²⁵ Askatari fatora fetsa nōko mai anoax afara ichapayakōi ikatsaxakī mā naax aya katiroma. Ea Ifofayamax koriya ifiakatsaxakī Epa Nios ano katiroma. Akka afama mīshtifoya iyopaofinixakī nā omiskōipakenakafo mĕra kaax anā aya itiroma. Āfe afarafori Nios inātiroma afe ipaxakī. ²⁶ Akka fatora fetsa eō rāfikī ěfe meka sharari yoikaspaito, ěri aō rāfikōixii ě yoikī iskafaxii: ‘Ě na yora ōimisma,’ ě faxii. Ěfe sharafoya mĕ oax ěfe Epa sharafoyari ě oxii, ěfe ājiri sharafori efe fotopakefofāxikani. ²⁷ Ě mato pāraima, fatora mā fetsa nayoxoma nono efe iyoxō ěfe Epa xanīfo finakōia mā ōiyoxii,” ixō Jesús ato yoini.

Jesús āfe femānā fetsa keskara ini, fafekōini. Āfe rapatiri oxokōi ini
(Mt. 17.1-8; Mr. 9.2-8)

²⁸ Askata ocho nia mā finōano ato yoikī keyota, Jesús māchi keya māpefaini arixō Apa Nios kīfikai. Āfe ina tres iyoni. Santiago iyota Juan iyota Pedro iyota ato fani. ²⁹ Apa Nios kīfiaino, āfe femānā fetsa keskara ĩtani. Āfe rapati oxokōi ini fafekōiyanā. ³⁰ Akka nāno feronāfake rafe akiki nokokanax afe mekanifo. Mā nafianixakī Moisés fe Elías inifo. ³¹ Nā rafeta chaxapakefofānifo. Mā fotokanax Jesús fe ketaxamei nikaxō yoinifo nā Jerusalén anoax Jesús omiskōixii reteaifono. ³² Nāskata Pedronō Santiagonō Juannō oxapaifikakī oxatenekōinifo. Jesús fafekōiaito ōinifo nā feronāfake raferi ōinifo Jesús fe niafāfe. ³³ Mā Moisés fe Elías Jesús makinoax foaifono, Pedro yoini: “Ifo, sharakōi ano nō oa. Nono nō tapas fanō, tres fakī. Mia fetsafaxota Moisés fetsafaxota Elías fetsafaxota nō fanō,” fani. Akka Pedro tāpinima a yoiai keskara shināfenokōini. ³⁴ Pedro mekai askaino ato kōinī maipakefofāni. Ato kōinī maipakefofānaito ōikani ratekōinifo. ³⁵ Nā kōi mĕranoax mekai iskaito nikanifo: “Nafi ěfe Fakekōikī ě aō noikōi. Nāskakē nikasharakōikāfe,” ixō yoiaito nikanifo. ³⁶ Mā mekai askai nishpatanaino, Jesús ares nikē ōinifo. Akka tsoa yoitama ares fisti āto ōiti mĕraxō shinānifo. Nāskaxō tsoa yoinifoma nā ōiafo keskara.

Jesús feronāfake naetapa niafaka chaka pōtaxoni
(Mt. 17.14-21; Mr. 9.14-29)

³⁷ Pena fetsa māchi keya ariax mā Jesús aōxō tāpimisfo fe fotoano, yōrafā rasi akiki fenifo ōipaikani. ³⁸ Nānoxō yōrafā rasi mĕraxō yora fistichi fāsikōi Jesús yoini: “Ifo, ěfe fake ea ōixoniyope. Nā fisti ěfe fakeki. ³⁹ Niafaka chaka a mĕra nanexō, fāsikōi fiisimamiski, mesta mesta imayanā āfe axfapari fākok potamamiski. Chakakōi famis a makinoax tsekekaspayanā. ⁴⁰ Akka mī inafō mĕ yoia ěfe fake makinoa niafaka yōshi chaka potakāfe ě ato fafiaino akka tsōa atiroma,” fani.

⁴¹ Askafaino Jesús kemani: “¡Ooa! Mā kai ea tāpisharama. Mā afara shināmis. Akka afetiakai ě matoki onima. ¿Afetiakai mā ea tāpimē?” Jesús ato fani. Nāskaxō yoini: “Niri mī fake ea efexōfe,” Jesús apa fani. ⁴² Nāskata āpa Jesús ano efeaino, nā fake nīafaka fia kekēfofā anā nāmā potani, anā ea ea imapaikī. Akka Jesús fāsi mekaināka fā iskafani: “Nīafaka mī chaka chakakōikī, nā feronāfake makinoax tsekekaitāfe,” fani. Nāskax nā feronāfake sharakōi ĩtani. Nāskaxō apa ĩnāni. “Nakīa mī fake,” fani.

⁴³ Askafaito òikani āa ranā yoinānifo: “Aira, Niospa afama mīshti atiro,” ikanax āa ranā yoinānifo.

Anā Jesús ato yoini: “Chipo ea retexikani,” ixō
(Mt. 17.22-23; Mr. 9.30-32)

Jesús nā feronāfake sharafaito òikaxō shināifono, Jesús aōxō tāpimisfo yoini, ⁴⁴ “Ē mato yoiāito nikakōisharakāfe, shināmakikākīma. Fetsafāfe ea ato achi-maxikani kiki,” ixō ato yoini. ⁴⁵ Akka tsōa tāpinima a ato yoiāi keskara Niospamāi ato shinā mēraxō ato shinātima faino. Nāskai ranonifo Jesús yōkapaikani ato xafakīa yoipanā.

“Akka, ġtsoakaimē sharafinakōia?” inifo
(Mt. 18.1-5; Mr. 9.33-37)

⁴⁶ Nāskata chipo aōxō tāpimisfo āa ranā feratenānifo, “Akka, ġfato nō fetsa sharafinakōimē?” ikanax. ⁴⁷ Nāskaxō a aōxō tāpimisfāfe shināifo keskara mā Jesús tāpixō fake yome ifixō chishtoinīfōfāni. ⁴⁸ Nāskata aōxō tāpimisfo yoini: “Akka fatora fētsa ēfe aneōxō na fake yome noikī nāatori ea noisharakōi. Nā ea noisharaito ea fisti noima, nā ea nīchiniri noisharai. Akka fatora mā fetsa āto ina keskaraxō mā yorafo shara faa, nāfi sharafinakōiakī,” ixō Jesús ato yoini.

Fētsa noko noikaspatama noko sharafai
(Mr. 9.38-40)

⁴⁹ Ato askafaito Juan yoini: “Ifo, mā nō òia oa feronāfake fistichi mī aneōxō niafaka chaka potaito. Nāskakē, ‘Askafayamafe,’ nō faa. ‘Mī nofe rafemismaki mī niafaka chaka yorafo makinoa potatiroma,’ ixō nō yoia,” fani.

⁵⁰ Askafaito Jesús kemani: “Askafayamakāfe, noko chakafatama, noko sharafai askara sharaki,” fani.

Jesús Santiago yafi Juan mekatima fani

⁵¹ Mā chaima Jesús Apa Nios ari nai mēra kaino tsōakai nētefatiroma ini māmāi tāpikē a Jerusalén anoax noko nāxoxiai Apa Niospa yoiyoni keskai. ⁵² Nāskaxō fetsafo rekē nīchini, mā fokaxō pexe rasi Samāria anoxō itipinīsharafaxonōfo a nokoikai anoxō. ⁵³ Akka samāritanōfāfe ato ifikaspanifo, māmāi tāpikaxō Jerusalén anoamāi foaifono. ⁵⁴ Ato askafaifāfe a aōxō tāpimisfo rafeta Santiago feta Juan òinifo. Nāskaxō yoinifo: “Ifo, mī noko yoife nō atoōxō Epa Nios kīfinō na pexe rasi anoāfo nai mēranoax chi pakeki ato kooakī mitonō,” ixō yoinifo. ⁵⁵ Akka Jesús anā ato yoini: “Anori shināyamakāfe. Mā shināi keskara ē shināimakai,” ixō ato yoini. ⁵⁶ Askafata pexe rasi fetsa ari fonifo.

A afe fopaimisfoōnoa Jesús ato yoini
(Mt. 8.19-22)

⁵⁷ Fāi foaifono feronāfake fistichi Jesús yoini iskafakī: “Ifo, ēri mefe kapai nā mī kai ari ēri mefe kafāsaxiki,” faito, ⁵⁸ Jesús kemani iskafakī: “Maxoteneroa kiniya, peyāfori naayafo. Akka ēkai pexeyama,” fani. ⁵⁹ Nāskaxō Jesús anā feronāfake fetsa yoini: “Efe kafe,” faito, akka nāato kemani iskafakī: “Ifo, ea manayofe ēfe epa naito ē maifayotanō,” faito, ⁶⁰ Jesús kemani: “Askakima ea Ifofafe. Akka nā ea Ifofaafāfema yora nakē maifatirofo. Akka mī efe koofe ēfe Epa Nios xanīfoōnoa ato yoifofāsafaxiki,” fani. ⁶¹ Akka anā fētsari yoini iskafakī: “Ifo, ē mefe kapai, akka ea manayofe ēfe pexe ano kaxō ē ato yoisharayotanō,” faito, ⁶² Jesús kemani iskafakī: “Akka fētsa ea yonosharaxofiakī a apaoni keskara anā aki, askara yorakai itipinīsharama. Nāskakē ēfe Epa Nios xanīfo ano katiroma,” ixō Jesús yoini.

10

Jesús setenta y dos yorafo nīchini pexe rasi ano fotanōfo

¹ Nāskata Jesús anā setenta y dos yorafo katonī. Nāskaxō rafe rasi faxō ato nīchini nā pexe rasifo mēra fanīma mīshti fotanōfo chipo akairi atoki kaxiki. ² Nāskaxō ato yoini iskafakī: “Yora ichapafāfe ea nikayamafiaifono ichapatoma ea yonoxokani eōnoa ato yoikakī. Nāskakē mā Epa Nios kīfikāfe a yonoxomisfo katonō eōnoa ato yoinōfo. ³ Akka mā fotakāfe, ē mato nīchikai yora chakafo mēra nāfāfe mato chakafapaikani. Oa chaxo poomānā pipaitiro keskafakī, matori askafapaikani eōnoax mā isharafiakē yora chakafāfe mato chakafapaikani. ⁴ Ato mēra kakī mātō forosa foyamakāfe, mātō koriri foyamakāfe, mātō sapatori foyamakāfe. Fokākī yorafo finōfāikakī nēteax ato fe mekakakīma. ⁵ Pexe fetsa mēra ikixō tafakī ato yoisharakāfe iskafakī: ‘Niospa mato sharafanō mā isharakōinō,’ ixō ato yoikāfe. ⁶ Akka nā pexe mēra ika fetsa isharakōikē nā Niospa shara fakōini. Akka a mā ato yoiāi keskara nikakaspafono Niospa ato inimamaima. Nāskakē fenokani. Akka mā ato yoiāi keskarakōinoax mā afaa fenoima. Epa Niospa mato sharafakōini. ⁷ Nāskata pexe rasi mēra nokoax pexe fetsa mēra oxayamakāfe. Nā mā nokoā anoxō mato pimayanā mato ayamanaifono pikāfe. Akka Niosxō yonomisfo nā afara yopaifo ato inātirofo. Nāskakē pexe fetsafo mēra iki foa foayamakāfe. ⁸ Mā nokoaito pexe rasi anoxō mato ifiyanā mato pimaifono pikāfe. ⁹ Nānoxō a isinī ikaifo eōxō ato sharafakāfe, iskafakī yoiyanā: ‘Epa Nios xanīfo finakōi afe yorafo ikixikī mā chaimashta oi,’ ixō ato yoikāfe. ¹⁰ Akka pexe rasi ano mā mā nokoano anoxō mato ifikaspaifono, anoax tsekekāikī ato iskafakāfe: ¹¹ ‘Nā mātō pexe rasi anoax nōko tae ano mapo neano, nō taa taa akano anā nōko neima. Nāskarifiakī mā noko nikakaspaino mātō chaka nōko neima, mātō nei. Akka shināsharakāfe Nios xanīfo mātō Ifo ipai mā chaimashta matoki oi kiki,’ ixō ato yoikāfe. ¹² Akka ē mato yoi, nā omiskōiai nokoaitīa, na pexe rasi anoā ato omiskōimaniyoi nā Sodoma anoāfo ani keskafakī finōmainīfofā ato omiskōimakī finakōiyoi,” ixō Jesús ato yoini.

Pexe rasi anoxō Jesús nikakaspafono

(Mt. 11.20-24)

¹³ Anā Jesús ato yoini iskafakī: “¡Ooa! Corazin anoafāfe Betsaida anoāfo fe mā omiskōifinakōixii. Akka Tiro anoxō Sidón anoxori nā ē mato ōimana keskara, ē ato ōimanano āto chaka xatekaxō Epa Nios Ifofakeranafo. ‘¡Ooa! Nō afara chakafamiskī iskaratīa nō anā Nios Ifofai,’ iyanā rāfikaxō āto rapati chapo safekaxō chii māpo raish akeranafo fetsafāfe ato ōinōfo. ¹⁴ Akka Niospa Tiro anoāfo yafi Sidón anoāfori ato omiskōimafiakī ato omiskōimasharaima, akka matoroko omiskōimakī finakōixii. ¹⁵ Akka, ¿nō Capernaúm anoax nō nai mēra kai Epa Nios ari ixō mā shināimē? Maa. Nā omiskōipakenakafo mēra ē mato potaxii,” ixō Jesús ato yoini.

¹⁶ Nāskata Jesús anā aōxō tāpimisfo yoini: “Nā mato nikaifāfe, eari nikasharakani. Akka nā mato nikakaspafāfe, eari nikakaspakani. Nā ea nikakaspafāfe nā ea nīchiniri ēfe Epari nikakaspakani,” ixō Jesús ato yoini.

Anā fenifo setenta y dos feronāfakefo Jesús ato nīchitano

¹⁷ Nā setenta y dos feronāfakefo anā fenifo, inimakōiyanā. Mā fēkaxō iskafakī yoinifo: “Ifo, niafaka chakafāfe noko nika mī aneōxō yorafo maki-noa nō potaino,” faifono, ¹⁸ Jesús ato kemani: “Ēje, mē ōia Satanás nai mēranoax pakeaito oa kana piishikai keskara. ¹⁹ Ē mato ēfe shara inā, ēfe sharaōnoax mā kaito rono feta nīfo mato chachiyamanō. Nāskaxō nā noko noikaspamis Satanás chaka mā finōkōinō, mato afeskafanōma. ²⁰ Akka

inimayamakāfe niafaka yōshi chaka potax. Akka mā nai mēraxō Epa Niospa māto anefo āfe kirikaki keneaki, nā sharafinakōia,” ixō Jesús ato yoini.

*“Ekeki fekāfe ē mato shināmasharanō,” ixō Jesús ato yoini
(Mt. 11.25-27)*

²¹ Ato askafata, Jesús Apa Yōshi Sharaōnoax inimakōikī yoini iskafakī: “Epa Niosi, keyokōi nai mēranoafoya nono mai anoafō mī āto Ifo. Mī sharafinakōia. Akka atirifāfe kirika kene tāpifikaxō mia Ifo fakaxoma. Iskafakī shināmisfo: ‘Tsoa fetsakai noko keskarama, nō tāpikōia,’ ixō shināmisfo. Akka nāfo mī meka mī ato tāpimanimā. Akka nā kirika kene tāpikaxoma mia Ifofaifono nāfo mī meka shara mī ato tāpimani, nā mī fichipaiyai keskafakī. Nāskakē ē mia aicho fai,” ixō yoini. ²² “Ēfe Epa Niospa a tāpia keskara eari keyokōi tāpimani ēmāi āfe Fakekē. Akka tsōakai ea tāpiama, ēfe Epa fistichi ea tāpikōia. Nāskarifiakī tsōa ēfe Epa tāpiama, akka eres fisti ē tāpia. Akka nā fetsafori ē ato tāpimanaino nāfāferi Epa Nios tāpitirofo,” ixō Jesús ato yoini. ²³ Anā aōxō tāpimisfoki oxō ato fisti yoini: “Nā mā ōiai keskara ōikanax fetsafori inimakōikani. ²⁴ Akka ē mato yoi, Niospa meka yoimisfo feta xanīfofōfāfe nā ē mato yoiai keskara ōipaifikakī ōipaonifoma. Nā mā nikai keskarari nikapaifikakī nikapaonifoma.”

Meka fetsafaxō samāritanō sharaōnoa Jesús ato yoini

²⁵ Feronāfake fisti a Moisés yoikī kirika keneni keskara ato tāpimamis Jesús fe mekaikai kani. Jesús ea kemaimāakai ixō yōkaikai: “Ifo, ĵē afeskatromē Nios fe ĩpaxakī?” ixō yōkaito, ²⁶ Jesús kemani: “Akka, ĵa Moisés keneni ano anexō mī ōimismamē afaa ikamākī?” faito, ²⁷ a Moisés keneni tāpiato kemani iskafakī: “Nōko Ifo Nios noikōikāfe nōko ōitifoyaxō nōko yōshi sharafoyaxori nōko kerex sharafoyaxō nōko māpori shināsharakōikāfe, askatari a mia chaima nikari noisharafe a māia mī noimeai keskafakī ixō Moisés keneni,” faito, ²⁸ Jesús kemani: “Mī ea kemasharakōia, mī askafai mī Nios fe ĩpaxatiro,” ixō Jesús yoini.

²⁹ Akka nā Moisés keneni ato tāpimamisto shināni, mī isharakōimisra ea Jesús fanōra ixō. Nāskaxō Jesús yōkani: “Akka, ĵtsoamē ea chaima nika?” faito, ³⁰ Jesús yoini: “Ē mia yoinō mī tāpinō. Feronāfake fisti Jerusalén anoax Jericó ari fāi kaito, yometsofāfe achikaxō rapati fīanifo. Nāskakē seteketsakata nasharakēma fai kesemē rātafainifo. ³¹ Nāskano nā ato Nios kīfixomisri nā fai fistichi kani. Akka kakī ōia fai kesemē rakakē ōifikī tanafainima. ³² Nāskano feronāfake fetsa levita arifi okī ōia rakakē ōini, nāatori kakī finōfaini. ³³ Akka feronāfake fisti Samāria anoax nā fai fistichi akairi chipo kakī, mā fichixō aō noikōikī shinākōini. ³⁴ Nāskata akiki kaxō, a āfe tsefefe ano xini yafi uva ene osixō aō tereaki fetsani. Nāskaxō taxta fakī fetsaxō, āfe kamayo kamaki tsaoinīfōfā iyoni, pexe mēraxō kexeshiyoni. ³⁵ Nāskata pena fetsa nā feronāfake samāritanō āfe kori exe rafe tsekaxō nā pexe ifo kopifani iskafakī yoianā: ‘Na feronāfake ea kexexōfe. Mī kexesharakē ē mia anā kopifaiyoxikai,’ ixō yoini. ³⁶ Akka na feronāfake tresnoa ē mia yoipai. Akka, ĵfato aō noikōinimē na feronāfake omiskōiai, a noko chaima nika nō noitiro keskafakī?” ixō yoikaito, ³⁷ a Moisés keneni tāpiato kemani iskafakī: “Nā noikōiaito akiki kaxō sharafani,” ixō yoiaito, Jesús iskafani: “Mīri ato noikī askafafe,” fani.

Marta feta María pexe ano Jesús kani

³⁸ Nāskata Jesús fāi kai pexe rasi mēra nokoni, nāno kēro āfe ane Marta ika ini nāato āfe pexe ano ifini. ³⁹ Akka nā Marta āfe chiko fistiya ini, āfe ane María. Nā María Jesús nāmā tsaoni a Jesús yoiai keskara nikakōixikī. ⁴⁰ Akka

Martakai nikanima. Pīchani Jesús pimapaikī. Nāskakē Jesúski kaxō yoini: “Ifo, ¿ea mīa shināimamē eres fisti ē pīchai ēfe chikokai efeta akima? Ea yoixōfe efeta anō,” faito, ⁴¹ akka Jesús kemani: “Marta, mī fekaxtei afarafo shināi. ⁴² Akka nā sharafinakōia Marīa nikakōisharai. Nāskakē ēfe meka shara nikaito tsōa xītitiroma,” ixō Jesús yoini.

11

*“Epa Nios kīfikī iskafakāfe,” ixō Jesús ato yoini
(Mt. 6.9-15; 7.7-11)*

¹ Pena fetsa Jesús Apa Nios kīfini. Mā kīfikī xateano aōxō tāpimis fistichi yōkani: “Ifo, afeskaxō Epa Nios nō kīfitiromakī noko tāpimafe, Juan aōxō tāpimisfo tāpimani keskafakī,” faito,

² Jesús yoini: “Akka mā kīfikī iskafatiro:

Epa Niosi, mī fisti sharafinakōia. Keyokōichi mia Ifofanōfo mī āto xanīfo finakōia inō ato ikisharakōipakexakī. ³ Nā pena tii a nō piai noko ināfafāife nō afaa yopayamanō. ⁴ A noko chakafaifo nō ato raefa keskafakī nōko chakari noko soaxōfe. Satanás noko afara chakafamapaifaito nokoki kematimafafe, ixō kīfikāfe,” Jesús ato fani.

⁵ Nāskafata anā Jesús ato yoini: “Ōitsai, fatora mā fetsa mā yamayano, mato yama yamenakē kafanaino mātō pexe ano kaxō mato yoikī iskafaino: ‘Yamā, tres faxō ea yoa ināpe. ⁶ Mā ēfe yama rama noi kiki chai inoax ēfe pexe ano, ē afaayamaki afaa ē pimatirodaki,’ ixō mato yōkaito, ⁷ kemakī mātō pexe mēraxō mā iskafatiroma: ‘Ea fekaxtefayamafe. Ēfe pexe fepoti fetaoxikakī ēfe fakefo fe ē oxaki. Finixō ē mia afaa inātiroma,’ ixō mā yoitiroma. ⁸ Ē mato yoi, fininākafe afara āfe yama inākasafikī inātiro fekaxtefaito nā fichipaiyai tii.

⁹ “Nāskakē ē mato yoi, afara fichipaikī Epa Nios yōkakāfe mato ināi kiki. Fena fenakākīma manakāfe nā Epa Niospa mato ināitīa. Nāskakē Epa Nios kīfifafāikāfe mā kīfifaito mato ināi kiki. ¹⁰ Akka nā yōkai Epa Niospa afara shara ināxii. Nāskarifiakī fētsa afara shara fenaito Epa Niospa fichimatiro. Nāskarifiakī fētsa Epa Nios kīfifaito ināsharakōixii.

¹¹ “Akka, ¿fatora fētsa mā āto epaxō mātō fakefo mā rono ato inātiromē mato foe yōkaito? Maa. Mākai mātō fake mā askafatiroma. ¹² Mātō fake mato takaranā too yōkaito, ¿nifo mā inātiromē? Maa. Mākai mātō fake mā askafatiroma. ¹³ Akka, mā chakafixō mātō fakefo kexesharaxō afara sharafo mā ato inātiro. Nāskarifiakī Epa Nios nai mēra ikato āfe Yōshi Shara mato ināsharakōixii mā yōkaito,” Jesús ato fani.

*Yora fetsafāfe, “Jesús niafakaōxō ato sharafaira,” fanifo
(Mt. 12.22-30; Mr. 3.20-27)*

¹⁴ Nāskata Jesús niafaka yōshi chaka potani feronāfake makinoa mekamamismano. Mā a makinoax niafaka tsekeano, nā mekamisma mekainīkafani. Mā mekaito ōikani, “¡Keel! Ōikapo, mā mekai,” yorafo iki fetsenifo. ¹⁵ Akka atirifāfe yoinifo iskafakakī: “Na Jesús nā niafaka chakafāfe āto xanīfoōxō nā Beelzebúxō* ato makinoa niafaka yōshi chakafo potai,” ikanax yoinānifo.

¹⁶ Fetsafāferi chakafamapai kakī yoinifo iskafakakī: “Nios feta nai mēraxō afara fetsafo noko ōimafe,” faifono, ¹⁷ akka Jesús tāpini a shināifo keskara. Nāskaxō ato yoini: “Keyokōi mai tio anoax āa ranā retenākani keyotirofo.

* **11:15** Satanás āfe ane fetsa Beelzebú.

Nāskarifiāi peXe fisti mēra ikanax āa ranā noikaspa faatanākani paxkanātirofo anā ano fistikai tsoa itiroma. ¹⁸ Nāskarifiākī Satanās āfe yōshi chakafo potaxō anā afaa afeskafatiroma. Akka āfe yono keyoano anā āfe yōshi chaka afe itiroma. Nā ē mato yoi, akka mā yoikī iskafai: ‘Satanās yōshi chakaōxō niafaka potai,’ mā ea fai. ¹⁹ Akka askafiano, akka, ¿tsōa āfe shara mātō inafō ināno niafaka chakafo potamisfomē? Nāskakē atoōxō mā tāpitiro akka mā eōnoa shināsharamisma. Akka Niosxō mātō inafāfe niafaka potamisfo. ²⁰ Akka ē niafaka yōshi chakafo potatiro Niospa Yōshi Sharaōxō ato makinoa. Nāskakē mā tāpitiro a Niospa atoki nīchiai mā nokoano. Nāskakē yorafāfe ea Ifofasharakōixikani.

²¹ “Akka feronāfake mitsisipakōichi marayaxō āfe peXe kexekōiano tsōa āfe afaa fīatiroma. ²² Akka fetsa nā mitsisipa finakōia oxō achixō metexkere axō āfe afarafo fīaitokai anā afeskafatiroma. Nāskax paxkanāi fetsetirofo.

²³ “Akka fetsa efe rafekaspakī ea chakafai. Nāskakē nāfāfe fetsafo ea Ifofamakaspakani ato paxkanā fakani Epa Nios Ifofayamanōfo,” ixō Jesús ato yoini.

*Anā niafaka chaka yoraki nanetiro
(Mt. 12.43-45)*

²⁴ Anā Jesús ato yoini iskafakī: “Ē mato yoinō mā tāpinō. Niafaka chaka feronāfake makinoax tsekeax tsōa istoma ano kafāsatiro anoxō tenepai. Akka anoxō tsoa fichiamax niafaka chakata anā shinātiro iskakī: ‘A ē anoax tsekeita ano anā kapa,’ ixō shinātiro. ²⁵ Mā kaxō ōia nā feronāfake nā peXe xaki mēra mātosomea keskara sharakōi ōitiro itipinīsharakōia. ²⁶ Nāskakē nā nīafaka afe niafaka siete efetiro nā chakafinakōiafo, nāfo nā feronāfake mēra iki fetsenō. Nāskakē nā feronāfake chakafinakōia itiro a iyopaoni keskarama.”

Niospa meka nikakani inimasharakōitirofo

²⁷ Nāskata Jesús anori ato yoiaino kēro fistichi yorafā rasi mēraxō fāsikōi yoini iskafakī: “Mī efa mikiki inimakōi mia fake fixō mī yome pishtakē mia chocho amayanāmāi mia pexkoax,” ixō fāsikōi yoiaito, ²⁸ Jesús kemani: “Akka nā Niospa meka nikasharakōiai nāfi inimai finasharakōi kiki,” ato fani.

*Yora chakafāfe Jesús yōkanifo: “Tsōa atiroma keskara noko ispafe nō mia chanīmara fanō,” ixō yōkanifo
(Mt. 12.38-42; Mr. 8.12)*

²⁹ Yorafā rasi Jesúski feafono anā ato yoini iskafakī: “Na keyokōi yorafo chakakōifo. Tsōa atiroma keskafakī ē afara afeskarafanō ōipaikani ea Niospa nīchiamākī tāpixonakī. Akka a keskara ōipaifakī ōikanima. Nā Jonás ini keskara fisti ōixikani. ³⁰ Akka Epa Niospa Jonás Nínive peXe rasi ano nīchini āfe meka shara ato tāpimatanō Epa Nios Ifofanōfo mā āto chaka xatekaxō. Nāskarifiākī Epa Niospa ea nīchia na yorafā rasi āfe meka shara ē ato tāpimanō. ³¹ ¿Mā shināimamē nā kēro xanīfo chai inoax kani Salomón tāpisharakōiano nikaikai? Akka mā kai ea nikamisma ē Salomón finōkōifiano nono efe ifi-axō. Akka nā Niospa yorafo keyokōi ichanāfaitīa ato yoipakexii fatofō afe ipanakafomakī, fatofori a omiskōipakenakafo mēra fokanimākai. Nāskaifono nā kēro xanīfo Salomón nikaikai chai inoax kanito mato yoikī iskafaxii: ‘Mā chakakōifo mā Jesús nikakaspamis,’ ixō mato yoixii. ³² ¿Mā shināimamē nā Nínive anoafāfe Jonás Niospa meka ato yoiaito anā Nios nikakōinifo? Akka mā kai ea nikamisma ē Jonás finōkōifiano nono efe ifi-axō. Akka nā Niospa yorafo keyokōi ichanāfaitīa ato yoipakexii fatofō afe ipanakafomākī, fatofori a omiskōipakenakafo mēra fokanimākai. Nāskaifono nā Nínive ano ipaonifāfe

mã äto chaka xatekaxõ mato yoikĩ iskafaxikani: ‘Mã chakakõifo mã Jesús nikakaspamis,’ ixõ mato yoixikani,” Jesús ato fani.

“Nõko õiti sharakẽ nõ shinãsharakõitiro. Akka nõko õiti chakakẽ nõ shinãsharatiroma,” ixõ Jesús ato yoini

(Mt. 5.15; 6.22-23)

³³ Anã Jesús ato yoini iskafakĩ: “Akka tsõa rãpari otaxõ tsõa istoma tsãotiro. Askatari tsõa kesho fepotiroma. Askatamaroko fomãkĩa tsãotiromo chai chaxasharakõikẽ a mẽra ikiaifãfe õinõfo. ³⁴ Akka mãto afama mĩshtifo noikĩ mã shinãfafãini. Akka nõko fero rafeta nã rãparinĩ chai chaxai keskarakẽ, nõko yora shara itiro. Nãskarifiãni nõko fero sharano nõ xafakĩa õisharatiroma. Nãskatari nõ isharakõitiro. Akka nõko fero chakakẽ nõ õisharatiroma, fakishkõi itiro. ³⁵ Akka õisharakãfe mã Epa Nios shinãni xafakĩa ifiaxõ ãfe meka kachikiri faxõ mã anã shinãsharatiromaki, fakish keskara mã itiro. ³⁶ Akka mã xafakĩa isharakõiano, mãto õiti mẽra oa fakish keskara itiro. Mã xafakĩa shinãsharakõitiro rãpari otaxõ mato xafakĩa chaxa keskara shara mã itiro,” Jesús ato fani.

Jesús ato yõani fariseofoya a Moisés yoini keskara ato tãpimamisfo

(Mt. 23.1-36; Mr. 12.38-40; Lc. 20.45-47)

³⁷ Mã Jesús ato yoikĩ xateano fariseo fistichi iyoni ãfe pexe ano pikĩxikĩ. Nãskakẽ Jesús ãfe pexe mẽra ikikainax mĩsa ano tsaoni. ³⁸ Akka nã fariseo shinãni Jesús mechokomeyamaito äto xinifãfe yoipaonifo keskai. Akka taeyoi mechokomepaonifo, chipo pixikakĩ. ³⁹ Akka nõko Ifãfe Jesús mã tãpixõ yoini askara shinãito: “Mã fariseofo mechokomesharafxõ, akka mãto shinã mẽraxõ afara sharafo mã shinãima. Yora fetsafo mã noima, afara fetsa fetsatapafo noikĩ mãto shinã mẽraxõ afara chakafo mato mẽra fospikõia. ⁴⁰ Akka mã anorima shinãmis. ¿Mã tãpimamẽ tsõa nõko yora femãkĩa onifata, nõko õiti mẽrari onifanimẽ? ⁴¹ Nãskaxõ a yora afaamaisfo afara ato inãkãfe. Mã askafakĩ yorafo mã õimatiro mãto õitinĩ mã Nios shinãkĩ. Nãskax mã isharakõitiro, Nios matoki inimanõ. Nãskaxõ a Niospa mato amapaiyai keskara mã atiro.

⁴² “¡Ooa, fariseofãfe! Mãto afarafo atiri mã Nios inãmis. Mãto fanafori atiri mã inãmis. Askafxõ mã fetsafo mã ato shinãmisma, askatari mã ato sharafamisma. Askatari mã Nios noikõiama. Akka nã mãto fanafo mã Nios inãmis keskafakĩ fetsafori noikõikãfe Niosri noikõiyã.

⁴³ “¡Ooa, fariseofãfe! Ichanãti pexe anoax tsaoti sharakõi ano mã tsaopaimis noko õisharanõfora ikax. Askatari yorafãfe noko finõkakĩ noko yoikõisharanõfora ikax.

⁴⁴ “¡Ooa! Mãfi nã yora naa keskarafokĩ. Nã yora maia ano kaxõ nõ pisi xetetiroma keskarafõ mã oke mẽra pisifiano. Nãskarifiãkĩ mãto õiti chakafiano mato õikakĩ sharara mato famisfo,” ixõ fariseofo Jesús yoini.

⁴⁵ Jesús ato askafaito, a Moisés yoikĩ kirika keneni keskara ato tãpimamisto kemani iskafakĩ: “Maestro, anori mĩ yoikĩ nokori mĩ ìchayanã yoi,” feito, ⁴⁶ akka Jesús yoini: “¡Ooa a Moisés yoikĩ kirika keneni keskara ato tãpimamisfãfe! Akka mãto kaifõfo yoikĩ mã iskafamis: ‘Moisés keneni keskara nikakõikãfe,’ ixõ mã ato yoifikĩ akka mãri nikasharakõimisma. Askatamaroko a Moisés yoini keskara finõmainĩfofã mã ato yoimis mato nikakanax askanõfo. Nã mã ato yoiai keskara apaifikakĩ tsõa atiroma. Akka mãri mã ato afaa axomisma.

⁴⁷ “¡Ooa! Mãfi nã Niospa meka yoimisfo maiafo anoxõ mã afarafo onifamiski ato shinãxikĩ. Akka nãfo mãto xinifãfe retepaonifo. ⁴⁸ Akka mã mã nikakĩ tãpikõia a mãto xinifãfe apaonifo keskara. Akka mãto xinifãfe ato retepaonifo. Akka a maiafo anoxõ mã afarafo onifamis yorafãfe õinõfo. Nãskarafo mã

ato õimani nã mãto xinifãfe aponifo keskara, mãri ato fe ixõ mã ato feta askafakerana.

⁴⁹ “Nãskakẽ Niospa atoõnoa tãpixõ iskafakĩ yoini: ‘A ãfe meka yoimisfo yafi eõxõ yonomisfo fetsa ã ato nĩchixii. Akka ranãri ato reteyanã ranãri ato omiskõimakani.’ ⁵⁰⁻⁵¹ Nãskakẽ na yorafo iskaratĩa niyoafo Niospa ato omiskõimaxii atoõxõ. Nã Niospa mai onifaki taefanitĩa Abel sharaiano ãfe õchi reteni. Nãskatari xinia fetsa finõmata a Niospa meka yoimisfo ato retepaonifo. Nãskata chipokõi fakakĩ Zacarĩasri retenifo. Nã Nios kĩfiti pexefã chaimashtaxõ koati mĩsamãfã nakirafexõ retenifo. Akka ã mato yoi na yorafo iskaratĩa niyoafo Niospa ato omiskõimaxii atoõxõ.

⁵² “¡Ooa a Moisés yoikĩ kirika keneni keskara ato tãpimamisfãfe! Niospa meka shara oa onea keskara mã faa yorafãfe tãpinõfoma. Mãkai Niospa meka tãpisharama. Nãskaxõ fetsafãfe nikapaifiaifono mã ato nikatimafai. Nãskakẽ Niospa mato omiskõimakĩ finakõixii,” ixõ Jesús ato yoini.

⁵³ Ato Jesús askafakĩ yoiaino, a Moisés yoikĩ kirika keneni keskara ato tãpimamisfo fe fariseofo akiki õitifishkiki finakõinifo. Nãskakaxõ fekaxtefayanã afara ichapakõi yõkanifo, ⁵⁴ afara ato yoiaino nĩkaxõ yõaxikakĩ. Nãskakaxõ yõkanifo xanĩfofo yoipaikakĩ.

12

Jesús ato yoikĩ iskafani: “Ato feparapaimis iyamakãfe,” ixõ ato yoini (Mt. 10.26-27)

¹ Nãskakẽ yorafã rasi akiki fekanax ichanãnifo. Shoiki fetsenifo yora ichapakõi mãiyakanax. Nãskakẽ Jesús aõxõ tãpimisfo yoikĩ taefani, ato iskafakĩ: “Õisharakãfe fariseofãfe nafo sharafora noko fanõfora ikaxõ mato anorima yoimapaikani kiki sharafoyamafikaxõ. Nãfo feparamitsapaimisfokĩ. Nãskakẽ mãri ato keskara iyamakãfe.

² “Akka nã afara one yoifimisfono Niospa ato xafakĩa kãimaxoxii, afarari fomãpaimisfono nãfori Niospa ato xafakĩa kãimaxoxii.

³ “Nãskakẽ a yora fetsafo fomãfai ares shinãmisfo, nãfori Niospa xafakĩa faxii. Nã peke kene mẽraxõ peke fepoti tserexõ afara one yoimisfori, nãfori Niospa peke kachiori ato xafakĩa kãimaxoxii keyokõichi tãpinõfo,” ixõ Jesús ato yoini.

Akka Nios fistiki nõ mesetiro (Mt. 10.26-31)

⁴ Anã Jesús ato yoini iskafakĩ: “Efe yorafãfe, ã mato yoi. Mato retepaifiaifono rateyamakãfe. Akka mãto yora nafaino mãto fero mẽsho naima kiki. ⁵ Akka ã mato yoi, tsoaki mã mesetiro, atoki mesetamaroko Nios fistiki mesekãfe. Nãato noko retexõ nõko fero mẽsho nã omiskõipakenakafo mẽra potatiroki. Nãskakẽ akiki mesekãfe.

⁶ “Akka ã mato yoi mã tãpinõ. Na cinco peya mĩshtifo minixõ mã kori ichapa fiima. ãfe exe rafes mã fii. Askatamaroko Niospa keyokõi peya mĩshtifo noi. Atokai shinãmakĩnakama. Peya mĩshtifo afaamafiakẽ Niospa ato noi. Keyokõi Niospa ato shinãpakenaka. ⁷ Akka ã mato yoi, Epa Niospa mãto foo fisti rasi mato tãpikakõia. Nãskakẽ rateyamakãfe. Nã peya mĩshtifo kexesharamis keskafakĩ matori Epa Niospa kexesharakĩ finakõiakĩ,” ixõ Jesús ato yoini.

Akka atiri yorafãfe, “Jesús ãfe Ifora,” ea famisfo yorafãfe ferotaifi. Akka atirifãferi, “Jesús ãfe Ifomara,” ea famisfo (Mt. 10.32-33; 12.32; 10.19-20)

⁸ Anã Jesús ato yoini iskafakĩ: “Akka ã mato yoi yorafãfe ferotaifi, ‘Jesús ãfe Ifora,’ ea faifono, ãri, ‘Nafu efe yorafo,’ ã ato faxii Epa Niospa ãfe ãjirifãfe

ferotaifi. ⁹ Akka nã yorafãfe ferotaifi, 'Jesús êfe Ifomara,' ea faifono, êri Niospa ãfe ãjirifãfe ferotaifi, 'Nafo efe yorafomara,' ê ato faxii.

¹⁰ "Akka Niospa Fake chakafakĩ mekafaifono Niospa ato chaka soaxotiro. Akka Epa Niospa ãfe Yõshi Shara chakafakĩ mekafaifono Epa Niospa ato chaka soaxonakama.

¹¹ "Nãskata ichanãti pexefo ano mato iyoaifono, askayamakĩ xanĩfofo ano mato iyoaifono, shinãchakayamakãfe afeskaxõ mã ato kemaimãkai afaa mã ato faimãkai. Epa Niospa mato shinãmasharai kiki. ¹² Akka a mato chakafakĩ mekafaifono Epa Niospa Yõshi Sharapa mato shinãmasharaino mã ato kemasharai," ixõ Jesús ato yoini.

Yora afama mĩshti ichapayax mesekõixii

¹³ Nãnoa fẽtsa Jesús yoini: "Ifo, êfe ochi ea yoixõfe ãfe afama mĩshtifo ea paxkaxonõ," faito, ¹⁴ Jesús kemani: "Efe yorashta, tsõakai ea nĩchima ã ato yoinõ ãto afama mĩshti paxkanãnofo," ixõ yoita. ¹⁵ Nãskaxõ anã yoini: "Mã kexemesharakãfe afarafo ato fichipaiyamakãfe, ayafixõ finõmafãi fipaiyamakãfe. Nã nõ yopaifo shinãyamakãfe, afama mĩshtiõnoaxkai nõ isharatiromaki. Nõko afama mĩshtifãfekai nõko õiti noko inimamaxotiromaki," ixõ Jesús ato yoini.

¹⁶ Nãskaxõ anã meka fetsafaxõ ato yoini: "Feronãfake fetsa afama mĩshti ichapaya ini. Æfe tare ano yonosharaxõ afama mĩshti fanano ichapakõi ini. ¹⁷ Nãskakẽ nã feronãfake afama mĩshti ichapayato iskafakĩ shinãni: '¿Êfe yonofõ ã afeskafaimẽ? Fanĩkai êfe yonofõ ã fatiroma,' ixõ shinãni. ¹⁸ Nãskaxõ anã shinãni: 'Êje, mẽ shinã ã afeskafaimãkai. Nã ã ano afama mĩshtifo famis êfe pexe nasaxõ anã efapafai, nãno êfe fana fimifo mekexiki êfe afama mĩshtifoya. ¹⁹ Nãskaxõ êfe shinãmã ã shinãni iskafakĩ: "Nẽ afama mĩshti mekekõia nã xiniai tii rakakõikai pixiki, ayayanã inimasharakõiyana."'

²⁰ "Nãskaito Niospa iskafakĩ yoini: 'Mĩkai afaa tãpiama. A na fakishi mĩ nai, akka, ¿na mĩ mekeafõ tsoanã ikimẽ?' fani. ²¹ Nãskariatiro a yora afama mĩshti ichapaya ikatsaxakĩ Nios shinãtama. Akka Niospa õiaino anã afaya itiroma," ato fani Jesús.

"Epa Niospa ãfe fakefo kexesharamis," ixõ Jesús ato yoini (Mt. 6.25-34)

²² Nãskata chipo Jesús aõxõ tãpimisfo yoini iskafakĩ: "Ê anã mato yoisharanõ. Ea nikasharakãfe. Shinãchakayamakãfe. ²³ Akka a nõ piaitokai noko imasharatiroma. Askatari a nõ safeatori nõko yora noko imasharaxotiroma. ²⁴ Shinãkapo. Nã peyafãfekai afaa fanamisfoma, afarikai topimisfoma. Askatari afari mekemisfoma. Nãskafekẽ Epa Niospa ato pimamis. Akka Niospa nã peyafõ finõmainĩfofã matoroko kexesharakõimis. ²⁵ Nãskakẽ, ¿afeskakĩ mã shinãchakaimẽ? A nõ shinãchakaitokai pena fisti noko anã nimatiroma. ²⁶ Akka afaa shinãyamakãfe. A nõ shinãitokai noko nimatiroma. Nãskakẽ afaa shinãyamakãfe.

²⁷ "Akka shinãkapo afeskax charofo foaikamakĩ. Na charofãfe yonokanima. Askatari xapo toro atirofoma rapati faxikakĩ. Nãskakẽ ã mato yoi, na charofo sharafiano xanĩfo Salomón rapati sharafinakõi safefixõ na charofo finõama. ²⁸ Akka Niospa nafefõ shara mĩshti onifasharafiano nõ sepakĩ xateano natiro. Nãskaxõ nõ koofatiro. Akka charofo finõmainĩfofã Niospa mato noikĩ mato rapati shara safematiro, mato kexesharaxõ. Akka mã shinãchakakĩ mã Nios chanĩmara fasharaima. ²⁹ Nãskakẽ shinãkĩ iskafayamakãfe: 'Ooa, ã afaa piimẽti a ã piai keyoano, askatari ã afaa ayaima,' ixõ shinãyamakãfe. ³⁰ Akka nã Nios Ifofaifãfema iskara shinãmisfo. A piai fisti shinãkata, a safepaiyaifori

shināmisfo. Akka Epa Niospa mā mato tāpia afarafo mā yopaito. ³¹ Nāskakē māroko Nios xanīfoōnoa shināfafāikāfe. Mā askaito afara shara Niospa mato ināxii kiki,” ixō Jesús ato yoini.

“Epa Nios ika anoxō afara sharakōifo mato mekexona,” ixō Jesús ato yoini (Mt. 6.19-21)

³² Anā Jesús ato yoini iskafakī: “Efe yorafāfe, rateyamakāfe, Epa Niospa mato kexesharaikiki. Akka Epa Niospa āfe afama mīshti mato ināsharai inimakōikai mato ināsharai. ³³ Māto afama mīshtifo minixō kori fiyokāfe. A yora afaamaisfo ato ināxikakī. Mā askaino Niospa nā ika anoxō mato afama mīshti mekexona. Nāfokai keyonakama, tsoarikai yometsotiroma. Askatari nakaxari mato pīatiroma, Epa Niospamāi mato mekexonano. ³⁴ Akka māto afama mīshti shinākī nā fisti mā shināi. Akka mā Nios fisti shinākī nā fistiri mā shinākōitiro māmāi noikōikī. Nāskax mā afe isharapakexatiro,” ixō Jesús ato yoini.

Īkisi itipinīsharakāfe

³⁵ Anā Jesús ato yoini iskafakī: “Nāskakē itipinīsharakāfe māto rapati safe-sharakōita māto rāpariri ōtasharakōikāfe. ³⁶ Nā āfe ifo yonoxomisto āfe ifo manatiro keskakāfe pexe fetsa ari kaax, āfiyatani oaino. Mā nokoaito āfe fepoti koshi fepexoxiki, mā nokoxō fepoti ramātoshiaino. ³⁷ Nāskaifono āto ifo atoki inimasharakōitiro, manasharakōiaifono. Akka ē mato yoikōi āto ifāfe mīsa ano ato tsāotiro atoki inimayanā. Nāskaxō ato pimatiro atoki inimasharakōiyanā. ³⁸ Nāskakē inimasharakōitirofo āto ifomāi manasharakōikanax, yamenake kafanaino nokoaino, askayamai penanaki kafanaino nokoainori akiki inimasharakōitirofo. ³⁹ Nāskakē māri nā keskara tāpisharakāfe. Akka pexe ifāfe mā tāpixō afetiā yometso nokoimākai ixō āfe pexe itipinīshara fatiro, a mēra ikiāx yometsoyamanō. ⁴⁰ Nāskarifiāi māri itipinīsharakāfe. Akka oimara ixō mā ea manayamaino ē matoki nokorisatani,” ixō Jesús ato yoini.

Ina shara yafi ina chakaōnoa Jesús yoini (Mt. 24.45-51)

⁴¹ Nāskaito Pedro yōkani: “Ifo, ĵnoko fisti meka fetsafaxō mī yoiamē, askayamakī keyokōi mī noko yoiamē?” ixō Pedro yoikaito, ⁴² Jesús kemani: “Mā tāpinō ē mato yoi afe keskaramākī ina shara āfe xanīfāfe āfe afama mīshti kexemafaini mai fetsa ari kakī nā āfe pexe anoāfo ato kexesharaxonō ato pimasharayanā, nā āfe xanīfo fena oyamaino. ⁴³ Mā mai fetsa ari katani oxō ōitoshini a yonoxomisto mā yonoxosharakōiano. Nāskakē akiki inimakōini a yonoxomisri inimakōini māmāi yonoxosharakōiax. ⁴⁴ Ē mato pāraima. Nāskaxō āfe xanīfāfe mā xanīfo imaxō āfe afama mīshti kexexonō inātiro. ⁴⁵ Akka nā āfe xanīfo yonoxomisto, ‘Ēfe xanīfo fena oimara,’ ixō shinākī, a yonoxomis fetsafo sēteketsani, kērofoya. Nā pāemisfo fe rafexō ato feta piyanā, askatari ato feta ayayanā, askatari ato fe pāeyanā. ⁴⁶ Iskaratīa ēfe xanīfo oimara ixō manayamaino, nā pena fistichi āfe xanīfo nokofiaino mā nokoxō a yonoxomis omiskōimatiro, nā yora chakafo fomisfo mēra potakī.

⁴⁷ “Akka a yonoxomisto mā tāpia āfe ifāfe fichipaiyai keskara, nāskakē mā tāpifiāx itipinīsharama, nāskakēri nikasharaima, nāskakē āfe ifāfe omiskōimayanā koshaketsatiro. ⁴⁸ Akka a yonoxomis fētsa āfe ifāfe yoia keskara tāpixoma afara chakafakē āfe ifāfe omiskōimafiakī, omiskōimasharanima. Nāskarifiakī Niospa fetsa ichapa tāpimaxō ichapari yōkaxii. Iskafakī a ē mia yoia keskafakī, ĵfetsafo mā mī ato tāpimasharamē? ixō yōkaxii. Akka fetsafo tāpimasharamano Niospa omiskōimakī tāpimaxii,” ixō Jesús ato yoini.

“Akka atirifāfe ea chanīmara faifono, atirifāferi ea chanīmara fakanima,” ixō Jesús ato yoini

(Mt. 10.34-36)

⁴⁹ Anā Jesús ato yoini iskafakī: “Ē keyokōi maifo tii anoa āto chaka xatemanioyi ē oa. Atirifāfe ea chanīmara faifono, fetsafāferi ea chanīmara fakanima. Nā chanīmara faamafo Niospa ato omiskōimaxii. Ēfe Epa Niospa ea mai ano yonomanai keskara iskaratīa keyokōi shara ikerana. ⁵⁰ Akka matōnoax naxii ē oni. Akka ē nayoamax ē omiskōixii. Nāskakē ē omiskōifinakōita ē naxii. ⁵¹ Akka, ¿mā shināimē ē oni nono mai anoax eōnoax inimanōfo? Maa. Askarakaima. Akka ē mato yoi nā ea chanīmara faafāfe shara shināifono, akka a ea chanīmara faafāfema shara shinākanima, afara chaka shinākani. ⁵² Akka iskaratīa nā peXe fisti mēra cinco yorafo ikaxō anorisfo shinākanima, paxkanātirofo. Trespato nā rafe noikaspafono, nā rafetari nā tres noikaspatirofo. ⁵³ Apa āfe fake noikaspaino āfe fakefāferi āfe apa noikaspatiro. Āfe āfari āfe fake xotofake noikaspaino āfe fake xotofākeri āfe afa noikaspatiro. Askatari āfe fāfa yōxafāfe āfe fāfa naetafa noikaspaino āfe fāfa naetafari āfe fāfa yōxafo noikaspatiro.”

Nai foiskī nō tāpitiro

(Mt. 16.1-4; Mr. 8.11-13)

⁵⁴ Nāskata Jesús yorafo yoini iskafakī: “Nai foiski nai kōi ōikī nai choshtakē oi feira mā faino oi itiro. ⁵⁵ Akka nā xini oaima anorinoax nēfefā oaino, mā xiniaira mā fatiro. Chanīma, nāskatiro. ⁵⁶ Akka mā kai afaa tāpiama, mā kōi mā kakamepaimis a mā yoi ai keskara mā yoifiki mā chanīmara famisma. Mā nai foiskī mā yois oi feira mā famis. Askara tāpifixo mā kai a Niospa mato yoi ai keskara mā chanīmara fapaima. Iskaratīa afara afeskarafaitokai mā tāpiama,” ixō Jesús ato yoini.

Fētsa mia chakafaito raefarisafafe

(Mt. 5.25-26)

⁵⁷ Anā Jesús ato yoini iskafakī: “Akka, ¿afeskakī mā shara shināimamē a sharafinakōia? ⁵⁸ Akka fētsa mato yoiki iskafaino: ‘Mī ea chakafaa. Ē xanīfo yoikai,’ ixō mato yoiaino, xanīfo ari kayoamano koshi raefakāfe. Akka mā askafayamaino nā xanīfāfe āfe sorarofa yoitiro nā sorarofāfe mato karaxa mēra ikimanōfo. ⁵⁹ Ē mato paraima. Fētsa mato karaxa mēra ikimanano mā fena tseketiroma. Akka nā mā nimia kopifatīa mā tseketiro,” ixō Jesús ato yoini.

13

Nōko chaka xatexō nā Jesús noko amapaiyai keskara fisti nō atiro

¹ Nāskaino yorafo Jesús ki fokaxō yoinifo iskafakī: “¿Mā mī tāpiamē na Pilato yorafo ato retemanita Galilea anoafu yoinā retexaxō Nios kīfiti pexefā mēraxō Epa Nios ināifono āto imifo yoinānā imifoya osita?” ixō yoinifo. ² Askafaiāfe Jesús ato yoini iskafakī: “¿Mā shināimē na Galilea anoax na feronāfakefo naitafo? ¿Yora chakakōifo keskarakanax āto kaifo keskarakanaxma chakafinakōiax naitafo ixō mā shināimē? ³ Maa. Askarama. Akka māri māto chaka xateyamaxō mā Nios Ifofayamax nā ikaifo keskai māri mā narisatiro mato reteafono. ⁴ ¿Akka mā shināimē nā feronāfake dieciochonoa atoki peXe keya āfe ane Siloé atoki pakeano nanifo? ¿Mā shināiraka: ‘Nāfo chakafinakōia nanifo Jerusalén anoafu keskaraxma,’ ixō mā shināimē? ⁵ Maa. Askarama. Chanīma ē mato yoi. Akka māto chaka mā xateyamaxō mā Nios Ifofayamax, māri mā omiskōipakenaka.”

Meka fetsafaxō higuera fimimaisnoa Jesús ato yoini

⁶ Jesús meka fetsafaxō ato yoini iskafakī: “Feronāfake fistichi āfe tarepa higuera fana ini. Nāskax ōikai kani mā fimiyamākī, kaxō ōini fimimais ini. ⁷ Nāskakē yoini a tare kexemis. ‘Ōipo mā tres xinia afiax na fana higuera fimiyama. Ē āfe fimi fichipaifiaino fimiyama. Ichakanō rerafe, ano fimi fetsa nō fananō,’ fani.

⁸ “Akka ifāfe askafaino a tare kexexomisto kemani: ‘Ifo, na xinia fisti manayofe. Ē a nāmā orosharata ē mai tatsispo sharayonō. ⁹ Ōitsai, ē askafaano fimisharatirokī. Akka fimiyamaito mī ea reramanō,’ ixō a tare kexemisto yoini.”

Jesús pena tenetitīa kēro petoko sharafani

¹⁰ Nāskano pena tenetitīa ichanāti pexe mēra kaxō Jesús ato yoini. ¹¹ Nānori kēro ini isinī itiani dieciocho xinia amis, niafaka chakata isinī imamis nā kēro sharamisma ini petoko itiani. ¹² Nānoa Jesús ōikī kenaxō yoini iskafakī: “Yōxafoshta, mā mī shara isinī itiyaniakī,” fani.

¹³ Nāskaxō āfe mēkemā ramāino, koshikōi nā kēro sharakōitani. Nāskaxō, “Epa Nios fāsi sharakōi,” nā kēromā fani. ¹⁴ Nāskakē Jesús pena tenetitīa kēro sharafaino, nā ichanāti pexe anoa xanīfo ōitifishkikī yorafo yoini iskafakī: “Seis nia nō yonotiro, akka na pena tenetitīa tsōa yonotiroma. Nāskakē seis nia otafe sharaxiki, akka na pena tenetitīa tsōa mato sharafatiroma,” xanīfāfe ato fani.

¹⁵ Askafaito nōko Ifo Jesús kemani iskafakī: “Mā kai afaa tāpiama, mā kōi mā kakapaimis, akka pena tenetitīari mā yonomis mato yoinā inafō mā tēpemis ato faka ayamanikakī. ¹⁶ Akka na kēro Abraham āfe fena Satanās chakata finitima famis isinī imayanā dieciocho xinia amamis. ¿Akka afeskakī na pena tenetitīa na kēro ē sharafatiromamē?” ixō Jesús ato yoini.

¹⁷ Nikakani a Jesús noikaspamisfo rāfipainifo. Akka yorafo inimakōinifo nā kēro Jesús sharafaito ōikani.

Mostaza exeōnoa yoikī meka fetsafaxō Jesús ato tāpimani
(Mt. 13.31-32; Mr. 4.30-32)

¹⁸ Nāskata Jesús anā ato yoini iskafakī: “Afe keskaramakī Nios xanīfāfe noko īkinā ē mato yoinō. Nikakapo iskarakī: ¹⁹ Oa mostaza exe feronāfake āfe tarepa fana keskarakī. Mā foaikax efapakōiax ifi tio itiro. Mā efepakōiano peyafāfe āfe pōyamā naa fatirofo. Nāskarifiakī mā taefakī fisti rasichi mā Epa Nios Ifofayotiro. Akka chipo ichapakōichi mā Epa Nios Ifofatiro,” ixō Jesús ato yoini.

Meka fetsafaxō pāa faraxika keskaraōnoa Jesús ato yoini
(Mt. 13.33)

²⁰ Afianā Jesús ato yoini: “Afe keskaramakī Nios xanīfāfe noko īkinā ē mato yoinō. ²¹ Nā kēromā pāa fakī levaduraya harina osixō kamosakano faraxitiro keskara. Nāskarifiakī nō ōitiroma. Yorafāfe Niospa meka āto shinā mēra naneafono nō ōiamafiaino āto ōiti fetsafakanax Nios keskara shara itirofo,” ixō Jesús ato yoini.

Fepoti pishtaōnoa Jesús ato yoini
(Mt. 7.13-14, 21-23)

²² Jerusalén ano fāi kakī, Jesús pexe rasi anoafō ato yoini a pexe rasi pasotai ikafo anoafori ato yoifoni. ²³ Ato askafaito fistichi yōkani: “Ifo, ¿fisti rasi Niospa ato ifimē?” faito Jesús kemani,

²⁴ “Pexe fepoti atsokē ikipaifkani tsoa ikitiroma. Akka ē mato yoi yora ichapakōi ikipaifkani ikitirofo. Nāskarifiāi ēfe Epa ika ano ikipaifkani

ikitirofoma. Nāskakē āfe meka tāpisharakāfe a mēra ikisharaxikakī. Akka yora ichapato ēfe Epa nikafikatsaxakakī, tsōa Ifofamax a ika ano ikipaifikani tsoa ikitiroma. ²⁵ Nāskakē pexe ifo fininākafe āfe pexe fepoti fepotiro. Nāskakē mā pexe emāiti nīxō mā kenakī iskafatiro: 'Ifo, noko fepoti fepexōfe,' mā faino mato kemakī iskafatiro: 'Ēkai mato ōimisma mākai efe yorama tiiri fakiranoax mā oa,' ixō mato yoitiro.

²⁶ "Nāskakē mā yoikī taefakī iskafaxii: 'Nō mefeta pita nō mefeta ayamis, askatari mī noko yoiaito nō nikamis,' mā faxii.

²⁷ "Mā askafaino mato kemakī iskafaxii: 'Mē mato yoi ē mato ōimisma fakiranoax mā oa. Emakinoax fotakāfe mā yora chakafo mato faxii.' ²⁸ Mato askafaino anoax mā oiayanā mā omiskōi fetsexii, Abrahamnō Isaacanō Jacobonō a Niospa meka yoimisfonō ato ōi Nios xanīfo ika anoa ato ōi. Nāskakē ato makinoa Niospa mato potaxii. ²⁹ Akka yorafo nā mai ano keyokōi ikanax fetsa fetsatapafo fexikani Nios xanīfo anoxō afe tsoaxō pixikakī. ³⁰ Nāskakē fetsafo iskaratīa Nios nikafikani afe rafeafoma, akka a chipo nikaifo Ifofakanax afo afe rafetirofo. Akka fetsafāfe nikakī taefafianixakakī Ifofakanamax a rama nikaifo keskarakanax afe ipaxatirofoma," ixō Jesús ato yoini.

Jesús Jerusalén anoafo ato shināi oiani
(Mt. 23.37-39)

³¹ Nāskata fariseofo Jesús ano fēkaxō yoinifo iskafakakī: "Nonoax katāfe Herodes mia retepai kiki," faifono,

³² Jesús ato kemani: "Fokaxō ea Herodes yoixotakāfe aato ato pāramiski. Ē fena nonoax kaimakai. Iskaratīa na yorafo sharafayanā penamari ē ato makinoa niafaka chakafo ē ato pōtaikai. A isinī ikaifori ē ato sharafapaikai. Mā ato askafakī keyota nā ē kapaiyai ari ē kaikai. ³³ Akka iskaratīa ē yonoyoi, pena fetsari ē yonoi, akka a Niospa meka ato yoimis Jerusalén makinoax na sharama.

³⁴ "iOoa Jerusalén ano ikafāfe! Māfi a Niospa meka yoimisfo mā ato retemiski. Askatari aōnoa āfe meka shara yoitanōfo Niospa mato ano nīchiafōri mā ato tokorinī tsakakī retemis. Oa takaranā āfe fakefo āfe pei nāmā onetiro keskafakī ē mato kexepaifaito mā ea nikakaspamis. Māfi ekeki omismakī ē mato īkipanā. ³⁵ Akka ōikapo, iskaratīa mato anā tsōa kexeima na mā imis anoa. Ē mato yoi anā mā ea ōima. Akka nā ē anā oiaitīa mā ea ōixii. Mā yoikī iskafaxii: 'Nafi Niospa nokoki nīchia fāsi sharafinakōia Epa Niospa na shara fapanaka,' ixō mā eōnoa yoixii," ixō Jesús ato yoini.

14

Jesús a isinī imis sharafani pōya rafe faraxita kishi raferi faraxikē

¹ Nāskakē pena tenetitīa Jesús kani nā fariseo xanīfāfe āfe pexe anoxō pikai. Akka nānoxō fariseo fetsafāfe ōinifo Jesús afaa afeska faimākai nō ōinō ikaxō. ² Nāskano nānori āfe ferotaifi feronāfake fisti isinī imis ini pōya rafeki faraxika ita kishi rafeki faraxika ini. ³ Nāskakē Jesús ato yōkani, a Moisés yoikī kirika kenenī keskara ato tāpimamisfoya fariseofo: "¿Na pena tenetitīa a isinī ikaifo nō ato sharafatiromē, askayamakī nō ato sharafatiromaraka?" ixō ato yōkaito, ⁴ akka tsōa tooxanima. Nāskakē Jesús a isinī ikai mētsoinīfōfā sharafani. Nāskaxō yoini: "Mā mī sharaki, katāfe," fani. ⁵ Nāskaxō fariseofo Jesús ato yoini iskafaki: "Akka, ¿fatora mā fētsa, mātō fake iyamāi mātō yoinā ina kini mēra pakeano mā koshi ifirisa fatiromamē pena tenetitīa?" ato faino, ⁶ tsōa kemanima.

Feronāfake āfiyaino fista ayanā pitirofoōnoa Jesús ato yoini

⁷ Nāskata Jesús ōini mā fēkaxō tsaoti sharakōi fikanax mīsa ano tsaofaifāfe. Nāskaifāfe ōikī Jesús meka fetsafaxō ato yoini iskafakī: ⁸ “Akka fētsa fista ayanā kēro fīkī mato kenano, tsaoti sharakōi ano tsaoyamakāfe. Akka mato keskarama nā feronāfake sharafinakōia pexe ifāfe kenano oax nā tsaoti sharakōi ano tsaotiroki. ⁹ Akka pexe ifāfe fetsa fe oxō mia yoikī iskafatiro: ‘Na feronāfake tsaoti ināfe,’ mia faino mī rāfikōiyānā kaax chikayakōi mī tsaotiro. ¹⁰ Akka askatamaroko mia fētsa kenamana kaax ori chikayakōi mī tsaoyotiro. Akka nā mia kenamanato mā oxō mia yoinō iskafakī: ‘Efe yorashta, na tsaoti sharakōi ano tsaoyofe,’ mia faino, nāskakē mī inimasharakōitiro yorafāfe ferotaifi a mefe mīsa ano tsaofafāfe mia ōiaifono. ¹¹ Akka fatora fētsa ato finōpaiyaito a keskara Niospa ato nāmā nīchitiro anā afaa inōma. Akka a shināi iskai: ‘Ēkai afama, ē fetsafo finōpaima, ē ato keskarama,’ ixō shināito Niospa fetsafo finōmainīfofā sharakōi nīchitiro,” ixō Jesús ato yoini.

¹² Ato askafata a ato pimairi Jesús yoini iskafakī: “Mī ato pimakī mī yamafoos ato pikīyamafe, mī extofoosri ato pikīyamafe, mī kaifoosri ato pikīyamafe, a mia chaima nikafori kori ichapayafari ato pikīyamafe. Akka afāferi kopikiri mia pikītirofo, nāskakē mā pimanāsharakōitiro. ¹³ Askatamaroko mī fista ayanā a yora afaamaisfoya a nipaikī ranāifo chātofoya a fēxofori ato pikīfe. ¹⁴ Nāskakē mī ato askafaax mī inimakōitiro. Akka afāfe mia kopifatirofoma, akka mī ato askafaito Niospa mia inimamasharaxii naax mī anā otokē,” ixō Jesús yoini.

Meka fetsafaxō Jesús ato yoini feronāfāke mā a piāi mā itipinīsharakōi faxō ato pimapaiyāiōnoa yoikī

(Mt. 22.1-10)

¹⁵ Ato askafaito nikakī fētsa a mīsa ano tsaoto Jesús yoini iskafakī: “Ifo, inimasharayanā Epa Nios xanīfāfe keyokōi yorafo ikināi anoax ato fe ikanax fāsi inimasharakōitirofo,” ixō yoiaito, ¹⁶ Jesús yoini iskafakī: “Feronāfake fistichi a piāi sharakōi faxō yora ichapa kenamani afeta pii fenōfo. ¹⁷ A piāi mā itipinīshara faxō a yonoxomis nīchini ato yoitanō iskafakī: ‘Kookāfe pixikakī. Mā ēfe xanīfāfe itipinīshara faki,’ ixō ato yoitanō.

¹⁸ “Ato askafaino, akka keyokōichi yoinifo iskafakakī: ‘Nō kayotiroma,’ ixō yoinifo. Akka a yoikī taefato yoini iskafakī: ‘Ē rama mai fiaki ē ōiyotanō. Ē mia yoikai ē mefe kayotiromaki,’ ixō yoini. ¹⁹ Fētsari yoikī iskafani: ‘Ē rama diez faxō fakka fiaki yonomaxii ē ōiyonō sharamakī. Nāskakē ē mefe kayoi kaimakai,’ ixō yoini. ²⁰ Fētsari yoikī iskafani: ‘Ē rama kēro fia. Ē mefe katiroma,’ ixō yoini.

²¹ “Nāskakē a yonoxomisto oxō nā yoiafo keskafakī āfe ifo yoini, a yonoxomisto yoiaito nikai ōitifishkikōini. Nāskakē afianā a yonoxomis yoikī iskafani: ‘Nā mī kapaiyai ari kaxō pexe rasi pasotainoa ato ifitāfe a afaamaisfoya, a nipaikī ranāifo ifita fēxofori ifita chatofori ifita ato fatāfe,’ ixō nīchini.

²² “Mā āfe ifāfe nīchia katani. Okī yoitoshini, iskafakī yoini: ‘Ifo, nā mīa yoia keskafakī mē ato yoitani. Akka mā fekani, mā fefiakanax mī pexe fospikanima,’ faito, ²³ afianā āfe ifāfe yoini iskafakī: ‘Na fāi kaxō ato yoirisafafe a chaima ikafoya, nāskaxō ato yoikī iskafafe: “Ēfe ifāfe pexe mēra ikikāfe afeta pixikakī,” ato fafe ēfe pexe fospikōinōfo. ²⁴ Akka ē mato yoi nā yorafo taefakī ē ato pimapaiyoa ēfe pexe anoxō efeta pinōfo akka afāfe anā efeta pinakafoma,’ ixō pexe ifāfe yoitiro,” ixō Jesús ato yoini.

Jesús Ifofai omiskōifikani isharakōitirofo

(Mt. 10.37-38)

²⁵ Yora ichapafāfe Jesús chīfaifono atokiri fesoakekafā ato yoini: ²⁶ “Fētsa ea Ifofapaikī ea noikī finakōitiro. Āfe apanō āfe afanō āfe āfinō āfe fakefonō āfe extonō āfe chikonō ato noifikī earoko noikī finakōiama, askatari āa anoi noimei ea noisharakōitama nāskakē a keskara eōxō tāpimis itiro. ²⁷ Akka ē cruznoax mato nāxoxii. Nāskakē ea tsōa yoikī iskafaima: ‘Iskaratīa ē Jesús Ifofai. Nāskakē ē nai omiskōifikī ē shināchakaima,’ ixō tsōa anori yoiaxma, nāskakē ēfe ina itirofoma.

²⁸ “Akka fatora fētsa mā pexe fapaikī ikisi mā shināyotiromamē afe tii xepa peimāki ōixiki aō pexe fakī mitoxiki. ²⁹ Akka mā pexe fapaikī mā xepa pei ichapama fixō mā mitotiroma. Nāskakē nā ōiaifāfe mato kaxemetsama fatirofo.

³⁰ “Mato iskafakī yoianā: ‘Kee, ōikapo, na feronāfāke pexe fafiakī akka pexe fakī mitoama.’ ³¹ Nāskarifiakī xanīfo fētsa afe xanīfo fetsa fe retenāpaikī shinātiro a diez mil soraroyato a veinte mil soraroya retetiromakī. ³² Nāskakē afe retenātiroma meekī, xanīfo fetsa oyoamano meka fomatiro iskafakī yoikī: ‘Nō retenāimakai, nō raenānō,’ ixō yoitiro. ³³ Nāskarifiiai fatora mā fetsa mātō afarafo mā potayamax ēfe ina mā itiroma,” ixō Jesús ato yoini.

*Akka tashi sharakēma nō pitiroma
(Mt. 5.13; Mr. 9.50)*

³⁴ Anā Jesús ato yoini iskafakī: “Akka shinākāpo. Tashi sharakē nō tsopeitiro. Akka tashi sharayamakē nō tsopeitiro, paispa chakakē. ³⁵ Askarakai tsōa fichipaima. Potatirofo. Nāskariakakī ea Ifofayamakakī ea tsōa Ifofasharakanima chakakōi ea fakani. Akka mā pachoyakī ea nikasharakāfe,” ixō Jesús ato yoini.

15

*Oveja fenoaōnoa Jesús meka fetsafaxō ato yoini
(Mt. 18.10-14)*

¹ Nāskakē nā xanīfo Roma kori fīxomisfo fe yora chakafo Jesúski fenifo āfe meka nikai fekani. ² Nāskaifono fariseofo feta a Moisés yoikī kirika kenei keskara ato tāpimamisfāfe Jesús mekafakakī iskafakī yoinifo: “Ōikapo nato yora chakafo ifimis, askatari ato feta pimis,” ixō yoinifo.

³ Askafaifono Jesús ato yoini meka fetsafaxō mā tāpīxō iskafakī: ⁴ “Fatora mā fetsa cien oveja inayano fisti ato makinoax fenoano, nā noventa y nueve mā anā fasifo mēra nīchitiro. Nāskaxō nā oveja fenoa fisti mā fenatiro shināmitsakōiyanā. Nā mā fichiatiā fetsafo kāimaxiki. ⁵ Mā fichiax āfe oveja fenoaki akiki inimakī tepapiinīfofā tepokomexō iyotiro. ⁶ Nāskax mā āfe pexe ano nokoxō āfe yamafoya a chaima nikafo yoitiro iskafakī: ‘A ēfe oveja fenoa. Mē fichiakī efe inimakāfe,’ ixō ato yoitiro. ⁷ Nāskakē ē mato yoi, nāskarifiiai inimakōikani nā nai mēra ikafo fētsa āfe chaka xatekōiano Jesús Ifofakī. Akka nā noventa y nueve yorafokiri nai mēranoax atokiri inimakani, afomāi isharakōipaonifono nono mai ano ikanax. Akka nā feronāfake chakafinakōi iyopaonixakī āfe chaka xatekōiano akiki inimaifinakōikani nai mēranoax,” ixō Jesús ato yoini.

Meka fetsafaxō Jesús ato yoini kēromā āfe kori exe fenoa fīaoxō

⁸ Anā Jesús ato yoini iskafakī: “Nāskarifiiai kēro kori exe diezyaano fisti pakeano āfe pexe mēra rāpari otaxō fenakī ōisharata mātsokī fichitiro. ⁹ Nāskata mā fichixō, āfe yamafoya a chaima ikafoya ato ichanāfatiro. Nāskaxō ato yoikī iskafatiro: ‘¡Aicho! A ēfe kori exe fenoa mē fichiaki efe inimakāfe,’ ixō ato yoitiro. ¹⁰ Nāskarifiakī ē mato yoi. Nāskarifiakani Epa Niospa āfe ājirifo

inimakani fētsa āfe chaka xateax a anā ipaoni keskara iyamaito ōikani,” ixō Jesús ato yoini.

Meka fetsafaxō Jesús ato yoini apa āfe fake raefatiroōnoa yoikī

¹¹ Jesús afianā ato yoini iskafakī: “Feronāfake fisti fake rafeya ini. ¹² Akka nā chipokoto apa yoikī iskafani: ‘Epa, mā mī chaima nakī a mīa ināxiai ikisi ea ināfe,’ fani. Nāskakē āpa āfe afama mīshti ato paxkaketsaxoni.

¹³ “Nāskano pena fetsa āfe fake chipokoto āfe afama mīshti ato ināketsani kori fixiki. Mā kori fiax chaikōi kani mai fetsa ari. Nārixō āfe kori potakī mitoni mēxotaima pāekī kēro chota feromafo fe ikī. ¹⁴ Akka mā āfe kori potakī keyoano, nā mai anoaxri fonāikōinifo. Nāskakē nā mai anoax nā feronāfakeri chipo omiskōini afaamaisax. ¹⁵ Nāskakē kaxō nā mai anoa feronāfake fetsa yono yōkani yonoxopaikī, iskafakī yoini: ‘Ē mia yonoxopai,’ ixō yōkaito āfe tarepa nīchini āfe kochifo pimaxonō. ¹⁶ Nāskata fonāikōifikī a kochifāfe piai maropei xaka pisharapaikōini tsōakairoko afaa pimaino.

¹⁷ “Nāskakī iskafakī shināni: ‘Ēfe epa yonoxomisfāfe ēfe ēpa pexe anoxō pikī finasharakōiyānā texefamisfo. Akka ē nonoax fonāiki finakōi mē nairokomē,’ ixō shināta, ¹⁸ ‘Mia iskaratīa afianā ēfe ēpa pexe ari kapa. Mē kaxō iskafakī ēfe epa yoi kaikai, “Epa, ē Nios chakafata miari ē chakafamis. ¹⁹ Nāskakē iskaratīa ēfe fakera mīa ea fatiroma. Mia yonoxomisfo keskara mī ea fatiro,”’ ixō shināta, ²⁰ āfe āpa pexe ari fāi kani. Nāskakē chai inoax oaito āfe āpa fichini shināmāi fakī. Nāskax akiki koshi farekekāi akiki nokota chishtoinīfofā kokoketsani.

²¹ “Nāskafaito āfe fāke āfe apa yoikī iskafani: ‘Epa, ē Nios chakafata miari ē chakafamis. Nāskakē ēfe fakera mīa fatiroma,’ ixō apa yoini.

²² “Apa askafaino akka āfe āpa a yonoxomis yoini ato iskafakī: ‘Koshikōi rapati fenasharakōi fīxokāfe ēfe fake ea safemaxokāfe, askatari anīcho sharari safemakāfe, askatari sandalia sharari safemakāfe,’ ato fata, ²³ ‘Fākka fake xoakōiari ifitakāfe retexikakī nō pinō fista ayanā. ²⁴ Akka na ēfe fake mā nani keskara ikatsaxakī mā anā ekeki nokoaki. Mā fenofinino mā nō anā fichiaki,’ ixō akiki inimakī fista axoni.

²⁵ “Akka āfe fake iyoato āfe tare ano yonofai okī nikaferani pexe chaima nokoiyokī mōsika maneyanā mairafono. ²⁶ Nāskakē a yonoxomis fetsa kenaxō yōkani āfe āpa pexe anoxō afaa afeskafakanimākai. ²⁷ Askafaito a yonoxomisto yoini: ‘Mā mī exto noko. Nāskakē āpa fakka fake xoa sharakōia ato retemana afeskaxma mī exto sharakōi nokoano,’ ixō yoini.

²⁸ “Akka āfe ochi iyoa akiki ōitifishkiki finakōini. Nāskakē pexe mēra ikinima. Nāskaino āfe apa āfe pexe mēranoax kāinākafani āfe fake yoiyoi mā āfe fake chipoko nokoano, ‘Mā mī exto nokoaki. Nōko pexe mēra ikikofe,’ fani. ²⁹ Āpa askafaino apa kemani iskafakī: ‘Shināpo epa, ē mia yonoxomis keskaraxō, çafe tii xinia ē mia yonoxomismē? Ea mīa yoiaitokai ē mia nikakaspamisma, akka eakai cabranā fakeshta mīa ināmisma retexō piyanā ēfe yamafo feta ē fista apanā. ³⁰ Akka mī fake mā noko nā mī kori ināni kēro chotaferomafoki potakī keyotani. Nāskafikē mī fākka fake xoashara retexona,’ faito, ³¹ āpa kemani: ‘Anifoshta, mīkai ea potamisma, mī efe itiani. Akka na ēfenāfo mīnā, keyokōi iki kiki. ³² Akka iskaratīa nō fista aki mī extoki inimayanā. Akka mī exto naa keskara ikatsaxakī, mā anā ekeki noko afaa afeskaxma, mā afetiama fenofinino anā oaito nō fichia,’ ixō āpa āfe fake iyoa yoini,” ixō Jesús ato yoini.

16

Meka fetsafaxō Jesús ato yoini, xanīfokōichi afe xanīfo yōaniōnoa yoikī

¹ Jesús afianā aōxō tāpimisfo yoikī iskafani: “Feronāfake fetsa afama mīshti ichapayato feronāfake fetsa afe xanīfo inō yoini. Nāskaxō nikani āfe afama mīshti āfe inapa kexesharaxokēma. ² Nāskakē āfe xanīfāfe kenaxō yoikī iskafani: ‘¿Afamē a mīōnoa ea mīa yoiai? Akka a mī yonofaiōnoa ea yoife. Akka iskaratīa mī anā efe xanīfo ikima,’ ixō yoini.

³ “Askafaito nikakī āfe inapa shinākōini: ‘¿Ē afeskaimē? Iskaratīa ěfe xanīfāfe ea anā yonomanipa, mā ea potai. Ēkai afeskaxō anā yonotiroma kerekai ē tarepanā. Nāskatari ē anā afaa yōkapaima ē rāfitiro. ⁴ ¡Choo! Mē shināi. Nā ěfe ifo nimiyāfo ē ato xekaxopakefofāni anā ichapa niminōfoma. Ē ato askafaino āto pexe anoxō ea ifnōfo ěfe ifāfe ea potano,’ ixō shināni.

⁵ “Nāskaxō fisti rasi ato kenapakeni afe tii āfe ifo nimiafomāki ato yoixiki. Nā akiki kai taea yōkakī taefani: ‘¿Afe tii mī ěfe xanīfo nimiamē?’ ixō yōikaito, ⁶ kemani iskafakī: ‘Ē nimia xini ene cien galon,’ faito, a xanīfo fētsa yoini iskafakī: ‘Nā mī nimia potaxō nono tsoaxō fetsa arisafafe cincuenta faxō kenefe,’ fani.

⁷ “Nāskaxō fetsari yōkani: ‘Akka mīri, ¿afe tii nimiamē?’ faito, atori yoini iskafakī: ‘Cien saco de trigo ē nimia,’ faito, ari yoini iskafakī: ‘A mī nimia potaxō fetsa arisafafe ochenta faxō kenefe,’ fani.

⁸ “Nāskakē a āfe ina chakapa āa shināxō akai keskara āfe xanīfāfe tāpikōini. Nāskakē yoini iskafakī: ‘Mī tāpikōia, nāskakē fetsafāfe mia sharara fakani,’ ixō yoini. Nāskarifiakī a Nios Ifofaafāfema tāpikī finakōiafo ato pārakīki, āa shinākaxō. Akka a Nios Ifofaafō askarafoma, ato pāratirofoma. Chanīma fisti yoitirofo.

⁹ “Ē mato yoinō, mā afama mīshti ichapayaxō a afaamaisfo ato inākāfe, mā ato askafakē mato yoisharanōfo. Nāskakē mā mā naxō mā anā kori yopatiroma mā Nios ari nokoaito nā mā kori ināmisfāfe mato yoikī iskafatirofo: ‘Aicho, mī noko shara famis. Iskaratīa nono Nios ano mī nofe ipanaka,’ ixō mato yoitirofo.

¹⁰ “Akka nā isharakōixō afara ichapama kexesharakōimis nō tāpitiro afara ichapa kexesharakōitirokē. Akka nā isharaxoma afara ichapama kexesharamisma nāri nō tāpitiro afara ichapa kexesharakōitirokēma. ¹¹ Akka nono mai anoxō āto afarafo kexesharayamaifono, Niospa ato afara sharakōifo ināpaifikī anā ato afaa inātiroma. ¹² Nāskarifiakī Niospa mato afara shara ināpaifikī mato inātiroma.

¹³ “Nāskarifiakī tsōa āfe ifo rafe yonoxosharatiroma. Akka fetsa noikaspata fetsa noisharatiro, nā yoiai keskarakōi axotiro, akka a fētsa amapaiyai keskara axotiroma noikaspatrio. Nāskarifiakī mā kori fisti shinākī mā Nios shinātiroma. Nāskatari Epa Nios fisti shinākī mā kori noitiroma,” ixō Jesús ato yoini.

¹⁴ Akka nā fariseofāfe kori noikōimisfono Jesús atoōnoa yoiaito nikakani akiki kaxemetsamanifo. ¹⁵ Askafaifono Jesús ato yoini: “Māfi nō sharafora imiski yorafāfe ferotāifi, akka mā askafaito Epa Niospa mato tāpikōia. Akka yorafo mā pāratiro nafo sharafoki mā ato fatiro, mā ato askafaino Niospa mā mato tāpixō mato iskafai: ‘Nafō chakakōifo,’ ixō mato yoi,” Jesús ato fani.

A Moisés yoini keskara sharafiano Nios xanīfāferoko ato finōkōinīfōfana

¹⁶ Anā Jesús ato yoini iskafakī: “Moisés Niosxō yoini keskafakī, a Niospa meka yoimisfāferi yoinifo keskara Juan mato yoini. Nāskakē meka shara Nios xanīfoōnoa Juan ato yoini iskafakī: ‘Māto chaka xatekāfe anā a mā ipaoni keskara iyamakāfe Nios xanīfo ari ikixakakī.’

17 “Akka chanīma, maife nai koshikōi keyotiro. Akka a Moisés yoini keskakōi, Niospa meka shara keyonakama,” ixō Jesús ato yoini.

Feronāfake āfe āfi fe enēnātirofoōnoa Jesús ato yoini
(Mt. 19.1-12; Mr. 10.1-12)

18 Anā Jesús ato yoini iskafakī: “Akka fētsa āfe āfi enexō, fetsa fia sharama. Chakafai. Askara sharama. Askatari mā fenē enea feronāfake fētsa fīari sharama. Nāatori chakafai āfe āfimakōi fe ikī,” ixō Jesús ato yoini.

Feronāfake fetsa afama mīshti ichapaya ikaino akka Lázaro afaamais ini

19 Nāskata afianā Jesús ato yoini iskafakī: “Feronāfake fetsa afama mīshti ichapaya ini, rapati sharakōi safea. Nāskaxō pena tii fista apaoni pisharakōiyanā inimakōikī. 20-21 Nānori feronāfake afaamais ini āfe ane Lázaro, yorafoki koyoi fetseax tsaoni a yora afama mīshti ichapayato āfe pexe fepoti ketokonō. Nā feronāfake afaamaisyato shināni iskafakī: ‘Na feronāfake afama mīshti ichapayato a piāi ea ināpainōra,’ ixō shināni. Nāskaino paxtafo akiki kaxō āfe koyoyo tāxoketsani.

22 “Nāskax Lázaro nani. Mā nakē ājirifāfe āfe fero mēsho iyonifo Abraham fe ikikanō Nios xanīfo ano. Nāskatari a yora afama mīshti ichapayari nani. Nāri nakē maifanifo. 23 Nāskakē a yora afama mīshti ichapaya omiskōikōini chiifā mēranoax a yorafo naax fomisfo anoax. Nānoxō foisnīfofā chai inoa Abraham yafi Lázaro fichini. 24 Nāskakē fāsikōi Abraham kenani iskafaki: ‘jEpa Abraham, ea shināfe! Ea Lázaro nīchixōfe āfe mifi rechoko fāka mechanafaxō ea ana mechana faxoyonō. Nonoax ē omiskōi finakōikai na chiifā mēranoax,’ ixō yoiāito, 25 akka Abraham kemakī iskafani: ‘Ēfe fāke, ĵmī shināimamē nayoamax mī isharakōiyopaoni inimakōiyanā? Akka Lázaro isharakōipaonima. Omiskōipaoni. Nāskakē iskaratīa nonoax isharakōia inimasharakōiyanā, akka mī omiskōikōi. 26 Nāskakē afeskax mia ari tosa katiroma, mīrikai afeskax noko ano otiroma. Na mafa kinīfā mesekōi afeskaxō nō finōtiroma. Māri afeskaxō arixori finōtiroma,’ ixō yoiāito, 27 nā afama mīshti ichapayato anā yoini iskafakī: ‘Ē mia yoi epa Abraham mī Lázaro nīchinō ēfe ēpa pexe ano 28 a ēfe exto cinco ikafo ano, anoxō Niospa meka ato yoinō nikakōinōfo akairi nono feyamanōfo nonoax omiskōi fetirofoki,’ ixō yoini.

29 “Askafaito Abraham yoini iskafakī: ‘Afāfēfi mā kirika kene ōiafoki a Moisés feta a Niospa meka yoimisfāfe kenenifo. Nā ōikaxō tāpisharakōinōfo,’ ixō yoiāito, 30 a afama mīshti ichapayato anā kemani iskafakī: ‘Mē tāpia, Epa Abraham, akka a yora naax otoato atoki oxō ato yoiāito nikakōitirofo,’ ixō yoiāito, 31 anā Abraham yoini iskafakī: ‘Akka a Moisés feta Niospa meka yoimisfāfe yoinifo keskara nikakaspakaki. Nāskarifiakī tsōa nikatiroma a yora otoato ato yoiāito,’ ixō Abraham yoinino,” Jesús ato fani.

17

Noko fētsa afara chakafamaino āfenā mesekōi itiro
(Mt. 18.6-7, 21-22; Mr. 9.42)

1 Jesús aōxō tāpimisfo yoini iskafakī: “Mēxotaima a ea Ifofaafāfema yorafo afara chakafamapaimisfo. Akka fētsa fetsafo afara chakafamax omiskōifinakōixii. 2 Akka ato askafamayoamano, tokiriya tenexti faxō fakafā nōafā mēra potatirofo a ea rama Ifofaifo ato afaa chakafamayamanō. Nāskara shara,” ato fani.

3 “Kexemesharakāfe. Fētsa mia chakafaito yoisharafe anā mia chakafanōma. Mī yoiāito nikakī iskafakī shinānō: ‘Chanīmarokomē ea yoisharakōi ē anā askanōma,’ ixō shināito raefaxō yoisharafe. 4 Akka anā

mia chakafakī mekafaxō, ea raefafe ixō mēxotaima mia yoiri faito akiki ōitifishkikīma mī yoisharaxō mī raefatiro,” ixō Jesús yoini.

Nō chanīmara faito Niospa noko afama mīshiti faxotiro

⁵ Nāskata a aōnoa yoimisfāfe Jesús yoinifo iskafakakī: “Ifo, nō mia chanīmara fai finōmainīfofā noko yoisharafe nō mia chanīmara fakōinō,” ixō yoiaifono, ⁶ Jesús ato kemani: “Akka mā ea nikakōixō na ifi efapa mā yoikī iskafakerana: ‘Mī tapofoya tsekekainax fakafā mēra pakeax anā foaife,’ mā faino anā foaitiro.”

Āfe xanīfāfe yoiai keskafakī a yonoxomisto axosharakōitiro

⁷ Nāskaxō anā ato Jesús yoini iskafakī: “Na meka fetsari ē mato yoinō nikakakī. Fatora fetsa mā inayaxō mātō inapa mātō tare ano yonoxotani oaino askayamakī fakkafo kexetani oaino akka, ¿mā iskafakī yoitiromē: ‘Pexe mēra ikikerafe tsaioxō pixiki,’ mā fatiromē? ⁸ Maa, mā askafatiroma. Askafatamaroko mā yoitiro iskafakī: ‘Ea pīchaxōfe ē pinō, mā nafakē ea yoixii ē pikī taefanō, mī chipo axiki,’ ixō mātō ina mā yoitiro. ⁹ Nāskatari āfe inapa nā āfe xanīfāfe yoia keskafakī mā axosharakōiano iskafakī yoima: ‘Aicho, ea mīa axosharakōia,’ ixō yoima. ¹⁰ Nāskarifiakī mārī a Niospa mato yoia keskarakōi fakī iskafakī yoikāfe: ‘Nōkai afama, nōa shināxō nō afaa akima. Nōko Ifāfe noko yoia keskafakī nō aki,’ ixō yoikāfe,” Jesús ato fani.

Jesús diez feronāfake sharafani rashkishi fetseaito

¹¹ Jerusalén ano fāi kakī Jesús Samāria yafi Galilea xatsokama rafe finōfaini. ¹² Nāskax Jesús pexe rasi pasotai nokoni. Nāno mā nokoano chai ixō diez feronāfake nā rashkishi fetseaiāfe ōikakī kenanifo fāsikōi. ¹³ Akka iskafakī fāsikōi yoinifo: “Jesús, Maestro, noko shināfe,” faifono, ¹⁴ Jesús ato ōikī ato yoini iskafakī: “A ato Nios kīfixomisfo ano fotakāfe, a mā shara ato ispaxiki,” ato faino, mā fokani koshikōi a isinī ikaifo sharai fetsenifo.

¹⁵ Akka fistichi āfe yora sharakōi meekī anā akiki oxō fāsikōi yoikī iskafani: “¡Aicho, fāsi Nios sharakōi! Mā ea sharakōi faki,” ixō yoini. ¹⁶ Nāskafata Jesús ferotaifi ratokonō mai chachipakefofā maikiri fepopakekafā. “¡Aicho Jesús, mī ea sharafaa! ¡Mī fāsi sharakōi!” ixō yoini. Akka nā feronāfake Samāria anoa ini.

¹⁷ Askafaito Jesús yoini: “¿Akka diez feronāfake ikafomamē a ē ato sharafa isinī ikaifono? ¿Akka fakimē ranāri a nueve feronāfake? ¹⁸ ¿Akka na feronāfake fisti efe yora yamafixō ekeki oxō Nios aicho faiyoamē?” ixō Jesús yoini. ¹⁹ Nāskaxō nā feronāfake yoini iskafakī: “Fininīkafāfe kātaxiki. Mī ea chanīmara fakōinax mā mī sharaki,” ixō Jesús yoini.

Nios xanīfāfe keyokōi yorafo īkināino afe keskara iximē

²⁰ Nāskano fariseofāfe Jesús yōkanifo iskafakakī: “¿Afetīa nono mai anoax yorafāfe ato xanīfo iximē Nios?” ixō yōkaifono, Jesús ato kemani: “Nios xanīfāfe ato īkināino nō ōitiro. ²¹ Tsōakai yoima iskafakī: ‘Nakīa, ōikapo,’ askatari, ‘Oa onokīa, ōikapo,’ mato faima. Akka Nios xanīfo mato mēra ixō mā mato shināmani nō ōiyamafiaino,” ixō ato yoini.

²² Nāskaxō āfe ināfo yoini iskafakī: “Ē samama mato makinoax kai. Mē mato makinoax kaano anā mā ea ōima. Ea ōipaifikī mā ea shinākōixii iskayanā, ‘Nōko Ifo nofe imis keskara nō ōipaikōi,’ ixō mā ea yoifikī a keskara mā anā ōima. ²³ Akka mato fetsafāfe pārakī iskafakani: ‘Nakīa Cristo,’ mato fata, ‘Oa onokīa,’ mato faifāfe, akka ato nikayamakāfe āa mato pārakani kiki. ²⁴ Akka ē nai mēranoax oi oa kana peiki fafetanaito nō ōitiro keskara, nāskarifiāi ē oaito mā ea ōixii ē chaxaferanaito. ²⁵ Akka ē taei omiskōifinayoxii yorafāfe ea ōikaspaifono nā ea ōikaspaifotīa. ²⁶ Akka nā Noé niyoano ini keskai nāskarifiāxii

ē anā oaino. ²⁷ Akka yorafo pikāta ayakāta fīanākāta ikaifono, mā Noé kanōanāfā mēra ikiano faka faipafāino, keyoi āsai mitokomenifo. Nāskarifiāxii ē oaino ea shinātama afara chaka shināifono.

²⁸ “Nāskarifiāni nā feronāfake Lot niyoano, yorafo pikāta, ayakāta, afarafo fīkāta, afarafo ato minikāta āto tarepa afarafo fanakāta pexe fakāta ikaifono, ²⁹ akka Lot mā Sodoma anoax tsekeano, oa oi ikai keskara nai mēranoax atoki chiifā pakeaino keyokōi koofi mitokomenifo.

³⁰ “Nāskarifiāxii ē oaino, ea shinākātama nā ipaiyai keskara shināifono. ³¹ Nāskarifiāki ē oaino fetsa āfe pexe fomākīa tsoxō anā āfe afara fīpai āfe pexe mēra ikitiroma āfe afara fīxiki. Askatamaroko ichotiro. Nāskarifiāi a āfe tarepa yonofai anā āfe pexe ano katiroma āfe afara fīxiki. ³² Akka nā Lot āfe āfiōnoa shinākāfe. Nā kēromā āfe afarafo shināi ifiakēkafā ōipai narisatani keskai māri askatiroki. Askayamakāfe. ³³ Akka fētsa shinākī iskafai: ‘Ē Jesús Ifofaito ea omiskōimakaniraiti,’ ixō shinākī ēfe meka kachikiri fai. Nā keskara yora naax omiskōipakenaka. Akka aa eōnoax omiskōiai naax efe isharakōipakenaka.

³⁴ “Akka ē mato yoi, yora rafe nā fakishi mishkitiro fistichi oxakanax ē oaino fetsa efe kaino fetsa nētetiro. ³⁵ Nāskarifiāi kēro rafeta xiki renekani. Fetsa ea ari kai yamarisatanaino akka fetsa nētetiro nā omiskōipakenakafo mēra kaxiki. ³⁶ Nāskatari feronāfake rafeta āto tare ano yonokani, fetsa ea ari kai yamarisatanaino, fetsa nētetiro nā omiskōipakenakafo mēra kaxiki,” ixō ato yoaino, ³⁷ yōkanifo iskafakāki: “Ifo, ¿faki fokanimē?” ixō yōkaifono ato kemani iskafakāki: “Mā tāpitiro a afara naa ano ishpifo fotofaifāfe. Nāskarifiāxii ē fotofaino a ea Ifofamisfo ekeki ferisaxakani,” ixō Jesús ato yoini.

18

Meka fetsafaxō kēro ifomafaōnoa yafi xanīfo Jesús ato yoini

¹ Jesús anā ato yoini meka fetsafaxō ato tāpimaxiki, Epa Nios mēxotaima kīfikani xokenāyamanōfo. ² Ato yoikī iskafani: “Nā pexefā rasi anoxō xanīfāfe Nios shinātama yorafori noimisma. ³ Nā pexefā rasi anori kēro ifomafa ika ini. Nāskakē nā kēro ifomafa mēxotaima a xanīfoki kapaoni yoikī iskafaikai: ‘A ea noikaspamisto ea chakafai kiki ea yoixōfe ea anā chakafayamanō,’ ixō yoifaito, ⁴ nā xanīfāfe nikakaspayanā tooxanima. Nā kēro ifomafa fekaxtefafiaino akka nāskaxō xanīfāfe shināni iskakī: ‘Ē Nios shināima, yorafori ē noima. ⁵ Akka na kēro ifomāfa ea fekaxtefai kiki, ē yoisharaxonō anā a chakafaito fekaxtefayamanō, mē yoixonano anā ea fekaxtefaima kiki,’ ixō xanīfāfe yoini.”

⁶ Iskafakī Jesús ato yoini: “A xanīfo chakapa yoini keskara nikasharakāfe. Chakafixō nā kēro ifomafa fekaxtefaito axosharaniki. ⁷ Akka Nioskai nā xanīfo chaka keskarama. Akka, ¿Niospari āfe yorafo ato afara axosharatiro-mamē? Noko nikaikai fekaxtetiro ma penachāi yafi fakishchāi kīfiaifono ato nikakaspatiroma. ¿Askayamakī, ‘Ea manayokāfe,’ ixō ato yoitiromē? ⁸ Maa. Akka ē mato yoi mā manamiskē koshi mato afara shara faxoxii. Akka a mato chakafamisfo ē ato omiskōimaxii. Akka, ¿ēfe Epa ariax anā ē nāmā fotoaitīa ea chanīmara faifāfe ē ōitoshiximē?” ixō Jesús ato yoini.

Meka fetsafaxō fariseofoya a ato kori fīamisfo Jesús ato yoini

⁹ Jesús meka fetsafaxō ato yoini ato tāpimaxiki. “Ēfi sharaki, ēkai afaa chakafamisma yora fetsafokai ea keskarama,” ixō shināmisfoōnoa Jesús ato yoini iskafakī: ¹⁰ “Feronāfake rafe fonifo Nios kīfiti pexefā mēra anoxō Nios kīfi fokani. Fetsa fariseo ini. Fetsari āfe xanīfo kori fīxomis ini. ¹¹ Nā fariseo arese nīxō kīfikī iskafani: ‘Epa Niosi, ē fetsafo keskarama. Akka fetsafo

yometsomisfo, chakakōifo, askatari ato āfima chotamisfo. Akka ěkai nā āfe xanīfo kori fīxomis keskarama. Nāskakē ě mia aicho fai. ¹² Na semānā tiifi ě foni tenekī rafefa fafafaīni mia shinākī. Akka nā ě fiairi ě mia paxkaxō fafāini, ixō fariseo Epa Nios kīfini. ¹³ Akka a āfe xanīfo kori fīxomis ori chai nini. Nāri chai nīxokai nai foispainima. Askatamaroko shināmitsayanā Epa Nios yoini iskafakī: ‘¡Ooa! Epa Niospa, ě mia chakafamiski. Eō noikī ea sharafafe ě chakakī, fani. ¹⁴ ě mato yoi nā āfe xanīfo kori fixomis āfe pexe ano oni mā Niospa āfe chaka soaxonano. Akka nā fariseo āfe chaka soaxonima. Nāskarifiāi fetsa āa anoi yoimesharai: ‘Ē sharara,’ imiskē chipo Niospa afaa imatiroma. Akka fētsa shinākī iskafai: ‘Ēfi afarafo chakafamiski,’ ixō shināito nā keskara yora Niospa chaka soaxotiro afe ĩpaxanō,” ixō Jesús ato yoini.

*Jesús fakefo chishtoxō ato māmāyanā ato Epa Nios kīfixopakeni
(Mt. 19.13-15; Mr. 10.13-16)*

¹⁵⁻¹⁶ Nāskatari yorafāfe ato fake mīshti Jesúski efenifo ato māmāpakeyanā ato Epa Nios kīfixonō. Akka nā Jesúsxō tāpimisfāfe ato iskafanifo: “Māto fakefo efexō nōko Ifo fekaxtefayamakāfe,” ato fanifo. Ato askafaifono Jesús ato yoini: “Ato enekāfe na fakefo ekeki fenōfo. Ato nētefayamakāfe. Ēfe Epa Nios xanīfo ika ari na fakefo keskarakōifoki,” ixō ato yoini. ¹⁷ “Ē mato pāraima, mā Epa Nios xanīfo nikayamax na fakefāfe ea nikaifo keskafakī, Epa Nios ika ari mā katiroma,” ixō Jesús ato yoini.

*Feronāfake naetapa kori ichapayax Jesús fe mekani
(Mt. 19.16-30; Mr. 10.17-31)*

¹⁸ Xanīfo fetsa Jesús ano oxō yōkani iskafakī: “Maestro, mī sharaki, ea yoife ě afaa afeska fatiromāki Nios xanīfo fe ĩpaxaki,” ixō yōkaito, ¹⁹ Jesús kemani: “¿Afeskakī sharara mī ea faimē? Akka Nios fisti shara. ²⁰ A Niospa yoini keskara mā mī tāpia. Iskafakī yoini: ‘Mī āfima chotayamafe; askatari yora reteyamafe; askatari yometsoyamafe; askatari chanīyamafe mā kaxpa ato pārāyamakāfe. Nāskaxō māto epa yafi māto efa nikasharakāfe,’ ” ixō yoiaito, ²¹ nā feronāfake yoini iskafakī: “Nā mīa yoiaifo keskara mē nikamis naetapaxō,” faito, ²² askafakī yoiaito nikakī Jesús kemani iskafakī: “Nāno afara fetsa fisti mī tāpiama. Akka mī afarafo minixō kori fixō nā afaamaisfo ato minife. Nāskax nai mēranoax mī afama mīshtifoya ixikai. Nāskafata efe koofe,” ixō yoiaino, ²³ akka nā feronāfake Jesús askafaito nikai, shināchakakōi tooxinima, afama mīshti ichapayax.

²⁴ Shināmitsaito ōikī Jesús ato yoini: “A yora afama mīshti ichapaya Nios xanīfo ano katiroma, fekax pishta. ²⁵ Māraki camello akoja kini mēra ikipaifi ikitiro fekaxkōi efapamāiax. Nāskarari yora afama mīshti ichapayato Nios Ifofapai fekaxkōi āfe afama mīshtifomāi potakaspakī,” ixō Jesús ato yoini.

²⁶ Ato askafaito nikakakī a aōxō tāpimisfāfe tāpipainifo. “¡Kee! ¿Afeskax nō Nios fe ĩpaxatiromē?” ikanax yoinānifo. ²⁷ Jesús ato kemani: “Akka yorafokai āa ĩfimetriroma, Nios fistichi yorafo ĩfitiro. Niospa afama mīshti fatiro. Tsōakai afama mīshti fatiroma, Nios fistichi atiro,” ato faito, ²⁸ Pedro yoini: “Ifo, nō mefe okī nōko afama mīshtifo nō ōiferani nō mefe oni,” faito, ²⁹ Jesús kemani iskafakī: “Ē mato yoikōi, fētsa Nios xanīfoōxō ato yoikakī āfe pexe ōifaita āfe apa yafi āfe afa ōifaita āfe onefetsafo ōifaita āfe āfi ōifaita āfe fakefo ōifaita ixō, ³⁰ nāato afama mīshtifo fixii. Nāskatari mā naax Nios fe ĩpanaka,” ixō Jesús ato yoini.

*Anā Jesús ato yoini: “Mā chaima ea retekanira,” ixō
(Mt. 20.17-19; Mr. 10.32-34)*

³¹ Jesús aõxõ tãpimis tiis doce kenani. Nãskaxõ ato yoini iskafakĩ: “Iskaratĩa mã nõ Jerusalén ano kaikai. Nãnoax nã Niospa meka yoimisfãfe eõnoa yoikĩ kenenifo keskakõĩ kaikai ã. ³² Nãnoxõ yora fetsafo ea ato achimakani kiki. Nãfãfe ea kaxemetsama fayanã ea ïchakani kiki ekeki kemo mechoketsayanã. ³³ Ea koshaketsakata ea retekani. Akka ea askafafiaifono tres nia oxata ã otõxi,” ixõ ato yoini.

³⁴ Ato askafakĩ yoiaitokai tsõa tãpinima. Mã nikafikakĩ tsõa tãpisharanima, Niospa Yõshi Sharapa ato shinãmayoamano.

Jesús yora fisti fẽxokõikẽ Jericó anoxõ sharafani

(Mt. 20.29-34; Mr. 10.46-52)

³⁵ Mã chaima Jesús Jericó ano nokoi kakĩ, yora fẽxo fai ketokonõ tsaokẽ fichini, anoxõ ato kori yõkaito. ³⁶ Nãnoxõ nã fẽxo fai ketokonõ tsoxõ nikakĩ yorafã rasi fofãnaifãfe ato yõkani: “¿Afaa afeskafakanimẽ?” ato faito, ³⁷ yoinifo: “Jesús Nazarete anoa kafani,” fanifo. ³⁸ Askafafiaifono nikai fãsikõĩ kenani iskai: “Jesús mĩfi David fenakĩ, ea shinãfe,” fani.

³⁹ Askafaito nã rekẽ foaifãfe iskafanifo: “Nõko Ifo fekaxtefayamafe,” fafiaifono, akka nã fãsikõĩ kenai iskani: “¿David fenapa, eõ noife!” faito nikai, ⁴⁰ Jesús nẽteakekafã ato yoini iskafakĩ: “Ea ifixotakãfe oaiskai kenariai,” ato faito ifixotanifo. Mã oano Jesús yõkani iskafakĩ: ⁴¹ “¿Ë mia afeskafatiromẽ?” faito, nã fẽxo kemani iskafaki: “Ifo, ã oĩsharapai afeskaxõ ã õisharatiroma,” faito, ⁴² Jesús yoini iskafaki: “Ea mã chanĩmara faax mã mĩ shara. Nãskaxõ mã mĩ õisharai,” fani.

⁴³ Nãskafaino nã fẽxo õisharakõitani. Nãskax Jesús fe kakĩ, “Aicho mã ea Niospa sharafaki, Nios fãsi sharakõikĩ,” ikax afe kaino yorafãfe õikakĩ akairi, “Nios fãsi sharakõĩ,” ikanax akiki inimakõinifo.

19

Jesús fe Zaqueo

¹⁻² Nãskano Jesús Jericó pexe rasi ano finõfaini. Akka nãno feronãfake afama mĩshti ichapaya ika ini, ãfe ane Zaqueo. A ato kori fixomisfãfe ãfe xanĩfo ini. Nãatori ãfe xanĩfo kori fixomis ini. ³ Nãato Jesús õipaifiki õinima, yora ichapafãfemãĩ nakifafono Zaqueomãĩ mĩsto pishtamãĩ axõ. ⁴ Nãskakẽ fãĩ rekẽ ichoni Jesús kaito õixiki. Nãskata ïfiya inani nã Jesús kafanai anori. ⁵ Jesús anori finõfãikĩ fomãkĩa naiskĩ fichixõ yoini iskafaki: “Zaqueo, fotopakekafãfe. Iskaratĩa mĩ pexe ano ã nẽteyoikaikai,” faino, ⁶ koshikõĩ Zaqueo fotopakekafãni. Nãskakẽ akiki inimasharakõiyana ãfe pexe ari iyoni.

⁷ Nãskaito õikakĩ yora rasichi iskafakĩ yoinifo: “¿Kee, õikapo! ¿Afeskai na yora chakapa pexe ano Jesús iki kaimẽ?” fanifo. ⁸ Askafafiaifono Zaqueo fininãkafã Jesús yoini iskafakĩ: “Ifo, õipo. Nã afaamaisfo na ãfenãfo ã ato paxkaxonikai. Nã ã atoki yometsomisfo cuatro veces faxõ ã ato inãĩ,” ixõ yoini.

⁹ Askafaito Jesús yoini iskafaki: “Iskaratĩa mẽ mia chaka soaxona mã Niospa fake iki mã afe ïpanaka,” ixõ yoini. Nãskaxõ nãnoafo ato yoini: “Na feronãfake Abraham ãfe fena. Abraham Nios nikakõipaoni keskakakĩ natori Nios nikakõĩ. ¹⁰ Akka ã oni ãfe Epa Nios anoax a fenoafo ato fenayanã ato ifiyoi,” ixõ ato yoini.

Meka fetsafaxõ koriõnoa Jesús ato yoini

(Mt. 25.14-30)

¹¹ Nã yorafãfe nikanifo Jesús ato yoiaito mãmãĩ Jerusalén chaima faifokakĩ, “Mã Nios xanĩfo chaima nokoira,” ixõ shinãifono. Nãskara shinãifono mã tãpixõ

Jesús meka fetsafaxō ato yoini. ¹² Iskafakī ato yoini: “Nāno feronāfake fetsa xanīfo keskara ini. Nā feronāfake chai kani mai fetsa ari, nāriax mā xanīfo ikax opai. ¹³ Akka kayoxoma a yonoxomisfo diez kenani. Nāskaxō ato kori ichapa ināketsayanā ato yoini iskafakī: ‘Na kōri afara ichapa mā fikāfe nā ē oaitīa,’ ixō ato yoini. ¹⁴ Akka yorafāfe āfe mai anoxō noikaspanifo. Nāskaxō acho yora rafe nīchinifo iskafakī ato yoitanōfo: ‘Na feronāfake nō fichipaima nōko xanīfo inō,’ ixō ato yoitanōfo.

¹⁵ “Akka askafafiaifono mā xanīfo itani anā anoris oni āfe mai ano. Mā nokoxō a yonoxomisfo kenamani nā ato kori ināfaini tii, tāpixoniki afe tii kori fiafomākī. ¹⁶ Nāskano fetsa akiki oitaexō yoikī iskafani: ‘Ifo, a ea māia kori ināfainitatima finōmainīfofā kori exe diez faxō mē mia fixōa,’ fani. ¹⁷ Askafaino āfe xanīfāfe kemani: ‘Aicho, mīfi ea yonoxō sharamiski. Ē mia afaa ichapa ināyamafiano finōmainīfofā mā fixosharakōia. Nāskakē pexe rasi diez anoa ē mia xanīfo imai,’ ixō yoini. ¹⁸ Nāskatari āfe ina fetsari akiki oxō yoikī iskafani: ‘Ifo, a ea māia kori ināfainitatima finōmainīfofā kori exe cinco faxō mē mia fixōa,’ fani. ¹⁹ Nāskafaino nāri kemakī iskafani: ‘Mīri cinco pexe rasi anoa xanīfo ikikai,’ fani. ²⁰ Akka a yonoxomis fetsari akiki oxō iskafakī yoini: ‘Ifo, nakīa mī kori ē mia mekexona samapa rakoxō. ²¹ Ē mikiki mesekī, mīmāi feronāfake mitsisipakōikē, mīnāyamafekē mī fimis, askatari a mī fanama anoafori mī fimis. Nāskakē ē mikiki mesekī ē mia kori mekexona, nakīa mī kori,’ ixō yoini.

²² “Askafaito nikakī āfe xanīfāfe yoini iskafakī: ‘Mī ea yonoxosharamisma, mī chakakōi, askatari mī xanikōi. Mī mekaōxō ē mia omiskōimani. Mī ea iskafakē, na feronāfake mitsisipakōi āfenāyamafekē fimis, askatari a fanama anoafori fimis mī ea fakē. ²³ Akka, ¿afeskakī banco ano mī ea kori faxōfamamē mā ēfe kori ichapano ea ināxikima, mē anā ēfe pexe ano ē oano?’ ²⁴ Nāskata nā anoafo ato yoini iskafakī: ‘Na feronāfake kori fikāfe nā diez faxō finōmainīfofā ea kori fixōa ināxikakī,’ ato faito, ²⁵ kemakī iskafanifo: ‘Ifo, akka nāatoroko mā diez faxō finōmainīfofā fia,’ faifono, ²⁶ anā xanīfāfe ato kemani: ‘Akka ē mato yoi nā afara ichapaya nō afara ichapa inātiro. Akka a afaa ichapayama, āfe afara nō fiatiro anā afaa ichapaya inōma. ²⁷ Askatari a ea noikaspakakī a ea xanīfo fakaspafo, fitakāfe ato retexikakī ēfe ferotaifi,’ ixō xanīfāfe ato yoini,” Jesús ato fani.

Jesús nokoni Jerusalén ano

(Mt. 21.1-11; Mr. 11.1-11; Jn. 12.12-19)

²⁸ Nāskara ato yoita Jesús kani Jerusalén ano a aōxō tāpimisfo fe. ²⁹ Mā chaima Betfagé fe Betania ano nokoxō machi Olivos anoxō a aōxō tāpimis rafe nīchini. ³⁰ Ato iskafakī yoianā: “Mēstekōi fōtakāfe oa ono pexe rasi ano. Mā nokoxō nānoa burro fake nexekē mā fichi kaikai toa aō nimisma. Tēpexō ea efexotakāfe. ³¹ Anoxō mato yōkaifono iskafakī: ‘¿Afeskakī mā burro tēpeimē?’ mato faifono ato yoikī iskafakāfe: ‘Nōko Ifāfe fichipaiyaito nō ifixoniyoa,’ ato fakakī,” Jesús ato fani. ³² Ato nīchia fōkaxō oiafo nā Jesús ato yoia keskarakōi fichitoshinifo.

³³ Mā burro tēpeaifono, nā burro ifofāfe ato yōkanifo: “¿Afeskakī mā noko burro tēpekaimē?” ato faifono, ³⁴ ato kemanifo iskafakakī: “Nōko Ifāfe fichipaiyaito nō ifixoniyoa,” ato fanifo. ³⁵ Nāskaxō burro kateki āto rapati kakafakaxō efenifo Jesús ano. Nāskaxō a kamaki Jesús tsaoinīfofānifo. ³⁶ Nāskakē Jesús tanaima kani. Akka yorafāfe āto rapatifo fai nēxpakīa kakafafonifo. ³⁷ Mā chaima machi Olivos tisiri mekani keyokōi a aōxō tāpimisfāfe fāsikōi yoinifo iskafakakī inimayanā: “¡Aicho, Nios fāsi sharakōi! ¡Niosxō afama mīshti mī akaito nō oia!” fanifo. ³⁸ Iskafakī yoinifo akiki inimakakī: “¡Aicho, nōko xanīfo nokoki oakī! ¡Niospa nai mēraxō shara famafafāini! ¡Niospa

yoini Jesús nõko xanĩfo inõ, aõnoax yorafo Nios fe nĩpaxanõfo! ¡Aicho, Nios fãsi finakõial!” ixõ fãsikõi yoinifo.

³⁹ Nãskafaifono fariseofãfe yorafã rasi mēraxõ yoinifo iskafakakĩ: “Maestro, mĩ inafõ yoife iskanõfoma,” faifono, ⁴⁰ akka Jesús ato kemani: “Ë mato yoi nafãfe ea yoisharayamaifono, na tokirifãfe fãsikõi eõnoa meka shara yoikeranafo,” ixõ Jesús ato yoini.

⁴¹ Mã chaima Jerusalén ano nokoax nã peXe rasi anoafõ ato õi, atoõnoax Jesús oiani. ⁴² Iskafakĩ ato yoianã: “Ea chanĩmara faax mã isharapakenakaki. Akka mãkai tãpiama iskaratĩa Niospa Fake mã noko. Eakai mã xanĩfo fapaima ã mato imasharapaifaito, mã ea nikakaspai. Iskaratĩa ã mato afeskafatiroma. Mã mã fenõ. ⁴³ Fatora penata mato noikaspakani nã mato noikaspafãfe. Nãskaxõ mato chetekaxõ mato mēra ikiferakaxõ mato retekĩ mitokani. ⁴⁴ Mãto pexefõri pãoiki fetsexii, mĩ kaifofoya mato retekĩ mitoxikani tsoa pishta ichoxima, mã ea nikakaspamis Niospa ea matoki nĩchifiano,” ixõ Jesús ato yoini.

Jesús a Nios kĩfiti pexefã mēraxõ a ato inãifo ato potani
(Mt. 21.12-17; Mr. 11.15-19; Jn. 2.13-22)

⁴⁵ Nãskata Nios kĩfiti pexefã mēra Jesús ikikaixõ õia a mēraxõ afarafo ato miniaifãfe õikĩ ato kãimani. ⁴⁶ Naskafata ato yoini iskafakĩ: “Niospa meka yõra kenekĩ iskafani: ‘Mã ãfe kĩfiti pexefã mēraxõ mã ea kĩfitiro,’ ixõ yoifinino, akka nã yometsofãfe peXe keskara mã famis,” ixõ Jesús ato yoini.

⁴⁷ Nãskata Nios kĩfiti pexefã mēraxõ pena tii Jesús ato yoini. Ato yoifaino a ato Nios kĩfixomisfãfe ãto xanĩfofo feta a Moisés yoikĩ kirika keneni keskara ato tãpimamisfãfe judeofãfe ãto xanĩfofofãferi afeskaxoma Jesús retepaikakĩ shinãnifo. ⁴⁸ Akka afeskaxõ retetiroma inifo, yorafãfemãi nikasharapaikõiaifono a Jesús ato yoiai keskara.

20

“¿Tsõa mia nĩchinimē mĩ xanĩfo inõ?” ixõ Jesús yõkanifo anoxõ achipaikakĩ
(Mt. 21.23-27; Mr. 11.27-33)

¹ Pena fetsa Nios kĩfiti pexefã mēra Jesús ikikaini anoxõ yorafo tãpimani afeskax Nios fe ĩpaxatirofomãkĩ. Anoxõ ato yoianõ a ato Nios kĩfixomisfãfe ãto xanĩfofo fe, a Moisés yoikĩ kirika keneni keskara ato tãpimamisfo, judeofãfe ãto xanĩfofori fenifo. ² Iskafakĩ yõkanifo: “¿Tsõaõxõ mĩ iskafaimē? ¿Tsõa mia yoiamē mĩ iskafanõ?” ixõ yõkanifo.

³ Askafaifono Jesús ato kemani: “Ëri mato yõkanõ ea yoikapõ. ⁴ ¿Tsõa Juan nĩchiamē ato maotisafakĩ ato faka mēra ikimapakenõ? Niospa nĩchiamakĩ yorafãfe nĩchiniforaka.”

⁵ Ato askafaino ãa ranã mēenãpai fetseyanã shinãnifo iskakakĩ: “Nõ kemakĩ iskafaino: ‘Niospa nĩchini,’ nõ faino noko yoikĩ iskafai: ‘Akka, ¿afeskakĩ mã Juan nikamismamē?’ ⁶ Akka nõ iskafakĩ yoitiroma: ‘Yorafãfe Juan nĩchinifo,’ nõ fatiroma yorafãfemãi tokirinĩ tsakakakĩ noko retenõfo. Akka keyokõichi shinãkani Niospa ato shinãmanaino, Juanmãi Niospa shinãmanaino ato yoianõ,” ikanax yoinãnifo. ⁷ Nãskaxõ kemanifo: “Nõ tãpiama tsõara Juan nĩchini ato maotisafakĩ ato faka mēra ikimapakenõ,” faifono, ⁸ akka Jesúsri ato kemani iskafakĩ: “Ëri mato yoima tsõaõxõ ã iskafaimãkai,” ixõ ato yoini.

Meka fetsafaxõ Jesús ato yoini a ato yonoxomis chakafõõnoa
(Mt. 21.33-44; Mr. 12.1-11)

⁹ Nãskata taefakĩ Jesús yorafo yoini. Meka fetsafaxõ ato yoikĩ iskafani: “Feronãfake fẽtsa ãfe tare ano uva fanaxõ fẽtsafãfe kexexonõ ato inãfaini chai

kayoni. ¹⁰ Nā āfe fana fimimistīa ifāfe a yonoxomis nīchini a kexexonafo ato yōkaxō āfe fana fimifo fixotanō nā āfenā tiiri. Akka nā fana kexeafāfe seteketsakaxō afaamais nīchinifo. ¹¹ Nāskata tare ifāfe anā a yonoxomis fetsa nīchini. Akka nāari īchaketsayanā seteketsakaxō afaamais nīchinifo. ¹² Nāskaxō afianā fetsari nīchini. Akka mā kaano nāri imi tofeketsakaxō tarepaxō potanifo.

¹³ “Nāskata tare ifāfe shināni: ‘¿Ē afeskafaimē? Ēfe fakekōi a ē aō noiai mia nīchipa, ōitsai ēfe fake nikakōitirofoki,’ ixō nīchini. ¹⁴ Akka mā āfe fake nīchia kaito fichikanax nā tare kexemisfo yoinānifo iskakani: ‘Nato āfe apa naano na fanafo fixii kiki. A nari nō retenō na tare nōkonā inō,’ ikax yoinānifo. ¹⁵ Nāskakata achikaxō tare pasotai iyokaxō retenifo. Akka, ¿afaa mā shināimē ato afeska faimē a tare ifāfe? Ē mato yoinō. ¹⁶ Kaxō a tare kexemisfo ato retekī mitoxō, fetsafo āfe tare ināxii afāfe kexexonōfo,” Jesús ato fani.

Ato askafaito nikakani iskanifo: “Askayamapainōra,” inifo.

¹⁷ Akka askaifāfe ōikī Jesús ato yoini: “Akka, ¿afeskakī Niospa meka iskafakī kenenifomē?”

Tokiri pexe fapaikakī nā pexe famisfāfe na tokiri chakara ixō potafiafono, fetsafāfe fichikaxō na tokiri sharakōi ikaxō akiki pexe fatirofo, ixō kirikaki kenenifo. ¹⁸ Akka tokiriki fetsa pakekī aō xao teketiro. Akka tokiri yoraki pakekī renekōitatio.”

¹⁹ Nā ato Nios kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe Jesús achipainifo karaxa mēra ikimpaikakī. Atoōnoa meka fetsafaxō yoiaito nikakakī akiki ōitifishkikaki. Akka achipaifakakī tsōa achinima yorafoki mesekakī.

*“¿Xanīfo nō kori inātiromē noko yōkaito?” ixō Jesús yōkanifo
(Mt. 22.15-22; Mr. 12.13-17)*

²⁰ Nāskakaxō a ato feparamisfo nīchinifo Jesús fe yoinātanōfo fanīrira Jesús ato yoiaito nikakakī āto xanīfofo yoixikakī Jesús achinōfo. ²¹ Nāskakē nāfāfe yōkanifo: “Maestro, mā nō tāpia a mī yoiai anori chanīmakōi mī yoimis. Nā mī ato yoiai anoriri, nokori yorafāfe yoimisfo. Chanīmakōi mī yoimis nā Niospa fichipaiyai keskarakōi. Afara yoipaikai mī ranomisma, mēstekōi mī ato yoimis. ²² Akka chanīmamakī noko yoife na romanō xanīfo nō kopifatiromāki askayamakī nō kopifatiroma rakikīa,” ixō yoinifo.

²³ Akka Jesús tāpini feparapaiyāifāfe. Nāskaxō mā tāpixō ato yoini, ²⁴ “Ea kori exe fisti ispakāfe ē ōinō,” ato fatto ispaifono ato yoini iskafakī: “¿Tsōa femānā na keskaramē? ¿Tsōa aneri na kori exe ano keneamē?” ixō ato yōkaito kemanifo iskafakakī: “Nōko xanīfo César keskara,” faifono, ²⁵ Jesús ato yoini: “Akka na kori exe Césarnākē César inākāfe, akka Niosnākē Niosri inākāfe.”

²⁶ Ato askafaito nikakani, rateyanā yoinānifo: “Kee, na yoiai keskarakai tsōa finōtiroma. Tāpikī finakōia,” ikanax āa ranā yoinānifo. Nāskakē yorafāfe ōiaifono Jesús fanīrira mekamapaifiaifono fanīrira mekatiroma ini. “Kee, finakōia,” ikanax anā tsoa tooxinima.

*“Yora naax anā otoax ¿afeskatiromē?” ixō Jesús yōkanifo
(Mt. 22.23-33; Mr. 12.18-27)*

²⁷ Nāskata saducefofo Jesús ōifokani fonifo. Nā saduceofāfe yoimisfo iskakakī: “Yora naaxkai anā afeskax ototiroma,” ixō yoimisfo. Akka nāfāfe Jesúski fōkaxō yōkanifo ²⁸ iskafakakī: “Maestro, noko Moisés kirika kenexoni iskafakī yoikī: ‘Feronāfake fetsa āfiyax afeta fake akamax naano one fētsa nā kēro ifomafa fitiro āfe āfi inō. Mā fixō afeta fake atiro āfe ōchi fake inō,’ ixō Moisés keneni. ²⁹ Akka nō mia yoinō, nā naneti siete feronāfake inifo. Āto

ochi iyoa āfiyai taeni. Mā āfiyax afeta fake akamax nani. ³⁰ Mā āfe ochi naano chipokoto fini. ³¹ Nāskata nā chipoko fētsari nā kēro fini. Nāskarifiāi nāari nani afeta fake akamax. Nāskakanax akikinoax nai keyonifo nā siete feronāfake afeta fake akanamax. ³² Nāskata mā nai keyoafono nā kērori chipo nani. ³³ Akka, ¿fatoto mā otokaxō na kēro fixikanimē, nā fistimāi fīpakaxō?” ixō yōkaifono, ³⁴ Jesús ato kemani: “Yorafo nono mai ano niyokanax feronāfakefo fe kērofo fianāyokani. ³⁵ Akka fatorafāfe Niospa meka chanīmara faafono Niospa ato imasharatiro afe īpaxanōfo. Akka nāfo mā otokanax feronāfakefo fe xotofakefo anā fīanātirofoma Nios ika ari nokokanax. ³⁶ Nāskakē anā tsoa natiroma. Ājirifo keskara ixikani Niospa fakekōifori ixikani mā otokanax. ³⁷ Akka Moisés nikani oa fana kooai xoisai keskara mēranoax mekaito, yoikī iskafaito: ‘Mā nafianixakakī mā anā otoafō, ēfi Abraham ikaino Isaaca ikaino, Jacobo ikaino, ē āto Nioskōiki. Iskaratīa efe niafo,’ ixō yoiaito Moisés nikani. Nāskakē nō tāpitiro naax nō anā ototiro. ³⁸ Akka Epa Niospa naafoma keskara ato ōi Epa Niosnoax keyokōi niafo,” ixō Jesús ato yoini.

³⁹ Nā Moisés yoikī kirika keneni keskara ato tāpimamisfāfe ranārīto iskafakī yoinifo: “Maestro, mī ato yoisharakōi,” fanifo. ⁴⁰ Nāskakē anā tsoa yōkapainima, atomāi kemasharakōiaito akiki rāfikakī.

*“Akka, ¿tsōa fenamē Cristo?” ixō Jesús ato yōkani
(Mt. 22.41-46; Mr. 12.35-37)*

⁴¹ Nāskata Jesús ato yōkani: “Akka, ¿afeskakī Cristo David āfe fenara mā faimē? ⁴² Nā David Niospa Yōshi Sharapa shināmanaino fanāiti kirika keneni iskafaki:

Epa Niospa ēfe Ifo yoini iskafakī: ‘Mī efe xanīfokōi īpanakaki. ⁴³ Akka nā mia noikaspai fo mī ato finōkōinō ē ato mī nāmā nīchikai,’ ixō yoini. ⁴⁴ Akka, ¿afeskai Cristo David āfe fena itiomē, nā David Cristo ēfe Ifora fafiapaonino?” ixō Jesús ato yoini.

*Jesús ato yōani a Moisés yoikī kirika keneni keskara ato tāpimamisfāfe anorima ato yoiaifono
(Mt. 23.1-36; Mr. 12.38-40; Lc. 11.37-54)*

⁴⁵ Keyokōichi yorafāfe nikaifono Jesús aōxō tāpimisfo yoini, ⁴⁶ “Ōisharakakī. A Moisés yoikī kirika keneni keskara ato tāpimamisfāfe mato pārapaikani kiki. Akka nāfo rapati chainipa safekanax fofāsapaimisfo. ‘Noko yoisharakōinōfora,’ ikanax tsaoti sharakōi fenamisfo īchanāti pe xe anoxō, a piaifo anori sharakōi ano tsaopaimisfo, ‘Noko ōisharanōfora,’ ikanax. ⁴⁷ Nāskakaxō kēro ifomafa pe xe fīamisfo. Nāskatari Epa Nios chaikōi kīfimisfo, ‘Noko nikanōfora,’ ikaxō. Akka nāfo chanīmisfono Epa Niospa ato omiskōimakī finakōixii,” ixō Jesús ato yoini.

21

*Kēro ifomafa afaamaisfixō Epa Nios ināsharakōini
(Mr. 12.41-44)*

¹ Jesús ōini a kori ichapayafāfe kori naneti mēra kori naneaifāfe Nios kīfiti pexefā mēraxō. ² Nāskatari ōini a kēro ifomafa afaamaisfixō āfe kori exe rafe kori naneti mēra āfe kori nanekī mitofaito. ³ Nāskata ato yoikī iskafani: “Chanīma ē mato yoikōi, na kēro ifomāfa afaamaisfixō ato finōmainīfofā inākōia. ⁴ Akka na kori ichapayafāfe mā Nios ināfikakī tsōa keyo ināma, te xe faafo. Akka na kēromā omiskōifikī āfe kori rafe potakī mitokōia. Anā afanā a piai fitiroma,” ixō Jesús ato yoini.

*Jesús ato yoini na Nios kīfiti pexefā pāoixii ixō
(Mt. 24.1-2; Mr. 13.1-2)*

⁵ Nāskata a afe rafea fetsafāfe Nios kīfiti pexefāōnoa yoinifo iskafakakī: “Nōko Nios kīfiti pexefā sharafinakōia. Tokiri petsanāmeax nā kori icha-payafāfe afara sharafofikaxō nētakeafo,” ikaxō yoiifono, Jesús ato yoini: ⁶ “Akka na mā ōiai anākai tokiri petsanāmexima, keyokōi pāoixii. Na tokirifori maoui fetsexii,” ixō Jesús ato yoini.

*Afaa afeskaximākai mā chaima nōko mai keyoaino Jesús ato yoini
(Mt. 24.3-28; Mr. 13.3-23)*

⁷ Nāskakē yōkanifo iskafakī: “Maestro, ¿na mī yoiiai keskai afetīa iximē? ¿Afeskakō nō tāpitiromē na ixiai keskara?” ixō yōkanifo.

⁸ Askafaifono Jesús ato kemani: “Kexemesharakani mā ato nikaino mato afara chakafamatirofoki. ‘Ēfi Cristokī. Mē oa māto xanīfo ixiki,’ ixō mato pārapaikani kiki. Nāskakaxō afāfe yoikani kiki a ē yoimis keskara. Akka yoiiaifāfe ato nikayamakāfe. ⁹ Akka yorafo retenāifāfe nikai rateyamakāfe. Askatari a fetsafāfe āto xanīfofori potapaiyaifāfe nikairi rateyamakāfe. Nā ē mato yoimis keskakōiyoxii kiki. Nāskafiax nōko mai fena keyoxima, chipo ixii.

¹⁰ “Akka yorafo mai fetsa anoax mēenāpaiyaifono, yora fetsafori mai fetsa anoax retenāixikani. ¹¹ Nāskaifono nā mai fetsa anoafo mai naya naya ixii. Askatari fonāiki finakōixikani, afaa pikanima. Askatari pae finakōia ixii nā mai fetsa anofo. Askatari nā nai mēranoafori a ōimismafo ōixikani. Ratekōixikani.

¹² “Akka askayoamano, mato achikaxō fāsi mato omiskōimaxikani. Mato achikaxō judeofāfe āto ichanāti peke mēra mato iyokani xanīfofōfāfe mato yōkanōfo. Nāskakaxō mato karaxa mēra ikimakani xanīfofōfāfe. Eōxō mato askafakani. ¹³ Mato askafaifono mā eōnoa ato yoitiro. ¹⁴ Akka kayoxoma shināchakayamakāfe. Ē mato shināmanikai mā ato yoisharanō. Afaa nō ato faimē iyamakāfe. ¹⁵ Akka ē mato ato kemamasharakani fanīrira mato mekafaifono mā ato kemasharanō. Nāskakē nā mato noikaspaiifāfe mato kemakanima, fanīrira mā noko yoi tsōa mato faima. ¹⁶ Akka māto epafāfe māto efafo feta mato ato achimaxikani. Māto ochifāfe, māto kaifofōfāfe mato fe rafemisfāferi mato askafaxikani. Akka ranāri mato retexikani. ¹⁷ Akka eōxō yorafāfe keyokōichi mato noikaspaxikani. ¹⁸ Akka mato noikaspaiifono Epa Niospa mato kexesharai mato retefaifonokai māto fero mēsho fenonakama. ¹⁹ Akka afara afeskara ifiaino ea shināmakiyamakāfe. Nāskax mā efe isharapakenakaki.

²⁰ “Jerusalén anoafo sorarofāfe ato cheteafono mā ōikī mā tāpitiro mā chaima ato reteafono, āto pexefori pāo iki keyoi. ²¹ Nāskakē a Judea ano ikafo māchi keya ari ichotanōfo. A Jerusalén ano ikafori nā pexefā rasi mēranoax tsekenōfo. A Jerusalén pasotai ikafori anā Jerusalén ano feyamanōfo. ²² Nā Niospa meka yoikī kenenifo keskakōi fakī Jerusalén anoafo Niospa ato omiskōimani. ²³ Askatari a kēro fake naneafo fe a fake yome pishta chocho amaifo omiskōixikani māmāi yorafo omiskōifinakōiaifono. Nāskakē nā Judea mai anoafo omiskōifinakōixikani, Niospa ato omiskōimanaino. ²⁴ Ranāri ato kenopa retokani. Akka ranāri ato achikaxō karaxa mēra ato ikimakani mai fetsafo ano. Ato askafaifono nā judeofoma Jerusalén ano iyokani. Akka nā Niospa ato omapaiyaitīa judeofo Jerusalén ano anā fexikani,” ixō Jesús ato yoini.

*Niospa Fake fotoaino afe keskara iximākai ixō Jesús ato yoini
(Mt. 24.29-35, 42-44; Mr. 13.24-37)*

²⁵ Anā Jesús ato yoini iskafakī: “Nāskakē xini fe oxe fishifori a nō ōimis keskara anā iki fetseima. Fetsa keskara iki fetsei. Askaito ōikani nono mai anoafo ratekōixikani. Fākafāri poo iki meseniaito nikakani. Ratekōixikani

nōkai iskara afaa òimisma ikanax. ²⁶ Nāskaito òikani yorafo ratekani shinā fenoyotaxikani. Afarafo afeskaraito òikani a òiyomisfoma keskara òikani. ²⁷ Nāskatari ea òixikani ē nai mēranoax nai kōinī ē fotoiyoafo. Shara finakōia ē fotoafo ea òixikani. ²⁸ Nāskakē nā ē mato yoiai keskai taei afarafo afeskaraino, inimayanā ea manasharakāfe, ea chanīmara fayana. Mē chaima okī ē mato ifirisa fatanō,” ixō ato yoini Jesús.

²⁹ Nāskaxō anā meka fetsafaxō ato yoini iskafakī: “Akka shinākāpo yōkka fiyafi ifi fetsaōnoa. ³⁰ Āfe pei siri ikaito òikī mā tāpitiro māmāi chaima xiniafo. ³¹ Nāskarifiakī mā tāpitiro nā ē mato yoimis keskara afarafo afeskaraito òikī mā chaima Nios Xanīfo oi kiki xanīfo ikiyoi nono nāmānoax.

³² “Akka ē mato pāraima. Na afarafo ē mato yoiai keskaito na yorafāfe nayokaxoma òiyokani. ³³ Akka nai fe mai keyoi. Akka ēfe meka fisti keyonakama na ē mato yoiai keskakōi.

³⁴⁻³⁵ “Nāskakē kexemesharakāfe mātō òitinī afaa chaka shinākakīma. A mā pāepaiyai fisti shināyamakāfe. Afaa fetsafori shināyamakāfe. Anori shinākī a ikaifo keskakī mā ea chanīmara fatiromaki. Akka afo itipinīsharafomano ē nokorisataxii. Māraki poomānā tanasharaxma tarapa faafo mēra ikiyamatiro. Māri nāskatiro ea shināxma. Nāskata afarafo afeskara iki fetseaino nā mai tio anoax omiskōi fetsexikani. ³⁶ Nāskakē itipinīsharakāfe, Epa Nios mēxotaima kīfifafāikāfe afara afeskaraino omiskōixikakima. Nāskax mā ekeki chipo nokoaino ē matoki inimaxikai,” ixō Jesús ato yoini.

³⁷ Nāskata Jesús pena tii Nios kīfiti pexefā mēraxō ato yoini. Akka fakish tii machi āfe ane Olivos ano oxatai apaoni. ³⁸ Nāskakē yorafā rasi pena tii akiki fepaonifo Nios kīfiti pexefā ano. Anoxō ato yoiafo nikai fekani.

22

“¿Afeskaxō nō Jesús retetiromē?” ixō shinānifo

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Mā chaima fista ikaino a Niospa ājirinī Egipto anoxō āto fake iyoafo retenima shinākakī pāa faraxatimais pipaonifo, Pascua fistatīa. ² Afia penata a ato Nios kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe afeskaxoma Jesús pāraxō retepaikani yorafoki ratenifo.

³ Nāskaifono Judas mēra Satanás ikini. Nā Judasri Jesús āfe ina ini. Āfe ane fetsa Iscariote ini. ⁴ Nā Judas kani a ato Nios kīfixomis xanīfofo yafi a anoxō Nios kīfiti pexefā kexemisfo xanīfofo yoikai. Anoxō ato yoini iskafakī: “¿Afeskaxō ē mato Jesús achimatiromē?” ixō ato yōkani. ⁵ Akiki inimayanā yoikī iskafanifo: “Aicho, nō mia kori ināi mī noko ato Jesús achimaxonō,” ixō Judas yoiaifono, ⁶ “Ia. Ē mato achixonō,” ixō ato yoini. Nāskaxō Judaspa shināni afetīa ē ato Jesús achixotiromē ini. Yorafā rasichimāi naki faafono afeskaxō achitiroma ini.

Mā chaima reteaifono Jesús aōxō tāpimisfo feta yātapake pini

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Akka nā fista Pascuatīa pāa faraxatimais pinifo. Afia penatari oveja fake retexō Nios ināpaonifo āto xinifāfe anifo keskafakī. Akka mā fista pakeano, ⁸ Jesús Pedro yafi Juan nīchini ato yoikī iskafayanā: “Fokaxō itipinīsharafatakāfe fistatīa nō pinō,” ato faito, ⁹ kemanifo: “¿Fanīxō nō itipinīsharafaikaimē?” faifono, ¹⁰ Jesús ato kemani: “Mā mā pexefā rasi ano nokoxō feronāfake fisti mā fichi kaikai keshoki faka tetsaomexō foikaino. Nā chīfafaikāfe fato pexe mēra ikikaimākai òixikakī. ¹¹ Nānoxō nā pexe ifo yoikī iskafaxikakī: ‘Nōko Ifāfe noko yoikī iskafakī: “Fato pexe kene mēraxō eōxō tāpimisfo feta fistatīa ē pitromāki ixō yōkatakāfe nōko Ifāfe noko faa,” mā

faito, ¹² nãato mato ispai kiki pexe keya kene efapaya itipinĩsharakõia. Nãno itipinĩsharafakãfe anoxõ nõ pinõ,” Jesús ato fani.

¹³ Nãskata mã fokaxõ fichinifo nã Jesús ato yoia keskarakõi. Nãskaxõ itipinĩ fanifo Pascua fistatĩa pixikakĩ.

¹⁴ Mã itipinĩshara faafono, Jesús a aõxõ tãpimisfo fe kaax, mãsa ano tsaoni. ¹⁵ Nãskaxõ tsaofono Jesús ato yoini: “Ë mato feta pipaitiani na fista Pascuatĩa ã nayoxoma. ¹⁶ Akka ã mato yoikõi êkai anã mato feta Pascua fistatĩa pifainakama. Akka nã mã Epa Nios xanĩfo ano nokoaitĩa ã mato feta pixii inimayanã.”

¹⁷ Nãskata kecho tsomainĩfofã Apa Nios kĩfikĩ, “Aicho,” fata, ato yoikĩ iskafani: “Na mato tiito ayakãfe. ¹⁸ Ë mato yoikõi ã anã mato feta na fimi ene ayaima. Akka nã ãfe Epa Nios fe ã xanĩfo ixõ keyokõi ã yorafo ãkixõ na fimi exe ã anã ato feta ayaxii,” ixõ ato yoini.

¹⁹ Nãskaxõ anã pãa tsomainĩfofã, Apa Nios kĩfikĩ aicho fata, ato pãa kaxkex-opakeyanã ato yoikĩ iskafani: “Nafi efe nami keskaraki. Matoõnoax ã nai. Nãskakẽ nã mã piatĩa ea shinãfafãikãfe,” ixõ ato yoini.

²⁰ Nãskarifiakĩ kecho tsomainĩfofã nã pixõ ato yoini iskafakĩ: “Na ayatiõxõ ã mato afara fenashara yoi iskafakĩ: Ëfe imi foaino ã matoõnoax nai mã ãfe Epa Nios fe ãpaxanõ.”

²¹ “Akka nã efe mãsa ano tsoa fẽtsa ea ato achimani. ²² Akka nã eõnoa yoikĩ kirika kenenifo keskakõi ã naikai. Akka nã ea ato achimanai akairi omiskõi finakõi,” ixõ Jesús ato yoini.

²³ Ato askafaito nikakani ãa ranã yoinãi fetsenifo: “¿Fatotokai nõ achiman-imẽ?” ikanax ãa ranã yoinãnifo.

Akka, ¿tsoa sharafinakõiamẽ?

²⁴ Nãskakẽ aõxõ tãpimisfo feratenãnifo fatokai sharafinakõiamẽ ikanax. ²⁵ Nãskaifono Jesús ato yoini iskafakĩ: “Nã yora fetsafo xanĩfokaxõ ato ferateyanã ato yonomamisfo. Ato askafafiakakĩ nõko xanĩfo noko afara shara faxõ fafãini ixõ nokoõnoa yoikãfe, ato famisfo.

²⁶ “Akka mãri askayamakãfe. Askatamaroko nã sharafinakõia mãto exto chipoko keskara ikãfe. Nã chipokofãfe ãto iyoafo ato yonoxosharatirofo keskara ikãfe. Akka xanĩfo ipaikakĩ fetsafo sharafakãfe ato axosharaxikakĩ. ²⁷ Akka, ¿fatokaimẽ sharafinakõia, nã mãsa ano tsoaxõ pimisraka, askayamai nã ato pimamisraka? Akka nã mãsa ano tsoaxõ piai nã sharafinakõia. Akka ã mato fe ixõ ã mato yonoxomis keskara ã imis.

²⁸ “Akka mã efe itiani mã ea potamisma, na afara chakafãfe ea chakafafaino. ²⁹ Nãskakẽ ãri mato xanĩfo imaxii, ãfe Epa Niospa eari xanĩfo imaino. ³⁰ Akka mã efeta pita efeta ayata mã faxii ãfe mãsa ano tsoaxõ. Nãskakẽ mã mã xanĩfoxõ nã doce nõko kaifo israelifãfe mã ato ãkixii,” ixõ Jesús a afe rafeafo yoini.

“Ë Jesús õimisma, Pedro ixiaino,” Jesús ato yoini (Mt. 26.31-35; Mr. 14.27-31; Jn. 13.36-38)

³¹ Nãskata nõko Ifãfe Simón yoini iskafakĩ: “Simón, õipo Satanás Nios yõkaxõ mato afara chakafamapai, mã ea potanõ. ³² Akka ã mia Epa Nios kĩfixoni mã ea nikakĩ xateyamanõ. Akka mã mã paxkafixõ mã ea anã Ifofakõixõ a mefeta ea Ifofafo ato yoisharafe ea Ifosharafanõfo,” ixõ yoiato, ³³ Simón kemani: “Ëfo, ã mia potanakama. Mia karaxa mãra ikimanaifono ãri mefe kai. Mia reteaifonori ãri mefe nai,” faito, ³⁴ Jesús kemani: “Pedro, ã mia yoi iskaratĩa takara fene keoyoamano mã ato yoi iskai: ‘Ë Jesús õimisma,’ ixõ mã ato yoikĩ tres fai,” Jesús fani.

“Mē samamashta omiskōikai,” Jesús ato fani

³⁵ Nāskafata Jesús anā ato yoini iskafakī: “Ē mato nīchiyamea pishamais koriri mā foyameama, saporori mā fotima. Akka ē mato nīchia kaxō ¿mā afaa yopatimē?” ato faito kemakakī iskafanifo: “Maa. Nōkai afaa yopatima,” fanifo.

³⁶ Nāskata ato yoini iskafakī: “Akka iskaratīa nā pishayato āfe pisha foikanō, āfe koriyafi. Akka nā keno yamato āfe rapati minixō kori fixō, nā kōri keno fetsa finō. ³⁷ Akka ē mato yoi nā eōnoa yoikī kirika kenenifo keskai mē askakōi. Ē askarayamafiano ea pārakani yora chakafāfe, ‘Nato ato chakafamis,’ ea fakani. Nāskakē nā eōnoa yoikī kirika kenenifo keskara nē askakōi,” ixō ato yoiato, ³⁸ a aōxō tāpimisfāfe yoinifo: “Ifo, nono keno rafe,” faifono, ato kemani: “Nā rafe inōkī anā nō yopaimakai. Nāskanō,” ixō ato yoini Jesús.

Getsemani anoxō Jesús Apa Nios kīfini

(Mt. 26.36-46; Mr. 14.32-42)

³⁹ Nāskata Jesús kani nā Kamis keskai machi Olivos ano. Aōxō tāpimisfori afe fonifo. ⁴⁰ A Kamis ano mā nokoxō ato yoini: “Epa Nios kīfikāfe Satanás mato afara chakafamapaiyai keskara axikakīma,” ixō ato yoini.

⁴¹ Ato askafata ato makinoax orishta kaxō Apa kīfini ratokonō mai chachipakefofā. ⁴² Apa kīfikī iskafani: “Epa, ea ifipaikī ea ifife ē omiskōinōma. Akka nā ē apaiyai keskafakīma, nā mī ea amapaiyai keskafafe,” Apa faino, ⁴³ āfe ājiri nai mēranoax akiki nokorisatani mitsisipakōi imaxiki. ⁴⁴ Shināmitsai finakōiyanā, Jesús Apa kīfini nā omiskōiai shināyanā. Nāskaino āfe nīskaya āfe imi mai ano tosinī.

⁴⁵ Mā Apa kīfita fininākfāta, aōxō tāpimisfo ari kani. Kaxō ōia oxafō inifo shināmitsai finakōikani āto Ifo omiskōiaino. ⁴⁶ Nāskaxō ato yoini: “¿Afeskai mā oxaimē? Fininīfofākāfe Epa kīfixikakī Satanás chakata mato afaa chakafamayamanō,” ato fani.

Jesús achinifo

(Mt. 26.47-56; Mr. 14.43-50; Jn. 18.2-11)

⁴⁷ Jesús ato yoiaino yorafā rasi nokotoshinifo. Nā āfe ane Judas, nāri Jesúsxō tāpimis iyopaoni, nā Judas rekē oaino acho yorafā rasi fenifo. Nā Judas Jesús ari kani kokoikai. ⁴⁸ Askafaito Jesús yoini iskafakī: “¿Judas, ea mīa kokoxō mī ea ato achimanimē?” fani.

⁴⁹ Askafaito ōikakī a aōxō tāpimisfāfe Jesús yōkanifo: “¿Ifo, nō ato kenopa rerapaketromē?” ixō yōkanifo.

⁵⁰ Nāskata fētsa nā ato Nios kīfixomisto āfe xanīfāfe ina āfe pacho kayakai aōri paxteni. ⁵¹ Askafaito ōikī Jesús yoini iskafakī: “Enefe. Nāskanō,” fata afianā koshikōi xanīfāfe āfe ina āfe pacho ramākaxō pacho tichixotani. ⁵² Nāskaxō ato yoini a Nios kīfixomis xanīfofo yafi a Nios kīfiti pexefā kexemis xanīfofo, nā anifo tiiri mā ifi feafono ato yōkani: “¿Afeskai kenofoya ifixatefoya mā oamē ea achiyoī oa ē yometso keskarakē? ⁵³ Pena tii ē mato fe itiani Nios kīfiti pexefā mēraxō ē mato tāpimani, akka māakai ea achipaimisma. Akka na fakishi mā ekeki oa Satanás mātō ifono,” Jesús ato fani.

“Ē Jesús ōimisma,” Pedro ini

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Jesús achixō iyonifo a ato Nios kīfixomis xanīfāfe pexe ano. Akka Pedro acho chipo kani. ⁵⁵ Akka pexe emāiti chii ketefaax tsaοax yoafono Pedrori nāno ato fe tsaοax yooni. ⁵⁶ Nāno ato fe tsaοax yooaino xanīfo yonoxomis xomayato fichixō yoini iskafakī: “A nari Jesús fe imiski,” faito,

⁵⁷ Akka Pedro iskani: “Ĕkai Jesús ōimisma. Mĩ ea pārai,” faito, ⁵⁸ fētsari tāpixō yoini iskafakī: “Mĩfi na Jesús fe imiski,” faito, Pedro kemani: “Maa. Ĕkai Jesús fe imisma,” fani.

⁵⁹ Mā askafaafo samaraka pishtano, fetsari anā iskafani: “Chanĩma, a nafi Jesús fe imiski. A na feronāfake Galilea anoa,” faito, ⁶⁰ Pedro yoini iskafakī: “A mĩ yoiāiōnoa ě tāpiama tsoaraōnoa mĩ yoi ě tāpiama,” Pedro faino takara keoinākfāni.

⁶¹ Pedro askaito Jesús texkeakekafā festani. Festanaino Pedro shinātani nā āfe Ifāfe yoia keskara. “A takara keoyoamano, ‘Ĕ Jesús ōimismara,’ ixō mĩ ato yoi tres fakī,” Jesús faa nā Pedro shinātani. ⁶² Nāskakē nānoax tsekekaini kaax Pedro shināmitsai oiāi finakōini.

Jesús kaxemetsama fanifo

(Mt. 26.67-68; Mr. 14.65)

⁶³ Nāskakē nā kexeafāfe Jesús kaxemetsama fanifo koshaketsayanā. ⁶⁴ Nāskata feopokaxō yōkanifo: “Noko yoife tsōa mia koshamakī.”

⁶⁵ Nāskakata ĩchaketsanifo afara fetsa yōkaketsayanā.

Xanĩfo tiito Jesús yōkanifo

(Mt. 26.59-66; Mr. 14.55-64; Jn. 18.19-24)

⁶⁶ Mā penano a judeofāfe āto xanĩfofo ichanānifo. Nā ato Nios kĩfixomisfāfe āto xanĩfonō, a Moisés yoikī kirika keneni keskara ato tāpimamisfori ato fe ichanānifo. Nāskakaxō Jesús iyonifo xanĩfo finakōia ano. Nārixō yōkanifo iskafakakī: ⁶⁷ “Noko yoife mĩmākī Cristo.”

Askafafono ato Jesús kemani: “Ĕje, ě mato faitokai mā ea chanĩmara faima. ⁶⁸ Ĕri mato yōkaito mā ea kemaima. ⁶⁹ Akka iskaratīa ěfe Epa Nios ketaxamei ě tsaosharakōi. Nāmāi fasi finakōikē afama mĩshti atiro,” ixō ato yoiāito, ⁷⁰ keyokōichi yōkanifo: “Akka, ĩmĩmē Niospa Fake?” ixō yōkaifono Jesús ato kemani: “Nā mā yoiai keskarakīa ě,” ato fani.

⁷¹ Ato askafaito nikakakī anā yoinifo iskafakākī: “ĭNikakapo! Nōkai anā aōnoa meka fetsa nō nikapaima. Mā nōakōi nō nika noko yoiaito,” ikanax yoinānifo.

23

Pilato ano Jesús iyonifo

(Mt. 27.1-2, 11-14; Mr. 15.1-5; Jn. 18.28-38)

¹ Nāskakata keyokōi fininĩfofākāta Jesús iyonifo Pilato xanĩfo finakōia ano. ² Nāskakata judeofāfe Jesús chakafakakī yōanifo iskafakakī: “Na feronāfāke nōko kaiffofo ato chakafamai iskafakī yoikī: ‘Na romanō xanĩfokōichi mato kori yōkaito ināyamakāfe,’ ato faa. Nāskatari, ‘Ĕkīa Cristo, ea Niospa nĩchia ě mātō xanĩfo inō. Ĕ Niospa Fake,’ noko faa,” ixō Pilato yoinifo.

³ Askafafono Pilato yōkani: “ĭMĩmē judeofāfe xanĩfo?” ixō yōkaito Jesús kemani: “Ĕje, nā mĩ ea yoiai keskarakīa,” fani.

⁴ Nāskafaino Pilato nā ato Nios kĩfixomis xanĩfofo yafi nā ano niafo yoini iskafakī: “Na feronāfākekai afaa chakafaa ě ōima,” ato fani.

⁵ Ato askafaito fāsikōi mekainĩfofā yoinifo iskafakakī: “Na feronāfāke ato tāpimayanā pexefo tii anoa ato chakafakī mekafamafofāsafai. Galilea anoxō ato taefamati, iskaratīa nono Judea anoxori ato askafamai,” ixō yoinifo.

Jesús Herodes ano iyonifo

⁶ Askafafāfe nikakī Pilato ato yoini: “ĭChanĩmamē na feronāfake Galilea anoamē?” ato faino, ⁷ “Ĕje, nānoa,” fanifo. Nāskaxō xanĩfo Herodes ano nĩchini,

nã Herodesmã Galilea anoax xanĩfokẽ. Nãskafaifono Herodes Jerusalén ano oni. ⁸ Jesús õi Herodes inimakõini, mẽxotaimamã õipaikatsaxakĩ, aõnoa yoiãifãfe nikakatsaxakĩ afama mĩshti feito õipaikĩ. ⁹ Nãskaxõ afama mĩshtifo yõkaketsani. Akka Jesúskaĩ pishta kemanima. ¹⁰ Nãskano nãnorĩ inifo, a ato Nios kĩfixomisfãfe ãto xanĩfofo fe a Moisés yoikĩ kirika keneni keskara ato tãpimamisfo, nãfãfe Jesús mekafakĩ chakafanifo. ¹¹ Nãskakẽ Herodes ãfe sorarofõ feta chakakõifayanã kaxemetsama fanifo. Nãskakaxõ rapati nana safemanifo nã rapati xanĩfonã. Nãskaxõ Herodes anã Pilato ano Jesús nĩchĩni. ¹² Nãskatari Pilato fe Herodes rafe fatanãnifo. Akka taeyoi chakafatanãyopaonifo.

Pilato ato yoini Jesús retenõfo

(Mt. 27.15-26; Mr. 15.6-15; Jn. 18.39-19.16)

¹³ Nãskaxõ Pilato ato ichanãfani a ato Nios kĩfixomis xanĩfofo yafi xanĩfo fetsafo, askatari a ano ikafori ato ãchanãfani. ¹⁴ Nãskaxõ ato yoini iskafakĩ: “Mã ekeki na feronãfake efea iskafakĩ yoianã: ‘Nato yorafo chakafakĩ mekafa,’ ixõ. Akka mãto ferotaifi mẽ yõka. Natokai afaa chakafa ã õima, askatarikai ato chakafakĩ mekafaama a mã yoiaĩ keskafakĩ. ¹⁵ Akka Herodesri aõnoa afaa chaka nikama. Nãskaxõ nokoki anã nĩchia. Mã mã õi natokai afaa chakafaama napanã. ¹⁶ Akka ã omiskõimakĩ tãpimani, chipo anã nĩchixiki katanõ,” ixõ ato yoini.

¹⁷ Akka Pascua fistatã Pilato ato inimamapaoni yora fisti karaxa mẽranao tsekakĩ. ¹⁸ Akka keyokõĩ fãsikõĩ mekainĩfofãnifo. “¡Na chaka retefe, Barrabás noko kãimaxoxiki!” fanifo.

¹⁹ Nã Barrabás karaxa mẽra ikimanifo pexefã rasi anoxõ romanõfãfe ãto xanĩfo nõ potanõ fãsikõĩ mekainĩfofãkãfe ato feito. Askatari ato retekẽ karaxa mẽra ikimanifo. ²⁰ Akka Pilato Jesús nĩchĩpaikĩ, afianã yorafo yoini. ²¹ Ato askafaito nikakakĩ yorafãfe fãsikõĩ mekafainĩfofãnifo: “¡A chaka mastafe!” fanifo.

²² Askafaifono afianã Pilato ato yoini: “Akka, ¿afaa chakafamẽ? Natokai afaa chakafa ã õima. Afeskaikai natiroma. Akka ã omiskõimakĩ finata ã nĩchi katanõ,” ato feito, ²³ akka afo mẽxotaima mekarianifo. “¡Mastafe!” faria fanifo. Askafaria faifono, “Mãa akãfe,” ato fani. ²⁴ Ato iskafakĩ, yoianã, “Nã mã apaiyai keskafakãfe” ato fata, ²⁵ nãskaxõ nã Barrabás karaxa mẽranao kãimani, “Noko kãimaxõfe,” faifono. Nã Barrabás karaxa mẽra ipaoni xanĩfofo potapaita ato retekatsaxakĩ. Nãskaxõ Jesús ato inãni nã apaiyai keskafanõfo.

Jesús ifi cruz ikaki mastanifo

(Mt. 27.32-44; Mr. 15.21-32; Jn. 19.17-27)

²⁶ Mã Jesús mastafokakĩ iyokakĩ, feronãfake fisti fichikaxõ yoinifo cruz foxõikanõ. Nã feronãfake Cirene anoa ini, ãfe ane Simón. Oriax oaito fichikaxõ cruz iyamanafono Jesús acho cruzya kani.

²⁷ Nãskakẽ yorafã rasi kẽrofo fe oiakani, fiisi fonifo. Acho fokani, shinãmitsakani ãto Ifo shinãkani. ²⁸ Nãskaifono Jesús ato õikĩ ato yoini iskafakĩ: “Kẽrofo Jerusalén anoafõfãfe, eõnoax õiayamakãfe, eõnoax õiakĩmaroko mãã ranã oia faatanãkãfe, mãto fakefoõnoaxri oiakãfe. ²⁹ Akka chipo a mã omiskõiai nokoxii, nãskakẽ mã yoikĩ iskafaxii: ‘Inimakãfe a fake fimisfoma, mã nofe omiskõikeranaki,’ ixõ mã yoixii. ³⁰ Nãskakẽ yorafãfe machi yoikĩ taefakĩ iskafaxikani: ‘Nokoki mãchifã mafakerafe noko fepoxiki nõ narisanõ omiskõixikima,’ ixõ yoixikani. ³¹ Ë afaa chakafayamafiamiskẽ ea iskafakani. Akka nã afara chakafakĩ xateyamaifo omiskõimakĩ finakõikani,” ixõ Jesús ato yoini.

³² Nāskata yora chaka raferi iyonifo Jesúsya mastai fokakī. ³³ Nāskata a mastai fo ano nokonifo āfe ane Mapo Xao ano. Nānoxō Jesús mastanifo. Yora chaka rafeya fetsa takai fetsa ata, fetsari takai fetsa anifo. ³⁴ Nāskaxō mā mastafono Jesús Apa kīfini: “Epa, ato raefafe na ea iskafai fo tsōa tāpiamakī,” Apa fani.

Nāskano soraroforo ato kaxetiya kaxenifo mā kanākanax Jesús rapati paxkanāxikakī. ³⁵ Nānoxō yorafāfe ōinifo. Nā xanīfofofāfe kaxemetsamafai fono iskafayanā: “Nō ōinō nato yorafo ifmiski, iskaratīa āari ifimeimākai. Niospa Fakeaxroko āa ifmei kiki a Niospa katonino,” fanifo.

³⁶ Sorarofori Jesúski kaxemetsamanifo. Nāskaxō akiki fokaxō fimi ene kacha ayamapainifo. ³⁷ Iskafakī yoiyanā: “Mī judeofāfe āto xanīfomākī mīari ifimefe,” fanifo.

³⁸ Nāskaxō āfe mapo mǎnāori tafara kenekī iskafanifo: “Nafi judeofāfe āto Xanīfoki,” fanifo.

³⁹ Nāskano nā aya mastai fo fētsa Jesús chakafakī mekafani iskafakī: “Mī Cristomākī mīa ifimeta nokori ifife,” faito, ⁴⁰ akka fētsa yoikī iskafani: “Askafayamafe. ĵMī Nioski meseimamē a mī afara chakafaax omiskōiai?” fani. ⁴¹ “Akka nō omiskōikōi chanīmakōi nōmāi afara chakafakatsaxakī. Akka na feronāfakekai afaa chakafama na omiskōiai,” fani.

⁴² Nāskaxō nāato Jesús yoini iskafakī: “Ifo, xanīfo finakōixō ea shināfe,” faito, ⁴³ Jesús kemani: “Ē mia pāraima iskaratīakōi mī efe kai nā sharafinakōia ari mī efe inimakōipakenaka,” fani.

Jesús nani

(Mt. 27.45-56; Mr. 15.33-41; Jn. 19.28-30)

⁴⁴ Nāskata xini keya nā mai tio fakishifākōitani. Nāskax mā xini kaino anā penatani. ⁴⁵ Nāskakē xini peinima. Nāskaino sama nami Nios kīfiti pexefā mēranoax nakirafekōi faxtepakekafāni. ⁴⁶ Nāskaino Jesús fāsikōi Apa kenani: “Epa, ea ifife ē mia ano kanō,” fata, nāskax nani.

⁴⁷ Nāskaito soraro xanīfāfe ōikī, Epa Nios aicho fayanā iskafakī yoini: “Chanīma, na feronāfake afaa chakafamisma,” ixō yoini.

⁴⁸ Nā ano niafāfe ōinifo Jesús naito. Nānoax fokani, oiai finakōi fonifo Jesús shinākani. ⁴⁹ Akka nā Jesús ōimisfāfe ano nētekaxō chai nikaxō ōinifo. Kērofāferi ōinifo, Galilea anoax afe foitaxakakī.

Jesús makex kini mēra maifanifo

(Mt. 27.57-61; Mr. 15.42-47; Jn. 19.38-42)

⁵⁰⁻⁵¹ Nāno feronāfake sharakōi fisti ini. Nāato Nios Ifofasharapaikōini. Āfe ane José, Arimatea anoa ini judeofāfe āto xanīfo. Nā José Nios xanīfokōi manapaoni. Nāatokai xanīfo fetsafāfe shināifo keskara shināpaonima. ⁵² Nā José Pilato ano kaxō Jesús yora yōkani maifai axiki. ⁵³ Mā yōkatani oxō cruz anoa fotomaxō sabanā fena sharakōipa rakoxō iyoxō mafa kini mēra rātani, a tsoa maiyomisma mēra. ⁵⁴ Nā penata itipinīshara fanifo, mā chaima safaro faino, ⁵⁵ kērofo Jesús fe Galilea anoax foitaxakakī. Nāfāfe José chīfafainifo afeskaxō kini mēra Jesús rātaimākai ōifokakī. ⁵⁶ Mā āto pexe ano fēkaxō, pirofomā yafi a aō tereati itipinīsharafanifo. Akka kērofāfe judeofāfe pena tenetitīa teneyonifo nā Moisés yoini keskafakī.

24

Jesús otoni

(Mt. 28.1-10; Mr. 16.1-8; Jn. 20.1-10)

¹ Akka nã pena teneti safaro mã finõfaano nomĩkonõ fakishparikõĩ fonifo a Jesús maia ano. Pirofomã foifokani mã itipinĩshara fakaxõ. ² Mã nokokaxõ õiafo a kini a aõ fepoitafo tokirinĩfã mã fepekemea ini. ³ Akka ikifaikakĩ õiafo ãto Ifo Jesús ãfe yora ano inima. ⁴ Nãskai ratekõiyã afeskamẽ ikaxõ shinãpaiyaifono, feronãfake rafe ato ketaxamei nĩtani, ãto rapati fafekõiyã. ⁵ Nãskaifono kerofo ratekõiyã maikiri fepepakefõfãnifo. Nãskaifono nã ãjiri rafeta ato yoini: “¿Afeskakĩ nã yora nia mã fenaimẽ na yora nakẽ maifamisfo mẽranoa? ⁶ Anãkai nonoma, mã otokaina. Akka shinãkapo a Galilea ano iyoxõ mato yoimis keskara. ⁷ ‘¿A yora chakafãfe ea achikaxõ ea mastafono tres nia oxata ã anã otoxira,’ mato feito mã nikamismamẽ?” ixõ ãjiri rafeta ato yoini.

⁸ Ato askafaino a Jesús ato yoimis anori shinãnifo. ⁹ Nãskakata nã Jesús maita anoax anã fekakĩ, nã once aõxõ tãpimisfoya nã fetsafori ato yoitoshinifo nã õitanaifo keskara. ¹⁰ Akka nã Jesúsnoa ato yoimiski chanifõfãifo tii, María Magdalena ikaino Juana ikaino Santiago ãfe afa María ikaino kero fetsafori inifo.

¹¹ Akka a aõxõ tãpimisfãfe, “Ãa chanĩkanira,” ato fanifo. Ato nikakaspanifo.

¹² Ato askafaifono nikai Pedro fareke kaini, a Jesús maita ano õikai. Kaxõ õia kini mẽra a aõ rakoita sabanã fisti mania ini. Nãskax anã Pedro pexe ano oni, “Kee, ¿afeskaitamẽ?” ikax.

Jesús Emaús ano fãĩ kani
(Mr. 16.12-13)

¹³ Afia pena fistichi Jesús fe rafemisfo rafe pexe rasi ãfe ane Emaús ano fonifo. Jerusalén fe Emaús once kilometro ini. ¹⁴ Fokakĩ yoifonifo a Jesús reteitafo. ¹⁵ Yoinãfõfãifono Jesús atoki nokoax ato fe fãĩ kani. ¹⁶ Akka mã õifikakĩ tsõa tãpinima, Niospa ato onãtimafaino. ¹⁷ Askafõfãifono Jesús ato kemani: “¿Tsoaõnoa mã yoifokaimẽ fãĩ kakĩ?” ato faino tsoa tooxinima nãno nẽtenifo shinãmitsakõiyã.

¹⁸ Nãskaito nã ãfe ane Cleofás kemani: “¿Meres fisti mĩ Jerusalén ano ixõ, mĩ tãpitamamẽ na rama iskaita?” feito, ¹⁹ Jesús kemani: “¿Afaa afeskaitamẽ?” ato feito yoinifo: “Jesús Nazarete anoa nõ yoi, nãatofi Niospa meka yoimiskĩ. Nãskakẽ yorafo akiki inimakõimisfo, Niosri akiki inimakõimis. Niospa ãfe sharaõxõ noko yoimis Niosxõ afama mĩshti noko faxomis. ãfe mekapa yorafo sharafata afara sharafo noko axomis. ²⁰ Nãskafiaito a ato Nios kĩfixomis xanĩfofo feta nõko xanĩfofõfãfe achikaxõ ato inãitafo retekaxõ mastanõfo. ²¹ Akka nã nõko kaifo israelifo romanõfo anoa ifimis ipainõra nõ famis nõko xanĩfo ixiki romanõfãfe anã noko afeskafanõfoma. Akka mã tres nia finõa a naita. ²² Akka nã kerofo nofe ikafãfe noko yoikakĩ noko ratekõiafo. Fakishparikõĩ a maia ano õifokaxõ õiafo ãfe yora ano ikama. ²³ Ano ãfe yorakẽma õitakani pexe ano anã feafo. Nãskaxõ yoiafo a ãfe ãjiri rafeta atoki nokoxõ ato yoiafo keskara iskafakĩ: ‘Jesús naama, iskaratĩa nia,’ ato faafono. ²⁴ Nãskakẽ nofe yora rafe chipo a maia ano fokaxõ õiafo nã kerofãfe yoiafo keskarakõĩ ika. Akka Jesús ãfe yora ano ikama.”

²⁵ Nãskafaifono Jesús ato yoini iskafakĩ: “Kee, mãkai afaa tãpiama, mã tatimakõĩ. Akka a Niospa meka yoimisfãfe yoinifo keskarakai mã chanĩmara faima. ²⁶ Akka kenenifõ iskafakĩ: ‘A Niospa nĩchia Cristo omiskõikõifiãx, chipo Apa Nios fe xanĩfokõĩ ixii,’ ixõ aõnoa kenenifo,” Jesús ato askafani.

²⁷ Nãskaxõ ato yoikĩ taefani a aõnoa yoikĩ kenenifo, a Moisés aõnoa yoikĩ keneni yoita, a Niospa meka yoimisfãfe aõnoa yoikĩ kenenifori; nãfo ato fe kakĩ ato yoifoni.

²⁸ Mã chaima pexe rasi ano nokokakĩ nã rafeta shinãnifo: “Noko finõfainikaira,” ikaxõ. ²⁹ Akka nã rafeta nẽtefanifo iskafakĩ yoianã: “Kaya-mafe. Nono nofe nẽtefe mã yãtapakei kiki. Mã fakishaki,” faifono Jesús

nāno ato fe nēteni. ³⁰ Nāskata mā mīsa ano tsoafono pixakakī Jesús pāa tsomainīfofā, Apa Nios kīfikī. “Aicho,” fata, nāskaxō pāa kaxkepakexō ato ināni pinōfo. ³¹ Ato askafaito nāskakē koshikōi Jesús tāpinifo. Akka mā tāpiafono ato makinoax yamarisatani. Nāskakē anā tsōa ōinima. ³² Nāskakē āa rafe yoinānifo: “No fe fāi okī a Niospa mekaōnoa yoikī kenenifo keskara noko yoifeaito nō mea nōko ōiti fepeisharakōia. Āfe meka sharakōi,” ikanax yoinānifo.

³³ Nāskakanax Jerusalén ano anā fenifo. Mā fēkaxō ato fichitoshinifo, nā Jesúsxō tāpimisfo once a ato fe rafeafo fe īchanākaxō, ³⁴ iskafakī yoiainifo: “Chanīma, mā nōko Ifo otoa, mā Simón ōimana,” ixō yoinifo.

³⁵ Nāskaifono nā rafetari ato yoinifo nā Jesús ato fe fāi kaito ōitanaifo: “Mā nō ōia noko pāa torexopakeaito,” ixō ato yoinifo.

Jesús aōxō tāpimisfoki nokoni

(Mt. 28.16-20; Mr. 16.14-18; Jn. 20.19-23)

³⁶ Nā ato yoiainifo, Jesús ato nakirafekōi nirisatani. Nāskaxō ato yoisharakōini iskafakī: “Inimakōikāfe,” ato fani.

³⁷ Ato askafaino ratekōinifo, “Niafaka chaka nokoki nokoara,” ikanax. ³⁸ Askaifono Jesús ato yoini: “¿Afeskai mā rateimē? ¿Afeskakī māto ōiti mēraxō mā chanīmara fatiromamē? ³⁹ Ōikapo ēfe mēke yafi ēfe tae. Ēkīa. Ea ramākapo. Akka ōikapo na rāfo tsefepo. Akka niafakakai namiyata xaoyama, nā mā ea ōiai keskara,” ixō ato yoini.

⁴⁰ Ato askafakī yoiyanā, āfe mēke toa yafi āfe tae toa ato ispani. ⁴¹ Ato askafakī yoiaino āto ōiti mēraxō shinānifo: “Jesúspara,” ikaxō. Nāskaxō chanīmara fakeratama akiki inimakōinifo. Nāskaifono Jesús ato yōkani: “¿Nono mā afaayamamē ē pipanā?” ato faito, ⁴² foe xoia pishta inānifo. ⁴³ Mā fixō āto ferotaifi pini.

⁴⁴ Nāskaxō afianā ato yoini: “Mēfi mato yoiyomiskī mato fe iyoxō eōnoa yoikī Moisésnō nā a Niospa meka yoimisfonō, eōnoa fanāiti kenenifo keskai nē askakōi,” ixō Jesús ato yoini. ⁴⁵ Nāskakē āfe shināmā a kenenifo keskara ato shināmanaino tāpikōinifo. ⁴⁶ Ato yoikī iskafani: “Eōnoa yoikī kenekī iskafanifo: ‘Cristo a Niospa nīchia mā nafiāx tres nia oxata anā otoxii,’ ixō eōnoa yoikī kenenifo. ⁴⁷ Akka ēfe aneōxō ato yoikāfe. Jerusalén anoxō ato yoikī taefakāfe. Nāskaxori nā maniafo tii anoafori ato yoifofāsafakāfe āto chaka xatekaxō anā Nios nikasharakōinōfo, nāskaifono āto chaka ē ato soaxonikai. ⁴⁸ Akka nā ē mato yoiaino, mā ōiai a mā nikaifori fetsafo yoipakexakāfe. ⁴⁹ Akka ēfe Yōshi Shara ē matoki nīchi ēfe Epa yoiyoni keskafakī. Akka mā nono Jerusalén ano nēteyokāfe, ēfe shara matoki nīchyonō nai mēraxō nā ē mato yoiaino keskafakī mā fetsafo eōnoa mā ato yoinō,” ixō Jesús ato yoini.

Jesús nai mēra kani

(Mr. 16.19-20)

⁵⁰ Nāskaxō Jesús ato iyoni Jerusalén anoxō Betania pasotai. Nānoxō Jesús mēshainākafā Apa Nios yoini iskafakī: “Epa Niospa, eōxō tāpimisfo ato kexesharapakexafe.” ⁵¹ Nāskafakī yoiyanā ato makinoax Jesús Apa Nios ari kani. ⁵² Akka a aōxō tāpimisfāfe iskafakī yoinifo: “Jesús, mī nōko Ifo sharakōi, nō mīo noikōi,” ixō yoikanax chipo Jerusalén ano fonifo inimakōiyanā. ⁵³ Nāskakē mēxotaima Nios kīfiti pexefā mēraxō Nios yoisharapaonifo. Nā tii.

Juan Jesúsnoa Yoikĩ Keneni

Jesucristoõnoa Juan keneni

¹ (Ĕkĩa Juan. Iskaratĩa Jesucristoõnoa ě mato yoi mã tâpinõ. Cristo ěfe ane ipaoni, Meka. Nãato Niosnoa noko tâpimani.)

Afaa oniataima na Meka aneya iyopaoni. Apa Nios fe iyopaoni. Nãrifi Nioski. ² Taefenakõi Nios fe iyopaonixakĩ, iskaratĩari afe ika. Afaa oniamatai nã Meka aneya Apa Nios fe iyopaoni. ³ Aõxõ Epa Niospa keyokõi onifani. Akka Jesúsmaisxõ afaa onifanima. Nãskaxõ Jesús feta Niospa afama mĩshti onifani. ⁴ Aõnoax keyokõi niafo. Niospa yorafo tii shinãmapaiyai keskafakĩ Jesúsxõ ato shinãmatiro ěto õiti xafakĩakõi inõfo. ⁵ Āfe õiti xafakĩakõifiax yora chakafo mēra Jesucristo ipaoni. Yora chakafãfe ěto õiti fakish keskara, shara shinãkanima. Askafiano yora chakafãfe Jesucristo xĩtirofoma yorafo shara shinãmanaino ěto õiti anã fakish keskara inõfoma.

Niospa Juan Maotista nĩchini ato yoinõ

⁶⁻⁷ Epa Niospa Juan nĩchini Jesucristoõnoa yorafo yoinõ iskafakĩ: “Āfe õiti xafakĩakõi. Epa Niospa mato shinãmapaiyai keskara aõxõ mato shinãmatiro,” ixõ Juan ato yoini Jesús chanĩmara fanõfo.

⁸ Juankai Cristoma, Niospa nĩchini Jesucristoõnoa ato yoinõ. ⁹ Cristo fistichi yorafo shinãmatiro ěto õiti xafakĩakõi inõfo. “Mã oi,” ixõ Juan ato yoini. ¹⁰ Oaito yorafãfe tâpinifoma. Niospa Jesúsxõ ato onifafiano tsõa tâpinima Jesús. ¹¹ Nã mai onifani ano nokoni. Nãno nokofiaito ěfe yorafãfe, nãfãfe ifikaspanifo. ¹² Askafafiaifono a ifipaiyaiãfe Jesús ato yoini iskafakĩ: “Mã ea noikĩ chanĩmara faa. Nãskakē ěfe Epa Niospa fakefo mã itiro ea chanĩmara faax,” ixõ Jesús ato yoini. ¹³ Niospa fakefo yorafãfe fakefo keskarama. Yorafãfe fakefo yora keskara, yõramãi ato fake faano. Akka Nios fistichi ato fake fatiro. Yõrakai Niospa fakefo fake fatiroma. Nã Jesús chanĩmara faafo tii Epa Niospa ěto shinã ato fetsafaxotiro ěfe fakefo inõfo.

¹⁴ Nãskakē na Meka aneya Apa Nios ika anoax mai ano oni yorakõi ixikĩ. Nonoax nofe iyopaoni. Apa Nios keskara sharakõi mã nõ õipaoni. Nãato yorafo noikõimis. Āfe meka chanĩmakõi. Nã fisti Epa Niospa Fakekõi. Apa Nios imis keskara nãskakõiriai sharakõi imiski.

Juan Maotista Jesucristoõnoa ato yoini

¹⁵ Jesúsnoa Juan ato yoini iskafakĩ: “Ea nikakãfe, õikapo. Nãõnoa ě mato yoimis. Iskafakĩ ě mato yoimis: ‘Mã oi. Ĕ taeyoi ofiano ea finõkõia ě fakeamano amãi Apa Nios fe iyopaonixakĩ,’” ixõ Juan ato yoini.

¹⁶ Jesús keyokõi noko shara famiski. Noko noikõixõ noko sharafa fafãfãini. Akka keyokõichi nõko õiti inimsharakõiaito nõ meemis. ¹⁷ Epa Niospa noko amapaiyai keskara Moisés yoini. Nãskakē Niospa noko yoini keskara Moisés noko tâpimani. Nãskakē Niospa noko õimapai noko noikõi afi chanĩmakĩ. Nãskaxõ Jesucristo nokoki nĩchini. Jesucristo noko keyokõi noimis. Nãskaxõ noko õimatiro Nios chanĩmakõi. Askatari Epa Niospa noko noi. ¹⁸ Tsõakai Epa Nios õimisma. Askafiax ěfe Fakekõi nã afe rafemis, arifi Nioskõi. Apa Niosnoa noko yoimis. Aõxõ nõ tâpitiro afe keskaramãki Epa Nios.

Juan Maotista judeofãfe ěto xanĩfofo yoini (Mt. 3.11-12; Mr. 1.7-8; Lc. 3.15-17)

¹⁹ Nā judeofāfe āto xanīfofāfe Jerusalén anoxō nā ato Nios kīfixomisfo nīchinifo, Juan ano. Akka nā Levifori ato nīchinifo Juan yōkatanōfo: “¿Mī tsoamē?” fatanōfo.

²⁰ Askafafono Juan ato kemani: “Ēkai Cristoma. A nō manai nōko xanīfo ēkai aama,” ato faito, ²¹ “¿Akka mī Cristoma, mī tsoamē? ¿Mīmē Elías?” faifāfe, “Ēkai Elíasma,” ato faito, “¿Akka mī Elíasmaax mī tsoamē? ¿Mīmē nā nō manamis Niospa meka yoimis, nā nokoki oai?” faifāfe, “Maa, ěma,” ato fani.

²² Ato askafaino anā yōkanifo: “¿Akka mī tsoamē? Noko yoife a noko nīchiafo nō ato yoitanō. Mī tsoamāki noko tāpimafe,” fanifo.

²³ Askafafono Isaías kirika keneni keskara nānorikōi Juan ato yoini iskafakī: “Niospa mato yoipaiyai keskara ē mato yoinō. Tsōa istoma anoxō ē fāsikōi mekaikai: ‘Nōko Ifo nokoki oxii. Īkisi itipinīsharakāfe. Mā ipaoni keskara afianā iyamakāfe. Keyokōichi mātō chaka potakāfe, mēstekōishara isharaxikakī,’” ixō Juan ato yoini.

²⁴⁻²⁵ Nikakata judeofāfe nā fariseofo a Juanki nīchinifo yōkatanōfo iskafakakī: “Mī Cristomamamāki, mī Elíasmamamāki nā nō manamis Niospa meka yoimis mīmaraka, akka, ¿afeskakī mī yorafo faka mēra ikimapakeimē maotisafakī?” ixō yōkakāfe ato fanifo. ²⁶ Juan ato kemani: “Ēfi ato maotisafapaikai. Ē ato askafafaino nono fetsa nokoki nokoi. Mākai tāpiama. ²⁷ Ē iskaratīa mato Niospa meka yoifafāini. Askafiano aato chipo mato yoixii. Fāsi ea finōkōia. Ē afaa tāpiama ē sharakeroko ē āfe zapato risfi nexaxopanā,” ixō Juan ato yoini.

²⁸ Nā pexe rasi Betania faka Jordán okirishtaxō Juan ato faka mēra ikimapakekī maotisafani. Nānoax ato fe yoināni.

Niospa āfe oveja fake keskara, Jesús

²⁹ Askata pena fetsa Juanki Jesús kani. Jesús fichixō Juan yorafo yoini iskafakī: “Ōikapo. Nā Niospa āfe oveja tetomashta keskara oa. Nato keyokōi yorafo chaka soaxonō Epa Niospa nīchia nokoōnoax naxō nōko chaka noko soaxonō. ³⁰ Ē mato aōnoa yoimis. Ē mato yoia iskafakī: ‘Chipo oi ea keskarama finakōia, nāmāi ē fakeamano iyopaonixakī. Nakīa mā oa. ³¹ Ērifi Cristo tāpixoma yorafo maotisafapai a nōko kaifo judeofāfe tāpinōfora,’” ixō Juan ato yoini Cristoōnoa yoikī.

³² Ato yoixō anā Jesúsnoa Juan ato yoini: “Niospa Yōshi Shara nai mēranoax rifi keskara Jesúski fotopakekafanaito ē ōia. ³³ Ēri ōiyamano Epa Niospa ea yoiti iskafakī: ‘Fatofāfe ea chanīmara faimākai mī faka mēra ato ikimapaketiro maotisafakī. Akka mikiki fetsa nokoano ēfe Yōshi Shara nā feronāfakeki fotopakekafāxii. Afe nītaxii. Nā mī ōikī mī tāpixii nāato ēfe Yōshi Shara matoya rafemaxii āfe shinā shara mātō shinā mēra nanenō,’ ixō ea yoia. Epa Niospa ea anori yoiyamakē Jesús nā Niospa Fake ēri tāpikeranama. ³⁴ Askafixō mē ōia. Askaxō ē mato chanīmakōi yoi nafi Niospa Fakeki,” ixō Juan ato yoini.

Jesúsxō tāpikī taefanifo

³⁵ Pena fetsa nāno Juan aōxō tāpimisfo rafe ini. ³⁶ Afe niafono Jesús ato finōfaini. Ato finōfainaito Juan ato yoini: “Ōikapo. Oa Niospa ina oveja fake keskara,” ixō Juan ato yoini.

³⁷ Juan ato yoiaito nikakata Jesús chīfafāinifo. ³⁸ Jesús ifiakekafā ato ōikī ato yōkani: “¿Tsoa mā fenaimē?” ato faito, “Maestro, ¿fanī mī ikamē?” faifāfe, ³⁹ “Ōno ōifokāfe, ē mato ispanō,” ixō ato iyonī. Askata afe fokakī ōiafo nā ika ano afe nokoni. Mā nokoafono mā xini kai ini. Nāno afe yātapakenifo.

⁴⁰ Nã rafe Juan ato yoia keskara nikakata Jesús chĩfainifo. Fetsa ãfe ane Andrés. Nã Andrés Simón Pedro ãfe exto ini. ⁴¹ Jesús ika ano nokokata Andrés ãfe ochi Simón fenaikai kani. Akiki nokoxõ yoini: “A Niospa nokoki nĩchia Mesías mã nõ fichia. Nã Cristora nõ famis. Ōiyotãfe,” fani. ⁴² Askata Andrés Simón Jesúski nokokini. Akiki nokoaino Jesús Simón yoini: “Mĩ Simón, Jonásfa fake. Iskaratĩa ã mia ane fetsafaxonõ. Nõ mia Cefas fanõ,” fani. (Cefas nãfa mekapo yoimis Pedro fakĩ.)

Jesús Felipe yafi Natanael kenani afe fonõfo

⁴³ “Ë Galilea ano kaira,” ixõ Jesús shinãni. Kapaikĩ Felipe fichixõ yoini: “Efe kafe, eõxõ tãpisharakõixikĩ,” fani. Askafaino afe kani. ⁴⁴ Felipe nõ Andrés nõ Pedronõ pexe rasi ãfe ane Betsaida ano imisfo.

⁴⁵ Askata Felipe Natanael fichixõ yoini: “Moisés Niospa yoini keskara kenekĩ iskafani: ‘Ë mãto xanĩfokõi Cristo matoki nĩchixira,’ ixõ Niospa yoini anori Moisés keneni. Nãnorikõi Niospa meka yoimisfãfe kenenifo. Nãkai mã nõ fichia. Jesús José fake Nazarete ano ika. Nãõnoa Moisés feta Niospa meka yoimis fetsafãfe kenenifo,” faito, ⁴⁶ “¿Afaa shara Nazarete anoax oimẽ?” ixõ yõkaito, “Ofe, õixikĩ,” Felipe fani.

⁴⁷ Natanael akiki nokoaino Jesús õixõ aõnoa yoini: “Nafi israelifãfe fakeki. Nato afaa chaka yoimisma. Chanĩmakõi fisti shinãfafãimiskĩ. Tsoakai pãramisma,” ixõ Jesús aõnoa yoini.

⁴⁸ Askafaito nikakĩ Natanael kemani: “¿Afeskaxõ mã ea õiyamafikatsaxakĩ mã ea tãpiamẽ?” faito, “Mia Felipe fichiyoamano ã mia õikĩ taefaita ifi higuera nãmãnoa ã mia õita,” Jesús fani. (Akka Jesús Natanael chai ixõ tãpini õiyamafikĩ.)

⁴⁹ Askafaito, “Maestro, mĩfi Niospa fakeki. Askatari mĩfi israelifãfe ãto xanĩfokĩ,” faito, ⁵⁰ Jesús kemani: “ ‘Mĩ ifi higuera nãmã tsoa ã mia õia,’ ixõ ã mia yoia, ¿nã nikaxõ mã ea chanĩmara faamẽ? Afara shara fetsa finakõia mã õixii. ⁵¹ Chanĩmakõi ã mia yoi. Ëfi yõra fakefiã ã Niospa Fakekõi. Nai fepekemeano mã Niospa ãjirifo õixii. Epa Nios ika anoax ãfe ãjiri ekeki fotota, mãpeinĩfofã fotota, mãpeinĩfofã ikaito mã õixii,” ixõ Jesús fani.

2

Jesús ãfe mekapo fakakõifekẽ fimi ene onifani

¹⁻² Tres nia oxakata Caná pexe rasi anoxõ Galilea mai anoxõ feronãfãke kẽro fiaino yorafo ano fisti ichanãnifo. Jesús ikaino afa ikaino Jesúsxõ tãpimisfori nãfo ato kenamanafono fenifo. ³ Fimi ene mã netsoafono, ãfa Jesús yoini iskafakĩ: “Nafokai fimi eneyama,” fani. ⁴ ãfa askafaito Jesús kemani: “Efa, ¿afeskakĩ mã ea yõkaimẽ afara fetsa afeskarafanõra ixõ? Iskaratĩa ã afara fetsa fena ayoima. Tsõa atiroma keskara ã fena akimakai,” fani. ⁵ Askafaito Jesús ãfe ãfa a yonoxomisfo ato yoikĩ iskafani: “Nã Jesús mato yoiai keskara faxokãfe,” ato fani.

⁶ Nãno tokiri kesho seis efapafo chaimashta tsoa ini. Treinta galon a mẽra ikitiro ini. Nãskata nã kesho mẽra faka fikaxõ, judeofãfe ãto chokati mẽraxõ chokaketsanifo. Nãskakĩ judeofãfe chokasharaifãfe Niospa ato õi nãfo sharara ato fanõ, ãto xinifo ipaonifo keskara.

⁷ Nãskata Jesús a yonoxomisfo yoini: “Nã keshofo mẽra faka fospifakãfe,” ato faito, faka fospikõi fanifo keshofo mẽra. ⁸ Askata Jesús ato yoini: “A ichanãifono ato kexemis na faka ayamatakãfe,” ato faino, nãskata a ato kexemis faka foxonifo. ⁹ A ato kexemisto ayaxõ mea faka inima fimi enekõi ini. Nãskakẽ tãpinima Jesús faka fetsafaano. (Akka nã yonoxomisfãfe õinifo Jesús faka fetsafaito. Nãskakẽ tãpinifo.) Nãskakẽ tãpixoma a ato kexemisto

a Jesús faka fetsafaa a rama këro fiai foxoni. ¹⁰ Nāskaxō yoini: “Fistatīa nā fimi ene sharakōi taefakī nō ato ayamamis. Akka nā fimi ene sharakōi mā mitoxō, nā fimi ene sharama chipo nō ato ayamamis. Akka iskaratīa fimi ene sharakapakōi mī ato ayamani,” fani.

¹¹ Jesús nā pexe rasi Caná anoxō tsōa atiroma keskara taefaito ōinifo Jesúsmaī finakōixō tsōa afama mīshti atiroma keskara atiro. Nāskakē ōikaxō aōxō tāpimisfāfe chanīmara fanifo.

¹² Askata Jesús afanō āfe extofonō aōxō tāpimisfonō nā pexe rasi āfe ane Capernaúm ano fonifo. Nāno oxa ranāyonifo.

Jesús a Nios kīfiti pexefā mēraxō a ato ināifo ato potani
(Mt. 21.12-13; Mr. 11.15-18; Lc. 19.45-46)

¹³ Mā judeofāfe āto fista Pascua mā chaima ikaino Jesús nā pexe rasi Jerusalén ano kani. ¹⁴ Nānoxō Nios kīfiti pexefā mēraxō fakkafo, ovejafo, rififo afo ato minikaxō kori finifo. Nānori a kori kāmiafamisfori tsaoafono Jesús ato fichini. ¹⁵ Jesús ato fichita risfi koshati fata ato koshapaita a ato inafō ato pōtaketsani. Ovejafo potakī, fakkafo potakī fani. Askata yorāfori potani. Mīsa kamaki āto kori māchiafo saakī fetsani. Mīsari kexkafaya kekēfōfā potani. ¹⁶ Nā rififāfe āto ifofo ato yoini: “Na māto inafōya ēfe Epa Niospa pexe mēranoax fotakāfe. ¿Afeskakī ēfe Ēpa pexe mēraxō mā afarafo ato miniketsaimē kori fixikī? Afianā ēfe Ēpa pexe mēranoax afarafo inānōnāyamakāfe kori fixikī. Na ēfe Epa āfe pexe mēranoaxkai mā afarafo minimitsaima,” ixō Jesús ato yoini.

¹⁷ Ato askafaito nikakata aōxō tāpimisfāfe shinānifo iskakakī: “Chanīma, Niospa meka nānorikōi Jesúsnoa kenenifo iskafakakī: ‘Epa Niosi, ē mī pexe kexesharapai a mēraxō mia fisti shinānōfo. Afara fetsa a mēraxō anōfoma. Afara fetsakai mī pexe mēranoa ē ōipaima,’ ixō kenenifo Jesúsnoa yoikī.”

¹⁸ Jesús askafaito judeofāfe āto xanīfofōfāfe yōkanifo: “¿Afeskakī Nios kīfiti pexefā mēraxō mī ato potaimē? Niospa mia yoiāito afara tsōa atiroma keskara noko ōimafe nō mia chanīmara fanō,” ixō yōkaifāfe ¹⁹ Jesús ato yoini: “Mā na pexe pāoikano afianā tres nia oxata ē anā pexe faxii,” ixō Jesús ato yoini.

²⁰ Ato askafaino, “Kee. Nōko xinifāfe cuarenta y seis xinia anifo Nios kīfiti pexefā fakakī. Akka, ¿mī koshikōi tres nia pexe faimē?” fanifo. ²¹ Askafafiakakī tsōa tāpinifoma Jesús Niospa pexeōnoa yoinima. Aafi anofi yoimeni. ²² Askata Jesús nafiax oxa rafeta tres nia īta otoano aōxō tāpimisfāfe shinānifo: “Chanīma, a Jesús ato yoita keskara, nā pexefā pāoikaikiri keparanākī, ‘Ēfi tres nia otoxii,’ ixō yoita. Iskaratīa mā nō tāpia aafi anofi yoimeita,” ixō aōxō tāpimisfāfe shinānifo Jesús otoano. Nāskakē Niospa meka kenenifo keskara chanīmara fanifo. Nāskata nā Jesús ato yoini keskara shinākakī: “Chanīmakōi Jesús noko yoini,” fanifo.

Jesús keyokōi yorāfo tāpini

²³ Askata tsōa atiroma keskara afama mīshti Jesús fani Jerusalén anoxō fista Pascuatīa. Nāskara ōikaxō yorafā rasichi, “Na Cristo,” ixō chanīmara fanifo. ²⁴ Askafiaifono a yorafāfe āto shinā mēraxō shināifo keskara Jesús ato tāpini. (“Iskaratīa ea chanīmara fakani. Askafikaxō chipo, āa chanīra, ea fakani,” ixō Jesús ato tāpini.) ²⁵ Yorafāfe āto shinā mēraxō shināifo keskara tsōa Jesús tāpimatiroma. Areskōi Jesús onātiro a āto shinā mēraxō shināifo Jesús tāpikōia. Chanīmara fayoaifāfe Jesús ato onāni nāskax koshi shināmakī fetsenifo.

3

Jesús Nicodemo tāpimani

¹ Nā feronāfake fariseo ini, āfe ane Nicodemo. Nāri judeofāfe āto xanīfo ini. ² Nāato fakishi oxō Jesús yōkani: “Maestro, nō tāpia mī noko tāpimanō mia Niospa nīchini. Mā nō tāpia Nios fe rafexoma tsōa afara fetsa atiroma nā mī akai keskara fakī tsōa atiroma,” faito, ³ Jesús kemani: “Ēfi chanīmakōi mia yoikai. Tsoari oa fake yome rama kāia keskaraxma Nios xanīfo ano nokotiroma,” fani.

⁴ Askafaito afianā Nicodemo Jesús kemani: “¿Afeskax afianā feronāfake yometatiromē? ¿Mā anifofiax afeskai afianā āfa xaki mēra nanetiromē, fake yomeax anā kāixikī?” ixō Nicodemo Jesús yōkani.

⁵ Askafaito afianā Jesús kemani: “Fake yome rama kāi fakaya kāitiro. (Nāskax yōra fake itiro. Nāskariakī āfe Yōshi Sharaōxō Niospa mato ōiti fetsafaano mā āfe fake itiro.) Akka Niospa Yōshi Sharapa mātō ōiti fet-safayamano mā Nios xanīfo ano nokotiroma. ⁶ A yōra fake fia nā keskara itiro. Nāskarifiakī Niospa Yōshi Sharapa mato fake fiano māri a keskara itiro. ⁷ Ē mia yoiaino mī ea nikax, ‘Mīri oa fake yome rama kāia keskara mī itiro,’ ē mia yoiano, ‘Aira, ¿afeskax nō afianā yometatiromē?’ iyamafe. ⁸ Nefeaito tsōa tāpitiroma fakirinoax oimākai. A nefe kai ariri tsōa tāpiama fakiri nefe kaimākai. Nāskari fakī Niospa yorafo āfe Yōshi Sharapa āto shinā fetsafaano tsōa tāpitiroma,” Jesús faito, ⁹ anā Nicodemo kemani: “¿Afeskax nō askatiromē?” ixō fani.

¹⁰ Askafaito afianā Jesús kemani: “Mī israelifo tāpimamis, ¿afeskakī na ē mia yoiai mī tāpimamē? ¹¹ Ē mia chanīmakōi yoi. Nā nō nikafo nā nō ōiafo nāfo nō mato yoi. Nāskafekē nō mato yoiaino mā noko chanīmara faima. ¹² Nono mai anoafō afarafo afeskaraito ē mia yoiaito mī ea chanīmara faima. Askatari nai mēranoafori afeskaraito ē mia yoiaito mī ea chanīmara faima.

¹³ “Tsoakai nai mēra kaax anā fototiroma. Akka ē fisti ē nai mēranoax fotoa yora fakekōi ikiyoi. Ē afianā chipo kaxii. ¹⁴⁻¹⁵ (Nōko kaifo israelifo tsōa istomanoax chaka iyopaonifo. Nāskakē Niospa rono atoki nīchini ato chachinō. Nāskaxō Niospa Moisés yoini iskafakī: ‘Na rofetaxō rono faxō nīchinīfōfāfe ifiki ratāfe yorafāfe ōikanax sharanōfo, a ato chachia tii.’) Nāskari fakī ifi cruz ikakī ea mastakaxō ea nīchinīfōfāxikani. Nāskakē nā ea chanīmara faafo tii eōnoax Nios fe nīpanakafo,” ixō Jesús ato yoini.

Epa Niospa keyokōi yorafo noi

¹⁶ Anā Jesús ato yoini iskafakī: “Epa Niospa keyokōi yorafo noikī āfe Fake fisti ato nīchixonī nai mēraxō nono mai anoax atoōnoax naiyonō. Nāskakē nā chanīmara faafo tii omiskōipakenakafoma afe nīpanakafo. ¹⁷ Niospa āfe Fakekōi mai ano nīchini ato omiskōimatama āto chaka soaxoniyonō aōnoax isharapakexanōfo,” ixō Jesús ato yoini.

¹⁸ Askata anā Jesús ato yoini iskafakī: “Nā Niospa Fake chanīmara faifokai omiskōipakenakafoma. Akka nā nikakaspai fo ato Niospa omiskōimaxii. Niospa Fake nikakaspakanax omiskōipakenakafo. ¹⁹ Pena fe fakish osinātiroma. Nāskarifiāi afara chaka fe Niospa fake rafetiroma. Nāskakē Niospa āfe fake nāmā nīchini nā yorafo pena keskara shara inōfo āto chaka xatekanax. Akka yorafāfe āto chaka potakaspakani. Niospa āfe fakeki fekaspakani. Nāskax isharakaspakani, chaka fisti shinākani. Niospa fake ōikaspakani āto chaka xateax isharaxikakima. Nāskakē Niospa ato omiskōimani. ²⁰ Afara chaka fichipaiyaito Niospa Fake ōikaspai. Nā chakafaifo fisti fichipaikani.

21 Nā shara nipaiyaifo Niospa Fakeki fekani. Ato òimasharaxikakĩ Niospa ato imasharanõ,” ixõ Jesús ato yoini.

Jesús Judea mai ari kani

22 Nāskata Jesús fe aõxõ tãpimisfo Judea mai ari fonifo. Nāno ato fe iyoni. Nānoxõ āto chaka potapaiyaifāfe ato maotisaſapani. 23-24 Juan karaxa mēra ikimayofafomano nāatori yorafo maotisaſapani. Nā Enón nā Salim chaimashta nika ini. Nāno faka noa ini. Nāskata nānoxõ ato maotisaſapani. Nāno yorafo akiki feaifāfe ato maotisaſapani.

Juan Maotista Jesúsnoa anā ato yoini

25 Nāskata Juan aõxõ tãpimisfo āto kaifo judeo fetsafo fe feratenānifo. Afeskaxõ mā chaka soatiromē ikanax feratenānifo. 26 Nāskaxõ Juan ano fõkaxõ Juan yoinifo: “Maestro, nõ mia yoipai. Faka Jordán okixori mĩ Jesús fichita. Fichixõ mĩ noko yoita: ‘Nā Cristo Niospa noko nĩchixona nā nõ manamis,’ mĩ noko feita. Nāatori iskaratĩa yorafo maotisaſapai. Oa yorafo keyokõi akiki fokani,” fanifo. 27 Askafaifono nikakĩ Juan ato kemani iskafakĩ: “Nios fistichi yonomatiro a yonoxonõ. Akka Niospa axoyamaino afaa afeska fatiroma. 28 Akka ěkai Cristoma. Epa Niospa ea yoia ě Cristoõnoa yorafo tãpimanõ āto chaka xatenõfo, Cristo nokoaito chanĩmara fanõfo. Nānori ě mato yoiaito mā nikamis. 29 Afianā ě mato yoinõ ea nikapo. Mā mā tãpia feronāfake āfe yama yoikĩ iskafatiro: ‘Aicho. Na kěro mĩ ea yoixona iskaratĩa ěfe āfi iki,’ ixõ yoiaino āfe yamari aõnoax inimatiro. Nāskarifiāi ě Cristoyamaſiax fetsafāfe nā Cristo Jesús chanĩmara faifono ěri fāsi akiki inimakõi. 30 Akka nā Cristo finakõia. ěkai Cristoma. ě afaa tãpiama, Cristo finakõia. Akka ě afianā afaa yoitiroa ea tanatamaroko, Cristo fisti nikakõinõfo,” ixõ Juan ato yoini.

Jesús nai mēranoax fotoni

31 Anā Jesús ato yoini iskafakĩ: “A nai mēranoax nāmā fotoato nāato nāmānoafo ato finõa. Akka nā nāmānoax fakeafāfe nāmānoa fisti yoitirofo. Akka nā nai mēranoax fotoato nāatofi keyokõi finõa. 32 Nāato noko yoitiro a õiafo, a nikafori. Nāskakē fisti rasichi chanĩmara fakani. 33 Niospa meka chanĩmara fakĩ nõko õiti mēraxõ nõ tãpisharakõitiro Niospa noko pāramisma, āfe meka chanĩmakõi.

34 “A Niospa nĩchiato Niospa meka yoi Niospa āfe Yõshi Shara a mēra naneano. Nāskaxõ tãpikõia. 35 Epa Niospa āfe Fake noikĩ nĩchini nai mēra ikafāfe āto Ifo inõ, nāmānoafāferi āto Ifo inõ. 36 Nāskakē Niospa Fake chanĩmara faax nõ afe nipaxatiro. Akka tsõa chanĩmara fayamakē Niospa ato omiskõimapakenaka. Akka Jesús nikayamakanax nakanax afe nĩpanakafoma fakishifā mēranoax omiskõipakenakafo.”

4

Jesús kěro samāritanõki nokoni

1-3 Fariseofāfe nikanifo Juan yorafo maotisaſapaito. Akka yora ichapa Jesús maotisaſapaito fariseofāfe nikanifo. Akka Jesúskaĩ ato maotisaſapanima, nā aõxõ tãpimisfāfe ato maotisaſapanifo. Aõnoa yoinifo keskai mā Jesús tãpiax aõxõ tãpimisfo fe Judea anoax Galilea ano kani. 4 Judea mai anoax Galilea ano kakĩ Jesús Samāria finõfaini.

5 Askata Samāria ano Jesús nokoni. Nāno nā pexe rasi āfe ane Sicar ano nokoni. Nāno chaimashta Jacobo āfe tare ipaoni. Nā tare āfe fake José ināni māmāi anifoxõ. 6 Nānori Jacobo kini fani nā kini mēranoa faka fixikĩ. Nā faka fiti ano xini keya Jesús nokoni. Chai inoaxmāi oax xokenāi Jesús nāno tsaoni. 7-8 Jesús teneyoaino, a aõxõ tãpimisfāfe a piaifo pexe rasi anoa fiifokani fonifo.

Mā foafono nāno kēro samāritanō akiki nokoni faka fiyoi. Faka fiti ketokonō Jesús tsaono akiki nokoni. Nāskaxō Jesús a kēro yoini: “Ea faka fexōfe ē ayanō,” fani.

⁹ Judeofo fe samāritanōfo ōikaspa faatanāmisofo. Ato fetakai pimisfoma. Nāskakē nā kēromā Jesús yoini: “Mīfi judeoki. Ēfi samāritanōki. ¿Afeskakī mī, ‘Ea faka fexōfe,’ mī ea faimē?” faito, ¹⁰ Jesús kemani: “Niospa mia ināpaiyai mī tāpiama mī eari tāpiama. Akka mī ea yōkaito ē mia faka shara inākerana. Nā faka sharapa yorafo nimasharatiro,” Jesús fani. ¹¹ Nāskafaito kēromā Jesús kemani: “Mī keshoyata mī risfi yama. Kini chaikōi, ¿afeskafaxō mī faka kini mēranoa fimē a noko nimasharatiro a mī ea yoiai keskara?” kēromā fani.

¹² Nāskata anā kēromā yoini: “Nōko xini Jacobo kini faxō faka fixō ayapaoni. Āfe fakefāferi ayapaonifo. Āto inafori ayamapaonifo. Nōri nā faka ayai. ¿Mī nōko xini Jacobo finōamē?” kēromā fani.

¹³ Askafaito Jesús kemani iskafakī: “Na faka kini mēranoa ayax chipo afianā mā nōamā iki. ¹⁴ Nāskafixō na faka ē ato ayamani anā nōamākiyamanōfo. Chanīmakōi, nā faka ayakanax isharapakexanōfo,” fani.

¹⁵ Askafaito kēromā kemani: “Mī feronāfake shara. Na faka shara ea ināfe ē ayax anā ē nōamākiyamanō ē afianā nonoa faka fiyamanō,” fani. (Jesús fakakiri keparanākī yoiaito nā kēromā tāpinima.)

¹⁶ Nāskaxō Jesús yoini: “Mī fene ifitāfe afianā nētekaini kaxō mī fene ifitāfe afe oxikī,” faito, ¹⁷ “Ēkai feneyama,” faito, “Mī chanīmakōi yoi. Mīkai feneyama,” Jesús fani. ¹⁸ “Mī fene cincoya mia fimisfo mī fenefo. Akka iskaratīa mī fetsa fe ika a mī fenema fe. Ea māa yoikōi mī feneyama,” ixō Jesús yoiaino, ¹⁹ “Ē iskaratīa ē mia tāpia mī Niospa meka ato yoimis. ²⁰ Nōko xinifāfe na machi anoxō Nios kīfipaonifo. Akka mī kaifo judeofāfe yoimisfo iskakakī: ‘Jerusalén anoxō nō Nios kīfitiro,’ ixō yoimisfo,” faito, ²¹ “Ē mia yoinō, ea chanīmara fafe. Na machi fisti anoxos nō Nios kīfitiroma. Jerusalén fisti anoxori nō Nios kīfitiroma. Akka fanīma mīshtixō nō Nios kīfitiro. ²² Māfi samāritanōfoki. Nios kīfikī nōko Epa Nios mā tāpisharama. Akka nōfi judeofoki. Nō nōko Epa Nios tāpikōia. Niospa noko tāpimani afeskaxō yorafāfe āto chaka soatirofomāki Epa Nios fe ipaxakakī. ²³ Chipō afetiara nō Nios kīfikōikē, āfe Yōshi Shara fistichi noko tāpimatiro nō kīfisharanō. Āfe Yōshi Sharaōxō nō Epa Nios kīfikōiaito nāskara Niospa fichipai. ²⁴ Nios yorama. Niosfi fero mēsho keskara sharaki. Nāskakē āfe Yōshi Sharaōxō nō Nios kīfitiro,” Jesús fani.

²⁵ Askafaito kēromā kemani: “Mē tāpia a Niospa nīchia chipo nokoki nokoxii. Nā āfe ane Cristo. Nāato afama mīshti noko tāpimaxii,” faito, ²⁶ “Ēfi Cristoki, ē mefe meikai,” ixō Jesús yoini.

²⁷ Askata Jesús kēro fe mekaino aōxō tāpimisfo fenifo. Fēkaxō ōiafo Jesús a kēro samāritanō fe mekaito ōikani ratenifo. Nāskax yoinānifo: “¿Afeskai mī na kēro fe mekaimē?” nō Jesús faima,” fanifo. Nāskata shinānifo: “Nā kēro samāritanō mī yoia keskarari nokori yoife, nōkai faima,” inifo.

²⁸⁻²⁹ Askata nā kēromā āfe kesho potafaini āfe pexe rasi ano kakī. Āfe pexe ano kaxō āfe yorafo yoini: “Oa feronāfake ekeki nokoxō ea yoia. Nā ē afama mīshti ē chakafamis mā ea kāimaxōa. Nāraka Cristo, ōifokāfe,” ixō ato iyoni.

³⁰ Nikakata nā pexe rasi anoax Jesúski fenifo.

³¹ Mā kēro kaano aōxō tāpimisfāfe Jesús yoinifo: “Maestro, piyofe,” faifono, ³² “Ē aya a ē piyai. Nā ē piyai mā tāpiama,” ato fani. ³³ Ato askafaito nikakani yoinānifo: “Kee. ¿Tsōa a piyai ināfanamē?” ikanax yoinānifo.

³⁴ Askata Jesús ato yoini: “Ĕfe Epa Niospa ea nĩchini ě ģfe yono shara yonoxonō. Nāato ea amapaiyai keskara ě apai. Nā ě piai keskara,” Jesús ato fani. (“Mā nō piax nō anā fonāikima, nō shara iki. Nāskarifiyai Niospa noko amapaiyai keskara nō iki nōko ōiti sharakōi iki. Nāskara noko amapaiyai nō aki, a nō piai keskara,” ato fani.)

³⁵ Anā Jesús ato yoini: “Māfi iskamiski: ‘Mā nōko tarepanoax mā nōko xiki choshiaki. Mā cuatro oxe akaki nō finō,’ mā imis. ¿Nāskarifiakī mā shināimē: ‘Nō Jesúsnoa yorafo Niospa meka yoiano chipo chanĩmara faxikani,’ ixō mā shināimē? Akka ě mato yoi: ‘Ōikapo, mā iskaratīa itipinĩsharakōiafo Nios Ifofaxikakī,’ ato fani. ³⁶ Akka fĕtsa ģfe yama ģfe tare kexexotiro, ģfe xiki topixoxiki. Chipo kopifaxinō, tare ifāfe. Nāskarifiakī fĕtsa taefakī yorafo Niospa meka yoitiro. Ato yoifiaino chanĩmara fayokanima. Askatari chipo fetsa oxō ato yoiaito chanĩmara fakani. Nā rafe Niospa ato shara imapakenaka nā rafetamāi Niospa meka ato yoimisfono. ³⁷ Nāskakē chanĩkima mā yoimis iskakī: ‘Fĕtsa xiki fanano chipo fĕtsa nā xiki fimi fitiro.’ Nāskarifiakī fĕtsa Niospa meka yoikī taefaano fĕtsari chipo rama oxō nāatori ato chanĩmara famatiro. ³⁸ Akka mā taefakī ato yoimisma iskaratīa ě mato nĩchia mā ato chanĩmara famanō. Taefakī fetsafāfe Niospa meka ato tāpimani, mā ato tāpimayoamano. Mā ato tāpimayoxoma koshikōi mā ato chanĩmara famatiro māmāi taefakī ato yoiyomisfono,” ixō Jesús ato yoini.

³⁹ Nāskata Jesús aōxō tāpimisfo yoiaino nā kĕro samāritanō ģfe kaifo yoikai kani pexe rasi ano. Kaxō ato yoini: “Oa feronāfāke mā ea tāpixō ea yoia nā ě afara amis keskara. Ea ōiyamafikatsaxakī mā ea tāpia,” ato fani. Ato askafaino Jesús fisti rasichi chanĩmara fanifo.

⁴⁰ Askata nā kĕro nikakanax Jesúski fonifo ģfe meka nikakani. Akiki nokoxō yoinifo: “Nofe nono iyofe,” fanifo. Askafaifono nikata Jesús ato fe oxa rafeyoni. ⁴¹ ģfe meka nikakaxō yora ichapato chanĩmara fanifo. ⁴² Askata chanĩmara fakaxō yorafāfe nā kĕro yoinifo: “Mī Jesúsnoa noko yoia fisti nō chanĩmara faima. Nōakōi mā nō ģfe meka nikakōia. Nāskakē iskaratīa nō chanĩmara fai. Nāato na yorafo ikafo tii ato ifitiro afe ĩpaxanōfo.”

Jesús sharafani xanĩfo yonoxomisto fake

⁴³ Askata mā oxa rafeta Jesús nā samāritanōfo anoax Galilea ano kani. ⁴⁴ Jesús Galilea anoax yosini, nānoxori yonopaoni. Afe yorafo nāno inifo. Askata Jesús ato yoini iskafakī: “A afe pexkonifāfe a ato Nios yoixomis yoikakī iskafatirofo: ‘Akai tsoama, afi nofe pexkoniki,’ fatirofo,” ixō ato Jesús yoini.

⁴⁵ Askata Jesús Galilea ano nokoni. Jerusalén anoax Galilea ano Jesús nokoamano yorafo Galilea anoax Jerusalén ano fonifo fista aki fokani. Nānoxō tsōa atiroma keskara Jesús Niosxō ani. Nā afama mĩshti Jesús anoxō akaito ōinifo. Nāskakē Galilea ano Jesús atoki nokoano akiki inimanifo: “Aicho, mā mĩ oakī,” Galilea anoxō fanifo.

Jesús xanĩfāfe fake sharafani

⁴⁶ Askata nā pexe rasi ģfe ane Caná ano Jesús nokoni nā Galilea mai ano. A ģfe mekapa faka fetsafani ano fimi ene keskara fakī nāno Jesús nokoni. Nānoa xanĩfo fĕtsa Jesús ōiyoi oni. Nā pexe rasi ģfe ane Capernaúm anoax oni. Nānoa xanĩfāfe fake isinĩ ini.

⁴⁷ Askata xanĩfāfe nikani Jesús Judea anoax oano Caná ano nā Galilea mai ano. Nikata akiki oxō yoini: “Xanĩfo, ěfe fake isinĩ iki nai kiki. Ĕfe fakeshta ea ōixoni ope ěfe fake ea sharafaxoxikī,” ixō iyopaini. ⁴⁸ “¡Ooa! Tsōa atiroma keskara ě fayamakē mā ea chanĩmara fakeranama,” ixō Jesús ato yoini. ⁴⁹ Afianā nā xanĩfāfe Jesús yoini: “Xanĩfo, efe kayoikape ěfe fake

nayamanō,” ixō iyopaini. ⁵⁰ Askafaito Jesús kemani: “Mī fake namaki. Katāfe. Iskaratīa mī fake niaki,” Jesús fani.

Jesús askafaito nikafaini kani. ⁵¹ Mā nokoi kaino āfe inafō akiki nokokaxō yoinifo: “Mī fake mā shara, anā isinī ikima,” fanifo. ⁵² Askafaifāfe ato yōkani: “¿Fanī xini rakano ēfe fake sharamē?” ixō ato yōkaito, “Xini keya mī fake āfe yona matsita,” fanifo. ⁵³ Yoiaifāfe nikata āpa shināni: “Chanīma, Jesús ea yoita xini keya, ‘Mā mī fake sharaki katāfe,’ ea Jesús feita,” ixō xanīfāfe shināni. Nāskata na xanīfonō āfinō afe yorafoyaxō Jesús chanīmara fanifo.

⁵⁴ Nāskata Jesús Judea anoax Galilea ano nokoxō afianā tsōa atiroma keskara fakī ato ōimani. Ato ōimakī rafe fani.

5

Jesús feronāfake isinī imis Betesda anoxō sharafani

¹ Askata Jesús Galilea anoax Jerusalén ano kani āfe kaifo judeofo feta fista akikai. ² Nāno Jerusalén ano ovejafāfe āto kāiti ano ĩa ini. Judeofāfe yoimisfo a ĩamā āfe ane Betesda. Nā ĩa kesemē pexe kafāshara mīshti tsaofafāina ini, cinco pexe. ³⁻⁴ Nāno yora isinī imisfo ichapa rasi inifo nāno rakafafāinafo. Fēxofō, chātofo, sifitianifo nāfo isinī imisfo nā pexe kafāshara mīshti mēra rakafafāinafo ini. Akka Niospa āfe ājiri nā ĩa ano nokomis nā ĩa fecha fecha axiki. Nā ĩa fecha fecha akaino nā isinī ikaifo nā nashi taea nashiax koshi sharamisfo. Nāskakē nā isinī ikaifāfe Niospa āfe ājiri manamisfo ato ĩa fecha fecha axoyonō nā nashi nā taea koshi sharaxikakī.

⁵ Jesús nāno nokoxō feronāfake fichini treinta y ocho xiniya amis finipaikī ranāmis. ⁶ Feronāfake finimisma fichixō Jesús tāpini nā feronāfake treinta y ocho xiniya amis isinī itiani. Nāskaxō yōkani: “¿Mī sharapaimē?” ixō yōkani. ⁷ Askafaito kemani: “Niospa ājirinī ĩa fecha fecha akaino tsōakai ea ĩa ano iyomisma. Akka ē nashipaiĩaino ea xītimisfo. Ēkai fena nashitiroma. Nono tsōama ea ĩa ano iyoikaxiki,” faito, ⁸ Jesús yoini: “Fininākfā, mī rakati fifaini kasharatāfe,” Jesús fani. ⁹ Askafaito nikai fininākfāta āfe rakati fifaini kani.

Nā pena safaronō finimisma Jesús sharafani. ¹⁰ Nāskano nā judeofāfe āto xanīfofōfāfe ōinifo nā feronāfake finimismato āfe rakati fifaini kaito yōkanifo: “¿Afeskakī mī rakati safaronō mī foikaimē? ¿Mī tāpīamamē nōko xinifāfe yoipaonifo safaroaino nō afaa metiroma? Akka mī rakati na safaronō mī fotiroma,” fanifo. ¹¹ Askafaifono ato kemani: “Oa feronāfāke ea sharafaxō ea yoia iskafakī: ‘Mī rakati fotāfe,’ ea faa,” ato faito, ¹² “¿Tsōamē a feronāfake anori mia yoia?” fanifo. ¹³ Finimismatokai tāpinima tsōa sharafaamāki Jesúsmaī a finimisma sharafafāini koshikōi a makinoax yorafā rasi mēra kaano. Nāskakē finimismato anā ōinima.

¹⁴ Askano chipo Jesús a feronāfake sharafaa Nios kīfiti pexefā mēranao fichixō yoini: “Anā mī isinī ikima. Mā mī shara. Anā a mī chakafapaoni keskafakī afianā chakafayamafe. Mī chaka xatefe. Mī chaka mī xateyamakē afaranā mia anā omiskōimatiroki,” ixō Jesús yoini. ¹⁵ Nāskax nā feronāfake Jesús makinoax kani judeofo yoikai, “Oa Jesús ea sharafaa,” ato fani. ¹⁶ Nā Jesús safaronō yora sharafaa nikakanax judeofo āto xanīfofo Jesúski ōitifishkinifo. Ōitifishkikakī Jesús mekafakī chakafanifo. ¹⁷ Askafaifono Jesús ato yoini: “Ēfe Epa pena tii yonofafāini. Iskaratīari yonoi. Ēri ēfe Epa yonoi keskafakī ėri yonoi,” ixō ato yoini.

¹⁸ Nāskakē fakirira shinānifo. Nāskara shinākakī Jesús mekafanifo: “Nōko xinifāfe yoini keskara nō safaronō afaa metiroma, akka Jesús yonoi yorafa sharafakī. Nāskaxō noko yoia: ‘Nios ēfe Epakōi,’ noko faa. Nāskax Nios

keskarakōi ipai,” fanifo. Nāskax a ranā yoinānifo: “¿Afeskaxō nō Jesús ato retematiromē?” ikanax yoinānifo judeofo āto xanīfofo.

Jesús Niospa Fakexō nā Niospa akai keskara fai

¹⁹ Nāskara shināifāfe Jesús ato tāpini. Nāskaxō Jesús ato yoini iskafakī: “Chanīma ē mato yoinō. Ea nikakapo. Ē Niospa Fakekōikī ēa ē afara afeskarafaima. Ēfe Epa Niospa akai keskara ōixō ēri aki. Nā fisti ē aki. ²⁰ Ēfe Epa Niospa ea noikōi. Nāskakī nā akai keskara ea tāpimani ēri anō. Akka afara fetsa finakōia ea ispaxii. Askaino mā ea iskafakī yoixii: ‘Aira ōikapo. ¿Afeskakī iskara shara akimē?’ mā ea faxii. ²¹ Epa Niospa yora naano anā otofatiro. Nāskaxō anā nimasharatiro. Ēri āfe Fakexō nāskari fakī ē ato nimapaikī ē ato nimatiro shara ĩpaxanōfo. ²² Epa Niospa ato yoima fatora yora shara nīpanaka, akka fatorari omiskōipakenaka. Ēfi Niospa Fakeki. Ea nīchini ē yorafo yoinō fatofomāki a afe nīpanakafo, akka fatoforimāki a omiskōipakenakafo. ²³ Nāskaxō yorafāfe Epa Nios yoixikani: ‘Mī fāsi shara. Tsōa mia finōtiroma,’ ixō yoixikani. Nāskarifiakī eari yoixikani ēmāi āfe Fakekē. Ea nīchini. Akka iskaratīa ea tsōa yoisharaima. Ēfe Epa Niosri askari fakani yoisharakima.

²⁴ “Ē mato chanīmakōi yoinō. Fatoto ēfe meka nikasharaimākai, akka nā ea nīchiniri, fatotori chanīmara faimākai nāfi ēfe Epa Nios fe nīpanakakī. Akka iskaratīa yorafo oa naa keskara ikafo Nios Ifofaamax. Akka Epa Nios chanīmara fakanax afe ipanakafo. Nafiax afianā otoxikani.

²⁵ “Ē afara fetsa chanīmakōi mato yoinō. Yorafāfe āto ōiti mēra shināsharakōiafoma oa naa keskarakōi ikafo. Akka ē Niospa Fakeki. Iskaratīa ē ato yoiaito ea nikakanax anā naa keskara ikanima, efe isharapakenakafo. ²⁶ Akka tsōa Epa Nios onifanima. Akōi ika. Nāskarifiakī Epa Niospa yoia keskara āfe Fakeri tsōa onifanima. Ēakōi ē ikaki. ²⁷ Ēfi Niospa Fakeki. Nāskakē ea yoia iskafakī: ‘Mī yorafo yoitiro fatofomāki efe nīpanakafo, akka fatoforimāki omiskōipakenakafo,’ ixō ea nīchini. ²⁸⁻²⁹ Nāskara ē mato yoiaino rateyamakāfe. Akka nā namisfāfe ēfe meka nikakani otoxikani. Afara shara famisfo nikasharakōimisfo nāfo Nios ano nīpanakafo. Akka nā afara chakafamisfo afo otokanax omiskōipakenakafo,” ixō Jesús ato yoini.

Niospa Jesús nīchini a apaiyai keskara famaxikī

³⁰ Anā Jesús ato yoini iskafakī: “Akka ēakōi ē yorafo omiskōimanimā. Epa Niospa ea yoiaino ē aki. Epa Niospa keyokōi tāpia. Akka ea mēstekōi yoia keskara ē yorafo yoitiro fatofomāki omiskōipakenakafomāki. Ē ato kaxpa omiskōimanimā. Eres fistikai ē apaiyai keskara ē shināima. Ēfe Epa Niospa ea nīchini a apaiyai keskara ea famaxiki. ³¹ Ēakōi ē yoimesharaito tsōa ea tāpitiroma ē afe keskaratiromakī. ³² Akka nāno yora fētsa eōnoa yoisharamis. Nāato ea chanīmara fakē māri a nikasharakōitiro. ³³ Akka mā yorafo Juan Maotistaki nīchimis eōnoa nikanōfo. Juan eōnoa meka shara yoimis nā yorafāfe mato tāpimakani. ‘Jesúsfi Cristoki,’ Juan ato famis. Nā nikakaxō mato tāpimamisfo.

³⁴ “Ēfi tsōa atiroma keskara fakē mā mā ōimiski. Akka tsōa eōnoa mato yoiamaito nāfo ōixō mā tāpitiro ē mato chanīkima yoimis. Nāskafekē Juan eōnoa mato yoimis keskara ē afianā mato shināmani māto chaka mā xatenō omiskōitamaro Epa Nios fe mā isharapakexanō. ³⁵ Juan feronāfake fāsi sharakōi. Oa rāpari fafeai keskara shara. Fakishikakī nō rāpari ōtano fai chaxasharano nō fāi katiro. Oa rāpari fafeai keskara shara mato Juan tāpimanano mā māto chaka xateax mā Nios fe mā isharapakexatiro. Mato yoimis keskara mā shināmis iskafakī: ‘Aicho, Juan noko mēstekōi Niospa

meka yoimis. Nō nikashara,' ixō mā shināmis. ³⁶ Juan eōnoa yoikōimis; akka ěfe Epa Niospa Juan finōkōia. Ěfe Epa ea nīchini a apaiyai keskara ě anō. Iskaratīa a ea yonomanai keskara ě aki. Akka a ě akai keskara ōixō mā tāpitiro Epa Niospa ea nīchini a ea yonomanai ě mitonō. ³⁷ Epa Niospa ea matoki nīchini. Nāatori eōnoa yoimis. Mākai Epa Niospa āfe meka nikamisma, askatari mā ōimisma. ³⁸ Niospa ea nīchifinino mā ea chanīmara faima. Nāskax āfe meka shara mātō shinā mēra nanema.

³⁹⁻⁴⁰ “Moisés feta a Niospa meka yoimis fetsafāferi kenenifo keskara mā mā ōisharai māmāi shinākī iskafakī: ‘Ě Niospa meka anekī ě tāpitiro afeskax ě Nios fe isharapakenakamāki,’ ixō mā shināi. Nāskaxō a Niospa meka yoikī kenenifo mā anefafāimis. Akka Moisés feta a Niospa meka yoimisfāfe eōnoa kenefinifono mā ekeki opaima ě mato imasharapanā.

⁴¹ “Epa Niospa ea yoikī iskafaino: ‘Ěfe fake shara,’ ea faino ě inimatiro. Akka yorafāfe, ‘Jesús sharaki,’ ea faifono ě askafamapaima. ⁴² Ě mato tāpikōia. Mākai Epa Nios noima. ⁴³ Epa Niospa ea nīchini ě matoki onō. Ě matoki ofiakē mā ea ifipaima. Akka yora fetsa āakōi matoki oaito mā ifitiro. ⁴⁴ Akka mā yora fetsafo, ‘Na yorafo sharafora, noko fanōfora,’ ixō mā ato yoimapai. Akka Niospa mato yoisharaino mā fichipaima. Nāskakī mā Niospa meka mā nikakaspai.

⁴⁵ “Mā ea chanīmara fayamakē ěfe Epa Nios ě yoima. Nāskakē, ‘Nā Jesús noko chakafai,’ ixō shināyamakāfe. Mā shināmis iskakī: ‘Moisés meka nikai nō Epa Nios fe nīpanaka,’ ixō mā shināmis. Anori mā shināfiaino Moisés Epa Nios yoixii mākairoko āfe meka nikakōimiskē. ⁴⁶ Moisés eōnoa yoikī keneni. Nāskaxō Moisés āfe meka chanīmara faxō eari mā chanīmara fakerana. ⁴⁷ Nāskafixō a Moisés kirika keneni mā chanīmara faima. Nāskaxō eari mā chanīmara faima,” ixō Jesús judeofāfe āto xanīfofo yoini.

6

Jesús cinco mil feronāfakefo ato pimani (Mt. 14.13-21; Mr. 6.30-44; Lc. 9.10-17)

¹ Askata Jesús anā ĩamāfā āfe ane Galilea pokefaini. Āfe ane fetsa Tiberias. ² Nāskaxō Jesús isinī imisfo āfe mekapa ato sharafaito ōikani yorafā rasichi chīfafainifo. ³⁻⁴ Nāskaifono judeofāfe āto fista Pascua mā chaima pakeaino Jesús māchi keya ano nokoax aōxō tāpimisfo fe tsaoni. ⁵⁻⁶ Nāno tsaofono yorafā rasi Jesúski fenifo. Akiki feaifāfe atokiri fesoxō Jesús ōini. (Ato ōikī Jesús shināni oa yorafo fonāikani rakikīa. Nāskaxō Jesús āa tāpini afeskaxō ato pimaimākai.) Nāskaxō Jesús Felipe tāpimapaikōini a āfe mekapa afama mīshti atiro. Nāskaxō Jesús Felipe yōkani: “¿Fanīa afaa ato pimaxikī nō fimē?” ixō Jesús Felipe yōkaito, ⁷ nikaxō Felipe kemani: “Kee, Ifo, nō dos cientos nia oxata yonoxō nō kori fitiro akka a tiikai nokotiro ma na yorafā rasi nō ato pimapanā,” Felipe fani. ⁸ Nāskafekē Jesúsxō tāpimis fetsa Andrés nā Pedro ěto yoini: ⁹ “Ōipo. Na fāke cinco pāa fea. Foe rafeya fea. Akka yora ichapato pitirofoma. Fisti rasichi pitirofo. Nono yora ichapa rasi. Na pāa pishta tsoa nokotiro ma,” fani.

¹⁰ Askafaito Jesús yoini iskafakī: “Ato yoikāfe tsaonōfo,” ato fani. Nāno fasi ichapa ini. Nā Jesús ato yoiai keskai fasi mēra tsaoi fetsenifo. Cinco mil feronāfakefo tsaoi fetsenifo. Kērofori, fakefori tsaonifo. ¹¹ Nāskax tsaofafono Jesús nā cinco pāa fita Apa Nios yoini: “Aicho, Epa,” ixō Apa Nios yoita pāa yafi nā foe rafe kaxkepaketa aōxō tāpimisfo ato ināni, afāferi ato inānōfo. Fikaxō pikani māyakōinifo. ¹² Nāskax keyokōi yorafo māyakōiafono Jesús ato yoini: “Nā pāa yafi foe texefafo fikāfe fēta mēra nanekāfe afaa pishta fenoyamanō,”

ato fani. ¹³ Ato askafaito nikakaxō nā pāa yafi foe texefafo finifo. Doce fēta fospifanifo.

¹⁴ Nāskata Jesús āfe mekapa foe rafe yafi cinco pāa ato pimaito ōikanax yoinānifo: “Chanīmakōi Jesús Niospa meka yoimis. Nā Epa Niospa aōnoa yoipaoni. Nokoki nīchini,” ikanax yoinānifo. ¹⁵ Askafaifono Jesús tāpaxō āfe ōiti mēra shināni: “Na yorafāfe ea kerexkai āto xanīfokōi ea imapaikani,” ixō tāpini. Askata ato makinoax machi fetsa ari kani.

Jesús ĩamāfā femākā kani
(Mt. 14.22-27; Mr. 6.45-52)

¹⁶⁻¹⁷ Askata mā xini kaino aōxō tāpimisfo kanōanāfā mēra nanefainifo ĩamāfā pokefainifo nā pexe rasi Capernaúm ano fokani. Nokoafomano mā fakishaino Jesús atoki nokonima. ¹⁸ Nēfefaino ĩamāfā pooitifikōini. ¹⁹ ĩamāfā chai naisti nēxpakīaxō nēfefānē ato akaino ĩamāfā pooitifikōini. Jesús ĩamāfā kamaki kaitokai tsōa tāpinima mā fichifikaxō. Tāpiamax ratekōinifo. ²⁰ “Ĕkĭa. Rateyamakāfe,” Jesús ato fani. ²¹ Nāskaxō yoinifo: “Aicho. Kanōa mēra naneyofe,” fanifo. Mā Jesús naneano nāskax ĩamāfā kesemē nokorisanifo.

Yorafā rasichi Jesús fenanifo

²² Nāskaino mā penano yorafā rasi okiri ĩamāfā kesemē nētenifo. “A aōxō tāpimisfo fe Jesús kaito nō ōiama. Nonokai kanōa fetsama. Akka Jesús nonoki,” ikanax yoinānifo.

²³ Nāskatari Tiberias chaimaxō kanōa rasi fenifo. A Jesús yorafā rasi ato pimaita ano fenifo. ²⁴ Askatari Jesúsxō tāpimisfo ano inifoma. Jesúsri ano inima. Nāskaxō yora rasichi Jesús fenaifokani fonifo kanōanāfānē Capernaúm anoa.

Jesúsfi a nō piyai keskaraki. Akka nō piaxma nō nitiroma. Nāskarifiakī nō Jesús chanīmara faaxma nō afe nīpaxatiroma

²⁵ Mā fichikaxō Jesús yoinifo: “Maestro, ¿afetĭa mĭ nono oamē?” ixō yōkanifo. ²⁶ Askafaifono ato kemani: “Chanīmakōi ē mato yoi. A yōra atiroma keskara ē mato ispafekē mā ea fenaima. Akka ē mato pimaino keyokōi mā māyakōita. Nāskakē mā ea fenai. ²⁷ Shinākapo. a piyai fisti mā shināfafāini. Akka a mā piyai pisiyax payokometiro. Nāskaxō mā yonofafāini a mā piyai fixiki. Akka a mā piyai fisti shināyamakāfe. A ē mato inātiro shinākāfe. A mā piyai ē mato inātiro a keyonakama. Nā piyax mā efe isharapakenaka. Ĕfi yōra fakekōiki. Ĕfe Epa Nios ekeki inimai ea katoxō matoki ea nīchini ē mato imasharapakexanō,” ato faino, ²⁸ nikakakī yoinifo: “¿Nō afeskatiromē Nios nokoki inimanō?” ixō yoinifo. ²⁹ Askafaifāfe Jesús ato kemani: “Epa Niospa ea matoki nīchini. Akka mā Epa Nios inimamapaikī ea chanīmara fakāfe,” Jesús ato faino, ³⁰ kemanifo: “A tsōa atiroma keskara fakī noko afama mīshti ispafe nō mia chanīmara fanō. ³¹ Akka Niospa meka kenenifo iskafakī: ‘Tsōa atiroma keskara Moisés a piaifo ato ināpaoni. Nā pena tii nai mēranoax pakepaoni a piaifo,’ ixō kirika kenenifo. A nōko xinifāfe pipaonifo tsōa istoma anoxō āfe ane mǎnǎ. Nāskakē mĭri a Moisés aka keskara fafe, nō mia chanīmara fanō,” ixō yoinifo.

³² Askafaifono Jesús ato yoini: “Ĕ mato pāraima na Moisés kai a nōko xinifāfe piyai ato inānima, nai mēraxō Epa Niospa ato ināni. Akka Epa Niospa mā iskaratĭa mato mēra nīchia a mā piyai keskara nai mēraxō mǎto ōiti mēra nanenō. ³³ Nā fistichi yorafo nimapakekōixatiro. Epa Niospa nāmā nīchini yorafo ato imasharapakexanō,” ato faito, ³⁴ “Ĕfo, a nō piyai noko ināfafāife a mĭ noko yoiai,” fanifo. ³⁵ Jesús ato kemani: “Ĕfi nǎ mā piyai keskarakī. Ĕ yorafo nimasharapakexatiro. Mǎ nō piyax māyatiro. Nāskax nō anǎ fonāitiroma.

Nāskarifiakī ea shināifāfe ē ato shināmafafāini. Ē ato potanakama. Nāskakē āto ōiti mēra inimakōitirofo. Askatari mā nō faka ayax nō anā nōamāitiroma. Nāskarifiakī ea shinākanax efe isharapakenakafo. ³⁶ Nāskafekē ē mato yoiatio mā ea nikakī mā ea chanīmara faima. ³⁷ Akka nā ea Ifofaafo Epa Niospa ea atoya imasharapakenaka nāfāfemāi ea Ifofakōiafono. Akka fatorafāferi ea Ifofaifāfe nāfo ē ato kexesharapakenaka. Ē ato potapakenakama. ³⁸⁻³⁹ Epa Niospa ea nīchikī ea yoini iskafakī: ‘Nā mefe ipaikani mefe ipanakafo tsoa pishta fenonakama. Nāfo mā nafiamisfono mī anā fotoxō mī ato ōtofaxii nofe nipaxanōfo. Nāskara ē fichipai,’ ixō ea nīchini. Nāskakē nā ēa ē apaiyai keskara faxiki ē mai ano onima. Akka nā ea nīchiato ea amapaiyai keskara faxikī ē mai ano fotoni.

⁴⁰ “Ēfi Niospa Fakeki. Ea chanīmara fakanax nāfo ēfe Epa Nios ari efe isharapakenakafo. Nafiafāfe ē afianā mai ano fotoxō ē ato ōtofaxii ishara-pakexanōfo. Nāskara ēfe Epa Niospa fichipai,” ixō Jesús ato yoini.

⁴¹ “Ēfi nai mēranoax onikī a mā piiai keskaraxō yorafo imasharaxikī,” Jesús ato faito nikafikaxō chanīmara fatama judeofāfe Jesús mekafakakī yōachepenifo: ⁴² “Kee, nikakapo. Na Jesús, āfe apa José yafi āfe afa María nō ōimis. Nakai afaama. Akka, ¿afeskakī noko yoimē: ‘Ēfi nai mēranoax Nios ika ariax onikī?’ Nāskakē na meka nō chanīmara faima. Iskara meka nō nikapaima,” ikanax yoinānifo. ⁴³ A āto ōiti mēraxō shināifo keskara Jesús ato onāxō ato yoini: “Ekeki yōachepeyamakāfe. ⁴⁴ Ē chanīma. Epa Niospa ea nīchini. Nāskafekē Epa Niospa āto ōiti mēra ato shināmayamaino ea tsōa chanīmara fatiroma. Akka nā ea chanīmara faax nakē ē anā nai mēranoax fotoxō ē ato otofaxii efe ipaxanōfo. ⁴⁵ Niosnoa yoimisfāfe kirika kenenifo iskafakakī: ‘Epa Niospa keyokōi ato tāpimaxii,’ ixō kirika kenenifo. Fatora yorafāfe ēfe Epa Nios nikaifono ato tāpimaxii. Nāskaxō afāferi ea chanīmara faxikani.

⁴⁶ “Tsōakai Epa Nios ōimisma. Eres fisti ē Epa Nios ōimis, ēmāi a makinoax onixakī. ⁴⁷ Ēfi mato chanīmakōi yoikai. A ea chanīmara fai ēfe Epa Nios fe ipanaka.

⁴⁸ “Ēfi nā mā piiai keskaraki. Nā ea chanīmara faafo tii Epa Nios fe isharapakenakafo. ⁴⁹ Nōko xinifo Moisés fe tsōa istoma ano ipaonifo. Nā pipaonifo, āfe ane mǎnā. Akka mǎnā pipaofinixakī mā nai mitokomenifo. ⁵⁰⁻⁵¹ Ē nai mēranoax ēfe Epa Nios ika anoax oni. Ēfi na mā piiai keskaraki. Nā ea chanīmara fai nāfi efe nīpanakakī. Nā nōko xinifāfe pipaonifo nai mēranoax pakeaito aatokai ato nimasharamisma. Iskaratīa afianā Epa Niospa nai mēraxō mato ināi a mā piiai. Nā piax yorafo isharapakenakafo anā nanakafoma. Ēfi nā mā piiai keskaraki. Nāskakē ē keyokōi yorafo ē ato nāxoxii nisharapakexanōfo,” ixō Jesús ato yoini.

⁵² Nikakani judeofo fochishpanā faatanānifo. “¿Afeskaxō na feronāfāke āfe nami noko inātiromē nō pinō?” ikanax yoinānifo. ⁵³ Jesús āfe namikiri keparanākī ato yoini: “Ē mato pǎraima. Ēfi yōra fakekōiki. Mā ēfe nami piyamata ēfe imi ayayamata ikax mā nipaxatiroma. ⁵⁴ Fatorafāfe ēfe nami pikani ēfe imiri ayakani isharapakexikakī. Nāskakē ē afianā nai mēranoax fotoaitīa a namisfo ē ato otofaxii Epa Nios ari nisharapakexanōfo. ⁵⁵ Ēfe nami na mā piiai keskara. Ēfe imiri a mā ayatiro keskara. ⁵⁶ Fatorafāfe ēfe nami pikani, ēfe imiri ayakani, nāfo efe rafesharapakenakafo. ⁵⁷ Akka ēfe Epa nīpanakato nāato ea nīchini. Nāskai ēri aōnoax nīpanaka. Nāskakē efe rafesharkanax eōnoax nīpanakafo.

⁵⁸ “Afianā ē mato yoi. Nōko xinifāfe a pipaonifo āfe ane mǎnā. Nā pifikanax mā nai keyonifo. Akka ēfi Epa Nios ariax ē matoki oni. Ēfi a mā

piai keskarakī. Ea pikanax eōnoax nisharapakenakafo,” ixō Jesús ato yoini. ⁵⁹ Judeofāfe āto ichanāti pexe mēraxō Capernaúm anoxō āfe meka Jesús ato yoini.

Jesúsnoax yorafo nīpaxatirofo

⁶⁰ Jesúsxō tāpimisfo a ranā yoinānifo: “A Jesús noko yoia keskara fekaxkōi. Tsōakai tāpitiroma. Nōkai na keskara meka nikamisma,” ikanax yoinānifo. ⁶¹ Jesús ato onāni a ranā yoināifāfe. Akka atirifāfe Jesús nikapainifoma. Nāskaxō ato yoini: “¿A ě mato rama yoia keskara mā nikapaimamē? ¿Anā mā ea chanīmara faimamē? ⁶² Ě yōra fakekōi fiax a ě ipaoni ano nai mēra ě anā kaito mā ea ōiki, ¿mā ea chanīmara faimamē? ⁶³ Akka Niospa Yōshi Sharapa nā fistichi yorafo nimasharapaketiro. Yorafokai yōra nimapaketiro. Akka ěfe Epa Niospa Yōshi Sharaōxō ě mato yoimis. Nāskakē ěfe meka chanīmara faax mā nisharapakexatiro. ⁶⁴ Nāskafekē fetsafāfekai ea chanīmara fakanima,” ixō Jesús ato yoini. Jesús taefakī ato ifini. “Fatotokai ea chanīmara fatama ea ato achimaximē,” ixō Jesús tāpiyoni. ⁶⁵ Askaxō anā ato yoini: “Ě mato yoia iskafakī, Epa Niospa āto ōiti mēra ato shināmayamaino ea chanīmara fatirofoma,” ixō ě mato yoia.

⁶⁶ Nāskaxō Jesús ato yoiai keskara nikakaxō a chīfamisfāfe Jesús potakaxō anā tananifoma. ⁶⁷ Akka Jesús a aōxō tāpimis doce ato ifini. Afetīama ato ifiyoni aōxō tāpimisfo inōfo. Nāskaxō ato yoini iskafakī: “¿Māri emakinoax kapaimē?” ato faino, ⁶⁸ Pedro kemani: “Ifo, nō fato fetsakai Ifofatiroma. Mī fistichi mī noko yoitiro afeskax nō isharapakexatiromākī. ⁶⁹ Mīfi mī Nios ariax nokoki oniki. Mīfi sharakōi Cristokī. Nios nā nipanakato nāato āfe Fakekōi mī. Nā nō chanīmara fai,” askafaito, ⁷⁰ “Ě mato doce feronāfake ifini mā eōxō tāpimis inō. Akka ě mato ififinino a mato fe rafea fetsa mā a mēra Satanás chaka nanea,” ixō Jesús ato yoini. ⁷¹ Nā Simón Iscariote āfe fake Judas ini. Nā Judasnoa Jesús ato yoini. Jesús nā Judasri ififinino nāato Jesús ato achimani fetsafāfe retenōfo.

7

Jesús āfe extofāfe chanīmara fanifoma

¹ Askata Jesús Galilea ano kafāsani ato tāpimafofāsafai. Judea ano kayopainima judeofāfe āto xanīfofāfemāi retepaiyaifono. ²⁻⁵ Judeofāfe āto xinifāfe tapas fapaonifo shinākakī fista anifo. Askata judeofo ichapa rasi Judea mai ari Jerusalén anoxō fista aki fokani fonifo. Mā fista chaima ikaino Jesús Judea mai ari kayotama, Galilea ano nēteni. Āfe extofori nā Galilea ano afe inifo. Āfe extokōifofiakaxō Jesús kai nafi Cristoki Niospa nīchini ixō tsōa chanīmara fanifoma. Nāskaxō yoinifo iskafakakī: “Nonoax Judea mai ano katāfe nā mia Ifofamisfāfe nā mī ato axomis keskara ōinōfo. Nā mī amis keskara mī ato ōimanamano fetsafāfekai mia tāpitirofoma. Nā mī afama mīshti akaifo ato is-pafotāfe,” faifāfe ⁶ ato kemani: “Ě iskaratīa ari katiroma. Ěfe Epa ea nīchiyoima. Akka afetīara kapai mā katiro,” ato fani. ⁷ “Na yorafāfekai Epa Nios yafi ea chanīmara faafoma. Nāfāfe ea noikaspakani. ‘Māfi afarafo chakafamis,’ ě ato famis. Nāskakē ea noikaspakani. Akka mato noikaspakanima. ⁸ Akka māri fista axiki Jerusalén ano fotakāfe. Ě kayoikaima. Ěfe Epa Niospa ea nīchiyoima,” ixō Jesús āfe extofo yoini.

⁹ Mā ato yoita Galilea ano Jesús nēteni.

Jesús kani fista akikai

¹⁰ Nāskata mā āfe extofo fista akikai, Jerusalén ano foafono Jesúsri chipo kani. Tsōa tāpiamano onekōi Jerusalén ano kani. ¹¹ Nānoxō nā judeofāfe āto

xanĩfofofãfe Jesús fenakani yoinãnifo: “¿Fanĩmẽ nã feronãfake?” fanifo. ¹² Nãno yora ichapa rasi inifo. Atirifãfe iskafanifo: “Jesús feronãfake sharakõi,” ikaxõ yoinifo. Askafafiaifãfe atirifãfe yoikĩ iskafanifo: “Maa. A feronãfakekai sharama. Yorafo pãramis,” ikaxõ yoinifo. ¹³ Nãskax a ranã yoinãnifo judeofãfe ato nikayamanõfo judeo xanĩfofoki mesekakĩ.

¹⁴ Fista mitokomeamano Jesús Nios kĩfiti pexefã mẽra ikikaini a mẽraxõ ato yoixikĩ. ¹⁵ Judeofãfe ãto xanĩfofofãfe nikakaxõ yoinifo: “Aira. Nikakapo. ¿Afeskakĩ na feronãfake kenekĩ tãpikĩ finayamafixõ tãpifinakõiamẽ?” ikanax yoinãnifo. ¹⁶ Nã yoiãifo keskara onãxõ Jesús ato yoini: “Èfe shinãmã shinãkõixõ ã mato yoima. Epa Niospa ea nĩchini nã ea shinãmanai keskara ã mato yoi. ¹⁷ Fatotora a Niospa yoiãi keskara apaikĩ tãpitiro akka ãa ã shinãxõ ã mato yoima, Epa Niospa ea shinãmanaino ã mato yoi. ¹⁸ Fatora yora fẽtsa ãfe shinãmã shinãxõ ãakõi ato yoi. Nãato yorafo shinãmapai iskafakĩ: ‘Nã feronãfake mekakĩ tãpikõia, ea fanõfora,’ ixõ anori ato shinãmapai. Akka yõra fẽtsa ãa ãfe shinãmã shinãx mekaima. A nĩchinito shinãmanaino mekai, a nĩchini fisti yoisharanõfo. Nãskakẽ nã yõra ato chanĩkima yoi, ato pãraima. ¹⁹ Nõko xini Moisés Niospa meka mato kenexoni. Akka mã nikasharamisma. Nãskakẽ pena tenetitĩa ã feronãfake sharafaano mã ea retepai,” ato faino, ²⁰ “Kee. Tsoakai mia retepaima. Mĩ mẽra niafaka yõshi chaka nanea,” faifãfe ²¹ ato kemani: “È feronãfake pena tenetitĩa sharafaino akka mã ea yoikĩ iskafamis: ‘¿Afeskakĩ Jesús pena tenetitĩa feronãfake sharafaimẽ?’ ixõ mã eõnoa yoimis. ²² È pena tenetitĩa afara shara faa keskafakĩ mãri pena tenetitĩa afara memis. Moisés kirika kenekĩ yoini keskafakĩ mãri mãto fake feronãfakefo rama kãikẽ mã ocho nia oxano mãto fake feronãfakefo mã foshki repa xatemis. (Akka Moiséskai askara noko yoinima, nõko xinifãfe askara yoinifo.) Akka iskaratĩa pena teneti ikaino mã mãto fake feronãfakefo mã foshki repa xatemis.

²³ “Moisés yoini keskara nikakĩ pena tenetitĩari mã mãto fake feronãfakefo mã foshki repa xatemis. Akka, ¿afeskai mã ekeki õitifishkikimẽ na pena tenetitĩa ã na feronãfake sharafaano? ²⁴ Nãskakẽ a yõra afara shara fakẽ õixõ yoikĩ iskafayamakãfe: ‘Nãto afara chakafai kiki,’ fayamakãfe. Mẽstekõi yoisharakãfe,” ixõ Jesús ato yoini.

“È ãfe Epa Nios ariax ã oni,” Jesús ato fani

²⁵ Askata yora rasi Jerusalén ano ikanax yoinãnifo: “¿A na feronãfakemẽ xanĩfofofãfe retepaiyaifo?” ikanax yoinãnifo: ²⁶ “Õikapo, yorafã rasichi õifiaifono mã ato yoi. Akka tsõakai afaa faima. Mã xanĩfofofãfe mã tãpiafo rakikĩa nã Cristo, a Niospa nokoki nĩchini. ²⁷ Ètsa, aama rakikĩa Cristo. Cristo oaito nõ tãpitiroma fakiranoax oi. Akka na feronãfake mã nõ tãpia fakiax oamãki,” ixõ yoinifo.

²⁸ Askafaiãfe nikaxõ Nios kĩfiti pexefã mẽra ikixõ Jesús ato yoini iskafakĩ: “Chanĩma, mã mã ea tãpia ã fakiax oamẽ,” ato fani. “Akka ãa ãfe shinãmã shinãx ã oama. Akka ãfe Èpa ea nĩchini. Nãfi chanĩmismaki. Akka mãfi ãfe Epa mã tãpiama. ²⁹ È ãfe Epa ariax oni. Nãato ea nĩchini. Nãskakẽ ã a tãpikõia,” ixõ Jesús ato yoini.

³⁰ Ato askafaito nikakani akiki õitifishki ikakĩ achipainifo karaxa mẽra ikimapaikakĩ. Akka a reteãifo ãfe pena nokoamano achipainifo. Tsõakai Jesús afeska fanima. ³¹ Nã yorafã rasichi Jerusalén anoafãfe yoinifo: “Tsoa fẽtsa atiroma keskara fakĩ Jesús Niosxõ afama mĩshti noko ispa. Nã Jesús afama mĩshti fai tsõa atiroma keskara fakĩ. Akka yora fetsa oax ãa iskai yoi:

‘Ēkīa Cristo,’ iki yoi. Akka atokai afama mīshti fakī Jesús finōtiroma,” ikanax yoinānifo. Nāskakī Jesús chanīmara fanifo.

Fariseofāfe āto inafō nīchinifo Jesús achitanōfo

³² Nā yorafā rasichi Jesúsnoa meka shara yoiāifāfe fariseofāfe nikanifo. Nāskaxō judeofāfe āto xanīfofo feta fariseofāfe a Nios kīfiti pexefā kexemisfo nīchinifo Jesús achitanōfo karaxa mēra ikimaxikakī.

³³ Askata Jesús ato yoini: “Ē anā nono mato fe samarakaima. Ē sama-mashta kai a ea nīchini shināfāini. ³⁴ Ē mato anoax kaino mā ea fenakī mā ea fichitiroma. A ē kai arikai mā katiroma,” ixō Jesús ato yoini.

³⁵ Ato askafaito nikakanax judeofāfe āto xanīfofo yoinānifo: “¿Faki na feronāfake kaimē nō fichitiroma? Nā nōko kaifo griegofo nā pexe rasi anoax paxkafainifo nāno kai rakikīa. Nānoxō griegofo tāpimaxikī kai rakikīa,” fanifo.

³⁶ “¿Afaa noko yoipaimē iskafakī? ‘Mā ea fenafikikai mā ea fichitiroma. Ē ika arikai mā katiroma,’ ixō noko yoiāi. ¿Afaa noko yoipai iskaimē?” ikanax yoinānifo.

Niospa Yōshi Sharapa yorafō nimapaketiro

³⁷ Askata mā fista mitokomeaino Jesús nā yorafā rasi mēraxō niinākaifā fāsi mekainākaifā ato yoini iskafakī: “Nikakapo. Nā mā nōamā iki faka ayapaiyai keskai ekeki fekāfe. ³⁸ A ea chanīmara faafāfe Niospa meka kenenifo keskara yora āfe xaki mēra faka poyo poyo iki netsotiroma keskara shara itiro ea Ifofaax,” ixō āfe Yōshi Sharaki keparanākī Jesús ato yoini. ³⁹ Akka faka ato yoinima, Niospa Yōshi Sharaōnoa ato yoini iskafakī: “A ea chanīmara fai ēfe Epa Niospa āfe Yōshi Shara fe rafepakenaka,” ixō Jesús ato tāpimani Apa Nios ari kayoxoma yorafāfe āto xanīfokōi ixikī. Nāskakē Jesús kayoamano Niospa āfe Yōshi Shara ato fe rafeama.

Jesúsnoa yoinifo. Askafikaxō anoris shinānifoma

⁴⁰ Jesús nikakaxō atirifāfe yoinifo: “Chanīmakōi nā feronāfake Niospa meka yoimis a nō manai,” ikanax yoinānifo. ⁴¹ Atirifāferi yoinifo: “Nāfi Cristoki,” ixō yoinifo. Akka fetsafāfe yoini: “Maa, nakai Cristoma. Cristokai Galilea anoax kaitiroma. ⁴² Niospa meka kenenifo keskara, ‘David āfe fena inō Cristo. Nā David ipaoni Belén ano. Nānoxri Cristo kāixira,’ ixō kirika kenenifo. Akka Cristokai Galilea anoax kaitiroma,” ixō yoinifo. ⁴³ Nāskakē nā yorafāfe Jesúsnoa nikakaxō anoris shinānifoma. Fetsafāfe Jesús chanīra fanifo, fetsafāferi chanīmara fanifo. ⁴⁴ Atirifāfe Jesús achipainifo karaxa mēra ikimapaikakī. Achipaifikakī tsōa Jesús afeska fanima.

Judeofo āto xanīfofofāfe Jesús chanīmara fanifoma

⁴⁵ Askata fariseofāfe āto Nios kīfiti pexefā kexemisfo fenifo. Āto xanīfofoki feaifono ato yōkanifo: “¿Afeskakī mā Jesús achiamamē noko efexoxikī?” ixō ato yoinifo. ⁴⁶ Ato askafaifono ato kemanifo: “Na feronāfake āfe meka sharakōi, tsōa anori yoimisma,” ato fanifo. ⁴⁷ Ato nikakaxō fariseofāfe ato yoinifo: “Kee, Jesús mā matori pāra. ⁴⁸ Akka nōfi mātō xanīfofo feta a Moisés kirika keneni nō tāpikōiakī. Akka nō fatotokai nō Jesús chanīmara faima. ⁴⁹ Akka nā yorafāfe mā rama Jesús nikafo nāfāfe a Moisés kirika keneni tsōa tāpiafoma. Niospa ato omiskōimaxiki,” ikaxō ato yoinifo.

⁵⁰ Askafafiaifono Nicodemo taeyoi nāto pena fetsa Jesúski kani fakishi afara yōkaikai. Nārimāi fariseoax nāskaxō afe rafeafo yoini: ⁵¹ “Efe yora mīshtichi, ē mato yoinō. Nōko xinifāfe āto xanīfofāfe yoinifo keskara nō fatora feronāfake nikasharayamaxō, ‘Afara chakafaira,’ nō fatiroma iskafakī: ‘Nāto afarafo chakafai kiki nō omiskōimanō,’ ixokai nō askafatiroma,” ato

askafaino kemanifo: ⁵² “Mī noko yoi Galilea anoxō yoiaino keskara. Galilea anoxō Niospa meka tāpiafoma. Shināpo. Fato feronāfakekai a Galilea anoxō Niospa meka yoimis oama. Akka nono fistixō Niospa meka noko yoitirofo,” ikaxō Nicodemo kemanifo.

⁵³ Nāskax yoinākanax āto pexe rasi ano fonifo.

8

Kēro āfe fenema fe ikaito xanīfofōfāfe retepainifo

¹ Nāskata Jesús machi āfe ane Olivos ano kani. ² Penaino Jerusalén ano nokoax anā a Nios kīfiti pexefā mēra Jesús oni. Nāno yorafā rasi afianā akiki fenifo nikai fekani. Askata tsoaxō ato yoini.

³ Ato yoiaino a Moisés yoikī kirika keneni keskara ato tāpimamisfo fe fariseofo fenifo. Kēro āfe fenema fe ikaito fichikaxō Jesúski efenifo. Yorafā rasi nēxpakīa kēro nīchinifo keyokōichi ōinōfo. ⁴ Askafakaxō Jesús yoinifo: “Maestro, na kēromā afarafo chakafaa. Āfe fenema fe ikaito nō fichia. ⁵ Moisés iskafakī noko yoini: ‘Kēro āfe fenema fe ikaito ōikī nō tokirinī tsakakī retetiro,’ ixō Moisés noko yoini. Akka, ¿mī noko afaa faimē?” fanifo.

⁶ Nāskaxō Jesús kemamapainifo, “Fakiri noko yoimākai,” ikaxō āto xanīfofo yoipaikakī. Askafaifono Jesús āfe mēkemā mai keneni. ⁷ Yōkarifaifono Jesús atoki fininākfā ato yoini iskafakī: “Fatotokai mā afaa chakafamismamē na kēro mā tokirinī tsakakī taefai,” Jesús ato fani.

⁸ Mā ato yoixō afianā āfe mēkemā mai keneni. ⁹ Nāskano mā ato yoiaino nikakaxō a Jesús mai keneai ōikanax nā kēro mekafakī chakafamisfo fisti rasi tsekefaifāinifo. Nā anifo tii foi taenifo. Chipo naetapafo fonifo. Mā foafono Jesús fisti nāno kēro fe nēteni. ¹⁰ Nāskax Jesús fininākfā nā kēro yōkani: “¿Nā feronāfakefo mia yōafo mā foafomē? ¿Tsoa fisti nēteamamamē anā mia yōaxikakīma?” ixō Jesús yōkaito, ¹¹ “Īfo, tsoa pishta nēteama,” faito, “Ērikai mia mekafakī chakafaima. Iskaratīa mī katiro. Afianā mī chaka ipaoni keskara anā askayamafe,” ixō Jesús nā kēro yoini.

Jesús pena xafashara keskara

¹² Askata mā kēro kaano Jesús yorafā rasi yoini. Ato yoini iskafakī: “Ēfi pena keskarakī. Ē nā yorafo tii imasharatiro shara ĩpaxanōfo, anā fakish keskara inōfoma. A ea Ifofai fenotiroma,” ixō Jesús ato yoini. ¹³ Nikakakī fariseofāfe yoinifo: “Na mī noko yoiaino anorikai tsōa mīōnoa noko yoima. Mīa mī yoimeī. Akka a mī noko yoiaino tsōa mia nikatiroma,” faifāfe ¹⁴ Jesús ato kemani: “Ē fakiax oamē fakiri ē kaimē mē tāpia. Akka ēa ē yoimeai ēfe meka chanīmakōi. Askafiax fakiax ē oamē ē fakiri ē kaimē mākai tāpiama. ¹⁵ Mā ea tāpixoma, mā ēfe meka chanīmara faima. Ea tāpixoma mā ea shināi oa chanīai keskara ē mekaito. Mā askara shināi Niospa mato askara anori shināmanainoma. Ēkai tsoa mekafakī chakafaima. ¹⁶ Akka, ‘Na yorafāfe afara chakafamisfo,’ ēa ē mato faima. Ēfe Epa shināi keskara nānorikōiri ē mato yoi. Askaxō chanīmakōi ē yoimis. Ēfe Epa nāato ea nīchini, nā ea tāpimanai ē yoimis. ¹⁷ Moisés mato yoini iskafakī: ‘Feronāfake rafeta nānoris mato yoiaino mā nikatiroma,’ ixō mato Moisés yoini. ¹⁸ Akka ēakōi ē yoimeī. Akka nā ea nīchinio ēfe Ēpari eōnoa nānorikōi yoimis,” ato faito, ¹⁹ nikakakī yōkanifo: “¿Fanīmē mī Epa?” faifāfe, “Mākai ēfe Epa yafi mā ea tāpiama. Ea tāpixō ēfe Epari mā tāpikerana,” ixō ato Jesús yoini.

²⁰ Nios kīfiti pexefā mēraxō ato yoini. Nāno nā kene mēra judeofāfe āto kori naneti ini. Niospa meka yoimisfo ato ināmisfo. Jesús ato yoiaino judeo

xanĩfofofãfe achipainifo. Askafixõ tsõa achinima ãfe penakairoko nokokẽ achipanãfãfe.

Jesús yorafo yoini: “È kai arikai mã katiroma,” ato fani

²¹ Askata Jesús afianã judeofo ãto xanĩfofo yoini: “È chai mẽ kai. È kaano mã ea fenafikĩ mã ea fichitiroma. Mãto chaka soaxoma nãskax mã nai. È kai arikai mã nokotiroma,” ixõ Jesús ato yoini. ²² Jesús ato askafaito nikakaxõ yoinifo: “¿Akõĩ retemeimẽ? Nã noko yoiai: ‘A ã kai ari mã nokotiroma,’ noko fai,” ikanax judeofo xanĩfofo yoinãnifo.

²³ Jesús ato tãpixõ ato yoini: “Mãfi na mai anoakĩ. Akka ãfi nai mẽranoakĩ. ²⁴ Nã ãa ã yoimea keskara mãto chaka potaxma mã nai eakairoko mã ea chanĩmara faax. Nãskakẽ afara chakafaxõ mãto chaka soaxma mã naax Epa Nios ari mã nokotiroma. Mã mã naano mãto chaka mato fe ipanaka.”

²⁵ Ato askafaito kemanifo: “¿Mĩ tsoamẽ?” ixõ yõkaifãfe, “Nã ã mato yoitaifamis ãkĩa. ²⁶ Matoõnoa afama mĩshti ã yoitiro. A mã afara chakafamis ã yoitiro. A ea nĩchinito ea yoiaito ã nikai. Nãskakẽ nã ã mato yoifafãini. A ea nĩchinito yoiai chanĩmakõĩ,” Jesús ato fani.

²⁷ Apa Niosnoa ato yoifaitokai tsõa tãpinifoma. ²⁸ Nãskaifãfe Jesús ato yoini: “Èfi yõra fakekõiki. Mã ea ifi cruz ikakĩ mastaxõ mã ea fininĩfofãxõ mã ea õixii ã tsoamãki mã ea tãpitiro. Nãskatari eõnoa mã tãpitiro ãa ã mato yoimisma. Epa Niospa ea yoia keskara ã mato yoimis. ²⁹ Nã ea nĩchini efe ika. Eres ã ikama. A ea amapaiyai keskara ã amiski. Nãskax ekeki inimasharamiski,” ixõ ato Jesús yoini. ³⁰ Yoiaito nikakaxõ yora ichapato chanĩmara fanifo.

Niospa fakefãfe Nios ãto Ifo, akka afara chakafamisfãfe afara chaka ãto ifo

³¹ Nãskaxõ Jesús a chanĩmara faafo yoini: “È mato yoiaito mã ea nikasharakõiax mã eõxõ tãpimiskõifo mã itiroki. ³² Èfe meka nikakõixõ mã Nios tãpitiro, Nios chanĩmisma. Askax mã isharatiro. Afara chanĩ mãto ifo itiroma.”

³³ Ato askafaito kemanifo: “Nõfi Abraham ãfe fenaki. Fato fetsa nõko ifo imisma. Nõkai tsõa yonomatifoma. ¿Afeskakĩ ‘Afara chanĩ mãto ifo itiroma’ noko Jesús faimẽ?” fanifo.

³⁴ Askafaifãfe anã Jesús ato yoini: “Chanĩmakõĩ ã mato yoi. Nã afara chakafamisfãfe nã chaka ãto ifo ixii. ³⁵ Mã mã tãpia pexe ifãfe ãfe yonomati ãfe pexe mẽra ipaxatiroma. Akka ãfe fake fisti ãfe pexe mẽra ipaxatiro. ³⁶ Nãskarari Niospa Fãke mato chaka soaxonano afara chaka mãto ifo itiroma. Niospa mato fakekõifai, mã afe isharakõipakenaka. ³⁷ Mẽ mato tãpia mãto xini Abraham. ãfe fenafoxõ ãfe meka mã nikakaspai. Nãskaxõ mã ea retepai. ³⁸ Èfe Epa amis keskara mẽ õimis. Nãõnoa ã yoimis. Mãri a mãto epa mato yoimis keskara mãri yoimis,” ato faito, ³⁹ kemanifo: “Akka nõko xini Abraham,” faifãfe, “Akka mã Abraham ãfe fenafokĩ ¿afeskai mã Abraham apaoni keskara mã amismamẽ? ⁴⁰ Epa Niospa ea yoimis keskara chanĩma ã mato yoifiaino mã ea retepai. Abrahamkai mato keskara ipaonima. ⁴¹ Mãto epa akai keskara mãri mã amiski,” ato faito, “Nõkai Epa ichapayama. Nõko Epakõĩ fisti Nios. Nõfi ãfe fakekõifoki,” faifãfe ⁴² Jesús ato yoini: “Èfi Nios fe imiski. È Nios ariax oni. Èa shinãx na mai ano ã onima, ãfe Èpa ea nĩchini. Akka mãto Epa Nioskẽ mã ea noikerana. ⁴³ ¿Afeskakĩ ãfe meka mã nikaimamẽ? A ã mato yoiaito mã nikakaspai. ⁴⁴ Akka mãto epa Satanás. Mã ãfe fakekõifo. Nãskaxõ mãto epa apaiyai keskara mãri mã apai. Nãfi taeyoi retemitsamis iyopaoni. Afi iskaratĩa nãskara. Atokai afara shara yoimisma, chanĩkõĩ. ãfe shinã mẽraxõ chanĩ fisti shinãmis. Nãskaxõ chanĩ fisti yoimis.

Nā chanīai shināifāfe nā chanīmis nāfi āto apaki. ⁴⁵ Nā keskara chanī ē mato yoyamafiaito mā ea chanīmara famisma. ⁴⁶ Ē afaa chakafaito mā ea ōimisma. Ēkai afaa chakafamisma. Ramashara ē chanīmisma. Ē askafiaito mā ea chanīmara famisma. ⁴⁷ Nā Nios fe rafeafāfe Niospa meka nikatirofo. Mākai Nios fe rafeama. Nāskaxō mā āfe meka mā nikaima,” ixō Jesús ato yoini.

Abraham fakeamano Cristo Apa fe iyopaoni

⁴⁸ Judeofāfe Jesús kemanifo: “Chanīma nō yoimis. Mīfi samāritanō chakaki. Askatari mī mēra niafaka chaka nanea,” faifāfe, ⁴⁹ “Niafaka chaka ē mēra naneama. Ē ēfe Epa Niosnoa meka shara ē yoimis. Akka māfi eōnoa meka chaka yoimis. ⁵⁰ Askafixō, ‘Ea yoisharakāfe,’ ē yorafo famisma. Ēfe Epa Niospa meka shara eōnoa ato tāpimapai. Nāato ato yoitiro fatofomāki yora sharafo, fatoforimāki yora chakafo. ⁵¹ Chanīmakōi ē mato yoinō. Nā ēfe meka nikaifo nakanamax nīpanakafo,” ato faito kemanifo, ⁵² “Iskaratīa mā nō mia tāpikōi mīfi niafaka chakaya. Akka mā Abraham nani, Niospa meka yoimisfori mā nanifo. Nāskafikē mī noko yoia: ‘Nā ēfe meka nikakōiaifo nātamaroko nīpanakafo,’ ixō mī noko yoi. ⁵³ Mā nōko xini Abram nani. Niospa meka yoimisfori mā nanifo. ¿Akka mī Abram finōkōiamē? ¿Mī shināimē ‘Ē ato finōara’ iki?” faifāfe, ⁵⁴ Jesús ato kemani: “A ēa ē yoimesharai ēfe meka sharama. Akka ēfe Ēpa eōnoa yoisharai. Mā a yoimis: ‘Nōko Epa Nios,’ fakī. ⁵⁵ Mākai ēfe Epa Nios tāpimisma. Akka ēfi ēfe Epa tāpikōia. Akka ē mato keskaraxō, ‘Ēfe Epamara,’ ē fakerana mato keskara chanīmis ē ikerana. Askatamaroko ēfe Epa Nios ē tāpikōia. Ea yoiai keskara ē amis. ⁵⁶ Māto xini Abram yoini: ‘Cristo oaito ē ōixii,’ ixō yoi inimani. Mā ē oaito ea ōini askax fāsi inimani,” ato faito, ⁵⁷ “Mīkai cincuenta xiniya akama. Mīkai nōko xini Abram ōimisma. Afetiakai nanima. Akka, ¿afeskakī, ‘Ē Abram ōimis,’ ixō mī noko yoimē?” faifāfe, ⁵⁸ “Chanīmakōi ē mato yoinō. Abram fakeamano ēfi iyopaoniki,” ixō Jesús ato yoini.

⁵⁹ Askaito nikakani nā judeofāfe āto xanīfofo ōitifishkikaxō tokiri fikaxō Jesús tsakapainifo. Askafapaiifaifono Jesús ato makinoax yamarisatani, Nios kīfiti pexefā mēranoax. Kaitokai tsōa ōinima.

9

Feronāfake fēxo kāini Jesús sharafani

¹ Jesús kakī feronāfake fēxo nāskarapa kāini fichini. ² Ōikakī aōxō tāpimisfāfe yōkanifo: “¿Maestro, afeskai na feronāfake fēxo kāinimē? Afara chakafakatsaxakī ikaraka, apa feta āfa afara chakafamisfono ikaraka,” ixō Jesús yōkanifo. ³ “Afara chakafayamafikatsaxakī nāskarapa fēxo kāini. Apa feta āfari afara chakafamismano nā feronāfake fēxo kāini. Nāskarapa kāini. Akka Niospamāi afama mīshti fatirokē nāskax fēxo kāini ato ōimasharaxikī. ⁴ Niospa ea nīchini ē yonoxonō. Nā ē akaitīa ē yonoxotiro. Akka fakishikai nō yonoxotiroma. Nāskarifiakī mā nō naxō nō anā Nios yonoxotiroma. ⁵ Ē nono mai ano iyoax ē pena keskara. Ē ato ōimayoi afeskax isharakanimākai,” ixō Jesús yoini.

⁶ Nāskara yoita maiki kemo mechota a mai kemō mechanafaxō a feronāfake fēxo aō fetekere ani. ⁷ Askafata, “Īamā fechokometāfe,” fani. Nā Īamā āfe ane Siloé, āto mekapa anemisfo na Siloé āfe ane “Nīchia” famisfo.

Nāskata fēxo Īamā kaax fechokomeni. Fechokomexō ōiakefaini. Nāskax oni. ⁸ Nāskata nā chaima nikafāfe a ōimisfāferi yoinifo: “Nā fēxo tsaoax afara yōkakameaito nō ōimis. ¿Nāmē?” faifāfe ⁹ atirifāfe, “Nākīa,” fanifo. Atirifāfe yoinifo: “Akerokōi,” fanifo. Nāskafikaxō yoinifo: “Nā keskarakōi,”

faifāfe, ato yoini: “Ēkīa. Ēfi fēxo iyopaoniki. Nāskafixō iskaratīa mē ōisharai,” ato faito, ¹⁰ “¿Afeskaxō mī iskaratīa ōisharaimē?” faifāfe, ¹¹ “Nā feronāfake ‘Jesúsra’ faifāfēfi āfe kemō mai mechanafaxō ea fetekere axō: ‘Nā Siloé ĩamā fechokometāfe,’ ea faano, Siloé ĩamā fechokomexō ē ōishara,” ato fani. ¹² Ato askafaito nikakaxō, “¿Fanīmē a feronāfake Jesús?” faifāfe, “Ētsa ē tāpiama. Mā fakira kaa,” ato fani.

Nā fēxo kāinito ōisharaino fariseofāfe a yōkanifo.

¹³ Askaito yorafāfe nā feronāfake fēxo iyopaoni fariseofo ano iyonifo. ¹⁴ Jesús nā feronāfake pena tenetitīa sharafani. ¹⁵ Fariseofāfe nā feronāfake anā yōkanifo: “¿Afeskax mī fero sharamē?” faifāfe, “Ea Jesús sharafaa āfe kemō mai mechanafaxō ea aō fetekere akano. Ē ĩamā fechokomexō ē ōisharakōia,” ato fani.

¹⁶ Nikakakī fariseo fetsafāfe yoinifo: “Akai Nios fe rafeama. Moisés kirika kenexō noko yoini iskafakī: ‘Pena tenetitīa nō yonotiroma,’ ixō yoini. Nāskakē nō yora sharafatiroma pena tenetitīa,” faifono, fetsafāfe ato kemanifo: “Akka yora chakapa fēxo sharafatiroma. Yora chakapakai nāto akai keskara fatiroma,” ikanax fariseofo fochishpanā faatanānifo. Atirifāfe fariseofāfe yoinifo: “Jesúska sharama,” faifono, atirifāferi, “Jesús sharaki,” fanifo. ¹⁷ Nāskata afianā fariseofāfe a yora fēxo ipaoni yōkanifo: “Mī noko yoia, ‘Nāto ea fero sharafaxōa,’ fakī. ¿Akka afaa mī shināimē tsoamāki?” faifāfe, “Nā Nios ato yoixomisto ea sharafaa,” ato fani.

¹⁸ Ato askafaito nikakakī judeo fetsafāfe, “A chanīra,” fanifo. “Na fēxo ipaonima,” ixō. Nāskaxō fariseofāfe apa yafi afa kenaxō yōkanifo. ¹⁹ “¿Namē mī fake fēxo ipaoni? Akka, ¿afeskakī iskaratīa ōimē?” faifāfe, ²⁰ “Nākīa nōko fake, nā fēxo kāini. Mā nō tāpia nōko fake. ²¹ Tiiri afeskara axora mā ōi nōkai tāpiama. Akka fakefomaki, xiniki mato yoitiroki afeskax sharamāki. Yōkakāfe,” afa feta āpa ato fani. ²² Judeofoki mesekakī nānori yoinifo. Akka judeo xanifāfe yoiyoni iskafakī: “Tsōa yoitiroka: ‘Epa Niospa Jesús nīchini nōko Ifo Cristo inō,’ ixō yoitiroka. Akka askara yoixō anā nōko ichanāti pexe ano ikitiroma,” judeo xanifāfe anori ato yoiaino nā fēxo ipaonito āfe afa fe āfe apa mesenifo. ²³ Nāskaxō ato yoinifo: “Xiniki fakefomaki. Yōkakāfe,” ato fanifo.

²⁴ Nāskata fariseofāfe nā feronāfake fēxo ipaoni yōkanifo: “Noko yoikī iskafafe: ‘Niospa ea sharafaa,’ ife,” fanifo. “Jesúska sharama. ‘Niosfi sharaki,’ ife. ‘Jesús sharara,’ fayamafe. Nō tāpia Jesús chakaki,” fanifo.

²⁵ “Ētsa. Ē tāpiama chaka iyamai shara rakikīa. Ē tāpia ē fēxo iyopaoni ē iskaratīa ōisharai. Nā fisti ē tāpia,” ato faito, ²⁶ “¿Afeskafaxō mia sharafaamē?” ixō yōkaifāfe, ²⁷ “Ē mato yoiaito, ¿mā ea nikamamē? ¿Afeskakī mā afianā ea yōkaimē? ¿Māri aōxō tāpimis mā ipaimē?” ato faito, ²⁸ nikakakī ĩchaketsanifo. Nāskaxō yoinifo: “Mīfi a Ifofaikai. Akka nōfi Moisés meka nikamiski. ²⁹ Nō tāpia Moisés Nios fe mekapaoni. Nōkai na Jesús tāpiama. Fakira anoax oa afe keskarara a feronāfake nō tāpiama,” faifāfe anā ato kemani: ³⁰ “¿Mā tāpiamamē fakira anoax oxō ea sharafaa ē fēxokē? ³¹ Nō tāpia yōra chakafamisfokai Niospa ato nikapaitiroma. Fatorato Nios Ifofasharapai isharatiro. Nāskara Niospa nikapai. ³² Nā Niospa mai onifani chāikai nō afaa nikayomisma yora fēxo kāini tsōa sharafai. Akka iskaratīa mā ea Jesús sharafaa. ³³ Na feronāfake Niospa nīchiyamanokai afaa afeskafakeranama,” ato faito, ³⁴ nikakani akiki ōitifishkinifo. “Mīfi chakakōi kāini. ¿Afeskakī mī noko tāpimapaimē mī chakafixō? Anā nōko ichanāti pexe mēra mī ikitiroma. Nonoax kariskatāfe. Nōkai anā mia ōipaima. Anā nōko ichanāti pexe mēra ikiyamafe,” fanifo.

Fatorafāfe Jesús chanīmara fayamakanax nā yora fēxo keskarakōifo

³⁵ Nāskano nā fēxo imis āto ichanāti pexe mēraxō potaifāfe nikafaini Jesús kani. Nāskaxō fenakī a fēxo imis fichini. Fichixō yōkani: “¿Mī Niospa Fake chanīmara faimē?” ixō yōkaito, ³⁶ “¿Fatomē ē chanīmara fanō?” faito, ³⁷ “Nā mī ea ōi. Ēkīa,” Jesús fani. ³⁸ Askafaito ratokonō mai chachipakefofā yoini: “Ifo, ēfi mia chanīmara faikai. Mī fāsi sharakōi. Ē mia Ifofai. Mī Niospa Fakeki,” ixō yoini.

³⁹ Askata chipo afianā yorafo akiki feafāfe Jesús ato yoini iskafakī: “Ēfe Epa Nios ika anoax ē nono mai ano oni. Fato yorafomāki a ea nikayamaifo, fatoforimāki a ea nikaifo ē ato ōiyoi oni. Fatotora shināi iskaito: ‘Mē afara chakafamiski. Ea chaka soaxope,’ ixō anori shināito ē āfe chaka soaxotiro afianā afara chakafayamanō. Ē na fēxo fero sharafaxōa keskafakī ē yorafo āto chaka soaxotiro shara inōfo. Akka fetsafāfe shināi iskakani: ‘Ē afaa chakafamisma, ē yora sharakōi. Ē tāpikōia,’ ixō shinākani. Askarafofi yora fēxo keskarafokī, a ato sharafamis ano fopaikanima ato sharafapanā. Nāskarafāfekai yoipaikanima āto chaka soapaikanima. Nāskarafo fenopakenakafo,” ixō Jesús ato yoini. ⁴⁰ Fariseofāfe a Jesús yoiai nikakaxō yōkanifo: “Kee. ¿Mī noko yoimē nōmē fēxo?” faifāfe ⁴¹ Jesús anā ato yoini: “Mā ea yoikerana: ‘Nō fēxo keskarafō. Mā nō afara chakafamis,’ ixō mā ea yoiaito ē mato chaka soaxokerana. Akka mā kai ea askafamisma. Mā yoimis: ‘Nō ōisharatiro. Nō kai fenoama. Nō sharakī. Nō kai chakama,’ ixō anori mā yoimis. Akka māto chaka soaxma, mā fenokōiax Epa Nios ika ano mā nokopakenakama,” ixō Jesús ato yoini.

10

Oveja keneaki keparanākī Jesús ato yoini

¹ (Askata Jesús ato tāpimani nāatomāi āto kexekatsaxakī. Oveja kexemisto āfe ovejafo kexemis keskari fakī nāskarifiakī Jesús ato kexemis.) Nānori Jesús ato yoini iskafakī: “Chanīmakōi ē mato yoinō. Yōra ovejafo kenexotiro āfe kene mēra inōfo, faki fofāsanōma. Nāskata yora yometsopai ovejafo āfe kāiti ano ikitiroma, fomākīari ikitiro. ² Akka nā ovejafo kexemis nā oveja kāitinī ikikaitiro. ³ Kāiti ano nokoano feronāfake nā kāiti kexemisto fepoti fēpexonano oveja kexemis ikitiro. Nā oveja kexemis ikiano āfe ovejafāfe āfe oi tāpikatirofo. Nāskaxō āfe ovejafo āfe anē ato kenaito āfe ovejafāfe chīfafāitirofo. ⁴ Nā ovejafo kexemis rekē kaino āfe ovejafo āfe kene mēranoax kāiferatirofo. Māmāi āfe oi tāpikanax nāskaxō chīfafaitirofo. ⁵ Akka a kexeamatokai iyotiroma, āfe oi tāpikatiro, a ato kexemisto āfe oikairoko askarakē. Nāskakē a makinoax ichotirofo,” ixō Jesús ato yoini. ⁶ Jesús nā ovejafoki keparanākī ato yoini. Ato yoiaito tsōa tāpinifoma.

Jesús noko kexesharamis

⁷ Nāskano Jesús afianā ato yoini: “Ē chanīmakōi mato yoinō. Nā ovejafo kene mēra ikikani nā kini fisti mēra ikitirofo. Ēfi na oveja kini keskaraki. Nā Epa Nios ano ikipaikani eōnoax fisti ikitirofo. ⁸ Ē matoki nokoamano fetsafāferi mato yoikī iskafakani: ‘Ēfi Cristoki. Ē mato tāpimatiro afeskax mā Epa Nios ari nokotiomāki afe ipaxakī,’ ixō anori yoikani āa chanīmisfo. Yometso keskarakōifo. A Nios chanīmara faifo ato pārapaikani: ‘Noko fisti nikanōfora,’ ikaxō. Nāskakē Niospa fakefāfe ato nikakanima, ‘Noko fisti nikanōfora,’ ixō ato pārapaiyafono. ⁹ Akka ēfi na kini kāiti keskaraki. Nā ēfe Epa Nios ika ano ikipaikani eōnoax ikitirofo afe ipaxakakī. Nāskatari eōnoax isharatirofo anā fekaxtetirofoma. ¹⁰ Akka fetsafāfe efe yorafo ato pārapaikani: ‘Ea ifofakāfe.

Ĕ mato tāpimasharanō,' ixō ato yoifikakī anorima ato pārakani. Nāskakaxō emakinoa ato ifipaikani. Yometso keskarakōifo. A ea chanīmara faafo ato kexesharapaikanima. Ato chakafata ato retepaikani. Akka ě askarama. A ea Ifofamisfo ě ato kexesharai efe isharapakexanōfo, nono nāmānoaxri isharapakexanōfo. Nāskax ě nono nāmā oni ato kexesharaxikī.

11-13 “A ea chanīmara faifo ovejafo keskarrafo. Ĕfi nā oveja kexesharamis keskaraki. Nāskakē ě efe yorafo ě ato nāxoxii. Oveja ifāfe feronāfake fetsa kori inātiro āfe oveja kexexonō. Nāskaxō mā kori ināno nā feronāfāke oveja kexesharatamaroko, kori fisti shinātiro. Nāskakē poomā oaito fichiax ovejafo kexetama ichotiro. Nāskaxō shināi iskakī: ‘Na poomā mesekōi. Na ovejafo ěfenākōima, aa poomānā pinō ěfenākōimakī. Nāskakē ě ichoikai ea poomānā afeska fanōma,’ ixō shinātiro. Akka ovejafāfe ifokōi askarama. Āfe oveja kexesharai. Poomā oaito fichixō ato kexesharatiro, poomānā ato afeska fanōma. Nāskaxō shinātiro iskakī: ‘Ĕfe ovejafoōnoax ě natiro afokai afeskatiroma,’ ixō shinātiro.

14-15 “Ĕfi nā ovejafāfe ifo keskara sharakī. Ovejafo āfe ifāfe ato tāpia atomāi kexesharakatsaxakī. Ĕri nā ea chanīmara faafo ě ato kexesharamis. Ĕfe Epa Niospa ea tāpikōia. Ĕri ěfe Epa ě tāpia. Nāskarifiakī a ea chanīmara faafo ě ato tāpia. Afāferi ea tāpiafo. Nāskax ě atoōnoax naxii. 16 Yora fetsafāferi ea chanīmara faxikani. Afokai nono ikafoma. Mai fetsa ano ikafo. Nāfāfe ea nikasharaxikani. Nāfo ěfe Epa ika ano ě ato iyotiro. Akka nā yora fetsafāfe a nono ikafāferi ea chanīmara fakanax yora fisti keskara ixikani. Nāskax Epa Niospa yorakōifo ixikani. Eres fisti ě ato kexesharai. 17 Ĕ ato kexeax ě atoōnoax naxii. Nāskaito ěfe Epa Niospa ea noi. Naax ě anā otoxii. 18 A ea chanīmara faafoōnoax ěakōi ě nai, ea tsōa retekeraanama. Ĕfe Ĕpa ea yoini keskara ě atoōnoax naikai. Ĕfe Epa Niospa ea yoini keskara ě atoōnoax nafiax ě anā otoxii,” ixō Jesús ato yoini.

19 Nikakaxō judeofāfe chanīmara fanifo. Akka atirifāfe chanīmara fanifoma. 20 Atirifāfe yoini iskafakakī: “Nīafaka yōshi chaka a mēra nanea. Afaa tāpiama. Noko yoiai nō tāpitiroma. ¿Afeskakī na feronāfake nō nikatiromē?” ixō yoinifo. 21 Akka atirifāfe yoinifo: “Nīafakakai a mēra naneama. Nīafaka a mēra naneanokai iskara meka shara yoikeranama. Nīafakakai feronāfake fēxo ōimatiroma,” ixō yoinifo.

Judeofāfe āto xanīfofofāfe Jesús chanīmara fanifoma

22-23 Askafafono Jesús kani judeofāfe āto Nios kīfiti pexefā mēra Jerusalén ano mā mechakaino. Nāno tapas keskara ini pexe kachiori. Ano Jesús kani. Nā tapas āfe ane Salomón. Nāskatari judeofāfe āto fista anifo. Nā fistatīa shinānifo a Niospa pexe onifani.

24 Judeofāfe āto xanīfofo Jesúski fenifo yōkai fekani: “¿Mīmē Cristoki? Noko yoife. ¿Afeskakī mī noko yoisharaimamē? ¿Afetīakairoko mī noko xafakīa yoimē?” faifāfe, 25 “Ĕ mato yoifimiskē mā ea chanīmara faima. Ĕfe Epaōxō a yorafāfe atiroma keskara fakī mē mato ispa ěmāi Niospa Fakexō. 26 Akka mākai ea chanīmara faima mākairoko Ĕpa Niospa yorafoxō. 27 A ea chanīmara faifāfe ea nikasharatirofo. Mē ato tāpia a ea Ifofakōinafo. 28-30 A ea Ifofaafoma omiskōipakenakafo mēra fokani. Akka a ea Ifofamisfokai ari fokanima. Askatamaroko ě ato imasharapakenaka. Epa Niospa atoya ea rafemani. Epa Niospa keyokōi ato finōkōia. Ĕ ěfe Epa Nios fe nā yora fisti keskara. Nāskakē a ea Ifofamisfo emakinoa tsōa ato ifitiroma, ěfe Epa makinoari tsōa ato ifitiroma,” ixō Jesús ato yoini.

³¹ Nikakaxō judeofāfe āto xanīfofōfāfe anā tokiri fikaxō aō Jesús tsakapainifo retepaiyanā. ³² Nāskafaifāfe Jesús ato yoini: “Epa Niosxō afama mīshti ē mato ispa tsōa atiroma keskafakī. Akka, ¿afaōxokai mā ea tokirinī tsakaimē?” ato faito, ³³ “Akka na afama mīshti mī noko ispaōxokai nō mia tokirinī tsakaima. Akka nā mī meka chakaōxō nō mia tokirinī tsakapai, ē Nios keskarara mī ikaito. Anā ano Nios fetsama. Mīri noko keskara yora. Akka mī noko yoia: ‘Ēri Nios keskara,’ iki. Akka mī Nios chakafai. Nāskakē nō mia tokirinī tsakai,” faifāfe, ³⁴ Jesús ato kemani iskafakī: “Mā iskai: ‘Anā ano Nios fetsama,’ mā imis. Akka nā Niospa meka yoimisto kirika keneni iskafakī: ‘Ē mato yoi māfi Nios keskarakōifokī. Niospa mato nīchia,’ ixō kirika keneni, Niospa meka yoikī. Akka nā meka tsōa chanīra fatiroma. ³⁵⁻³⁶ Akka Niospa anorī yoifiano ¿afeskakī mā ea yoimē ē Nios chakafai? Akka Niospa ea nai mēraxō nāmā nīchini. Nāskakē ē mato yoitiro ēfi Niospa Fakeki. ³⁷⁻³⁸ Mākai ea nikapaima. Ēfe Epa Niospa aka keskara ē ayamakē, āa chanīra mā ea fakerana. Akka ēfe Epa akai keskara ēri akaito mā yoikerana: ‘Chanīma Epa Niospa atiro keskara Jesús aki,’ ixō mā yoikerana. Nāskakē a ē afama mīshti akaōxō ea chanīmara fakāfe. Ēfe Ēpa akai keskara ēri akaito mā ea tāpitiro ēfe Epa fe ika,” ixō Jesús ato yoini.

³⁹ Nikakaxō anā Jesús achipaifiaifono, ato makinoax kaitokai tsōa tāpinima. Nāskakē tsōa achinima.

⁴⁰ Ato makinoax kai, faka Jordán ari kani nā Juan yorafo maotisafapaoni ano. Nāno chaimashta Jesús nēteni faka kesemē. ⁴¹ Nāskakē yorafo akiki fēkaxō yoinifo iskafakakī: “Jesús Niosxō afama mīshti fakī noko ispa. Juankai askafapaonima. Askafixō Juan Jesúsnoa noko yoini chanīmakōi,” ikanax yoinānifo. ⁴² Nāskakaxō yora ichapato Jesús Niospa fakera fakaxō Jesús chanīmara fanifo.

11

Lázaro mā nani

(Mt. 12.46-50; Lc. 8.19-21)

¹ Askata feronāfakē Lázaro isinī ini. Nā Lázaro Betania ano ikax isinī ini. Poi rafe fe ikax María ikaino, Marta ikaino, nā rafe ato fe ikax. ² Nā María pirofomā sharakapa Jesús āfe tae pemākīa nachiyoni. Nāskaxō āfe fōo otekere ani.

³ María feta Marta iskafakī Jesús yoitanōfo ato nīchini: “Ifo, mī yamakōi Lázaro isinī iki kiki,” ikaxō yoitanōfo. ⁴ Kenamanaifāfe nikaxō Jesús aōxō tāpimisfo ato yoini iskafakakī: “Nā Lázaro isinī ikai naima. Akka yorafāfe ōikani ē afara afeskarafaito. Nāskakē ea tāpikani ēmāi Niospa Fakekē. Nāskaxō yorafāfe yoikani: ‘Epa Nios fāsi sharakōi,’ ikaxō yoinōfo,” ixō Jesús ato yoini.

⁵ Jesús poi rafeya Lázaro noikōini. ⁶ Lázaro isinī ikaito nikafi Jesús oxa rafeyoni. ⁷ Nāskata a aōxō tāpimisfo Jesús yoini: “Nō Judea mai ano nō anā kanō,” ixō Jesús ato yoini. ⁸ Ato askafaito kemanifo: “Maestro, nōko xanīfofāfe Judea anoxō mā mia retekeraifaito. ¿Afeskai mī afianā ari kapaimē?” ixō yoiaifono, ⁹ Jesús anā ato kemani: “Penata nō ōisharatiro. Xinī chaxaino nō ōisharatiro. Nāskax nō otisikax nō paketiro. Nāskarifiakī pena tii Niospa ea amapaiyai keskara ea tāpimani. Nāskaxō ea kexeano ē mesetiroma. ¹⁰ Akka fakishi yora kai xafasharayamano otisikax paketiro. Nāskarifiakī Nios fe rafeamato tāpisharatiroma afeskax isharatiromāki. Askax fenotiro,” ixō Jesús ato yoini.

¹¹ Nānori ato yoita anā Jesús ato yoini iskafakī: “Nofe yora Lázaro mā oxakē ē mōikai,” ato faito, ¹² a aōxō tāpimisfāfe nikakaxō yoinifo: “Ifo, akka

oxakōiax naima. Chipō sharatiro,” fanifo. ¹³ “Nofe yora Lázaro mā oxaki,” Jesús ato fani. Mā Lázaro nafiakē ato tāpimapainima. Nāskakē shinānifo: “Lázaro oxara,” ikaxō tsōakairoko tāpixō. ¹⁴⁻¹⁵ Nāskaxō Jesús ato xafakīa yoini mā Lázaro nakōinano: “Mā Lázaro naki. Nāskax ē inimaikai ē ano ikamano Lázaro naki. Akka mā ea chipō ōitiro ē afara afeskarafaito. Nāskaxō mā ea chanīmara fai. Nāskakē iskaratīa nō Lázaro ano kanō,” ixō Jesús ato yoini. ¹⁶ Ato askafaito nikakata Tomás nā Rafe Naneni nāato Jesúsxō tāpimis fetsafori ato yoini: “Nō kanō nōri afe naxikī,” ixō ato yoini.

Jesús fistichi naafo ato otofatiro

¹⁷ Askata Betania ano nokoxō Jesús nika: “Mā Lázaro naa,” nikani. Mā cuatro nia oxa nikani a maifaitafo mafa kini mēra, Betania ano. ¹⁸ Betania fe Jerusalén chaima ini. ¹⁹ judeofo ichapa María fe Marta ika ano fenifo ato ferarofai fekani, mā āto poi naano.

²⁰ Nāskata Marta Jesús oaito nikai akiki nokoikai kani María pexe mēra nīchifaini. ²¹ Marta Jesúski nokoxō yoini: “Ifo, mī nono ikanokai ēfe exto nakeraitama. ²² Ē tāpia mī iskaratīa afara fetsa mī Nios yōkaito mia axorisafatirokī,” faito, ²³ “Extofi anā otoi kiki,” faito, ²⁴ “Ē tāpia nā namisfo mā mai keyoaino afianā otoxikani. Ēfe extori otoxii,” ixō Marta yoiaino, ²⁵ Jesús kemani: “Eōnoax nā nafo tii otokani. Akka eōnoax niafori. Nā ea chanīmara faax nafiax anā otoxii kiki. ²⁶ Nāskakē ea chanīmara faax anā nanakama. ¿Nāskakē mī ea chanīmara faimē?” faito, ²⁷ “Ēje, Ifo, ē mia chanīmara fai mīmāi Cristokē, Niospa fake. Nō mia manamis. Akka nōko xinifāferi Cristo manapaonifo. ‘¿Afetīa na mai ano Cristo oimē?’ ikaxō nōko xinifāfe mia manapaonifo,” Marta fani.

Lázaro mafa kini mēra maia ōi Jesús oiani

²⁸ Nāskata mā yoikī xateta, Marta āfe chiko María yoikai kani. Kaxō ōia a María fe rafeafo oiyakani inifo. Nāskata Marta āfe chiko María one mēshanāxō yoini: “Mā nōko Ifo oaki. Mia kenamana, ōikofe,” fani. ²⁹ María nikata fininākfāta kani Jesúski nokoikai. ³⁰ Jesúska pexe rasi ano nokoama ini. Nā Marta akiki nokoano Jesús nēteni. ³¹ Mā María ato fe oiafai kaino a afe oiafaiyāifāfe ōinifo. “María poi maia mǎnāonoax oiai kai kiki,” ikaxō chīfafainifo.

³² María Jesúski nokota ratokonō mai chachipakefofā yoini: “Ifo, mī nono ikanokai ēfe exto nakeraitama,” María fani. ³³ María oiaito Jesús ōini. Judeofo a María fe feafori oiaifāfe Jesús ato ōini. Nāskaxō ato shinākōini. ³⁴ Nāskaxō ato yōkani: “¿Fanī mā maifaitamē?” ato faino, yoinifo: “Ifo, ono nō akitakīa ōiyopo,” fanifo. ³⁵ Askafaifono Jesús oiani. ³⁶ Oiaito ōikakī judeofāfe: “Ōikapo. Lázaro manoi oiai,” fanifo. ³⁷ Nāskaxō fetsafāfe yoinifo: “Nā fēxo sharafaita keskafaxō, ¿afeskafakī nonoxō Lázaro sharafaitamamē?” fanifo.

Jesús Lázaro otofani

³⁸ Nāskata Jesús anā shināmitsani Lázaro maia ano nokoax. Nā Lázaro maia ano nā kini tokiri efapato fepofo ini. ³⁹ Nāno nokoxō Jesús ato yoini: “Na tokiri aō fepoa fepekāfe,” ato faito, nikakī Marta yoini: “Iskaratīa mā pisiaki,” faito, ⁴⁰ nikakī anā Jesús yoini: “¿Ē mia yoiaito mī ea nikaimamē? Ea mīa nikaino Niospa afara shara faito mī ōitiro,” fani. ⁴¹ Askafaito nikakakī fēpexonifo. Fēpexonaifono nai foisnīfōfāta Apa yoini: “Epa, ē mia kīfaiato mī ea nikai. Ē mia aicho fai. ⁴² Ē tāpiaki ea mīa nikafafāimiskī. Nāskakī ē mia kīfi na yorafāfe mia chanīmara fanōfo. Nāskakaxō ea tāpinōfo ea mīa nīchiniki.”

⁴³ Apa kīfikī askafata fāsikōi Lázaro kenani: “Lázaro, kini mēranoax kākerafe,” faino, ⁴⁴ Lázaro kākeraani nā aō rakoitafoya. Nāskaxō ato yoini: “Na mā aō rakoita pekakāfe kākisharanō,” ato fani.

“¿Afeskaxō nō Jesús retetiromē?” ixō shinānifo

(Mt. 26.1-5; Mr. 14.1-2; Lc. 22.1-2)

⁴⁵ Nāskata judeofo a María fe feafāfe Jesús Lázaro otofaito ōikakī Jesús chanīmara fanifo. ⁴⁶ Nāskafaito ōikani atiri fariseofoki chanifokani fonifo. ⁴⁷ Ato yoiaifāfe nikakanax fariseofo fe a Nios ato kīfixomisfāfe āto xanīfofo ichanānifo. Ichanākanax yoinānifo: “¿Nō Jesús afeska faimē? Tsōa atiroma keskara fai kiki. ⁴⁸ Nō afeskafayamaino keyokōichi chanīmara fakani kiki. Romano xanīfokōifo fēkaxō noko yoitirofo iskafakakī: ‘Mākai anā xanīfoma,’ noko fatirofo. Nāskaxō nōko kīfiti pexefā noko pōtatirofo,” ikanax yoinānifo. ⁴⁹ Nāskaifāfe Nios ato yoixomis xanīfokōichi Caifás ato yoini: “Māfi tati-makōikī,” ato fani. ⁵⁰ “¿Mā tāpiamamē? na feronāfake fisti a yorafoōnoax naxiai. Nāfi sharaki. Ares fisti natiro nō nanōma, nōko kaifo fetsafori nanōfoma,” ixō ato yoini. Chanīmakōi Caifás yoini a ixiai keskara yoikī.

⁵¹ A Caifás yoiai āa shinākī yoinima. Niospa āfe shināmā shināmanaino yoini. Nios kīfixomisfāfe āto xanīfokē Niospa āfe shināmā shināmanaino, “Jesús judeofonoax naxira,” ixō yoini. ⁵² Jesús kai judeofo fistiōnoax naima. Mai fetsa ano ikafāferi chanīmara faafono ato nāxoxii. Nāskata Niospa fake ixikakī noinānkōikanax, nā yora fisti keskara ixikaki.

⁵³ Nāskata nā penata judeo xanīfofofāfe shinānifo: “¿Afeskaxō nō Jesús rete-tiromē?” ikaxō pena tii shināpaonifo. ⁵⁴ Mā retepaiyaifono tāpiax judeofo ano anā Jesús kanima. Yorafā rasi ano katamaroko pexe fisti rasi ano kani, nā pexe āfe ane Efraín ano, tsōa istoma ano. Nā aōxō tāpimisfo fe nāno iyoni.

⁵⁵ Judeofāfe āto fista Pascua mā chaima ikaino, yora rasi Jerusalén ano fonifo, Pascua fista akifokani. Moisés āto xinifo yoīpaoni keskai akairi āto chaka soapaikani Nios kīfiti pexefā mēra ikifokani, fista ikamano fonifo. ⁵⁶ Nāskaifono judeofāfe Jesús fenanifo. Nāskakanax Nios kīfiti pexefā mēra ikinifo. Nānoax yoinānifo: “¿Faniēmē Jesús?” ikanax yoinānifo. “ ‘Nonoxō Jerusalén anoxō Jesús fista akiyoirā,’ ¿mā ikimē?” ikanax aa ranā yoinānifo. ⁵⁷ Askakaxō judeofo āto xanīfofo feta fariseofāfe ato yoinifo iskafakakī: “Jesús fichixō noko tāpimakāfe nō achinō,” ato fanifo.

12

Kēromā Jesús shinākī pirofomā āfe tae pemākīa nachini

(Mt. 26.6-13; Mr. 14.3-9)

¹ Nāskano seis nia Pascua fista mā chaima ikaino Jesús aōxō tāpimisfo fe Betania ano kayoni. Nāno Lázaro ika ini. Nā Lázaro nakē Jesús otofani. ² Nānoxō Jesús pimaxikakī pīchanifo, a Jesús fe foafāferi pinifo. Lázarori ato feta pini. Nā Marta ato pimani. ³ Mā piafono María Jesúski oni āfe pirofomā sharaya. Oxō nā pirofomā āfe tae pemākīa nachini. Nāskaxō āfe fōo otekere ani. Nāskafaano yorafāfe nā pexe mēra ikafāfe nā pirofomā sharakōi xetenifo. ⁴ Nā Jesúsxō tāpimis fētsa nā Judas Iscariote, Simón fake, nā ato achimaxiaito yoini, ⁵ “Kee. ¿Afeskakī na kēromā pirofomā shara potaimē? Ato minixō kori ichapa fixō noko inākerana a afaamaisfo nō ato ināpanā. Nāskax shara ikerana,” Judaspa fani. ⁶ Anori Judaspa yoifkī ato kori inākeranama. Nā Judasfi yometsokōi iniki. Nā Judaspa āto kori kexexopaoni. Yometsofixō nāskakē tsōa tāpipaonima. Nā kori fixō a afaamaisfo ato inākeranama, nā a kori onekerana. ⁷ Nāskafaito nikakī Jesús Judas yoini: “María fekaxtefayamafe. Ē samamashta naito mā tāpixō ekeki pirofomā nachia,” fani. ⁸ “Nā yora

afaamaisfo mato fe ipanakafo. Nāskakē mā ato mēxotaima afarafo inātiro. Akka ěkai mato fe nono mai ano ipanakama, ě mato yoi. Akka na María iskaratīa ea shara faa,” ato Jesús fani.

Judeofāfe āto xanīfofofāfe Lázaro retepainifo

⁹ Nāskata judeofo ichapa rasi Jesúski fenifo, Betania ano ikano mā tāpikanax Jesús fistikai ōifekani fenifoma. Lázarori ōifekani fenifo. Nā Lázaro Jesús otofaita nikakaxō ōipainifo. ¹⁰⁻¹¹ Nā Lázaro Jesús otofaita nikakaxō judeofāfe ranārīto anā āto xanīfofo tananifoma Jesús fisti chanīmara fakakī. Nāskaifono nā xanīfofo ōitifishkikanax yoinānifo: “Jesús yafi Lázaro nō retenō. Jesús fistima. Lázarori nō retenō,” ikanax yoinānifo.

Jesús nokoni Jerusalén ano

(Mt. 21.1-11; Mr. 11.1-11; Lc. 19.28-40)

¹² Nāskano pena fetsa judeofāfe āto fistatīa yorafā rasi Jerusalén ano fenifo. Jesús nokoaito nikakani nāskax akiki fenifo. ¹³ Epe pei tsoamakanax akiki fekani. Nāskakanax fāsikōi tai tai ifenifo iskakani: “¡Sharafinakōi nokoki oi kiki Niospa nīchiano! Israelifo mī nōko xanīfo oi nokoki. ¡Sharafinakōia!” ikaxō fāsikōi yoinifo. ¹⁴⁻¹⁵ Askafaifono Jesús burro fakeshta kamaki tsoax oni. Niospa meka fētsa kenei iskakakī Niospa shināmanaino:

Jerusalén ikafāfe, rateyamakāfe. Māto xanīfo matoki oxii burro fakeshta kamaki tsoax, ikaxō kirika kenei. ¹⁶ Nāskafikē Jesúsnoa yoikī kirika kenei keskara aōxō tāpimisfāfe tāpiyonifoma. Akka mā reteafono otoax Apa ari kaano nāskakē aōnoa tāpinifo. Iskakakī shinānifo: “Nā Jesús nono mai anoxō a afama mīshti axiai aōnoa yoikakī kirika kenei. Nōko xinifāfe Jesús fakeyoamano a inōpokoai aōnoa yoikakī kirika kenei,” ikaxō Jesúsxō tāpimisfāfe āto ōiti mēraxō shinānifo.

¹⁷ Jesús Jerusalén ano nokoaino nikakakī yorafā rasichi a mananifo ōipakakī. Atirifāfe mā Lázaro nakē Jesús otofaitano ōinifo. Nāskakē mā Lázaro Jesús otofaita ōikanax fetsafoki chaninifo akairi tāpinōfo. ¹⁸ Jesús Lázaro mā nakē otofaita nikakaxō nāfāferi ōipainifo. Nāskaxō fai nēxpakīaxō mananifo. ¹⁹ Nāskakē fariseofo yoinānifo: “Kee. Shinākapo. Nōkai na yorafo afeska fatiroma anā Jesús tanayamanōfo. Tsōakai noko anā tanapaima keyokōichi yorafāfe Jesús nikakōipaikani,” ikanax yoinānifo.

Griegofāfe Jesús fenanifo

²⁰ Nāskata Jerusalén ano nā yorafā rasi mēra griegofori ato fe inifo judeofāfe āto fista akaifono. ²¹ Nānoax Felipe ano fonifo, Felipe yōkai fokani. Nā Felipe Galilea mai anoax fakeni, nā pexe rasi āfe ane Betsaida anoax. Felipe ano fokaxō griegofāfe Felipe yōkanifo: “Nō Jesús ōipai noko efexōfe nō afe yoinānō,” Felipe fanifo.

²² Askafaifāfe nikaxō Felipe Andrés yoini: “Na griegofo Jesús fe meka-paikanikiki. Nō Jesús ato yoixonō,” fani. ²³ Yoiaifāfe nikakī Jesús ato kemani: “Ēfi samamashta ěfe Epa ari ě kaikai afe xanīfo ikikai. Akka ěfe Epa ari kayotama ě yorafonoax nayoxii. ²⁴ Akka ě mato tāpimani mā tāpinō. Xiki fero fisti nō fanayamano kāitiroma. Akka nō fanasharano foaikax āfe fimi ichapa itiro. Nā nō fana āfe exe fisti payokometiro, akka āfe kaya yositiro. Nāskarifiāi ě matoōnoax nayamakē mā efe ipaxatiroma. Eres fisti ě ipaxatiro. ²⁵ Akka āa fētsa shināi iskai: ‘Niospa ea amapaiyai keskara ě shināima, ěa ě apaiyai keskara ě shināi,’ ixō anori shināi fenotiro. Akka nā iskakī shināi: ‘Ē nono mai ano niyoxō ě apaiyai keskara ě shināpaima, Niospa ea amapaiyai keskara fisti ě shināpai,’ ixō shināi afi Epa Nios fe nipanakaki. ²⁶ Akka a ea

yonoxopaikī ēfe meka nikakōixō a ē yoiai keskara atiro. Ea Ifofax a ē ika ano nāri efe ipaxatiroki. Ea yonoxomis a ē yoiai keskara ea axōaito ēfe Epa Niospa yoixii iskafakī: ‘Aicho. Mī ēfe Fake Jesús nikasharamiski. Mī fāsi sharakōiki,’ Epa Niospa yoikī iskafaxii a ea Ifofamis.

²⁷ “Iskaratīa ēfe ōiti mēra ē shināmitsai. ¿Ē afeskaimē? Akka, ‘Epa, ea ifife ea omiskōimayamanōfo,’ ē faima. Akka ēfe Ēpa ea nīchini ē ato omiskōixonō,” ato Jesús fani. ²⁸ Nāskaxō Jesús Apa yoini: “Epa, eōxō ato ispafe mī fāsi sharaki,” ixō Jesús Apa yoini. Askafaito nikakī nai mēraxō fāsikōi Niospa kemani: “Ē mīōxō mē ato ispa ēmāi afama mīshti shara fakī afianā afama mīshti ē ato ispai,” ixō yoini.

²⁹ Nā yorafā rasichi anoxō nikakani yoinānifo. Atirifāfe yoinifo: “Mā nai tiri ika,” fanifo. Atirifāfe yoinifo: “Epa Niospa ājirinī Jesús yoia,” ikanax yoinānifo. ³⁰ Nāskaifono Jesús ato yoini: “Na meka nai mēranoa mā nikai ea tāpimatama, mato tāpimaxikī yoia,” ato fani. ³¹ “Iskaratīa nā ea Ifofaifoma Niospa ato omiskōimani. Āto ifori nā yōshi chaka Satanás nāri ēfe Epa Niospa potaxii anā xanīfo inōma. ³² Akka ēfi yōra fakekōi. Ea retekaxō ifi cruz ikakī ea mastakaxō ea fininīfofāxikani. Ea askafaifono ē yorafo ē ato ifi efe rafenōfo,” ixō Jesús ato yoini. ³³ Nānori ato yoini nā ifi cruz ikakī mā mastaxiaifono ato tāpimani.

³⁴ Nikakaxō yorafāfe nāno nixō yoinifo iskafakakī: “Niospa meka sharaōnoa kirikaki kenekī yoikī iskafanifo: ‘Cristo, nā Niospa nīchia nīpanaka nanakama,’ fanifo. Akka, ¿afeskakī mī noko yoimē iskafakī?: ‘Na yōra fakekōi retekaxō ifi cruz ikakī mastakaxō fininīfofāxikani,’ mī noko fai. ¿Akka tsoaōnoa mī noko yoimē?” fanifo. ³⁵ Askafaifono Jesús ato yoini: “Ē nono ika pena keskara shara. Nāskakē ē anā mato fe nono ifāinakama. Ē mato yoiaito nikasharakāfe fenoxikakima. Pena yamaino fakish itiro. Nāskakē yora fenotiro. Tsōa fakish mēra ōitiro, fāi kai fenotiro. Nāskarīfai a chaka shināmis fenotiro. Fenokī tāpitiroma afeskax Nios fe rafetiromāki. ³⁶ Ē mato fe iyoano ea Ifo shara fakāfe fenoxikakima. Mā ea nikasharaino ē mato pena keskara shara fatiro, xafakīa mā inō. Ēfi pena keskarakī. Ea Ifo shara fakaxō māri fetsafo pena keskara shara fatiro mātōxō eari Ifo sharafanōfo,” ato Jesús fani. Mā ato yoikī senēfax, nāskax ato makinoax kaitokai anā tsōa ōinima.

Judeofāfe Jesús nikanifoma

³⁷ Yorafāfe ferotaifi tsōa atiroma keskara Jesús fafiaino tsōa chanīmara fanima nā Niospa Fakekōi fiano. ³⁸ Nā Isaías Niospa meka ato yoipaoni. Nāato kirika keneyoni a inōpokoai yoikī. Iskafakī yoini:

Ifo, nō mī meka nō ato yoifiainokai tsōa noko chanīmara faima. Yōra atiroma keskafakī mī ato ispafiaino tsōa tāpiama, ixō Isaías a inōpokoai yoikī kirika keneyoni.

³⁹ Nāskakē tsōa Jesús nikanima. Askatari afianā Isaías kirika kenenī a inōpokoai yoikī iskafakī:

⁴⁰ A nikaiyamaifo Epa Niospa fēxo keskara ato imapakenaka Niospa meka chanīmakōi mā tāpifikaxō tsōa nikayamaito. Niospa ato shinātimafai anā shināsharanōfoma. Nāskakē Niospa meka ōifikakī tsōa shināima āto ōiti kerekōi fakani mā nikafikaxō. Āto chaka xateaxma ekeki fekanima ē ato fetsa keskara shara fapanā, ixō Niospa ato yoini. Nānori a Jesús inōpokoai yoikī Isaías kirika keneyoni.

⁴¹ Isaías Niospa shināmanaino Jesús tāpini xanīfo sharakōi ikiyoai. Nāskaxō Isaías Jesúsnoa yoini.

⁴² Judeofāfe xanīfofo atirifāfe Jesús chanīmara fanifoma. Akka atirifāfe chanīmara fanifo. Akka afaa tsōa yoinifoma fariseofoki mesekakī noko

potayamanōra ikanax āto ichanāti pexe mēraxō. ⁴³ Yora fetsafāfe ato yoiaito nafo sharakōifora nā yorafāfe atoōnoa meka shara yoiaifono nikapaimisfo. Akka Niospa atoōnoa nafo sharakōira ixō yoiaino fichisharapainifoma.

Jesús mekaōxō nō tāpia nō chakakōifo

⁴⁴ Nāskata Jesús fāsikōi mekainīkafā ato yoini iskafakī: “Nā ea chanīmara faito ea fisti chanīmara fatama nā ea nīchiniri chanīmara fai. ⁴⁵ Nāskafakīri mā mā ea ōia nā ea nīchiniri mā mā ōia. ⁴⁶ Nono mai ano fakish keskara. Nāskakē ēfe Epa Nios ariax ē nono mai ano ē oni pena keskara ikiyoi. Fakishi tsōa ōitiroma. Akka nā ea chanīmara faito Epa Nios Ifo sharakōifatiro pena keskara shara ixiki.

⁴⁷ “Mā ēfe meka nikafikaxō ea nikayamaifono ēkai ato omiskōimانيا. Akka ē mai ano oni yorafo omiskōimatama ato ifiyoi ē oni efe ipaxanōfo. ⁴⁸ Akka nā iskakī shināi: ‘Ēkai Jesús Ifofapaima, askatari āfe mekari ē nikapaima,’ ixō shināi nā ē mato yoimis keskara nikayamax Nios ari katama omiskōipakenakafo mēra kaxii. Nāskakē ē mato yoiaito mā ea nikayamax mā mai keyoaino mā omiskōipakenaka. ⁴⁹ Ēfe Epa Niospa ea yoia keskara nānorikōi ē mato yoimis. Ēa ē mato yoima. Ēfe Epa Nios nā ea nīchinioxō ē mato yoimis. ⁵⁰ Mē tāpia Epa Niospa yoia keskara chanīmara faax mā nīpaxatiro. Nāskakē, ‘A ē ato yoimis keskara nānori ato yoife,’ Ēfe Epa Niospa ea famis,” ixō Jesús ato yoini.

13

Jesús aōxō tāpimisfo āto tae chokapakeni

¹ Mā judeofāfe āto Pascua fista chaima ikaino Jesús tāpini a mai anoax Apa ari kaxiai. A Ifofaafō nā nono mai anoafō ato noini. Mā atoōnoax nakī ato noikōini.

² Jesús aōxō tāpimisfo feta mā xini kaino ato feta pipaini. Nāskaino nā Judas Iscariote mēra Satanás yōshi chaka nanetani. Nā Simón fetsa āfe fake Judas Iscariote. Nā Judas mēra niafaka nanexō shināmani iskafakī: “Ato tāpimafe afeskaxō na Jesús achitirofomāki,” ixō Satanás shināmani.

³ Akka Epa Niospa āfe Fake yoini: “Nā nai mēranoafōya nā mai anoafori mī ato yonomatiro. Mī āto xanīfo,” ixō Epa Niospa anori yoiaito Jesús tāpini. Epa Nios ariax onixakī mā anā akiki kakī Jesús tāpini. ⁴ Nāskata pikī keyotama Jesús fininākafā āfe rapati pekata āfe rakotinī pinixemeni. ⁵ Nāskata faka tasoki manexō a aōxō tāpimisfo ato fāka ochopakeni. Mā ato ochopakexō ato otekere apani āfe rakotinī.

⁶ Ato askafapakī Pedrori āfe tae chokapaiyaito yoini: “Ifo, ¿afeskakī mī ēfe Ifo fixō mī ea fāka ochopaimē?” faito, ⁷ Jesús kemani: “Na ē mato fāka ochofai mī tāpiama. Akka mī chīpo tāpixii,” faito, ⁸ anā Pedro kemani: “Maa, Ifo, mīakai ea fāka ōchopakēnakama,” Pedro faito, anā Jesús kemani: “Ē mia ōchoyamainokai mī efe rafetiroma,” fani. ⁹ Askafaito nikakī Pedro yoini: “Ifo, taekis ea chokakima ēfe mifikiri ea afe, ēfe mapokiri ea māchofe,” faito, ¹⁰ “Nā rama yora nashiax āfe yora choshtanatiroma, āfe tae fisti choshtanatiro. Nāskakē nō tae fistiki nō chokatiro. Akka keyokōi mā choshtama, ranāri mā shara,” ato Jesús fani. ¹¹ Nānori ato yoini māmāi tāpixō fatoto ato achimaximākai.

¹² Mā ato ōchopaketa āfe rapati safeni. Mā āfe rapati safeta afianā tsaopakekafāni. Nāskaxō ato yoini: “¿Mā mā tāpiamē na ē mato fāka ōchofaito?” ato fani. ¹³ Nāskaxō anā ato yoini: “Māfi, ‘Maestro,’ mā ea fayana, ‘Ifo,’ mā ea famiš. Chanīmakōi ēmāi mātō Ifo ita ē mātō maestrori.” ¹⁴ Askata anā ato yoini: “Ē mātō Ifokī, askatari ē mātō maestrokī ē mato fāka ōchopakea oa mātō ina keskarakōixō. Akka nā ē mato fāka ochopakea keskariai mā ranā fāka

ōchokome faatanākāfe oa mātō inafō keskarax. ¹⁵ Ē mato ōimana keskariai māri askakāfe,” ato fani. ¹⁶ “Ē mato chanīma yoi. A yonoxomistokai āfe xanīfo finōtiroma. Akka ě mato nīchia mā fetsafo ěfe meka yoinō. Nāskafixokai fetsafo ěfe meka ato yoifikīkai mā ea finōama. Ē mato fāka ōchomis oa ě mato yonoxomis keskaraxō. Nāskaxō, ‘Nō fetsafo finōa, nō āto inama,’ iyamakāfe,” ato Jesús fani. ¹⁷ “Na ě mato yoiāito mā nikakōiax, nāskax mā fāsi inimakōitiro.

¹⁸ “Nāskakē ě mato yoi, akka keyokōiōnoa ě mato yoima. Ē tāpia fatomākī ě katoa a nofe kai, askatari a nofe kaima. Nāskakē ě mato yoi, eōnoa Niospa meka yoikī kirika keneyonifo nō nikakī nō chanīmara fatiro. Iskafakī kirika keneyonifo, Niospa meka: ‘A feta piāi fētsa ea ōikaspakī ea chakafaxii,’ ixō kirika keneyonifo. Chanīmakōi mā ōifainaka,” ato Jesús fani. ¹⁹ “Ea askafayoa-mano ě mato yoiyomis. Akka nā ě mato yoiāi keskara ea askafafono mā ea ōikī, nāskakē mā ea chanīmara fatiro. ²⁰ Ē chanīkima mato yoi ě mato nīchi mā ěfe meka ato yoitanō. Mā ato yoiāito nikakaxō eari nikakani. Nāskatari ea chanīmara fakaxō nā ea nīchiari chanīmara fakani,” ixō Jesús ato yoini.

*“Mā fētsa ea ato achimaxii,” ixō Jesús ato yoini
(Mt. 26.20-25; Mr. 14.17-21; Lc. 22.21-23)*

²¹ Mā yoikī keyota Jesús fāsi shināmitsakōini. Nāskaxō xafakīakōi ato yoini: “Ē chanīma mato yoi. Fatora mā fētsa ea mā ato achimaxii,” ato faito, ²² nikakani fesenākefainifo tāpikanaxma. ²³ Afe ketaxamei tsoa Jesús fichisharapaikōini. ²⁴ “Fatora mā fētsa ea mā ato achimaxii,” ato faito nikakī a Jesús fe ketaxamei tsoa Pedro fenāmāshta yōkani: “Tsoaōnoa yoimākai, yōkafe,” fani. ²⁵ Nāskafaito nikakī a Jesús fe ketaxamei tsoato chaimashta fani yōkaxikī: “Ifo, ¿tsoaōnoa mī yoimē?” faito, ²⁶ Jesús kemani: “Na pāa tore pishta nami ene mēra mechanafaxō ě ināito nāatofi ea ato achimaxii kiki,” Jesús fani. Nāskafaxō nami ene mēra pāa mechanafaxō Judas Iscariote Jesús ināni, Simón fetsa āfe fake. ²⁷ Jesús pāa mechanafaxō Judas ināino Judas mēra Satanás chaka nanerisatani. Nāskaxō Jesús Judas yoini: “Nā mī apaiyai keskara farisafafe,” fani.

²⁸ Nā tsoakaxō piāifāfekai tāpinifoma afeska fakī askafaimākai. ²⁹ Atirifāfe shinānifo: “Jesús Judas nīchiaito Judaspa afara fitanō Jesús nīchi fista ayanā pixikī,” ixō shinānifo. Akka atirifāferi shinānifo iskafakī: “Jesús Judas nīchia a afaamaisfo kori inātanō,” ixō shinānifo. Nā Judaspa āto kori kexexomis ini. ³⁰ Nāskax Judas koshi kani mā fakishaino.

Jesús Ifofamisfo noinā faatanātirofo

³¹⁻³² Nāskata mā Judas ato makinoax kaano Jesús ato yoini: “Iskaratīa ě naino Epa Niospa mato ōimani ěmāi āfe Fake sharakōikē. Nāskafiax ěfi yōra fakekōi. Ē afama mīshti akaito ōikaxō, ‘Epa Nios fāsi sharara,’ faxikani. Nāskakē mā tāpitiro ěmāi Niospa Fakekōikē a keskara sharakōi.

³³ “Ēfe fakefāfe, ěkai anā nono mato fe ifīinakama. Mā ea fenaxii. Ē judeofo yoita keskafakīri ě matori yoi. Ē kai arikai mā katiroma. ³⁴ Ēfe meka fenashara ě mato yoikai, noināi finakāfe. Nā ě mato noiai keskariai māri noinā faatanāsharakāfe. ³⁵ Mā noināiyaito yorafāfe ōinōfo mā eōxō tāpimiski,” Jesús ato fani.

*“Ē Jesús ōimisma, Pedro ixiaino,” Jesús ato yoini
(Mt. 26.31-35; Mr. 14.27-31; Lc. 22.31-34)*

³⁶ Nāskata Pedro Jesús yōkani: “Ifo, ¿faki mī kaimē?” faito, nikakī Jesús kemani: “Ē kai arikai iskaratīa mī efe kayotiro. Chipō mī kaxii,” faito, ³⁷ anā Pedro kemani: “¿Afeskai iskaratīa ě mefe katiromamē? Mē iskaratīa

itipinĩshara mĩõnoax naxikĩ,” faito, ³⁸ anã Jesús kemani: “¿Mĩ chanĩmamẽ? ¿Mã mĩ itipinĩsharamẽ naxikĩ?” Jesús fani. Nãskaxõ anã yoini: “Na fakishi takara keoyoamano mĩ ea iskafai: ‘Èkai Jesús õimisma,’ ixõ mĩ ato yoi tres fakĩ,” Jesús fani.

14

Jesús fai keskara. Aõnoax nõ Nioski nokotiro

¹ Anã Jesús ato yoini: “Èfe fakefãfe, mãto õiti fekaxtefayamakãfe. Nios chanĩmara fata, eari chanĩmara fakãfe. ² Èfe Epa ika ano pexe ichapa sharakõifo. È mato itipinĩsharafaxõi kaikai. Askarayamakẽ è mato yoikerana. ³ È kaxõ è mato itipinĩshara faxõikai. Afianã oxõ è mato ifiyoxii, a è ika ari mato iyoxiki ari mã efe ìpaxanõ. ⁴ Mã mã fai tãpiaki a è kai ari,” ato faito, ⁵ Tomás kemani: “Ifo, nõkai a mĩ kai ari tãpiama, afeskaxõ nõ fai tãpitiro,” faito, ⁶ Jesús kemani: “Èfi nã fai keskarakai. Èfi chanĩmismaki. Eõnoax yorafo nĩpaxatirofoki. Tsoakai èfe Epa ika ano nokotiro. Eõnoax fisti èfe Epa ari nokotirofo.

⁷ “Ea tãpikõixõ èfe Epari mã tãpikõitiro. Akka iskaratĩa mã èfe Epa tãpikõikai. Nã mã ea õiai keskarakai mã èfe Epa mã õi,” ato Jesús faito, ⁸ Felipe kemani: “Ifo, noko Epa Nios õimafe. Mĩ noko Epa Nios õimanaino nõ inĩmakõitiro,” faito, ⁹ Jesús kemani: “Felipe, afetiakai è mato fe imisma. ¿Afeskakĩ mã ea tãpiyomismamẽ? Ea õikĩ èfe Epari mã mĩ õi. ¿Afeskakĩ: ‘Ea Epa õimafe,’ mĩ ea faimẽ? ¹⁰ Èfi èfe Epa fe fisti keskarakõiki. ¿Nã mĩ chanĩmara faimamẽ? A è mato yoiai èa è mato yoima èfe Epaõnoa è mato yoi. Epa Niospa nã apaiyai keskara ea famai efe imis. ¹¹ È mato yoi èfe Epa efe rafea èri èfe Epa fe rafemiski. Nãskakẽ ea chanĩmara fakãfe. Nã tsõa atiroma keskarafori è famis nã õixõ ea chanĩmara fakãfe.

¹² “Chanĩmakõi è mato yoi. Nã ea chanĩmara faxõ nã è akai keskarakai faxii. Èfe Epa ari kaxõ a è aka keskaramaroko finõmainĩfofã axikani. ¹³ Afara èfe aneõxõ èfe Epa mã yõkaito è mato axoxii, eõxõ Epa Nios sharara fanõfo. ¹⁴ Afara fetsa èfe aneõxõ mã Epa Nios yõkaito è mato axotiro,” ixõ Jesús ato yoini.

“Epa Nios ãfe Yõshi Shara è matoki nĩchixii,” Jesús ato fani.

¹⁵ Anã Jesús ato yoini iskafakĩ: “Ea noikõikĩ nã è mato yoiai keskai ikãfe. ¹⁶ È Epa Nios mato kifixonii mato fetsa nĩchixonõ, nãato mãto õiti fepeaxoyonõ. Nã Niospa Yõshi Shara, nãfi chanĩmismaki. Mato fe ipanaka. ¹⁷ A nikayamaifãfe õitirofoma. Askatari tãpitirofoma. Akka mãfi mã mã tãpimiski mato femãi ikẽ. Nãskatari mãto shinã mẽra mato fe ika.

¹⁸ “Akka èkai mato fe ikima. Askafixõ è mato potaima. È matoki anã oxii. ¹⁹ È anã nono ikima. A ea Ifofaifãfema anã ea õikanima. Akka mã ea õixii, è niano. Nãskakẽ mãri efe nĩpanaka. ²⁰ Naax è otoaito mã ea tãpitiro emãi Epa Nios fe nĩpanakakẽ. Nãskarifiã mã efe ixii. Èri è mato fe ixii. ²¹ Nãskakẽ è mato yoiaito mã ea nikakõixõ mã ea fãsi noi. Ea noixori èfe Epari mã noi. Askatari èri è mato noi. Nã è shinãi keskara è mato tãpimani,” ixõ Jesús ato yoini.

²² Nãskaito Judas fetsa, Judas Iscariotema yõkani: “Ifo, ¿afeskakĩ a mia Ifofaifoma mã ato tãpimatama noko fisti mã tãpimanimẽ?” ixõ yõkaito, ²³ Jesús kemani: “Ea noikakĩ nã è mato yoiai keskara ea nikakõitirofo. Èfe Epa ato noiaino èri ato noi. Nãskax nõ ato fe rafetiro. ²⁴ Ea noiyamakaxokai è yoia keskara ea nikakanima. Na meka mã nikai èfe mekama, èfe Epa meka è mato yoi. Nã ea nĩchinito ãfe meka.

²⁵ “Mato fe iyoxō ē mato yoiyofafāina. ²⁶ Nāskaxō Epa Niospa āfe Yōshi Shara matoki nīchi eōxō mato fe ixō mātō ōiti mato inimamasharaxonō. Keyokōi mato tāpimani. Nā ē mato yoia keskara mato shināmani.

²⁷ “Ē mato makinoax kakī ē mato ōiti fepeaxosharafāinikai. Akka nā ea nikaifāfema mato ōiti fepeaxotirofoma, ē fistichi ē mato axotiro. Nāskakē shināchakayamakāfe. Rateyamakāfe. ²⁸ Ē mato yoiaito mā mā nikai ē mato makinoax kaikai. Askafīax ē anā matoki oxii. Ea noikōiax mā ekeki inimatiro ēmāi ēfe Epa ari kaino, ēfe Epamāi ea finōkōikē. ²⁹ Nā ē mato rama yoiai keskaito mā ea chanīmara fatiro. Mē mato yoi a ixiai mā ōixō mā ea chanīmara fanō.

³⁰ “Ē mato mēxotaima yoipaifiaino nā yōshi chakafāfe āto xanīfo Satanās chaka ekeki oi. Askafīxō ea afeska fatiroma. ³¹ Akka ē Epa Nios fāsi noikōi. Nāskakē nā ea yoiai keskai ē akōini. Nāskaxō keyokōichi ea tāpikani ē fāsi aō noiaito. Fininīfofākāfe. Nonoax nō kanō,” ato fani.

15

Jesúsfi fana āfe kaya keskaraki. Akka nā fana pōya keskarafō a Ifofamisfo

¹ Anā Jesús ato yoini iskafakī: “Ēfi uva āfe kaya keskarakōiki. Akka ēfe Epa nā uva āfe ifo keskara. ² Akka mā na uva āfe pōya keskarafō. Nā uva pōya fetsa fimiymaito āfe ifāfe mextetiro potaxikī. Akka nā uva āfe pōya fimiyafo nā āfe teshpa mīshti ifāfe xatetiro. Nāskax uva pōya sharayakōi itiro fimi sharaya ixikī. ³ Nāskarifiakī mā ēfe meka nikaxō mā mātō chaka mā potax mā isharaxii. ⁴ Emakinoax paxkayamakāfe. Efe rafekāfe, nā ē mato fe ika keskariai. Akka uva pōya fisti fimitiroma āfe kayamaisax. Nāskarifiakī mā efe rafexoma nā ē mato amapaiyai keskara mā atiroma.

⁵ “Ēfi nā uva āfe kaya keskarakī. Akka mā na uva āfe pōyafo keskara. Akka nā efe rafekōiai ēri afe rafekōiaino ea keskarakōiri itiro. Ē mato fe ikamano mā afaa afeskatiro. ⁶ Uva āfe pōya chaka fimimais nō mextexō potatiro. Nāskaxō mā xinī tsasifaano nō ichafaxō nō kofatiro. Nāskarifiāi nā efe rafekaspaifo nāfo chiifā mēra fokani.

⁷ “Akka mā efe rafekōixō ēfe meka mā nikakī mātō ōiti mēraxō mā shinākī mā afarashta fapaikī ēfe Epa Nios mā kīfiāito mato axōi. ⁸ A ē mato amapaiyai keskara mā akī nāskax eōxō tāpimis mā iki. Mā askafaito ōikakī Epa Nios tāpitirofo Epa Niosmāi fāsi finakōikē. ⁹⁻¹⁰ A Epa Niospa noikōiai keskafakī ēri mato noikōi. Epa Niospa ea yoiai keskara ē afafāini. Akka ē afe imiskē ea noifafāini. Nāskafakīri nā ē mato yoiaito mā atiro māmāi efe ixō. Nāskakē ē mato noifafāini.

¹¹ “Anori ē mato yoi ē inimai. Nāskarifiāi māri mā inimanō. Ē mato yoiaito mā anori akī mā tāpitiro ē mato noiaino. ¹² Iskafakī ē mato yoi: Ē mato noiai keskai māri noinākāfe. ¹³ Nō fetsafo fe rafekōiax nō aō noikōiax nō aōnoax natiro. A mā nakī noiai keskarakōi tsōa finōtiroma. ¹⁴ Ē mato yoiai keskara aki mā efe rafemis mā itiro. ¹⁵ Akka a mato fe rafea mā tāpimatiro a mā shināi keskara. Nā ēfe Epa ea yoimis keskara ē matori tāpimani māmāi efe rafeano. Nāskakē ea yonoxomisfora ē anā mato faima. Efe rafeafora ē mato faxii. ¹⁶ Mā ea ifiyamafiaino ē mato ifni ea keskara mā inō mātōxō fetsafāferi ea chanīmara fanōfo. Nāfāfe ea Ifofapanakafo efe ipaxakakī. Nāskaifono mā afarashta ēfe Epa Nios ēfe aneōxō mā yōkaito mato axosharaxii. ¹⁷ Nā ē mato yoiai keskai noinākāfe,” ixō Jesús ato yoini.

Jesús Ifofamisfo ato noikaspakani

¹⁸ Anā Jesús ato yoini iskafakī: “Anā ē mato yoi mato noikaspayokanima. Akka ea noikaspayokani. Mato iskaratīa noikaspafiaifono mā tāpitiro taefakī

ea noikaspakani. ¹⁹ A ea Ifofaafoma fe mā ato fe rafeaito mato noikeranafo. Aa ranā noināifo keskari fakī matori noikeranafo. Akka mā kai ato keskarama. Ē mato ifini a ea Ifofaifoma keskara mā inōma. Akka nā ea Ifofaafāfema mato noikaspakani. ²⁰ Nā ē mato yoi ai keskara shinākāfe. Ē mato yoi iskafakī a yonoxomistokai āfe ifo finōtiroma. Akka ea omiskōimakani matori omiskōimaxikani. Akka a ē ato tāpimana nikakaxō matori nikaxikani mā ato yoi aito. ²¹ Akka mā ea Ifofaito, nā ea amisfo keskafakakī matori askafaxikani. Akka a ea nīchini tsōa tāpiama. Nāskaxō mato chakafaxikani.

²² “Ē atoki oyamaxō Niospa meka ē ato yoiyamaito tsōa tāpikeranafoma. Akka Niospa meka pishta tsōa nikayomisma afara chakafamisfo. Nāskax āto chaka atoō neama. Nāskafiaifono Niospa meka ē ato yoixiki ē oni. Nāskakē tsōa iskaratīa iskatiroma: ‘Tsōa ea Niospa meka yoiama.’ Askatari: ‘Ē afaa chakafamisma,’ itirofoma. Mā nikafikatsaxakakī āto chaka xateafoma. Nāskax āto chaka atoō nea. ²³ Ea noikaspayanā ēfe Epari noikaspakani. ²⁴ Niosxō tsōa atiroma keskara ē ato ispamis. Askafikaxokai tsōa āto chaka xateafoma. Tsōa atiroma keskara ē faitō ōifikakī ea nikakanima. Nāskax shara ikanima. Akka ē afarafo shara fayamaito ea tāpikeranafoma. Nāskax ato chaka atoō nekeranama. Akka ē afarafo shara faito mā ōifikaxō ea noikaspayanā ēfe Epari noikaspakani. ²⁵ A Niospa meka yoikī kirika kenenifo nē askakōi. Niospa meka yoikī eōnoa kirika kenenifo iskafakakī: ‘Ē afara chakafayamafiakē ea noikaspakani,’ ixō eōnoa yoikī kirika kenenifo.

²⁶ “Matori noikaspafono ēfe Epa Nios arixō āfe Yōshi Shara ē matoki nīchixii. Nāto mato ōiti fepeaxosharanō. Nāfi chanīmakōikī eōnoa mato yoixii. ²⁷ Ē yorafo Niospa meka ato yoikī taefani. Nāskax mā efe imiski. Nāskarifiakī māri eōnoa tāpixō mā ato yoitiro.

16

¹ “A mā omiskōixiai ē mato yoiyoni mā iskakī shinānōma: ‘¿Afeskai Jesús ēfe Ifo fiano ē omiskōimē?’ ixō mā anori shinākī mā ea potapaixii, anākai mā ea chanīmara faxima. ² Tāpikāfe. Māto kaifāfe nā ea Ifofaafāfema mato potaxikani mā anā āto ichanāti pe xe mēra īkinōma. Ē mato yoikōi anā shināsharakanima. Fakirira shinākani iskakakī: ‘Nā Niospa apaiyai keskara nō faxōi. Nā Jesús Ifofaafoma nō retei,’ ixō anori shinākani. ³ Ēfe Epa tāpiafoma eari tāpiafoma. Nāskakaxō mato chakafaxikani. ⁴ Akka nā mā ea Ifofakī taefanitīa mā omiskōixii ē mato famisma, ē mato fe ifiaxokai ē mato afaa yoimisma. Akka iskaratīa ē mato yoi. Nāskakē mā mato omiskōimanaifono mā shināxii nā ē mato yoimis keskara,” Jesús ato fani.

Niospa Yōshi Sharapa noko shināmatiro

⁵ Anā Jesús ato yoini iskafakī: “Ēfe Epa ea nīchini. Iskaratīa ē anā akiki kai. Akka mā, ‘¿Faki mī kaimē?’ mā ea faima. ⁶ Ē mato yoiaino mā shināmitsai. ⁷ Ē mato yoikōi, ē mato makinoax kaano mā shara ixii. Akka ē mato makinoax kayamaino Niospa Yōshi Shara matoki oima. Nāskakē māto ōiti mato fepeaxoyoima. Nāskafiano ē mato makinoax kaxō ēfe Yōshi Shara ē matoki nīchixii. ⁸ Nā ēfe Yōshi Sharapa nai mēranoax oxō a ea Ifofaafoma ato yoixii iskafakī: ‘Mā mā afarafo chakafamiski,’ ato faxii. Nāskatari a Niospa fīchipaiyai ato tāpimaxii. Nāskaxō a Nios Ifofaafoma ato yoixii iskafakī: ‘Mā mā afarafo chakafamiski, nāskakē mā omiskōi,’ ato faxii. ⁹ Nā ea Ifofaitoma afara chaka shināi. Nāskakē ēfe Yōshi Sharapa a afara chakafamis ispayoxii. ¹⁰ Ēfi nā ēfe Epa ea amapaiyai keskara ē amiski. Nāskax ēfe Epa ari ē kai anā ea ōinōfoma. Nāri Niospa Yōshi Sharapa ato tāpimaniyoxii. ¹¹ Nāskatari

Niospa Satanás omiskōimaniyoxiai Niospa āfe Yōshi Sharapa ato tāpimaniyoxii, nā Satanás āto xanīfo.

¹² “Ē mato meka ichapa yoipaiyaitokai mā tāpitiroma. ¹³ Nāskafikē Niospa Yōshi Shara matoki oxō a Niospa āfe meka chanīmakōi mato tāpimaxii. Nāfi chanīmismo. Akka āfe meka mato yoitama nā ēfe Epa shināmanai anori mato tāpimaniyoi. Nā afarafo afeskara ixiai mato tāpimaniyoi. ¹⁴ Nāato eōnoa yoisharakōixii. Nāskakē nā ē mato yoimis keskara Niospa Yōshi Sharapa mato tāpimaxii. ¹⁵ Nā ēfe Epanāfori ēfenāfori. Nāskakē nā ē yoiai keskara ēfe Epa āfe Yōshi Sharapa mato tāpimaxii,” ixō Jesús ato yoini.

Jesús aōxō tāpimisfo shināmitsafikanax chipo inimaxikani

¹⁶ Anā Jesús ato yoini iskafakī: “Akka ēkai anā mato fe nono samarakaima. Mē ēfe Epa ari kai. Nāskakē mā ea ōiyoima. Nāskafiax anā ē samamashta oaito mā ea ōixii,” aōxō tāpimisfo Jesús ato fani.

¹⁷⁻¹⁸ Ato askafaito nikakani yoinānifo: “¿Afeskakī, ‘Ēfe Epa ari kaito mā anā ea ōiyoima,’ noko faimē? ‘Afianā ē oaito mā ea ōixii,’ noko fai. Na noko yoiai keskarakai nō tāpiama,” ikanax yoinānifo.

¹⁹ Nāskakaxō yōkapaiyāifāfe Jesús ato tāpini. “¿Na ē mato yoiai keskara mā tāpiamax mā yoinōnāimē?” ato fani. ²⁰ “Ē mato xafakīa yoinō. Mē omiskōiaino a ea Ifofaafoma fāsi inimakani. Akka māfi ea shināi mā oiai. Mā ea shināi oiafiāx chipo mā ekeki inimaxii. ²¹ Akka mā kēro fake kāikī pae metiro. Nāskax mā fake kāixō anā pae metiroma māmāi āfe fake kāiax. Nāskax inimasharakōitiro māmāi āfe fake kāisharax. ²² Nāskarifiāi ē mato makinoax kaino mā oiai omiskōixii. Nāskax ē anā chipo matoki oaino mā inimakōixii. Tsōakai mato xatematiroma mā ekeki inimaio.

²³ “Ē naax ē otoax ē anā mato fe iyamaino mā anā afara mā ea yōkatiro. Akka ēfe aneōxō mā Epa Nios yōkatiro. Afarashta ēfe aneōxō mā Epa Nios yōkaito mato axoxii. ²⁴ Ēfe aneōxokai ēfe Epa mā yōkayomismo. Akka ē naax otokē nāskakē ēfe aneōxō ēfe Epa mā yōkatiro. Mā yōkaito ēfe Epa mato ināxii. Mato ināino mā fāsi inimakōixii,” ixō Jesús ato yoini.

Jesús keyokōi finōa

²⁵ Anā Jesús ato yoini iskafakī: “Ē mato meka fetsafaxō yoiaito mā tāpiyomismo. Ēkairoko xafakīa mato yoiaito mā tāpipanā. Akka iskaratīa xafakīa ē mato yoi Epa Niosnoa mā tāpinō. ²⁶⁻²⁷ Nāskaxō mā ea noi. Ēmāi Nios ariax matoki onikē mā mā ea chanīmara faa. Nāskakē Epa Niospa matori noikōi. Akka, ‘Ē mato makinoax kakī anā ē mato Epa Nios kīfixoni,’ ē mato faima. Mā mā yōkaxii ēfe aneōxō. ²⁸ Ē Epa ariax nono mai ano oni. Nāskakē iskaratīa nono mai anoax ēfe Epa ari ē kai,” ixō ato Jesús yoini.

²⁹ Ato askafaino aōxō tāpimisfāfe kemanifo: “Aicho, iskaratīa xafakīakōi mī noko yoikai. A mī noko taefakī yoiaito nō tāpiyoyitama. Anā meka fetsafaxō mī noko yoima. ³⁰ Iskaratīa mā nō tāpia keyokōi mī tāpikōia. Nō mia yōkapaiyāito mī noko tāpitiro. Nāskakē mī Nios ariax onikē nō mia chanīmara fai,” ixō yoiaifāfe ³¹ Jesús anā ato kemani: “¿Chanīmamē mā mā ea chanīmara faimē?” ato fani. ³² Nāskaxō anā ato yoini: “Chipo mā emakinoax mā paxkakāinikai. Mā fakirira kai. Chanīma, iskaratīa mā emakinoax mā fakirira kai. Tsoakai ēfe nēteima. Mā askafiainokai eres ē nēteima. Ēfe Epa fe ē nētei. ³³ Nā ē mato yoi mātō ōiti shara inō. Akka nā ea chanīmara faafoma fe mā nono nāmā nētei. Nāskakē mato omiskōimafiaifono shināchakayamakāfe. Ē Satanás yafi nā ea chanīmara faafomafo ē ato finōkōia. Nāskakē ē mato kexesharatiro,” Jesús ato fani.

17

Aōxō tāpimisfo Jesús Epa Nios ato kīfixoni

¹ Nāskata Jesús nai foisnīfofā Apa yoini: “Epa, iskaratīa ē naano ato tāpimafe ē mī Fakekōiki. Mī ato tāpimanaino ēri ato tāpimatiro mī fāsi sharakōi. ² Mī ea nīchini ē āto xanīfo inō. Nāskaxō mī ea ato ināni ē ato imasharapakexanō. ³ Meres fisti mī Nioskōi. Akka ēfi Jesucristo nā mīa nīchini. Nā noko tāpiafo nāfo nipanakafo.

⁴ “Ē nono mai anoxō afarafo ē ato ispa, mīmāi sharafinakōikē. Nā mīa yoiai keskara mē aka. ⁵ Nō mai onifamatai ē mia keskara xanīfo shara iyopaoni. Nāskakē iskaratīa ē mefe xanīfo inō ea xanīfo imafe a ē ipaoni keskara.

⁶ “Nono mai anoa yorafo mī ea ato minini ē ato tāpimanō mī afe keskaramāki. Nā mīnāfofiano mī ea ato minini. Mī meka nikakōinifo. ⁷ A mī ea yoia keskara ē ato yoimis. Nāfo mā tāpikōiafo. ⁸ A mīa yoiai keskara ē ato yoiaito ea chanīmara fakōikani. A ē mia ariax oniri mā tāpiafo. Chanīmara fakani a ea mīa nīchini.

⁹ “Ē mia ato kīfixōfafāini. Akka a ea chanīmara faafoma ē mia ato kīfixonima. Nā ea mī ato mininiōxō ē mia kīfifafāini. Ē mia ato kīfixōfafāini nāfomāi mīnāfokē. ¹⁰ Akka nā ēfenāfori mīnāki. Nā mīnāfori ēfenā. Nāskaxō nā ea chanīmara faafoōxō fetsafāferi tāpitirofo ē sharakē.

¹¹ “Ēkai anā na mai ano ikima. Ē mikiki kai. Akka nā mia Ifofaafofi nono na mai ano nētekani. Epa, mī fāsi sharaki. Ato kexesharafe. Mī aneōxō ato kexesharafe. Nā mī ea ināni tii ato kexesharafe. Akka nōfi fisti keskaraki. Nāfori nofe fisti keskara inōfo. ¹² Ē ato fe iyoxō ē ato kexeshara. Mīoxō ē ato kexeshara, ē fato fenoama. Akka nā Satanās āfe fake fisti ē fenoa. Nā mī meka yoikī kirika keneyonifo keskarax nā fisti mā fenoa.

¹³ “Iskaratīa ē mia ari kai. Ē kayoxoma ē ato yoioi nā ē ikai keskariai akairi inimakōinōfo. ¹⁴ Nā mī yoiai keskara mē ato tāpimani. A mia chanīmara faafāfema ato noikaspakani, miamāi Ifofaafono. Nāskakē ato noikaspakani. Nāskakēri ērikai ato keskarama. Akka eari noikaspakani.

¹⁵ “Akka ē mia yoima na mai anoa mī ato ifnō. Akka ē mia yoi na mai anoa mī ato kexesharanō Satanās chakata ato afeska fanōma. ¹⁶ Nā mia Ifofaafō a mia chanīmara faafomafo fe, ato fe rafetirofoma. Ērikai ē ato fe rafetiroma. ¹⁷ Mī meka chanīmakōi. Mī mekapa ato sharafafe mia keskara shara inōfo. ¹⁸ Ea mī mai ano nīchini ē mī meka ato yoinō. Nāskarifikā ē yorafo nīchi mī meka shara ato yoitanōfo. ¹⁹ Mīa ea yoia keskara ē akaino nāfāferi askari fanōfo.

²⁰⁻²¹ “Ēkai ato fistiōxō kīfifafāinima. Nā ea Ifofaafāfe ato yoiaifono nikakaxō ea Ifofaxikani. Nāskakē ē mia ato kīfixōfafāini nā nō shināi keskara fisti shinānōfo. Mī efe imis keskai nāfori nofe inōfo. Nō ato fe tanaima niaito ōikakī a ea chanīmara faafāfema akairi chanīmara fanōfo mī ea nīchini. ²² Mī efe imis keskai ēri ato fe imiski. Nā nō shināi keskarafō akairi shinānōfo. ²³ Mī efe ika keskarari ēri ato fe ikaki. Akka nā mī shināi keskarafō nōri shinātiro. Mī ōiti keskara nō itiro. Akka mī ea atoki nīchini. Nā mī ea noiai keskari fakī nāfori mī ato noikōi. Mī askafaino nā ea chanīmara faafāfema tāpitirofo.

²⁴ “Epa, nā yorafo mī ea ināfo efe inōfo mī ika anoa mia keskara shara ea ōinōfo. Mī mai onifayoxoma mī ea noiyopaoni. ²⁵ Epa, mī fāsi sharakōi. Nā ea chanīmara faafāfemakai mia tāpiafoma. Akka ē mia tāpikōia. Mī ea nīchini nā efe ikafāfe mā tāpiafo. ²⁶ Mī afe keskaramāki mē mia ato tāpimamis nā mī ea noiai keskari fakī, nāfāferi fetsafo noikōinōfo ē ato fe ikano. Askatari ē ato ōimafafāini,” ixō Jesús Apa kīfini.

18

Jesús achinifo

(Mt. 26.47-56; Mr. 14.43-50; Lc. 22.47-53)

¹ Nāskata mā Apa kīfikī nishpata aōxō tāpimisfo fe fakishi Jesús kani, xexa Cedrón pishta pokefaini. Nāno ifi fanafāfe āfe anefo olivos ini. Olivos mēra ikitoshinifo. ² Judaspa ato Jesús achimani kakī tāpini faki Jesús kaamāki, Olivos anomāi aōxō tāpimisfo Jesús ato iyomiskē. ³ Nānori Judaspa sorarofaoyoni Jesús achinōfo. Nā ato Nios kīfixomis xanīfofāfe askatari fariseofāferi Nios kīfiti pexefā kexemisfo nīchinifo Judas fe fōtanōfo. Chiifoya kenofoya koshatifoya ashifoya fonifo. ⁴ Mā achifofāifono Jesús ato tāpini. Mā nokoafono ato yōkani: “¿Mā tsoa fenaimē?” ato faito, ⁵ “Nō Jesús Nazarete anoa nō fenai,” faifāfe, ato kemani: “Ēkīa, nono ē ika,” ato fani. Ato askafaino nā Jesús ato achimanai Judasri nāno ato fe ini. ⁶ “Ē nono ikaki,” Jesús ato faino, chetekiri ifiakekafāpakei fetsenifo. ⁷ Nāskaxō Jesús anā ato yōkani: “¿Tsoa mā fenaimē?” Jesús ato faino, “Nō Jesús Nazarete anoa nō fenai,” faifāfe ⁸ anā ato yoini: “Ēkīa nā mā ea fenai ē mato faa,” ato fani. Nāskaxō ato yoini: “Mā ea fenamākai na eōxō tāpimisfo ato nīchikāfe fotanōfo,” ato fani.

⁹ Nā Jesúsnoa yoikī kirika keneyonifo iskafakī: “A mā ea minia fato fisti fenoima,” ixō kirika kenenifo. Nāskaxō nā kirika kenenifo keskarakōi Jesús Apa Nios kīfini. ¹⁰ Nāskaino Pedro āfe keno tsekani, āfe keno tsiostamexō. Mā āfe keno fixō nā ato Nios kīfixomisto āfe xanīfāfe yonomati paxteni. Nā xanīfāfe āfe yonomati āfe ane Malco ini. Nā Pedro paxteni. ¹¹ Pedro askafaito oikī, “Mī keno fafe,” Jesús Pedro fani. “¿Mī shināimamē? Ēfe Epa ea afara kechoki inā ē ayai,” ayatiki keparanākī Jesús Pedro yoini. “Nā ēfe Epa Niospa apaiyai keskara ē akikai,” ixō Jesús yoipaini.

Jesús Anás ano iyonifo

(Mt. 26.57-58; Mr. 14.53-54; Lc. 22.54)

¹² Sorarofāfe āfe xanīfo feta a Nios kīfiti pexefā kexemisfo feta osinākaxō Jesús achikaxō metexkere anifo. ¹³ Metexkere akaxō Anás pexe ano iyonifo. Nā Anás Caifás āfe rayos ini. Nā Caifás Nios ato kīfixomis xanīfokōi ini. ¹⁴ Nā Caifás āfe kaifo israelifo yoini: “Feronāfake fisti yorafoōnoax naa, sharaki,” ato fani.

“Ē Jesús ōimisma,” Pedro ini

(Mt. 26.69-70; Mr. 14.66-68; Lc. 22.55-57)

¹⁵ Askata Jesús iyoaifono Pedro fe a Jesúsxō tāpimis fetsa ato acho fonifo. Mā pexe ano nokoano nā Jesúsxō tāpimis fetsa xanīfāfe mā ōimis ini. Nā Jesús fe ikikaini. ¹⁶ Akka Pedro kāiti ano nēteni, ikinima. Akka nā Jesúsxō tāpimis fetsa ikikaini. Nāato xomaya a kāiti kexea yoini Pedrori ikimanō. ¹⁷ Mā Pedro ikiano nā kāiti kexemis xomayato yōkani: “¿Mīri mī Jesús āfe inamē?” faito, “Maa, ēkai Jesús āfe inama,” Pedro fani.

¹⁸ Mā fakishano matsinākōikanax chii ketefaax keyokōi chii yoonifo matsi meyamaxikakī. Nā xanīfofo āto yonoxomisfo fe a Nios kīfiti pexefā kexemisfāfe chii ketefaax yoonifo. Pedrori ato fe yooni.

Judeofāfe xanīfāfe Jesús yōkani

(Mt. 26.59-66; Mr. 14.55-64; Lc. 22.66-71)

¹⁹ Nāskata ato Nios kīfixomisfāfe āto xanīfāfe Jesús yōkani iskafakī: “¿Fatofomē a mīōxō tāpimisfo? ¿Afaa mī ato yoimismē?” faito, ²⁰ “Ēkai one ato yoiamā. Keyokōichi ea nikanōfo ē ato yoimis. Ē mātō ichanāti pexe mēranoa yafi a mātō Nios kīfiti pexefā mēranoa ē ato yoimis. Ēkai ēfe meka ē onemisma. ²¹ ¿Afeskakī

mĩ ea yōkaimē? Ea yōkakima a ea nikamisfo yōkafe. A ě ato yoimis tāpiafoki,” Jesús faito, ²² a Nios kīfiti pexefã kexemisto afe ketaxamei niato fepasyanã yoini: “¿Afeskakĩ nõko xanĩfo mĩ anori yoimē?” faito, ²³ Jesús anã kemani: “Afaa chaka ě yoimē ea yoife. Akka ě afaa chaka yoiana ¿afeskakĩ mĩ ea fepasimē?” Jesús fani.

²⁴ Askafaito nikakĩ Anás ěfe rayos Caifás ano Jesús nĩchini metexkere axõ. Nã Caifás ato Nios kīfixomis ãto xanĩfokõi ini.

Pedro anã ato yoini: “Ĕkai Jesús õimisma,” ato fani

(Mt. 26.71-75; Mr. 14.69-72; Lc. 22.58-62)

²⁵ Nãnoax Pedro ato fe chĩ yooni. ato fe yooaito afianã Pedro yōkanifo: “Mĩfi nã Jesús ěfe ina fetsakĩ,” faifãfe, “Maa, ěkai nã Jesús ěfe inama,” ato fani.

²⁶ Ato askafaino nã paxteato afe yõra yōkani: “¿Ĕ mia õiamamē? Akka ě mia õia. Nã fanafo mapoa mēranoa Jesús yafi ě mia õia,” nã paxteato afe yõra Pedro fani. ²⁷ “Maa. Ĕkaima,” Pedro faino takara keoinãkafani.

Pilato ano Jesús iyonifo

(Mt. 27.1-2, 11-14; Mr. 15.1-5; Lc. 23.1-5)

²⁸ Nãskano fakishpari judeofãfe Caifás ěfe pexe anoxõ Pilato xanĩfo ano Jesús iyonifo. Nã judeofo Pilato ěfe pexe mēra ikitiroma inifo. Pilatokairoko judeokē a mēra ikipanãfãfe. “Nõ Pilato ěfe pexe mēra ikiax nõ chakanatiro,” ikanax, ikikaspanifo. Nã judeofo a judeofoma fe rafexõ Pascua fistatĩa pitirofoma ipaonifo. Nãskara feyafamisfo ipaonifo. Nãskakē Pilato ěfe pexe mēra ikikaspanifo. ²⁹ Nãskaifono pexe kachiori kãinãkafã Pilato ato yōkani: “¿Afaa chakafakē na feronãfake mã ea ano efeamē?” ato faito, ³⁰ “Afaa chakafayamakekai nõ mikiki efekeranama,” faifãfe, ³¹ ato Pilato yoini: “Iyotakãfe. Mãto xinifãfe yoini keskafakĩ omiskõimaxikakĩ. Nã keskara mã feyafamiski. Afaa chakafamãki mã akãfe,” ato Pilato faito, judeofãfe kemanifo: “Akka mãto xanĩfofãfe yoinifo nõ tsoa retekĩ mastatiroma,” fanifo.

³² Jesús aõxõ tāpimisfo taeyoi yoini keskafakĩ nãskakõi fanifo ifi cruz ikaki mastakakĩ.

³³ Nãskano Pilato ěfe pexe mēra Jesús ikimani yōkaxiki. Mã ikimaxõ yōkani: “¿Mĩmē judeofãfe ãto xanĩfo?” Pilato faito, ³⁴ Jesús kemani: “¿Mĩ ea shinãimē ě judeofãfe xanĩfo mia yoiaforaka?” Jesús faito, ³⁵ anã Pilato kemani: “¿Mĩ shinãimē ě judeo? Ĕ judeoma. Akka mĩ kaifo feta mĩ xanĩfofãfe mia ekeki efeafõ ě mia omiskõimanõ. ¿Mĩ afaa chakafakē mia ekeki efeafomē? Ea yoife,” Pilato faito, ³⁶ Jesús kemani: “Ĕkai na mai anoax xanĩfoma. Ĕ nonoax xanĩfokē a ea Ifofaafãfe yorafo setekeranafo ea achiyamanõfo. Akka ěkai na yorafãfe ãto mai anoax ě ãto xanĩfoma,” Jesús faito, ³⁷ Pilato kemani: “¿Akka mĩ xanĩfo rakikã?” faito, “Nã ea mã yoiai keskarakã ě xanĩfo. Nãskakē ě yõra fakekõi kãini meka chanĩmakõi ato yoixikĩ. A meka chanĩmakõi fisti nikapaiyãifãfe nãfãfe ea nikamisfo,” Jesús faito, ³⁸ “¿Afaamē a meka chanĩmakõi?” Pilato fani.

Pilato ato yoini Jesús retenõfo

(Mt. 27.15-31; Mr. 15.6-20; Lc. 23.13-25)

Askafata Pilato pexe kachiori kãinãkafani. Kãinãkafaxõ judeofo yoini: “Ĕ na feronãfake yōkakĩ ěkai aõnoa afaa chaka nikama,” ato fani. ³⁹ “Iskaratĩa na Pascua fistatĩa ě yora fisti karaxa mēranoa ě mato kãimaxomis, nãskaramãĩ mãto feyafamiskē. ¿Akka ě mãto xanĩfo ě mato kãimaxotiomē katanõ?” ato faino, ⁴⁰ fãsikõĩ mekainĩfofãnifo: “¡Jesús tsekakima! ¡Barrabás noko kãimaxõfe!” fanifo. Nã Barrabás yometso ini.

19

¹ Nāskaxō Pilato ato yoiano Jesús iyonifo sorarofāfe koshatinī koshaxikakī. ² Askano sorarofāfe moxa chainipafo maiti fakaxō maimanifo. Akiki kaxepaiyanā nāskatari tari ōshi nana safemanifo. ³ Nāskax akiki kaxepai kakī iskafanifo: “Aicho. Mīfi judeofāfe āto xanīfoki. Mī mēxotaima nipanakaki,” iyanā fepasketsanifo.

⁴⁻⁵ Askafaifono Pilato Jesús pexe xaki mēranoa kāimani ōinōfo. Jesús tari ōshi nana safeax kāikaini, moxari maiti fakaxō maimanafono. Nāskaxō Pilato ato yoini: “Ōikapo na feronāfakekai afaa chakafaa ē nikama ē chakafapanā,” ato fani. ⁶ Ato askafaito judeofāfe āto xanīfoyaxō a Nios kīfiti pexefā kexemisfāferi fāsikōi mekafanifo: “¡Mastafe! ¡Mastafe!” faifono, “Mā iyokaxō mastatakāfe. Ēkai aōnoa afaa chaka ē nikama ē chakafapanā,” Pilato ato fani. ⁷ Ato askafaino judeofāfe kemanifo: “Akka na feronāfāke noko yoimis: ‘Ēfi Niospa fakeki,’ noko famis. Akka nōko xinifāfe yoini: ‘Ē Niospa fakera ikai natiro,’ fanifo. Nāskakē na feronāfake nayamaima,” fanifo.

⁸ Askafaifāfe nikai Pilato ratekōini. ⁹ Nāskaxō āfe pexe mēra Jesús anā iyoni. Iyoxō yōkani: “¿Fanīamē mī?” faino, Jesús kemanima. ¹⁰ Pilato anā Jesús yoini: “¿Ea mīa kemaimamē? ¿Ea mīa tāpiamamē ē xanīfo? Ē mia kāimatiro, askayamai ē mia ato mastamatiro,” Pilato askafaino, ¹¹ Jesús kemani: “Niospa mia xanīfo imayamainokai mī ea afeska fakeranama. Akka mī ea ato mastamanax mī chaka iki. Akka nā ea mikiki efea nā chakafinakōi iki mī ea reteano,” Jesús fani.

¹² Askafaito nikakī Pilato Jesús kāimapaini. Kāimapaiyaino nikakani fāsikōi judeofo mekainīfofākata yoinifo: “Fatora fetsa xanīfo ipaikī nāato César xanīfo chakafai. Akka na Jesús xanīfo ipai. Akka mī Jesús kāimaxō mī anā nōko xanīfo César tanaima,” fanifo.

¹³ Askafaifāfe nikakī afianā Pilato Jesús pexe mēranoa kāimani. Nāskax Pilato a xanīfāfe tsaoti ano tsaoni. Nā xanīfāfe tsaoti pexe emāiti ini tokiri sapa kamaki āfe tsaotiki tsāoni. Nā tokiri hebreofāfe āto mekapa anemisfo Gabata fakakī. ¹⁴ Mā Pascua fista ikaino xini keya Pilato tsaioxō ato yoini mā Jesús kāimaxō, “Nakīa ōikapo māto xanīfo,” ato fani. ¹⁵ Ato askafaino fāsikōi mekainīfofākata yoinifo: “¡Iyoxō mastatāfe ifi cruz ikikakīnoax nanō!” faifono, “¿Mā ōipaimē ē māto xanīfo mastanō?” ato Pilato faino, “César fisti nōko xanīfokōi. Anā ano nōko xanīfo fetsama,” judeofāfe āto xanīfofōfāfe Pilato fanifo.

¹⁶ Askafaifono Pilato ato Jesús nīchixonī iyoxō mastatanōfo.

Jesús ifi cruz ikaki mastanifo

(Mt. 27.32-44; Mr. 15.21-32; Lc. 23.26-43)

¹⁷ Nāskano sorarofāfe Jesús iyonifo. Iyoaifono āakōi ifi cruz ika Jesús iyaxō foni. A mastaifo ano nokoni. A mastaifo nāno āfe ane ini: “Mapo Xao,” fanifo anakakī. Judeofāfe mekapa Gólgotara fapaonifo. ¹⁸ Nāskata Jesús yafi yometso raferi mastanifo. Takai rafe yometso rafe mastanifo. Akka Jesús nēxpakīa anifo.

¹⁹ Mā Jesús mastakaxō āfe mapo mǎnāori kenenōfo Pilato ato yoini. “Jesús Nazarete anoa judeofāfe āto xanīfokōi,” fanifo kene kakī. ²⁰ Jerusalén ano yora fetsafo osiafo ichapakōifo inifo. Nānoxō Jesús Jerusalén chaimashtaxō mastaifo ini. Nānoxō Pilato meka fetsa fetsatapafo ato kenemani Jesús judeofāfe āto xanīfokē tāpinōfo. Judeofāfe āto meka keneta, griegofāfe āto meka keneta, romanōfāfe āto mekari kenenifo. ²¹ Nāskax judeofāfe āto xanīfofo Pilato ano fonifo yoi fokani: “Jesús nōko xanīfoma. Nāskakē ato kenemayamafe iskafakī: ‘Jesús judeofāfe āto xanīfokōi,’ askara ato kenemayamafe. Akka,

'Jesús yoimis, "È judeofãfe xanĩfora" imis.' Nãnori mĩ ato kenematiro," faifãfe, ²² Pilato ato yoini: "Nã ã ato kenemana keskara ã ato kenemani. Èkai anã afaa fetsa ã ato kenematiroma," Pilato ato fani.

²³ Sorarofãfe Jesús mastafono ãfe rapati fĩanifo. Nãskax paxkanãi fetsenifo Jesús ãfe rapati soraro cuatropa Jesús rapati finifo. Nãskata nã ãfe tari chainipari fĩanifo. ²⁴ Nãskax yoinãnifo: "Nã tari nõ faxteimãkai fetsakanãyamaxikĩ. Nãskara memashara nõ finõ," inifo. Nãskax ãfe tariya kaxenifo ãto kaxetiya. "Na finõmanato Jesús ãfe tari fii kiki," inifo. Nãnori Niospa meka yoikakĩ keneyonifo. A Jesús inõpokoai yoikakĩ keneyonifo. Iskafakĩ kenenifo: "Èfe rapati paxkanãxikani. Askata ãfe tari chainipayari ãto kaxetiya kaxexikani. Nã finõmanato ãfe tari fixii," ixõ kirika keneyonifo. Nãskakẽ sorarofõ Jesús ãfe tariya kaxenifo.

²⁵ Nãskano nã Jesús mastafõ ano chaimashta Jesús ãfe afa nini. ãfe afa fet-sari nãno nini. Nã Cleofaspa ãfe ãfinõ María Magdalenanõ nãno chaimashta ninifo. ²⁶ Nã aõxõ tãpimis fisti ãfe yamakõ a Jesús noikõipaoni afa fe ketaxamei nikẽ Jesús õini. Nãskaxõ Jesús afa yoini: "Na feronãfakefi mĩ fakeki," fani. ²⁷ Nãskata nã feronãfakeri Jesús yoini: "Nafi mĩ efaki," fani. Askafaino nikakĩ María ãfe pexe ano iyoni kexesharaxikĩ.

Jesús nani

(Mt. 27.45-56; Mr. 15.33-41; Lc. 23.44-49)

²⁸ Jesúsnoa yoikĩ Niospa meka keneyonifo keskakõini. Mã Jesús tãpixõ yoini: "È nõamãiki," ato fani. ²⁹ Ato askafaino fimi ene kacha ocha mefetiki tsaono nã mĩxa fikaxõ fimi ene kachaki momokaxõ Jesús ayamapainifo tafa xatekĩ rõtati fakaxõ. ³⁰ Mã fimi kacha yaxõ Jesús yoini: "Keyokõ ãfe Èpa ea yoia keskara mẽ aka," ato fani. Ato yoita nãskax nai tepopakekafãni.

Soraronõ Jesús ãfe pishi nãmã chachini

³¹ Mã Pascua fista ikaino Jesús yafi yometso rafe ifi cruz ikakĩnoa judeofãfe õikaspanifo. Nã fistatĩa ato pena tenetitĩa ini. Nãskax mã fista ikaino Pilato ano fonifo yoi fokani iskafakakĩ: "Mã penama nõko fista iki kiki. Nã Jesús yafi nã yometso rafe ãto fitax xao tẽkerisa fanõfo koshi nanõfo ato yoife. Mã penama nõko fista iki kiki nã ato mastafõ ano anã inõfoma nõko fistatĩa," judeofãfe ãto xanĩfofãfe Pilato fanifo. ³² Nãskafafono Pilato sorarofõ yoini iskafakĩ: "ãto fitax xao ato tẽkerisa fakãfe koshi nanõfo." Ato askafaino fokaxõ õiafo yometso rafe naafoma inifo. Naafomano ãto fitax xao ato tãkenifo nanõfo. ³³ Akka Jesúski fokaxõ õiafo mã Jesús naa õinifo. Nãskakẽ tsõa ãfe fitax xao tẽkenima. ³⁴ Akka soraro fistichi ãfe ãshi ãfe pishi nãmã chachiaino ãfe imi fakaya siini.

³⁵ Èkĩa Juan na kirika ã keneai nã ã õimis keskara ã mato yoi na kirika kenekĩ mã chanĩmara fanõ. Èfi chanĩmakõ mato yoi. ³⁶ Niospa meka yoimisto a Jesús inõpokoai yoikĩ kirika kenenifo iskafakĩ: "ãfe xaokai tsõa tẽkexikanima," ixõ kirika keneyonifo. ³⁷ Askatari, "A ãfe pishi chachiaifono õixinõfo," a Niospa meka yoimisto nãnorikõ kirika keneyoni.

Jesús makex kini mẽra maifanifo

(Mt. 27.57-61; Mr. 15.42-47; Lc. 23.50-56)

³⁸ Nãskano José Arimatea ano ikax Pilato ano kani. Kaxõ Jesús ãfe yora yõkani: "Ifi cruz ikakĩnoa ã Jesús fotomapai maifaxikĩ," José feito, "Atãfe," Pilato fani. Nã José Jesús Ifofamis ini. Jesús Ifofafxõ ato yoinima. Judeofãfe ãto xanĩfofoki mesekĩ ato yoinima. ³⁹ Nicodemo feta José Jesús ifi cruz ikakĩnoa fotomanifo maifaxikakĩ. Nã Nicodemo Jesúski fakishi kaxõ yõkayoni. Nãato ãfe pirofomã shara treinta kilo feni Jesús ãfe yora raish axiki fena

piSIYamanõ. Fetsa äfe ane mĩrra ini. Fẽtsa aneri áloes ini. Nã rafe osia ini. ⁴⁰ Askano José feta Nicodemo sama oxo shara pirofomã raish axõ aõ rakonifo. Judeofãfe äto kaifo maifakĩ askara feyafamisfo ini. ⁴¹ Nã ifi shara mĩshti mapoa anoxõ chaimashtaxõ Jesús mastanifo. Nãnori mafa kini fena, tsoa a mẽra maiyomisma ini. ⁴² Mã judeofãfe äto pena teneti chaimashta ikaino mã xini kaino Jesús maifanifo. Nãskakẽ nã mafa kini chaimashta nã mẽra Jesús maifanifo.

20

Jesús otoni

(Mt. 28.1-10; Mr. 16.1-8; Lc. 24.1-12)

¹ Nãskano nomĩkonõ fakishparikõi María Magdalena kani nã Jesús mafa kini mẽra maia ano. Kaxõ õia mã mafa kini fepekemea ini. Nã tokirinĩfã aõ fepoitafo mã fepekemea ini. ² María õifaini ichoni Pedro yafi nã Jesúsxõ tãpimis fetsa nã Jesús äfe yamakõi chanifaikai kani. Ato yoini: “Nõko Ifãfe äfe yora kini mẽranao mã fakira oneafo nõkai tãpiama,” ato fani.

³ Ato askafaino Pedro fe a Jesúsxõ tãpimis fetsa õifokani ichonifo. Mafa kini ano õifokani. ⁴ Nã fẽtsa Pedro xonõfaini rekẽ nokoikakĩ. Akka Pedro chipo nokotoshini. ⁵ Rekẽ nokotoshixõ a Jesús maia ano mafa kini mẽra tẽkepakekafã naisni. Ari naiskĩ õia a aõ rakoitafo sama mania ini. ⁶ Nãskata Pedrori chipo nokotoshini. Nokoax mafa kini mẽra ikikaini. Ikikaixõ õia aõ rakoitafo mania ini. ⁷ A aõ mapoki marakoitafo nã fosoita ariri äfe sama mania ini chaimashta. ⁸ Askaino a Pedro fe kaari kini mẽra ikikaini. Ikikaikĩ õia ano Jesúsma ini. Nãskaxõ chanĩmara fani. ⁹ A Jesús otoxiai Niospa meka yoikĩ kirika kenenifo tsõa tãpiyonima. ¹⁰ Nãskata mã õita äto pexe ano fenifo.

Jesús María Magdalenaki nokoni

(Mr. 16.9-11)

¹¹ Mã foaifono María kanima. Mafa kini kachiori niax María oiani. Oiayanã nãatoro kini tẽkepakekafã naiski õini. ¹² Niospa äfe äjiri rafe rapati oxokõi safekanax tsaoafo ini Jesús rakaita ano. Nã fosoita ariri fetsa tsaoa, fetsari äfe tae ikita ariri tsaoa ini. ¹³ Nãskaxõ Niospa äfe äjiri rafeta yoini: “¿Afeskai mĩ oiaimẽ?” faifono, “Èfe Ifãfe äfe yora mã fakira oneafo ã tãpiama,” ato fani.

¹⁴ Nãskata María texkeakekafã õia Jesús a kachiori niano tãpinima. ¹⁵ Jesús María yõkani: “Kẽromã, ¿afeskai mĩ oiaimẽ? ¿Mĩ tsoa fenaimẽ?” faito, María shinãni: “Nã fanafo kexemisra,” fani. Nãskaxõ María yõkani: “Mĩ èfe Ifãfe äfe yora fanĩ mĩ faamẽ ea yoife, ã afianã nono maifanõ,” faito, ¹⁶ Jesús: “María,” faito, foisnĩfofã María õia nã Jesús äfe fesokõi ini. Nãskaxõ María judeo meka: “Rabonĩ,” fani. Rabonĩ fakĩ, “Noko tãpimamisto,” fani. ¹⁷ Askafaino, “Ea ramãyamafe. Èfe Epa ari ã kaamaki. Akka ea ramãkima efe yorafo ea ato yoixotãfe, mã èfe Epa Nios ari ã kaikai. Nã èfe Epari mãto Epaki. Nã èfe Niosri mãto Nioski, ato fatãfe,” fani. ¹⁸ Askafaino María kaxõ aõxõ tãpimisfoki nokoxõ ato yoini: “Mẽ nõko Ifo ã õiaki,” ato fani. Nã äfe Ifãfe yoia keskara ato yoini.

Jesús aõxõ tãpimisfoki nokoni

(Mt. 28.16-20; Mr. 16.14-18; Lc. 24.36-49)

¹⁹ Nãskata nomĩkonõ mã xini kaino a aõxõ tãpimisfãfe judeofoki mesekakĩ äto pexe fepoti feponifo ichanãkakĩ. Mã ichanãifono äto nẽxpakĩa Jesús nirisatani. Ato yoini: “Mãto õiti fepeakax inimasharakãfe,” ato fani. ²⁰ Ato askafata a mifiki rãfomã mastaitafo äfe tsefe ato ispani. A äfe pishiki äshi chachitafori ato ispani. Ato ispaito õikani äto Ifoki fãsi inimakõinifo.

²¹ Afianã Jesús ato yoini: “Mãto òiti fepeakax inimasharakãfe. Nã ãfe Êpa ea nĩchini keskafakĩri iskaratĩa ã matorĩ nĩchikai,” ato fani. ²² Nãskaxõ ato yoini: “Na ãfe Epa ãfe Yõshi Shara fikãfe,” ixõ atoki axfainãkafa ato xoõ ani. ²³ “Fatora fetsa mã ãto chaka soaxonaino Niospari ãto chaka soaxoxii. Mã ato chaka soaxoyamaino atoõ chaka nepakenaka,” ixõ Jesús ato yoiax nãskax ato makinoax kani.

²⁴ Ato Jesús yoiaínokai Tomás ato fe ano inima. Nã Tomásri Jesúsxõ tãpimis ini. Æfe ane fetsa “Rafe Kãini” fapaonifo. ²⁵ Tomás atoki oaino yoinifo: “Mã nõko Ifo nokoki oaito nõ õia,” faifãfe Tomás ato yoini: “Ë ãfe mifi natakinõ a rãfo tsefefe ã meikerana a ãfe pishi tseferi ã meikerana nãskaxõ ã chanĩmara fakerana. Akka ã ãfe tsefefe ramãkayamaxõ a mã Jesús õia ã chanĩmara faima,” ato Tomás fani.

Jesús aõxõ tãpimisfoki anã nokorisatani

²⁶ Nãskata ocho nia oxata Jesús aõxõ tãpimisfo anã kene mẽranoax ichanãfono Tomásri nãno ato fe ini. PeXe fepoti fepokõiafono Jesús atoki nokorisatani. Anã ato yoini: “Mãto òiti fepeakax inimasharakãfe,” ato fani. ²⁷ Nãskaxõ Jesús Tomás yoini: “Ea mĩ mifi ramãfe ãfe mifi nataki. Ëfe pishi nãmãri ea ramãfe. Anã ea chanĩmara fakima, ea chanĩmara fafe,” Jesús faito, ²⁸ Tomás kemakĩ: “Mifi ãfe Ifoki. Mifi ãfe Nioski,” faito, ²⁹ “Ea mã õikĩ mĩ ea chanĩmara fai,” fani. “Akka ea õiyamafikakĩ ea chanĩmara faifofi Epa Niospa ato shara faxii. Inimakõixikani,” Jesús fani.

Juan kirika kenei tãpinõfo

³⁰ Akka afama mĩshti tsõa atiroma keskafakĩ Jesús aõxõ tãpimisfo ato õimamis. Afara fetsafori Jesús aka ã afo mato kenexonama. ³¹ Epa Niospa Jesús nĩchini nõko Ifo inõ. Nãfi Niospa Fakeki. Ë mato Jesúsnoa kenexoni mã chanĩmara fanõ. Chanĩmara faax mã aõnoax Nios fe nĩpaxanõ.

21

Ïamãfã kesemẽ Jesús aõxõ tãpimisfoki nokoni

¹ Nãskano Jesús anã aõxõ tãpimisfoki atoki nokoni. Ïamãfã Tiberias kesemẽ nãno atoki nokoni. Ë mato yoinõ afeskax Jesús onimãki.

² Pedro fe Tomás (nã Tomás “Rafe Naneni” fapaonifo), Natanael Caná anoa ini Galilea mai anoa, Zebedeo fake raferi ini, Jesús fe rafemis raferi ato fe ichanãnifo. ³ Nãskaxõ Pedro ato yoini: “Ë rinipa fii kaikai,” Pedro ato faino, “Nõri mefe kai,” fanifo. Nãskax fonifo kanõanãfãne nanefainifo. Fõkata rini potenifo nã rini fakishchãi potefikaxokai tsõa foe finifoma.

⁴ Mã penaino Jesús Ïamãfã kesemẽ atoki nokorisatani. Ïamãfã kesemẽxõ aõxõ tãpimisfãfe tsõa Jesús tãpinifoma. ⁵ “¿Ëfe fakefãfe, mã foe fiamamẽ?” ato faino, “Nõ fiamã,” fanifo. ⁶ Askafaifono ato yoini: “Mãto põya kayakai aõri mãto rini potekãfe. Askafaxõ mã fitiroki,” ato faino nikakakĩ nã ato yoiai keskafanifo ãto rini potekakĩ ãto põya kayakai aõri. Nãskaxõ meafõ mã foe kayakõi fia menifo. Ato kanõanãfã mẽra nanepaikakĩ ranãnifo. ⁷ Nã Jesúsxõ tãpimis fẽtsa nã Jesús ãfe yamakõi ipaonito Pedro yoini iskafakĩ: “¡Nãfi nõko Ifoki!” fani. Askafaito nikai Pedro koshikõi ãfe rapati safeni nãskax kanõanãfã makinoax Ïamãfãnaki pakekaini ãfe Ifoki nokorisapai. ⁸ Nãskaito õikani atiri kanõanãfãne acho fonifo. Æto rini foe fospikõiano ninifonifo Ïamãfã kesemẽ chaimashta nokoxikakĩ.

⁹ Mã Ïamãfã kesemẽ nokokaxõ õiafo chii mãnã mãnã ikaito õinifo. Foe yafi pãa xoimea chii ketokonõ raka õinifo. ¹⁰ Askata Jesús ato yoini: “A mã rama foe fia niri fekãfe,” ato fani.

¹¹ Akka Pedro kanõanãfãoxõ rini ninifoni ñamãfã kesemẽ rataxiki. Mã rini fixõ õia foe rini mẽra fospikõia õini. Ciento cincuenta y tres ini. Akka fõe rini faxtenima. ¹² Askaifono Jesús ato yoini: “Piyoi fekãfe,” ato fani. Akka tsõa yõkanima: “¿Mĩ tsoamẽ?” tsõa fanima mãmãi tãpikaxõ ãto Ifomãiyakẽ.

¹³ Nãskaxõ Jesús ato pimakĩ ato pãa yafi foe ato inãni.

¹⁴ Mã reteafono otoitaxakĩ aõxõ tãpimisfoki nokoni. Tres ves ini atoki oi.

Jesús Pedro yoini

¹⁵ Mã pixõ Jesús Simón Pedro yoini: “Simón mĩfi Juan fakeki. ¿Na fetsa finõmainĩfofã mĩ ea noimẽ?” faito, “Èje Ifo. Mã mĩ tãpiaki ã mia noiaito,” Pedro faito, Jesús yoini: “A ea noisharaxõ a ea rama Ifofaifori ato kexesharafe ea Ifosharafanõfo. A oveja kexemisto ãfe oveja fake kexemis keskafe ato kexekĩ,” fani.

¹⁶ Anã Jesús Pedro yõkani: “Simón, mĩfi Juan fakeki. ¿Chanĩmamẽ mĩ ea noimẽ?” faito, “Èje, Ifo. Mã mĩ tãpia ã mia noiaito” Pedro faito, anã Jesús yoini: “A ea noisharaxõ ea Ifofamisfo ato kexesharafe ea Ifosharafanõfo. A oveja kexemisto ãfe oveja kexemis keskafe ato kexekĩ,” fani.

¹⁷ Nãskaxõ anã Jesús yõkani: “Simón, mĩfi Juan fakeki. ¿Ea mĩa noikõimẽ?” ixõ Jesús yõkari faino Pedro anã tooxinima. Nãskaxõ anã Pedro kemani: “Ifo, mĩfi afama mĩshti tãpiaki. Mã mĩ tãpia ã mia noiaito,” fani. Askafaino anã Jesús yoini: “A ea Ifofamisfo ato kexesharafe ea Ifofasharanõfo. ¹⁸ Ë mia yoikõinõ. Mĩ naetapakĩ nã mĩ apaiyai keskara mĩ fapaoni. Askatari nã mĩ kapaiyai ari mĩ kapaoni. Akka mã mĩ anifoax mĩ takairafe mẽshax kaxii mia iyoaifono a mĩ kapaiyamai ari mia iyoxikani,” Jesús fani. ¹⁹ Askafakĩ Jesús Pedro tãpimani afeskax naximãkai. Pedro Jesúsnoax naxiaino yorafãfe mã tãpikaxõ, “Nios finakõia,” faxikani. Nãskano Jesús Pedro yoini: “Ea Ifosharafafe,” fani.

²⁰ Askafaino Pedro texkeakekafã Juan fichini acho oaino. (Nã Juanri Jesúsxõ tãpimis ini, Juan Jesús noikõia ini. Jesús reteyoafomano aõxõ tãpimisfo feta fakishi piyoni. Akka Juan afe ketaxamei tsoaxõ Jesús yõkani iskafakĩ: “¿Ifo, tsõakai mia ato achimaximẽ?” fani Jesús reteyoafomano afeta pikĩ.)

²¹ Nãskaxõ Pedro nã Juan fichixõ Jesús yõkani: “¿Ifo, afeskax na Juan naximẽ?” fani.

²² Askafaino Jesús kemani: “A ã nimapaikĩ ã nimaino niyoxii nã ã anã oaitã. Akka mĩkai aõnoa shinãchakatiroma. Askatamaroko ea Ifofatitaifafe. Eõnoa fisti shinãfafãife,” fani. ²³ Nãskax Jesúsxõ tãpimisfo ãa ranã yoinãnifo: “Juankai nanakama,” fanifo. Askafafiaifono Jesúska Pedro anori yoinima. Akka iskafakĩ yoini: “A ã nimapaikĩ ã nimaino niyoxii nã ã anã oaitã. Akka mĩkai Juanõnoa mĩ shinãchakatiroma,” fani. Nãnori fisti Jesús Pedro yoini.

²⁴ Ëkã Juan ã kirika kenexõ ã mato yoi. Ëri Jesúsxõ tãpimis. Ea Jesús noikõia. Jesús afarafo faito ã õimis. Nãfo ã mato kenexoni. Jesús afarafo akaito mẽ õimis. Nãskakẽ mã ãfe meka chanĩmara fatiro. Ë mato yoiaito mã Jesús chanĩmara fatiro. ²⁵ Jesús afama mĩshti fani afo yoikĩ nõ kirika kenekĩ mitotiroma. Ëkã Juan ã mato kirika kenexoni. Nã tii.

Jesúsxõ Tãpimisfãfe Apaonifo Keskara

“Niospa ãfe Yõshi Shara matoki nĩchixii kiki,” ixõ Jesús yoini aõxõ tãpimisfo

¹ Teófilo, ẽ mia anã kirika kenexoni mia yoikĩ. Ẽfi Lucaski, mia kirika fomai. A Jesús nai mẽra kayoxoma afama mĩshtifo fayaná ato tãpimapaoni keskara yoikĩ ẽ mia kirika kenexõ fomayoni, mĩ tãpinõ. ²⁻³ Mã Jesús retefiafono oxa rafeta anã otoni. Mã otoxõ aõxõ tãpimisfo ato ifixõ ato tãpimani Niospa Yõshi Sharapa shinãmanaino akairi fetsafo tãpimanõfo. A metasitafo ato ispaketsani a aõxõ tãpimisfo. “Nafo ea metasitafokĩ õikapo,” ato fani õikakĩ tãpisharanõfo. Mã anã nia afia ipaoni keskara ixõ tãpinõfo ato yoisharani nai mẽra kayoxoma. Cuarenta nia oxata ato tãpimasharani chipo katãxiki ato yoipakeyoni a Nios xanĩfoõnoa ato yoisharapakeni. Nãskax Apa Nios ari kani nai mẽra.

⁴ Nai mẽra kayoxoma anã pena fetsa aõxõ tãpimisfo yoisharani iskafakĩ: “Nonoax fakifoyoyamakãfe. Ẽ mato yoisharayonõ, mã nikasharanõ. Ẽfe Epa ãfe Yõshi Shara matoki nĩchixii kikĩ a ẽ mato yoimis keskafakĩ. Mã mã nikafafainakĩ ẽ mato yoiaito. Nãskakẽ na Jerusalén anoxõ manayokãfe, ẽfe Epa ãfe Yõshi Shara mato mẽra naneyonõ. ⁵ Juan mato maotisafakĩ faka mẽra ikimapakeni Niospa mãto chaka mato soaxonano mã ato õimanõ. Nãskafakĩri samama fatora penata Niospa ãfe Yõshi Shara mato mẽra naneaino mã shinã sharaya ixii.”

Jesús nai mẽra kani

⁶ Anã ano fisti Jesús fe ichanãkaxõ yorafãfe yõkanifo iskafakakĩ: “¿Ifo, iskaratĩa nõko kaifo israelifãfe ãto xanĩfo mĩ ikimẽ? ¿Anã nafa nõko xanĩfo ixiimamẽ?” fanifo yõkakakĩ.

⁷ Askafafãfe Jesús anã ato yoini iskafakĩ: “Tsõa tãpiama. Epa Nios fistichi tãpia. Afetĩara inõpokoi mã tãpitiro. ⁸ Mã tãpiyamafitirono Niospa ãfe Yõshi Shara mato mẽra naneano aõxõ mã afama mĩshti tãpitiro. Nãskakẽ mã eõnoa ato yoitiro mẽstekõi. Taefakĩ nã Jerusalén anoafõ yoita, nã Judea anoafõ yoita, nã Samãria anoafõ yoita, keyokõi nã maitio anoafõ eõnoa mã ato yoitiro,” ixõ Jesús aõxõ tãpimisfo yoini.

⁹ Nãskata mã ato yoita Apa Niospa ifiaino nai mẽra kani. Aõxõ tãpimisfãfe õiaifono fininãkafã kani. Mẽstekõi mãpeinĩfofani nai kõi mẽra ikikainaito aõxõ tãpimisfãfe anã õinifoma mã kaano. ¹⁰ Nai mẽra foisaifono feronãfake rafe ato ketaxamei nĩtanifo rapati oxo shara safekanax ato yoinifo iskafakĩ: ¹¹ “¿Na Galilea anoafãfe, afeskakĩ mã nai mẽra foisimẽ? Mã Jesús nai mẽra kaa. Afetĩara anã matoki oxii. Fatora penata afia mã kaito õia keskara oxii kiki,” ixõ feronãfake rafeta ato yoini.

Jerusalén anoax aõxõ tãpimisfo ichanãnifo

¹² A mãchifanẽ ãfe ane Olivos anoax Jesús ronoinãkafã nai mẽra kaito õikata anã anoris fenifo Jerusalén ano chaima. Un kilometro Olivos fe Jerusalén nã tiixõ rafe ini. ¹³⁻¹⁴ Jerusalén ano nokokata pexe mẽra ikifaikata fomãkĩa mãpeinĩfofãkata a ikafo ano ikifainifo. Ano ikifaikanax ano fistiax ichanãnifo. Pedro ikaino, Jacobo ikaino (nã Jacobo ãfe ane fetsa Santiago ipaoni), Juan ikaino, Andrés ikaino, Felipe ikaino, Tomás ikaino, Bartolomé ikaino, Mateo ikaino, Jacobo Alfeo fake ikaino, Simón Celote ikaino, Judas Santiago fake ikaino, Jesús onefetsafo ikaifono, Jesús ãfe afa María ikaino, a kẽro fetsafori ikaifono ano fisti ichanãnifo Nios kĩfikani. Nãnoxõ pena tii Nios kĩfifãinifo.

¹⁵ Askata pena fetsa yora rasi ciento veinte ichanānifo. Askaifono Pedro niinākaḡā ato yoini ¹⁶ iskafakī: “Efe yorafāḡe, ea nikakōisharakāḡe ē mato yoinō. Na Judaspafi yorafo iyoita Jesús achifonōfo. ‘Fato Jesúsmaḡkī noko yoife,’ faifāḡe, ‘Nakīa,’ ato feito ōikakī achitafo. Afia Niospa shināmanaino nōko xini David yoikī kirika kenepaoni keskafakī Judaspa ato yoita. ¹⁷ Na Judas nofe rafemis noko akai keskari fakī Jesús ifini. Nāskakē nofeta yonoxofikatsaxakī mā chakafakī yorafo ato achimanita,” ixō Pedro ato yoini.

¹⁸ (Ato askafaito kori ināitafo āa anofi chakamenō. Kori ināfiafono anā anoris xanīfofo ināita. Nā kōri xanīfofoḡe mai fiitafo. Askata Judas āa tenexemeta ifiki nexeax ronoinākaḡāita. Ronoax ariax xetaori pakei mā nafaraxikax āḡe poko napakemeita. ¹⁹ Askaito nikaitafo Jerusalén anoxō. Anoax āḡe imi fokē nā mai aneitafo “Acéldama” ixō aneitafo. Nōko mekapa nō yoitiro iskafakī: “Imi Mai” fakī.) ²⁰ Askata anā Pedro ato yoini iskafakī: “Nōko xini David a inōpokoai yoikī kirika Salmos ano keneni a Judasnoa yoikī iskafakī:

A yōra āḡe mai ano tsoa inōma,
yoikī keneni. Nāskata anā yoini iskafakī:

Feronāfake fetsa a yonomis ano ikiakēkafanō,
ixō anori yoikī noko kenexoni.

²¹ “Nāskakē iskaratīa a feronāfake fetsa nō ifinō, a nofe Judas ipaoni keskara inō. Fatora fetsa nō ifinō, a Jesús fe taefenai kafāsapaoni keskara nofe inō.

²² Nā nofe ixō ōini Juan Jesús maotisafakī faka mēra ikimanaino, nāskakē mēxotaima nofe imis, akka mā Jesús nai mēra kaito nofeta ōitakī, nāskakē nō ifinō nofeta ato yoimis inō. Nofe rafexō Jesúsnoa iskafakī yoinō: ‘Mā Jesús nayofiax mā anā otofaa,’ ixō ato yoinō,” Pedro ato fani.

²³ Ato askafaino José Barsabás fe Matías nāno inifo. Nā rafe ato ifipaikī, “¿Fato nō ifimē?” ixō shinānifo. Nā José Barsabás āḡe ane fetsa Justo. ²⁴ Askata a rafe ifipaifakakī fisti ifinifo. Nāskakē Nios kīfinifo iskafakakī: “Epa Niospa, ¿fato nō ifimē? Epa, mī nōko Ifoki. Keyokōi nōko ōiti mēra mī tāpikōiaki. Nāskakē noko tāpimafe fato mī ifiamāki nofeta mīōnoa yoimis inō. ²⁵ Judaspa Jesús ato achimaita. Nāskakē Judas naax omiskōipakenaka. Nāskakē Judaspa anā mīōxō yonotiroma nofeta. Noko tāpimafe fato a Judas ipaoni keskara itiromākī mīōxō ato yoimis inō,” ixō Nios kīfinifo.

²⁶ Nāskakata āto ane rafe tokiriki kenexō kesho mēra nanexō napakefofānaifono fisti pakeaito ōikakī nā ifinifo. Matías āḡe ane ini. Nāskakē Matías ifiafono nā feronāfake oncefo feta Jesúsnoa yoimis ini.

2

Niospa Yōshi Shara ato ōiti mēra naneni

¹ Askata judeofāḡe āto fista Pentecostés ikaino a Jesús Ifofaafo pexe fisti mēra ichanānifo. ² Anoxō nikafo nai mēranoax oa nēfefā oi itikikerani pexe mēraxō nikafo. ³ Nāskata ōiafo oa chii keskara fotopakekafāni. Oa nōko ana keskarafiax oa chii rekēfo keskara maratamefafāinafo ini. ⁴ Askaifono Niospa Yōshi Shara ato mēra nanetani. Askaino anā a meka fistichi tsoa mekanima. Meka fetsafāḡe fisti rasi mekanifo Niospa Yōshi Sharapa ato meka fetsafamano.

⁵ Nāskaifono judeofāferi Nios Ifofapaikani Jerusalén ano ipaonifo, chai inoax fekanax. Nā Jerusalén ano inifo mai fetsa fetsatapafano anoax fekanax. ⁶ Anoxō nikafo oa nēfefā oai keskara nikanifo. Askaito nikaferakani a Jesús Ifofaafo ichanāfo ano ikitoshinifo. Tāpipaikani afaa afeskaimākai ikanax. Nāskata nikafo a chai inoax feafāḡe āto mekapa mekaifāḡe nikanifo, fisti rasi āto mekapa mekaifono. “¿Afeskaxō nōko meka tāpiafomē? Nikakapo,” ato

fakī fetsanifo. Askakanax ratei fetsenifo. ⁷⁻⁸ Rateyanā yoinānifo. Iskanifo: “Na Galilea anoafāfe nōko meka nikayamafikatsaxakakī nōko meka tāpiafo nō nikai. ¿Afeskaxō tāpiafomē mai fetsanoax nō ofiafiano? ⁹ Akka nō Partia anoax oni. Fetsafori Media anoax fenifo. Fetsafori Elam anoax fenifo. Fetsafori Mesopotamia anoax fenifo. Fetsafori Judea anoax fenifo. Fetsafori Capadocia anoax fenifo. Fetsafori Ponto anoax fenifo. Fetsafori Asia anoax fenifo. ¹⁰ Askatari fetsafori Frigia anoax fenifo. Fetsafori Panfilia anoax fenifo. Fetsafori Egipto anoax fenifo. Fetsafori nā Africa fe, Cirene chaima nikakanāfo anoax fenifo. Akka fetsafori judeofo Roma anoax fenifo; ¹¹ nāfo judeokōifo ini. Akka a Roma anoax feafori judeokōifoma inifo. Nāskafikaxō mā Nios Ifofakani judeofo keskara inifo. Askatari fetsafori Creta anoaxri fenifo. Askatari fetsafori Arabia anoaxri fenifo. Nōfi mai fetsa fetsatapafo anoax nō onikī,” ikanax yoinānifo. “Nāskax nō ichanāiyoi oa chai inoax, akka nōko mekapa mekaifāfe nō nikai. Nāskaito nikai nō ratei,” ikanax yoinānifo. “Na Galilea anoafō nōko mekakōichi xafakīakōi yoikani iskakani: ‘Niospa afama mīshti tāpikōia,’ ixō noko yoikani nōko mekapa. ¹² Afeskaxō na yorafāfe nōko meka nikayamafikatsaxakakī noko yoiāifāfe nō ato nikasharakōi,” ikanax rateyanā yoinānifo: “¿Afeskai iskafofomē?” ikanax.

¹³ Askaifāfe ōikakī a yora fetsafāfe ato iskafanifo: “¿Afeskai na yorafo pāekanax nōko mekapa mekakanimē?” ixō yorafāfe ato kaxemetsama fanifo ato ōsakakī.

Pedro Niospa meka ato yoini

¹⁴ Askaifono Pedro niinākafā Jesúsxō tāpimisfo oncefo feta fāsikōi mekainākafā ato yoini: “Ēfe kaifo judeofofāfe na Jerusalén ano ikafo feta, ea nikasharakāfe. ¹⁵ ¿Afeskakī pāekanax nōko mekapa mekakanira, mā noko faimē? Nafo pāekanima. Penamakai tsoa pāeima mā rama xini keyaino. ¹⁶ Nā mā nikai anori Niospa meka yoimisto Joel kirika keneni Niospa Yōshi Sharapa shināmanaino. Nā iskanōpokoai yoikī kirika keneni iskafakī:

¹⁷ A ea Ifofaifo nā maniafo tii anoa ēfe Yōshi Shara āto ōiti mēra ē nanexii. Nāfo askayoi mā chaima nōko mai keyoaino. Afia penatari mātō fenafāfe ēfe meka yoixikani. Naetapafāfe ōiafo oa namakē ōia keskara ōixikani. Anifo tiitori eōnoa namaxikani. ¹⁸ Askata a ea yonoxomisfori feronāfakefoya kērofoya ēfe Yōshi Shara ē ato mēra nanei fatora penata ēfe Yōshi Sharaōxō eōnoa ato yoinōfo. ¹⁹ Afama mīshti tsōa ōimisma afo ē ato ispaxii nai arixō, nāmāxori ē ato afama mīshti ispaxii. Imi yafi chii āfe kōimāfāri ōixikani ē ato ōimanaino. ²⁰ Askatari xinī anā chaxaxima, fakishkōi ixii. Oxeri oa imi keskarakōi ōshikōi ixii. Askata nāfo askai fetseyoi mā chaima mātō Ifo oaino. Askata mā mātō Ifo nokokōiaino keyokōichi xafakīa ōixikani. ²¹ Mā askai fetseaino akka nōko Ifo yoikī fatorafāfe iskafāifāfe: ‘Ifo Cristo, ea shināfe, ē mefe ipaxanō,’ faifāfe ato ifixii, ixō Joel kirika keneni Niospa anori yoiaino,” ixō Pedro ato yoini.

²² Askatari Pedro anā ato yoini iskafakī: “Israelifāfe,* ea nikakāfe. Mā mā tāpia Jesús Nazarete anoa Niospa nai mēraxō nāmā nīchini, nāmāxō mato afama mīshti ōimanō afara sharafo fakī. Mato askafaino mā tāpinō Niospa Jesús nīchinikē. ²³ Nāskafikē māfi Jesús achixō yora chakafo ināyameaki achixō cruzki mastanōfo. Akka reteyoafomano Niospa mā tāpaxō Jesús nāmā nīchini: ‘Ēfe Fāke mato nāxoxii,’ ixō Niospa yoini mā tāpaxō. Nāskakōikī mātōōxō yora chakafāfe reteyameafo Niospa yoini keskafakī. ²⁴ Mā retefitafono Niospa anā Jesús otofani. Anākai omiskōinakama. Anākai nanakama. Anākai natiroma.

* **2:22** Israelifo āto ane fetsa judeofo ipaoni.

²⁵ Askatari a xanīfo David afianori yoikī kirika mēra keneni Cristoōnoa āfe meka iskafakī:

Mē tāpia ēfe Ifo Nios efe itiani. Efe ixō efeta aki kiki. Nāskaxō ea kexei tsōa ea fekaxtefanōma. ²⁶ Nāskakē ēfe ōiti mēra ē fāsi inimakōi Niospa ea kexesharaino. Nāskakē ē yoikī: ‘Nios fāsi sharakōi,’ ē fafafaīni. Ē Nios chanīmara fakōini afe ipaxakī ēfe yora ea fena faxōano. ²⁷ Ea potayamaino ēfe fero mēsho omiskōipakenakama. Ēfe yora mai mēra nēteima. Epa Niosi, mī ea noi. Ēfi mī fakekōikī, ēfe yora mī pisi famaima. ²⁸ Ē nafiakē mī ea nimapakenaka. Ē mia ari kai, mefe ikax ē inimakōixii, ixō David yoini Cristoōnoa yoikī.

²⁹ “Efe yora mīshtichi, ea nikakāfe. Nōko xini David āa yoikī kenenima. Jesúsnoa yoikī keneni. Afetīama mā David nani. Mā nō tāpia a maia ano. ³⁰ A nā askanōpokoai yoikī keneni. Niospa David yoini iskafakī: ‘Ē mia yoi na chipo kāiyai mī fena ēfe Fakekōi ixii. Mia keskara xanīfokōiri ixii. Ēfi Nioskī. Ē mato pāraima,’ ixō Niospa yoini. Niospa yoiaito nikakī David chanīmara fani, tāpini Niospa pārayamaino. ³¹ Nāskakē David tāpixō a inōpokoai Cristoōnoa yoini iskafakī:

Nafiax otōxii. Nāskax āfe fero mēsho omiskōipakenakama, āfe yorari pisinakama, ixō David keneni. ³² Nā David yoini keskakōifakī Epa Niospa mā Jesús otoakē nō ōita keyokōichi. ³³ Mā otoax mā nai mēra kaa Apa Nios ano. Iskaratīa xanīfo finakōia Apa fe. Nāskaxō Epa Niospa yoikī taefani iskafakī: ‘Ēfe Yōshi Shara ē atoki nīchixikai nāmā,’ ixō Niospa yoini. Nāskakē Niospa āfe Yōshi Shara nai mēraxō nāmā nīchia. Oa nēfefā keskara Niospa āfe Yōshi Shara nokoki nīchia. Nāskakē nō mātō meka nikayamafikatsaxakī nō meka fetsafāfe nō mekai fetsea. Mā chai inoax oxō mā noko nika, nō mātō mekapa mekai fetseaito. ³⁴⁻³⁵ Nāskakē mārī tāpikāfe, nānori David kirika kenenikī Jesúsnoa yoikī. Āa yoinima. David otoax nai mēra kanima. Nāskaxō kirika kenepakekī yoini iskafakī nōko Ifo Cristoōnoa:

Nono efe ife, efe xanīfokōi ixiki. A mia noikaspaifo ē ato mī nāmā nīchinō, ixō yoini Niospa. Nānori tāpixō David yoikī kirika keneni,” ixō Pedro yoini.

³⁶ Askata Pedro anā ato yoini: “Ēri mato anori yoikai, israelifāfe, ē mato pāraima. Mā Jesús retekī mā mastayamea. Akka Niospa yoini Jesucristo nōko Ifokōi inō,” ixō Pedro ato yoini.

³⁷ Ato askafaito nikakakī shinānifo: “¿Afeskakī Jesús askafayameafomē?” ixō shinākī ato ōitinī shināketsanifo, Jesús shinākakī. Askata Pedro yafi a Jesúsnoa yoimis fetsafori yōkanifo: “No fe yorafāfe, nō mato nikai. ¿Nō anā afeskatiromē?” ixō ato yōkanifo.

³⁸ Askafafāfe nikakī Pedro ato yoini: “Iskaratīa mātō chaka soakāfe anā anori shinākakīma. Jesús aneōxō mato maotisafanōfo, faka mēra ikimapakekī. Mato maotisafafono yorafāfe mato ōinōfo mā Jesucristo Ifofaito. Nāskaxō āfe Yōshi Shara mato mēra nīchi kikī mato fe rafekōinō. ³⁹ Jesús yoini iskafakī: ‘Fatora fetsa nōko Ifo Niospa ifixii āfe Yōshi Shara ato mēra nanexii. Mātō fakefori, mātō fenafori a chai ikafo tiiri nā fake refonoafori Niospa āfe Yōshi Shara ato mēra nanexii Niospa ato ifiano,’ ixō noko Jesús yoini.”

⁴⁰ Ato askafakī yoita anā Pedro ato yoini ato iskafakī yoianā: “Mātō chaka soakāfe. Na yora nono nāmā ikafo ichapa chakakōifo chaka shināmisfo. Askakakīma māa kexemesharakōikāfe anā askayamaxikakī. Mā askaito Jesús mato chaka soaxonō mato ifixiki mā afe ĩpaxanō,” ixō Pedro ato yoini.

⁴¹ Ato askafaito nikakakī yora rasichi chanīmara faifāfe, ato maotisafapanifo, ato faka mēra ikimapakekakī. A ato maotisafai fo tres mil yorafo ini.

Nāskax ato fe rafenifo a Jesús Ifofakakī taefanifo fe. ⁴² Nāskakē keyokōichi ato nikakōinifo a Jesúsnoa yoimifāfe ato yoiaifono. Nāskax Jesús Ifofaafō fe rafesharakōipaonifo, a rama Jesús chanīmara faifo. Askaxō pāa torekaxō ato pikīpaonifo Jesús shinā kakī, a ato nāxoyamea. Nāskakē Nios kīfitai fapaonifo pena tii ichanākaxō.

Jesús Ifofamisfo isharakōipaonifo

⁴³ Nāskaxō anoxō a Jesúsnoa yoimifāfe, nā docefāfe, afama mīshtifo apaonifo, yonaifono ato sharafata, afara fetsafori apaonifo, nāskaxō afama mīshti faifāfe ato tāpinōfo. Nāskafāifāfe ōikani keyokōi anoax yorafo ratenifo. ⁴⁴ Jesús chanīmara fakani pena tii ichanānifo. Anoax āto afama mīshti paxkanāi fetsexikakī. ⁴⁵ Āto afarafo ato minikaxō kori fixō, a afaamaisfo kori inānifo tsoa afayakēma. ⁴⁶ Nāskata pena tii Nios kīfiti pexefā mēranoax ichanākaxō Nios kīfinifo. Nāskaxō āto pexe mēraxō a Jesús ato nāxoyamea shinākakī pāa torepakexō pinifo inimakōiyanā. ⁴⁷ “Aicho, Nios fāsi sharaki,” ikanax inimai finakōinifo. Askaifāfe ōikani a Jerusalén ano ikafāfe ato yoinifo iskafakakī: “Na Jesús Ifofaafō isharakōiafo,” ixō ato yoinifo. Nāskakē pena tii a yora fetsafāferi Jesús Ifofaifono Niospa ato chaka soaxoni. Nāskax nā Jesús rama Ifofaifo fe ano fistiax ichanānifo, ato fe rafekanax.

3

Pedro feta Juan yora finimisma sharafanifo

¹ Askata a Nios kīfiti pexefā mēra Pedro fe Juan yātapake fonifo. Yātapakes anoxō yorafāfe Nios kīfifokani fopaonifo. ² Nā Nios kīfiti pexefā kāiti ano feronāfake finimisma nāskarapa kāini tsoa ini. Nā mēxotaima iyopaonifo pexe fepoti ano, nā pexe fepotini afe ane “Sharashta” fanifo. Anoxō ikiaifāfe ato kori yōkanō iyopaonifo. ³ Pedro fe Juan ikifainaifāfe ōikī a finimismato ato kori yōkani iskafakī: “Ea kori inākāfe,” ato faito, ⁴ Pedro feta Juan feesnifo. Pedro yoini iskafakī: “Noko feisfe,” fani.

⁵ Askafaito, “Ea kori inākanira,” ixō ato feisni. ⁶ Ato feisaito Pedro yoini: “Ē mia kori ināima. Ē koriyama. Ē mia kori inākima Ē mia sharafatiro. Nikafe, Ē mia yoinō. Jesucristo nā Nazarete ano ipaoni āfe sharaōnoax fininākafāfe,” fani.

⁷ Askata Pedro mētsoinīfofāni aō pōya mēste aōxori. Nāskax a finimisma fininākafani. Pedro mētsoinīfofānaino niinākafāni. Askaxō mea mā nisharakōia meeni a finimismato. Āfe taefoya āfe opoxko mā shara meeni. ⁸ Nāskax inimakōini. Askata mono mono ini. Mono mono ita Pedro fe Juan iki-fainaifono, akairi ato fe ikikaini ichotiri ichotiri ikani inimayanā. Nios kīfiti pexefā mēra ato fe ikikaini. Askata mekani: “Aicho, Niospa mā ea sharafaki,” ixō Nios sharafani. ⁹ Askaito yorafāfe a ichanāfo anoxō ōiketsanifo kafāsaito Nios yoisharayanā. ¹⁰ Askata, “Kee, ōikapo. Mā finia, na pexe kāiti āfe ane ‘Sharashta’ ano tsaotiani, a ato kori yōkamis. ¿Afeskax finiamē?” ikanax yoinānifo, rateyanā.

Nios kīfiti pexefā kene fetsa āfe ane Salomón anoxō Pedro ato yoini

¹¹ Pedro fe Juan kaino ato fe kani nā finimisma mā sharax. Nā Nios kīfiti pexefā kene fetsa mēra ikifainifo. A pexe kene āfe ane “Salomón” ini. Askaito nikakani yorafāfe ōifokani ichonifo ano ikiafono. Nāno nokotoshikata ōiafo a finimisma Pedro fe Juan niano ato fe nia ini ato mētsoax. ¹² Askaifāfe ōikī Pedro ato yoini iskafakī: “Israelifāfe, ea nikakāfe. ¿Afeskax nā finimisma sharamē ixō mā shināimē? ¿Afeskakī mā noko ōimē? Nōkai sharafama. Akka Jesúsxō nō sharafaa,” Pedro ato fani. ¹³ Askata anā Pedro ato yoini:

“Nōko xinifo Abraham, Jacobo, Isaaca atiito Nios Ifofapaonifo. Afia fistichi a yonoxomis Jesús finakōia imani. Nāskakē afama mīshti famis. Nāskafikēkai mā Jesús Ifofapaiyameama. Nāskakē xanīfo Pilato Jesús shinākī, ‘Nō reteimakai’ fafaito, ‘Maa, nō sharafaima, ato retemafe,’ ixō Pilato mā yoiyamea, Jesús retenōfo. ¹⁴ Jesús ōiti sharayaxō afaa pishta chakafamisma, akka mā noikas-payamea. Nāskakē mā Pilato yoikī: ‘A chaka kāimayamafe,’ mā fayamea. Pilato Jesús kāimapaifiaino a yora chakakōi Barrabás kāimakaspakī. Askafaito mā iskafayamea: ‘Barrabás kāimafe, Jesúsroko ato retemafe,’ mā fayamea. ¹⁵ Akka nā Jesús taefakī yora onifani, iskaratīari noko ikinā, aōnoax nō nia. Nāskafekē mā reteyamea. Mā mā retefiano Apa Niospa afianā otoyamea. Nāskaito Juan feta nō ōiyamea. Mā anā otoyamea. Iskaratīa nia. ¹⁶ Nāskakē nā finimisma Jesús chanīmara faax mā fininākafāna. Jesúsnoax mā shara. Nāskakē keyokōichi mā ōi.

¹⁷ “Nāskakē ē mato yoi, efe yora mīshtichi. Akka ēfi mē mato tāpimiskī. Akka mā tāpixoma mā Jesús reteyamea, ‘Niospa Fakemara,’ ixō. Askata māto xanīfofofāferi tāpiyameafoma. Jesús nōko Ifokōi fiano tāpixoma reteyameafo. ¹⁸ Nāskakē afetīama Niospa yoini a inōpokoai mā tāpioxō: ‘Efe Fake Cristo retexikani,’ ixō Niospa yoini. Nānori yorafāfe kirika kenenifo, Niospa ato shināmanaino. Nāskakē mā reteyameafo a Niosnoa ato yoimisfāfe nānorikōiri yoinifo. Mā askakōia. Akka Niospa mā tāpiano, mā askakōifayamea. ¹⁹ Nāskakē māto chaka xatekāfe. Mā afara chakafamiskī anā anori shināyamakāfe. Nāskakē Epa Nios fisti shinākāfe, māto chaka mato soaxonō. ²⁰ Nāskaxō nōko Ifāfe māto ōiti mato inimamasharakōinō. Nāskakē mato ano Cristo Jesús Niospa anā nīchixii, māto Ifokōi mato nīchioxii. Āfe Fake Cristo Jesús katonī mato ifimis inō. ²¹ Iskaratīa Apa fe nai mēra iyoa, oyoxoma na nāmā anofo keyokōi Niospa fena shara fayoi. Askata chipo nāmā Jesús anā fotoxii. Nānori a Niosnoa yoimisfāfe yoiyopaonifo a inōpokoai yoi kakī, Niospa ato shināmanaino. ²² Moisésri nānori yoikī kirika kenenī iskafakī afia Nios fistichi shināmanaino: ‘Nōko Ifo Niospa mato mēra fisti nīchixii mato Nios yoixomis inō, ea ani keskafakī. Nāato mato yoiai anori nikasharakōikāfe. ²³ Akka a nikakaspaifo Niospa afe yorafo mēra ato ifixiima. Ato makinoa ato potaxii anā ato fe inōfoma.’ ²⁴ Na iskaratīa nō ōiai yoikī Samuel taefakī yoini a inōpokoai yoikī. Nānori fisti a Niosnoa yoimis fetsafāferi keyokōichi yoinifo Niospa ato shināmanaino. ²⁵ Nāskax mā māto xinifāfe āto fenakōifokī mā. Nāskakē Niospa māto xinifo iskafakī yoini: ‘Māto fenafoōxō ē ato sharafai keyokōi nā maniafo tii,’ ixō Niospa Abraham yoini. ²⁶ Nāskakē Niospa āfe Fake Jesús nokoki nīchini nai mēraxō yonoxomis inō. Taefakī nokoki nīchini nōko chaka nō xatenō anā chaka shināyamaxiki a Ifo sharafaxō. Nāskax nō isharakōinō,” ixō Pedro ato yoini.

4

Pedro yafi Juan xanīfofo ano iyonifo

¹⁻² Pedro feta Juan Jesúsnoa yorafā rasi yoiaifono ōikani atoki fenifo, a ato Nios kīfixomisfo ita, a Nios kīfiti pexefā kexemisfo xanīfofo ita, saduceofo ita nāfo atoki fekanax ōitifishkinifo, Pedro feta Juan mā Jesús nafiax anā otoita ato faifono. ³ Nāskakata yātapakē ato achixō karaxa mēra ato ikimanifo. Fakishchāi ishinifo a mēra. ⁴ Ato ikimayofafomano a yora rasi ato yoiaifono nikakakī ato chanīmara fakōinifo. Afia penata cinco mil yora rasichi Jesús Ifofanifo.

⁵ Pedro fe Juan karaxa mēra ikafono, Jerusalén anoax judeofāfe xanīfofo fe a xanīfo fetsafori, askatari a Moisés yoikī kirika kenenī keskara ato

tāpimamisfori pena fetsa fakishpari ichanānifo. ⁶ Nānori a ato Nios kīfixomis xanīfo finakōia ini āfe ane Anás. Askatari a xanīfo fetsari āfe ane Caifás ini, Juanri ini, Alejandrori ini, a ato Nios yoixomisfāfe āto kaifori ato fe inifo, ano fisti ichanākani. ⁷ Nāskaxō Pedro yafi Juan kenanifo ato yōkaxikakī. Tsōaōxō a finimisma sharafafomāki tāpipai kakī Pedro yafi Juan kenanifo karaxa mēranoa. Mā feafono ato nakirafe nīchikaxō ato yōkanifo iskafakakī: “¿Tsōaōxō na finimisma mā sharafaitamē?” ato fanifo.

⁸ Ato askafaifono Pedro ato yoini iskafakī Niospa Yōshi Sharapa shināmanaino: “Efe xanīfofōfāfe, efe anifofōfāfe, ea nikakapo ē mato yoinō. ⁹ ¿Tsōaōxō nō yora sharafatiromē mā tāpipaimē? Na mā tāpipaiyai finimisma tsōaōnoax sharamākī mā noko yōkaito ē mato yoinō. Ea nikakāfe. ¹⁰ Tāpixikakī israelifāferi tāpinōfo mēstekōi ē mato yoisharanō. Ea nikakāfe. Na feronāfake keyokōichi ōiaifo Jesús Nazarete anoato mā sharafaita. Nā mā ifi cruz ikaki mastaitato mā Apa otoaitano nāato mā sharafaa,” Pedro ato fani. ¹¹ “Aōnoa yoiyokī yōra kirika keneni iskafakī Niospa shināmanaino:

Tokiri pexe famisfāfe, ‘Na tokiri chakara,’ ixō potanifo sharafiano.

Nāskakaxō chipo tāpinifo nā tokiri sharafinakōifiano.

Nāskarifikī nā Jesucristo tokiri keskarafiano mā potamis sharafinakōifiano. Mā mā potafiano Epa Niospa ifini aōnoax mā afe yorafo inō. ¹² Anā fato yora fetsakai nāmā ikama noko shara fatiro. Jesús fistichi nōko ōiti noko shara faxotiro nō afe nīpaxanō,” ixō Pedro ato yoini.

¹³ Ato askafaito nikakani a xanīfofo āa ranā yoinānifo: “¿Afeskakī iskara yoimē kirika kenekī tāpisharayamafixō? Ranotamakōi iskara noko yoi. ‘Na rafe Jesús fe ipaonifo,’ ” ikanax yoinānifo. ¹⁴ Nāskaxō ōiaifono nā finimisma mā finiax ato fefotai kafāsaito ōinifo mā sharax. Nāskakē na rafeta afaa chakafafoma ixō atoōnoa afaa yoitiro ma inifo nā finimisma mā shara ōikakī. ¹⁵ Nāskakaxō Pedro yafi Juan nīchinifo ato makinoax fotanōfo. Pedro fe Juan mā kāifainaifono, nā xanīfofo āa ranā yoinānifo iskakani: ¹⁶ “¿Na rafe nō afeska faimē? Akka keyokōi Jerusalén anoafāfe mā tāpiafo, na feronāfake rafeta finimisma sharafaito ōitaxakakī. Fato feronāfake fētsakai iskara finimisma sharafatiroma. Iskarakai nō fomātiroma. ¹⁷ Akka iskaratīa nō ato yoinō anā Jesúsnoax mekanōfoma. Nō ato yoinō iskafakī: ‘Mā anā Jesúsnoa yoiaito nō nikakī nō mato omiskōimani,’ ” ikanax āa ranā yoinānifo. ¹⁸ Askaxō ato kenanifo pexe emāitinoa. Ato kenakaxō ato yoinifo: “Anā mā Jesúsnoa afaa yoikī.”

¹⁹ Ato askafaifāfe nikakī Pedro feta Juan ato kemani iskafakakī: “¿Akka nō tsoa nikaimē? Mato nō nikasharairaka, askayamakī Nios nō nikairaka. Mā shinākāfe fato sharamākī. ²⁰ Nā nō Jesús ōifafaina keskafakī, nā noko Jesús yoiaito nō nikafafaina keskafakī nō yoipaketiro enetama,” ixō Pedro feta Juan ato yoini.

²¹ Ato askafaifono ato yoinifo iskafakakī: “Mā anā Jesúsnoa yoiaito nikaxō nō mato omiskōimani,” ato fanifo xanīfo tiito. Ato askafakaxō ato nīchinifo yora fetsafāfemāi ato ōiaifono. A xanīfo tiito ato koshapaifikakī ato koshanifoma yorafoki mesekakī. Akka a yorafāfe, “Epa Nios sharakōira,” fanifo Pedro feta Juanmāi Niosxō ato sharafaino. ²² A finimisma nāskara kāini ini mā cuarenta xinia akano Pedro feta Juan sharafanifo Niospa Yōshi Sharaōxō.

Jesús Ifofaafāfe Nios kīfinifo mitsisipakōi ixikakī

²³ Nāskata a xanīfofōfāfe ato nīchiafono Pedro fe Juan fonifo mā ichanāxō a ato fe rafeafo ato yoixikakī, a ato Nios kīfixomis xanīfofo feta anifofōfāfe ato yoiāfo keskara. ²⁴ Ato askafakī yoiāifono nikakaxō a Jesús Ifofamisfāfe Nios kīfinifo iskafakakī: “Epa Niosi, mī nōko Ifo finakōiaki. Mī keyokōi

onifani. Nai yafi mai mĩ onifani. Fākafāri mĩ onifani. Nai mēranoari mĩ onifani. Nāmānoafori mĩ onifani, fākafā mēranoafori mĩ onifani, afama mĩshtifo. ²⁵⁻²⁶ Akka nā mia yonoxomis nōko xini David mĩ Yōshi Sharapa mĩ shināmani mĩōxō ato yoini iskafakī:

¿Afeskai na yorafo Nioski ōitifishkikanimē? Keyokōichi yorafāfe āa shinākani Nios potapaikakī. Askafikaxō potatirofoma. Āto xanīfo tiitori ano fisti ichanākaxō nōko Ifo Nios noikaspaxikani potapaikakī. Askatari a Niospa noko nīchixoxiai Cristori noikaspaxikani. Aa askara shinākakī, ixō David kirika kenei mĩōxō yoikōikī.

²⁷ “Iskaratīa nāskakōi Herodes fe Poncio Pilato yorafetsafo fe ichanāitafo, israelifori ato fe ikitāfo mĩ Fake Cristo Sharafinākōia ifixō mĩ nīchifinino chakafakani. ²⁸ Nā mĩ yoiyoni keskafakī mā nāskakōi faitafo a inōpokoai mĩ yoini keskafakī. ²⁹ Epa Niosi, noko nikāfe mĩoxō noko noimati fakani kiki. Nāskakē noko mesemayamafe nō mia yonoxosharamiskī. Nāskakē atoki mesetama mĩ meka shara nō ato ranotamakōi yoinō mitsisipakōi noko imafe. ³⁰ Epa Niosi, mĩ sharaōxō a isinī ikaifo ato sharafafe, afama mĩshtifo ato ōimayanā a mia yonoxomis Jesucristo aneōxō,” ixō Epa Nios kīfinifo.

³¹ Mā askafakakī kīfikī xateafono nā ichanāfo anoax mai naya naya ini. Nāskaino Niospa Yōshi Shara āto mēra naneaino ranotamakōi Niospa meka shara yoinifo.

Nā afarafo keyokōi atonā ini

³² Jesús Ifofaafāfe nānori fistis shinānifo āto ōitinī. Nāskakanax na afarafo nōkonā fistis ixō tsōa shinānima. Askakimaroko keyokōi atonā ini. ³³ A Jesúsnoa yoimisfāfe, “Nōko Ifo Jesús noko nāxofiax mā anā otoni,” ixō ato yoinifo Niospa Yōshi Sharapa ato shināmanaino. Nāskakē keyokōi nā chanīmara faafo Epa Niospa ato shināmasharaino inimakōinifo. ³⁴⁻³⁵ A Jesús Ifofaafāfe atirito āto tarefoya āto pexefo ato minikaxō kori fikaxō nā Jesúsnoa yoimisfo ato inānifo afāferi a afaamaisfo ato inānōfo tsōa afaa yopayamanō. ³⁶ Akka José Levī āfe fena ini. Chipre anoax fakea ini. Nāskakē a Jesúsnoa yoimisfāfe āa anenifo iskafakakī: “Yora Inimamamis” fanifo. Akka āfe ane kaiyakōi Bernabé ini. ³⁷ Nā feronāfake tareya ini. Nāato āfe tare ato minixō kori fixō a Jesúsnoa ato yoimisfo ināni a afaamaisfo ato inānōfo.

5

Āfe āfi feta Ananías ato feparapaini

¹ Akka feronāfake fetsa āfe ane Ananías ini. Āfe āfinī ane Safira ini. Nāato āfe tare ato minini kori fixii. ² Nā feronāfake āfe āfi feta shinākaxō ranāri kori finifo. Ranāri a Jesúsnoa ato yoimisfo inānifo keyokōi mā noko ināfo ixō shinānōfo.

³ Nāskaito Pedro yoini iskafakī: “Ananías, ¿afeskai mĩ mēra Satanás naneamē mĩ Niospa Yōshi Shara feparapainō ranāri mā mĩ kori fifiaxō mĩ tareōxō?”

⁴ Akka, ¿taeyoi mĩ tare iyoamamē? Akka mā mĩ ato minia, akka, ¿na kori mīnāmamē? Nāskakē nā mĩ apaiyai keskafatiro. Akka atiri mekepaikī mĩ noko yoia shara ikerana. Askatamaroko mĩ noko fomāpai. Mīkai noko pārāima, akka Nios mĩ pārāpai,” ixō Pedro yoini.

⁵ Askafafāfe nikai Ananías koshikōi nani. Askaito nikakani yorafā rasi ratei fetsenifo. ⁶ Nāskakē naetapafo fēkaxō Ananías rakonifo mā nakē. Nāskafakāta maifaifokakī iyonifo.

⁷ Mā askai samarakano āfe āfiri ikitoshini, afaa tāpiamax. ⁸ Nokotoshiaito Pedro yōkani iskafakī: “Ea yoipo mā tare minixō afe tii mā kori fiamāki,” ixō Pedro yōkani. Kemani a kēroma iskafakī: “Nā noko inā tii nō mato inā,” faito,

⁹ Pedro yoikĩ is kafani: “¿Afeskakĩ mĩ fene feta mã shinãxõ nõko Ifãfe ãfe Yõshi Shara mã fe parapaimẽ? Mã mĩ fene nakẽ maifatakani a pexe kachiori fekani. Õipo, iskaratĩari mia iyoi fokani,” ixõ Pedro yoini.

¹⁰ Askafaito nikai Safira koshikõi nãtani. Pedro nia nãmã pakeni. Naetapa tiito mã fene maifatakani ikiferakakĩ õiafo mã ãfe ãfiri naa fichitoshinifo. Ari ififainifo maifaifokakĩ, fene ketaxamei. ¹¹ Askaito nikakani a Jesús ifofamisfo ratenifo. Yora fetsafori askanifo nikakani akairi ratei fetsenifo.

Iskarafokai tsõa õiyomisima inifo

¹² Tsõa atiroma keskafakĩ nã Jesúsnoa yoimisfoõxõ afama mĩshtifo fanifo yorafãfe õinõfo. Nãskakanax keyokõi ichanãnifo pexe kene ãfe ane Salomón anoax. ¹³ Atiri a Nios Ifofaaafoma a Nios Ifofaafo fe ato fe rafenifoma. Akka ato askafafiaifono yorafãfe, “Na Nios Ifofaafo isharakõiafo,” ato fanifo. ¹⁴ Ato askaifaifono yorafãfe nõko Ifo nikakõinifo, feronãfakefo feta kërõfãfe. Nãskax ichapakõi inifo. ¹⁵ Nãskakata a isinĩ ikaifo xafakĩa ato kãimanifo ãto rakatiki ato rataxõ fãi kesemẽ, “Pedro ãfe yõra ato fakish faafõfãnaino sharatirofora,” ikaxõ. ¹⁶ Nãskakata a chaima ikafori yora kaya Jerusalén ano fonifo. A isinĩ ikaifo ato efeyanã a niafaka chakata ato mẽra nanexõ ato fekaxtefaifori ato efenifo. Nãfo a Jesúsnoa ato yoimisfãfe ato sharafapanifo.

A Jesúsnoa ato yoimisfo ato omiskõimakõinifo

¹⁷ A Nios ato kĩfixomis xanĩfo fe saduceofo afe ikanax õitifishkinifo, afeskakĩ noko nikakanimamẽ ikanax. ¹⁸ Nãskakaxõ a Jesúsnoa ato yoimisfo ato achikaxõ karaxa mẽra ato ikimanifo. ¹⁹ Akka Niospa ãfe ãjiri fakishi oxõ karaxa ãfe fepoti fepexõ ato kãimani is kafakĩ ato yoianã: ²⁰ “Nonoax kãifaikaxõ a Nios kĩfiti pexefã mẽraxõ ato yoitakãfe afeskaxõ nõko Ifo Jesús ato ãkitiromãkĩ,” ato fani. ²¹ Nã ãjirinĩ ato yoiaito nikafo keskakani penakaiama Nios kĩfiti pexefã mẽra ikifainifo, anoxõ ato yoixikakĩ.

Nãskaifono a ato Nios kĩfixomis xanĩfãfe, a afe ikafoya israeli xanĩfofo ato kenani, ano fistiax ichanãi fenõfo xanĩfo finakõia anoax, anoxõ a Jesúsnoa yoimisfo ato ifitanõfo ato fe ichanãi fenõfo. ²² Mã ato nĩchiafono a ato kexemisfo fokaxõ õiafo a karaxa mẽra tsoa inima. Nãskakẽ anã ato yoifekani fenifo. ²³ Iskafakĩ ato yoinifo: “Kaxõ nõ õia karaxa fetaxõkõina nõ fichitoshia, sorarõfãfe kexekõiafono kãiti ano. Akka a mẽra ikikaixõ nõ õia ano tsoa ikama,” ato faifono, ²⁴ nikakani a Nios kĩfiti pexefã kexemisfãfe a ato xanĩfofo fe, a ato Nios kĩfixomisfo xanĩfokõifo ãa ranã yoinãnifo: “¡Aira! ¿Afeskax tsekeafomẽ?” ikanax ratenifo.

²⁵ Askaifono feronãfake fetsa atoki oxõ ato yoini is kafakĩ: “Nikakapo a mã ato karaxa mẽra ikimanita feronãfake rafeta, a Nios kĩfiti pexefã mẽraxõ mã ato yoikani,” ato faino, ²⁶ a ato kexemisfãfe ãto xanĩfo ãfe inafõ fe kani ato ifikai. Akka mã fokaxõ ato efenifo. Nãskaxõ ato afeska fanifoma yorafoki mesekakĩ tokirinĩ noko tsakatirofora ikaxõ.

²⁷ Mã fokaxõ ato iyonifo a xanĩfo finakõia ano. Nãnoxõ a ato Nios kĩfixomis xanĩfãfe ato yoini is kafakĩ: ²⁸ “Mã nõ mato yoita, ‘Anã ato Jesúsnoa yoiyamakãfe,’ nõ mato feita, akka, ¿afeskakĩ Jesúsnoa mã ato yoirifaimẽ? Jerusalén anoafõ mã ato yoiki mã mã ato tãpimakõia. Nãskaxõ mã noko pãrapai nafãfe Jesús reteitafora mã noko fapai, noko chakafapaikĩ.”

²⁹ Ato askaifaifono Pedro a afe rafeafõ feta ato kemani: “Akka nõfi Nios nikaikai. Yorafokai nõ nikapaima. ³⁰ Nõko xinifãfe ãto Niospa Jesús otoaita, mã mã retelitano ifi cruz ikaki mastaxõ. ³¹ Nãskaxõ Niospa Jesús a keskara xanĩfofinakõi imani yorafo ato ifixõ ato ãkikõipakexanõ. Nãskakẽ israelifãfe keyokõichi Nios chanĩmara fanõfo, a afara chakafamisfono ãto chaka ato

soaxonõ. ³² Chanĩma mã nõ õimis, askatari Niospa Yõshi Shara pa mã tãpia. Akka a nikaifo Niospa ãfe Yõshi Shara ato mẽra nanea,” Pedro ato fani.

³³ Ato askafaito nikakakĩ akiki õitifishkiyanã ato retepainifo. ³⁴ Akka nã xanĩfofo fe fariseo ãfe ane Gamaliel ato fe ini. Nãato a Moisés yoikĩ kirika kene ni keskara ato tãpimamis ini. Yorafãfe aõnoa yoisharakõimisfo. Nãato niinãkafã ato yoini iskafakĩ: “Xafakĩa ato kãimayokãfe,” ato fani. ³⁵ Nãskaxõ ato kãimaxõ a xanĩfo fetsafo yoini: “Efe yorafãfe israelifãfe, ea nikakapo ã mato yoinõ. Mãfi na feronãfake rafe retepaikã, ¿afeskaito mã ato retepaimẽ? Shinãsharakãfe. Ato retepaikakĩma,” ato fani. ³⁶ Nãskata anã ato yoini: “Shinãkapo, oa feronãfake Teudas xanĩfo iyoni. Xanĩfo finakõia ipaiyaito cuatro cientos yorafãfe chĩfafainifo. Akka nã mã yora fetsafãfe retenifo. Mã reteafono ãfe inafõ paxkanãi fetsenifo. Nãskakanax ariax keyonifo. ³⁷ Askatari chipo ãto anefo kenekakĩ censo akaifono, Judas fetsa. Galilea anoa ini. Xanĩfo ipaikĩ ato yoini yorafãfe chĩfafainõfo. Askafafiaino nãri retenifo. Nãskakẽ ãfe inafõri paxkanãi fetsenifo. ³⁸ Nãskakẽ ã mato yoi na feronãfake rafe ato enekãfe ato afeska fakakĩma. Akka a Niospa shinãi anori ato yoyamakakĩ, ãa ato yoikakĩ kaxpa ato yoitirofo. Nãskakanax keyotirofo. ³⁹ Akka Nios ato fe ikano mã ato afeska fatiroma. Mãroko kexemesharakãfe ato chakafayanã Niosri mã chakafatiroki,” ixõ Gamaliel ato yoiãito nikanifo.

⁴⁰ Ato askafaito nikakakĩ, a Jesúsnoa yoimisfo ato kenakaxõ ato koshakata, “Anã Jesúsxõ mã afaa yoiki,” ato fakaxõ ato nĩchinifo. ⁴¹ Nãskakẽ a Niosnoa yoimisfo xanĩfofo anoax tsekekani inimakõinifo, Niosnoaxmãi omiskõikanax Jesúsnoa meka shara ato yoikani. ⁴² Nãskakẽ pena tii nõko Ifo Cristo Jesúsnoa meka shara ato yoinifo. A Nios kĩfiti pexefã anoxõ ato yoita pexefo anoxori ato yoifõfãsafanifo.

6

Jesúsxõ tãpimisfãfe docefãfe feronãfake fetsafo siete ato ifinifo ato feta yononõfo

¹ Nãskaifono a Jesús Ifofaifo ichapakõi inifo. Akka fetsafo a griego mekapa ikaifãfe, hebreofo ato mekafakakĩ taefanifo ato iskafakakĩ: “¿Afeskakĩ nõko kaifo a fenemaisfo a piaifo mã ato inãsharaimamẽ? Akka mãto kaifo fisti mã ato inãi,” ikaxõ ato mekafanifo. ² Ato askafaifãfe nikakata a Jesúsxõ yoimisfãfe nã docefãfe a Jesús Ifofamisfo ato ichanãfakaxõ ato yoinifo iskafakakĩ: “Nõ mato Niospa meka yoikĩ nõ xatetiroma a ma piai mato paxkaxoxiki. Akka pena tii nõ mato Niospa meka yoifafãini,” ato fanifo. ³ “Efe yora mĩshtichi, feronãfakefo siete fenakãfe a mã piai mato inãsharanõfo. Mã mã tãpiakĩ fatofomãkĩ Niospa Yõshi Shara fe rafeafo. Nãfo nõ ato yonomanõ a mã piai mato inãsharanõfo. ⁴ Akka nõ pena tii Epa Nios kĩfifafãinikã, ãfe meka sharari yoianã,” ixõ ato yoinifo.

⁵ Ato askafaifono nikakani keyokõi inimanifo. Nãskakata Esteban ifinifo, nãato Nios chanĩmara fakõina ini, ãfe Yõshi Shara a mẽra naneano. Feliperi ifinifo, Prócorori ifinifo, Nicanori ifinifo, Timónri ifinifo, Parmenasri ifinifo, Nicolásri ifinifo. Nã Nicolás Antioquía anoa ini. Judeofãfe Nios Ifofaifo keskafakĩ Nicolás Nios shinãmis ini. ⁶ Ato askafakãta a ato Jesúsnoa yoimisfo ano ato iyonifo. Anoxõ ato Nios kĩfixoyanã ato mãmãnifo.

⁷ A Jesúsxõ yoimisfãfe Niospa meka ato yoiãifono atoõxõ yorafãfe chanĩmara fanifo, Jerusalén anoxõ. Askatari judeofãfe a ato Nios kĩfixomisfãferi akairi Jesús Ifofanifo. “Jesús Niospa Fakekõira,” ixõ chanĩmara fanifo.

Esteban achinifo

⁸ Esteban Jesús chanĩmara fakõina ini. Niospa ãfe kerex shara a mēra naneano akiki inimakõini. Nãskakē aõxõ afama mĩshtifofakĩ ato õimani. ⁹ Akka judeofo fetsafo nã ichanãti pexe mēranoax ichanãpaonifo. Nã ichanãti pexe anenifo: “Anã Ato Inafoma,” fakakĩ. Nãfo Cirene anoafo ikaino Alejandría anoafo ikaino Cilicia anoafo ikaino fetsafori Asia anoafori nãfo ichanãkanax Esteban fe feratenãnifo. ¹⁰ Meka finõmapaifiaifono Niospa ãfe Yõshi Sharapa Esteban ãfe õiti mēra shinãmani. Shinãsharakõita ato yoini. Ato askafaito tsõa Esteban kemanima.

¹¹ Ato askafaito nikakakĩ akiki õitifishkiyanã yora fetsafo ato kori inãnifo ato iskafayanã: “Nõ mato kori inãnõ Esteban mã pãratakãfe iskafakĩ: ‘Na Esteban Moisés yoini keskara chakafaito nõ nika, Niosri chakafayanã,’ ixõ ato yoitakãfe,” ato fanifo. ¹² Mã fokaxõ ato yoikĩ askafaifono, yorafo õitifishkikani mekai fetsenifo, a judeofãfe ãto xanĩfo fe a Moisés yoikĩ kirika keneni keskara ato tãpimamisfori askanifo. Nãskakaxõ Esteban achikaxõ xanĩfokõi ano iyonifo. ¹³ Mã iyokaxõ ãa pãranifo ãa chanĩ fetsekakĩ iskafakakĩ: “Na feronãfãke nõko Nios kĩfiti pexefã mēxotaima chakafai, askatari a Moisés yoini keskara chakafai. ¹⁴ Nãskatari, ‘Nã Jesús Nazarete anoato nã Nios kĩfiti pexefã pãoaxii kiki,’ ikaito nõ nikamis. Nãskatari, ‘A Moisés yoini keskara ã fetsafaxii,’ ikaito nõ nikamis,” fanifo ãa pãrakakĩ.

¹⁵ Askafaifono xanĩfofo feta a ano tsoafãfe õiafo Esteban ãfe femãnã nã ãjirinĩ femãnã keskarakõi õinifo.

7

Esteban ato kemasharakõini

¹ A judeofo Nios kĩfixomis xanĩfo finakõiato Esteban yõkani: “¿Chanĩmamakĩ a mĩõnoa yoiãifo keskara?”

² Askafaito nikakĩ Esteban kemani iskafakĩ: “Efe yora mĩshtichi, ea nikapapo. Nõko Nios fãsi sharakõixõ afetĩama nõko xini Abraham yoini, Mesopotamia ano iyoano, Harán mai ano kayoamano. ³ Iskafakĩ yoini: ‘Na mai anoax tsekekaini katãfe, mefe yorafoya ato õifaini. Nã mã kai ano ã mia ispaikai,’ ixõ Niospa Abraham yoini. ⁴ Nãskakē Abraham Caldea anoax tsekekaini kani, Harán ano ikikai. Mã anoax ãfe apa naano Niospa Abraham efeni na mai ano, na iskaratĩa nõ ika ano. ⁵ Akka Niospa afaa pishta inãyonima. Mairi fena inãnima. Akka iskafakĩ yoini: ‘Ë mia na mai inãxii,’ ixõ yoiyoni. ‘Akka mã mã nanino mã fenafo ã ato inãxii,’ ixõ Niospa Abraham yoiyoni ãfe ãfi feta fake akamano. ⁶ Askata Niospa anã yoini iskafakĩ: ‘Mĩ fenafo yora fetsa keskarakanax mai fetsa ano iyonõfo. Nãnoax ãto yonomati keskarakanax omiskõikõiyonõfo cuatrocientos xinia akani.’ ⁷ Nãskata anã yoini iskafakĩ: ‘Ë na yorafo omiskõimani, nã ato yonomakĩ omiskõimanaifo. Ë ato askafaino anoax mã fenafo tsekefaixikani. Mã anoax fokaxõ nã Canaán mai anoxõ ea nikasharakõixikani,’ ixõ Epa Niospa Abraham yoini. ⁸ Niospa afetĩama Abraham yoini: ‘Mĩ fake feronãfake mã foshki repa xatetiro,’ ixõ yoiyoni. Nãskakē Abraham ãfe fake Isaaca mã ocho nia ikano foshki repa xateni. Nãskarifikĩ Isaaca ãfe fake Jacobori askafani. Nãskarifikĩ Jacobo ãfe fakefo ato foshki repa xatepakeni.

⁹ “Jacobó ãfe fakefo nõko xinifo ipaonifo, nãfãfe ãto exto José õikaspaonifo. Nãskakaxõ Egipto anoax foaifono yora fetsafo ato inãnifo aõxõ kori fixikakĩ nãfãfe Egipto ari iyotanõfo. Askafaifiaifono Epa Niospa José potanima. ¹⁰ José omiskõiaito Epa Niospa ifini. Nãskaxõ shinãsharamani. Nãskakē Egipto anoxõ ato xanĩfokõichi José noisharakõini. Nãskaxõ xanĩfãfe José xanĩfo imani, Egipto anoxõ ãfe pexe anoax xanĩfokõi inõ.

11 “Nāskakē Ejipto anoafō fe Canaán anoax fonāiki finakōinifo omiskōiyanā. Nāskakē nōko xinifāfe afaa pinifoma. 12 Akka Jacobo nikani Ejipto anoa a piaifo ichapakē. Nāskakē nāri āfe fakefo nīchini a piaifo fitanōfo, nā nōko xinifo. Ari fokatsaxakakīma foitaenifo. 13 Nāskakata afianā fonifo. Mā anā foafono José āfe ochifo tāpimani. Nāskakē nā xanīfo Faraón tāpini José āfe kaifo. 14 Nāskata chipo José apa kenamani Ejipto ano onō āfe fakefo fe. Nā yorafo setenta y cinco inifo Ejipto ano ikifeaifo. 15 Nāskakē Jacobo kani Ejipto ano ikikai. Nānoax Jacobo nani, nānoaxri nōko xinifori nāpanifo. 16 Nāskakē Jacobo āfe xafo Siquem ano fonifo maifaifokakī. Nā mai nōko xini Abraham afetīama fini, feronāfake āfe ane Hamor minini. Nā mai kini mēra nōko xinifo maifanifo.

17 “Akka mā anoax chaima tsekeaifono nā Epa Niospa Abraham yoiyoni keskai, mā Ejipto anoax kaikanax fakefo ichapakōi kainifo. 18 Nāskatari Ejipto anoax nā xanīfo fetsa finakōiato José ōimisma ini. 19 Nā xanīfāfe nōko kaifofo ato pārapaoni. Nāskaxō nōko xinifo ato omiskōimapaoni. Ato pāraxō āto fakefo ato potamapaoni nā fake rama kāiyaifo nanōfo. 20 Ato askafaino nānoaxri Moisés fakeni. Akiki Epa Nios inimakōini. Nānoxō apa feta āfe afa ato pexe anoxō kexesharapaoni. Tres oxe anifo kexekakī. 21 Mā tres oxe akano apa feta āfa fētamā fevoxō faka ketokonō ratanifo. Nānoa Faraón fake xomayato fichixō ifini āfe fake keskarakōi inō. 22 Nāskakē Moisés nā Ejipto anoxō tāpiafo keskarari tāpikōini. Mā yosixō yoikī tāpisharakōia ini a xanīfāfe yoitiro keskafakī.

23 “Mā cuarenta xinia axō Moisés āfe kaifo israelifo ōikai kani. 24 Akka mā kaxō ōia Ejipto anoato āfe kaifo koshaito ōini. Askafaito ōikī timamapaikī, Moisés Ejipto anoa feronāfake koshakī reteni. 25 Askafata Moisés shināni: ‘Ēfe kaifāfe tāpikani eōxō Niospa ato ifipai,’ ixō shināni. Akka tsōa tāpinima. 26 Nāskata pena fetsa Moisés āfe kaifo ari kaxō ōia āfe kaifo raferi setenāifāfe ōitoshini. Nāskaxō ato raefapaita ato yoini iskafakī: ‘Nā yora fistifiax ¿afeskai mā setenāimē?’ 27 Ato askafaino a fētsa seteai Moiséski ōiti fishkiyanā yoini iskafakī: ‘¿Tsōa mia xanīfo imamē mī noko īkinō?’ 28 ¿Akka mī ea retepaimē nā Ejipto anoa mī retefaiyamea keskafakī?’ ixō yoini akiki ōiti fishkiyanā. 29 Askafaito nikai Moisés onekaini Madián mai ari kani. Nāri ipaoni yora fetsa keskarax. Nāriax āfiyaxō fake feronāfake rafe ani.

30 “Nārixō Moisés mā cuarenta xinia akano, tsōa istoma machi Sinai chaima akiki ājiri nokoni, oa fanafo kooai keskara mēranoax. 31 Askaito nikai Moisés rateyanā namakē ōia fani. Nāskakē akiki chaimashta kaxō ōipaikī nika a mēranoax Nios mekaito nikani iskafakī yoiaito, 32 ‘Ēfi mī xinifāfe ato Nioski. Abraham ikaino Isaaca ikaino Jacobo ikaino ēfi āto Nioskōikī,’ ixō Niospa yoiaito nikai Moisés rateyanā choani. Nāskakē anā ari naisnima. 33 Nāskaito Epa Niospa yoini iskafakī: ‘Mī zapato pekafe, nā mī nia ano sharakōikī. 34 Efe yorafo mē ōia omiskōiaifāfe Ejipto anoax. Mē ato nika tetsosikaifāfe. Nāskax ē fotoa ato ifiyoi. Nāskakē iskaratīa Ejipto ano ē mia nīchi,’ Niospa Moisés fani.

35 “Āfe kaifāfe noikaspakakī iskafafianifono: ‘¿Tsōa mia yoiamē mī nōko xanīfo inō noko īkixikī?’ ixō yoifinifono. Akka Epa Niospa xanīfo imaxō nīchini āfe kaifo ifitanō, āfe ājiriōxō. 36 Mā Moisés kaxō Ejipto anoa nōko xinifo ifini. Mā ato ifitani oxō Moisés afama mīshti fani tsōa atiroma keskara fakī. Nā mai anoxō cuarenta xinia ani. Nā ĩamāfānē āfe ane Ōshi anoax tsōa istoma ipaonifo. 37 Moisés āfe kaifo israelifo yoikī iskafani: ‘Niospa fatora fetsa ea keskara mato ano nīchixii kiki. Nikasharakāfe,’ ato fani. 38 Nā Moisés judeofo fe tsōa istoma ano ipaoni. Nānoax ājiri fe mekani machi Sinai anoax, nā ājirinī

yoia keskafakī nōko xinifo yoini. Nā Moisés a noko ĩkipakexatiro Niospa meka shara fini, nā meka sharapa noko ĩkipakexatiro ixō ato yoini.

³⁹ “Akka nōko xinifāfe nikakaspayanā chakafanifo. Nāskakanax afianā Egipto ano fepainifo. ⁴⁰ Nāskakaxō Aarón yoinifo iskafakakī: ‘Noko nios faxōfe noko ĩkinō. Fakira Moisés kaaki nō tāpiamaki, Egipto anoa noko efefiitaxakī.’ ⁴¹ Nāskafafāfe Aarón ato fakka fake keskara oro ato onifaxoni. Mā ato onifaxōano yoinā retexō ināyanā akiki inimayanā fista axonifo. ‘Aicho, nōko nios fasi sharakōi,’ fanifo āa onifakaxō. ⁴² Nāskakē Nios ato makinoax paxkani iskafakī ato yoiyanā: ‘Na fishifo nai mēranoafo nōko niosra mā fatiro,’ ato fani. Akka nā Niosnoa yoimifāfe, nānorikōi kirikaki kenenifo iskafakī:

Israelifāfe tsōa istomaxō mā mā cuarenta xinia afiaxō mākai yoinā retexō mā ea ināpaonima, ⁴³ Askatamaroko mā mā afara fetsa onifaxō, ‘Nā nōko niosra,’ ixō Moloc mā iyafofāsafamis. Askata mātō nios Refán āfe fishifori mā noimis. Na nōko niosra ixō mā afara onifanixakī, akiki mā inima kakāini. Nāskakē ē mātō na tsōa istoma anoa ē mato chai nīchi, Babilonia finōfāi,

Niospa ato fani.

⁴⁴ “Nāskakē nōko xinifāfe tsōa istomaxō nā Moisés Niospa yoini keskafākī pexe fakanax ipaonifo. Nā Niospa Moisés yoini iskafakī: ‘Karpa pexe fafe nā ē mia ōimana keskara fakī,’ ixō yoini. ⁴⁵ Nāskakē mā xini ichapa finōta nōko xinifāfe nā karpa pexe finifo. Akka mā Josué xanīfoxō ato iyoni yora fetsafo potaxō ato mai fīaifonōfo. Niospa ato axōfaino ato mai fīanifo. Mā askapakeafono Davidri chipo xanīfoni. ⁴⁶ Xanīfo Davidki Nios fāsi inimakōini. Nāskakē David Nios yoini iskafakī: ‘Epa Niosi, ē pexe efapa shara mia faxopai ano Jacobo āfe fenafo inō,’ ixō yoini. ⁴⁷ Askafakī yoifixō axonima, āfe fake Salomón Epa Nios pexe faxoni. ⁴⁸ Akka yorafāfe pexe faxōfiafono nā Nios finakōia a pexe mēra itiroma. Niospa keyokōi ĩkinā ixō a Niosnoa yoimisto kirika kenei iskafakī:

⁴⁹ “Ē nai mēra ika. Nārixō na mai anoafo ē onifani tii keyokōi ē ĩkinā. Akka, ¿afeskakī mā ea pexe faxotiomē a fisti mēra ē inō faki kafāsaxikima? ⁵⁰ Akka, ¿ē afama mīshti onifanimamē? ixō Niospa ato yoini.

⁵¹ “Akka māfi mātō xinifo keskarakī. Mā nikayospakōifo Epa Niospa meka mā nikakaspakōimis, chanīmarakai mā famisma. Niospa Yōshi Sharapa mato yoimis mā nikakōimisma. ⁵² Nāskaxō mātō xinifāfe a Niospa meka ato yoimisfo ato omiskōimapaonifo. Nāfāferi retenifo, ‘A sharafinakōia nokoki fotoxii kiki,’ ixō aōnoa yoinifo. Akka nā sharafinakōia mā nokoki oano, mā achixō ato retemayamea. ⁵³ Niospa ājirifoōxō Moisés Niospa meka shara mato yoifimisno mā nikakaspamis,” ixō Esteban ato yoini.

Esteban retenifo

⁵⁴ Esteban ato yoikī askafaito nikakani judeofāfe Esteban noikaspakani, akiki ōitifishkikī finakōinifo. ⁵⁵ Askafiaifono Esteban shināchakanima māmāi Niospa āfe Yōshi Shara āfe ōiti mēra naneano. Askata nai ari foisnīfōfākī ōia Niospa āfe shara chaxasharakōiaito ōini, Jesús Apa fe ketaxamei nikē. ⁵⁶ Nāskaxō ato yoini iskafakī: “Ĵōikapo! Mā nai fepekemea ē ōikai Jesucristo Apa ketaxamei niakī,” ixō Esteban ato yoini.

⁵⁷ Ato askafaito nikakaspakōikakī fāsikōi fiisiyanā paopomenifo. Nāskakaxō noikaspayanā akiki fareke ferakaxō, ⁵⁸ mā achikaxō pexe rasi pasotai iyokaxō nā Esteban yōaitafāfe feronāfake naetapa āfe ane Saulo rapati inānifo ato kexexonō. Nāskakaxō chipo Esteban tokirinī tsakaketsanifo.

⁵⁹ Nāskafakī tokirinī tsakaketsaifono Esteban Epa Nios kīfini iskafakī: “Ifo Jesús, ěfe fĕro mĕsho ifife,” ixō yoini. ⁶⁰ Nāskata ratokonō mai chachipakefōfā, fāsikōi fiisini. Iskafakī yoini: “Ifo, ea chakafakani kiki ato raefāfe,” ixō yoiax nani.

8

A Jesús Ifofaafo Saulo ato omiskōimani

¹ Mā Esteban reteafono Saulo inimayanā: “Mā mā akakōikī,” ato fani. Nāskata afia penata nā Jesús Ifofamisfo ato omiskōimakī finakōinifo Jerusalén anoxō. Akka Jesúsxō tāpimisfo ichonifoma, Jerusalén ano nĕtenifo. Akka nā ato omiskōimanaifo ichokanax paxkanāi fetsenifo. Ranāri Judea mai ari foaifono, ranāri Samāria ari fonifo. ² Atiri yorafāfe a Nios Ifofamisfāfe Esteban maifakani oiai finakōinifo aō noikani. ³ Akka nā Saulo Jesús Ifofamisfo ato omiskōimani pexefo tii mĕra ikikafākakāini ato achixō karaxa mĕra ato ikimaxiki, kĕrofofo feronāfakefo.

Niospa meka sharaōnoa Samāria anoa ato yoinifo

⁴ Akka nā Jerusalén anoax ichoafāfe Jesucristoōnoa meka shara ato yoifofāsafanifo nā foaifo arixō. ⁵ Felipe pexe rasi Samāria ano kani, anoxō Cristoōnoa ato yoikai. ⁶ Ato yoiaito nikakani yorafo ichanākaxō Felipe nikakōinifo. Askatari Niospa Yōshi Sharaōxō tsōa atiroma keskafakī Felipe afama mīshtifo faito ōinifo. ⁷ Askata a niafaka chakafo ato mĕra nanea ato makinoa potapakeni. Nāskakĕ niafaka chakafo ato makinoax tsekei fiisiki fetsenifo. Askatari a finimisfoma sharafata chātofori sharafani. ⁸ Askafaito ōikani a pexe rasi anoafō Felipeki inimakōinifo, ato sharafapaito ōikani.

⁹ Akka nā Samāria mai anoa feronāfake āfe ane Simón ini. Taeyoi yōfe iyopaoni, nāato Samāria anoafō ato pārapaoni: “Ē feronāfake sharafinakōiara,” ixō. ¹⁰ Keyokōichi fakefoyaxō anifofofāfe nikakōisharanifo iskafakī yoiyanā: “A nā yoimisfo a nato Niosxō afama mīshtifo fai kiki,” ixō yoinifo.

¹¹ Nāskakĕ akiki inimakakī nikakōipaonifo āfe yōfēōxomāi mā ato pārapakemiskĕ. ¹² Akka askafiaifono Felipe Nios xanīfoōnoa yafi Jesucristoōnoa meka shara ato yoiato nikakakī chanīmara fakōinifo. Nāskakĕ chanīmara faifāfe Felipe faka mĕra ato ikimapakeni maotisafakī āto chaka xatenōfo. Feronāfakefoya kĕrofoya ato faka mĕra ikimapakeni. ¹³ Askatari a Simón yōfe ifiakatsaxakī atori Jesús chanīmara faxō Ifofani. Askafaito ōikī aari Felipe maotisafani. Nāskax nā Simón Felipe afe kapaoni. Akka Felipe tsōa atiroma keskafakī Niosxō afarafō sharafaito ōikī yoini iskafakī: “Aira. ¿Afeskaxō iskafaimĕ?” ixō Simón yoini.

¹⁴ Nāskaifono a Jesús fe rafemisfāfe Jerusalén anoxō nikanifo Samāria anoxō yorafāfe Niosnoa meka shara chanīmara faifāfe. Nāskakĕ Pedro yafi Juan nīchinifo, Samāria ari fotanōfo. ¹⁵ Mā Samāria ano nokokaxō a Nios Ifofaafo ato Nios kīfixonifo Niospa Yōshi Shara ato mĕra nanenō. ¹⁶ Ato mĕra Epa Niospa Yōshi Shara naneyoamano Jesús aneōnoax maotisanifo. ¹⁷ Nāskakĕ Pedro feta Juan ato māmānifo ato Nios kīfixoyanā. Ato askafaifono Niospa Yōshi Shara ato mĕra naneni.

¹⁸ Nāskakĕ Simón ōini Niospa Yōshi Shara ato mĕra naneaito Pedro feta Juan ato Nios kīfixoyanā ato māmāifono. Ato askafaifono ōikī Simón ato kori ināpaini. ¹⁹ Ato iskafakī yoiyanā: “Earī na kerex shara inākāfe ĕri ato māmāpakenō Niospa Yōshi Shara ato mĕra nanenō,” ixō Simón ato yoini.

²⁰ Ato askafaito Pedro kemani: “A na mī koriya mī nai, akka mī shinā korioxō a Niospa noko ināpaiyai keskara nō fitiro. Maa, askarakaima. ²¹ Mīkai afaa tāpiama na nō Nios yonoxonai keskarakai mī nofeta atiroma. Mia Niospa

tāpikōia mī ōiti mēraxokai mī shināsharaima. ²² Nāskakē mī chaka xatefe a mī shināi anori anā shinākima. Nios yōkafe mī kīfaiito mia chaka soaxotiroki.

²³ Mē mia ōi mī ōitifishkiki finaito mīmāi chakakōiax,” ixō Pedro yoini.

²⁴ Askafaito nikakī Simón kemani iskafakī: “Ea Nios kīfixōfe, nā mīa yoiai keskafakī, Niospa ea omiskōimayamanō,” ixō yoini.

²⁵ Askakāta Pedro feta Juan Samāria anoafō nōko Ifo Jesúsnoa meka shara ato yoitakani Jerusalén ano anā fenifo.

Mā fekakī pexe rasi anoafō Jesúsnoa meka shara ato yoifenifo

²⁶ Nāskata Niospa āfe ājirinī Felipe yoini: “Fai fētsa kakīma, na fāi katāfe na fāi Jerusalén yafi Gaza finōfainaki tsōa istoma ari na fai kaaki,” fani.

²⁷ Askata Felipe fininākfāta kani. Fāi kai feronāfake Etiopía anoaki nokoni. Nā feronāfake xanīfori ini. Nāato kēro xanīfokōi kori kexexopaoni Etiopía ano. Nāato Jerusalén ano kaxō Epa Nios kīfitani. ²⁸ Mā āfe kaifo mēra okī āfe karo mēra tsoxō kirika anefeni, nā Isaías Niosnoa yoikī keneni. ²⁹ Nāskata Niospa Yōshi Sharapa anā yoini Felipe: “Oa karo ano katāfe,” fani. ³⁰ Mā Felipe akiki kaxō nikani nā feronāfake Etiopía anoato kirika aneaito, nā Isaías keneni. Nāskaxō yōkani: “¿Mā mī tāpiamē a mī aneai?” faito, ³¹ Etiopía anoato kemani iskafakī: “¿Afeskaxō ē tāpitiromē? ¿Tsōa ea tāpimatiromē?” fata nāskaxō nā feronāfake Felipe keneni: “Ēfe karomā naneyofe efe tsoxiki,” fani. ³² A kirika kenea anekī ōiai iska ini:

Oveja iyokaxō retetirofo keskafakī, ari iyonifo retexikakī. Ovejanā fake achikaxō āfe rani xateaifono feroitiroma keskai ari tooxinima. ³³ Rāfinī fanifo afaa chakafayamafiakē noikaspā kakī. A xanīfofo aō rafanā inifoma aō rafanā itamaroko retenifo. Akka āfe fenafāfe nikanakafoma, ixō Isaías keneni ōini.

³⁴ Nāskata nā xanīfo Etiopía anoato Felipe yōkani: “Ea yoife ē tāpinō na Niospa meka yoimisto yoini afaa ikamākī, fetsaōnoa yoikī kenenimākī askayamakī āa anoi yoimekī kenenimākī,” faito, ³⁵ Felipe yoini iskafakī: “Na mī kirika ōiai Isaías keneni a Jesucristo noko nāxoxiai yoikī keneni,” fani. Nāskafaxō Jesúsnoa meka shara yoipakeni. ³⁶ Nāskakata fāi fokani faka ano nokonifo. Nānoxō a xanīfo Etiopía anoato Felipe yoini: “Na faka ōipo. ¿Na fāka mī ea maotisafatiromamē?” fani.

³⁷ Askafaito Felipe yoini: “Mī ōiti mēraxō mī chanīmara fakōinaito ē mia atiro,” fani. Askafaito a feronāfake kemani: “Ēje, ē chanīmara fai Jesucristo Niospa Fake,” fani.

³⁸ Askafaito nikakī Felipe, “Mī karo nētefafe,” fani. Mā karo nētefakata nā rafe fotopakefōfānifo faka ano. Nānoxō Felipe a feronāfake Etiopía ano maotisafani. ³⁹ Mā faka anoax feaifono, Niospa Yōshi Sharapa Felipe iyofaino yamarisatani. Nāskakē a feronāfake Etiopía anoato Felipe anā ōinima.

⁴⁰ Nāskata Felipe mai fetsa, Azoto ano nokoni. Nānoxō kakī a pexe rasi anoafō Jesúsnoa meka shara ato yoifoikaax, Cesarea ari nokoni.

9

Saulo Jesús chanīmara fani Damasco ano kakī (Hch. 22.6-16; 26.12-18)

¹ Nāskatari nā Saulo mēxotaima ē mato reteikai ixō ato retepaipaoni a Jesús Ifofaafō. Nāskakē a ato Nios kīfixomisfo āfe xanīfo ano kani. ² Mā kaxō ato yoini iskafakī: “Ea kirika kenexokāfe ē aya katanō, ichanāti pexefō Damasco ano a Jesús chanīmara faifo ē ato achitanō, feronāfakefoya kērofoya, Jerusalén ano ato iyoxō karaxa mēra ato ikimaxiki,” ixō ato yoini. ³ Akka mā pexe rasi Damasco chaima fāi kaino, nai mēraxō a kemataima chaxatanaino,

⁴ Saulo pakeni. Pakexō nikani, iskafakī yoiaito: “Saulo, Saulo, ¿afeskakī mī ea omiskōimanimē?” faito nikakī, ⁵ Saulo kemani: “Ifo, ¿mī tsoamē?” faito kemakī iskafani: “Ēkīa Jesús, a mī ea omiskōimanai. ⁶ Fininākfā. Pexe rasi ano katāxiki. Anoxō mia yoikani kiki mī afaa afeska faimākai,” fani.

⁷ Akka a Saulo fe foaifo ratekōinifo mekaito nikakani. Akka anoa mekaito nikafikakī tsoa ōinifoma. ⁸ Nāskata Saulo fininākfani. Fininākfāta ōipaikī anā ōinima, mā fēxoa ini. Nāskakē mētsokaxō iyonifo Damasco ano. ⁹ Nā Damasco ano tres nia ini ōiaxma. Askatari afaa pinima, afaari ayanima.

¹⁰ Akka nā Damasco ano Jesús Ifofaa fisti ika ini, āfe ane Ananías. Nāato namakē ōini nōko Ifāfe yoiaito iskafakī: “Ananías,” faito, “Ēkīa, Ifo,” fani.

¹¹ Askafaito nōko Ifāfe yoini: “Na fai āfe ane ‘Mēstekōi’ ari katāfe. Mā nokoxō Judaspa pexe ano yōkafe nānoa feronāfake Tarso anoa, mī fichikai āfe ane Saulo. Nānoxō Epa Nios kīfi kiki. ¹² Anoxō mia namakē ōiafai kiki, mī mīfi mī māmāito, anā ōisharaxiki,” ixō yoiaito, ¹³ nikakī Ananías kemani: “Ifo, na feronāfakeōnoa ea yoiaifāfe mē nikamis. Nāato keyokōi Jerusalén anoafō chakafaito a mia Ifofafo. ¹⁴ Akka mā nono oa a ato Nios kīfixomis xanīfofōfāfe nīchiafono. A mia Ifofamisfo ato karaxa mēra nīchixikī mā ato ifiyoa,” faito, ¹⁵ anā nōko Ifāfe yoini iskafakī: “Mē na feronāfake katoa eōnoa meka shara ato yoinō mai fetsafo anoafōya āto xanīfofōya israelifōya ato yoinō. ¹⁶ Nāskakē ē Saulo ōimana eōnoax omiskōifinakōinō,” ixō yoini.

¹⁷ Askafaito nikafaini Ananías kani. Kaax pexe mēra ikitoshita nānoa Saulo fichitoshini. Nāskaxō āfe mīfi māmāni iskafakī yoianā: “Saulo, ēfi mefe yorakī. Nōko Ifo Jesús nā mī fāi oaito mikiki nokoitato, ea nīchia ē mia fero sharafaxonō, askatari Niospa Yōshi Shara mī mēra ē nanenō,” faino, ¹⁸ koshikōi Saulo fero mēranoax oa foe pese keskara pakeni. Nāskaxō ōisharakōitani. Nāskakē Ananías maotīsafani faka mēra ikimakī. ¹⁹ Nāskaxō mā pixō meea āfe yora sharakōi ini, anā āfe yora pachi inima. Nāskakē nā Jesús Ifofafo fe Damasco ano ato fe oxa ranāyonifo.

Damasco anoxō Saulo Niosnoa yoini

²⁰ Askata Saulo ichanāti pexe mēraxō ato yoikī taefani iskafakī: “Jesús Niospa Fakekōi,” ixō ato yoini. ²¹ Ato askafaito nikakani ratei fetsenifo. Nāskaxō yoinifo iskafakakī: “Akka, ¿nato Jerusalén anoxō a Jesús Ifofamisfo ato omiskōimamismamē? Akka, ¿naamamē? Mā nono oa nonoafō ato achiyoi, a Nios kīfixomisfāfe āto xanīfofo ato iyoxoni axiki.”

²² Akka taeyoi Saulo ratepishtakī yoiyoni. Nāskaxō feyafani fāsikōi yoikī. Nāskaxō mēstekōi ato yoini Niospa āfe Fake Jesús nokoki nīchini. Nāskakē judeofāfe Damasco anoxō tāpipaiketsanifo. “¿Fato nō chanīmara faimē?” ikaxō, “Jesucristofi Niospa Fakekōikī,” ixō ato yoiaito.

Saulo judeofoki mesei onekaini

²³ Nāskata mā oxai ichapano, judeofāfe ichanākaxō shinānifo: “¿Afeskaxō nō Saulo retetiromē?” ikaxō, ²⁴ akka Saulo tāpini yoiaifono. Pena yafi fakishchāi manaifono pexe rasi kāiti anoxō retepaikakī. ²⁵ Askaito ōikakī a Jesús Ifofamisfāfe Saulo fēta mēra nanexō kene fomākīaxō risfichi fakishi fotomanifo a tsoa niama anori. Mā fotomanafono onekaini.

Saulo Jerusalén ari kani

²⁶ Mā Saulo Jerusalén ano nokoax a Jesús Ifofamisfo fe rafepaiyaito, akka keyokōichi omisnifo tāpikaxoma koshikairoko Nios Ifofara ikaxō. ²⁷ Askaito ōikī Bernabé Saulo iyoni Jesús āfe inakōifo ari. Nāskaxō ato yoini iskafakī: “Na Saulo nōko Ifo ōia fāi kakī, nōko Ifāfe yoiaito. Nāskaxō na Saulo Damasco anoxō ato yoisharapakea, ‘Jesús Niospa Fakekōi,’ ixō ato yoia ranotamakōi,”

Bernabé ato fani. ²⁸ Nāskakē Saulo Jerusalén ano ato fe ikax, kafāsapaoni. Nōko Ifo Jesúsnoa ato yoifofāsafapaoni mesetama. ²⁹ Anoxō ato yoiaito judeofāfe griego meka tāpikaxō fochishpamanifo. Nāskakaxō afeskaxoma retepainifo. ³⁰ Askafaifono a Jesús Ifofaafāfe mā tāpikaxō Saulo iyonifo Cesarea ano. Nānoxō Tarso ano nīchinifo.

³¹ Nāskakē a Jesús Ifofaafō Judea anoax ita Galilea anoax ita Samāria anoax ita isharakōinifo anā tsōa ato omiskōimanaimano. Anoxō Nios nikasharakōinifo isharakōikaxō Niospa Yōshi Sharapa ato axosharaino. Nāskakē a Nios Ifofaafō ichapakōi inifo.

Pedro Eneas sharafani

³² Nāskakē Pedro kafāsani a Nios Ifofaafō ato ōifofāsafai. A Lida ano ikaxō Nios Ifofaafōri ato ōikai kani. ³³ Nānoa feronāfake āfe ane Eneas fichini. Rakatiani mā ocho xinia aka ini. ³⁴ Fichixō Pedro yoini iskafakī: “Eneas, Jesucristo mia sharafaaki fininākfāta mī oxati itipinīfāfe,” ixō yoiaino, Eneas koshikōi fininākfani. ³⁵ Nāskakē Lida ano ikafāfe, Sarón anoafāferi ōikakī nōko Ifo Jesús chanīmara fanifo.

Mā Dorcas naano Jesúsxō Pedro otofani

³⁶ Nāskaifono nā pexe rasi Jope ano kēro Nios Ifofaa ika ini, āfe ane Tabita. Griego mekapa Dorcas famisfo. Nā kēromā isharakōixō ato axosharakōipaoni ato afara ināsharakōikī. ³⁷ Nāato askafai, Dorcas isinī iki nani. Mā nakē chokakaxō fomākīa māpemainīfōfā pexe kene fetsa ano ratanifo. ³⁸ Akka Jope fe Lida chaima ini. Nā Lida ano Pedro ika ini. Nāno ikē nā Nios Ifofaafāfe tāpikaxō feronāfake rafe nīchinifo, iskafakī yoitanōfo: “Jope anoxō mia kenafō mī koshi kanō,” ixō yoitanōfo.

³⁹ Askafaifono Pedro ato fe kani. Mā nokoano fomākīa māpemainīfōfānifo a Dorcas raka ano. Anoax a kēro fenemaisfo oiakakī Dorcas nayoxoma ato samafaxomis ispanifo. ⁴⁰ Askafāfe ōikī Pedro ato kāimani. Ato kāimata ratokonō mai chachipakefōfā Epa Nios kīfini. Nāskata a kēro naa ōiyanā yoini iskafakī: “Tabita, fininākfāfe,” faino, nā kēromā Pedro feista nāskax tsaoinākfāni. ⁴¹ Nāskata Pedro mētsoxō fininīfōfāni. Nāskata a Jesús Ifofaafōya a kēro ifomafafo ato kenani ato ōimaxiki mā Dorcas anā otoano. ⁴² Askaito nikanifo a pexe rasi Jope anoafāfe. Nāskakē ichapakōichi nōko Ifo chanīmara fakōinifo. ⁴³ Mā askafata Pedro Jope pexe rasi ano oxaranāyoni, a Simón anoxō fichi shinā famis ano.

10

Pedro fe Cornelio

¹ Nā pexe rasi Cesarea anoa feronāfake āfe ane Cornelio ini. Sorarofāfe āto xanīfo ipaoni. Nā sorarofo, “Italianōra,” ato famisfo. ² Nā feronāfake āfe yorafo fe isharakōixō Epa Nios kīfipaonifo. Nāskatari judeofo ato axosharayanā kori ichapa ato ināpaoni. Nāskaxō Epa Nios mēxotaima kīfipaoni. ³ Nāskata pena fetsa yātapake oa namakē ōia fani, Niospa āfe ājiri xafakīakōi ōini akiki oxō iskafaito: “Cornelio,” faito. ⁴ Nāskakē Cornelio ājiris ōini. Nāskaxō rateifinakōiyanā yōkani iskafakī: “¿Afaa mī ea yoipaikī kenaimē, Ifo?” faito, ājirinī yoini: “Mī kīfīaito mā Epa Niospa mia nikakōia, a yora afaamaisfo ato axosharayanā mī ato kori ināito.” ⁵ Nāskaxō yoini: “Fatora fetsa nīchife Jope pexe rasi ano kaxō Simón ifitanōfo. Āfe ane fetsa Pedro. ⁶ Simón fetsa pexe ano oxaki nā Simón ĩamāfā ketokonō ikaki fichi koiro fai.”

⁷ Askafakī yoiax mā ājiri kaino, Cornelio a yonoxomis rafeya āfe soraro fisti kenani nā soraronō kexekōimis ini. Akka nā soraronō Nios shināmis ini. ⁸ Nā ājirinī yoia keskara mā ato yoixō Jope ari ato nīchini.

⁹ Penama xini keya mā Jope chaima faifoafono, Pedro pexe māmākīa māpeinīfofāni arixō Epa Nios kīfikakī. ¹⁰ Nāskax fonāikōikī pipaini. Akka pixikakī mā pīchaifono Pedro namakē ōia fani. ¹¹ Ōia nai fepekemeaito ōini ariax sabanā keskara petapafā nexeax nai mēranoax nāmā fotopakekafanaito. ¹² Nā sabanā petapafā mēra yoinā fetsa fetsatapafo ōini ronofoya, peyafo, afama mīshti ini. ¹³ Nāskata mekaito nikani iskafakī yoiaito: “Pedro, fininākafe. Nafo retexō pixiki,” faito nikani.

¹⁴ Askafaito nikakī Pedro kemani: “Maa, Ifo, nafo ē pimisma, Moisés noko yoini nafo nō pitiroma,” faito, ¹⁵ afianā yoiaito nikani iskafakī: “Niospa nafo shara imaki. Akka nafo chakara fayamafe,” faito nikani.

¹⁶ Yoikī tres fata nāskax nā sabanā petapafā anā nai mēra kaito ōini. ¹⁷ Nāskakē Pedro shināchakakōiyanā tāpipaini. “¿Afaa iskara Niospa ea yoipaimē na namakē ōia keskara ē ōiai?” ixō Pedro shināni. Nāskaino a Cornelio ato nīchia fokaxō, pexe fepoti anoxō ato yōkanifo: “¿Fatomē Simón pexe?” ixō ato yōkanifo. ¹⁸ Anoxō fāsikōi ato yōkanifo: “¿Fanī Simón fetsa oxamē, āfe ane fetsa Pedro?” ixō ato yōkanifo.

¹⁹ Oa namakē ōia keskara ōixō Pedro shināpaiyaino, Niospa Yōshi Sharapa yoini iskafakī: “Ōipo, feronāfake trespa mia fenai feafokī. ²⁰ Fininākafe. Nā mā fotoax ato fe kataxiki tanaimakōi, ē ato nīchia feafoki,” faino, ²¹ Pedro fotopakekafāxō a feronāfake tii ato yoini iskafakī: “¿Afaa mā akiyoamē? Ēronō a mā ea fenai,” Pedro ato fani.

²² Ato askafaino kemanifo: “Nō oa nā sorarofāfe āto xanīfo Cornelio noko nīchiano nā feronāfakefi sharakōiki. Nios nikakōimis. Judeofāfe aōnoa meka shara yoimisfo sharara famisfo, Niospa āfe ājirinī yoia mia kenanō āfe pexe ano mī kanō, nāato mia nikasharai mī yoiaito,” fanifo.

²³ Askafafāfe nikakī Pedro ato ikimani. Nāno afe oxa fistinifo, nāskata Pedro ato fe penama kani. A afe rafeafori Nios Ifofakanax Pedro fe fonifo Jope anoax.

²⁴ Mā fokanax pena fetsa Cesarea ano nokonifo, a Cornelio ato manai ano, afe yorafo feta. Āfe yamakōifori ano afe inifo ato kenamana fekanax. ²⁵ Mā Pedro pexe ano nokoano, Cornelio āfe pexe anoax kāinākafe Pedro ifikai kani. Mā kaxō a nāmā ratokonō mai chachipakefōfā: “Mī fāsi sharakōira,” fani.

²⁶ Askafaito ōikī Pedro fininīfofāni iskafakī yoiyanā: “Fininākafe. Ēri yoraki mia keskara,” fani.

²⁷ Nāskax afe mekayanā pexe mēra ikikaikī ōia yora ichapakōifo ichanā inifo. ²⁸ Anoxō Pedro yoini: “Mā mā tāpia a nōko xinifāfe noko yoini keskara a judeofoma fe nō rafetiroma. Askatari āto pexe mēra nō ikitiroma. Akka Niospa ea tāpimana ē tsoa chakafatama ē ato noisharakōinō. ²⁹ Nāskakē ea yoiāifono ē koshi oa, ē okaspama. Akka ē tāpipai afeskakī mī ea kenamāki,” faito, ³⁰ Cornelio kemani iskafakī: “Mā cuatro nia finōa, a nono xini rakato ēfe pexe anoxō foni teneyanā ē Epa Nios kīfiaino yātapake, feronāfake rapati fafekōiai safeax ekeki nokoita, ³¹ ea yoikī iskafaita: ‘Cornelio, mā Niospa nika mī kīfiāito. A mī akai keskarari mā tāpia, a afaamaisfo mī ato afara ināsharaito,’ ea faito ē ōita. ³² ‘Nāskaxō feronāfake tres pexe rasi Jope ano nīchife Simón ifitanōfo. Āfe ane fetsa Pedro. A Simón fetsa āfe pexe mēra ikaki. Nā Simón fētsa fichi koiro shinā famiski iamāfā kesemē ikaki,’ ixō ea yoita. ³³ Nāskakē feronāfake tres ē koshikōi nīchita mia ififonōfo. Akka mī nokoki osharakōiyanā mī noko inimamasharakōia. Nāskakē keyokōi mā nō ichanā Niospa noko ōiaino. Akka nō nikapai a nōko Ifāfe mia yoia keskara mī noko yoinō,” ixō Cornelio yoini.

Pedro ato yoini Cornelio pexe anoxō

³⁴ Askafaito nikakī Pedro yoini iskafakī: “Chanīma mẽ tãpikōia Niospa noko yora fetsa keskara ōima, keyokōi nã yora fisti keskara noko ōi. ³⁵ Askakimaroko nã mani fetsafãferi Nios nikakōikakī, afarafo sharakōi fakanax, Epa Niospa fake itirofo. ³⁶ Niospa israelifãfe fenafo meka sharaōnoa ato yoini, inimasharakōinōfo. Jesucristoōxō ato yoini, nã nõko Ifoōxō. ³⁷ Mã mã nikamiski a Judea mai anoax ini keskara. Taefakī Galilea anoxō ato yoikī taefani: ‘Mãto chaka xatekãfe Nios chanīmara fakãfe ã mato maotisafapanō,’ ixō Juan ato yoini. ³⁸ Akka mã mã tãpia Niospa ãfe kerex sharafoya ãfe Yōshi Shara Jesús mẽra naneni. Jesús afama mĩstiffo fapaoni, ato sharafayanã a omiskōiaifo, niafaka chakata ato omiskōimanaino. Nãskakē afama mĩstiffo fatiro Niosmã afe ikano. ³⁹ Akka nõ ōiyamea Jesús afama mĩstiffo faito judeofãfe ãto mai anoxō ata Jerusalén anoxori akaito nõ ōiyamea. Nãskafafaito reteyameafo ifi cruz ikakī mastakaxō. ⁴⁰ Akka mã retefitafono Epa Niospa tres nia oxata otofayamea. Nãskakē nokoki nokoaito nõ ōiyamea. ⁴¹ Akka atiri yorafoki nokoyameama, nokoki nokoaito nõ ōiyamea. Afetĩamamã Niospa noko katonixakī chanĩmakōi nõ mato yoi. Nõ a feta piyanã nõ afeta ayayamea mã Niospa otofayameano. ⁴² Nãato noko nĩchiyamea pexe rasi anoafõ nõ ato yoinõ iskafaki: ‘Niospa Jesús nĩchini,’ ato yoinõ fatofomãkī afe nĩpanakafo mã nafianixakakī, askatari a niafori ato yoixii. ⁴³ A Niosnoa yoimisfãfe a nã Jesús iskanōpokoai yoikī aōnoa yoionifo. Iskafakakī yoinifo: ‘Nã chanĩmara faifono aōxō Epa Niospa ato chaka soaxotiro,’ ixō yoinifo,” Pedro ato fani.

Nã judeofomafãfe Niospa Yōshi Shara finifo

⁴⁴ Pedro ato yoikī xateamano Niospa Yōshi Shara ato mẽra naneni ãfe meka shara nikaifono. ⁴⁵ Nãskakē a judeofãfe Jesús Ifofamisfãfe Pedro fe foitaxakakī ato ōinifo. Ato iskafanifo: “Aira. Ōikapo. Na nõko kaifomafo Niospa Yōshi Shara ato mẽra naneakekafana,” ikax yoinãnifo. ⁴⁶ Anoxō ato nikanifo meka fetsapa mekaifãfe iskakani a ato kaifomafo: “Nios fãsi sharakōi,” ikanax mekaifãfe ato nikanifo judeofãfe. ⁴⁷ Askafãfe Pedro ato yoini: “Akka tsōa na yorafo ato maotisano fayamakãfe noko fatirofoma. Akka Niospa Yōshi Shara mã ato mẽra nanea, nõmẽra naneni keskai.”

⁴⁸ Pedro ato yoini Jesucristo aneōxō ato maotisano fanōfo. Mã ato maotisanõ faafono, Pedro nĩchikaspanifo. “Kayamafe, nono nofe iyoxiki,” fanifo.

11

Pedro a Nios Ifofafo Jerusalén anoafõ ato yoini

¹ Nã Cesarea anoafãfe Jesús Ifofanifo judeofo yamafikaxō. Afãfe Jesús Ifofaifãfe ato nikanifo a Jesúsxō tãpimiskōifãfe. A Nios Ifofamisfo fetsafãferi nikanifo. Atiixō ato nikanifo ãto mai Judea anoxō. ² Askata Pedro Cesarea anoax kani Jerusalén ano. Anoxō a Jesús Ifofamis fetsafãfe Pedro mekafanifo a Moisés keneni tãpiafãfe: “Judeofoma fe mĩ rafeira,” ikaxō. ³ Iskafanifo: “¿Afeskai a nõko kaifoma ano mĩ kaitamẽ? Anoxō ato fe rafexō mĩ ato feta piaito nõ nikaita a Moisés yoini keskafakī nõ ato feta pitiroma,” fanifo.

⁴ Askafafãfe nikakī Pedro ato yoini a namakē ōiafaita keskara, ⁵ iskafakī: “Ë pexe rasi Jope anoxō ã Nios kĩfianã oa namakē ōia keskara ã õita. Ë õita oa sabanã keskara nexeax nai mẽranoax fotopakekafanaito a ã nia ano. ⁶ Askaito ã õia a mẽra yoinã fetsa fetsatapafõ ikita askatari a xõchixaraifoya peyafõri ã õita a mẽra kechokomekẽ. ⁷ Askata mekaito ã nikaita ea yoikī iskafaito: ‘Pedro, fininãkafãfe. Na fetsa retexō pixiki,’ ea feita. ⁸ Ea askafaito nikakī ã kemakī iskafaita: ‘Maa, Ifo. Moisés yoikī keneni keskafakī, nãto nõ pitiroma.

Nāskakē na yoināfo ē pimisma,' ē feita. ⁹ Ē askafaito afianā nai mēraxō iskafakī ea yoiaito ē nikaita: 'Niospa yoia nafo mī pitiroki. Pife, sharaki, chakafakīma,' ea faito ē nikaita. ¹⁰ Ea yoikī tres fata, afianā nai mēra kaito ē ōita. ¹¹ Askaino Cesarea anoax feronāfake tres ekeki feitafo. Ato nīchiafono ea fenai fekani. Mā fekanax pexe ano nokoitafo a ē ika ano. ¹² Nāskakē Niospa Yōshi Sharapa ea nīchita iskafakī ea yoianā: 'Shināchakakīma ato fe katāfe,' ea feita. Nāskatari a Nios Ifofaafo seis feronāfake efe foitafo. Nāskakē ato fe yora yamafax Cornelio pexe mēra nō ikitoshita. ¹³ Nānoxō noko Cornelio yoita a āfe pexe anoxō ājiri ōitaxakī iskafakī yoiaito: 'Fatora fetsa pexe rasi Jope ano nīchife Simón ifitanōfo, āfe ane fetsa Pedro. ¹⁴ Nāato mia yoi kiki afeskax Nios fe mī ipaxatiromākī, mefe yorafo fe,' ixō Niospa yoitano Cornelio ea yoita," Pedro ato fani. ¹⁵ "Ē ato yoiaino Niospa Yōshi Shara ato mēra naneita, taeyoi nō mēra naneni keskai. ¹⁶ Nāskakē ē shināfaita a nōko Ifāfe noko yoiyamea anori chanīma. 'Juan ato fāka maotisafani, akka Niospa āfe Yōshi Shara mato mēra nanei,' ixō Jesús noko yoiyamea. ¹⁷ Epa Niospa āfe Yōshi Shara ato mēra naneita a nōmēra naneni keskafakī, nōko Ifo Jesucristo nō chanīmara faito. Akka ē, 'Mī Yōshi Shara ato mēra naneyamafe,' ē Nios fatiroma," ixō Pedro ato yoini.

¹⁸ Ato askafaito nikakani a Nios Ifofamisfo Jerusalén anoax anā tooa tooxinima, Nioskiroko inimanifo. Iskafakī yoinifo: "Aicho, Nios fāsi sharakōi, nā noko ināni keskafakī, āfe Yōshi Shara ato mēra nanea, a nikakōisharakanax afe ĩpaxanōfo," ixō yoinifo.

Antioquia anoafāfe Jesús Ifofanifo

¹⁹ Mā Esteban reteitafono a Jesús Ifofamisfo ato omiskōimakī taefanifo. Ato askafaifono ranāri Fenicia ari ichonifo, ranāri Chipre ari fonifo, ranāri Antioquia ari fonifo. Nārixō judeofo Jesúsnoa meka shara ato yoinifo. Yora fetsafo ato yoinifoma, judeofos ato yoinifo. ²⁰ Ato askafaifono a Nios Ifofamisfo Chipre anoax fekāta Cirene anoaxri fenifo pexe rasi Antioquia ano. Mā fēkaxō a judeofoma nōko Ifo Jesúsnoa meka shara ato yoinifo. ²¹ Nōko Ifāfe āfe Yōshi Shara ato fe ikano, a āto xinifāfe ato yoipaonifo shināmakikāta nōko Ifo chanīmara fakōinifo.

²² Askaifono a Jesús Ifofamisfāfe Jerusalén anoxō ato nikanifo. Nāskakē Bernabé Antioquia ano nīchinifo. ²³ Mā Bernabé nokoxō ōia Niospa ato imasharakōia ōitoshini. Askafāfe ōikī Bernabé inimasharakōini. Nāskaxō ato yoisharakōini shināsharakōixō. "Isharakōixō nōko Ifo nikasharakōikāfe," ato fani. ²⁴ Akka Bernabé feronāfake sharakōi ini. Niospa Yōshi Shara āfe ōiti mēra nanea, Jesús chanīmara fakōina. Nāskakē yorafāfe aōxō nōko Ifo Jesús chanīmara fakōinifo.

²⁵ Mā askata Bernabé Tarso ano kani Saulo fenaikai. Mā fichixō Antioquia ano iyonni. ²⁶ Nārixō a Nios Ifofaafo feta xinia fisti ani, yora ichapafo ato tāpimayanā. Antioquia anoxō taefakī ato anenifo a Jesús Ifofaafo. "Cristianōra," ato fanifo.

²⁷ Askaifono a Niospa ato shināmanaino Niosnoa ato yoipaonifo nāfo Jerusalén anoax Antioquia ano fonifo. ²⁸ Mā fokaxō fishtichi niinākfāxō ato yoini āfe ane Agabo, Niospa Yōshi Sharapa shināmanaino, "Nā maitio anoax fonāiki finakōixikanira," ixō ato yoini. Akka chanīma, askakōini Claudio xanīfo ikano. ²⁹ Nāskakē a Nios Ifofaafāfe Antioquia anoxō shinānifo a Nios Ifofaa fetsafo Judea anoafō ato kori manamaxikakī, afe tii ato fomakanimākai. ³⁰ Nāskakaxō Bernabé yafi Saulo inānifo ato foxotanōfo. Nāno a Jesús Ifofamisfo Judea ano xanīfofo ikafo inifo. Nāfo ato kori inānifo ato paxkaketsaxonōfo.

12

Santiago retekāta Pedro karaxa mēra ikimanifo

¹ Nāskaino Herodes xanīfāfe a Jesús Ifofamisfo atiri ato achixō karaxa mēra ato ikimani ato omiskōimayanā. ² Nāskata Herodes ato yoini Santiago retenōfo kenopa. Nā Santiago Juan fe nanea ini. ³ Mā Herodes Santiago ato retemanano ōikani judeofo akiki inimanifo. Askafaiifāfe ōikī Herodes āfe inafō yoini Pedrori achinōfo. Nāato askafanifo fistatīa pāa faraxaxoma piyanā. ⁴ Mā Pedro achiafono Herodes Pedro karaxa mēra ikimani. Nānoxō dieciseis sorarofāfe kexenifo. Herodes shināni: “Mā fista senēano chipo ē Pedro kāimanō yorafāfe ōinōfo,” ixō shināni. ⁵ Nāskakē Pedro karaxa mēra ini, sorarofāfe kexekōiafono. Askafafiaifono a Jesús Ifofamisfāfe Epa Nios kīfixonifo Niospa kexesharakōinō.

Niospa Pedro kāimani karaxa mēranoa

⁶ Nā fakish fistichi Herodes shināni: “Ē penama Pedro kāimanikai yorafāfe ōinōfo,” ixō, akka karaxa mēranoax Pedro oxani soraro rafe fe cadenānā takai rafe metexkere ikax. Nāskaino atiri sorarofāfe karaxa fepoti anoxō kexeshinifo. ⁷ Nāskaino nōko Ifāfe āfe ājiri akiki nokorisatani. Karaxa mēra fakishfiāx penasharakōi itani. Nāskaxō ājirinī Pedro mōini ramāyanā iskafakī yoini: “Fininākafāfe kataxiki,” faino koshikōi Pedro mifi inoax cadenās mepekemetani. ⁸ Nāskafata ājirinī yoini iskafakī: “Mī rapati yafi mī sapato safefe,” faito nikakī Pedro koshi āfe rapati yafi āfe sapato safeni. Nāskaxō ājirinī anā yoini: “Mī tariri safefe efe kaxiki,” fani.

⁹ Nāskafaino Pedro ājiri aho kani. Aho kakī shināpaini: “¿Chanīmamē mā ea ājirinī kāimanamē? Akka ē namakē ōiafai keskara ē ōi,” ixō shināpaini. ¹⁰ Nāskax ājiri fe kakī a soraro kexei taea finōfaini. A fetsari kexea finōfaini. Nāskax nā fepoti firo ano nokoxō ōia, mā fepoti āakōi fepekemea ini. Nāskax ājiri fe mā tsekeano fāi kaax ājiri a makinoax yamarisatani.

¹¹ Nāskafaito ōikī Pedro tāpini. Nāskaxō shināni iskafakī: “Chanīma, mē ōi ēfe Ifāfe āfe ājiri nīchia. Herodes feta judeofāfe ea retepaiyaifono ea kāimana,” ixō shināni.

¹² Mā tāpiāx Pedro María pexe ano kani, Juan āfe afa ano. Nā Juan āfe ane fetsa Marcos ipaoni. Nā María pexe anoxō yora ichapafāfe ichanākaxō Epa Nios kīfiaifono Pedro kani. ¹³ Mā kaxō pexe fepoti anoxō ato kenaino, nā xomayato María yonoxomis āfe ane Rode, nāato kaxō ōini tsoamāki. ¹⁴ Mā Pedro āfe meka tāpikāta, inimakōiyanā pexe fepoti fēpexotama ato yoikai ichoni. “Mā Pedro oa. Na pexe fepoti ano nia,” ato fani. ¹⁵ Ato askafaito tsōa chanīmara fanima. Iskafanifo: “Mī chanī, Pedrokai oama,” faifono, “Maa, mē Pedro āfe meka nikakōia,” ato fani. Ato askafaino iskafakī yoinifo: “Aamaki, āfe ājiriki,” fanifo.

¹⁶ Askafaiifono Pedro pexe fepoti anoxō mēxotaima ato kenani. Mā fēkaxō fepoti fepekaxō Pedro fichikanax ratenifo. ¹⁷ Askafāfe ōikī Pedro āfe mēkemā meyamakāfe ato fani. Nāskaxō ato yoini afeskaxō nōko Ifāfe karaxa mēranoa kāimanamākī. Nāskata anā ato yoini iskafakī: “Santiago yafi a Nios Ifofamisfo ato yoitakāfe,” ato fani. Ato askafakī yoita pexe fetsa ari kani.

¹⁸ Akka mā penano anoa Pedro ōikanima sorarofō yoinānifo, tāpikanamax Pedro afeskamē ikanax. ¹⁹ Mā kāikaina nikaxō, Herodes ato fenamani, “Akka mā fenafikāki fichiyamaifono mā kexesharamaki,” ixō Herodes, “Nā sorarofō retekāfe,” ato fani. Ato askafata Herodes Judea anoax kani Cesarea ari ikikai.

Herodes nani

²⁰ Herodes atoki òitifishkini Tiro pexe rasi anoafu yafi Sidón pexe rasi anoafoki. Atoki òitifishkikaino Tiro anoa feta Sidón anoafāfe shinānifo Herodes yōkaifoxikakī anā atoki òitifishkiyamanō. Nāskakaxō xanīfo Blasto yoinifo: “Noko Herodes yoixōfe nō afe mekapaikai. Nokoki òitifishkiki kiki, nō afe rafepaisharaikai anā nokoki òitifishkiyamanō. Nokoki òitifishkiki afe yorafo yoitiroki a nō piai noko inānōfoma,” ixō Tiro anoafu feta Sidón anoafāfe Blasto yoiaifono. Nā yoiaifo keskafakī Blasto Herodes yoini. ²¹ Askafaito nikakī, “Pena fetsa ē ato fe mekanō,” fani. Nāskata pena fetsa mā akiki feaifono, rapati sharakōi nā xanīfāfe safemis keskara safeax tsaoti sharakōi ano tsaoni, anoxō ato yoixiki. ²² Ato yoikī askafaino fāsikōi yorafo mekainīfofānifo. Iskafakī yoinifo: “Na mekai yora mekaima, nios mekai,” fanifo. ²³ Askafaifono nōko Ifāfe āfe ājirinī Herodes isinī imani, “Ē Niosma. Nios sharakōi,” ato faimano. Nāskax Herodes nani xenafāfe xaki mēraxō piaino.

²⁴ Askano Niospa meka shara Jesúsnoa ato yoifofāsafanifo akairi Niospa meka shara nikakaxō chanīmara fanōfo. ²⁵ Nāskafaifono Bernabé feta Saulo mā yonokī mitokanax Jerusalén anoax fonifo, Antioquía ano. Juanri ato fe kani, āfe ane fetsa Marcos ini.

13

Bernabé feta Saulo Niospa meka ato yoikī taefanifo

¹ Antioquía ano Jesús Ifofamisfo inifo, a Niosnoa ato yoipaonifori ano ato fe inifo. A Jesús Ifofaax afeskax isharatirofomākī ixō ato tāpimamisfori ano ato fe inifo. Bernabé ikaino, Simón āfe ane fetsa Nā Fisora fapaonifo ikaino, Lucio a Cirene anoa ikaino, Manaén xanīfo Herodes fe yosini ikaino, nā Saulori ato fe ini. ² Akka pena fetsa foni teneyanā nōko Ifo kīfiaifono Epa Niospa Yōshi Sharapa ato yoini iskafakī: “Bernabé yafi Saulo ato paxkanāfakāfe ē ato katoaki eōxō yononōfo,” ato fani.

³ Nāskata foni teneyanā mā Epa Nios kīfikaxō Bernabé yafi Saulo ato mīfi māmākaxō Epa Nios ato kīfixoyanā, ato nīchinifo fetsafo ari fokaxō Epa Niospa meka shara ato yoitanōfo.

Bernabé fe Saulo Chipre ano fonifo

⁴ Mā Niospa Yōshi Sharapa ato nīchia fokanax Bernabé fe Saulo Seleucia ano fonifo. Nānoax kanōanāfānē nanefainifo Chipre ano fokani. Nā ĩamāfā fakafā nakirafe mai toomāfā ano fokani. ⁵ Mā fokanax pexe rasi Salamina ano nokokaxō judeofāfe āto ichanāti pexe mēraxō Niospa meka sharaōnoa ato yoikī taefanifo. Juanri ato fe kani afara fetsa ato axoxii.

⁶ Nā ĩamāfā nakirafe mai toomāfā anoa ato yoikāta, Pafos ano fonifo. Nānoa judeo yōfe fichinifo āfe ane Barjesús. Nā chanīkōi ipaoni ē Niosxō yaira iki.

⁷ Nā yōfe Barjesús xanīfo Sergio Paulo fe ipaoni. Nā xanīfāfe tāpisharakōia ini. Nāskaxō Bernabé yafi Saulo kenamani, Niospa meka shara nikapaikōiki.

⁸ Akka nā yōfemā āfe ane fetsa griego mekapa Elimas fapaonifo. Nāato āfe xanīfo yoini: “Ato nikayamafe mia pārakani kiki,” fani, ea nikanōra ixō.

⁹ Nāskakē Saulo āfe ane fetsa Pablo ini. Niospa Yōshi Shara a mēra nanekōia. Nāato aas ōini. ¹⁰ Nāskaxō yoini iskafakī: “Chanīchakapa nīafaka fake, nā sharafo mī noikaspamis. Mī chanīmis ato pārapaiyanā nōko Ifāfe mēstekōi ato yoifimisno, akka anorima mī ato yoimis. ¿Afskai mī xateimamē? ¹¹ Akka iskaratīa nōko Ifāfe mia omiskōimani. Mī anā fēro ōima, xinī chaxafiaino mī anā fena ōiyonakama,” fani.

Askafaino Elimas anā fēro òinima. Fakish mēra nia keskara ini. Askaxō ato kenani mētsoxō iyoifonōfo anā fēro òiyamaito. ¹² Nāskaito òikī xanīfāfe nōko Ifo chanīmara fani. “Aira, Jesús afama mīshti fatiro,” ixō yoinifo.

Pablo fe Bernabé Antioquía ano inifo. Nā Antioquía Pisidia mai ano ini

¹³ Pablo afe rafeafo fe Pafos anoax kanōanāfānē nanefainifo pexe rasi Perge ano fokani. Nā Perge Panfilia mai ano ini. Nānoax Juan anā ato fe kanima. Nāno nēteax anā oni, Jerusalén ano. ¹⁴ Nā Perge anoxō Antioquía finōfainifo, Antioquía anoxō shinā Pisidia chaima ini. Nāriax pena tenetitīa ichanāti pexe mēra ikifaikanax tsaonifo. ¹⁵ A Moisés Niospa meka yoikī kirikaki kenei yafi a Niospa ato shināmanaino yoipaonifo keskara anakāta, a ichanāti pexe kexemisfo xanīfofōfāfe Pablo yafi Bernabé ato yoini iskafakakī: “Nōko kaifo rafeta mā noko afara yoipaimākai noko yoikāfe, noko inimamaxikakī,” ixō ato yoinifo.

¹⁶ Ato askafaifono Pablo niinākakāfā atokiri mēshainākakāfā mekeyamakāfe ato fani. Nāskaxō ato yoini iskafakī: “Ea nikakāfe ēfe kaifo israelifāfe yora fetsafo feta mā nofeta Epa Nios kīfipaimākai ē mato yoisharanō. ¹⁷ Israelifāfe āto Niospa taefakī nōko xinifo katonni afe yora inōfo. Nāskakē Egipto anoax kainifo yora fetsafo mēra iyokanax Ejipto mai anoax. Nāskakē chipo Epa Niospa āfe kerex sharaōxō Ejipto anoa ato iyoni. ¹⁸ Nāskakē Niospa meka tsōa nikasharayamafiaifono, Niospa ato kexepaoni cuarenta xinia tsōa istoma anoxō. ¹⁹ Nāskata Niospa Canaán mai anoxō siete faxō mani fetsafo ato potani, nōko xinifo a mai ato ināxiki. ²⁰ Nāskakē cuatrocientos cincuenta xinia ayonifo. Fena Canaán mai ano fonifoma. Mā cuatrocientos cincuenta xinia finōta xanīfoya inōfo Niospa ato yoini.

“Nāskatari chipo nā Niospa meka ato yoimisri Samuel xanīfo ini. ²¹ Nāskakē, ‘Xanīfo finakōia nō fichipai noko ikinō,’ ixō yoinifo. Nāskakē Niospa Saúl cuarenta xinia imani xanīfokī. Akka nā Saúl āfe apa Cis ini, Benjamín āfe kaifo. ²² Nāskata Epa Niospa Saúl tsekani anā xanīfo iyamanō. Akka Epa Niospa David xanīfo inō imani. Nāskaxō yoini iskafakī: ‘Isaí āfe fāke David mā ea inimamakōi nā ē apaiyai keskafaki nāato akōini,’ ixō yoini. ²³ Nā David āfe fena ini Jesús. Epa Niospa nai mēraxō nāmā nīchini israelifo ato ifipakexanō nā yoiyoni keskafakī. ²⁴ Askatari Jesús oyoamano israelifo Juan Jesúsnoa meka shara ato yoini iskafakī: ‘Māto chaka xatexō Nios Ifofakāfe maotisaxakakī fetsafāfe tāpinōfo mā māto chaka mā xateano,’ ixō ato yoini. ²⁵ Askata mā Juan chaima nakī, ato yoini: ‘¿Mā shināimē ē Cristokē? Maa, ēkai aama. Akka a Cristo samama oi a nō manai nōko xanīfo ikiyoi. Akai ea keskarama. Ato afama mīshti tāpia. Atokai afaa chakafamisma,’ ixō ato yoini.

²⁶ “Ēfe kaifo mīshtichi, māfi Abraham fenafokī, ea nikakapo a ēfe kaifomafo feta ē mato yoinō. Māfi Epa Nios chanīmara fapaikai. Nā meka sharaōnoa nikakāfe Epa Niospa āfe Fake nīchiniki noko ifipakexanō. ²⁷ Nā Jerusalén ano ikafāfe āto xanīfofo feta tāpinifoma Jesús tsoamāki. A inōpokoai yoikī aōnoa kirika kenenifori tsōa tāpiyameama, pena tenetitīa ichanāti pexe mēraxō anefikakī. Nāskakaxō reteyameafo nā aōnoa yoikī kenenifo keskakōifakī. ²⁸ Afaa chakafaito òiyamafikakī retapaikakī. ‘Ato retemafo,’ yorafāfe Pilato fanifo. ²⁹ Nāskakē nā aōnoa yoikī kirika kenenifo keskakōifakī, mā askafayameafo retekaxō ifi cruz ikakinoa fotomapakefōfākaxō mafa kini mēra maifanifo. ³⁰ Akka mā mafa kini mēra maifafiafono Epa Niospa otoyamea. ³¹ Mā oxa ranāta a Galilea anoax Jerusalén ano afe foitafāfe atoki nokoaito òiyameafo. Nāfāfe judeofo Jesúsnoa ato yoikani.

³²⁻³³ “Nāskakē na meka shara aōnoa nō mato yoi, Epa Niospa nōko xinifo yoini keskakakī. Mā noko askafaxokōia nō āto fenafokē. Nāskakē Epa Niospa mā retelitafono Jesús otoayamea. A kirika Salmo ano kenea isikai:

Mī ēfe Fake. Iskaratīa ē mia nima,
ixō kenenifo. ³⁴ Niospa afetīama yoiyoni iskakakī:

Mī nafiano ē mia ofofaxii mī yora pisiyamanō,
ixō yoinino, nānorikōi aōnoa kirika kenenifo:

Chanīma, nā ē David yoini keskakakī ē mia sharafai,
ixō Niospa yoini. ³⁵ Nāskakē ana aōnoa yoikī yōra keneni iskakakī:

Epa Niosi, mī Fake mī kexesharai āfe yora pisinōma,
ixō keneni. ³⁶ Chanīma, David nayoxoma ato īkiyopaoni, Niospa yoiaino. Nāskax chipo nani āfe xinifo nāpa keskai, nā āfe xinifo mai anori David maifanifo. Anoax āfe yora pisini. ³⁷ Akka Jesús mā nafiakē Epa Niospa otoani. Ato āfe yora pisinima. ³⁸⁻³⁹ Efe yora mīshtichi, mā nō mato yoimis māri tāpisharakāfe, māto chaka mā soapaimāakai Jesúsxō mā atiro. Mā chanīmara faito aōxō Epa Niospa mato chaka soaxotiro. Akka a Moisés noko yoinioxōkai nōko chaka nō soatiroma. ⁴⁰ Kexemesharakāfe a inōpokoai yoikī Niospa meka yoimisfāfe kenenifo keskai mā askatiroki. Iskakakī yoinifo:

⁴¹ Akka ē yoiaino mā ea nikakaspai, ekeki kaxemetsamayanā. Nāskakē ē afarafo akaito oīax rateyanā mā nai iskarafō nō oīmisma ikax. Nāskakē mā chanīmara famisma, fetsafāfe mato yoifiaifono,
ixō kenenifo,” ixō Pablo ato yoini.

⁴² Mā Pablo afe rafeafo fe judeofāfe āto ichanāti pexe mēranoax tsekefainai-fono, nā judeofofāfema ato iskakafanifo: “Mā noko yoia keskakakī pena teneti fetsatīa noko anā yoifaixakāfe,” ixō ato yoinifo. ⁴³ Mā ichanāti pexe anoax ichanāi xateafono, judeofo feta yora fetsafāfe a Epa Nios Ifofaafo keskakakī akairi Epa Nios Ifofapaikani ato fe fonifo, Pablo fe Bernabé foaifono. ato fe foaifono ato iskakafanifo: “Nofe yora mīshtichi, Niospa mato yoiaino anori tāpisharakāfe. Niospa mato afara sharafaxōfai keskara shinākāfe inimayanā,” ato fanifo.

⁴⁴ Nāskata afianā pena fetsa pena tenetitīa, pexe rasi anoax yora ichapakōifo ichanānifo nōko Ifāfe āfe meka shara nikakani. ⁴⁵ Nāskaifono judeofāfe ato oīnifo yōrafā rasichi Pablo yafi Bernabé ato nikaifono. Nāskakē oītifishkikōinifo. Nāskaifono judeofo Pabloki oītifishkiyanā mekakakī chakafayanā ichanifo. ⁴⁶ Ato askafaifono Pablo feta Bernabé mesetama ato kemanifo ato iskakakakī: “Nō mato Niospa meka sharaōnoa yoikī taefafiaino, mā nikakaspamis. Nikakaspaxkai mā Epa Nios fe īpanakama. Nāskakē nā judeofoma nō ato yoikai. ⁴⁷ Nāskakē nōko Ifāfe noko nīchini iskakakī yoianā:

Ē mato nīchi oa luzpa keyokōi chaxa keskara faxō, eōnoa mā ato yoifotanō, efe īpaxanōfo. Maifo tii anoax na chai ikafo ari kaxō mā ato yoitanō,”

ixō noko nīchini.

⁴⁸ Ato askafaifono nikakani, a judeofoma inimakōinifo. Nāskaxō yoinifo iskakakakī: “Nōko Ifāfe āfe meka sharakōi,” fanifo. Nāfāfe chanīmara fakōinifo a Niospa ato katoafo afe ipanakafora ikaxō. ⁴⁹ Nāskakē nā mai anoaxo, nōko Ifāfe āfe meka sharaōnoa ato yoifofāsafanifo. ⁵⁰ Ato askafaifono judeofo nā kērofo isharakōimisfo fe mekanifo, a pexe rasi anoax xanīfofo feri inifo. Nāskakaxō ato yoinifo Pablo yafi Bernabé ato chakafakī ato omiskōimata a mai anoaxō ato potanōfo. ⁵¹ Ato askafaifono Pablo feta Bernabé āto sapato tsekakaxō taatakanifo yorafāfe ato tāpinōfo. Nāskanax Pablo fe Bernabé Iconio ari fonifo. ⁵² Akka nā Nios Ifofaafo inimakōinifo, Epa Niospa Yōshi Shara ato fe ikano, mā Pablo fe Bernabé foaifono.

14

Pablo fe Bernabé Iconio ano inifo

¹ Mā fokanax Pablo fe Bernabé Iconio ano nokonifo. Nānoax judeofāfe ichanāti pexe mēra ikifainifo. Nānoxō Niospa meka sharaōnoa ato yoiaifono ato nikakōisharayanā ato chanīmara fanifo, judeofāfe yora fetsafo feta. ² Askaifono judeofāfe ato nikakaspakakī, a judeofoma ato yoinifo iskafakakī: “Ato nikayamakāfe āa chanīkani kiki,” ato fanifo Pablo yafi Bernabé nikanōfoma. ³ Ato askafafiaifono Pablo fe Bernabé nāno ato fe iyopaonifo. Nānoxō nōko Ifoōxō mesetamakōi ato yoipaonifo. “Nōko Ifāfe noko chaka soaxotiro Nios fe nō ĩpaxanō,” ixō ato yoinifo. Nāskaxō afama mīshtifo fakakī ato ispanifo. Askafaifono Niospa ato noikī ato ōimani aōxō ato yoinōfo. ⁴ Akka yorafāfe pexe rasi Iconio anoxō anoris shinānifoma. Ranārito judeofo chanīmara faifono, ranāritori Pablo yafi Bernabé chanīmara fanifo.

⁵ Nāskaifono judeofo yora fetsafo fe xanīfofo fe yoinānifo, Pablo yafi Bernabé ato tokirinī tsakakī omiskōimaxikakī. ⁶⁻⁷ Ato askafapaiyaifono Pablo feta Bernabé mā tāpikanax Iconio anoax Listra ano fonifo, nānoax Derbe ano fonifo. Nā pexe rasi Listra fe Derbe Licaonia mai ano ini. Nāskakē nānoafo Niospa meka sharaōnoa ato yoifofāsafanifo.

Listra anoxō tokirinī Pablo tsakaketsanifo

⁸ Listra ano feronāfake finimisma ika ini, kafāsamisma chatomāiax. Nāskarapa kāini tsaoya ini. ⁹ Pablo yoiaito nikai. Nāskaito Pablo aas ōikī shināni na feronāfake Jesús sharafatiroraka chanīmara faito ixō shināni. ¹⁰ Nāskaxō fāsikōi yoini iskafakī: “Fininākafāfe,” faino, koshikōi fininākafānax kafāsani. ¹¹ Pablo askafaito ōikani, yorafo Licaonia meka mekanifo iskakani: “Aicho, na nios rafe nokoki fotoaki yora keskarakanax,” ikanax yoinānifo.

¹² Nāskakaxō Bernabé na nōko nios Zeus fakaxō, Pablori ato yoiaito, “Na nōko nioskōi Hermes,” fanifo. ¹³ Zeus kīfiti pexeya ini pexe rasi chaima, pexe efapa ini. Nā mēraxō na nōko niosra ikaxō Nioskōima kīfipaonifo. Nā pexe mēra yonomisto Pablo yafi Bernabé shināmaxō fakkafoya charofo fexonifo. Nāfāfe yorafo feta mā niosra ixō ato fakka retexopainifo ato ināxikakī.

¹⁴ Akka ato askafaifono Bernabé feta Pablo mā tāpikaxō, āto rapati faxtenifo, ato niosra faifono āto ōiti mēraxō shinākōikaki. Nāskakaxō ato mēra ikifaikata fāsikōi ato yoinifo ¹⁵ iskafakakī: “¿Afeskafakī mā noko na rafe niosra mā noko faimē? Nōkai niosma. Nōri mato keskara, nō mato meka shara yoiyoi oa na afarafo nōko niosra mā famis a chakafo mā potanō a chakafokai afama. Nāskaxō nā Nioskōi nīpanaka Ifokōi fakāfe, nai yafi mai fakafāri onifaniki. Nai mēranoafo onifata, nono mai anoafo onifata fakafāri mēranoafo onifani. ¹⁶ Nā iyopaonifāfe afara chakafakī xateafomano Epa Niospa ato xatemanima āa anōfo. ¹⁷ Nāskafiaifono Niosxō afarafo sharafakakī ato ōimanifo, tāpinōfo Nios tsoamāki. Akka nāato mato oi imaxona, mato fanafori mato fofaimasharaxona, a mā piari mato ināsharataifa, mā ini-masharakōinō,” Pablo feta Bernabé ato fani.

¹⁸ Ato askafakī yoifikakī ato xatematiroma inifo, ato fakka retexopaiyaifono nōko niosra ixō ato ināpaikakī.

¹⁹ Ato askafaifono judeofo Antioquía anoax fekāta Iconio anoax fenifo. Ato pārari fekani, “Pablo feta Bernabé mato pārakani,” ixō ato yoinifo. Ato askafaifono Pablo tokirinī tsakaketsanifo. Mā nō reteara ikaxō xarafokaxō pexe rasi pasotai potanifo. ²⁰ Askafaifono a Jesús Ifofafo a mǎnāo niakekaxō ōiaifono Pablo fininākafani. Askata finikaini pexe rasi mēra anā kani. Nāskata nānoax pena fetsa Bernabé fe Derbe ano kani.

²¹ Derbe anoxō Niospa meka sharaōnoa ato yoiiafono yōrafā rasichi ato nikakaxō Nios Ifofasharakōinifo. Mā ato yoikanax Listra ano fenifo, nānoax Iconio ano fenifo, nānoax Antioquía ano nokonifo. ²² Nāriafo a Nios Ifofaafo ato yoifofāsafakakī ato inimamakōinifo, “Isharakōikāfe Nios nikakōisharayanā. Epa Nios xanīfo fe ipaxakakī, nai mēra oyoamano nono mai anoax mā omiskōi finakōitiro,” ixō ato yoinifo. ²³ Nāskatari Pablo feta Bernabé a Nios Ifofaafo anoafō a ato kexeaifo xanīfofo katonifo, Nios chanīmara fakōinafono. Mā foni teneyanā Epa Nios kīfikaxō iskafakakī: “Epa Niospa, ato kexesharafe mia chanīmara fakani kiki,” ixō yoinifo.

Pablo fe Bernabé anā Antioquía ano fenifo nā Antioquía Siria mai ano ini

²⁴ Mā anoax fokakī Pisidia finōfāikanax Panfilia ano nokonifo. ²⁵ Nāskakata Perge anoxō Niospa meka sharaōnoa ato yoikata, Atalia ano fonifo. ²⁶ Nānoax kanōanāfānē fonifo Antioquía ano anā fokani. Nā Antioquía anoxō ato nīchinifo. “Niosnoax fokaxō ato yoisharatakāfe,” ixō ato nīchiyameafono ato yoitakani anā fenifo. ²⁷ Mā Antioquía ano nokoafono a Jesús Ifofamisfo ato fe ichanāfono anoxō ato yoinifo a Niospa ato feta afama mīshti aka keskara. Iskafakī ato yoinifo: “Nōko Ifāfe a judeofoma ato chanīmara famaino mā Ifofaafo,” ixō ato yoinifo. ²⁸ Nāskakanax Pablo fe Bernabé nā Nios Ifofaafo fe nāno ato fe iyopaonifo.

15

Jerusalén anoax a Jesús Ifofaafo ichanānifo

¹ Nāskaifono feronāfakefo Judea anoax Antioquía ano fonifo. Mā nokokaxō a Jesús Ifofamisfo ato yoinifo iskafakakī: “Moisés noko yoini iskafakī: ‘Foshki repa xateyamax nō Nios ano katiroma,’ ixō noko yoini. Nāskakē nā Moisés noko yoini keskai nō askamis,” ixō ato yoinifo. ² Ato askafaifāfe nikakī Pablo feta Bernabé, “Maa, askarakaima. Fanīrira mā yoi,” ato fakanax ato fe feratenānifo. Ato askafaifono Pablo yafi Bernabé a Jesús Ifofamisfo fetsafori ato katokaxō Jerusalén ari ato nīchinifo a Jesúsxō āfe meka ato yoimisfoya a Nios Ifofaafo ato kexemisfo ato yōkatanōfo chanīmamakī.

³ Nā Nios Ifofaafāfe Antioquía anoxō ato nīchiafo fokakī, Finicia yafi Samāria finōfāikakī ato yoifainifo: “A judeofofāfema Nios Ifofakakī mā āto chaka xateafora,” ixō ato yoiiafono nikakani a Nios Ifofaafo inimakōinifo.

⁴ Mā Pablo fe Bernabé Jerusalén ano nokoafono, a Jesús Ifofaafo feta a Jesúsxō āfe meka yoimisfo feta a ato kexemisfofāferi ato ifnifo, ato iskafayanā: “Aicho, mā nokoki osharakī,” ixō ato yoiyanā. Ato askafaifono anoxō ato yoinifo a Niosxō afama mīshtifofamisfo. ⁵ Ato askafaifono nikaxō fariseofāfe Jesús Ifofakaxō ato iskafanifo: “Judeo yamafikaxō Nios Ifofakaxō āto foshki repa xatetirofo Moisés yoini keskafakī,” ixō ato yoinifo.

⁶ Nāskaifono a Jesúsxō āfe meka ato yoimisfo fe ato kexemisfo fe ichanānifo tāpixikakī a yoiiafo keskara. ⁷ Mā ichapa yoināfono Pedro fininākfā ato yoini iskafakī: “Efe yora mīshtichi, mā mā ea tāpia afetīama Niospa ea katoni, mato mēranoa āfe meka shara a judeofoma ē ato yoinō, akairi chanīmara fakanax afe ipaxanōfo. ⁸ Niospa a shināifo keskara tāpikōia. Nāato ato tāpimani afe yora inōfo. Nāskaxō āfe Yōshi Shara ato mēra nanei, a nōmēra naneni keskafakī. Nāskakē keyokōichi tāpitirofo Niospa ato ifiaito. ⁹ Niospa atoya yora fetsa keskara noko ōima, nā yora fisti keskara noko ōi. Nā noko ani keskafakī āto chakari mā ato soaxona chanīmara faifono. ¹⁰ Akka mātō xinifāfe a Moisés yoini keskara nikakōipaonifoma. Nāskarifiakī māri mā nikakōimisma. Akka a Moisés yoini keskara nikakōiyamafikatsaxakī, ¿afeskakī a judeofoma Jesús Ifofafiafono a Moisés yoini keskara nikakōikāfe mā ato famismē? Nāskakē

afãferi nikakõitirofoma. Akka Jesús fistichi noko nimafitirono, ¿afeskakĩ mã chanĩmara faimamẽ? ¹¹ Akka Moisés yoini keskarato noko nimatirora ixõ mã shinãmis. Akka nõko Ifo Jesús nõ chanĩmara faito, noko noikõixõ noko ifitiro afe nõ Ìpaxanõ. Nãskarifiakĩ a judeofoma ato ifitiro chanĩmara faifono,” ixõ Pedro ato yoini.

¹² Nãskakẽ anã tsoa tooxinima, ato nikakani. Akka Pablo feta Bernabé ato yoinifo a Niospa atoõxõ afama mĩshtifo faa, judeofoma mẽraxõ. ¹³ Mã yoikĩ xateafono, Santiagori ato yoini iskafakĩ: “Efe yora mĩshtichi, eari nikakapo ẽ mato yoinõ. ¹⁴ Simón Pedro noko yoiyamea Epa Niospa a judeofoma ato noikĩ mã ato katoa ãfe yorafo inõfo ixõ noko yoiyamea. ¹⁵ Nãnorikõĩ a inõpokoai yoikakĩ a Niosnoa yoimisfãfe kenenifo. Iskafakĩ yoinifo na kirika keneano:

¹⁶ Nãskata ẽ anã oxii a David ãfe kaifãfe ea anã shinãtama chaka shinãifono, ato chaka soaxoxiki. Ato õiti fepeaxosharayanã isharakõinõfo ea anã Ifofakanax. ¹⁷ Ea õikakĩ fetsafãferi ea fenanõfo nã maitio ikafo feta nã ẽ ato katoafãfe ixõ Epa Niospa yoini. ¹⁸ Nõko Ifãfe afetĩama afama mĩshti tãpiyoni, ixõ aõnoa yoikĩ kenenifo.

¹⁹ “Nãskakẽ ẽ shinãkĩ iskafai, nõko kaifãfema Nios Ifofapaiyaifono nõ ato afara fetsa kerexkai amatiroma. ²⁰ Askatamaroko nõ ato kirika kenexõ fomanõ iskafaki yoikĩ:

Na nõko niosra ikaxõ afara onifakaxõ nami inãfo piyamakãfe. Askatari mãto ãfima chotayamakãfe. Kẽromãri ãto fenemafo chotamayamanõfo. Askatari yoinã yafi afara inafakaxõ tetoxakafo ãfe imi foyamaito piyamakãfe, ãfe imiri ayayamakãfe, ixõ nõ ato kirika kenexõ fomanõ judeofoma. ²¹ Nã taeyoi ato yoipaonifo keskafakĩ, iskaratĩari pexefo anoxõ a Moisés ato yoipaoni keskafakĩ ato yoikani. Mẽxotaima ichanãti pexe mẽraxõ pena tenetĩtia nã kirika anemisfo.”

A judeofoma ato kirika kenexõ fomanifo

²² Nãskakata a Jesúsxõ ato yoimisfãfe a ato kexemisfãferi a Nios Ifofaafãferi shinãnifo a Nios Ifofaa fetsafo katoxikakĩ, Antioquía ano ato nĩchixikakĩ Pablo fe Bernabé foaifono. Judas yafi Silas ifinifo, nã Judaspa ãfe ane fetsa Barsabás ipaoni. Na feronãfake rafe isharakõiafo a Nios Ifofaafãfe ato fapaonifo. ²³ Nãskakaxõ mã foaifono ato kirika keneni inãnifo ato foxotanõfo, iskafakĩ ato yoikaxõ:

Nõfi Jesúsxõ ãfe meka yoikatsaxakĩ, ato kexemisfo feta a Jesús Ifofaafõ nõ mato kirika kenexõ fomai, mã tãpinõ. Efe yora mĩshtichi, mã nõko kaifoyamafekẽ nõ mato meka shara fomai, Antioquía anoa fomata Siria anoa fomata Cilicia anoa fomata nõ mato fai. ²⁴ Mã nõ tãpia yora fetsafo nonoax foitafo nõ ato nĩchiyamafiano, mã foitaxakakĩ mato yoikakĩ ãto mekapa mato fekaxtefakani, fanĩrira mato yoikakĩ nõ ato anori yoiyamafekẽ fanĩrira mato yoiaifono mã ato tãpipai. ²⁵ Nãskakẽ ichanãxõ nõ shinã feronãfake fetsafo katoxiki noko anoax fokaxõ mato õitanõfo. A nõ ato noiai Bernabé yafi Pablo nõ katoa. ²⁶ Nã Bernabé feta Pablo nõko Ifo Jesucristoõnoa ato yoipaifiaifono ato retepaimisfo ato nikakaspakakĩ. ²⁷ Nãskakẽ Judas yafi Silas nõ nĩchia mã fokaxõ mato yoisharakõinõfo nã nõ mato kenexona keskafakĩ. ²⁸ Nã Niospa Yõshi Sharapa shinãĩ keskafakĩ nãnorikõĩ nõ shinãĩ. Afaa fetsa nõ mato yoipaima. Akka nã sharafinakõia nõ mato yoipai mã nikanõ: ²⁹ Na nõko niosra ikaxõ afara onifakaxõ yoinã retexõ inãfo piyamakãfe. Askatari ãfe imi ayayamakãfe. Yoinã ina fakaxõ tetoxakafo ãfe imi foyamaito piyamakãfe. Askatari mãto ãfima chotayamakãfe, kẽrofãferi ãto fenema chotamayamanõfo. Akka nã nõ mato

yoiai anori mā nikasharakōiax, mā isharakōikai. Nā tii nō mato yoi na kirikaki kenexō, ixō ato yoinifo.

³⁰ Nāskakaxō Jerusalén anoxō ato nīchiafono Antioquía ano fonifo. Mā fokaxō a Nios Ifofaafo ato ichanāfakaxō kirika kenea ato inānifo. ³¹ A Nios Ifofaafāfe kirika anexō ōikani, inimaifinakōinifo, “Aicho, noko kirika kenexō manamakakī noko inimamasharakōikani,” ikanax. ³² Judas yafi Silas Niospa ato shināmanaino Niospa meka tāpikaxō Niosnoa meka shara ato yoikakī ato inimakōiyanā ato nikamasharakōinifo āto mekapa a Nios Ifofaafo. ³³ Nā Antioquía ano ato fe iyopaonifo. Nāno ato fe ikafono nā Nios Ifofaafāfe ato nīchinifo iskafakī ato yoiyanā: “Tanaima fosharatakāfe,” ato faifono, tanaimakōi fosharakōinifo a anoxō ato nīchiameafo ano. ³⁴ Akka Silas anā Jerusalén ano kanima nāno ato fe nēteni. Judas fisti kani. ³⁵ Akka Pablo fe Bernabéri fonifoma, Antioquía ano nētenifo anoxō fetsafo feta nōko Ifoōnoa meka shara yoixikakī.

Pablo afianā kani Jesúsnoa meka shara pexefo tii ari ato yoikai

³⁶ Mā askakāta Pablo Bernabé yoini iskafakī: “A Nios Ifofaafo nō anā ato ōikanō fokāfe pexe rasi anoafo a nōko Ifoōnoa meka shara nō ato yoikī taefaniano afeskax ikafomāki.” ³⁷ Bernabé Juan iyopaini ato fe kanō, nā Juan āfe ane fetsa Marcos ipaoni. ³⁸ Akka Pablo iyokaspani. Nā Marcasmāi Panfilia anoax ato makinoax nēteyameano, ato feta yonokaspakī. ³⁹ Askai feratenākanax anoax paxkanāfainifo. Bernabé Marcos Chipre ano iyoikai kanōanāfānē nanekaini. ⁴⁰ Akka Pablo Silas ifini afe kaxiki, afeta Niospa meka shara ato yoi axiki. Askaito ōikakī a Jesús Ifofamisfāfe ato Nios kīfixonifo fosharakōitanōfo Niospa ato kexesharanō. ⁴¹ Mā fokakī Siria yafi Cilicia anoafo Jesúsnoa meka shara ato yoifofāsafanifo, a Nios Ifofaafāfe Jesúsnoa tāpisharakōinōfo inimasharaxikakī.

16

Timoteo ato fe kani Pablo feta Silaspa Niospa meka sharaōnoa ato yoikai foaifono

¹ Pablo fe Silas pexe rasi Derbe ano nokonifo, nānoax Listra ano fonifo. Nānoa Nios Ifofaa fetsa āfe ane Timoteo fichinifo. Āfe afa Judea kēro ini, Nios Ifofa, akka āfe apa griego ini. ² Nā Nios Ifofaafāfe Listra anoxō Iconio anoafāferi, “Na Timoteo feronāfake sharakōira,” fanifo. ³ Pablo Timoteo iyopaini afe kanō. Akka iyoyoxoma āfe foshki repa xatemani, judeofāfe mekafoyamanōfo, māmāi tāpikaxō Timoteo āfe apamāi griegokē. ⁴ Askata mā fokakī a pexe rasi anoafo a Jesús Ifofamisfo ato yoifainifo, nā Jesúsxō āfe meka yoimisfo feta, a Jesús Ifofamisfo ato kexemisfāfe Jerusalén anoxō ato yoitafo anori. ⁵ Ato yoiaifāfe nikakani a Jesús Ifofamisfāfe Jesús chanīmara fakī finasharakōinifo. Askatari a Jesús Ifofaifo ichapakōi kainifo pena tii.

Pablo namakē ōia keskara fani feronāfake Macedonia anoa

⁶ Akka Niospa Yōshi Sharapa, Asia mai ari ato nīchikaspani, arixō Jesúsnoa meka shara ato yoipaiifaifono. Nāskakē Frigia yafi Galacia finōfainifo. ⁷ Fokanax Misia mai xatea ano nokonifo. Nānoxō Bitinia ano fopaikakī shinānifo, ari fopaiyaifono Jesús āfe Yōshi Sharapa ato nīchikaspani. ⁸ Nāskakē Misia finōfaini fokanax Troas ano nokonifo. ⁹ Nānoxō Pablo fakishi namakē ōia fani, feronāfake Macedonia anoato nīxō yoikī iskafaito: “Nono Macedonia ano ofe noko tāpimaxiki,” ixō yoiaito ōini. ¹⁰ Nāskara ōixō Pablo ato yoini iskafakī: “Itipinīkāfe nō Macedonia ano kanō, Niospa ari noko nīchipai kiki arixō Jesúsnoa meka shara nō ato yoinō,” noko fani.

Pablo fe Silas Filipos ano inifo

¹¹ Nã Troas anoax nõ kanõanãfãñẽ nanekaini ãamãfã nakirafe mai toomãfã ano kai ãfe ane Samotracia ano. Nãnoax kaax pena fetsa Neápolis ano nõ nokoni. ¹² Nãnoax nõ anã kani Filipos ano. Nã Filipos ano romanõ xanĩfokõifo ipaonifo nãnoa ãto pexe rasi sharafinakõia ini, nã Macedonia mai ano. Nãno nõ oxa ranãyoni. ¹³ Nãnoax pena tenetitã pexe rasi anoax nõ tsekekainikax faka ketokonõ nõ kani, nõ shinã anoxõ judeofãfe Nios kĩfikanira ixõ. Nãno tsaõxõ Niosnoa meka shara kẽrofo nõ yoini ano ichanãfono. ¹⁴ Nãnoa fetsa ãfe ane Lidia ini pexe rasi Tiatira anoa. Nã kẽromã sama fexta nana sharakõi ato minimis ini. Askatari Nios shinãkõimis. Nãskaxõ Pablo Jesúsnoa yoiaito nikakõisharaito õikĩ nõko Ifãfe ãfe õiti fepeaxosharakõini. ¹⁵ Nãskaito õikĩ afe yorafoya maotisafanifo faka mẽra ikimakĩ. Nãskaxõ noko yoini iskafakĩ: “Mã ea iskafaikai, mĩ nõko Ifo ifofaki mã ea faikai, ãfe pexe ano oxai fekãfe,” noko fani. Noko askafaino nõ nẽteyoni.

¹⁶ Nãskata pena fetsa a Nios kĩfimisfo ano nõ kaino nãno nokoki xomaya nokoni niafaka chaka a mẽra naneano. Nãato ato õnãxomis ini. ãto inakõima ini, ãa ato onãxomis. Aõxõ kori ichapa fimisfo ini. ¹⁷ Nã xomayato noko chĩfafaini Pablo fe nõ kaino fãsikõi mekayanã noko yoifoni iskafakĩ: “Na feronãfakofofi Nios nã keyokõi finõato ãfe inakõifoki. Afeskax nõ Nios fe ipaxatiromãki noko yoi feafo,” ixõ yoini.

¹⁸ Pena tii noko askafafofãsa fani. Noko askafaito Pablo mã fekaxtexõ anã teneyamakĩ, ifiakekafã nã niafaka yõshi chaka xomaya mẽra nanekẽ iskafani: “Jesucristoõxõ ã mia yoikai na xomaya makinoax tsekekaitãfe,” fani. Askafaino a makinoax niafaka chaka tsekekaini.

¹⁹ Pablo askafaito õikakĩ, akka a xomayato ãfe ifofãfe shinãchakakõinifo anã afaakema, anãkairoko aõxõ kori fikani. Nãskakaxõ akiki õitifishkikakĩ Pablo yafi Silas achikaxõ xanĩfo finakõia ano iyonifo. ²⁰ Nãskakaxõ xanĩfofo ano ato iyokaxõ iskafakĩ ato yoinifo: “Na judeo rafeta nõko pexe rasi anoa ato chakafakĩ mekafakani. ²¹ Nõ mato yoisharaira ikaxõ nã imisfo keskapaikĩ anori ato yoipaikani. Akka nõa nõ chanĩpaima, askara yoikĩ nõ feyafaima nõmã romanõfoxõ,” ixõ ato xanĩfofo yoinifo.

²² Ato askafaifãfe nikakani yorafã rasi atoki õitifishkinifo Pablo yafi Silaski. Nãskakaxõ ãto xanĩfofofãfe ato yoinifo ato rapati fĩakaxõ ato chati koshanõfo. ²³ Ato koshakĩ finakaxõ karaxa mẽra ato ikimanifo. Nãskakaxõ a karaxa kexea yoinifo ato kexesharakõinõ tsekeyamanõfo. ²⁴ Yoikĩ askafaifãfe nikakĩ, a karaxa kexemisto oke mẽra chaikõi ato ikimaxõ tafara rafe oyatamaxõ ato tsãoni.

²⁵ Ato askafafono Pablo fe Silas yamenakekafanaino Epa Nios kĩfiyanã fanãinifo. Askaifono a ato fe karaxa mẽra ikafãfe ato nikanifo. ²⁶ Nãskaifono fãsikõi mai naya naya ikĩ, nã karaxa pexe simĩto posa posa akõini. Nãskafaino ãfe fepotifo fepekemei fetseni. Nãskaino a karaxa mẽra ikafo cadenãs mepeke-meime fetsenifo. ²⁷ Askaino a karaxa kexea moinãkafã õia mã karaxa ãfe fepoti fepekemei fetsea õini. Askaito ãfe espada tsekata ãa retemepaini, mã tsekeafora ixõ shinã. ²⁸ Askaito Pablo fãsikõi yoini iskafakĩ: “Mã retemeyamafe. Nõ faki kaamaki,” faito nikakĩ.

²⁹ A karaxa kexeato ãfe soraro fẽtsa, “Ea kirosĩ otaxõ fexõfe,” fani. Mã fexoano koshikõi ichoni choayanã ratei, nãskax Pablo fe Silas niafono ato nãmã ratokonõ mai chachipakefõfãni. ³⁰ Nãskata fininãkãfe mã ato kaimaxõ ato yõkani iskafakĩ: “¿Afeskaxõ ãfe chaka ã soatiromẽ Nios fe ipaxakĩ?” ixõ ato yõkani.

³¹ Ato askafaito nikakakĩ kemanifo iskafakakĩ: “Nõko Ifo Jesucristo chanĩmara fafe Ifokõi faax mefe yorafo fe mĩ afe nĩpanakakĩ,” fanifo.

³² Nāskakaxō nōko Ifoōnoa meka shara yoinifo, a afe ikafori āfe pexe mēranoa ato yoinifo. ³³ Ato askafaifono nā fakish fistichi nā karaxa kexemisto a ato koshafo ano ato fāka chokani. Ato askafaino āfe āfiyafi āfe fakefoya ato maotisafanifo, ato faka mēra ikimapakekakī Jesús chanīmara faifono. ³⁴ Nāskaxō āfe pexe ari ato iyoxō ato pimani. Nāskax āfe āfi fe āfe fakefo fe inimakōini Nios chanīmara fakōikanax.

³⁵ Nāskata penama xanīfofōfāfe āto sorarofō nīchinifo a karaxa kexeafō ato yoitanōfo Pablo yafi Silas ato kāimanōfo. ³⁶ Nā karaxa kexeato Pablo yoini iskafakī: “Xanīfofōfāfe ea yoiāfo ē mato kāimanō. Mā mā tanaima kasharatiro,” faino, ³⁷ Pablo a ato kexeafō yoini iskafakī: “Nōri romanōfōfiano noko koshaketsafo yorafāfe ferotaifi, noko yōkasharakaxoma. Nāskakaxō noko karaxa mēra ikimanafo. Akka, ¿afeskakī one mā noko kāimapaimē? Āakōi noko kāimani fenōfo ato yoitakāfe,” Pablo ato fani.

³⁸ Ato askafaito nikakakī mā fokaxō sorarofāfe ato xanīfofo yoinifo. Ato yoiāifono nikakani ratenifo: “Nōri romānōfora,” ato faifāfe nikakanax. ³⁹ Ato askafaifono xanīfofo mā fokaxō ato iskafanifo, Pablo yafi Silas: “Nō mato tāpiama māri romanōfo fekē nō mato koshaketsaxō karaxa mēra nō mato ikimana. Na karaxa mēranoax kāikāfe, nōko pexe rasi anoax fōtaxikakī,” ato fanifo. ⁴⁰ Mā karaxa mēranoax kāikanax Pablo fe Silas Lidia pexe ano fonifo. Nānoxō a Nios Ifofafo Jesúsnoa meka shara ato yoikakī ato inimamakōinifo. Nāato yoikī askafakanax ato makinoax fonifo.

17

Tesalónica anoax mekai fetsenifo

¹ Pablo fe Silas mā fokakī, Anfīpolis yafi Apolonia finōfāikanax, Tesalónica ano nokonifo. Nā Tesalónica ano judeofāfe ichanāti pexe ini. ² Pablo nā imis keskai pena tenetitīa ichanāti pexe mēra kapaonī. Tres simānā anoxō ani, anoax ato fe feratenāyanā a kirika ano Niospa meka kenenifoōnoa ato yoiyāna. ³ Anoxō ato yoini: “A Cristo omiskōiax nani. Mā nafiakē anā Epa Niospa otoani. Nā Jesúsnoa ē mato yoikai nāfi Cristoki,” ixō Pablo ato yoini.

⁴ Ato askafaifāfe nikakakī atiri judeofāfe Jesús chanīmara fanifo. Mā Jesús chanīmara fakanax ato fe rafenifo. Askatari griegofāferi Nios chanīmara fakaxō Nios fāsi sharakōi fanifo, nā kērofo xanīfofo feta. ⁵ Askaifāfe ōikani judeofo noko anā nikakanimaraka ikanax, Pablo yafi Silas mepaikani ōitifishkinifo. Nāskakaxō a yora xani chakafo ato fenaifokani fonifo, Pablo yafi Silas chakafakakī mekafanōfo, fetsafāfe pexefo tii anoxō ato nikanōfo. Nāskakanax Jasón pexe ano fonifo Pablo yafi Silas fenaifokani, ato kāimaxikakī yorafāfe ato omiskōimanōfo. ⁶ Akka Pablo yafi Silas anoa ato fichikaxoma, Jasón yafi a Nios Ifofamis fetsafo ato achikaxō āto xanīfofo ano ato iyonifo. Mā ato iyokaxō fāsikōi ato iskafanifo: “Na feronāfakefāfe fanīma mīshtixō ato chakafafōfāsafamisfo. Akka mā noko ano feafo. ⁷ Na Jasón āfe pexe mēra ato ikimana. Nafāfe a romanō xanīfāfe yoimis anori anā nikakanima. Akka nāno nōko xanīfo fetsa āfe ane Jesús ikani,” ixō ato yoinifo.

⁸ Ato askafaifāfe nikakani xanīfofo ōitifishkikī metsamanifo, noko anā nikakanimara ikanax. ⁹ Akka Jasón feta fetsafāfe a xanīfofo ato kori ināfono ato kāimanifo.

Pablo fe Silas Berea ano fonifo

¹⁰ Nāskakata fakishi Pablo fe Silas Berea ano fotanōfo koshikōi ato nīchinifo. Mā Berea ano nokokanax judeofāfe ichanāti pexe mēra ikifainifo. ¹¹ Nā judeofāfe Pablo feta Silaspa ato yoiāifono ato nikakōipainifo, Tesalónica anoafō keskara inifoma. Ato nikasharapaikōikakī Niospa meka shara nikakōinifo.

Nāskakata pena tii kirika fepekaxō òinifo a ato yoiafo keskara chanĩmamākĩ.
¹² Nāskakē judeofāfe Jesúsnoa chanĩmara fakōinifo. Askatari griegofāferi chanĩmara fakōinifo. Kērofāferi nikakōinifo a feronāfakefāfe nikaifo keskafakĩ.

¹³ Akka judeofāfe Tesalónica anoxō nikanifo Pablo Niosnoa meka shara Berea anoafato ato yoiaito. Nāskakanax Berea ari fonifo, mā ari fokaxō ato yoinifo Pablo mekafakĩ chakafanōfo. ¹⁴ Ato askafaifono, akka a Jesús Ifofam-isfāfe Pablo koshikōi katanō nĩchinifo fakafā kesemē ano. Akka Timoteo fe Silas fonifoma. Berea ano nētenifo. ¹⁵ Akka a Pablo fe fofaifo, afe fonifo pexe rasi Atenas ano. Nānoax anā feaifono Pablo ato yoini iskafakĩ: “Timoteo yafi Silas ea ato yoixotakāfe koshi ekeki fenōfo,” ixō ato yoini.

Pablo Atenas ano ini

¹⁶ Pablo Timoteo yafi Silas Atenas anoxō ato manayanā òia Atenas anoxō afarafo ichapakōifo onifakaxō, “Na nōko niosra,” faifāfe òi. Āfe òiti mēraxō shināchakakōini. ¹⁷ Nāskakē Pablo nā judeofāfe ichanāti pexe mēranoax jude-
 ofo fe a judeofoma fe a Nios sharara faifo fe yoināni. Nāskatari a pexe emāiti ni-
 ax yoināifo mēxotaima Pablo Jesúsnoa ato yoini. ¹⁸ Ato yoiaino yora fetsafo akiki fenifo afe feratenāxikaki. Nāfāfe shinānifo iskakakĩ: “Nā nō apaiyai keskafakĩ nō atiro noko inimamanō,” ixō shinānifo. Nāfāfe āto anefo epicureofo. Ranāri iskanifo: “Afara afeskara afiaino nō tenetiro,” ixō shinānifo. Nāfāfe āto anefo estóicofo. Nāfo epicureofo fe estóicofo Pablo fe feratenānifo. Iskafakĩ yoinifo: “Na mekakĩ finamisto ¿afaa noko yoipaimē?” ixō yoiaifono, fetsafāferi iskafanifo: “Nios fetsafoōnoa noko yoipai rakikĩa,” ixō yoinifo. Nāskafakĩ fetsanifo. Pablo Jesúsnoa meka shara ato yoifiato, mā Jesús nafi-
 ax anā otoyamea ixō ato yoifiato nikakaspakakĩ. ¹⁹ Nāskakaxō Areópago ano Pablo iyonifo a anoax mēxotaima ichanāxaxō afarafo yoimisfo ano. Nānoxō yōkanifo iskafakakĩ: “Nō tāpinō na mĩ yoiai anori meka fenakōiki noko yoife. ²⁰ Na mĩ noko yoiai anori nō nikamismaki. Afaa ikamākĩ noko yoife nō tāpinō,” fanifo. ²¹ Nā Atenas anoafato feta yora fetsafāfe anoxō òikakĩ nikapaikōinifo a nikaifo keskara ato yoixikakĩ.

²² Nāskaxō nā ichanāmisfo āfe ane Areópago anoxō Pablo ato nēxpakĩa niinākāfe ato yoini: “Atenas anoafāfe, ea nikakapo, mē mato òi mā Niosnoa nikapaikōiaito tāpipaikōiyanā. ²³ Nā mā nios kĩfimis ano kafasakĩ mē òia. Nānoa ē fichia na nōko niosra ixō mā afara onifanixakĩ mā akiki kenekĩ iskafakē: ‘Nō na nios òimisma,’ ixō mā aōnoa yoikĩ keneni. Nā nios òikatsaxakĩma mā kĩfimis, nāōnoa ē mato yoi.

²⁴ “Nā Niospa keyokōi onifani, afama mĩshtifo nai mēranoafoya mai anoafato onifani ato Ifo ixikĩ. Nā Nios yorafāfe pexe faafo mēra ikama. ²⁵ Askatari ea afaa axokāfe ikima. Akka nāato keyokōi noko nima. Nō xakainō noko nefefaxoni, afara fetsafori ani.

²⁶ “Askata feronāfake fisti onifakĩ taefani, nānoax nā maniafo tii kainōfo, nā mai tio ano ipaxakakĩ. Nāskaxō ato yoini, afe tii xinia akanimākai fanĩra ikaxō. ²⁷ Nāskakē Niospa yorafo onifani keyokōichi fenanōfo tāpipaikakĩ. Akka fenakĩ fichitirofo. Chanĩma, Nios chai ikama, noko chai faama. ²⁸ Akka Niosnoax nō nia. Akka Niosyamakēkai nō nikeranama. Akka nā mato tāpimamisfāfe kenenifo iskafakakĩ: ‘Nō Niospa fenakōifo,’ ixō yoinifo. ²⁹ Akka nō Niospa fenafofi-
 axō, nō shinātiroma Nios na yorafāfe afarafo onifafo keskara inō, āa shināxō yorafāfe onifafo keskara. ³⁰ Askafiaifonokai Niospa ato afeska fanima. Akka iskaratĩa keyokōi ato yoi āto chaka xatekaxō chanĩmara fanōfo. ³¹ Nāskakē Niospa tāpiyoni afetĩa ato ichanāfaimākai, a ato omiskōimanaitĩa, fatofa sharafomākĩ askayamai fatofori chakafomākĩ. Nā feronāfake kato-
 nioxō ato askafaxii. Akka mā nafiakē Āpa otofaito keyokōichi òinifo,” ato faito,

³² a Jesús naax otoita nikakani, akiki kaxemetsamanifo. Ranãrito yoikĩ iskafanifo: “Mã nõ nikakĩ a mĩ noko yoiaito, anã pena fetsa noko yoifaixãfe,” fanifo.

³³ Askafaifono a ichanãfo anoax Pablo kani. ³⁴ Akka Pablo mã kaino atiri afe fonifo Jesús chanĩmara fakanax. Dionisiori nãno ato fe ini, nã Dionisio Areópago anoxõ ato fe ichanãxõ ato yoimis ini. Kërori nãno ato fe ini, ãfe ane Dámaris, këro fetsafori ano ato fe inifo.

18

Pablo Corinto ano ini

¹ Nãskata Pablo Atenas anoax kaax Corinto ano nokoni. ² Nãnoa feronãfake ãfe ane Aquilaki nokoni. Nã feronãfake Ponto pexe rasi anoa ini. Rama Italia anoax ãfe ãfi Priscila fe nokoita ini, nã Italia anoa ãto xanĩfãfe ãfe ane Claudio ato potaitano. Ato iskafayanã na judeofo Roma anoax fõtanõfo ixõ. Nãskakẽ Pablo ato õikai kani. ³ Nã Pablo nã akaifo keskafakĩ akairi pexe fakãki tãpia ini, karapa pexe fakĩ. Nãskakẽ nãno ato fe nëteni, ato feta yonoxiki. ⁴ Nãskakẽ nãnoax mëxotaima pena tenetitĩ ichanãti pexe mëra kapaoni. Anoxõ judeofoya a judeofoma ato Jesúsnoa meka shara nikamapai chanĩmara fanõfo.

⁵ Akka Silas fe Timoteo mã Macedonia anoax akiki nokoafono Pablo Jesúsnoa meka shara judeofo ato yoifofãsafani: “Jesúsfi Cristoki Niospa katonĩ ãfe Fakekõi inõ,” ixõ ato yoini. ⁶ Ato askafaito nikakakĩ judeofãfe Pablo iskafanifo: “Jesúskai Cristoma. Mĩa mĩ chanĩ,” fakaxõ Pablo ìchaketsanifo. Askafaifãfe nikakĩ Pablo ãfe rapatiõnoa atoki mapo taa taani mã anoax kakĩ ori fetsa ari ato iskafafãini: “Ë Niospa meka mato yoipaifaito mã ea nikakaspai. Mãto shinãmã mã iki. Nãskax naax mã Nios fe nĩpanakama. Ë mato yoisharapaifaito mã ea nikakaspai. Nãskakẽ na judeofoma ari ã kai ariafo ato yoixiki,” ixõ Pablo ato yoini.

⁷ Nãato askafata ãto ichanãti pexe anoax kãikaini feronãfake ãfe ane Ticio Justo pexe ano kani. Nãato Epa Nios shinãkõikĩ kĩfipaoni. Nã ato ichanãti pexe chaima ika ini. ⁸ Feronãfake Crispa ichanãti pexe anoa ãto xanĩfo ini. Nãato ãfe ãfi feta ãfe fakefoyaxõ nõko Ifo nikakõiyana chanĩmara fani. Askatari nã Corinto anoafãferi chanĩmara fakõinifo, Pablo Jesúsnoa meka shara ato yoiaito. Nãskakẽ chanĩmara faifono ato maotisafakĩ faka mëra ato ikimapakenifo. ⁹ Nãskano fakish fetsa Pablo namakẽ õia fani, nõko Ifãfe yoiaito iskafakĩ: “Ratekima mëxotaima ãfe meka sharaõnoa ato yoi xateyamafe. ¹⁰ Ë mefe ikaki mia tsõa afeska faima kiki. Na pexe rasi ano efe yorafo ichapa ikafokĩ,” ixõ yoini. ¹¹ Nãskakẽ Pablo Corinto ano nëteni. Anoxõ xinia fisti finõmata oxe seis ani. Nãnoxõ mëxotaima Niospa meka ato yoipaoni.

¹² Akka Acaya mai anoax Galiõn xanĩfo finakõia ini. Nãnoax judeofo ichanãnifo Pablo achixikãki. Mã achikaxõ ãto xanĩfo finakõia ano iyonifo. ¹³ Iskafakĩ ãto xanĩfo yoinifo: “Na feronãfãke ato pãrafõsafai, yoipai mã Nios kĩfiki iskafatiro ixõ. A Moisés yoini anori ato yoima, fakirira ato yoi,” ixõ yoinifo.

¹⁴ Pablo mã ato kemapaiyaito nã xanĩfo Galiõn judeofo yoini iskafakĩ: “Na feronãfãke afara chakafakẽ, askayamakĩ ato retekẽ mã ea yoiaito ã mato nikakerana. ¹⁵ Akka nã mãto xinifãfe yoipaonifo keskaraõnoa mã yoita, a mãto kaifãfe ãfe aneõnoa yoita, a Moisés yoini keskaraõnoa mã yoi. Akka nã mã apaiyai keskafakãfe, ã aõnoa afaa tãpipaimakai. ¹⁶ Nãskakẽ nonoax fotakãfe,” Galiõn xanĩfãfe ato fani. ¹⁷ Ato askafa fokaxõ Sóstenes achinifo nã ichanãti pexe anoa xanĩfo. Mã achikaxõ nãri seteketsanifo xanĩfãfe ferotaifi. Akka nã xanĩfo Galiõn aõ rafanã inima.

Pablo anã Antioquía ano kani Niosnoa meka shara ato yoikai. Taeyoi kai rafenixakĩ anã kai fistini

¹⁸ Pablo Corinto ano oxaranãyoni. Nãnoax a Nios Ifofaafõ makinoax kani Priscila fe Aquila afe fonifo. Nãskakata kanõnãfãnẽ nanefainifo Siria mai ano fokani. Mã fokanax akka Cencrea anoax kanõanãfã mẽra nanexoma Pablo ato testemayoni. Akka Pablo Nios yoiyoni: “È mĩõxõ afara axii, mĩ ea õiaino,” ixõ yoini. Akka mã axõ ato testemani tãpinõfo. È Nios afara afeskarafaxõara ikax. ¹⁹ Nãskata mã fokanax Efeso ano nokonifo. Nãno Pablo ato nĩchifaini Aquila yafi Priscila, ichanãti pexe mẽra kakĩ nãnoax judeofo ichanãfono ato fe yoinãxiki. ²⁰ Nãnoxõ nẽtefapainifo. “Kayamafe nono nofe iyofe,” fanifo. Askafaifono akka Pablo nẽtekaspani. ²¹ “Maa, ã nẽtetiroma, mẽ kai,” ato fani iskafakĩ ato yoianã: “Epa Niospa ea nĩchiaino anã oxõ ã mato õiyoxii.”

Nãato askafata Pablo kanõanãfãnẽ naneinãkafani Efeso anoax mã kai. ²² Mã Cesarea ano nokoax, Jerusalén ano kani a Nios Ifofaafõ ato yoisharaikai. Mã ato yoita anã kani Antioquía ano. ²³ Nãno ato fe ikatsaxakĩ, nãnoax anã kani Niospa meka sharaõnoa ato yoifofãsafaiakai. Galacia anoxõ ato yoikĩ taefata, Frigia anoxori ato yoini. A Nios Ifofaafõ ato inimamakõini, Niosnoa meka shara ato yoikĩ.

Apolos Efeso anoafõ Niosõnoa meka shara ato yoini

²⁴ Nãskaifono Efeso ano judeo fisti nokoni ãfe ane Apolos pexe rasi Alejandria ano ini. Nãato Niospa meka yoikĩ kirika kenenifo tãpikõia ini, xafakĩakõi ato yoimis. ²⁵ Nãato nõko Ifo Jesúsnoa tãpikõixõ ato yoini, inimakõikai nã tãpia anori xafakĩakõi Jesúsnoa ato yoini. Askafixõ Jesúsnoa tãpisharaxõ nã Juan ato maotisafakĩ faka mẽra ato ikimani nã fisti tãpia ini. ²⁶ Nãskata Apolos ichanãti pexe mẽraxõ ranotamakõi ato yoiaito nikakĩ. Aquila feta Priscila kenakaxõ ori iyokaxõ Niospa meka tãpimasharakõinifo nikasharakõinõ.

²⁷ Nãskakẽ Apolos Acaya mai ano kapaiyaito nikakĩ a Nios Ifofaafãfe iskafanifo: “Nõ a Jesús Ifofamisfo kirika kenexõ fomanõ mia ifisharakõinõfo,” ixõ yoinifo. Apolos mã Acaya mai ano kaxõ, ato yoisharakõini. Ato askafaito nikakani Niosnoax inimasharakõinifo. ²⁸ Nãnoxõ õiaifo judeofo Apolos yoini: “Jesús Niospa Fakemara,” faifono. Akka nã kirika keneaõxõ Apolos ato yoini iskafakĩ: “Nã nõ manai Cristofi Niospa Fakeki,” ixõ xafakĩakõi ato yoiaito tsõa kemanima.

19

Pablo Efeso ano oni

¹ Apolos Corinto ano iyoano, mãchi keya ari fai tãpiato kaax Efeso ano Pablo nokoni. Nãnoa Nios Ifofamisfo fichitoshini. ² “¿Mã Nios Ifofaxõ Niospa Yõshi Shara mato mẽra mã nanenimẽ?” ixõ Pablo ato yõkaito, kemanifo iskafakakĩ: “Maa, nõkai aõnoa afaa nikayomisma, Niospa Yõshi Sharakai nõ nikamisma,” fanifo.

³ Askafaifãfe nikakĩ anã Pablo ato yõkani: “¿Afeskai mã maotisanimẽ?” ato faito, kemanifo iskafakakĩ: “Juan noko yoinino nõ ini,” ixõ yoinifo.

⁴ Askafaifono anã Pablo ato yoini iskafakĩ: “Juan ato maotisafani afara chakafakatsaxakakĩ ãto chaka xatepaiyaifono Nios Ifofapaikakĩ. Iskafakĩ ato yoianã a chipo oxiai nikakõisharaxikãfe ixõ ato yoini, Jesúsnoa yoikĩ,” ato Pablo fani.

⁵ Pablo ato yoikĩ askafaino, nikakani nõko Ifo Jesús ãfe aneõnoax maotisanifo fetsafãfe tãpinõfo. ⁶ Askaifono õikĩ Pablo ato mãmãpakeaino Niospa Yõshi Shara ato mẽra naneni. Nãskakanax meka fetsapa mekai fetsenifo. Niosnoa

meka shara nikakaxō ato yoinifo. ⁷ A ato mēra Niospa Yōshi Shara nanea, doce feronāfake ini.

⁸ Nāskaifono Pablo nāno ato fe ikax mēxotaima ichanāti pexe mēra kapaoni. Anoxō tres oxe ani. Niospa meka sharaōnoa ato yoiyanā ranotama, anoxō Nios xanīfoōnoa ato tāpimapaikōikī. ⁹ Ato askafafiaino atirifāfe nikakaspakakī yorafāfe ferotaifi mekafakī chakafanifo iskafakakī: “Nōkai Jesús chanīmara faima. Aōnoaxkai Epa Nios ari nō katiroma,” ixō yoiaifono, Pablo ato maki-noax kakī a Nios Ifofafo ato iyoni, feronāfake āfe ane Tirano a anoxō ato tāpimamis ano. Nānoxō a chanīmisfo anoxō pena tii Pablo Jesúsnoa meka shara ato yoipaoni. ¹⁰ Anoxō Pablo Niospa meka sharaōnoa ato yoikī xinia rafe ani. Nā Asia mai ano ikafāfe nikasharakōinifo Niospa meka sharaōnoa. Judeofo feta a judeofofāfema nōko Ifo Jesúsnoa meka shara nikapaonifo. ¹¹ Nāskakē Niospa Pabloōxō afama mīshtifo fakī ato ispani. ¹² Nāskakē yorafāfe āto payōiro iyamata āto sama faxte pishta Pablo āfe yora ramākanifo. Nāskafata mā fokaxō a isinī ikaifoya a niafaka chaka naneafo ato ramānifo. Ato askafaifono a isinī ikaifo fe a niafaka chaka naneafo sharai fetsenifo.

¹³ Nāskaifono atiri judeofāfe fofāsakakī niafaka chakafo yorafo makinoa pōtanifo pexefo tii fofāsakakī. Jesús āfe aneōxō niafaka chakafo yorafo makino-a ato pōtapainifo. Iskafanifo: “Niafaka chakafāfe, Jesús aneōxō Pablo noko yoimiski, akka nō mato yoikai ato makinoax tsekefaitakāfe,” ato fanifo.

¹⁴ Nāskafapaonifo nā judeo āfe fake sietipa, nā judeo āfe ane Esceva ini. Nā ato Nios kīfixomisfāfe āto xanīfo ini. ¹⁵ Ato askafaifono a niafaka yōshi chaka yora mēra naneato ato kemani iskafakī: “Ē Jesús ōimis, askatari Pablori ē tāpia. Akka, ¿mā tsoamē?” ato fata, ¹⁶ nā niafaka yōshi chakayato ato rapati faxteyanā, fāsikōi ato achixō ato seteketsayanā ato imi tofeni. Nāato askafakī fetsaino pexe mēranoax yorioma ichonifo. ¹⁷ Nāato askafaano Efeso anoxō judeofāfe yora fetsafo feta nikakani ratenifo. Nāskakaxō, “Nōko Ifo Jesús fāsi sharakōi,” fanifo.

¹⁸ Nāskakaxō a Jesús chanīmara famisfāfe fēkaxō a afara chakafapaoni xakakī yorafāfe ferotaifi yoinifo. ¹⁹ Askatari a yōfe tāpiafāfe āto kirika fēkaxō yorafāfe ferotaifi koanifo, mā Jesús Ifofakaxō. Nā kirika kene ōiafo kopikōi ini, como cincuenta mil ini. ²⁰ Nāskakē nōko Ifāfe āfe mekashara nikaketsanifo Jesús Ifofamisfāfe ato yoiaifāfe, āfe kerex sharaōxō afama mīshtifo fakakī.

²¹ Nāskafata Pablo shināni Macedonia yafi Acaya ano kaxiki. “Nānoax Jerusalén ano ē kaikai, Jerusalén anoax Roma ano ē kaikai,” ixō shināni. ²² Nāskaxō a afeta yonomisfo rafe Macedonia ano ato nīchini Timoteo yafi Erasto. Akka Pablo Asia ano nēteyoni.

Efeso anoax yorafo mekai fetsenifo

²³ Nāskaifono nā Efeso anoafō mekai fetsenifo: “Jesúsfi Niospa Fakekī aōnoax nō Nios ari katiro,” Pablo ato faino, ²⁴ nāno feronāfake āfe ane Demetrio ini. Nāato yonokī afarafo kori exe keskara oxokōi onifapaoni. Nā feronāfāke afara onifakī tāpikōia ini. Nāskaxō kēro ōitsa onifani, na nōko niosra ixō āfe ane Artemisa. Ranāfaxō kēro ōitsa fakī kafāshara mīshtifo onifani. Nāskakē a afeta yonofaifāfe aōxō kori ichapa fipaonifo. ²⁵ Nāskaxō Demetrio ato ichanāfani, a afeta yonomisfo ato iskafayanā: “Efe yora mīshtichi, mā mā tāpiakī nōko nios Artemisa yora keskara onifaxō, aōxō nō kori ichapa fimiski. ²⁶ Akka mā mā ōimis nikayanā, na Pablo ato yoifofāsafamis iskafakī: ‘Na yorafāfe niosra ixō onifafo, akai niosma,’ ixō ato yoi. Mā yora ichapafāfe chanīmara fakōinafo ato yoiaito nikakakī. Na Efeso anoafos ato yoiamā, Asia mai anoafori ato yoimis. ²⁷ Na Pablo yoiai keskara mesekōi, ē shināchakakōi. Anā noko tsōa kori ināyamaino nō fenotiro, na nōko nios Artemisa anā tsōa

kĩfitiroma, nã maitio ikafãfe Asia mai anoxõ křifimisfo. Askatari a nõko nios křifiti pexefã mēranoax anã ichanãtirofoma,” ixõ Demetrio ato yoini.

²⁸ Demetrio ato askafaito nikakani Pabloki õitifishkiyanã fãsikõi yoinifo iskafakakĩ: “¡Na Artemisa Efesio anoafõ nã sharafinakõiafo, tsoa keskarama!” ikanax fãsikõi mekai fetsenifo.

²⁹ Nãskakanax pexe rasi anoax fekaxtei fetsenifo. Nãskakaxõ Gayo yafi Aristarco achinifo. Nã rafe Macedonia anoa inifo, Pablo fe feitafo. Nãskakaxõ a yora kaya ichanãfo ano ato iyonifo. ³⁰ Ato askafaifono Pablo ato mēra ikipaini arixõ yorafo yoixiki. Akka a Jesús Ifofaafãfe Pablo nřchikaspanifo, “Mia retetirofoki,” ikaxõ. ³¹ Askatari a Pablo fe rafemisfãfe, xanřfofõfãfe Asia mai anoxõ ato yoinifo, Pablo yoitanõfo ato mēra ikiyamanõ. ³² Nãskakẽ ãa ranã ichanãkanax fãsikõi mekanifo. Atirifãfe fetsa anori yoinifo. Nãskaifono ranãrito tãpinifoma afeskai ichanãfomãkĩ. ³³ Nãskaifono judeofãfe shinãnifo, na yorafo chakai mekai taeafora noko fakanira ikaxõ. Nãskakaxõ Alejandro přtsikinifo õiaifono ori nřxõ ato yoitakãfe ikaxõ. Nãskafaifono Alejandro ni-inãkafã mēshaxõ ato yoini iskafakĩ: “Mekayamakãfe, ě mato yoisharanõ,” ixõ Alejandro ato yoini. ³⁴ Akka mã tãpikaxõ Alejandro judeokẽ, fãsikõi ãa ranã mekai fetsenifo, iskakani: “Na Efeso anoafãfe ãto Artemisa sharafinakõia,” ikaxõ.

³⁵ Askaifãfe õikĩ a xanřfo kenexomisto, “Mekayamakãfe,” ato fani. Ato askafaito anã tsoa mekanima. Nãskaxõ ato yoini iskafakĩ: “Efesofo anoafãfe ea nikasharakãfe. Keyokõichi tãpiafo nõfi Efeso anoafokĩ, nã ãto nios Artemisa ãfe křifiti pexefã nõ kexemis. Nã onifafo nai mēranoax pakeafori nõ kexemis. ³⁶ Nãskakẽ ãa chanřkanira tsoa itiroma. Nãskakẽ anã mekayamakãfe, afaa afeskafapayamakãfe shinãsharaxoma. ³⁷ Akka na feronãfakefo mã ato efea afaa chakafayamafafono, askatari na pexefã mēranoa tsõa afaa oneyamafiano, askatari na nõko nios Artemisa tsõa chakafakĩ mekafayamafiano mã ato efea. ³⁸ Akka na Demetrio afeta yonomisfo feta, a ato chakafapai xanřfofo ano ato iyotiro, anoxõ ato yõkanõ afaa chakafafomakĩ. ³⁹ Nãskaxõ afara fetsa mã yoipaikĩ nã ichanãfo anoxõ mã yoitiro. ⁴⁰ Mã iskaratĩa ato chakafai keskafakĩ xanřfofõfãfe nikaxõ nokori askafatirofo. Na yorafãfe afaa chakafayamafiamisfono, afeskakĩ mã yõachepeimẽ xanřfofõfãfe noko faifono nõ ato kematiroma,” ixõ a xanřfo kenexomisto ato yoini.

⁴¹ Ato yoikĩ askafata ato nřchiaino fonifo.

20

Pablo Macedonia ano kata Grecia ariri kani

¹ Mã mekakani nishpafono Pablo a Nios Ifofaafo kenani ato yoisharaxiki. Mã ato yoisharata, ato makinoax kani Macedonia ari kai. ² Mã kaxõ nãriafo Jesúsnoa meka shara ato yoifõfãsafakĩ a Nios Ifofaafo ato inimamakõini. Nãskata Grecia ano nokoni. ³ Nãnoxõ tres oxe ani anoax kanõanãfãfã Siria ano kapaikĩ, nikani judeofãfe kexeafono retepai kakĩ. Nãskakẽ fãi kakĩ, Macedonia anã finõfaini. ⁴ Mã kaino feronãfake ranãri afe fonifo. A feronãfake fetsa ãfe ane Sópater Berea anoa ini. Æfe apa ane Pirro ini, Aristarcori ini, Segundori ini, nã Segundo Tesalónica anoa ini. Fetsari Gayo, Derbe anoa ini. Fetsari Timoteo ini. Askatari Tíquico fe Trófimo Asia mai anoa inifo. Nã tii Pablo fe fonifo. ⁵ Nã tii rekẽ fokaxõ Troas anoxõ noko mananifo. ⁶ Akka mã fista senẽano chipo nõ kani. Nã fistatĩa pãa faraxaxoma pimisfo ini. Nãskata Filipos anoax kanõanãfãfã nõ kai cinco nia mã nõ oxax Troas ano nõ atoki nokoni. Nãno nõ siete nia oxayoni ato fe.

Troas ano õikai Pablo kani

⁷ Nāskata mā pena nomīkoaino nō ichanāni pāa kaxke mīshtixō pixiki a Jesús noko nāxoyamea shinākī. Anoxō Pablo a Nios Ifofaafo yoini, mā penama kaxiki yamenake kafanaino ato yoikī xateni. ⁸ Nānoax pexe kene keya fomākīa anoax nō ichanāni, a rāpari ichapa ōtai fetsea anoax. ⁹ Nāskaino naetapa āfe ane Eutico pexe kene fomākīa āfe naisti anori tsaoni. Pablo ato chaikōi yoiaino nā naetapa oxakatsaini. Nāskax mā oxachāi kaax pexe kene fomākīakōinoax pakeax nakē chishtoinīfofānifo. ¹⁰ Nāskakē Pablo fotopakekafā chishtoinīfofā nā naetapa ikōni, ato iskafakī yoiyanā: “Rateya-makāfe, naamaki,” ato fani.

¹¹ Nāskafata anā pexe fomākīa Pablo māpeinīfofāxō ato pāa kaxkeketsaxoni ato feta pixiki. Nāskaxō ato yoikī pena fani. Mā penano Pablo kani. ¹² Ato askafaino nā naetapa nafiāx mā otokē afe yorafāfe xanēnē iyonifo. Askafakī Pablo ato inimamakōini.

Troas anoax Pablo Mileto ano kani

¹³ Akka nō kanōanāfānē rekē kani, Aso anoxō Pablo ifixiki. Akka noko iskafakī yoini: “Ē fāi kaikai rekē fokāfe,” ixō noko yoini. ¹⁴ Nā Aso anoa noko fichiāx nofe feronāfāke kani. Nāskax Mitilene ano nō nokoni. ¹⁵ Nāskata nānoax nō tsekekainax pena fetsa Quío mai nō finōfaini kaax pena fetsa Samos fai fototai nō nokoni. Anā anoax kaax pena fetsa pexe rasi Mileto ano nō nokoni. ¹⁶ Akka Pablo Asia ano samarakapainima. Efeso anori kakaspani, Jerusalén ano koshi nokopai ato feta fista Pentecostés apai.

A Nios Ifofaafo ato kexemisfo Efeso anoafu meka shara Pablo ato yoini

¹⁷ Mileto anoxō Pablo ato kenamani, Efeso anoxō Nios Ifofaafo ato kexemisfo. ¹⁸ Mā feafono ato iskafani: “Mā mā ea ōimis ē isharakōiaito nā ē oitachāi. Na Asia mai anoxō ē afaa afeska fama ē isharakōia Jesúsnoa meka shara mato yoi. ¹⁹ Mēxotaima ē mato mēra itiani, nōko Ifo yonoxoni. Ē mato yoi ē oiatiani Nios mato Ifo sharafamapai. Askatari ea omiskōimanaifono ē omiskōimis judeofāfe ea askafaifono. ²⁰ Akka ea askafafiaifono Jesúsnoa meka shara ē mato yoikī xateima. A meka sharakapafo ē mato yoimis. Ranotamakōi ē mato yoimis, ichanāti pexe anoxō yoita a mato pexekōifo anoxori ē mato yoimis. ²¹ Judeofo yoita a judeofomari mē yoimis āto chaka xatekaxō Nios Ifofanōfo nōko Ifo Jesucristori chanīmara fakōinōfo.

²² “Akka iskaratīa Jerusalén ano ē kai, Niospa Yōshi Sharapa ea nīchiaino. Ē tāpiama arixō ea manafo ea afeskarafakani. ²³ Akka mē tāpia Niospa Yōshi Sharapa ea yoiāito, pexe rasi anoxō ea karaxa mēra ikimakaxō ea omiskōimakani. ²⁴ Akka ea askafafiaifono ē shināchakaima. Nā Epa Niospa ea amapaiyai keskara fisti ē shināi. Epa Niospa keyokōi yorafo noikōi na meka shara ato yoitāfe ea fani. Nā ea yoini keskara ē apai.

²⁵ “Ē mato mēraxō Nios xanīfoōnoa ē mato yoimis. Akka mē tāpikōia anā mā ea ōinakama. ²⁶ Nāskakē ē mato yoipai. Na fetsafāfe ea nikakaspamisfo ē ato yoipaiāito tsōa ea nikamisma. Nāskax omiskōixikani. Nāskakē ē ato afeskafatiroma, mē ato yoimis. ²⁷ Mē mato yoimis a Niospa fichipaiyai keskafakī ē mato yoikaspamisma. ²⁸ Nāskakē kexemesharakāfe, a Nios Ifofaafori ato kexesharakāfe. Niospa Yōshi Sharapa mato īkināki, a Nios Ifofaafo mā ato kexesharanō. Jesús nokoōnoax nai āfe imi foniki. ²⁹ Mē mato makinoax kaano, chipo a fanīrira yoimisfo chakafo fekani mato fanīrira yoipaikani. Oa poomānā chaxo fichixō pitiro keskafakī mato pārapaikani mā anā Jesús shinānōma. ³⁰ Afianofi mā fetsa mā ranā mā pārānōnāxii nō Niospa meka tāpiara ixō mā ato pāraxii, a Nios Ifofaafāfe mato nikanōfo. ³¹ Kexemesharakōikāfe, akka shinākapo. Tres xinia ē ani Niospa meka

sharaōnoa mato yoikī. Penata yoita, fakishi yoikī ē mato famis, Niospa meka sharaōnoa ē mato yoi ē oiamis.

³² “Akka efe yora mīshtichi, iskaratīa ē Epa Nios kīfi mato kexesharanō, a mato noiai keskafakī āfe meka shara mato mēra nanenō. Nāato āfe kerex sharaōxō āfe meka shara mato inātiro mato mēra nanesharanō askatari a yoiyoni keskafakī afe yorakōifo ato afara ināsharakōitiro afe ĩpaxanōfo. ³³ Ēakōi ē afaa fipaimisma, askatari ē mato kori yōkamisma, rapatiri ē tsoa yōkamisma.

³⁴ Askatamaroko ēfe mifikōichi ē yonofaito mā mā ōimis, a ē fichipaiyai fixiki, a efe ikafori ato ināxiki. ³⁵ Mē mato ōimamiski afeskaxō mā yonotiromāki, a omiskōiaifo ato axosharayanā. Nōko Ifo Jesús āfe meka sharaōnoa shināyanā fetsafāfe noko afara ināino nō inimatiro keskai, ‘Nōri fetsafo afara ināsharai nō inimaifinakōitiro,’ ixō nōko Ifāfe noko yoini,” Pablo ato fani Efeso anoafō.

³⁶ Mā ato yoikī askafata ratokonō mai chachipakefofā Pablo ato Epa Nios kīfixoni. ³⁷ Anoax keyokōi oiayanā Pablo ikōketsayanā kokoketsanifo.

³⁸ Shināmitsakōinifo: “Ē anā mato ōinakamara,” ato faino, askakāta afe fakafā kešemē fonifo Pablo kaito ōifokani. Nāskax Pablo kanōanāfānē nanekaini mā kai.

21

Pablo Jerusalén ano kani

¹ Anoa a Nios Ifofaafō nō ato ōifaini, kanōanāfānē nō nanekaini kaax Cos ano nō nokoni. Anoax kaax pena fetsa Rodas ano nō nokoni, anā anoax kaax Pátara ano nō nokoni. ² Nā Pátara anoxō kanōanāfā nō fichini Fenicia ano kaino, nāo nō nanekaini. ³ Kakī fakafā nakirafe Chipre mai toomāfā nō ōifaini. Nā Chipre mai nōko pōya mishkiori ini. Nā finōfaini kaax Siria ano nō nokoni. Nānoxō pexe rasi Tiro fai fototai nokoxō kanōanāfā mēranao afama mīshtifo māpemanifo. ⁴ Nānoa a Nios Ifofaafō nō ato fichini, nāno nō ato fe siete nia oxani. Nāfāfe Pablo yoinifo Niospa Yōshi Sharapa ato shināmanaino iskafakakī: “Jerusalén ano kayamafe. Anoxō mia retepaikani kiki,” ixō yoinifo. ⁵ Askafaifono mā siete nia finōta nō anoax kaino, keyokōi āto āfīfo fe āto fakefo fe nofe fonifo pexe rasi pasotai. Nānoxō nā māshifā anoxō ratokonō mai chachipakefofā nō Epa Nios kīfini. ⁶ Nāskata mā nō kakī nō ato yoisharaketsata, kanōanāfā mēra nō naneinākafani, akka atii anā fenifo āto pexe ano.

⁷ Nāskata kanōanāfānē nō kai Tiro ano nō nokoni, nānoax kaax Tolemaida ano nō nokoni. Nānoax a Nios Ifofaafō fe nō ato fe yoināsharakōini, askatari nāno nō ato fe oxa fishtiyoni. ⁸ Nāskata nānoax kaax pena fetsa Cesarea ano nō nokoni. Nānoax Felipe pexe ano nō kani. Nā Felipe Niospa meka shara yoimis ini. A Jesús Ifofaafāfe afetīama Felipe ifinifo Jerusalén anoxō a piaifo ato paxkaxonō. Seis feronāfake fetsafoya Felipe ifinifo ato feta yononō. Nāato pexe ano nō nēteni. ⁹ Felipe fake xotofake cuatro inifo fenemais. Nāfāfe Niospa Yōshi Sharapa ato shināmanaino ato yoipaonifo. ¹⁰ Nāno nō oxa ranāni, nāno Judea anoax feronāfake āfe ane Agabo nokoki nokoni. Nāato Niosnoa yoimis ini, a inōpokoai yoikī. ¹¹ Mā noko ano nokoxō, Pablo āfe nanexemeti fīata, aō metexkere ita aō otxekere ini. Nāskaxō ato yoini iskafakī: “Niospa Yōshi Sharapa ea yoi Jerusalén anoxō judeofāfe na nanexemeti ifo iskafaxikani. Nāskaxō yora fetsafo ināxikani,” ixō Agabo ato yoini.

¹² Noko askafaito nikakī Cesarea anoafō feta, “Jerusalén ano kayamafe,” nō Pablo fani. ¹³ Askafaifono Pablo noko kemani iskafakī: “¿Afeskakī mā oiayanā mā ea shināmitsamanimē? Mē itipinīshara ea nexayamakakī ea retekani Jerusalén anoxō, nōko Ifo Jesúsxō ea askafakani,” Pablo noko faito,

¹⁴ nō anā afaa fanima noko nikayamaito. Nāskaxō nō yoini iskafakī: “Nōko Ifāfe nā mia apaiyai keskafanō,” ixō nō yoini.

¹⁵ Mā askata nō itipinī fani, nāskax nō Jerusalén ano kani. ¹⁶ Nō kaino a Nios Ifofaafo ranāri nofe fonifo Cesarea anoax. Nāfāfe noko iyonifo feronāfake āfe ane Mnasón pexe ano, nā Mnasón Chipre anoa ini. Nāato afetiama Nios Ifofakī taefani. Nāskaxō āfe pexe anoxō noko ifini ano nō oxanō.

Pablo Santiago ōikai kani

¹⁷ Mā nō Jerusalén ano nokoano a nofeta Jesús Ifofamisfāfe noko ifinifo nokoki inimakōiyānā. ¹⁸ Askata pena fetsa Pablo nofe kani Santiago ōikai. A Nios Ifofaafo ato kexemisfori nāno inifo. ¹⁹ Mā atoki nokoxō Pablo ato yoisharakōini. Nāskaxō ato yoipakeni a Niospa aōxō a judeofoma ato chanīmara famakōikē.

²⁰ Ato yoiaito nikakakī, “Nios fāsi sharakōi,” fanifo. Nāskaxō Pablo yoinifo iskafakakī: “Nofe yorashta, nō mia yoisharapai, mā mī ōimiski na judeofāfe ichapakōichi mā nōko Ifo Jesús chanīmara fafiakaxō, nāfāfe a Moisés yoini keskara nikapaikōimisfo. ²¹ Nāfāfe yoiafo judeofo a yora fetsafo mēra ikafo mī ato yoikē iskafaki: ‘A Moisés yoini keskara nikayamakāfe,’ ixō mī ato yoikē, ‘Askatari māto fakefo foshki repa xateyamakāfe, askatari a mā imis keskai anā askayamakāfe,’ ixō mī ato yoimiskē. ²² Akka, ¿nō afeskaimē, yorafāfe nikakani mā mī nono oano? ²³ Akka nā nō mia yoiai keskafe. Na cuatro feronāfakefāfe Nios yoiafoki iskafakakī: ‘Epa Niosi, mī noko yoia keskai nō askakōikai,’ ixō yoiafoki. ²⁴ Akka na cuatro feronāfake fe Nios yoiti pexefā mēra katāfe, nō imis keskai ato fe ife māto chaka soaxikakī. Mī ato kopifaxōfe mato testeaifono. Mī ato askafaito ōikakī keyokōichi tāpitirofo a mīōnoa yoiaifo āa chanīkani. Askatamaroko mīri a Moisés yoini keskara mī nikakōimis. ²⁵ Akka a judeofofāfema a Jesús Ifofaafāfe mā chanīmara fakōinafo. Akka mā nō ato kirika kenexona iskafakī: ‘Nō nami pitiroma na nōko niosra ixō afara onifakaxō fetsafāfe ināfono. Askatari yoināfo āfe imiri nō ayatiroma. Askatari yoinā ina fakaxō tetoxakafo āfe imi foyamaitori āfe nami nō pitiroma, askatari nōko āfima nō chotatiroma, kēromāri āfe fenema chotamatiroma,’ ixō nō ato yoia,” Pablo fanifo.

Nios kīfiti pexefā mēraxō Pablo achinifo

²⁶ Nāskafaifono nā cuatro feronāfake Pablo ato iyonī. Nāskata pena fetsa ato fe Nios kīfiti pexefā mēra ikini, āto chaka soaxikakī. Nāskata a Nios kīfiti pexefā mēra ikikaini xanīfo yoixiki a Epa Niospa yoini keskara afetiā keyoimākai, nā tiitori yoinā retexō Epa Nios ināpaikakī.

²⁷ Mā siete nia ikano judeofo Asia mai anoax fokaxō Nios kīfiti pexefā anoa Pablo ōikakī yorafo yoinifo Pablo chakafakī mekafanōfo. Ato askafai-fono Pablo achinifo. ²⁸ Mā Pablo achikaxō fāsikōi ato yoinifo iskafakakī: “Israelifāfe, nofeta nākifēkape, a na feronāfake kafāsakī yorafo ato pārafōfāsa famiski. Nōko maifo tii anoa ato chakafakī yoimiski. Askatari a Moisés noko yoini anori nikayamakāfe ato fai. Askatari nōko Nios kīfiti pexefā chakafakī mekafai. Askatari nōko Nios kīfiti pexefā sharafinakōifiano chakafaa, a mēra nōko kaifoma griego yorafo ikimana,” fanifo. ²⁹ Akka taeyoi Pablo ōinifo pexe rasi ano nā Trófimo fe kafāsaito. Nā Trófimo Efeso anoa ini. Na Pablo nōko Nios kīfiti pexefā mēra Trófimo ikikinaki ixō shinānifo aa yamafiano.

³⁰ Nāskakē pexe rasi anoax mekai fetsenifo, nāskaifono yorafo nikaferakani ichonifo. Nāskakaxō Pablo achikaxō Nios kīfiti pexefā mēranoa kāimanifo. Nāskata Nios kīfiti pexefā koshikōi feponifo. ³¹ Nāskaxō mā chaima reteafono, romanō anoa sorarofāfe āto xanīfāfe nikani pexe rasi Jerusalén anoafāfe yōachēpeaifāfe. ³² Nāskaifāfe nikakī a soraro xanīfāfe a afe rafeafoya āfe

sorarofo ichanāfani. Nāskax ato fe koshikōi ichoni yorafo mēra, a soraro xanīfo āfe sorarofo fe kaito ōikakī anā tsōa Pablo seteketsanima enerisafanifo.

³³ Nāskata a soraro xanīfāfe mā Pabloki kaxō mā achixō, cadenās rafeta ato metexkere amani. Nāskaxō chipo yōkani tsoamāki, askatari afaa afeska faamāki. ³⁴ Akka askafaino yorafo fanīrira mekai fetsenifo anoris yoinifoma. Nāskai mekai fetseafono soraro xanīfāfe tāpitiroma ini. Nāskaxō sorarofo mēra ato iyomani. ³⁵ Mā chaima sorarofo mēra nokoikaino, anoxō yorafāfe retapaiyaifono, sorarofāfe Pablo chishtokaxō iyonifo yorafāfe afeska fanōfoma. ³⁶ Nāskakē keyokōi acho fokani fāsikōi mekafonifo. “Aa chaka reterisafakāfe,” ato faafonifo.

Askafafono yorafāfe ferotaifi Pablo ato yoini

³⁷ A sorarofo ika mēra mā ikimanaifono, a sorarofāfe āto xanīfo Pablo yōkani: “¿Ē mefe pishta mekatromē?” faito soraro xanīfāfe kemani iskafakī: “¿Griego mekapa mī mekatromē? ³⁸ Akka, ¿mīmamē a Ejipto anoa afetiama xanīfo potapaiyanā cuatro mil yorafo tsōa istoma iyonifo?” ixō xanīfāfe yōkani.

³⁹ Askafaito nikakī Pablo kemani iskafakī: “Maa, ēma. Ēfi judeoki. Ēfi Tarso anoax fakeakī nā peixe rasi Cilicia mēranoax. Akka na yorafo ē ato yoinō ea yoife,” faito, ⁴⁰ nā soraro xanīfāfe, “Mī ato yoitiro,” fani. Nāskafaino Pablo kipiti ano niinākakāfā mēshainākakāfā, “Mekayamakāfe,” oinoma ato fani. Mā ato nishpafaxō hebreo mekapa iskafakī ato yoini:

22

¹ “Efe yora mīshtichi, ea nikakāfe ē mato yoinō ea chakafafo keskara, ea anā chakafayamanōfo,” ixō ato yoini.

² Hebreo mekapa ato yoiāito nikakani, tsoa pishta tooxinima. Askaifono Pablo anā ato yoini, ³ “Ēri judeo. Tarso anoax ē fakea, Cilicia mai anoax. Akka ē nono Jerusalén anoax yosia, ēfe maestro Gamalielxō ē tāpia. Na Moisés nōko xinifo yoipaoni anori ē yoimis. Mēxotaima ē shinākōimis ēfe ōitifoyaxō ē Nios Ifofapaikī. Nā mā Nios Ifofapaiyai keskafakī ēri askafapaoni. ⁴ Taefakī a Jesús Ifofaifo ē ato omiskōimakī ē ato retepaipaoni. Nāskaxō ē ato achixō karaxa mēra ē ato ikimapaoni, feronāfakefoya kērofo. ⁵ A ato Nios kīfixomisfāfe āto xanīfofo feta a xanīfo fetsafāfe mato yoitirofo nā ē mato yoiāi keskara. Nāfāfe ea kirika kenexō inānifo, nofe yorafo judeofo Damasco anoāfo ē ato foxotanō. Nāskax ē ari kani a Nios Ifofaāfo ato fenaikai, ato achixō Jerusalén ano ato efexiki anoxō ato omiskōimaxiki,” ixō Pablo ato yoini.

Pablo afeskaxō Jesús Ifofamāki ato yoini

(Hch. 9.1-19; 26.12-18)

⁶ Anā Pablo ato yoini iskafakī: “Akka fāi kaikī mē chaima Damasco faikaino, nānoxō xini keya oa luz keskarato nai mēraxō ea chaxakōitani. ⁷ Ea askafaino ē nāmā pakeni. Nāskaxō mekaito ē nikani, ea iskafaito: ‘Saulo, Saulo, ¿afeskakī mī ea omiskōimanimē?’ ea faito. ⁸ Ea askafaito ē yōkani iskafakī: ‘¿Mī tsoamē, Ifo?’ ē faito ea kemani iskafakī: ‘Ēkīa Jesús Nazarete anoa, nā mī ea omiskōimanai,’ ea fani. ⁹ A efe foaifāfe luz keskarato ea chaxatanaito ōikani ratenifo. Akka a ea yoi mekaito tsōa nikanima. ¹⁰ Ea askafaito ē yōkani iskafakī: ‘¿Ifo, ē afeskatiromē?’ ē faito, nōko Ifāfe ea iskafani: ‘Fininākakāfāta Damasco ano katāfe. Anoxō ē mia yoi kaikai mī afaa afeskafaimākai,’ ea fani. ¹¹ Akka anā ē fēro ōitiroma ini, nā luzpa ea fechaxki mā ea fēxoano. Nāskakē a efe foaifāfe ea mētsoxō Damasco ano iyonifo.

¹² “Nāno feronāfake āfe ane Ananías ika ini. Nāato Nios nikakōixō a Moisés yoini keskara nikakōipaoni. Nānoxō judeofāfe Damasco ano ikaxō aōnoa yoisharapaonifo. ¹³ Ē Damasco ano nokoano ekeki Ananías oni ea ōiyoi. Mā

ekeki oxō ea iskafani: ‘Efe yorashta Saulo, anā ōife,’ ea faino koshikōi ē anā fēro ōini. Nāskaxō ē ōisharakōini. ¹⁴ Anoxō ea yoini iskafakī: ‘Nōko xinifāfe āto Niospa mia katoa, a mia amapaiyai keskara mī tāpinō. Askatari āfe Fake sharafinakōia mī ōinō, āfe meka sharafinakōia nikayanā. ¹⁵ Nāskaxō mī ato yoixii Niosnoa, nā maniafo tii anoa, nā mī ōiaifoya, nā mī nikaifo. ¹⁶ Nāskakē samarakakima koshikōi fininākafāta maotisafe faka mēra ikipakekafāfe nōko Ifāfe āfe aneōxō mia chaka soaxonō,’ ea fani” ixō Pablo ato yoini.

Pablo ato yoini a judeofoma mēra Epa Niospa nīchini

¹⁷ Anā Pablo ato yoini iskafakī: “Mē Jerusalén ano anā oax, Nios kīfiti pexefā mēra ē kani anoxō Nios kīfikai. Nānoxō ē ōia oa namakē ōia ē fani. ¹⁸ Ē nōko Ifo ōini ea iskafaito: ‘Nā Jerusalén anoax koshi tsekekaitāfe, mī eōnoa yoiaito mia tsōa nikaima kiki,’ ea fani. ¹⁹ Ea askafaito ē kemakī iskafani: ‘Ifo, mā ea tāpiafo nā ichanāti pexe mēranoafo kaxō ē ato achixō karaxa mēra ē ato ikimapaoni a mia Ifofaifo. Askatari ē ato koshaketsapaoni. ²⁰ Askatari a mī inakōi Esteban reteaifono, ěri nāno ato fe ini reteaifono. Nāskaxō ē ato rapati kexexoni.’ ²¹ Ē askafaino nōko Ifāfe ea yoini: ‘Fininākafāta fāi katāfe, mai fetsafo ari chaikōi ē mia nīchikai a judeofoma ari,’ ea fani,” ixō Pablo ato yoini.

Soraro xanīfāfe Pablo kexeni

²² Ato askafaito nikakani, akka fāsikōi yorafo mekainīfofānifo: “Na feronāfake chaka retefe anā niyamanō,” fayanā chakafakī mekafanifo. ²³ Nāskakakī ōitifishkikī finayanā fāsikōi mekakakī āto rapati taa taa ayanā fomākīa mapo saakī fetsanifo. ²⁴ Askafaiāfe nikakī a soraro xanīfāfe ato yoini Pablo karaxa mēra ikimanōfo, koshaketsakaxō, nāskafafono ato yoinō afeskai a yorafo akiki chakai mekakanimākai. ²⁵ Akka mā metexkereakaxō koshapaiyaifono, a soraro xanīfo fētsa Pablo yoini iskafakī: “¿Tsōa mia yoiamē mā romanō koshanō xanīfo yōkaxoma?”

²⁶ Askafaito nikai a soraro xanīfo āfe xanīfokōi yoikai kani iskafakī: “¿Mī afeska faimē, na feronāfakeri nofe romanō?”

²⁷ Askafaito nikakī soraro xanīfokōi Pablo ano kani yōkaikai. “¿Mī chanīmamē mī romanōmē?” ixō yōkaito, “Ēje, ěri romanōki,” Pablo fani.

²⁸ Askafaito nikakī a xanīfāfe yoini iskafakī: “Ē romanō ixiki kori ichapa ē ato ināni, akka taeyoi ē romanō iyopaonima,” faito nikaki, Pablo kemani iskafakī: “Akka ěfi romanōkōiki,” fani.

²⁹ Ato askafaito nikakani a koiro fichi koshapaiyaifo a makinoax fonifo. Nā soraro xanīfāfe mā tāpiax Pablo romanōkōikē nikai ratekōini cadenānā ato metexkerekamax.

Judeofāfe āto xanīfāfe ferotaifi Pablo yoini

³⁰ Nāskata pena fetsa soraro xanīfokōichi tāpipaikōikī judeofāfe aōnoa afaa yoiafomākī, a cadenānā menexafo mēpeni. Nāskaxō ato ichanāfani a Niosnoa ato yoimisfo ato kexemisfoya, a xanīfokōifo. Nāskaxō Pablo kāimaxō āto ferotaifi nīchini.

23

¹ A xanīfofo ōikī Pablo ato yoini iskafakī: “Efe yora mīshtichi, nā Epa Niospa ea yoikī taefani keskai, nē askakōimis. Ēfe ōiti mēraxō ē Nios shinākōiyanā ē sharakōimis,” ixō ato yoini.

² Akka Ananías ato Nios kīfixomis āfe xanīfo ini. Nāato a Pablo ketaxamei nia yoini Pablo apasnō. ³ Askafaito ōikī Pablo kemani iskafakī: “Epa Niospa mia koshai mīkai afaa tāpiaama. Mī ano tsaoxō mī ea pārai a Moisés yoini keskara

nikaimara ixõ. Akka mĩroko a Moisés yoini keskara nikakaspakĩ, mĩ ea ato apasmana,” ixõ Pablo yoiaino, ⁴ a anoxõ õiaifãfe Pablo iskafanifo: “¿Afeskakĩ a ato Nios kĩfixomis xanĩfo mĩ chakafakĩ mekafaimẽ?” faifono, ⁵ Pablo ato yoini: “Efe yora mĩshtichi, ã tãpiama nato ato Nios kĩfixomis xanĩfofiano. Akka kirika ano kenekĩ iskafanifo: ‘Mãto xanĩfo chakafakĩ mekafayamakãfe,’ ixõ yoinifo,” ixõ Pablo ato yoini.

⁶ Nãskaxõ mã tãpixõ ano fisti ichanãfono saduceofoya fariseofo fãsikõi Pablo ato yoini: “Efe yora mĩshtichi, ãri fariseo, ãfe kaifofori fariseofo. Akka ea chakafakĩ mekafakani, yora naax anã ototirora ixõ ã chanĩmara faino.”

⁷ Pablo ato yoikĩ askafaito nikakani, fariseofo fe saduceofo ãa ranã feratenãnifo. Nãskakanax ichanãkanax paxkanãnifo. ⁸ Akka saduceofãfe yoimisfo: “Naax nõ anã ototiroma,” famisfo. Askatari anokai ãjirima anorikai nõko yõshima famisfo. Akka fariseofãfe keyokõi chanĩmara famisfo. ⁹ Nãskakanax fãsikõi mekainĩfofãnifo, akka nãno ranãri inifo a Moisés yoikĩ kirika keneni keskara ato tãpimamisfo. Nãfo fariseofo inifo, nãfãfe niinĩfofãkaxõ yoinifo iskafakakĩ: “Na feronãfakekai afaa chakafama. Õitsai, yõshi sharapa yoiyamãki Niospa ãjirinĩ yoia rakikã,” ixõ yoinifo.

¹⁰ Ato askafaino fãsikõi mekai xatenifoma. Nãskakaxõ Pablo achikaxõ nini nini akanaifono nã soraro xanĩfo ratekõini. Nãskakẽ ãfe sorarofõ kenamani, ato anoa ifixõ anã ãfe pexe ano iyoikaxiki.

¹¹ Nã fakishi Pabloki nõko Ifo nokoxõ iskafakĩ yoini: “Pablo, inimafe. Na Jerusalén anoafõ eõnoa mĩ ato yoimis keskafakĩ na Roma anoafõri ato yoife,” fani.

Pablo retexikakĩ itipinĩsharanifo

¹² Nãskata pena fetsa ranãri judeofo yoinãnifo Pablo retexikakĩ. “Nõ Pablo retexoma nõ foni tenekĩ taefanõ, afaa piamata afaari nõ ayaimakai, noko Niospa retetiroki. Akka mã Pablo retexõ chipo nõ pixikai,” ikanax yoinãnifo.

¹³ Cuarenta feronãfakefo anori yoinãnifo. ¹⁴ Nãskakata nã feronãfakefo fonifo a ato Nios kĩfixomisfãfe ãto xanĩfofo fe a judeofãfe ãto xanĩfofo ikafo ano. Iskafakĩ ato yoifokani: “Nõ yoia iskafakĩ: ‘Pablo reteyoxoma, nõ foni teneyoi nõ afaa piyamata afaari nõ ayaima. Nõ askayamaino Epa Niospa noko retetiro,’ ixõ nõ yoia,” fanifo. ¹⁵ “Akka iskaratĩa mã na xanĩfo fetsafo feta, na soraro xanĩfo yoikãfe mato ano penama Pablo efenõ. Feparaxõ yoikĩ iskafakãfe: ‘Nõ Pablo yõkasharapaikai noko nĩchixõfe nõ yõkanõ afaa aõnoa yoiafomãkĩ,’ ixõ yoikãfe. Oaito õikĩ nõ achixõ reterisafanõ,” fanifo.

¹⁶ Nãskaifono Pablo ãfe pĩaka nikani nõ Pablo retenõ ikaifono. Nãskax sorarofõ mẽra kani anoa ãfe koka Pablo yoikai. ¹⁷ Mã Pablo nikaxõ, soraro xanĩfo fetsa kenaxõ yoini iskafakĩ: “Na naetapa xanĩfokõi ano iyotãfe, afara yoipai kiki,” fani.

¹⁸ Nã soraro xanĩfãfe ãfe xanĩfokõi kenaxõ yoini iskafakĩ: “Na karaxa mẽra ikato Pablo ea kenaxõ ea yoia na naetapa ã mikiki efenõ afara mia yoipai kiki,” faito, ¹⁹ nã xanĩfokõichi nã naetapa mëtsofaixõ a fisti iyoxõ orixõ yõkani: “¿Afaa mĩ ea yoipaimẽ? Ea yoife,” faito, ²⁰ nã naetãpa yoini iskafakĩ: “Mã judeofo yoinãfo, mia yoixikakĩ mĩ penama a xanĩfofo ichanãfo ano mĩ ato Pablo iyoxonõ. Mia feparapaikani nõ Pablo yõkasharapai aõnoa nõ nikasharapai mia fai fekani. ²¹ Akka mia askafaifono ato nikayamafe. Cuarenta feronãfakefo fai nẽxpakã kexekaxõ ãfe koka manafoki achikaxõ retexikakĩ. Nõ Pablo retexii nõ foni tenekĩ taefanõ afaa piyamata afaari nõ ayaimakai. Nõ askayamaito Epa Niospa noko retetiroki. Akka mã Pablo retexõ chipo nõ pikai ikax yoinãfo, mã itipinĩkõikaxõ mia manafõ mĩ ato afafaimãkai,” ixõ nã naetãpa yoini.

²² Askafaito nikakĩ a soraro xanĩfãfe nã naetapa nĩchini, “Na ea mĩa yoiyai anori tsoa yoiyamafe,” fayana.

Pablo xanĩfo Félix ano nĩchinifo

²³ Nãskaxõ a soraro xanĩfokõichi afe xanĩfo rafe kenaxõ ato yoini dos cientos sorarofõ yoixõ nĩchinõfo, askatari setenta kamayonõ fotanõfo, askatari dos cientos sorarofõ ashifoya fotanõfo Cesarea ari fõkani fakishi. ²⁴ Nãskata kamayori ato itipinĩfamani a kamaki Pablo tsaoax kanõ. Nãskaxõ ato yoini kexesharata iyotanõfo xanĩfo Félix ano. ²⁵ Nãskaxõ kirika kenexõ ato inãni a xanĩfo Félix foxotanõfo iskafakĩ kenexõ:

²⁶ Efe xanĩfo Félix, ekĩa Claudio Lisias, ẽ mia kirika kenexõ fomai mia yoisharayanã. ²⁷ Na feronãfake judeofãfe achixõ retepaiyafono, akka ẽ nikaita ẽri romanõki ikaito, nãskaito nikakĩ ẽfe sorarofõ fe kaxõ ẽ ifita. ²⁸ Afaa chakafaamakĩ ẽ tãpipaikĩ, judeo xanĩfofo ichanãfo ano ẽ iyoita. ²⁹ Anoxõ ea yoiãifãfe ẽ nikaita, na Pablo a Moisés yoini keskara shinãima ea faifãfe. Akka afaakai chakafama retepanãfãfe, askatari karaxa mẽra ikimapanãfãfe. ³⁰ Akka mẽ tãpia judeofãfe ea feparapaiyãifãfe Pablo retepai kakĩ. Nãskakẽ ẽ mikiki nĩchi. A Pablo chakafaifori nãfori ẽ mia ari nĩchi, afaa Pablo chakafamakĩ mia yoinõfo. Nã tii ẽ mia yoi efe xanĩfãfe, ixõ keneni.

³¹ Ato xanĩfãfe ato yoiã keskafakĩ kexesharakõixõ, fakishi Pablo iyonifo Antípatris ano. ³² Askata pena fetsa sorarofõ atiri nẽteferakani ãto pexe ano fenifo a tãe foaifo. Akka a kamayonõ foaifo Pablo fe fonifo. ³³ Mã Cesarea ano nokokaxõ xanĩfo ano Pablo iyonifo, a ãto xanĩfãfe kirika kenexõ manamana, nã xanĩfo Félix inãnifo. ³⁴ Mã a kirika kene anexõ, nã xanĩfãfe Pablo yõkani: “¿Mĩ fanĩamẽ?” faito, “E Cilicia anoa,” Pablo faito nikakĩ, ³⁵ anã yoini iskafakĩ: “A mia mekafakĩ chakafaifo mẽ fekaxõ mĩõnoa yoiãifãfe ẽ nikanõ mia afaa fakanimãkai ẽ ato manayonõ,” ixõ yoini. Nãskaxõ sorarofõ yoini Herodes xanĩfo ika ano iyoxõ Pablo kexesharakõinõfo.

24

Pablo xanĩfo Félix yoini

¹ Mã cinco nia oxata nã ato Nios kĩfixomis xanĩfokõi, ãfe ane Ananías, Cesarea ano oni. Judeofãfe ãto xanĩfo fetsafo fe feronãfake fetsari ato fe kani, ãfe ane Tértulo, nãato ato yoixomis ini. Nãfo xanĩfo ano fonifo, Pablo chakafakĩ mekafaxikakĩ. ² Mã nokoafono xanĩfãfe Pablo ifitanõfo ato yoini. Mã efeafono nã Tértulo Pablo yõani. Iskafakĩ nã xanĩfo Félix yoini: “Aicho xanĩfo, mẽ noko ãkinã nõ isharakõiaki. Aicho mẽ tãpisharakõiaki nõko maitio anoafõ mẽ ato yoisharakõimis noko chakafanõfoma. ³ Fanĩmã mĩshtixõ mẽ askafaito nõ nikamis. Nãskakẽ mẽ noko sharafamiskẽ nõ mikiki inimasharakõimis. ⁴ Akka ẽ mia yoikĩ, ẽ mia chai samaratapaimakai. Nõ mia yoiãito noko pishta nikayofe. ⁵ Na feronãfake mẽ nõ õimis ato fekaxtefamis, fakima mĩshtifo kafãsakĩ ato pãrafõsafakĩ judeofãfe anoris shinãnõfoma. Askatari ãto xanĩfo nazarenõfo ato mekamamis. ⁶ Askatari nõko Nios kĩfiti pexefã chakafakĩ mekafaito nikakĩ nõ achita. ⁷ Akka nã sorarofãfe ãto xanĩfo Lisias nomakinoa kerexkai ifita. ⁸ Anoxõ noko yoikĩ iskafaita: ‘Mãri Cesarea ano fotakãfe afaa Pablo chakafamakĩ, a xanĩfo yoixikakĩ.’ Nãskakẽ nõ mia ano oa. Yõkaxõ mẽ tãpitiro nã afara chakafakẽ aõnoa nõ yoiã keskara,” ixõ yoiãifono, ⁹ judeofãferi ano fisti ichanãkaxõ, nãnoriri yoinifo: “Chanĩma,” fanifo.

¹⁰ Askafaifãfe nikakĩ xanĩfãfe Pablo ãfe mẽkemã, “Mekafe,” faino, Pablo niinãkafã yoini iskafakĩ: “Inimakõikai ẽ mia yoi ẽ afaa chakafamisma. Mẽ tãpia na mai anoafãfe mẽ ãto xanĩfokõi, mẽ mẽ xini ichapa aka xanĩfokĩ.

¹¹ Akka mī ato yōkaxō mī tāpitiro ē oxa ichapama doce nia ē ika na Jerusalén ano ē oita anoxō Epa Nios kīfixikī. ¹² Ē tsofe feratenāito ea ōimisfoma, Nios kīfiti pexefā mēraxori ē tsoa mekafamisma, ichanāti pexe mēraxori ē tsoa mekafamisma, askatari a pexe rasi mēranoax ē tsofe feratenāito ea tsōa ōimisma. ¹³ Na yorafokai āa kaxpa chanītirofoma, ē afaa chakafaitokai ea ōiafoma. ¹⁴ Akka ē mia yoitiro nōko xinifāfe āto Nios ē shinākī ē kīfimis. Nōko Ifo noko yoipaoni keskafakī akka na yorafāfe āa chanīra ea famisfo. Akka a Moisés yoikī kirika kenenī nāri ē chanīmara fakōimis. A Niospa ato shināmanaino yoipaonifori, nāfori ē chanīmara fakōimis. ¹⁵ Akka na ea yōaifāfe a yora sharafoya yora chakafo nafono Niospa ato otofaxii chanīmara famisfo keskafakī ēri nā akaifo keskafakī chanīmara famis. ¹⁶ Nāskakē mēxotaima ē isharapaikōimis, shināsharakōita. Niospa mā ea ōimis, yorafāferi mā ea ōimisfo.

¹⁷ “Mai fetsa ari kafāsakī mē xini ichapa akatsaxakī, ēfe mai ano ē oita a afaamaisfo ato kori ināyoi, askatari a Nios kīfiti pexefā mēraxō Nios afara ināxiki. ¹⁸ Epa Niospa noko yoini keskarakōi ē faa. A nō imis keskai nē askakōikī Epa Niospa ferotaifi afaa chakafatama ē isharakōia. Akka yora ichapa ano efe ikafo. Askatari anoax tsoa fāsi mekaitama. Akka atiri judeofo Asia mai anoax fenixakakī ea ōiafo. ¹⁹ Nāfāfe ē afara chakafaito ea ōifikaxō ōafeskai afo feafomamamē, nonoxō ea yōaxikaki a ē afara chakafaito ōiafo keskara? ²⁰ Akka afo feyamaifono, nā nonofo mī ato yōkatiro ē afaa chakafaito ea ōiafomāki judeofāfe āto xanīfofōfāfe ferotaifi. ²¹ Akka ē anoxō fāsikōi mekainākafā ē ato yoita iskafakī: ‘Yora naax anā ototiro,’ ixō ē chanīmara faito, mā ea chakafakī mekafai ixō ē ato yoita,” Pablo xanīfo fani.

²² Akka na Félixpa Jesúsnoa tāpia ini. Nāskaxō shināni iskafakī yoianā: “Mā soraro xanīfo Lisias oxō ea yoisharaiyonō ē tāpisharanō mī afaa chakafaamākī,” ixō yoini.

²³ Nāskaxō xanīfo Félixpa soraro xanīfo fetsa yoini anā Pablo karaxa mēra ikimayonō a āfe yorafāfe pimapaikakī ōipaiyaifāferi ato ikimanō.

²⁴ Mā oxa ranāta xanīfo Félix anā oni āfe āfi Drusila fe. Nā āfe āfi judeo kēro ini. Nāskaxō Félixpa anā Pablo kenamani. Mā oxō Pablo ato yoiaito nikanifo Jesús meka shara afeskaxō nō Jesucristo Ifofatiromākī. ²⁵ Akka Pablo yoini afeskax nō isharatiromākī, askatari afeskax nōa nō kexemesharatiromākī. Jesús Ifofaxma naax omiskōipakenakafo ixō yoiaito nikai Félix ratekōini. Nāskaxō yoini iskafakī: “Iskaratīa katāfe ē mia anā kenaxikai afaa afeska fayamakī,” ixō yoini.

²⁶ Pablo askafaito nikakī Félixpa shināni ea Pablo kori ināno ē kāimatiro ixō. Nāskakī mēxotaima kenapaoni afe mekaxiki. ²⁷ Nāskakī anoxō xinia rafe anifo. Nāskatari Félix tsekeni anā xanīfo inima, fetsa ini xanīfoi, āfe ane Porcio Festo. Akka Félixpa karaxa mēranoa Pablo kāimanima, judeofāfe aōnoa yoisharakōinōfo.

25

Festopa ferotaifi Pablo yoini

¹ Festo nokoni xanīfo ixiki. Mā tres nia ikax Cesarea anoax Jerusalén ari kani. ² Nārixō a ato Nios yoixomisfāfe āto xanīfofōfāfe a judeo xanīfofo feta Pablo chakafakī mekafanifo. ³ Nāskaxō Festo yōkanifo Festopa ato yoinō Jerusalén ano Pablo iyotanōfo. Akka atiito shinānifo fai nēxpakīaxō nō Pablo retenōra ikaxō. ⁴ Askafaifāfe nikakī akka Festopa ato kemani iskafakī: “Pablo Cesarea ano karaxa mēra ika. Akka ari mē samama kai,” ato fani. ⁵ Nāskaxō ato yoini iskafakī: “Nāskakē māto xanīfofo Cesarea ano efe fotirofo, na Pablo afaa chakafaamakī arixō yoixikakī.”

⁶ Festo Jerusalén ano oxa ranāyoni. Nāskata Cesarea ano anā oni. Nānoxō pena fetsa a xanīfofo tsaomisfo anoxō tsaoxō ato yoini Pablo ifitanōfo. ⁷ Mā Pablo oano ōikakī, judeofāfe Jerusalén anoax fēkaxō, akiki fokaxō mekafakī chakakōi fanifo. Askafaifono, “Afaa Pablo chakafamākī ea yoikapo,” xanīfāfe ato faito, tsoa afaa inima Pablokairoko afaa chakafaito ōikanax āamāi noikas-pakakī. ⁸ Askafaifāfe nikakī Pablo ato kemani iskafakī: “Ēkai afaa chakafama, a Moisés judeofo yoini keskarari ē chakafamisma, a anoxō Nios kīfiti pexefāri ē chakafamisma, askatari romanō xanīfori ē chakafakī mekafamisma.”

⁹ Askafaito nikakī judeofāfe nōko xanīfo Festo sharakōira fanōfo Pablo yōkani iskafakī: “¿Mī Jerusalén ano kapaimē? Anoxō ē ōikanō mī afaa afeska famāki.”

¹⁰ Askafaito nikakī Pablo kemani: “Ē ari katiroma mīrimāi romanōfāfe xanīfokē nonoxō ea yōkatirofo. Mā mī tāpia, ē judeofo chakafamisma. ¹¹ Akka ē afara chakakōifaito ea ōikaxō ea retetirofo. Ea retekanira ikax ē meseima. Akka ē afaa chakafayamaito āa ea pārakaxō ea ari nīchitirofoma ea retenōfo. Akka ē xanīfo finakōia César ano ē kapai anoxō ea yōkanō.”

¹² Askafaito nikakī Festopa a afe rafeafo feta yoini: “Mā mī yoiaki xanīfo finakōi ari katāfe arixō mia xanīfāfe yōkanō,” fani.

Xanīfo Agripa ano Pablo iyonifo

¹³ Mā ano ikatsaxakī pena fetsa xanīfo Agripa āfe chiko Berenice fe Cesarea ano fonifo Festo fe mekasharai fokani. ¹⁴ Nāri oxa ranāifono, Festopa Pabloōna xanīfokōi iskafakī yoini: “Na karaxa mēra feronāfake fisti ika Félixpa ikimayameano. ¹⁵ Ē Jerusalén ano ikano a Nios ato kīfixomisfāfe āto xanīfofo fe judeofāfe āto xanīfofo ekeki fēkaxō Pablo chakafakī mekafaitafo iskafakī ea yoiyanā na feronāfake omiskōimafe ea faitafo.

¹⁶ “Ea askafaifono ē ato yoikī iskafaita: ‘Nō romanōfāfe askara feyafamisma nikasharaxoma nō tsōa retetiroma. A chakafakī mekafaifo fe ato fe yoināmano, afeskakī aōnoa yoikī chakafakī mekafakanimākai.’ ¹⁷ Nāskakē mā nono Cesarea ano feafono, pena fetsa mē xanīfoxō a xanīfofo tsaomisfo ano tsaoxō, ē ato manamayamea Pablo ifitanōfo. ¹⁸ Akka afaa chakafaamakī ea yoikapo ē ato fafiaino, tsōa aōnoa afaa chaka ea yoiama. Afara chakafakī finakē ea yoikanira ixō ē shināfiaino. ¹⁹ Akka aōnoa yoikī iskafaifāfe ē nikaita: ‘Na Pablo Niosnoa yoimisfo anori yoima, a feronāfake Jesús mā nafianino, mā anā otoyamea,’ ixō yoimisfaifāfe ē nikaita. ²⁰ Ē afeskaimē na yoiāifoōnoakai ē tāpiama ixō ē shināita. Nāskaxō ē Pablo yōkaita, Jerusalén ano kapaimākai xanīfāfe anoxō yōkanō a aōnoa yoiāifo keskara.

²¹ “Ē askafaito ea Pablo yoikī iskafaita: ‘Ē anā Jerusalén ano kapaima. Nonoxō ēfe xanīfokōichi ea yōkatiro,’ ixō ea yoita. Ea askafaito ē ato yoita anā Pablo karaxa mēra ikimanōfo, nā ē nīchiatīa,” ixō Festopa yoiāito, ²² Agripa yoikī iskafani: “Ēri na feronāfake nikasharapaikōi,” ixō Agripa yoiāito, Festopa kemani iskafakī: “Mī penama nikatiro,” fani.

²³ Nāskata pena fetsa Agripa āfe chiko Berenice fe rapati sharakōi safekanax xanīfāfe pexe mēra ikinifo. Soraro xanīfofo fe a pexe rasi anoa xanīfori ato fe ikinifo. Nāskaifono Festopa Pablo ifitanōfo ato yoini. ²⁴ Mā Pablo efeafono Festopa xanīfo Agripa iskafakī yoini: “Efe xanīfo Agripa, a xanīfo fetsafori nofe ichanāfāfe na feronāfakekīa ōikapo. Judeofāfe ekeki efeafō aōnoa afara chaka yoiyanā. Jerusalén anoxō chakafamisfo, nono Cesarea anoxori chakafamisfo. Mēxotaima fāsikōi mekayanā retefe ea famisfo. ²⁵ Akka afaa chakafakai ē ōima ē retepanā. Akka iskaito ē nika: ‘Ē xanīfo yoipai ē afaa chakafamākī ea yoinō,’ ixō Pablo yoiāito ē nika. ²⁶ Akka afaa chakafaitokai ē ōiama, aōnoa yoikī ēfe xanīfo ē kirika kenexō ē fomapanā. Nāskakē mato

ano ě Pablo efea mĩmāi xanĩfo finakõikē. Efe xanĩfo Agripa, mĩ Pablo yõkaxõ mĩ ea yoitiro nānori yoikĩ ě xanĩfo kirika kenexõ fomanõ. ²⁷ Akka ě shinā askara sharama na feronāfake xanĩfo ari nõ nĩchitiro ma tãpixoma afaa aõnoa yoiafomāki.”

26

Pablo xanĩfo Agripa ano kaxõ yoini a aõnoa chakafakĩ yoiafo keskara

¹ Nāskakē xanĩfo Agripa Pablo yoini iskafakĩ: “Mĩ yoitiro afeskakĩ mia chakafakĩ mekafafomāki,” faito Pablo mēshaināka fã ato yoini iskafakĩ: ² “Xanĩfo Agripa, ě inimakõi mĩ ferotaifi yoi na judeofāfe eõnoa afara chaka yoiafo keskara yoi, na eõnoa yoiafo keskara mĩ chanĩmara fanõma. ³ Akka mĩ xanĩfokõi mā mĩ õimis, nā judeofo imis keskai nõ yoināito. Nāskakē ě mia yoi, fekaxtekima mĩ ea nikayonõ,” ixõ Pablo yoini.

Pablo Jesús Ifofamax isharayopaonima

⁴⁻⁵ Anā Pablo ato yoini iskafakĩ: “Keyokõi judeofāfe tãpikõiafo a ě ato mēranoax imis keskara, ěfe mai anoxõ tãpikāta, Jerusalén anoxori tãpiafo. Askatari mā tãpiafo, akka mia yoipaikakĩ mia yoitirofo, ěri fariseo. Nā nõko xinifāfe noko yoipaonifo keskara ě nikakõimis. ⁶ Epa Niospa nõko xinifo yoini keskafakĩ, a yora naax anā ototirora ixõ ě chanĩmara faito, ea chakafakakĩ mato ano ea efeafõ. ⁷ ěfe kaifo judeofāfe nā doce xoko fetsafāfe, nā Epa Niospa yoiyoni keskara õipaikakĩ manamisfo. Nāskakē Epa Nios kĩfimisfo, penata kĩfita fakishi kĩfikĩ famisfo. Nāskarifiakĩ ěri õipaikĩ ě manaino, na judeofāfe āa ea pārakakĩ ea chakafakĩ mekafamisfo. ⁸ ¿Afeskakĩ mā chanĩmara faimamē, Niospa yora nakē otofafiatirono?” ixõ Pablo ato yoini.

Pablo ato yoini a Jesús Ifofaafo ato omiskõimapaonixakĩ

⁹ Anā Pablo ato yoini iskafakĩ: “Ēa shināxõ a Jesús Ifofaafo ě ato omiskõimapaoni. Nā Jesús Nazarete ano ikano, āfe ane nikakaspakĩ ě chakafapaoni. ¹⁰ Jerusalén anoxõ ě ato askafapaoni. A Nios ato kĩfixomisfāfe āto xanĩfofõfāfe ea yoiafono a Nios Ifofaafo ichapakõifo ě ato karaxa mēra ikimapaoni. Ato reteaifonori nõ ato retenõ ě ato fapaoni. ¹¹ Mēxotaima ě ato omiskõimapaoni, anā Jesús sharara fayamakāfe ixõ. Nā ichanāti pexefo mēraxõ ě ato askafapaoni. Ē atoki õitifishkikĩ finakõikĩ pexe rasi fetsafo mēra kaxori ě ato omiskõimapaoni,” ixõ Pablo ato yoini.

Pablo yoini afeskaxõ Jesús Ifofamāki

(Hch. 9.1-19; 22.6-16)

¹² Anā Pablo ato yoini iskafakĩ: “Nāskakē achixõ ě ato omiskõimapai pexe rasi Damasco ano ě kani, a Nios ato kĩfixomisfāfe āto xanĩfofõfāfe ea yoikaxõ ea nĩchiafono. ¹³ Xanĩfo Damasco ari fāi kakĩ ě õini xini keya nai mēraxõ chaxatanaito oa xinĩ chaxa keskara inima, chaxakĩ finakõini. Ea kemataima chaxakõia ini, a efe fofaifori ato askafani. ¹⁴ Noko askafaino nõ nāmā pakeni. Askata āfe meka ě nikani hebreo meka pa ea yoiaito iskafakĩ: ‘Saulo, Saulo, ¿afeskakĩ mĩ ea omiskõimanimē? Ea mĩa iskafai, mĩakõi mĩ chakamei oa fakka ifiki chachixõ pae meetiro keskai.’

¹⁵ “Ea askafaito nikakĩ ě kemakĩ iskafaita: ‘¿Ifo, mĩ tsoamē?’ ě faito, nõko Ifāfe ea kemakĩ iskafaita: ‘Ēkĩa Jesús, ea mĩa omiskõimamis. ¹⁶ Finināka fãfe ě mikiki nokoaki mĩ ea Ifofanõ. Askatari na mĩ õiai keskara mĩ ato yoinõ, a ě mia chipo õimanai keskarari. ¹⁷ Ē mia kexesharaxii judeofāfe mia retepaiyaifono, yora fetsafāferi mia askafafono ě mia kexesharaxii. Nāskakē ato mēra ě mia nĩchi. ¹⁸ Nāskakē ato mēra ě mia nĩchi, eõnoa mĩ ato yoinõ

anã fakish mēra nia keskara inōfoma, askatamaroko penata nia keskara shara inōfo, Satanás chakata ato yoiaito anã nikayamanōfo, askatamaroko Nios Ifofanōfo. Nāskakaxō ea chanīmara fakaxō afara chakafakatsaxakakī āto chaka xatekanax Niospa yoini keskai efe ipaxanōfo,' ixō Jesús ea yoini," ixō Pablo ato fani.

Jesucristo yoiaito namakē ōia keskarafaxō Pablo nikakōini

¹⁹ Anã Pablo ato yoini iskafakī: "Ēfe xanīfo Agripa, ē nikakaspanima a ē namakē ōia keskarafaxō nīi mēraxō ea yoiaito. ²⁰ Damasco anoxō ē ato yoikī taefani Jesúsnoa meka shara ato yoikī. Nāskata Jerusalén anoafori ē ato yoini, Judea mai anoafori ē ato yoini. Askatari a judeofoma ē ato yoini iskafakī: 'Māto chaka xatekāfe Nios Ifosharakōifaxikakī, askaxori afarafo shara fakī ato ōimakāfe mato chanīmara fanōfo mā Nios Ifofasharakē,' ixō ē ato yoiaito, ²¹ judeofāfe ea achinifo Nios kīfiti pexefā mēraxō ea retepainifo. ²² Akka ea retepaiyaifono Epa Niospa ea kexesharani, iskaratīari ē isharakōia Niosnoa ato yoianā. A xanīfokōifoya a afamafori ē ato yoimis. Afaa fetsa ē yoimisma. A ato Niospa shināmanaino Moisés feta yoipaonifo anori fisti ē yoimis. ²³ Iskafakī ato yoipaonifo, na Niospa nīchia Cristo omiskōiax naxii. Mā nafiax anã otoxii, mā otoxō ato yoisharax afeskax Epa Nios fe ipaxatirofomākī, judeofoya a judeofoma," ixō Pablo ato yoini.

Pablo Agripa shināmapaini akairi Jesús Ifofanō

²⁴ Pablo yoikī askafafiaino, Festopa mekatimafani iskafakī yoini: "Pablo, mā mī fekaxtekōia mēxotaima kirika fisti anekī tāpikōiax," fani.

²⁵ Askafaito nikakī Pablo kemani iskafakī: "Ēfe xanīfo Festo, ē fekaxtemisma. Askatamaroko na ē yoiai anori sharakōi, chanīmakōi ē mato yoi. ²⁶ Na ē mato yoiai anori nōko xanīfo Agripa mā tāpikōia a ē Jesúsnoa yoimis anori. Nāskakē xafakīakōi āfe ferotaifi ē yoi, akka mē tāpia na ē yoiai anori nāatori mā tāpia. Nā ē yoiai anori ē nikamisma mā itiroma onekai ē yoimisma. ²⁷ Ēfe xanīfo Agripa, a Niospa ato shināmanaino yoipaonifo keskara, ĵmī chanīmara faimē? Akka ē tāpia mī chanīmara fai," ixō Pablo Agripa yoini.

²⁸ Askafaito nikaki Agripa kemani iskafakī: "Mā mī ea chanīmara famakerana Jesús Ifofafe," ixō yoini.

²⁹ Askafaito anã Pablo yoini: "Iskaratīa iyamai afetīara ea keskara mī inō ē fichipai, askatari nā mā ea nikaifo keyokōi ea keskara mā inō. Nōko Ifo Jesús Ifofai nāskafiax karaxa mēra mā ikiyamanō ē imis keskai. Nānori ē mato Epa Nios kīfixomis," ixō Pablo ato yoini.

³⁰ Ato askafaito nikai xanīfokōi fininākafani, xanīfo fetsa fe, Bereniceri ato fe askani, a ano tsaofori ato fe fininīfofānifo. ³¹ Nāskakanax ori fokanax āa ranā yoinākani iskanifo: "Na feronāfākekai afaa chakafama afeskakīkai retetirofoma, askatari afeskai karaxa mēra itiroma."

³² Nāskaxō Agripa Festo yoini iskafakī: "Na feronāfake nō kāimakerana, ē xanīfo César ari kaimakai noko faino," ixō Agripa Festo yoini.

27

Pablo Roma ari nīchinifo

¹ Nāskakē shinākaxō Italia ano noko nīchinifo. Pablo yafi a afe karaxa mēra imisfo soraro xanīfāfe āfe ane Julio ato kexenō. Nā sorarofō, "Xanīfo finakōia kexemisfo," ato famisfo. ² Nānoax kanōanāfānē nō nanekaini. Nā kanōanāfā Adramitio fai fotoa anoax oaino mā itipinīkōiax Asia fai fotoa ano kaino. Aristarcori nofe ini, nā Aristarco Tesalónica anoa ini, Macedonia mai anoa. ³ Nānoax kaax pena fetsa Sidón fai fotoa ano nō nokoni. Nānoxō soraro xanīfāfe āfe ane Julio nāato Pablo noikōikī iskafani: "Mefe yorafo kaxō

ōitāfe afāfe nā mī fichipaiyai keskara mia inānōfo,” ixō yoini. ⁴ Nāskata Sidón anoax nō anā kanōanāfānē kaino, nēfefanē noko akaino nā fakafā nakirafe mai toomāfā āfe ane Chipre aōri nō kani, takai fetsaxomāi noko nēfefanē katimafaino. ⁵ Askata mā nō kakī Cilicia yafi Panfilia fakafā kesemēkōi nō finōfaini. Askata pexe rasi Mira ano nō nokoni. Nā pexe rasi Mira Licia mai anoa ini.

⁶ Nānoxō a soraro xanīfāfe kanōanāfā fetsa fichini Alejandría anoax okē. Nā kanōanāfā Italia anoax kaino, nāo noko naneni aō nō kanō. ⁷ Fenāmāshta kai nō oxa ranākōini, nō kanōanāfā tōfei nō xokenākōini. Nāskax pexe rasi Gnido okiri nō nokoni. Anoxō nēfefānē noko anā akaino, pexe rasi Salmona okiri nō finōfaini. Nā Creta anoa fakafā nakirafe mai toomāfā okiri nō kayakeni. ⁸ Nāskata nēfefānē noko katimafaino nō samarakakōi nō fekaxtekōini. Nāskata nō nokoni pexe rasi āfe ane Buenos Puertos ano. Pexe rasi Lasea chaima ini.

⁹ Nāskai mā nō ano samarakōiano, mā mechakaino fakafā pooiki mese-niaito ōikī anā katiroma meeki Pablo ato yoini ¹⁰ iskafakī: “Xanīfofōfāfe, nō katiromaki mesekōi iki kiki mē tāpiaki. Na kanōanāfā yafi nōko afama mīshtifo nō fenotiro, askatari nōri nō āsai fetsetiroki,” ¹¹ ato faino akka tsōa Pablo nikanima. Akka na kanōanāfānē ifāfe yoini: “Maa. Nō meseima, nō āsaima. Nō kanō fokāfe,” ato fani. Ato askafaino nā sorarofāfe āto xanīfāfe nā kanōanāfānē ifo nikanī. Nā rafeta Pablo nikanifoma. ¹² Akka nā fai fototai shara inima anoxō mechaka finōpaifiaifono nāskakē anoxō shinānifo: “Nō nonoax kanō Fenice ano,” ixō shinānifo. Nā pexe rasi Fenice Creta mai anoa ini.

Nēfefanē fakafā anoxō ato ani

¹³ Nāskaxō shinānifo: “Anā nēfefaima kiki, fenāmāshta nefei kiki na nēfe nō kanō,” ikax yoinānifo. Nāskata nānoax mā nō kakī Creta ketokonōkōi nō finōfaini. ¹⁴ Akka mā nō kaino chipo nokoki nēfefākerakī, fakafā pooiki kanōanāfā rafe rafe ani. ¹⁵ Noko askafaino fakafā ketokonō nō kapaifi-aino, noko katimafani. Nāskakē nā nēfefanē nā iyopaiyai ari noko iyoni. ¹⁶ Noko askafaino nā fakafā nakirafe mai tōo eapama āfe ane Cauda nō finōfaini. Nāno nō finōfainaino anā noko nēfe fāsi anima. Nāskakē a kanōa kafāshara chirotimea fāsi kerexkai kanōanāfā xaki mēra nanenifo. ¹⁷ Mā askafakaxō risfi eapato kanōanāfā nexasharakōinifo ato nēfe toōxayamanō. Nexakaxō āto sama poteti pekakaxō kanōanāfā mēra rātanifo, nēfe noko iyoyamanō nā mashi āfe ane Sirte ano ikaxō, “Nēfe noko fakirira iyoikanōra,” ikaxō. Nāskakaxō kanōanāfāki nexakaxō āto afeskarafakafānaki nōtanifo, nato nā noko iyopaiyai ari noko iyoikanōra ikaxō. ¹⁸ Akka pena fetsa anā nokoki nēfefani, nāskakē nā kanōanāfā mēranoa āto afama mīshtifo fakafā naki potaketsanifo. ¹⁹ Askakāta mā tres nia ikano nēfefā nishpayamaito ōi kakī āto risfifoya āto firofo, āto fitifo, āto samafo, fakafā naki potakī mitonifo. ²⁰ Nāskai nēfefā nishpayamaino xini yafi fishifo nō ōitiroa ini, nēfefanē noko ōitimafaino. Nāskatari anā afaa nō shinānima mā nō āsai fetseira ikax.

²¹ Nāskakī mā nō foni tenekī ranā faano, Pablo niinākakā noko yoini iskafakī: “Efe yora mīshtichi, nō afeskakeranama na Creta anoax fena foyamakāfe ē mato fafiaino mā ea nikaitama. Nōko afama mīshtifokai nō fenokeranama, mārikai omiskōikeranama. ²² Nāskakē rateyamakāfe. Mā āsaimakai. Kanōanāfā fisti fakafā mēra iki kiki. ²³ Na fakishi Niospa āfe ājiri ekeki nokoakī Niospa nīchiano, nā Niosfi ēfe Ifokōikī, nā ē yonoxomis. ²⁴ Ea iskafakī yoiakī: ‘Pablo, rateyamafe. Mī xanīfo César ano kaikai ato mia yōkanō mī afaa chakafamākī. Mīoxō Epa Niospa na kanōanāfā mēra mefe foaifo ato kexesharai kiki afeskakanima kiki,’ ixō ea yoiaki. ²⁵ Nāskakē ē mato yoikai efe yora mīshtichi, ratekakima inimakāfe. Epa Niospa ea yoiyai keskara ē

chanĩmara fakõimiski. Mẽ tãpiaki tsoa ãsaima kiki mã ea ãjirinĩ yoiaki. ²⁶ Akka fakafã nẽxpakĩa mai toomãfã anoax nõko kanõanãfã tooxai kiki,” ixõ Pablo ato yoini.

²⁷ Mã nõ catorce nia finõta fakafã ãfe ane Adriático ano nõ nokoni. Nãskakẽ nãnoxõ nẽfefanẽ nõ noko iyopaiyai ari noko iyoikaino, nõ fakish fistichi yamenake kafanaino a kanõanãfã mẽra yonomisfo yoinãnifo: “Mã nõ mai ano nokoikaira,” ikanax. ²⁸ Nãskakaxõ ãto tanãtinĩ faka noamãkĩ ixõ meenifo. Mã meekaxõ õiafo treinta y seis metros ini, askata afianã ori fokaxõ meeafõ veintisiete metros ini. ²⁹ Nãskakaxõ mesekakĩ nõ tokirinĩfakĩ nokoi katirora ikaxõ, cuatro faxõ ãto firopafãfo nexakaxõ kanõanãfãki chenexti fakaxõ fakafã naki potanifo, noko nẽfefanẽ iyoyamanõra ikaxõ. Nãskakaxõ Epa Nios kĩfinifo koshi penanõra ikaxõ. ³⁰ Nãskaifono akka a kanõanãfã mẽra yonomisfo onefaipainifo kanõanãfã mẽranoax. Nãskakẽ a kanõanãfã mẽranoa a kanõa kafãshara fotomapainifo. Nõ firopafãfo nexaxõ kanõanãfã renexite faxõ nõ fakanaki potaira ikaxõ ato feparapainifo. ³¹ Nãskaifono Pablo soraro xanĩfo yoini, ãfe sorarofõya iskafakĩ: “Nafo kanõanãfã mẽra nẽteyamaifono tsõa mato anã iyoyamaino, mã ãsai mitokomei,” ato faino, ³² sorarofãfe a aõ kanõa fotomapaiyaifo risfi xatenifo a kanõa fakanaki pakeano fãka fõtanõ.

³³ Nãskata mã penaino Pablo shinãxõ ato yoini afara pishta pinõfo. Iskafakĩ ato yoini: “Mã nõ nomĩko rafe akaki nẽfefã nishpaira ixõ, manayanã a mã pimis keskafakĩ mã afaa piamaki. ³⁴ Ë mato yoikai pikãfe. Nõ piach shara nõ itiroki anã mãto yora kerex inõ. Nõ afeskaimakai,” ixõ ato yoini.

³⁵ Ato yoikĩ askafata pãa tso mainĩfofã ãto ferotaifi, Epa Nios kĩfikĩ iskafani: “Aicho Epa Niosi, mã noko kexesharaki,” fata ato pãa pikĩni. ³⁶ Ato askafaino inimakõiyã anã ratekakĩma akairi pinifo. ³⁷ Akka nõ kanõanãfã mẽra docientos setenta y seis yorafo nõ ini. ³⁸ Mã pii mãyakõikãta ato trigõfo fakafã naki potanifo, kanõanãfã xaka inõ.

Kanõanãfã ikini

³⁹ Mã penaino a kanõanãfã mẽra yonomisfãfe, mã mai fichifikaxõ tsõa tãpinima. Akka a fakafã chitotanã anoa mashi fichikaxõ, “Ono nõko kanõanãfã nõ rĩtiaki kanõ,” inifo. ⁴⁰ Nãskakata a aõ kanõanãfã nexea ãfe risfi xatekaxõ nãnoa õifainifo. Nãskatari ãto fitifo pekaketsanifo kanõanãfã mẽstekõi iyoikanõ. Nãskata afianã kanõanãfã rechokoki ãto samapafã poteinĩfofãnifo ato nẽfe iyoikanõ. Nãskax mã fõkakĩ mashi chaima fanifo. ⁴¹ Akka mã fõfaifono kanõanãfã nẽ mashi tsakax nãno rakani. Refokirixori mashi tsakakõia ini, pishta ferõitiroma. Nãskakẽ aõ chipokirinoax toxai fetseni fãsikõi fãkafã poo ikaino.

⁴² Nãskaino sorarofãfe a karaxa mẽra imisfo ato retepainifo, tsoa pishta ichoyamanõ. “Keyokõi nõ ato retenõ,” ikax yoinãnifo. ⁴³ Akka a sorarofãfe ãto xanĩfãfe Pablo retepaikĩma, “Ato reteyamakãfe,” ãfe sorarõfo fani. Nãskaxõ ato yoini iskafakĩ: “Fatoto mã faka feakĩ tãpiamãkĩ faka feafaitakãfe mashi ano nokoxikakĩ. ⁴⁴ Akka a faka feakĩ tãpiafoma tii na kanõanãfã kaxkẽ aõ nonoax fonõfo,” ixõ soraro xanĩfãfe ato yoini.

Nãskakẽ keyokõi ãsaxma mashi ano nokonifo.

28

Pablo mai toomãfã ãfe ane Malta ano ini

¹ Mã nõ keyokõi fãkafã kesemẽ nokoxõ, nõ tãpini nõ fãkafã nẽxpakĩa mai toomãfã ãfe ane Maltakẽ. ² Nãnoxõ keyokõi noko ifisharakõinifo. Nãnoax nokoki oi ikaino, matsikõi ini. Nãskakẽ anoxõ chii ketefakaxõ, “Yoofẽkãfe,”

noko fanifo. ³ Pablo nānoxō karoya shano ikōferani chii ketefakī. Mā chii kete-faino chii xanamei shano kāikerani oxō mifikī chachini. Mā mifikī chachiax aō neetani. ⁴ Pablo āfe mifi shano ronokē ōikani āa ranā isakai fetsenifo: “A na feronāfāke ato retemis rakikīa. Fakafā anoax nokosharafiaino, mā Niospa shano chachimana nai rakikīa,” ikanax yoinānifo.

⁵ Akka Pablo metashkiri itakī shano chii nēxpakīa potani. Shanopa chachifiano Pablo paemenima. ⁶ Nāskakē keyokōichi ōiketsanifo faraxinākafanax naira ikaxō. Akka faraxiyamaito ōikakī, iskafanifo: “Nakai retemitsamisma, nafi nioski,” ikanax yoinānifo.

⁷ Anoxō shinā nā xanīfo Publio chaima ika ini. Nānori yorafo afe ikafo ini. Nā xanīfāfe āfe pexe anoxō noko ifisharakōixō noko pīchasharakōixoni, tres nia ano nō oxaino. ⁸ Nānoax Publio āfe apa isinī iki rakani, yonayanā chixoi. Nāskaino Pablo ōikai kaxō Epa Nios kīfixota āfe mifi māmāsharani. ⁹ Pablo sharafaito nikakanax a isinī ikaifori nā ika anoax feafono Pablo ato sharafapani. ¹⁰ Ato askafaito ōi kakī anoxō afama mīshtifo noko ināketsanifo. Nāskata mā nō ato makinoax kai kanōanāfā mēra nō naneikainaino, anā afama mīshtifo noko inānifo a nō kakī pifoikai.

Pablo Roma ano nokoni

¹¹ Nāskata anoxō mā nō tres oxe akax, kanōanāfā mēra nō naneinākafāni. Nā kanōanāfānē nā mai anoxō mechaka finōmani. Nā kanōanāfā Alejandría ano ini. Nā kanōanāfā recho koki afarafo tsaioxō fonifo na nōko niosra ikaxō, fetsa āfe ane Castor ini, fetsari Pólux ini. ¹² Nāskax nō nokoni Siracusa fai fotoa ano, nāno nō tres nia oxayoni. ¹³ Nānoax kanōanāfānē nō anā kai fakafā ketokonō pishtakōi nō kaax Regio ano nō nokoni. Nānoxō pena fetsa nēfefānē noko ani a xini oaikirinoaxma oxō. Nāskakē nānoax kaax pena fetsa nō nokoni Puteoli ano. ¹⁴ Nānoa a Jesús Ifofafo nō ato fichini nāfāfe noko yoikī iskafanifo: “Nono nofe oxa ranāyokāfe,” noko fanifo. Nāskata nānoax ato makinoax kaax chipo Roma ano nō nokoni. ¹⁵ Mā nō kaino nō Roma ano nokoyoamano a Jesús Ifofamisfāfe Roma anoxō nikaketsanifo. Nāskakē nokoki nokoifekani fenifo. Atiri pexe rasi Foro de Apio anoax fenifo, atiri pexe rasi Tres Tabernas anoax nokoki nokonifo. Askafāfe ōikī Pablo Epa Nios kīfikī iskafani: “Aicho Epa Niosi, mī yorafo ekeki nīchiaki,” fani inimakōiyānā. ¹⁶ Mā nō Roma ano nokoano, xanīfāfe ato yoini pexe fetsa mēra ares Pablo inō, anoxō soraro fistichi kexenō.

Roma ano Pablo ini

¹⁷ Mā nokoitaxakakī ano tres nia ixō, Pablo judeofo xanīfofo Roma ano ato kenamani fenōfo. Mā fekanax ichanāfono Pablo ato yoini iskafakī: “Efe yora mīshtichi, ea nikakapo ē mato yoinō. Ēkai judeofo chakafakī mekafamisma. A nōko xinifo ipaonifo keskarari ē chakafakī mekafayamafiakē, ea achikaxō Jerusalén anoxō romanōfo ano ea nīchinifo. ¹⁸ Nānoxō mā ea yōkakaxō, ea nīchipainifo, ēkairoko afaa chakafakē ea retexikakī. ¹⁹ Ea askafafono, akka judeofāfe ea iskafayameafo: ‘A chaka kāimayamafe,’ ea faifono, ē xanīfofo yoini iskafakī: ‘Ē xanīfokōi César ano kapai ato ea yoinō, ē afaa chakafayamafiakē efe yorafāfe eōnoa yoiafo keskara,’ ixō ē ato yoini. ²⁰ Ē mato kenamana mato fe yoināxiki. Akka mā mā nikai ēfe kaifo israelifāfe, nā noko nimamis Niospa Fake nō manamis. Nāskakē mā mā ea ōi nonoxō ea metexkere akafono,” ixō Pablo ato yoiaito, ²¹ nikakakī iskafanifo:

“Judea anoxō mīōnoa tsōa noko kirika kenexō femama. Nofe yorafo judeofori ariax fēkaxō mīōnoa afaa chaka noko yoiafoma. ²² A mī yoiai keskara nō tāpipai, akka mā nō nikamiski, a maniafo tii anoxō a Jesús Ifofamisfo chakafakī ato mekafamisfokī,” ixō ea yoinifo.

²³ Nāskakata, “Pena fetsa nō mefe ichanāfainakaki,” fanifo. Nāskakē yora ichapakōi a Pablo ika ano fenifo nikai fekani. Mā feafono Pablo ato yoikī yātafani, Nios xanīfoōnoa ato yoikī. Afeska faxoma Jesúsnoa ato nikama-paikōini, a Moisés keneniōnoa ato yoita, a Niospa ato shināmanaino keneni-foōnoari ato yoini. ²⁴ Pablo ato yoiaito ranārito nikanifo, akka ranāritori nikakaspanifo. ²⁵ Nāskakē āa ranā fochishpanā faatanānifo ares shinākanima. Nāskakata mā fopaiyaifono Pablo ato yoini iskafakī: “Isaías chanīmakōi ato yoipaoni Niospa shināmanaino. Nāōxō Niospa Yōshi Sharapa mātō xinifo yoini, iskafakī:

²⁶ Kaxō mī kaifo yoitāfe iskafakī: ‘Mā mā nikakōifikī mā nikasharaima; mā mā afara sharafo ōifikī mā ōisharaima.’ ²⁷ Mā na yorafāfe nikafikakī shināsharakanima, āto ōiti fēstokōi. Mā ōifikakī tāpapaikanima, na ē yoiai keskara chanīmakōi ōifikakī. Askatari nikakōiafoma ē ato chaka soaxopanā efe nīpaxanōfo, ixō Niospa Yōshi Sharapa Isaías yoini. ²⁸ Na ē mato yoiai keskara tāpikāfe, Epa Niospa noko nimapaiyai keskara mā nikayamaino a judeofoma ē ato yoi afāfe ea nikakōixikani,” ixō Pablo ato yoini.

²⁹ Pablo ato yoikī askafaino, judeofo mā fokani āa ranā feratenāfonifo.

³⁰ Anoxō Pablo xiniya rafe ani. A pexe ifo Pablo kori ināni a mēra ixiki. Nānoxō ato ifisharapaoni ōikai fofaifono ato yoisharayanā. ³¹ Nānoxō ranotamakōi ato yoini afeskaxō Epa Nios xanīfāfe noko ūkitiromāki. Nōko Ifo Jesucristoōnoari ato yoiaito tsōa xatematiroma ini. Nā tii.

Pablo Roma Anoafu Kirika Kenexõ Fomani

Pablo Jesús Ifofaafu Roma anoafu kirika kenexõ fomani

¹ Roma anoafãfe, ẽ mato kirika kenexõ fomai. Ẽkãa Pablo, ẽ Jesucristo yonoxomis. Niospa ea nĩchini ẽ aõnoa yoimis inõ, ẽfe meka shara Jesúsnoa yoinõ.

² Niospa ẽfe Fake nokoõnoax naiyonõpokoai tãpixõ a Niospa meka yoimisfãfe meka kenenifo. Jesúsnoa meka shara yoinifo. ³ Niospa Fakeõnoa meka shara kenenifo a inõpokoai keskafakĩ. Jesús Niospa Fakekõifiax David ẽfe xini ini. Nã David nõko xinifãfe ẽto xanĩfokõi ipaoni. ⁴ Niospa afama mĩshti fatiroxakĩ nõko Ifo Jesucristo otofani. Otofãxõ ato õimani nãmãi Niospa Fakekẽ. Niospa ẽfe shinãmã ẽfe Yõshi Sharaõxõ ẽfe Fake otofani. Ato õimani Jesúsmã ẽfe Fakekẽ. ⁵ Jesucristoxõ noko noi. Noko noikĩ ẽfe shinã noko inãni. Nãskaxõ noko nĩchini Jesúsnoa yoimis nõ inõ. A judeofomari a xoko fetsafori afãferi Jesús chanĩmara fanõfo nõ yoiaino. Jesús chanĩmara fakaxõ nikasharakõinõfo. ⁶ Mãri mã mã Jesucristo chanĩmara faito mato nĩchini mã afe yorafo inõ.

⁷ Roma anoafãfe, ẽ mato kirika kenexõ fomai. Niospa mato noixõ mato ifini mato chaka soaxoxiki afe yorafo mã inõ. Mato noikĩ mãto shinã mẽraxõ mato shinãsharamanõ. Epa Nios feta nõko Ifo Jesucristo mato askafanõ.

Pablo a Jesús chanĩmara faafu Roma anoafu ato õipaini

⁸ Ẽ mato yoinõ. Nikakapo. Keyokõichi a maitio anoafãfe mato yoimisfo, mã Jesús chanĩmara faito õikakĩ. Nãskakẽ, “Aichora,” ẽ Nios famis. Jesucristoxõ, “Aichora,” ẽ famis. ⁹ Ẽfi Nios yonoxokõikai. Chanĩmakõi ẽ yonoxonikai. Ẽ feparanima. Ẽfe Fakeõnoa ẽ meka shara yoimis. Pena tiifi ẽ mato Nios kĩfixõfafãini. Niospa tãpia. ¹⁰ Ẽ mato õisharapai. Nãskaxõ ẽ Nios kĩfifafãini ẽ mato ano kapaikĩ. Akka ẽ kai, ẽ kayamai ẽ kaima. A Niospa ea nĩchipaiyaino ẽ katiro. ¹¹ Ẽ mato õisharapai. Ẽkaxõ ẽ mato Niospa meka yoipai. Niospa ẽfe Yõshi Sharaõxõ ẽ mato yoipai mã chanĩmara fakĩ finakõinõ Jesús Ifo sharakõi faxiki. ¹² Nãskax Jesúsnoax nõ inima faatanãnõ. Mã Jesús chanĩmara faino ẽ inimatiro. Nãskarifiakĩ ẽ chanĩmara faino mã inimatiro.

¹³ Efe yorafãfe, ẽ mato tãpimapai mã tãpinõ afeskaxma ẽ matoki kapai ẽ katiroma mei, ẽ kamisma. Mẽ kãta katamis ifiakeranax afara fetsa aki ẽ kamisma, mato ari kapaifi. Mai fetsa aria ichanãmisfo judeofoma nãfo ẽ Jesús ato chanĩmara fama. Nãskari fakĩ ẽ matori askari famapai. ¹⁴ Jesús ea yoia ẽ ẽfe meka keyokõi ato yoinõ. Nã kirika kenekĩ tãpiafo ita a kirika kenekĩ tãpimafori ẽ ato yoikai. Nafafoya a nafamafori ẽ ato yoitiro. Ẽ ato yoiaito nikakakĩ Jesús chanĩmara fanõfo. ¹⁵ Nãskari fakĩ ẽ Jesúsnoa mato Roma anoari yoikapaimis.

¹⁶ Jesúsnoa meka shara yoipaikai ẽ ranotiroma. Ẽfe meka xafakãa shara. Noko Niosnoa tãpimatiro a tsõa atiroma keskara Niospa atiro. Nõ chanĩmara faito Jesucristoxõ Niospa noko chaka soaxotiro nõ afe ãpaxanõ, nõ fenoyamaino. Taefakĩ judeofãfe nikakõinifo. Akka iskaratĩari judeofomafãferi nikakani afe ipaxakakĩ. ¹⁷ Nã Jesúsnoa meka sharaõxõ Niospa noko õimatiro. Nõ Jesús chanĩmara faito Niospa nõko chaka noko soaxotiro. Nãnori kenenifo iskafakakĩ: “A Jesús chanĩmara fakõinaifo Niospa ẽto chaka ato soaxõ afaa chakafamisma keskara ato õi. Nãskax shara ipanakafo Nios fe.”

Keyokõi yorafo chakamisfo

18 Niospa meka nikakaspafāfe a chakafamisfo Niospa ato ōimani ato omiskōimakī. Niospa meka chanīmakōifiano nikakaspakata yora fetsafori ato Niospa meka chanīmara ato famakaspakani. 19 Nōko Nios afe keskaramākī tāpipaikī nō tāpitiro. Akka Niospa noko ōimamis. 20 Nō Nios ōiyamafixō nō tāpitiro Niospa keyokōi onifani, nāmāi Nioskōi ixō. Nā Niospa onifani ōikī nō tāpitiro tsoa fētsa keyokōi atiro. Nios fistichi atiro, afama mīshti. Nāskakē Nios nikakaspafāfe Nios chanīmara fapaikanima, a onifani ōifikakī. Nāskakē Niospa ato omiskōimani nāfāfe Nios tāpipaikanima. Akka tāpipaikī tāpikeranafo. 21 A Niospa onifani ōifikakī iskafakī yoipaikanima: “Nios fistichi keyokōi onifani. Aicho, Nios finakōia,” ikaxō shināpaikanima. Nāskakaxō āto shinā mēraxō afara shināsharakanima. Afara chaka fisti shinākani āto ōiti fakish keskara ikaxō. 22 “Nōfi tāpikōiaki,” ifiakaxō tsōa shināsharaima. 23 Niosfi sharakōikī shara enenakama. Nāfi isharapakenakakī. Isharakōifiaito Ifofapaikanima. Askata yorafo isharayamaino yora fetsafāfe afara yora keskara onifakaxō, “Na nōko Niosra,” ikaxō kīfimisfo Nioskōi kīfikaspakakī. Yoinā keskara onifakaxō, peya keskara onifakaxō, rono keskarari onifakaxō, nāskarafo onifakaxō, “Na nōko Niosra,” ikaxō kīfimisfo.

24 Askafafāfe ōikī Niospa anā ato Ifofamaima. Nā chakafapaiyaifo fisti akaifāfe ōikī Niospa ato xatemanima. Nāskax āa ranā fekaxte faatanākani. 25 Nios fistifi chanīmismaki. Nā chanīyamafimiskē tsōa Ifofapaima nā fisti nōko Nios sharakōifiano. Niospa keyokōi onifafianino tsōakai Ifofapaima. Akka nā Niospa onifanifo, “Nā nōko niosra,” ikaxō kīfitaifamisfo. Tsōakai Nioskōi Ifofapaima, mēxotaima sharafinakōia ifiamiskē. Nāskakē, “Epa Niosi, mī sharafinakōia,” ikaxō yoikani. Askapakexapainōfora.

26 Askafafāfe ōikī Niospa ato chaka xatexonama, afara chakafapaiyaifo fisti akaifāfe. Niospa noko onifani feronāfake yafi kēro, kēro feronāfake fe inō. Askafafianino kēro rafe fichināpaikani chaka ikani. 27 Askatari feronāfake rafe fichināpaikanax chotanākani, kēro tanatama. Askax chaka ikanax omiskōikani.

28 Nāskakakī chaka fisti shināpaikani. Anā Nios shināpaikanima. Askafāfe ōikī Niospa ato potai nā apaiyai keskara fakī chaka fisti shinānōfo. 29-31 Chaka fisti feyafakanax chaka shinākani. Chaka faatanāi xatekanima. Feronāfakefāfe āto āfima fichipaikī chotamisfo. Kērofāferi āto fenema fichipaikī chotamamisfo. Nāskaxō afara shara āa atonā fisti fipaikani. Fetsafo chakafakī xatekanima. Fetsafo xītipaimisfo. Yora retemitsamis ita, setemitsamis ita, feratenā faatanāmisfo. Ōitifishkikī feyafamisfo. Ato pārafōfāsafamisfo. Ato noikaspam-isfāfe fetsafonā fīapaikakī. Ato noikaspamisfo. Chanīmisfo fetsafo pāramisfo. Nios noikaspayanā tsoa noimisfoma. Īchamitsamisfo. Kakapaimisfo, āa kakamepaimisfo. Afara fetsa chaka shināi iskakani: “Afaa chaka fetsa ē afeska faimēti,” ixō shinākani. Āto apa yafi āto afa nikakaspakani. Afara shara shinākanima. A yoiyai keskara amisfoma. Āa chanīmisfo. Tsoa noikanima. Ōitifishkikax fetsaki raemisfoma. 32 “Askakanax nakanax omiskōipakenakafo,” ixō Niospa anori yoini. Niospa yoiyai keskara āto shinā mēraxō tāpifikaxō afara chaka xatemisfoma. Askata fetsafāfe afara chakafafāfe ōikani atoki inimamisfo.

2

Niospa mēstekōi noko ōixō yoitiro: “Nāto afaa chakafamisma. Akka natori chakafamis,” noko fatiro

1 Ēfe kaifo judeofāfe, ē mato yoinō. Mā fatorafāfe yoi iskakī: “Na keskara yorafāfe afara chakafaifo omiskōipakenakafo,” ixō mā shināmis. Anori

shināfikī māri ato keskarari afara chakafamis. Nāskata, “Nō afaa chakafamisima,” mā itiroma. ² Mā nō tāpia, Niospa ato tāpikōia a yorafāfe chaka shināifo. Nāskakē ato omiskōimaxii. Niospa tāpikōixō chanīmakōi yoi. ³ Mā, “Nato afara chakafara,” ixō māri mā aki. ¿Nāskakī mā shināimē: “Niospa noko omiskōimani,” ixō? Akka nāskakē ē mato yoi. Niospa matori omiskōimani mā afara chakafaito. ⁴ Niospa mato noi. Mā chakafafaito mato omiskōimarisafaima. Mato noikikai mato omiskōimapaima. Nāskakē, “¿Nā ē ipaiyai keskara ē iki,” ixō mā shināimē? Askara shināyamakāfe. Niospa mato noikī mato shinā fetsafaxopai mato chaka mā xatexō āfe meka mā nikasharakōinō. ⁵ Niospa mato shinā fetsafaxopaifaito mā nikayospakōi. Māto ōiti mā kerexfaxō mā Nios nikakaspai. Mākai mato shinā mā fetsafapaima mato chaka mā xatexiki. Mā askafiaino iskaratīa Niospa mato omiskōimayoi. Akka mā mai keyoaino mato omiskōimaxii mākaikōi mato chaka xateano. Nā keyokōi yora chakafo ato omiskōimanaitīari nānori matori omiskōimaxii. Niospa mēstekōi noko ōi. Nāskakē nā yora chakafo ato omiskōimani. Nāskaxori nā yora chakafo ato omiskōimaxō noko ōimaxii. ⁶ Nā nō imis keskara Niospa tāpikōia. Nāskax nō naano keyokōi noko kopifaxii mā nōko mai keyoaino. ⁷ Yora fetsafāfe shara shināmisfo a Niospa ato amapayai keskara apaikī. Niospa ato inimamatiro. Askatari Nios fe ipaikani. Askara yorafo Nios fe ipanakafa. ⁸ Akka yora fetsafāfe nā apaiyai keskara shinākani. Niospa meka nikakaspakani. Chaka fisti shinākani. Askarafoki Nios atoki ōitifishkixō ato omiskōimani. ⁹ Nā chakafamisfo nāfo keyokōi omiskōixikani, judeofo, judeofomari omiskōixikani afara chakafakanax. ¹⁰ Nā Nios chanīmara faafo tii Niospa ato imasharaxii a keskara inōfo. Nāskaxō ato yoixii iskafakī: “Māfi sharaki. Mā ea nikasharakōia. Nāskax mā efe isharapakenaka,” Niospa ato faxii. Nānori judeofo yoixii. A judeofomari ato yoixii askafakī. ¹¹ Niospa ōia nāskarafos ōi yorafo, a judeofo ōita a judeofomari nāskarafos ōi.

¹² Akka a Moisés kirika keneni tāpiamato afara chakafaax omiskōipakenaka. Nios fe ipanakama. Askatari a Moisés kirika keneni tāpiato afara chakafaax nāri omiskōipakenaka. Nānori Moisés kenekī yoini: “A afara chakafamisfo omiskōipakenakafo,” ixō Moisés kirika keneni. ¹³ A Moisés kirika keneni keskara nikafikakī nikakaspai. Afokai Niospa shara ato ōima. Akka nā Moisés kirika keneni keskara nikakōiaifo, “Sharafora,” Niospa ato faxii. ¹⁴ Moisés Niospa meka a judeofoma ato kirika kenexonima. Askafekē a Moisés keneni keskara judeofomafāfe tāpiamafikaxō āa tāpikōikaxō shara shinākani. Nāskaxō a Moisés keneni tāpiafo keskara ikafo tāpiamafikanax. ¹⁵ Moisés keneni tāpiamafikaxō shināsharaifono fetsafāfe ato ōitirofo Moisés keneni keskara Niospa ato shinā mēra ato shināmana. Akka sharafakaxō shinākakī iskafatirofo: “Ē afaa chakafama,” ixō shinātirofo. Akka afara chakafaxō shinākani iskatirofo: “Oashta, ē afara chakafaa,” ixō shinātirofo. Nāskaxō anā afaa chakafapaikanima. ¹⁶ Niospa nōko ōiti mēraxō nō shināito noko tāpikōia. Jesucristori noko tāpia. Akka yorafāfe nōko ōiti mēraxō nō shināito noko tāpiafoma. Nāskakē mā nōko mai keyoaino Niospa noko yoikī iskafaxii mā māi noko tāpixō: “Nafō sharafō. Akka nāfori chakafo,” noko faxii. Nāskara ē yorafo yoimis.

Moisés judeofo Niospa meka kenexoni

¹⁷ Ea nikakapo, efe yorafāfe. ¿Mā shinākī iskafatiromē? “Nōrifi nō judeofoki. Moisés keneni keskara mā nō tāpia. Nōfi Niospa afe yorafoki,” mā imis. ¹⁸ Moisés kenenixō Niospa mato amapayai keskara mā tāpitiro. Askatari mā asharakōikī mā tāpitiro. ¹⁹ Akka mā shināmis iskafakī: “A Moisés

keneni tāpiafoma yora fēxo keskarafō. Nāskakē nō ato tāpimasharatiro āto ōiti xafa shara inōfo, anā fakish keskara inōfoma,” ixō mā shināi. ²⁰ “Nā afara shara tāpiamafori nō ato tāpimatiro,” mā iki. Nāskatari, “Nā rama tāpiaifori nō ato yoitirora,” ixō mā shināi. Mā shināi iskafakī: “Mā nō Moisés keneni tāpikōia. Nāskaxō nō ato yoitiro noko chanīmara fanōfo,” ixō mā shināi. ²¹ A Moisés keneni keskara mā ato yoifikī, ¿afeskakīri māri mā nikakōimamē? “Atoki yometsoyamakāfe,” mā ato fafiāi māri mā yometsoi. ²² “Māto āfima fe iyamakāfe,” mā ato fafiāx māri māto āfima fe mā chotanāmis. Askatari yora fetsafāfe afara onifakaxō, “Na nōko niosra,” famisfo. Askafafiaifono mā ato yoimis: “Anā ano Nios fetsama. Nios fisti. Afara yora faxō, ‘Na nōko niosra,’ fayamakāfe,” mā askafamis. Mā ato askafafiai āto nios kīfiti pexefā mēranoax mā yometsomis. ²³⁻²⁴ Māfi yoikī iskafamis: “A Moisés Niospa meka kirika keneni nō tāpikōia,” nā kakapaimisfo keskara mā imis. Askafafiaxōkai a Moisés keneni keskara mā akama. Mā askayamaito ōikakī judeofomafāfe yoikī iskafamisfo: “Niospa afe yorafo judeofo isharafo. Nāskakē Niosrikai sharama,” ixō yoimisfo. Askafakī matoōxō Nios chakafaifo. Nānori Niospa meka yōra kirika keneni.

²⁵ Moisés judeofo kirika kenexoni iskafakī: “Māto fake feronāfakefo foshki repa xatekāfe mato tāpinōfo mā judeofokē,” ixō Moisés kirika keneni. Māto fake foshki repa mā xatefixō nā Niospa mato yoini keskara mā nikayamaito Niospa mato ōi judeofoma keskara. Niospa yorafo mā itiro mā judeofofiax. Nāskarari nā Epa Niospa noko yoini keskara mā ikaito Niospa mato ōi judeokōifo keskara. ²⁶ Judeofoyamafixō Niospa meka nikaifono Niospa judeofo keskara ato ōi afe yorafo keskara. ²⁷ Nā judeofoma foshki repa xateyamafikaxō a Moisés Niospa meka yoikī kirika keneni tāpiyamafikaxō nā Niospa yoini keskara chanīmara fakanax nāskarafōfi sharafōki mato keskarama. Akka māfi judeofofixō a Moisés kirika keneni tāpifixō mā nikakōima. Moisés mato Niospa meka yoikī kirika kenexofianino mā nikasharakōima. ²⁸ Māfi judeofo kāinikī. Nāskaxō mā foshki repa xatemis. Akka mā judeofofixō a Niospa yoini keskara mā nikaima. Nāskax mā judeokōifo keskarama. Mā māto feyafatifixō māto chaka mā xatemisma. Nāskaxkai mā Niospa afe yora ikima. ²⁹ Moisés kirika kenekī yoini keskafakī judeofāfe āto fakefo foshki repa xatemisfo ato tāpinōfo judeokōifokē. Akka judeofo atirifāfe Nios shinākanima. Nāfōfi judeomakōifo keskara. Nāfokai Niospa afe yorafoma. Akka judeofo atirifāfe Nios shinākani. Nāfōfi judeokōifokī. Nāfōfi Niospa afe yorafokī. Niospa Yōshi Sharapa noko ōiti fetsafaxōano Nios keskara shara ikafo. A Moisés kirika kenenito noko ōiti fetsafaxotiro. Niospa Yōshi Sharapa noko ōiti fetsafaxotiro. Akka yorafāfe, “Mīfi sharakī,” noko fayamafiaifono Niospa, “Mī sharakī,” noko fai.

3

¹⁻² ¿Nō judeofoxō nōko fakefo nō foshki repa xatemiskē sharamē? Ēje, shara itiro. Akka nōfi judeofo fake kāiniki. Moisés Niospa meka yoikī noko kirika kenexoni. Nāskakē nō inimai nō judeofo. Efe yora mīshtichi, shinākapo. Epa Niospa nā yorafo tii yoipaiyai keskara nōko kaifo taeyoi ato yoiyoni. Noko tāpimanai keskarari nō yora fetsafori nō ato tāpimanō āfe meka. ³ Akka nōko kaifāfe atirifāfe Niospa meka ifo shara fayamaifono akka Niospa a yoiai keskara amis. ⁴ Yorafo chanīmisfo. Akka Nios ramashara chanīmisma. Yorafāfe keyokōichi noko pārafiaifono akka Niospa noko pāramisma. Nā David Niospa meka yoikī kirika keneni iskafakī:

Niospa āfe meka mēstesharakōi yorafāfe ōinōfo. A shara shināifo Niospa ato sharafaxōi. Akka a chaka shināifo Niospa ato tāpimakī omiskōimaxii, ixō David yoikī kirika keneni.

⁵ Nios fistifi sharakōiki. Nōkai a keskarama. Nāskakē nō chakafaito yorafāfe ōikakī shināitirofo iskafakakī: “Nios iskarama, Niosfi sharakōikī. Na yorafāfe afara chakafakani. Akka Niospa afaa chakafamisma,” ixō shināitirofo. Nāskaxō Nios sharara fakani. Akka nāskaxō āa yora fētsa shināitirofo iskakī: “Ē afara chakafaito ōikakī yorafāfe yoitirofo: ‘Akka Nios iskarama, Nios shara.’ Nāskakē ē chaka shināi yorafāfe Nios sharakōi ōinōfo ea keskarama. Nāskakē Niospa ea omiskōimatiroma ē chakafafiaito,” ixō yora fētsa shara shināima. Nāskara shinākī yōra shināi keskara shināi, Niospa shināi keskara shināima. ⁶ Nios chakama. Nios mēstekōi ika. Akka mēstekōi iyamaxō yorafo yoikeranama iskafakī: “Nafō sharakōifoki. Ē ato sharafaxōi. Akka nafori chakafo. Ē ato omiskōimani,” ixō Niospa yoikeranama mēstekōi iyamaxō. ⁷ Yora fētsa āa shināi iskatiro: “Yorafāfe ea yoitirofo ē chanīaito ōikakī. Iskafakakī ea yoitirofo: ‘Mī Nios keskarama. Nios chanīmisma. Nios mēstekōi ika,’ ixō ea yoitirofo. Akka ē chanīaito ōikakī fetsafāfe, ‘Nios sharakōi, mia keskarama,’ ea faxikani. Nāskakē ē shināitirofo iskafakī, Niospa ea yoitirofo iskafakī: ‘Mī afara chakafafiaito ē mia omiskōimaxima,’ ea Niospa fatiro,” ixō āa yōra anori shināi. Anori Niospa yoyamafiano āa shināi askatiro. ⁸ Iskafakakī yoipaikani: “Nō afara chakafanōkāfe. Nō afara chakafaito ōikakī yorafāfe, ‘Nios sharara,’ fanōfo,” ixō yoipaikani. “Nā Pablori anori yoimiski nō afara chakafanō,” ixō yoikani. Āa chanīmisfo. Ēkai anori yoimisma. Epa Nios chanīmisma. Nā keskara yorafo ato omiskōimaxii.

Nō keyokōichi chakafamis

⁹ “Nō judeofo sharakōifo. Akka nā judeofoma sharafoma,” ē faima. Askatamaroko ē iskafakī yoimis: “Nōfi nā judeofoma ōitsa, nāskarafos nō. Nō keyokōichi afara chakafamis. Nāskakē Niospa ato yafi noko omiskōimaxii noko tāpimakī,” nānori ē yoimis. ¹⁰ Niospa meka yoikakī kirika kenenifo iskafakakī:

Tsoa pishtakai nā Niospa yoia keskara famisma. ¹¹ Tsoa pishtakai Nios shināipaikanima. Tsōakai Nios tāpipaisharakanima. ¹² Tsoa pishtakai anā Nios Ifofapaikanima. Afara chaka fisti fapaikani. Afara sharakai tāpiafoma. Tsōa pishtakai sharafamisma. Fato fistichikai shara Ifofaima. ¹³ Yora naax maiax fepekemeax pisi kāitiro. Nāskarifiakī nōko axfapa meka chaka fisti nō yoimis. Mā nō ato pārakī feyafamis. Nā rono paekapato noko chachiano nō paemetiro keskarari nōko meka chakaōnoax omiskōixikani. ¹⁴ Nō ato fekaxtefapaikī meka mitsisipato fisti nō mekamis. Nō ato īchari famis. ¹⁵ Tsoa afayamafekē nō ato retepaimis. ¹⁶ Nōa kafāsakī nō ato omiskōimafofāsafamis. Nōa nō ato fekaxtefaafofāsafaki. ¹⁷ Yora fetsafokai nō ato raefapaimisma ato fe isharaxikima. ¹⁸ Nōko shinā mēranoaxkai Nioski nō rateima. Āfe meka nō nikapaima. Nōko chaka nō xatepaima, ixō nāskara yoikī kirika kenenifo.

¹⁹ Mā nō tāpia a Niospa yoia keskara Moisés noko kirika kenexoni. Akka tsōakai Niospa meka nikakōimisfoma. Nāskaxō tsōa yoitirofo iskakī: “Ēfi afaa chakafamismaki. Ē shara imis,” tsoa itiroma. Akka Niospa noko yoitirofo iskafakī: “Māri afara chakafamiski,” keyokōi noko fatiro. ²⁰ Nāskakē Niospa meka a Moisés noko kenexoni nō nikapafiaito, Niospa noko yoikī iskafatiroma: “Mā shara imiski,” noko fatirofo. Akka tsōa āfe meka nikasharakōima. Āfe mekaoxō nō tāpitirofo keyokōichi nō chakafamisfo.

Jesucristo chanĩmara faax nõ Nios fe ipaxatiro

²¹⁻²² Iskaratĩa Niospa noko afara fetsa tãpimana. Noko xafakĩa õimana afeska faxõ noko imasharatiromãkĩ a keskara shara nõ inõ. Moisés kenenioxõ noko shara imaima. Akka nõ Jesucristo chanĩmara fakẽ Niospa noko shara imatiro Jesúsmãi noko nãxonikẽ nõko chaka noko soaxoxiki. Nãnorri Niospa meka Moisés yoikĩ kirika keneni. Niospa meka yoimisfãferi nãnoriri kenenifo. Nã keyokõichi Jesucristo chanĩmara faifo Niospa ato shara imai. Judeofo, judeofomafori Niospa shara imatiro Jesús chanĩmara faifãfe. ²³ Keyokõichi mã nõ chakafamis. Tsoa Nios keskarama. Nios sharakõi. Afaakai chakafamisma. A keskarakai tsoama. ²⁴ Nãskakẽ Niospa noko noikĩ nõko chaka noko soaxotiro nõ Jesucristo chanĩmara faino. Akka Jesucristo nõko chakaõnoax noko nãxoni. Nãskaxõ nõko chaka noko soaxoni. Nõ afaa kopifatiroma Niospa noko shara imanõ. ²⁵ Æfe Fake Jesucristo nĩchini ãfe imi foax nõõnoax nanõ nõko chaka noko soaxoxiki. Nãskaxõ Niospa noko omiskõimanima. Nõ Jesús chanĩmara faino Niospa nõko chaka noko soaxoni nõ shara inõ. Nãskaxõ nõ õitiro Nios sharakõi. Jesús nayoamano chakafafiaifono Niospa teneyoni. Ato omiskõimayonima Niospamãi tãpixõ ãfe Fãkemãi chipo ato nãxoxiaino Niosmãi mẽstekõi ixõ. ²⁶ Jesús nõko mai ano oax noko nãxoni. Nãskakẽ nõ chanĩmara feito Niospa nõko chaka noko soaxoni noko imasharai. Nãskaxõ Niospa noko õimasharai amãi mẽstekõi ixõ.

²⁷ Nãskaxõ tsõa yoitiro ma iskafakĩ: “Ëfi sharaki, fetsafo keskarama. Nãskax ã Nios fe ipanaka,” ixõ tsõakai yoitiro ma. Moisés kirika kenekĩ yoini keskara nikafixõ tsõa anori yoitiro ma. Jesucristo noko nãxoni nõko chaka noko soaxoxiki nõ shinãsharanõ. Nãskakẽ nõ Jesús chanĩmara faino, “Jesús nõko chaka noko soaxoni nõ afe ipaxanõ,” ixõ nõ yoitiro. ²⁸ Nãskakẽ anã nõ mato yoi. Jesucristo nõ chanĩmara fakẽma a Moisés kirika keneni keskara nõ ifofafiaito nõko chaka noko soaxonima. Akka nõ Moisés meka nikaito Niospa, “Mĩ afara sharafamiski,” noko fatiroma. Akka nõ Jesús chanĩmara feito, “Mĩ Jesúsnoax isharakõimis,” noko fatiro.

²⁹ Nãskakẽri, ¿Niospa judeofo fisti ato ifitiromẽ afe yora inõfo? Maa, judeofomafori ato ifitiro Jesús chanĩmara faifono afe yora inõfo. ³⁰ Niosfi fistiki. Judeofori, judeofomafãferi Jesús chanĩmara fakanax Nios fe nipanakafõ ato chaka soaxonano. ³¹ ¿Nõ Jesús chanĩmara faxõ a Moisés kirika keneni nõ potatiromẽ? Maa, nõ potatiroma. Jesús chanĩmara faxõ a Moisés Niospa meka yoikĩ kirika keneni nikakĩ nõ chanĩmara fatiro.

4

Abraham Nios chanĩmara fakõini keskara yorafãferi keyokõichi Nios chanĩmara fatirofo

¹ Akka nõko xini Abraham ipaoni keskara ã mato yoinõ. ² Abraham afara sharafaõxokai Niospa ãfe chaka soaxonima. Akka Nios chanĩmara feito Niospa ãfe chaka soaxoni. “Mĩ afara sharafaito nãskakẽ ã mia ifitiro mĩ efe yora inõ,” ixõ Niospa anori yoinima. Akka Niospa anori yoiano Abraham yoikerani: “Ë afara sharafaito ea Niospa chaka soaxona,” ixõ yoikerani ãa kakapaikĩ. Akka anori Niospa yoinima, nã Niospamãi mã ãfe chaka soaxonano chanĩmara feito. ³ Niospa meka yoikĩ Moisés kirika keneni iskafakĩ: “Abraham Nios chanĩmara feito Niospa ãfe chaka soaxoni. Nãskakẽ Niospa yoini iskafakĩ: ‘Mĩ afaa chakafamisma keskara ã mia õi,’ Niospa fani.” Nãskakẽ Moisés kirika keneni. ⁴ Akka feronãfãke yora fetsa yonomaxõ kori inãtiro, kaxpa inãtiro ma. ⁵ Akka nõ afara sharafaõxokai Niospa nõko chaka noko soaxonima, nõ afaa chakafamisma keskara noko õixiki. Askatamaroko nõ Jesús chanĩmara feito

Niospa nõko chaka noko soaxotiro. ⁶ Nāskarari David yoini iskafakī: “Mā Nios chanīmara faito oa afaa chakafamisma keskara Niospa mato õitiro a Moisés keneni keskara mā nikakõiyamafiaito. Nāskax mā inimatiro.” David anā yoini iskafakī:

⁷⁻⁸ Fatora yora Niospa āfe chaka soaxonano inimatiro Niospamāi õiaino afaa chakafamisma keskara. Mā Niospa yora āfe chaka soaxõ Niospa anā shināchakaima a yõra afara chakafapaoniõnoa. Nāskax yora inimakõitiro Niospamāi mā āfe chaka soaxonano, ixõ David yoini kirika kenekī.

⁹ ¿Nā judeofo fisti Niospa āto chaka ato soaxotiomē? Maa, anorima. Judeomafāferi Nios chanīmara faifāfe ato chaka soaxotiro afori inimanõfo. Nāskakē Niospa meka yoimisto kirika keneni iskafakī: “Abraham Nios chanīmara faito Niospa sharakõi õini,” ixõ a Niospa meka yoimisto kirika keneni. ¹⁰ Akka taeyoi Abraham foshki repa xateyoamano Niospa yoini iskafakī: “Mī ea chanīmara fai nā mī afaa chakafamisma keskara ē mia õi,” Niospa fani. ¹¹ Nios chanīmara faito Niospa Abraham āfe chaka soaxoni afaa chakafamisma keskara õixiki. Nāskaxõ chipo Abraham foshki repa xatenifo fetsafāfe tãpinõfo Nios chanīmara faino. Akka taeyoi Abraham Nios chanīmara fani askayoxoma. Nāskaxõ chipo foshki repa xateni. Taefakī Abraham Nios chanīmara fani Niospa fake ixiki. Nāskano a chipo Nios chanīmara faifo Abraham āfe fenafo. “Abraham nõko xini ipaoni,” fatirofo. Abraham keskara nõ foshki repa xateyamafixõ nõ Nios chanīmara faito Niospa noko chaka soaxotiro afaa chakafamisma keskara noko õixiki. ¹² Abraham askayoxoma Nios chanīmara fani. Nāskaxõ foshki repa xateni. Nā Abraham judeofāfe āto xini ipaoni. Judeofo a Nios chanīmara faafāfe nãfāfe āto xinikõi Abraham nafāferimāi Nios chanīmara fakanax.

Niospa noko yoiyai keskara noko axõi

¹³ Niospa Abraham yoini: “È mia yafi mī fenafo keyokõi ē mato mai ināikai,” fani. A Moisés kirika keneni Abraham nikaito Niospa mai inānima. Akka Nios chanīmara faito Niospa mai ināni. Nāskaxõ Abraham Nios chanīmara faito Niospa āfe chaka soaxoni, afaa chakafamisma keskara shara õikī. ¹⁴ Fetsafāfe anorima shinātirofo iskafakakī: “Nõ Moisés kirika keneni nikaito Niospa a yoiyai keskara noko axotiro. Akka Jesús fisti nõ chanīmara faito Niospa noko axotiro. Kaxpa nõ Jesús shināi,” ixõ anorima shinātirofo. Akka nõroko Jesús chanīmara faito Niospa yoiyai keskara noko axosharatiro Jesúsmai nõko Ifoxõ. ¹⁵ Akka Niospa meka a Moisés yoini keskara nõ nikayamaito Niospa noko omiskõimatiro. Akka Niospa noko afaa yoyiyanino nõ nikayospa ikeranama. Akka iskaratīa nõ nikayospakõifo mā nõmāi Moisés kirika keneni tãpiax.

¹⁶ Taeyoi Niospa Abraham yoyoni Nios chanīmara faino. Nāskakē Niospa afama mīshti axoni a yoyoni keskafakī. Niospa Abraham afaa yõkanima afama mīshti axosharaxõ. Akka Abraham āfe fenafori Niospa ato noikī nāskaxõ afama mīshtiri ato axosharai a yoyoni keskafakī. A Moisés yoini keskara nikakõiaito Niospa afama mīshti axosharanima. Akka Nios chanīmara faito Niospa axosharani. Nāskarari a Abraham keskarafõ Nios chanīmara faifori Niospa ato shara faxõi. Akka Abraham nõko xinikī nõmāi Nios chanīmara fai Abraham ipaoni keskara. ¹⁷ Niospa Abraham yoini keskafakī, yora fētsa kirika kenekī iskafani: “Nā yora ichapakõifo āto apa keskarakõi mī inõ,” ixõ kirika keneni. Abraham Nios chanīmara fani. Askaxõ Abraham nõko epa keskara Niospa õi. Niospa nã namisfori anā otofatiro.

Nāskaxō Niospa afama mīshti onifatiro tsōa ōimismafo. Nāskakē Abraham Nios chanīmara fani.

¹⁸ Nāskax Abraham anifokōi ini anā fake atiromaxakī. Nios chanīmara faito Niospa yoini: “Mī chipo fake fixii. Mī fenafori ichapa rasi kaixikani,” ixō Epa Niospa yoini keskara Abraham chanīmara fani. Nāskax, “Yorafāfe āto xini mī iki,” Niospa fani. ¹⁹ Nāskax Abraham anifokōi ini. Cien xiniya aka. Sara āfe āfiri yōxafokōi ini. Anā yōxafoxō fake fitiroma ini. Nāskafixō Abraham Nios chanīmara fani. “Ē anifokōi, ē anā fake fitiroma,” ixō Abraham shinānima. “Akka Niospa tsōa atiroma keskara fatiro,” ixō Abraham shinākī Nios chanīmara fani. ²⁰ “Mī āfi Sara fake nanexii,” ixō Niospa yoini. Niospa nāskara yoiāito nikakī Abraham Nios chanīmara fani. Niospa askafafiaino, “Ēfe āfi yōxafokōia. Anā fake nanetiroma,” ixō Abraham shinānima. “Niospa ea yoia keskara ea axotiro. Aicho, Nios fāsi sharakōi,” fani. ²¹ Niospa axōai keskara fakī Nios chanīmara faxō Abraham afaa fetsakai shinānima. ²² Nāskakē Niospa yoini: “Mī ea chanīmara fai afaa chakafamisma keskara ē mia ōi,” Niospa fani.

²³ Niospa Abraham askafaniōnoa yōra kirika keneni iskafakī: “Nios chanīmara faifāfe afaa chakafamisfoma keskara Niospa ato ōi,” ixō Abrahamnoa fisti kirika kenenima. A Nios chanīmara faifo Niospa ato ōi afaa chakafamisfoma keskara māmāi āto chaka soafono. ²⁴ Nokori askara kenexoni nō Nios chanīmara faito. “Nōko Ifo Jesús naafiakē Niospa otofani,” nōri chanīmara fakē, afaa chakafamisma keskara Niospa noko ōi. ²⁵ Nōko chakaōnoax Jesús nani nōko chaka noko soaxoxiki. Askata mā otofaano aōnoax afaa chakafamisma keskarāfo nō ixii.

5

Nō Nios chanīmara faito afaa chakafamisma keskara Niospa noko ōi

¹ Nōko Ifo Jesucristo nō chanīmara fakē nōko chaka noko soaxonano aōnoax nō Nios fe isharapakexatiro. ² Nō Jesús chanīmara faito noko noikī Niosya noko rafemani. Nāskakē, “Ē Nios ikano kaax ē a keskara shara itiro,” ixō nō shināi nō akiki inimakōitiro. ³ Askatari Jesúsnoax omiskōi nōko shinā mēra nō inimakōitiro. Askax nō a keskara nō itiro. Omiskōifiaito Jesús āfe shināmā nōko shinā mēra noko mitsisfamaxotiro nō tenenō. ⁴ Akka Jesúsnoax omiskōikī nō tenei nō yora finakōia ipainākafatiro anā chaka shināyamaxiki. Nāskakē Nios nokoki inimai. Nokoki inimaino nō tāpia nō afe ipaxanō. ⁵ Nō askara shināi nō rāfitiroma Niospamāi a yoia keskara noko axōaino. Akka noko Niospa noikōikī āfe Yōshi Shara nōko shinā mēra noko nanexotiro.

⁶ Akka nōa nōko chaka nō soametiroma. Nāskakē Niospa āfe Fake nīchipaiyaitīa nai mēraxō nāmā nīchini yora chakafoōnoax naaxinō. ⁷ Tsōakai yora fetsa nāxopaitiroma sharafiano. Ētsa, itiro rakikīa yora nai yora sharafoōnoax. ⁸ Akka nō chakafokē Niospa āfe Fake nīchini noko nāxonō. Nāskakē nō tāpitiro Niospa noko noikōiai. ⁹ Askax nōōnoax naano āfe imi foni. Nō chanīmara fakē afaa chakafamisma keskara noko ōi noko chaka soaxō. Akka nō chakakē Jesús nōōnoax nani. Nāskakē iskaratīa mā nō chanīmara fakī finakōia. Anā nokoki Nios ōitifishkikī noko omiskōimaxima. ¹⁰ Askata nō Nios noikaspaino āfe Fāke noko nāxoni Nios fe nō rafenō. Nāskax nō iskaratīa Jesús afe yorafo nō afe rafekōia. Askaxō noko sharafakī finakōi. Jesús nakē Niospa anā otofani, nōri afe nipaxanō. ¹¹ Akka nō Nios noikaspayoni. Iskaratīa mā nōko Ifo Jesucristoōxō noko raefaa nō afe isharakōia. Nāskakē Jesús Nioski noko inimamasharakōia.

Adāōxō yorafāfe keyokōichi chakafamisfo. Akka Cristo nōko chaka noko soaxotiro

¹² Niospa nã feronãfake Adán taefakĩ onifani. Nã Adán taefakĩ afara chakafani. Nãskakẽ aõxõ afara chakafapafo. Nã Adán afara chakafaniõnoax keyokõi nõ natiro nõmãi keyokõichi afara chakafaax. ¹³⁻¹⁴ Mã Adán afetiãmana naniano Moisés Niospa meka yoini kirika keneni afe keskara nõ niimãkai. Akka Niospa Moisés yoiyoamano keyokõichi chakafayopaonifo. Nãskax mã nai keyonifo. Fetsafãfe chakafafiakaxõ Moisés kirika keneni tãpipaonifoma. Askafafiaifãfe oa afaa chakafamisfoma keskara Niospa ato õini tsõakairoko ãfe meka tãpikẽ. Adán keskara foma. Adán Niospa meka tãpifiãx nikayospani. Nãskaxõ Adán chakafakĩ taefani. Nãskarifiãkĩ yorafãfe keyokõichi chakafamisfo. Akka nãskax mã nai keyokani, Adánmãi taeyoi nanikẽ. Nãskarifiãi Cristo oni yora chakafoõnoax naiyoi. Nãskakẽ yorafo aõnoax nãpaxatirofo.

¹⁵ Akka Jesucristo Adán keskarama. Adán Nios nikakaspax nani. Nãskakẽ nõri aõnoax natiro. Akka Jesúsxõ Niospa yorafo noikõikĩ ato imasharapakenaka afaa chakafamisma keskaramãi ato õikĩ. Akka nã Adán nai taeni afara chakafaax. Nãskax yorafo Adánnoax nãpanakafo. Akka Jesús Ifofakanax Jesús fistiõnoax keyokõi isharapakenakafo. Jesúsxõ Niospa ato raefatiro a chanĩmara faafo tii. ¹⁶ Adán afara chakafaniõnoax yorafo nai keyotirofo. Nãskatari ãto chakaõnoaxri nai keyotirofo. Akka nõ keyokõichi chakafakẽ Niospa noko omiskõimatiro. Nã Adán ani keskarakai Cristo afaa chakafamisma. Mã nõ keyokõichi afara chakafamiskẽ Jesucristoõxõ Niospa noko noikĩ nõko chaka noko soaxotiro afaa chakafamisma keskara noko õikĩ. Omiskõitamaroko nõ afe isharapakexanõ. ¹⁷ Adán ãfe chakafoõnoax keyokõi nakani. Akka Cristo fisti nokoõnoax nani nõ aõnoax Nios fe nãpaxanõ Niospamãi noko shara õiaito. Jesucristoõxõ Niospa noko noixõ noko nimapakenaka. Nãskakẽ noko askafaxõkĩ Jesús Adán finõkõia.

¹⁸ Nãskakẽ ã mato yoia keskara nã feronãfake Adán ãfe chakaõxõ keyokõi Niospa noko omiskõimani. Akka Jesúskaiki afaa chakafamisma. Nãskakẽ nã chanĩmara faafo tii Nios fe nãpanakafo. Nãskakẽ nã afaa chakafamisma keskara Niospa ato imai. ¹⁹ Akka nã feronãfake Adán Nios nikakaspakĩ taefani. Nãskax Adán nikayospakõi taeyoi ini. Keyokõichi aõxõ nõ chakafapamis. Akka nã Cristo fistichi ares Nios nikakõimis. Afaakai chakafamisma. Nãskakẽ nã chanĩmara faafo tii aõnoax afaa chakafamisma keskarafo ipanakafo.

²⁰ Moisés Niospa meka yoikĩ ato kirika kenexoni afara chakaõnoa tãpinõfo. Akka nã Moisés ato kenexoni mã õifikakĩ a Niospa ato yoia keskara tsõa nikakõikanima. Keyokõichi afara chakafamisfo. Mã chakafakĩ finafiafono Niospa ato noisharakõixõ ãfe Fake atoki nãchini ato chaka soaxonõ. ²¹ Afara chaka fisti shinãkani namisfo. Akka Niospa noko noikõia. Nãskakẽ ãfe Fake Jesús noko nãxoni nõko chaka noko soaxoxiki. Nãskakẽ nõ Jesús chanĩmara faito Niospa afaa chakafamisma keskara noko õi. Noko chaka soaxonano nõ afe ipanaka.

6

Cristo nia keskara nõri afe nãpatiro

¹ Akka yorafãfe atirito shinãkakĩ iskakani: “Nõ afara mẽxotaima chakafafiaino Epa Niospa noko noikĩ nõko chaka noko soaxotiro. ¿Nãskakẽ nõ afara chakafa fafafiãtiro,” ixõ anori shinãkani sharamẽ? Maa, sharama. ² Nãskakẽ afara chaka shinãyamakãfe. Nõ Jesús chanĩmara faxõ mã nõko chaka nõ pota. A nõ ipaoni keskara nõ anã shinãpaima. ³⁻⁴ Mã mã tãpia noko maotisafani nõ fetsafo õimanõ. Nãskax nõ a Jesús fe naa keskara nõ chaka ipaoni keskara anã shinãima. Nãskakẽ nõko chaka soapaikĩ nõ Jesús chanĩmara faino noko maotisafani. Jesús nokoõnoax naano maifanifo. Nãskax nõ afe naa keskarax

nōri maia keskara. Akka Jesús naax otoiñakafata Apa ari kani. Nōri nono mai anoax Jesúsnoax ari nō katiro. Askaxō Apa Niospa mā Jesús otifaxō noko ōimani nāatomāi afama mīshti fatiroxakī. Nōko ōiti noko fetsafaano a nō ipaoni keskara nō anā itiroma, a keskara sharakōi nō ipai.

⁵ Cristo nōkoōnoax nani. Nā nō chanīmara faax nō afe rafetiro. Nāskakē Jesucristo nakē Apa Niospa otofani keskafakīri anā otofatiro, a keskara shara nō inō. ⁶ Jesús mastanifo nōko chaka noko soaxonō. Nōri Jesús fe masta keskarakōi anā chakafapaima. Nāskarifiāi nō Jesús Ifofaax nō afe naa keskara. Nāskaxō nō anā chaka shināima. Afara chakafo nōko ifoma. ⁷ Akka yōra nāxokai anā chaka shinātiroma. Nāskarifiāi nōri chaka shinātiroma afara chakakairoko nōko ifokē.

⁸ Nō Cristo fe naa keskaraxō nō Jesús chanīmara faax nō afe isharapakenaka nāmāi nō chanīmara faax. ⁹ Mā nō tāpia Cristo mā nafiano Niospa otofani. Nāskax anā natiroma. Anākai afeskax Cristo natiroma. ¹⁰ Akka nai fistinixakī nōko chaka noko soaxoni anā afara chaka nōko ifo inōma. Nāskakē iskaratīa Cristo mā nia. Nāskaxō nā Niospa apaiyai keskafai.

¹¹ Māri Cristo fe naa keskara. Nāskakē iskaratīa mā shinātiro iskakī: “Ē chaka ipaoni keskara anā shināpaima. Nāskax ē iskaratīa Jesucristoōnoax Epa Nios fe rafe kakaini ea amapaiyai keskara axiki,” ixō anori shinākāfe. ¹² Nāskaxō afara chaka anā ifofayamakāfe afara chaka mato famapai kiki a keskara mā anōma. ¹³ Nāskax Niosnoax isharakāfe. Afara chaka mato famapaiyai nīkayamakāfe. Afara chakafamis iyamakāfe. Nios Ifofakāfe mato sharafanō. Iskafakāfe: “Nios ēfe Ifokōixō ea amapaia keskara ē aki sharafakī.” ¹⁴ Akka anā afara chakapa mato afeska fatiroma. Afara chaka anā mātō Ifo itiroma mā mā Cristo chanīmara faano. Epa Niospa mato noikī ares fisti mato ifitiro mā afe ĩpaxanō. Akka nā Moisés kirika kenenioōnoaxkai mā Nios fe ĩpaxatiroma.

Epa Niospa mato amapaiyai keskara mā nikakōiyanā mā yonoxokōitiro

¹⁵ Moisés yoini keskara nō nikaito Epa Niospa noko nimasharaima. Akka Cristo nō chanīmara faito noko noikī noko nimasharatiro. Nā fisti nōko Ifo itiro noko chaka soaxonano. Nāskatari, ¿nō afara chakafa fafafaītiromē Niospa noko noikī nōko chaka soaxonō? Maa, nō afaa chakafatiroma. ¹⁶ Mā tāpia āfe yonomatixō mātō ifo nikakōiyanā mā yonoxotiro. Nāskarifiakī mā katotiro fatomākī mātō Ifo. Epa Nios mā nikakōitiro āfe yonomati ixii, askayama chaka mā katoax mā āfe yonomati mā itiro. Chaka katoax mā naax mā omiskōixii, mā Nios fe nīpanakama. Askatamaroko Epa Nios nikakōiax mā afe isharapakenaka. ¹⁷ Mā afara chaka ifofaax āfe yonomati mā ipaoni. Akka iskaratīa mā mā Epa Nios Ifofaa. Mato yoimis keskara mātō shinā mēraxō mā nikakōimis. ¡Aicho! Mā mā Epa Nios Ifofaano mato nimasharamis. ¹⁸ Nāskakēkai afara chaka anā mātō ifo itiroma anā mato yonomatiroma. Akka iskaratīa afara shara fisti mātō ifo itiro. Māfi āfe inakōifoki. ¹⁹ Ē mato meka fekax yoima, mātō ifoōnoa ē mato yoinō mā tāpisharakōinō. Chaka fetsa fetsatapafo mātō ifo ipaoni. Nāskaxō mā afara chakafakī finakōipaoni. Akka iskaratīa Epa Niospa āfe inafō, mā. Anā afara chakafayamakāfe afara shara fisti mātō ifo inō.

²⁰ Taeyoi afara chaka mātō ifo ipaoni. Nāskakē afara shara mā shināpaonima mātō ifo ipanā. ²¹ ¿Mā ipaoni keskara sharamē? ¿Mato imasharapaonimē? Maa, a nō ipaoni keskarakai anā afokai nō shināpaima. Afo nō shināi nō rāfitiro. Nā chakafo xateyamax nā nō naitīa nā omiskōipakenakafo mēra nō katiro. ²² Nāskakē iskaratīa afara chaka anā mātō ifoma. Epa Nios mātō Ifo. Māfi āfe yonomatifoki. Mā āfe yonomatifokē mato sharafa fafafaīni a keskara shara mā inō mā afe ĩpaxanō. ²³ Nā afara chaka nōko ifono, ¿afanā

noko kopifaimē? Akka aōnoax nō naax nō omiskōipakenaka. Akka Jesucristo nō Ifofaino Epa Niospa noko afaa kopi yōkaima nō afe nipaxanō.

7

Nō anā chaka ifofaxoma nō Cristo Ifofatiro

¹ Efe yorafāfe, mā mā tāpia nōko xanīfokōichi noko yoia keskara nō nikatiro. Nō niyoxō nō nikatiro. Akka mā nō naxō nō anā nikatiroma. ² Nāskarifiāi kēromā āfe fene niyoano enetiroma. Akka mā fene naano fetsa fe fianātiro ixō anori Moisés yoini Niospa meka. ³ Akka fene niyoanokai kēromā fene eneta fetsa fe fianātiroma. Askarafi chakakī. Chota feroma itiro. Akka fene naano kēro feronāfake fetsa fe fianā askara shara, ixō Moisés keneni.

⁴ Akka mā fenē naxō anā āfe āfi yonomatiroma. Nāskarifiakī mā Cristo fe naa keskarax a Moisés kirika keneni anā mā nikatiroma. Akka mā Cristo fe naa keskarax mā yora fena sharakōi itiro Cristo mato Ifono. Mā Cristo naax otoiñakafanax Nios fe ipanaka. Nāskaxō afara shara mato amatiro mā Nios yonoxonō. ⁵ Nō Cristo Ifofamatai afara chaka fetsa fetsatapafo nō ayopaoni. Moisés keneni keskara atama nō chaka fisti shināpaipaoni. Nā chakaōnoax nō naxii. ⁶ Cristo noko nāxonī nōko chaka noko soaxoxiki nō fena shara keskara inō. Nāskakē nō Cristo Ifofaax mā nō afe naa keskarakōi. Nō afe naa keskarax nō yora fena shara iki. Afara chaka anā nōko ifoma. Askatamaroko āfe Yōshi Sharaōxō Niospa noko amapaiyai keskara noko amatiro. A fisti nō Ifofai, a Moisés keneni keskara ifofayopaonixaki anā nō ifofatiroma.

Moisés kenenioxō nō tāpia nō chakafamis

⁷ Iskafakī shināyamakāfe. A Moisés noko kenexoni, chakara fayamakāfe. Akka Moisés Niospa yoini keskara keneyamanikēkai nō chakafamis nō tāpikeranama. Moisés keneni iskafakī: “Yora fetsanā afara fīapaiyamakāfe. Nō yora fetsanā fīpaikī nō chakafai,” Moisés anori keneyamanikē nō tāpikeranama. ⁸ Moisés anori keneni tāpifixō nōko ōiti chakakōikē nō shināsharaima. Nōkonāyamafekē nō fichipaimis. Afara chakafori nō fichipai. Akka Moisés Niospa meka keneyamanikēkai nō nikayospa ikeranama. ⁹ Niospa meka tāpixoma afara chakafafiakī nō shināma. Askata chipo nō āfe meka tāpifixō nō akama a noko yoia keskara. Nāskafaxō āfe mekaōxō a nō afara chakafamis nō tāpitiro. ¹⁰ Niospa yoia keskara akax nō nipaxatiro. Niospa yoiai keskara nō akima mā tāpifiāx, askax nō omiskōi. “Moisés keneni keskara ayamax nō natiro,” ixō nō shināmis. ¹¹ “Epa Niospa noko yoia keskara nō aki. Nāskai nō Nios fe nīpanaka,” ixō nō shināfikī nō afara chakafakī nō xateama. Akka chakapa noko pārai. Nāskakē nō tāpia nōko chakaōnoax nō omiskōi nō Nios fe nīpanakama.

¹² Moisés keneni keskara sharakōi nāmāi Niospa meka. Niospa meka mēstekōi, chanīmakōi. ¹³ A Moisés keneni sharafianokai a keneni keskara nō nikasharamisma. Moisés kenenioxō nō tāpitiro nō chakafamis. Moisés keneni ōifikī, ¿afeskafaxō nōko chaka nō potatiromē? Nāskax nō naax nō omiskōipakenaka. ¿Moisés kenenioñnoax nō omiskōipakenakamē? Maa, askarama. Akka nō Nios nikakaspax nō omiskōipakenaka. A Moisés keneni sharakōi, Niospa meka. Moisés kenenioñnoax nō tāpia nō nikayospakōi. Nō Niospa meka nikakōimisma. Nāskax nō chakakōi.

Nōakōi nōko chaka xatepaifikī nōko shinā mēraxō nō xatetiroma. Nōko shinā mēra chakakōi

¹⁴ A Moisés Niospa Yōshi Sharapa shināmanaino noko kenexoni. Niospa meka nō shināyamai nō sharama. Afara chakafi nōko ifokī nō āfe yonomati.

¹⁵ ¿Afskai nō iskamismē? Nōkai tāpiama. Nō sharafapaiyai keskara nō akima.

Akka nō akaspafiakī nō aki. ¹⁶ Moisés keneni keskara nō nikapai, “Nā meka shara,” shinākī. Askara shināfiki nō akima. Nā afara chakafapaiyamafikī nō aki. ¹⁷ Nōakai nō afara chakafapaima. Akka nōko shināmā nō shinākī nō afara chakafamis. Afara sharafapaifikī nō shināsharaima, nōko shinā mēramāi chakakōikē. ¹⁸ Mā nō tāpia nōko shinā mēra sharama. Isharapai nō itiroma. ¹⁹ Akka a nō akai keskara sharama. Nā sharafapaifikī nō amisma. Nā afara chakafapaiyamafikī nāskara nō amis. ²⁰ Nāskakī a nō akaspai nō aki. Nōakōi nō afara chakafapaima. Nō chaka potapaifikī nō potatiroma nōko shinā mēramāi chakakōikē. ²¹ Akka nō askamiski. Nō sharafapaifaito nōko shinā mēraxō afara chakapa noko fakirira shināmapai nō shara shinānōma. Nō keyokōi askamis.

²²⁻²³ Nōa nō iskafai: “Aicho. Niospa noko yoiai keskara shara,” ixō nō shināfi nō nikayospamis afara chakapamāi noko fekaxtefaito. Niospa meka nō tāpifiax nō nikayospamis. Nōa nō sharafapaiyai keskara nō atiroma. Nō chaka xatetiroma. ²⁴ Nāskakēkai ē inimaima. Ē shināchakai. Ēfi feronāfake chakakī. Ē inimaima. Ēfe shinā mēraxō ē afara chakafaax ē omiskōixii. Ooa. ¿Tsōa nō Ifofatiromē nōko Ifokōi inō, afara chaka anā nōko ifo inōma? ²⁵ Aicho Epa Nios. Ēfe Ifokōi Jesucristoōxō ēfe chaka ē xatetiroki. Iskaratīa ē tāpia Niospa meka nō ifofapaifikī afeska faxō nōa nō atiroma nōko shinā mēramāi chakakē. Akka Jesucristoōxō nō atiro.

8

Niospa Yōshi Sharaōnoax nō ika

¹ Akka Jesucristo nōko Ifono nō afe yora. Nāskakē Epa Niospa noko yoima iskafakī: “Mā chaka. Ē mato omiskōimanō. Emakinoax fotakāfe omiskōipakenakafo mēra nānoax mā omiskōipakenaka,” ixō noko yoipakenakama māmāi nōko chaka noko soaxō, ² Jesucristoōxō Niospa āfe Yōshi Sharapa noko nimasharai anā chaka nōko ifo inōma, nō omiskōipakexanōma. ³ Moisés yoini keskara nō tāpifiano aato noko imasharatiroma nōko chaka noko soaxotiroma. Akka Epa Niospa shināyoni āfe Fake nai mēraxō mai ano nīchixiki ari noko keskara yora inō. Noko keskarafiaxokai nō amis keskara afaa chakafamisma. Akka noko nāxoni anā afara chaka nōko ifo inōma. ⁴ Nāskata iskaratīa nō Niospa Yōshi Shara Ifofaax aōxō Moisés yoini keskara nō nikatiro. Nō Niospa meka ifofasharakōitiro.

⁵ Akka nō chaka xateyamano afara chakapa noko amapaiyai keskara fisti nō atiro. Akka Niospa Yōshi Sharapa noko īkināno nā noko amapaiyai keskara fisti nō atiro. ⁶ Nā apaiyaifo keskara fisti shinākanax afo nakanax anā otokanax omiskōipakenakafo. Nios fe ipanakafoma. Akka Niospa Yōshi Shara ato mēra naneano nā apaiyai keskara Niospa Yōshi Sharaōxō atirofo. Nāskax isharapakenakafo shināsharakata. ⁷ Fetsafāfe Nios noikaspakani Niospa ato yoia keskara nikapaikanima. Āto shinā mēraxō afara chaka fisti shinākani. Nāskaxō Niospa ato yoia keskara nikatirofoma. ⁸ Nā āto shināmā shināifo keskara fisti shinākakī Niospa ato amapaiyai keskara atirofoma. Afara chaka ifofaifono Nios atoki inimaima.

⁹ Akka mākai askarama. Māto shinā mēraxō afara chakapa mato shināmanima. Akka Niospa Yōshi Shara māto shinā mēra nanexō mato shināmasharamis. Akka Niospa Yōshi Shara māto shinā mēra naneyamaino mā Cristo fe rafetiroma. ¹⁰ Cristo mato fe rafefiaino afara chakaōnoax māto yora nai. Māto yora nafiano māto fēro mēsho naima Nios fe nipanaka Niospamāi afaa chakafamisma keskara mato ōiaino. ¹¹ Mā Jesús naano Niospa ofofani.

Nāato āfe Yōshi Shara mātō shinā mēra nanea. Nāskarifiakī mātō yora naano āfe Yōshi Sharaōxō Niospa anā mato otofatiro mātō yora fenasharakōi inō.

¹² Efe yora mīshtichi, Niospa Yōshi Shara nofe rafeaino Epa Niosnoa nō shinātiro noko amapaiyai keskara akī. A nō afara chakafamiskai anā nō shināpaitiroma noko Niospa amapaiyai keskara akī. ¹³ Akka a nō apaiyaifo keskara fisti shināx nō omiskōipakenaka nai. Akka nāskafixō Niospa Yōshi Sharaōxō afara chakafakī nō xatexō anā chaka nō shinātiro. Nō Epa Nios fe nisharapakenaka.

¹⁴ Niospa Yōshi Sharapa noko shināmanaino nō Niospa fakefo iki. ¹⁵ Āfe Yōshi Sharapa noko shināmasharapai nō anā mesenōma. Mā nōfi Niospa Yōshi Shara fīaki. Nā āfe Yōshi Sharaōxō āfe fakefo noko ima. Aōxō nō yoitiro iskafakī: “Epa Nios, mī ēfe Epa,” ixō nō yoitiro. ¹⁶ Nōko shinā mēraxō Niospa Yōshi Sharapa noko yoi iskafakī: “Mī Epa Niospa Fakekōi,” ixō noko yoi. ¹⁷ Nō Niospa fakekē nā noko yoia keskara noko inātiro. Nōfi nō Niospa fakekē nā āfe Fake Cristo ani keskara nokori inātiro. Nōōnoax omiskōifinixakī iskaratīa nai mēranoax Apa Nios fe xanīfokōi. Nāskarifiāi nōri aōnoax omiskōiax nō nai mēra Epa Nios ano nokoano noko sharafinakōia imaxii nō afe isharapakexanō, a keskara shara nō inō. Akka afe yorafo Niospa ato sharafaxōi nāfomāi āfe fakefokē.

Niospa fakefo Jesús fe isharapakenakafo

¹⁸ Nō iskaratīa omiskōiyofiax nō chipo Jesús fe isharapakenaka. A keskara sharafinakōi noko imai. Tsōa ōimisma keskara sharafo noko ōimaxii. A nō omiskōipaoni anā nō shināima. ¹⁹ Epa Niospa āfe fakefo otofaxii a keskara sharakōi ato imaxii. Akka nā Niospa onifanifāfe manakani ōisharapaikōikakī afe keskarafo ato imaimākai. ²⁰⁻²¹ Niospa āfe fakefo sharakōi ato ōimaxii. Nāskatari a onifanifori sharakōi ixii. Anā afaa chaka ixii. Afarafo anā payokomepakenakama. Akka iskaratīa nā Niospa onifanifo payokomepakenakafo askayamapaifiaifono. Nāskaxō Niospa yoini: “Adán afara chakafaōnoax keyokōi payokomepakenaka.” Akka Niospa āfe fakekōifo akiki nokoafono ato yora fetsafaxoxii anā payokomenōfoma, afara chakafāfe ato fekaxtefanōma. Nāskarifiāi Niospa onifanifori nā Niospa fakekōifo keskara shara ixii, anā payokomepakenakama.

²² Kēromā fake kākī pae meytiro. Mā kākō anā pae metiroma. Nāskarifiāi a Niospa onifanifo omiskōiyokani. Akka mā Niospa ato fetsafaano anā omiskōixikanima. ²³ Akka nō Niospa fakefo āfe Yōshi Shara nofe rafeaino nō tāpitiro nō Nios ikano kaax nō isharakōixii. Akka iskaratīa nō isinī iki fekaxtei. Nāskakē nō manasharai Epa Nios ika ano noko ifinō nō āfe fakefokē a keskara shara noko imanō. Nāskatari nōko yora fena sharakōi noko imai anā nō isinī inakama. Anākai nō nanakama. ²⁴⁻²⁵ Nāskara nō shināi nō akiki nokoaito noko fetsafaxii a keskara shara nō inō. Nāskax nō afe ipanaka. Chanīmara faxō inimayanā nō manasharatiro fena fenakima nā nō akiki nokoaitīa. Akiki nokoxō nō anā manatiroma māmāi nō ōikī.

²⁶ Nāskarifiakī Epa Niospa āfe Yōshi Sharapa noko axosharafafāini. Afeskaxō nō Epa Nios kīfisharatiromē nōkai tāpiama. Akka āfe Yōshi Shara nō mēra nanexō noko shināmanaino nō kīfisharatiro. Noko noikī noko kīfixoni. Noko kīfixonai keskarakai tsōarikai kīfitiroma. ²⁷ Āfe Yōshi Sharapa shināi keskara Epa Niospa tāpikōia. Keyokōi nōko shinā mērari nō shināi keskara tāpikōia. Epa Niospa noko amapaiyai keskara nānori āfe Yōshi Sharapa a chanīmara faafo tii ato kīfixomis.

Jesúsō nō keyokōi finōkōitiro

²⁸ Akka nõ tãpia Epa Niospa noko katoni a apaiyai keskara nõ anõ. Nõ Epa Nios noiaino afarafãfe noko afeskarafafiaino afoxõ Epa Niospa noko axosharai. ²⁹ Nõ Jesús Ifofayoamano Epa Niospa tãpiyoni fatofomãkĩ a chanĩmara faifo. Akka chanĩmara fayofomano shinãni iskafakĩ: “Nafõ ãfe Fake keskara ã ato imaxii,” ixõ shinãyoni. Niospa ãfe Fake iyõa Jesús. Nãskaxri nõri ãfe fake chipoko ixii. ³⁰ Tãpiyoni nõ ãfe fakefo ixinõ. Askano nõko shinã mẽraxõ noko yoini: “Ëfe Fake chanĩmara fakãfe,” noko fani. Fatora anori yoixõ ato chaka soaxoni isharanõfo, afaa chakafamisma keskara ato õixii, ato chaka soaxonano ãfe Fake sharakõĩ keskara inõfo.

³¹ Noko askasharafaino nõ fakiri yoitiromẽ? Epa Niospa noko sharafakõinaino afara chakafãfe noko chakafamatiroma. ³² Epa Niospa noko noikĩ ãfe Fake Jesús timamanima noko naxonõ. Nãskanixakĩ noko axosharatiro nõ apaiyai keskara nõ anõ. ³³ Epa Niospa noko katoni nõ afe yora inõ. Nãskaxõ nõko chaka noko soaxonano afara chakafamisma keskara noko õixiki. Askano fetsafãfe mĩ chakara noko faifono nõ ato ifofaima. ³⁴ Jesucristo noko nãxokẽ Æpa otofani. Iskaratĩa Apa Nios ika ano ika Apa feta ato keyokõĩ ikinã. Epa Nios noko kifixõfafãini. Nã chanĩmakõikẽ tsõa, “Mĩ afara chakafamiski. Nãskax mĩ omiskõipakenaka,” noko tsõa fatiroma. ³⁵ Tsõakai Jesucristo nomakinoa potatiroma noko noiyamanõ. Nõ omiskõikãĩ, nõko shinã mẽra fekaxtekãĩ, nõ Jesúsnoa yoiaito noko omiskõimafãĩ, noko fonãimafãĩ, nõ rapati yopafãĩ, noko mesemafãĩ noko retepafãĩ, keyokõĩ afãfekãĩ Cristo nomakinoa potatirofoma noko noiyamanõ. ³⁶ Niospa meka yoikĩ David kirika keneni iskafakĩ:

Epa Nios, pena tii mĩõxõ noko retepaiikani. Nõ oveja keskara. Ifãfe nõ oveja itipinĩfasharai retexiki. Nãskarifiakĩ a mĩõxõ noko chakafaifãfe noko retepaitirofo, ixõ kirika keneni. ³⁷ Noko askafafiaifono keyokõĩ nõ chakafo nõ finõkõitiro Jesús noko noiaino. ³⁸⁻³⁹ Jesucristo nõko Ifonokai afanã Epa Nios nomakinoa potatiroma anã noko noinõma. Nã ã chanĩmara fakõini. Epa Niospa noko noiaino afanã noko afeska fatiroma anã noko noinõma. Nõ nafiakẽkai nomakinoa afanã Nios potatiroma. Nõ niyoanori nomakinoa tsõa paxkatiroma. Æfe ãjirifãferikai nomakinoa paxkatirofoma. Yõshi chakafãferikai nomakinoa paxkatirofoma. Afarafo iskaratĩa ikaifãferikai nomakinoa paxkatirofoma. Inõpokoifãferikai nomakinoa paxkatirofoma. Afara chakafãfe ãto xãnifofõfãferikai nomakinoa paxkatirofoma. Nã nai ari ikafãfe, mai ano ikafãferikai nomakinoa paxkatirofoma. Epa Niospa nõko Ifo Jesucristoxõ noko noi. Nãskakẽ keyokõĩ onifanifãferikai nomakinoa paxkatirofoma anã noko noinõma.

9

Niospa judeofo katoni afe yora inõfo

¹ Ë Cristo fe rafexõ ã mato mẽstekõĩ yoi. Ë mato pãraima. Niospa Yõshi Shara ã mẽra naneano ãfe shinãmã shinãkĩ chanĩma ã mato yoi. ² Ë mato yoi iskafakĩ, ãfe kaifo atirito Cristo Ifofaafoma. Nãskakẽ ãfe shinã mẽra ã atoõnoax omiskõĩ kakaini. Ë ato shinãkõikĩ finamis afomãĩ efe yorafokẽ. ³ Nãskakẽ ã shinãmis iskafakĩ: “Epa Niospa, ãfe kaifo nõ israelifo ã ato axopai fenoyamanõfo, mefe nipaxanõfo omiskõipakenakafo mẽra fonõfoma. Nãskaxõ Cristo makinoa ea potãfe ato potakima ã ato omiskõixonõ afo omiskõipakexanõfoma. Nã ã fichipai ãfe kaifo judeofo Cristo fe ipaxanõfo,” ixõ ã shinãmis. ⁴ Nõ judeofo, Jacobo ãfe fenafo. Epa Niospa noko ifini ãfe fakefo nõ inõ. Nãa Nios sharafinãkõixõ nõko kaifo israelifo ato õimapaoni. “Ë mato afara sharafaxõikai. Cristo nõ

oxiai judeokōi ixii. Aōxō ē mato sharafaxōikai,” ixō Niospa yoini. Nāskara Moisés Niospa meka yoikī israelifo ato kirika kenexoni nikanōfo. Nāskaxō ato tāpimani afeskaxō Nios kīfitirofomāki ichanāxō. Nāskata afara sharakōi ato axoxiai keskara ato yoiyoni. ⁵ Judeofāfe xinifāfe Epa Nios Ifofasharapaonifo. Cristori judeo fake kāini, Niospa Fakekōifiax. Nāskax arifi nōko xinifāfe āto fena. Nāfi yorafāfe āto Ifokī, nāatomāi keyokōi ato ikikē. Nāskakē, “Nios fāsi finasharakōia,” nō fapaxanō. Askapainō.

⁶ Epa Niospa noko yoisharayoni keskara judeofo atirito chanīmara fayamafiafono āfe meka chanīmakōi. Afe yorafo yoiyoni keskara axii. “Nā judeofo Israelifāfe āto fenafo ē katoa efe yora inōfo,” ixō Niospa yoini. Askafafiano atirito Nios chanīmara famisfoma. Nāskakē afe yorakōi keskara Niospa ato ōima. ⁷ Nāskarifiakakī Abraham apaoni keska fakī āfe fena atirifāfe Nios chanīmara famisfoma. Afokai Niospa yorakōifoma. Akka Niospa Abraham yoini iskafakī: “Mī fakekōichi Isaaca āfe fakefo mī fenakōifo ixii, mī fake fetsafāfe āto fakefori mī fenakōifo ixiima,” ixō yoini. ⁸ Nāskano nō tāpitiro Abraham āfe fenafo atiri āfe fakekōifo Niospa ato ōima. Akka Niospa Abraham yoiyoni āfe āfinī Sara fake fixiai. “Nā fakefi mī fakekōi ixii. Mī fakē āfe fakefori mī fenakōifo ixii,” fani. Nā yoini keskara Abraham Nios chanīmara fani. Nā Abraham Nios chanīmara fai keskafakīri Nios chanīmara faifono nāfofi Niospa fakekōifoki. ⁹ Abraham āfe āfinī Sara fake naneamatai Epa Niospa yoiyoni iskafakī: “Xinia fētsa ē anā mikiki nokoxii. Nāskano mī āfi Sara fake kāixii feronāfake,” ixō Niospa Abraham yoini.

¹⁰ Nāskata Sara āfe fake kāini. Nāskaxō aneni, Isaaca fakī. Nāskakē nā Isaaca nōko xini. Isaaca naetapaxō Rebeca fini āfe āfi inō. Rebeca fake rafe naneni. Nā fake rafeta āto apakōi Isaaca ipaoni. ¹¹⁻¹² Rebeca fake kāini fake rafe naneax. Esau kāi taeni. Chipu Jacobo ini. Akka kāiyoafomano tsōa tāpiyonima fatoto shara shināimākai, fatotori chaka shināimākai. Nāskano Niospa fisti katonni afe yora inō. Kāiyoafomano Niospa āto afa yoiyoni iskafakī: “Mī fake chipokoto āfe ochi yonomaxii,” fani. Akka Niospa nā apaiyai keskara fatiro, yorafāfe apaiyai keskara Niospa faima. Askano nō tāpitiro Niospa a inōpokoai keskara shināyoni nāskarākōi aki. ¹³ Nāskara Niospa meka yōra kirikaki keneni iskafakī: “Ē Jacobo ifipai efe yora inō. Esau ē fichipaima,” fani.

¹⁴ Nāskakē ĵiskara nō yoitiromē, “Niospa mā fake fisti katoa kāiyoafomano, afaa chakafayoafomano fisti mā katoa akka fetsa katoama ōixoma. Nāskakē Niospa shināsharaima,” ixō nō shinātiromē? Maa, anori nō shinātiroma. Akka Niospa tāpisharakōia. Nā apaiyai keskara fatiro. Nā fichipaiyai katotiro. ¹⁵ Niospa Moisés yoini iskafakī: “Nā ē axopaiyai ē axosharaiikai. Nāskarifiakī nā ē noipaiyai ē noisharaiikai,” ixō Niospa yoini. ¹⁶ Askatari nō Nios nikasharatama nōakōi nō afe yora isharapaiyāito askara noko axōima. Askatamaroko Niospa noko noikī noko ifitiro afe yora nō inō, nāatomāi noko ōiti tāpikaxō. Nāskaxō noko noikī nā apaiyai keskara shara axōi. ¹⁷ Moisés kirika keneni iskafakī: “Epa Niospa Egipto anoa āto xanīfo yoini iskafakī: ‘Ē mia xanīfo imapaikī ē mia xanīfo imani mīoxō nā maitio ikafāfe tāpinōfo ē afama mīshti faito. Akka mī afara chakafaito ē mia potai mī anā xanīfo inōma. Ē mia askafaito ōikakī eōnoa ato yoitirofo nā maitio ikafāfe: ‘Nios tsoa keskarama āfe shināōxō mā Faraón pota,’ ixō eōnoa yoitirofo,’ ixō Niospa Faraón yoini.” ¹⁸ Akka shinākapo. Nā Niospa ato noipaiyai ato noikī axosharatiro. Nāskarifiakī fētsa afara chakafakī xateamano Niospa āfe ōiti nikayospakōi imatiro afaa shināpaiyamai keskara imatiro.

¹⁹ Nāskakē fētsa shinātiro iskafakī: “ĵAfeskakī Niospa noko yoitiromē afara chakafamisfora fakī? Akka nāato noko amai nā apaiyai keskarafakī. Nāskakē

noko omiskōimatiroma nō nikayospaito,” ixō fētsa yoitiro. ²⁰ Askafayamafe. ¿Afeskakī mī Epa Nios kemapaimē? Mīfi yoraki. Aafi Nioski nā apaiyai keskara atiro. Akka a Niospa onifatokai yoikī iskafatiroma: “¿Afeskakakī mī ea iskara onifaamē?” ixō yoitiro. ²¹ Kēromā kesho rafe faxō nā apaiyai keskara fatiro. Kesho fetsa mēra afara shara nanetiro, fetsa mērari afara chaka nanetiro. Akka na kēsho iskafatiroma: “¿Afeskakī mī ea iskara faamē?” ixō yoitiro.

²² Nāskarifiakī Epa Niospa keyokōi yorafo onifafloxō atiri ato potatiro āfe meka nikakaspaifāfe. Fenāmāshta ato yoiyoflaito nikayospamisfo. Nāskakē anā teneima, mā atoki ōitifishkikī ato omiskōimaxii. Nāskaxō yorafo ato ōimapai ato potakī omiskōinōfo chaka fisti shināifāfe. ²³ Akka nōfi ato keskarama. Noko Niospa noikī noko tāpimamis. Nāskatari noko itipinīsharafamai ini-makōikai nō nai mēra shara afe ĩpaxanō. Noko askafamakī yorafo ōimani nā noiaifo Niospa ato noikōia. ²⁴ Noko judeofo fisti Niospa katonima nō afe ĩpaxanō. Akka judeofomafori ato katoni. ²⁵ Nānori Oseas Niospa meka yoikī kirikaki keneni iskafakī:

Fetsafo judeofomari ē katoxii efe yorafori inōfo. “Ē mato noi,” ē ato yoiyamafikatsaxakī, ē ato yoixii iskafakī: “Ē mato noikōi,” ixō Epa Niospa yoini keskara Oseas kirikaki keneni. ²⁶ Askata anā keneni iskafakī:

Niospa judeofoma ato iskafani: “Mākai efe yorafoma,” ato fayoni. Nāskata chipo anā Epa Niospa ato ifixii afe yora inōfo. Nāskakē yorafāfe ato yoixikani iskafakakī: “Nafo Niospa fakefo. Epa Nios finakōia afama mīshti fatiro,” ixō yoixikani. ²⁷ Isaías israelifoōnoa yoini iskafakī: “Na Israel āfe fenafo ichapakōifo ixii oa makex mīshtifo nō tanātiroma tiikōi. Nāskarifiāi judeofo ichapakōi kaixikani. Askafikaxō fisti rasichi Nios Ifofaxikani Nios fe ipaxakakī. ²⁸ Nāskaxō nā yoiyoni keskara nā maitio ikafāfe nā chanīmara faafoma. Nōko Ifāfe ato omiskōimaxii anā ato manayoima āto chaka potayonōfo,” ixō Isaías yoini. ²⁹ Isaías yoiyoni keskara nāskakōi. Nāskata anā yoini iskafakī:

Nōko Ifo finasharakōia nōko fenafo fetsafo ifini afe ĩpaxanōfo. Askafayamafiano anā judeofo ikeranama. Akka nō nai keyokerana Sodoma anoa fe Gomorra anofo ini keskai, ixō Isaías kirika keneni.

Nā judeofoma na meka shara Jesúsnoa Pablo ato yoini

³⁰ Nāskakē ē mato yoi. Nā judeofomafāfe shināyonifoma iskafakakī: “Nōko chaka nō soapai,” ixō shināyonifoma. Akka iskaratīa Cristo chanīmara faifāfe Epa Niospa mā ato chaka soaxona afaa chakafamisma keskara ato ōixiki. ³¹ Akka ēfe kaifo israelifāfe Epa Niospa Moisés yoini keskara ifo sharafapainifo. Nāskaxō shinānifo iskafakakī: “A Moisés keneni nō ifofasharaito Niospa noko shara ōitiro,” ixō shināfiaifono Moisés kenenioxō Niospa ato chaka soaxotiro ma ato shara ōixiki. ³² ¿Afeskakī Niospa ato shara ōimamē? Ē mato yoinō. Afāfekairoko Jesucristo chanīmara faifono ato chaka soaxopanā. Askatamaroko Moisés ato yoini keskaraōnoax isharapaikī āto chaka soapaikani Niospa ato shara ōinō. Akka Moisés yoinioxō Niospa ato chaka soaxotiro ma. Ē mato afara fetsa anā yoinō. Tokiri fai nēxpakīa rakano finōpai akiki nō otisikaināi nō paketiro. Nāskarifiakī Jesús finōpaiyaifāfe chanīmara fakanima afe nīpāxakakīma. Akka nā yorafo oa nō tokiriki otisikai pake-tiro keskarafo. Nāskakī Jesús finōpaikakī shināchakatirofo. Akka tsōa Jesús finōtiroma. ³³ Nānori Isaías Niospa meka yoikī kirika keneyoni iskafakī:

Nikakapo, judeofāfe āto peXe rasi ano Niospa tokiri keskara nīchixii yorafo akiki otisikī shināchakaxinōfo. Nā tokiri efapaki yorafo otisikani paketirofo. Akka nāskarari nā Jesucristo chanīmara faafo tiikai paketirofoma. Anā shināchakakanima, ixō Jesúsnoa Isaiás kirika keneni. Akka Jesús nā tokiri efapa keskarakōi.

10

¹ Efe yora mīshtichi, ēfe kaifo ē shinākī finakōi. Ē ato Nios kīfixōfāfāini Jesús chanīmara fanōfo, Nios fe ĩpaxanōfo. ² Mē tāpia nāfāfe Epa Nios tāpisharapaikani. Nāskafikakī a Niospa ato tāpimapaiyai keskara shinākanima. Āa āto shināmā fisti shināxō akani. ³ Jesúsxō Epa Niospa āto chaka ato soaxotiro afaa chakafamifoma keskara ato ōixiki. Akka nā Jesús ato chaka soaxotiro nikakaspakani. Āakōi shinākanax shara ipaikani. ⁴ Iskakakī shinākani: “Moisés keneni keskara nō nikakōiaito Niospa noko chaka soaxotiro afaa chakafamisma keskara noko ōixiki. Nāskax nō afe ĩpaxanō,” ixō āakōi shinākani. Akka Moisés kenenioxō nōko chaka nōa nō soametiroma afaa chakafamisma keskara ixii Niospa noko ōinō. Askatamaroko Moisésxō nō Cristoōnoa tāpitiro. Nāskakī nō Jesucristo chanīmara faax aōnoax nā afaa chakafamisma keskarakōi nō itiro nō Nios fe ĩpaxakī. Nāskakī nō Cristo fisti Ifofatiro. Nō anā Moisés keneni nikatiroma.

Jesús yorafoōnoax ato nāxoni

⁵ Moisés kirika kenekī iskafani: “Epa Niospa noko yoini keskara ē kirika keneni. Fatora fētsa nā meka ifo sharakōi fai isharakōixii, afaa chakafaamax. Akka māfi Nios fe ikōisharapakenakaki. Akka nā Niospa yoini keskara nō ifo sharakōi fatiroma. Askakimaroko nō Cristo chanīmara fai Niospa noko shara ōinō, nō afe ĩpaxanō.” ⁶⁻⁸ Askata anā kirika kenekī iskafani: “Niospa noko yoini afeskax nō shara itiomākī. Nō Cristo chanīmara faito nōko chaka noko soaxotiro afaa chakafamisma keskara noko ōixiki. Nā Cristo meka shara nōko shinā mēra ikakī. Nō aōnoa tāpixō nō ato yoimis. Akka iskara shināyamakāfe: ‘¿Tsoa nai mēra katiromē Cristo fotomaxiki nō chanīmara fanō?’ Akka tsoakai nai mēra katiroma Cristo fotomaxiki. Askatari iskafakī shināyamakāfe: ‘¿Afeskaxō mā Cristo naafianikē mai mēranoa nō ifitiromē?’ ixō shināyamakāfe. Akka iskaratīa Niospa meka nō mēra ikakī,” ixō kirikaki Moisés keneni. Nānori nō mato yoimis. ⁹ Akka, “Jesús ēfe Ifoki,” nō ato fakī nō shinātiro iskafakī: “Chanīma, Jesús nafianikē Apa Niospa ofofani,” ixō nō shināito nōko chaka noko soaxotiro nō afe ĩpaxanō. ¹⁰ Akka nōko shinā mēraxō nō chanīmara fakē Epa Niospa nōko chaka noko soaxotiro afaa chakafamisma keskara noko ōixiki. Askatari, “Jesucristo ēfe Ifoki,” ixō nō ato yoiax nō afe ipanaka.

¹¹ Nānori Niospa meka yoikī yōra kirika keneni iskafakī: “A Jesucristo Ifofakanax anā āto ifo fetsa fenakanima. Cristo fistichi ato nimasharatiro afe ĩpaxanōfo,” ixō kirikaki keneni. ¹² Judeofo feta judeofomafāferi Cristo chanīmara faifono āto Ifo itiro. Niospa ato ōia nā yora fisti keskarafo, nāskarafos ato ōi. Nāskaxō fatotora yōkaito Niospa axosharakōifāfāini aō noikōikī. ¹³ Nānorikōi Joel yoikī kirika keneni iskafakī: “Fatotora nōko Ifo chanīmara faxō yoikī iskafaito: ‘Mī ēfe Ifoki, ea ifife ēfe chaka ea soaxoxiki,’ faito āfe chaka soaxotiro afe ĩpaxanō,” ixō Joel kirika keneni.

¹⁴ Akka tsōa Jesús Ifofaxoma, “Ea ifife ēfe chaka ea soaxoxiki,” ixō tsōa yōkatiroma chanīmara faxoma. Akka Jesúsnoa nikakatsaxakīma afeska faxō chanīmara fatirofoma. Tsōakairoko Jesúsnoa ato yoimiskē nikapanāfāfe.

¹⁵ Akka Niospa ato nīchiyamaino tsoa katiroma Niospa meka shara ato

yoixikakī. Ākai fotirofoma. Nānori Isaías kirika keneni iskafakī: “A meka shara yoi feai sharakōi,” ixō yoini.

¹⁶ Ē mato yoinō Niospa mā yorafo nīchini Cristoōnoa meka shara ato yoi-tanōfo. Niospa meka yoisharafiaifono judeofo atirifāfe ato nikapaikanima. Nānori Isaías kirika keneni iskafakī: “Ēfe Ifāfe, nō ato yoiaito tsōa chanīmara faima,” ixō yoini. ¹⁷ Nāskano Cristoōnoa meka shara yoiaito nikakakī fetsafāfe chanīmara fatirofo.

¹⁸ “Akka, ¿judeofāfe nā meka shara Jesúsnoa nikamisfomamē?” ixō fētsa ea yōkaito, ě kematiro iskafakī: “Ēje, mā nikamisfo.” Nānori David yoini kirika kenekī iskafakī:

Nā maifo tii anoafāferi nā meka shara mā keyokōichi nikamisfo, ixō David kirika keneni. ¹⁹ Mā shināiraka iskafakī: “Akka judeofāfe na meka shara Jesúsnoa mā nikafikakī nikasharamisfomara,” ixō mā shināi rakikā. Akka ě mato yoi iskafakī, mā nikamisfo nā meka shara Jesúsnoa. Mēxotaima mā nikafikakī chanīmara faafoma. Akka israelifomafāfe Nios nikakatsaxakakīma mā rama aōnoa nikafo. Moisés Niospa meka yoikī kirika keneni iskafakī:

Nā judeofoma efe yora iyopaonifoma. Akka iskaratīa ě ato noikōikī ě ato ifi efe yora inōfo. Ē ato askafaito ōikakī judeofāfe ato noikaspaxikani ato xītipaikakī. Askatari, “Na judeofomafāfe afaa tāpiafoma, judeofāfe ato fafiaifono ě ato ifi efe yora inōfo. Nāskakanax judeofo atoki ōitifishkixikani,” ixō Niospa yoini,

ixō Moisés kirika keneni. ²⁰ Chipō Isaíasri Niospa meka yoikī kirikaki keneni iskafakī:

A judeofomafāfe akōi ea fenayamafikatsaxakakī chipo ea fichixō ea chanīmara fakanax efe ipanakafo. Askatari, “Niosnoa noko tāpimafe,” ixō ato yoiyamafikatsaxakakī. Akka chipo ě ato tāpimaxii, ixō Niospa yoini keskara Isaías keneni. ²¹ Askafiaifono ěfe kaifoōnoa Niospa yoini iskafakī: “Nā pena tiixō āto shinā mēraxō ě ato yoimis iskafakī: ‘Ekeki fekāfe,’ ixō ě ato shināmafaiaino ekeki fepaikanima. Nikayospamisfo,” ixō Niospa yoini keskara Isaías kirika keneni.

11

Niospa israelifo noikōi

¹ Mā iskafakī shināiraka: “Epa Niospa afe yorafo israelifo mā pota,” ixō mā shināiraka. Mā askaito ě mato kematiro iskafakī: “Maa, ato keyokōi potama. Nāskaxō eari potama ěri israeli. Akka Abraham fe Benjamín ěfe xini. Nāskax ě israelikē ea Niospa potama,” ixō ě mato kematiro. ² Epa Niospa afe yora inōpokoai fo israelifo ato katoyonixakīkai ato potamisma. Shinākapo. Nōko xini Elías israelifoōnoa yoikī kirika keneni iskafakī: ³ “Ēfe Ifāfe, a mī meka shara yoimisfo mā ato retemisfo. Askatari a mīsa kamakixō mia kīfimisfo mā potafo. Iskaratīa ě fistichi mia Ifofai. Anā ano tsoama. Eari retepaikani,” ixō Elías Nios yoini. ⁴ Nāskafaito nikakī Epa Niospa ¿afaa fanimē, Elías? Iskafakī kemani: “Maa. Meres fistikai mī ea chanīmara faima. Akka nāno mī kaifo siete mil yorafāfe ea chanīmara fakaxō afaa fetsakai ifofaa foma. Akka yorafāfe onifanifo āfe ane Baal, ‘Akai nōko niosra,’ famisfoma,” ixō Niospa Elías yoini. ⁵ Nāskarifiakī iskaratīari ěfe kaifo fisti rasichi mā Nios Ifofaafo, Niospamāi afetiama ato noikī ato katoyonino afe yora inōfo. ⁶ Niospa noko noikōisharakī noko ifi nō afe yora inō. Akka nō afara sharafaōxokai noko ifima. Niospa noko afaa kopi yōkaima noko ifixiki. Akka āakōi noko ifi noko noisharakī. Nāskakē nō afara sharafatiroma noko ifinō. Akka a nō kopifa

keskara noko òikĩ àakòì noko ifikeranama. Nàskakè noko afaa kopi yòkaima àakòimài noko ifixò.

⁷ Akka èfe kaifo israelifo fisti rasichi Nios fenapaonifo afe rafexikakĩ, nàfomài Niospa katoyonino afe yora inòfo. Akka israeli fetsafàfe Nios nikakaspapaonifo Nios fe rafekaspakakĩ. Akka a Nios nikakaspafàfe àto òiti kerexkòifakaxò nikakaspakani. ⁸ Nànorì Niospa meka kirika kenekakĩ iskafanifo: “Epa Nios nikakaspakani nà oxafò keskarafo afaa shinàkanima. Askatari oa yora fèxo keskara ipaikani. Nàskaxò Nios nikakòipaikanima. Askafafàfe Epa Niospa àfe meka shara ato tãpimanima. Iskaratĩari nàskakani,” ixò yòra kirikaki kenenì. ⁹ Askatari David kirika kenenì iskafakĩ:

A Nios nikakaspafàfe shinàkani iskafakakĩ: “A nò piài ichapa ita nòko afama mĩshtiforì ichapa. Nàskakè Niospa noko shara òi,” ixò shinàkani, Nios nikayamafikakĩ. Akka nòko afama mĩshtiòxò Niospa noko shara òima nò afe ìpaxanò. A Nios nikakaspafò àto afama mĩshtiònoax fenoxikani afama mĩshtifo shinàifàfe. Niospa ato omiskòimaxii. ¹⁰ Oa yora fèxo keskara inòfo. Askarafàfe Nios nikayamaifono oa yora afara efekòì pefea keskara Niospa ato imanò, ixò David kirika kenenì a Nios nikakaspafònoa yoikĩ.

Judeofomafèri Jesús chanĩmara fakanax afe ipanakafo

¹¹ Akka, ¿Niospa afe yorafo israelifo ato potapakenakamè? Maa, ato keyokòì potaima. Akka nà israelifàfe Cristo chanĩmara famisfomano a israelimafèri mã Jesucristo chanĩmara fakani. Ifofaifono Niospa ato ifi afe yora inòfo. Akka nà israelifomafàfe mã Cristo chanĩmara faifono israelifàfe ato òikakĩ akairì Jesucristo chanĩmara fapaikani afe ipaxakakĩ. ¹² Èfe kaifàfe, afara chakafamisfo Jesucristo Ifofapaimisfoma. Akka Epa Niospa nà maitio anoafò Jesucristoònoa ato tãpimanano chanĩmara fakanax afe ipanakafo. Nàskaxò Niospa ato shara faxòì, inimakòinòfo. Askatari èfe kaifo judeofèferi chipo Jesucristo chanĩmara fakanax inimai finakòixikani Niospa ato sharafaxòano.

¹³ Akka mã èfe kaifoyamafiano Epa Niospa ea mato mèra nĩchini Jesúsnoa è mato yoinò. È inimakòì Epa Niospa ea katonì è mato ano onò. ¹⁴ È mato yoiaino mã Cristo chanĩmara fayana mã inimakòiaito mato òikakĩ èfe kaifèferi Jesucristo chanĩmara fapaikani, mato keskara ipaikakĩ. Nàskarakòì ipainòfora. ¹⁵ Shinàkapo. Èfe kaifo judeofàfe Jesucristo chanĩmara fayamaifono Niospa ato potani anà afe yorakòì inòfoma. Akka nà maifo tii anoafàfe Cristo chanĩmara fakanax Nios fe rafekani. Nàskakè èfe kaifèferi Cristo chanĩmara faifono Niospa anà ato ifi afe yora inòfo. Nàskakanax sharakòì ixikani. Nà yora naax otoa keskara itirofo, inimakòikani. ¹⁶ Nàskaxò è anà mato yoinò pàakiri keparanàkĩ iskafakĩ: Pàa kaxke pishta Niosnà ikano keyokòì àfenà itiro. Nàskatari ifi àfe tapo àfenà ikano àfe teshpaforì keyokòì Niosnà itiro. Nàskarifiakĩ èfe kaifàfe Jesucristo chanĩmara fakakĩ taefanifo fisti rasichi. Nàskakè àto fenafàfe Nios Ifofakanax chipo afe yora ixikani chanĩmara fakanax.

¹⁷ È mato afara fetsa anà yoinò mã tãpinò. Èfe kaifo judeofo ifi olivo àfe pòya keskarafo. Nà ifi pòya fimioa ifàfe mextexò potatiro. Nàskaxò ifi olivo fetsa nà nii mèra nia àfe pòya fetsa fìaxò tichixotiro nà olivo kayakòiki. Nàskarifiakĩ judeofàfe Jesucristo chanĩmara fayamaito Niospa mã ato pota. Akka mã judeofoma. Mãfi nà ifi olivo nii mèra nia keskarafo. Nà ifi ifoyama keskarafo, mã. Nàskax mã Epa Niospa yora ipaonima. Akka Jesucristo mã Ifofaito Niospa mato ifi afe yora mã inò. Nàskata nà ifi olivo mã àfe pòya tichiax àfe tapo mèranoax yoiaino foaisharatiro. Nàskarifiakĩ nà judeofàfe àto xinifàfe mekaòxò mã Niosnoa tãpisharakòiafo nà ifi olivo yosiai

keskaraxō. ¹⁸ Iskara shināyamakāfe: “Nō sharakē noko Niospa ifia. Akka judeofo chakafokē Niospa mā ato pota,” iyamakāfe. Shinākapo. Māfi ifi āfe pōya keskarafō. Ifi pōyakai āfe tapomais nitiroma, xanatiro. Ifi pōyafō aō tapoōnoax nia. Nāskarifiakī judeofo āto xinifāfe Nios tāpinifo taefakakī. Atoōxō māri Nios tāpitiro.

¹⁹ Mā shināiraka iskakī: “Ifi pōya chakakē, ifāfe mextexō pōtatiro. Nāskarifiakī judeofāfe Jesucristo chanīmara fayamaifono Niospa ato potani. Akka nō judeofo keskarama nō Jesucristo chanīmara faax nō afe ipanaka,” ixō mā shināiraka. ²⁰ Nā mā yoiai keskara chanīmakōikī kexemesharakāfe. Akka judeofāfe chanīmara fayamaifāfe Epa Niospa ato potani. Nā judeofo potani keskafakī Epa Niospa matori potatiroki. Kexemesharakāfe, mā anā Jesús chanīmara fayamaito matori potatiroki. Nāskakē kakapaiyamakāfe. Mā Jesús chanīmara fayamax mā fenotiroki. ²¹ Judeofāfe Nios chanīmara fakī taefafianifono chipo āto fenafāfe chanīmara fayamaifāfe Niospa ato potani. Māri mā chanīmara fayamaito matori potatiroki.

²² Akka shinākapo. Niospa noko noifiaino nō nikayamaino noko tāpimatiro omiskōimakī. Nāskakē judeofāfe chanīmara fayamaifāfe ato omiskōimakī ato potai. Akka Niospa mato noikī afe yora mato imai. Nāskakē mato noiai keskara shināfafāikāfe. Chanīmara fafafāikāfe. Mā askafayamaino matori potatiro. ²³ Ēfe kaifo judeofāfe anā chaka shinākakima, Jesús chanīmara faifono anā afe yora Epa Niospa ato imatiro. Ifi mextexō anā āfe pōya tichixotiro anā foainō. Nāskarifiakī Epa Niospa anā ato ifitiro afe yora inōfo. ²⁴ Mākai judeofoma. Judeofo ifi olivokōi keskarafō. Akka mā judeoma. Mā nā olivo nii mēra nia keskara. Olivokōi āfe ifāfe nā nii mēra olivo āfe pōya xatexō olivokōiki tichitiro foaisharanō. Nāskarifiakī mā Niospa yora ipaonima. Akka iskaratīa Epa Niospa mato ifia mā afe yorafō inō. Nāskakēri ēfe kaifo anā Niospa ato ifipaisharakī ifitiro afe yora inōfo. Jesús chanīmara faifāfe afe yorafō ato imatiro.

Epa Niospa judeofo anā ato ifixii afe yora inōfo

²⁵ Efe yora mīshtichi, māfi israelifoma. Meka fetsaōnoa mā nikamisma ē mato tāpimanō māto shinā mēraxō mā shinānō, nā ē mato yoiai keskara mā tāpiax kakapaimis mā inōma, mā iskanōma: “Nō israelifo keskarama, nō sharafinakōia,” mā inōma. Chanīma, iskaratīa ēfe kaifo israelifāfe āto ōiti kerexkōixō Niospa meka shara Jesúsnoa nikakaspakani. Akka israelifāfema Jesús chanīmara faafono Niospa ato ifini afe yora ato imaxii. Nāskatari ēfe kaifāferi anā Nios chanīmara faifāfe Niospa anā ato ifixii afe yora inōfo. ²⁶ Akka keyokōichi israelifāfe Jesús chanīmara faifāfe Epa Niospa ato ifixii afe yora inōfo. Nānori Isaías kirika keneni iskafakī:

Nōko Ifo Siōn anoax oxii nōko chaka noko soaxoxiki nō afe ipaxanō. Nā nōko Ifo israeli yora ixii. Nāato israelifo ifiyoi anā afara chaka āto ifo inōma, ixō Isaías kirika keneni. ²⁷ Askata Isaías Niospa meka anā yoini iskafakī:

Ē ato yoyoni keskara ē āto chaka ato soaxoxii,
ixō Niospa yoini Isaías kirikaki keneni.

²⁸ Jesúsnoa meka shara judeofāfe nikakaspakani, noikaspakakī. Akka mā judeoma. Nāskakē Epa Niospa mato sharafaxōa āfe meka shara Jesúsnoa mā chanīmara fanō. Akka judeofāfe āto xinifo Niospa yoini iskafakī: “Ē mato ifi mā efe yora inō,” ixō ato yoini. Nāskakē āto xinifoōxō Niospa ato noi, āfe fenafori noikōi. ²⁹ Epa Niospa ēfe kaifo āfe afama mīshti ināxixakī yoyoni keskara anā fetsafaima afetīamamāi ato ifiyonixakī. Nāskakī ato potapakenakama. ³⁰ Akka mā judeoyamafixō mā Epa Niospa nikayopaonima.

Akka iskaratīa mā anā nikayospa ipaima. Nāskakē Niospa mato sharafaxopai mā chanīmara faito. Akka ēfe kaifo judeofo ato sharafaxopaifiaito nikakaspapoonifo. Nāskakē mā chanīmara faito Epa Niospa mato noikī mato sharafaxōi. ³¹ Nā mā Nios nikakaspayopaoni keskakani ēfe kaifofo. Nāskafiaifono nā mato noiai keskari fakī atori Niospa noikōi. Nāskakē chipo Epa Nios anā shināxikani. ³² Epa Niospa yoini tāpioxō iskafakī: “Yora keyokōichi chakafamisfo, nikayospafo,” ixō yoini. Askafiaifono ato noikī ato chaka soaxoxii afe īpaxanōfo.

Nios sharafinakōia

³³ ¡Aicho! ¡Nōko Nios sharakōi! Afama mīshti tāpikōia. Shināsharakōia. Āfe shinā mēraxō yorafoōnoa shināi keskara tsōa tāpitiroma. Aato akai keskara tsōa tāpitiroma. ³⁴ Tsōa nōko Ifāfe shināi keskara tāpitiroma. Tsōarikai nōko Ifo tāpimatiroma. ³⁵ Tsōarikai nōko Ifo afaa ināma noko nīminō. ³⁶ Ares āfe shināmā shināxō afama mīshti onifani. Keyokōi āfenā. Aōnoax nipanaka. Nāskakē, “Nios sharakōira,” fapanakafo. Askapainō.

12

Afeskax Niospa āfe yonomati nō itiomākī

¹ Efe yora mīshtichi, ē mato yoisharapaiyai keskara akāfe. Epa Niospa mato noikī mato sharafamiski. Nāskakē māri ināmekāfe mātō Ifo inō, āfe yonomati ipaxakakī. Mā askaino anā afara chaka mātō ifo itiro, Nios mātō Ifo iki. Shinākapo. Mā mēste shināsharakōikī Nios noiyanā sharafakāfe. Mā askafaino Nios matoki inimakōitiro. ² Nios Ifofaafāfema shināi keskara shināyamakāfe. Mā shināpaoni keskara anā shināyamakāfe. Iskaratīa Niospa mātō shinā mēra fetsafapaiyai keskara shinākāfe. Afaa fetsakai mā shinātiroma. Mā askakī mā tāpitiroma Niospa mato imapaiyai keskara sharafinakōi. Mato imapaiyai keskara mā ikaino matoki inimatiro.

³ Epa Niospa ea noikī ea yoia ē mato tāpimanō. Nāskakē ē keyokōi mato yoisharapai. Kakapaimis iyamakāfe. Niospa mato imapaiyai keskara fisti shinākāfe. Afaa fetsa shināyamakāfe. Niospa mato shināmana keskara fisti matoōnoa shinākāfe. Mēstekōi matoōnoa shinākāfe. Mā Nios chanīmara fakī shinākāfe iskakī: “Ea Niospa imapaiyai keskara ē ipai,” ixō shinākāfe. ⁴ Ē mato afara fetsa ēa yoipai. Nōko yora fistifiano nō pōyayai fetsea. Askata nō feroyata, pachoyata, nā nō fisti askai fetsea. Nāskaxō nāfāfe nō afara fetsafo atiro. ⁵ Nāskarīfai nōko Ifo Cristo fistikōi. Akka nōfi āfe pōya keskarata, āfe fero keskarata, āfe tae keskarata nō iki fetsea yora fisti fiax.

⁶ Epa Niospa noko amapaiyai keskara nō aōxō fetsafo axosharatiro. Mā nō Nios Ifofaano a noko imapaiyai keskara noko imaketsai fētsa āfe meka ato yoinōfo, fētsari ato tāpimanō, fētsari afaamaisfori ato inānō. Nāskarafo noko imaketsai. Mā nō Nios Ifofaano noko noikī noko katoa noko amai keskara nō anō. Noko fetsafo katoa āfe shināōxō fetsafori āfe meka nō ato yoinō. Nāskakē mā mato katoano mā chanīmara faxō mato yoiai keskara fetsafori ato yoisharakāfe. ⁷ Mā mato fetsafo katokē āfe shināōxō fetsafori axosharafāfāikāfe. Mato fetsafo katokē āfe shināōxō āfe meka ato tāpimasharakāfe. ⁸ Mato fetsafo katokē aōxō fetsafo ōiti ato fepeaxōfāfāikāfe. Mato fetsafo katokē afara yopaifo inimayanā ato ināsharakāfe. Mato fetsafo katokē āto xanīfo mā inō. Nāskakē Niospa shināmana keskara ato yonomasharakāfe. Xanīfo mēsteshara ikāfe. Nā mato katokē āfe shināōxō omiskōiaifo ato noikī inimayanā ato axosharakāfe.

Afeskax Nios Ifofafo itirofomē

⁹ “Ē mato noira,” ifiata ato pārayamakāfe. Yorafo noikōikāfe. Afara chakafo noikaspakāfe. Afara shara noisharakāfe. Afo potayamakāfe. ¹⁰ Nā mā Nios chanīmara faafo tii noinākāfe. Mato fe yorakōifo fe mā noināmis keskariai noinōnākāfe. A mā mā nōimeai keskariai fetsafori ato noisharakāfe. “Fetsafo finakōiaki, ē finakōiyamaki,” ixō ato sharafakāfe. ¹¹ Nōko Ifo yonoxoni xaniyamakāfe. Niospa Yōshi Sharaōxō inimakāi yonosharaxokāfe. ¹² Epa Niospa mato sharafaxoxiai keskara shinākāfe. Nāfo shināi inimakāfe. Akka omiskōifi fena fenayamakāfe. Epa Nios kīfikī xateyamakāfe. ¹³ Nios Ifoafāfe afara yopaifono ato inākāfe. Fetsafo pimasharakāfe. Pexe yopaifāfe mato pexe mēra ato ikimakāfe. Ato kexesharakāfe.

¹⁴ Mato omiskōimanaiifāfe ato kopiyamakāfe. Nios kīfikāfe iskafakī: “Epa Niospa ato chakafayamafe ato sharafafe,” ixō Epa Nios kīfikāfe. Nāskaxori ato ĭchayamakāfe. Askatamaroko ato sharafaxokāfe. ¹⁵ Inimaifono māri inimakāfe. Ato sharafafono aōnoax inimakāfe. Oiaifono māri shināmitsayanā ato shinākāfe. Omiskōiaifono māri atoōnoax omiskōikāfe. ¹⁶ Afe feratenākakīma Epa Niospa mato shināmapaiyai keskara fisti anori shinākāfe. “Ē ato keskarama,” iyamakāfe. Xanīfofo fisti fe rafepaimis iyamakāfe. Afaayamafo feri rafekāfe. “Ē tāpia keskarakai fetsafāfe tāpiafoma,” ixō anori shināyamakāfe. Kakapaiyamakāfe.

¹⁷ Mato chakafafiaifāfe ato kopiyamakāfe. Āto ferotaifi isharakāfe, “Nios chakara,” fayamanō. ¹⁸ Keyokōi yorafo fe rafepaisharakāfe. Mā aska sharafapaifiaino fetsafo mato fe rafesharapaikanima. ¹⁹ Efe yora mīshtichi, fētsa mato chakafafiaito ato kopiyamakāfe. Epa Niospa meka yoikakī kenenifo iskafakakī: “Mato chakafaifo ē ato omiskōimanikai,” ixō kirika kenenifo. Epa Niospa yora chakafo ato omiskōimaxii. Mākai ato omiskōimatiroma. ²⁰ Ato kopitamaroko nā mato noikaspaifo fonāikaifāfe ato pimakāfe. Nōamā ikaifāfe ato ayamakāfe. Ma askafaito ōikani, “Noko kopikanimara,” ikanax rāfipainōfo. ²¹ Askata fetsafāfe mato chakafapaifiaifāfe māri kopikiri ato chakafayamakāfe. Chaka ifofayamakāfe. Askatamaroko afara sharafataifakāfe. Askafakī mā chaka potatiro.

13

Nō xanīfofo nikakōitiro

¹ Epa Niospa yoini keskara nā maitio ikafāfe xanīfofo katotirofo. Akka xanīfo finakōia nikata afe rafeafori nikakōikāfe Niospa ato xanīfo imaino. Akka Niospa xanīfo ato imayamaino itirofoma. ² Niospa noko yoini iskafakī: “Māto xanīfofo nikakōikāfe.” Akka māto xanīfo mā nikakaspakī Niosri mā nikakaspai. Mā nikakaspaito mato omiskōimaxii. ³ Akka nō isharaxkai nō xanīfoki mesetiro. Akka nō isharayamax nō xanīfoki mesetiro. Xanīfoki mesexikima isharakāfe. Mā askaito mato chakafatama matoōnoa yoisharanōfo. ⁴ Xanīfofo Epa Nios yonoxomis keskarafo mato axosharakani. Akka mā afara chakafaax xanīfoki mā mesetiro. A xanīfoafo afokai kaxpa xanīfoafoma, mato omiskōimatirofo. Nāfofi Niospa ōimati keskarafokī afara chakafaiifāfe ato omiskōimatirofo. ⁵ Akka māto xanīfofo nikakōikāfe mato omiskōimayamanōfo. Māto shinā mēraxō shināsharaxikakī. Ato nikayamakī mā shinātiro iskafakī: “Ooa, ē nikayospakōi. Nāskax ē shināmitsaito ē mei,” ixō mā shinātiro xanīfofo nikayamax.

⁶ Māto xanīfofo Nios yonoxomisfo keskarafo pena tii mato yonoxokani mā isharanō. Nāskakē mato kori yōkaifāfe ato inākāfe aōxō mato axosharanōfo. ⁷ Mā ato nimixō ato kori inākāfe. Askatari ato noisharata ato noisharakāfe.

Nō nōinōnātiro

⁸ Tsoa nimiyamakāfe. Askatamaroko noinākāfe. Noināi eneyamakāfe. Nā nō yorafo noiaiōxō Epa Niospa yoini keskarakōi nō amis. ⁹ Noko yoikī iskafani: “Māto āfima fe iyamakāfe. Kērofori māto fenema ferī iyamakāfe. Retemitsapaiyamakāfe. Yometsoyamakāfe. Fetsa pārayamakāfe. Fetsa fīapaiyamakāfe,” ixō noko yoini. Afara fetsafori noko yoini. Nō yorafo noikī na Epa Niospa yoini keskara nō ato chakafaima. Nāskakē a mīa mī noimei keskari akī fetsafo ato noife. ¹⁰ Nō fetsafo noikōixō nō ato chakafatiroma. Akka nō ato noikōikī Niospa yoini keskara nō aki. Nō āto āfi fe nō ipaima. Askatari nō ato noikōixō nō atoki yometsoima. Askatari nō ato pāraima. Akka nō ato noiaiōxō Niospa noko yoia keskara nō atiro.

¹¹ Nā Jesús fena oyoaima chāi ē taefakī Jesús Ifofani. Akka iskaratīa nōko Ifo Jesús mā chaima oi. Nāskakē ē mato yoiai keskara akāfe. Oxakatsa ikai keskara iyamakāfe. Oxakatsa ikīkai nō yonosharatiroma. Nāskakē xanikakīma Jesús yonosharaxokāfe itipinīsharaxikakī. ¹² Mā penaino samamakōi penatiro. Nāskarifiakakī mā nōko Ifo chaima oaino fakish mēra ika keskara iyamakāfe. Māto chaka xatekōikāfe. Jesús ika keskara māri xafakīa ikāfe afara chakafaxikakima. ¹³ Isharakōikāfe penano nō ōisharatiroma pakexikima. Nāskarifiakī Jesús Ifofaax nō isharakōitiro afaa chakafatama. Akka fetsafāfe monokakī afara chakafaifo mēra foyamakāfe. Chaka fetsa fetsatapafō ayamakāfe. Pāeyamakāfe. Askatari māto āfima chotayamakāfe. Kēromāri māto fenema chotamayamakāfe. Afara chaka fetsafo shināyamakāfe. Feratenā faatanāyamakāfe. Fetsa xītipaimis iyamakāfe. ¹⁴ Askatamaroko nōko Ifo Jesucristo fe rafekāfe. Jesús ika keskara māri ikāfe afara chakafakīma. Afara chaka mā shināpaiyai keskara ayamakāfe.

14

Mato fe yorafo a Nios Ifofafo mekafakī chakafayamakāfe

¹ Meka fetsa ē mato yoinō. Fetsafāfe Jesús Ifofafiakaxō āfe meka tāpisharakanamax mato fe ichanāifono, “Aicho, nofe ichanāi fekāfe,” ato fakāfe. Mā shināi keskara anori shināyamaifono ato fe feratenāyamakāfe. Ato mekafakī chakafayamakāfe. ² Mato mēra ixō fētsa yoitiro iskafakī: “Ē Jesús chanīmara faxō keyokōi ē pitiro,” ixō yoitiro. Akka fētsa yoikī iskafatiroma: “Ēfi Jesús chanīmara fakī ēkai nami pitiro. Ē fanafō fisti pitiro,” ixō yoitiro Jesús meka tāpisharaxoma. ³ Fētsafāfe nami pikī a nami pimisfoma ato mekafakī chakafatiroma. Ato yoikī iskafatirofoma: “Mā afaa tāpiama. Nō nami pia shara, noko chakafatiroma. Nami shara,” ato fatirofoma. Nāskarifiakī nā nami pimismato a nami pimisfo ato mekafakī chakafatiroma. Ato yoikī iskafatiroma: “Nafāfe nami pikakī chakafakani,” ixokai atoōnoa yoitirofoma. Akka Epa Niospa keyokōi nāskarafo noko ifi nō āfe fakefo inō. Nāskakē fetsafo mekafakī chakafayamakāfe. ⁴ Jesús Ifofaafokai māto inafoma. Akka afāfe Epa Nios yonoxomisfo. Nāskakē ato mekafakī chakafayamakāfe. Epa Niospa ato yoitiro. A chakafaifo ato iskafatiroma: “Mā chakafai,” ixō ato yoitiro. Askatari a sharafaifo, “Mā sharafai,” ato fatiro. Akka a chaka shināifo Niospa ato tāpimatiro isharanōfo anā chaka shinānōfoma.

⁵ Akka a Nios Ifofafo fetsafāfe shinākani iskafakakī: “A judeofāfe tenetitīa nō ichanātiro Jesús shināi,” ixō anori shinākani. Akka fetsafāferi shinākani iskakakī: “Nā pena keyokōi shara nō ichanātiro Jesús shināi,” ixō shinākani. Nāskaxō nā āto shināmā shināifo keskara shara. Nā shināifo penata ichanātirofo Jesús shinākani. Akka mā shināi keskara shināyamaifono ato mekafakī chakafayamakāfe. ⁶ “Na judeofāfe tenetitīa nō ichanātiro Jesús shināi,” ixō shināifāfe, nāfāfe nōko Ifo Jesús Ifofasharapaikani. Akka a nā

fatora penata nõ ichanãtiro Jesús shinãi ikaifãferi, nãfãfe nõko Ifo Jesús Ifofasharapaikani. Askatari fetsafãfe shinãkani: “Nõ nami pitiro. Aicho, Epa Niospa mĩ noko nami inã nõ pinõ,” ixõ shinãkani. Nãfãferi nõko Ifo Jesús Ifofasharapaikani. Akka fetsafãferi nã nami piyamaifãfe nãfãferi nõko Ifo Jesús, “Aicho,” fatirofo. Nãskaxõ nãfãfe Nios shinãsharapaikani. ⁷⁻⁸ Nõ niyoxõkai nõa nõ apaiyai keskara fisti nõ shinãtiro. Epa Niospa noko amapaiyai keskara nõ shinãtiro. Nõfi ãfenãfoki. Nãfi nõko Ifokĩ. A nõ naitĩari nõko Ifo Jesús niyoxõ nõ Ifofasharapai nokoki inimanõ. A nõ naitĩari nõko Ifo nõ shinãtiro nõmãi ãfenãkõixõ.

⁹ Cristo noko nãxoni. Mã maifafono otokainixakĩ. Iskaratĩa mã nia. Nãskakẽ nõ nayoamax nõko Ifo iki. Mã nõ naaxri nõko Ifo ixii. ¹⁰ ¿Afeskafakĩ mato feta chanĩmara faafo mã mekafakĩ chakafaimẽ? ¿Afeskafakĩ mã fetsaõnoa mã shinãchakaimẽ? “Aakai afaamara,” ixõ mã shinãi. Shinãkapo, keyokõi nõ chipo Nios ikano nõ akiki nokoi kaikai. Askatari noko yoixii nõ afara sharafayamakẽ nõ chakafamiskẽ. ¹¹ Isaías Niospa meka yoikĩ kirika keneni.

Niospa yoini iskafakĩ: “Chanĩmakõi ẽ nia. Chanĩmakõiri keyokõi maifo tii anoafõ ekeki nokoxikani. Ekeki ratokonõ mai chachikaxõ yoixikani: ‘Epa Niospa, mĩ chanĩmakõi, mĩ Nioskõi,’ ixõ ea keyokõichi yoixikani.”

¹² Akka keyokõichi Epa Niospa ferotaifi nõ amis keskara nõ yoixii. Nõ shinãmis keskarari nõ yoixii.

Fetsafo afara chakafamayamakãfe

¹³ Nãskakẽ a mato feta Jesús chanĩmara faafo mekafakĩ chakafayamakãfe. Iskafakĩ shinãkãfe: “Nõ afara chakafaito õikaxõ akairi chakafatirofo. Nãskakẽ nõ afaa chakafapaima akairi afaa chakafayamanõfo.” ¹⁴ Jesús ẽfe Ifokẽ ẽ mato yoisharapai. Keyokõi a nõ piaifo shara nõ pitiro. Nã ẽ chanĩmara fakõini. Nãskafiano fetsafãfe shinãkani iskafakakĩ: “Na piaifo nõ pixõ nõ chaka shinãtiro,” ixõ shinãkani. “Nõ nami pitiro,” ixõ shinãfikakĩ mã nami pikani. Nãskaxõ chaka shinãkani. ¹⁵ Mato feta fẽtsa Jesús chanĩmara faito ãfe ferotaifi a nami pitiro piyamakãfe ãfe shinã mẽraxõ shinãchakanõma. A noikõixõ mã ãfe ferotaifi pitiro. Nõko Ifo Cristo aõnoaxri nani. Nãskakẽ a pitiro pikĩ mã fetsa shinãchakamatiro. Nãskakẽ ãfe ferotaifi piyamakãfe Jesús kachikiri faax fenoyamanõ. ¹⁶ “A ẽ akai keskara chakama,” ixõ mã shinãfiaino fetsafãfe askara shinãkanima. Iskafakĩ shinãkani: “Na mã akai keskara chaka,” mato faifono mã xaterisafatiro matoxõ shinãchakayamanõfo. ¹⁷ A nõ piaito Niospa yora noko imatiroma. Askatari a nõ ayaito Niospa yora noko imatiroma. Akka Nios nõko xanĩfokõino ãfe Yõshi Sharaõnoax nõ sharakõi. Nõko õiti fekaxteima nõ inimakõitiro. ¹⁸ Nõko Ifo Cristo nõ nikasharaino Epa Nios nokoki inimasharatiro. Yorafãferi nokoõnoa shinãsharatirofo.

¹⁹ Nãskakẽ Jesús chanĩmara fai fetsafo fe isharakõikãfe. Jesúsnoa yoinõnãkãfe a keskara shara ixikakĩ. ²⁰ Niospa yoini keyokõi a nõ piyai shara. Nãskafekẽ fetsafãfe, a Nios tãpisharãfãfema shinãkani iskafakakĩ: “Afara fetsa nõ pixõ nõ chakafai,” ixõ shinãifono ãto ferotaifi afara piyamakãfe. Akka mã ãto ferotaifi piaino mato õikakĩ ãto shinã mẽra shinãchakatirofo. Nãskaxõ anã Jesús Ifofasharatirofoma. ²¹ Mã nami piaito fetsafãfe mato õikĩ shinãchakatirofo. Nãskaxõ anã Jesús Ifofatirofoma. Nãskakẽ ãto ferotaifi afaa piyamakãfe. Askatari mã mãmã ayaito õikakĩ fetsafãfe shinãchakatirofo. Nãskaxõ anã Jesús Ifofatirofoma. Nãskakẽ anã ayayamakãfe. Afara fetsafori akĩ mã ato shinãchakamatiro, nãskakẽ xatekãfe Jesús Ifofanõfo. ²² Nãskaxõ mã shinãi keskara mares shinãkãfe. Epa Nios fisti mã yoitiro. Mã Nios chanĩmara faxõ mãto shinã mẽra shinãsharakĩ mã iskafatiro: “Chanĩma, ẽ akai keskara chakama,” ixõ shinãkĩ mãto shinã mẽra mã inimatiro. ²³ Nãskaxõ fẽtsa Niospa meka tãpisharaxoma shinãtiro iskafakĩ: “Nafõ pikĩ ẽ chakafairakaiti,” ixõ

shināfikī akairi pikī chakafatiro. Afara fetsafori shinākī iskafakī: “Nafo akī ē chakafairakaiti,” ixō shinākī akairi akī chakafatiro.

15

Nā mā apaiyai keskara fatama fētsa apaia keskara axokāfe

¹⁻² Jesús chanīmara fakōixō a Niospa meka tāpisharafoma nō ato fenāmāshta yoitiro ato fe feratenātama. Nōa nō apaiyai keskara fisti nō atiroma. Nā Jesús chanīmara faa fetsafori noikī nō ato axotiro āto shinā mēra inimamakī shara inōfo Jesús Ifo sharafakōinōfo. ³ Shinākapo. Nōko Ifo Cristo aafi apaiyai keskara fisti shināpaonima. Aōnoa Nios yoimisto kirika keneni iskafakī: “Epa, ē mia nikakōia. Akka mia chakafakakī eari chakafakani,” ixō kirika keneni Cristoōnoa yoikī. ⁴ Niospa meka kenepakenifo noko tāpimaxikakī. Āfe meka nō chanīmara faxō afara chaka finōkōixō nō tenekōinō. Āfe mekaōxō nōko ōiti nō fepeaxō nō tāpitiro nōko Ifo fe nai mēra chipo nō afe ipanaka anā afara chakapa noko omiskōimanōma. ⁵ Noko afara chakapa afeskarafafaiito Epa Niospa noko mitsisfamatiro nō tenenō nōko ōiti fepeaxokī. Nāskakē mā Jesús Ifofasharaino mato nānori fisti shināmatiro. ⁶ Nāskakē nōko Ifo Jesucristo āfe Apa nō yoisharai. Nāskax nā meka fistipa nō mekai keskarakōi Epa Nios yoisharakī nā yora fisti keskara.

Niospa meka shara judeofoma yoinifo

⁷ Cristo nokoki inimakī noko ifini afe yorafo nō inō. Nāskakē māri fet-safo fe yōra faatanākāfe. Mā askaino Niosnoa shināsharatirofo. ⁸ Ē mato yoinō Jesucristo mai ano oni judeofo ato yonoxomis keskara ikiyoi. Niospa nōko xinifo yoiyoni keskara Cristo oni. Nāskakē Niospa nōko xinifo yoini keskara chanīmakōikē nō tāpitiro. ⁹ Akka judeofomaōnoaxri Jesús oni. Nāfāferi chanīmara faxō yoixikani iskafakakī: “Aicho, Epa Niospa noko noikī āfe Fake nokoki nīchini. Epa Nios shara,” ixō yoixikani. Nānori David kirika keneni iskafakī:

Epa Niosi, ē mīōnoa ato yoisharaxii, a judeofoma. Ē mia fanāki, “Aicho, Nios shara,” ē mia faxii, ixō kirika keneni. ¹⁰ Anā Niospa meka yoikī kirika keneni iskafakī:

Judeofoma nā judeofo fe inima faatanākāfe. Māri ato fe Niospa yora ixii, ixō kirika keneni. ¹¹ Anā kirika keneni iskafakī:

Maitio anoafāfe, nōko Ifoōnoa yoisharakāfe. Keyokōi nā maifo tii ikafāfe nōko Ifo fanākāfe, ixō kirika keneni. ¹² Isaías aatori iskafakī kirika keneni:

Nōko xini Isaí āfe fena na maitio ikafāfe āto xanīfo ixii. Shināxikani iskafakakī: “Nā fistichi Nios ika ano noko ifitiro nō afe ĩpaxanō, nō anā nanakama,” ixō shināxikani, ixō Isaías kirika keneni Cristoōnoa yoikī.

¹³ Epa Nios chanīmara faxō nōko Ifo oxii noko ifixiki nō afe ĩpaxanō,” ixō noko shināmani. Nāskakē ē mato kīfixomis Niospa mato inimamanō. Askatari mātō shinā mēra mato shināmasharai mā afeskatama mā isharanō mato axosharai. Mā Nios chanīmara faano āfe Yōshi Sharapa mato axosharai mā isharanō.

Pablo Jesucristoōnoa judeofoma ato yoini

¹⁴ Efe yora mīshtichi, mē tāpia mā noinā faatanāito Jesúsnoa mā tāpisharai mā yoinōnāsharatiro. ¹⁵⁻¹⁶ Niospa ea noikī ea katoni Jesucristo āfe yonomati ē inō, āfe meka shara ē mato tāpimanō. Nāskakē ē ranotama anā aōnoa ē mato shināmasharai kirika kenekī. Akka Niospa ea nīchini judeofoma ē ato Jesús

Ifofamanõ. Mã Jesús Ifo sharafaxõ, mãto chaka mã soax a keskara shara mã inõ. Nãskax Epa Nios matoki inimakõi.

¹⁷ Nãskakẽ ã inimakõi nõko Ifo Jesucristomãi ea katonikẽ Epa Nios ã yonoxonõ judeofoma Niospa meka ã ato yoinõ. ¹⁸ Ëa ã ato yoima. Cristo ea shinãmanaino ã ato yoimis. Nãskakẽ a ã ato yoimis keskara Epa Niosnoa nikakõimisfo. ¹⁹ Æfe Yõshi Sharapa ea shinãmanaino a tsõa atiroma keskara ã ato õimana. Nã maitio Jerusalén anoafõ yoita Ilírico anoafõri ã ato yoini. Keyokõi nã meka shara Cristoõnoa ã ato yoifofãsafamis. ²⁰ Ëkai a yora fetsafãfe Cristoõnoa yoimisfo ari ã kapaimisma. A Cristoõnoa nikamisfoma ano ã kapaimis ato tãpimaxiki. ²¹ Nãnori Isaías Niospa meka keneni iskafakĩ:

Tsõa aõnoa nikayomisma chipo nikakaxõ tãpinõfo, ixõ keneni.

Pablo Roma ano kapaikĩ shinãni

²² Akka ã mato ari kapaimis. Ë mato õikapai fi ã kamisma. Afara fẽtsa ea katimafamis. ²³ Nãskafixõ iskaratĩa Jesúsnoa mẽ ato yoikĩ mẽ mitoa. Nãskax mẽ itipinĩa mato ari kaxiki. Mẽ xini ichapa amis mato õikapaikĩ. Mẽxotaima ã mato ari kapaimis. ²⁴ Ë España ari kai ã mato ano nẽteyoxii mato fe mekaxiki nõ yoinõnãsharaxiki. Mato anoax ã kaito a ã yopai ea inãxikãfe ã España ari nokosharanõ. ²⁵ Akka iskaratĩa ã Jerusalén ano kayoikai. Jesús chanĩmara faafãfe ea nĩchikani a Jerusalén anoxõ Jesús chanĩmara faafõ ã ato kori inãno. ²⁶ Macedonia anoxõ a Jesús chanĩmara faafãfe Jerusalén anoafõ a Jesús chanĩmara faafõ ato kori inãpainifo. Acaya anoxori Jesús chanĩmara fakaxõ ato kori inãpainifo a afaamaisfo. Nãskakẽ ea kori inãnifo ã ato inãtanõ. ²⁷ Inimayanã ato inãpaikakĩ ato yoinifo iskafakakĩ: “Jerusalén anoax Jesúsnoa yoimisfo nokoki fenifo Jesúsnoa meka shara noko yoi fevani. Akka nokoki feyamanifono na meka shara nõ nikakeranama. Nãskaxõ nõ afarayaxõ nõ ato inãpai ato sharafakĩ,” ixõ yoinifo. ²⁸ Nãskata ã ato kori inãfainikai Jerusalén anoax España ari kakĩ. Nãskaxori ã Roma anoafõ ã mato õifainikai. ²⁹ Mẽ tãpia ã mato ano nokoxõ nõko Ifoxõ ã mato yoisharaxii mãto shinã mẽra mã inimanõ.

³⁰ Efe yora mĩshtichi, meka fetsari ã mato yoipai. Mã nõko Ifo Jesucristo noixõ ãfe Yõshi Sharaõxõ ea noikãfe. Ea Nios kĩfixokãfe ã yonosharaxonõ afanã ea afeska fanõma. ³¹ Ea kĩfixokãfe Epa Niospa ea kexenõ Judea anoafãfe a Jesús chanĩmara faafãfema ea afeska fanõfoma. Ea kĩfixokãfe a Jesús chanĩmara faifo Jerusalén anoafõ ã ato kori inãino inimakõikai finõfo. ³² Mẽ ato inãkĩ mitoano Epa Niospa ea nĩchiano ã inimayanã matoki nokoxinõ. Nãskata nõ yoinõnãsharaxinõ nõko õiti mẽra inimayanã. ³³ Epa Nios mato fe inõ. Akka Niospa noko imasharatiro nõ isharanõ.

16

Pablo ato meka fomani

¹⁻² Nofe yora Febe, Cencrea anoax matoki nokokẽ sharafakãfe. Nã kẽromã nõko Ifo Ifofasharakõimis. Cencrea anoxõ a Nios Ifofaafo ato sharafaxomis. Yora fetsafori ato afara yopaito axokãfe.

³ Aquila ãfe ãfi Prisca nã rafe efeta Jesucristo yonosharaxomisfo. Ea ato yoisharaxokãfe. ⁴ Yorafãfe ea retepaiyai fi ãfe nã rafeta ea kexesharamisfo ea reteyamanõfo. Ëfe kaifomari nã Jesús chanĩmara faafãfe ichanãkaxõ yoimisfo iskafakĩ: “Aquila yafi Prisca nõ atoki inimasharakõi,” ixõ yoimisfo. ⁵ Æto pe xe anoaxri ichanãkaxõ ea ato yoisharaxokãfe. Efe yorakõiri Epeneto ea yoisharaxokãfe. Nãatofi Asia anoxõ Cristo chanĩmara fakĩ taefaniki. ⁶ Maríari mato yonosharaxomiski aari ea yoisharaxokãfe. ⁷ Efe yora raferi Andrónico

yafi Junias ea ato yoisharaxokāfe. Nā rafe efe karaxa mēra ikinifo. A Jesúsnoa yoimisfāfe a rafeōnoa yoisharamisfo. Ē Jesucristo chanīmara famatai nā rafeta chanīmara fakī taefanifo.

⁸ Ampliatori ē noishara nāatomāi nōko Ifo Ifofasharakōiaito. Aari ea yoisharaxokāfe. ⁹ Urbano efeta Jesucristo yonoxomis. Nārifi ea yoisharaxokāfe. Efe yorashtari Estaquis nāri ea yoisharaxokāfe. ¹⁰ Apeles feronāfake sharakōi. Epa Nios akiki inimamis. Nāatori Jesucristo yonosharaxomis. Nāri ea yoisharaxokāfe. Aristóbulo yafi afe yorafori ea ato yoisharaxokāfe. ¹¹ Efe yorashtari Herodión ea yoisharaxokāfe. Narciso yafi afe yorafāferi nōko Ifo chanīmara faafo, afori ea ato yoisharaxokāfe. ¹² Trifena yafi Trifosari ea ato yoisharaxokāfe. Nā kēro rafeta nōko Ifo yonosharaxomisfo. Nofe yora Pérsidari ea yoisharaxokāfe. Nā kēromāri nōko Ifo yonosharaxomiski. ¹³ Nōko Ifāfe Rufori katonni afe yora inō. Nā Rufo āfe afa ēfe efakōi keskara. Ea kexesharamis. Nā raferi ea ato yoisharaxokāfe. ¹⁴ Asíncrito ikaino Flegonte ikaino Hermas ikaino Patrobas ikaino Hermes ikaino nāfāfe nōko Ifo chanīmara faafo. A fetsafāferi nōko Ifo chanīmara fakanax ato fe ikafori ea ato yoisharaxokāfe. ¹⁵ Filólogo ikaino Julia ikaino Nereo ikaino āfe poi Olimpas ikaino keyokōi a nōko Ifo chanīmara fakanax ato fe ikafori ea ato yoisharaxokāfe.

¹⁶ Keyokōi ichanākanax yoinōnā faatanāsharakāfe noinōnāsharaxikakī. Nā maitio ikafāfe a Cristo Ifofaafāfe mato yoisharapaikani.

¹⁷ Efe yora mīshtichi, ē mato yoinō nikakapo. Mato fe ichanāmis fetsafāfe mato afara chakafamapaikani anā mā Jesúsnoa shinānōma. Akka nō mato mēstekōi tāpimanai keskara nāfāfe mato anori yoikanima. Akka fakirira mato yoipaikani anā mā Jesús shinānōma. Nāskax ato fe rafeyamakāfe, mato pāratirofokī. ¹⁸ Afāfekai nōko Ifo Cristoōxō yoimisfoma. Nāfāfe afara fipaiyaifo fistis shināmisfo. Niospa meka tāpisharafoma āto meka fistiōxō ato pārapaikani ato anorima shināmaxikakī. ¹⁹ Keyokōichi mā nikafo nōko Ifo mā Ifofasharakōikē. Nāskakē ē matoki inimakōini. Afara sharafoōnoa tāpikōikāfe. Mā afara chakaōnoa tāpiyamakāfe. Afoōnoa shināyamakāfe. ²⁰ Epa Niospa mato imasharatiro mā isharanō. Nāato Satanás mato nāmā potai anā mato afeskafanōma. Nōko Ifo Jesucristo mato sharafaxopainō.

²¹ Nā Timoteo efeta Jesús yonoxomisto mato mekashara fomai. Askatari Lucio ikaino Jasón ikaino Sosípater ikaino nāfāferi mato mekashara fomakani. Nāfo efe yorakōifo.

²² Nā Terciori mato mekashara fomai. Nāato ea kirika kenexona.

²³ Gayopa pexe mēra ē ikē ea kexemis. Jesús chanīmara faa fetsafori Gayopa pexe mēranoax ichanāmisfo. Nāfāferi mato mekashara fomakani. Na Erasto pexe rasi anoa ato kori kexexomisto mato mekashara fomai. Askatari nofe yora fetsari Cuarto nāatori mato mekashara fomai.

²⁴ Nōko Ifo Jesucristo mato noikī mato sharafanō. Askapainō.

Mā ato yoikī enekī Niosnoa ato yoisharani

²⁵⁻²⁶ Epa Niospa mato kexesharanō. Ē Jesucristoōnoa mato yoimis keskara āfe shināmā mato shināmatiro mā Ifofasharanō. A iyopaonifāfekai tsōa Jesucristoōnoa tāpiyopaonifoma. Akka iskaratīa keyokōichi mā tāpiafo. Epa Niospa nā nipanakato noko nīchini Jesucristoōnoa nō ato yoinō. A ixiainoa Epa Niospa ato yoini nānorikōi kirika kenenifo. Nā maitio ikafāfe Jesús chanīmara fayana nikasharatirofo.

²⁷ Nōko Ifo Jesucristoxō keyokōichi Niosnoa yoisharapakenakafo. Nōko Nios fistichi keyokōi tāpikōia. Askapainō.

Nā tii ē mato yoi.

Pablo Corinto Anoafu Kirika Kenexõ Fomani

Pablo Jesús chanĩmara faafu Corinto anoafu kirika kenexõ ato fomani

¹ Ēkĩa Pablo, ẽ mato kirika kenexõ fomai. Nofe yora feta nã Jesús Ifofamis feta, ẽfe ane Sóstenes, efeta mato kirika kenexoni. Epa Niospa ea katopaikĩ ea katonĩ ẽfe meka shara Jesucristoõnoa ẽ yoifofãsafanõ. ² Akka Jesucristo ea nĩchĩni ẽ ẽfe meka shara keyokõĩ maifo tii ẽ ato yoifofãsafanõ. Corinto anoafãfe mãfi Niospa fakefoki. Nãskakẽ ẽ mato kirika kenexõ fomai. Mã mēxotaima ichanãmis Niospa meka shara tãpisharakõixikĩ. Niospa mato katonĩ Jesucristoõnoax mã afe yora shara inõ. Mato fisti katonĩma, a shinãifori keyokõĩ ato katonĩ mato fe Niospa yora inõfo. Nã mai fetsa anoafãfe nõko Ifo ẽto Ifori. ³ Mato noikĩ mãto shinã mēraxõ mato shinãmasharanõ. Epa Nios feta nõko Ifo Jesucristo mato askafanõ.

Jesucristo afara sharafo noko axotiro

⁴ Mē tãpia Jesucristo mato noikĩ afarafo mato tãpimani ẽfe õiti keskara mã inõ. Nãskara tãpixõ ẽ Epa Nios kĩfikĩ iskafa fafafaĩni: “Aicho Epa Niosi, mĩ Corinto anoafu afara sharafo Jesucristoõxõ mĩ ato tãpimanaki,” ixõ ẽ kĩfifafaĩni. ⁵ Chanĩma, Jesucristo mato fe rafesharaino aõxõ mã Niosnoa tãpisharakõitiro. Akka ẽfe shinãõxõ xafakĩa mã yorafo mã yoisharatiro. Jesucristoõnoa mã ato yoisharatiro. ⁶ Nõ mato Jesúsnoa yoini keskara nikakĩ mãto õiti fetsafaxõ a keskara shara mã ixii. Nãskakẽ mã Jesús chanĩmara faxõ mã mã ato õimana. ⁷ Nãskakẽ Epa Niospa ẽfe Yõshi Sharaõxõ mato imapaiyai keskara mã iki. Nios chanĩmara faa fetsafo nãskarifiakani Niospa mato shinãmasharaino. Nãskakẽ mã nõko Ifo Jesucristo fe ipaikõikĩ mã manasharai nã nokoaitĩa õixikĩ. ⁸ Oyoxoma mato kexesharayoi. ẽfe kerex shara mato inãyoi mã Ifofasharano. Nãskakẽ nokoõxõ yoixii iskafakĩ: “Mãfi efe ipanakaki, ẽ mato chaka soaxonano. Nãskakẽ tsõa mato iskafatiroma: ‘Mã chakakõifoki,’ mato tsõa fatirofoma,” ixõ mato Jesús yoixii. ⁹ Epa Niospa mato katonĩ ẽfe Fake nõko Ifo Jesucristo fe mã rafenõ. Epa Nios chanĩma, noko yoiai keskara aki.

Corinto anoxõ Jesús chanĩmara faafãfe anoris shinãñifoma

¹⁰ Efe yora mĩshtichi, ẽ mato yoisharapai. Nõko Ifo Jesucristo ea yoiaino ẽ mato yoi nãnorifos mã shinãnõ, mã fetsa shinãnõma. Jesucristo mato shinãmapaiyai keskara fisti shinãkãfe. ¹¹ Efe yora mĩshtichi, mē nika a Jesucristo mato shinãmapaiyai keskara fisti mã shinãima. Cloépa afe yorafo nono fēkaxõ ea yoiafo mã feratenã faatanãito. ¹² Akka mã atiri iskai fetsei: “Nõfi Pablo ifofamiski. Noko tãpimanai keskara kayakaikõĩ nõ nikamis. Fetsafãfekai kayakai shinãkanima,” ixõ mã yoimis. Askatari fetsafori iskakani: “Nõfi Apolos ifofamiski,” ixõ mã yoimis. Askatari fetsafori mã iskamis: “Nõfi Pedro ifofamiski,” ixõ mã yoimis. Askatari fetsafori mã iskamis: “Nõfi Cristo Ifofai,” ixõ mã yoiketsamis.

¹³ Efe yora mĩshtichi, ẽafeskai mã feratenãimē? Askarakai sharama. Cristokai anori noko shinãmanima feratenãyanã anorima nõ shinãketsanõ. Cristokai ẽfe shinã ranãyama. Mēstekõĩ fisti noko yoimis. Akka, ẽafeskakĩ “Nõ Pablo ifofaira” mã ato faimē? Ēkai mato ifi cruz ikakĩnoax nãxonima. Cristo fisticĩ mato ifi cruz ikakĩnoax nãxonĩ mã Ifofanõ. Askatari ẽkai tsoa faka mēra ikimakĩ maotisafama ea ifofanõfo. ¹⁴ Nãskakẽ ẽ inimai. Ēkai tsoa maotisafama. Akka Crispo yafi Gayo nã rafes ẽ maotisafa Cristo Ifofaifãfe õikĩ. ¹⁵ Nãskakẽ tsõa yoitiro maotisafama: “Pablo ẽfe aneõnoax ẽ maotisamenĩ.

Nāskakē ē Pablo ifofai,” ixō tsōa shinātiroma. ¹⁶ Chōō, iskaratīari ē rama shināi. Estéfanas yafi afe yorafori ē ato maotisafani. Ē shināyoama ē tsoa fetsa maotisafamara ē ika. ¹⁷ Cristokai ea yoia ē yorafo maotisafapanō. Akka ea yoia ē aōnoa meka shara ē mato yoinō. Ēa shināxō ē mato yoima. Ēa shināxokai ē mato Jesucristo chanīmara famatiroma. Jesucristo mato ifi cruz ikakīnoax nāxoni mato chaka soaxoxikī. Cristo mekaōxō Niospa mato chanīmara famatiro.

Epa Niospa keyokōi tāpikōia afara fetsa apaikī atiro. Cristoōxō noko ōimayopaoni

¹⁸ Nāskakē Jesús ato nāxoni nikakanax a chanīmara faafāfema yoikī iskafakani: “Jesús ifi cruz ikakinoax noko nāxoni nōko chaka noko soaxoxikī, ixō noko yoipaiyafāfe nōkai chanīmara fatiroma. Āa chanīkani,” ixō shināmisfo. Nāskakanax nāfo fenokōikani. Omiskōipakenakafo mēra fokani. Akka nō Jesús chanīmara faito noko nimapakenaka nō afe ipaxanō. Niospa āfe shināōxō Jesús noko nāxoni nōko chaka noko soaxoxiki. Afara fētsakai noko nimatiroma nō afe nīpaxanō. ¹⁹ Akka Niospa meka kirikaki kenekī iskafanifo:

Fētsa yoikī iskafatiro: “Nō tāpikōia. Nōko māpo shināsharafāi nō afara fetsafo fatiro nōfi tāpisharakōiakī,” ixō shināfikakī afaa tāpiafoma. Askarafofi ē ato ōimanikai afāfe shināifo keskarakai ē ato shināmanima. Nāfāfekai afaa tāpimisfoma. Āa shināmisfo, ixō Niospa yoini.

²⁰ Akka, ġfanīmē a nō kirika kenekī tāpiakōiara imisfo? Akka tāpifikaxō a Niospa shināi keskara shinākanima. Nāfofi Niospa ato ōimaxii afaa tāpiafoma keskara fakī. “Nōfi afama mīshti tāpikōiakī,” ifiaifāfe Niospa afaa tāpiama keskarafō ato imai. ²¹ Tsōa pishtakai āto shināmā Nios tāpitirofoma. Nios fistichi keyokōi tāpisharakōia. Nāskakē nō ato yoimis iskafakī: “Niospa tāpikōixō āfe Fake Jesucristo nīchini noko nāxonō nōko chaka noko soaxoxikī,” ixō nō ato yoimis. A Nios chanīmara faafāfema yoikī iskafamisfo: “Jesús chanīmara faifāfe aōnoa anorima yoimisfo,” ato famisfo. Akka nā Jesús chanīmara faifo Niospa ato chaka soaxoni afe nipaxanōfo. Nā nō mato yoimis.

²² Akka ēfe kaifo judeofo iskamisfo: “Niospa nai mēraxō afama mīshti noko ōimanaito chipo nō Jesús chanīmara fatiro,” ixō shināmisfo. Akka nā judeofomafāferi afama mīshti tāpipaikani. Afeskaxō Niospa yorafo imasharaimākai tāpipaikani. Askatari afeskaxō Jesús yorafo āto chaka soaxonamākī nāri tāpipaikani. Afama mīshti āa shinākakī tāpipaikani. Akka tāpitirofoma. Nāskakē iskamisfo: “Noko Jesucristoōnoa yoiaifono nō tāpitiroma, fekaxkōi. Nāskakē nō Jesús chanīmara faima. Nā afara nōa nō shināi nā nō chanīmara fai,” ixō yoimisfo. ²³ Nānori shināfiaifono nō yoikī iskafamis: “Jesucristo ifi cruz ikakinoax noko nāxoni noko chaka soaxoxikī,” ixō nō yoimis. Akka ēfe kaifāfe judeofāfe yoikī iskafamisfo: “Ifi cruz ikakī mastafō askarakai nōko Ifo itiroma. Akka Cristokai afeskax natiroma,” ixō judeofāfe shināmisfo. Nāskatari yora fetsafo Cristoōnoa nikakani akiki kaxepaikani iskamisfo: “Tsōakai askara chanīmara faima. Akka tsoa fētsakai noko nāxotiroma,” ixō yoimisfo. ²⁴ Askafiaifono nā chanīmara faifo tii Niospa ato katonī afe ipaxanōfo. Judeofo yafi judeofomari Cristoōxō Epa Niospa ato katonī chanīmara faifāfe. Nāskakē āfe shinā sharaōxō ato nima. Atofi keyokōi tāpikōiakī Cristoōxō noko nima nō afe nipaxanō. ²⁵ Jesús chanīmara faafāfema yoikī iskafamisfo: “Jesucristo noko nāxoni,” ixō yoifikakī anorima shināmisfo, āa chanīkakī. “Akka yora mapo sharayato Cristo chanīmara fatiro,” ixō yoimisfo a Jesús chanīmara faafāfema. Akka anorima yoiaifono Niospa āfe Fake Jesús noko nīchixonī noko nāxoyonō. Nāskax Niospa āfe shinā a chanīmara faafāfema

āto shinā keskarama. Aatofi mēstekōi shināmis. Akka nā chanīmara faafāfema yoimisfo iskafakakī: “Nō tāpikōia,” ixō yoifikakī yoisharamisfoma. Anorima shināmisfo. “Nō afama mīshti fatiro,” ifiakakī fetsafo nimasharatirofoma. Askafikata aforikai āa chaka soametiropfoma. Akka Epa Nios fistichi afama mīshti fatiroxakī noko chaka soaxotiro.

²⁶ Efe yora mīshtichi, Niospa rama mato katoano afe keskara mā iyopaonimāki. Shinākapo. Mā fisti rasichi mā kirika kene tāpia mā ipaoni. Askatari mā xanīfo ipaonima. Nāskax mā finakōia mā ipaonima. Akka nā Jesús chanīmara faafāfema yoikī iskafamisfo: “Afāfekai afaa tāpiafoma,” ixō mato yoimisfo. ²⁷ Mato askafafiaifono Epa Niospa mato katonī afe yora mā inō. Matoōnoa yoimisfo iskafakakī a Jesús Ifōfaifāfema: “Afāfekai afaa tāpiafoma. Shināsharakanima,” ixō yoimisfo. Askatari shināmisfo iskakakī: “Nōfi afama mīshti fatiroki. Akka a Jesús chanīmara faifo pachikōifo, kerexkai shinātiropfoma. Nō atiro keskara atirofoma,” ixō shināmisfo. Mato askafafiakakī chipo mato tāpitirofo. Niospa mato afara shara tāpimanaino ōikani rāfipaitirofo. ²⁸ Nāskakē shinākani iskakakī: “Jesús chanīmara faifo afāfekai afaa tāpiafoma. Nāskakē nō ato ōipaima,” ixō matoōnoa mato yoifiaifono Niospa mato katonī afe yora mā inō. “Māakai afaama,” mato fafiaifono Niospa mato katonī mā ato ōimanō akka afāfekairoko afaa tāpiafoma. ²⁹ Akka tsōa pishtakai Niospa ferotaifi yoitiroma iskafakī: “Ē tsoa keskarama. Ē shara shināi fetsafo keskarama,” ixō yoitiroma. ³⁰ Niosnoax Jesucristo afe yorafo mā inō. Jesucristoōxō noko mēstekōi tāpimani āfe ōiti keskara noko imaxii. Noko nāxonī noko chaka soaxoxiki nō afe nīpaxanō. ³¹ Nāskakē nō Jesús chanīmara faaxkai nō kakapaimis itiroma. Niospa meka yoikī yōra kirika kenenī iskafakī: “Akka tsoakai āa yoimesharatiroma iskai: ‘Ē afama mīshti tāpikōia,’ ikax āa kakapaitiroma. Askatamaroko nō yoisharatiro nā afara sharafo nōko Ifāfe aka,” ixō kirika ano yōra kenenī.

2

Jesucristo ifi cruz ikakī mastanifo Pablo ato yoini Corinto anoafō

¹ Efe yora mīshtichi, ē matoki nokofenaxō yōra shināōxō ē mato Niospa meka yoiyameama. Niospa āfe shinā fistiōxō ē mato yoiyamea. Ēa shināxō ē mato yoiyameama. Niospa ea shināmanaino ē mato yoiyamea. ² Ē matoki oyoxoma ē shinākī iskafani: “Jesucristo ifi cruz ikakinoax noko nāxonī, nā fisti ē ato yoixikai. Afaa fetsa ē ato yoitiromaki,” ixō ē shināyamea. ³ Askata mē nokoax ē matoki ratekōiyamea. Nāskakī rateyanā ē shināyamea iskafakī: “Ē mitsisipama ea ōikakī ea nikakaspaitirofo,” ixō ē shināyamea. ⁴ Nāskakē ē mato Jesucristoōnoa yoimis ēfe shināmā shināxō ē mato yoitamarako Niospa Yōshi Sharapa ea shināmanaino ē mato yoiyamea. Ē mato yoiaino aōxō mā Jesús chanīmara fayamea. ⁵ Akka yōra shināōxō mā Jesús chanīmara fayameama. Niospa shināōxō mā chanīmara fayamea.

Niospa Yōshi Sharapa noko shināmasharatiro

⁶ Nāskakē a Niospa meka nikasharaifāfe mā tāpiafo nō Niospa Yōshi Sharaōxō xafakīakōi nō ato yoiaito. Nāskaifono fetsafāferi kirika kene tāpisharakōifikaxō Niospa shināi keskara tsōa anori shināima. Āto shināōxōkai Niospa meka nō mato yoima. Āto xanīfofōfāfe shināifo keskararikai nō mato yoima. Akka āto xanīfofo mā chaimashta tsekekani. Anā afo xanīfo ikanima. Nā xanīfofōfāfe shināifo keskara mā keyoi. A shara shināifo keskara shinākanaxma. ⁷ A nō mato iskaratīa Niosxō yoia tsōa tāpiyopaonima. Niospa mai onifayoxoma shinākī iskafani: “Ēfe Fāke ato chipo nāxoxii nā

chanĩmara faafo tii ato nimapakexixakĩ,” ixõ shinãni. ⁸ Ë na meka mato yoiyai keskarakai xanĩfofofãfe tãpiyopaonifoma. Nãskaxõ Jesús retenifo. Akka tãpikaxokai tsõa nõko Ifo Cristo ifi cruz ikaki mastakeranifoma. Nã nõko Ifo Cristo sharafinakõia. ⁹ Akka yõra kirika kenekĩ iskafani:

Afama mĩshti shara Niospa ato axoxii. Tsõa õiyomisma sharafo ato axoxii. A tsõa nikayomisma ato axõfãi a tsoa pishta ãto shinã mëraxõ shinãyomisfoma nãfo ato axosharaxii. A ato noiaifo ato itipinĩshara faxoxii, nãskara yoikĩ Niospa meka yõra kirikaki keneni. ¹⁰ Nã kirika kenekĩ yoinifo keskarakõi Epa Niospa ãfe Yõshi Sharapa noko õimani. Æfe Yõshi Sharapa keyokõi tãpikõia. Epa Niospa shinãni keskarari ãfe Yõshi Sharapari tãpikõia.

¹¹ Yõra ãfe shinã mëraxõ ãa shinãitokai tsõa tãpitiroma. Akka ares fisti tãpitiro. Nãskarifiyai Epa Niospa shinãni keskara ãfe Yõshi Shara fistichi tãpikõia. ¹² Epa Niospa ãfe Yõshi Shara nokoki nĩchini noko tãpimapaiyai keskara noko tãpimanõ. Akka nã chanĩmara faafãfema Niospa meka nikakanima. Nãfãfe shinãni keskarakai Niospa noko shinãmanima.

¹³ Nãskakẽ yorafãfe noko tãpimanifo keskara nõ mato yoitamaroko Niospa Yõshi Sharapa nõko shinã mëraxõ noko shinãmana keskara nõ mato yoimis. Æfe meka chanĩmakõi fisti. Nãskakẽ nõri aõxõ nõ mato chanĩmakõi Niospa mekakõi tãpimani. Nã meka shara mã nikamis mãmãi Niospa Yõshi Shara mato fe rafeano.

¹⁴ Akka fetsafo Niospa Yõshi Shara fe rafeyamano nãfãfe Niospa Yõshi Sharapa yoiyai keskara nikakaspakani. Nãskaxõ iskafatirofo: “Tsõakai nã meka chanĩmara faima. Akka nã shara shinãifãfe chanĩmara fakanima,” ixõ shinãkani. Akka Niospa Yõshi Sharapa shinãni keskara tsõa tãpiama. Nãskakẽ Niospa Yõshi Shara ato fe rafeyamano a yoiyai keskara tãpiafoma. Akka Niospa Yõshi Shara fistichi ato tãpimatiro chanĩmara faifono. ¹⁵ Akka fatora fetsa Niospa Yõshi Shara afe ikano Niospa tãpimapaiyai keskara tãpitiro. Fato-forimãkĩ chaka shinãifo, askatari fato-forimãkĩ shara shinãifo Niospa Yõshi Sharapa ato tãpimatiro. Nãskakẽ a Niospa Yõshi Shara fe rafeyamato a Jesús chanĩmara faifo ato tãpitirofoma. ¹⁶ Akka Isaías kirika keneni iskafakĩ:

Tsõakai nõko Ifãfe ãfe shinã mëraxõ shinãni keskara tãpitiroma. Tsõakai nõko Ifo tãpimatiro, ixõ kirika keneni. Askafiaifono nã nõ Cristo chanĩmara faifãfe a shinãni keskara nõ tãpitiro nõ afe rafexõ.

3

Corinto anoafo Niospa Yõshi Shara fe rafeafoma

¹ A fake rama kãiatokai afaa tãpitiroma. Mã yosixõ tãpitiro afara fetsa. Nãskarifiyai a rama Jesús Ifofaifãfe Niospa meka tãpisharafoma a fake yome rama kãia keskarafoma. Nãskarafo mã Jesús mãto Ifo fiano ranãrito ãfe meka mã tãpisharama. Mã rama Jesús Ifofayamafiai oa rama Jesús Ifofaifo keskarafoma, mã. Niospa meka mã mã nikafikatsaxakĩ a yoiyai keskara mã nikasharama. Ooa efe yora mĩshtichi, mãfi Niospa meka nikamisma keskarafoki, rama Jesús Ifofaifo keskara. Mãfi nã Niospa Yõshi Shara fe rafeama keskarafoma. Nãskakẽ ã mato Niospa meka tãpimasharatiroma mãkairoko itipinĩsharakẽ nikasharaxikima. ² Fake yome rama kãiato chocho fisti atiro, afaakai pitiroma. Nãskarifiakĩ Niospa meka mã nikapaifiki ãfe meka mã nikasharatiroma. Nãskakẽ ãfe meka ichapa ã mato yoiyotiroma. Æfe meka fet-safori ã mato yoipaifiaino mã nikasharaima. Nãskax mãkai itipinĩsharapaima Niospa meka nikasharaxikima. ³ Mãfi nã Niospa Yõshi Shara fe rafeama keskarafokĩ. Nãskaxõ fetsafo mã ato xĩtipai mã ato keskara ipaikĩ. Nãskax mã

fochishpanā faatanāi mā ika. Nāskaxō yōra shināi keskara mā shināi. Akka Niospa Yōshi Sharapa mato shināmapaiyai keskara mā shināima. ⁴ Mā fatora fetsafāfe yoikī iskafai: “Nōfi Pablo ifofakī. Pablo fistichi noko tāpimasharatiro,” ixō mā yoimis. Akka fetsafāferi mā yoikī iskafai: “Nōfi Apolos ifofakī. Apolos noko shara yoitiro,” ixō mā yoimis. Nāskax mā fochishpanā faatanāpai. Nāskaxō yōra shināi keskara mā shināi. Askarafokai Niospa Yōshi Sharapa mato shināmanima.

⁵ Akka askayamakāfe. Nō afaama. Akka Apolos fetakai nō afaa tāpiama. Nōkai Nios keskarama. Akka nōfi āfe inaki. Nāskaxō nō mato Jesús chanīmara famani. Nōko Ifo Niospa noko katonī noko yonomapaiyai keskara nō yonoxonō. ⁶ Ē mato iskafakī yoipai. Yora fētsa taefakī xiki fanatiro. Fetsafāfe a nāmā orometirofo foaisharanō. Nāskafixokai nā rafeta xiki foaimatirofoma. Nios fistichi xiki foaimasharatiro. Nāskarifiakī ē mato taefakī Jesucristo chanīmara famani. Chipō Apolos Cristoōnoa mato yoini āfe meka mā nikasharakōinō. Nō mato yoiaino Nios fistichi mātō shinā mēraxō mato shināmasharatiro āfe meka mā tāpisharakōinō. ⁷ Nā ē mato yoiaito mā nikai keskara Apolos feta nō afaa tāpiama. Akka Nios fistichi yorafo shināmasharatiro āfe meka tāpisharakōinōfo. ⁸ Akka taefakī fetsafo Jesús chanīmara famano, a chipō ato yoiaitori nānorikōiri ato yoi. Nā rafetamāi nānorikōi shinākakī Niospamāi ato shināmanaino. Nāskakē ato Jesúsnoa yoixikani a Ifofasharanōfo. Nāskatari Niospa a yonoxonafo ato afara ināxii. Fetsa ichapa ināta fetsafori ichapama ināxii yonoxosharafomano. ⁹ Efe yora mīshtichi, ē meka fetsa mato yoipai. Tarepa ifo fistifiano fetsafāferi yonoxotirofo. Askatari pexe ifo fistifiano fetsafāferi yonoxotirofo. Nāskarifiāi māfi Niospa āfe tare keskarafokī. Askatari mā āfe pexe keskara. Nios fisti mātō Ifo. Akka nōri Apolos feta yonoxomiski. Noko yoiai keskara nō mato tāpimasharani āfe meka mā nikasharakōinō.

¹⁰ Ē mato yoinō afeska faxō pexe fatirofomāki. Taefakī āfe kishi kerexkōi fikaxō nīchitirofo. Mā kishi nīchikaxō aōxō yonotirofo. Nāskarifiāi māfi pexe keskaraki. Akka nō mato Niospa meka tāpimani nā pexe faifo keskara. Cristofi pexe kishi keskaraki. Nā āfe kishiōnoax pexe nitiro. Nāskarifiakī Cristo mato nimai. Ea Niospa tāpimashara keskarari taefakī ē mato yoiaito mā Cristo Ifofani. Askatari fetsafāferi nānorikōi mato yoikani mā Cristo Ifofasharanō. Nāskata nā fetsafo ē ato yoimis iskafakī: “Shināsharata ato mēstekōi yoisharakāfe,” ixō ē ato yoimis. ¹¹ Ē mato taefakī Cristoōnoa yoini mā Ifofanō. Akka tsōakai mato yoikī iskafatiroma: “Ē mato meka fetsa tāpimanō mā chanīmara faax Nios fe ĩpaxanō,” ixō tsōa mato anori yoitiroma. Jesucristo fistichi noko nimasharatiro nō Nios fe ĩpaxanō. ¹² Afara fetsa anā ē mato yoinō, ea nikakapo. Fētsa pexe fakī kishi kerexkōi nīchitiro. Akka fētsari akiki rofetaxō kerexkōi kenetirofo. Fētsari akiki oro kenetiro. Fētsari akiki tokiri sharakōi kenetirofo. Askatari fētsari akiki ifi kerexma kenetirofo. Fētsari xepa pei akiki kenetirofo. Fētsari tafa akiki kenetiro. Nāskakē nā pexe kooaino pexe ano ikafo ichotirofo kooyamaxikakī. Akka pexe kishi kerexkōi akiki keneafō oro akiki keneta, roe taxo akiki keneta, tokiri sharari akiki keneafono kootirofoma. Akka nā ifi kerexma kootiro. Xepa peifori kootiro. Tafari kootiro. ¹³ Nāskarifiāi Nios nā pēxe ifo keskara. Niospa meka yoimisfo nā pexe ifo pexe faxōaifo keskarafō. Fetsafāfe shara faxomis, fetsafāferi shara faxomisma. Nāskaxō anā oaitīa Cristo noko ōimaxii nā nō axomis keskara fatōfo keyonakamakī. Akka fatōfori nipanakafomākī. Noko ōimaxii afeskaxō nō Nios yonoxonamāki. Fētsa Jesús Ifofasharaxoma āa shināxō Niospa meka ato yoisharaima, tāpisharaxoma ato yoisharatiroma. A yoiai keskara sharama, ifi kerexma keskara, samama keyotiro. Akka fētsa Niospa mekakōi ato yoi. Niospa shināmanaino ato tāpimani. Nā tokiri kerexkōi keskara keyotiroma.

¹⁴ Nāskatari fatotora Nios yonosharaxonano Niospa afara shara ināsharaxii nā Jesús oaitīa. ¹⁵ Akka fatotorari Nios yonosharaxonamano Niospa afara shara ināima. Nāskafiax Nios fe ipanaka. Āa kaxpa yonokatsaxakī akka āfe yono keyoxii.

¹⁶ Akka, ĵmā tāpimamē mā Niospa pexe keskarakōi? Āfe Yōshi Shara mato mēra ika. ¹⁷ A Nios ika anokai afaa chakama. Nāskakē āfe Yōshi Shara mato mēra ikano ōisharakāfe chaka shināi iyamakāfe. Mā afe nīpaxanō Niospa mato katonī afe yora mā inō. Nā Ifoafafo tii ato shara imai. Akka fatotora ato anorima yoikī ato afara chakafamaino Niospa kopikiri omiskōimaxii.

Cristo noko tāpimasharatiro

¹⁸ Efe yora mīshtichi, iskafakī shināyamakāfe: “Nā Jesús chanīmara famafāfe kirika raiskakī afama mīshti tāpisharakōiafo. Nōri ato keskaraxō anori shinākī tāpikōia,” ixō anori shināi mā pārameyamakāfe. Jesús chanīmara famafāfe shinākakī iskafakani: “Nā Jesús chanīmara faafāfe shināsharakanima,” ixō nokoōnoa yoimisfo. Matoōnoa anori yoifiaifono Niospa mato mēstekōi shināmasharapai mā shinātiro. ¹⁹ Nā Jesús chanīmara famafāfe shinākani iskafakakī: “Nōfi mēstekōi shināsharakī,” ifiaifāfe Niospa ato ōia mēstekōi shināsharakanima. Tatima keskarafa ato ōi. Nānori yōra Niospa meka yoikī kirika keneni iskafakī: “Nā Jesús chanīmara famafāfe āa shinākani iskakakī: ‘Nōfi tāpikī finakōiaki,’ ixō shinākakī Nios pāratirofoma. Āakōi anori pāramekani. Nāskakanax fenoafo,” ixō Niospa meka yōra kirikaki keneni. ²⁰ Anā David kirika keneni iskafakī: “ ‘Nōfi tāpisharakōiaki,’ ifiaifāfe nōko Ifo Niospa ato tāpikōixō yoikī iskafatiro: ‘Nafāfekai mēstekōi shināsharafoma, tatima keskarafa,’ ” ixō David kirika keneni.

²¹ Nāskakē anā yoi iskayamakāfe: “Na feronāfāke a noko tāpimamisto āfe meka fisti mēstekōi, sharakōi,” ixō anori anā shināyamakāfe. Niospa ato shināmayamainokai tsōa mēstekōi shinākeranama. Nios fistioxō nō mato mēstekōi yoitiro mā tāpisharakōinō. Keyokōi Niosnā, nā Niosnāri mātonā. Nāskakē aōxō mato shara faxōi. ²² Ē ikaino, Apolos ikaino, Pedro ikaino nō Nios yonoxomis. Āfe meka nō mato yoimis mā nikasharanō. Askatari naax mā afe īpaxanō. Keyokōi Niosnā, askatari nā Niosnāri mātonā. Iskaratīa afara sharafo ikai aōxō Niospa mato shara faxōi. Nā chipo ixiaifori aōxori Niospa mato shara faxoxii. Keyokōi a Niospa onifanifo mātonāri. Nāskakē māri āto ifo ixii. ²³ Akka Cristofi māto Ifokī. Cristori āfe Ifori Nios.

4

Cristo yonoxomisfāfe afeskaxō yonoxotirofomāki

¹ Akka mā nokoōnoa shinākī iskafatiro: “Nafāfēfi Cristo yonoxomisfokī,” ixō nokoōnoa yoikāfe. Cristoōnoa meka shara tsōa nikayomisma Epa Niospa nōko shinā mēraxō noko shināmanaino nō atori tāpimani. ² Akka āfe inafāfe āfe ifo nikakōitirofo. Āto ifāfe ato yoia keskara axosharatirofo. Akka nōfi Cristo āfe inafoki. Niospa noko yoini iskafakī: “Ē mato yoia keskara ato yoikāfe ato fomākakīma. Ato yoikāfe xanikakīma,” ixō noko yoimis. ³ Nios fistichi tāpikōiakī nā ea yoia keskara ē aki. Akka yorafāfe ea mekafakī chakafakani. Akka fetsafāferi ea yoisharakani. Nāskanōki āa ea mekafanōfo. Ē āto yonomatimaki. Akka ē Niospa yonomatiki. Akka Nios fistichi tāpia ē yonoxosharakōiaito. Yorafāfekai tāpiafoma. Ērikai tāpiama. ⁴ Ēfe shinā mēraxō ē shināi iskafakī: “Ea Niospa yoiai keskara ē aki,” ixō ē anori shināfiaino nōko Ifo fistichi ea tāpikōia a ea yoia keskara ē ayamakī ē akima. ⁵ Cristo anā oyoamano iskafakī yoiyamakāfe: “Nāfāfekai Nios yonosharaxokanima,” ixō

anori yoiyamakāfe. Akka yora fētsa shināi keskara tsōa tāpiama. Shinākapo. Nōko Ifo anā oaitīa keyokōichi noko ōiaifono nōko shinā mēraxō nō shināmis keskara nōko Ifāfe ato ōimaxii. Anāakai nō afaa pishta nō fomāxiima, Niospamāi keyokōi tāpikōikē. Nā nō afara shara nō one axomis tsōa ōiyamaino, askatari nā nō afara chakafamis nāfo keyokōi Niospa noko kāimaxoxii. Askatari nō afara shara faino Niospa noko yoikī iskafaxii: “Aicho. Ē mato yoia keskara mā amis. Mā sharakōi,” ixō noko yoixii.

⁶ Efe yora mīshtichi, nānori ě mato yoi mā isharanō. Yōra kirika keneni keskara a Niospa yoiai nā fisti ě aki. Nā Apolosri Epa Niospa yoia keskara fisti aki. Nō askafaito mā noko ōixō nō akai keskara māri akāfe. Nāskakē iskayamakāfe: “Nā noko yoimisto āfe meka sharafinakōia, fetsafo keskarama. Akka nō fetsafo nikapaima,” ixō anori shināyamakāfe. ⁷ Akka Niospa keyokōi noko onifani. Nō Nios fistiōxō afara fetsa nō ato sharafaxonō. Nāskaxō, “Nā ě akai keskarakai tsōa atiroma,” ixō shināyamakāfe. Nāskax kakapaimis iyamakāfe.

⁸ Mā shinākī iskafamis: “Nō Niospa meka tāpikōia. Nō fetsafo finōkōia. Nāskaxō nō anā tsoa fichipaima noko tāpimanō. Nōfi Cristo fe xanīfo keskaraki. Nō yorafāfe āto ifo keskarakī,” ixō mā shināi. Nāskapainōra mā xanīfokōifo iki. Mā xanīfokōifo ikaino nōri mato fe xanīfo ikerana. Akka nō xanīfoma. Noko tsōa ifofaima. ⁹ Ē afara fetsa mato yoipai, nikakapo. Karaxa mēra ikiafo ato retematirofo. Yora ichapafāfe ōiaifono ato retematirofo. Nāskarifiakī nōri ato keskara. Noko Jesús nīchini nō aōnoa meka shara nō ato yoinō. Nō Jesúsnoa yoiax nō Jesúsnoax omiskōiaino keyokōi yorafāfe noko ōikani. Niospa āfe ājirifāferi noko ōikani. Nō yora mitsisipama noko ōikani, nōkairoko xanīfofo keskarakē. Nō āto nāmā rakakōia noko ōikani.

¹⁰ Nāskakē ě Jesucristo Ifofamis. Akka mā ea yoimis: “Pablo afaa tāpiamara,” mā ea famis. Askatari, “Nō Jesús Ifofakī nō tāpisharakōia,” mā imis. Askafixō mā tāpisharakōiama. Nāskaxori mā ea yoimis, “Na Pablo afaa afeska fatiroma. Akka nō afarafo nō atiro,” mā imis. Askafixō mā askafatiroma. Mā shinākī sharakōi mā meei. Akka ea mā ōia ě afaamakōi mā ea ōimis. ¹¹ Akka iskaratīari nōfi fonāianā nōamaikīyanā rapati shara safeyamata nō imis. Askatari noko koshamisfo. Akka pexemais ixō Niospa meka fisti nō ato yoifofāsafamis. Nāskax nō omiskōi. ¹² Nāskaxō nō kerexkai yonotiro a nō piai fixiki. Nāskatari yorafāfe noko mekafakī chakafaifono ato kopitamaroko nō tenemis. “Jesús mato shara faxopainō,” ixō nō yoimis. Noko omiskōimafiaifono nō tenemis. ¹³ Askatari noko ĩchafāfe ato kopitamaroko Niospa meka shara nō ato yoimis. Nāskakē iskaratīa noko chakafakani, “Māfi nā afamafo keskarakī, nā afara chaka potafo keskara,” ixō nokoōnoa yoimisfo.

¹⁴ Nāskakē ě mato nānori yoikī kirika kenexō ě mato rāfimapaima. Askatamaroko ě mato shināmasharapai. Akka māfi ěfe fakekōifo keskarafoki. Ē mato noikōi. Nāskakē ě mato yoisharapai anā mā anorima shināyamanō. ¹⁵ Yora ichapato mato Cristoōnoa tāpimakani. Akka ě taefakī mato Cristoōnoa tāpimayoni. Nāskakē mā Cristo chanīmara fani. Eōnoax mā Niospa fakekōifo. Nāskatari ě mato epa keskarakōi. Fetsafāfe Cristoōnoa mato tāpimafiaifono afokai mato epa keskarama. Akka ě fisti mato epa keskarakōi. ¹⁶ Nāskakē nā ě ikai keskakāfe. Ē Nios Ifofasharai keskafakī māri askafakāfe. ¹⁷ Nāskakē ě Timoteo matoki nīchikai. Ē Timoteo Cristo chanīmara famaki taefani. Nāskax ěfe fake keskarakī. Ē aō noikōi. Nōko Ifo Jesús yoiai keskarakōi nikakōi. Ē Jesucristo Ifofai keskara Timoteo mato shināmaxii mā shināmakinōma. Nā chanīmara faafo pexe rasi tii anoafō ě ato tāpimani keskara Timoteori mato tāpimaxii.

¹⁸ Mē tāpia mā ranārīto shinākī iskafai: “Pablo Timoteo nokoki nīchi nokoki mesekī. Āakai nokoki opaima. Akka nō keyokōi tāpikōia. Nō Pablo yopaima,” ixō mā shināi. Askai mā kakapaimis. ¹⁹ Anori mā shināfiaino ē samamakōi ē mato ari kaikai. Niospa ea yoiaino ē samamakōi mato ari kai. Mē mato ano nokoōxō ē tāpixii nā kakapaimisfāfe Niospa Yōshi Sharaōxō yoikanimākai, āakōi yoimisfomākī. ²⁰ Nios nōko Ifono nō meka fisti yoitamaro ko āfe shinā sharaōnoax nō isharatiro. ²¹ Nāskakē nā ē matoki nokoaitīa āfe shinā sharaōnoax ē matoki nokoxii. Mē nokoxō ē tāpixii afeskax mā ikamākī. Mā chaka xateyamakē Niosxō ē mato tāpimaxii omiskōimakī. Akka mātō chaka mā xatekē ē mato noikōikī fenāmāshta ē mato yoisharaxii. Nāskakē ē matoki nokoxō ē mato omiskōimayamano fenāmāshta oi tsii faxō ē mato yoixii ea yoikāfe fato mā fichipaimākai.

5

Jesús chanīmara fafiakaxō afara chakafakani (Hch. 9.1-19; 22.6-16)

¹ Mē nika mato mēraxō feronāfake fistichi afara chakafaito. Akka, ¿afeskakī mā yoimamē anā afaa chakafayamanō? Nā feronāfake āpa āfi fe oxakī chakafai. Askara chakakōi. Nā Nios chanīmara faafoma tsoa askamisma. ² Ooa. Nā feronāfāke mato mēraxō afara chakafai aōnoa rāfipaikanima, “Nō sharakōifora,” ixō mā yoimis kakapaiyanā. Akka, ¿afeskakī nā feronāfakeōnoa mā shināchakaimamē? Akka nāskaxō āfe chaka xateyamax anā mato fe ichanāito potakāfe anā mato fe ichanāyamanō. ³⁻⁵ Ē mato fe iyamafiāxō ē mato shinākōi. Ē ano mato fe iyamafiāxō nā feronāfake afeskaimākai mē tāpikōia. Ē mato anoxō yoikī iskafakerana: “Mā Jesucristo shināyanā ichanāino Niospa āfe Yōshi Sharaōxō nā feronāfake āpa āfi fe imiskē mato makinoa potakāfe Satanás ifofaāfo mēra inō. Nāskakē Satanás nā feronāfake omiskōimanō. Nāskaxō Satanás nā apaiyai keskara faxii nā feronāfake. Nāskafaino omiskōixii. Satanás omiskōimanaino āfe chaka xatepaixii Jesús anā Ifofapaikī anā omiskōiyamaxiki. Mā āfe chaka xateano nōko Ifo Jesucristo anā oaitīa nā feronāfake ifixii afe ipaxanō anā omiskōinōma,” ixō ē mato yoikerana ē mato fe ixō.

⁶ Ooa, mā iskamis: “Nō sharakōi,” ixō mā shināfikī mā kai nā feronāfake mato mēranoa mā potapaima afara chakafafaito. ¿Mā tāpīamamē, yora fistichi mato mēra ixō afara chakafaito mā xatemayamax aōnoax keyokōi mā chaka itiro? ⁷ Ē mato afara fetsa yoipai. Nikakapo. Kēromā pāa fakī levadura aya osiano keyokōi faraxitiro. Pishta aya osiano keyokōi faraxitiro. Nāskarifiakī fētsa mato mēraxō afara chakafaito mā xatemayamax aōnoax keyokōi mā chaka itiro. Nāskakē nā yora fistichi afara chakafaito potakāfe mato mēraxō anā afara chakafayamanō, mā fena keskara ixikakī. Akka Niospa Fake, Jesucristo, noko nāxonī nōko chaka noko soaxoxiki. Nāskakē mā afaa chakafamisma keskara. ⁸ Nāskaxō a nō chakafapaoni anā nō shināpaima. Fetsafo fekaxtefayamata ato pārāyamata meka chanīmakōi fisti nō ato yoitiro.

⁹ Ē mato kirika kenexoyoni iskafakī: “Feronāfakefo āto āfima fe imisfo. Askatari kērofori āto fenema fe imisfo. Askarafo yorafo fe rafeyamakāfe.” ¹⁰ Akka a Jesús Ifofaāfoōnoama ē mato kenexoyonima. Nā Jesús Ifofaifoōnoa ē mato kenexoni. Akka faki pishtakai iyamafoma a Jesús Ifofaifoma. Nāskakē nō ato fe imis. Fakira kaxō nō ōimis nāriri ikafo a Jesús Ifofaafoma. Nō ato fe ifiāxō afāfe akaifo keskarakai nō amisma. Afāfe āto ifo Satanás. Nāskaxō āto chaka xateafoma. Chaka fetsa fetsatapafo amisfo. Nāskaxō āto āfimafo chotamisfo. Kērofori nāskarifiāmisfo āto fenema fe chotanākani.

Afama mīshti fipaikata āfenāfoma fipaimisfo. Nāskatari yometsokōifo imisfo. Nāskakata nioskōiyamafekē, “Na nōko niosra,” ikaxō afara kīfimisfo. Nāskafaifono nō ato feta afaa chakafamisma. Nāskafikē nō ato fe imis. Nō ato makinoax faki paxkatiro. ¹¹ Akka mā efeta Nios Ifofaino ē mato kirika kenexoyoni. Nāskakē fatotora yoikī iskafatiro: “Ēri mato feta Jesucristo Ifofai,” ixō yoifixō āfe āfima chotamis. Kērofori askari amisfo āfe fenema fe chotanāmisfo. Askatari afama mīshti fichipaimisfo. Atonāma fipaimisfo. Nioskōiyamafekē afara kīfimisfo. Yora fetsafo chakafamisfo. Pāemisfo. Yomet-somisfo. Askarafo fe rafeyamakāfe. “Nō Jesús Ifofaira,” ifiakaxō afara chakafamisfokī. Askarafo fe rafeyamakāfe.

¹²⁻¹³ Nā Jesús Ifofaifāfema afara chakafaifāfe nō ato yoitiro ma omiskōinōfo. Akka Nios fistichi ato yoitiro iskafakī: “Mā afara chakafamis. Nāskaxō māto chaka mā xateyamaito ē mato omiskōimaxii,” ixō Niospa ato yoitiro. Akka nō ato yoitiro ma. Nāskakē Niospa noko yoia nā Nios Ifofaa fetsafāfe afara chakafaifono nō ato yoitiro āto chaka xatenōfo omiskōixikakima. Akka Niospa meka yōra kirikaki keneni iskafakī: “Nā feronāfāke mato mēraxō afara chakafamis yoikāfe anā mato fe ichanāyamanō āfe chaka xateyamax,” ixō kirika keneni.

6

A Nios Ifofamisfo rafeta fētsa chakafaino fētsa chakafayamafaito, askara achixō a xanīfo Nios Ifofaama ano iyotiroma ato yoinō

¹ A mato feta Nios Ifofaafo ato yōayamakāfe xanīfofo yoikī a xanīfofōfāfe Nios Ifofaafomaki. Askatamaroko nā Nios Ifofaafo ano ato iyokāfe ato yōkanōfo mato chakafafomakī. ² Akka, ¿mā tāpiamamē mā Nios Ifofaxō mā nōko Ifo nokoaino mā xanīfo keskara mā ixii? Nāskaxō mā ato yoixii fatofomākī shara imisfo. Askatari mā yoixii fatofomākī chaka imisfo Niospa ato omiskōimanō. Nāskakē iskaratīari fētsa pishta chakafaano mā ranā yoinōnāsharakāfe xanīfofoki chanikakīma. ³ Askatari mā Nios feta yoixii āfe ājirifo fatofāfe sharafafomākī, askatari fatofāferi chakafafomākī Niospa ato omiskōimanō, a chakafamisfo. Nāskakē iskaratīa mā mā ato ōi fatofomākī chakafo fatoforimākī sharafo. Nāskakē mā ranā mā yoinōnāsharakāfe xanīfofoki chanikakīma a xanīfofāfe Nios Ifofaafomaki. ⁴ A mato feta shara shināifo mā ato ifitiro mato yoisharanōfo, mā fochishpanā faatanāino. Akka a Jesús Ifofaafoma mā ato ifitiro ma. ⁵ Afaa tāpiafoma mā ato iflax mā rāfitiro. Akka, ¿a shara shināifo mato fe ikafomamamē? Ēje, nāno ikafo a shara shināifo. Nāskakē ato ifikāfe mato yoisharanōfo mā fochishpanā faatanāino. ⁶ Akka mā fochishpanā faatanāx, mā raenā faatanāsharamisma. Askakimaroko mā ato yōaxō nā Nios Ifofaafoma ano mā ato iyomis xanīfofōfāfe ato yōkanōfo.

⁷ Mā ranā mā fochishpanā faatanāx nā Nios Ifofaafomaki mā atoki chanimis. Akka askarakai sharama. Nāskakē Jesús Ifofaa fētsa mato chakafaito kopitamaroko a Jesús Ifofaafomaki mā chanitiro ma. Nāskax mā shara itiro. Askatari a Jesús Ifofaa fētsa matoki yometsoano nā Jesús Ifofaafomaki mā chanitiro ma āa matoki yometsonōfo. Nāskax mā shara itiro. ⁸ Akka mā ranā mā yometso faatanāmis chaka faatanāyanā. Askatari mato fe yorafori mā ato chakafamis.

⁹ ¿Mā tāpiamamē a yora afara chakafamis Nios xanīfo ano katiroma? Nāskakē māri mā pārameyamakāfe. Mā afara chakafaax Nios xanīfo ano mā katiromaki. Akka nā āto āfima chotamisfo Nios xanīfo ano fotirofoma. Askatari kērofori āto fenema chotamamisfo Nios xanīfo ano fotirofoma. Nāskatari nioskōiyamafekē afara fetsa fichipaikī, “Na nōko niosra,” ixō

fichipaimisfo. Afokai Nios xanīfo ano fotirofoma. Askatari feronāfakefo aa ranā chotanāpaimisfo. Kērofori nāskari amisfo aa ranā chotanāpaikani. Afokai Nios xanīfo ano fotirofoma. ¹⁰ Askatari yometsomisfo, atonāma fipaimisfo, pāemisfo, ĩchamitsamisfo, nikayospamisfo, afara fētsa fīatixō ato pāraxō afara fetsa fīamisfo. Nāskarafokai Nios xanīfo ano fotirofoma. ¹¹ Mā askapaonixakī iskaratīa mā mā Niospa afe yorafo. Niospa āfe Yōshi Sharaōxō mātō chaka mato soaxona nōko Ifo Jesucristo mā Ifofaito. Mātō chaka mato soaxoyanā āfe ōiti keskara shara mato imai. Askafaxō afaa chakafamisfoma keskara mato ōi.

Nō Cristo fe rafexō nō chakafatiroma

¹² Akka mā yoiraka iskafakī: “Cristo ēfe Ifo. Nāskakē a Niospa yoiyamano nā ē apaiyai keskara ē atiro, afaa chakama,” ixō mā yoiraka. Ēje, nānōrikōi. Askatamaroko afara shara fetsa fekē ē aki ē ifofatirora ixō ē apaima. ¹³ Askatari mā yoiraka iskafakī: “Niospa nōko xāki noko onifaxoni a nō piāi nō pinō. Nāskaxori a nō piāi noko onifaxoni,” ixō mā yoimis. Akka chipo Niospa a nō piāi yafi nōko xāki yamafaxoxii nāatomāi a nō piāi noko onifaxonixakī. Chanīmakōi Niospa noko onifani nō afe rafepakexanō. Niospakai nōko āfima fe nō inō noko onifanima. Kērofori āto fenema fe inō ato onifanima. Askatamaroko Niospa nōko yora noko onifaxoni nō nōko Ifo fe nō rafepakexanō, Jesús āfe ina nō inō, nāskata Jesús nōko Ifo inō. ¹⁴ Nōko Ifo Jesús mā nafianikē Epa Niospa āfe shinā sharayaxō otofani. Nāskarifiakī āfe shinā sharayaxō nokori otofaxii.

¹⁵ ¿Mā tāpiamamē nō Cristo Ifofaax nō āfe yorakōi? Nāskaxō nō nōko āfima chotatiroma nōmāi Jesús afe yorakōixō. ¹⁶ Niospa meka yoikī yōra kirika kenekī iskafani: “Feronāfake kēro fe ikaino nā rafe yora fisti keskarakōi itirofo,” ixō keneni. ¿Mā tāpiamamē, nā mātō āfima fe mā ikī yora fisti keskara mā itiro? Nāskakē mātō āfima fe iyamakāfe mā chakanatiroki. Askatari kērori fene fetsa fe itiro. ¹⁷ Nāskax nō nōko Ifo Jesús fe rafeax nā yora fisti keskara nō ixii. Niospa āfe Yōshi Shara nokoya rafemaxii. Nāskax nōko fero mēsho nā fisti keskara ixii Niospa Yōshi Shara fe rafeax.

¹⁸ Nāskakē mātō āfima fe ipaiyamakāfe. Askatari kērofori mātō fenema fe ipaiyamakāfe. Askara shināyamakāfe. Askapaikakīma ato makinoax ichotakāfe mātō āfima fe ixikakīma. Mā chakanatiroki. Askatari kērofori ichotakāfe mātō fenema fe ipai kakīma mā chakanatiroki. Akka mātō āfima mā chotakī mātō yora mā chakanafatiroma. Askatari afara chaka fetsa akī mātō yora mā chakanafatiroma, afara chaka afiafikī mā chakanatiroma. ¹⁹ ¿Mā tāpiamamē Niospa Yōshi Shara nofe ika? Nōko yora āfe pexe keskarakōi. Nāskakē Niospa Yōshi Shara nōmēra ika nāmāi nōko Ifofaax. Nāskax mākōi mā ifofametiroma. Akka Nios mātō Ifo. ²⁰ Jesucristo mato nāxoni mātō Ifo ixikī. Nāskax mā āfe inakōifo. Nāskatari Nios mātō Ifokōi. Nāskax mātō yora Niosnā. Nāskakē Niosnā ixosharakāfe Niospa mato imapaiyai keskara. Mā askafaito ōikakī fetsafāfe, “Nios sharara,” fatirofo.

7

Afeskax feronāfake āfi fe isharatirofomē

¹⁻² Mā ea kirika kenexō femakī mā ea yōkaita. Nāskakē nā mā ea yōkai keskara ē mato yoisharapai mā tāpinō. Feronāfake kēromaisax shara itiro. Askafiax āfiyapai āfiyatiro chakafaxikīma. Nāskax feronāfakefo āfiyatirofo. Xotofakefori feneyatirofo. Nāskara shara. ³⁻⁴ Feronāfake mā āfiyax āfe yora anā āfenā fistima. Āfe āfināri itiro. Nāskarifiāi kēro mā feneyax anā āfe yora āfenā fistima. Āfe fenenāri itiro. Nāskakē āfinī āfe fene afe ipaiyaito fene ranītiroma.

Nāskatari fenēri āfe āfi afe ipaiyaito ranītiroma. ⁵ Nāskakē ranīnōnāyamakāfe. Akka nāskaxō mā shinātiro iskafakī: “Nō Epa Nios kīfiyonō, nō paxkanōnāx oxa ranāyoxikī. Chipō anā nō kemānāxikī,” ixō mā yoitiro. Nāskafiax chai samarakayamakāfe. Mā samarakaino Satanás mato chakafamatiro mā kēro fetsa fe ipaitirokī. Nāskarifiāi kērori feronāfake fetsa fe ipaitiro. Afe ipaikī chakafatiro.

⁶ Ē mato, “Fianākāfe,” ixō ē mato yoima. Akka mā fianāpai mā fianātiro. ⁷ Askata ē shinākī iskafai: “Feronāfakefo ea keskara kēromais ikanax shara itirofo. Niosnoax ē āfiyamax ē isharai. Ē shināchakaima. Ē inimakōi. Akka Niospa ea kēromais ima keskarakai ato askafaima. Fetsafo Niosnoax āfiyāfo. Fetsafori kēromaiskanax nā ē ikai keskariai inimatirofo.”

⁸ Akka iskaratīa nā kēromaisfo yafi fenemaisfo ē ato yoinō. Feronāfakefo ea keskara kēromais itirofo. Askatari kērofori fenemais itirofo. Askara shara. Askatari āto fene ato makinoax namis, afo anā feneyatirofoma. Ea keskara shara itirofo. ⁹ Akka feronāfake ares ixō teneyamai kēro fe ipaikī fatora kēro fe oxatiro. Askara sharama. Askatamaroko āfiyatiro tanaima shara ixikī, anā kēro fetsafo fe ipaixikīma.

Feronāfake āfe āfi potatiroma, nāskarari kēromāri āfe fene potatiroma

¹⁰⁻¹¹ Askata iskaratīa feronāfake āfiya ē yoipai, xotofāke feneyari ē yoisharapai. Ēa ē mato yoima. Nōko Ifoōxō ē mato yoi iskafakī, kēromā fene enetiroma. Mā fene eneax fetsa fe fianātiroma. Ares itiro. Akka askayamai anā feneki kematiro. Askara shara itiro. Askatari feronāfake āfi enetiroma.

¹² Nāskakē iskaratīa keyokōi ē mato yoisharapai. Na meka ē mato yoiāi Niospa ea yoiyamafekē ēa mēstekōi shinākī ē mato yoi. Feronāfake Jesús Ifofaino āfe āfinī Jesús Ifofaxoma fene noikī fene enepaiyamaino fenē āfe āfi potatiroma. ¹³ Askatari āfe āfinī Jesús Ifofaino fenē Jesús Ifofaxoma āfe āfi enepaiyamaino āfinī fene enetiroma. ¹⁴ Feronāfake Nios chanīmara faimano āfe āfinī Nios chanīmara faino āfe āfiōxō Niospa nā feronāfake shara faxotiro. Nāskaxō āfe āfinī Jesús Ifofaito oikī āfiōxō fenē Jesús Ifofatiro. Nāskatari kēromā Jesús Ifofayamaino fenē Jesús Ifofaino feneoxō Niospa nā kēro shara faxotiro. Akka feronāfake fe āfi enenāifono āto fakefo shara itirofoma. Akka enenāyamaifono Niospa āto fakefo shara oitiro. ¹⁵ Akka feronāfake Jesús Ifofayamakē āfinī Jesús Ifofaito fenē enepaikōikī enetiro. Nāskax kapaiyaito nētefayamafe. Katanō. Mā nētefaino fekaxtetiroki. Askatari kēromā Jesús Ifofayamakē fenē Ifofaito kēromā enepaikōikī enetiro. Kapaiyaitori nētefayamafe. Katanō. Mā nētefaino fekaxtetiroki. Niospa noko katonī nōko shinā mēraxō afanā noko fekaxtefanōma nōko oiti tanaimakōi shara inō. ¹⁶ Kēromā Jesús Ifofaxō āfe feneri Jesúsnoa tāpimatiro āfinī fene yoiaino fenē Ifofai rakikīa nō tāpitiroma. Feronāfākeri Jesús Ifofaxō āfe āfiri Jesúsnoa tāpimaino Ifofai rakikīa, nō tāpitiroma.

¹⁷ Nā nōko Ifo Jesús mato ima keskara nāskara ikāfe. Akka Niospa mato ifini nā Jesús mato ima keskara mā inō. Askatari nā Nios Ifofaafo tii Nios kīfiti pexefā anoafoya nā maitio anoafori nānorikōi ē ato yoimis. ¹⁸ Iskafakī ē ato yoimis. Judefo Niospa ato yoini keskarakōi āto fake feronāfakefo foshki repa xatepaonifo. Akka mato foshki repa xatenifono Jesús Ifofaxō shinākī mā iskafatiroma: “Iskaratīa ē Jesús Ifofai. Nā fistichi ēfe chaka ea soaxonano ē afe ĩpaxanō. Ooa, ĵafeskakī ea foshki repa xatenifomē, ē askayamapaifaino? Aatokai ēfe chaka ea soaxotiroma. Nāskakē ē foshki repa xateama keskaraxō ē ato fomāi,” ixō shināyamakāfe. Akka māto foshki repa mā mato xatenifono shināchakayamakāfe. Askatari mā Jesús Ifofaxō iskakī shināyamakāfe: “Judefo āto xinifāfe ato yoini keskara ē ipai. Ē foshki repa xatepai nā Moisés yoini keskara ē ixikī,” ixō anori shināyamakāfe. Nō foshki repa xatetiroma Niospa

noko ifinõ. ¹⁹ Akka nõ foshki repa xatemisma askatari nõ foshki repa xatemis nãskara shara. Akka nõ askanokai, “Mã chakafaa,” noko Niospa faima. Askatari nõ askamanori, “Mã chakafaa,” noko Niospa faima. Nã judeofo imis keskarakai nõ itiroma noko Niospa ifinõ. Askatamaroko Niospa noko yoini keskara nã fisti nõ atiro. ²⁰ Akka nã Niospa mato ifini keskarakõi ikãfe. ²¹ Mã fëtsa yonomati ikatsaxakĩ shinãchakayamakãfe. Nãskarakõi ikãfe. Akka mãto ifãfe mato nĩchipaiyaino, “Fotakãfe anã yonoxoxikakĩma,” mato faino mã katiro. ²² Akka nõko Ifo Jesús mato ifini. Mato ifiyoamano ranãri mã ãto yonomati iyopaoni. Iskaratĩari mã ãto yonomati mã ato yonoxomis. Mã askafixõ mã Jesús Ifofaano, Jesús mãto chaka mato soaxonano, ãfe yonomatikõifo mã iki. Nãskaxõ tsõa mato iskafatiroma: “Mãkai Jesús afe yorafoma,” tsõa mato fatiroma. Akka ranãritokai mã tsõa yonoxomisma. Askaflix mãri Jesús Ifofaax mãri ãfe yonomatikõifo. ²³ Epa Niospa ãfe Fake Jesucristo noko nĩchixononi noko nãxoyonõ nãskax nõko Ifo inõ. Nãskax mã afe yorakõifo. Nã fisti mãto Ifokõi. Nã fistichi mẽstekõi mato shinãmasharatiro. Askaxõ fetsafo ifofayamakãfe mato shinãmasharatirofomaki. ²⁴ Efe yora mĩshtichi, Niospa mato ifiano nã mã ipaoni keskara ikãfe Epa Nios mato fe ikaino.

Feronãfake ãfimaisfoya kãrofo fenemaisfoõnoa Pablo yoini

²⁵ Akka iskaratĩa afara fetsa anã ã mato yoipai mã ea yõkaita. Feronãfakefo ãfimaisfoya kãrofo fenemaisfoõnoa ã mato yoi. Ë mato yoiãi keskara nõko Ifãfe ea yoiyamafixõ ea noikĩ ea nĩchini ã ãfe ina inõ. Nãskakẽ ã mato yoiãi keskara mã chanĩmara fatiro. ²⁶ Iskaratĩa afara mesekõikĩ noko omiskõimani. Nãskakẽ mã ãfimais ika shara. Nios Ifofaafãfema noko omiskõimapaikani nõ Jesús Ifofakẽ. ²⁷ Akka ãfiyakaxõ mãto ãfi eneyamakãfe. Askatari ãfimaisxõ kãro fenayamakãfe. ²⁸ Akka mã kãroyaxõ mã chakafatiroma. Kãrofori feneyakatsaxakĩma mã feneyaxõ mã chakafatiroma. Askata mã feneyax askatari feronãfake mã ãfiyax mato omiskõimanaifono mã omiskõitiro. Nãskaxõ mato omiskõimatirofo mã Jesús chanĩmara faino. Nãskakẽ ã mato yoisharapai mã omiskõiyamanõ.

²⁹ Askatari ã mato iskafakĩ yoipai, efe yora mĩshtichi. Nõko Ifo Jesús mã chaima oi kiki. Nõko Ifo nõ yonoxokĩ nõ chai faima. Nãskakẽ nõ nõko Ifo yonoxosharakõipai. A ãfimaisfãfe nõko Ifo yonoxosharakõitirofo kãro shinãkima. Askatari nã ãfiyatori nõko Ifo yonoxosharatiro nã ãfimaisfãfe yonoxonaifo keskafakĩ. ³⁰ Askatari nã shinãchakaifãfe nõko Ifo yonosharaxotirofo nã shinãchakaifãfema yonoxonaifo keskafakĩ. Nãskatari nã ini-maifãfema nõko Ifo yonoxosharatirofo nã inimaifãfe yonoxonaifo keskafakĩ. Askatari nã afara fiaifãfe shinãtirofo iskafakĩ: “Na nõkonãma, akka na nõko Ifonã,” ixõ shinãtirofo. Akka nõko Ifo shinãkõikĩ nõ yonotiro. ³¹ Nõko Ifo Jesús mã chaima oi kiki. Nãskakẽ nõko mai anoxõ nõ yonosharafafãinõ nã nõ yopai fixiki. Nãskafixõ afama mĩshtifos shinãkima nõko Ifokõiroko nõ shinãkõinõ. Keyokõi mai anoafõ keyoxikani. Nãskakẽ Jesús nõ shinãkĩ finakõikĩ afama mĩshti fipaikĩ nõ shinãtirofo.

³²⁻³⁵ Ë mato anori yoi mãto shinã mẽraxõ afaranã mato fekaxtefanõma. Ë mato, “Ãfiyayamakãfe,” faima. Askatari xotofakefori, “Feneyayamakãfe,” ã ato faima. Ë mato mẽstekõi imapai nõko Ifo fisti mã shinãkĩ finakõinõ, mã afara fetsa shinãnõma. Askaxõ ã mato yoiã keskara feronãfake ãfimaisto ãfe Ifo inimamapai. Akka feronãfãke ãfiyaxõ ãfiri inimamapai. ãfinĩ afara yopaito fenẽ shinãchakakĩ ãfi fixotiro. Nãskakĩ ãfe Ifo fistikai shinãtirofo. Nãskaxõ ãfe Ifo inimamapaikĩ ãfiri inimamapai. Askatari xotofake fenemaisto ãfe Ifo Jesús fisti yonoxosharapai. Afara fetsakai shinãima ãfe Ifo fisti shinãi. Niospa

amapaiyai keskara fisti aki. Akka xotofake feneyaxō āfe feneri inimamapaikī afara fetsafori shinātiro āfe Ifo Jesús fisti shinākīma.

³⁶ Nāskakē meka fetsari ē mato yoi. Feronāfāke taefakī xotofake yoiyoxō fichisharapaikī chipo fitiro āfe āfi inō. Shinākī iskafatiro: “Mē afetiama afe mekaitakī, mia fipa,” shināchakayamaxiki ixō fitiro, chaka shināyamaxiki. Nāskafakī afaa chakafaima. ³⁷ Askatari feronāfāke fētsa shinākī iskafatiro: “Ēfe Ifo ē yonoxosharapaiyai keskara ē āfiyaxō ē axotiroma. Nāskakē ē āfiyaima mē yoifixō,” ixō anori shinākī afaa chakafaima. Tsōa kerexkai, “Āfiyafe, mā mī yoiaki,” fayamaino nā feronāfāke xotofake fe fianātiroma Nios yonoxosharaxii. ³⁸ Akka feronāfāke nā xotofake fe fianāsharatiro. Akka nā xotofake fe fianāima nōko Ifo yonoxosharatiro. Nāskarari shara itiro.

³⁹ Askata meka fetsari ē mato yoi. Āfe fene naamanokai kēromā fene enetiroma fetsa fe fianāxiki. Akka mā fene naano fetsa fe fichināpai afe fianātiro nā Nios Ifofaa fe. Askara shara. ⁴⁰ Nāskatari ēa ē shinākī iskafai. Mā fene naano fetsa fe fianāmax nāskarari sharakōi itiro. Ē shināi Niospa Yōshi Sharapari nonorikōi mato yoipai.

8

Nioskōima onifakaxō yorafāfe kīfipaonifo. Nāskaxō nami ināpaonifo atoōnoa Pablo yoini

¹ Mā ea yōkaito ē mato yoisharatiro. Yora fetsafāfe afara onifakaxō, “Na nōko niosra,” ikaxō nami ināmisfo. Askata anā nā nami fikaxō ato ināmisfo yorafāfe pinōfo. Akka yorafāfe āto niosnā nō nami pia, shara. Nō piamari, shara. Nāskaxō nō afaa chakafaima. Akka mā yoikī iskafamis: “Mā nō tāpia nō āto niosnā nami pia, shara. Akka nō piamari, shara,” māmāi shinākī Nioskōimara ixō. Akka mā fatora fetsafāfe shinākī iskafamis: “Ēfi tāpikōiaki. Nā ē shināi keskara ē mēstekōi shināi. Ē fetsafo keskarama. Ē apaiyai keskara ē atiro,” ixō mā yoimis. Askara yoi kakapaimis mā itiro. Askara shinākīkai nō fetsafo inimamatiroma. Askakimaroko nō yorafo noixō nō āto ōiti fepeaxosharakōitiro Jesús Ifofasharanōfo. Nāskakē nō ato inimamatiro.

² Askatari fatora fētsa shinākī iskafamis: “Ēfi afama mīshti tāpiakī,” ixō anori yoifikī atiri afaa tāpiama. ³ Akka fatora fētsa Nios noiaino nāskarifikī Niospa aōnoa yoitiro iskafakī: “Nā ea noiai mē tāpikōia. Nāfi efe yoraki,” ixō yoitiro.

⁴ Nāskaxō yorafāfe afara fetsa onifakaxō, “Na nōko niosra,” ikaxō nami ināifo. Nā nami nō pitiro. Nā shara. Nō chakafaima. Akka nō piamari, shara. Akka mā nō tāpia a afara fetsa yorafāfe onifafo akai afama. Nā onifafotokai afaa tāpiama. Akai ōitiyama. Āfe māporikai afaa shinātiroma. Akai Niosma. Akka Nioskōi fisti. ⁵ Jesús Ifofaafāfema yoikī iskafamisfo: “Nios ichapa. Nai mēranoafoya mai anoafoya nios ichapakōi,” ixō yoimisfo. Akka nā āto nios ichapafiax Nioskōifoma. ⁶ Mā nō tāpia Epa Niosfi fistiki. Fetsakai anoma. Nāato keyokōi onifani. Nokori onifani nō āfe fakefo inō. Nāskatari nōko Ifo Jesucristori fisti. Anā ano fetsama. Nāskaxō Niospa āfe Fake feta keyokōi onifani. Aōnoax nō nitiro.

⁷ Nā ē mato yoiyai keskara fisti rasichi Jesús chanīmara faifāfe tāpiafoma. Shināmisfo iskafakakī: “A fetsafāfe afara onifafo, nā āto nioskōi nia,” ixō yoimisfo niyamafiakē. Akka āto xinifāfe nānori ato yoipaonifo. Nāskakē shinākani iskakakī: “Nā āto niosnā nō nami pixō nō Nioskōi chakafatiro,” ixō shinātirofo. Akka mā pikaxō āto shinā mēraxō shināchakatirofo: “Mā nō chakafara,” ikaxō. ⁸ Anori shināfiaifonokai a nō afara piatokai Nios yafi noko rafemasharatiroma. Nios makinoa noko potatiroma. Afara onifakaxō, “Na nōko niosra,” ikaxō nami ināfo nā nami nō piamanokai noko shara

imatiroma. Askatari noko chakafatiroma. Nāskatari mā nō pianori noko chakafatiroma. Nāskatari noko shara imatiroma.

⁹⁻¹² Nāskakē mato feta Nios Ifofafo afaa chakafamayamakāfe. Mā shināi iskafakī: “Nō keyokōi pitiro. Afara onifakaxō, ‘Na nōko niosra,’ ikaxō nami ināfo. Nā nami nō pitiro nā onifafokairoko Nioskōikē. Akka mā nō na nami pixokai nō āto nios chanīmara faima. Akka mā nō tāpia Nioskōima. Akka pixō Nioskōi nō chakafaima. Jesúsri nō kachikirifaima,” ixō mā shināi. Mā anori shināfiaino Jesús Ifofaa fetsafāfe anori tāpiafoma. Tāpiamaifono nā nioskōimato kīfiti pexefā anoxō mā pi ai fisti mā pipai mā kai āto nios ifofapaima, nāskakī mato ōikakī akairi apaikani. Akka mā mā tāpia yorafāfe āto niosnā nō nami pia shara, chakama. Akka fetsafāferi Nios Ifofafiakaxō yoimisfo iskafakakī: “Āto niosnā nō nami pia sharama, nō chakafatiro,” ixō yoimisfo. Nāskaxō mā nami piaito fetsafāfe mato ōikakī akairi afāfe nami pitirofo. Nāskaxō mā nami pikaxō chipo shinātirofo iskafakakī: “Ooa, mē nami pixō ēfe Ifo Jesús ē chakafaa ēmāi āto niosnā nami pixō. Nā nami pikī ē āto nios sharafai. Ē āto nios ifofai ōitsai. Ooa, ē chakafaa,” ixō shinātiro. Askaxō āfe shinā mēraxō shināchakakōitiro mā nami piaito ōikakī akairi pikaxō. Nāskakē mā chakafamatiro. Askafakī Cristori mā chakafai. Mā mā tāpia afara onifakaxō, “Na nōko niosra,” ikaxō nami ināifo nā pixokai mā chakafaima nā onifafokairoko Nioskōikē. Akka fetsafāfekai tāpiafoma. Afāfe shinākani: “Nā nami pixō nō chakafatiroki,” ixō shināmisfo. Akka mā piaito ōikakī akairi pikaxō shināchakatirofo. Mā akai keskafakīri shinākani. Akka mā nā nami piyamainokai akairi pikeranafoma. Shināchakakeranafoma. Nāskakē mato fe yorafo noikōixō mā nā nami pitiroma ato chakafamaxikima. Akka atoōnoaxri Cristo naniki. ¹³ Nāskakē nō nami pixō Jesús Ifofaa fetsafo nō ato chakafamatiro. Nāskakē āto niosnā nō nami pitiroma fetsafo chakafamaya-maxikī. Nāskakē nō fetsafo chakafamapaima. Nofeta Jesús Ifofaa fetsafo noikī nō afaa chakafamapaima.

9

Niospa Pablo nīchini āfe meka ato yoinō

¹ Nios fistifi ēfe Ifokī. Nā ea yonomapaiyai keskara ē atiro. Tsōakai ea yonomatiroma. Jesús ea nīchini ē aōnoa yorafo yoinō. Akka nōko Ifo Jesús mē ōisharakōini. Aōnoa ē mato yoiaito mā chanīmara fani. Nāskakē nōko Ifo Jesús ē yonoxonaōxō Jesús mā Ifofai. ² Fetsafāfe shinākakī iskafamisfo: “Niospakai Pablo nīchiama Jesúsnoa noko tāpimanō,” ixō anori yoimisfo. Fetsafo mekaino anori shināyamakāfe. Ē mato yoiaito mā nōko Ifo Jesús chanīmara fai. Nāskakē mā tāpitiro chanīma Niospa ea nīchini ē mato Jesúsnoa yoinō.

³ A ea īchakakī mekaifono iskafakī ē ato kematiro: ⁴ Fetsafāfe Jesúsnoa yoiaito nikakakī afaa kopi yōkaxoma kaxpa ato pimamisfo. Akka ē mato Jesúsnoa yoiaito nikakakī, ¿eari afaa kopi yōkaxoma kaxpa eari pi-matirofomamē? ⁵ Ē akai keskafakī Pedrori Jesúsnoa yoifofāsafamis. A Jesús nīchiafāfe fetsafāferi Jesúsnoa ato yoifofāsafamisfo. Jesús āfe extofāferi ato yoifofāsafamisfo. Nāfo kēro Jesús Ifofafo fe fianākaxō Jesúsnoa ato yoifofāsafaifono āto āfifori ato fe fofāsamisfo. ¿Nāfāfe āto āfifāfe Jesús Ifofafo fe fianāfo keskari ēri nā kēro Jesús chanīmara faa fe ē fianātiromamē eferi kafāsanō? ⁶ ¿Afeskakī ē Bernabé feta nō mato Jesúsnoa yoifikī nō yonoimē, a nō yopai yafi a nō pi ai fixikī? Akka fetsafāfe Jesúsnoa mato yoifikakī yonokanima nō akai keskafakī. Akka afara yopaifono mā ato ināmis. Akka a nō yopai kaxpa nō fimisma, yonoxō nō fimis. ⁷ Anā meka fetsari ē mato yoinō. Sorarofāfe kaxpa yonokanima. Āto xanīfāfe a piaifo ato inākani. Askatari ato

kori inākani. Nāskarifikā yora tare fanamisto āfe tare foaisharano āfe yono pitiro. Askatari fakka kexemistori āfe fakka chocho fīaxō ayatiro. Nāskarari a Jesúsnoa yoimisfāfe a piaifo fitirofo pixikakī tsōa kopifaxoma.

⁸ Nā ē mato yoiai keskara yōra mekama. Akka Moisés nānori kirika keneyoni Niospa meka yoikī. ⁹⁻¹⁰ Moisés Niospa meka kenekī iskafani: “Nā fakka keskara nexakaxō xiki peama peama amamisfo āfe xaka potaxikakī. Nāskakē ifāfe renextiroma xiki xaka pinō ifomāi yonoxokī,” ixō Moisés Niospa meka yoikī kirika kenei. Akka fakkaōnoa Niospa yoinima. Yorafoōnoari yoini. Nā Jesús yonoxomisfoōnoa yoini. Nāskaxō afaa kopifaxoma fitirofo yopaifo Niosnoa ato yoikakī. Askatari fetsafāfe tare kexexō shinātirofo iskakakī: “Ē na tare kexeakī nāskakē ē tarepanoa afama mīshti fipa,” ixō shinātirofo. Nāskarifikā a Niospa meka ato yoimisfāfe a piai fitirofo. ¹¹ Nāskarifikā nokori kopikiri a nō yopai mā noko kaxpa inātiro afaa kopi yōkaxoma. ¹² Fetsafāfe Jesúsnoa mato yoiaifono nikakī nā yopaifo mā ato ināmis.

Akka nō mato taefakī yoiyoni. Nāskakē mā noko afama mīshti inātiro fet-safo finōmainīfofā. Mā noko afama mīshti ināfitirokē nō mato afaa yōkamisma. Nāskaxō nō tenemis. “Nō ato kori yōkaito anā noko nikapaitirofoma,” ixō nō shināmis. Nāskakē nō mato afaa yōkapaimisma. ¹³ ĶMā tāpiamamē? Nōko kaifo judeofo na Nios kīfiti pexefā mēra femisfo a piaifo. Nā piaifo Nios ināxikakī. Nāskakē a Nios kīfiti pexefā mēra yonomisfāfe a piai kaxpa pimisfo tsōa kopifaxoma. ¹⁴ Nāskarifikā nōko Ifāfe yoini iskafakī: “Fētsa ēfe meka shara fetsafo yoiaito nikakakī nā nikaifāfe a yopaifo ato inātirofo,” ixō nōko Ifāfe yoini. ¹⁵ Nānori nōko Ifāfe yoifinikē ē mato afaa pishta yōkamisma. Mato Niospa meka yoifikī ē mato kirika kene fomaima: “Ea kori inānōfora,” ixō. Nāskakē tsōa ea yoikī iskafatiroma: “Pablo ato kori fīapaikī ato Jesucristoōnoa yoimis,” ixokai tsōa eōnoa anori yoitiro. “Akka Pablo ato kori fīamiski ato Jesucristoōnoa yoikī,” ea mā faito ē rāfipaitiro. Nāskaxō ē mato afaa pishta yōkamisma: “Pablo kori fia,” mā ea fanōma. ¹⁶ “Ē mato afaa yōkatama Jesúsnoa ē mato yoimis. Nāskakē ē sharafinakōiakī,” ixokai ē yoitiro kakapaiyanā. Akka Niospa ea katoxō ea nīchini ē Jesúsōnoa ē yoifafāinō. Akka ē Jesúsōnoa yoyamaito Niospa ea omiskōimatiro. ¹⁷ Ē yoikī iskafamis: “Epa Niosi, mī Fakeōnoa ē yoipai,” ixō ē yoikē Epa Niospa ea afara inātiro. Akka ēa ē yoima. Niospa ea nīchini Jesúsnoa ē ato yoinō. Nāskakē nā ea yoini keskara ē ato yoimis. ¹⁸ Akka ē Niospa meka shara yoimiskē, Ķafaa ea Niospa ināimē? Ato Niospa meka yoixokai ē afaa ato yōkamisma. Askaxorikai ē ato yoimisma iskafakī: “Niospa mato yoikē Jesúsnoa ē mato yoifafainaito a ē yopai ea inānōfora,” ixokai ē ato yoimisma. Akka ē Niospa meka ato yoipai afaa yōkaxoma. Nāskax ē inimasharakōi Epa Niospa ea inimamaino.

¹⁹ Ēkai tsōa yonomatima. Nāskafīax ēakōi ē mato yonomati keskarakōi. Nāskakē keyokōi yorafo ē axosharapai ato Jesús chanīmara famaxikī. Nāskax ē yorafāfe āto yonomati keskaraki. Akka nā Nios Ifofaafoma ē ato fe rafemis āto feyafati shara keskara ixō ē ato yoiaito, Jesús Ifofanōfo ē Niospa meka yoiaito. ²⁰ Ēfe kaifo judeofo fe ē ikax nā ikaifo keskari ēri ato keskara ipai. Ē ato keskara ikaito ea ōikakī Jesús chanīmara fatirofo. Nōko xini Moisés nōko kaifo yoipaoni keskarakai iskaratīa anā ē nikaima. Akka ē nikayamafikī a Moisés yoipaoni keskara nikamisfo fe ēri ato fe ixō Moisés yoini keskara ēri askai ato Jesús chanīmara famaxikī. ²¹ Nāskakēri nā Moisés yoini keskara nikaifoma fe ē ato fe ixō nā Moisés yoini keskara ē akima ato Jesús chanīmara famaxikī. Ē nāskafīamiskē Cristo ea yoini keskara ē amis. Ē nikasharaxō nā fisti ē kachikiri fatiro. ²² Jesús chanīmara faafāfe ranārīto Niospa meka

tāpisharayokanima. Ĕ nā keskarafō fe ikax ėri ė ato keskara ipai eari Jesús tāpimasharanō. Nā ea tāpimana keskara ėri ato tāpimasharanō. Nāskatari fatora fetsafo fe ė ikax ė ato keskarari ė ipai. Eōxō Jesús chanġmara fakanax afe isharapakexanōfo. ²³ Nāskakē ė askafakġ ė ato Jesucristoōnoa tāpimasharai nā chanġmara faifono ėri ato fe inimai finakōitiro.

²⁴⁻²⁵ Akka mā mā tāpia nā naetapafo xonōnōnāxikakġ ichotirofo yora ichapafāfe ato ōiaifono. Akka nā koshi fistichi ato xonōtiro. Nāskakē akiki xanġfo inimakġ afara shara fetsa inātiro. Nāskakē kerexkai ichotirofo fetsafo xonōpaikani. Akka ichoyokanaxma tae fenai ichoyofofāfōfāitirofo feyafaxikakġ xokenāxikakima. Nāskarifakġ nōko Ifo Jesús kerexkai yonosharaxokāfe afara chakafo fayamaxikakġ. Akka Niospa mato yoiaito nikakġ akāfe Jesús feyafaxō Ifofaxikakġ mā akiki nokoaitġa mato afara shara inānō. Akka nā ichokġ ato xonōa xanġfāfe afara shara inā keyotiro. Akka Niospa noko afara inā keyonakama. ²⁶ Nāskakē ė Jesús fisti yonoxoni afaa fetsa shinātama. Akka ėa ė kaxpa mato yoimisma. Niospa ea shināmanaino ė mato yoimis. Naetapafo xonōnōnāpaikani mēstekōi ichotirofo. Nāskarari ė mēstekōi ika. Ĕfe Ifāfe ea yoiai keskarakōi ė iki akiki nokosharaxiki. ²⁷ Ĕa ė apaiyai keskara ė akima. Ĕfe Ifāfe ea amapaiyai keskara ė aki. Ĕ tenepaifikġ ė tenetiroma Jesús Ifofasharaxikġ. Ĕ xokenāfiakġ ė tenetiroma Jesúsnoa yoikġ. Jesús fistichi ea yonomatiro. Nāskakē ė fetsafori yoifafāini Jesús Ifofaxō yonosharaxonōfo. Nāskakē Niospa ea yoia keskara ė ayamax ė fenotiro, afianā ė Nios yonoxotiroma. Niospa anā ea yonomatiroma. Ĕ fenopaima. Nāskakē nā ėa ė apaiyai keskara ė akima. Ĕfe Ifāfe ea amapaiyai keskara, nā fisti ė aki.

10

Judeofāfe Nios chakafapaoni keskara iyamakāfe

¹ Efe yora mġstichi, tāpikāfe. Nōko xinifo Egipto anoax fonifo. Akka Niospa nai kōi nāmā pishta ato fotomaxoni a ōiax nōko kaifo judeofo aġo fonifo. Niospa nā nai kōiōxō ato iyopaiyai ari ato iyonġ. Ato iyoikaino nā ġamāfā āfe ane Ōshi ano nokonifo. Nānoxō nōko kaifo judeofo Niospa ato ġamāfā nēxpakġa rafe ato paxkaxotani anori pokefainōfo. ² Moisés ato rekē tanaxoni. Akka nōko kaifo judeofo Moisés aġo fonifo. Nā Moisés chanġmara fakanax afe rafepaonifo. Nāskakē nai kōi nāmā pishta kaino Moisés nāmā ato iyonġ. ġamāfā pokeifokani mā ġamāfā nakirafekōi shinātanano. Nāskakē pokefainifo ġamāfā nēxpakġa. Mā āfe kaifo ato ififani Moisés kani. ³ Askatari Niospa nai mēraxō a piaifo ato potaxoni fikaxō pinōfo. ⁴ Nāskatari ano fakamano Moisés tokirinġfā āfe mēstetġnġ ramāino faka sharakōi tsekeni keyokōichi ayanōfo. Cristoōnoax faka sharakōi tsekeni judeofāfe ayanōfo. Akka fakirira fofāfōfāipaonifo Cristo ato fe kaino, tsōa Cristo ōinima. ato fe kakġ ato axopaoni ato kexexō. ⁵ Askafafiaifono Epa Nioskai atoki inimanima āfe meka nikayamaifono. Nāskakanax tsōa istoma anoax fofāfōfāikani nikayospakanax nai keyonifo. Nā tsōa istoma ano ato maifakġ fetsanifo Niospa ato namakġ keyoano.

⁶ Akka afāfe afara chakafapaonifo. Nāskakē atoōnoa noko tāpimani afara chakafo fapaonifo keskara nōri ayamanō inifo keskai omiskōixikima. ⁷ Afāfe afara chakafapaonifo keskara ayamakāfe. Akka nāfāfe afara fetsa onifakaxō, “Na nōko niosra,” fapaonifo. Nāskakaxō kifipaonifo. Kġfikaxō āfe ferotaifi piyanā ayata ikaxō afara fetsafo chakafapaonifo. Pāeyanā monopaonifo. “Nōko nios nokoki inimaira,” ikanax askapaonifo. Nāskakē māri ato keskara iyamakāfe. ⁸ Nāskakanax āto āfima fe ipaonifo. Askatari kērofori āto fenemafo

fe ipaonifo. Askaifāfe òikī Niospa veintitrés mil yorafo ato namarisafatani nā pena fisti. ⁹ Māri ato keskara chaka iyamakāfe. Akka, “Nioskai nokoki fena òitifishkiyotiroma. Nāskakē ē afara chakafafiaito ea Niospa omiskōimani,” ixō shināyamakāfe. Akka nōko xinifāfe chakafaiāfe òikī anā teneyamakaikī Niospa ato omiskōimani. Nāskakē ato mēra rono paekōifo nīchini ato chachinōfo. Ato chachiano ranāri nanifo. Nāskakē noko tāpimai nōri Nios chakafaito nokori omiskōimatiro. ¹⁰ Askatari mēxotaima mekaifāfe òikī Niospa āfe ājirinī ranāri ato namani. Akka māri ato keskara iyamakāfe mato omiskōimayamanō.

¹¹ Nā nōko xinifāfe afara chakafapaonifoōnoa noko kenexonifo noko yoisharanō nōri ato keskara iyamanō omiskōixikima. Akka nōko Ifo Jesús oyoamano chaima nō itipinīsharayoi mā nōko Ifo nokoaino anā nō keskara chaka nō ixikima. ¹² Akka fētsa shinākī iskafai: “Ēkai ato keskarama. Ē afaa chakafatiroma. Akka afara sharafo fisti ē amis,” ixō anori shinātiro. Nāskakē kexemesharakāfe ato keskara iyamaxikakī afara chakafai. Akka māri Jesús Ifofasharamax mā ato keskarari mā itiro afara chakafai. ¹³ Satanás mato afara chakafamapaikī mato fisti chakafamapaimisma. Keyokōi nā Nios Ifofaafori ato chakafamapaimis. Mato chakafamapaiaino Niospa mato yoia keskara mato kexesharatiro mā afaa chakafanōma. Akka mato yoimis keskara mato axōi mā chanīmara faito. Nāskakē Niospa Satanás mato ichapama fekaxtefatimafai mā chakafanōma. Mato Niospa amatiro mā tenenō mato fekaxtefaiaino. Māto òiti mato kerexfaxotiro mā Satanás nikanōma. Askatari afara afe keskararafāfe mato fekaxtefaino Niospa mato amatiro mā tenenō mā Nios kachikirifaxikima.

¹⁴ Efe yora mīshtichi, fetsafāfe afara onifakaxō, “Na nōko niosra,” ikaxō chanīmara faifono ato makinoax paxkafaitakāfe. ¹⁵ Nāskakē shināsharakōikāfe nā ē mato yoiai keskara òitsai ē mato pārairaka. Akka ea yoikāfe ē mato pāraimākai. ¹⁶ Mā mā tāpia Niospa meka nikai nō ano fisti ichanāmis. Nāskaxō nō fimi ene ayamis Jesús noko nāxoni shināyanā. Nā nō ayamis, “Fimi ene Jesús āfe imira,” ixō nō shināmis. Nāskaxō nō shinātiro Jesús noko naxōi āfe imi foni nō afe nīpaxanō. Nāskakē nō yoitiro iskafakī: “Aicho Epa Niosi, mī Fāke noko nāxoni nō afe īpaxanō,” ixō nō yoitiro. Nāskatari pāa torepakexō Jesús noko nāxoni shinākī nō pimis. “Nā pāa Jesús āfe namira,” ixō nō shināmis. Nāskaxō nō shinātiro Jesucristo noko omiskōixononi mastafono ifi cruz ikakinoax. Nāskakē nō afe rafepakenaka Ifofaax. ¹⁷ Akka pāa fisti torepakexō keyokōichi nō pimis. Nāskarifikī Jesucristo fisti keyokōichi nō chanīmara faax fisti keskara nō ixii.

¹⁸ Nāskatari nōko kaifo israelifo shinākāfe. Nāfāfe āto inafō retekaxō Nios ināmisfo āto chaka soapaikakī. Nāskatari nā israelifāfe Nios kīfiti pexefā mēraxō Nios yonoxomisfāfe nā nami pimisfo. Nāskakanax nā fisti keskara imisfo ano fisti ichanānākaxō pikani Nios shināyanā. ¹⁹ Nāskakē ē mato yoi nā afara fetsa onifafo akai afama. Askatari afara fetsa onifakaxō nami ināfo nā namikai afama a onifafokairoko Nioskōikē. ²⁰ Akka nā Jesús Ifofaafāfema Nioskōi nami inātamaroko afara fetsa onifakaxō, “Nā nōko niosra,” ikaxō niafaka chaka nami ināmisfo. Nāskakē māri nami ināyamakāfe. Niafaka chaka fe mā rafeaito ē mato òipaima. ²¹ Mā nōko Ifo Jesús fe rafepai a niafaka chakafo fe rafeyamakāfe. Askaxō nā rafe mā ifofatiromaki. Nā Jesús Ifofaafō fe mā ato fe ichanākaxō pāa torexō mā ato feta pimis Jesús noko nāxoni shināyanā. Nāskakē nā Jesús Ifofaafoma fe ato fe mā ichanātiro nā niafaka chakafo nikaxikīma. ²² Nōko Ifo Jesús fe rafepaikī nō niafaka chaka fe rafepaikī nō nōko Ifo Jesús nō òitifishkimatiro. Nō askafaito noko omiskōimatiro. Akka, ¿nō Jesús kerexkai finōtiromē noko omiskōimayamanō? Maa, nō Jesús finōtiroma.

Jesús noko omiskōimanaito tsōa noko timamatiroma.

Nā Jesús Ifofafo nō ato noikōixō nō ato shināchakamatiroma

²³ Akka mā shināiraka iskafakī: “Cristo ēfe Ifo. Nāskakē nā ē apaiyai keskara ē atiro, afaa chakama,” ixō mā shināiraka. Ēje, nānorikōi mā shināmis. Nāskakē afara shara shinākī: “Nā chakama nō atiro,” ixō mā shināfiaino akka fetsafāfe anori shinākanima: “Chakara,” famisfo. Nāskakē fētsa ferotaifi nō afara pitiro ma ato shināchakayamaxikī. Chanīma, nō Jesús Ifofaxō Niospa noko yoini keskara keyokōi nō pitiro. Keyokōi nami shara nō pitiro. Chanīmakōifiano, Jesús Ifofaa fetsafāfe shināmisfo iskafakakī: “Ē nami pitiro ma. Ē nami pixō ē Jesús chakafatiro,” ixō shinātirofo. Nāskakē nō ato ferotaifi nō nami pitiro ma shināchakanōfoma. Akka nō ato shināchakamatama Jesús fisti nō ato shināmapai. ²⁴ Nāskakē nā mā apaiyai keskara fisti shināyamakāfe. Fet-safoōnoari shinākāfe. Ato axosharakāfe.

²⁵ Fatora fētsa mato nami ināpai mato kori fīaxikī akka pipaikī mā fi-tiro pixikī. “¿Fanīa mī na nami feamē?” ixō yōkayamakāfe mā pixō shināchakaxikakīma: “Nā nami nā mī niosnāraka,” ixō yōkayamakāfe. Akka noko Niospa yoini iskafakī: “Keyokōi mā nami pitiro,” ixō noko yoini. ²⁶ Nōko Ifāfe keyokōi onifani. Keyokōiri āfenā. Nā onifani tii noko ināpai nōkonā keyokōi inō.

²⁷ Akka nā Jesús chanīmara famato mato pimapaiyaito mā a feta pipaiyai afeta pikāfe. Nāskaxō iskafakī yōkayamakāfe: “¿Fanīa na nami mī feamē? Nā mī niosnāraka,” ixō yōkayamakāfe. Yōkaxoma mā pitiro shināchakaxikima. ²⁸⁻²⁹ Askatari fētsa mato yoikī iskafatiro: “Ē mato nami pimai nā ēfe niosnā,” ixō mato yoiaito nā nami piyamakāfe. Akka mā piaito ōikī āfe shinā mēraxō shinātiro iskafakī: “Ajaa, na feronāfāke Jesús Ifofāfaxō nā ēfe niosnā mā nami pii. Na feronāfākekai Jesús Ifofasharama,” ixō āfe shinā mēraxō shinātiro. Nāskakē māri mā nami pixō māto shinā mēraxō mā shināchakatiro: “Mā nō chakafara,” ixō. Akka mā mā tāpia keyokōi nō nami pitiro. Nāskakē fetsafāfe tāpiamano ato ferotaifi nā nami piyamakāfe shināchakayamanōfo.

³⁰ Mā yoiraka iskafakī: “Ē keyokōi nami pikī ē Nios, ‘Aichora,’ fafafaīni. ¿Akka afeskakī fētsa eōnoa shināchakatiromē?” ixō mā shināiraka.

³¹ Ē mato yoinō afara mā akai shara shinākī akāfe. Niospa mato shara ōinō akāfe. Niosnoa shināsharanōfo akāfe. ³² Nā mā akai keskafakī fetsafo shināchakamayamakāfe. Nōko kaifo judeofo iyamai mani fetsafo Nios Ifofaafoya ato shināchakamayamakāfe matoōxō nōko Ifoōnoa shināchakanōfoma. ³³ Nāskari fakī ēri keyokōi yorafo ē ato shara faxopai inimanōfo. Akka nā ē apaiyai keskara fisti ē akima. Fetsafāfe afara apaiyaifo keskafakī ē ato axopai Jesucristo Ifofakaxō ato chaka xatekanax afe īpaxanōfo.

11

¹ Akka na Cristo akai keskara ēri aki. Akka māri nā ē akai keskara akāfe.

Ichanāxō nō Nios shināino feronāfake fe kēro afeskax itirofomāki Pablo ato yoini

² Mā ea shināmiskē ē mato aicho fai matoki inimakī. Nā ē mato yoimis keskara mā nō feyafamiski. Nā mā nikafafaīni. ³ Efe yora mīshtichi, ē afara ē mato yoipai mā tāpinō. Cristofi keyokōichi nōko Ifokī. Nāskarari kērofāfe āto ifo āto fenefo. Akka Cristo āfe Ifokī Epa Nios. ⁴ Nāskakaxō feronāfake Nios yoiti pexe anoxō yoianā kīfikani marakometirofoma Cristo shinākanani. Nō marakomexō nōko Ifo nō noima. Nāskakē nōko Ifo nō rāfimatiro. ⁵ Askatari kērofāfe Nios kīfipaiyanā Niospa meka yoipaikani marakometirofo fetsafāfe tāpinōfo āto fenefo āto ifokē. Nāskara mā nō

feyafamis. Āto marakometimaisax maxko ika keskara itirofo. Nāskaxō āto fenefo rāfimatirofo. ⁶ Akka kērofāfe Nios kīfipaikani marakomekaspakani feronāfakefo keskara maxko itiro. Nāskakanax kērofo maxko ikanax rāfipaitirofo. Nāskakē ato iskafatirofo: “Nā kērofo chakafora,” ikaxō yoitirofo. Nāskakē kērofāfe Nios kīfipaiyanā āfe mekari yoipaikani marakometirofo. ⁷ Akka feronāfakefāfe Nios kīfipaikani askayamai āfe meka yoipai marakometirofoma Nios keskara sharamāi ikanax. Askatari Nios nikakōikanax āfe ōiti keskara shara ikafo. Nāskafakīri kērofāfe āto fene nikakōikanax shara itirofo. Nāskakē āto fenefo atoki inimatirofo. ⁸⁻⁹ Niospa feronāfake onifakī taefani. Chipō xotofake onifani. Feronāfakeōnoa Niospa xotofake onifani. Kēronoakai Niospa feronāfake onifanima. Akka feronāfakeōnoa xotofake Niospa onifani fene afara axosharanō. ¹⁰ Nāskakē feronāfake kēro ĩkitiro. Kērofāferi āto fene nikakōitirofo. Nāskax Nios Ifofafo ichanāifono kērofāfe āto marakometi maitirofo āto fenefo nikakōikaxō fetsafāfe ato ōinōfo āto fenefo nikakōiaifono. Askaifono Niospa āfe ājirifāfe ato ōikakī yoitirofo iskafakakī: “Niospa yoini keskara na kērofāfe āto fenefo nikakōisharakani,” ixō yoitirofo. ¹¹ Nāskax nōko Ifo fe nō rafeax feronāfakefo fe xotofakefo nō axō faatanāsharatirofo. Akka xotofakefo iskatirofoma: “Nō feronāfakefo nō yopaima,” itirofoma. Askatari feronāfakefo iskatirofoma: “Nō xotofakefo nō yopaima,” itirofoma. ¹² Niospa taefakī feronāfake onifani, āfe ane Adán. Nāskaxō xotofakeri onifani, āfe ane Eva. Adán āfe pishi tsēkaxō Niospa onifani. Nāskatari xotofake fake feronāfake kāipakemis. Akka xotofakefoya feronāfakefo Niospa onifani.

¹³ Efe yora mīshtichi, shinākāpo. Xotofakefāfe mato fe ichanākaxō Nios kīfipaikakī marakomexoma Nios kīfikī, ¿askara sharamamē? Mā ea yoitiro. ¹⁴ Mā mā tāpia feronāfake foo chainipaya nō shara ōitiroma. Akka nōkai askara feyafamisma. Nāskakē feronāfake foo chainipa fatiroma. Foo chainipayax rāfitiro. ¹⁵ Akka xotofakefāfe āto foo chai faafo nā marakometi shara ōitsa itirofo. ¹⁶ Akka na ē mato yoiai keskara ea nikakaspai fetsa efe feratenāito ē afaa yoipaima. Akka nā fisti ē mato yoimis. Xotofakefo marakometiro ē mato yoimis. Nā ē mato yoimis keskarari Nios Ifofaa fetsafāfe nānorikōiri yoimisfo nā ichanāifotīa.

Nios yoiti pexe anoax ichanākaxō Corinto anoafāfe afarafo chakafaiyono Pablo ato yoini anā askanōfoma

¹⁷ Akka afara fetsari ē mato yoipai. Mē nika Nios yoiti pexe anoax ichanākaxō mā afara chakafaito. Nāskaxō afara shara fatama mā afara chakafakōini. Nāskakē, sharafora ē mato faima. ¹⁸ Akka mē nika mato anoax fēkaxō ea yoiaifono nā mā ichanāitīa fetsafo fe mā osināxma ato fe ichanākaspaifo. Nāskax mā ato ketaxamei tsaopaitiroma. Mā ichanākaxō nā nōko Ifo Jesús mato nāxoni shināpaifi mā ranā mā noikaspa faatanāi. Nā ē matoōnoa nikai keskara ē chanīmara fai rakikīa. ¹⁹ A mā shināi fisti anori mā shināima. Nāskarafo yorafo a shināi fisti anori shinākanima. Nāskakē mā ranā feratenākakīma yoinānāsharakāfe tāpisharaxikakī. Fetsafāfe anori mā shināino, nāskakē fet-safāferi anorima shināi. Nāskakē yoināsharakāfe fato sharamākī. ²⁰ Ē anā mato yoisharapai. Mā Nios yoiti pexe anoax ichanākaxō mā pāa piyanā ayayanā a noko Jesús nāxoni mā shināima. Askatamaroko mā piyai yafi a mā ayai fisti mā shināmis. ²¹ Mē nika a mā piyai mā feaito mares pixikī ichanākaxō ato manayoxoma. A fonāikaifokai mā ato ināima. Nāskakē fonāikani. Askatari mā pāemis. Askarakai sharama. ²² Akka pipaikī ichanāti pexe ano kayoxoma ĩkisi mātō pexe anoxō piyokāfe. Akka mātō pexe anoxō piyoxomaroko nā Nios yoiti pexe ano mā femis anoxō mares pixikī a fonāikaifo ato akīxikima. Nāskakē a fonāikaifo rāfitirofo. Mā askafakī a mato fe ichanāfo mā chakafai. Mā ato noima. ¿Ē matoōnoa yoisharaimē? Maa. Ēkai matoōnoa yoisharaima māmāi ato chakafaito.

Jesús noko nāxoni shināyanā nō piyanā nō ayatiro
(Mt. 26.26-29; Mr. 14.22-25; Lc. 22.14-20)

²³⁻²⁴ Nāskakē nōko Ifo Jesús ea yoini keskara ē anā mato yoini. Ea tāpimani keskara ēri mato tāpimapai. Nōko Ifo Jesús Judaspa ato achimayoamano nā fakish fisti aōxō tāpimisfo fe ichanāyoni. Nāskaxō ato feta pikī pāa tsomaxō Apa Nios yoini iskafakī: “Epa Niospa, mī sharafinakōia. Mīfi keyokōi tāpiaki. Aicho,” fata pāa torepakexō ato tii ināni. Nāskaxō ato anā yoini iskafakī: “Na pāafi ēfe yoraki. Ēfi matoōnoax chipo naikai mato noikōiax. Mē naano nā mā ichanāitīa nā mā pāa piatīa ea shināfafāikāfe,” ixō ato yoini. ²⁵ Nāskaxō mā piaifono anā kecho tsomaxō ato yoini iskafakī ato ayamayanā: “Afara fena shara ē mato yoinō. Nā mā ayai ēfe imi. Nāskakē mā ea shinātiro. Ēfe imi foyanā ē matoōnoax nai mā efe Epa Nios ari īpaxanō. Nā nō akai keskara chipo akāfe mē naano nā mā ichanāitīa ea shinākī,” ixō ato Jesús yoini. ²⁶ Nāskakē nā mā ichanāitīa pāa piyanā ayayanā Jesús shināfafāikāfe: “Nōko Ifāfe noko nāxoni,” shināyanā. “Nā pāa Jesús āfe yora,” ixō shināfafāikāfe pāa piyanā. Jesús anā oaitīa nā chanīmara faifo askapakexanōfo. Ē anā oaitīa nāskaras akāfe.

Ichanāifo anoxō pāa pikī nō Jesús shinātiro

²⁷ Nāskakē nā mā ichanāi anoxō mā pāa piyanā ayayanā mā Jesús shinātiro. Askafafiakīkai māto chaka xatekaspaxō māri mā chakafai pāa pixō. Akka nōko Ifāfe noko nāxoni āfe yora omiskōiyanā āfe imi foyanā noko nāxoni. Nāskakē nō ichanāi anoxō pāa piyanā ayayanā nōko Ifoōnoa shinākima nō nōko Ifo nō chakafai. ²⁸⁻³² Nāskakē nō ichanāyanā nō pāa piyanā nō ayatiro nōko Ifo shināyanā. Akka taefakī nō shinātiro iskafakī: “Ē afara chakafamis,” ixō nō shinātiro. Akka nō afara chakafafxō Epa Nios nō yōkayotiro nōko chaka noko soaxonō. Nāskaxō Jesús noko nāxoni nō shinākōitiro pāa piyanā. Akka nō askafayamaito Epa Niospa noko omiskōimani. Akka nā ē mato yoiāi keskara atiri mā askaima. Nāskakē mā iramanai. Ranāri mā isinī iki. Nāskatari ranāri mā mā nai. Nāskakē nā mā ichanāitīa pāa piyoxoma afara chakafxō ikisi Epa Nios yoiyokāfe mato chaka soaxonō matori omiskōimayamanō. Akka noko omiskōimafiakī a Jesús Ifofaafoma Niospa ato omiskōimanai keskafakī noko omiskōimasharaima. Akka afokai āfe fakefoma. Nāskaxō omiskōipakenakafo mēra ato potaxii. Akka nōfi āfe fakekōifokī. Nōko Ifāfe noko omiskōimafiakī a omiskōipakenakafo mēra noko potatamaroko noko omiskōimakī noko tāpimani nō anā chakafanōma.

³³ Akka mā ichanāxō pāa pixikī ranārito mā taefakī piimis. Nāskakē fetsafāfe akairi pipaikani afaa pitirofoma. Akka piyoxoma ato manayokāfe fetsafo feta pixikakī. Nāskakē mā ato manayotiro keyokōichi pitirofo. ³⁴ Akka fatora fetsa mā fonāiki ichanāyoxoma māto pexe anoxō mā piyotiro. Nāskaxō mā ichanāxō mā ichapa piyamaino fetsafāferi pitirofo. Nāskaxō mā ichanāxō Jesús shinākī ato feta mā pisharaino Niospa mato omiskōimanimā. Afara ichapakōi ē mato yoipai. Nāskaxō ē matoki nokoxō atoōnoa ē mato yoisharapai.

12

Jesús Ifofaafāfe Niospa Yōshi Sharaōxō afarafo atirofo fetsafo fe axō faatanāsharaxikaki

¹ Efe yora mīshtichi, afara fetsa anā ē mato yoisharapai. Niospa Yōshi Sharaōxō afarafo nō atiroōnoa ē mato tāpimapai aōnoa mā tāpisharakōinō. ² Shinākapo. Mā Jesús Ifofaamano afara fetsa onifakaxō, “Na nōko niosra,” ikaxō mato chanīmara famapaonifo. Mā chanīmara fafiaino a onifafotokai afaa shinātirofoma. Askaxorikai afaa pishta mato yoitiroma. Nāskakē mā

anorima shināyopaoni. ³ Askata yora fetsafāfe matoki nokoxō yoitirofo iskafakakī: “Ē mato Niospa meka yoinō. Niospa Yōshi Sharaōxō ě mato yoi,” ixō mato yoiaito, ʒafeskaxō mā tāpitiromē Niospa Yōshi Sharaōxō mato yoimākī? Ē mato tāpimanō afeskaxō mā tāpitiromākī. Fatora yora fĕtsa Jesús mekafakī chakafai, akai Niospa Yōshi Sharaōnoax mekaime. Akka, “Jesúsfi nōko Ifokī,” ixō yoi Niospa āfe Yōshi Sharaōxō yoitiro.

⁴ Nā nō Epa Nios Ifofa tii āfe Yōshi Sharapa noko amapaiyai keskara noko amai. Ares fisti noko shināmatiro aōxō nā Nios Ifofaafō fetsafo nō ato asharaxonō. ⁵ Aōxō fetsa fetsafakī afo akī nōko Ifo nō axotiro. Nā keyokōi Nios chanīmara faifo tii nōko Ifo fisti. ⁶ Nāskakē Niospa nā nō Ifofa tii noko shināmani aōxō nō fetsafo afara axosharanō. Askatari Niospa keyokōi noko tāpimani a noko axopaiyai keskara noko axōi. Nā nōko Nios fisti anā ano fetsama. ⁷ Askatari nō Nios Ifofaito noko tāpimani āfe Yōshi Shara nofe iki. Nofe ixō noko amatiro nā Nios Ifofaifo nō ato axosharanō. ⁸ Fetsafāfe Niospa Yōshi Sharaōxō mĕstesharakōi noko yoitiro. Askatari fetsafāfe Niospa Yōshi Sharaōxō tāpisharakōikī noko tāpimasharatiro. ⁹ Askatari fetsafori Niospa Yōshi Shara fistiōxō Nios chanīmara fakanax finakōia ikafo. Askatari fetsafāferi Niospa Yōshi Sharaōxō yorafo sharafakani. ¹⁰ Askatari fetsafāferi Niospa Yōshi Shara fistiōxō tsōa atiroma keskara faino, fetsafāferi Niospa Yōshi Sharaōxō nā Niospa yoiyai keskara noko yoiiafono, fetsafāferi Niospa Yōshi Sharaōxō tāpitiromē fĕtsa niafaka chakaōxō yoimākai askayamai Niospa Yōshi Sharaōxō yoimākai. Askatari fetsafāferi Niospa Yōshi Sharaōxō meka fetsa nikayomisma yoitiro. Askatari fetsafāfe meka fetsafāfe noko yoiaito nikafikī nō tāpiyamaito fetsafāferi Niospa Yōshi Sharaōxō noko yoisharatiro tāpinōfo. ¹¹ Nā nō Nios Ifofatifi Niospa Yōshi Shara fistichi noko amapaiyai keskara nō atiro. Nā noko amapaiyai keskara noko amatiro.

Nōfi yora fisti keskaraki

¹² Nōko yora fistifiano nō pōyayai fetsea. Askata nō feroyata, pachoyata nā nō fisti askai fetsea. Nāskarifiyai nō keyokōichi Cristo Ifofaano nā fisti keskarakōi. ¹³ Cristo fistifiano nōfi āfe pōya keskarakī. Atiri nō judeofo ikaino mani fetsafori judeofoma ikaino yorafāfe āto yonomatifo ikaino askatari yorafāfe āto yonomatifoma ikaino nō askai fetsea. Nā nō Cristo chanīmara faafo tii nō afe yora ika. Niospa Yōshi Sharapa noko ōiti fetsafaax nō mĕra iki.

¹⁴ Nōko yora fistifiano nō pōyayai fetsea. ¹⁵ Nāskakē nōko tāekai yoikī iskafatiroma: “Ēkai mĕkema. Nāskakē ěkai āfe afaama,” ixō yoifi nā nōko tāeri nōko yoraō nea. ¹⁶ Nāskatari nōko pachori yoikī iskafatiroma: “Ēkai feroma. Nāskakē ěkai āfe afaama,” ixō yoifi nā nōko pachori nōko yoraō nea. ¹⁷ Akka nōko yora nōko fero fistikē afeskaxō nō nikakeranama. Nāskatari nōko yora nōko pachō fistikē afeskaxori nō xetekeranama. ¹⁸ Akka Niospakai askara noko onifanima. Nā apaiyai keskara fakī noko onifani. Mapoya fāta feroya fāta pōyaya fāta pachoya fata kishiya fāta noko fani. ¹⁹ Akka nōko yora afara fistiya ikanokai shara ikeranama. ²⁰ Akka nōko yora fistifiano nō pōyayai fetsea.

²¹ Nāskakē nōko fĕrokai mĕke yoikī iskafatiroma: “Ē mia yopaima,” ixō yoitiro. Māporikai tae yoikī iskafatiroma: “Ēkai mia yopaima,” ixokai yoitiro. Nāskafakīri a Nios Ifofaafō fetsafo iskafakī yoyiamakāfe: “Ē mia yopaima,” ixō yoyiamakāfe. Niospa nā Ifofaafō tii noko noikōia. Nāskakēri nōa ranā noinākāfe. ²² Nōko yora āfe afara fetsafo mitsisipayamafekē nāfori nō yopakōi. ²³ Nōko yora āfe afara fetsafo, sharamara, nō fafiakī nāfori nō kexesharai. Nōko afara fetsafori nō onesharatiro nō rāfixikīma. ²⁴ Akka nōko

yora āfe afara fetsa sharano nō onetiroma. Niospa noko yora onifaxoni nō kexesharanō. Nāskaxō nō yoitiro iskafakī: “Ēfe afara ē yopakōi,” ixō nō yoitiro. Nāskafakiri fētsa a Nios Ifofaa fetsa yoikī iskafatiroma: “Nakai afama,” ixō yoifiaino Nios aō noikōi. Nāskakē noko onifani nā Ifofaafo tii keyokōi nō yopakōi. ²⁵ Niospa noko onifani nā Ifofaafo tii keyokōi nō kexenōnāsharatiro isharaxikī nānori fisti shināxikī. ²⁶ Akka nō fanīra moxaki chachixō nō pae meetiro keyokōi nōko yora pāei fetsetiro. Nāskarifakī Jesús Ifofaa fetsa omiskōiaino keyokōi nōri shināmitsatiro. Nāskafakī yorafāfe Jesús Ifofaa fetsa sharafakē keyokōi nō afe inimakōitiro.

²⁷ Akka nō Cristo yora keskarakōi. Nāskax nō āfe pōya keskarafō. Nō ichapafīax nō yora fisti keskarakōi. ²⁸ Nāskaxō keyokōi nā nō Jesús Ifofaa tii Epa Niospa noko katonī aōxō afara fetsa nō anō. Akka fetsafori taefakī ato katonī Jesucristoōnoa ato yoifofāsafanōfo. Askatari fetsafori katonī āfe meka yoimis inōfo Niospa ato shināmanaino. Askatari ato katonī ato tāpimamisfo inōfo. Askatari aōxō tsōa atiroma keskara amisfo ato katonī. Askatari Niospa Yōshi Sharaōxō a isinī ikaifo ato sharafamisfo ato katonī. Askatari fetsafo ato axomisfo ato katonī. Askatari fetsafo shara yonomamisfo ato katonī. Askatari fetsafāfe āfe Yōshi Sharaōxō meka fetsapa yoiyomisma ato katonī ato yoinō āfe mekapa. Noko keyokōi katonī aōxō yorafo nō axosharanō. ²⁹ Niospa keyokōi noko katonī a apaiyai keskara nō anō. Akka noko askafafianino keyokōichi Jesucristoōnoa nō ato yoifofāsafamisma. Askaxori keyokōi noko katonī āfe meka yoimisfo nō inō. Askaxori keyokōi noko katonī aōxō ato tāpimamisfo nō inō. Askaxori keyokōi noko katonī tsōa atiroma keskara aōxō afama mīshti nō fanō. ³⁰ Keyokōi noko katonī Jesúsxō isinī ikaifo ato sharafamisfo nō inō. Keyokōi noko katonī nā meka fetsapato āfe Yōshi Sharaōxō nō ato yoinō. Keyokōi noko katonī nā meka fetsa nikaxō nā yoia keskara nō ato tāpimanō. ³¹ Nāskakē Niospa mato imapaiyai keskara ixō nā Jesús Ifofaafo mā ato shara faxotaifai. Niospa Yōshi Sharapa mato amapaiyai keskara nāfo fichipaikāfe. Akka nāfo sharafiano ē mato afara fetsa sharafinakōia iskaratīa ē mato yoinō. Ea nikasharakapo. Shara finakōia Niospa noko imapaiyai keskara ē mato tāpimanō, a noko Niospa noiai keskari fakī nōri fetsafo noisharakōinō.

13

Nō fetsafo nōisharakōitiro

¹ Ēfe mekapa ē yoifitiroxakī, yora fetsafāfe mekapari ē yoifitiroxakī, Niospa āfe ājirifāfe mekapari ē yoifitiroxakī ē Niosxō yorafo noiyamax ēkai afaa itiro. Nāskax ē mekai achakōi itiro, fetsafo fekaxtefai keskara ē itiro. Nāskafakī ēa ē fetsafo axomis keskara ē itiro. ² Niospa meka ē ato yoifikī ē ato noiyamax ēkai afaa itiro. Askatari fetsafāfe Niospa meka tāpiyamaino akka ē tāpikōifixō ē ato noiyamax ēkai afaa itiro. Askatari ē Nios chanīmara fakī finakōixō ē Niosxō ē nā machi xekafitiroxaki ē yorafo noiyamax ēkai afaa itiro. Ē ato noiyamaino Niospa ea shara ōima. ³ Nāskatari ē afama mīshti nā afaamaisfo keyokōi ē ato ināfixō ē ato noiyamax ēkai afaa itiro. Askatari Niospa meka shara ē ato yoiaito ea nikakaspakakī ea koaifono ē atoōnoax nafiakī ē ato noiyamax ēkai afaa itiro. Ē ato noiyamaino Niospa ea shara ōima.

⁴ Nō yorafo noikōiaino noko fekaxtefaifono nō atoki ōitifishkitiroma, nō tenetiro. Nāskaxori nō ato noikōikī nō ato axosharatiro. Askaxori nō ato noikī nō xītipaitiroma. Askatari kakapaimis nō itiro. Nō yorafo noikōikī nō iskatiro: “Ē tāpikōiaki. Ē fetsafo keskarama,” ixō nō yoitiro.

⁵ Nāskaxori nō ato noikōikī nō ato rāfinīfaima. Askaxori nōa apaiyai keskara fistis nō shinātiroma. Akka nō fetsafori nō ato axosharatiro. Askaxori nō ato fena feratemisma nō itiro. Nāskaxori noko fētsa chakafakī mekafaino nō shinātaifatiroma. Afo shinātamaroko nō aō noisharatiro. ⁶ Askaxori nō ato noixō fetsafāfe afara chakafaito ōi nō inimatiroma. Akka afara chanīmakōi shara nikai nō inimakōitiro. ⁷ Askaxori afara afe keskararafiaino nō Nios noikī nō shināchakatiroma. Nō tenetiro. Askatari ato noikōikī atoōnoa afara chaka yoiaifono nikakī nō chanīmara fatiroma. Akka fetsafoōnoa chaka nikafixō nō tāpixoma, “Afaa chakafayamapainōfora,” ixō nō shinātiro ato noikī. Askatari a mēxotaima chakafaifoōnoa atoōnoa nō yoitiroma iskafakī: “Nāfāfe mēxotaima afara chakafaifono Niospa ato chaka soaxotiroma,” ixō nō yoitiroma. Askatamaroko nō iskafatiro: “Nios Ifofakakī āto chaka xate-tirofo,” ixō nō shinātiro ato noikī. Nāskaxori afara afe keskararafiaino nō Nios noikī nō kachikiri fatiroma.

⁸ Nā Jesús Ifofaafāfe Epa Nios yafi yorafo ato noipakenakafo. Askafiaino nōko mai keyoaino Niospa meka yoimisfāfe anā ato yoixikanima. Askaxori a yōra mekapama meka fetsapa yoimisfāfe anā meka fetsapa yoixikanima. Askaxori nā tāpimamisfāferi anā noko tāpimaxikanima. Mā nōko Ifo nokoaino nō anā ato yopaxiima noko axonōfo. ⁹ Nāskakē iskaratīa Niospa noko tāpimanai keskara nō tāpisharayoama. A Niospa meka noko yoimisfāfe keyokōi tāpisharafoma. ¹⁰ Mā Jesucristo nokoaino nō a keskara shara ixii. Aatofi keyokōi tāpiakī. A tāpia keskara nokori tāpimaxii.

¹¹ Akka ē yomeax ēfe meka fāke meka keskara ē iyopaoni. Fakefāfe metiro keskarari ē meyopaoni. Fakefāfe shinātiro keskarari ē shināyopaoni. Iskaratīa mē yosixō fakefāfe shināi keskara ē anā shināima. Fakefāfe ichapa tāpiama. Akka ē iskaratīa mē yosiax fakefo keskara anā ē ikima. Iskaratīa ē feronāfakekōi ē anā fakefo keskarama. ¹² Feisiti fetakōikē nōko femānā nō ōisharatiroma. Nāskarari Jesús nō ōitiro afe keskara ikamākī. Akka nā oaitīa nō ōixii afe keskaramākī. Akka iskaratīa nō tāpisharayoama. Akka Jesús oaino nō tāpisharakōixii. Jesús noko tāpikōia keskarari nōri tāpikōixii. ¹³ Iskaratīa nō Nios chanīmara fai. Nō Nios chanīmara faxō nō manai nā oaitīa afe ipaxakī. Nō Nios chanīmara fai nā shara. Askatari afe ipaxakī nō manaino nāri shara. Askatari nō fetsafo noikōia nāfi sharafinakōiaki.

14

Niospa Yōshi Sharapa noko amapaiyai keskara anā Pablo yoini

¹ Nā Niospa noko noiai keskafakī fetsafori noitaifakāfe. Nāskara sharakōi. Nāskara fichipaikāfe askaxikakī. Askatari Niospa Yōshi Sharapa afara fetsa mato amapaiyai keskara nō fetsafo fe axoshara faatanānō, afori fichipaikāfe. Niospa Yōshi Sharaōxō nā Niospa meka mā ato yoinō fichipaikōikāfe.

² Askatari fētsa Niospa Yōshi Sharaōxō meka fetsapato yoikī yorafo yoitama Niosroko yoitiro. Niospa Yōshi Sharaōxō yoifiaitokai tsōa tāpitiroma.

³ Askatari fētsari Niospa meka shara noko yoikī noko tāpimasharatiro nō Jesús Ifofasharanō. Askata nōko ōiti noko fepeaxosharatiro nōko ōiti mēra nō inimanō afara afeskarafiaino. ⁴ Askatari fētsa Niospa Yōshi Sharaōxō meka fetsapato yoikī āa metiro āfe ōiti fepeaka keskara. Askatari fētsa nōko mekapā Niospa meka shara noko yoisharaito nō keyokōichi nikatiro. Nāskakē Niospa noko yoiai keskara nikasharax nōko ōiti fepeaka keskara shara nō itiro.

⁵ Mā keyokōichi nā meka fetsapato Niospa Yōshi Sharaōxō mā yoipainō. Nāskara sharafiano akka fētsa mato mekapā mato tāpimasharai nāfi sharafinakōiaki. Akka fētsari meka fetsapato mato yoiaito mā nikatiro ma tsōa mato yoiyamaino. Akka nā mato yoiai keskara fētsari mato tāpimatiro mā tāpinō. Nikai mato ōiti fepeaka keskara shara itiro. ⁶ Efe yora mīshtichi, meka

fetsapato ẽ mato yoiaito mã nikayamax mã mekakai mãtonã afama. Nãskakẽ mã ẽ mato yoiai keskara Niosxõ mãto mekakõichi ẽ mato tãpimatiro Niospa mato yoipaiyai keskara mã tãpinõ.

⁷ Shinãkãpo, meka fetsa ẽ mato yoinõ. Xãiti anorima maneaite nõ nikasharatiroma fatomãkĩ xafakĩa maneaifo. ⁸ Askatari soraro fẽtsa mã kexemisto ãfe põõiti põõatiro ãfe sorarofõ itipinĩsharanõfo ato reteifoxikakĩ. Askafiakĩ põõasharamano tsõa tãpitiro. Nãskakẽ tsoa itipinĩsharatiroma ato reteifoxikakĩ. ⁹ Askatari meka fetsapa mã fetsafo yoiaino afeska faxõkai mã yoiai keskara tsõa tãpitirofoma. Mã askara mekapa mekai mãakõĩ mã mekai tsõa mato nikayamafiaino. ¹⁰ Akka mã maitio ikafo meka fetsapa mekakani. Akka nõ ato nikatiroma. ãto kaifãfe meka fisti nikatirofo. Nãskax keyokõĩ meka shara. ¹¹ Akka ẽfe mekapa ẽ ato yoiaito yora fetsafãfe tãpitirofoma. Ëkairoko ãto kaifãfe mekapa yoiaito ea nikafo. Akka ẽ ãto meka tãpiamax ẽ ãto kaifo keskara itiroma. ¹² Nãskakẽ Niospa Yõshi Sharapa mato afara fetsa amapaiyai keskara mãfo mã fichipaikõitiro. Mato askafaino aõxõ mã Jesús Ifofafo mã ato õiti fepeaxosharakõitiro Jesús Ifofasharanõfo. Nãskara fichipaikãfe Nios yonosharaxoxikakĩ.

¹³ Nãskakẽ Niospa Yõshi Sharaõxõ meka fetsapato yoikĩ Epa Nios kĩfikãfe mã mã yoiai keskara mato tãpimanõ. Mã tãpisharaxõ atori mã ato tãpimatiro akairi nikakõisharanõfo. ¹⁴ Nãskakẽ Niospa Yõshi Sharaõxõ meka fetsapato nõ Nios kĩfikĩ nõko shinãmã shinãxõ nõ kĩfima. ¹⁵ Akka Niospa Yõshi Sharaõxõ meka fetsapato ẽ Nios kĩfitiro. Askatari yorafãfe mekakõichiri ẽ Nios kĩfitiro keyokõichi nikanõfo. Askatari meka fetsapa fanãitiro. Askatari yorafãfe mekapari ẽ fanãitiro keyokõichi nikanõfo. ¹⁶ Mã Niospa Yõshi Sharaõxõ meka fetsapa Epa Niosnoa mã yoifiato afeskaxokai a mato fe ichanãfãfe yoitirofoma iskafakakĩ: “Chanĩmakõĩ mã yoi,” mato fatirofoma tsõakairoko mãto meka tãpixõ. ¹⁷ Mã meka fetsapato Nios aicho fafiakĩ fetsafo mã ato õiti fepeaxosharatiroma mato nikafiaifono mãmãĩ meka fetsapato yoikĩ. ¹⁸ Efe yora mãshtichi, Niospa Yõshi Sharaõxõ yõra mekapama meka fetsapa mato finõinĩfofãta ẽ yoimiskĩ. Nãskakẽ ẽ Epa Nios aicho fai. ¹⁹ Askafia a Jesús Ifofafoya fetsafori ẽ ãto yoipai ea nikanõfo. Ichanãti pexe anoxõ ato ichanãfaxõ ãto mekakõichi ẽ ato yoipai meka ichapama ẽ yoifiato. Nãskarafi sharakĩ. Akka yõra mekapama meka fetsapa ẽ ato yoiaito ea nikatirofoma meka ichapa ẽ ato yoifiato. Nãskakẽ mekakõichi ẽ ato yoipai ea nikanõfo.

²⁰ Efe yora mãshtichi, ẽ mato tãpipapaiyai keskara tãpisharakãfe. Fake yomẽ tãpisharayoxoma, shinãsharatiroma. Nãskarifikã fake yomẽ shinãĩ keskara shinãyamakãfe. Mẽstekõĩ shinãkãfe. Akka yora xinifãfe chaka shinãtirofo. Akka fake yomẽfãfekai chaka shinãtiro. Nãskakẽ fake yome keskara ikãfe. Afara chaka tãpipaiyamakãfe. ²¹ Isaías Niospa meka yoikĩ kenenĩ iskafakĩ:

Nã israelifo ẽ ato yoifiato ea nikakaspamisfo. Nãskakẽ ẽ ato kaxpakõĩ yoimis. Nãskaifãfe õikĩ ãto kaifoma ẽ atoki nĩchikẽ, ãto mekapa ato yoiaifãfe ato nikakanima meka fẽtsapamãĩ yoiafono. Ato yoifiakonokai ato nikakanima,

ixõ Isaías kirika kenenĩ Niospa meka yoikĩ. ²² Nãskakẽ yõra mekapama nõ meka fetsapa ato yoiaito a Nios Ifofaafãfema noko nikatirofoma. Nãskakẽ Niospa ato õimani afãfekai Niospa meka tãpitirofoma Nios chanĩmara fayamakaxõ. Akka Nios Ifofaafãfe Niospa meka tãpitirofo. Askata ichanãxõ ãto mekakõichi nõ ato Niospa meka yoiaino Niospa Yõshi Sharaõxõ nikasharatirofo. Akka mã chanĩmara faafãfema nikasharakanima ãto mekakõichi nõ ato yoifiaino. ²³ Nãskakẽ ichanãx yõra mekapama meka fetsapa mã mekaino a Nios chanĩmara faafoma fe a mato fe yoramafori

mato fe ichanāxō mato nikakakī shinātirofo iskafakakī: “Ōikapo, nā yorafo nā afaa shināifoma keskarafo,” ikanax yoinātirofo. ²⁴⁻²⁵ Nāskata mā ichanāxō Niospa meka mā yoisharaito a Nios chanīmara faafoma fe a nofe yoramafori mato nikakaxō āto ōiti mēraxō shinātirofo iskakakī: “Ooa, nōri Niospa yoiai keskara nō amisma. Niospa keyokōi tāpikōia. Nōko shinā mēraxō nō afara pishta fomāpaimisfo Niospa tāpikōia. Chipō noko kāimaxoxii,” ixō shinātirofo. Nāskaxō shinātirofo Niospa meka mēstesharakōikī. Anori shinākakī ratokonō mai chachixō Epa Nios kīfitirofo iskafakakī: “Epa Niospa, mī sharafinakōia. Na mia chanīmara faafo fe mī ika keskai nōri mefe ipai,” ixō kīfitirofo.

Pablo ato yoini nō ichanāx nō afeskatiro māki

²⁶ Efe yora mīshtichi, ē mato yoipai iskafakī ē mato tāpimapai. Mā ichanāino fētsa mato fanāixotiro. Fētsari mato Niospa meka yoitiro. Fētsari Niospa Yōshi Sharaōxō meka fetsapa mato yoitiro. Fētsari Niospa Yōshi Sharaōxō a meka fetsapato mato yoiaifo mato tāpimatirofo. Nāskakē nā ē yoiai keskara asharakāfe. Nāskax mā ranā mā ōiti fepeasharatiro. ²⁷ Mā ichanāino yora ichapama a yōra mekapama meka fetsapa mekapai mekatirofo. Nāskakē fetsa mekai taetiro. Askatari fetsari chipō mekatiro. Akka meka fetsapato mato yoiaito fētsari mātō mekapa xafakīa mato tāpimatiro a mato yoiai keskara mā nikasharanō. ²⁸ Akka yōra mekapama meka fetsapato mā yoipaiyaito tsōa nikatiroma. Akka a ato tāpimatirofo ano ikafomano meka fetsapa mā ato yoitiroma. Akka mātō pexe anoax mares fisti mā mekatiro yōra mekapama Epa Nios fe.

²⁹ Mā ichanāino nā Niospa meka yoimis rafeta Niospa meka mato yoitirofo. A yoiai keskara nikakaxō nā Jesús Ifofaifāfe shinātiro iskafakakī: “Niospa Yōshi Sharaōxō noko yoi,” askayamai, “Āa shināxō noko yoirā,” ixō shinātirofo. ³⁰ Askaxō fētsa Niospa meka mato yoioaino fetsari tsoano Niospa Yōshi Sharapa shināmanaino mato yoipaikī yoitiro. Akka a taefakī yoiato tsoaxō nikatiro. ³¹ Nāskakē Niospa Yōshi Sharapa mato shināmanai keskara fētsa yoikī taefatiro fētsari chipō yoitiro. Askatari fētsari yoitiro. Nāskaifono nā ichanāfāfe keyokōichi ato nikatirofo. Nāskaxō ato ōiti fepeaxosharakani. ³² Nā Niospa meka ato yoiaito āfe shinā mēraxō shinātiro iskafakī: “Fētsari ato yoipai kiki ikax xatetiro.” ³³ Askaxō ichanāxō rafekaita ato yoiaifono tsōa ato nikasharatiro. Nāskakē āto ōiti fekaxtefatirofo. Askarakai Niospa fichipaima. Akka Niospa fichipai nā ichanāfo anoxō rafekaita ato yoiyamaino fistichi ato yoinō nikasharakōinōfo.

³⁴ Askatari afara fetsari ē mato yoisharapai. Nios Ifofaafo ichanāifo anoax xotofakefo mekatirofoma. Niospa meka yoimisto yoiaino xotofakefāfe nikakōitirofo. Mekatamaroko nā Niospa meka yoiai keskara nikasharaxikakī. Nānori taeyoi Niospa meka yoikakī kirikaki kenenifo. ³⁵ Nā ichanākaxō nikafo keskara xotofakefāfe tāpisharaxoma āto fene yōkapaikakī manayotirofo. Akka āto pexe ano nokokaxō āto fenefo yōkatirofo āto fenefāfe ato tāpimanō. Nāskakē mā ichanāino xotofakefo mekaifokai sharama.

³⁶ Akka Epa Niospa yoipaiyai keskara mato fisti taefakī tāpimanimā. Niospa meka yoimisfo matoki fisti fenifoma Niospa meka yoifekani. Fetsafori yoifekani fenifo. ³⁷ Akka fatora fētsa mā yoikī iskafatiro: “Nō Niospa meka ato yoimis. Askatari nō Niospa Yōshi Sharaōxō nā Nios Ifofaafo nō afara fetsa ato axosharatiro,” ixō mā yoikī mā tāpitiro nā ē mato kenexonai keskara nōko Ifāfe mato yoia mā anō. ³⁸ Fētsa anorima mato yoiaito nikayamakāfe. ³⁹ Nāskakē efe yora mīshtichi, nā mā ichanāi anoxō Niospa meka ato yoipaikāfe. Nā sharakōikī. Akka fētsa yōra mekapama meka fetsapa Niospa

Yōshi Sharaōxō mato yoipaiyaito xatemayamakāfe. ⁴⁰ Akka mā ichanāino fētsa taefakī yoitiro. Askatari fētsari chipo yoitiro nā yoiaino keskara mā nikasharakōinō. Mā askaino māto ōiti fekaxteima.

15

Cristo naflax anā otoni

¹⁻² Efe yora mīstichi, iskaratīa meka shara Jesúsnoa ē mato yoimis keskara ē anā mato shināmapai. Ē mato Jesúsnoa yoiaino mā chanīmara fani. Mā chanīmara faito Jesús mato chaka soaxoni mā afe ĩpaxanō. Akka ē mato yoini keskara mā kai kachikiri famisma. Akka mā kachikiri faino ēa kaxpa mato yoikerani.

³⁻⁷ Yorafāfe ea meka sharafinakōia yoiyonifo. Nāskakē ēri mato yoini iskafakī: Cristo noko nāxoni nōko chaka noko soaxoxiki. Akka Cristo tres nia maiyoni. Askata anā otoni. Mā otoax Pedroki nokoi taeni. Nāskatari chipo a aōxō tāpimisfokiri nokoni. Askatari nā chanīmara faafoki yorafā rasifokiri nokoni. Akka fisti rasi nāpaifono, akka ranāri nanifoma. Nāskatari chipo Santiagoki nōko Ifo nokoni. Askatari a aōnoa āfe meka yoimisfoki nokoni.

⁸ Akka chipokōi ekeki Jesús nokoni. Ē kai aōnoa afaa tāpiyopaonima. Akka fet-safāfe mēxotaima nikayopaonifo. Nāskakē chanīmara fakī taefanifo. Akka ē afe niyopaonima taeyoi a fetsafo ikai keskai. Ē askafiaino ea Jesús katonī chipo. Ekeki nokoxō ea yoiaino ē koshi Ifofani. ⁹ Akka ē chakafayopaoni keskara Jesús Ifofaa fetsafāfe chakafamisfoma. Akka ē afara chakafakī finayopaoni. A Jesús Ifofaafo ē ato omiskōimayopaoni. A afe yorafo ē chakafayopaonifikē Jesús ea noikī ea nīchini aōnoa ē ato yoinō. ¹⁰ Niospa ea noixō ea katonī a apaiyai keskara ē anō. Nāskakē nā ea amapaiyai keskara mē amis. Akka ea kaxpakōi katonima. Nā aōxō yonoxomisfo keskafakī ē yonoxokī finakōimis. Akka ēakōi ē yonoxomisma. Ea noikī Niospa ea katonī ē Jesús yonoxomis inō. ¹¹ Akka ē Jesúsnoa yoimis iyamai fetsafāfe mato Jesúsnoa yoimis itirofo nānori fisti nō mato yoimis. Nāskakē nā Jesúsnoa fisti nō mato yoimis keskara nikakī mā mā Jesús chanīmara faa.

Namisfo otoxikani

¹² Nō mato yoimis iskafakī: “Cristo noko naxōfinixakī mā anā otoni,” ixō nō mato yoimis. Akka, ¿afeskakī atirito mā yoikī iskafamismē? “Yora naax anā ototiro ma,” ixō mā anorima yoimis. ¹³ Akka yora naax ototirokēma Cristori otokeranima. Akka nō tāpia yora naax ototirokē nāskakē Cristo otoni. ¹⁴ Akka Cristo otoyamanikē kaxpa aōnoa nō mato yoikerana. Nāskakē kaxpakōi mā chanīmara fakerana. Akka chanīma Cristo naax otoni. ¹⁵ Akka Cristo otoyamanikē nō mato pārakerana. Akka nō mato yoimis iskafakī: “Epa Niospa Fake Jesús otofani,” ixō nō mato yoimis. Yora naax ototirokēma Epa Niospa Cristo otofakeranima. ¹⁶ A naafo otoyamaino Cristori otokeranima. ¹⁷ Cristo otoyamanikē kaxpakōi mā chanīmara fakerana. Māto chaka mato soaxokeranama. ¹⁸ Akka Cristo otoyamanikē kai nōri naax nō otokeranama. Askax nō afe nīpakeranama. ¹⁹ Nono mai anoxō niyoxō nō shinākī iskafakerana: “Ē naax Cristo otoni keskai ēri otoxii ea Niospa otofaano,” ixō nō shināfiāx Cristo otoyamanikē nāskakē kaxpa nō chanīmara fakerana. Akka Cristo otoyamanikē chanīmayamakē, “Afaa tāpiafoma,” noko fakeranafo nokoōnoa shināchakakōikeranafo.

²⁰ Akka chanīmakōi, Cristo otoi taeni. Anā naxiima. Nāskakē Cristo otonino nā chanīmara faafo nakanax otoxikani afe ipaxakakī. ²¹⁻²² Akka Adán Niospa onifakī taefani. Adán taefakī afara chakafani. Nāskakē afara chakafaax nani. Akka nā feronāfakeōnoax keyokōi nāpamisfo. Nāskarifiāi nā feronāfake

Cristoõnoax nã chanĩmara faafo ototirofo afe nĩpaxikakĩ. ²³ Cristo otoi taeni nĩpaxakĩ. Nã anã oaitĩa keyokõi afe yorafo otofaxii afe nĩpaxanõfo. ²⁴ Nãskatari nono mai anoafõ keyoxikani. Nãskatari Cristo keyokõi xanĩfofo potaxii anã xanĩfo inõfoma. Askatari niagakafãfe ãto xanĩfofori potaxii. A niagakafãfe ãto xanĩfo finakõiari potaxii. Cristo ato potano anã ato yonomapakenakafoma. Nãskaxõ Cristo Apa Nios yoikĩ iskafaxii: “Mã yorafo keyokõi ãto xanĩfo mĩ itiro. Ë anã ãto xanĩfo ikima,” ixõ Apa yoixii. ²⁵ Akka iskaratĩa Cristo nõko xanĩfo iyoa. Nã xanĩfo fetsafo a Cristo nikakaspaifo Niospa anã ato afaa imaxiima. Cristo nãmãri ato nĩchixii. Nãskatari Epa Nios xanĩfokõi ipanaka. ²⁶ Akka Niospa Satanás omiskõipakenakafo mẽra potaxii. Akka nã Satanás Adán afara chakafamanino keyokõichi nõ afara chakafaax nõ napanaka. Nãskakẽ Niospa Satanás omiskõipakenakafo mẽra potano anã tsoa nanakama. ²⁷ Nãskaxõ Niospa ãfe Fake Cristo nãmãri keyokõi ato nima. Akka mã nõ tãpia Apa Nios fisti ãfe Fake nãmã ikama nãatomãi nãmã keyokõi ato nimax. ²⁸ Keyokõi Niospa Fake nãmã ikafono Apaõxõ ato yonomatiro. Nãskaxõ ãfe Fãke Apa yoixii iskafakĩ: “Epa mĩri ea yonomatiro,” ixõ yoixii. Nã Apa yoiai keskara nikasharakõi. Nãskakẽ Apa Nios fistichi keyokõi yonomaxii ãto xanĩfo finakõimãiaxõ.

²⁹ Akka yora maotisamisma naano fẽtsa maotisaxotiro. Nãskara mã feyafamisfo. Akka yora naax otoyamanikẽkai tsõa ato maotisanoxokeranama. Tsoa otoyamanikẽ nõri ototiroma. Akka, ¿afeskai nõ maotisaxonimẽ nõ otoyamafi? Akka nõ tãpia mã nõ naax nõ anã otoxiyai. ³⁰ Akka tsoa otoyamanikẽkai ãri otokeranama. Nãskakẽ, ¿afeskai mẽxotaima Cristoõnoax mesekõi mẽra ã kafãsaimẽ ã otoyamafi? Akka ã tãpia a ã otoxiyai. Nãskakẽ mẽxotaima ã Cristoõnoax mesekõi mẽra kafãsai Cristoõnoa ato yoifofãsafai. ³¹ Nãskakẽri ã fetsafo matoõnoa yoisharamis mãmãi eõxõ nõko Ifo Jesucristo mã Ifosharafaino. Efe yora mĩshtichi, chanĩma ã mato yoi mẽxotaima Cristoõxõ ea retepaiyani. ³² Poomãnã noko pipaiyai keskara nã Efeso anoafãfe ea retepainifo, a Cristo nikakaspaiãfe. Akka Cristoõnoax ã naax ã otoyamax kaxpa ã aõnoax nakerana. Askatari ã ato Cristo Ifofamano nakanax tsoa otoyamaino kaxpa ã ato Cristo Ifofamakerana. Nõ naax anã otoyamafixixakĩ nã nõ apaiyai keskara nõ anõkãfe. Nãskakẽ fetsafãfe yoikakĩ iskafakani: “Nõ nayoxoma nõ piyanã nõ ayayoi inimayanã. Nõ Nios shinãtama nã nõ apaiyai keskara nõ ayoi,” ixõ shinãkani anorima. Akka nõ naax nõ anã otoxii. Nãskakĩ nõ nayoxoma Niospa noko amapaiyai keskara nõ anõkãfe.

³³ Niosnoa yora chakafãfe mato pãramisfo. ato fe rafeyamakãfe. Yora chakafo fe mã rafeaito matori afara chakafamatirofoki. ³⁴ A mã anorima shinãmis anã shinãyamakãfe. Chakafakĩ xatekãfe. Atiritokai mã Nios tãpisharama. Nãskax mã rãfipaitiro.

Nõ naax anã nõ otoiã nõko yora fetsa keskara ixii

³⁵ Akka yoikĩ iskafakani: “¿Afeskaxõ Niospa naafõ otofaxiimẽ? ¿Anã nõ otonõ afe keskara yoraya noko imaimẽ?” ixõ yoikani. Anori yoikakĩ afaa shinãkanima. Akka shara shinãsharakakĩ tãpitirofo. ³⁶ Nõ ifi exe fanano ãfe xaka payokometiro. Akka ãfe exe oke mẽranoa pishta payokometiroma chipo foaitiro. Maiax ãfe exe xaka naamax ãfe exe pishta foaitiroma. ³⁷ Akka nõ afara fanakĩ nõ ãfe kayafoya fanatiroma. ãfe exe fisti nõ fanatiro. Mã ãfe xaka payokomeaino ãfe exe foaitiro. Nãskax mã foikax anã ãfe exe keskara itiro. Fetsa keskara itiro. ³⁸ Nã ifi exe nõ fanano Niospa foaimasharatiro. Nã apaiyai keskafakĩ fanafõ fetsa fetsatapafõ fai.

³⁹ Akka nõko yorari yoinãto yora keskarama. Nõko yora fetsa keskara. Yoinãnã fetsa keskarafono peyafonãri fetsa keskarafõ. Foenãri fetsa

keskarafo. Akka nã yora fisti keskara Niospa noko onifanima, fetsa fet-satapafo Niospa noko onifani. ⁴⁰ Akka nõko mai anoafãfe ãto yorafo fetsa keskarafo. Askatari Epa Nios ari anoafori nai mẽranoafãfe ãto yorafori fetsa keskarafo. Keyokõi sharaflax askarafoma. ⁴¹ Akka xini ikaino oxe ikaino fishifo ikaino nã yora fisti keskarama fetsa keskarafo. Nãfo sharaflax askarafoma.

⁴² Nãskarifiã yora naino ãfe yora payokometiro. Anã nõ otoaxkai nõko yora payokomenakama. Nãskara shara nõ ipanaka anãkai nõ nanakama. ⁴³ Nõko yora maia anoax chakakõi ixii. Akka nõ otoax sharakõi nõ ipanaka. Nõ nono mai ano niyoax nõ iramanapakeax nõ natiro. Nõ anã otoaxkai nõ anã nanakama, mitsisipa shara nõ ipanaka. ⁴⁴ Nõ naano noko maifafono nõko yora payokomei. Akka nõ otoano Niospa noko nimaxii afe ìpaxanõfo. Akka nõ mai ano niyoax nõ natiro. Akka mã nõ naax anã nõ otoax nõko yora fetsa keskara ixii. Nõ anã nanakama. ⁴⁵ Niospa meka yõra kenekĩ iskafani: “Feronãfake Adán Niospa onifakĩ taefani. Onifaxõ xãka ikai fani,” ixõ yõra kirikaki keneni. Akka Cristori Adán keskara feronãfake. Feronãfakekõixõ noko nimapakenaka. Nõ naax anã otoax nõ anã natiro. ⁴⁶ Niospa feronãfake Adán onifakĩ taefani. Chipa Cristori kãini noko nimapakexakĩ. ⁴⁷ Niospa nã feronãfake Adán onifakĩ taefani. Mai yorafaxõ onifani. Akka Cristo nai mẽranoax nokoki ftoni. Tsõakai Cristo onifanima. ⁴⁸ Akka nono mai anoax nõ kãiax nõko yora Adán yora keskara. Nõ Jesús Ifofaax nã keskara nõ ixii. ⁴⁹ Nõ nono mai anoax fake kãini. Nãskax nõ Adán keskarakõi. Askatari nõ Niospa yora ikax nõ Jesucristo keskarakõi ixii.

⁵⁰ Efe yora mĩshtichi, ã mato yoinõ nõ afeskax iximãkai. Nõ iskaratĩa namiya. Askatari nõ imiya. Nãskara yorayax Nios fe nõ ipanakama. Akka nõko yora natiro nõ anã otoxixakĩ. Nõ anã otoax nõko yora fetsa keskara ixii. Nãskakẽ nõ anã nanakama. ⁵¹ Tsõakai nikayomisma na meka shara ã mato yoi. Tãpipaikĩ ea nikasharakãfe. Akka nõkai atiri naima. Askaflix nõ keyokõi fetsa keskara iki fetsexii. ⁵² Jesús anã oaino ãfe ãjirinĩ ãfe maneti maneaino Jesús chanĩmara faafo, a nayoamafo, fetsa keskara ìtaxikani. Fet-soitanai keskarataxikani fetsa keskara ìtaxikani. Askatari Jesús chanĩmara faax namisfori otorisataxikani. Nãskakẽ keyokõi Jesús chanĩmara faafo tii fetsa keskara ixikani. Askax anã nanakafoma. ⁵³ Nõ iskaratĩa naino nõko yora payokometiro. Askafiano Niospa nõko yora noko fetsafaxoxii nõ anã nanõma, nõ afe nĩpaxanõ. ⁵⁴ Nãnori Niospa meka yoikakĩ kirika kenenifo. Nã yoinifo keskara chanĩmakõi ixii. Iskafakakĩ kirika kenenifo yoikakĩ: “Aicho. Anãkai Niospa yorafo nanakama. Cristoõnoax nõ afe isharapakenakaki,” ixõ kirika kenenifo. ⁵⁵ Askatari kenenifo iskafakĩ: “Anãkai afanã noko namatiroma. Anãkai nõ nai omiskõinakama,” ixõ kirika kenenifo. ⁵⁶ Nõ afara chakafamisnoax nõ nai nõ omiskõitiro. Nãskakẽ nã Moisés noko yoinioxõ nõ tãpitiro afara chakafaax nõ natiro. Naax nõ omiskõixii. ⁵⁷ Akka Jesucristo noko nãxoni noko chaka soaxoxiki. Nãskakẽ nõ Jesucristo Ifofaax nõ nafilax nõ anã otoax nõ anã nanakama. Nõ afe nĩpanaka. Nãskakẽ nõ Epa Nios aicho fai.

⁵⁸ Akka efe yora mĩshtichi, afara fetsa shinãyamakãfe. Niospa noko ima-paiyai keskara nã fisti shinãsharakãfe. Jesús Ifofasharakãfe. Nõko Ifo Jesús yonoxosharafafãikãfe. Mã mã tãpia nõko Ifoõxõ nõ yonoai kaxpa nõ yonomisma, nõko Ifomãi noko amakẽ. Nãskakẽ nõ aõxõ ato axosharatiro nõ kaxpa ato axõima.

16

Nã Nios Ifofaafãfe kori ichafaxõ Nios Ifofafo fetsafo fomani

¹ Iskaratīa mā ea yōkaita, afara fetsa kirikaki kenexō ē mato yoi. Nios Ifofaafo Jerusalén anoafō afaamais. Ato noikī mā ato afara fomatiro. Akka nā Nios Ifofaafo Galacia anoafō ē ato yoia keskara ē matori yoipai nā afaamaisfo afarafo mā ato ināsharanō. ² Nomīkotīa ichanāi mā kori ichafaxō chipo Jerusalén anoa mā ato fomatiro. Yonoxō kori fīta atiri mā ato inātiro. Akka mā kori ichapama fixō ichapamari mā ato inātiro. Akka mā ichapa fixō ichapari ato inākāfe. Nomīkotīa ichanāi mā kori ichafatiro, ea manakima kori ichafayokāfe. Nā ē matoki nokoaitīa mā anā kori meketiroma. Nā kori mā ichafaa nā Jerusalén anoafō afaamaisfo mā ato fomatiro mē Corinto ano matoki oano. ³ Nāskano feronāfake sharakōifo katokāfe afāfe nā afaamaisfo ato kori foxotanōfo Jerusalén anoafō. Nāskatari ē Corinto ano nokoxō Jerusalén anoafō ē kirika kenexō ē ato fomanō. Nā feronāfake sharakōifāfe ato foxotanōfo. Akka nā feronāfakefāfe nofeta Jesús Ifofaafo. Nāskakē ato ifisharakāfe ixō ē kirika kenei nā feronāfakefo sharakōifāfe foxonōfo Jerusalén anoxō Jesús Ifofaafāfe ato tāpinōfo. ⁴ Niospa ea nīchipaiyaino nā feronāfakefo mā katoa efe fotirofo.

Pablo Corinto ano kapaikī ato yoini

⁵ Ē Macedonia finōfainikai ē matoki Corinto ano nokoikai. ⁶ Ētsa, ē ano mato fe samaraka pishtayotiro rakikīa. Askayamai ē mato feta mechaka fisti finōyotiro rakikīa. Nāskakē ē matoki nokoaino mā ea axosharayotiro. Askatari mē kaino mā ea nīchitiro ē kasharatanō. ⁷ Ēkai mato finōfaipaima. Niospa ea nētefayopaiyaino ē mato ano nēteyotiro.

⁸ Askafīax ē nono Efeso ano iyoi nā nōko fista āfe ane Pentecostés ikaitīa. ⁹ Nonoxō yorafāfe nōko Ifoōnoa nikapaikani. Nāskakē ē nonoxō nōko Ifoōnoa ē ato yoisharayoi chanīmara fanōfo. Ē nōko Ifoōnoa ato yoifiaito atirifāfe ea xatemapaikani ē Jesúsnoa yoiyamanō.

¹⁰ Akka ē nōko Ifo yonoxomis keskafakī Timoteori nōko Ifo yonoxomis. Nāskakē matoki Timoteo nokoaino kexesharakāfe akiki inimayanā. ¹¹ Nāskakē, “Mī afaamara,” fayamakāfe. Nāskax mato anoax ekeki oaino nīchisharakāfe inimayanā ekeki nokonō. Nios Ifofaa fetsafo fe ekeki nokoyonō ē anā ato fe rafesharanō.

¹² Askatari iskaratīa nofe yora Apolosōnoa ē mato yoi. Ē Apolos yoia iskafakī: “Corinto anoafō ōiyotāfe,” ē faito ea yoia iskafakī: “Ē iskaratīa kayotiroma. Niospa ea nīchipaiyaitīa ē katiro,” ixō ea yoia.

Pablo mā mekai xatekī Corinto anoafō ato meka fomani

¹³ Jesús shināfafāikāfe chakafakakīma. Jesús Ifofasharakāfe. Jesús chanīmara faax afara afeskarafiaito rateyamakāfe. Kachikirifayamakāfe. ¹⁴ Afarafo mā akai keskara Nios yafi yorafo noikī axosharakāfe.

¹⁵⁻¹⁶ Estéfanas afe yorafo fe Acaya ano ixō nānoxō Jesús chanīmara fakī taefanifo. Mā mā ato ōimiskī. Mā mā tāpia nāfāfe Nios Ifofaafo sharafamisfo. Nā keskarafo nikasharakāfe. Nā ato feta yonoaifori nikasharakāfe.

¹⁷ Ē inimasharakōi Estéfanas, Fortunato, Acaicori afo ekeki nokoafono. Akka mā ea axopaiyai keskara nāfāfe mā ea axōafō. Mā ea axotiroma mā chaikōi ika. ¹⁸ Nā tiito ea inimamamisfo. Mato inimamamisfo keskafakī eari inimamamisfo. Nāskakē atoōnoa yoisharakāfe.

¹⁹ Nā nōko Ifo chanīmara famisfāfe Asia anoafāfe mato yoisharapaikani. Aquila feta āfe āfi Priscila mato yoisharapaikani. Mato shinākōikani. Āto peze mēranoax ato fe ichanāmisfāferi mato yoisharapaikani. ²⁰ Keyokōi nōko Ifo chanīmara faafāfe nono efe ikaxō mato yoisharapaikani. Nāskakēri mā ranā yoinōnāsharakāfe.

²¹ Ēfi Pablōki mẽ mekai xatekĩ meka rafes ě mato kenexonõ. Akka taefakĩ nofe yora Sóstenes ea kirika kenexona. Akka iskaratĩa ěkõi kirika mato kenexoni mã tãpinõ.

²² Fatotora nõko Ifo noiyamaino Niospa omiskõimapainõ omiskõipakenakafo mẽra potakĩ.

Nõko Ifo Jesús chaima nokopainõ.

²³ Nõko Ifo Jesucristo mato noikĩ mato inimamasharakõinõ.

²⁴ Ē nõko Ifo Jesucristoõxõ keyokõi ě mato noi. Nã tii.

Pablo Corinto Anoafu Afianã Kirika Kenexõ Fomani

Pablo Corinto anoafu yoisharani

¹ Ëfe yora mĩshtichi, ěkĩa Pablo. Ë kirika kenexõ mato fomai mã tâpinõ. Nofeta Jesús Ifofamis Timoteo feta ě mato kirika kenexõ fomai. Epa Niospa ea katopaiyaito Cristo Jesús ea katonĩ afe meka ě mato yoifofãfõfãinõ.

Nios chanĩmara faafo Corinto anoafu, Acaya mai anoafori ě mato keyokõĩ yoisharai. ² Ë nõko Nios mato kĩfixomis iskafakĩ: “Epa Niospa, nõko Ifo Jesús feta ato noikõikĩ ãto õiti inimamasharaxõfe. Askatari ato shara fafe,” ixõ ě matoõnoa yoimis.

Pablo omiskõini

³⁻⁴ Nõ Epa Nios yoisharanõ iskafakĩ: “Epa Niospa, mĩ noko sharafa fafãfãini. Mĩ sharafinakõia. ¡Aicho!” ixõ nõ Epa Nios yoinõ. Nãfi nõko Ifo Jesucristo afe Apaki. Nãatori noko noisharakõĩ. Askatari nõ omiskõiaito noko inimamatiro. Akka nã nõ meemis keskara mei, fetsa omiskõiaito nõ inimamatiro, nã Epa Niospa nõ omiskõiaito noko inimamamis keskafakĩ. ⁵ Cristo omiskõimakĩfinakõinifo. Nãskakẽri nõri Cristoõnoax omiskõikõĩ. Akka Cristo omiskõiaito Niospa axosharakõini. Nãskakẽ Cristoõxori nokori Niospa axosharakõĩ. ⁶ Akka nõ Niospa meka mato yoi nõ omiskõiaito mã noko nikakõixõ mã nõko Ifo Jesús chanĩmara faax mã afe isharakõitiro. Nãskax mã inimakõitiro. Akka nõ mato yoi nõ omiskõifiaito nõko õiti Epa Niospa noko inimamaxomis. Akka mã mã noko õimis nõ omiskõiaito Epa Niospa noko axosharaito. Nãskarifiãĩ mãri omiskõiaito Epa Niospa matori axosharakõixii mã tenesharakõinõ. ⁷ Mã nõ tâpia nõ omiskõiaĩ keskai mãri nofe omiskõiaito Epa Niospa nõko õiti inimama keskafakĩ matori inimamasharai.

⁸⁻⁹ Efe yora mĩshtichi, Asia mai anoax nõ omiskõita ě mato yoi mã tâpinõ. Nõ omiskõifinakõita tenetiroma mei nai keskarakõĩ nõ meita. Nãskakẽ nõ tâpitiro nãskara Epa Niospa noko tâpimana nõa nõ ifimetrioma nõ omiskõiyamanõ. Epa Nios fistichi noko ifitiro. Akka nõ omiskõiaino nõ naano, nãatofi yorafo otofatirokĩ, ixõ nõko shinã mẽraxõ nõ shinãita. ¹⁰⁻¹¹ Akka nõ fãsi omiskõĩ nakerafiaino Epa Niospa noko ifita. Anã afetiãara noko ifixii. Askatari nõ chanĩmara fakõini nokomãĩ ifitaifamiskẽ, mãmãĩ noko Epa Nios kĩfixomiskẽ. Mã noko askafaino nã Nios chanĩmara faa fetsafãfe shinãkĩ iskafaxikani: “Aicho Epa Niospa, mĩ Pablo yafi afe rafemisfo mĩ ato ifisharakõia. Mĩ fãsi sharakõĩ,” ixõ yora ichapafãfe yoixikani.

Afeskai Pablo kanimamẽ Corinto ano

¹² Nã nõ fakira kafãasai ariax nõ isharakõimis, nõ afaa chakafamisma. Niospa fichipaiyai keskara nõ amis. Askatari mato mẽranoax nõ isharaifinakõimis. Nãskakẽ nõ shinãchakaima nõ inimasharakõĩ. Akka nõkai nõ mato pãramisma, chanĩma fisti nõ mato yoimis. Niospa noko noikĩ noko shinãmanaino nõ isharanõ mato mẽranoax. Askatari nã nõ fakira kafãasai ariax nõ isharakõimis. ¹³⁻¹⁴ Ë mato kirika kenexõ manamani tâpitiropinĩ shara faxõ fekaxma mã tâpitiro xafakĩã sharakõĩ. Nãskafekẽ atirifãfe tâpisharafoma ě afe keskaramãki. Nãskafixõ mã tâpisharai, nãskara shara ě fichipai. Nãskakẽ nõko Ifo Jesús anã oaino mã nokoki inimasharaxii, nõri matoki inimasharanõ.

¹⁵⁻¹⁶ Nãskakẽ ě shinã ě Macedonia ano kaitĩa ě mato ano mãpefaixii anã ě mato yoisharaxiki mãto õiti mẽra mã inimanõ. Askata nã Macedonia anoax ě oaitĩa anã ě mato ano mãpetiro mato fe iyoxiki. Chipõ Judea ano ea nĩchitirofo,

ixō ē shināni. ¹⁷ Nānori ē shināfiāx ē mato ari ē kayoikaima. Akka mā iskafakī shināiraka: “Pablo ē kaira ifiāx kaima, ¿afeskakī noko pāramē?” ixō mā shināiraka. Akka ēkai ōiti ranāyama fetsa yoikī, fetsa yoikī ē fapanā. Nā yōra Jesús Ifofaamato shināi keskara ē shināima. ¹⁸ Nā Niospa noko pāramisma keskafakī nōrikai mato pāramisma. Nāskakē tāpisharakōia nō mato pāramisma. ¹⁹ Akka Timoteo ikaino Silvano ikaino ē ikaino Jesucristo Niospa Fakeōnoa nō mato yoimis. Jesucristo mekakai rafema, āfe meka mēstekōi. Chanīma fisti. ²⁰ Epa Niospa noko yoioya keskara keyokōi Cristo mā noko axomis. Nāskakē nō keyokōichi yoimis iskafakī: “Epa Niosi, mī fāsi sharakōi. Jesúsxō keyokōi mī afama mīshti famis nā mī yoioya keskafakī. Nāskakē Jesús aneōxō nō mia aicho fai,” ixō nō yoimis. ²¹ Askatari Epa Niospa mato yafi noko Jesús Ifosharakōifama. Nāskatari noko katoxō noko nīchini āfe meka yoimis nō inō. ²² Akka fētsa āfe afarafo marakka fatiro fetsafāfe tāpinōfo āfenākē. Nāskafakīri Epa Niospa āfe Yōshi Shara nō mēra nanea aōxō nō tāpinō nō afe yoraxō. Nāskakē nō tāpitiro afara fetsa nā noko yoioya keskara chanīmakōi noko ināxii.

²³ Ē mato ari kaira ixō ē shināfiitaxakī ē kaama. Epa Niospa ea tāpikōia ē chanīkēma. Ē mato ari kakerana. Nāskafīax ē kaama ē mato shinākī. Ē ato ari kaxō ē ato fasi yoikī ē ato shināmitsamatirora ikax nāskax ē mato ari kaama. ²⁴ Ē mato askafatama ēroko mato inimamapaisharai. Ēkai māto ifo ipaima. Akka Jesús fisti nōko Ifo. Akka mā mā Jesús chanīmara faxō mā mā Jesús Ifo sharakōifai. Nāskakē ē mato feta Jesús yonoxopai mā inimai finakōinō, askatari mā Jesús Ifo sharakōifanō.

2

¹⁻² Nāskakē ēfe shinā mēraxō shinākī ē iskafayamea: “Ē Corinto ari kapaifi ē kaima. Akka ē kaxō ē ato yoikī iskafapaima: ‘A mā afara chakafamis keskara xatekāfe,’ ixō ē ato yoikī ē ato inimamatiroma. Askakimaroko ē ato shināmitsamatiro. Ē ato shināmitsamanaino, ¿tsōa ea inimamatiromē? Akka ares fisti ea inimamatirofo,” ixō ē shināyamea. ³ Nāskakē ē mato kirika kenexona, mato ari kakīma. Akka ē shinā, “Ē ato ari kaxō ē ato iskafaino: ‘Mā isharakōiyama māto chaka xatekāfe,’ ē ato faino shināmitsakōitirofo,” ixō ē shināyamea. Akka mā ea nikayamaino ēri shināmitsakōitiro. Akka mā anā Nios nikakī anā isharakōiaino, mā ea inimamasharakōitiro. Akka mē tāpikōia ē inimakōiaino māri inimakōitiro. ⁴ Ē mato kenexokī ē meyamea ēfe ōiti shināmitsakōiaito oiayanā. Ēkai mato shināmitsamapainima. Askatamaroko ē mato kenexoni a ē mato noikōiai keskara mā tāpinō.

Fētsa noko chakafaito nō rae fatiro

⁵ Akka nā feronāfake fētsa ea chakafakī mekakakī ea fisti shināchakamanama, nā mā Nios Ifofaafari keyokōi mato shināchakamana. Nāskakē noko keyokōi chakafakī mekakaa. Noko askafafiaino ēkai na feronāfake omiskōimaki finapaima. ⁶ Akka mā ranārīto omiskōimanakī nāskanōkāfe. ⁷ Akka a mā aka keskafakī anā askafakīma rae fakāfe. Nāskaxō yoisharakāfe inima-masharaxikakī anā omiskōinōma. Akka mā askafayamaino āfe shinā mēra shināmitsakōitiro anā shināsharatiroma anā Nios Ifofapaima. ⁸ Nāskakē ē mato yoiai keskafakī ea nikasharakāfe. “Nō mia noikōi. Mī anā nofe isharakōitiro,” ixō yoikāfe tāpinō. ⁹ Ē mato kirika kenexō manamayamea tāpipaikī mā mēxotaima ea nikakōimākai. ¹⁰ Mā fetsa rafakē ēri nā rafatiro. Fētsa ea chakafaito ē mato shinākī Cristo ea ōiaino ēri nā rafatiro. ¹¹ Nō fetsa rafasharakōiaino Satanás noko feparatiroma. Nō tāpisharakōia Satanás noko kexepaikōi. Akka a Nios Ifofaafō isharayamaino, rafayamaino, a Nios

Ifofaafoma tiito chakafakī mekafatirofo Satanás fichipaiyai keskara. Akka nō fetsa raefaino Satanás noko afeskafatiroma.

Pablo pexe rasi Troas ano nokoax inimanima

¹² Akka ē mato eōnoa tāpimapai. Ē pexe rasi Troas ano kani meka shara Cristoōnoa ato yoikai. Cristoōnoa nikapaikōinifo. Nāskano nōko Ifāfe ea atoki nīchini ē āfe meka ato yoinō. ¹³ Akka ē shināni nofe yora Tito Troas ano ē fichikaira ixō. Akka fichiyamax ē inimanima. Nāskaxō ē fāsi shinākōini. Nāskata, “Mē kai,” ixō Troas anoafō nā nōko Ifo chanīmara faafo ē ato yoita ē oni nono Macedonia ano.

Cristoōxō nō keyokōi finōtiro

¹⁴ Aicho Epa Niosi, mī Cristo Jesús afara chaka potamana anā afeskafanōma. Nāskakē nōri afe inimai nōmāi aōxō āfe meka yoikatsaxakī yorafāfe tāpinōfo. Akka pirofomā nakas shara nachikomea nō keyokōichi xetetiro keskafaki, nāskafakīri Niospa noko nīchiano nokoōxō keyokōichi tāpitirofo āfe meka shara. ¹⁵ Akka nō meka shara Cristoōnoa yoimis keyokōichi nikanōfo. Akka atirifāfe chanīmara fakōikani, Nios fe ipaxakakī. Akka atirifāfe nikasharakanamax Jesús Ifofakanamax nakanax omiskōipakenakafo. ¹⁶ Akka na meka shara nikaifoma mā nakanax omiskōipakenakafo mēra fokanax omiskōixikani, nāfāfemāi na meka shara nā nō afara pisikōi xetemis keskara xetekatsaxakakī. Akka nā meka shara nikaifāfe nā nō pirofomā nakas shara xetemis keskara xetemisfo. Nāskakanax Nios fe nīpanakafo. Akka, ħtsōa Niospa meka Jesúsnoa yoisharatiromē? Akka tsōa atiroma. ¹⁷ Akka fetsafāfe Niospa meka ato yoikakī kori fipaikani āa ato pārakaxō. Nō mato Niospa meka yoikai noko kopifakāfe ikaxō āa ato pārakaxō ato kori fīaifo keskafakī nōkai mato askafamisma. Mā nō tāpia nō āfe meka yoiaito Epa Niospa noko ōisharakōi, nāatomāi noko nīchinixakī. Āfe meka yoikai nō kaxetiroma, Niospamāi noko ōiaino nōmāi Cristo āfe inaxō.

3

Jesús ato meka fena yoimis Pablo ato yoini

¹ Askara nō yoiaino, mā shināiraka nā nōa nō yoimesharai keskara. Maa. Nōa nō yoimesharaima. Mā chaka shināi. Akka fētsa yonopaiyaito fētsari fetsa kirika kene fomaxotiro fetsafāfe ōinōfo yonosharamiskē. Akka, ħmā shināimē fetsafāfe nokoōnoa kirika kenenōfo noko yoisharakakī nō yonosharamiskē Niospa meka yoikī? Akka nō askara fichipaima. Akka, ħmā shināimē nō mato kirika kene yōkai to kirika kenexō mā noko inānō nōri fetsafo inānō noko tāpinōfo nō mato mēraxō yoisharamiskē? Maa. Askara nō fichipaima. ² Akka nā kirika kenea keskara nō fichipaima māmāi nā kirika kenea keskarakē, fetsafāfe mato ōitirofo māmāi Nios Ifofasharakē. Mato ōikakī nokori tāpitirofo nō Niosxō yonosharamiskē. ³ Akka mā mā isharakōia anā mā imis keskarama a Niospa fichipaiyai keskaraino. Nā noko ōimana Cristo māto ōiti fetsafaa fena keskara mā inō. Nāskakē mā kirika kenea keskara. Mato ōixō fetsafāfe tāpitirofo nō Niospa meka mato tāpimasharamiskē. Akka na kirika kene lapi si kenemeama, askatari tokiri sapaki kenemeama; Epa Nios nīpanakato āfe Yōshi Sharapa mato imashara mā isharakōinō.

⁴ Iskafakī nō yoia, mā nōmāi tāpixō Niospamāi noko nīchinikē nō āfe meka mato yoinō Cristo āfe sharaōxō nō mato yoisharamis. ⁵ Akka nōa nō afara shara nō mato yoitiro ma isharanō. Askatamaroko Epa Niospa āfe Yōshi Sharaōxō nō fetsafo tāpimatiro isharanōfo. ⁶ Niospa Yōshi Sharaōxō na meka fena nō ato yoimis Jesúsnoa nō Nios fe nīpaxatiro. Akka a Moisés kenenioōnoa nō ato tāpimamisma, sharafiano keyokairoko nikanōfo nō ato yoipanā. Akka a

Moisés yoini keskara keyokōi nikakanamax Nios ika ano katiroma. Askatamaroko Niospa Yōshi Sharapa noko imasharapakenaka Nios ika ano nōmāi Cristo Ifofakē.

⁷⁻⁸ Epa Niospa nōko xinifo israelifo nā ato yoipaiyai keskara ato yoini nikanōfo. Tokiri pāraiki kenexō ato yoini. Epa Niospa Moisés tokiri kene ināino luz keskara fafekōini. Nāskatari Moisés femānā fafekōini. Nāskakē mā Moisés māchi keya ariax fotokē nōko xini israelifāfe ōitiroma inifo. Nāskax fafekōifiax fenāmāshta matapakeni. Akka Epa Niospa Moisés yoini keskara sharakōifixō noko imapakexatiroma. Sharakōifixō, akka iskaratīa Niospa Yōshi Sharapa noko yoiai keskara nāroko sharafinakōia. ⁹ Akka nā Moisés yoini keskara sharafiano nikakanamax nakanax Nios ika ano katiroma. Akka iskaratīa Niospa āfe Fake Jesúsxō noko chaka soaxotiro nō afe isharapakexanō. Nā sharafinakōia afaa fetsakai askarama. ¹⁰ Epa Niospa Moisés yoini keskara sharafiax, akka Epa Niospa Jesúsxō noko axoni keskara nāroko sharafinakōia. ¹¹ Niospa meka shara Moisés fiaino fafesharakōini. Mā fiax āfe femānā fafesharakōini, Moisés. Āfe femānā fafesharakōifiax fenāmāshta matapakeni. Epa Niospa Moisés yoini keskara sharafiax, akka Epa Niospa Jesúsxō noko axoni keskara keyonakama nāroko sharafinakōia.

¹² Nāskakē mā nō tāpikōia Epa Niospa Jesúsnoa yoini keskara keyonakama. Nāskakē ranotama nō Jesúsnoa yorafo yoitiro. ¹³ Nōkai Moisés keskarama. Moisés āfe femānā fafeaino samapa feopomeni israelifāfe ōinōfoma nāskax fenāmāshta matapakeni. ¹⁴ Akka nōko xinifāfe nikasharapaonifoma, āto ōitimāi fēstokōi keskarakē. Iskaratīari nōko kaifo nāskarafori. A Moisés ato yoini keskara ato kirika anexonaifono ato nikakaspakanax. Nāskakaxō Epa Niospa meka tāpisharatirofoma. Akka Cristo fistichi ato shināmatiro nā ōiti fēstoā keskara inōfoma. ¹⁵ Iskaratīari nā Moisés yoini keskara ato anexonaifono āto ōitimāi fēstokōiano shināsharapanāfāfe. ¹⁶ Askafikaxō iskaratīa a Moisés keneni keskara anā shinākaxoma nōko Ifo chanīmara fakaxō aōnoa fisti shinātirofo. Nāskakē anā feopomea keskara ixikakima. ¹⁷ Niospa Yōshi Shara nō Ifofaax nofe ikaino afaa fetsa nōko ifo itiro, noko ikixiki. ¹⁸ Akka nōko ōitikai fēstoā keskarama. Nōko Ifāfe āfe meka nō nikasharakōitiro. Āfe Yōshi Sharapa noko ikixō noko fetsafatiro a keskara shara nō inō. Akka mā noko fetsafaano nō sharakōi ixii. Nāskakē fetsafāfe noko ōikakī tāpitirofo nō shara isharakē. Nā feisiti xinī chaxaino fafeai keskara noko ōikakī nōko Ifo Jesús tāpitirofo afe keskaramāki.

4

¹ Akka Epa Niospa noko shinākī noko yoini āfe meka shara Jesucristoōnoa nō yoifofāfofāinō. Nāskakē nō shināchakaima, nō Niospa meka yoiki xateima. ² Nāskakē nō afaa one chakafamisma rāfixikima, a afara one chakafamisfo keskafakī. Askatari nō toa pāramisma. Askatari nōa nō Niospa meka fetsafaxō yoimisma. Akka Niospa tāpia meka chanīma fisti nō yoimiskē. Nāskakē mā nokoki inimasharapainō, nā nō afarafo shara faito ōi. ³ Na meka shara Jesúsnoa nō yoimis nikakaspafono nā onea keskara. Nāskakē tāpikanamax oa fēstoā keskarafō. Nāskakanax omiskōipakenakafō. ⁴ Nāfofi nā niafaka chaka āto ifoxō ato yoimis. Nāskaxō nā ōiti fēstoā keskara ato faano na meka shara Jesúsnoa tāpitirofoma. Nā yora fēxō luz ota sharafiano ōitiroma keskarafō. Nāskarakaxori Jesús finakōia tāpitirofoma. Nāskatari tsōa tāpitiroma Jesús Apa keskara sharafinakōifiano. ⁵ Akka nōkai nōa nō nokoōnoa nō mato yoimisma mā noko ifofanō. Askatamaroko nō mato yoimis Jesucristo mātō Ifo inō. Nōko Ifokē aō noixō nō yonoxosharapai. Akka nō mato axosharapai Cristoōnoa mā tāpinō. ⁶ Niospa pena onifayoxoma fakishkē yoini pena inō.

Nāskarari nõ Jesús Ifofayamax nõko õiti nã fakish keskara chakakõi ipaoni. Akka Niospa Jesucristoõxõ nõko õiti mēra noko chaxamashara aõxõ nõ tãpinõ afe keskara sharakõimãki.

Pablo yoini nõ Jesús chanĩmara faax nõ isharatiro

⁷ Akka nõ afaayamafekē Niospa ãfe sharakõi noko mēra nanea nõ ãfe meka shara Jesúsnoa ato yoinõ. Akka nã kesho noko keskarari akai afaama. Samama moshitiro. Moshifitirokē a mēra afara sharakõi nõ nanetiro. Nāskarifiã nõ afaayamafiano Jesús nofe rafea. Nāskakē yorafãfe tãpitirofo Niospa Yõshi Shara nõmēra nanea. ⁸ Nã nõ imis keskara iskaratĩã ē mato yoinõ mã tãpinõ. Noko chakafafiakakĩ noko xatemakanima. Nāskafixõ nõ afeskaimēti ixõ, nõ shinãchakafikĩ mã nõ tãpia Epa Niospamã nõ noko axosharafafainaito. ⁹ Noko noikaspakakĩ noko chakafapaimisfo. Nāskakaxõ nõ chĩfafofãsafamisfo. Noko askafafiaifono Epa Niospa nõ potaima. Nāskakatari nõ retepaikakĩ nõ tsefeya fafiafono Epa Niospa nõ kexesharamis nõ nayamanõ. ¹⁰ Jesús niyoano retepaipañifo keskafakĩ nokori nāskari fakani retepaikakĩ. Noko retepaifiaifono nõko Ifo Jesús nõ kexesharai nõ retenõfoma. Nāskakē yorafãfe tãpitirofo mã Jesús nafianixakĩ anã otoax nikē. ¹¹ Nõ Jesús yonoxonaito mēxotaima nõ retepaikani. Akka nõ retepaifiaifono nõko Ifo Jesús nõ kexesharai nõ reteyamanõfo. Akka nõa nõ ifimetiroma nayamaxiki. Nāskakē tãpitirofo mã Jesús nafianixakĩ anã otoax nofe ikē. ¹² Nāskakē Jesúsnoa nõ mato yoimis fetsafãfe nõ retepaifiaifono mã chanĩmara faax mã afe ipaxanõ.

¹³ Akka Epa Niospa meka kirika ano yõra keneni iskafakĩ: “È Epa Nios chanĩmara fakõini. Nāskakē Niosnoa ē ato yoi,” ixõ kirikaki Niospa meka keneni yõra. Nāskarifiãkĩ nõri Niospa meka chanĩmara fakõixõ nõ mato yoi. ¹⁴ Akka mã nõ tãpia nõko Ifo Jesús mã nafiakē Èpa Niospa anã õtofani afe ipaxanõ. Nāskakē Apa Jesús ofofani keskafakĩ mato yafi nokori ofofaxii nõ afe ipaxanõ. ¹⁵ Akka nõ omiskõikõi mato Epa Niospa meka yoi mã ãfe meka chanĩmara fakõinõ. Nāskakē yora ichapafãferi Epa Nios nikakõikaxõ, “Aicho, Epa Nios, mĩ fãsi sharakõi,” faxinõfo.

¹⁶ Nāskakē nõ omiskõifikĩ nõ shinãchakaima. Nõko Ifokai nõ kachikiri faima. Akka nõko yorari anã kerexma nõ omiskõiaino. Askafixõ nõko shinã mēra mēxotaima nõ kerex fafãfãini. ¹⁷ Akka a nõ niyoax nõ omiskõiyoi akai afaama, samamashta keyoi. Akka nõ Jesúsnoax omiskõiaito a nõko sharakõi imai a keskarakai tsõa õiyomisma. Nãfori keyonakama. ¹⁸ Akka nã nõ omiskõiai shinãtamaroko nã nõ õiyomisma nõ shinãi. Nios ika anoxõ nõ inimamapakenaka. Nãa nõ shinãi. Akka nã afaranã nõ omiskõimanai samama keyoxii. Akka a Niospa nõ chipo imai keskara keyonakama.

5

¹ Akka ē mato yoinõ nikakapo. Pexe xiniãx pão ikax keyotiro. Nāskarifiã nõ naino nõko yora keyotiro anã nõko fero mēsho nõ mēra inõma. Akka tsõakai nõko yora fenafaxotiro. Epa Nios fistichi nõko yora fena onifaxotiro. Akka mã nõ nai mēra kaax nõko yora fena shara ixii. Epa Niospa nõko yora fena shara faxõano a anã keyonakama. ² Akka nõ fekaxtemis nõko yora fekaxkõime. Nõko yora fenashara fapai nai mēraxõ. ³ Akka nõ naax, nõko fero mēsho yoraya itiroamamē? Maa. Epa Nios fisti nõ Ifofamiskē nõko yora fena shara faxotiro nõ afe ipaxanõ. Nāskakē nõko fero mēsho yoramais nai mēranoax itiro. Epa Niospamã nõko yora fena faxõano. ⁴ Iskaratĩã nono mai ano niyoax nõko yora omiskõiyoi. Askafiax nõ nayopaima. Nõ nayoamano Cristo onõ nõko yora fetsafaxoxiki nõ isharapakexanõ. ⁵ Nã Epa

Nios fistichi noko onifani nõ afe İpaxanõ. Nãskakẽ äfe Yõshi Shara nõ mẽra nanea nõ tãpinõ noko yora fetsa faxoxiaino.

⁶ Nãskakẽ nõ shinãsharafafãini nono mai ano niyoxõ, nayoxoma, nõko Ifo Jesús ari kayoxoma mã nõ tãpia. ⁷ Nãskakẽ nõ Jesús ika ano õiyamafikĩ nono mai anoxõ nõ chanĩmara fafafafãini. Nãskaxõ chipo nõ õixii Epa Niospa noko fetsafaano. ⁸ Akka mã nõ tãpisharakõia Epa Niospamãi noko yora fetsa inãino. Akka mã nõ nakĩ nõko yora nõ ratafainikai nõ sharafinakõia ikikakĩ. Nãskakẽ nõ inimasharakõi mã nõ nai nõko Ifo Jesús femãi nõ ikikai. ⁹ Akka nono mai ano nõ niyoxõ nõko Ifo nõ yonoxosharayopai nokoki inimanõ. Nãskatari nai mẽraxori na fischisharapaiyai keskafakĩ nõko Ifo nõ inimamapaisharakõi. ¹⁰ Akka nõ chanĩmara faafo tii Cristoki nokoxikani. Nãskatari noko yoipakexii nono mai ano niyoxõ nõ shara famismãkĩ, askayamakĩ nõ chakafamismãki. Akka nõ afara shara famiskẽ afara sharakõi noko inãxii. Akka nõ afara chakafamiskẽ afara shara noko inãpaifikĩ noko inãxima. Nãskakẽ nõ fixiima. Nãskakẽ Jesúsxõ nõ yonopai sharakõi.

Pablo yoini Cristoõnoax nõ Nios fe rafetiro

¹¹ Akka Niospa noko yoia keskara nõ ayamax nõ rãfitiro. Nãskatari fetsafori nõ ato yoipai nõ Niospa ato yoiai keskara anõfo. Niospa noko tãpikõia nõmãi mẽstekõi yoiaito. Nõkai ato feparapaima. Mãri mã mã noko tãpikõia nõ mato pãramisma. Nõko meka mẽstekõi fisti nõ mato yoimis. Nãnori fisti mãto shinã mẽraxõ mã shinãpainõ. ¹² Akka kakapai nõa nõ yoimesharapaima. Akka mẽstekõi fisti nõ mato yoimis, mã mã tãpia. Akka fetsafãfekai mato yoikõikanima mato feparapaikani. A yoiaifo anorikai yoimisfoma äa äto shinã mẽraxõ shinãkaxõ yoimisfo kakapaiyanã. Akka nõfi mato pãramisma, chanĩma fisti nõ mato yoimis. Nãskakẽ mã nokoki inimakõimis. Nãskaxõ mã nokoõxõ ato yoikĩ nokoõnoa mã ato yoisharatiro. ¹³ Chanĩma, nõ Nios noikĩ kerexkai nõ yonoxofafãimis aõnoa fetsafãfe nikasharanõfo. Akka yorafãfe nokoõnoa yoimisfo iskafakakĩ: “Na Pablo feta yonomisfãfe shinãsharamisfoma mẽxotaima ato Niospa meka yoifofãsafamisfo omiskõifinafikakĩ,” ixõ noko yoimisfo. Äa noko askafanõfokĩ mã nõ tãpiakĩ Niosxõ nõ yonofikai mã äfe meka tãpinõ. Akka nõ mẽstekõi shinãsharakĩ nõ mato yonoxosharamis. ¹⁴ Cristo noko noikĩ noko yoini nõ äfe meka shara mato yoinõ. Cristo keyokõi yorafoõnoax naani. Nãskakẽ mã nõ naa keskara a nõ iyopaoni keskara ixikima. ¹⁵ Akka mã Jesús nayoni yorafoõnoax keyokõi a keskara shara ixiki. Nãskakẽ a nõ chaka İpaoni keskara İxiima. Nãskakẽ nõ nõ apaiyai keskara fisti anã nõ shinãtiroma. Cristoõnoax nõ yonosharaxotiro. Cristo äa nokoõnoax nayoni. Nafiano Epa Niospa äfe sharaõxõ anã otofani.

¹⁶ Akka nõ Jesús chanĩmara faafãfema fetsafoõnoa shinãifo keskarakai nõ anã atoõnoa anori shinãpakenakama. Nõri anori shinãyopaoni nõ anã askapaima. Cristoõnoari nõ chakakõi shinãyopaoni. Nõkai anã aõnoa anori shinãima. ¹⁷ Nãskakẽ Cristo nõ İfofaafo ato shinã fetsafaxõa anã shinãyopaoni keskara inõfoma, fena keskara shara inõfo. A Niospa fichipaiyai keskara fena keskara nõ İxii. Keyokõi fena keskara İxii. ¹⁸ Epa Niospa Cristoõxõ noko fetsafaa anã nõ noikaspanõma, nõ afe rafenõ. Askatari noko yoini aõxõ äfe meka nõ ato tãpimanõ Epa Nios fe rafenõfo. ¹⁹ Epa Niospa Cristoõxõ keyokõi yorafo afe rafemapai anã noikaspanõfoma. Cristomãi noko nãxonikẽ Epa Niospa a nõ afara chakafamisnoa anã shinãima. Nã Epa Niospa noko yoia keskafakĩ nãnorikõi nõ mato yoimis.

²⁰ Akka Cristo noko nõchini nõ äfe meka mato yoinõ. Nõ äfe meka mato yoi nõ Epa Niospa mato yoiai keskara. Epa Niospa nokoõxõ mato yoi nõ Cristo mato yoipaiyai keskafakĩ. Nãskakẽ nikakõikãfe Cristo mato nãxonikĩ mato

chaka soaxoxiki. Nāskakē Cristo Ifofaxō mātō chaka xatekāfe Epa Nios fe rafexikakī. ²¹ Akka Cristo afaa chakafapaonima. Nāskafikē Apa Niospa nōko chakafo akiki nīchini. Cristo afaa chakafayamafiakatsaxakī noko nāxonī Epa Niospa noko omiskōimayamanō. Nā yora chaka keskarax nōko chakafoōnoax Jesús nani. Nāskakē nō Jesús Ifofaino Niospa noko ōitiro sharakōi nā nō afaa chakafamisma keskara, nokoki inimakōikī.

6

¹ Akka nō Nios feta yonomis āfe meka mato yoikī. Nāskakē nō mato yoisharapai Epa Niospa mato noisharakōiaino, mā shināmakiyamanō, āfe meka mā kachikiri fayamanō. Fetsafāfe anorima mato yoiaito nikayamakāfe. Askatamaroko Jesús meka shināmakiyamakāfe. ² Taeyokī Niospa meka yoimisto kirika kenenī iskafakī Niospa yoiaino:

Ē mato shināito, mā ea yoiaino ē mato nikai mā omiskōiaino. Ē mato ifinō, ē mato axosharaxiki, ixō yoini Epa Niospa. Nāskakē nikasharakāfe iskaratīari Epa Niospa noko axosharapai noko ifixii.

³ Nōkai mato afaa chaka yoipaima tsōa noko chakafayamanōfo. Akka nō chaka niāito ōikaki a Nios chanīmara faamafāfe noko mekafatirofo. Nāskakē nō afaa chakafapaima. ⁴ Akka nā nō keyokōi Niosxō aka keskara nō mato ōimamis nōmāi yonoxokatsaxakī. Noko omiskōimafiaifono nō tenekōimis. Askatari fekaxteifinakōita nō tenekōimis. Noko chakakōi famisfo, noko askafafiaifono nō tenekōimis. ⁵ Nāskakaxō noko koshamisfo, askatari karaxa mēra noko ikimamisfo. Nāskatari yora chakafāfe noko noikaspakakī fāsi noko mekafamisfo. Noko askafafiaino fekaxtekōiyanā nō yonomis. Askatari nō oxa tenekōimis. Nāskaxri nō fonāikōimis. ⁶⁻⁷ Noko askafafiaifono afaa chakafatama nōko ōiti mēraxō nō afaa chaka shināima. Nō Cristo fe rafeaito nā noko yoimis keskara mā nō tāpia. Noko chakafafiaifono nō atoki ōitifishkitama. Fena fenakima nō tenekōimis. Nāskax fetsafo fe rafepaikī nō ato sharafa fafafāimis Niospa Yōshi Sharaōxō nō ato askafamis ato pārakīma nō ato noikōimis. Nō askakī keyokōi nō mato ōimatiro nōmāi Niospa yonomatixō. Satanās noko afara chakafamapaifaiito Niospa Yōshi Sharapa nā Nios keskara shara noko imaino āfe Yōshi Sharaōxō nō afara chaka potatiro. ⁸ Akka fetsafāfe nokoōnoa meka shara yoifiaifono fetsafāferi nokoōnoa meka chaka yoimisfo. Akka fetsafāferi na yorafo sharakōira noko fafiaifono fetsafāferi noko īchamisfo. Nō chanīmakōi yoifimiskē noko feparamisfo ixō nokoōnoa fetsafāfe yoimisfo. ⁹ “Pablo fe rafeakai tsoama. Nōkai ato ōimisma,” noko fafiaifono akka fetsafāfe Nios Ifofakōikaxō noko noikani. Nāskatari nō napaifiax nō nia. Noko omiskōimafiakakī noko tsōa reteama. ¹⁰ Akka nō shināmitsafaiito nōko Ifo Niospa noko inimamamis. Akka afaamaisfixō nō Niosxō nō fetsafo imasharakōimis, Nios Ifo shara faifono. Nō afaamais keskarafiax nō aya a Niospa noko ināi. Akka nā keyokōi Niosnā nōkonāri.

¹¹ Efe yora mīshtichi Corinto anoafāfe, nā nōko ōiti mēraxō nō shināi keskara nō mato yoimis. Nō mato fomāmisma. Keyokōi nōko shinā mēraxō nō shināi keskara nō mato yoimis mā tāpinō. ¹² Akka nō mato noikaspamisma. Akka māroko noko noisharamisma. ¹³ Akka iskaratīa ē mato yoi āpa fake noisharakī yoitiro keskafakī, nokori noisharakāfe nā nō mato noiai keskafakī.

Nā Nios chanīmara faafāfema akaifo keskara ayamakāfe

¹⁴ Nā Jesús chanīmara faafoma fe rafeyamakāfe. Akka na yora Nios Ifofaafāfe shināifo keskarakai nā yora chakafāfe shinākanima. Nāskarīfai pena fe fakish osinātiroma. ¹⁵ Nāskarīfiakī Cristo feta Satanās anoris shinātirofoma.

Akka nã Cristo Ifofaafãfe fichipaiyaifo keskara nã Cristo Ifofaafãfema askara fichipaikanima. ¹⁶ Nã Cristo chanĩmara faafãfe ichanãmisfo Epa Nios kĩfinõfo. Akka nã Ifofaafoma ato fe ichanãtirofoma afara nimofa fakaxõ kĩfitirofo na nõko niosra ikaxõ. Nãskakẽ nã rafe osinãtiroma. Akka afãfekai Epa Nioskõi kĩfipaikanima. Akka Epa Nios nõ mẽra ika. Nãskakẽ nõ Niospa pexe keskara. Nõko Nios nia. Epa Niospa yoini iskafakĩ:

Èfi ato fe ikikai, ato fe rafexikĩ. È ãto Nios ikaino afo efe yora ikani, ixõ yoini. ¹⁷ Askatari Epa Niospa yoini iskafakĩ:

Akka nã Cristo chanĩmara faamafãfe akaifo keskara ayamakãfe. Ato fe rafeyamakãfe afaa chakafaxikãkima. Mã askaino ã mato ifikai, ixõ yoini. ¹⁸ Askatari nã afama mĩshti atiroto ato yoini iskafakĩ:

Akka ã mãto Epa ixii. Akka mã ãfe fakefo ixii, ixõ nõko Ifo Niospa yoini.

7

¹ Èfe yora mĩshtichi, Epa Niospa nã noko yoiyoni keskara shara. Nãskakẽ nõ isharanõ keyokõichi nõko chaka nõ xatenõ. Afarafãfe nõko yora iyamai nõko õiti mẽraxõ noko chakafamatiro nãfo nõ xatekõinõ sharakõi ixiki. Nõ Epa Nios noikõiax a keskara shara nõ ipai.

Corinto anoxõ chaka shinãyopaonifo. Akka iskaratĩa mã shara shinãkani

² Akka nã yora fisti keskara nõ inõ noko noisharakãfe. Nõkai mato chakafamismaki. Askatari nõ mato afaa chakafamamisma, askatari nõ mato pãramisma. ³ Èkai nã ã mato yoiai keskafakĩ mekakĩ chakafakĩ ã mato yoimisma. Akka ã nayoxoma ã mato mẽxotaima noikõifafãini. Nãskatari mẽ nafiãxõ mẽxotaima ã mato noikõixii. Nãskakẽ tsõa noko paxkanã fatiroma nã yora fisti keskaramã ã ikẽ. ⁴ Mã nõ tãpikõia mã noko noikõiyana, mã Jesús Ifo sharakõi fakẽ. Nãskakẽ nõ yorafo yoimis mã isharakõimiskẽ. Nãskatari nõ omiskõifi nõ inimakõimis.

⁵ Akka nã nõ Macedonia ano nokoitatĩa nõ teneama, mẽxotaima fanĩma mĩshtinoax fekaxteaifãfe õi. Akka nõ shinãchakakõimis. Askatari a Nios Ifofaa fetsafori nõ ato shinãkõimis, mã nõko Ifo Jesús kachikiri faafora ixõ. ⁶ Akka nã shinãmitsaifo Niospa ato inimamamis. Nãskakẽri nokoki Tito nĩchiano nõ inimakõimis. ⁷ Akka mã nokoki Tito nokoxõ noko inimama noko yoia iskafakĩ: “Corinto anoafãfe ea inimamakõiafo,” ixõ Titopa noko yoia. Askara nõ nikai nõ inimakõia. Askatari noko yoia mã eõnoa yoikĩ iskafakĩ: “Nõ Pablo shinãkõi nokoki samamashta nokopainõ,” ixõ mã yoikẽ: “Nãskaxori nõko õitinĩ nõ shinã chanĩma nõ afara chakafamis. Akka nõkai anã askapaima. Nõ Pablo shinã,” ixõ mã yoiaino Titopa ea yoia. Nã keskara nikai ã inimai finasharakõi.

⁸ Akka ã mato kirika kenexõ manamakĩ ã mato shinãmitsamana. Nãskax ãri shinãmitsakõiyoa. Akka anã ã shinãmitsaima. ⁹ Akka iskaratĩa ã inimakõi. Akka ã mato shinãmitsamanax ã inima. Akka mã shinãmitsayanã mã Epa Nios kĩfiti iskafakĩ: “Epa Niosi, nõ afara chakafakĩ noko raefafe nõ afara chakafamiski,” ixõ mã yoikĩ. Nãskakẽ ã inimasharakõimis. Mã askafaino Epa Niosri matoki inimasharakõi. Akka ã mato kirika kenexõ manamakĩ ã mato yoikĩ chakafaama. Askatamaroko ã mato yoisharakõia mato axosharayanã. ¹⁰ Akka nõ shinãkĩ iskafatiro: “Ooa, ã afara chakafakĩ, Niosri ã chakafaa,” ixõ shinãkĩ nõko chaka nõ xatepaitiro Epa Nios Ifofapaikĩ. Nõ askaito õikĩ Epa Niospa noko ifitiro nõ afe ipaxanõ. Nãskaxõ nõ shinãtiroma iskafakĩ: “Ooa, ãfe chaka ã xateama shara ã ikerana. Niosri ã Ifofaama ã shara ikerana,” ixõ anori nõ shinãtiroma. Akka nã chanĩmara faamafãfe nõ shinãi keskara shinãkanima. Iskafakĩ shinãmisfo: “Ooa, nõ afara chakafaa,” ixõ shinãkani

āto ōiti mēra shināmitsakanima Nioskai shināpaikanima. Nāskax nakanax Epa Nios fe ipanakafoma. ¹¹ Akka mākai askarama. Shinākapo. Mā mātō ōiti mēraxō mā mā shinā anā mā Nios Ifofai mātō chaka xatepaikī nā Niospa fichipaiyai keskafakī. Nāskax mā ratekōia Niospa keyokōi noko omiskōimaxira ikax. Nāskakē mā mā itipinīkōia ika a afara chakafaifo ato omiskōimaxiki. Nāskaxō mā fāsikōi ato yoia āto chaka xatenōfo. Nāskakē mā mā noko isпамākai ato keskarama. Nāskakē mā ea fichisharapaikōi ē mato ōikanō mā isharakōiyamākī. ¹² Akka ēfe kirika kene fixō mā ea noiyanā mā ea nikakōisharamis. Akka ē kirika keneama, nā feronāfāke afara chakafaaōnoa omiskōimakāfe ixō. Askatari nā feronāfāke omiskōimanafoōnoari ē kirika keneama. Akka ē mato kirika kenexona mā tāpinō mā ea noimākai. Akka mā ea nikakōimis. Nāskaxō mā tāpitiro māmāi ea noikī Niospa ferotaifi.

¹³ Nāskakē nō inimasharakōi, māmāi noko noisharakōiaino nikakōisharayanā. Akka Titori matoōnoax inimasharayamea. Nā Tito inimaito ōi nōri inimaifinasharakōiyamea. ¹⁴ Akka Tito kayoamano ē yoiti iskafakī: “Na Corinto anoafō sharakōifo,” ixō ē yoiti. Nāskakē Tito mato mēra kaano mā ifisharakōiyamea. Nāskakē ē matoōnoax rāfiyameama. Akka chanīma fisti nō mato yoimis. Nā ē matoōnoa Tito yoia keskara chanīmakōi Titopa mato ōia. ¹⁵ Tito matoki nokoxō ōia mā rateaito mato ōita noko Titopa ferateneira ikax. Nāskakē pishta rateyanā mā Tito nikakōita. Nāskakē Titopa mato shinākī, mato noikī finakōi. ¹⁶ Ēri matoki inimakōi. Akka iskaratīa mē tāpia nā ē mato yoiai keskara mā amiskē.

8

“Afarayaxō fetsafo ināsharakāfe,” ixō Pablo Corinto anoafō yoini

¹ Akka meka fetsari ē mato yoinō mā tāpinō. Mā Epa Nios Macedonia anoxō chanīmara faafono Epa Niospa ato noikī āto shinā mēraxō ato shināmashara fetsafori kori ināsharakōinōfo. ² Akka Macedonia anoax omiskōifikakī Niosnoax inimakōikakī, afaayayamafiakaxō nā yora afaamaisfo ato afara fetsa ināsharakōiafo. ³ Akka nā ē ōia keskara ē mato yoinō. Fetsafāfe afaayayamafiakaxō fetsafori ato afara ato ināsharakōiafo. Ato afaa fīshkofafoma. Nāskakē atonā afaa ichapa nēteama. ⁴ Iskafakī ea yoiafo ato ināsharapaikī: “Nā Jesús chanīmara faa fetsafāfe kori yopakani. Nāskakē nōri ato afara fomasharapai,” ea faafo. ⁵ Nō shināyamea kori fistis noko inākanira ixō, Jerusalén anoafō a Nios Ifofafo ato foxopaikī. Akka noko kori ināyokaxoma taefakī Nios ināyameafo, iskafakī yoivanā: “Ifo, nōfi mefe yorakī nā mī noko afara amapaiyai keskara mī noko yoitiro,” ixō yoiyameafo. Nānori yoikāta nokori yoiyameafo iskafakakī Niospa fichipaiyai keskafakī: “Nōri nō mato nikakōinō,” ixō noko yoiyameafo. ⁶ Titopa taefakī mato yoiyoni iskafakī: “Mātō korifo ichafakāfe a afaamaisfo Jerusalén anoafō ato ināxikakī,” ixō mato yoiyoni. Nāskakē nō Tito yoiyamea iskafakī: “Nā mī yoimis keskafakī anā ato yoife nā afaamaisfo Jerusalén anoafō ato kori inānōfo. ‘Mā ato noikī mā ato kori inātiro,’ Corinto anoafō ato yoife,” ixō nō Tito yoiyamea. ⁷ Akka mā Jesús chanīmara fakī finakōiyanā mā Niospa meka mēstekōi yoimis, āfe meka tāpisharakōiyanā. Chanīmakōi mā Jesús yonoxosharakōiyanā mā noko noisharakōi. Nāskakē nā mā afarafo shara faa keskafakī nā afaamaisfori mā ato ināsharatiro. Niosxō mā ato noikōikī inimasharakōikai mā ato inātiro, fetsafo finōkōinīfofā nā mā imis keskayanā.

⁸ Akka ēakōi ē mato yoima nā afaamaisfo mā ato kori inānō. Akka ē tāpipai fetsafāfe ato kori ināpaiyai keskafakī māri ato ināpaimākai. Askayamakī mātō meka fistichi mā yoiaraka nō ato ināira ixō. Akka askakīma mā ato noikōiyanā

mã ato inãsharatiro. ⁹ Mã mã tâpia nõko Ifo Jesucristo nai mēranoax nãmã fo-toyoamax afama mĩshtifoya iyopaoni. Afaakai yopapaonima. Nãskafixõ noko noikõikĩ ãfe afama mĩshtifo keyokõi potãferani. Nãskax nokoõnoax afaamais iyopaoni nõ aõnoax isharapakexanõ.

¹⁰ Akka nã ã shinãinoa ã mato yoinõ mã tâpinõ. Akka mã xinia fisti finõa mãkai inimakõiyana kori ichafaxõ mã ato inãma. Akka taefakĩ nã afaamaisfo mã ato noikĩ mã ato kori inãpaikĩ mã fiyamea mã mekea ato chipo inãxiki. ¹¹ Nãskakẽ inimakõikĩ mã kori ichafakĩ taefati keskafakĩ iskaratĩari inimayanã ato inãsharakãfe anã afaa yopanõfoma. Nã mã ato inãpaiyaiti ato inãkãfe. ¹² Akka mã ato inãpaikĩ mã ato inãtiro. Askatari mã afarayaxõ mã ato inãsharaito Epa Niospa tâpia. Askatari mã afara ichapayaxoõma mã ato inãitori nãri Epa Niospa tâpia. Nãskakẽ inimakõi.

¹³⁻¹⁴ Akka ã mato iskafakĩ yoima: “Ichapakõi ato inãkãfe,” ixõ ã mato yoima. “Askatari keyokõi mã ato inãx mã afayaima,” ixõ ã mato yoima. Akka iskaratĩa mã afara ichapaya. Nãskakẽ nã afara yopaifo mã ato inãtiro. Akka mãri afara yopaito nãfãfe afara ichapayakaxori matori inãtirofo. Mã askai mã ranã mã kexenõnãsharax mã isharakõitiro afaa yopaxikima. ¹⁵ Akka kirika ano Niospa meka kenea iskai: “Akka nõko xinifo tsõa istomaxõ a piaifo Niospa ato inãpaoni. Akka nã ichapa fiato texefapaonima. Akka nã ichapama fiatori afaa yopapaonima,” ixõ kirika ano Niospa meka yõra kenei. Nãskakẽ yora fetsafo nõ afara inãito, Niospari noko afara fetsafo noko inãtiro nõ afaa yopayamanõ.

Tito fe rafeafo

¹⁶ ã matoõnoa shinãkõiai keskafakĩ Titopari ãfe õiti mēraxõ mato shinãkõi, Epa Niospa shinãmanaino. Nãskakẽ nõ Epa Nioski inimakĩ nõ aicho fai. ¹⁷ Akka iskafakĩ nõ yoyamea: “Corinto anoafõ anã ato õitãfe ato yoisharaxikĩ,” ixõ nõ Tito yoyamea. Nãnori nõ yoiaino inimayamea. “Aicho, ã ato ari kaikai ã ato yoisharai kaikai,” ixõ noko yoyamea. Akka ã shinã nõ yoiai fistiõnoax kaima. Åari matoki kasharapai kai. ¹⁸ Akka nã nofeta Nios Ifofamis fetsa nõ Titoya nĩchi. Nã nofe yora, nãatori Jesúsnoa ato yoisharamis. Nãskakẽ aõnoa keyokõichi meka shara yoimisfo. ¹⁹ Akka nã Nios chanĩmara faafo tiito ichanãkaxõ na feronãfake katonifo, nofeta nã kori yopaifo foxõikanõ. Nios shinãkĩ na kori nõ ato inãyanã nõko Ifo sharara fanõfo. Askatari nõ mato feta nõ ato inãpai tâpinõfo nõ ato axosharapai.

²⁰⁻²¹ Nã afaamaisfo nõ ato kori foxosharapai. Nãskakẽ yorafãfe ferotaifi nõ ato õimasharapai noko chakafakĩ mekafayamanõfo. Na kori ichapa nõ ato foxosharapai noko iskafanõfoma: “Nõko kori ranãri oneafo,” noko fanõfoma. Nãskakẽ nõko Ifãfe ferotaifi nã yorafãfe ferotaifiri nõ ato õimapai nõ isharakõixõ.

²² Akka nã nofe yora nã Jesús Ifofamis fetsa Tito yafi nõ mato nĩchi. Nã feronãfake mã nõ õimis nãato Jesús chanĩmara fakõimis. Nofeta Jesús yonoxosharakõimis. Akka nãato mato nikamis mã Jesús Ifofasharakõixõ nã afaamaisfo mã ato inãsharakõiaito. Nãskakẽ mato ari kapaimis mato feta ato shara faxiki. ²³ Akka mã mã Tito õimiski. Nãato efeta mato yonoxosharamiski. Nã efe rafemis Jesús yonosharaxoxiki. Nã Jesús chanĩmara faafo raferi afe mato ari fokani. Akka nã Jesús chanĩmara faafãfe ichanãkaxõ ato katonifo mato ari fonõfo. Nã rafeta Nios Ifofasharakõimisfo. Nãskakẽ ato katonifo mato ari fonõfo. ²⁴ Akka mãto ari nokofaifãfe ato ifisharakõikãfe nã Nios Ifofafo ato katonifo ato tâpinõfo mã ato ifisharaito. Mã ato askafaino nã ã matoõnoa yoisharamis keskara tâpitirofo chanĩmakõikẽ.

9

Nã Nios Ifofaafãfe Corinto anoafõ feta Macedonia anoxõ nã Nios Ifofaa fetsafori ato kori manamanifo

¹⁻² Akka nono Macedonia anoxõ ã kirika kenexõ ã mato fomakĩ ã mato yoikĩ iskafapaima: “Ato kori fomakãfe,” ixõ ã mato yoipaima. Akka mẽ tâpia mã xinia fisti aka nã Jesús chanĩmara faa fetsafãfe afara yopaifãfe mã ato inãpaiyaito. Akka ã Macedonia anoafõ ã yoikĩ iskafaa: “Acaya anoxori ato kori fomapaikani Judea anoafõ,” ixõ ã yoia. Ë ato askafaito nikakaxõ akairi ato kori fomasharapaikani. ³ Nãskakẽ ã Tito yafi nã afe rafeafo ã matoki nĩchi nã ã matoõnoa yoisharai keskara chanĩmakõikẽ tâpinõfo. Ë Macedonia anoafõ ato yoimis iskafakĩ: “Nã Corinto anoafãfe mã itipinĩshara faafo ato kori fomaxikakĩ,” ixõ ã ato yoia. Akka ã Tito yafi a afe rafeafo ã nĩchi mato ano nokokaxõ õinõfo nã ã matoõnoa ato yoia keskara chanĩmamãkĩ. ⁴ Akka Macedonia anoafõrõ efe foaifõno ã ato fe mato ano nokoxõ õia mã kori ichafayamano ã mãto rãfiaino mãri mã rãfipaitiro. ⁵ Nãskakẽ ã shinã Tito yafi afe rafeafo rekẽ mato ari nĩchixiki mato feta kori itipinĩfanõfo ato fomaxikakĩ nã afaamaisfo. Akka afetiãma mã mã shinãxõ yoiyoni: “Nã afaamaisfo nõ ato kori fomanõ,” ixõ. Akka ã mato yoia: “Ato kori inãkãfe,” ixõ. Mãakõi mã ato inãi. Akka nãskara shara mã ato inãpaiki mã ato inãtiro.

⁶ Nãskakẽ shinãsharakãfe. Akka nõ fimi exe fisti fanaxõ ichapa fitiroma. Akka nõ fimi exe ichapa fanano nõ fimi exe ichapa fitiro. Nãskarifiakĩ nõ fetsafo afara ichapama inãkẽ nokori Niospa ichapama inãxii. Akka nõ inimayanã fetsafo ichapa inãito nokori Niospa ichapa inãtiro. ⁷ Nã ãto shinã mẽraxõ shinãifo keskafakĩ fetsafo inãtirofo. Nãskakẽ iskafakĩ shinãtirofoma: “Ooa, ã ichapama inãpaifaito ea yõkarifaito ã inã.” Askatari iskafakĩ shinãtirofoma: “Akka ã inãyamaino ekeki õitifishkitiro. Akka ã inãi ekeki õitifishkiyamanõ,” ixõ anori shinãyamakãfe. Askatamaroko inimayanã inãkãfe. Nã fetsafo ato afara inãi inimamis nã Niospa noikõi. ⁸ Akka nã mã fichipaiyai tii keyokõi Niospa mato inãtiro afara sharafo fetsa fetsatapafõ mã afaa yopanõma. Askatari nã afara yopaifo mã ato inãno, Niospa keyokõi tâpia mato sharafa fafafaĩtiro mãri fetsafo shara fanõ. ⁹ Niospa meka aõnoax kirikaki kenea iskai:

Feronãfake sharapa nã afaamaisfo afara ichapa ato inãsharamis. Nãskakẽ Epa Niospa nã feronãfake axosharaino mẽxotaima ato afara inãsharatiro, ixõ kenenĩ. ¹⁰ Niospa fimi exefo onifani. Nãskakẽ nõ fimi exe fanatiro. Chipõ Niospa ãfe fanafo foaimasharaxotiro pisharanõ. Nãskarifiakĩ mã afara yopaito Niospa mato inãsharatiro. Afara ichapakõi mato inãno mã inimayanã nã Niospa Ifofaafõ Jerusalén anoafõ mã inãsharafafaĩtiro. ¹¹ Chanĩma, Niospa mato afaa fĩshkoima afara ichapa mato inãi mãri ato afara ichapa inãno. Akka nã afara yopaifo mã ato inãi nãfo nõ ato foxoxii. Nãskakẽ inimayanã yoixikani iskafakĩ: “Aicho Epa Niosi, mã fãsi sharakõi,” ixõ yoixikani. ¹² Akka mã ato afara inãsharaino nã afaamaisfãfe fixikani. Nãskakẽ mã fĩkaxõ inimayanã Epa Nios yoixikani iskafakakĩ: “Aicho Epa Niosi, mã noko shara famis,” ixõ yoixikani. ¹³ Mã ato afara inãsharano nã afaamaisfo inimakõixikani mã ato inãsharano. Nãskakẽ yoikĩ iskafaxikani: “Aicho Epa Niosi, mã noko afara inãifãfe mã meka nikasharakõimisfo. Jesús nõko Ifo mia famisfo. Mã ato yoia keskafakĩ noko inãsharafo. Fetsafori nãfãfe afara ato inãsharafo. Nãskakẽ mã nõ ato tâpikõia chanĩmakõi mã Fake Jesús ãto Ifokõi,” ixõ nã afaamaisfãfe yoixikani. ¹⁴ Nãskakẽ mato Epa Nios kĩfixoxikani. Mã Niosxõ ato afara inãsharakẽ, yoikĩ iskafaxikani: “Epa Niosi, mãõxõ na yorafãfe noko afara inãsharafo. Aicho Epa, nõ ato fãsi noikõi. Ato shara fafe,” ixõ mato Epa

Nios kīfixoxikani. ¹⁵ Aicho Epa Niosi, mī Fake Jesucristo mī noko ināsharakōini nofe rafesharapakexanō. Nāfi sharafinakōiakī aōnoa nō yoisharapaikōi nōkai tāpiama afeskaxomāi nō yoisharakōinō.

10

“Niospa ea nīchini Jesúsnoa ē mato yoinō” ixō Pablo ato yoini

¹ Iskaratīari meka fetsari ē mato yoisharapai. Efe yora mīshtichi, ea nikasharakāfe. Jesucristokai meka mitsisipato noko yoimisma. Noko yoikī fenāmāshta noko yoisharamis nō āfe meka nikasharakōinō. Nāskarifiakī ēri Cristoōxō mato fenāmāshta yoisharapai mā tāpinō. Akka eōnoa yoikī iskafamisfo: “Pablo nofe ixō fenāmāshta noko yoiaito nō ōimis. Nāskafixō noko kirika kenexoni mitsisipakai noko kirika kenexonaito nō ōimis,” ixō ea yoimisfo. ² Ē matoki nokoxō fāsi mekakai ē ato yoipaima ea nikanōfo. Askafixō ea nikayamafiaifono fāsi kerexkai ē ato yoitiro. Akka nā ea chakafakakī mekaifafo ato nikayamakāfe. Akka eōnoa yoi iskafamisfo āa chanīkani iskakani: “Pablo noko yoi nā Nios Ifofaamafāfe yoiifafo keskara. Niospa shināōxōkai noko yoima,” ixō yoimisfo. Akka ē matoki nokoxō ē mato yoitiro nā Nios Ifofaamafāfe shināifo keskara ē mato yoimisma. Niospa shināi keskara fisti ē mato yoimis. Akka mē nokoxō fāsi mekakai ē ato yoixii tāpinōfo. ³ Chanīma, nono mai ano nō ika nā Nios Ifofaafoma fe. Akka nā Nios chanīmara faamafāfe fetsafo finōpaiyaifo keskai nōkai askamisma nā noko noikaspaifo ato finōxiki. ⁴ Akka a Nios Ifofaafoma a Satanás nikakī mato chanīkī tāpimapaikani mā anā Jesús Ifofayamanō. Mato pārapaikani. “Nō Nios Ifofara,” ikani. Askatamaroko nō Nios nikakī nō mēxotaima yoimis chanīmakōi. Nāskaxō Nios āfe sharaōxō nō ato xatematiro afara chaka anā yoiyamanōfo. ⁵ Epa Niospa noko yoiaino nō fetsafo tāpimatiro āa chanīaifo, “Nō Niospa meka tāpisharakōiakī,” ikanaifo, kakapaiyaifo. Akka nō Niospa sharaōxō fetsafo nō ato tāpimatiro nā chanīmisfo Niospa meka tāpisharafoma. Shara shināfoma. Epa Nios Ifofaima. Niosxō nō ato yoimis Nios Ifofanōfo. ⁶ Akka ea Jesús nīchini āfe meka ē mato yoinō. Nāskakē mā Jesús yafi ea nikakōixō mā anā afaa chakafayamaino ē mato afeskafatiroma. Akka mā noko nikakaspaito ē mato omiskōimatiro.

⁷ Akka mā ōikī shināi oa shara keskaraxō fetsafāfe yoiiaifono iskafakī: “Cristo ea nīchini āfe meka ē mato yoinō. Akka Pablokai ea keskarama,” ixō mato yoimisfo. Akka nāfāfe shināsharakaxō tāpitirofo eari Cristo nīchinikē āfe meka shara ē mato yoinō. ⁸ Nōko Ifo Jesús ea yoimis keskara ē mato yoitiro. Mato afaa chakafamatama nōko Ifo ē mato Ifofamasharapai mato ōiti fēpeaxosharaxiki. Ē anori mato yoi ēa kakapaitama, ēroko mato yoisharapai. Ē anori mato yoikai ē rāfima. ⁹ Akka ē mato kirika kenexō ē mato ratepaima mā mesenōma. ¹⁰ Akka fetsafāferi eōnoa yoikī iskafamisfo: “Pablo noko kirika kenexokī noko feratekōiaito nō ōimis. Akka askafiax nofe ikē nō ōia afaamakōi nō ōimis. Āfe mekakai mitsisipama,” ixō eōnoa yoimisfo. ¹¹ Nānori eōnoa yoifimisfono ē mato ari samama kaxō ē ato tāpimaxii. Nā ē mato kenexona keskafakī nānorikōi ē mato yoixii.

¹² Fetsafāfe mato yoimisfo iskafakī: “Nōfi afara tāpikōiakī nō mato tāpimasharakōitiro,” ixō mato yoimisfo. Nāskarafo ichanākanax āa ranā yoinākani iskakani: “Noko keskarakai tsoama. Nores fisti nō tāpisharakōia,” ikanax kakapaimisfo. Nāfo tatimakōifo afaakai tāpiafoma. Nāskakaxō nāfāfe anorima afara chaka yoimisfo. Akka ēkai ato keskarax ē sharakōi ē itiroma ēroko ato keskarax. ¹³ Akka nōkai anori yoipaitiroma. Nā Niospa noko yoi ai keskara fisti nō mato yoitiro. Noko yoini āfe meka shara fisti nō mato yoinō.

Nā fisti nō mato yoimis. Akka mā ika nā Niospa ea nīchini ano. Akka ē kani Corinto anoxō mato Niospa meka tāpimaxiki. ¹⁴ Nāskakē ori fetsa ari ē kanima, nā ea nīchini ano ē kani. Akka nā nō mato yoiai keskara chanīmakōi. Nōkai kakapaimisma. Nā Niospa noko yoiai keskara fisti nō mato yoitiro. Akka nō mato Niospa meka yoikī taefatani Jesucristoōnoa meka shara mā nikamiskēma. ¹⁵ Akka nā ē kamisma anoxō fetsafāfe ato yoiafono nō ato yoia ixō nō ato yoimisma. Akka nō mato yoi nā nō mato afara axosharamis fistiōnoa. Akka nā fetsafāfe mato axomisfoōnoa nō yoimisma. Akka mā mā Jesús nikasharai. Nāskapainō. Mēxotaima mā nikasharakōifafāinō. Akka mā ea ifisharakōiano mēxotaima ē mato yoisharatiro nā Niospa fichipaiyai keskafakī. ¹⁶ Nāskakē mai fetsa ari chaikōi mato finōfāi ē kapai Jesúsnoa ato yoixiki nā Niospa meka nikamisfoma ari. Akka nārixō mā fetsafāfe ato yoiafono nō ato yoia, nō ipaima fetsafo imis keskai. Nōkai fetsafo ato yono xītikapaima. ¹⁷ Akka kirika ano Niospa meka kenea is kai: “Akka tsōakai āa yoimesharatiroma is kai ē afama mīshti tāpikōiakī ikax āa kakapaitiroma. Askatamaroko nō yoisharatiro nā afara sharafo nōko Ifāfe aka,” ixō kirika ano yōra keneni. ¹⁸ Akka fetsa āa yoimesharai akai afaama. Akikikai Nios inimatiro. Akka Niospa fetsa na feronāfake sharakōi faax akiki inimakōitiro.

11

Pablo ato yōani āa chanīkani noko Niospa nīchiaki nō Niospa meka mato yoinō imisfoōnoa

¹ Iskaratīa ē mato yoinō, nā yora shināsharayamaito yoiai keskara nānorikōi ē mato yoifīkīkai askarakōi ē mato yoima. Nā mā ea nikamis keskafakī iskaratīa ea nikasharakāfe. ² Feronāfake kēroyapaikī āfe apa yōkatiro, nā kēro fixiki āfe āfi inō. Nāskakē apa āfe fake xotofake kexesharatiro feronāfake fetsa fe oxayamanō. Nāskax mā fianākanax fene fes fianātirofo feronāfake fetsafekairoko oxakatsaxakī. Nāskarifiakī ē mato Nios Ifofamakī ē mato kexesharani. Nāskaramāi Epa Niospa fichipaiyaino. Nāskakē mēxotaima ē mato kexesharai mā fetsafo nā chanīmisfo mā ato nikayamanō. Nāskakē mā nai mēra Nios ano kaax Cristo afe yorakōi mā ixii. ³ Nāskakē ē shināchakakōi Satanás Eva ani keskafakī fetsafāfe matori pārayamanōfo, mato pāraifono mā anā Cristo noinōma. ⁴ Ooa. Fetsafāfe mato pārapaikani. Nō Jesúsnoa mato yoimis keskara anori mato yoikōiyamafiaifono mā kai ato xatematama mā ato chanīmara fai. Nō Niospa Yōshi Sharaōxō meka shara Jesúsnoa nō mato yoimis keskara anorikai afāfe yoikanima. Jesúsnoa anorima mato yoifīaifono mā ato xatemanama. Mā ato nikayanā mā yoimis iskafakī: “Aicho, mā nofe isharapainō,” ixō mā ato yoimis. ⁵ Akka mā shināi nāfāfe Niospa meka yoisharakōimisfora ixō. Akka askafīkaxō ea finōfafoma. ⁶ Akka, ĩ mā shināimē ē yoisharatiroma? Akka ē Niospa meka tāpisharakōia. Nā ē mato yoiai anori mēstekōi. Mā mā ea tāpikōia ē mato Niospa meka xafakīakōi yoimis. Nā keskara ē mato ōimafafāini.

⁷ Nā ē mato Niospa meka yoimis chāikai ē mato afaa yōkamisma. Ēkai mato afaa fīamisma, koriri ē mato yōkamisma. Ōitsai, ē mato chakafairaka ē mato kori fīakīma. Akka ē Niospa meka shara Jesúsnoa ē mato yoimis Niospa fakefo mā inō. Ē mato askafai afaamais keskara ē imis mā Niospa meka tāpisharakōinō. ⁸ Akka ē mato fe ikano nā Nios chanīmara faa fetsafāfe ea kori inānifo aō nā ē fichipaiyai keskara ē finō. Ōitsai, ē atoki yometsoa keskararaka nā kori fii mato Niospa meka yoi, ē mato yonoxomis keskaraxō. ⁹ Ē mato fe imis chāikai ē afara yopafikī ē mato fekaxtefamisma. Akka Macedonia

anoafāfe Nios chanīmara faafo fēkaxō ea afarafo inānifo. Akka ē mato fe imis chāikai ē tsoa afaa yōkamisma. Askatari ē tsoa afaa yōkapakenakama. ¹⁰ Cristo āfe meka chanīmakōi. Nāskarari nā ē mato yoiairi chanīmakōi. Nāskakē Acaya mai anoxō nā ē mato yoiai keskara ea tsōa xatematiroma. ¹¹ Ē mato anori yoikī, ĵē mato noimamē? Maa. Anorikaima Niospa tāpikōia ē mato noikōi.

¹² Nā ē mato yonoxomis chāi ē mato afaa fiapaimisma. Iskaratiari ē mato afaa yōkaima. Nāskaxos ē mato yonoxoni nā chanīmisfo mā anā ato chanīmara fanōma. Nā ē yonoaito ōikaxō fetsafāfe yoimisfo iskakakī: “Nōri Pablo yonoai keskafakī nō yonoi,” ifiakaxō afāfekai ē yonoai keskafakī tsōa yonomisma. ¹³ Akka nāfo chanīmisfo. Ē ikai keskara ipaifikani tsoa askakōimisma. “Cristo noko nīchia aōnoa āfe meka nō mato yoinō,” ixō mato yoifikani afokai Cristo fe rafemisfoma. ¹⁴ Chanīma, Satanás nokoki nokotiro nā Niospa āfe ājiri fafeai ōitsa. Nāskarato noko yoitiro iskafakī: “Ēfi mato xafakīa yoikai,” ixō noko feparapaitiro. ¹⁵ Akka nā Satanás yonoxomisfori nā keskara itirofo. “Nōri nō Nios yonosharaxomis,” ixō noko pārapaikani. Nāskafāfe ōikī Niospa ato omiskōimakī finakōixii. Nāskakē nāfāfe afara chakafakanax omiskōipakenakafo.

Pablo omiskōini Niospa meka yoikatsaxakī

¹⁶ Ē mato yoia keskara anā ē mato yoinō: “Pablo afaa tāpiama,” ixō eōnoa shināyamakāfe. Akka ea nikapaikī ea nikayokāfe. Nā yora fetsa afaa tāpiama mā nikamis keskafakī eari nikasharayokāfe. Ēari ē pishta yoimeyonō. ¹⁷ Nā ē mato yoiai keskara a ēa ē yoimesharai ēfe Ifāfe ea anori yoia. Akka nā afaa tāpiamafāfe anori yoimisfo. ¹⁸ Akka nā nōko Ifo chanīmara faafoma āa yoimesharaifo keskara nānori fetsafāfe mato yoimisfo. Akka iskaratiari ē mato yoi a ēari ē yoimesharai keskara. ¹⁹ Akka mā shināi mā tāpikōia. Nāskaxō nā afaa tāpiamafo mā ato nikamis. Akka afeskakī mato anorima yoifiaifono mā ato xatemamisma. ²⁰ Mato yoimisfo āto yonomati keskarakōi mato fakaxō, askatari mato kaxpa yonomamisfo. Nāskatari mato pāramisfo, askatari mato chakafamisfo, askatari mato ičamisfo. Mato askafaiyono mā tenekōimis. ²¹ Mato askafakakī shinākaniraka nō mitsisipakōira ikaxō. Ooa. Nōkai mitsisipama oa ato akaifo keskafakī nōri mato askafapanā. Akka nōkai mato askafamisma nōkairoko ato keskaraxō.

Akka nāfo āa yoimesharakakī mato afara yoimisfo keskafakī ēari ē yoimesharatiro. Ooa. Nā afaa tāpiamafo keskaraxō anā ē mato yoi. ²² Akka nāfo, “Nō hebreos yorafo,” ikani. Akka ēri hebreo yora. Askatari, “Nō israeli yorafo,” ikani. Akka ēri israeli yora. Askatari, “Nō Abraham āfe fena,” ikani. Akka ēri Abraham āfe fena. ²³ Akka, ĵnāfo fistimē Jesucristo yonoxomisfo? Maa. Akka ēroko yonoxokī finakōimis. Ooa. Ē iskafakī ē mato yoi oa shināsharayamaito yoiai keskaraxō ē mekai askayamapaifi. Akka nā chanīmisfāfe mato yoikī iskafakani: “Nō Jesús yonoxokōimis. Askatari Jesúsxō noko karaxa mēra ikimanafo,” imisfo. Akka ēroko yonokī finakōimis. Nāskakē earoko karaxa mēra ikimakī finakōimisfo. Askatari ea koshakī finakōimisfo. Ea askafakī fetsaifono mē nakerakōimis. ²⁴ Efe yora judeofāfe ea koshakakī cinco veces fakī ea koshamisfo. Nā ea koshaifo tii treinta y nueve ea famisfo. ²⁵ Romano xanīfofōfāferi āto chāti ea koshanifo tres veces fakī. Askatari ēfe kaifāferi tokirifāfe ea tsakakī fisti fanifo. Askatari kanōanāfānē ē pokefainaino kanōanāfā fakafā fospia ikiaino mē āsakerani. Mā kanōanāfā fakafā mēra ikiano nā kanōanāfā āfe kaxke ē fakafā mñāo ē nononi āsaxikima. Fakish fisti ita pena fistiri ē ini. ²⁶ Mē kafāsamis, faka faiyaito mesekōi ē ōimis; askatari yometsoafāfe ea achikaxō ea mesenifaifono mē ōimis; askatari ēfe kaifokōifāfe ea mesenifaifono mē ōimis; yora fetsafāferi

ea mesenifaifono mẽ õimis; pexefã rasi anoxori ea mesenifaifono mẽ õimis; tsõa istomaxori ea mesenifaifono mẽ õimis; fakafã anoari mesekõi mẽ õimis; “Nõri Nios Ifo sharakõifamis,” ikax a chanĩmifãfe ea mesenifaifonori mẽ õimis. ²⁷ Ë omiskõiyanaã ã yonomis xokenãkõiyanaã; askatari ã oxa tenekõimis; askatari ã fonãiyanaã nomi tenekõimis; askatari ã pimisma; askatari matsi mei ã omiskõikõimis rapatimais ikax.

²⁸ Nãskarafo ã mei ã omiskõikõimis. Askatari afara fetsafoõnoaxri ã omiskõimis. Askatari mẽxotaima ã mato shinãkõimis nã mã ichanãxõ keyokõichi mã nõko Ifo Jesús Ifofamis tii mã kachikiri fayamanõ. ²⁹ Akka ã nika fẽtsa Jesús Ifofasharapaifi rateaino ã aõxõ shinãchakakõitiro. Akka fẽtsa a Nios Ifofaa afara chakafamakẽ ã akiki õitifishkikĩ rãfikõitiro. ³⁰ Akka nã ã mato rama yoiã keskara kakapaikĩ ã mato yoima. Ë mato yoi mã tãpinõ ã ã afaa atiroma. ³¹ Nã Nios fisti nõko Ifo Jesucristo ãfe Apa, nãato tãpikõia ãkai chanĩmisma. Iskafakĩ nõ yoinõ: “Epa Niospa, mã sharafinakõia,” ixõ nõ yoipakexanõ. ³² Akka Aritas xanĩfokõĩ iyopaoni. Nã Aritas fetsa nĩchini Damasco anoax xanĩfo inõ. Damasco ano ã ikano, nãato ãfe sorarofo yoini nã pexe rasi anoxõ ãfe kãiti anoxõ ea kexenõfo ea achixikakĩ. ³³ Akka anoxõ ea achipaiyaifono, nã nõko Ifo Jesús Ifofaafãfe fẽta efapa mẽra ea onekaxõ pexe rasi kene fomãkĩaxõ ea fotomanifo ã katanõ.

12

Pablo ãfe namapa õiai keskara õini Niospa tãpimanaino

¹ Akka ãa ã yoimesharai. A ãa ã yoimesharai keskarakai akai afaama. Nãskafekẽ nõko Ifo Jesús ea õimana keskara ã mato yoinõ. Nã ãfe namapa ã õiai keskara ea õimana. Nã tsõa nikamisma ea tãpimani. Nãnorĩ ã mato yoi. ² Mã catorce xinia finõa a Niospa ea ifirisafayoni, ã Cristo fe rafeaito õikĩ. Ëkai tãpiama ãfe fero mẽsho fisti nai mẽra kani rakikĩa, askayamai ãfe yora kani rakikĩa. Nios fistichi tãpia a ã ini keskara. ³⁻⁴ Niospa nã ika ano ea ifirisafayoni. Nã ã mato yoiyoa keskara anã ã mato yoi. Ëfe yora iyamai ãfe fero mẽsho fisti kani rakikĩa ãkai tãpiama. Nios fistichi tãpia nã ã ini keskara. Nã ika anoxõ ea afara nikamani keskara ã tsoa yoitiroma. Akka ea yoikĩ iskafani: “A mã nika keskara tsoa yoiyamafe,” ixõ ea Niospa yoini. ⁵ Ë nã õia keskara ã fetsafo yoipaima iskafakĩ: “Niospa ea fisti nã ika ari ea õimani,” ixõ ã yoitiroma. Ë anori yoipaima. Anori ã yoi kakapaimis ã itiro. Ëkai ãa ã yoimesharapaima. Ereskai ã afaa fatiroma. Nãskakẽ nã fisti ã yoimis inimakĩ. ⁶ Akka ãa ã yoimesharai ã yoimetiro. Ë anori yoi nã yora afaa tãpiamafãfe yoimisfo keskara ã yoima. Chanĩmakõĩ eõnoa ã yoimesharatiro. Akka ãkai eõnoa ã yoimesharapaima eõnoa shinãkĩ finakõinõfoma. Mã ea õimis ã afe keskaramãkĩ, askatari mã ea nikamis ã afe keskara yoimismãkĩ.

⁷ Akka Epa Niospa a ika ari ea õimani keskara tsõa õimisma. Akka Niospa ea õimaniõnoax ãa ã yoimesharapaitiro ã tãpikõiara ikax. Nãskakẽ Niospa nẽtefayamano Satanás ea isinĩ imani nã nõ moxaki chachiano noko mõxa fekaxtefai keskafakĩ ãa ã yoimesharayamanõ. ⁸ Nãskakẽ ã kĩfikĩ iskafani: “Ifo, ea sharafafe,” ixõ tres ves fakĩ ã yõkani. ⁹ Ë askafaito nõko Ifãfe ea kemakĩ iskafani: “Ë mia noi. Askafixõ ã mia sharafaima. Cristo mia axotiro na pae mã tenenõ ã mefe rafekakaini. Mã mitsisipayamafikẽ ã mĩõxõ ã ato õimatiro ã afama mĩshti fatiro,” ixõ ea kemani. Nãskakẽ ã isinĩ ifiai ã inimasharakaini. ¹⁰ Nãskakẽ ã mitsisipayamafixõ Jesucristoõnoax ã inimakõĩ. Nãskaxõ ea ãchaifono ã tenemis, afaayayamaxri ã inimakõimis ea omiskõimanaifonori ã tenemis. Nãskatari afarafo fekaxkõifekẽ ã tenemis. Ë askafakĩ ã mitsisipayamafixõ Jesucristoõxõ ã afama mĩshti fatiro.

Pablo nā Nios chanīmara faafo Corinto anoafo ato shinākōini

¹¹ Akka nā yora afaa tāpiamafo āa yoimetirofo keskarax ēa ē yoimea. Akka mā eōnoa afaa yoisharama. Akka mā ea ōisharakī, “Nā Pablo sharakōi,” ixō mā eōnoa yoiano nā sharakōi ikerana. Nāskakē ēa ē yoimesharakōi fetsafāfe ea tāpinōfo ē afe keskaramāki. Akka ēakai ē afaa asharatiroma. Ēkai afaama. Nāskafekē nā eōnoa afara chaka mato yoimisfāfe ea finōkanima. ¹² Jesucristo ea nīchini aōxō āfe meka ē mato yoinō. Nāskakē tanaimakōi ē yonomis fena fenakima. Nāskara ē yonofaino Niospa afama mīshti amis eōxō mā tāpinō Jesucristo ea nīchinikē. ¹³ Akka, ¿afeskakī mā iskafakī shināimē? “Pablo nā Nios chanīmara faa fetsafo ato shara fai keskafakī nokori shara faima,” ixō mā eōnoa yoitiroma. Akka nā Nios chanīmara faa fetsafori ē ato shara fai keskafakī, nāskarifikī ē mato sharafa fafāfāini. Ēkai mato afaa fīapaimisma. Askatari ē mato fekaxtefamisma. Ea pimakape ea rapati safemayanā ē mato famisma. Ōitsai, ē mato afaa fīapaikima ē mato chakafaamakī ea raefakāfe.

¹⁴ Mē mato ari kai rafea. Akka iskaratīa mē itipinīsharax anā ē mato ari kai. Ē mato amis keskafakī anā ē mato yōkakī fekaxtefaima. Ē mato afaa fīapaitama ēroko mato shināfafāini. Shinākapo. Fakefāfekai apa yafi afa pimatiro. Akka afa fetaroko apa fakefo pimatiro. Akka māfi ēfe fakekōifo keskarakī. Akka ē mato Niospa meka tāpimasharakōia eōnoax mā isharanō. ¹⁵ Akka ē afarafo fikī mē kori potakī keyokōia, askafafīaxō ē shināchakaima, askatari ēakōi ē ināmei mā Niosnoax isharakōinō. Akka ē mato noikī finasharakōifianokai ōitsai mā ea noikī finasharakōimisma rakikīa.

¹⁶ Akka ē mato afaa yōkamisma. Akka fetsafāfe mā Corinto anoafāfe eōnoa yoimisfo iskafakakī: “Akka mā nō tāpia Pablo mato afaa yōkamisma. Askafīxō mato pāraxō mato kori fīamis, Judea anoafo ē ato foxotanōra,” ixō. ¹⁷ ¿Nā feronāfakefo ē matoki nīchinioxō ē mato pāramē ē mato kori fīaxiki? Maa. ¹⁸ Ē Tito yoini iskafakī: “Corinto ano katāfe,” ixō ē yoini. Nā nōko Ifo chanīmara faa fetsafori ē matoki nīchini. Akka, ¿Titopa mato pāramē mato afara fīaxiki? Maa. Mē tāpia Titopakai mato afaa fīapaimisma. Nā ē mato fe imis keskai ari mato fe imis. Noko rafeta nō mato yoimis. Nāskara fisti nō mato afara shara faxopai noko rafe nō mato fe imis.

¹⁹ Mā shināiraka ē mato yoiai keskara mā eōnoa shināsharanō. Maa. Anorikaima. Epa Niospa nā ē yoiai keskara ea nikamis Cristo ea shināmanaino. Efe yora mīshtichi, nā ē mato yoiai keskafakī ē mato shara fapai Jesús shināi keskafakī māri mā shināsharanō. ²⁰ Akka ē tāpiama, ōitsai, ē ari nokoxō ōia a ē yoiai keskai mā isharayamakē ē mato fichikai. Askatari ē matoki nokoaino ōitsai, mā ekeki inimaima rakikīa nā mā shināi keskai. Akka ē matoki nokoxō ōipai mā mā chaka xatexō mā Jesús Ifofasharaino. Akka ē matoki nokoxō ōia mā chaka xateyamano ē shināmitsatiro. Mā fochishpanā faatanāta, fētsa fiati mārifi mā fipaita, fetsa mekafata, ōitifishkita, mares fisti mā fipaita, mā chanīta, fetsafo mekafata, nō tsoa keskarama ita, isharayamata, mā askaito ē mato ōipaima. ²¹ Nāskatari ē shināchakakōi, shināyanā ōitsai Niospa atoōxō ea rāfimaniraka ixō ē shināi mā isharayamaino. Mā askaino ē matoki nokoax ē rāfikōixii mā afara chakafaino. Akka ranāri mā isharapaonima. Māto āfima fe mā oxapaoni. Askatari kērofori āto fenema fe oxapaonifo. Nāskatari afara chakafo fetsa fetsatapafo mā apaoni. Akka mā xateyamaino ē nokoax ē mato ōi ē shināmitsakōixii, rāfikōiyanā.

13

Pablo iskafakī ato yoini: “Anā afaa chakafayamakāfe,” ixō ato yoini

¹ Mē mato ōikī rafe faa. Iskaratīari anā ē mato ōikaikai. Ē anā mato ōikaikai mā mato chaka mā xateamākī. Akka kirika ano Epa Niospa meka kenenifo iskafakī: “Fētsa afara chakafaito ōixō yōfaito, ‘Nato afara chakafaa,’ ixō rafeta yoiaino, askayamakī trespa yoiaino askayamakī ranāfai yoiaino chanīmara nō fatiro,” ixō kirika ano Niospa meka kenenifo. Nāskafakīri ē mato ano nokoxō ē nikai mā afara chakafaito mā afara chaka xateyamaito. Akka ē mato ōitiro mā chaka ikamāki, askayamai shara mā ikamāki. ² Akka anā ē mato ano kayoxō mē mato yoiyoni mā afara chakafanōma. “Mā afara chakafakī xateyamaino ē mato omiskōimaxii,” ixō ē mato yoiyoni. Anā iskaratīari chai ixō ē mato yoi kirika kenexō iskafakī: “Ē anā kaxō ē mato ōikai mā mā chaka xateamāki. Akka mā chaka xateyamaito ē mato omiskōimaxii. Akka tsoa pishtakai ē finōmaxima.” ³ Akka mā tāpipai Cristo eōxō mato yoiaino. Chanīma, mā samama tāpinō xafakīakōi ē mato ōimani. Akka ēakai ē mato yoima, Cristoōxō ē mato yoi. Jesucristo mitsisipakōikai mato tāpimani mato chaka mā xatenō. ⁴ Chanīma, Jesucristo nokoōxō ifi cruz ikakī mastafono nā feronāfake pachikōi keskara ini. Nokoōnoax nai āakai ifimenima. Nāskafinixakī iskaratīa Niospa sharaōnoax nia. Nāskarifiāi nōri mitsisipama. Nāskafixō Jesús feta nā Niospa apaiyai keskara nō atiro Epa Niospa sharaōxō.

⁵ Akka māto shinā mēraxō shināsharakāfe chanīmamākī mā mā Jesús Ifofasharamākī. Māa tāpimesharakāfe. Akka, ĵmā mā tāpimē Jesucristo mato fe ikano? Askayamai mā mā chanīmis rakikīa nō Jesús Ifofaira ifixō mā Ifofaama. ⁶ Akka mā mā ea ōikī tāpia ē Jesucristoōxō yonosharakōimiskē mato mēraxō. Nā mā chanīmara fakōipainō. ⁷ Ē mato Epa Nios kīfixomis mā afaa chakafanōma. Nokoōnoa shinānōfo ixokai ē Epa Nios kīfimisma. Iskafakī fetsafāfe nokoōnoa shinākani rakikīa: “Pablo fe rafeafāfe ato yonoxosharafoma,” ixō nokoōnoa yoikani rakikīa. Akka noko askafafiaifono mā Jesús Ifosharakōifai nāskara nō fichipai. ⁸ Akka Niospa meka shara fistiōnoa nō yoitiro. Aōnoakai meka chaka nō yoitiro mā āfe mekamāi sharakōikē. ⁹ Akka fetsafāfe nō afama noko askafakī shināfiaifono nō shināchakaima. Akka mā Jesúsnoax isharakōikē nō fāsi inimakōitiro. Akka nō mato Epa Nios kīfixona mā a keskara sharakōi inō. ¹⁰ Akka ē mato kirika kenexona mato ari kayoxoma mā ea nikanō. Mē mato ari nokoxō ōia mā Cristo Ifo sharakōifaino ē mato ōitoshinō. Nāskakē mā isharakōiaino Niosxō fāsi mekakai ē mato yoima mā isharakōinō. Epa Niospa ea yoia ē mato yoisharanō mā Nios Ifo sharakōifanō isharakōixō.

Mā Pablo āfe meka xatekī ato yoisharani

¹¹ Mē mekai xatekī ē mato yoisharai. Jesús keskara isharakāfe. Ea nikasharakāfe. Nānori fisti shinākāfe. Isharakāfe. Mā askaino Niospa mato noikōikī mato inimamasharai āfe Yōshi Sharaōxō mato fe ixō. ¹² Keyokōi nā mā Nios Ifofaa tii yoinōnāsharakāfe. ¹³ Keyokōi nōko Ifo Jesús chanīmara faafāfe nā efe ikafāfe mato yoisharapaikani.

¹⁴ Nōko Ifo Jesucristo mato axosharapai. Epa Niospari mato noikōi. Niospa Yōshi Shara mato fe rafepakexanō. Nā tii.

Ēkīa Pablo

Pablo Galacia Anoafu Kirika Kenexõ Fomani

Galacia anoxõ Nios Ifofaafu Pablo ato kirika kenexõ fomani

¹ Ëkĩa Pablo, ã mato kirika kenexõ fomai. Niospa ea nĩchini aõnoa meka shara ã ato yoinõ. Yorafãfe ea nĩchinifoma, Jesucristo feta Epa Niospa ea nĩchini. Nã Niospa Jesucristo otofani mã nakẽ.

² Mã Galacia anoxõ Nios Ifofakẽ, na nono efe ikafãfe, akairi Nios Ifofakaxõ efeta mato kirika kenexõ fomakani. ³ Epa Niospa nõko Ifo Jesucristo feta mato noikĩ mato sharakõi fanõ. Askatari mãto õiti mẽranoax mã anã fekaxtenõma. ⁴ Nõ afara chakafamisno nokoõnoax Jesús nani nõko chaka noko soaxoxiki, askatari nã yorafo chakafo mẽranoa noko ifixiki Epa Niospa fichipaiyai keskafakĩ. ⁵ Nãskakẽ Nios sharakõi mẽxotaima fapanakafo. Nãskapakexapainõ.

Anã ano meka fetsama a nikax Epa Nios fe nõ ipaxanõ. Akka Epa Nios fistichi noko nimapakenaka

⁶ Ooa. Epa Nios potakanimara ixõ ã shinãmis, koshikõi kachikiri fayana mã potafiaino, Cristo mato noiaino Epa Niospa mato katofinino. Epa Nios fe ipaikakĩ ãfe meka shara nikafiyana, meka fetsa fetsatapafo nikakakĩ kachikiri famisfo. ⁷ Akka anã anokai meka fetsama, a nikax Nios fe nõ ipaxatiro. Akka nã Nios Ifofaafãfema mato fekaxtefakani. Meka fetsafaxõ anorima mato yoipaikani, Cristoõnoa meka shara mã nikapaifiaino a nikax afe ipaxakĩ. ⁸ Akka fetsafãfe Nios fe mã ipaxanõ Niospa mekaõnoa mato yoifikakĩ, meka fetsafaxõ anorima mato yoikani, mã nõ mato yoifimisno. Nã keskara yorafo nã omiskõipakenakafo mẽranoax omiskõipakenakafo, ã iyamai Niospa ãjiri itiro nai mẽranoax oax. ⁹ Nã ã taefakĩ mato yoiyoni keskafakĩ, iskaratĩa anã ã mato yoi. Fetsafãfe Nios fe mã ipaxanõ Niospa mekaõnoa mato yoifikakĩ anorima mato yoikani, mã nõ mato yoifimisno. Nãnoru mato yoikanax nã omiskõipakenakafo mẽranoax omiskõipakenakafo.

¹⁰ Ë yoiki iskafaino, yorafãfe eõnoa yoisharanõfora ixõ ã shinãima, askatamaroko Niospa eõnoa yoisharanõ. Ëkai yorafo eõnoa shinãmasharapaima. Akka yorafo eõnoa shinãmasharapai, ãkai Cristo yonoxomis itiroma.

Jesucristo ea nĩchini ãfe meka sharaõnoa ã ato yoinõ

¹¹ Efe yora mĩstichi, xafakĩakõi ã mato yoipai. Na meka shara Jesucristoõnoa ã mato yoimis nõ afe ipaxanõ. Na keskarakai yorafãfe ãto shinãmã shinãmisfoma. ¹² Na meka shara ã mato yoimis keskara yorafãfe ea tãpimanifoma. Tsõarikai ea tãpimanama. Askatamaroko nõko Ifo Jesucristo ea tãpimana keskara ã mato yoimis.

¹³ A ã ipaoni keskara mã mã nikapaoni. Ëmãi judeoxõ a nõko xinifãfe yoipaoni keskara ã nikayopaoni. Mã mã tãpia mitsisipakõikai a Nios Ifofaafu ã ato omiskõimapaoni, anã Nios Ifofayamanõfora ixõ. ¹⁴ Nõko xinifo judeofãfe yoipaonifo keskara ã nikakõini, ãfe kaifofo ã ato finõkõini, efe yosifinifono. Ë nikakõikĩ a ãfe xinifãfe yoipaonifo keskara ã nikakĩ finakõini.

¹⁵ Akka taefakĩ Epa Niospa ea katoni ã fakeyoamano. Ea noikõikĩ ea katoni. Nãskakẽ ea tãpimapaikĩ ea askafani. ¹⁶ Nãskaxõ ãfe Fake ea tãpimani ãfe meka shara a judeofoma ã ato yoinõ afe ipaxanõfo. Nãskakẽ ã rama Jesús Ifofakĩ ã tsoa yõkai kai kanima ea tãpimanõ. ¹⁷ Nãskakẽ Jerusalén ano ã kayonima a taefakĩ Jesúsnoa meka sharaõnoa yoimisfo ato õikai. Askatamaroko Arabia mai ano ã kani. Nãskata Damasco ano anã ã oni.

¹⁸ Nāskata Jerusalén ari fena ě kayonima, mā xinia tres akax ě kani. Nānoxō ě Pedro tāpini, nāno ě afe oxa ranāyoni quince nia ě ini ano oxai. ¹⁹ Akka nā Jesús fe rafemisfo fetsafori ě ōinima. Nōko Ifāfe āfe exto Santiago fisti ě ōini. ²⁰ Niospa ferotaifi ě mato yoikōi, na ě mato kirika kenexokī chanīmakōi ě mato yoi.

²¹ Nāskata chipo Siria yafi Cilicia mai ano ě kani. ²² Akka Judea mai anoxō Cristo Ifofafiakaxō ea tāpiayonifoma. ²³ Ea ōiyamafikatsaxakakī eōnoa iskafakī yoiāifāfe nikapaonifo: “A na feronāfāke taefakī noko omiskōimapaofinixaki, iskaratīa Jesúsnoa meka shara ato yoifofāsafai. Askatari noko keyokōi omiskōimakī noko xatemapaipaoni nō anā Jesús nikanōma,” ixō eōnoa yoinifo. ²⁴ Nāskaxō eōxō Epa Nios aicho fakani, mā Pablo Nios Ifofara ikaxō.

2

“Na Pablori noko ani keskafakī Jesús katoa aōnoa āfe meka shara ato yoinō,” fanifo

¹ Mā catorce xinia finōta Jerusalén ano anā ě kani Bernabé fe. Titori ě iyoni. ² Ě ari kani Niospamāi ea yoiano. Nā Jerusalén anoxō xanīfofo fes ichanāxō ě ato yoini a judeofoma Niospa meka sharaōnoa afe ipaxanōfo ě ato yoimis keskara. Nāskakē ě ato yoini: “A ě ato yoimis keskara sharamamākī, mī shara yoimiski ea fakanimākai,” ixō ě ato yoini. ³ Nāskakē tsōakai Tito afaa fanima efe oiano. Tito judeoyamafiano foshki repa xatefe tsōa fanima. ⁴ Nānoa fetsafo nō Nios Ifofara ikanax one ikikanax nofe ichanānifo, Nios Ifofayamafiakanax. Nāfāfe yoinifo iskafaki: “Titopari foshki repa xatetiro,” ixō yoinifo. Nāfāfe noko ōipaikani ikiafo ini, chanīmamākī tāpipaikakī afeskax Cristo Jesús Ifofaax nō ikamāki. Noko anā yonomapaikani nō Jesucristo Ifofanōma a Moisés yoini keskara fisti nikanōfora ixō noko anā yonomapaikani. ⁵ Akka nāfāfe noko yoipaiyaifono nō ato nikamisma. Akka nō fichipaimis nā meka shara chanīmakōi Jesucristoōnoa mā nikakōinō afe ipaxaki.

⁶ Akka a xanīfofofāfe ě ato fe ichanāino, “Nā mī ato yoiaī anori sharamaki, meka fetsa shara ato yoife,” ea tsōa fanima. Akka afo xanīfofofiano ě atoōnoa shināchakaima. Nāskarifiakī Niospa nōko femānāōxō noko onāima, akka Niospa noko tāpikōia. ⁷ Meka fetsa shara ea yoitamaroko, afāfe tāpinifo a Niospa āfe meka ea yoini keskara a judeofoma āfe meka sharaōnoa ě ato yoinō afe ipaxanōfo. A Pedro yoini keskafakī judeofo na meka sharaōnoa ě ato yoinō. ⁸ Nā Nios fistichi Pedro nīchini judeofo mēra āfe meka sharaōnoa ato yoinō. Nāatori ea nīchini a judeofoma mēra ěri a judeofoma āfe meka sharaōnoa ě ato yoinō.

⁹ Nāskakē Santiago ikaino Pedro ikaino Juan ikaino, afāfe a Nios Ifofaafō ato ikikaxō ea tāpinifo Niospa ea nīchinino nā meka sharaōnoa a judeofoma ě ato yoinō. Nāskakaxō ea yafi Bernabé noko metakaxanifo. Noko askafakāta nokoki inimakaki noko yoikī iskafanifo: “Aicho, judeofoma mēra kaxō Niosnoa meka shara mā ato yoitiro,” noko fanifo, judeofoma mēra kaxō Niospa meka sharaōnoa nō ato yoikanō, akka afāfemāi nā judeofo Niospa meka sharaōnoa ato yoikakī. ¹⁰ Akka noko yoikī iskafanifo: “A afaamaisfo ato shināmakiyamakāfe. Afarayaxō ato inākāfe,” ixō noko yoinifo. Askara yoikī ea inimamanifo ěrimāi a afaamaisfo ě ato ināsharamiskē.

“Na mī akai keskara sharama,” Pablo Pedro fani Antioquía anoxō

¹¹ Akka Pedro Antioquía pexe rasi ano kaxō afara chakafaino āfe ferotaifi ě yoikī iskafani: “Na mī akai keskara sharama, mī chakafai,” ixō ě yoini. ¹² Akka taeyoi a judeofoma feta pipaonifo. Nāskaifono chipo a Santiago fe rafeafo fenifo. Mā feafono judeofoma makinoax Pedro paxkani anā ato feta

pinima a rama feafoki atoki mesekĩ mĩ chakafai na judeofoma feta mĩ pii ea fatirofora ixõ. Nãskakẽ anã a judeofoma feta pinima. Akka a judeofoma rama feafãfe ato yoikĩ iskafanifo: “Mã Nios ari kapaikĩ mãto foshki repa mã xatetiro,” ixõ mẽxotaima ato yoinifo. ¹³Nãskakẽ a judeofori Nios Ifofakanax nã Pedro ikai keskanifo. Nã Bernabéri ato fe askani. ¹⁴Akka nõko xinifãfe Niospa meka sharaõnoa noko yoinifo nõ afe ipaxanõ anori Pedro nikayamaito õikĩ yorafãfe ferotaifi ã Pedro yoikĩ iskafani: “Mĩ judeo. Akka a judeofoma fe mĩ imis, nãskax judeoma keskara mĩ imis. Akka, ¿afeskakĩ a nõko xinifãfe yoipaonifo keskara a judeofoma mĩ ato yoipaimẽ, judeofo keskara ixõ?” ã Pedro fani.

Judeofo a judeofoma feta Nios Ifofakanax Nios fe ipaxatirofo

¹⁵ Akka nõ judeokõifo nõ sharakõifo nõ afaa chakafakĩ finakõimisma na yora fetsafãfe amisfo keskafakĩ. ¹⁶ Askatamaroko mã nõ tãpia a Moisés noko yoini keskaraõxõ nõko chaka nõ soatiroma Niospa noko omiskõimanõma. Akka nõ Jesucristo Ifofaito nõko chaka noko soaxotiro, nõ askainokai noko omiskõimaxima. A Moisés yoini keskara nõ shinãito nõko chaka noko soaxotiro. Akka Jesucristo fisti nõ Ifofaito noko omiskõimaxima.

¹⁷ Nõfi Cristoõxõ nõko chaka nõ soatiroki noko omiskõimanõma. Nãskara mã nõ tãpifixõ nõ afara chakafamis. Akka nõ afara chakafaito, ¿Cristo noko afara chakafapaimẽ? Maa, askarama. Noko afaa chakafamatiroma. ¹⁸ A Moisés noko yoini keskara mã nõ tãpia, aõnoaxkai Nios fe nõ nipaxatiroma. Jesús fistichi nõko chaka noko soaxotiro nõ afe nipaxanõ. Nã nõ chanĩmara fai. Akka a Moisés keneni keskara afianã nõ nikapai nõ fenotiro Nios fe nõ ipaxatiroma. ¹⁹ Akka a Moisés yoini keskara ayamakĩ mẽ tãpia ãkai aõnoax isharatiroma. ã askaino Epa Nios ekeki inimatiroma. Nãskakẽ nãfoõxõ mẽ tãpia Cristo fisti ã chanĩmara faino Epa Nios ekeki inimatiro. Nãskax ã afe yora itiro. Akka iskaratĩa a Moisés yoini keskaraõnoa anã ã shinãpakenakama, atokai ea ãkipakexatiroma. Askara shinãtamaroko Nios fisti fe ã rafei afe isharaxiki. ²⁰ Nõko Ifo Cristo ifi cruz ikaki mastafono nani keskai ãri ã afe naa keskarakõi ini. Nãskakẽ iskaratĩa a ã ipaoni keskara anã ã ikima. A ã Jesús Ifofayamax ã ipaoni keskara anã ã shinãima. Niospa Fake Cristo ea noikõi nã ipaiyai keskakĩ ea nãxoni. Nãskakẽ ã chanĩmara faino iskaratĩa Cristo efe ika a keskara shara ea imaxiki. ²¹ Akka Epa Niospa ãfe Fakeõxõ ãfe chaka ea soaxoni ã afe nipaxanõ. ãkai afaa fetsa shinãmisma nisharapakexakĩ, Nios fisti ã shinãkõimis Nios fe nipaikĩ. A Moisés kenenioxõ nõko chaka nõ xateax Nios fe nõ nipaxafiatirono Cristo noko nãxokeranima. ãkõi Cristo noko nãxokerani.

3

A Moisés yoini keskara nõ nikayamakĩ nõ Jesús chanĩmara fakõinaito nõko chaka noko soaxotiro

¹ Efe yora mĩshtichi Galacia anoafãfe, mãfi oa yõra shinãsharaima keskarafoki. Akka, ¿tsõa mato paraimẽ oa mato parakani afianã mã shinãsharanõma? Akka nõ xafakĩakõi mato yoimis Jesucristo ifi cruz ikaki mastafono matoõnoax nani. Nõ mato yoisharafimisno meka fetsa nikakĩ mã anorima shinãmis. ² Akka ã mato yõkapai mã ea yoinõ a Moisés noko yoini keskara tãpixõ mã Niospa Yõshi Shara fiamãki, askayamaki Jesucristoõnoa meka shara nikaxõ mã fiamãki. ³ Niospa Yõshi Sharaõxõ Jesús mato amapaiyai keskara mã ayopaoni. Akka iskaratĩa mã shinãkĩ iskafai: “A Moisés noko yoini keskara nikax nõ isharatiro,” ixõ mã shinãmis. Ooa. ¿Afeskakĩ oa yorafãfe shinãsharaifoma keskara mã shinãimẽ? ⁴ Mã Jesús

Ifofaino mato omiskõimapaonifo, askafikĩ Niospa Yõshi Sharaõxõ mã Jesús Ifofasharamis. Akka afianã mã Jesús Ifofayamai mãkõi kaxpa mã Jesúsnoax omiskõipaoni. Mã askayamapainõ. ⁵ A mã nikamis keskara mã mã chanĩmara fakõina. Nãskakẽ ãfe Yõshi Shara mato mẽra naneyanã, tsõa atiroma keskafakĩ afama mĩshti mato faxõfa. Moisés kenenioxokai mato askafaxõama.

⁶ Shinãkapo. Abraham Nios chanĩmara feito Niospa yoiyoni iskafakĩ: “Mĩ ea chanĩmara feito mĩ chaka ã mia soaxoni mĩ efe ipaxanõ,” ixõ yoini.

⁷ Nãskakẽ tãpisharakãfe nã Abraham ãfe fenafãfe nã Nios chanĩmara faifãfe, nãfãfe chanĩmara fakõinafoki. ⁸ Epa Niospa a inõpokoai keskaraõnoa tãpiyoni a nõko kaifofofãfemari Ifofaifono ãto chaka ato soaxota ato imasharaxixakĩ. Askaifono atoki inimakõini, akka Niospa Abraham yoiyoni iskafakĩ: “Ë mĩõxõ keyokõi nã maifo tii anoafõ ã ato sharafaxii,” ixõ Niospa yoinino kenenifo.

⁹ Nãskakẽ Abraham chanĩmara fani keskafakĩ, akairi chanĩmara faifono Epa Niospa ato sharafaxõi, Abraham sharafaxoni keskafakĩ.

¹⁰ Akka fẽtsa shinãkĩ iskafai: “Moisés yoini keskara ã nikai ã isharakõi,” ixõ shinãi afi ãfe chaka aõ nepakenaka. Akka kirika kenekĩ yoikĩ iskafanifo: “Moisés yoikĩ kirika kenekĩ iskafakĩ yoinino: ‘A Moisés yoini keskara nikayamakani ãto chaka ãto nepakenaka,’ ” ixõ yoinifo. ¹¹ Akka fẽtsa Epa Nios chanĩmara faino ãfe chaka soaxota imasharakõitiro. Akka fẽtsa a Moisés yoinioxõ ãfe chaka soapaikĩ iskafakĩ shinãtiro: “Moisés noko yoini keskara nõ nikaito Epa Niospa noko imasharatiro,” ixõ shinãfiafonokai Epa Niospa a Moisés yoini keskaraõxõ ato imasharatiroma. ¹² Akka mã nõ tãpia Jesús fisti nõ chanĩmara faax Epa Nios fe nõ ipaxatiro. Akka a Moisés noko yoini keskaraõnoax nõ askatiroma. Akka Moisés noko yoini iskafakĩ: “Nã Niospa noko yoini keskafakĩ mẽxotaima nõ nikayamax Nios fe nõ ipaxatiroma,” ixõ noko yoini.

¹³ Akka a Moisés noko yoini keskara: “Nõ nikayamaito Epa Niospa noko omiskõimaxira,” ixõ kenefinifono, noko omiskõimatama, ãfe Fake omiskõimani. Niospa meka kenenifo iskafakĩ: “Fatora fetsa ifi cruz ikaki mastaifono, atori Epa Niospa omiskõimaxii akairi omiskõinõfo,” ixõ kenenifo. Akka nõ afara chakafamisno Cristo nokoõnoax ifi cruz ikakinoax nani. Noko nãxoyamanikẽ nõ omiskõipakexakerana. ¹⁴ Akka Epa Niospa Abraham sharafani keskafakĩ, judeofori Jesucristoõxõ ato sharafaxii. Nãskakẽ a chanĩmara faifo tii ato yoiyoni keskafakĩ ãfe Yõshi Shara atoya rafematiro. Akka Cristo nokoõnoax nani Apa Nios fe nõ ipaxanõ. Nãskatari Niospa Abraham yoiyoni keskafakĩ chanĩmara faifono a judeofomari ato imasharaxii.

Niospa Abraham yoiyonino Moisésri ato yoini nikanõfo

¹⁵ Efe yora mĩshtichi, iskaratĩa nã nõ amis keskaraõnoa ã mato yoi mã tãpinõ. Feronãfake mã afe feronãfake yoiyoxõ anã shinãkĩ fetsafatiroma mãmãi ãfe ane kenexõ. ¹⁶ Nãskarifiakĩ Epa Niospa Abraham yoiyoni ãfe fena fistiõnoa yoikĩ. ãfe fena Cristo fistiõnoa yoini. ¹⁷ Ë mato xafakĩa yoinõ Epa Niospa Abraham yoiyoni keskara cuatro cientos treinta xinia finõta Epa Niospa Moisés yoiniki. Niospa Moisés yoinino akka Abraham yoini keskara anã fetsafatiroma. Nã yoiyoni keskakõimis. Nãskaxõ Epa Niospa anã shinãkĩ fetsafanima, nã yoiyoni keskara amiski. ¹⁸ Epa Niospa Abraham yoiyoni keskara Abraham chanĩmara feito, chipo Epa Niospa Abraham noikĩ ãakõi axosharakõini.

¹⁹ Akka, ¿afeskai a Moisés yoini keskara sharamẽ? Ë mato yoinõ, ea nikakapo. Niospa yoiaino Moisés keneni yorafãfe tãpinõfo afeskax isharatirofomãki, Niospa fichipaiyai keskai. Askatamaroko tosa askamisma, nikayospakõimisfo. Nãskakẽ Epa Niospa ãfe ãjirifo yoini afãferi Moisés yoinõfo

Moisésri yorafo yoinō yorafāfe nikakōinōfo Abraham āfe fena Cristo oyoamano. ²⁰ Akka Epa Niospa Abraham anori yoinima. Āfe ājiriōxō yoyiamata, yorafoōxori yoinima. Epa Niospa āakōi yoipaiyai keskafakī Abraham yoini.

¿Afeskakī Epa Niospa Moisésxō ato yoinimē?

²¹ Akka, ¿Epa Niospa a inōpokoai fo yoyoni keskara yafi a Moisés yoini keskarakōiri mā shināimamē? Maa. Epa Niospa mekakai rafema. A Moisés yoini keskaraōxō noko nimapakexatirokē Epa Niospa nāfoxō nōko chaka noko soaxokerana nō a keskara shara inō. ²² Akka Niospa meka yoikī kirikaki kenekī iskafanifo: “Keyokōichi nō afara chakafakatsaxakī nā nō karaxa mēra ika keskarakōi,” ixō kenenifo. “Akka Jesucristo nō chanīmara faito ares fisti noko kaimatiro afara chaka nōko ifo inōma.” Nāskarakōi yoikī kenenifo.

²³ Nāskakē nō chanīmara fayopaonima. Akka Cristo oyoamano a Moisés noko yoini keskaraōnoax oa karaxa mēra ika keskarafo nō iyopaoni. Akka mā Cristo oano nō chanīmara faino noko kaimanano anākai oa karaxa mēra ika keskara nō itiroma. ²⁴ Nāskakē nō tāpitiro Epa Niospa apaiyai keskafakī Moisés noko yoini. Nāskakē nōko ifo keskara iyopaoni. Akka Cristo oaino nō chanīmara faino nōko chaka noko soaxota noko imasharaxiki. ²⁵ Nō askafipaonixakī mā Cristokōi nokoano a Moisés yoini keskara afianā nōko ifo itiroma anākai aato noko ikitiroma.

²⁶ Akka mā chanīmara faax Niospa fakekōifo mā iki māmāi Cristo Jesús Ifokōi faxō. ²⁷ Keyokōi māfi mā mā Cristo fe rafekōiakī mā maotissimeax keskarax Niospa Yōshi Shara mato mēra naneano. Nāskax oa rapati fena shara safea keskarakōi mā. ²⁸ Epa Niospa Cristoōxō keyokōi nā maifo tii anoafō keyokōi nāskarafos noko ōi. Judeofoya a judeofoma, a ato yonomatifoya a yonomatifoma, feronāfakefoya kērofo, nāskarafos noko ōi. Jesucristo nōko Ifo ikano aōnoax yora fisti keskara nō itiro. Akka keyokōichi nō Ifofaax nō afe yorafo. ²⁹ Akka mā Cristo afe yorax Abraham āfe fenafori mā iki. Nāskakē nā keyokōi Epa Niospa Abraham yoyoni keskara mātonāri iki.

4

¹⁻² Akka ē mato iskara yoipai. Apa naano āfe fāke āfe apanāfo fitiro. Nāskakē nā fake yomekē, fetsafāfe āfe afama mīshtifo kexesharaxoyokaxō, nā fake yome yonomayotirofo. Nāskakē āpa yoini keskafakī āa yosiyonō, yora fetsafāfe āfe afama mīshti kexexoyotirofo. ³ Nāskarifiakī nō Cristo Ifofayoa-mano nō oa fake yome keskarakē nōko xinifāfe noko yoipaiyai keskafakī noko yoipaonifo. Nāskakē ato yonoxomis keskara nō iyopaoni. Nā Cristo chanīmara faafāfema amisfo keskara noko amapaonifo nō ato yonoxomis keskara inō. ⁴ Akka Epa Niospa nā yoinitīa, āfe Fake nīchini, kēromā xakī mēranoax kāini judeokōi nā Moisés noko yoini keskara nikakōipaoni. ⁵ Akka nono mai ano oni, noko imasharaxii a Moisés yoini keskara nikapaimisfono, nāskax Niospa fakekōi keskara nō inō.

⁶ Chanīma, māfi iskaratīa Niospa fakefoki. Nāskakē Epa Niospa āfe Yōshi Shara nō mēra naneano aōxō nō yoitiro iskafakī: “Epa Niosi, mīfi ēfe Epakōi,” ixō nō yoitiro. ⁷ Nāskakē iskaratīa mā Niospa fakefo, a Moisés yoini keskara nō anā nikaima nōko ifo inō. Nāskakē afe fakefo afara ināsharai keskafakī matori afara ināsharaxii Jesucristoōxō.

Pablo a Jesús Ifofafo ato shinākōini

⁸ Akka taeyoi mā Nios tāpiyoamax nā nioskōimafo mā ato nikaito mato yonomayopaonifo. ⁹ Mā mā askapaonixakī, akka iskaratīa mā mā Nios tāpikōia. Epa Niospari mato tāpikōia. Mā mā Nios tāpikōifiax, ¿afeskakī a mā apaoni keskafakī afianā mā ato yonoxopaimē? Afāfekai Epa Nios xanīfo ika

ari mato iyotirofoma. ¹⁰ Nã mãto xinifãfe yoinifo keskai mã askakõimis. Nãskakẽ pena safaronõ mã tenemis, askatari rama oxe kãiyaino mã fista amis, askatari rama xiniaino mã fista amis, askatari seis xinia finõmata mãto tare mã fanamisma. Mã shinãkĩ iskafamis: “Nã fistaĩa nõ ato fe inimaino Epa Nios nokoki inimatiro, nãskaxõ nõko chaka noko soaxotiro,” ixõ mã anorima shinãmis. ¹¹ Ë mato shinãkõimis ã mato yonoxopaoni. Ë mato Jesúsnoa yoikĩ kaxpa ã mato yoipaoni rakikĩa mã shinãyamafiaino.

¹² Efe yora mĩshtichi, ã mato yoisharapai ã akai keskafakĩ anã mã Jesús Ifofanõ. Mã Jesús Ifofai keskafakĩ ãri Ifofaaki. Ë mato fe ikano mã ea chakafapaonima, askatamaroko mã ea sharafapaoni. ¹³ Akka mã mã tãpia Epa Niospa ea nẽtefani taefakĩ Niospa meka sharaõnoa ã mato yoinõ nõ afe ipaxanõ. Akka ã isinĩ iki ã anã katiroma ini. Nãskakẽ ã mato ano nẽteni. ¹⁴ Ë isinĩ iki ã omiskõifiaino mã ea iskafanima: “Pablo isinĩ iki mesekõi nõ afe ichanãtiroma,” mã ea fanima. Askatamaroko mã ea ifisharakõini oa Niospa ãfe ãjiri keskara õikĩ, askatari oa Jesucristo keskara ea õikĩ mã ea ifisharakõini, askatari mã ea kexesharakõipaoni. ¹⁵ Ë mato yoiaino mã inimapaoni. Akka, ¿afeskai iskaratĩa a mã ipaoni keskai anã mã inimaimamẽ? ¿Mã shinãimamẽ a mã ea noikõipaoni keskara? Ë afara yopaito mã ea inãpaoni ea noikõiyana. Akka mãto ferori tsekatiro pinikẽ mã ea inãkerapaoni. ¹⁶ Akka, ¿mã shinãimẽ na meka chanĩmakõi yoikĩ ã mato noikaspai keskara?

¹⁷ A Moisés yoikĩ keneni keskara yora fetsafãfe mato tãpimapaikani. Nãfãfe a shinãifo keskara mato tãpimapaikani mã ato keskara inõ. Akka a akaifo keskara mã ato feta aka a keskarakai sharama. Nãskaxõ nãfãfe noko paxkanã fapaikani afianã mã ea nikatama afãfe mato yoiaifo keskara mã ato nikanõ. ¹⁸ Akka fetsafãfe mato sharafaifono shara itiro. Ë mato fe iyamafiano mato sharafaifono, nãskarari sharakõi itiro. Jesucristoõxõ mato sharafaifonori sharakõi itiro. ¹⁹ Ëfe fakefãfe, afianã ã matoõnoax omiskõikĩ ã pae meekõi. Nã kãromã fake kãikĩ pae meetiro keskarakõi ã mei. Akka mã fake kãixõ anã pae meetiroma. Nãskarifiakĩ mã Jesús Ifofayamaino ã matoõxõ pae meekõitiro. Akka Cristo ãfe Yõshi Shara mãto õiti mẽra naneano afianã ã mãtoõxõ pae meetiroma. ²⁰ Ooa. Iskaratĩa ã ano mato fe ipainõ afianã ã mato yoisharaxiki. Akka ã tãpiama a mã shinãi keskara mã anorima shinãi. Akka ã ano mato fe ixõ ã mato yoisharakõikerana.

Agar fe Sara ipaonifo keskaraõnoa noko yoi

²¹ Niospa shinãmanaino a Moisés kirika keneni keskaraõnoa mã anã nika-paimãkai Nios Ifofakaspakĩ ea yoikapo ã mato yoinõ. Akka, ¿a Moisés yoini keskara mã nikamismamẽ? ²² Iskafakĩ yoikĩ kenenifo: “Abraham fake rafeya ini. Fetsa ãfe ãfinĩ yonomati feta fake ani, fetsa ãfe ãfikõi feta ani. Nã ãfe ãfikõi tsõa yonomati inima,” ixõ keneni. ²³ Nã Abraham ãfe ãfinĩ yonomatĩnĩ fake fini, nã kãrofãfe fake fimisfo keskarari fake fini. Akka Abraham ãfe ãfikõi yõxafokõi ini fake fitiroma. Nãskafekẽ Epa Niospa Abraham yoiyoni iskafakĩ: “Mĩ ãfinĩ fake feronãfake fixii,” ixõ yoinino, nãskakẽ Abraham ãfinĩ fake feronãfake fini. ²⁴⁻²⁵ Nã xotofake rafeoxõ Niospa afara fetsa noko shinãmani. Niospa yoiyoni afeska faxõ yorafo ifitiromãkĩ. Nã kãro Agar nõ shinãino machi Sinai noko shinãmani, Arabia anoa. Nã machi ãfe ane fetsa Agar. Nã machi arixõ Niospa Moisés yoini Moisésri nã israelifo ato yoinõ nikakõinõfo. Askatari nã kãro Agar nõ shinãino noko Jerusalén shinãmatiro. Nã Jerusalén ano ikafo nõ shinãino nã Agar ãfe fakefo noko shinãmatiro. Nãfãfe Moisés yoini keskara nikakanax nãfo ãto yonomati keskarafo. ²⁶ Akka nãno kãro fetsa Abraham ãfe ãfikõi. ãfe ane Sara, nã nõko efakõi keskara. Nõ Sara

shinãino Jerusalén fetsa nai mēranoa noko shinãmatiro Epa Nios ika aria. Nāskakē chipo nō ari ixii. Nōri Sara keskara nō āto yonomatima, āfe fakefori āto yonomatifoma. A Moisés yoini keskarakai nōko ifo itiro. ²⁷ Akka kirika kenekī iskafanifo:

Kēromā, mī fake fimismakī inimafe, askatari mī fakeyamakī inimayanā tai tai ife mī fake pae meemismaki. Akka nā kēro fenē eneyoa nāfi chipo āfe fena ichapayakōi ixii kiki, a kēro feneya finōmainīfofā, ixō yoikī kirika ano kenenifo.

²⁸ Efe yora mīshtichi, nōfi Isaaca keskaraki. Epa Niospa Abraham yoiyoni keskai āfe fake Isaaca chipo kāini. Nāskarifiakī Epa Niospa yoiyoni keskai nōri āfe fakefo. ²⁹ Nā āto yonomati Agar yōxafxoma āfe fake fikī taefani āfe ane Ismael. Akka nā fake fimismato Sara chipo yōxafxō fake fini Niospa Yōshi Sharaōxō. Nāskano Agar āfe fake Ismael iyoaxō āfe exto omiskōimapaoni. Nāskarifiakī Niospa Yōshi Sharaōnoax nō Niospa fake ikaino, fetsafāfe Nios Ifofakaxoma noko omiskōimatirofo. ³⁰ Akka kirika kenekī, ¿afaa fanifomē? Kenekī iskafanifo: “Mī fake Isaaca ē ināxiai keskara, akka nā mātō yonomati Agar āfe fāke afaa fixiima. Nāskakē mato anoxō āfe fakeyafi ato nīchikāfe afianā mato fe inōfoma,” ixō Epa Niospa Abraham yoini. ³¹ Nāskakē ē mato yoi efe yora mīshtichi, nōkai a āto yonomatinī fake keskarafoma. Askatamaroko nōfi Abraham āfe āfikōichi fake keskarafō. Nāskaxō nō Nios Ifofaax nō tsōa yonomati itiro, nō Niospa fakekōifo itiro.

5

Cristoōnoax isharakāfe a mā ipaoni keskara chaka anā shinākakima

¹ Akka Cristo nokoōnoax nani a Moisés yoini keskara nō anā nikanōma, nāskax anā āto yonomati nō inōma. Cristo fistiōnoax nō isharatiro, nāskakē Cristo kachikiri fayamakāfe. Mā ipaoni keskara anā iyamakāfe, nōko xinifāfe yoinifo keskara afianā nikayamakāfe āto yonomatifo ixikakīma.

² Ē mato yoinō, ea nikasharakapo. Iskafakī shināyamakāfe: “Ē foshki repa xatekema Epa Niospa ēfe chaka ea soaxotiroma,” ixō shināyamakāfe. Anori mā shināito Jesús mātō chaka mato soaxotiroma Epa Nios fe mā ipaxanō. ³ Afianā xafakīakōi ē mato yoipai. Fatora fētsa mā foshki repa xatepai Nios fe ipaikī, anori shināfikī nā Moisés yoini keskara nikakōiamax, anorima shināx Nios fe mā nipaxatiroma. ⁴ Moisés yoini keskara fisti mā nikaito mātō chaka mato soaxotiroma. Nāskax mā Cristo fe rafeima, akka Epa Niospa mato noifiaino mā Cristo fe rafeima, akka Epa Niospa mato noifiaino mā Cristo kachikirifai. Nāskafekē mato afeska fatiroma mātō chaka mato soaxona mā afe ipaxanō. ⁵ Akka Niospa Yōshi Sharaōxō mā nā tāpia, Cristoōxō nōko chaka noko xoaxotiro Niospamāi noko noikōikī. Nāskakē nō manasharai. ⁶ Nō foshki repa xateano, askayamākī nō xateamano, afāfekai nōko chaka noko soaxotiroma. Akka nō Jesucristo Ifofakōinaino fetsafo noko ato noimasharakōitiro nō ato noisharakōinō. Nā fisti nō fichipai, chanīmara fasharakōixii.

⁷ Mā Jesús Ifofasharayopaoni. Akka, ¿tsōa mato yoiamē, na meka sharakōi kachikirifayanā mā anā nikanōma? ⁸ Akka Niospakai anori mato yoiamā. Āfe Fake fisti mā chanīmara fanō mato yoia. ⁹ Akka mato mēraxō yora fistichi chaka shinākī, nā fistichi keyokōi mato afara chaka shināmatiro, aōxō chakakōi mā shināno. ¹⁰ Ē Nios kīfiyanā nōko Ifo ē chanīmara fakōini, ē akai keskafakī māri chanīmara fanō. Akka nā mato fanīrira chaka shināmanaifo Niospa ato omiskōimaxii.

¹¹ Efe yora mīshtichi, akka eōnoa yoikī mā iskafamis: “Na Pablo yoimis nō foshki repa xateamax nō Nios ari katiroma ixō yoimis,” mā ea famis.

Maa, ěkai anori yoimisma, ě anori yoiaito ea omiskōimakeranafo. Akka ě yoimis: “Jesucristo ifi cruz ikaki mastafono noko nāxoni, nōko chaka noko soaxoxii Epa Nios fe nō ipaxanō,” ixō ě yoimis. Nānori ě yoiaito nikakī nā Jesúsnoa nikakaspamisfāfe ea omiskōimamisfo. ¹² Akka fetsafāfe mato yoimisfo iskafakakī: “Mā foshki repa xatexoma mā Nios chanīmara faima,” ixō fanīrira mato shināmamisfo. Nānori yoikakī mato fekaxtefamisfo, nāfo anā mato fe iyamapainōfo.

¹³ Efe yora mīstichi, Jesucristoōxō iskaratīa āfe meka fisti nikakōikāfe. Afaa fetsa mato yonomayamafiaino chakafayamakāfe. Jesucristo mato imasharakī iskaratīa nā nō apaiyai keskara nō atiro iyamakāfe. Akka fetsafo fe axō faatanākāfe noinākōiyanā. ¹⁴ Akka Niospa Moisés yoini iskafakī: “Nā mā noimeai keskariakī fetsafori noisharakāfe,” ixō yoini. Mā askafakī nā Niospa Moisés yoini keskara, keyokōi mā aki. Mā askafakī keyokōi a Niospa Moisés yoini keskara mā aki. ¹⁵ Akka mā chakafaatanax mā keyotiro, oa paxta rafe keyonākanax retenātirofo keskai. Nāskakē kexemesharakāfe askaxikāma, a mato feta Nios nikamisfo anā mato fe ichanātirofomaki. Askatari Nios kachikiri fatirofoki.

Nōko shinā mēraxō nō afara chakafapaimis keskara yafi a Niospa Yōshi Sharaōnoax nō isharatiro Pablo ato yoini

¹⁶ Akka ě mato yoi Niospa Yōshi Shara nikasharakāfe aōnoax isharaxikaki. Nāato mato yoitiro mā afeskaimākai. Nā nikakōixō afianā a mā apaoni keskara mātō shinā mēraxō afara anā mā atiroma. ¹⁷ A nōko shinā mēraxō nō afara chakafapaiyai keskarakai Niospa Yōshi Sharapa shināima. Nāskaxō āfe Yōshi Sharapa noko amapaiyai keskara nōko shinā mēraxō nō shināfikī nōkai askafapaimisma. Nōko shinā mēraxō nō shināpaoni keskarakai Niospa Yōshi Sharapa anori shināmisma. Akka nā nō apaiyai keskafakī nō atiroma. A nō afara chakafapaoni keskara nō anā ayamakī Niospa Yōshi Sharapa nōko shinā mēraxō noko yoiai keskara nō nikakōitiro. ¹⁸ Nāskakē Niospa Yōshi Shara nofe rafeaino a Moisés yoini keskara anā nōko ifo itiroma noko yonomaxiki.

¹⁹ Fetsafāfe Nios nikakaspakakī afarafo chakafakani. Mā mā tāpia afe keskarafo ikafomāki. Nāskakē feronāfakefāfe āto āfimafo chotamisfo. Nāskakata afara fetsa fetsatapafō chakafamisfo. ²⁰ Nāskakaxō afara yora fakaxō na nōko niosra ixō kīfimisfo. Askatari koshoiti tāpiafo, askatari ato noikaspamisfo, askatari isharakātama ōitifishkimisfo. Nāskakaxō atonā fisti afara apaimisfo, askatari noikaspā faatanāmisfo nores fisti nō tāpikōia a nō tāpia keskara tsōa tāpiama ikanax. ²¹ Nāskaxō fetsafo afara fīapaimisfo, askatari pāemisfo, askatari pikīfinapaikōimisfo. Nāskakaxō afara fetsa fetsatapafō chakafamisfo. Ě mato yoimis a keskara chakafo Epa Niospa keyokōi ato ĩkinā ano tsoa katiroma afe ipaxakakī.

²² Akka Niospa Yōshi Sharapa noko ĩkināno fetsafo nō noikōitiro ini-makōiyanā, askatari nō isharakōita nō fekaxtetiro, askatari fena fenakima nō manasharakōiyotiro, askatari nō fetsafo chakafamisma itiro, askatari nā nō yoimis keskara nō atiro isharakōita. ²³ Askatari isharakōita, fetsafo fe feratenātama oi tsifaxō ato yoimis ita, askatari a Niospa fichikaspai atama nōa nō kexemetiro afaa chakafaxikima. Nāskaxō Niospa āfe Yōshi Sharaōxō noko yoia keskara nō atiro isharaxiki. Nāskakē anā meka fetsa nō yoipaima Niospa Yōshi Sharaōnoax isharaxiki. Nāskakē anā noko tsōa yonomatiroma. ²⁴ Nā Cristo chanīmara faifo tii afe yorakōifo. Jesús cruznoax noko nāxoni nōko chaka noko soaxoxiki. Akka nō naa keskaraxō anā afaa nō chakafatiroma a nō apaoni keskara. Nāskakē nā noko Niospa amapaiyai keskara fisti nō

atiro. ²⁵ Nāskakē Niospa Yōshi Shara fe nō rafekī nā noko yoiai keskara nō nikakōitiro. Nāskaxō nā noko amapaiyai keskara nō atiro.

²⁶ Nāskakē Niospa Yōshi Shara fe nō rafeax kakapaimis nō itiro, fetsafāfe nokoōnoa yoisharanōfora ixō ē mato finōkōiara iyamakāfe. Mā askakī fetsafo mā shināchakamatiroki. Mā askara chakafo shinākī mā shināsharatiroma, askara chakakōiki.

6

Mā ranā axosharanōnā faatanākāfe

¹ Efe yora mīshtichi, fētsa afara chakafaito ōikī, Niospa Yōshi Sharayaxō aō noikī oi tsii faxō yoisharakāfe, afara chakafakī xatenō. Meka mitsisipato yoyamakāfe. Nāskakē māri kexemesharakāfe afara chakafayamaxiki.

² Nāskakē fetsafo fe afara axonōnā faatanāsharakāfe. Mā ranā Nios kīfinōnā faatanākāfe. Fetsa omiskōiāito aō noikī inimamakāfe, nāskakē kexenōnā faatanāsharakāfe. Fetsa omiskōiāito Nios kīfixokāfe Jesúsnoa shināmasharayanā Ifo sharafanō. Mā askakī nā Cristo yoini keskara keyokōi mā akikai.

³ Akka fētsa shinākī iskafai: “Ē sharakōi. Ēkai tsoa yopaima ea Nios kīfixonō,” ixō shināi. Nā keskara yorakai afama, āakōi pāramei. ⁴ Akka nō nōko shinā mēraxō nō shinātiro nō Jesús yonoxōsharaimākai. Akka nō yonoxōsharai mā nō tāpiax nō inimasharatiro. Nāskakī nō shinākī iskafatiroma: “Na fetsafāfe afara chakafaifo keskafakī ē afaa chakafamisma,” ixō nō shinātiro. ⁵ Akka keyokōichi nō afara chakafamis. Nāskaxori keyokōichi nōko shinā mēraxō nō shinātiro a nō afara chakafamis keskara. Tsōakai a Niospa noko amapaiyai keskara noko amatiroma, nōakōi nō atiro.

⁶ A Niospa meka mato yoimisto afara yopaito ināsharakāfe.

⁷ Mārifi anofi pārameyamakāfe, tsoari Nioski kaxemetsamapaitiroma. Akka akiki kaxemetsamapaiyaifono Niospa ato omiskōimatiro. Akka afara nō fanaxō mā fimiano āfe fimi nō fitiro. Nāskarifiakī Niospa meka nikayamata nō afara chakafaax nō omiskōitiro. Akka nā Niospa noko yoia keskara nō akax nō isharakōitiro. ⁸ Akka fētsa āfe shinā mēraxō afara shinākī afara chakafaax omiskōifinakōitiro. Akka Niospa Yōshi Sharapa amapaiyai keskara fētsa afafāini, nāfi Niospa Yōshi Sharaōnoax nisharapakenakaki. ⁹ Nāskakē afara sharafakī eneyamakāfe. Nāskaxō iskafakī shināyamakāfe: “Mē fetsafo sharafayomiski iskaratīa ē anā askaimakai, ē anā fetsafo sharafatiromaki. Nāskanō,” ixō anori shināyamakāfe. Akka nō askatama nō inimakōikē nā noko ināpaiyai keskara shara Niospa noko ināsharaxii. ¹⁰ Nāskakē afeskaraiāfe ōikī keyokōi ato axosharafafāikāfe. Nāskatari a Nios Ifofafo ato noisharayanā ato axosharafafāikāfe.

Pablo mā mekai xatekī ato yoisharani

¹¹ Akka iskaratīa ēkōi mato kirika kenexoni. Ēfe kene efapakōikī ōikapo. ¹² Akka fetsafāfe mato yoipaikani iskafakakī: “Māto foshki repa xatekāfe nōri askaraki,” ixō mato yoimisfo. Akka mato yoipaikanima a Jesucristo ifi cruz ikakinoax noko nāxoni nōko chaka noko soaxoxiki. Askara mato yoimisfoma, askara nō ato yoiaito noko omiskōimatirofora ikaxō. ¹³ Nāfāfe mā foshki repa xatefikaxokai a Moisés kenei keskara tsōa nikakōimisma. Nāskakaxō matori yoipaikani māto foshki repari mā xatenō. Māri nā imisfo keskai mā ato fe askaito, nāfāfe fetsafo yoitirofo iskafakakī: “Nafāfe noko nikakōimisfo,” ixō ato yoitirofo. ¹⁴ Akka ēkai anori shināpaima, nā meka shara fistiōnoa ē yoipaifafāini. Nā meka shara fistiōnoa ē yoipaikī ē iskafai: “Aicho, Jesucristo ifi cruz ikakinoax ea nāxoni, aōxō a ē chaka shināpaoni keskara anā ē shinātiro. Jesús nā ea nāxofaitīa nā ē afarafo chakafapaonifo mā Jesús

fe naa keskarakōi. Nāskakē anākai ea afeska fatiroma,” ixō ē shinātiro. ¹⁵ Nō Jesucristo Ifofaxō nō foshki repa xatea askarakai sharama atokai nōko chaka noko soaxotiro. Akka nō Ifofaito Niospa nōko chaka noko soaxotiro fena keskara shara nō inō. ¹⁶ Niospa Yōshi Sharapa Jesúsnoa noko yoia keskara mā akē Epa Niospa mato inimamakōiyānā mato noikōi. Nāskax Niospa fakekōifo mā iki.

¹⁷ Akka mē mekai xatekī ē mato yoinō. Ēfe Ifo Jesúsnoax ē omiskōimis, ēfe yora toafo ōikī mā tāpitiro ē Jesús yonosharaxonaito ea iskafamisfo. Nāskakē anā ea fekaxtefayamakāfe.

¹⁸ Efe yora mīshtichi, nōko Ifo Jesucristo keyokōi mato noikī mato sharafa fafāfāini. Nāskapainō. Nā tii.

Pablo

Pablo Efeso Anoafu Kirika Kenexõ Fomani

Pablo ato yoisharani, Efeso anoafu

¹ Ëkĩa Pablo ẽ mato kirika kenexõ fomai. Ea Jesucristo nĩchia ẽ aõxõ әне meka yoimis inõ, Niospa fichipaiyai keskafakĩ. Ẽ na kirika mato fomai a Nios Ifofaafu, Jesucristo chanĩmara faafu, Efeso anoafu. ² Nõko Epa Nios feta nõko Ifo Jesucristo mato shinãsharanõ mato noikĩ mato shinã mẽra mato shinãmasharanõ, mato õiti fekaxtenõma.

Nõ Cristo chanĩmara faito afara sharafo noko amatiro

³ Nõko Ifo Jesucristo әне Apa Niospa noko afara sharafo noko shara famai, nai mẽraxõ nõ õiamafiaito nõko õiti mẽra noko inimamasharai nõmã әне fakefokẽ. Nãskakẽ nõ yoisharai nõ inimasharakõi Epa Nioski. ⁴ Epa Niospa mai yafi nai onifayoxoma noko katoni nõ afe ãpaxanõ әне Fake Cristo keskara afaa chakafamisma keskara sharakõi nõ inõ. Niospa noko noikĩ, ⁵ әне fakefo noko fani. Anori shinãni Niospa a Jesucristo noko nãxoyoxiai. ⁶ Nãskakẽ Niospa әне Fake noikõikĩ nokori nãskarifai noikĩ. Nãskaxõ noko nimasharapakenaka. Nãskakẽ Nios sharafinakõikẽ nõ aicho fai akiki inimakĩ nokomã afama mĩshti sharafo famaito Jesúsxõ. ⁷ Niospa noko noikĩ finakõikĩ әне Fake Jesús noko nãmã nĩchixonĩ nokoõnoax әне imi foax ifi cruz ikakinoax noko nãxonõ nõ sharakõi afe inõ, askatari nõko chaka nokoõnoa noko soxonõ. ⁸ Nãskaxõ Niospa noko õimana noko noisharakõikĩ noko tãpimasharakõikĩ, askatari noko shinãmakĩ finakõi. ⁹⁻¹⁰ Nãskakẽ Epa Niospa yoini afama mĩshti onifayoxoma әне Fake xanĩfo imaxikĩ, keyokõi, nai mẽranoafoya, nãmãnoafoyari ato xanĩfo finakõi inõ. Tsoa pishta anori meka nikayomisma Niospa onãxõ yoini a shinãi keskafakĩ, anori noko tãpimani nõ tãpisharanõ aõxõ. Nãskakẽ Niospa әне shinãkĩ iskafani: “Nã әне Fake ẽ nĩchipaiyaitĩ әне nãmã nĩchixii keyokõi nai mẽranoafoya, nãmãnoafori ato xanĩfokõi inõ,” ixõ Niospa shinãni. Nãskaxõ nãnori iskaratĩa noko tãpimana.

¹¹ Nõfi Cristo fakekõifokĩ. Nõ afe yorakõifo ikaito, Epa Niospa noko katoni noko onifayoxoma әне shinãkĩ taefani. Epa Niospa nonori iskafakĩ shinãni: “Na әне Fake Jesús ẽ inãi keskari fakĩ nã әне Fake Jesús Ifofaifori ẽ ato inãira,” ixõ Epa Niospa shinãni. A Niospa shinãkĩ yoini keskara, nãskarifakĩ iskaratĩa mã askafaa. ¹² Akka nõ Cristo Ifofakĩ taefaxõ nõ yoikĩ iskafanõ: “Epa Niosi, mĩ fãsi sharakõi. Mĩ noko sharafamis keskara sharakõi. Tsoa fetsakai mia keskara sharama,” ixõ nõ yoinõ.

¹³⁻¹⁴ Nãskakẽ ẽ mato yoi mãkai judeofoma. Nãskafixõ Niospa meka shara Jesúsxõ mã nikakĩ mãri chanĩmara fai. Mã askaito Niospa mato chaka soaxona mã afe nipaxanõ. Nãskakẽ mãri iskaratĩa Cristo afe yorafokĩ. Anori Niospa yoikĩ taefani keskafakĩ, әне Yõshi Shara nõ mẽra nanea noko ãkinõ. Noko askafaito nõ tãpitiro әне shara noko inãxii. Nãskaxfi nõ Niosnoafoki. Nãskakẽ nõ tãpiama afetĩara nai mẽra noko ifi. Taekõifakĩ anori noko yoini. Nãskakẽ nã chanĩmara fakĩ nõ yoipakenaka: “Nõko Nios fãsi sharakõi,” ixõ nõ yoipakenaka.

Pablo Epa Nios yõkani iskafakĩ: “Epa Niosi, mĩ Fake chanĩmara faafu ato tãpimasharafe,” fani

¹⁵⁻¹⁶ Nãskakẽ nirixõ ẽ mato nikai mã Jesús Ifo sharafata, a fetsafo feri a mato feta Nios Ifofamisfo fe mã rafesharakõiaito ẽ nikakĩ inimayanã ẽ nirixõ ẽ mato Epa Nios kĩfixõfafãini. Nãskakẽ ẽ iskafa fafãini: “Epa Niosi, na Efeso anoxõ mã noisharakata fetsafo feri rafesharakõiafo,” әне fai yoikĩ. ¹⁷ Niospa әне

Fakekōikī Jesucristo. Nāskax sharafinakōia. Nāskakē ē mato kīfixokī iskafamis: “Epa Niosi, mī Yōshi Sharapa na Efeso ano ikafo ato tāpimasharakōife mia xafakīakōi tāpisharakōinōfo. ¹⁸ Oa xini peisharaino nō fomākīa foiski nō nai xafakīakōishara nō ōitiro keskara, mī Yōshi Sharapa ato ōimafe Epa Niosi, mia tāpisharakōinōfo āto ōiti mēraxō. Askatari ato tāpimafe a nō oniyamatai mī noko shināni nono nāmāxō mī Fake Jesús nō Ifofaax nō mefe ĩpaxanō nai mēra. Askatari a nō ōimismafo mī noko ināxiai ato ōimafe. ¹⁹⁻²⁰ Epa Niosi, mī Yōshi Sharaōxō mī afama mīshti famis. Nāskaxō mī Fake Cristo mī anā nimani mī Yōshi Sharaōxō mefe pataxamei niax mefe xanīfokōi inō. Nāskax mī pōya kayakai aōri mefe tsoa. Afia mī Yōshi Shara nō mēra nanexō a nofeta mia chanīmara faafo tii afara fetsafo mī noko ispasharakī mī noko amasharakī.” ²¹ Āfe Yōshi Sharaōxō Cristo ato mānāo nīxō, nā nāmānoafo āto xanīfo tii finōkōia. Askatari nai mēranoafori āto xanīfofo Cristo ato finōkōia keyokōi. Nāskax āto xanīfo finakōia. Tsoa pishta finōtiroma. ²²⁻²³ Akka Epa Niospa āfe Fake yoini keskafakī keyokōi mai anoafoya nai mēranoafo ato ĩkinā. Nāskaxō āfe Fake katonī nā chanīmara faafo tii āto Ifo inō. Nā chanīmara faafofi āfe yorakōi keskarafoki. Cristo āto mapo keskara. Akka nōko māpo nō shinātiro. Nā fistichi nā chanīmara faifo yoitiroki, noko ĩkināno afeskaxō nō atiromāki. Akka nō mapomaisax nō nitiroma. Nāskarīfiai nōko Ifo Jesúsmaisax tsoa nitiroma. Keyokōi nā chanīmara faafo nofe ikafo. Nāskax nofe rafe kakāini nā noko amapaiyai keskara nō anō.

2

Niospa noko noikī noko ifia nō afe ĩpaxanō

¹ Taeyoi mā iyopaoni oa naa keskara māto chaka soaxma. ² Nāskakē mā afara chakafamis, a yora chakafāfe akai keskafakī. Askata a nai mēra ikafāfe a niafaka chakafāfe āto xanīfāfe Satanās mato amapaiyai keskafakī mā amis, Satanās ifofakī. ³⁻⁴ Nōri askafapaoni, nā nō afara chakafapaiyaifo keskara nō apaoni. Afara chaka shināmiskōifo nō ipaoni. Epa Niospa nā nikayospamisfo ato omiskōimanaitīa ato omiskōimakōixii. Nōri ato keskaraxō nō afara chakafaito nā ato akai keskafakī nokori omiskōimakerana. Akka nō afara chakafafiatō noko omiskōimatama. Niospa noko fāsi noisharakōimis, noko shinākōikī noko omiskōimapaima. Noko chakafapaimisma. ⁵⁻⁶ Nō Nios Ifofayoxoma nō shināyopaonima, chaka fistis nō shināyopaoni, nō chakafayopaoni. Niospa noko noikōifiatō, nō oniyamatai ares noko Niospa ōikī yoini: “Na ēfe Fake Jesús Ifofaifo ē ato nāmā nīchixonī mā reteafono, ē otofaxō, ato yafi ifixii niri nai mēra afe ĩpaxanōfo,” ixō Niospa yoini ares ōikī afe ikaifono ato omiskōimayamaxii. Nāskakē nō nāmānoax oa nō afe nai mēra ika keskara nō nono ika nāmā. ⁷ Epa Nios xanīfokōixō Jesús yafi noko otoani noko noikōikī nō afe nai mēra ĩpaxanō, nā chipo fakeaifāferi tāpinōfo Epa Niospa noko noikōiaito. ⁸⁻⁹ Nios sharafinakōia. Nō Jesús chanīmara fakē noko ifi nō afe ĩpaxanō. Akka nōa nō ifimetiroma, Nios fistichi noko ifitiro noko noisharakōikī. Akka nō afarafo shara fatokai noko ifitiro nō afe ĩpaxanō. Akka fetsafo āa chanīkani iskatirofoma: “Ē afama mīshti famis. Nāskakē ē tanaima sharakōi Nios ano kai,” ixō yoifiax askara yorakai Nios ano katiroma āamāi chanī Jesús Ifofaamax. ¹⁰ Nāskakē Epa Niospa taeyoi shināyonī Jesucristoōxō yorafetsafo nō axosharakōinō. Nāskakē aa fistichi noko onifani afara fetsafo nō sharafanō aōxō. Akka nores fisti nō afaa sharafatiroma. Cristo Jesús Ifofaxō nō afama mīshti sharafatiro. Nāskakē taeyokī Epa Niospa ares ōikī yoini.

Jesucristoōnoax nō ōiti sharakōiya ipanaka anā nōko ōiti chaka neenōma

¹¹ Nāskakē shināmakiyamakāfe. Mā chanīmara fayopaonima. Nā judeofāfe yora fetsafo ato yoikī iskafanifo: “Nā yora fetsafo nōko kaifoma. Akka nōfi Niospa yorafokī. Akka na yora fetsafokai Niospa yorafoma. A Niospa noko yoimis keskafakī keyokōi nōko foshki repa nō xatepakemis na nō judeofāfe. Nāskakē nō ōimani afe yorakōifoxō. Akka a yora fetsafāfe āto foshki repa xatemisfoma. Nō ato tāpitiro afokai Niospa āfe yorafoma,” ixō judeofāfe mato yoimis mā judeofokēma. ¹² Akka shinākapo. Taeyoi mā kai Cristo fe iyopaonima. Epa Niospa israelifo ato katonī keskafakī matorikai katoyonima mā ato fe afe yorafo ipanā. Afe yorafo yoiyoni keskafakī matorikai yoiyonima. Mā shinākī iskafani: “Ooa. ¿Nō afeskatīromē nōko chaka noko soaxonō nō Nios fe ipaxanō?” ixō mā shināpaoni. Nāskatari nā Nios chanīmara faafoma mēra mā iyopaoni. Mā Nios fe rafexoma mā tāpiyopaonima. ¹³ Nāskaxō mā Niosnoa shināyopaonima. Nāskafiano Cristo Jesús matoōnoax naino, āfe imi foni mā afe ipaxanō. ¹⁴ Nāskakē Jesucristoōnoax nō noinātiro, ēfe kaifo israelifo fe yora fetsafo. Nāskakē nāskarafos noko shināmasharatiro nō aōnoax noinā faatanāx afianā nō noikaspa faatanānōma. Nāskakē afanā noko anā afeska fatiroma. Iskaratīa nō Cristoōnoax yora fisti keskarafō. ¹⁵ Nāskakē Jesús nokoōnoax nani. A Moisés Niosxō kenenī keskara anā noko tsōa yoitiroma. Jesucristo keyokōi noko nāxoni nō afe yorafo inō. Nāskakē māri judeofoyamafekē, mato yafi noko ifini. Nāskax a yora fisti keskarafō nō inō. Mā nō fetsa keskarax ōitisharayakōifo nō inō noināsharakōi. ¹⁶ Nāskakē Jesús ifi cruz ikakinoax noko nāxoni. Na ēfe kaifo judeofo yafi a judeofomari Jesúsxō Niospa noko a yora fisti keskara noko fani. Noko noisharakōikī nō nikayospafo iyopaofinikē, Jesús nokoōnoax nani. Nāskakē Niospa noko yora fetsafoya rafema sharakōia afe yorafo nō inō.

¹⁷ Nāskakē Jesús nāmā fotoxō noko yoini āfe meka shara Niospa noko ifinō. Noko judeofo akai keskafakīri, matori ifia mā judeofoyamafekē mā Nios shināyamafipaonino. Akka nō judeofāfe nō Nios shināyopaoni. Nāskakē iskaratīa nō anā noikaspa faatanātama nō noināsharakōi. ¹⁸ Jesús noko nāxoni nōko chaka noko soaxoxiki nō Nios fe rafesharakōinō afe ipaxakī. Nāskakē Niospa āfe Yōshi Shara nokoya rafemana na nōko kaifomafo fe nō rafesharakōinō. Nāskax Epa Nios fe nō ipaxanō.

¹⁹ Nāskakē iskaratīa mā anā Nios chaifaama mā afe yorakōifo. Nāskakē iskaratīa a Jesús Ifofamisfo fe a rama Jesús Ifofaifo Niospa yorakōifo. ²⁰⁻²² Nāskax mā oa pexe sharakōi keskarafō. Oa tokiri nō pexe shara faa, afeskax paketiro ma keskara. Taefakī nō mai pōkita a mēra tokiri nanexō, nō pexe fatiro pakeyamanō. Tokiri kerex sharakōiki nō atiro pexe fakī. Nāskarifiakī taefakī a Niospa mekaōnoa ato yoipaonifāfe ato yoipaonifo Niospa ato shināmanaino. Akka chipo mā Jesús nāmā fotoxō, aōxō tāpimisfo ato ifini aōxori a fetsafo tāpimanōfo, oa pexe fisti mēra nō imis keskaraxō, akairi ato tāpimanōfo Niospa meka sharaōnoa ato yoikakī, atoōxori yorafāfe chanīmara fanōfo. Askaxori a rama fakeaifāferi Jesús Ifofakanax, oa nō pexe mitsisipakōi faano, anā paketiro ma keskarakōi inōfo Jesucristo Ifofakanax. Nāskakē nōri Ifokōi faax, nōri anā paketiro ma nō keyokōichi Ifofaax. Oa pexe sharakōi mēra nō ika keskara, nō ixii, Niospa āfe Yōshi Shara nō mēra naneano.

3

Niospa Pablo yoini a judeofoma Jesúsnoa yoinō

¹ Nāskakē ē mato Epa Nios yoixoni. Ēfi judeokī mā ēfe kaifoyamafekē ē mato noi. Mato noixō, ē mato Jesucristoōnoa yoi. Nāskakē ea achixō karaxa mēra

nīchitifo. ²⁻³ Niospa ea nīchini ē aōnoa ē mato yoinō. Niospa keyokōi yorafo ato noi, judeofo fisti ato noima. Akka a iyopaonifāfekai tsōa tāpiyopaonima Niospa ares ato noifaito. Nāskakē ē aōnoa ē mato kenexona, pishta fakī. ⁴ Na ē mato kenexona ōixō, mā tāpitiro nā ē tāpia keskafakī Cristoōnoa. Akka a nōko xinifo iyopaonifāfekai tsōa tāpipaonima. ⁵ Niospa taefakī toa tāpimayonima. Mā iskaratīa Niospa āfe Yōshi Sharaōxō a aōnoa yoimisfo mā ato tāpimana. Askatari a āfe mekaōnoa yoimisfori mā ato tāpimana. ⁶ Akka na meka sharakai tsōa Jesúsnoa tāpiyopaonima. Akka yora fetsafori Epa Niospa afe yorafo itirofo. Nāskakē iskaratīa matori Niospa tāpimani, judeofoya yora fetsafo Jesúsnoax Niospa fakefo mā inō. Nāskakē Epa Niospa āfe kaifo judeofo yoiyoni keskafakī Jesucristoōxō akairi fitirofo.

⁷ Nāskakē a Jesús Ifofafo ē ato chakafafaito, ea noisharakī Epa Niospa ea nīchini ē āfe meka shara ato yoinō āfe Yōshi Sharaōxō. ⁸ Ē fāsikōi Jesús chakafakī finakōipaoni, na fetsafāfe chakafakī finayamafiaifono. Ē askafafaito, ares fisti Niospa ea noikī ea nīchini aōxō na yora fetsafo judeofoma ē āfe meka shara ato yoikī tāpimanō Niospa ato noisharakōiaito. Ato noikī ato shināmakōipai. Nios fisti toa keskaramakōi. Āfe Fake Jesúsnoa keyokōi nō tāpitiro. ⁹ Niospa keyokōi onifaxō, ea nīchini ē ato mēstesharakōi tāpimanō. Tsoa pishta tāpimano ares fisti tāpini Jesús noko nāxoyoamatai ato tāpimanimā. ¹⁰ Nāskakē Niospa ea nīchini āfe meka sharaōnoa ē ato yoinō akairi Nios tāpinōfo. Tāpikanax oa ato fe yorakōifo keskara ixikakī Jesúsnoax. Mā askaito nai mēraxō a xanīfo tiito askara ōikī tāpisharatirofo. “Chanīma, Niospa tāpikīfinakōia,” fatirofo. ¹¹ Afaa pishta onifaataima nānori shināni: “Na ēfe Fake Cristo Jesús Ifofaifo efe yorakōifo ixikani,” ixō yoini keskara mā iskaratīa askakōia. ¹² Jesúsmaī noko nāxonikē, nō Ifofaax, nō Nios fe rafesharatiro mesetama noko potayamanō. ¹³ Ē mato yoinō, ea nikakāfe. Ē mato yoiaito ea nikakakī ea karaxa mēra ikimatifo. Ē omiskōifiaino eōnoa shināchakayamakāfe. Ea karaxa mēra ikimanafoki ē Cristoōnoa mato yoiaino. Nāskafekē inimasharakāfe, mā Niospa yorafokī.

Cristo noko noi

¹⁴ Nāskakē nāfo shinākī ē ratokonō mai chachipakefōfā ē Epa Nios kīfimis. ¹⁵ Nāmāi nai mēranoafo feta nono mai anoxō nā Ifofaafāfe āto Epakē, nāato ēfe fakefora noko famis. ¹⁶ Nānori ē mato Epa Nios kīfixokī iskafamis: “Epa Niosi, mī fāsi sharakōi. Maitiofo yafi nai mēranoafo mīnākōifo. Mī afama mīshti fatiro. Mī Yōshi Sharaōxō mia chanīmara faafo Efeso anoafo mī kerex shara ato ināfe. ¹⁷⁻¹⁹ Nā Jesús Ifofafo mī Yōshi Shara atoya rafemafe. Mia tāpikī finakōinōfo. Askaxō tāpinōfo mī fāsi ato noiaito. Mī Fake Cristori fāsi ato noi. Cristo noko noiai keskara tsōa tāpitiro. Askafikē ato tāpimafe, Epa. Akka tāpikanax, mī ato fe rafekōiaito mia keskara inōfo,” ixō ē matoōxō Epa Nios kīfifāini.

²⁰ Akka Epa Niospa afama mīshti fatiro a nō yōkai tii noko axotama finōmata noko axotiro. Nāato āfe sharaōxō noko axotiro afama mīshtifo. Noko axopaiyai keskafaito nō tāpitiro. Finōmainīfofāta noko shara fatiro. ²¹ Nāskakē nō Epa Nios yoikī iskafatiro: “Epa Niosi, mī sharafinakōia. Mī Fake Jesucristoōxō mī noko sharafamis,” ixō mēxotaima nō yoifafāini. Keyokōichi nā chanīmara faafo feta a inōpokoiaifāferi yoisharapakenakafo. Nāskapakexapainō.

4

Niospa Yōshi Sharaōnoax oa yora fistikōi keskara nō itiro

¹ Ĕ mato yoisharakōi. A Jesucristoōnoa Ĕ mato yoimis. Ĕ ato yoiaito a Jesucristo nikakaspaiĕfe ea karaxa mĕra nĕchiafo. Ĕ mato yoisharanō, ea nikasharakōikāfe. Niospa mato katonĭ Jesucristo mĕ Ifosharakōi fanō. A Ĕ mato yoiai keskai isharakōikāfe. ² Nĕskax, “Ĕ finakōia,” iyamakāfe, anori shinātama. Yora fetsafo noisharakāfe ato shinākĭ. A fĕtsa tĕpisharamato mato afeskarafaito, shinĕchakatama ato noisharakāfe, ōitĭfishkitama, isharakōita. ³ Niospa Yōshi Sharaōnoax nō isharakōinō a yora fistikōiax itikini. Tanaimakōi ikāfe, ōitĭfishkiki faatanākakĭma. ⁴ Niospa noko yoimis keskai: “Isharakōikāfe, nōko Ifo ifofasharax, mĕ chaima anĕ fotoiyoi kiki,” shinĕi isharakāfe. A Nios Ifofaafari oa nofe naneafō keskarakōifoki. Nĕskax isharakāfe. Niospa āfe Yōshi Shara askarakĭ. ⁵ Nōko Ifokōi Jesucristo. Nĕ fisti nō chanĭmara fai Ēpa Nios fe ĩpaxakĭ. Nĕskakĕ āfe Yōshi Shara nō mĕra nanei. ⁶ Anĕ fato fetsa nōko Niosma. Nĕ fistikōi āfe Fake fe a chanĭmara faafō tiito āto xanĭfokōi. Nĕskaxō keyokōi onifani. Nĕskakĕ a Ifofaafō āfenākōifo. Nĕskaxō afara sharafo noko amai nōko shinĕ mĕraxō afe keskararāfo noko amatiro. Āfe Yōshi Sharaōxō keyokōi a fĕchipaiyai keskara nō anō āfe shinĕ noko inĕi.

⁷ Nō Jesŭs Ifo sharafaito ōikĭ āfe shara noko minia fisti rasi chanĭmara faifo nō ato axonō Jesŭs Ifofasharakōinōfo. Keyokōi āfe sharaōxō afara fetsa nĕ Jesŭs apaiyai keskara anōfo ato inĕi. Nō fisti keskarafiakĕ nĕ noko imapaiyai keskara noko ima nō afara axonō. ⁸ Nĕskakĕ Niospa meka Cristoōnoa yoikĭ David kirika kenekĭ iskafani:

Nono mai anoax Apa Nios ari kaitĭa nĕ Ifofaafō tii āto chaka ato soaxoni afianĕ Satanĕs āto ifō inōma, askatamaroko Ifo sharakōi fanōfo. Nĕskatari keyokōi nĕ afe yorafo ato imapaiyai keska fakĭ ato imani aōnoax ishara faatanĕnōfo, ixō kenenĭ.

⁹ Nĕskaxō kenekĭ iskafani: “Nono mai anoax Cristo afianĕ Apa Nios ari kani,” ixō kenenĭ. Nĕnori kenenino nō tĕpĭtiro Apa Nios ari kayoamano na mai ano fotoyonino nai mĕranoax noko keskara ixiki. ¹⁰ Niospa yoiaino, fotonĭ. Mĕ reteafono āfe Apa Niospa otoani. Nĕskaxō ifini afe nai mĕra ixii. Nĕskakĕ keyokōi nai mĕranoafōfāfe nono nĕmĕnoafāferi āto xanĭfo ixii. ¹¹ Nĕato noko katonĭ noko imapaiyai keskai aōnoax nō shara faatanĕnō. Nĕskaxō fetsafo afe rafemisfo ato imata, nokori nĕchi aōnoa fetsafo nō ato yoisharanō. Fetsafori katonĭ nĕ meka shara aōnoa ato yoinōfo Jesŭs Ifofanōfo. Fetsafori katonĭ āfe meka shara chanĭmara faifono ato tĕpĭmayanĕ ato kexesharanōfo āfe meka nikasharakōinōfo. ¹² ĴAfeskakĭ ato Niospa katonĭmĕ? Aōxō yoinōfo Niospa ato katonĭ a yora fetsafo ato yoisharanōfo, a Jesŭs chanĭmara faafō aa yora fisti keskara inōfo Jesŭs tĕpĭkōikanax. ¹³ Afĕfe Niospa Fakeōnoa noko tĕpĭmasharakōiaifono, aōxori fetsafori nō ato yoikĭ tĕpĭmasharanō. Askax keyokōi oa yora fistikōiax itikini nō inō. Askaxori Jesŭs afe keskaramĕki nō tĕpĭsharakōinō. Askax oa Jesŭs ōiti keskara sharakōi ixiki. ¹⁴ Nĕskax anĕ oa fakefo keskara nō itiro ma mĕ nōmĕra Niospa meka yosiano. Oa nefe onori kai, anĕ onori kai imis keskai, fakefo askatirofo afaa shinĕsharaima. Askaxō a Niospa meka tĕpĭsharafĕfema ato yoiaifĕfe nĕkafofĕsa fatirofo. Askaxō tĕpĭsharaxikakĭma Niospa mekakōi. Askatari a yora āa chanĭki fanĭrira ato yoimis nō nikatiro ma. ¹⁵ Fanĭrira ato yoitama nō nōinĕsharakōixō Niospa meka mĕstesharakōi nō ato tĕpĭmasharakōitiro. Nō askai nōko Ifo Jesucristo āfe ōiti keskara sharakōi nō itiro. ¹⁶ Jesŭs nōko mapo keskaraxō noko shinĕmakĭ noko yonomanaino, oa afe yora keskara nō itiro. Akka nōko yora meemafĭax nō mĭfĭmais ita, nō kishĭmais ita, nō pachomais ita, nō feromais ita, ixō nō afaa yonotiro ma, afaakairoko shinĕkĭ. Akka nō mĭfi rafeyata, nō tae rafeyata, nō fero rafeyata, askai fetsexō nō meemasharakōixō nō yonosharakōitiro

shināfāi, nōko yoramāi meemasharakōikē. Nāskafakīri keyokōichi nō Jesús Ifokōi faax nofe yorafo fe nō isharakōitiro noināsharakōikai, Jesúsnoax mā noko āfe Yōshi Shara ināno oa āfe yora keskara sharax.

Cristo nōko ōiti noko fetsafaxōano a keskarakōi nō itiro, anā nō ipaoni keskara ixikima

¹⁷ Jesucristo ea īkinā aōxō ē mato yoinō. Ea nikasharakōikāfe a Jesús Ifofamisfāfema fanīrira chaka fisti yoimisfo fanīrira shinā kakī. Nāskakē tsōa shināsharaima. Nāskakē ato keskara iyamakāfe. ¹⁸ Tsōa shināima oa fakishifā mēra niafo keskarafo. Askatari oa feromais keskara ikafo chai ōima. Nāskakē tsōa tāpifāi shināmisma. A Niospa shināi anori shināmisfoma. Nāskakē tsōa Nios Ifofapaimisma. ¹⁹ Āto ōiti kerexkōi. Askakaxō afarafo chakafakani tsoa rāfitiroma. Nikayospakōimisfo, nō finakōiara ikani nikayospakani. ²⁰ A Jesús noiaifāfema shināifo anori mato Jesús tāpimamisma fanīrira chaka. ²¹ Jesús mato tāpimamis chanīkī mato yoimisma. ²² A Nios tāpiamax mā iyopaoni anori anā shināyamakāfe. Fanīrira mato Satanās shināmayopaoni mā chaka inō. ²³ Anā anori shinātama, iskaratīa Niospa Yōshi Sharapa mato shināmapaiyai anori shinākāfe a mā iyopaoni shināmakikāta, isharakāfe. ²⁴ Ōiti fenashara fichipaiyāfe. Oa nō rapati chapokōi potaxō nō rapati fenasharakōi nō safemis keskafakī, ōiti fena sharaya ikāfe Niospa fichipaiyai keskai.

²⁵ Nāskax nō Cristo yorafo. Nāskakē anā fanīrira chanī yoiyamakāfe. Afara ōixō yoikōikāfe chanīmakōi.

²⁶ Mā ōitifishkikī anā afarafo chakafayamakāfe. Askata aa chai ōitifishkiyamakāfe. Ōitifishkipai samama raekāfe xini ikiyamano. ²⁷ Mā ōitifishkiriaito koshikōi Satanās mato chakafamarisafai. Askayamakāfe Satanās nō mēra ikiyamanō.

²⁸ Mā yometsoyopaoni anā askayamakāfe. Iskaratīa yonokāfe a mā fichipaiyai fixikakī, a yora afaamaisfo ato ināxikakī afara sharafo.

²⁹ Askata anā fanīrira chaka yoiyamakāfe. Shināsharata yoisharakāfe. Mā askaito mato nikakanax āto ōiti mēra inimanōfo. Askatari Jesús Ifofasharanōfo. ³⁰ Askata Niospa āfe Yōshi Shara nōko ōiti mēranoa omiskōimayamakāfe afara chakafakī. Askatamaroko nōko Ifāfe āfe Yōshi Shara nokoōnoa inimamasharakōikāfe. Āfe Yōshi Shara nō mēra naneakī, oa koxa marakka faa keskarafakī Niospa noko askafaa nā Jesús anā fotoaitīa.

³¹ Māto yora mēraxō mato ōiti fishkimamis a chaka shināmakikāfe. Ato noikaspai ōitifishkikī finakōimis iyamakāfe. Afaa shināima oa ōitimaais keskara āakōi mekai keskara iyamakāfe. Fāsikōi yōachepemis ato ferateni iyamakāfe. Ato noikaspakī ato īchayamakāfe. Mā chakara ato fayamakāfe. Mākōi chakafakī ato noikaspayamakāfe. ³² Askatamaroko ato fe raenā faatanāsharakōikāfe, a mato Niospa aka keskafakīri Jesúsxō ato raefakāfe.

5

Afeskax Niospa fakefo itirofomē

¹ Mā Niospa fakefokē mato noisharakōi. Nāskakē a keskara ikāfe, Ifofasharakōi. ² Cristo noko shinākī finakōi nokoōnoax nani. Nōko chaka noko soaxoni. Nāskakē noko nāxoni, aakōi nanima. Nāskaito xafakīa Epa Niospa ōini nōko chakaōnoax nani, anā nōko chaka nokoō neenōma. Nāskakē mā ranāri nōināi finasharakōikāfe.

³ Mā Niospa fakefokī ōisharata ikāfe. Isharakāi afarafo chaka shinātama. Māto āfimafo chotayamakāfe. Kēromāri māto fenemafo chotamayamakāfe. Askatari mares fisti afama mīshti a mā fichipaiyai fo fiyamakāfe. ⁴ Askatari fanīrira meka chaka yoiyamakāfe. Anori shinātama a Niospa fakefo

isharakōikaxō, mēstekōi yoisharatirofo iskafakī: “Aicho Epa Niosi, mī noko ikisharakōiaki,” ixō mā yoimis. ⁵ Mā mā tāpimis yora fetsafāfe fanīrira shināmisfo āto āfimafo chotamisfo ato fe oxakaxō, kēromāri āto fenemafo chotamamisfo, askara yorafo Nios ano fokanima. A afarafo noikakī fichipaimisfo, askara yorafāfe afama mīshtifo noikani Nios shinātama, askara yorafo a Nios xanīfo ano fokanima.

⁶ Ōisharakakī yora fetsafāfe anorima mato yoipaikani fanīrira āa mato pārakakī. Askara yorafāfe Nios nikakaspakakī chakafakani. Askaito ōikī Niospa ato kopikiri chakafaxii atoki ōitifishkikī. ⁷ Nāskakē nā ikaifo keskara mā iyamakāfe. Afarafo ato feta chakafakī, anori shināyamakāfe.

⁸ Mā fanīrira shināyopaoni mātō ōiti oa fakish keskara ikax, akka iskaratīa mā Cristo fe rafeax a mā iyopaoni keskara anā mā shināima. Mātō ōiti xafasharakōia mā ika. Nāskara shara. Mēxotaima isharakāfe. ⁹ Nāskax mā isharakōimis. Cristo mato ikināno mātō ōiti xafasharakōi mā imis. Mā isharakōiax shara mā itiro. Mātō ōiti mēraxō mēstesharakōi mā shinākōitiro. Mā anori shināxō anā fanīrira mā yoima. ¹⁰ A Niospa fichipaiyai keskafakī tāpisharakōikāfe. Nāskakōi fakāfe. ¹¹ Nā Nios Ifofakaspamisfāfe, afaa tāpiamafāfe afarafo chakafaiifāfe ōiki māri ato feta chakafayamakāfe. Ato ōitamaroko ato yoisharakōikāfe: “Anā afaa chakafayamakāfe,” ixō ato yoikāfe. ¹² Askatari a yora fetsafāfe one afama mīshti chakafafiakī onepaimisfo. Askarayakai nō mekaima nō yoi nō rāfitiro. ¹³ Akka mā fakishano nō rāpari otaxō, keyokōi nō ōisharakōitiro. Nāskarifiiai a yorafāfe afarafo chakafakaxō onepaifaiifāfe, Niospa meka ōikī tāpitirofo a chakafamisfo. ¹⁴ Nāskakē Niospa yoimis iskafakī:

Afarafo mā chakafamiski moinīfofākāfe oa mā naa keskara ikax finīfofākāfe Cristo mātō ōiti mēra oa fafeai keskara mato fasharanō, ixō yoimiski.

¹⁵ Nāskax isharakōikāfe. Oa Niospa meka tāpiama keskara iyamakāfe. A Niospa mekaōnoa yoikī kenenifo anori isharakōikāfe. ¹⁶ Nāskakē a Nios Ifofaafomafo iskaratīa chakafinakōiafo. Nāskakē māri isharakōikāfe ato keskara ikakīma. A Niospa apaiyai keskara akāfe mēxotaima. ¹⁷ Nāskakē fanīrira chaka shināpaiyamakāfe a Niospa mato amapaiyai anori tāpisharakōikāfe. ¹⁸ Askatari anā pāeyamakāfe. Mēxotaima pāeriai mā chakakōifo itiroki. Askaxō mā afaa shināsharaima. Askatamaroko Niospa Yōshi Shara mato mēra naneano afe rafesharakāfe mato yonomasharanō. ¹⁹ Nāskakē mā ranā Niosnoa yoinōnākāfe isharakōikai. Nōko xini David mēxotaima fanāipaoni keskariai māri Nios Ifofaax aōnoax fanāikāfe mā ranā mātō ōiti mēraxō nōko Ifo shināi inimayanā. ²⁰ Pena tii aichora fakāfe Epa Niospa noko afama mīshti faxōfaino, nōko Ifo Cristo shināyanā nō Ifo sharafanō.

Afe keskara nō itiomē Cristo yorafo

²¹ Cristo nikasharapai, mā ranā nikanōnāsharakōikāfe.

²² Kēromāri a mātō Ifo Jesús mā nikasharai keskafakī, mātō fenefo ato nikasharakōikāfe mato yoisharaifāfe, mātō Ifo Jesús mā nikai keskafakī. ²³ Cristo nōko xanīfofinakōia nō nikasharai keskafakī, kērofāferi āto fenefo nikasharakani āto xanīfomāiyakē. Askatari Cristo noko ifimis nō nikasharakōitiro oa nō afe yorakōifo keskaraxō. ²⁴ Nāskakē kēromā āfe fene nikasharatiro āfe xanīfomāiyakē a nōko Ifo Jesús chanīmara faafo tiito nikasharaifo keskafakī.

²⁵ Nō Cristo Ifofaano noko noikōiax aakōi nokoōnoax nani. Nāskarifikāi feronāfakefāfe, mātō āfiffo noisharakōikāfe. ²⁶ Mā āfe meka chanīmara faito, oa noko fāka choka keskara faxō noko katonī, oa nō afaa chakafamisma keskara noko imaxii. ²⁷ Mā noko ifiax, nāskax nokoōnoax nani nōko chaka

noko soaxoxiki nõ isharanõ. Nã anã nõko Ifo Jesús oaitĩa a chanĩmara faafo tii noko ifixõ sharakõi noko õixii, oa nõ afaa chakafamisma keskara noko õixii. ²⁸ A feronãfakefo ãa noimesharaifo keskafakĩ, mãto ãfifo noisharakãfe. ²⁹⁻³⁰ Akka shinãkapo. Tsõa pishtakai ato yora chakafamisma. Nõko yora nõ mesefakĩ fonãikĩ nõ pimis shara nixiki. Nãskafakĩri Cristo a afe yorafo ato kexesharamis mãmãi nõ afe yorakõifokẽ. ³¹ A Niospa meka yoimisto keneni iskafakĩ: “Nãskakẽ feronãfãke kero fiax anã apa fe afa ikano anã ano itiroma. Paxkatiro, ãfi fe ixiki. Askax oa fisti keskara ixiki anã rafema,” ixõ yoikĩ keneni. ³² A Niospa meka yoimisto keneni anori taefakĩ tsõa tãpinima. Mã iskaratĩa noko Niospa tãpimasharai a nõko Ifo Cristo Ifofaafo tii afe yorafokanax, oa fisti keskara afe yorafo ixõ keneni. ³³ Ë mato yoi fisti rasichi mãto ãfifo noisharakõikãfe. Mëxotaima aa mã mã noimeai keskafakĩ mãto ãfifo noisharakãfe. Askatari kero fãferi ato fenefo noisharakõikaxõ nikasharakõinõfo.

6

¹ Fakefãfe, mãto epa nikasharakõikãfe mãto efa yafi, nõko Ifo Jesús noikĩ. Nãskara sharakõi. ²⁻³ Epa Niospa Moisés shinãmanaino kirika keneni iskafakĩ askara nõ nikanõ: “Mãto epa yafi mãto efa noisharakõiyã ato nikasharakõikãfe. Mã askafakĩ nono mai anoxõ xinia ranã mã aki inimayanã,” ixõ Niospa shinãmaino Moisés kirika keneni.

⁴ Iskaratĩa ato apafari ã yoisharai. Mãto fakefo ferateyamakãfe matoki õitifishkiyamanõfo. Ato askafatamaroko a nõko Ifãfe noko noiai keskafakĩ, mãto fakefo tãpimasharakõikãfe. Fenãmãshta ato yoisharakõikãfe akairi Jesús tãpisharakõinõfo.

⁵ Askatari ato yonoxomisfãferi mãto xanĩfo tii ato nikasharakõikãfe, nono mai anoxõ mato yonomanãifãfe mãto xanĩfo tiito. Nãskakẽ mato yoiaifãfe ato nikasharakõikãfe, nã nõko Ifo Jesús fichipaiyai keskafakĩ mã samama ato axorisa fai. Askatari mãto xanĩfãfe mato yonomanaito mã axosharatiro. Nãskakẽ, “Ë Cristoõxõ yonosharai,” ixõ nõ yonosharatiro. Nãskarifikĩ ãfe xanĩfori ã yonosharaxotiro. ⁶ Mãto xanĩfãfe mato õiainos yonoxosharakakima, mato õiayamafianori yonosharaxokãfe inimakõiyã. Mã askaito õi inimanõ. Mã mãto xanĩfo yonosharaxokĩ, nã nõko Ifo Cristo yonoxona keskara mã faikai. Akka nono mai anoxõ mãto xanĩfo mã inimama keskafakĩ, nõko Ifo Niospa mato amapaiyai keskara mã axikai. Nãskax nõko Ifo Jesús ãfe yonomati ixikakĩ. ⁷ Inimasharakĩ yonosharaxokãfe. A mã nõko Ifo yonosharaxonai keskafakĩ mãto xanĩfori yonosharaxokãfe inimayanã. ⁸ Mã mã tãpia yorafãfe yonosharãifãfe õikĩ, Cristo afara sharakõifo ato inãxii, a xanĩfomais inãta a xanĩfoyari inãxii.

⁹ Nãskakẽ mã xanĩfofãferi, a mato yonoxomisfo ato shara fakãfe. Nõ mato chakafaira ixõ ato ferateki koshapayamakãfe. Shinãkãfe, mãri Ifoyakĩ a nai mẽra ika. Nõko Ifo Cristo keyokõi nãskarafos noko õi kiki.

Afeskax nã nõ chanĩmara faafo tii nõ mitsisipasharakõi itiomẽ fetsafãfe noko afara chakafamapaiyafono nõ afaa afeska fanõma

¹⁰ Ë mato yoisharanõ, ea nikasharakõikãfe, efe yora mĩshtichi. Nõko Ifo Niosnoax nõ mitsisipakõi itiro ãfe Yõshi Shara no mẽra naneano. ¹¹ Ë afara fet-saõnoa mato yoinõ mã tãpinõ. Sorarofõ ato xanĩfãfe ato yoitiro itipinĩsharanõfo fetsafãfe ato afeska fanõfoma. Nãskaxõ a aõ xorakomeaifo kerexkõi ato inãtiro, maiti kerexkõiri ato inãtiro, sitora kerexkõiri ato inãtiro fetsafãfe ato retenõfoma. Nãskarifiakĩ Epa Niospa ãfe Yõshi Shara mato inãpaiyaito fikãfe, Satanás chakata mato afara chakafamapaiyai keskara axikakĩma. ¹² Akka nõkai yorakõifo fe mẽenãima. Askatamaroko nã niáfaka yõshi chakafo fe nõ

iki, kerexkai noko afara chakafamapaiyaifono. Nāfāfe nō ōiamafiaino noko afara chakafamapaikani. Nā niafaka yōshi chakafo ichapakōifo. ¹³ Nāskakē Epa Niospa āfe kerex shara mato ināpaiyaito fikāfe aōnoax mitsisipakōi ixikakī, niafaka yōshi chakafo matoki nokoxō, mato afeska fanōfoma. Nāskaxō nā niafaka yōshi chakafāfe mato afara chakafamapaiyaito Niospa kerex sharaōxō mā finōtiro mato afaa chakafamanōfoma. Akka Niospa nā mato amapaiyai keskara mā akōinax mā isharakōitiro, niafaka chakafo mato makinoa potax. Nāskax Jesús fe rafexō mā afaa chakafaima.

¹⁴ Ē mato yoiai keskai sorarofō itipinī sharatirofo keskai. Māri itipinī sharakāfe niafaka yōshi chakafo matoki nokoxō mato afara chakafamapaiyaifo keskara axikakīma. Epa Niospa mato amapaiyai keskara fisti akāfe isharaxikakī. Sorarofāfe ĩkisi āto sītora kerexkōi itipinī fatirofo ayaxō āto rapati safexikakī. Nāskarifiāi mā isharakōiaino niafaka yōshi chakata mato afeska fatiroma. Askatari sorarofō āto safeti kerexkōichinī xorakometirofo, nā ato noikaspaifāfe āto ōitiki ato pīanōfoma. Māri Niosnoax isharakōikāfe, nikafaka yōshi chakafāfe māto ōiti mēraxō mato afaa chakafamanōfoma. ¹⁵ Oa sorarofāfe āto sapato shara safekanax ichotirofo keskariai, māri nāskari akāfe. Nāskarifiāi mā ato Niospa meka yoisharaikai mā katiro a Niospa meka nikamisfoma mēra. Itipinī sharakāfe fetsafoki nokoxō Niospa meka sharaōnoa mā ato yoiaito nikai inimakōinōfo. ¹⁶ Akka sorarofāfe āto xītimati nā kerexkōi tsomatirofo a ato noikaspaifāfe ato pīanōfoma. Nāskarifiakī a mato xītixonai mā fenai. Mā nōko Ifo Jesús chanīmara faino nā niafaka chakafāfe mato afara chakafamapaiyaito mā atiroma. Nāskakē nō Jesús chanīmara fakōinaino nā nōko xītimati keskara itiro. ¹⁷ Sorarofāfe āto maiti kerexkōi safekaxō āto mapo kexesharatirofo, a ato noikaspaifāfe ato mapoki afeskafanōfoma. Nāskarifiakī mā Jesús chanīmara fakōinax mā Epa Nios fe nipaxatiro. Mā askaito niafaka chakata mato afeska fatiroma. Sorarofāfe āto keno fitirofo a ato noikaspaifo fe aō ato fe retenāxikaki. Nāskarifiakī Niospa Yōshi Shara oa keno keskaraki fikāfe. Nā keno keskaraki Niospa meka shara nā mā fichipaikōi niafaka yōshi chaka matoki nokopaiyaito otimafaxikakī. ¹⁸ Shināmakiyamakāfe. Mēxotaima kīfikāfe Niospa āfe Yōshi Sharaōxō mato tāpimasharai. Shināmakixoma mato shinākōi. Nāskakē shināchakayamakāfe. Mēxotaima ato Nios kīfixokāfe a Ifofaafo ato axosharanō. ¹⁹ Nāskaxō eari kīfixokāfe Niospa Yōshi Sharaōxō āfe meka shara mesetama ē ato yoinō. Nā āfe kaifomafoōnoaxri Jesús ato nāxoni ē yoinō tsōa tāpiyonifoma. ²⁰ Ea Niospa nīchini anori ē ato yoinō āfe meka shara. Nāskakē ea karaxa mēra ikimanifo. Nāskakē ea kīfixokāfe ē Niosxō ato yoinō mesetama.

Pablo mā mekai xatekī Efeso anoafō meka shara fomani

²¹ Nofe yora Tíquico ē aō noisharakōi. Efeta nōko Ifo Jesús yonoxomiskē. Ē Tíquico mato ari nīchixii, ē afe keskara ikamākī mato tāpimanō. ²² Nāskakē ē a mato ano nīchikai nō afe keskaramāki a Tíquico mato tāpimanō. Nāskakē māto ōitinī shināsharai mā inimanō mā mā tāpiax.

²³ Nōko Epa Nios feta nōko Ifo Jesucristo māto ōiti mēra mato shināsharamanō mā fekaxteyamanō. Jesús chanīmara faax, keyokōi mā nōināi fetsenō. ²⁴ Nā nōko Ifo Jesucristo noipakenakafo Nios sharakōi mato noikōipakenaka. Askapakexapainō. Nā tii.

Ēkīa Pablo ē mato kenexoni.

Pablo Filipos Anoafu Kirika Kenexō Fomani

Pablo karaxa mēraxō a Nios Ifofaafu Filipos anoafu ato kirika kenexō fomani

¹ Ēkīa Pablo, Timoteo feta nō Jesucristo yonoxomis. Nāskakē nā Epa Nios Ifofaafu nā māto xanīfofoya a mato kexemisfo nō kirika kenexō fomai mā tāpinō. Nā pexe rasi Filipos anoafu nō fomai, nāfofi Jesucristo afe yorafoki. ² Nōko Epa Nios feta nōko Ifo Jesucristo mato noikī mato sharafai kiki mato inimamakī mā anā fekaxteyamanō mā isharakōinō.

A Nios Ifofaafu Pablo ato kīfixopaoni

³ Nā ē mato shināitīa, ē Epa Nios aichofa fafāfāini. ⁴ Ē Epa Nios kīfikī mēxotaima inimakōikai keyokōi ē mato kīfixōfafāini. ⁵ Mā efeta Jesucristo chanīmara fakī taefanitīa, iskaratīari mā efeta Niospa meka shara Jesucristoōnoa mā ato yoimis. ⁶ Chanīmakōi ē yoi, nā Epa Niospa māto ōiti mato shara faxoni keskafakī nē askakōifa fafāfāini nā Jesucristo oaitīa. ⁷ Nāskakē nānori shinākī ēfe ōiti mēraxō ē matoōnoa shināfafāini, ēmāi mato noikōikī nā Epa Niospa ea sharafai keskafakī mārīmāi efeta meemiskē. Akka ea karaxa mēra ikimanifo. Nāskakaxō xanīfofofāfe ferotaifi ea iyomisfo anoxō ē ato yoisharanō Niospa meka sharaōnoa afe īpaxanōfo. Iskafakī ē ato yoimis: “Jesús noko nāxoni nōko chaka noko soaxoxiki nō afe īpaxanō,” ixō ē ato yoimis. ⁸ Epa Niospa tāpia keyokōi ē mato noikōiaito a nōko Ifo Jesucristo noko noikōiai keskafakī. ⁹ Ē mato Nios kīfixokī iskafaxōfafāini, mā nōināi finakōinō, askatari mā tāpisharakōixō nikakōisharayanā mā tāpikōinō. ¹⁰ Nāskaxō afara sharakōifo tāpixō katonōfo. Nāskakanax isharakōitirofo, afaa chakakai matoō netiroma, matoōnoari afara chaka yoitirofoma mā Cristo oaino. ¹¹ Nāskaxō nā Jesucristo mato sharafai keskafakī, māri askafatiro. Mā askaito mato ōikī fetsafāfe mato yoikī iskafatirofo: “Aicho, nafo isharakōiafo Epa Niosnoax. Nios fāsi sharakōi,” ixō yoixikani. Nānori matoōxō ē Epa Nios kīfifafāini.

Ē shināi ē Cristo fe rafepakenaka

¹² Efe yora mīshtichi, mā tāpinō ē mato yoinō. Ea karaxa mēra ikimafiafono, akka ē mēxotaima Niospa meka sharaōnoa ē ato yoifafāini afe nīpaxanōfo. ¹³ Nāskakē sorarofāfe xanīfāfe pexe anoxō fetsafo feta mā tāpiafo ē karaxa mēra ikē Cristo Ifofai. ¹⁴ Ē karaxa mēra ikano nā nōko Ifo Jesús Ifofaafāfe atirifāfe Niospa meka sharaōnoa ato yoikakī mesetamakōi inimakōikai nōko Ifoxō ato yoikani.

¹⁵⁻¹⁷ Chanīma, fetsafāfe Cristoōnoa meka shara yoifikakī ea finōpaikani, ea shināchakamapaikakī. Akka fetsafāfe ea noikakī eōnoa shināmisfo iskafakakī: “Pablo karaxa mēra ikimafiafono Epa Niospa meka yoiaito tsōa xatematiroma Jesúsnoa ato yoiaito nikakōinōfo,” ixō Jesúsnoa yoisharatirofo. Akka fetsafāfe Cristoōnoa yoikakī: “Noko nikakōinōfora,” ixō ato yoipaikani ea finōpaikakī ē karaxa mēra ikano. Akka fetsafāfe ato noikakī ato yoisharamisfo, māmāi tāpikaxō nonoxō ē Cristoōnoa meka shara yoimiskē afe nīpaxanōfo. ¹⁸ Akka nāskanō, nā yoipaiyai keskafaxō Cristoōnoa ato yoinōfo. Nāskafakī ato yoiiaifono nikai ē inimakōini.

¹⁹ Akka mē tāpia ē inimakōi, mā ea Epa Nios kīfixonaito nikai Jesucristo āfe Yōshi Sharapari ea axōfaino. ²⁰ Epa Niospa ea amapaiyai keskara akiki ē rāfitiroma. Ranotamakōi ē yoitiro. Ē askafakī yoiaito ōikakī fetsafāfe Cristoōnoa shinākōinōfo. Nāskakē ē nayoamax ē niyoa sharakī. ²¹ Akka

Cristo fistiõnoax ã ãpanaka, akka ã nairi sharafinakõia, ã inimakõi ãmãi Cristo fe nãpaxakã. ²² Akka ã niyoxõ fetsafo Cristo ã ato chanãmara famatiro afe nãpaxanõfo. Akka ã fato katotiroma, nia rakikã shara, askayamai naa rakikã shara. Ëkai tãpiama. ²³ Akka fekaxkõi. Nã rafe sharafax fato ã katotiroma. Akka ã napai Cristo ari kaax afe ãpaxakã, nã sharafinakõia ã mei. ²⁴ Akka fetsari nã sharafinakõia ã shinãi, mã ea yopai Niospa meka shara ã mato yoinõ. ²⁵ Mẽ tãpia mãmãi ea yopakõiaito, askatari mẽ tãpia ã nayoamax ã mato fe iyoikai. Niospa meka shara ã mato yoiaino mã inimayanã chanãmara fakã mã finakõinõ. ²⁶ Nãskakẽ ã anã mato fe ikaino mã inimaifinakõixii Cristo Jesúsnoax.

²⁷ Akka shinãsharata isharakãfe. Nãskaxõ na meka shara Jesucristoõnoa chanãmakõi yoixikakã. Mã askaito ã mato õikanõ, askayamai chai ixõ ã matoõnoa nikakã ã tãpitiro mã Jesús Ifofasharaino nãskara fisti shinãkaxõ. Nãskaxõ keyokõi Niospa Yõshi Sharaõxõ fetsafo mã ato Jesús chanãmara famaxikãki. ²⁸ Mã askafakã yoiaito a mato noikaspafãfe mato mekakã xatemapaiyaifono rateyamakãfe. Nãskakẽ mã atoki rateyamaito õikakã tãpitirofo akka nãfo fenokõikani, akka mã fenotama Nios fe mã nãpanaka. ²⁹ Epa Niospa mato sharafaxõa mã Cristo chanãmara fata aõnoa mãri mã omiskõinõ. ³⁰ Ë ikai keskai mã efe omiskõimis. Mã mã ea õipaoni ã omiskõiaito, iskaratãri mã mã ea nika Cristoõnoa ã omiskõiaito nãskafixõ ã eneima Niospa meka ato yoikã.

2

Cristo nono mai anoax afama iyopaofnixakã iskaratã xanãfo finakõia

¹ Nãskakẽ Cristo mato inimama mato noikã mato inimamashara ãfe Yõshi Shara mato fe ika. Chanãma, Cristo mato noikã mato inimamashara mã mã meemis. ² Nãskakẽ ea inimamakõikãfe. Isharakõita keyokõichi nãnorifos shinãkãfe. Mã ranã nõinãsharakõikãfe. Nãskakẽ Jesús mato amapaiyai keskara fisti axikakã. ³ Akka fetsafo afara axotama a mã mã afara apaiyai keskara fisti shinãyamakãfe, askatari fetsafãfe eõnoa yoisharakõinõfora ikax kakapaimis iyamakãfe. Askatamaroko isharakõita fetsafoõnoa yoikã iskafakãfe: “Nafãfe ea finõtirofoki. Akka ãkai afama. Jesús fistichi ea imasharatiro,” ixõ fetsafo finõpaiyamakãfe. ⁴ Askatari a mã mã fichipaiyai keskara fisti shinãyamakãfe, askatamaroko a fetsafãfe fichipaiyaifo keskarafori shinãkãfe.

⁵ Nãskaxõ nõko Ifo Jesucristo shinãi keskafakã mãri nãnori shinãkãfe. ⁶ Nãfi Nioskõikã Apa Nios keskara ari onifafianino yoikã iskafapaonima: “Ëri ã Nioskõi nã efe Epanãfori ãfenã. Nãskakẽ efe Epa nai mẽra ika keskariai ã nono mai ano itiro. Ë askaito afanã ea afeska fatiroma,” ixokai anori Jesús shinãpaonima. ⁷ Askatamaroko Jesús ãfe sharafoya ãfe afama mãshtifo potayoni, nono mai ano oax ato yonoxomis keskara ixiki. Nãri fake feronãfake kãitiro keskai, feronãfakekõi kãini. ⁸ Feronãfakekõi ixõ isharakõixõ Apa Niospa yoiai keskara nikakõiax nani. Afara chakafamis keskarax ifi cruz ikakinoax omiskõikai nani. ⁹ Nãskakẽ Epa Niospa xanãfo finakõia imani, nãatofi keyokõi finõinãfofanakã. ¹⁰ Nãskakẽ Jesús keyokõi ato finõano ãfe ane nikakakã keyokõichi akiki ratokonõ mai chachikaxõ yoikã iskafaxikani: “Jesús, mãfi xanãfo finakõiakã,” ixõ yoixikani keyokõi nã nai mẽranoafoyaxõ nono mai anoafãfe. Askatari nã Ifofax namisfãferi askafaxikani, niakafãferi askafaxikani. ¹¹ Nãskafaifono keyokõichi tãpixikani, “Jesucristo nõko Ifora,” faifono. Askafakãki Apa Niosri inimamakõixikani.

Jesús Ifofaafãfe ato õimasharatiro afeskax isharatirofomãki, a Jesús Ifofaafoma

¹² Nãskakẽ efe yora mãshtichi, ã mato fe ixõ ã mato yoiaito mẽxotaima mã ea nikapaoni keskafakã, ea nikakã finakõikãfe iskaratã ã chai ikakã nono

karaxa mēra. Jesús māto chaka mato soaxonō isharakōita shināsharakōikāfe afe ĩpaxakakī kachikiri fakakīma. Nāskakē meseyanā nikakī finakōifafāikāfe Niospa māto chaka mato soaxonō. ¹³ Niospa māto shinā mēraxō mato shināmafafāini a mato amapaiyai keskara mā anō. Nā apaiyai keskafakī, nānori mato shināmapai.

¹⁴ Nāskatari nā mato amapaiyai keskara akāfe, yōachēpekakima, askatari feratenāyamakāfe, ¹⁵ mā isharakōiano tsōa matoōnoa afaa chaka yoiya-manō. Askatamaroko yora chakafo mēra ikax mā isharakōiaito mato ōitirofo māmāi Niospa fakekōiax afaa chakafamisma. Akka mā ato mēra ixō ato ōimasharakāfe, oa fakishi fishifāfe chai chaxatiro keskafakī. ¹⁶ Nāskaxō Niospa meka sharaōnoa ato yoifofāfōfāikāfe afe ĩpaxanōfo. Nāskakē mā Cristo oaino ē matoōnoax inimaifinakōitiro, ēakairoko kaxpa Niospa meka ē mato tāpimanax, askatari ēa ē kaxpa yonomisma. ¹⁷⁻¹⁸ Ē mato yoisharamis mā Jesús chanīmara fakōinō. Akka Epa Nios ē yoitiro iskafakī: “Epa Niospa, ea mīa yoini keskafakī Filiposo anoafō mī Fake Jesúsnoa ē yoimis. Nā chanīmara fakōinōfo, a mī ato yoiyai keskara akōixikani. Ē mia ato chanīmara famaōxō ea retexikani rakikīa,” ixō ē Epa Nios yoitiro. Akka ea retefiafono eōxō mā Jesús Ifofaano ē inimatiro. Nāskakē māri efe inimakāfe Niospa ea sharafaino matoōnoax ē natiro.

Timoteo fe Ipafrodito

¹⁹ Nōko Ifo Jesucristo nīchipaiyaino ē matoki samamashta Timoteo nīchipai mato ōikanō. Mā anā oxō matoōnoa ea yoiaito nikai ē inimakōixii. ²⁰ Akka tsōakai efeta iskafakī shināima, Timoteo fistichi shināi ē shināi keskara. Chanīma, na Timoteo mato noikōikī matoōnoa tāpipai mā Jesús Ifo sharafaamāki. Akka tsoakai na Timoteo keskarama. Nāskaxō ē mato noiai keskafakī nāatori mato noikōi. ²¹ Akka fetsafāfe āakōi apaiyaifo keskara fisti shināmisfo. Cristo Jesús ato amapaiyai keskara amisfoma. ²² Akka mā mā tāpia na Timoteo isharakōixō mato ōimamis efeta Niospa meka sharaōnoa ato yoimis. Nā fāke āfe apa feta yonotiro keskafakī na Timoteo efeta yonosharamis. ²³ Nāskakē Timoteo, ē mato ano nīchipai mato ōikanō. Mē tāpixō ē afeskaimākai, akka mē tāpixō mato ari ē Timoteo nīchi eōnoa mato tāpimanō. ²⁴ Akka ē nōko Ifo chanīmara fai, ea mato ari nīchiaino samamashta kaxō ē mato ōikai.

²⁵ Akka ē shinā nofe yora Ipafrodito mato ari nīchipaikī. Fekaxfiano nāato efeta yonokōimis na Ipafrodito mā ekeki nīchini, ē afara yopaito ea axonō. ²⁶ Na Ipafrodito mato ōisharapaikōi, mato shinākōi māmāi nikamiskē isinī ikaito. ²⁷ Chanīma, na Ipafrodito isinī ikōini, mā nakerati. Nāskaino akka Nios aō noikōikī mā sharafaita, eari noikōiyānā. Akka mā naano ē shināmitsaifinakōikeraita. ²⁸ Nāskakē ē mato ari nīchipaikōi mā inimakōinō matoki anā nokoaino, ēri shināmitsakōiyamaxiki. ²⁹ Nāskakē matoki nokoaito inimayanā ifisharakōikāfe nōko Ifoōxō. Nāskakē nā mā Ipafrodito noiai keskafakī nā keskarafori fetsafo noikōikāfe. ³⁰ Akka na Ipafrodito Cristo yonoxoni mā nakeraita. Akka mā chai ikax ekeki oyamaino matoōnoa omiskōinixakī nā Ipafrodito ekeki oyamea ea axosharaxiki.

3

Jesús chanīmara faafo a chanīmara faafoma mēra ikaxō ato ōimatiro afeskak isharatirofomākī

¹ Efe yora mīshtichi, iskaratīa nōko Ifoōnoax inimakāfe. Mē mato kirika kenexokatsaxakī, anā ē mato yoi. Akka mā nikakōisharanō ē mato yoi. ² Kexemesharakāfe, a yora chakafo fishtayamakāfe, nā paxta pōfe

keskarafoki. Nāfāfe afara chakafamisfoki. Iskafakī mato yoipaikani kiki: “Mā foshki repa xateyamax mā Nios ari kaima,” ixō mato yoipaikani kiki. ³ Akka nō foshki repa xatexokai nōko chaka nō soatiroma. Cristo Jesús noko nāxononōko chaka noko soaxoxiki. Niospa āfe Fakeōxō āfe fakefo noko imatiro. Āfe Yōshi Sharaōxō nō Nios yoitiro iskafakī: “Nō mia noi. Mī sharakōi,” ixō nō yoitiro. Nāskakē nō akiki inimakōi ares fisti noko nimatiro. Mā nō tāpia nō foshki repa xateaōxokai noko afeska fatiroma. ⁴ Fetsafāfe yoikī iskafakani: “Ē shara famis. Nāskax ē Nios fe ĩpanaka,” ixō shināifono, ēri anori shināpaiki ē shinākī finapaoni. ⁵ Mē kāiax ocho nia ē oxano ea foshki repa xatenifo. Ēfi israelikōikī, ēkai osiama. Benjamín ēfe xini ipaoni, ēfi āfe fenaki. Ēfe epa feta ēfe ēfa hebreoxomāi ea fake fiafono, nāskakē ēri hebreo. Askatari fariseo ē iyopaoni, nāskaxō Niospa Moisés yoipaoni keskara ē nikakōipaoni ēmāi fariseoxō. ⁶ Askatari Niospa meka nikasharapaikōikī a Nios Ifofaafo ē ato chakafapaoni. Askatari ē isharapaikōikī Moisés yoini keskara ē nikasharakōipaoni. Nāskakē eōnoa yoikī tsōa iskafatiroma: “Na Pablokai Moisés yoini keskara nikakōipaonima,” ixō tsōa yoitiro.

⁷ Akka nāfo taeyoi ē ōia ēfenā sharafinakōia iyopaoni. Akka iskaratīa ē ōia afokai anā afama. Cristo Ifofakī afo ē anā shināima mē shināmakikōia. Cristo fisti Ifofakī afe ĩpaxakī. ⁸ Akka a ē ipaoni keskara anā ē shināima. Nāfo mē shināmakikōia, afo shināi ē finakōia ipaoni. Akka ē shināi afokai afama, nā afara chaka potamea keskarafō. Akka ēfe Ifo Jesucristo fisti ē tāpipaikōi, nāfi sharafinakōiaki. Ares fisti ea imasharatiro, a Moisés yoini keskarakai ē anā nikatiroma ea imasharanō. ⁹ Askatamaroko ē Cristo chanīmara faino Epa Niospa āfe Fakeoxō ea imasharatiro a keskara shara ē inō. Akka ē Nioski nokoaino ekeki inimatiro, ē Cristo fisti chanīmara fakē ea imasharanō. ¹⁰ Ē Cristo tāpipaikōi afe rafesharaxiki. Niospa āfe kerex sharayaxō Cristo anā ofofani keskai, ēri āfe kerex shara mepai a keskara shara ea imanō. Jesucristo omiskōini keskai ēri aōnoax omiskōipai. Jesús naani keskai ēri askapai a keskara ixiki, afaa chakafaxikima, askatari afaa chaka shināxikima. ¹¹ Nāskakē a chakafo kachikiri fata, nā Jesús keskara sharakōi ē ipai, oa yora naax anā otoa keskara shara.

Ē Jesús Ifokōi fai nā ē akiki nokoaitīa

¹² Ē isharakōira ē ifiax ēkai isharakōiama. Askatari Jesús keskara ē ipaifi ē askakōima. Jesucristo ea Ifofamani ē a Ifofanō. Nāskakē ē Jesús Ifofakōini a keskara sharakōi ixiki. ¹³ Efe yora mīshtichi, ē Jesús keskara iyamafiai a ē ipaoni keskara ē anā shināima. Akka ē Jesús fisti Ifofai. Nā feronāfakefo ichokani xonōnōnākī texkeakekafā ōitirofoma. Nā ifi nīchiti nia ari fisti ōiax ichotirofo keskariakī afara chaka shinākima Jesús fisti ē shināmis a keskara sharakōi ixiki. ¹⁴ Nāskaxō afaa fetsa ē shināima. Nā Cristo Jesús ē shināmis Ifofapaikōikī. Akka Niospa ea katoni ē afe ĩpaxanō, Cristo Jesúsōnoax Epa Nios ari ē nokotiro, ariax a keskara sharakōi ixiki.

¹⁵ Mā Jesús Ifofakī nā ē mato yoimis keskafakī nānorikōi shinākāfe. Akka fetsafāfe a ē shināi keskara shināyamaifono, Niospa ato tāpimakī mēstekōi shara ato yoixii. ¹⁶ Akka nāfo nō tāpiax, shināsharakōita nō isharakōitiro, mā nōmāi Jesucristoōnoa tāpiax.

¹⁷ Efe yora mīshtichi, ē Jesús Ifofaa keskafakī māri Ifofakāfe. Mā nō mato ōimamiskī, nō ikai keskai māri askakāfe. ¹⁸ Mē mato mēxotaima yoitaifamis, nāskafekē afianā ē mato yoi oiayanā. Akka fetsafāfe na ē mato yoiai keskara nikakaspakani. Āto chaka xatekaspakakī Jesucristo ifi cruz ikakinoax noko nāxononikakaspakani. Nāskakanax Jesús noikaspayanā ikafo. ¹⁹ Jesús ato amapaiyai keskara shinātama āa apaiyaifo keskara fisti shināmisfo. Nā piiai

fisti shinākata, a ayai fisti shināmisfo. Feronāfakefāferi kērofo shināmisfo, āto āfifoma. Kērofāferi feronāfake fetsafo shināmisfo āto fenefoma. Nāskara chakafos shinākī, nā keskara fisti tāpiafo. Akka nō chakama, nō isharakōimis imisfo. Nāskakanax rāfitirofoma, nā keskarafo mā keyokani. Askatari nā omiskōipakenakafo mēra fokani. ²⁰ Akka nōfi askaramakī, nō Niospa fakefokī nō afe nai mēra ĩpanaka. Akka nō manai a noko Ifimis nai mēranoax oxō noko ifiyonō, nōko Ifo Jesucristo. ²¹ Nāato nōko yora chakakē noko fetsafaxoxii afe yora keskara sharafinakōia nō inō. Nāskaxō āfe kerex sharaōxō nōko yora noko fenasharafaxoxii afara chakafo nō finōinīfofanō.

4

Nōko Ifo Jesúsnoax mēxotaima inimafafāikāfe

¹ Nāskakē efe yora mīshtichi, ē mato noikōikī ē mato ōisharapai. Nā ē mato shināitīa ē mea ē inimakōikakāini. Nāskakē ēfe fakefāfe, Jesús kachikiri fayamakāfe. Ifo sharakōi fakāfe.

² Akka a xotofake rafe Evodia yafi Síntiqui ē ato yoisharapai mēnāpaikakīma isharakōinōfo nā yora fisti keskarakanax nōko Ifoōnoax. ³ Yamā, mī efeta Nios yonoxomiskī, ē mia yoinō nā kēro rafe ato yoisharafe isharanōfo. Nā rafeta efeta Niosnoa meka shara yoimisfoki afe ĩpaxanōfo. Clementeri nofeta yoimis. Fetsafāferi efeta Niosnoa yoipaonifo. Nāskakē āto anefo Niospa mā kirikaki kenea afe ĩpaxanōfo.

⁴ Nāskakē Jesús māto Ifokī mēxotaima inimakāfe. Afianā ē mato yoi, ini-maifinakōikāfe. ⁵ Nāskakē isharakōikāfe keyokōichi mato ōinōfo, isharakōiafora mato fanōfo. Mā chaima nōko Ifo oi kiki.

⁶ Nāskakē afara afeskara afiaino shināchakayamakāfe, askatamaroko mēxotaima Epa Nios kīfiki. A mā fichipaiyai keskara yōkakāfe iskafakī kīfiki: “Aicho Epa Nios, mī ea nikasharakōimis. A ē yopai keskara tāpixō mī ea axosharamis,” ixō kīfikāfe. ⁷ Nāskakē mā ratepaiyaito Niospa mato inimamasharakōixii. Afara afeskara ifiaino Niospa nōko ōiti noko inimamaxotiro. Nāskakē nō tāpitiroma afeskaxora nōko ōiti noko inimamaxotiro. Askafiano Cristo Jesús nō chanīmara faino noko shināmasharatiro. Afara sharafoōnoa shinākāfe.

⁸ Efe yora mīshtichi, ē kirika kenekī keyokerana. Afara nā chanīmakōi fisti shinākāfe, askatari afara sharafos shinākāfe, askatari nā noko mēstekōi shināmatiro shinākāfe, yorafāfe a afara sharafaifo keskarari shinākāfe, a Niospa noko axōai keskaraforti shinākāfe. Askaxō nōko Ifo aicho fakāfe.

⁹ Afara a ē mato yoiai keskara yafi a ē mato tāpimana keskara akāfe. Nāskaxō afara fetsa ē akaito mā ōia keskakakī, māri askafakāfe. Mā askaito ōikī Niospa māto ōiti mēra mato inimamasharakōitiro. Nāskax mato fe isharapakenaka.

Filipos anoafāfe kori ichanāfakaxō Pablo fomanifo

¹⁰ Ĕ nōko Ifoōnoax inimakōi, taeyoi mā ea kori manamayopaofinixakī anā mā ea manamamisma. Akka iskaratīa ea shinākī mā mā ea manamana ē aō pinō. Akka ea shināmakiafora ē mato faima, ea manamatiroma meekī mā ea manamamisma. ¹¹ Ĕ afaayayamafixō ea afaa ināfoma ē mato famisma. Ĕ shināchakaima, Niospa anori ea tāpimana. Ĕ afaamais fiāx ē inimatiro, askatari afara ichapayax ē inimatiro. ¹² Akka mē tāpia afaamaisax afeskax ē itiomāki. Askatari mē tāpia a afara ichapayax ē itiro. Askatari mē tāpia afara afeskara ifiaino ē inimatiro. Nāskakē ē shināchakaima. Askatari māyaxri ē inimatiro, fonāifiāiri ē inimatiro. Afara mekefaxri ē inimatiro, afaa meke fayamafixri ē inimatiro. ¹³ Afara fetsafo ē atiro Cristo āfe kerex shara ea ināno.

¹⁴ Nāskafekē mā ea shinākī mā ea sharafa ē omiskōiaito. ¹⁵ Akka Filipos anoxō mā mā tāpia, nā ē Jesúsnoa meka shara yoikī taefanitīa noko ifipakex-anō. Akka ē Macedonia anoax kaino, mā Nios Ifokōifaxō, mā ea kori manamani, ēmāi Niosnoa mato tāpimanano. Akka fetsafāfe ea afaa manamanifoma. ¹⁶ Ē Tesalónica ano iyoano, ē kori yopaito mā ea femayopaoni. ¹⁷ Akka ē shināima a ē afara fiati fisti. Askatamaroko ē shināi mā ea sharafaino Niospa mato sharafa fafāfāinō, mato noikī. ¹⁸ Nāskakē iskaratīa ē anā afaa yopaima, mēmāi ayaxō. Ipafrodito ea fexoyamea a mā ea manamayamea tii. Nā ē fichipaiyai tiimaroko finōmainīfofā mā ea femayamea. Nā mā Nios noiai keskafakī eari noikī mā ea femayamea. Mā ea askafaito ōi matoki Nios inimakōixii. ¹⁹ Ēfe Niospa nā mā fichipaiyai tii mato ināxii. Epa Niosnā āfe afara sharakōifo nā ichapakōifo keyonakama, āfe Fake Cristo Jesúsxō mato ināsharaxii. ²⁰ Akka nōko Epa Niosfi nōko Epakōikī nā fāsi sharakōi, tsoa keskarama. Ares fisti sharakōi. Tsōakai a finōtiroma. Nā nōko Ifokōira nō fapanaka. Askara ipainōra.

Pablo mā mekai xatekī Filiposo anoafō meka shara ato fomani

²¹ Eōxō keyokōi a Cristo Jesús Ifofaafō ea ato yoisharaxokāfe. Askatari na nono efe ikafāferi nā Jesús Ifofaafāfe mato yoisharakani kiki. ²² Na nono ikafāfe Nios Ifofakanax, xanīfo César āfe pexe ano yonomisfāfe afāferi mato yoisharakani. ²³ Nōko Ifo Jesucristo mato noikī mato sharafanō. Nā tii ē mato yoi.

Pablo

Pablo Colosas Anoafu Kirika Kenexõ Fomani

Pablo Jesús Ifofaafu kirika kenexõ fomani, Colosas anoafu

¹⁻² Ēkĩa Pablo, Niospa ea nĩchini, aato apaiyai keskafakĩ ě yorafo yoinõ Jesucristoõnoa. Nofe yora Timoteo feta nõ mato kirika kenexõ fomai. Mã Cristo Ifofakõikẽ, pexe rasi Colosas anoxõ Nios nikakõiyana. Nõko Epa Niospa mato noikĩ mato shinãfafãinõ afanã mato fekaxtefanõma mã isharakõinõ.

Pablo a Jesús Ifofaafu ato kĩfixõfafãini

³⁻⁴ Nã nõko Ifo Jesucristo afe Apa Nios nõ mato kĩfixõfafãini. Nõ mato kĩfikĩ iskafaxokĩ aicho fakĩ mãmãĩ nõ nikax mã Cristo Jesús Ifofakõikẽ. Nãskaxõ nõ Jesús Ifofaa fetsafori mã ato noikõimiskẽ mã nõ nikamis. ⁵ Na meka shara chanĩmakõĩ Jesucristoõnoa mã mã nikamis. Jesucristo chanĩmara faax Nios ika ari mã afe ipaxatiro ixõ yoinifo mã mã nikamis. Na meka chanĩmara fakõixõ fetsafo mã ato noikõimis. ⁶ Na meka shara Jesucristoõnoa mã nikakĩ taefakĩ mã chanĩmara fakĩ finakõini. Nãskaxõ nikakĩ mã tãpini chanĩmakõĩ, Niospa mato noikĩ Jesucristoõxõ mãto chaka mato soaxoni mã chanĩmara faino. Nãskakẽ na meka shara, nikakani maifo tii anoafori nãskarifiamisfo. ⁷ Nonori nofe yora Ipafras mato yoini. Akka nã Ipafras nofeta Cristo yonosharaxomis, nãskakẽ nãato Jesucristoõnoa mato yoipaoni. ⁸ Nã Ipafras matoõnoa iskafakĩ noko yoiaito nõ nikamis: “Na Colosas anoafu Niospa Yõshi Sharaõnoax isharakõikaxõ fetsafo noikõikani,” ixõ noko yoiaito nõ nikamis.

⁹ Nãskakẽ nã ě matoõnoa nikakĩ taefanitĩa, ě mato Epa Nios kĩfixokĩ xatemisma. Kĩfikĩ ě iskafa fafafãini: “Epa Niospa, Colosas anoafu mĩ Yõshi Sharaõxõ mĩ ato amapaiyai keskafakĩ ato tãpimafe, mĩ ato tãpimanai keskafakĩ ato õiti mēraxõ mia tãpikaxõ mia Ifokõĩ fanõfo,” ixõ ě mato kĩfixõfafãini. ¹⁰ Nãskaxõ nã mato amapaiyai keskara mã akaino õi Nios matoki inimakõixii. Nãskax afe Fake keskarakõĩ mã itiro. Nãskaxõ mã fetsafo sharafa fafafãikĩ mã Nios tãpiki finakõitiro. ¹¹ Akka Epa Niospa afama mĩshtifo shara fatiroki, afe kerex shara mitsisipakõĩ mato inãtiro afara afeskarafiaino aõxõ mã tenekõinõ. Nãskafikĩ mã tenetiro fena fenakĩma inimasharakõikai. ¹² Nãskakẽ mã inimakõĩ. “Aicho Epa Niospa,” mã fatiro nãatomãĩ noko imasharata afe yorafo inãpaiyai keskafakĩ nokorimãĩ inãito. Nõri afe yorafokẽ noko inimaxii, a ika anokai fakishma penasharakõĩ. ¹³ Nãskakẽ noko imasharakõia anã fakish mēra nõ inõma. Akka nã Satanás ika ano fakishifãkõĩ. Nãnoa Epa Niospa noko ifia, afe Fake fe nõ ĩpaxanõ. Nãato afe Fake noikõĩ. ¹⁴ Afe Fãke noko nãxonikẽ aõxõ Epa Niospa noko ifia, nõko chaka noko soaxoyanã.

Jesús noko nãxonioõnoax Nios fe nõ isharapakenaka

¹⁵ Akka nõ Epa Nios õiyamafitirono afe Fake Jesús mai ano oni. Nãskaxõ afe Fãke noko tãpimani afe keskaramãkĩ Apa Nios. Nã afe Fake Jesús Apa Nios keskarakõĩ, afe õiti keskarakõiri. Afaa oniataima Apa Nios fe nai mēra iyopaoni. ¹⁶ Afe Fake Jesucristoõxõ Niospa keyokõĩ onifani, nai mēranoafoya nono mai anoafu. Nã nõ õitiromafoya, a nõ õitirofo onifani. Askatari afe ãjirifo nã afe ikafo onifata, niafakafãferi ãto xanĩfori onifani. Epa Niospa afe Fake Jesucristoõxõ keyokõĩ onifani. ¹⁷ Afaa oniataima Cristo iyopaoni. Afe kerex sharaõxõ keyokõĩ kexesharakõimis. Nãskaxõ fishifo kexeta, xini kexeta, oxe kexeta, nõko mai kexeta famis. Akka nãfo kexeyamaino, chakanai fetsekerana. Nai fe mairi chakanakerana. ¹⁸ Tsõakai Jesús finõtiro, afaa oniataima keyokõĩ finõyopaonixakĩ, iskaratĩari keyokõĩ finõa. Nãfi nã chanĩmara faafãfe

āto Ifokōiki. ¹⁹ Nāskaxō Epa Niospa yoikī iskafani: “Ē imis keskai ēfe Fakeri nāskakōimis, nāskax nāri efe Nioskōi, nō nāskara rafekōi,” ixō inimakai Epa Niospa yoini. ²⁰ Jesús ifi cruz ikaki mastafono āfe imi foax noko nāxoni nōko chaka noko soaxoxiki. Nāskakē aōnoax Epa Nios fe nō anā isharatiro. Aōnoax keyokōi mai anoafoya nai mēranoafo afe isharatirofo.

²¹ Māto ōiti mēraxō mā Nios noikaspayanā, mā chakakōi fapaoni. Nāskata mā Nios fe rafeyamata, afe yorarikai mā ipaonima. ²² Nāskafikē āfe Fake Jesucristo nai mēraxō mai ano nīchini feronāfakekōi ikiyonō. Nāskax ifi cruz ikakinoax noko nāxoni, aōnoax Epa Nios mato fe rafexō māto chaka mato soaxotiro a keskara shara mā inō. Nāskax mā akiki nokoaito matoōnoa afaa chaka yoitiroma. Nāskaxori mā yoitiroma iskafakī: “Mī afara chakafamis,” ixō aōnoa mā afaa yoitiroma. ²³ Nāskano na meka shara Jesucristoōnoa mā chanīmara faxō afara fetsa mā shināyamaino Epa Niospa matoōnoa yoipakenakama iskafakī: “Mī afara chakafamis,” ixō matoōnoa afaa yoipakenakama. Askatamaroko mā chanīmara faax mā inimakōiaito mato ifixii mā afe ipaxanō. Mā Jesucristo āfe meka shara nikakī taefani keskafakī nānorikōi keyokōi ē ato tāpimani. Ēkīa Pablo, ē Epa Niospa āfe meka yoifafāini Jesucristoōnoa ato yoikī.

Niospa Pablo yoini a Jesús chanīmara faafo ato yonoxonō

²⁴ Nāskakē ē inimai ē matoōnoax omiskōifi, māri afara afeskaraino mā Cristo Ifosharakōi faano. Cristo nokoōnoax omiskōini keskai, ēri nā afe rafemisfoōnoax nā Niospa fakefo atoōnoax ē omiskōimis. Ē matoōnoax omiskōita iskaratīari ē Cristoōnoax omiskōimis. ²⁵ Akka Epa Niospa ea katonī, a mato yonoxomis keskara ē inō, āfe meka shara ē mato yoinō. Nāskaxō ea yoikī iskafani: “Na maniafo tii anoa ēfe meka shara Jesucristoōnoa ato yoifofāsafafe,” ixō ea yoini. Nāskaxō āfe kaifoma mēra ea nīchini. ²⁶ Na meka shara Jesucristoōnoa nōko xinifāfe tāpiyopaonifoma. Niospa ato tāpimayopaonima. Akka iskaratīa Niospa noko tāpimani nō afe yorafokē. ²⁷ Epa Niospa Cristoōnoa mato yoiyomis keskafakī keyokōi mato tāpimaxii, mato fisti tāpimatama, nā yora fetsafori ato tāpimaxii. Iskafakī ato yoixii: “Ēfe Fake Cristo mato fe rafekakāini, nāskakē mā chanīmara fatiro a ē ika ano efe ipaxakī. Nā Cristo isharakōiai keskafakī ēri mato askafatiro māri isharakōinō,” ixō mato yoini.

²⁸ Nō Cristoōnoa yoimis, keyokōi nō ato yoifofāsafamis keyokōi nō ato yoimis nikakōinōfo. Mā isharakōiano nō keyokōi Niospa ferotaifi nō ōimasharapai a keskara shara ixii. ²⁹ Nāskakē ē mato yonoxokī finakōifafāini, Cristo āfe kerex shara ea ināno.

2

¹ Akka ē mato yoipai mā tāpinō, ē mato Epa Nios kīfixōfafāini. Laodicea anoafo yafi fetsafori a ea ōimisfoma nāfori ē ato Epa Nios kīfixōfafāini. ² Nāskaxō ē mato kīfixōfafāini māto ōiti mēranoax mā inimakōiyanā, mā ranā mā nōinākōinō. Nāska faatanāxō Epa Niosnoa xafakīakōi mā tāpitiro, akka a iyopaonifāfe Cristoōnoa tsōa tāpiyopaonima. Nāskakē iskaratīa xafakīakōi mato tāpimapai aōnoa mā tāpisharakōinō. ³ Nāato keyokōi tāpikōia, Apa Niospa tāpia keskafakī āfe shinā mēraxori tāpikōia. Akka Epa Nios afarafo sharafoyakē, Cristoōxō mā tāpitiro. ⁴ Nānori ē mato yoi, tsōa mato pārayamanō, meka fetsafaxō fanīrira mato yoipaikani kiki. ⁵ Ē mato fe iyamafiāxō pena tii ē mato shināi. Akka matoōnoa nikai ē inimakōi, mā chanīmara fakōixō mā Cristo nikakōiaito.

Jesucristo nōko ōiti fetsafaxōfaano a keskara shara nō inō

⁶ Nāskakē mā nōko Ifo Jesucristo chanīmara fakōixō, mā Ifofakōina. Nāskakē pena tii afe rafefafāikāfe. ⁷ Oa afara fanafono āfe tapo mai mēra chaikōi kaax feroitiro ma keskara, Jesúsri nāskarakōikī, afe rafefafāikāfe afaa chakafatama a keskara shara ixikakī. Ipafras mato yoini keskafakī pena tii nikakōikī Jesús chanīmara fafafaikāfe. Nāskaxō pena tii Epa Nios aichofa fafafaikāfe.

⁸ Nāskakē kexemesharakāfe, fetsafāfe mato pāraymentōfo. Mā Jesús nikakōiai keskafakī anori mato yoipaikanima. Akka nā mato yoiaifo keskara mā ato nikakī kaxpakōi mā ato chanīmara fatiro. Nāfāfe Cristoōnoa yoikōikanima, nāskaxō nā imisfo keskakakī mato yoipaikani. Nā chanīmara faafāfema shināifo anori fisti mato shināmapaikani.

⁹ Akka Cristo fe Apa Nios nāskara rafe, Cristo noko keskara feronāfakekōifiax Apa Nios imis keskara nā nāskakōini. ¹⁰ Nāfi keyokōichi āto xanīfokōiki, xanīfo fetsafoya, a niafaka chakafāfe āto xanīfofo finōkōinīfofāna. Nāskakē mā Jesús fe rafexō mā afaa fetsa yopaima. ¹¹ Askatari mā Cristo Ifofai akka feronāfakefāfe āto foshki repa xatepaonifo, nāskaramāi feyafakatsaxakakī. Akka mā foshki repa xatefifono māto chaka mato soaxotiro ma. Cristo fistichi māto ōiti mato fetsafaxotiro, māto chaka mato soaxotiro afianā a mā chaka apaoni keskara mā anā atama a keskara shara mā inō. ¹² Akka mā maotisaī faka mēra mā ikinitīa, nā mā chakafapaonifo oa maia keskara, askatari nā Jesús maifanifotīa a mā afara chakafapaonifo oa maia keskarafo. Mā faka mēra iki maotissimeax mā fininākfāni oa Jesús fe fininākfāni shinātsatiro mā a keskara sharakōi ixiki. Niospa āfe kerex sharaōxō afianā Jesús otofani nā nō chanīmara fai. Askatari mai mēranoax Jesús otonitīa, māri afe otoni keskara itiro, a keskara sharakōi ixiki. ¹³ Mā Jesús Ifofaamax nā yora naa keskara mā iyopaoni. Nāskaxō mā afara chakafapaoni māto chaka xatexoma. Nāskafikē Epa Niospa Cristo otofani afe nipaxanō. Nāskarifiakī matori aōxō nimapakexatiro, nāskaxō nōko chakafo mā noko soaxona. ¹⁴ Shinākapo. Keyokōi nō chakafamis keskara nōko chakafo Epa Niospa noko soaxoni, anā afoōnoa shināyamaxii. Nāskano Niospa yoini keskara nō nikatama afara fetsa nō chakafapaoni. Nāfo keyokōi nō chakafamisfo keskara kenepakea. Askafixō ifi cruz ikakinoa Jesús mastanifoxō nāo nōko chaka noko soaxoni. ¹⁵ Akka Cristo ifi cruz ikakinoax noko nāxonixakī, Satanás yafi keyokōi niafaka chakafo finōkōia. Nāskakē noko anā afeskafatiroma, anā nōko ifo ixō noko īkitirofoma. Nāskakē Jesús ifi cruz ikakinoax naino Niospa keyokōi maifo tii anofo ato ispani na niafaka chakafo anā kerexfoma.

Jesús ika ari nai mēra sharakōi nā fisti fichipaikāfe

¹⁶ Akka māto xinifāfe āto feyafati ipaoni xinia fena ikaino fista apaonifo. Askatari oxe rama kāiyaino fista apaonifo. Akka mato yoitirofo iskafakakī: “Afaa mā pitiroma askatari afaari mā ayatiroma. Askatari nōko pena tenetitīa māri tenetiro,” ixō mato yoitirofo. Akka mā askayamaino fetsafāfe mato mekafakī īchatirofo. Mato askafaifono ato nikayamakāfe. ¹⁷ Akka nā māto xinifāfe āto feyafati noko ōimatirofo afe keskara iximākai a Cristo oaino. Akka mā Cristo oano nā fisti nō Ifofatiro. Nā nō feyafamis keskara nō anā atiroma. Cristo fisti nō nikatiro a nō ayopaoni keskara nō anā axikima. ¹⁸ Ōisharakāfe fetsafāfe mato pārapaikani kiki iskafakakī: “Nō afaa tāpiama. Ājirifo nō kīfitiro,” ixō mato pārapaikani. Afāfe afaa ōiyamafikatsaxakakī afama mīshtifo yoipaimisfo. Āto shināmā shinākata kakapaikōimisfo, Niospa shināi keskarakai shināmisfoma. ¹⁹ Afokai Cristo fe rafepaikanima. Akka Cristo nōko mapo keskara askatari nō āfe yora keskara. Nāskaxō nōko yora nō kexesharax nō mitsisipakōi itiro. Nāskatari nōko pono efapayafō, nōko pono mīshti, nōko nami mēranoax ichanātirofo. Afeskatama nō isharakōinō. Akka nō Cristo fe

rafekōiaito Epa Niospa āfe Fākeoxō āfe kerex shara noko inātiro a keskara shara nō inō. Nāskarakōi noko axopai.

²⁰ Mā oa Cristo fe naa keskara mā ini. Nāskakē iskaratīa a mā chakafapaoni keskara mā anā akima. Askatamaroko mā isharakōimis. Mā askaito nā chanīmara faafāfema mato afaa yoitirofoma. Nāskafekē, ʒafeskakī mā ato nikaimē, mā ato nikaxō nā mato yoiaifo keskara ma apai? Nāskakē ato nikayamakāfe. ²¹ Nāskakē mato yoiki iskaratīa: “Na afarafo meyamakāfe, afori piyamakāfe, mato ināifonori māto mēkemā achiyamakāfe,” ixō mato yoipaikani. ²² Akka na mato yoipaiyaifo keskara Niospa anori ato yoiaima. Āa shinākaxō mato yoipaikani. Akka nā mato yoipaiyaifo keskara nāfo mā keyoxii, anākai afo inakama. Nāskakē ato nikayamakāfe. ²³ Chanīma, yora fetsafāfe shinākī iskaratīa. Na ato yoiaifo keskara shara, nafāfe tāpikōiafo, a Niospa noko yoini keskarari tāpikōiafo. Nāskakē Niospa āfe ājirifo kīfifāikani. Nāskakatari ato fanīrira mekafamisfoma, askatari āto yorari mese famisfoma āa koshamemisfo. “Nafo sharakōifo,” ixō atoōnoa yoipaikani. Akka afokai isharakōimisfoma. A afarafo chakafaifo keskarakai xateafoma, chanīma nāfo kakapaikōimisfoki.

3

¹ Akka Cristo naax anā otoiākafani keskai māri nāskariai afe otoiākafani keskara mā itiro mā isharakōiax afe ipaxakī. Cristo iskaratīa Apa Nios fe ika afeta keyokōi ikinā. Nāskakē aōnoa shināta nā mato amapaiyai keskara aōnoa shināfafāikāfe. ² Nāskakē nā Niospa fichipaiyai keskara fisti shinākāfe, nāskakōixikakī. Akka nono mai anoxō yorafāfe afara chakafapaiyaifo keskafakī māri askafayamakāfe. ³ Anā ē mato yoi Cristo noko nāxoni. Akka mā oa Cristo fe naa keskara iyoni, nāskakē iskaratīa mā afe rafekakaini, Epa Nios feri mā askakakāini. Nāskariai Epa Niosri mato fe rafekakaini. Mā askaito tsōa mato tāpitiroma, a mā Cristo fe rafeai keskai ari askaxiki. ⁴ Cristo anā mai ano fotofaino māri afe ixii. Nāato noko īkipakenaka. Nāskakē a keskara sharakōi nōri afe ixii, keyokōichi yorafāfe noko ōixikani.

Nō chaka iyopaonixakī iskaratīa nō ōiti fena sharayakōi

⁵ Nāskakē a mā afarafo chakafapaoni keskafakī anā askafayamakāfe. Askarafo anā shināyamakāfe. Askatari māto āfimafori chotayamakāfe, kērofāferi māto fenemafori chotamayamakāfe. Nāskaxō ato chaka shināmayamakāfe. Afarafori noiyamakāfe feronāfakefāfe māto āfima fichipaiyamakāfe, kērofāferi māto fenemafo fichipaiyamakāfe. Afara chakafori fichipaiyamakāfe, nā mā fichipaiyai fisti fichipaiyamakāfe. Mā askakī Nios mā noima, nā afarafo fisti noikī. ⁶ Askara chakafo Niospa ōipaima, nāskakē ato omiskōimakī finakōixii nikayamaifono. ⁷ Nāskakē taeyoi chakakōi mā iyopaoni Nios nikamax. ⁸ Mā mā askapaoniki. Akka iskaratīa a chakafo shināmakikāfe. Anā ōitifishkiyamakāfe, anā chaka shināyamakāfe, ato chakafayamakāfe, ato īchayamakāfe, askatari māto axfapa meka chaka yoiyamakāfe. ⁹ Nāskakē mā ranā pāranōnāyamakāfe, mā taeyoi ipaoni keskara a chakafo mā mā potakōiakī. ¹⁰ A mā apaoni keskara anā atama iskaratīa, mā mā Jesucristo fe rafekōia a keskara shara ixiki. Akka Epa Niospa māto ōiti mēra fena sharakōi mato ōi. Nāskakē a keskara sharakōi mato imafafāini, aōnoa mā tāpisharakōinō. ¹¹ Nō Cristo Ifofakē Niospa keyokōi nāskarafos noko ōi. Judeofo yafi a judeofoma, a kene tāpiafoya a kene tāpiafomari, yorafoya nafafo āto yonomatifofoya a āto yonomatifomari Niospa nāskarafos noko ōi. Keyokōi nō afe yoraxō nō Jesucristo fisti yopakōi.

¹² Niospa mato noikĩ mato katonni afe yorafo mã inõ. Aa keskara shara mato imaxiki. Nãskakẽ fetsafo noikĩ ato sharafa fafafaikãfe. Nãskakẽ fetsafo shinãki nã mã apaiyai keskara fisti shinãtama, fetsafãfe apaiyai fo keskari shinãkãfe, oi tsi faxõ ato yoifafaikãfe. ¹³ Nãskakẽ fetsafo fe mënãpaitama ato yoisharakãfe raenãsharakãki. Nõko Ifãfe mato raefa keskafakĩ fetsafo fe raenã faatanãsharakãfe. ¹⁴ Nãskakẽ nã ã mato yoiyai keskai, keyokõi noinãkãfe, nõ noinãsharainakõiaki. Nãskai nõ noinãx nõ isharakõitiro, nã nõko Ifãfe noko yoini keskai nõ noinãsharakõiax nõ nãskasharakõitiro. ¹⁵ Nãskakẽ Cristo nikasharakõikãfe mãto õiti sharanokai mã fochishpanã faatanãtiro. Askatamaroko aõnoax isharakõiax nã yora fisti keskara shara mã itiro. Nãskakẽ Epa Niospa mato katonni aõnoax mã isharakõita fetsafo mã afeska fanõma. Nãskakẽ mã Epa Nios yoitiro iskafakĩ: “Aicho Epa Niosi, ãfe õiti mã sharafaxõa,” ixõ mã yoitiro.

¹⁶ Cristo noko tãpimani keskafakĩ mãto õiti mẽra nanekõikãfe. Nãato mato ãkinãkĩ ãfe meka tãpisharakõixõ fetsafo yoisharakãfe isharaxikakĩ. Mãto õiti mẽraxõ Nios aicho fata David fanãini keskai mãri fanãixota ãfe mekaõnoari fanãixokãfe. ¹⁷ Nãskaxõ nã mã apaiyai keskafakĩ yoikãfe iskafakĩ: “Aicho, Epa Niosi. Nõko Ifo Jesucristoõxõ nã nõ apaiyai keskafakĩ keyokõi mã noko axõfafãimis,” ixõ yoifafaikãfe.

Nõ Jesús Ifofakõinax aõnoa nõ afeskatiromãki

¹⁸ Kẽrofãfe, mãto fenefãfe mato yoiãfãfe ato nikasharakõikãfe. Nãskax mã isharakõikai nõko Ifãfe mato yoiyai keskai. ¹⁹ Feronãfakefãfe, mãto ãfifo noikõikãfe ato fe feratenãyamakãfe.

²⁰ Fakefãfe, mãto epa yafi mãto efa nikakõikãfe. Mã askaino nõko Ifo matoki inimakõi kiki. ²¹ Epafo feta efafãfe, mãto fakefo ferateyamakãfe, mãto fakefãfe shinãkĩ iskafayamanõfo: “Ooa, ãfe epa feta ãfe efa ea feratenafo,” ixõ shinãyamanõfo.

²² ãto yonomatifãfe, mãto ifofo ato nikakõikãfe nono mai anoxõ. Akka mato õiaifonos ato yonoxokakĩma, mato õiamai fonori ato yonoxokãfe. Nã mãto Ifo Jesucristo mã noiaino, matoki inimanõ ato yonoxosharakãfe. ²³ Afara yonokĩ inimayanã axosharakõikãfe. Nõko Ifo shinãkĩ ato yonoxosharakãfe. ²⁴ Nãskakẽ shinãmakiyamakãfe mã mã tãpiaki nõko Ifo chipo afara sharafo mato inãxii kiki. Mã nõko Ifo Jesucristo yonoxosharamiski, nãfi mãto Ifokõikĩ. ²⁵ Akka nã afara chakafamisfo, nãfo omiskõi finakõixikani afara chakafakat-saxakakĩ. Nãskakẽ Niospa fetsa keskarafo noko õima, nãskarafos noko õi.

4

¹ Ato yonomamisfãfe, mãto yonomatifo ato paraxõ yonokakĩma ato noisharayanã afara sharafo ato inãsharakãfe ato parakakĩma. Mã mã tãpiakĩ mãri Ifoyakĩ, mãto Ifãfe nai mẽraxõ mato õifafaini kiki.

² Nãskakẽ Epa Nios kĩfiki xateyamakãfe, kĩfikĩ afara fetsa shinãkakĩma, Epa Nios fisti kĩfikĩ iskafakãfe: “Aicho Epa Niosi, mã ea sharafa fafafaĩni,” ixõ kĩfikãfe. ³ Nãskakẽ nokori kĩfixokãfe, Epa Niospa fetsafo mẽra noko nĩchiano Cristoõnoa nõ ato yoisharanõ. Afãfe Cristoõnoa nikamisfomaki. Akka ã Cristoõnoa meka shara yoiãito yorafãfe ea karaxa mẽra ikimanifo. ⁴ Ea Epa Nios kĩfixõfafaikãfe xafakĩakõi Jesucristoõnoa anã ã ato yoinõ.

⁵ Akka nã Jesús Ifofaafoma mẽra mã ikaki ato õimakãfe mã isharakõixõ. Nãskaxõ nã mã atoki nokoaitĩa Jesucristoõnoa ato yoisharakãfe. ⁶ ato fe mekakĩ meka shara fisti ato yoifafaikãfe, ato kaxemetsama fakakĩma ato yoisharakõikãfe, ãto õiti mẽraxõ shinãchakanõfoma. Mã askakĩ nã yorafo mã ato kexesharatiro.

Pablo mā mekai xatekī Colosas anoafo ato meka shara fomani

⁷ Nofe yora Tíquico, ẽ aõ noikõ. Nãato efeta nõko Ifo Jesús yonoxomis. Nãskakẽ aato eõnoa mato yoi kiki ẽ afeskax nono ikamãkĩ. ⁸ Nãskakẽ ẽ mato ari nĩchia, aato mato yoinõ afeskax nono nõ ikamãkĩ, askatari mato inimamasharakõixiki. ⁹ Nã nofe yora Onĩsimõri afe kai, nãri ẽ noikõ. Nã mato fe iyopaoni, nofeta nõko Ifo Jesúsnoa yoi inimakõimis. Nã rafeta matoki noko kaxõ mato yoikani nono afe keskaramãki.

¹⁰ Akka na efe karaxa mẽra imisto Aristarcori mato meka shara fomai. Marcosri mato meka shara fomai, nã Marcos Bernabé ẽ afe chai. Nãskakẽ nã Marcos matoki nokoaito ẽ mato yoia keskafakĩ ifisharakãfe kexesharayanã.

¹¹ Na feronãfake ẽ afe ane Jesús nãatori mato meka shara fomai, ẽ afe ane fetsa Justo. Nãfãfe judeofo mẽraxõ Nios Ifokõi fakaxõ efeta Nios xanĩfoõnoa yoikĩ yonomisfo. Nãskafakĩ ea inimamakõimisfo. Akka ẽfe kaifãfe nonoxõ efeta Nios yonoxomisfoma, nã ẽ mato yoiaifo feta ẽ Niosnoa yoimis. ¹² Na feronãfake Ipafrasri meka shara mato fomai, nãatori Cristo yonoxomis, nã mato mẽra iyopaoni. Nãato mẽxotaima matoõxõ Epa Nios kĩfikĩ iskafa fafãfãini: “Epa Niosi, mĩ ato amapaiyai keskafakĩ ato amafe afaa fetsa shinãõfoma. Nãskakanax mĩ Fake Jesús õiti keskara shara inõfo,” ixõ mato kifixõfãfãini.

¹³ Akka mẽ õia na Ipafras matoõxõ shinãchakakõiaito. Askatari nã pexe rasi Laodicea anoafo yafi Hierápolis anoafo ato Epa Nios kifixõfãfãini. ¹⁴ Na Lucas ato sharafamis, ẽ aõ noikõ. Nãato Demãs feta mato meka fomakani.

¹⁵ A Jesús Ifofaafo Laodicea anoafo ea ato yoisharaxõfe. Nĩfasri ea yoisharaxõfe, a ẽ afe pexe anoax Nios Ifofakanax ichanãmisfori ea ato yoisharaxõfe. ¹⁶ Akka na kirika kene ẽ mato fomai mā mā õixõ, nã Nios Ifofaafo Laodicea anoafori ato fomakãfe akairi õinõfo. Mãri na kirika kene õikãfe Laodicea anoxõ mato mana manafono. ¹⁷ Nãskakẽ Arquipori ea yoikĩ iskafaxokãfe: “Epa Niospa mia yoia keskafakĩ axosharakõife,” ixõ ea yoisharaxokãfe.

¹⁸ Ẽkĩa Pablo, ẽ mato kirika kenexoni. Mato yoisharakĩ, ẽfe mifikõichi ẽ kenei. Nãskakẽ ea shinãmakiyamakãfe ẽ karaxa mẽraxõ ikakĩ. Niospa mato noikĩ matoõnoa shinãfãfãinõ. Nã tii.

Pablo Tesalónica Anoafo Kirika Kenexō Fomani

Pablo a afe rafeafo feta a Tesalónica anoxō Nios Ifofafo ato kirika kenexō fomani

¹ Ēkīa Pablo, nō mato kirika kenexō fomai, Silvano ikaino Timoteo ikaino nā tiito nō mato fomai. Nā pexe rasi Tesalónica anoxō Nios Ifofafo nō fomai, anoxomāi Epa Nios yafi nōko Ifo Jesucristo mā Ifokōi faafono. Epa Nios feta nōko Ifo Jesucristo mato noikī mato sharafanō fekaxtetama mā isharakōinō.

Tesalónica anoafāfe Jesús Ifokōi fakaxō ato ōimanifo

² Mēxotaima nō matoōxō Epa Nios aicho fakī nō kīfikī iskafa fafāfāini. ³ “Epa Niosi, na Tesalónica anoafāfe, mia noikakī mia yonoxosharamisfo, nāskakaxō fena fenakākima nōko Ifo Jesús manasharamisfo nokoki anā oi kiki,” ikaxō. Nānori pena tii ē mato kīfixōfafāini. ⁴ Efe yora mīshtichi, Niospa mato fāsi noikī mato katonī afe yorafo mā inō. ⁵ Nō mato Niospa meka sharaōnoa yoimis afeskax nō afe ĩpaxatiromāki. Akka nōko mekapas nō mato yoimisma, askatamaroko Niospa Yōshi Sharayaxō āfe kerex sharafofaxō nō mato Jesúsnoa nā meka chanīmakōi nō mato yoimis. Akka mā mā tāpia nō mato fe isharafoani. Nō askaino mā Jesús Ifofakōini.

⁶ Akka nō Jesús Ifofai keskafakī māri Ifofani. Nāskakē Niosnoa meka shara nō mato yoiaito inimakōiyanā mā nikakōini, Niospa Yōshi Sharapamāi mato inimamakōiaino fetsafāfe mato omiskōimafiaifono. ⁷ Nāskakē mā isharakōixō mā ato ōimakōia nā Nios Ifofafo Macedonia anoafāfe yafi Acaya anoafāfe. ⁸ Matoōxō nōko Ifāfe meka shara nikakī taefanifo Macedonia anoafāfe yafi Acaya anoxō. Akka anoxos nikanifoma. Nā pexe fetsafo anoxori nikanifo. Nāskaxō mā tāpiafo mā Nios Ifokōifakē. Nāskakē nō anā matoōnoa ato yoitiroa, māmāi matoōnoa tāpikōiafano. ⁹ Askatamaroko fetsafāfe nokoōnoa ato yoimisfo iskafakāki: “Tesalónica anoafāfe nōko Ifo Nios Ifofakōinafo, nāskaxō Pablo yafi a afe rafeafo ato sharafayanā a yoiaifo keskara ato nikakōimisfo. Nāskakaxō afara fetsa onifakaxō, ‘Na nōko niosra,’ ikaxō anā kīfimisfoma, Nioskōi Ifofakakī. Nāskakaxō nā nipanaka Nioskōi yonoxomisfo. ¹⁰ Akka nā Niospa Fake Jesús mā manakōi nai mēranoax anā oaitīa. Akka Niospa āfe Fake otofani. Nāato noko ifitiro a omiskōiaiffo mēranoax nō omiskōinōma.”

2

Pablo Tesalónica anoxō Jesúsnoa ato yoini

¹ Efe yora mīshtichi, mā mā tāpia kaxpa nō mato ōikai kanima. Jesúsnoa nō mato yoikai kani nikakī mā Ifofakōinō. ² Mā mā tāpia nō matoki kayoamano na Filiposo anoafāfe noko ĩchayanā noko omiskōimapaonifo. Nāskaxō noko xatemapaiyaifono, Epa Niospa āfe kerex shara noko ināno, nō ratetama na meka sharaōnoa Jesúsnoa nō mato yoimis keskara tsōa noko xatematiroma. ³ Akka nō mato yoiki fanīrira nō mato yoimisma, nō mato yoisharakōimis. Askatari nō mato chakafakī yoimisma, askatari nōa nō mato paramisma. ⁴ Askatamaroko Epa Niospa noko katonī āfe meka shara Jesúsnoa nō mato yoinō. Akka nōkai yorafo nokoōnoa shināmapaitiroa. Askatamaroko nokoōnoa Nios fisti nō inimamapai, nā fistichi nōko shinā mēraxō nō shināi keskara tāpikōia. ⁵ Mā mā tāpia nōkai matoōnoa meka shara yoimisma, māri nokoōnoa yoisharanō. Ēkai mato feparamisma, “Noko afara

shara inānōfora,” ixō. Akka a ẽ mato yoimis keskara Epa Niospa tãpikōia, nãato ea õifafaini. ⁶ Nõkai fetsafo nokoõnoa yoisharakãfe nõ ato famisma. ⁷ Akka nõ aõnoa yoinõ noko nõchini ãfe meka shara nõ mato yoinõ. “Akka noko afara afeskarafaxokãfe,” ixō nõ mato yoikerapaoni. Akka ãfa ãfe fake yome kexesharamis keskafaki nõ mato kexesharapaoni. ⁸ Nõ mato noikõikĩ inimakãi nõ mato Niospa meka shara yoianã nõa nõ inãmepaikõini, mã Nios tãpisharakõinõ. Nãskaxõ nõ mato noipaoni keskafaki, iskaratĩa nõ mato noikĩ finasharakõimis. ⁹ Efe yora mĩshtichi, mã mã tãpia nõ mato mẽraxõ yonomiski omiskõikõianã, a nõ fichipaiyai fixiki, penata yonota fakishchãiri nõ yonomis. Akka nõ mato afaa kaxpa fiapaimisma, Niospa meka sharaõnoa mato yoianã.

¹⁰ Akka mã mã noko õimis, Niospari tãpia nõ tanaima isharakõimiskẽ mato fe a mã Nios Ifofaafõ fe. Nãskakẽ nokoõnoa tsõa afaa chaka yoitirofoma. ¹¹ Askatari mã mã tãpia nõ mato inimamakõimis, mã shinãmitsaitori nõ mato askafamis inimamamis oa ãpa ãfe fake inimamatiro keskafakĩ. ¹² Akka nõ mato yoimis mã isharakõinõ a Nios Ifofaafõ imis keskai. Akka nãato mato katonĩ Jesũs keskara shara mã ipaxanõ.

¹³ Nãskakẽ mẽxotaima nõ Epa Nios aicho fatitaifaa mãmãi noko nikasharaito, nõ mato Niospa meka sharaõnoa yoiaito. Nãskakẽ mã yoikĩ iskafani: “Na meka shara mã noko yoiai yõra mekama, Niospa meka shara,” ixõ mã yoini. Chanĩma, Niospa mekakõi nõ mato yoimis. Nãskakẽ mã ãfe meka nikakĩ mã chanĩmara faino mato shinãmasharai Jesũs keskara shara mã inõ. ¹⁴ Efe yora mĩshtichi, mãri omiskõini mãto kaifãfe mato omiskõimanaifono. Nãskarifiiai nõ mã ikai keskai a Nios Ifofaafõ Judea anoxõ Cristo Jesũs Ifofakanax omiskõikani ãto kaifo judeofãfe ato omiskõimanaifono. ¹⁵ Nã judeofãfe nõko Ifo Jesũs retenifo, taefakĩ a ato Niospa meka sharaõnoa yoimis ato retepaonifo, nãskaxori noko omiskõimayanã noko potanifo. Nãskaxori Nios aicho fayamata yorafo chakafakĩ mekafamisfo. ¹⁶ Askatari a judeofoma Nios fe ipaxanõfo nõ ato yoisharapaiyaino, noko ato yoitima famisfo. Nãskakẽ afaa chakafakĩ finayamafikatsaxakakĩ mã afara chakafakĩ finakõimisfo. Akka iskaratĩa anã tenetiromameki Niospa ato omiskõimaki finakõi.

Pablo Tesalónica anoafõ anã ato õipai kapaini

¹⁷ Efe yora mĩshtichi, mã nõ mato fe paxkanãifinixakĩ, nõa nõ shinãki mato õiamafikĩ mẽxotaima nõ mato shinãtaifai nõko õiti mẽraxõ. Akka nõ kaxõ nõ mato õisharapaikõi. ¹⁸ Akka mã nõ mato ari kapaitaiais, nãskaifi ẽroko mẽxotaimakõi mato ari kapaikõimis. Nõ askafiaino, akka Satanás noko katimafamis. ¹⁹ Nõ mato yoimis Jesũs keskara shara mã inõ. Nãskakẽ Jesucristo oaino keyokõichi tãpitirofo Jesũsmãi Ifokõi fakaxõ. Nãskakẽ Jesũs õiaino matoõnoax nõ inimakõixii, nõ mato yoipaoni keskaramãi mã nikakõimiskẽ. ²⁰ Chanĩma, nokoõxõ mã Jesũs Ifofakõinafono nõ inimakõi. Nãskakẽ Epa Nios nokoki inimakõi.

3

¹⁻² Nãskakẽ nõ anã tenetiroma meekĩ nõ shinãita nono Atenas ano nores nẽtexiki, nãskaxõ nofe yora Timoteo nõchixiki mato õikanõ. Na Timoteori Nios yonoxomis, nãato nofeta yonomis Jesucristoõnoa meka sharaõnoa ato yoikĩ. Nãato mato yoikĩ mato inimamasharakõitiro. ³ Nãskakẽ ẽ matoki Timoteo nõchini: “Omiskõikãki anã Niospa meka nikatirofomara,” ixõ. Akka mã mã tãpia na nõ omiskõiai keskara. ⁴ Akka nõ mato fe iyoxõ, nõ mato yoifafãiyamea, nõ omiskõixiira fakĩ. Nõ mato yoifafãiyamea keskai mã askakõia, nãskakẽ mã mã tãpia. ⁵ Nãskakẽ ẽ anã tenetiroma meekĩ, ẽ Timoteo nõchiyamea mato

yōkatanō, a mā Jesús Ifofapaoni keskafakī ai mā Jesús Ifofamākī ē tāpipaikī. Akka ē ratekōiyamea, “Niafaka chakata ato afara chakafamaira,” ikax. Akka nōakōi kaxpa Niospa mekaōnoa nō mato yoiyamea ikerana.

⁶ Akka Timoteo mā Tesalónica anoax anā oa mato ōitani. Meka shara matoōnoa noko yoitoshia, mā Jesús Ifofasharayanā mā noināsharakōiaito. Noko yoia mā noko shināyanā mā noko noikōiaito, askatari mā noko ōisharapaikōiaito, nā nō mato ōipaiyai keskafakī mā noko ōisharapai. ⁷ Nāskakē efe yora mīshtichi, noko Jesúsxō omiskōimayanā noko fekaxtefaifono mā Jesús Ifo sharafakī mā noko inimamakōimis. ⁸ Akka mā mā Jesús Ifofashara, mā anā afaa fetsa shināima. Mā nō tāpiax nō inimasharakōi nō isharakōitiro. Nāskakē afara afeskaraino nō tenetiro. ⁹ Nō matoōnoa shināki nō Epa Nios kīfikī, nōko ōiti mēranoax nō fāsi inimakōi. Nāskakē nō matoōxō Epa Nios kīfiki nō aichofa fafāfāini. ¹⁰ Nāskakē penata yoita fakishi yoita nō Nios kīfifāfāini matoōxō, noko mato ari nīchiaino nō mato ōikanō a mā tāpiamafo nō mato yoixiki mā Jesús Ifofakōinō.

¹¹ Nāskakē Epa Nios feta nōko Ifo Jesucristo mato ari noko nīchipainō nō mato ōikanō. ¹² Nōko Ifāfe mato shināmasharaino mā noināi finakōinō, fetsafori mā noisharanō, nō mato noiai keskafakī māri keyokōi yorafo noisharakōinō. ¹³ Mā askaino Epa Niospa māto ōiti mēraxō mato shināmasharai, Jesús Ifo sharafayanā mā afaa chakafayamanō. Mā askaino nōko Ifo Jesús afe yorafoya oaitīa māri a keskara shara ixii, Epa Niospa ōiaino.

4

Afeskak isharaxō nō Nios inimamatiromē nokoki inimanō

¹ Efe yora mīshtichi, mē mekai xatekī ē mato yoinō. Nō mato yoipaoni afeskak mā itiomākī Nios matoki inimanō. Akka nā nō mato yoipaoni keskai mā mā askakōia. Nāskakē anā nō mato yoi noko nikakapo. Mā Nios Ifofaa keskafakī nōko Ifo Jesucristoōxō Ifofakī finakōikāfe.

² Akka mā mā tāpia nōko Ifo Jesús noko yoini keskara, nānorikōi nō mato yoimis. ³ Akka Niospa fichipai a keskara shara mā inō. Nāskakē tsōa āfe āfima chotatiroma. Kērofāferi āto fenemafo chotamatirofoma, ⁴ Askatamaroko āfiyatirofo āfe āfi noiyanā āfe āfifes ixiki. ⁵ Nāskata afara chakafapaimiskōi iyamaxikakī, a Nios tāpiamafāfe amisfo keskara axikakima. ⁶ Akka Epa Niospa yoini iskafakī: “Fētsa āfi fe ipaiyamakāfe. Tsoa fomāyamakāfe fetsa āfi fe ixiki,” ixō Niospa yoini. Akka nō mato yoini keskai, tsoa askayamakī afara chakafaifono Epa Niospa ato omiskōimaxii. ⁷ Epa Niospa noko katonima nō afara chakafanō. Askatamaroko noko katoni a keskara shara nō inō. ⁸ Nāskakē a ē mato yoimis keskara tsōa nikayamakī atokai yora fisti nikakaspaima. Niosri nikakaspai, nāto āfe Yōshi Shara mato ināfiano a mato amapaiyai keskara mā anō.

⁹ Ēfe mekakai mā fichipaima mā ranā noināxiki. Epa Niospa mato tāpimani mā noinānō. ¹⁰ Mā nō tāpia nā Nios Ifofaafō Macedonia anoxō mā ato noikōiaito. Nāskakē nō mato yoisharapai, mā ato noiki finakōinō. ¹¹ Nāskakē isharakāfe māto ōiti mēraxō afanā mato fekaxtefanōma. Fētsa afara afeskarafaino aōnoa shināchakayamakāfe. Nā Niospa mato amapaiyai keskara fisti akāfe. Askatari mā yonotiro xanikima. Nānori nō mato yoimiski. ¹² Nāskafakī mā yonotiro a mā fichipaiyai fixiki. Kaxpa afaa ato yōkayamakāfe. Mā askaito a Nios Ifofaafāfema matoōnoa shinākōitirofo.

Nōko Ifo Jesús anā oaino, ¿afe keskara ixii?

¹³ Efe yora mīshtichi, ē mato yoiai keskara nikasharakāfe. Jesús Ifofaafō nakanax afeskakanimākai ē mato yoinō, akka a Ifofaafoma ato fe yorafo

naafono, manomitsakani omiskōikani. Akka mā askaima māmāi Nios Ifofaax, māmāi anā ōinōnāxixakī. Akka a Nios Ifofaafoma anā ōinōnākanima. ¹⁴ Mā nō tāpia Jesús nafiāx afianā otoni. Nāskarifiakī mā nō tāpia Niospa atori otofaxii. Jesús anā oaino, a Ifofakanax namisfo.

¹⁵ Nāskakē nō mato yoimis nōko Ifo Jesús noko tāpimamis keskara. Akka nō nayoamax nōko Ifo Jesús oaino nō rekē nai mēra kaima, nā naitaenifo rekē fokani. ¹⁶ Akka nōko Ifo nai mēranoax fotopakekafāni fāsikōi mekakeraxii xanīfo finakōimāiax. Askatari nā ājiri xanīfo finakōiafāfe āto mekari nō nikaxii. Askatari Niospa āfe maneti chāi chāisaito nō nikaxii. Nāskakē a Cristo Ifofakanax namisfo otoi taexikani. ¹⁷ Nāskata a nō namisfoma Niospa atoya noko iyoxii, nāskakē nai kōi mēranoax nō fichināxii. Nōko Ifori nofe ixii nai kōi mēra. Nāskakē nōko Ifo fe mēxotaima nō ipanaka. ¹⁸ Nāskakē mā ranā inima faatanāsharakāfe, na meka sharaōnoax.

5

¹ Efe yora mīshtichi, nōko Ifo Jesucristo anā oaino anā nō mato yoitiroma. ² Akka mā mā tāpikōia nā oaitīa tsōa manasharayamaino nōko Ifo nokotiro. Nā afaa shināima tanaima oxafono, fakishi oax yometso atoki yometsotiro keskai. ³ Yorafo iskaifono: “Nōkai afaa chakafamisma nō isharakōia,” ikaifono Epa Niospa ato omiskōimanaino pae meexikani. Oa kēromā fake nanexō mā fake kāikī pae meetiro keskara meexikani. Nāskakē nā omiskōiai nokoaino tsoa faki onetiroma.

⁴ Akka efe yora mīshtichi, mākai oa fakish mēra nia keskarama, askataro mā oa penata nia keskara. Nāskakē mā manasharaito nōko Ifāfe mato fichitoshitiro. Akka nā Ifofaafoma oa fakish mēra nia keskarafono, atoki yora yometso oax atoki yometsoaino tsōa tāpitiroma keskarafono. Nāskarifiakī nōko Ifo oaino afaa shinātirofoma, Ifokairoko fakaxō. ⁵ Akka māfi nā penata nia keskara sharakōifokī. Mākai oa fakish mēra nia keskarafoma. ⁶ Nāskakē nā Satanās ifofamisfo keskara nō imisma, afāfe afarafo chakafaifo fisti shināmisfo. A Jesús fotoainoa tsōa shināmisma. Akka nō anā Jesús oaitīa nō shināi, oa yora oxa keskara nō imisma. Oa yora moia keskara nō imis Jesús oaitīa manai xafakīakōi isharaxō. ⁷ Nā afaa shināifoma a Satanās ifofaafoma nā fakishi oxafono keskarafono. Nāskarifiakī a Satanās ifofaafoma a afaa shināifoma fakishi pāemisfo keskarafono. ⁸ Akka nōkai ato keskarama, nōfi oa penata nia keskara sharafoki. Nāskakē Jesús Ifokōi fata nō yorafo noikōita nā Jesús oaino nō manakōitiro, nō askaito Satanās noko afaa chakafamatiroma. Māraki sorarofāfe āto rapati kerexkōi safeafono tsōa ato retetiro, āto maiti kerexkōi safeafonori tsōa ato retetiroma. Nāskarifiakī nō Jesús Ifofaano, āfe Yōshi Shara nō mēra naneano Satanās noko afeska fatiroma. ⁹ Akka Niospa shinānima a omiskōipakenakafo mēranoax nō omiskōipakexanō. Askataro noko ifini Jesucristoōxō nōko chaka noko soaxoxiki nō afe ipaxanō. ¹⁰ Akka Jesucristo nokoōnoax nani nō afe ipaxanō. Nayamafiāx mā naaxri nō afe nīpanaka. ¹¹ Nāskakē inimayanā fetsafo ato inimamasharakāfe. Mē tāpiaki mā ato askafaino. Nāskakē ato fe mēxotaima aska faatanākāfe.

Pablo A Nios Ifofaafoma ato yoisharani

¹² Efe yora mīshtichi, ē mato yoisharapaikai, ea nikasharakāfe. Epa Niospa nā Ifofaafoma katonī āfe meka shara mato yoinōfo. Nāfāfe nōko Ifoōnoa mato yoisharamisfo nōko Ifo mā Ifo sharafanō. Nāskakē ato noiyanā ato nikasharakāfe. ¹³ Nōko Ifoōxō mato yoisharamisfo, nāskakē ato nikasharakāfe, ato noisharayanā. Mato fe yorafo fe isharakāfe, mēnāpaitama isharakōikāfe.

¹⁴ Askatari efe yora mīshtichi, nō mato yoisharamis iskafakī: A xanimisfori ato yoisharakāfe yonosharanōfo, askatari a shināmitsaifo ato inimakāfe. Nāskaxō a Nios Ifofasharafoma ato yoisharakāfe chanīmara fakōinōfo. Nāskaxō ato noiyanā fenāmāshta mā ato yoisharatiro.

¹⁵ Nāskakē kexemesharakāfe, fetsafāfe mato noikaspaifono ato kopiya-makāfe. Askatamaroko noinā faatanāsharakāfe, keyokōi yorafo sharafakāfe.

¹⁶ Mēxotaima inimafafāikāfe. ¹⁷ Pena tii Epa Nios kīfifafāikāfe. ¹⁸ Afara afeskara afiaino, Epa Nios aicho fakāfe. Nāskara Niospa matoōnoa fichipai kiki mā Cristo Jesús Ifo shara fakē.

¹⁹ Niospa Yōshi Sharapa mato amapaiyai keskara xateyamakāfe. ²⁰ Fetsafāfe Niosxō mato yoiaifono a yoiaifo keskara, “Na afamara,” ixō ato nikakaspakakīma, ato nikasharakōikāfe. ²¹ Akka fētsa mato yoipaiyaito Niospa Yōshi Sharaōxō yōkakāfe nā mato yoiai keskara chanīmamakī askayamai chanī itiroki. Akka nā meka chanīmakōi nikafafāikāfe, a meka chanī nikakakima. ²² Afara chaka fishtayamakāfe.

²³ Niospa mātō yorafoya, mātō fero mēshofoya mātō yōshi sharafoya Niospa mato sharakōi fatiro mā fekaxtenōma. Nāato shara mato imatiro āfe ōiti keskara shara mā inō. Mato kexesharata mātō ōiti mēraxori mato shināmasharatiro. Askax mā sharakōi inō. Epa Niospa mato askafaino nōko Ifo Jesucristo afianā oaitīa mato shināmasharaxii. ²⁴ Niospa mato katonī mā Ifofanō. A noko yoiai keskara Niospa noko pāratiro, noko axotiro.

Mā mekai xatekī Pablo ato yoisharani

²⁵ Efe yora mīshtichi, noko Epa Nios kīfixokāfe.

²⁶ Keyokōi a nōko Ifo Jesús Ifofaafo fe yoinōnāsharakāfe.

²⁷ Nāskaxō Epa Niospa mato yoia keskara nikasharakāfe. Nā mā Ifofa tii ē mato kirika kenexō fomaikai ato nikamasharakāfe.

²⁸ Nōko Ifo Jesucristo mato noikī mato sharakōifanō. Nā tii ē mato yoi.

Pablo

Pablo Tesalónica Anoafo Afianã Kirika Kenexõ Fomani

Pablo afe rafeafo feta Tesalónica anoxõ Nios Ifofaafono ato kirika kenexõ fomani

¹ Ëkã Pablo. Silvano ikaino Timoteo ikaino nõ mato kirika kenexõ fomai. Efe yora mĩshtichi, mã Epa Nios Ifofaano pexe rasi Tesalónica anoxõ, mãfi nõko Epa Nios fe rafekõiakĩ nõko Ifo Jesucristo ferĩ mã askakõia. ² Nãskakẽ Epa Nios feta nõko Ifo Jesucristo mato noikĩ mato sharakõifanõ, askatari mato imasharakõinõ mãto õiti mẽranoax mã anã fekaxtenõma.

Epa Niospa a yora chaka omiskõimaxii mã Cristo anã oaino

³ Efe yora mĩshtichi, mã taefakĩ mã Nios chanĩmara fani. Nãskakẽ iskaratĩa mã chanĩmara fakĩ finakõia. Askatari mã rama Nios Ifofaax mã nõinãsharakõini. Nãskakẽ iskaratĩa mã nõinãifinakõi. Nãskakẽ nõ matoõxõ Nios kĩfikĩ iskafa fafafãini: “Aicho Epa Niosi, mefe yorafãfe Tesalónica anoafãfe mia Ifokõi faafoki,” ixõ ã mato kĩfixõfafãini. ⁴ Nãskakẽ Niospa mekaõnoa nõ ato yoifofãsafakĩ nã Nios Ifofaafono fe nõ ato fe ichanãitĩa nõ matoõnoa ato yoimis iskafakĩ: “Nã Nios Ifofafo Tesalónica anoafo ãto kaifo fetsafãfe ato omiskõimamisfo. Nãskakẽ afara chakafãfe ato afeskarafafiaino a shinãtamaroko Jesús Ifokõi fakaxõ tenekõimisfo,” ixõ nõ matoõnoa ato yoixomis. ⁵ Nãskakẽ mã Jesucristoõnoax omiskõifixõ mã tãpitiro Niospa isharakõixõ mato yoikĩ iskafaino: “Nafo isharakõiafo,” mato faino mã afe ipaxatiro. Nãskax mã mã omiskõifixax chipo mã afe isharapakenaka.

⁶ Niospa mẽstekõi fisti shinãmis, a mato omiskõimamisfo kopikiri chipo Niospa ato omiskõimaxii. ⁷ Nãskakẽ nõko Ifãfe mato tenemasharaxii mã anã omiskõinõma a noko akai keskafakĩ mã nõko Ifo fotoxõ. Akka nõko Ifo nai mẽranoax fotoi oa chii xoisai itikikeraxii ãfe ãjiri finakõiafo fe oi. ⁸ Akka nõko Ifo oxii a Nios Ifofamisfoma ato omiskõimaniyoi, askatari ãfe meka sharaõnoari nikamisfomano ato omiskõimaxii. ⁹ Nãfo omiskõipakenakafo, anãkai nĩpanakafoma. Nõko Ifokai õipakenakafoma, askatari ãfe shara yafi ãfe kerex shara õipakenakafoma. ¹⁰ Akka nõko Ifo oaino, nã penata a Ifofamisfãfe aõnoa yoisharaxikani. Nãskafaifono nã Nios Ifofamisfãfe õiketsaxikani, akka mã mã nikamis nõ mato yoiãito.

¹¹ Nãskakẽ nõ matoõxõ Nios kĩfikĩ iskafa fafafãini: “Epa Niosi, mã ato imapaiyai keskafakĩ ato imasharafe mia Ifofakaxõ fetsafo sharafapaikani kiki mã kerex shara ato inãfe,” ixõ ã matoõxõ Epa Nios kĩfimis. ¹² Nãnori nõ mato Epa Nios kĩfixomis, fetsafãfe mato õikakĩ nõko Ifo Jesúsnoa yoisharanõfo iskafakakĩ: “Jesús afama mĩshti fatiro, nãskaxõ afe yorafo a keskara sharakõi ato ima,” ixõ aõnoa yoisharanõfo. Nãskakẽ Epa Nios feta nõko Ifo Jesucristo mato noiyanã a keskara sharakõi mato imatiro.

2

Nã feronãfake afara chakafamisnoa ato yoini

¹⁻² Akka nõko Ifo Jesucristo anã fotofaino nã Ifofaafono tii akiki nokoxikani afe ipaxakakĩ. Nãskafekẽ fetsafãfe mato parapaikani iskafakakĩ: “Jesús mã oxõ a inõpokoãifo keskara ea tãpimana,” ixõ mato yoikani. Nãskatari fetsafãferi mato yoikĩ iskafakani: “Mã nõ nika Jesús mã oa,” ixõ mato yoiãifono, fetsafãferi yoikĩ iskafakani: “Pablo noko kirika kenexõ fema, ‘Jesús mã oa,’ ” ixõ mato yoipaikani, ãa chanĩkakĩ. Nãskakẽ rateyamakãfe. Ë mato yoinõ.

Jesús oaino nã Ifofaafo afe ichanãxikani, nãskax afe ipanakafo. Akka mato yoisharapaiyaito nikasharakãfe. ³ Nã chanĩmisfo ato nikayamakãfe. Jesús oyoamano keyokõichi Epa Niospa meka kachikiri fakani anã nikaxikakima. Nãskakanax nikayospakõi ixikani. Nãskaifono a feronãfake chakafinakõia oxii. Nãato a Niospa yoini keskara nikakaspakõimis. Nãato Satanás ifofakõimis. Askafiax chipo a omiskõipakenakafo mēra kaxii. ⁴ Akka a feronãfake niyoxõ iskafakĩ yoixii: “È keyokõi finõa. ‘Na nõko Niosra’ ixõ mã kĩfimis, nãri ã finõa. Akai Niosma,” ixõ ato yoita, nã Nios kĩfiti pexefã mēra ikikaixõ ato yoixii iskafakĩ: “Afaa fetsa kĩfiyamakãfe. Askatari afaa fetsari noiyamakãfe. Èfi Nioski,” ixõ ato pãraxii.

⁵ Akka, çmã shinãimamē a ã mato fe iyoxõ a ã mato yoipaoni keskara? ⁶ Akka mã mã tâpia nã chaka finakõia Epa Niospa nētefayoa, fena oyoyamanõ. Nãskafiax chipo oxii Epa Niospa anã nētefayamaino. ⁷ Nã noikaspamis Epa Niospa nētefayoano fena oyoima. Chipoxii Epa Niospa anã nētefayamaino. Akka oyoamano nã aõxõ afara chakafamisfãfe fomãpaiyoxikani. ⁸ Nãskakē nã chakafinakõia mã oano, nõko Ifo Jesús ãfe axfapa xoõ atakĩ reteskĩ mapokõi fataxii. ⁹ Nõko Ifãfe reteyoamano nã yora chakafinakõiato Satanãõxõ afama mĩshtifo faxii afarafo afeskarafakĩ ato parayanã. ¹⁰ Nãskaxõ afarafo afeskarafakĩ ato pãraxii a nikaifo, nãskakē nã nikakanax afe nã omiskĩskõipakenakafo mēra foxikani. Nãfãfe Niospa mekakõi nikayamakãta, ãfe meka sharari noimisfoma Nios fe ipaxakakĩma. Nãskakē nã omiskõipakenakafo mēra foxikani. ¹¹ Nãskakē Niospa anã ato yoipaima ãa ato paranõfo, a ato paramisfãfe ato yoiaifo keskara nikakõiaifono. ¹² Nãskakē nãfãfe Niospa mekakõi nikayamakãta, tsoarikai aõ noimisma. Askatamaroko afara chaka fisti fichipaiyaifono Epa Niospa nã omiskõipakenakafo mēra ato potaxii nã ato paramisfo fe omiskõipakexanõfo.

Niospa noko katonĩ nõko chaka noko soaxoxiki nõ afe ipaxanõ

¹³ Efe yora mĩshtichi, taekõifakĩ Epa Niospa mato noikĩ mato katonĩ afe mã ipaxanõ. Nãskakē ãfe Yõshi Sharaõxõ mato ifini afe yora mã inõ, Jesúsnoa mã chanĩmara faino. Nãskakē mēxotaima nõ Nios aicho famis mato shinãkĩ. ¹⁴ Nãskakē ãfe meka shara nõko Ifo Jesucristoõnoa nõ mato yoiaino nokoõxõ mã mã tâpikõia. Nãskaxõ mã chanĩmara faino ãfe Fake Jesucristo ofofani keskafakĩ matori õtofaxii a ika ano mã afe ipaxanõ.

¹⁵ Nãskakē efe yora mĩshtichi, nã nõ mato yoimis anorikõi nikafafãikãfe. Akka anoriyamakē afo nikayamakãfe. Nã nõ mato yoipaoni keskara nã fisti chanĩmara fayaná, a nõ mato kirika kenexoki nõ mato yoini keskarari shinãfafãikãfe. ¹⁶ Nõko Ifo Jesucristo feta nõko Epa Niospa noko noikĩ, nõko õiti mēraxõ noko inimamakõinõ. Nãskakē nõ tâpitiro noko potanakama nõ afe ipaxanõ. ¹⁷ Mãto õiti inimamakõikãfe mato imasharakõiaino. Nãskaxõ afara afeskara afiaino ato yoisharakõita mã ato axosharafafãixikakĩ.

3

“Noko Epa Nios kĩfixokãfe,” ixõ Pablo ato yoini

¹ Akka efe yora mĩshtichi, mē mekai xatekĩ ã mato yoi. Noko Epa Nios kĩfixokãfe, nõko Ifãfe ãfe meka shara mã nika keskafakĩ nõko Ifoõnoa keyokõichi nikanõfo. ² Askatari noko Epa Nios kĩfixokãfe na yora chakafo feta a shinãsharaifãfema noko afeskafanõfoma. Nãkakē Jesúsnoa nõ ato yoiaito noko nikakatama noko xatemapaimisfoki. ³ Akka nõko Ifo sharakõi, nã noko yoimis keskara noko axomis. Nãato mato imasharapakenaka, afara chakatari mato fekaxtefanõma. Askatari nãato mato kexesharapakenaka.

⁴ Nāskakē nōko Ifoōxō nō chanīmara fai, nā nō mato yoimis keskara mā akaito. Nāskakē mēxotaima mā askafa fafafaīni a nō mato yoimis keskafakī. ⁵ Epa Niospa mato noiai keskafakī nōko Ifāfe mato tāpimapainō. Cristo omiskōifikī teneni keskafakī, aōxō māri mā tenesharakōifafaīnō.

Keyokōichi nō yonosharakōitiro

⁶ Efe yora mīshtichi, nōko Ifo Jesucristoōxō nō mato yoimis. A Epa Nios Ifofaa fetsafāfe yonokaspaifono mā ato makinoax paxkanō a nō mato yoimis keskara nikakaspafono. ⁷ Akka mā mā tāpia a nō imis keskara mā askapai mā isharakōitiro. Nō mato mēra ixō nō yonokaspapaonima. Askatamaroko nō yonokōipaoni. ⁸ Askatari nō tsoa afaa kaxpa pīapaonima. Askatamaroko nō yonopaoni, penata yonota, fakishi yonota nō fapaoni a nō piai fīxō pixii mares fisti mātō kori ichapa mā potanōma. Nō yonokī askafapaoni. ⁹ Niospa mekaōnoa yoinifo iskafakī: “Nā mato Niospa meka yoimisfāfe afara yopaifāfe ato inākāfe,” ixō kenenifo Niospa ato shināmanaino. Nāskakē, “Noko afara inākāpe,” ixō nō mato yōkakerapaoni. Askatamaroko nō yonopaoni nō mato ōimakī a nō akai keskafakī māri mā yononō. ¹⁰ Akka nō mato mēra ixō nō mato yoipaoni iskafakī: “Akka nā yonoyamaito afaa pitiroma,” ixō nō mato yoini. ¹¹ Akka matoōnoa noko yoiāfo iskafakakī: “Na ranārito yonokaspata ikafo, nāskakanax afaa meekatama āa fofāsakaki ato parafofāsa famisfo,” ixō noko yoiāfo. ¹² Nāskakē nō mato yoi iskafakī, nōko Ifo Jesucristoōxō mā tanaima yonosharakōinō anā xanikima a mā fichipaiyai keskara fixiki.

¹³ Efe yora mīshtichi, a mā afarafo sharafamis keskafakī xateyamakāfe. ¹⁴ Akka na kirika kenexō nō mato yoiāi keskara nikakaspai, aōnoa shinākāpo. Nāskakē afe rafepaiyamakāfe, mā askafaino rāfinō. ¹⁵ Nāskafaiato noikaspayamakāfe. Askatamaroko yoisharakāfe mato fe yora keskara fakī.

Mā mekai xatekī Pablo ato yoisharani

¹⁶ Nōko Ifāfe nōko ōiti noko inimamaxotiro. Pena tii afara afeskara afaino mato inimamatiro. Nōko Ifo keyokōi mato fe isharanō.

¹⁷ Ēkīa Pablo, ēkōi ēfe mēkemā kirika kenexō ē mato fomai yoisharakōiyanā. Akka nā ēfe kirika kenefo ē iskafamis kenekī. ¹⁸ Nōko Ifo Jesucristo mato noikī keyokōi mato sharafanō. Nā tii ē mato yoi.

Pablo Timoteo Kirika Kenexõ Fomani

Pablo Timoteo yoisharani

¹ Ëkĩa Pablo. Iskaratĩa ã mia kirika kenexõ fomai Timoteo, ã mia yoikĩ. Epa Niospa ea katonĩ ã ãfe meka Jesucristoõnoa ã ato tãpimanõ. Epa Nios noko ifimis, Jesucristo nõko Ifo feta ea yoini ã ato tãpimanõ. Jesucristo nokoõnoax nani ares noko Epa Nios ari iyoxii kiki. ² Nãskaxõ ã mia Jesucristo chanĩmara famaxõ, ã mia fakekõĩ faa, Timoteo. Nãskaxõ ã mia yoixõ Epa Nios, Cristo Jesús nõko Ifo feta mia shinãsharanõ mĩno noikĩ, mĩ shinã mẽra mia shinãmasharanõ, mĩ õiti fekaxtenõma.

Pablo Timoteo yoini: “Õisharakõife, ato anorima tãpimapaikõikani kiki”

³⁻⁴ Ë Macedonia ano kayamea taefakĩ, ã mia yoifaini kati. Ë mia anã yoiaito nikasharafe. A Efeso anoax fena kayamafe. Nãno ixõ mĩ efesofo ato yoisharafe. Atiixori Niospa meka anorima yoimisfokĩ. Niospa meka yoitamaro ko ãto xinipao ipaoni fisti ato yoifafãikani. Askakani feratenãkani. Nãskakẽ ã mia yoi mĩ ato yoisharanõ iskafakĩ: “Niospa meka mẽstekõĩ yoisharakõikãfe. Mãto xinipaofãfe afeskax Epa Nios ari nõ nokotiomãki noko tãpimapaonifoma. Jesucristo noko nãxonĩ nõko chaka noko soaxoxiki. Epa Nios ano noko imaxiki nõ Jesús chanĩmara fakẽ. Nã fisti chanĩmara fakãfe, a fisti ato yoikãfe. A mãto xinipao ipaoni anori mã anã shinãnõma. Anorima chaka ato yoiyamakãfe. Niospa meka yoisharakãfe mẽstekõĩ,” ixõ ato yoife.

⁵ Niospa meka ato yoisharafe noinãnõfo. Mĩ ato yoiaito nikakĩ ãto õiti sharafanõfo. Askatari ãto chakafo Jesús ato soaxonõ, anã afaa pishta chaka shinãifomano, askatari Jesús chanĩmara fakõinõfo. Nãskax keyokõĩ shara faatanãkõinõfo. ⁶ Mã askafiax atiri yorafãfe anã shinãsharakanima. Anã ato noisharakanima. Nãskakĩ mẽxotaima ato mekafofãsa fakani. Nãskakĩ anã ato tãpimasharatiroma, fanĩrira yoitiro. ⁷ Nãskaxõ a Moisés yoikĩ kirika kenenĩ keskara ato tãpimapaikakĩ nãfãfe yoimisfo iskafakĩ: “A Moisés yoini keskara nõ fãsi tãpikõia,” ixõ yoifikatsaxakakĩ a yoiaifo keskara tãpikõiafoma.

⁸ Akka mã nõ tãpia nã Moisés yoini keskara shara. Mẽstekõĩ ato yoiaifono nikasharatirofo isharaxikakĩ. ⁹ Mã nõ tãpia a yora sharafoõnoa yoikĩ Moisés kenenima. Akka nã yora chakafoõnoa yoikĩ kenenĩ. A nikayospafoõnoa yoikĩ, askatari a yora chakafoõnoa yoikĩ, askatari a Niospa meka nikamisfomaõnoa yoikĩ, askatari ãto apa yafi ãto afa retemisfoõnoa yoikĩ, askatari a ato retemisfoõnoa yoikĩ, ¹⁰ askatari a ãto ãfimafo chotamisfoõnoa yoikĩ, kẽrofãferi ato fenemafo chotamamisfoõnoa yoikĩ, askatari feronãfakefori aa ranã chotanãmisfoõnoa yoikĩ, nãskakãkĩ ãto ãfifo anã tanamisfomaõnoa yoikĩ, askatari yora fetsafo achikaxõ onemisfo ato yonomaxikakĩ, askatari ãa chanĩmisfo, Niospa meka fanĩrira yoimisfo, askatari afarafo chakafamisfo, afãfe Niospa meka tãpiafoma, nãskara yorafoõnoa Moisés ato kenexoni tãpinõfo afeskax isharatirofomãkĩ a Niospa noko imapaiyai anori. ¹¹ Nãfãfe Niospa meka tãpisharafoma, nikakanima. Epa Niospa ea yoia ã ãfe meka mẽstesharakõĩ ato tãpimanõ. ãfe Fake Jesucristo fãsi shara nokoõnoax nani nõko chaka noko soaxoxiki nõ afe nipaxanõ. Aicho, Nios fãsi sharakõĩ.

“Aicho, mĩ ea õia mĩ ea shinãkõia,” Pablo Nios fani yoikĩ

¹²⁻¹⁴ Ë anorima shinãyopaoni Niospa Fake tãpiaxma. Ë fãsi anorima shinãpaoni iskafakĩ: “Jesús Niospa Fakekẽroko. ãa pãrakaninõ, yorakõifekẽ,” ixõ ã chakafapaoni, ã anorima shinãkĩ. Anori shinãki a Jesús Ifofamisfo ã

fāsi ato chakafapaoni. Ē fāsi feronāfake mesekōi ipaoni ea omispaonifo ē tāpisharaxma. Anorima ē shinākī ē noikaspapaoni, ares ea shināfiato Niospa ea noikī. Nāskaxō ea ifisharani. Ē fāsi chakafafiamiskē ea noisharai. Nāatofi ea shināmamiskī ē aō noinō. Ea askafaito ē nikasharakē nōko Ifo Cristo Jesús ea yora fetsafo fāsi noimasharai. Aicho, ē Jesúski inimasharakōi ea noisharaito. Jesucristo ea shināmani iskafakī: “Mī ea noikī, ea shināsharafe, mī ea tāpisharaxō eōxō mī yonoi ato tāpimakī,” ixō ea yoia.

¹⁵ Timoteo, na ē mia yoiai chanīma. Keyokōichi chanīmara fanōfo. Jesucristo nai mēraxō Apa Niospa nāmā nīchini nōko chakafoōnoax noko nāxoyonō nō afe ĩpaxanōfo. Askafiaino na fetsafāfe chakafakī finayamafiaifono ē fāsikōi chakafakī finakōipaoni. Jesús Ifofamisfo ē chakafayopaoni. ¹⁶ Nāskafiaito ōikī Jesús ēfe chaka ea soaxona. Ē chakafafiafimiskē Jesucristo ea fāsi noi. Ea askafaito ōi kakī yora fetsafāfe iskatirofo: “ĪŌikapo! Na Pablo fāsi chakafafiamiskē mā Jesús aō fāsi noi,” shināito ōikī, “Nokori Jesús noikī noko ifitiro, na Pablo akai keskafakī, nō afe ĩpaxanō na Pablo ikai keskai Jesús fe nipanaka, nōri afe nipaxanō,” ikaxō anori shinātirofo.

¹⁷ Anori shinākī nānori nō yoitiro iskafakī: “Aicho Epa Niospa, mī fāsi sharakōi. Meres mī xanīfokōi, tsōa mia finōtiroma. Mī nanakama, mī nīpanaka. Tsōa mia ōitiroma. Meres mī keyokōi tāpikōia. Meres mī Nioskōi, anā fato fetsama.” Nāskafakī nō Nios yoipakenaka.

¹⁸ Ēfe fake Timoteoshta, a Jesús Ifofanifāfe mia yoiaito mī nikamiski. Niospa ato shināmanaino anori mī kerexkai ato yoisharanō mēstekōi, ēri mia yoi kerexkai yoife mī Niospa meka nikasharakōixō Jesús Ifofaxō ato yoisharafe. ¹⁹ A yora fetsafāfe mā Niospa meka tāpifikaxō iskaratīa anā Nios shinākanima. Niospa meka nikakaspakakī Jesús anā chanīmara fakanima. Fanīrira shinākani mā na meka tāpifikatsaxakakī. ²⁰ Akka a feronāfake rafe Himeneo feta Alejandro iskafamisfo. Nā rafeta Nios chakafamisfo noikaspakakī. Askaito ōikī ē ato yoia: “Mā mā Satanás nikakī, Nios chakafakī, afianā Niospa mato kexeima.” Mā askafaito Satanás mato omiskōimatiro. Mato omiskōimanaito mā tāpitiro mā anā Nios chakafanōma.

2

Afeskafaxō nō Nios kīfitiromē

¹ Timoteo, a Nios Ifofamisfo ē mia yoiai anori ato fāsi yoife. Taefakī mī ato yoitiro iskafakī: “Keyokōi yorafo ato yoixokāfe. Afara yopaifāfe Nios ato yoixokāfe. Mato Niospa axōfaito aicho fakāfe akiki inimakī. ² A xanīfokōi fe afe rafeafo keyokōi xanīfofo ato Nios yoixokāfe mato yonoxosharanōfo isharaxikākī. Nāskakē afanā mato fekaxtefayamanō, mā Nios shināsharanō, Nios Ifofasharaxiki.” ³ Nāskakē Nios noko ifimisto noko ōikī noko iskafatiro: “Na ēfe fakefo isharafo. Iskara sharakōi. Na yorafoki ē inimakōira,” ixō Niospa yoitiro. ⁴ Niospa keyokōi yorafo ifisharapai, keyokōi yorafo Jesús ato nāxoni ato chaka soaxoxikī a tāpikōinōfo. ⁵⁻⁶ Nios fistikōi, anā fato Nios fetsama. Nā Nios fisti ares shara. Akka na yorafo chakakōifo. Afara chakaya shara nō ositiroma. Akka yōra ato mēraxō afara chakafamisto Nios ōikaspai, nikakaspakī. Akka nā yora chaka askara Nios ari katiroma. Nāskakē Cristo Jesús nāmā na mai ano oni yorafo nāxoxiki nōko chaka noko soaxoxiki. Askafakī, yorafo chaka soaxonano isharanōfo, ato askafaano, Nios ari nokotirofo. Nāskakē nō tāpia Jesucristo fistichi noko Nios ari iyotiro. Nāskakē keyokōi yorafo ifipai. Nāskakē noko ōimani Jesucristo keyokōi yorafo ifipai. ⁷ Nāskakē Niospa ea katonī aōnoa judeofoma ē ato tāpimanō nāfāferi tāpinōfo. Yora fetsafoōnoaxri Jesús nani. “Eōxō yoixiki,” ixō Niospa ea yoini.

Ĕ chanĭma, ĕ mia paraima. Niospa ea yoini ĕ ato tĕpimanŏ Jesŭs ato nĕxoni chanĭmara fanŏfo.

⁸ Akka feronĕfakefo ichanĕkaxŏ kĭfikani inimakani, keyokŏi mĕ raenĕ faatanĕkaxŏ ato chaka Jesŭs soaxonano, ĕto mĕke rafe Nioskiri mĕshaxotirofo Niospa ŏitiro. Askafono Jesŭs ato chaka soaxonano, nĕ Nios kĭfiaifĕfe ato Niospa nikatiro. Askapainŏfora ixŏ ĕ yoi.

⁹ Nĕskarifiakĭ nŏ ichanĕino xotofĕke iskara shinĕtiroma: “Sama shara safeta, teoti ichapa safeta, askata femĕnĕki keneta, foaromesharata, irosharakŏita, ĕ ikaino yorafĕfe, ‘Na xotofake sharakŏira’ ixŏ ea yoinŏfo,” ixŏ anori shinĕyamakĕfe. ¹⁰ Askafatamaroko, fetsafo axosharakĕfe, Nios Ifofaxŏ Nios ŏimaxikakĭ. “Na xotofake sharakŏira,” ikaxŏ aŏnoa yoitirofo. ¹¹ Ano fisti ichanĕkaxŏ xotofakefĕfe ato nikakŏisharatirofo. Akairi tĕpisharaxikakĭ atoŏxŏ. ¹² Ĕ fichipaima xotofĕke feronĕfakefo Niospa meka ato tĕpimanaino. Askatamaroko feronĕfakefĕfe xotofakefo Niospa meka sharaŏnoa ato yoitirofo. Nĕskakĕ xotofakefĕfe feronĕfakefo nikakŏitirofo. ¹³ Akka Niospa Adĕn onifakĭ taefani. Nĕskaxŏ chipo Evari onifani. ¹⁴ Nĕskakĕ Satanĕs Eva pĕrani. Adĕn anima pĕrakĭ. Nĕskakĕ xotofakefĕfe nikakŏisharatirofo. ¹⁵ Nĕskaxŏ xotofĕke fake fixŏ pekosharatiro, Nios Ifo shara famaxiki. Nĕskakĕ chanĭmara fatirofo. Mĕ askafaito Niospa ato ifitiro. Ĕto ŏiti inimasharanŏfo a fetsafo noisharakanax ato fe isharanŏfo. Isharakaxŏ, shinĕsharakŏinŏfo.

3

Afe keskara itiomĕ a Niospa meka ato yoimis

¹ Nĕ ĕ mia yoiai chanĭmakŏi. A feronĕfake Niospa meka yoimis ipai askara sharakŏi itiro. Askatari a Nios Ifofamisfo ato kexemis ipai askarari shara. ² Nĕskakĕ nĕ isharakŏimis ifife. Isharaito ŏikakĭ fetsafĕfe yoitirofoma iskafakĭ: “Nato afara mĕxotaima chakafamis,” ixŏ yoitirofoma. Askatari ĕfi fistiya itiro. Kĕro fetsa kaxefamisma ikĕi, shinĕsharakŏita isharakŏimis ikĕi, fĕsi yonosharamis xanimisma ikĕi, fetsafo sharafamiskŏi ĕfe pexe anoxŏ yora pimamis ikĕi, fĕtsa pexe yopaito ĕfe pexe mĕra yora ikimamis ikĕi, ato tĕpimasharamis ikĕi, nĕskara feronĕfake ifife. ³ Askatari pĕemisma ikĕi, setemitsamisma ikĕi, yorafo noimiskŏi ikĕi, ato chakafamisma ikĕi, kori noimisma ikĕi, askara feronĕfake shara katofe. ⁴ Ĕfe ĕfinŏ ĕfe fakefonŏ afe isharakŏimisfo itirofokĭ. Ĕfe fakefĕfe noikakĭ nikasharakŏimisfo itirofo. ⁵ Akka askayamaito, afe yorafĕfe a nikakaxoma askara yora Jesŭs Ifofamisfĕferi a nikatirofoma. ⁶ Akka a rama Jesŭs Ifofaa a Niospa meka ato yoimis askara katoyamafe. Aato shinĕki iskafatiro: “Ĕ fĕsi sharakŏi, ĕ Niospa meka ato tĕpimani. Tsoa fetsa ea keskarama,” ixŏ shinĕi Jesŭs shinĕyamafi ĕa shinĕi askatiro. Satanĕs anori mekani: “Ĕ Nios finŏikai,” ini. Askaito Niospa nai mĕraxŏ potani nĕmĕ. Nĕskari fakĭ a rama Jesŭs Ifofai, Satanĕs ani keskari fatiro. Nĕskakĕ a ato Niospa meka yoimis askara katoyamafe a rama Jesŭs Ifofai. ⁷ Akka askaito ŏikĭ a Nios Ifofamisfĕfema yoitirofo isharakŏiaito ŏikakĭ. Akka isharayamaito, tsŏa yoisharatiroma. Askara yŏra fanĭrira chaka shinĕi paketiro Satanĕs paraino.

Afe keskara itiomĕ a Nios Ifofamisfo ato kexemis

⁸ Nĕ a Nios Ifofamisfo ato kexemis nĕ keskara feronĕfake katoxŏ ifife. Nĕskara yora sharakŏifo itirofo, ĕto meka mĕstekŏi shara itirofo, askara yorafo pĕemis itirofoma, nĕ kori fisti shinĕfafĕinaifoma. Nĕskara feronĕfake isharamisfo ifife Nios Ifofamisfo ato kexesharanŏ. ⁹ Na Niospa meka nŏ tĕpiyopaonima, iskaratĭa rama nŏ Niospa meka tĕpi. Nĕskakĕ na feronĕfake Niospa meka nikasharakŏimis ifife, askatari afara chakafayamaino ĕfe ŏiti

fekaxtemisma askara ifife. ¹⁰ Nā Nios Ifofaafō ato kexemis ikimākai mī ōiyotiro. Askarato afe keskara yonosharaimākai mī ōiyotiro asharamākai. Askata asharakōiaito ōikī, askara yora mī ifitiro a Nios Ifofaafō ato kexemis inō. ¹¹ Mā askafono āto āfifori ato keskara sharafori itirofo. Nāskaxō anā ato mekakakī chakafatirofoma. Askatari pāemismafori itirofo. Askatari āa kakapaimisfo itirofoma. Askara yorafāfe shināsharamiskōifo itirofo. ¹² Nāskax a Niospa meka yoimisfo fe rafekanax āfi fistiyafo itirofo. Nāskakanax ato pexe anoax isharakōitirofo, āto āfinō, āfe fakefori afe isharatirofo, askara nikakōisharatirofo. ¹³ Nāskaxō a Nios Ifofaafō ato kexemisto yonosharakōiaito ōikakī fetsafāfe ōikaxō yoisharakōitirofo aōnoa. Nāskaxō a feronāfake mese-tama fetsafo yoisharatiro: “Cristo Jesús ea ifia,” ixō ato yoitiro.

Niospa meka chanīmakōi noko yoimis.

¹⁴ Timoteo, iskaratīa ē mia kenexō fomai, mia ari samama kapaikī. ¹⁵ Akka ē mia ari fena kayamaino ōikī na kene tāpixō mī tāpitiro afeskax itirofomākai a Jesús Ifofaifo. Akka Nios nīpanaka. Nāskax a Ifofamisfo Niospa fakekōifo afe ipanakafo. Nāskaxō Niospa meka mēstekōi ato yoisharaiifāfe fetsafāferi ato nikasharakōitirofo. ¹⁶ Fetsafāfe yoikī iskafatirofoma: “Niospa meka chanīra,” ixō yoitirofoma. Jesús Niospa Fake feronāfakekōi kāini. Niospa Yōshi Sharapa, “Jesús Niospa Fakekōi,” ixō yoini. Askatari Niospa ājirifāfe Jesús ōinifo Niospa Fakekōikē. Askatari yorafāferi ōinifo Jesús Niospa Fakekōikē. Nāskaxō yorafo tāpimakōinifo ato yoisharakōikakī, akairi tāpisharakōinōfo. Askaifāfe yora fet-safāfe mai fetsafo arixō nikakakī ato chanīmara fanifo akairi Jesús shinākakī. Nāskakē Jesús anā nai mēra kani Apa Nios ano.

4

Pablo yoini anā Nios shināyamaifono

¹ Niospa Yōshi Sharapa noko mēstekōi yoikī iskafamis: “Jesús mā chaima oaitīa atiri yorafāfe Nios kachikiri fakani. ‘Ē Jesús Ifofaira’ ifiamisxakakī nā nīafaka ato pārafaiato anorima ato yoimisfo. Askara anori yoimisfāfe nikakaxō nīafaka fisti ifofamisfo,” ixō ato yoimis. ² Askara yorafāfe yora fetsafo anorima yoikani āa ato pāarakakī, ōiti chakayafiakaxō. Anori fisti shinākī feyafamisfo. Nāskakē afara chakafakani rāfikanima. ³ Askarafāfe fetsafo tāpimakī iskafakani āa ato pāarakakī: “Niospa yoikī iskafamis: ‘Feronāfakefo āfiyatirofoma. Askatari nami piyamakāfe,’ ixō yoimis,” ato fatirofo. Akka Niospa keyokōi onifani nō pinō. A Nios Ifofamisfāfe pixikakī Nios kīfiyotirofo. Nāskaxō nō pitiro afama mīshti. ⁴ Keyokōi a nō piaifo Niospa onifakī sharakōi fani. Nāskakē nō inimakī yoitiro aicho fakī. Nāskakē nō pikaspakī chakafatirofoma a nō piaifo Nioski inimakī. ⁵ Epa Niospa noko yoia: “Keyokōi shara,” ixō noko yoia. Nāskakē nō, “Aicho Epa Niosi, mī noko yoinā shara inā,” nō fai. Nāskaxō nō pitiro.

Afe keskara itiomē Jesús yonoxosharamis

⁶ Timoteo, na ē mia yoiai anori mī chanīmara famis. Nāskakē Jesús Ifofamisfo ato tāpimasharafe, mī Cristo Jesús yonoxomis shara ixiki. Askatari Niospa meka mēxotaima ōife a mī piakī keskafakī, fāsi shināsharakōixiki, shara nixiki. ⁷ A tāpiamafāfe yoimis anori nikayamafe. Mēxotaima Niospa meka shināfafāife. Askata ōiti kerexfāfi Nios shināfafāife mī ōiti pachi fakīma. ⁸ Akka afaa meeyamai rakatsax nōko yora xokenātiro. Nō anā afaa yonopaitirofoma. Akka nō mēxotaima yonoi nō mitsisipakōi itiro. Nāskara shara. Nāskafakīri nō mēxotaima Niospa meka nō ōirifakī, Nios kīfirifai nō mitsisipakōi itiro nōmēra sharafinakōia. Nāskax nō shara itiro. Nāskatari nō naax, nai mēra kaax,

ariaxri nõ mitsisipakõi itiro sharafinakõimãi niax Nios anoax, nõmãi Nios Ifofakatsaxakĩ. ⁹ Na ã mia yoiai chanĩmakõi. Nãskaxõ keyokõichi chanĩmara fanõfo. ¹⁰ Nãskaxõ mitsiskai nõ Niospa meka yoifafãini. Nõ askafaito fet-safãfe noko omiskõimatirofo a Niospa meka õikaspaifãfe. Askai omiskõifikĩ nõ tãpikõimis Jesús iskaratĩamãi nikẽ. Nãskaxõ Jesúsmãi noko nãxonikẽ, keyokõi yorafoõnoax, nãskaxõ a Ifofamisfo ato ifixii.

¹¹ Timoteo, na ã mia yoiai yonosharata ato tãpimafe. ¹² Nios Ifofafãi isharakõife. Mĩ isharakõiaito mia õinõfo, ato õimasharakõife. Askax mĩ isharakõixiki Nios Ifokõi faax, ato yoisharakõife mĩ meka pachi faxõ, ato noikõisharata, nãskax isharaito õikakĩ yorafãfe mia chakafakĩ yoinõfoma iskafakĩ: “Na naetapa Timoteo fanĩrira noko yoi kiki nikayamakãfe,” ixõ mia tsõa yoitiro. ¹³ Nã ã kayamaichã, ato ichanãfaxõ Niospa meka ato anexõ, ato nikamasharakĩ, ato yoisharakõife. ¹⁴ A Nios Ifofaafo ato kexemisfãfe mia mãmãkaxõ mia Epa Nios kĩfixonaifono Niospa mia amapaiyai keskara mia axoni a Nios Ifofaafo mĩ ato tãpimasharanõ ato kexesharayanã. Akka Epa Niospa mia kaxpa tãpimanimakĩ fetsafori sharafaxõfafãini xateyamafe.

¹⁵ Shinãfãikõi isharafe nã ã mia yoiai keskafakĩ. Mĩ askafaito mia tãpisharakõinõfo mĩ yorafo Niospa meka yoiaito mia tãpisharakani. Askaxõ, “Timoteo fãsi sharakõi,” ixõ mia yoikani. ¹⁶ Nãskakẽ kexemesharafe. Niospa meka mēstesharakõi ato yoife, isharakõita. Mĩ askafai Epa Nios fe mĩ isharakõipakenakaki. A mia nikaifori askapakenakafoki.

5

Afeskax nõ isharatiromẽ a nõ Nios Ifofaa tii

¹ Anifo fãsi mekafata yoiyamafe. Nã mĩ epa mĩ aka keskafakĩ, oitsifafãi yoisharafe. Askatari nã naetapafori mĩ ochi yafi mĩ exto aka keskafakĩ ato shinãmasharata ato yoisharafe. ² Yõxafofori nã mĩ efa mĩ aka keskafakĩri shinãsharafãi ato yoisharafe. Mĩ chiko yafi mĩ chipi mĩ aka keskafakĩ nã xomayafo sharafo feesyamafã, askara shinãtama ato yoisharafe.

³ Nã kēro ifomafafo, askata fakemaisfo, askatari fafamaisfo, nãfo shinãmakiyamafe nã Jesús Ifofamisfãfe kexesharanõfo. ⁴ Akka nã kēro ifomafa fakeyakẽ, askayamai fafafoyakẽ afãfe kexesharatirofo. Askarifakĩ nã yome pishtakẽ ato kexesharapaonifo keskafakĩri kopikiri kexesharanõfo ãfe fakefãferi. Nãskafãifãfe fetsafãfe õi kakĩ, “Nã yorafãfe Nios nikasharakani,” ikaxõ yoisharanõfo. Nãskaito õi Nios atoki inimai. ⁵ Nã kēro ifomafa fakemais ita, fafamais ita, fenemais ita, nãskarafãfe Nios fisti shinãkĩ: “Niospa ea kexei,” ixõ shinãkĩ iskafakĩ, nã pena tii kĩfita fakish tii kĩfita famisfo Epa Nios mēxotaima kĩfikakĩ. ⁶ Nãskafiax nã ifomafa fetsa fenemaisax kafãsatiro. Aa inimasharakõi nã ipaiyai keskai. Niospa meka mã shinãmakixõ, kachikiri faax, nã mã naa keskara. Shinãsharaima, chaka shinã. ⁷ Timoteo, keyokõi ã mia yoiai na kēro ifomafa Jesús Ifofamisfo tãpimasharafe, askara tãpikaxõ nikasharakõinõfo, fetsafãfe, “Mã chakara,” ikaxõ yoitirofoma. ⁸ Akka fētsa afe yorafo kexesharama, ãfe pexe mēra ikiaifãfe ato kexeima nãskafakĩ chakafai. Aa keskaratokai Niospa meka nikasharama. A Jesús Ifofamato askarato afara chakafai, akka a Jesús Ifofaafãfe afe yorafo kexesharakakĩma fãsi chakafamisfo.

⁹ A kēro ifomafa sesenta xini aka, ãfe fene fisti fe iyopaoni nã keskaraki kirika kenefe nã Jesús Ifofamisfãfe ato kexenõfo. ¹⁰ Nãskata nã kēroõnoa yorafãfe yoisharamisfo; nãskata ãfe fakefo pexkosharakõini; askatari yora fetsa ãfe pexe ano kaito atoki inimamis; fetsafo pimamis; omiskõiaito ato

sharafamis; ato feta amis; kēro askara fistichi āfe ane kenetiro Jesús Ifofamisfāfe a kexenōfo.

¹¹⁻¹² Akka nā kēro ifomafa sesenta xinia akama, a keskaraki āfe ane mī kenetiroma. Nā kēromā āa shinākī iskafatiro: “Jesús, ē mia fisti shināpai. Mia fisti ē yopai. Ē anā feneyapaima,” ifiaxō anā fetsa anori shinātiro feneyapaikī, anā Jesús shinātiroma. Nā Niospa yoiāi anori shināima āa chanī mekatiro. Askafai āa chanīaito ōikī, askara kēroki Nios inimatiroma. Nāskakē āfe ane kenetiroma. ¹³ Askara kēro fenemaisax xani itiro, pexe tii ōifofāsafakī, askai kafāsakī, ato pārafofāsafatiro āa chanīkī. Nāskakē ato fekaxtefatiro. ¹⁴ Askatamaroko kēro ifomafa yōxafo famatai feneyatiro. Mā feneyaxō fake fitiro. Fake fixō āfe pexe fisti anoxō kexesharatiro. Askafasharaito ōikī yorafāfe chakafakī mekafatirofoma. ¹⁵ Atiri kēro ifomafafāfe Nios kachikiri fakaxō Satanās ifofafo.

¹⁶ Timoteo, a Jesús Ifofamisto afe yora ifomafakē, kexesharatiro. Askatari a ifomafafo kaifoyakēma, fenemais ita, fakemais ita, fafamaisfo askara a Nios Ifofamisfāfe ato kexetirofo.

¹⁷ A Nios Ifofaafāfe xanīfōfōfāfe noko kexesharakaxō noko ikisharamisfo Niospa meka noko tāpimanaifono nō atoki inimakī nō aicho fatiro. Askatari nō ato ināsharatiro nā afara yopaifo keskara finōfo. ¹⁸ Moisés kenekī yoikī iskafani: “A ato yonomanaito ato yonomakī kopifatiro.” Askatari keneni yoikī fakkaki keparanākai. Moisés keneni yoikī iskafakī: “Oa fakka keskara nō yonomanaino trigo āfe xaka chona chona a fofāsafatiro nō renextiroma pi-ifofāsafanōfo. Askatari a noko tāpimasharamis nō kopifatiro afaa yopayamanō. Nāskafakī nō yoitiro akiki inimasharakī,” ixō yoikī keneni.

¹⁹ A yora fistichi Nios Ifofamisto xanīfōfōnoa mia yoiāito, chanīmara fayamafe. Akka feronāfake rafe iyamai trespa a afara chakafaito ōikaxō, mia yoiāifāfe mī ato nikatiro.

²⁰ Askaito nikakī a Jesús Ifofamisfāferi ichanākakaxō yoitirofo iskafakī: “A mī chakafaa keskafakī anā askafayamafe. Nā mī chaka shināi, Jesús yoife na afarafo mī chakafakī fetsai, mī yoiāito nikakī Jesús mia chaka soaxonō.” Mī askafaito ōikani fetsafo rāfitirofo. Askaxō afaa chakafapaitirofoma rāfikaspakakī.

²¹ Epa Nios feta Jesucristo āfe ājirifāfe mia ōikani. Nāskakē na ē mia yoiāi anori askafafe. A afara chakafamisfāfe āto ferotaifi yoife. Mī kaifofo yafi mī kaifofofoma ōikī, nāskarafāfe āto chaka xatenōfo ato yoife. ²² Ōisharata ato katofe Niospa meka ato yoimis. A kaa fisti ato katoyamafe. Ato ōisharayofe taefakī. Mī ōisharaxoma ato ifitiroma. Mī askara ifikē chipo afara chakafaira ixō, fetsafāfe mia mekafakī chakafatirofo. Nāskakē shināsharafāi ife, Timoteo. Afaa chakafayamafe.

²³ Timoteo, mī xāki pāemiski faka fisti ayakima uva ene pāepishta ayafe sharaxikī.

²⁴ Atiri yorafāfe afara chakafaito nō ōitiro xafakīakōi. Akka atirifāferi afara chakafaiifāferi nō ōitiro. Mā askafimisfono chipo nō tāpixii Niospa kāimanaino. ²⁵ Nāskarifikī atirifāfe shara faifāfe nō ōitiro xafakīakōi. Askatari fetsafāferi afara shara faifāfe nō ōitiro. Mā askafamisfono chipo nō tāpixii Niospa xafakīakōi kāimakē afo.

6

¹ A ato yonoxomisfāfe Jesús Ifofamisfāfe āto xanīfo shināfāi yonosharaxotirofo. Askakaxō tsōa chakafakī mekafatiroma āto xanīfo. Akka āto xanīfo yonosharaxokima chakafakī mekafaiifāfe fetsafāfe ato iskafatirofo: “Kee, na Nios Ifofamisto yonokī finasharaima.” Nāskarifikī Niosri chakafakī yoi.

Niospa mekari chakafakī yoi. ² Āfe xanīfāfe Jesús Ifofamiskē a yonoxomistori Jesús Ifofaxō askarato āfe xanīfo noikī shināfāi yonosharakotiro, akiki xanikima aō noisharakōita afe nanea ōitsakōi ixō shināsharakōitiro āfe xanīfo.

Timoteo, nā ē mia yoiyai anori Jesús Ifofamisfo tāpimasharafe. ³⁻⁴ Nōko Ifo Jesucristo āfe meka fāsisharakōi. Jesús meka nikax oa Nios keskara nō shara itiro. Akka a yora fētsa noko anorima yoitiro, āa shināxō. “Ēfi fāsi tāpifinākōiakī, ea keskarakai tsoama,” ixō āa yoi askara yōra afaa tāpiamafiax. Āa chanī askamis. Askara yora ato fe feratenātiro. Askakī meka shara yoitiro. Āa kakapaimis askara yōrari āa shinātiro: “Ea tsōa finōyamanōra,” ixō āa shinātiro. Askara feronāfākekai Niospa meka ato yoisharatiroma. Askaito ōi kakī feratetirofo, meepaitirofo, nikakaspaitirofo, ūchatirofo, noikaspaitirofo, “Noko chakafaira,” ixō shinātirofo. ⁵ Akka a feratenāmisfāfe anorima fisti shināmisfo. Mā Nios shināyopaofinixakakī anā shināsharatirofoma. Anā ato yoisharatirofoma mēstekōi. Afāfe shināfo: “Nō Nios Ifofakatsaxakī nō kori ichapaya itiro,” ixō shināmisfo anori Niospa yoiamafiano. Akka fētsa shināi iskatiro: “Ēri a keskara shara ipai,” ixō shinātiro. ⁶ Akka anori shinātamaroko nō afaamaisfixō nō Nios Ifofaax, nō inimasharakōitiro. ⁷ Na nō fake kāiyaitīa nō afaaya pakenima. Nāskairi a nō naitīa nōkai afaaya katiroma. ⁸ A nō piyai yafi a nō rapatiyax nō inimatiro, afaa anā ichapafō fichipaitama. ⁹ Akka atiri yorafo rapati ichapaya ipaimisfāfe nonori shinākani iskamisfo: “Afara ē fipaikī ē fitiro, nāskax ē inimatiro,” ixō anori fisti shinātiro. Fētsa kori fisti fichipai samama shināchakatiro, afara chakafo fetsa fetsatapafō fichipaitiro. Kori ichapa fipaikī afeskaxoma askarato chaka shināfafāini. Askara naax, a omiskōipakenakafo mēra katiro. ¹⁰ Nāskakī kori fisti noi, Niospa meka shinātama afara chakafōfa fafāfāini kori fixikī. Nāskafakī Nios kachikiri famisfo. Askara yorafo āto shinā mēraxō shinākani omiskōikanax anā inimasharatirofoma.

Pablo yoini afe keskaramāki Nios Ifofaax nō kerexkai ikai

¹¹ Timoteo, Niospa mia katoa. Kori yafi rapati shināyamafe. Nios Ifofasharafe a keskara ixiki, afaa chakafamisma ixiki, Jesús meka chanīmara fakōixiki. Askaxō mī yorafo noimiskōi ixiki, Niospa meka Ifofakī, akka mī yorafo yoikī oitsifafāi yoisharafe. ¹² Mia yora ichapafāfe ōiaifono mī ato yoimis: “Jesús ea nāxoni ēfe chaka ea soaxoxiki. Nā Jesús ēfe Ifo. Ē fāsi inimai,” ixō mī yoisharani. Akka anā shināmakiyamafe. Jesús mia nāxoniki nō afe nīpaxanō. Nā fistiōnoa shināfe. Satanās mia chaka shināmapaiyaito nikayamafe. ¹³ Ea nikasharafe Niospa keyokōi noko onifani noko nimaxiki. Jesucristo nā xanīfo Poncio Pilato yoini: “Ēfi Niospa Fakekōi,” ixō ratekima yoini. Iskaratīa Nios feta Jesús mia ōi. ¹⁴ Nāskakē Jesús meka nikasharafe. Afara ē mia yoiyai keskara afe, mī askaito ōikī fetsafāfe, “Timoteo chakafamisra,” ixō yoinōfoma. Nāskara afe nōko Ifo Jesucristo nokoaitīa. ¹⁵ Nios fistichi Jesús nokoaitīa tāpiakī āa nīchixiki. Ares afara apaikī atiroki. Afi xanīfo efapakōiki xanīfo fētsa finōtiroma. Nā nōko Ifo efapakōi fato xanīfo fētsa finōtiroma. ¹⁶ Akka tsōa onifanima, aakōi ares ika. Nāskax nanakama. A chaxasharai mēra ika tsoa akiki nokotiroma. Askatari tsōa ōimisma, tsōa ōitiro. Nāskakē keyokōichi nō aōnoa yoisharatiro: “Nios fisti sharafinākōia. Nā fistichi afara sharafo ares atiroki,” ixō yoipakenakafo. Askapainō.

¹⁷ A kori ichapayafō ato yoife: “Ē kori ichapayaki tsoa ea keskarama,” ixō anori shināyamakāfe. Māto koriōnoax inimamis iyamakāfe. Askatari māto kori mato afeskafatiroma, keyotiro samama. Askatamaroko Nios fisti shinākāfe. A nō afara fipaiyai noko ināi noko fīshkoima. ¹⁸ Nāskakē

mãto korioxõ fetsafo aõ noisharakãfe. Fishkomĩtsayamakãfe. Afaamaisfo ato inãkãfe. Fishkoyamakãfe. Inãkõikãfe. ¹⁹ Akka mã ato inãsharaito õi Nios matoki inimai. Mato afara fãsi shara faxõi mã Nios ari nokoaitĩa. Iskaratĩa mã fetsafo inãsharai keskari fakĩ, Niospari chipo mato inãsharaxii kiki. Nãskax mã Niosnoax isharapakexatiro,” ixõ ato yoife.

Pablo mã mekai xatekĩ, “Timoteo, mã isharaxõ ato yoi sharafe,” ixõ kirika kene manamani

²⁰ Nãskakẽ Timoteo, Niospa ãfe meka shara mia tãpimani fetsafori mã ato yoinõ. Nãskakẽ tãpisharayofe, ãfe meka tãpisharaxõ fetsafo mēstekõi tãpimaxii. Akka fetsafãfe Niospa meka anorima yoimisfo. Aa ranã yoinõnãkakĩ kaxpakõi yoimisfo. Nãfãfe yoimisfo nõ tãpikõiara ifiakaxõ tãpiafoma. Nãskakẽ ato fe rafeyamafe. ²¹ Nãskakẽ nikayamafe. Fetsafãfe nãfo nikakanax ifofakaxõ Niospa meka kachikiri fakanax, nãfo fenoafo. Afianã chanĩmara faafoma.

Nõko Ifofãfe mato noikĩ mato kexesharanõ. Nã tii.

Ĕkĩa Pablo.

Pablo Timoteo Afianã Kirika Kenexõ Fomani

Pablo Timoteo yoisharani

¹ Ëkã Pablo ã mia kirika kenexõ fomai. Epa Niospa fichipaiyai keskafakĩ Cristo Jesús ea katonĩ aõnoa ãfe meka shara ã yoifofãsafanõ. Ea yoinĩ iskafakĩ: “Keyokõĩ yorafo yoife iskafakĩ: ‘Jesucristo matoõnoax nãxonĩ mãto chaka mato soaxoxiki nã chanĩmara faafo tii afe nĩpaxanõfo,’ ixõ ato yoife nã ã mia yoiai keskafafe,” ixõ Jesús ea yoinĩ. ² Timoteoshta, ã mĩo noikĩ ã mia kirika kenexõ fomai mĩ tãpinõ. Epa Nios nõko Ifo Cristo Jesús feta mia noikĩ mia shara famanõfo. Askatari mĩ shinã mẽra mia shinãmasharakõinõfo mĩ õiti fekaxtenõma.

Ato Jesúsnoa yoisharafe

³ A ãfe xinifãfe Epa Nios yonoxosharapaonifo keskari fakĩ, ãri a yonoxosharai. Ë mẽraxõ ã afaa shinãchakayamafai ã yonoxosharai. Nãskakẽ ã mia Nios kĩfixõfafãini aicho fakĩ. Pena tii yafi fakish tii ã mia Nios kĩfixõfafãini. ⁴ Nãskakẽ mẽ oaino, mĩ ea shinãĩ oiaito ã mia õiferani. Nãskakẽ ã anã mia õisharapai, mia õi ã inimasharakõixiki. ⁵ Taefakĩkõĩ mĩ chichi Loida Jesús Ifofani. Askata mĩ efa Euniceri Jesús Ifofani. Afãfe Ifofasharakõimisfo keskafakĩ, mĩri Ifofasharai. Mẽ mia tãpia mĩ Ifofasharakõiaito nãskakẽ ã mia yoi.

⁶ Anã shinãmakiyamafe ã mia mãmãxõ ã mia Nios kĩfixoni. Nãskakẽ Niospa mia katonĩ Jesús yoimis mĩ inõ. Mã chii nokakẽ nõ anã xofisa fatiro anã xofisanõ. Nãskarifiakĩ mĩ anã yorafo ato yoipaima mã mĩ xokenãifinaxõ askara meekĩ mĩ Nios kĩfitiro anã mia õiti fepeaxosharanõ, mĩ anã ato yoisharanõ inimayanã a mĩ taefakĩ ato yoinĩ keskafakĩ. ⁷ Nãskakẽ Niospa Yõshi Sharapa noko yorafoki mesematama. Aõxõ afama mĩshti noko amatiro. Askatari noko ato noimasharai. Aõxori noko shinãmasharatiro anã nõ chakafanõma. ⁸ Askafai rãfiyamafe Jesúsnoa yorafo yoitaifãfe rãfikima. Askatari eõri rãfiyamafe. Ë Jesucristo ato yoirifaito ea karaxa mẽra ikimatifoki. Mĩri Jesús ato tãpimasharafe; mĩ askaito, miari omiskõimanaifono rateyamafe. Jesúsnoax mĩ omiskõiaito, Niospa mia axoxii. ⁹ Akka Niospa ãfe Fake Cristo Jesús noko nĩchixonĩ nokoõnoax nãxoyonõ nõko chaka noko soaxoxiki. Askaxõ noko shinãni afe yora nõ inõ. Nõ yora chakafõiakẽ Niospa noko noimis. Taefakĩkõĩ Niospa mai onifaxoma, a inõpokoai tãpixõ, noko shinãni noko ifixixakĩ Jesúsxõ. ¹⁰ Jesús noko ano oamatai Niospa noko ifipaiyai anori nõ tãpipaonima. Akka rama iskaratĩa mã nõ tãpia noko ifimis Jesucristo noko nãxonĩ. Nãskax iskaratĩari nõ nai, nõ rateima omiskõipakenakafa mẽra nõ kairoko. Nõ Nios ari kaax anã nõ naxima. Jesús noko chaka soaxonano nõ Nios ari nĩpanaka. Mã iskaratĩa nõ tãpia Jesús noko nãxonĩ nõ chiifã mẽra kanõma noko ifiano.

¹¹ Niospa ea katonĩ na meka shara Cristoõnoa yora fetsafo ã ato tãpimanõ.

¹² Nãskakẽ ã karaxa mẽranoax Cristoõnoax omiskõifi ã rãfima. Ë Jesús tãpikõiax chanĩmara fayaná. Jesús ãfe chaka taefakĩ ea soaxonitĩa ã Epa Nios iskafakĩ yoinĩ: “Epa Niosi, ea kexesharapakexafe Jesús afianã oaitĩa,” ixõ ã yoinĩ keskara ea axoxii ã chanĩmara fakõini.

¹³ Na ã Cristo Jesúsnoa mia chanĩmakõĩ tãpimana shinãmakiyamafe. Ë mia mẽstekõĩ tãpimana keskafakĩ, nãskari fakĩ ato tãpimafe. Cristo Jesús chanĩmara fakĩ afe rafekĩ aõxõ yorafo noife mĩ afe rafeakĩ. ¹⁴ Nã ã mia yoia keskara mĩ mẽraxõ shinãfe, shinãmakixikima. ãfe Yõshi Shara mĩ mẽra ikano mefeta aki. Õifãĩ, Niospa mia yoia keskafakĩ kachikiri fayamafe.

¹⁵ Mā mī tāpia keyokōichi chanīmara faafo Asia mai anoafāfe ea ōifainafo. Askatari ato feta Figelo feta Hermógenesri ea ōifainafo ato fe fokākī. ¹⁶⁻¹⁷ Akka Onesíforokai askanima, eō rāfinima ē karaxa mēra ikikē. Nāafi Roma ano nokoxō pena tii ea fenafafākī ea karaxa mērao fichita, ea ōiyoi nā otita-iapaoni mēxotaima ea ōifaa ōifakī, ea pishta inimamani. Nāskakē nōko Ifāfe Onesíforo āfe āfinō āfe fakefonō Efeso anoxō ato noikī ato kexesharaxonō. ¹⁸ Onesíforo Efeso anoxori ea yonosharaxopaoni, mīfi a ōixō tāpisharakī. Jesucristo anā fotoxō noko ichanāfaxō Onesíforoki inimakōikī noikī axosharaino ē askara fichipai.

2

Nō Jesús Ifofakī oa soraronō āfe xanīfo nikakōiai keskafakī nōri Nios nikasharakōitiro

¹ Timoteoshta, Jesucristo āfe kerex sharaōnoax isharafe, afaa chakafaxima. ² Ē yorafo Jesúsnoa yoiaito mīri ea nikafafāini. Nāskarifiāi mī ato chanīmara fasharatiro. Nāskaxō a feronāfakefāfe a shinā sharaifo ifife mī ato tāpimaxikī afāferi fetsafo tāpimanōfo.

³⁻⁴ Akka soraro ōiti sharayato omiskōifikī tenetiro. Āfe pexe shināyamata āfe xanīfo fisti ifofaxō nikasharakōi. A afara yonoai keskara āfe xanīfāfe yonomanaino soraro sharapa yonosharatiro. Nāskarifikī Niospa mia yonomapaiyai keskari fakī yonosharaxōfe fanīrira fetsa shinākima. Jesúsnoax omiskōifi meseyamafe. ⁵ Askatari fetsafo xonōnōnāxikakī ĩkisi itipinīsharatirofo xonōnōnāpaikani. Askatari mīri shināsharafai Niospa mia yoiaito nikasharakōife. Akka mī nikasharayamaito Niospa mia, “Aicho, mī fāsi sharakōi,” ixokai mia yoitiro. ⁶ Askatari feronāfake yonosharamiskōi āfe tare efapafaxō, ĩkisi āfe yono fitiro pixikī. Nāskarifiakī mīri Jesúsnoa yonoxosharamis Jesús mikiki inimakōinō mia afara shara ināxii. ⁷ Ē mia yoiai keskara shināsharafe. Nōko Ifāfe mato tāpimasharai kiki.

⁸ Nāskakē shināmakiyamafe Jesucristo naafiakē anā Niospa otofani noko ifimis inō. Nā David āfe fena. Nānori nā meka shara ē yoifafāimis. ⁹ Nā ē yoifaito, yorafāfe Jesús Ifofaafoma ōitifishkikakī. Ē Niospa mekasharaōnoa yoiaino ekeki ōitifishkikakī ea karaxa mēra ikimanafo. Ē afaa chakafayamafiakē ē feronāfake chaka keskarakē ea karaxa mēra ikimanafo. Ea ikimafianifono Niospa meka Jesucristoōnoa ē enetiroma. ¹⁰ Nāskakē ē atoōnoax omiskōifikī ē tenekōi a Jesús Ifofaafoto tii ē ato tāpimani chanīmara fanōfo, Nios fe ĩpaxakakī.

¹¹ Na meka sharakōi nikafe:

Nō Jesúsnoax nakī nō chanīmara faax nō afe ĩpanaka. ¹² Askatari nō Jesúsnoax omiskōifikī nō tenei, nō Jesús fe Epa Nios ariax xanīfo ĩpanakakī. Akka nō Jesús potakī, “Niospa fakemara,” ixō nō askafaito Jesús noko yoitiro iskafakī: “Mā ea Niospa Fakemara faito ēri mato kopitiro iskafakī: Mī ēfe fakema,” fakī noko fatiro. ¹³ Askatari nō Jesús nikayamai nō isharayamafimisno, akka akai askarama, aroko isharakōimis. Aatokai afaa chanī yoimisma, āfe meka chanīmakōi. Aakai ōiti ranāyama.

Afe keskara a Niospa meka yoimis shara itiomē Nios akiki inimanō

¹⁴ Na ē mia yoiai anori, mefe yorafo ichanāmisfo ato shināma fafāife. Niospa mia xafakīa ōiaino ato yoife Niospa mekaōnoa feratenānōfoma, feratenākani aōnoax mekanōfoma. Akka fatotokai yoisharaimākai fatotori yoisharaimamākai ikaxō tsōa tāpitiroma tāpipai kakī. Anorima nika kakī tsōa tāpitiroma. Askakani fanīrira mekamisfo āa chanīkani. ¹⁵ Timoteo, Niospa meka pena tii ōife. Askafaxō Niospa meka tāpisharaxō yorafo mēstekōi ato

tāpimafafāife. Mī askaito Niospa mīōnoa yoitiro iskafakī: “Na ea yonoxosharamis, ě akiki inimasharakōi,” ixō mīōnoa yoixiki. Mia askafainokai mī aō rāfitiroma. ¹⁶ A feratenāmisfo āto meka nikayamafe. Nō āto meka nikaxō meka mēstekōi Jesúsnoa nō nikapaitiroma. Askaxō anā nō Nios Ifofapaitiroma. Chakakōi itiro. ¹⁷ Oa yora faraxiki finaxō, koofi payokometiro keskafakī, a yōra anorima yoikī yorafo āto ōiti chakana fatiro. Himeneo feta Fileto askara chakakōi ato yoimisfo. ¹⁸ A Jesús oaitīa a namisfo anā otoviaifo mā nō tāpifekē, a feronāfake rafeta Himeneo feta Fileto anorima mato yoimisfo. Akka nō tāpia mā Jesús anā fotoaino Epa Niospa nā namisfo otofaxii. Akka nā rafeta mato pāramisfo āa chanīkakī. Iskara mato yoimisfo: “Mā finōa a mato yoimisfo keskara. A Niospa namisfo mā ato otofaa,” ixō a refeta yoimis. Afāfe nā meka nikaxō shinākī iskafatirofo: “Ooa. Mā nō nakē Niospa noko anā otofaima,” ixō anorima shinātirofo. Anori shinākani Jesús shināmakitirofo. ¹⁹ Akka Niospa meka chanīmakōi. Tokirinīfakai tsōa rafetiroma. Niospa meka nāskarari. Tsōakai āfe meka fetsafatiroma. A chanīma, nā yoimis keskara nāskararakōi. Tokirinīfakī yōra keneakai tsōa soatiroma. Nāskarifiakī Niospa meka kenenifo iskafakī: “Nōko Ifāfe afe yorafo tāpikōia.” Nāskakaxō, “Afe yorafāfe a afara chakafamisfo keskara potatirofo,” ixō kenenifo.

²⁰ Feronāfāke āfe peche efapa sharakōi faxō a mēra kecho sharakōifo faa, askaxō a kecho sharafo mēra afara sharafo fatiro. Akka a kecho chakafo mēra afara chakafori fatiro. ²¹ Mā mī chaka mī xatekōiax, nā fēta xinikī afara chaka potatiro keskara itamaroko. Nā sapa choka keskara sharakōi mī itiro. Nāskax Jesús keskara shara mī ikaino Epa Niospa mia yonomapaiyai keskara mī aōxō afara sharafo faxotiro.

²² A naetapafāfe afara chakafo shinākī nā apaiyai keskara faifono mīri askayamafe. Anori shinātamaroko Niospa fichipaiyai keskara shināfe, Jesús chanīmara fafāi, yorafo noikī, fetsafāferi shināsharakōiaifono, Jesús Ifofaifo ato fe mēstekōi isharakōife. ²³ Anā ě mia yoinō, ea nikasharafe. A feratenāifo ato nikayamafe. Ato fe feratenāpaiyamafe. Askara yorafo samama ōitifishkitirofoki. ²⁴ Niospa meka yoimisto tsoa feratetiroma. Anori askatamaroko keyokōi yorafo ato noisharafāi, ato tāpimasharatiro, tenekōisharata ato yoitiro. ²⁵ Fētsa Niospa mekakōi nikakaspakī meka anorima fisti shināito, fenāmāshta ato tāpimasharafe. Mī ato askafaino āto chaka xatetiromo Niospa mefeta akaino. Askaxō Jesús chanīmara fakōinōfo. ²⁶ Nāskafakī anā Niosnoa shināsharanōfo. Oa tarapa mēra ikia keskara Satanás ato fapai kiki. Nāskaxō ato amapaiyai keskafakī ato yonofafāini. Akka mia nikaxō Jesús ato ifitiro. Nāskaifono Satanás afianā ato afara yonomatiroma. Afianā tarapa mēra ikia keskara ikanima.

3

Afeskakanimākai yorafo na mai keyoaino

¹ Timoteo, ōisharafe. Ě mia yoi Jesús chaima oaino fekaxkōi ixii kiki. ² Fetsa noitama āakōi kexemei, askatari fētsa āfe kori fisti shināfāi, āakōi anofi inimamis ikāi, Niosnoa chaka yoimis ikāi, askaxō āto apa yafi āto afa nikakaspamisfo ikāi, yonoxofiaifāfe aichora ato famisfoma ikāi, ato noikaspamisfo, Niosnoa shinātama chakakōi fistis shināmisfo, ³ afe yorakōi noiyamafāi, fetsafo noiyamata axokaspafāi, fetsafo āa pāramis ikāi, āa apaiyai keskafakī enemisma ikāi, mitsisipakōi ikāi, afara mīshti sharafo noiyamafāi, ⁴ askata a afe rafeafo ato chakafafāi, samama ōitifishkimis ikāi, “Ěkai tsoa keskarama,” ixō yoifāi, Nios noitama afara chaka fisti fakī ato inimama-paimiskōi ipaikani. ⁵ Askata a Nios Ifofaifo ichanāifono ato fe ichanākaxō

Niospa meka nikafikaxō shināsharakanima. “Nōri Nios Ifofai,” ixō āa mato pārakani. Askax āa chanīmisfo Nios Ifofayamafiakanax.

Askaifāfe ōi ato fe rafeyamafe. ⁶ Askara yorafāfe a fofāsakakī ato pāratirofo a kēro tāpisharamisfoma fanīrira ato yoimisfo ato anorima yoiaifāfe. Atirifāfe noko yoikōikanira ato famisfo. Nāskakē a xotofakefāfe noko yoikōikanira ikaxō a yoiaifo anori ato nikataifafo. Nāskakē a kērofāfe āa shinākani iskakakī: “Nō fāsi chakakakainaito, noko tāpimasharanōfora,” ixō shinākani anorima āto shinā mēraxō shinākaxō nāskai fekaxtetitaiafo. ⁷ Nāskaxō a ato yoimis fētsari ato yoiaito, nikatai fakaxō Niospa meka sharakōi tsōa mēstekōi tāpinakafoma. A rama ikai fētsari yoiaito, nikakākiri aōxō tāpisharapaifikakī, tsōa tāpinakama Niospa mekakōi. ⁸⁻⁹ ¿Mā mī shināimē anori aakōi Egipto anoa xanīfāfe Faraón israelifo ato yonoma paoni, mesemaxō? Askaito ōikī Niospa Moisés nīchini afe yorafo israelifo mai fetsa ari ato iyotanō. Ato askafaito Faraón ato nīchikaspani. Askaino a feronāfake rafe ano mokaya inifo; fētsa ane Janes ikaino fētsa aneri Jambres ini, nā rafe Faraón fe rafeafo ini. A rafe Moiséski ōitifishkinifo. Nāskaxō āto xanīfo Faraón āa pāranifo ato Moisés nikanōma. Askafaiifāfe ōikī chipo āto xanīfāfe tāpini Moisés a feronāfake mokaya rafe finōkōia ini. Mokayafiakaxō afaa tāpiama inifo. Nā rafeta Faraón yoinifo Moisés nikanōma. Nāskafakīri fetsafāfe Niospa meka mēstekōi ato nikamakaspakani. Nāskakaxō Niospa meka mēstekōi tsōa yoima āto shināmā anorima shinākani. Oa Janes feta Jambres āto xanīfo anorima yoiaifono āto xanīfāfe ato tāpini keskafakī. Nāskafakīri na iskaratīa na anorima yoimisfo āa chanīaifāfe nō ato tāpixii afāfe afaa tāpiafoma.

Mā Pablo mekai xatekī Timoteo yoisharani

¹⁰ Timoteo, mā mī ea ōisharakōimiskī ē ato afo tāpimanaito. Mā mī ea ōimiskī afeskax ē isharaimākai, Nios fisti inimamapaifāi, Jesús noikī chanīmara fafāi, afarafo chakafo nokoaito ē tenefāi, ē yorafo noifāi, ¹¹ a yora chakafāfe ea Jesúsxō chakafaiifāfe ē tenefāi, askai ē omiskōimis. Mā mī tāpia ē afo tenemis. Askatari mā mī tāpia a Antioquía anoa ita, Iconio anoa ita, a Listra anoxō ea chakafaiifāfe ē teneni. Nāskakē nā chakafoōxō nōko Ifo Nios ea kexesharamis ē tenesharakōimis inō. ¹² Na ē mia yoiai anori chanīma. Nō Cristo Jesús fe rafesharapaiyaito a Jesús noikaspamisfāfe noko omiskōimaxii. ¹³ A yora chakafāfe āa ato pārakani. Askatari chipo ato pārakī finakōixikani. Nāskakē afara chakafakī ato pāraifāfe ōikī Satanásri ato pāraxii.

¹⁴ Nāskakē Timoteo, na meka Jesúsnoa mī tāpisharai. A mia tāpimanafo mā mī tāpikōia. Nāskakē mī tāpisharakōi. Anori meka chanīmara fafe, shināmakikima. ¹⁵ ¿Mā mī shināimē yomepishtaxō mī Niospa meka tāpiakī? A mekaōnoa mī shināsharamiskī Cristo Jesús chanīmara faax nō afe isharapakenaka. ¹⁶ Niospa ato shināmanaino feronāfakefāfe kirika ato kenexonifo Niospa meka ato tāpimaxikakī. Fetsafāfe afara chakafaifono, nō ato Niospa meka tāpimasharatiro anā askayamanōfo. Askatari nō isharapaikōikī nō Niospa meka ōikī nō tāpitiro afeska faxō nō Jesús Ifofasharatiromākī. ¹⁷ Akka Nios Ifofamisfāfe āfe meka nikasharakōikaxō, Nios yonoxosharakōitirofo.

4

¹ Timoteo, ē mia kaxeta yoima, nikafe. Jesús oatīa nōko xanīfokōi ixii Apa Nios feta, keyokōi yorafo namisfo yafi niafori ato yoixii. Jesús chanīmara fakanax afe nai mēra nisharapakenakafo; akka a chanīmara famisfoma chiifā mēra Niospa ato potai omiskōipakexanōfo. Nāskakē āfe Fake Jesucristo feta Niospa noko ōiaino ē mia yoi iskafakī: ² Niospa meka fena fenakima ato yoife fenāmāshta shara. A nikapaiyaifo askatari a nikakaspaifori ato

yoisharafe, mĩ ato yoisharaino āto chaka xatenōfo Jesús Ifofasharax isharanōfo. Shināsharata, Niospa meka mēstekōi yoife. ³ A yora chakafamai nokoaino yorafāfe Niospa mekakōi nikakaspapirofo. A nikatamaroko meka fetsafo shinātirofo, nā apaiyai keskafakakī. Anori fisti shinākani. Nāskakanax ano fisti ichanākaxō anorima a fetsafāferi yoiaito nikakakī. ⁴ A Niospa mekakōi nikakaspakani a āto xinifāfe shināpaonifo keskari fakakī. ⁵ Nāskakē Timoteo, ōisharafe. Afara afeskaraito Niospa mekakōi Ifofasharafe; mĩ shināfenotama anori tāpisharafe. Mia omiskōimanaifono teneffe. Kafākakaikī yorafo Jesúsnoa tāpimafe Ifofanōfo. Nā mia Niospa yoiai keskafafe shināfāi.

⁶ Iskaratīa eōnoa ē mia yoi. Anā ē samarakaima mē chaima nai ea Jesúsxō retekikani. ⁷ Mē yonosharakōitiani ēfe Ifo Jesúsxō. Ē chanīmara fatitaifaa enekima. Keyokōi Niospa ea yoiai keskara mē aka. ⁸ Nōko Ifokōichi ea ōimis ē Ifofasharakōiaito. Nāskakē ē akiki nokoaito ea afarafo ināsharaxii. Eres fisti ē fixiima. Nā nōko Xanīfo finakōia oaitīa keyokōi nā Ifofaafāferi fixikani. Aō noikī a manaiiori ato ināsharaxii.

Pablonō Timoteo fisti yoini kirika kenexokī

⁹ Timoteo, ea ano orisape. ¹⁰ Demās afarafo fichipaikī ea nonoa ōifaiti, Tesalōnica ano kakī. Askatari Crescenteri kati Galacia ano. Askatari Titori Dalmacia ano kati. ¹¹ Akka na Lucas fisti efe ika. Nāskakē Marcos ea efexōfe ea axosharaiyonō Niospa meka ato yoikī. ¹² Akka ē Tíquico Efeso ano nīchiyamea ēa. ¹³ Mĩ oaitīa ea ēfe rakoti fexōfe a Troas ano ē faferati a Carpo pexe ano. Askata ēfe kirikari ea fēxota, askatari kirika fetsari ea fēxota a fakka fichisharakōi ē akiki kenemis, aari ea fexōfe. Ē afo fichipaikai.

¹⁴ Na yami famis Alejandro ea fāsi mekafamis. Aato ea chakafaito ōikī Niospa kopikiri omiskōimaxii. ¹⁵ Ōisharafe. Alejandro miari chakafatiroki na meka shara Jesúsnoa nō yoiaito noko meka xatemapai kiki.

¹⁶ Akka ea taefakī xanīfo ano iyonifo tsōakai eōnoa yoisharanima. Akka keyokōichi ea ōifainifo fōkakī. Askafiaifono ē Niosp iskakī yoini: “Epa, na ea nonoa ōifainifo ato chakafayamafe,” ixō ē Niosp yoiyamea. ¹⁷ Ea askafafiaifono ēfe Ifāfe Jesús ea potayameama, ea kexexō. Ea askafiaifono ē ratetima ēfe Ifāfe ea kexeano āfe kerex ea ināno ē ato yoinō. A judeofomafāfe ea yōkaifāfe keyokōi nikanōfo ē Niospa meka Jesúsnoa ato yoiyamea. Ē askaito ea retepaiakakī, oa poomānā noko pipaiyai keskara ea fatifo ea retepaiakakī. Ea askafiaifono ea Niospa kexesharayamea ea tsōa retenōma. ¹⁸ Afara chakafo ekeki nokoaito ōikī ēfe Ifāfe ea kexetaifa a ē akiki nai mēra nokoaitīa. Fāsi nōko Niosp sharakōi, tsoa fētsakai askafatiroma. Nāskakē tsōa nōko Niosp finōtiroma. Ares fisti shara finakōia. Nō aōnoa yoisharapakexanō. Nāskapakexapainō.

Pablo mā mekai xatekī ato meka shara fomani

¹⁹ Timoteoshta, ea Prisca yafi Aquila ea yoixōfe, keyokōi yorafo Onesíforo pexe ano ikāfori ea yoixōfe. ²⁰ Erasto Corinto ano nēteyamea. Trófimo isinī ikī rakakē ē Mileto ano rataferayamea. ²¹ Nā mechaka ikamano ekeki ofe. Eubulonō, Pudentenō, Linōnō, Claudianō, keyokōichi Jesús chanīmara faafāfe mato yoisharapaikani.

²² Nōko Ifo Jesucristo mefe ipaxanō. Askatari Niospa mato noikōikī mato kexesharakōinō keyokōi. Nā tii ē mato yoi.

Ēkīa Pablo

Pablo Tito Kirika Kenexõ Fomani

Pablo Tito yoisharani

¹ Tito, ã mia kirika kenexõ fomai. Ëfi Pabluki, Niosfi ãfe Ifokõiki. Nã ea yoiai keskamis ã. Jesucristo ea nãchia ã aõnoa yoimis inõ, nã Niospa katoa yorafo ã ato tãpimanõ afãfe Jesús chanĩmara fanõfo. ² Niospa mai onifatama shinãkĩ iskafani: “Na yorafo ã ato katoano efe rafeaifono ã ato ãkikõipakenaka efe ãpaxanõfo,” ixõ shinãni. Nãskakẽ nõ Nios Ifofapaikĩ nã yoiai keskara nõ chanĩmara fatiro. Nios ramashara chanĩmismo. ³ Aatofo noko tãpimapaiyaitã ãfe meka shara noko tãpimani. Nãskakẽ iskaratã ea nãchia ã ato ãfe meka shara yoinõ eõxõ tãpinõfo. Nã Nios noko ifimis nõ afe ãpaxanõ. ⁴ Tito, ã mia kirika kenexõ fomai. Mĩfi ãfe fake keskarakõikĩ, eõxomãĩ mĩ Nios chanĩmara fakẽ. Epa Nios mĩ Ifofakẽ mia imasharakõipakenaka mia noikĩ mia shinãsharamani. Nõko Ifo Jesucristori mia askafai.

Pablo Tito Creta ano nãchiferani ato tãpimanõ

⁵ Tito, ã mia nãchiferati Creta ano a nõ yonofai mitoxoma mĩ chipo mitonõ. Nãskakẽ ã mia yoiti iskafakĩ: “Nã pexe rasi anoafõ kexemisfo katofe nã Nios Ifofaafo ichanãfono ato kexenõ,” ixõ ã mia yoiferati. ⁶ A Nios Ifofaafo kexemis katofe afaa chaka shinãmismo. ãfi fistiya inõ. ãfe fakefo Jesús tãpiafo inõfo, ato kemamismo inõfo, afaa chakafamisfoma inõfo ãfe fakefo. ⁷ Nã Nios Ifofaafo kexemis sharakõi itiro, afaa chaka shinãmismo nãmãĩ xanĩfoax. Nã keskara yora mĩ katotiro nã Nios Ifofaafo kexemis inõ. Nã Niospa shinãmanai keskara inõ aõnoa afaa chaka yoiyamanõfo. Askatari kakapaimis itiro. Askatari samama õitifishki imiskai itiro. Askatari pãemis itiro. Askatari setemitsamis itiro. Askatari yora fetsa pãraxõ kori fãamis itiro. ⁸ Askatamaroko isharakõixõ yorafo ãfe pexe nokoaito atoki inimayanã ato ifitiro. Askatari yorafo keyokõi ato afara shara axosharakõimis itiro. Askatari ãa kexemesharamis itiro mẽstekõi isharakõiyã. Niospa meka nikasharakõipai afara chakafapaifikĩ anã akima. Nãskaxõ a Niospa fichikaspai fo anã shinãima. ⁹ Niospa meka nikasharaxõ kachikiri fayamafãĩ, nã Niospa yoiai anori chanĩmara faxõ fetsafori yoitiro. Xafakãkõi yoitiro. Nãskaito nikai yorafo Nioski inimanõfo. Askatari anorima yoimisfori ato tãpimatiro, akairi tãpinõfo.

¹⁰ Akka nã fetsafo nikayospakõimisfo Niospa meka ato yoiaifono nikakaspakõimisfo. Nãskaxõ meka fetsafaxõ yoimisfo ãa fanĩrira yoikakĩ nã Moisés yoini keskara fisti nõ nikanõra ikaxõ. Akka nã judeofo ranãri askamisfo ãa chanĩkani. ¹¹ Nãskakẽ ato xatemafo ato pãranõfoma. Kori fisti fipaikakĩ anorima chakakõi ato tãpimapaikani kiki. Nãskakẽ ranãrito atoõxõ Jesús kachikiri fayomisfoki.

¹² A feronãfake onãyato a inõpokoai keskaraõnoa Creta anoxõ yoini: “Nono ikafo, Cretafofi chanĩmisfokĩ, nikayospafo, pikĩ fisti tãpiafo, yoinã keskara pitsikõifo xanikõifo,” fani. ¹³ Nã tãpiato ato yoikõini ato pãranima. Creta anoafõ chakakõi ikafo. Nãskafiaifono ato yoisharafe Titopa, anã askanõfoma, Niospa yoiai keskara nikanõfo. Nãskaxõ Niospa meka chanĩmara fanõfo. ¹⁴ Akka judeofãfe ãto xinifãfe ato yoipaonifoki anorima, ãa chanĩkakĩ. Nãskakẽ ato yoisharafe anã ato nikanõfoma. Askatari a Niospa meka anã nikaifãfema ato yoipaiyaifono, ato yoisharafe anã ato nikanõfoma.

¹⁵ Fetsafo õiti sharayafo, mãmãĩ Epa Niospa ato chaka xatexonano. Nãskakẽ afara sharafo atonã sharakõifo. Akka a õiti chakayafãfe ãto shinã mẽraxõ

chakakōi shināmisfo. ¹⁶ Askafiax chanīmisfo, “Nō Nios tāpiara,” iki, tsōa Nios shināyamafi. Askara yōra Niospa meka nikakaspakī chakafai. Nāskakē nō tāpitiro askara yora Nios fe rafemisma. Askara yōra shara shināima, afaa pishta shara fatiroma, chakakōi shināi.

2

“Niospa meka ato mēstekōi tāpimasharafe,” Pablo Tito fani

¹ Mīfi askaramakī, Titopa, mī ato yoisharafe. Niospa meka ato mēstekōi tāpimasharafe, mia nikasharanōfo. ² Askata anifo tiiri ato yoisharafe isharanōfo. “Anā pāeyamakāfe,” ato fafe. Askafaxō ato yoisharafe: “Māri isharakāfe mā askaito ōikī fetsafāfe mato ōinōfo. Afara chakafapaikī anā ayamakāfe, kexemesharakāfe. Shara shināi ikāfe. Māto ōitinī Nios shinākī kachikiri fayamakāfe. Askata māri yorafo fe rafesharakāfe. Ato noikāfe. Māto afara afeskaraito shināchakayamakāfe, a finōmataroko Nios yoikāfe.” Nāskaxō anori ato tāpimasharafe, Titopa. ³ Askatari a yōxafo tiiri ato yoisharafe iskafakī: “Isharakāfe a Niospa fichipaiyai keskai. Askatari mā ranā paranōnyamakāfe. Parakī ato chakafayamakāfe. Yōxafofiax pāeyamakāfe. Askatamaroko afara sharakōifo fetsafo ato tāpimakāfe,” ixō ato yoife. Askafafe ato yoikī, a ranā askanōfo. ⁴ Nāskafaxō anā ato yoisharafe, Titopa, yōxafo tiito a naetafafo ato yoisharanōfo a tiitori tāpinōfo, nāskaxō āto fene noisharakōinōfo, āto fakefori noikōinōfo, ⁵ afara chakafapaifikakī anā anōfoma, kexemesharanōfo, askatari āto pexe anoxō āto fakefo kexesharakōinōfo faki fofāsapaiyamanōfo, askatari ato noisharakōinōfo, askatari āto fene nikakōinōfo. Nāskafāfe ōikī fetsafāfe Niospa meka chakara fatirofoma, nā kērofo shara niaifāfe ōikī, Nios Ifofakanax. Akka kērofāfe Nios Ifofafiakakī anorima shināifono fetsafāfe Niospa meka chakara fatirofo, nā kērofo ōikī, chaka niaifono, Nios Ifofafiakanax. Akka nā kērofo Nios Ifofaax shara ikaifono ōikī fetsafāfe Niospa meka chakara fatirofoma. Nāskara yōxafofofāfe ato shara tāpimatirofo, naetafafo.

⁶ Askatari naetapafori yoisharafe iskafakī: “Māri tāpikāfe, shināsharakāfe isharaxikāki. Afara chakafapaifikī anā ayamakāfe, kexemesharakāfe,” ixō ato yoife, Titopa. ⁷ Askatari mīri isharafe. Keyokōi yorafo shara fafe. Afeskax isharatirofomākī ato ōimafe. Ato Niospa meka tāpimafe, mēstekōi ato yoisharafe, xafakīakōi. Niospa mekaki kakapaiyamafe. ⁸ Ato meka shara yoife. Mī shara yoiaito, mia fetsafāfe iskafanōfoma: “Titopa noko meka chaka yoirā,” inōfoma. Tsoa mefe feratenāyamanō. Mefe feratenāpaikani rāfitirofo. Mī afara chakafaino mia tsōa ōiyamanō.

⁹ Askatari a ato yonomatifo ato yoife iskafakī: “Māto xanīfāfe mato yoiaito akiki inimayanā nikakōikāfe afe feratenākakima. ¹⁰ Nāskaxō māto xanīfo āfe afara onēyamakāfe. Shara yonoxokāfe, ramashara mā ato pāramismakī. Askara ōikī mato tāpisharanōfo mā ato yonoxosharakōiaito māmāi Niospa meka shara shinākī.” Nāskakē mātoōxō, “Niospa meka sharara,” fatirofo. Nā Nios noko ifimis nō afe ipaxanō.

¹¹ Epa Niospa āfe Fake Jesús nāmā nīchini nokoōnoax naiyonō nōko chaka noko soaxoyanā nō afe ipaxanō. Nāskakē nō tāpitiro Epa Niospa keyokōi noko noikōiaito. ¹² Noko noikī noko tāpimani afara chakafakī nō xatenō. Noko afara chakafamapaiyaifāfe nō ato yoitiro iskafakī: “Maa, ē anā afaa chakafapaima. Ē shara nipai, ē anā chaka shināpaima,” nō ato fatiro. Nāskaxō nōko ōiti mēraxō a afara chaka nō fichipaiyai a Niospa fichipaiyaima, nōri anā fichipaitiroma. Askara fichipaitama a nō shināmakitiro. Nāskata nō isharakōitiro. Niospa noko shināmanai keskara fisti nō shinātiro. Nāskax nō shara nitiro. Yora fetsafāfe chaka shināifono nō askara shinātiroma, Nios Ifofaxō. ¹³ Iskaratīa

nō Jesucristo manai anā oaito nō ōisharapai. Nāfi nōko Ifokōikī. Nāfi Nioski. Nō tāpia nokoki anā oxii. Nokoki nokoaito sharafinakōia nō ōixii. Nāato noko nāxoni nō omiskōipakexanōma nōko chaka noko soaxoxiki, nō afe nīpaxanō. ¹⁴Nā nokoōnoax nani. Nōko chaka keyokōi noko soaxōfaini. Nāskaxō nōko ōiti noko sharafaxōa. Nō afe yoraxō nō afara sharafapaikī nō anō.

¹⁵Nāskakē ē mia yoiyai keskafakī keyokōi yorafo ato tāpimafe, mia Niospa shināmanaino. Afara chakafaifāfe ato yoisharafe, anā askanōfoma. Niospa yoiyai keskafakī mīri ato yoisharafe, inimanōfo. Mī ato askafaito mia nikasharanōfo Niospa mia yoiyai keskarafakī akairi nikasharanōfo.

3

Nios Ifofaafō shara nitirofo

¹Nāskaxō mefe yorafo ato yoisharafe, Titopa, iskafakī: “Māto xanīfofo feta nafa xanīfāfe yoiaito nikasharakāfe. Ato nikasharax a mato yoiailo keskakāfe. Askatari afara afeskaraito ato axosharakāfe. Shara shinākāfe. ²Askatari ato mekafakī chakafayamakāfe. Fētsa mato yoipaiyaito ferateyama-kāfe. Akiki ōitifishkiyamakāfe. Ato shināsharakāfe. Fenāmāshta ato yoikāfe,” ixō ato yoisharafe, Titopa.

³Nāskakē nōri afaa shināyopaonima. Nōko ōiti mēra nō afaa pishta shinātiroma nō ipaoni. Nō nikayospakōi nō ipaoni. Nō chaka shināpaoni. A nā nō ipaiyai keskara nō ipaoni. “E shara shināi, nā ē ipaiyai keskara ē iki,” ikax nōa nō pāramepaoni. Nō yora fetsa āfe afara fichipaipaoni. Nō ato mekafakī chakafapaoni. Chakakōi nō ipaoni, afaa pishta nō mekeaima. Nāskax nō noikaspa faatanāpaonixakikai nō xatemisma. ⁴Mā nō askapaonino, Epa Niospa noko noikī āfe Fake fisti nīchini nōko chaka noko soaxoniyonō, nō omiskōipakexanōfoma nokoōnoax naiyonō. Nāskaxō noko ōimani afeskakō noko noimākai. ⁵Akka nō chaka shināmiskē noko nāxoni nōko chaka noko soaxoxiki, nokomāi noikōikī. Akka nō afara shara faōxō noko ifima. Noko noikī nōko ōiti fetsafaxō noko shināmasharai. Noko askafaano nō niax fena keskara shara nō itiro. Niospa Yōshi Sharapa noko askafatiro. Nōa nō niax nō askatiroma. Nōa nō chaka soametiroma. ⁶Nōko Ifo Jesucristo noko nāxoni, nōko chaka noko soaxoxiki noko ikipakexakī. Nāskakē Niospa āfe Yōshi Shara noko inā nō mēra nanenō, fishkomītsatiroma. ⁷Nāskaxō noko ōiti shara faano, nō afe rafekōitiro nokomāi noikōikī. afe rafeax nō afe nisharakōipakexatiro nā nō ipaiyai keskai.

⁸Titopa, ē mia xafakīakōi yoiaki. Nā ē mia yoiyai keskara chanīmaki. Nāskakē Nios Ifofaafō yoisharakōife, shināsharata isharakōinōfo, yora fetsafo shara fanōfo. Askara shara ikax keyokōi nō isharatiro. ⁹Nāskata fētsa mia feratenāito kemayamafe. Mia iskafaito: “Nōko xinifo mī tāpiama, mī ea keskarama,” mia faito kemayamafe. Askata oi mitsisipato mekaito kemayamafe. Moisés yoini keskafakī mia mekafainīfofānaito kemayamafe. Mī kemapanā sharamaki. A noko askafai yōra afaa tāpiamaki. Askara fe nō kemanātiromaki.

¹⁰Akka fētsa a Jesús Ifofaafō ato yoisharakima āa ato pārakī ato paxkanāfaino kenaxō yoisharafe mia nikasharaimākai anā askanōma. Akka mā mī yoikī rafefafiano mia nikayamaino anā afaa yoiyamafe. Askatari anā afe rafeyamafe, ares inō. ¹¹Mā mī tāpia askara yōra Nios Ifofaama. Niospa meka nikaima, chaka shināi, ōiti chakaya. Askarato afashta shara faima. Mā āa tāpimekōia, yora chaka.

Pablo mā mekai xatekī ato meka shara fomani

¹² Askata ã mikiki Artemas iyamakĩ Tíquico ã mia nĩchixonĩ. Mikiki nokokẽ, ekeki ofe, Nicópolis ano. Na oi pakeaitĩã ã shinã ã nono Nicópolis ano itiroki, mechakaino. ¹³ Apolos yafi Zenas kexesharafe. Nã Zenasmã noko ato yoixomiski, nõko xanĩfo. A rafe mato makinoax foaifãfe ato kexesharafe. Nãskaxõ afara fichipaiyaifãfe ato inãfe, aya fõtanõfo. ¹⁴ Askatari a Jesús Ifofaafo ato yoife yonomisfo inõfo, yonosharakõĩ yononõfo, yonochakama. Askarafãferi afara yopakakĩ fitirofo, yonokaxõ. Askarafo ato yoife xanimisfoma inõfo, ato afara inãxikãki a omiskõiaifo, afaamaisfo.

¹⁵ Na ãfe ikafãferi ãto meka shara mia fomakani, Jesús Ifofaafãfe. A noko shinãifori noko ato yoixõfe. Niospa ãfe shinã shara mãto õiti mẽra nanemanõ mato noikõikĩ. Nã tii ã mia kenexõ fomai, Titopa.

Pablo

Pablo Filemón Kirika Kenexõ Fomani

Pablo Filemón yoisharani

¹⁻² Ëkĩa Pablo. Na karaxa mēraxõ ã mia kirika kenexõ fomai. Na nõko exto Timoteo feta nõ mia kirika kenexõ fomai. Ë Jesucristoõnoa ato yoiaito, ea nikakaspakakĩ ea achikaxõ karaxa mēra ea ikimatifo. Nāskakē ã mia yoi, Filemón, mĩfi noko keskarakĩ Niosnoa ato yoimis. Nāskakē nõ mia noikõi. Nõ mia kirika kenexõ fomai, mia yafi a mefeta Jesús Ifofaafo a mĩ pexe anoax ichanāmisfori nõ mato kirika kenexõ fomai. Akka Apia nõko poi keskara, nāskakē Arquipo yafi nõ ato kirika kenexõ fomai. Akka nã Arquipo noko keskarari nāatori ato Niospa meka yoimis. ³ Niospa mato noikĩ mātõ shinã mēra mato shināmashara mã fekaxtenõma. Epa Nios feta nõko Ifo Jesucristo mato askafanõ.

Filemón Jesús Ifofaxõ yorafo noipaoni

⁴⁻⁵ Mē mia nika mĩ nõko Ifo Jesús noikõiaito, askatari mĩ chanĩmara fakõinaito, askatari a Jesús Ifofaafori mĩ ato noisharakõia keyokõi. Mĩ askaito nikakĩ ã mia nirixõ kĩfixõfafāini iskafakĩ: “Aicho Epa Niosi, na Filemón mia Ifofasharakõia,” ixõ ã mia Epa Nios kĩfixomis. ⁶ Askatari mĩ Epa Nios Ifofasharakõianã mĩ ato afara axosharakõimis ato tãpimasharakõianã. Nāskakē ã Epa Nios mia kĩfixomis mĩ tãpisharakõinõ nã Cristo Jesús nõ Ifofaito noko inimamamis keskafakĩ. ⁷ Ë mikiki inimasharakõi mĩ ato noisharakõiaito nikai. Nāskakē ã mikiki inimai, efe yorashta, a Nios Ifofaa fetsafo mĩ ato noikĩ mĩ ato inimamasharakõiaino.

Pablo Filemón iskafani: “Mĩ yonomati Onĩsimõ eõxõ sharafafe,” ixõ yoini

⁸ Cristo ea ifini ã ãfe meka yoimis inõ. Nāskakē fāsi mekainĩkafã ã mia yoifitiroxakĩ, akka ã mia askafapaima mĩmã fetsafo ato noiyanã mĩ ato inimamasharakõiano. ⁹ Ë mia askafatamaroko ã mia noikõianã ã mia yoipai. Ëkĩa Pablo mē anifokõia ã Cristo meka ato yoiaito ea nikakaspakakĩ karaxa mēra ea ikimatifo. ¹⁰ Nāskakē Onĩsimõõnoa ã mia yoisharapai. Na Onĩsimõfi ãfe fake keskaraki. Nono karaxa mēraxõ ã Onĩsimõ Jesús chanĩmara famati. Nāskakē Onĩsimõ ãfe fake keskara.

¹¹ Akka taeyoi Onĩsimõ mia yonoxosharapaonima. Mã askayopaofinixakĩ, iskaratĩa mĩõ noikĩ mia axosharatiro, nã ea axõai keskafakĩ. ¹² Ë mia anã Onĩsimõ nĩchixonĩ ã aõ noikõifikĩ. ¹³ Epa Niospa meka shara ã yoiaito ea karaxa mēra ikimanifono, oa nono efe ixõ mĩ ea kexesharamis itikixõ na Onĩsimõ ea kexenõ ã fichipaikerana. ¹⁴ Akka ã mia yõkaxoma nonoxõ ea kexenõ, ã nētefapaima. Nāskakē, “Na ea Onĩsimõ anã nĩchixõfe,” ã mia faima. Nāskakē na Onĩsimõ mĩ efeta yonomapaikĩ ea kexenõ mĩ yoitiro. ¹⁵ Õitsai, Niospa anori fichipaiyaino askayameaki nāskax anã mĩ yonomati keskara ikima Nios chanĩmara faax. Mĩ yonomatifax mikiki onekeratiki afetĩama. Anã iskaratĩa mia ano kaax, chaka ikima mefe rafesharakõi kiki. Anã mikikinoax faki kanakama. ¹⁶ Anã mĩ yonomati keskarama. Iskaratĩa mã Jesús Ifofaa. Nāskax oa mefe nanea keskara mã Jesús Ifofaa. Nāskai ã aõ noiai keskafakĩ, mĩ aõ noifinakitiro. Iskaratĩa anã oa mĩ yonomati keskarama. Mã isharakõia oa mĩ exto keskara, anã oa yora fetsa keskarama.

¹⁷ Nāskakē mĩ oa efe nanea keskaraxõ mĩ efeta Jesús Ifofai, ã mikiki nokoaino mĩ ekeki inimayanã mĩ ea ifitiro keskafakĩ, na Onĩsimõki inimayanã ifisharakõife. ¹⁸ Akka mia chakafaferatimãkĩ, askayamãkĩ mia nimifera-timãkĩ ea yoife ã mia kopifanõ. ¹⁹ Nānori ã mia yoi mia kirika kenexõ

fomayanã. A Onĩsimõ mia nimia ã mia kopifanõ ea chanĩmara fafe. Efe yorashta, mĩ ea nimia shinãfe. Mĩ ea kori nimiyamafekẽ ã mia Jesús meka yoiyamano mĩ Jesús Ifofakeranama afe nĩpaxakĩ. ²⁰ Efe yorashta, ã mia yoi nõko Ifoõxõ ea Onĩsimõ shara faxõfe. Efe õiti inimamasharakõife.

²¹ Mẽ tãpia a ã mia yoiai anori mĩ ea nikasharakõi. Askatari a ã mia kirika kenexona õikĩ a finõmainĩfofã mĩ ea axosharai. ²² Eẽ mia anã fetsari yoi. Mĩ ea Epa Nios kĩfixotitaifanõ. Mĩ askafaino ea karaxa mẽranoa kãimanafono ã mikiki samama nokotiro. Nãskakẽ ea mĩ pexe kene ano mĩ ea itipinĩ faxotiro, Niospa ea kãimanano ã ano oxaxinõ.

Mã Pablo mekai xatekĩ ato meka shara fomani

²³ Na Ipafras Cristo Jesúsnoa yoimis a yafi ea karaxa mẽra ikimatifo, aatori mia yoisharai. ²⁴ A efeta Jesucristo yoimis, fetsafori Marcos ikaino, Aristaroco ikaino, Demãs ikaino, Lucas ikaino, nã tiito mia yoisharakõikani mikiki inimakãkĩ.

²⁵ Nõko Ifo Jesucristo mato noikĩ mato kexesharakõipainõra. Nã tii ã mato yoi.

Èkĩa Pablo.

Jesúsnoa Yoikĩ Fětsa Hebreofo Kirika Kenexõ Fomani

Jesús afe Apaõxõ yoini. Nāskakē nō tāpitiro afe keskaramāki

¹ Efe yora mīshtichi, ẽ mato kirika kenexõ fomai mā tāpinõ Jesúsnoa. Taeyoi Epa Niospa afe meka nõko xinifo israelifo yoipaoni mēxotaima. Afe ājiriõnoa ato yoipaoni. Askatari afe namapa ato yoipaoni. Askatari afe meka yoimisfoxõ ato yoipaoni. ² Akka iskaratĩa noko yoia afe Fakeoxõ. Nāskakē nō tāpitiro Nios afe keskaramāki. Afe Fakeoxõ keyokõi nai mēranoafoya mai anoafoyari onifani. Nāskafata afe Fake katonĩ nai mēranoafoya mai anoafoyari nõko xanĩfo finakõia inõ. ³ Nāfi sharafinakõiaiki Apa Nios keskarakõi. Apa Nios afe keskaramāki noko õimani. Nāato keyokõi kexesharamis afe mekasharaõxõ. Askatari nokoõnoax nani nõko chaka noko soaxoxiki a keskara shara noko õi. Nāskakē nõko chaka anā shināima. Nāskata mā otoax nai mēra kani Apa fe xanĩfokõi ixiki.

Niospa afe ājirifo Jesús ato finõkõia

⁴ Nāskakē nō tāpitiro Niospa Fāke ājirifo ato finõkõia. Nāskax Niospa Fake xanĩfokõi Jesús. ⁵ Akka Niospakai afe ājirifo yoikĩ iskafamisma:

Māfi ẽfe Fakekõifokĩ. Ẽ māto Epaki, ato famisma. Akka afe Fake fisti yoikĩ iskafani:

Mĩ ẽfe Fakekõi. Nāskakē mĩ fisti āto xanĩfo finakõia ipanakaki, ixõ yoini. ⁶ Nāskaxõ afe Fakekõi mai ano nĩchini. Nāskata afe ājirifo yoini iskafakĩ:

Keyokõichi ẽfe Fake noikõikāfe. “Mĩ fāsi sharakõi,” ixõ yoikāfe. ⁷ Nāskata afe ājirifoõnoa yoikĩ iskafani:

Ẽfe ājirifo oa nefe koshi katiro keskara ẽ fai, ẽfe meka yoinõfo. Nāfori oa chii xoisai keskarrafo. Nāskakē nā ẽ ato yoiai keskafakĩ afara arisafatirofo, ixõ Niospa yoini. ⁸ Akka afianā afe Fakeõnoa yoikĩ iskafani:

Mĩ ea keskarari. Mĩri mĩ Nioskõi. Mĩ āto xanĩfokõi ipanaka. Mĩ keyokõi ĩkikõisharapakenaka. ⁹ Mĩ afara sharafo noikõimis, nā afara chakafo noikaspayanā. Nāskakē ẽ mia katonĩ mĩ āto xanĩfo inõ. Akka ājirifo ẽ ato inimamai. Akka ẽ mia inimamakõi, ixõ yoini. ¹⁰ Askata anā yoini,

Mĩri ea keskarakõi. Mĩ āto xanĩfokõi. Afaa oniyamatai mai yafi nai mĩ onifakĩ taefani. ¹¹ Nāskakē nāfo keyokõi mitokomexii. Akka mĩ fisti keyonakama. Nā rapati mā chapoax keyotiro keskai mai fe nai keyoxii.

¹² Rapati chapokē potatirofo fetsa fena shara fixikakĩ. Nāskarifiakĩ mai fe nai anā sharakēma mĩ anā mai yafi nai pāofakĩ keyotiro. Anā fenashara faxiki fenashara inõfo. Akka mĩ fetsatiroma. Mĩ fisti ipanaka, ixõ Epa Niospa afe Fake yoini. ¹³ Niospakai afe ājirifo yoikĩ iskafamisma:

Mā efe xanĩfo ikikai efe ketaxamei. Tsaokāfe, ixokai yoimisma. Akka afe Fake fisti yoini iskafakĩ:

Mĩ efe xanĩfokõi ikano nā mia noikaspaifāfe anā mia afeska fatirofoma mĩmāi keyokõi ato ĩkikē. Nā mia noikaspaifo mĩ ato ikĩxii, ẽ mia askafaino mĩ efe xanĩfokõi ixii,

ixõ yoini. ¹⁴ Akka Epa Niospa afe ājirifo yoini noko kexesharanõfo. Fatorafāferi Jesús Ifofaafomākĩ afe ipaxakakĩ. Nāskakē Niospa afe ājirifo yoini a Ifofaafõ kexesharanõfo.

Nāskakē nō tāpia ājirifo Jesús finõkõia.

2

Jesús nokoõnoax nanixakĩ noko imapakenakakĩ. Nãskakẽ kachikiri fayamakãfe

¹ Akka Cristo ãjirifo finõkõia. Nãskakẽ nã meka chanĩmakõi Niospa Fakeõnoa nõ nikasharakõitiro, na meka shara kachikiri fayamaxiki. ² Niospa ãfe ãjirifo nõchini ãfe meka yorafo yoitanõfo nõko xinifãfe nikasharanõfo. Akka nikasharayamaifono Niospa ato omiskõimani. ³ Akka taefakĩ Jesús yoiyoni nokoõnoax chipo naxiai, nõko chaka noko soaxoxiki nõ afe ãpaxanõ. Nãnori ato yoiaito nikakaxõ a afe rafemisfãfe noko yoinifo. Akka nõ Jesús Ifofaino, Niospa noko ifitiro. Akka nõ nikayamaino Niospa noko ifitiro. ⁴ Askatari Niospa afara fetsa fetsatapafo tsõa atiroma keskara ato ispapaoni aõxõ tãpinõfo ãfe meka chanĩmakõikẽ. Askatari ãfe Yõshi Shara ato mẽra naneni ato katoxõ nãfãfe yonokĩ fetsa fetsafakĩ yonoxonõfo. Nãskakẽ nõ Niospa meka chanĩmara fai.

Jesucristo nono mai anoax yorakõi ikiyoi oni, feronãfakekõi askafiax Nioskõi

⁵ Akka Niospa ãfe ãjirifo yoikĩ iskafanima: “Na mai fena anoax mã xanĩfo ixii,” ixõ yoinima. (Nãskakẽ nõ Jesúsnoa nõ shinãmakitiroma nãmã xanĩfofinakõikẽ.) ⁶ Akka na kirika kenekĩ David yoikĩ iskafani Niospa shinãmanaino:

Epa Niosi, keyokõi mĩ onifani. Akka nõkai afama. Nãskafekẽ mĩ noko noiyanã mĩ noko shinãmis, noko kexesharayanã. ⁷⁻⁸ Akka mĩ ãjirifãfe noko finõyonifo. Nãskafiano nono mai anoã mĩ noko xanĩfo ima. Nãskakẽ nã mĩ onifanifãfe noko nikakõitirofo mĩmã noko xanĩfo imasharakẽ, ixõ keneni. Akka keyokõi nã Niospa onifanifo nõ ãto xanĩfo itiro. Tsoa fetsakai xanĩfo itiro. Askafiano keyokõichi noko nikakanima. ⁹ Akka mã nõ tãpia Niospa noko noikĩ nono mai ano Jesús nõchini yorakõi inõ. Nãskakẽ ãfe ãjirifãfe Jesús finõyonifo. Akka mã nokoõnoax nai omiskõixõ noko chaka soaxokẽ. Epa Niospa xanĩfo finakõi imani, nãskaramã Niospa fichipaikĩ keyokõi noko noikĩ. ¹⁰ Epa Niospa keyokõi onifani aõnoax keyokõi inõfo. Nãskakẽ ãfe fakefo afe isharapakenakafo. Nãskaxõ ãfe Fake Jesús nõchini nokoõnoax omiskõiyonõ nõ afe ãpaxanõ. ãfe Fake fisti nokoõnoax omiskõitiro nõko chaka noko soaxoxiki. Nãato Apa Nios ika ari noko iyoano nõ afe ãpaxatiro. ¹¹ Akka Jesús ãfe Apa Nios nãri nõko Epa. Nãskaxõ noko chaka soaxona nõ a keskara shara inõ. Nãskaxõ rãfikima noko yoikĩ iskafatiro: “Nafõ ãfe fakefo,” ixõ noko yoitiro. ¹² Nã chanĩmara faafõnoã Jesús Apa Nios yoikĩ iskafani:

Epa Niosi, mĩõnoã efe yorafo ã yoisharaxii. Nãskakẽ ato fe mĩõnoax ã fanãixii, ixõ yoini. ¹³ Nãskaxõ anã yoikĩ iskafani:

Epa Niosi, ã mia chanĩmara faaki, ixõ yoini. Nãskafata anã yoikĩ iskafani:

Epa Niosi, nã ea chanĩmara faafõ mã mĩ ea inã ãfe fakefo inõfo, ixõ Jesús Apa Nios yoini. Nãskarakõi keneni David.

¹⁴ Nã fakefo apa fistichi ato fake fafiano nã yora fistiyata nã imi fistiya ikafo tsoa osiama. Nãskarifiã Jesúsri noko keskara yorakõi ipaoni. Yorakõi kãinixakĩ noko nãxonã Satanãs yõshi chaka nõko ifo iyamanõ anã noko namapakenõma. Nokoõnoax Jesús naitã Satanãs ãfe kerex xateni anã noko afeska faxima. ¹⁵ Akka Jesús nokoõnoax nayoamano yorafo nõ naira ikax ratekõipaonifo. Askafiano mã nokoõnoax Jesús naxõ noko chaka soaxona afe ãpaxanõfo. Nãskakẽ napai nõ anã ratetiro. ¹⁶ Akka mã nõ tãpia Jesúska onima ãfe ãjirifo afara ato axoyoi. Askatamaroko Abraham ãfe fenafo nã chanĩmara

faafo, Abraham chanĩmara fapaoni keskafakĩ chanĩmara faifono ato afara axosharayoi oni. ¹⁷ Akka Jesús noko keskara yorakõi ini. Nãskakẽ nã nõ meemis keskarari arifi meepaoni. Yorafãfe noikaspaifono meepaoni paekõi. Askatari mekafaifono, askatari chakafamapaiyaifono, meepaoni paekõi. Nãskakẽ nokoõnoa shinã. Noko potaxikima. Nãskakẽ Epa Nios noko kifixomis noko imasharanõ. Akka nã Jesús nokoõnoax nani nõko chaka noko soaxoxiki. Nãskakẽ noko Apa Nios kifixotiro iskafakĩ: “Epa Niosi, ẽ ato nãxonikĩ ato chaka soaxõfe nã ea chanĩmara faifo,” ixõ Apa yoitiro. Nãskaxõ noko Epa Nios kifixomis xanĩfokõi itiro. ¹⁸ Satanás Jesús chakafamapai. Akka Jesús omiskõifikĩ afaa chakafanima. Nãskakẽ nokori Satanás afara chakafamapaiyaito Jesús noko axosharatiro nõ afaa chakafayamanõ.

3

Jesús Moisés finõkõia

¹ Efe yora mĩshtichi, Epa Niospa mato katonĩ ãfe Fakekõifo mã inõ, nãskaxri mã afe xanĩfo inõ. Niospa Jesús nĩchini nokoõnoax nanõ. Akka nãatori Apa Nios noko kifixomis. Akka a ato Nios kifixomisfo Jesús ato finõkõia. Nãskakẽ Jesús shinãsharakõikãfe. ² Akka a Niospa Jesús yoini keskara, nãskara asharakõini. Nãskatari Niospa Moisés katonĩ israelifo Egipto mai anoa ato ifinõ, askatari ãfe meka shara ato yoinõ. Nã Niospa yoini keskarari Moisés asharakõini. ³ Akka Moisésnoa yoisharafitirofono, askatamaroko Jesúsnoa yoisharakõitirofo. Nã pexe sharaõnoa yoisharatirofono, askatamaroko nã pexe famisnoa yoisharakõitirofo. Nãskarifiakĩ Moisésnoa yoisharafitirofono akka Jesúsnoaroko yoikĩ finasharakõitirofo. ⁴ ã pexe itiroma. Akka nã pexe famisto atiro pexesharafakĩ. Nãskarifiakĩ Epa Niospa keyokõi onifani. ⁵ Akka Moisés Epa Niospa ãfe yonomati ini. Niospa yoini keskafakĩ, nãskarakõi ani. ãfe kaifo israelifo ato yoipaoni Niospa meka. Askatari ato kexesharapaoni. Askatari Egipto anoa ato ifixõ ato iyonĩ. Nã Moisés apaoni keskafakĩ õikĩ keyokõichi tãpikõitirofo Epa Niospa ãfe Fake nĩchiai afe yorafo ichapakõi ifinõ nai mēra afe ĩpaxanõfo. ⁶ Akka Jesúskaĩ Epa Niospa ãfe yonomatima. ãfe Fakekõi. Nãskakẽ afe yorafãfe ãto Ifokõi. Akka tsoamãki afe yorafo ẽ mato yoinõ. Nõ Jesús Ifofaxõ a noko yoiyoni keskafakĩ nõ manasharai nã anã oaitã, nõ kachikiri fayamax nõ afe yorakõi nõ iki.

Niospa fakefo aõnoax inimakõitirofo anã ãto õiti fekaxtenõma

⁷⁻⁸ Akka Niospa Yõshi Sharapa yoikĩ iskafani:

Epa Niospa mato yoiatĩ keskafakĩ nikasharakãfe. Mãto õiti kerexfayamakãfe Niospa meka nikakaspakĩ. Mãto xinifo keskara iyamakãfe. Mãto xinifo ẽ ifini Egipto anoa. Ẽ ato ifininõ tsõa istoma anoxõ ea nikasharanifoma. Askakimaroko Jesús mato yoiatĩ keskara nikasharakõikãfe. ⁹ Nã tsõa istoma anoxõ mãto xinifãfe ea nikakaspapaonifo nã tsõa õiyomisma ẽfe yonoshara ẽ ato ispafiaino. Ano afaamano a piaifo ẽ ato inãpaoni. Askatari ano fakamano, ẽ ato inãpaoni. Ẽ ato xinia ranã askafafiaino ea nikakaspapaonifo. ¹⁰ Nãskakẽ ẽ atoki õitifishkini. Nãskakẽ ẽ yoini iskafakĩ: “Ea nikatamaroko ãto õiti mēraxõ afara chaka shinãmisfo. A ẽ ato shinãmapaiyai keskarakai tsõa nikafoma.” ¹¹ Nãskakẽ ẽ atoki õitifishkikĩ ẽ atoõnoa yoini iskafakĩ: “Na israelifãfe ea nikakaspakani. Nãskakẽ a ẽ ato inimamapaiyai keskafakĩ ẽ ato axopakenakama,”

ixõ Epa Niospa nõko xinifoõnoa yoini.

¹² Efe yora mĩshtichi, õisharakãfe. Nõko xinifo keskara iyamakãfe. Mãto shinã mēraxõ mã Jesús chanĩmara fayamax chakakõi mã itiro. Mã askaikai

nã Nios nĩpanakãfe mã ipanakama. ¹³ Askatamaroko pena tii yoinõnãsharakĩ inimama faatanãkãfe nõko Ifoxõ shinãsharakõixikakĩ. Afara chakafãfe noko pãratirofoki nõ chakafanõ. Akka nõ nikaxõ nõ anã shinãsharatiroma. Nõko õiti chakakõi itiro. Nãskakẽ ato nikayamakãfe. ¹⁴ Akka nõ taefakĩ Jesús chanĩmara fakõini keskafakĩ eneyamax nõ afe ipaxatiro. ¹⁵ Akka nã kirika keneano iskakĩ ã mato yoinõ,

Epa Niospa mato yoiai keskara fisti nikasharafafãikãfe. Mãto xinifãfe

Epa Nios nikakaspakakĩ ãto õiti kerexkõi fapaonifo. Nãskakẽ ato keskara iyamakãfe. Mãto õiti kerex fayamakãfe. Nãskax nikayospa iyamakãfe, ixõ Niospa meka yoikĩ kenenifo.

¹⁶ Akka, ¿tsoafo Niospa tsekanimẽ Egipto mai anoa ãfe meka nikakaspakakĩ kachikiri faifono? Akka keyokõi nõko xinifo Moisés Egipto mai anoa iyoni. Nãfãfe Nios nikakaspapaonifo. ¹⁷ Akka, ¿tsoafoki Epa Nios õitifishkinimẽ cuarenta xinia mã akax? Nã nikakaspayanã afara chakafaiifoki ini. Nãskakẽ Epa Niospa tsõa istoma anoxõ keyokõi ato namapakeni. ¹⁸ Akka, ¿tsoafo Niospa yoinimẽ iskafakĩ? “A ã mato inimamapaiyai keskafakĩ ã anã askafapanakama,” ixõ yoini. Akka nã nikayospafo ato yoikĩ askafani. ¹⁹ Akka Epa Nioskai tsõa chanĩmara fanima. Nãskakanax a Niospa ato imapaiyai ano tsoa ikinima. Nãskakẽ tsõa anoxõ tenenima inimayanã.

4

¹ Akka Epa Niospa noko yoiyoni iskafakĩ: “Mã ea Ifofaino ã mato anã inimamatiro. Akka mã ea Ifofayamakẽ ã mato inimamatiroma,” ixõ noko yoiniki. Nãskakẽ keyokõichi nõ Ifofanõkãfe. ² Epa Niospa noko yoia: “Ë mato ifipai,” noko fani. Nãskarifikĩ Epa Niospa nõko xinifo yoikĩ iskafani: “Ë mato ifipai mato inimamapaixikĩ anã mã fekaxtenõma,” ixõ ato yoini. Ato askafafiaino tsõakai nikasharanima. Kaxpakõi Epa Niospa ato yoini. ³ Akka Niospa Moisés shinãmanaino iskafakĩ kirikaki kenekĩ yoini:

Ea nikayamaifono ã atoki õitifishkikĩ. Nãskakẽ ã ato fãsikõi yoia iskafakĩ:

“Mã ea nikayamaino ã mato mai shara fetsa ano imapakenakama anoax mã isharanõ,”

ixõ ato yoini. Akka Epa Niospa keyokõi onifani. Mã keyokõi askafakĩ fetsaxõ teneni. Nãskafakĩri Niospa fichipai afe yorafo isharanõfo anã fekaxteyamanõfo. Iskaratĩari afe yorafo isharamapai afe isharapakexanõfo. Akka nõa nõ Nios chanĩmara faino, Epa Niospa noko ifisharai nõ inimapakexanõfo.

⁴ Akka kirikaki Moisés keneni pena tenetiõnoa yoikĩ. Iskafakĩ keneni:

Seis nia yonokĩ Epa Niospa keyokõi onifani. Nãskaxõ pena fisti teneni, ixõ keneni. ⁵ Askatari anã kirikaki keneni, iskafakĩ yoikĩ:

Efe isharapakenakafoma,

ixõ kirikaki kenekĩ yoini.

⁶ Askafiano ranãri afe isharapakenakafo. Akka nã Niospa meka nikakaspaiifo afe ipanakafo. ⁷ Nãskakẽ Niospa shinãmanainori chipo David kirika kenekĩ yoini iskafakĩ:

Iskaratĩa Niospa meka nikakĩ mãto shinãmã shinãsharakãfe. Anorima shinãkakima, ixõ David yoini.

⁸ Mã Moisés naano, Josué israelifo iyoni Canaán mai ano isharanõfo. Nãskaifono Niospa iskafakĩ yoini: “Nã ea Ifofafo efe nai mẽra isharapakenakafo,” ixõ yoini. ⁹ Nãskakẽ mã nõ tãpia nõ Ifofaax, nõ afe isharapakenaka. Epa Niospa afe yorafo inimamasharapai isharapakexanõfo. ¹⁰ Epa Niospa keyokõi onifaxõ inimayanã teneni. Nãskarifiyai nõ Epa Nios ano kaax a nõ

iyopaoni keskara nõ anã itiro, Niospa noko inimamasharakõiaino. ¹¹ Akka fekaxfiano nõ Nios Ifofakõitiro afe isharapakexakĩ. Akka nõko xinifãfe nikayamaito Epa Niospa ato mai shara inãpaifikĩ ato inãanima. Nãskakẽ nõri ato keskara ipaima.

¹² Epa Nios nipanaka. Nãskarifiãfe afe meka keyonakama, mitsisipakõi. Akka keno ikikõichi nami potexõ afe xaki mẽra nõ õitiro. Nãskarifiãfe Epa Niospa meka fãsi finakõia. Afe meka shara nõ mẽra ikano aõxõ nõ tãpitiro nõ shara ikamãki askayamai nõ chakamãki. ¹³ Epa Niospa keyokõi tãpia nõ õtatiroma. A nõ afara shinãxõ nõ amis keskara keyokõi tãpikõia. Akka nõri tãpia a nõ amis keskara. Nãskakẽ nõ Nios pãratiroma.

A Nios ato kifixomisfo Jesús ato finõkõia

¹⁴ Akka Jesúsfi Niospa Fakekĩ. Askatari noko Nios kifixomis. Nãatofi a Nios ato kifixomisfo finõkõiaiki. Nãskax nai mẽra Nios ano kani. Nãskakẽ nõ kachikiri fatiroma nikakõisharayanã. ¹⁵ Nãatori meemis a Satanás noko afara chakafamapaiyai keskara. Nãskakẽ nãato tãpia a nõ meemis keskara fekaxkõi. Akka Satanás Jesúsri afara chakafamapai. Nãskafekẽ Jesús nikanima. Nãskakẽ nokori axotiro. ¹⁶ Nãskakẽ nõ Nioski ranokima nã nõ yoipaiyai keskara nõ yoitiro. Nõ yoiaito Niospa noko noikĩ noko afara axosharatiro.

5

¹ Ë mato yoinõ afeskax ato Nios kifixomis xanĩfo itirofomãki. Nã Niospa ato katoato nãato noko kifixonõ. Nã Niospa katoa noko keskara yorari itiro. Nãfi Nios noko kifixomis xanĩfo itiro. Nãskakẽ yorafãfe Epa Nios aicho fakakĩ a Nios ato kifixomisto afe xanĩfo afara inãmis atori Nios inãnõ. Askatari yorafãfe ato chaka soapaikakĩ nã yoinã ina fexomisfo retexõ ato koofaxonõ Epa Niospa ato chaka ato soaxonõ. ² Akka nãri noko keskarari nãatori afara chakafatiro. Nãskakẽ tsõa tãpisharayamakĩ, shinãsharakima afara chakafaino, nã xanifãfe tanaima isharaxõ ato axosharatiro. ³ Nãskaxõ yorafãfe nã yoinã inafõ inãino nãato retexõ koofakĩ Epa Nios ato kifixomis Epa Niospa ato chaka ato soaxonõ. Nãskatari ãri afe yoinã ina retexõ koofamis ari Epa Niospa chaka soaxonõ, a noko axomis keskafakĩ. ⁴ Akka ãkai tsoa katometiroma Nios ato kifixomis xanĩfo ixii. Nios fistichi ato katotiro Aarõn ani keskafakĩ. ⁵ Nãskarifiãfe Cristo aari katomenima Nios ato kifixomis xanĩfokõi ixiki. Akka Apa Nios fistichi yoini iskafakĩ:

Mĩ ãfe Fakekõi. Nãskakẽ mĩ fisti ato xanĩfo finakõia ipanakaki, ixõ yoini. ⁶ Askatari anã iskafakĩ yoini:

Mĩfi ato Nios kifixomis xanĩfo ipanakaki, nã xanĩfo Melquisedec ipaoni keskara, ixõ Apa yoini.

⁷ Jesús nono mai ano ikax, mã chaima naxiki omiskõikõini. Nãskaxõ fãsikõi mekayanã oiayanã Apa kifini iskafakĩ: “Epa, mĩ keyokõi tãpia. Ea mã ifipaikĩ ea mã ifitiro ã nanõma,” ixõ yoini. Mẽxotaima nã Apa amapaiyai keskara fisti shinãkĩ Jesús afe Apa nikakõini. Nãskakẽ afe Apa tenemakõini axosharakõianã omiskõiaino. ⁸ Akka Jesús Niospa Fakekõifiax omiskõini. Omiskõifikĩ Apa nikakõini. ⁹ Nokoõnoax omiskõifikĩ Apa Niospa yoiai keskara nikakõini. Nãskaxõ a nikaifo ato ifipakexakĩ. Nãskax noko ifimis sharakõi imis. ¹⁰ Epa Niospa afe Fake Jesús katoxõ yoikĩ iskafani: “Mĩfi nã Melquisedec keskara ikikai. Nãskakẽ a ea ato kifixomisfãfe ato xanĩfokõi mĩ ipanakaki ato ikipakexakĩ. Nãskaxõ a eõnoa ato kifixomisfo xanĩfofori mĩ ato finõkõinifõfanakĩ,” ixõ Apa yoini.

Õisharakõikãfe. Mã Jesús kachikiri faa fãsi mesekõi itiroki

11 Ĕ mato yoia Epa Niospa Jesús katoa a noko Nios kĭfixomis afe xanĭfo finakōia ixii. Akka nāōnoa Ĕ mato fetsa yoisharapai. Nāskakē Ĕ mato anā yoisharatiroma māmāi fenāmāshta tāpiaino. 12-13 Akka mā Niospa meka nikakĭ mā mā xinia ranā aka. Nāskakē tāpikōixō mā ato yoikerana. Akka mākai tāpisharama. Akka a mā taefakĭ Niosnoa mā ato yoiyoni mā mā shināmakia. Nāskakē mato anā tāpimanōfo mā ato fenai. Nā fake yome chocho afiai yosiaima keskarakōifo, mā. Akka fake yomēkai afaa piyotiroma. Nāskarifiakĭ māri Niospa meka tāpisharaima. Nāskakē mā tāpiana fato sharamākĭ fatofori chakamakĭ. 14 Akka nō pena tii Niospa meka ōifafāikĭ nō tāpikōiax isharakōitiro māmāi nō tāpiax fato sharamāki, fatofori chakamāki.

6

1 Akka nōkai fakefo keskarama. Fakefāfekai afaa tāpisharafoma. Akka nōroko tāpisharakōia. Akka fetsa Ĕ mato yoipai a Ĕ mato yoiyomis keskara anā Ĕ mato yoima. Mā nō tāpia a nō afara chakafamis. Nāskakē nō rāfikōiyānā nōko chaka shināmakitiro. Nāskaxō nō Nios Ifofaino noko chaka soaxotiro nō afe ĩpaxanō. 2 Mā nō tāpia noko fĕtsa maotisafaino keyokōi tāpitirofo mā nōmāi Nios Ifofaino. Askatari nō tāpia noko Nios kĭfixoyanā āto mifi noko māmātirofo Niospa Yōshi Sharapa noko imasharanō. Nāskatari mā nō tāpia nō Jesús Ifofaax nō naax nō anā otoxiai. Akka a Jesús nikakaspamisfo Niospa a omiskōipakenakafo mĕra ato potaxii. Nāskakē nāfo mā nō tāpikōia. 3 Nāskakē a Niospa fichipaiyaino afara fetsafori nō tāpitiro.

4 Nāskakē nō Jesucristoōnoa meka shara nikaxō chanĭmara faax mā naax Nios fe nō ĩpaxatiro. Nāskatari Niospa Yōshi Shara noko fe iki. 5 Nāskakē nō Niospa meka tāpisharakōiaino a Niospa afara shara noko yoiai nō atiro. Askatari Niospa afara sharafo noko famapai afara sharafo nō atiro, āfe Yōshi Sharaōxō. 6 Nāskakē keyokōi nō afo tāpifixō nō Niospa Fake kachikiri faxō chakafakĭ mekafaxō, nō anā Ifofatiroma mā nōmāi chakafaxō a noko Ifimis. Anā tsōa noko ifitiroma. 7 Akka Ĕ mato yoinō nikakapo. Oi ikaino mai mechanatiro. Nāskakē tare anoax fanafo foaisharatiro. Nāskakē a tare yonomisfo inimatirofo fanafo foaisharaino Niospamāi imasharaino. 8 Akka nā tare fetsa chaka anori oi ikaino, fanasharafo foaitiroma. Moxa chakafo fisti foaitiro. Nāskakē koofatirofo nā fanachakafo kooi mitokomenō. Nāskarifiakĭ fĕtsa Niospa meka shara nikafafāifikĭ Nios chakafakĭ mekafaito nā keskarrafo Niospa nā omiskōipakenakafo mĕra potaxii. Nō tare shara keskarakē Epa Nios nokoki inimatiro. Akka nō tare chaka keskarakē Epa Nios nokoki inimatiro. Nāskakē noko omiskōimaxii.

Akka mā nō tāpia nō Jesús chanĭmara faax nō isharakōitiro

9 Efe yora mĭshtichi, mĕ matoōnoa tāpisharakōia. Mākai ato keskarama. Akka Jesús Ifofaax oa mā fāi kai keskara mā Nios ari kai. 10 Akka Epa Nios sharakōi. Afaa chaka shināmismo. A mā sharafamis Epa Niospa tāpia, shināmakima. Askatari mā Nios noikĭ a chanĭmara famisfo mā ato axosharamis. Nāskakē Epa Nios shināmakima. 11 Akka Epa Nios kachikiri faxoma a mā akai keskararifakĭ, ato sharafakĭ mĕxotaima Ifofasharakōikāfe, “Nioski nokoaitĭa nō afe isharapakexakĭ,” shinākōikĭ. 12 Akka Epa Niospa meka shināmakiyamakāfe. Epa Niospa fetsafo yoini iskafakĭ: “Mā ea Ifofakĭ mā ea manasharaito Ĕ mato afara shara ināxii,” ĩxō ato yoini. Nāskarifiakĭ māri manasharakāfe, Jesús kachikiri faxoma. Māri afara shara fixikakĭ.

13-14 Niospa nōko xini Abraham yoiyoni iskafaki: “Ĕkĭa mĭ Nios. Ea tsōa finōtiroma. Ramashara Ĕ chanĭmismo. Ĕ mia yoinō mĭ tāpisharakōinō. Ĕ mia axosharakōikai mĭ fenafo ichapakōi inōfo. Akka mĭkai ato tanātiro. Mā fenafo mĭ ichapakōikē,” ĩxō Niospa Abraham yoiyoni. 15 Nāskakē Abraham

fena fenakima manakōipaoni. Nā Niospa yoiyoni keskarakōi fakī Abraham āfinī fake fini. Āfe fake Isaaca. ¹⁶ Akka fētsa noko yoikī iskafatiro: “Ē mia pārāima ēfe xanīfāfe mā ea ōi. Nāskakē nā ē mia yoiai keskara ē mia axoxii,” ixō noko yoitiro. Nāskakē nō tāpitiro nokokairoko pārāito. ¹⁷ Nāskarifiakī Niospa noko tāpimapai āfe meka chanīmakōi. A noko yoiyoni keskara afeskaxō anā fetsafatiroma. Nāskaxō ato yoini iskafakī: “Ē Nioskōi. Tsōakai ea finōtiroma. Nāskakē nā ē mato yoiai keskafakī mā ea chanīmara fatiro,” ixō ato yoini chanīmara fanōfo. ¹⁸ Chanīma Niospa a noko yoiyoni keskara mā noko ōimasharakōia mā nō tāpia. Nāskakē noko pārātiroma. Noko yoini iskafakī: “Ēfe Fake ē matoki nīchixii māto chaka mato soaxonō mā efe ipaxanō,” ixō noko yoini. Nāskakē nō chanīmara fai nā noko yoiyoni keskara āfe Fakeōnoax Epa Nios ano nō afe ipaxatiro. ¹⁹ Nāskaxō anā afaa fetsa nō shinātiroma. Nios makinoakai tsōa noko potatiroma. Nāskakē Epa Nios fe nō ipanaka. ²⁰ Jesús nai mēra kani nō aōnoax chipo kanō. Nārixō xanīfokōixō noko Apa Nios kīfixōfafāini Melquisedec ipaoni keskaraxō.

7

Nā Melquisedec yorafo Nios kīfixomis ipaoni

¹ Akka Melquisedecnoa ē mato yoinō afe keskara ipaonimāki. Melquisedec xanīfo ipaoni pexe rasi āfe ane Salem anoax. Askatari ato Nios kīfixomis ipaoni. Nā cuatro xanīfofo yometso chakafo ato īchoxō Abraham āfe pia ifitani, afama mīshtifoya oaino, nā Melquisedec Abrahamki nokoni. Nāskata Melquisedec Abraham Nios kīfixoni axosharanō. ² Askafaito ōikī Abraham Melquisedec nā afama mīshti fitanai ranāri ināni. Nā Melquisedec āfe ane “Asharakōimis,” famisfo. Nā Salem pexe rasi anoax xanīfo ipaoni. Nā Salem āfe ane “Isharakōi,” fapaonifo. ³ Nā Melquisedec āfe epa yafi āfe efa nō tāpiama. Āfe xiniforikai nō tāpiama. Askatari nō tāpiama a fake kāinitīa. A nanitīari nō tāpiama. Nāskakē nō Melquisedec shinākī Niospa Fakeri nō shinātiro. Nāato noko Niosnoa kīfixomis xanīfo ipanaka.

⁴ Efe yora mīshtichi, shinākapo. Melquisedec xanīfokōi ipaoni tsoa keskarama. Akka Abraham israelifāfe taefenai āto xini iyopaoni. Abraham sharakōi ipaoni. Askafixō Abraham Melquisedec afama mīshti ināni āfe afaayamafekē. Akka Melquisedec xanīfo finakōia ini Abraham sharafiano. ⁵ Israeli xoko fetsafo Levī āfe fenafo Epa Niospa katonī. Nāfāfe āto kaifo Epa Nios kīfixopaonifo. Nāskakē Moisés yoini keskafakī nā ato Nios kīfixomisfo kori fisti rasi ato ināpaonifo. Askatari āto afama mīshtifori ato inānifo āto kaifāfe. ⁶ Akka Melquisedec Levī āfe fenayamafiano Abraham āfe afama mīshtifo fetsa fetsatapafo ināni. Nāskakē Melquisedec Abraham yoini iskafakī: “Abraham, mia Niospa axosharai,” ixō yoini. ⁷ Chanīma, keyokōi nō tāpikōia fētsa ato finōkōixō āfe mekapa ato shara fatiro. Nāskakē nō tāpia Melquisedec Abraham finōkōia. ⁸ Nāskakē nā israeli xoko fetsafāfe nā Levī fenafo afama mīshti ato ināfinifono nāfo mā nai keyonifo. Akka Melquisedec Abrahamnā afama mīshti fini. Akka Niospa meka yoikī kenenifo Melquisedec iskaratīa nia keskara. ⁹⁻¹⁰ Levī fenafāfe āto xini Abraham ipaoni. Nāskaxō Abraham Melquisedec afarafo ināino Levīfāfe akairi ināi keskafanifo. Nō tāpiama afetīara nani. Nāskakē nia keskara nō famis. Nā Abraham Melquisedec afarafo ināitīa Abraham āfe fena Levī anokai fakeama ini. Chipo Levī fakeni. Nāskakē nō tāpitiro Melquisedec fistichi āto xini Abraham yafi ato finōkōia.

¹¹ Efe yora mīshtichi, shinākapo. Epa Niosxō Moisés noko yoini keskafakī Levī fenafāfe noko Nios kīfixomisfāfe noko ifitirofono Niospa āfe Fake nīchikeranima Apa Nios noko kīfixomis inō. Cristokai Levī āfe fena Aarón

keskarama. Nā Cristo Melquisedec keskarakōi. ¹²⁻¹⁴ Akka tae fenai Leví āfe fena Aarón ini. Nā Aarón yorafo ato Nios kīfixomis ini fetsafāfe āto xanīfo. Akka nōko Ifo Jesús kai Leví āfe fenama, xoko fetsa ini. Nāskax Aarón keskarama. Akka nōko Ifo Jesús Judapa fena. Nā Levipa chipoko Judá. Akka, “Judapa yorafāfe yorafo ato Nios kīfixomisfo itirofora,” ixō Moisés yoinima. Askafiano Niospa āfe Fake Jesús nīchini yorafo ato Nios kīfixomis inō. Nāskatari a Moisés yoini keskara Epa Niospa fetsafani.

¹⁵ Nāskakē anā ē mato mēstekōi yoisharapai. Iskaratīa xafakīakōi nō tāpishara Nios afara fetsa yoini keskara noko Nios kīfixomis āfe fena Jesús, Melquisedec keskara nokoki nokoni. ¹⁶ Akka Moisés yoini keskarakōi Leví āfe fenafo fisti ato Nios kīfixomisfo itirofoki. Jesús kai Leví fenaxoma a Moisés yoini keskaraōnoax noko Nios kīfixomis itiroma. Askatamaroko Niospa Jesús katonī noko kīfixomis inō. Āfe sharaōxō Epa Niospa Jesús otofani. Anā nanakama. Nāskax noko Nios kīfixomis ipanaka Niospa sharaōxō. ¹⁷ Nānori Niospa yoiyoni David Jesucristoōnoa kenekī iskafani:

Mī Melquisedec keskara. Nāskaxō mī yorafo Nios kīfixomis ipanaka, ixō kenenī. ¹⁸⁻¹⁹ Nāskakē a Moisés yoini keskarakai nō anā ifofaima. Nokokai imasharatiroma. Askatari nōko chaka noko soaxomisma nō Nios fe ĩpaxanō. Akka Jesús āfe meka askarama. Āfe meka sharafinakōia. Epa Niospa Fake nokoki nīchini aōnoax nō afe ipanaka.

²⁰⁻²¹ Akka Epa Niospa āfe Fake yoini keskafakī kai Leví āfe fenafo anori yoinima. Niospa yora shināmanaino iskara kenenī, Niospa āfe Fake Jesús yoikī iskafani:

Na meka ē mia yoiai chanīmakōi. Nāskakē ē anā fetsapakenakama. Ē yorafāfe āto Ifokōi. Nāskakē a ē mia yoiai keskafakī yorafo mī ato ea kīfixomis ipanaka,

ixō Epa Niospa āfe Fake yoini. ²² Akka Apa Niospa nānori yoinikē nō tāpitiro Jesúsnoax Nios fe nō ipaxatiro. Akka Moisés meka askarama. Aōnoax Niospa yorafo nō itiroma. Akka Epa Niospa Moisésxō Leví āfe fenafo yoini keskara sharafiano akka āfe Fake Jesús yoini keskara sharafinakōia.

²³ Akka a āto kaifo ato Nios kīfixomisfo ichapafofiax afo natirofo. Tsoa nīpaxatirofoma. Mā fetsa nano fetsari katotirofo atori āfe yorafo Epa Nios kīfixomis inō. ²⁴ Akka Jesús kai ato keskarama. Nāfi nīpanakakī nāato noko Epa Nios mēxotaima kīfixomis ipanaka. ²⁵ Nāskakē Apa Niosxō noko ifitiro nō afe ipaiyaito nokoōxō Apa Nios yoifafāini iskafakī: “Epa Niosi, ē ato nāxoniki, ato chaka soaxōfe. Nāskaxō a mī ika ano ato imafe,” ixō nokoōxō Apa yoimis. Nāskakē a nokoōnoa Apa yoia keskafakī noko nāskakōi faxoxii nō afe ĩpaxanō. Nāskaxkai nō fenopakenakama.

²⁶ Akka nā Jesúsfi noko Nios kīfixomis xanīfokōikī. Apa Nios keskara sharafinakōia. Fetsafo finōkōia. Tsōakai aōnoa afaa chaka yoitiroma. Aatokai afaa chaka shināmisma yora chakafo keskarama. Nāskaxō Apa Nios ika anoafari ato finōkōia. Nāskaxō a nō yopaifo noko axosharatiro. ²⁷ Akka a ato Nios kīfixomis xanīfo fetsafo keskarafoma. Taefakī afāfe pena tii yoinā ina retepaonifo Epa Nios inākakī ato chaka soaxonō. Nāskakē Niospa mā ato chaka soaxonano yora fetsafāferi ato yoinā inafō inānifo, atori Epa Niospa chaka soaxonō. Akka Jesús kai ato keskarama. Jesús ato finōkōia. Nāskakē Jesús nai fistini noko chaka soaxonano Epa Nios fe nō ipaxatiro. ²⁸ Akka Epa Niosxō Moisés yoini keskafakī yorafoōnoa Epa Nios ato kīfixomisfo inōfo āto xanīfofo katonifo. Akka nāfofi noko keskarafari nāfāferi afara chakafamisfo. Nāskakē Niospa yoiyoni keskafakī āfe Fake Jesús chipo katonī nokoōxō Nios kīfixomis ĩpaxanō. Aatokai afaa chakafamisma. Isharakōimis.

8

Epa Niospa meka fenasharakōi yoini Jesús noko nāxonō nōko chaka noko soaxoxii

¹⁻² Akka nā sharafinakōia nō yoiai nāfi Apa Nios xanīfokōi ika ari afe ikaki. Nāskakē nō afara yoipaiyaito nokoōxō Apa yoipakenaka. Nāatofi noko Apa Nios kīfixomis xanīfokōikī. Nāskakē a ika arikai tsōa afaa fetsa onifanima. Akka Nios fistichi onifani. Nāskakē ariax Apa fe nokoōnoax mekakakāini. Nā ika ari nai mēra anoa a anoxō Nios kīfiti pexefā keskarakōifiax finakōia. Nāskakē nā ē mato kenexona keskara xafakīakōi mā tāpitiro.

³ Nā ato Nios kīfixomis xanīfokōi inōfo Niospa ato katonī afarafo yorafāfe Nios inākata finōfo. Askatari yoinā ināfo fixō retekaxō koofaxō ato kīfixonōfo āto chaka ato soaxonō Niospa ato katonī. Nāskakē nā Jesús, noko Nios kīfixomisto, nāatori Nios ināni. Yoinā ina inānima. Askatamaroko āa noko nāxonī nōko chaka noko soaxoxiki. Āfe Āpa amapaiyai keskara ani. ⁴ Moisés yoini keskafakī Levī āfe fenafos israelifāfe ato Nios kīfixomis itirofo yoinā retekaxō ato Nios ināxoxikakī Niospa ato chaka soaxonō. Akka Jesúskaī Levī āfe fenama. Nāskakē Jesús nono mai ano ixō nokoōxō Apa Nios kīfimis ikeranama. Akka nai mēra ixō noko kīfixomis, Niospa ato katoano. ⁵ Akka nono mai anoxō nā Levī fenafāfe a anoxō Nios kīfiti karapa pexe mēraxō yonopaonifo. Nānoxō āto kaifo israelifo tāpimapaikakī Nios ika ari afe keskaramākī tāpinōfo. Askafixō askarakōi tsōa tāpiyonima. Nāskakē Epa Niospa Moisés yoini iskafakī karapa pexe fayomanō: “Ē mia yoiai keskafakī a anoxō ea kīfiti karapa pexe fafe. ¿Mā mī shināimē ē mia machi anoxō tāpimana keskara nāskakōi fafe karapa pexe fakī? Nāskakē a yonomisfo tāpimafe nā ē mia yoiai keskarakōi fanōfo,” ixō Epa Niospa Moisés yoini. ⁶ Akka Niospa āfe Fake Jesús yoini keskarato a Moisés yoini keskara finōkōia. Nāskakē Jesús Apa ika arixō nokoōxō Apa Nios kīfifafāini. Akka Levī fenafāfekai askafapaonifoma. Epa Niospa āfe Fake Jesús yoiyoni keskarakōi ato yoimisma. Akka nā ato yoiyoni keskara sharafiano nā āfe Fake Jesús yoini keskararoko sharafinakōia.

⁷ Niospa Moisés yoini keskara nō nikasharakōixō nō afara chaka nō fakeranama. Akka nō nikasharakōima. Nāskakē Epa Niospa aōxō noko ifitiroma. Nāskakē noko fetsa yoini iskafakī: “Ēfe Fake ē nīchixii mato nāxonō mato chaka soaxonō. Mā Jesús Ifofaino ē mato ifixii,” ixō Epa Niospa yoini. ⁸ Akka Epa Niospa Moisésxō yoini keskarakai tsōa askara nīkasharakanamax nōko xinifo nikayospakōi inifo. Nāskakē nōko Ifo Niospa yoini iskafakī:

Ē chipo na efe yorafo israelifo yafi Judapa āfe fenafo meka fena shara ē ato yoixii. Nā ē ato sharakōi axōai keskara ē ato ōimaxii. ⁹ Ē āto xinifo Egipto anoa iyoni. Nāskaxō ē ato yoisharani ēfe meka nikasharaiāfe ato kexesharafafāixikī. Ē ato yoisharafiaino ēfe meka kachikiri fanifo. Nāskakē ē ato potani. Akka a āto xinifo ē ato yoini keskarakai ē āto fenafo askara ē yoixiima. Askatamaroko ēfe meka fena shara ē ato yoixii ea nikasharanōfo. ¹⁰ A ē israelifo yoixiai kene fistiōxō ē ato tāpimaxima. Askatamaroko āto shinā mēra ēfe meka shara ē nanexii āto ōiti mēraxō a kirika kenea keskara sharaōxō shināsharanōfo. Nā ē ato yoiai keskakōixii shināsharaxikani. Nāskakē ē āto Epa Nioskōi ixii. Akka afo efe yorafo ixikani. ¹¹ Akka anā fisti rasichi ato tāpimaxikanima. Keyokōichi ea tāpixikani. Yorafo afamafāferi ea tāpiaifono, xanīfofōfāferi ea tāpikōixikani. Nāskakē anā eōnoa tsōa ato tāpimaxima akōi keyokōichi mā ea tāpikōiafono. ¹² Ē ato chaka soaxoxii afara chakafafiaifāfe. Nāskaxō a afara chakafamisfo ē anā shināpakenakama,

ixõ Niospa yoini. ¹³ Nāskakē Niospa anã ato yoini iskafakī: “Meka fena shara ē mato yoinõ,” ixõ ato yoini. Akka a Moisés ato yoini keskarakai anã tsõa shinãtirioma. Nã Moisés ato yoini keskara meka xinikõi. A mekakai anã tsõa shinãpakenakama. Nāskakē nã meka shinãmakipakenakafo.

9

Karapa pexe kene fetsa mēraxõ Epa Nios ato kīfixopaonifo. Akka iskaratīa Jesús noko kīfixomis Apa Nios ika arixõ

¹ È mato yoinõ afe keskara yorafo ipaonifomakī. Akka Epa Niospa Moisés yoini afeskaxõ nono mai anoxõ afe yorafo ato Nios kīfixotirofomākī Niospa ato chaka soaxonõ. Akka karapa pexe fanifo a mēraxõ Nios kīfinõfo. ² Akka a karapa pexe fanifo mēra kene rafe ini. Nã kene rekētana mēra siete rāpari oro ootatia metax keskara ini. Askatari mīsari a mēra ini. Nã mīsa kamaki mēxotaima doce pāa fapaonifo. Nã kene rekētana anenifo iskafakakī: “Nios chaimashta ika,” ixõ anenifo. ³ Akka karapa pexe fanifo mēra sama namikõi nakirafekõi potexõ xītia ini. Nã kene chikaya anenifo iskafakakī: “Nono Nios ikõina,” ixõ anenifo. ⁴ Nã kene rekētana ketaxamei mīsa kafāshara oroya taxta fanifo ini. A kamakixõ nakas potoshara kooati ipaoni. Nāskatari kene chikaya fetsa mērari kafo oroya taxtafanifo ini. Nã kafo mēra pāa keskara āfe ane mñnã kecho oro mēra nanea ini. Akka Aarón āfe chatiri nã kafo mēra naneyoamano Niospa nã Aarón āfe chati charofo onifayoni. Nāskata Aarón āfe chati chipo kafo mēra naneni. Nāskatari Niospa Moisés āfe meka makexki kenexõ inãni nikanõfo. Nã makex para Niospa mekaya nã kafo mēra nanea ini. ⁵ Nāskakē nã kafo māmākīa Niospa āfe ājiri keskara raferi nia ini. Āto peta rafeta kafo fepoafõ keskara ini. Nāskakē nã Niospa āfe ājiri keskara rafeoxõ nõ tãpitiro Nios fãsi sharakõikē nõko chaka noko soaxomis. Askafiano akka nãfoõnoakai ē mato iskaratīa yoitiro.

⁶ Nāskakē nã Nios kīfiti karapa pexe kene rekētana mēra a ato Nios kīfixomisfo mēxotaima ikipaonifo anoxõ nakas potoshara koofaino ato Nios kīfixoxikaki. ⁷ Akka a kene fetsa mērari tsoa ikitiro ma ipaoni. Nã ato Nios kīfixomis xanīfo finakõia fisti ikipaoni. Xinia fisti ata ikipaoni. Nāskatari imimais ikipaonima. Yoinã imiya ikipaoni nã imi Epa Nios inãxikī āfe chaka soaxonõ, askatari afe yorafori ato chaka soaxonõ. ⁸ Nāskakē Niospa Yōshi Sharapa xafakīa noko tãpimani. Akka nã karapa pexe iyoano āfe kene fetsa mēra tsoa ikipaonima. Nã ato Nios kīfixomis xanīfokõi fisti ikipaoni Nios fe mekaxiki. Yorafo Epa Nios fe mekayoxoma, Nios ato kīfixomis xanīfo fisti yoiyopaonifo. ⁹ Nāskakē nã ipaonifoõna iskaratīa noko shinãmatiro Moisés ato yoini keskafakī. Karapa pexe ano yoinã ina retexõ inãpaonifo Niospa āto chaka ato soaxonõ. Askafikanax isharapaonifoma afara chakafakaxõ shinãtaifapaonifo. ¹⁰ Akka Moisés ato yoini keskafakī a ato Nios kīfixomisfāfe nāskakõi fanifo. Nāskaxõ afara shara fetsafori ato tãpimani Moisés meka. Afara pita, afara ayata mñ fatiro ato fani. Askatari afaari mñ pitiro ma, afaari mñ ayatiroma ato fani. Askatari ato tãpimani afeskax mechokometirofomākī Epa Niospa ato nikakõinõ. Akka askafiaifono afāfekai ato chaka soaxokõitirofoma. Cristo oyoamano nãnori Niospa ato yoiyoni. Nã Cristo naitīa aõxõ keyokõi Niospa fetsafani. Nāskakē nõ Jesús Ifofaino, Niospa nõko chaka noko soaxotiro. Nāskakē a Moisés yoini keskara anã tsõa ifofasharatiroma āfe chaka soapaikī.

¹¹ Akka Cristo mñ anã nai mēra kaax, noko Nios kīfixomis xanīfokõi ini. A Niospa noko yoiyoni keskara noko inãmis. A karapa pexe anoxõ a ato Nios kīfixomisfāfe ato Nios kīfixopaonifo yorafāfe anifo. Akka Jesús noko kīfixomis ano shara finakõia Nios fistichimãi nai fanino. ¹² Akka Cristokai karnīro imi fota fakka fakeshtari fonima. Askatamaroko nokoõnoax nakī āfe imi foax ikisi

Apa Nios ari kani. Nāskaxkai anā Jesús nanakama. Nāskaxō nōko chaka noko soaxonano āfe Apa Nios ari nō katiro. ¹³ Akka chanīma, karnīro yafi fakka retexaxō āfe imi fīkaxō nā karnīro koofakaxō āfe chii mapoya nā imi osikaxō saa saa anifo Epa Niospa ato chaka soaxonō anā choshta keskara iyamanōfo. ¹⁴ Akka Cristokai afaa chakafamisma. Nāfi sharafinakōia. Niospa Yōshi Shara a nīpanakato Jesús shināmani. Nāskakē Apa yoini iskafakī: “Epa, ē atoōnoax naikai. Nāskakē ēfe imi foano eōxō mī āto chaka soaxotiro mefe yorafo inōfo,” ixō Apa yoini. Akka a nō Nios inimamapaikī nō shināpaoni keskara nō anā shināima. Akka iskaratīa nō Nios inimamapaikī nō nikasharakōitiro. Nā Nios nīpanaka sharafinakōia.

¹⁵ Akka a Moisés ato yoini keskara sharafiano tsōa nikapaonima. Afara chakafapaonifo. Nāskakē nā afara chakafapaonifo keskara Cristo fistichi ato chaka soaxotiro. Akka a Moisés yoipaoni keskara anā ato yoitiroma. Nāskakē Cristo oni nokoōnoax naiyoi nōko chaka noko soaxoxiki nō Nios fe ipaxanō. Nāskakē Niospa noko yoini iskafakī: “Ekeki fekāfe ēfe Fakeōnoax efe yorafo ixikakī,” ixō noko yoini. Nāskaxō a noko yoiyoni keskara noko ināxii. ¹⁶⁻¹⁷ Iskaratīa afara fetsa ē mato yoinō mā tāpinō. Nō nayoxoma nō yoitiro iskafakī ato yoikī: “Ē naano tsōa ēfe afarafo fīmākai ikisi ē mato tāpimayonō,” ixō nō yoitiro. Nāskakē nā nō yoiyomis keskafakī nō nayoxoma nōko afarafo fetsafo ināpaikī nō yoitiro. Akka nō nayoamano nōko afarafo tsōa fena fitiroma. ¹⁸ Nāskakē Niosxō Moisés afe yorafo yoini āto yoinā inafō reteafono imi fonō. Akka a yoinā inafāfe imi foyamaino a ato yoiyoni keskafakī Niospa ato chaka soaxotiroma. ¹⁹⁻²⁰ Taefakī Epa Niospa shināmanaino Moisés israelifo keyokōi ato yoini nikanōfo. Mā ato yoikī mitoxō, nā ifi hisopo āfe pōya pishta fini. Mā fixō fakka fake imi yafi oveja imi fakkaya osini. Nāskaxō ifi hisopo pōya pishta fixō oveja raniya texkeani. Nāskata nā ifi hisopo pōya pishta texkeata fakka fake imiki momo momo axō nā Niospa meka kirikaki kenea a Niospa yoiyoni keskafakī fakka imi saa saa ani. Askatari yorafokiri fakka imi saani. Ato yoikī iskafayanā: “Na imioxō mā tāpitiro Epa Niospa noko yoiyoni keskara axii. Nāskax nō afe yorafo itiro,” ixō Moisés āfe kaifo yoini. ²¹ Nāskatari nā karapa pexe a mēraxō Nios kīfiti Moisés imī saa saa ani, askatari a mēranoafori keyokōi imī saa saa ani. ²² Chanīma, nā Epa Niospa Moisés yoini keskafakī Moisés imi saakano karapa pexe anoafō keyokōi ato chaka soaxona. Akka imi foyamaino noko chaka soaxotiroma. Anā ano fato fetsama nōko chaka noko soaxotiro.

Cristo nōkoōnoax nani noko chaka soaxoxiki

²³ Nā anoxō Nios kīfiti karapa pexe mēranoa keskarakōifo Nios ika ari. Nāfoki ato Nios kīfixomisfāfe yoinā imi saanifo Niospa afo ōisharanō. Akka a karapa pexe mēranoa imifo sharafiano afāfe nōko chaka noko soaxotiroma. Askatamaroko nā Cristo nokoōnoax nai fistini nōko chaka noko soaxoxiki. Noko chaka soaxonano Nios ika ari nō katiro, a keskara shara afe ipaxakī. Askatari anokai a anoxō Nios kīfiti karapa pexe keskarama. A Nios ika ano sharafinakōia. ²⁴ Akka yorafāfe karapa pexe fanifo anoxō Nios kīfinōfo. Nāskakē a mēra a Nios nai mēra ika keskarakōi ipaoni. Akka Cristo mā otoax a karapa pexe fanifo mēra ikinima. Askatamaroko Apa ari nai mēra kani. Nāskakē iskaratīa ari afe ika noko Apa Nios kīfixōfafāixiki. ²⁵ Akka nā ato Nios kīfixomis xanīfo karapa pexe kene fetsa mēra ares fisti xinia fisti akax ikipaoni a mēraxō Nios kīfixiki. Āfe imikōiya a mēra ikitamaroko, yoinā imiya ikipaoni. Akka Cristokai ato keskarama. Akai mēxotaima natiroma, nai fistini Apa Nios ari kaxiki. ²⁶ Akka askakatsaxakī Cristo nokoōnoax nai ranā ranākerana nā Niospa mai onifanichāi. Akka askamisma. Jesús nai fistini ikisi noko

keyokōi chaka soaxoxiki. ²⁷ Akka keyokōi nō nai fetsexii. Nō naax keyokōi nō akiki nokoaito noko yoixii a nō niyoxō amis keskara. Nāskakē a nō amis keskara noko yoiano nā Jesús Ifofaafō tii afe isharapakenakafo. Akka nā nikamisfoma omiskōipakenakafo mēra ato potaxii. ²⁸ Cristo āari ināmeax noko naxōi fistini. Yora ichapafōnoax omiskōixō noko nāxoni. Askafiax anā āfe yorafoki oxii, noko ikisharapakexakī. Nāskakē anā nokoōnoax nanakama noko chaka soaxoxiki. Askatamaroko aōnoax nō isharapakenaka.

10

¹ Niospa Moisés yoini keskaraōxō nō tāpitiro Cristo noko afarasharakōi faxoxiai. Nāskakē nā Moisés ato yoini keskarakai tsoa imasharatiroma. Afia Moisés ato yoini keskafakī nā xinia tii a ato Nios kīfixomisfāfe yoinā inafō retepaonifo Niospa ato chaka soaxonō. Askatari a Moisés yoini keskaratokai ato imasharamisma Nios fe ĩpaxanōfo. ² Akka a ato Nios kīfixomisfāfe yoinā inaoxō ato chaka soaxonaifono, tsōa anā akeranama yoinā ina reteskī. Āfe chakaōxō anā shināchakakeranama. Nāskakē anā tsōa yoinā ina retekaranama. ³⁻⁴ Akka askarama. Nā xinia tii cabra ato retexonaifotīa nā afara chakafamis keskara ato shināmapaonifo. Akka yoinā ina imioxō āfe chaka ato soaxotiroma.

⁵ Nāskakē Cristo mai ano fotoyoxoma Apa yoini iskafakī:

Epa, mīkai fichipaima yoinā ina imioxō āto chaka soanōfo. Askatamaroko yorakōi mīa ea onifani ēfe yora ē mia inānō. Nāskaxō yorafōnoax naxō ē ato chaka soaxoxiki. ⁶ Akka yorafāfekai mia inimamakanima yoinā ina reteskaxō kooakī mī ato chaka soaxonō, ixō yoini. ⁷ Akka anā mē mia yoia iskafakī:

Mē nono mai ano fotoa a mīa amapaiyai keskara ē axiki. Nānorikōi mī meka yoimisto eōnoa yoikī keneyoni, ixō Cristo Apa yoini. ⁸ Efe yora mīshtichi, shinākapo. Cristo Apa yoikī taefani iskafakī: “Epa, mīōxō Moisés ato yoini keskara sharafiano mī anā fichipaima. Akka nāato ato yoikī iskafani: ‘Yoinā inafō reteskāfe āfe imi foano aōxō Niospa mato chaka soaxonō,’ ixō ato yoini. Akka a yoinā reteskō koakaxō mia ināifāfekai afāfekai mia inimamaima,” ixō Apa yoini. ⁹ Nāskaxō anā yoikī iskafani: “Epa, ē nono mai ano ē fotoni a mīa amapaiyai keskara axiki,” ixō Apa yoini. Akka Cristo noko nāxoni noko chaka soaxoxiki. Nāskakē a Moisés ato yoini keskara nō anā nikatiroma nōko chaka Epa Niospa noko soaxonō. Nāfo mā Niospa fetsafaa. ¹⁰ Nāskakē a Apa amapaiyai keskai Jesucristo āari ināmeni noko nāxoxikī aōnoax nō a keskara shara inō. Nāskakē nō anā afaa fetsa fichipaima māmāi Jesús noko nai fistixonikē.

¹¹ Akka a atoōxō Nios kīfixomisfāfe pena tii yoinā ina retepaonifo Epa Niospa keyokōi ato chaka soaxonō. Askafekēkai afāfe ato chaka soaxopaonifoma. ¹² Akka Jesucristo mā noko nai fistixoniki noko chaka soaxoxiki. Nāskakē nō anā afaa fetsa yopanakama noko chaka soaxonō. Nāskakē mā nokoōnoax naax Apa Nios ari kani ariax afe xanīfokōi ikikai. ¹³ Akka mā Apa ari kanixakī iskaratīa arixō manai, a noikaspamisfo Apa Niospa ato potaitīa. Nāskakē Jesucristo Apa fe xanīfofinakōia ixii. ¹⁴ Nāskakē āarifi ināmei fistixō noko nāxoni nōko chaka noko soaxoxiki. Nāskaxō nō Ifofaax a keskara shara nō ixii. Nāskakē Niospa anā afaa chaka nōkoōnoa oipakenakama. Nāskakē nōri a keskara sharakōi ixii.

¹⁵⁻¹⁶ Nānori Niospa Yōshi Sharapa noko yoiyoni iskafakī:

Efe yorafāfe, ea Ifofaifono āto shinā mēra ēfe meka ē nanexii āto ōiti mērari a ēfe meka kenea keskara ē faxii ea Ifofasharanōfo, ixō yoini. ¹⁷ Nāskaxō anā yoikī iskafani:

Mã ea Ifofaino ě anã shinãpakenakama a mã chakafamisfo, ixõ Niospa Yõshi Sharapa yoini. ¹⁸ Akka mã noko chaka soaxonano, nãskakẽ nõ anã yoinã ina inãtiroma noko chaka soaxonõ.

Nios fe rafesharakõikãfe

¹⁹ Efe yora mĩshtichi, nãskakẽ nõ nai mẽra ikitiro Nios ano ranotama Jesucristomãi nokoõnoax nai imi fonikẽ, noko chaka soaxoxiki. ²⁰ A ato Nios kĩfixomisfo kĩfiti pexefã kene fetsa mẽra xinia tii ikifistipaonifo ato Nios kĩfixoxikakĩ. Anã iskaratĩa nõ yopatiroma askara. Anã askafapanakama. Akka iskaratĩa afara fetsa fenasharakõi Jesús noko axoni. Nãskakẽ mã Jesús naino mã Nios kĩfiti pexefã kene mẽranoa sama nãmĩfã faxtetani anã tsoa ikiyamanõ. Nãskakẽ nãkõi mã Nioskõi nõ kĩfitiro. ²¹ Nõko Ifo Jesús nokoõxõ Apa Nios kĩfixomis xanĩfokõi. Nãskakẽ keyokõi Niospa fakefãfe ãto Ifokõi. ²² Nãskakẽ nõ Jesús chanĩmara fakẽ mã noko nãxonioxõ nõko õiti fena sharakõi noko faxotiro. Nãskaxõ a nõ afarafo chakafamis keskarafõ anã nõ shinãtiroma nõko õiti inimakõitiro. Nãskaxõ faka sharapa nashimana keskara noko fatiro anã afaa chaka nõko shinã mẽraxõ nõ shinãnõma. Nãskakẽ Nios fe rafekãfe. ²³ Akka nõ yoikĩ iskafamis: “Jesús nõko Ifokẽ Epa Niospa a noko yoiyoni keskara noko axoxii,” ixõ nõ yoimis. Nãskakẽ afaa fetsa shinãyamakãfe. Nã nõ shinãi fisti shinãfafãikãfe. ²⁴ Akka Epa Niospa noko sharafamis. Nõri nõ shinãsharanõ afeskaxõ nõ fetsafo shinãmasharatiromãkĩ nõinã faatanãkaxõ afara axoshara faatanãnofo. ²⁵ Mã mã tãpia mã Jesús chaima oi. Akka fetsafo anã ichanãmisfoma. Nãskakẽ ato keskara iyamakãfe. Nãskakẽ ichanãi xateyamakãfe. Jesúsnoa mã shinãi keskafakĩ fetsafori yoitaifakãfe mãto õiti inimasharakõinõ.

²⁶ Fatora fẽtsa mã tãpia Jesús nokoõnoax nani nõko chaka noko soaxoxiki. Nãskara mã tãpifixõ afara chakafakĩ nõko Ifo Jesús kachikiri fakĩ, askarakai Niospa ãfe chaka soaxotiroma. ²⁷ Nãskarafo Niospa ato omiskõimaxii. Akka Niospa ato õiaino ratei finakõixikani. Nãskakẽ Niospa ato yoixii iskafakĩ: “Emakinoax omiskõipakenakafo mẽra fotakãfe, chiifã mẽra,” ixõ ato yoixii. ²⁸ Akka fẽtsa mã Moisés yoini keskara nikakaspakĩ afara chakafaito fẽtsa õixõ xanĩfo yoimis. Fistichi yoiyamakĩ rafeta yoitiro, askayamakĩ trespã yoitiro iskafakĩ: “Mã nõ õia nato afara chakafaito,” ixõ yoitirofo. Nãskakẽ xanĩfãfe yoitiro: “Na feronãfãke afara chakafaa mã natiro,” ixõ yoitiro. ²⁹ Akka mã Moisés yoini keskara nikakaspaifo afo retepaonifo keskafakĩ fatorafãferi Jesús nikakaspamisfokẽ Niospa ato omiskõimakĩ finakõixii. Nãskakẽ mã yora chakafãfe shinãkĩ iskafamisfo: “Mẽ nikamis Jesús ea nãxonni. Nã naino ãfe imi foni. Nãskaxõ ea katoni aõnoax ě Niospa fake inõ. Akka ě shinãikai afama. Nãskakẽ ě Jesús Ifofapaima,” ixõ anori shinãkĩ mãato Niospa Fake nikakaspakõimis. Askara meka yoikĩ Niospa Yõshi Shara chakafakĩ mekafamis, Niospa Yõshi Sharapa sharafafiamisno noikĩ. ³⁰ Akka mã nõ tãpia Niospa yoikĩ iskafani: “Afara chakafaifãfe ě ato omiskõimaxii,” ixõ yoini. Askatari yoikĩ iskafani a kirika keneano: “A ea Ifofaafãfe afara chakafaifono ě ato omiskõimaxii,” ixõ yoini. ³¹ Akka fatorafãfe nõko Ifo Jesús kachikiri fakaxõ afara chakafariafaifono atonã fãsi mesekõi ixii. Nãskakẽ askarafo mã Nios nĩpanakato ato achixõ ato omiskõimakĩ finakõixii.

³² Shinãkapo efe yora mĩshtichi. Mã taefakĩ Jesúsnoa tãpixõ mã Ifofani keskafakĩ shinãmakiyamakãfe. Fetsafãfe mato Jesús Ifofatimafaifono ato nikatama mã nõko Ifo Jesús Ifofasharakõipaoni. ³³ Nãskaxõ mã Jesús Ifofasharaito õikakĩ fetsafãfe mato ãchayanã mato omiskõimamisfo. Akka a Jesús Ifofamis fetsafori omiskõiaifono mãri ato fe omiskõipaimis. ³⁴ A Jesús Ifofaa

fetsafo karaxa mēra ato ikimanifo. Nāskakē mā ato noiyanā ato inimama-pai karaxa mēranao mā ato ōikai kani ato shināmasharata ato inimamaxiki. Nāskatari nā Jesús Ifofaafāfema mātō afarafo mato fīakī keyokōinifo. Mato askafafiaifono a shināchakatamaroko mā tāpini Epa Niospa nā ika arixō mato afara mekexona afokai fenopakenakama. Nāskara tāpiax mā inimakōini.
³⁵ Nāskakē a mā Jesús chanīmara faa keskafakī kachikiri fayamakāfe. Mā kachikiri fayamakē Epa Niospa mato sharafaxii noko yoiyoni keskafakī. Nāskaxō afara shara mato ināxii. ³⁶⁻³⁷ Akka Niospa meka keneni iskai:

Cristo mā chaima matoki oi, samarakaima, ixō kenenifo. Nāskakē mā Jesús Ifofasharai keskafakī omiskōifikī tenekāfe. Epa Niospa mato ināpaiyai keskara aōxō nā mato yoiyoni keskara mā fixii.
³⁸ Nāskaxō anā Niospa meka kenenifo iskafakī yoikī:

Nā ea chanīmara fai ē imasharaito, nāato ea Ifofasharakōixii. Akka nā ea kachikiri faafoki ē inimaxima, ixō Niospa yoini kirika keneano. ³⁹ Nāskarafāfe Jesús kachikiri fakanax omiskōipakenakofo mēra fokani. Akka nōkai askarama. Askatamaroko nō Jesús chanīmara fakōimis noko nimasharapakexanō nō afe ipaxakī.

11

Nios nikakōipaonifo

¹ Akka nō Epa Nios chanīmara fakōixō a noko yoiyoni keskara noko axoyoa-mano nō chanīmara fai chipomāi noko axōfaito. Nāskarifiakī a noko yoiyoni keskara nō ōiyamafixō āfe mekaōxō nō chanīmara fai. Nāskara nō shinākī nō Nios chanīmara fai. ² Nāskakē nōko xinifāfe Niospa ato yoini keskara chanīmara fakōipaonifo. Nāskakē Epa Nios atoki inimakōikī atoōnoa meka shara yoini.

³ Akka nō chanīmara faxō nō tāpitiro Niospa āfe mekapa mai yafi nai onifani. A nō ōiyomisfoma afarafo Niospa onifani, akka iskaratīa mā nō ōitiro. Nāskakē āfe mekapas keyokōi onifani.

⁴ Ē mato yoinō nikakapo mā tāpinō a nōko xinifo ipaonifo afe keskaramākī. Nōko xini Abel Nios chanīmara faxō oveja fake ināni nā Niospa yoini keskafakī. Nāskakē Nios akiki inimakōini. Akka āfe ochi Caínkai askara inānima. Nā Caín Nios nikakaspayanā āfe afarafo ināpaiyaito Niospa fichikas-pani. Akka āfe exto Abel Nios chanīmara fakōikē Niospa aōnoa yoikī iskafani: “Mī ea chanīmara fakōina,” ixō yoini. Abel Nios chanīmara faax mā nafianikē nō Abel shinākī nō tāpitiro Nios chanīmara faxō nō nikasharakōitiro. Nō askafaino Nios nokoki inimasharakōi.

⁵ Nōko xini Enoc aatori Nios chanīmara fakōinax afe rafekōipaoni. Nāskakē nayamafiakē a ika ari Niospa ifirisafatani. Aōnoa yoikī Niospa meka kenenifo iskafakī: “Ē Enoc yoiai keskafakī ea nikakōimis. Nāskakē ē akiki inimakōi,” ixō Niospa yoini. ⁶ Akka nō Nios nikayamakī nō Nios inimamatiroma. Akka nō Nios fe ipaikōikī nō nikakōitiro. Iskaratīa Nios nia. Nāskakē nō chanīmara fatiro Niosmāi nikē. Askatari nō nikapaikōikī chanīmara fayana akiki nokoaito Niospa noko afara shara faxoxii.

⁷ Nōko xini Noéri Nios chanīmara fakōipaoni. Nāskakē Niospa Noé yoikī iskafani: “Ē oi kaya imai faka faipafanō āsai fetsenōfo. Nāskakē kanōanāfā pexeya fafe. Mī fakefo fe mī āfinō ano ikanax āsaxikanima. Nā ē mia yoiai keskafafe,” ixō Niospa Noé yoini. Akka tsōa askara ōiyomisma nāskakē Noé chanīmara fakī kanōanāfā fani āfe fakefo fe āsaxikakima. Nā Noé Nios chanīmara faax isharakōipaoni. Akka nā nikakaspaifo askapaonifoma, afāfe

afara chakafapaonifo. Nāskakē Niospa ato omiskōimani āsanōfo. Nāskakē Nios fe Noé rafeaito akiki inimakōini.

⁸Nōko xini Abrahamri Nios chanīmara fakōipaoni. Nāskakē Niospa Abraham yoikī iskafani: “Nā ē mia nīchipaiyai ari mī katiro. Ē mia mai inānō mīnā inō,” ixō Epa Niospa yoini. Akka Abraham tāpia inima fakiri kaimākai. Askafīax nā Niospa yoia keskakōini. ⁹Nāskakē nā Niospa yoiyoni keskara chanīmara faax, a Niospa nīchia mai ano nokoax Abraham yora fetsafo mēra kani. A keskarafo inima. Nānoax pexe keskara a karapa pexe fofāsafapaoni a mēra oxaxikaki. Nāskakēri āfe fake Isaaca fe āfe fafa Jacobo nā keskara mēra ipaonifo. Epa Niospa Abraham yoini keskafakī nā raferi ato yoikī askafani: “Ē mato mātō mai ināxii,” ixō yoini. ¹⁰Nāskakē Abraham manapaoni. Akka Niospa yoini keskara nā mai ano ifīaxō tāpīpaoni a Nios ika ari afe ipanaka. Nāno Niospa onifanifo keyokōi sharakōifo nāfori āfenā ipanaka. Nāskakē Abraham manapaoni.

¹¹Niospa Abraham yoini iskafaki: “Mī āfi Sarapa chipo fake fixii. Āfe fake feronāfake ixii. Nāskakē mī fenafo ichapakōi ixikani,” ixō yoini. Akka Abraham anifokōi ini āfe āfiri yōxafokōi ini fake fimisma. Nāskakē Abraham āfe shinā mēraxō shinākī iskafani: “Epa Niospa ea yoiyoni keskara ea axōi. Nāato nā yoiai keskarakōi famis,” ixō Abraham Nios chanīmara fani. Nāskakē Abraham āfinī fake fini, āfe fake feronāfake. Nāskakē Abraham fakeya ini. ¹²Akka Abraham mā anifokōia ini. Nāskano āfe fenafo ichapakōifo ini. Tsōa ato tanātiroma. Nā fishifo tiikōi askatari nā mashi exe tiikōi inifo tsōa ato tanātiroma. Abraham āfe fenafo ichapakōi inifo.

¹³Nā ē yorafoōnoa mato rama yoia keskara atoōnoa ē mato yoinō. Nā yorafo nai mitokomenifo a Niospa ato yoiyoni keskara fikanaxma. Akka askafīkaxō chanīmara fakakī ato shinā mēraxō oa ōiai keskara fanifo. Nāskakē inimakōinifo. Nāskakanax yoinānifo iskakani: “Nonokai na mai ano nō ipanakama, mai fetsa ano nō ixii,” ikax yoinānifo. ¹⁴Akka nānori yoiaifāfe nō tāpitiro nāskara yorafo nono mai ano ipaitama Nios ika ari fopaikani afe ipaxakakī. ¹⁵Akka a ipaonifo ano shinākani āto mai ano anā fopaikani fokeranifo. ¹⁶Akka āto mai ari fopai atama Nios ika ariroko shinānifo ari nokopaikakī. Nāfāfe tāpinifo Nios ika ari sharafinakōia. Nāskakē Epa Niospa a ika ari ato pexe shara faxoni afe ipaxanōfo. Nāskakē Niospa atoōnoax inimakī ato yoikī iskafani: “Ēfi mātō Nioski,” ixō atoōnoa yoini inimayanā.

¹⁷⁻¹⁸Anā Abrahamnoa ē mato yoinō. Epa Niospa tāpipaini Abraham chanīmara fakī nā yoia keskara akimākai. Nāskaxō yoikī iskafani: “Mī ina ea retexotamaroko mī fake fisti Isaaca ea retexōfe,” ixō yoini. Nāskatari Epa Niospa taefakī Abraham yoiyoni āfe fake fisti Isaacaōnoax āfe fenafo ichapakōi ixiaifo. Nā afara sharafo Niospa Abraham yoiyoni keskafakī āfe fake Isaacaōxō keyokōi axoxixakī tāpimayoni. Nānori Niospa Abraham yoiaino āfe fake fisti retexō Nios inākerani. Nāskaxō Nios chanīmara fakōixō nā yoini keskakōi fani. ¹⁹Nāskaxō Abraham āfe shinā mēraxō shinākī iskafani: “Epa Niospa ea yoia iskafakī: ‘Mī fake Isaaca ea retexōfe,’ ea faito ē shinā Niospa afama mīshti fatiro. Akka ēfe fake nafiakē Epa Niospa samama ea otofaxotiro,” ixō shināni. Chanīma, āfe fake nakerani. Nāskakē Abraham shināni āfe fake nafiakē Niospa otofaxotiro.

²⁰Akka Isaaca nāatori Nios chanīmara fakōipaoni. Nāskakē āfe fake feronāfake rafe yoini a inōpokoai: “Jacobu yafi Esau, chipo Epa Niospa afara shara mato faxoxii,” ato fani.

²¹Nāskarifiakī Jacobori Nios chanīmara fakōipaoni. Nāskakē mā chaima naito Niospa āfe shinā mēra shināmanai keskafakī āfe fafa rafe, José fake rafe,

Niospa ato shara faxonōpokofai ato yoini. Ato yoita āfe chatiki mēstexō Epa Nios kīfiyanā aicho fani.

²² Nā Joséri Nios chanīmara fakōipaoni. Nāskaxō mā chaima nakī āfe yorafo yoikī iskafani: “Chipo Epa Niospa nōko fenafo nā israelifo Ejipto anoa ato iyoxii kiki. Fokakī ēfe xaori foxikani kiki. Nā ikaifo ano ea maifaifoxikakī,” ixō ato yoiyoni.

²³ Moisés āfe apa feta āfe afa Nios chanīmara fakōipaonifo. Nāskakē Moisés yomeax sharapishtakōikē āfe apa feta āfe afa ōini. Nāskaxori tāpinifo mā yosixō a Niospa yoiai keskara yonosharakōixiaito. Nāskakē Ejipto anoa xanīfāfe ato yoini a israelifāfe āto fake feronāfake yome mīshti keyokōi ato rētekī mitokakōinōfo. Askafiaifono Moisés āfe apa feta āfe afa Nios chanīmara fakaxō ratekakima tres oxe anifo āto fake onekakī xanīfāfe āto fake rēteyamanō.

²⁴ Moisés āfe chata keskara ini Faraón. Askafafiaifono Moisés askara fichikaspani. Nāskaxō ato yoini iskafakī: “Xanīfo Faraónkai ēfe chatama. Āfe fakerikai ēfe efama,” ixō ato yoini, chanīmara fanōfo israelifo āfe kaifo ini. Moisésri Nios chanīmara fakōipaoni. ²⁵ Akka Moisés shināni iskakī: “Ē Ejipto anoax xanīfāfe pexe ano ikax ēri ato fe inimasharakai xini ranā ayanā ē afara chakafatiro Nios shināyamakī. Ē askapaima,” ixō shināni. Askapaitamaroko iskafakī shināni: “Ēkai ejiptofo feta afara chakafapaima, askakimaroko ēfe kaifo fe nā Niospa inafō omiskōiaifo keskai ēri ato fe omiskōi. ²⁶ Ē Egipto anoafō ato afara fīapaikī ē ato fīakerani. Ē fīaxoma, ea mekafafiaifono Egipto anoafāfe, nāskanō. Akka afarafoyafīax shara. Akka Cristo, a Niospa noko nīchixii noko ifinō, nā sharafinakōia. Ē Cristoōnoax omiskōifiano Epa Niospa a ika arixō ē nokoaito afara sharakōi ea ināxii ē afe ĩpaxanō,” ixō shināni.

²⁷ Akka Nios chanīmara fakōinax Ejipto anoax āfe kaifo fe Moisés kani. Ejipto anoax āto xanīfo akiki ōitifishkifiaino akiki mesetama nā xanīfāfe mai anoax kani. Akka Nios tsōa ōiyamafitirono Moisés fisti Nios fe rafekōiax afe mekapaoni. Nāskakē nā Niospa yoini keskafakī enepaonima. ²⁸ Akka Ejipto anoax israelifo foyoafomano Niospa Moisés yoini iskafakī: “Mī kaifo yoife ovejanā fake retenōfo. Nāskakaxō nā oveja imi āto pexe fepotifo raish anōfo, askafafono ōiki ēfe ājirinī āto fake iyoafo rēteyamanō, nā Ejipto anoafō āto fake iyoafo ato reteaitīa,” ixō Niospa yoini. Nāskakē Moisés nā Niospa yoia keskara chanīmara faxō āfe kaifo israelifo yoini. Nāskakē israelifāfe āto fake iyoafo nanima.

²⁹ Nāskakē israelifāfe Nios chanīmara fanifo. Nāskakaxō nā fakafā āfe ane Ōshi pokefainifo. Epa Niospa nēxpakīa fakafā shināfatanaino israelifāfe pokefainaifono ato acho Ejipto anoafō fonifo ato retepaikani. Mā fakafā nēxpakīa kāiyaifono Niospa atoki fakafā yosifani. Nāskakē āsai mitokomenifo.

³⁰ Akka Niospa israelifo yoini: “Nā Jericó pexe rasi kachiori siete nia foaketi fayakenōfo,” ixō yoini. Nā pexe rasi kachiori simīto kene keyakōi masoa ini. Nāskakē israelifāfe a pexe rasi kachiori foaketi fayakenaifono nā Niospa yoini keskara nā pexe rasi maokomei fetseni. ³¹ Akka keyokōi Jericó anoafō nai keyonifo. Akka nā kēro chotaferoma āfe ane Rahab nā fisti nanima nāatomāi mā Nios chanīmara faax. Akka Jericó pexe rasi ano foyoafomano israeli xanīfāfe feronāfake rafe nīchini ato onāti fatanōfo. Mā foafono nā rafe Rahab āfe pexe mēra ato ikimani tsōa ato fichixō reteyamanō. Nāskakē nā Rahab tsōa retenima āfe kaifo retefikakī.

³² Akka, ĵanā afaa fetsa ē mato yoitromē? Nā yora ichapafāfe Epa Nios chanīmara fapaonifoōnoa ē mato yoikī keyotiroma. Nā Gedeón ikaino, Barac ikaino, Sansón ikaino, Jefte ikaino, David ikaino, Samuel ikaino nā Niospa meka yoimis fetsafoōnoari ē mato yoipanā ēkai yoikī keyotiroma. ³³ Nāskakē

afāfe Epa Nios chanīmara fakaxō āto sorarofō yoinifo a ato noikaspaifo ato retenōfo. Nāskakē a ato noikaspaifo ato retepaifīkakī finōkōinifo. Akka atiri xanīfo ikaxō āfe yorafo kexesharapaonifo isharanōfo. Nāskakē a Niospa ato yoiyoni keskara ato axosharani. Nāskatari atiri nā Nios Ifofaafāfema poomā mēra ato potanifo. Askafiaifono Epa Niospa ato kexesharani poomānā ato pinōma. ³⁴ Akka atiri xanīfo chakafāfe ato yoinifo chiifā mēra ato potanōfo. Chii mēra ato potafiafono Niospa ato kexesharani koonōfoma. Atiri kenofāfe ato retepaifīkakī tsōa ato retenīma. A isinī ikani ato yora pachikōifokē afori Niospa ato mitsiskōi imani. Nāskakē nā ato noikaspaifāfe āto sorarofāfe ato retepaifīafono nāfāferoko ato īchonifo ato afeskafanōfoma. ³⁵ Kērofāferi Nios Ifofaino, fake naano Niospa ato otofaxoni anā ninō.

Akka fetsafo Nios chanīmara fakōinafono nā Nios Ifofaifāfema ato omiskōimanifo ato retekakī. Nāskaxō ato yoikī iskafanifo: “Mā Nios Ifofayamaito nō mato afeska faima mā kasharatanō. Akka mā Ifofaito nō mato retei,” ixō ato yoinifo. Ato askafafiaifono tsoa Nios shināmakinima. Nāskakē ato retenifo ato retyoafomano shinākī iskafanifo: “Noko retefiaifono Epa Niospa samama noko ōtofatiro nō afe īpaxanō,” ixō shinānifo. ³⁶ Askatari a Nios chanīmara faa fetsafori ato kaxemetsamafayanā ato koshaketsayanā ato cadenānā metexkere ata ato otekkere axō ato karaxa mēra ikimanifo. ³⁷ Askatari ranāri tokirinī ato tsakaketsakaxō ato retenifo, ranāri sirochonō nakirafe ato xatenifo nanōfo, ranāri kenopa ato retenifo, ato askafiaifono. Nāskakē nā afaamaisfāfe ano rapatīyamano oveja fichi iyamai cabra fichi rapati fakaxō safenifo. Ato retepaikakī ato īchorifaifono. Nāskakē omiskōikōinifo. ³⁸ Nāskakē tsōa istoma anoax machi keya anoax a mafa kini mēra ikikata mai kini mērari ikinifo. Akka nā Nios chanīmara faafo a Nios Ifofaafāfema ato shara fanifoma Niospa ato ōia sharafiafono, ato chakafapaonifo.

³⁹ Nāskakē nāfo omiskōi finafīkakī Nios Ifokōi fapaonifo. Nāskakē Niospa atoōnoa yoikī iskafani: “Nafāfe ea nikakōikani. Nāskakē ē atoki inimakōi omiskōifīkani isharakōimisfo,” ixō Niospa atoōnoa yoini. Askafīkaxō a Niospa ato yoiyoni keskara tsōa fiama ini. ⁴⁰ Nāskakē Epa Niospa ato manamayopaoni. Akka nōri nō Nios chanīmara faax nō ato fe a Jesús ika ari nō nokoxii. Nāskakē yora fisti keskara nō ato fe ixii a keskara shara noko imaino. Nāskaxō ato feta anā afaa fetsa nō yopapakenakama. A Niospa yoiyoni keskara keyokōi noko ināxii nai mēraxō.

12

Nō Jesúsnoa shināsharatiro

¹ Akka nōko xinifāfe Nios chanīmara fapaonifo. Nāskakē nōri ato keskara nō itiro. Nāskaxō a afara chakata noko nētefapaiyai keskara nāfo nō kachikiri fakōini. Nāskaxori afara chakafāferi samamakōi noko afara chakafama-paitiro. Nāfo chakari nō kachikiri fakōini a Niospa noko amapaiyai keskara fisti axiki, fena fenakima a noko yoiai keskara nō axosharakōi. ² Akka nō Jesús fisti shināfāfainō. Nāfi nōko Ifokōikī noko tāpimamiskōi. Akka nāto noko ōimakī taefanikī afara afeskara afiaino nō Nios chanīmara fakōinō. Nāskaxō a Apa yoia keskara akōipaoni. Nāskakē nōri a keskara inōkāfe. Nāskaxō mā mastakakī yorafāfe ferotai fi rāfinī fanifo. Askafafiaifono omiskōiyanā tenekōini māmāi tāpiax a chipo xanīfo ixō Apa Nios feta noko ifixiai inimakōiyanā Apa Nios ika arixō.

³ Yora chakafāfe chakafafiaifono tenekōini. Nāskaxō a nokoōnoax omiskōini keskara shinākī matorī omiskōimanaifono, shināchakatama mātō ōiti fekaxtefayamakāfe. Nāskaxō a Niospa mato amapaiyai keskara mā enetiroma.

⁴ Akka yorafetsafāfe mato afara chakafamapaimisfo anā mā Jesús Ifofanōma, ato nikatama mā omiskōifi mā omiskōi sharamisma. Akka Jesúsroko omiskōi finakōini. ⁵ Mā mā shināmakia keskara ē anā mato yoinō. Mā āfe fakekē, Epa Niospa mato yoini keskara āfe meka kirikano kenea iskara fētsa keneni:

Ēfe fāke, ēfi mī Ifokōikī. Akka nā ē mia yoiyai keskara mī ayamaito ē mia omiskōimani mī ea nikanō, mī ea Ifofasharanō. Ē mia askafaino, akai afamara mī fatiroma. Askatari shināchakayamafe. Tāpisharafe. ⁶ Nā ē aō noiai tāpimasharai aō noikī. Ēfe fake keyokōi omiskōimani anā nikasharanō, ixō keneni a Niospa shināmanaino. ⁷ Epa Niospa mato tāpimapaiyai keskara tāpikāfe. Nāskax omiskōifikī shināchakatamaroko tenesharakōikāfe. Nāskakē omiskōixō mā tāpitiro māmāi Niospa fakefoxō. Apafāfe āto fakefo tāpimatirofo keskafakī Epa Niospa mēstekōi nokori tāpimani. ⁸ Keyokōi Epa Niospa āfe fakefo ato tāpimanaito mā meemisfo. Akka Epa Niospa noko tāpimayamaino nō āfe fakekōifo itiroma. Nāskax nōri āfe yorafo itiroma. ⁹ Akka nō yomekē nōko epafāfe nono mai anoxō noko tāpimapaonifo. Nāskakē nō shinākī nō ato nikakōimis. Akka Epa Niospa noko tāpimanaino nō tenekōitiro. Nāskaxō nā noko tāpimapaiyai keskai nō inimayanā nō isharakōitiro. ¹⁰ Nōko epafāfe āa shinākaxō noko tāpimamisfo nō shara inō. Akka mā nō yosiano anā noko askafamisfoma. Nāskarifikī Epa Niospa mēste shināsharakōikī, nokori shara fapaikī noko tāpimamis a keskara shara nō inō. ¹¹ Chanīma, noko tāpimayanā noko omiskōimanaino nō shara meetiroma. Paekōi mei nō ichopaitiro. Askafixō mā yosixō chipo nō shinātiro Epa Niospa noko tāpimasharai, nōko ōiti inimasharatiro shara noko imaino.

Nō Niospa meka nikakaspaino mesekōi ixii

¹² Nāskakē afara afeskara afiaino shināchakayamakāfe. Epa Niospa mato tāpimapaiyai keskara fisti akāfe. Nāskaxō Nios Ifofakī kachikiri fatama nikasharafafāikāfe. Nāskatari āfe meka shara nikakī enepaiyamakāfe. Yora pachi keskara iyamakāfe. ¹³ Nāskax isharakōikāfe Jesús Ifofasharaxikakī. Mā askaito ōikani nā Jesús Ifo sharafaafoma mato fe rafepaitirofo Jesús keskara shara ipaikani.

¹⁴ Nāskakē mēenāpaitama keyokōi yorafo fe isharafafāikāfe. Nāskatari Jesús keskara shara ipaikāfe. Akka tsoa Jesús keskara shara iyamakani afāfekai nōko Ifo ōinakafoma. ¹⁵ Epa Niospa noko noikōikī āfe Fakeoxō noko sharafa fafafāimis. Nāskakē a Niospa noko amapaiyai keskara akāfe fenoxikakima. Askatari mātō shināmā afaa shināyamakāfe. Akka mātō shināmā mā afara shinākī fetsafori mā ato afara chakafamatiro akairi askara anōfo. ¹⁶ Nāskatari mātō āfima fe iyamakāfe. Kērofori mātō fenema fe iyamakāfe. Akka nō naino, nōko fake iyoato nōko afama mīshti fitiro. Akka Esau shināsharanima. Fonāikī āfe exto yōkani āfe ēxto pimanō. Nāskaxō a āfe apa ināpaiyai shinākima āfe exto yoini iskafakī: “Epa naano āfe afama mīshtifo ē fiaī ē mia inānō kopifakī,” ixō yoini. Nāskakē nā Esau keskara iyamakāfe. Atokai Niosnoa shināpaonima. Akka a Niospa mato ināpaiyai keskara fikaspakīma, fikāfe. ¹⁷ Mā mā tāpia āpa afara shara ināpaiyai keskara fipaifikī finima. Nāskaxō apa yōkakī iskafani: “Epa, a mīa ināpai keskara ea ināfe, ē mī fake iyoakōi,” ixō oiayanā yōkafaiito āpa inānima māmāi chipokoto fiano. Nāskakē ōisharakāfe. Mā Nios nikayamai māri Esau keskara itiro. Nāskakē Niospa mato ināpaiyai keskara mā fitiroma.

¹⁸ Epa Niospa a nōko xinifo yoini keskara iskaratīa noko yoimisma a keskara. Ato yoini machi āfe ane Sion tenāmā fotanōfo anoxō afara fetsa ato yoixiki. Akka nā machi anoax chiifā erepafākōi, askatari kōi fakishifākōi, askatari nēfefākōiyanā kana piishini. ¹⁹⁻²⁰ Nai mēranoax maneti fāsikōi chāi chāisaito nikanifo. Nāskatari nai mēraxō fāsikōi ato yoiaito nikanifo ato Niospa

iskafaito: “Na machi ano tsōa mǎpetiroma. Mǎpeaifǎfe tokirinĩ ato tsakakĩ retékǎfe. Askatari yoinǎfǎferi mǎpeaito mǎ retetiro,” ixō ato yoiaito nikanifo. Nǎskakē ratekōikakĩ Moisés yoinifo iskafakakĩ: “Moisés, nō anǎ Niospa meka nikapaima. Mǎchi ari mǎpei nō narisatiro. Nǎskakē Nios yoife noko anǎ yoiyamanō,” ixō israelifǎfe Moisés yoinifo. ²¹ Akka Moisésri nǎ ōia keskara ato yoini iskafakĩ: “Ēri fǎsi ratekōi, tari tari iki,” ixō ato yoini.

²² Akka nōkai machi Sión ano nō kaima. Askatamaroko machi Sión fetsa ano nō kai, ǎfe ane fetsa nǎ Jerusalén Fena ano a Nios ika ari. Nǎskakē nǎnoax ǎfe ǎjirifo ichanǎkaxō, “Nios sharara,” fafafafǎikani. Akka nǎ ǎfe ǎjiri ichapakōifo tsōa ato tanǎtiroma. ²³ Nǎnori nō keyokōi a Jesús chanĩmara faafo afe ixii. Akka nǎ Nios ika ari ǎto anefo kenea afe ĩpaxanōfo. Nǎskakē nōri nō Nioski noko. Nǎskakē noko yoixii fatofǎfe Ifofakanax afe ipanakafomǎki. Nǎ Ifofaafos a keskara shara ato nai mēraxō imai afaa chakafamisfoma keskara inōfo. ²⁴ Jesús noko nǎxoyoamano tsōakai nokoōnoax nǎxoyonima. Nǎskakē iskaratĩa Jesús noko nǎxonikē nō Nios fe isharapakexatiro. Akka nōko xini Caín onefetsa Abel reteni. Nǎskakē Epa Niospa Caín yoikĩ iskafani: “Caín, ǎafeskakĩ mĩ exto mĩ reteamē? Iskaratĩa ě mia omiskōimani,” ixō yoini. Abel nafianixakĩ aato noko nimapaketiro, Jesús keskarama. Akka Jesús nanixakĩ noko nimapakenaka.

²⁵ Nǎskakē Niospa mato yoiyai keskara nikakaspayamakǎfe. Nǎ nono mai anoxō nōko xinifo Moisés ato yoini keskara nikayamaifǎfe Epa Niospa ato omiskōimani. Akka Jesús Moisés keskarama. Nios ika ariax nokoki fotonĩ Niospa Fakekōiax. Nǎskakē a Jesús noko yoiyai keskara nō nikayamaito nokori omiskōimakĩ finakōixii. ²⁶ Akka Epa Niospa Moisés yafi nōko xinifo machi Sión anoxō ato yoikĩ ǎfe mekapa mai naya naya ani. Nǎskaxō anǎ ato yoini iskafakĩ: “Anǎ mai fisti ě naya naya axima. Nairi ě naya naya axii,” ixō ato yoini. ²⁷ Nǎskakē nǎ Epa Niospa noko yoini keskaraōxō nō tǎpitiro nǎ afara nipatirofoma, Niospa nǎfo yamafarisafataxii anǎ afaa inōfoma. Akka nǎ Niospa ato imapaiyai fisti itirofo. ²⁸ Nǎskatari a Nios ika ariax mai naya naya itiro. Nǎskakē nǎno nō afe isharapakexatiro. Nǎskakē aōnoa nō shinǎsharayanǎ nō kĭfifafǎinō. Nǎskaxō a noko amapaiyai keskara nō axōaino nokoki Epa Nios inima sharakōixii. ²⁹ Akka mǎ nō tǎpia nōko Ifo Nios nǎ chiifǎ erepafǎi keskara. Akka nǎ ǎfe meka shara nikakaspakĩ kachikiri faifono Niospa chiifǎ erepafǎi mēra ato potaxii anoax omiskōipakexanōfo. Nǎskakē nō nikasharakōinō.

13

Afeskaxō nō Nios inimamatiromē

¹ Mǎfi Cristo afe yorafokĩ. Nǎskakē mǎ ranǎ nōinǎi xateyamakǎfe. ² Yora fetsafori mai fetsa ariax oaito mǎto pexe anoxō ifisharakǎfe. Nǎskakēri tǎpixoma fetsafǎfe yorayama fiano ǎjirifo fiano ifimisfo.

³ Nǎ karaxa mēra ikafori ato shinǎkǎfe. Nǎskaxō ato ōiti inimamasharakǎfe. Askatari ato axosharakǎfe. Nǎ mǎ ato fe karaxa mēra ika keskara shinǎkōikǎfe.

⁴ Feronǎfakefo, mǎto ǎfiffo fe nōinǎsharakǎfe. Nǎskax isharakǎfe. Askatari mǎto ǎfima fe ipaiyamakǎfe, mǎto ǎfi fisti fe ikǎfe. Kērofori mǎto fenema fe ipaiyamakǎfe, mǎto fene fisti fe ikǎfe. Akka nǎ ǎto ǎfima fe ikaifono, kērofori ǎto fenema fe ikaifono, nǎskarafo Niospa ato omiskōimaxii.

⁵ Akka kori ichapa noiyamakǎfe. Askatamaroko inimakǎfe afe tii mǎ ayamakĩ. Epa Niospa yoinikĩ iskafakĩ: “Ēkai mato makinoax paxkanakama. Askatari ě mato potanakama. Nǎskakē a mǎ yopai ě mato inǎxii,” ixō yoini.

⁶ Nǎskakē chanĩmakōi nō yoitiro iskafakĩ:

Afara afeskara afiaino ěfe Ifāfe ea axomis. Nāskakē ě rateima, Epa Niospamāi ea kexesharaino yorafāfe ea afeskafanōfoma, ixō nō yoitiro.

⁷ Niospa meka yoimisfāfe mato yoinifo keskara atoōnoa shināfafāikāfe. Nāfāfe mato shara famisfo. Nāskakaxō nōko Ifo Jesús chanīmara famisfo. Nāskakē ato keskara ikāfe nō Jesús Ifofasharakōinō.

⁸ Akka Jesucristo nā ipaoni keskara ĩpanaka. Anāakai iskaratīa fetsatiroma. ⁹ Akka fetsafāfe mato anorima yoipaikani, a tsōa nikamisma keskara. Nāskakē ato nikayamakāfe mato iskafakī yoipai ani kiki: “Nōko xinifāfe noko yoinifo keskara nō nami fetsa piaino nōko shinā mēra noko shināmasharatiro,” ixō mato yoipai ani kiki. Akka a nō piatokai nōko shinā mēra noko shināmasharatiro. Askatamaroko Niospa noko noixō noko imasharatiro a keskara shara nō inō.

¹⁰ Nāskakē nō chanīmara famis Jesucristo ifi cruz ikakinoax noko nāxoni nōko chaka noko soaxoxiki. Akka Jesucristo chanīmara fatama nā Moisés ato yoini keskara fisti chanīmara famisfo. Nāskakē afāfekai ato chaka soaxotirofoma.

¹¹ Akka nā Moisés ato yoini keskai a ato Nios kīfixomis xanīfo fisti, ares fisti peke kene fetsa mēra ikipaoni, nā mēra yoinā ina imiya ikikē ōikī Epa Niospa ato chaka soaxonō. Akka nā yoināfāfe ato kaya peke rasi pasotaixō koofapaonifo. ¹² Nāskarifiāi Jesús Jerusalén pasotainoax noko omiskōixokī āfe imi foax noko nāxoni nōko chaka noko soaxoxiki a keskara shara nō inō. ¹³ Akka nōri Jesús ipaoni keskara inōkāfe a nō ipaoni keskara anā ixikima. Nāskaxō āfe kaifāfe potanifo keskafakī nokori nofe yorafāfe potatirofo. Nāskakaxō Jesús ĩchaketsanifo keskafakī nokori aōxō ĩchatirofo. Akka Jesúsnoa chaka shināmisfo keskafakī nokori aōxō chakafatirofo. ¹⁴ Nono mai anoax nō omiskōifikī nō shināchakaima, mā nōmāi tāpiax nono mai ano nō ĩpanakama. Askatari mā nō tāpia a Nios ika ari nokoax nō afe ĩpanaka. Nāskakē nā nō manasharamis.

¹⁵ Jesús noko nāxonioxō nō Epa Nios aicho fai. Akka nō yoikī iskafatiro: “Aicho Epa Niosi, mī Fake Jesús ěfe Ifokōi. Aōxō ě mia aicho fai,” ixō nō yoitiro. ¹⁶ Askatari ato shināmakiyamakāfe mā afarayaxō a afaamaisfo ato ināsharakāfe. Mā ato askafaito ōikī Nios matoki inimasharakōi kiki.

¹⁷ Akka nā ichanāti peke anoxō Niospa meka mato yoimisfo ato nikasharakōifafāikāfe. Nāskax nā mato yoiaifo keskakōikāfe. Nāfāfe mato kexesharamisfo mā Jesús nikasharanō. Akka nāfāferi tāpiafo Nios ari nokoāifāfe ato yōkaxii iskafakī: “¿Mā ěfe meka mā ato tāpimasharamismē?” ixō ato yōkaxii. Nāskakē ato nikasharakāfe inimakōinōfo. Akka mā ato nikayamaino inimatirofoma, shināchakatirofo. Nāskaxō mato axosharatiroma.

¹⁸ Nokori Epa Nios kīfixokāfe. Epa Niospa noko amapaiyai keskara mā nō apaimiski. Nāskaxō nōko shinā mēraxō nō afaa chaka shināima. Nō isharapaikōi. ¹⁹ Eari Nios kīfixokāfe matoki ea samama nīchinō ě anā mato fe inō.

Ato Nios kīfixoyanā mā mekai xatekī ato yoini

²⁰⁻²¹ Epa Niospa noko inimamakōimis nō afaa shināchakanōma. Nōko Ifo Jesús mā nokoōnoax nafiakē Apa Niospa otofani Jesús keyokōi finōax noko kexemis inō. Jesús noko nāxonioōnoax Epa Nios fe nō afe yora ĩpanaka. Nāskakē mā afara shara yopaito Epa Niospa mato inātiro a mato apaiyai keskara shara mā anō. Āfe Fake Jesucristoōxō nōko shinā mēra noko shināmasharax nokoki inimakōixii. Nāskakē keyokōichi Jesúsnoa nō yoisharapakenaka. Nāskara sharakōi ĩpanaka.

²² Efe yora mīshtichi, nã ã mato ichapama yoia keskara nikasharakãfe fena fenakãkima. Nã ã mato kenexona keskai mãto shinã mãra mato shinãmasharaxii kiki. ²³ ã mato yoipai mã nofe yorashta Timoteo iskaratã karaxa mãranoax mã tsekea. Akka samamashta ekeki oano ã afe kai mato ari.

²⁴ Keyokõi ichanãkaxõ a mato Niospa meka yoixomisfo yafi a mato kexemisfori nõ ato yoisharai. Akka nono Ítalia anoxori nã Nios Ifofaafãferi mato yoisharakani.

²⁵ Epa Niospa keyokõi mato noikĩ mato shara faxõfafãinõ. Nã tii.

Santiago Jesús Chanĩmara Faafo Kirika Kenexõ Fomani

Judeofo paxkanãifono Santiago ato kene fomani

¹ Ëkĩa Santiago ẽ mato kirika kenexõ fomai. Epa Nios yafi nõko Ifo Jesucristo ẽ ato yonoxomis. Mãfi Jesucristo mã Ifofamiskĩ nã maitiofo mã paxkanãifetseni. Ë mato meka shara fomai.

Niosxõ nõ tãpisharatiro

² Efe yora mĩshtichi, afara chakafo nokoaino, inimasharakãfe, shinãchakakakima. ³ Mã mã tãpiakĩ, ano afara chakafo nokoaino, mã Jesús nikakĩ finasharakõikĩ, afara chakafo nikakãkima mã tenesharakõitiro. Nãskaxõ afara chakafo mã finõinĩfofãtiro. ⁴ Mã askaino Jesús mato imapaiyai keskara mã itiro mẽxotaima mãmãĩ mã Jesús nikakõisharakĩ. Mã askakĩ afafo Jesús mato amapaiyai keskara mã atiro afaa chaka shinãkima.

⁵ Akka Niospa mato amapaiyai keskara mã tãpixoma, Nios yõkakãfe mato tãpimanõ. Mã yõkaito mato tãpimatiro. “Ea fekaxtefayamakãfe,” ixokai Niospa mato anori yoima. Inimayanã mato tãpimani. ⁶⁻⁸ Nãskata mã Nios yõkakĩ iskafakĩ shinãyamakãfe: “Ë Epa Nios yõkaito ea tãpimanimaraka,” ixõ anori shinãyamakãfe. Akka nã mã yõkapaiyai keskara shinãkãfe. Nãskaxõ, “Aicho, ẽ Nios yõkaito mã ea tãpimasharaki. Nãskakẽ ea amapaiyai keskara ea tãpimaxii,” ixõ shinãkãfe. Askatari anã afaa shinãyamakãfe. Fekaxteyamakãfe. Nãskarari nẽfefakĩ ifi fokẽ fokẽ akaito nõ tãpitiroma fakiri kaimãkai. Nãskarifiakĩ Niospa mato tãpimafiaino mã anã afara fetsa shinãkĩ mã shinãsharatiroma. Nãskakẽ mã fekaxtexõ mã shinãsharatiroma. Nãskakẽ Niospa mato afaa tãpimatiroma mã fekaxteaito.

⁹ Jesús chanĩmara fafiakani ranãri yorafo afaamaisfo. Nãskakẽ fetsafãfe ato tanakanima. “Nafokai afama,” ixõ shinãkani. Askatamaroko afaamaisfi-fafono Niospa ato iskafai: “Mãfi ẽfe fakekõifokĩ. Keyokõĩ ẽfenãfo mãtonãri,” ixõ Niospa ato yoini. Nãskakẽ inimatirofo. ¹⁰⁻¹¹ Fetsafori Jesús chanĩmara faafo afama mĩshtiyafõ. Nãskakẽ feronãfake afama mĩshti ichapayato shinãkĩ iskafatiro: “Ë afama mĩshti ichapayafekẽ ẽfe afama mĩshtifãfe ea inimatiro. Ëfe afama mĩshtiõnoaxkai ẽ isharatiroma. Akka ẽfi Niospa fakekõiax, ẽ afe rafepakenakakĩ. Nãskax ẽ inimakõĩ,” ixõ shinãtiro. Akka taeyoi charofo sharashta iyotiro. Askafiaino xinĩ tsofifaano, anã shara itiro mãmãĩ xinĩ tsofifaano. Nãskarifiaino feronãfake afama mĩshti ichapayato shinãtiro iskafakĩ: “Nã charo ikai keskariai fatora penata ẽ natiro. Mẽ nãxõ ẽfe afama mĩshti ẽ fotiro. Askatari ẽfe afama mĩshtifãferikai ea afeska fatiro,” ixõ nã feronãfake afama mĩshtiyato shinãtiro. Nãskakẽ mã ẽfe afama mĩshtifoõnoax isharakõiax narisatiro.

Santiago ato tãpimani afara chakafamisfoõnoa

¹² Nõko Ifãfe yoikĩ iskafayoni: “Nã ea noiaifi efe ãpanakakĩ,” ixõ yoyoni. Nãskakẽ afara chakafo nokoki nokoaino, nãskara teneyanã nõko Ifo Nios nõ kachikiri fayamaito õikĩ nokoki inimatiro. Nãskax a yoyoni keskai nõ afe nãpanaka. ¹³ Chanĩma, keyokõichi nõ Jesús Ifofaxõ afara chakafapaikĩ nõa nõ yoitiro iskafakĩ: “Ea Niospa afara chakafamapai,” ixõ nõ yoitiro. Akka Nios sharafinakõia. Afara chakafatiroma. Tsõarikai Nios afaa chakafamatiroma, Niosmãĩ sharafinakõikẽ. Nãskakẽri Niospa ato afaa chakafamatiroma. ¹⁴ Nãskakẽ nõ afara chakafapaiyaino afara chaka nõo

nea. Nāskatari nōko shinā mēraxō nō afara chakafapaikī nō atiro. ¹⁵ Ē mato yoinō, nikakapo. Kēro fistichi fake naneano fenāmāshta yositiro. Akka mā kāiax yositiro. Mā yosiax anifoax, natiro. Nāskarifiakī nōko shinā mēraxō nō afara chakafo fapai, akka afara chakafo nō shināmakiyamaxō, afara chakafo nō atiro. Nāskakē mēxotaima nō afara chakafatiro. Nāskax nō naa keskara nō itiro.

¹⁶ Akka efe yora mīshtichi, anorima shināyamakāfe. Niospa afaa chakafatiromaki. ¹⁷ Akka Epa Niospa nai mēraxō mēxotaima noko kexesharafafāini. Nāskaxō noko afama mīshti onifaxoni. Xini onifata, fishifo onifata, oxe onifata, nāfo noko onifaxoni, afāfe noko chaxasharanō. Akka oxe ikiaito nō anā ōitiro. Fishiri nāskarari ikiaito nō ōitiro. Chipo kāiyaito nō anā ōitiro noko chaxasharaito. Akka Epa Nioskai askarama. Akai fetsatiroma. Noko mēxotaima sharakōi faxomis. Nokokai chakafatiroma. ¹⁸ Niospa ares shināyoni iskakī: “Ēfe meka chanīmakōi nikaifono ē ato fetsafaxii ēfe fakekōi inōfo,” ixō Niospa shināyoni. Nāskakē noko katokī taefani. Nāskatari a rama chanīmara faifo āfe fakekōifo ixikani.

Niospa meka mēstesharakōi nikax askakōikāfe. Nāskakē mā chanīmara fakōinikai

¹⁹ Efe yora mīshtichi, nikasharakāfe ē mato yoisharanō. Fētsa mato yoipaiyaito, nikakaspatama nikayokāfe. Māri chipo fenāmāshta yoisharaxikakī. Akka samamashta ōitifishkiyamakāfe. Nāskakē nō ōitifishkiki nō mekatiro.

²⁰ Mā ōitifishkikikai Niospa mato afara sharafamapaiyai keskara mā atiroma. ²¹ Nāskakē afara chakafo mā famis xatekāfe. Mā mā chaka xatexō mā Niospa meka nikakōisharatiro. Nāskaxō mā yoikī iskafatiro: “Epa, mī meka shara emēra nanefe ē mia Ifofasharapaikai. Ē mia nikapaisharakōikai,” ixō anori yoikāfe. Āfe meka shara mato mēra naneano, a mato yoiyoni keskai mā afe nīpanaka.

²² Āfe meka fisti nikakākima nā Niospa yoini keskakōiri akāfe. Mā mā nikafi mā askayamai māa mā pāramei, “Nō Nios Ifofara,” ixō shinākī. ²³⁻²⁴ Nā keskarafofi iskamisfokī: Espejo fikaxō āto femānā choshtakē ōikanax fechokomepaikani shināmakitirofo. Nāskarifiakani Niospa meka nikafikakī, nāskakaxō afara chakafakakī xateafoma. ²⁵ Akka fētsa Niospa meka shara nikafafāikī nā yoiai keskara amis, shināmakitama. Nā keskara yōra Nios chanīmara faxō Niospa yoiai keskara amis, nāskax inimakōimis. Shinākī iskafamis: “Niospa meka sharakōi. Nā ea yoiai keskara ē aki,” ixō shināmis. Nā keskara yora isharakōitiro inimayanā.

²⁶ Akka fētsa shinākī iskafai: “Ē Jesús Ifofasharai,” ifiakī meka chaka fisti yoimis āa pārameyanā. Askara yōrakai Jesús Ifofasharama. Akikikai Nios inimaima. Nā keskara yōrakai tsoa ōimatiroma afeskax isharatiromāki. Atokairoko Nios Ifofaxō ato ōimaxiki. ²⁷ Askatari nō Jesús Ifofasharaxō fakefo apamaisfoya, kēro ifomafafari nō ato kexesharatiro, omiskōiaifāfe. Nāskatari nō Jesús Ifofasharaxō a afara chakafaifo keskara nō atiroma. Nō aska sharaito noko ōi nokoki Jesús inimatiro. Nāskarafo nōko Ifo Jesús keskara sharakōi ikani.

2

Yora kori ichapaya fisti sharafatama a afaamaisfori ato sharafakāfe

¹ Efe yora mīshtichi, nōko Ifo Jesucristo xanīfofinakōia. Nāskakē noko noipakenaka. Yora afama mīshtifoya, afaamaisfoyari keyokōi noko Jesús noi. Nāskatari māri Jesús chanīmara famis, noko Jesús noiai keskafakī, keyokōi

noikāfe. Nā yora kori ichapaya fisti noikakīma, nā yora afaamaisfoiyari noikāfe. ²⁻³ Akka mā ichanāino feronāfake kori ichapaya oro anīcho efapa safefāi rapati sharakōi safeax mato fe ichanāiyoi oaito, mā shinākī iskafatiro: “Nafi afama mīstifoyaki, nāskakē nō ifisharai,” ixō mā shinātiro. Nāskaxō, “Nono tsaoyofe keyokōichi mia ōinōfo,” mā fatiro. Mā askafaino, feronāfake afaamais rapati chapokōi safeax mato fe ichanāpaiyaito mā iskafatiro: “Onī nīxō ōife,” askafayamakī, “Onī nāmā tsoxō ōife,” mā fatiro. ⁴ Mā askafakī mā chakafai. Nā kori ichapaya noikī nā feronāfake afaamaisya mā ifimisma. “Jesús shināi keskara nōri nō shināi,” ixō mā yoimis. Anori yoifi mā askamisma. Feronāfake afaamaisya ifisharaxma Jesús shināi keskara mā shināima.

⁵ Efe yora mīstichi, ē mato noikōi. Akka ē mato yoiai keskara ea nikasharakāfe. Yorafāfe afaamaisfikaxō, Jesús chanīmara faifāfe ato noixō Niospa ato katoni afe yorakōifo inōfo. Ato yoiyoni iskafakī: “Mā ea chanīmara fakī, mā ea noikōi. Nāskakē mā efe ipanaka ē xanīfo ika ano. Nāskatari nā ēfenāfo mātonāri ixii,” ixō Niospa ato yoiyoni. ⁶⁻⁷ Askafixō a afaamaisfoya mā ato ikisharakōima, mā ato chakafai ato ōikaspayanā. Akka shinākapo afe keskarafomākī kori ichapayafo. Nā kori ichapayafāfe mato omiskōimakani. Mā ato nimikē xanīfo ano mato iyokaxō mato karaxa mēra ikimapaikani. Askarafāfe nōko Ifo chakafakī mekafamisfo. Akka a kori ichapayafāfe mato noikanima ato kori fisti noi kakī. Akka, çafeskakī a kori ichapayafo mā ato ifisharapaimē mato chakafafiaifono? Akka a afaamaisfo mā ato noikas-pamis.

⁸ Akka kirikaki Niospa meka kenekī iskafanifo: “Nā mā noimekōiai keskari-akī fetsafori noikōikāfe,” ixō yoinifo. Nā Niospa yoini keskara mā nikakōiax mā isharakōikai. ⁹ Akka mā fetsafo noiamax mā shara ikima, chaka mā iki. A Niospa Moisés yoini keskara mā akima. Nāskakē, “Mā nikayospakōifo,” Niospa mato fatiro. ¹⁰ Niospa noko yoiyoni iskafakī: “Keyokōi noikāfe,” noko fani. Akka keyokōi Niospa noko yoini keskara nō nikafikī afara fisti nō shināmakixoma nō chakafai. Nāskakē Epa Niospa noko ōi nā nō afaa nikama keskara. ¹¹ Shinākāpo. Niospa noko yoini iskafakī: “Kēro fetsa fe oxayamakāfe. Xotofakeri feronāfake fetsa fe oxayamakāfe,” noko fani. Askatari, “Yora reteyamakāfe,” Niospa noko fani. Akka kēro fetsa fe mā oxayamafikatsaxakī mā yora retekī Niospa noko yoini keskara keyokōi mā nikama.

¹² Akka Niospa noko noikī, āfe meka noko yoini nō afaa chakafanōma. Nāskakē noko yoini keskara, nō keyokōi nikasharaito noko omiskōimanima. Akka nāfo tāpikōixō, keyokōi nō nikakōixō nō ato yoisharatiro. Askatari fetsafo sharafakāfe, askara sharakōikī. ¹³ Mā askaxō Niospa noko yoini keskara, mā yorafo noiyanā ato shinākī mā ato sharafai. Mā askafaito Niospa mato omiskōimatiroma. Akka mā yora fetsafo mā noiyamaito Niospari mato noixoma mato omiskōimatiro.

Nō Jesús chanīmara fakōixō nō fetsafori afara sharafaxotiro

¹⁴ Efe yora mīstichi, ē mato yoisharapai. Akka fētsa yoikī iskafai: “Ē Jesús chanīmara fai,” ixō yoifixō yorafo sharafamisma, askarakai sharama. Nāskaxō mā noko ōimani mā kai Jesús chanīmara faama. Nāskakē mā Nios fe nīpanakama. ¹⁵⁻¹⁶ Akka a Jesús chanīmara faa fetsa omiskōi afaamaisyax matoki nokoaito, mā iskafatiro: “Mī rapati safesharata katāfe, matsi meya-maxiki. Askatari pisharatāfe fonāiyamaxiki,” mā fafiakī mā kai afaa ināmisma, askarakai sharama. ¹⁷ Akka mā yōra nāxokai anā fetsafo afaa sharafaxotiroma. Nāskarifiakī fetsafāfe yoikī iskafatirofo: “Ē Jesús chanīmara fai,”

ifiaxō fetsafo afaa sharafaxomisma atokai Jesús chanĩmara fakõinama. Nã keskarafi yora naa keskarakĩ.

¹⁸ Akka fẽtsa shinãkĩ noko iskafatiro: “È Jesús chanĩmara fai. Nãskakẽ Epa Nios ãfe Ifo,” ifiaxō fetsafokai sharafamisma. Akka ã iskafai: “Èri Jesús chanĩmara fai. Askatari ã fetsafo sharafamis. Nãskakẽ mĩ ea tãpitiro Nios ãfe Ifokẽ.” Akka mĩ, “È Jesús chanĩmara fai,” ifiaxō mĩ fetsafo sharafamisma. Akka, ¿afeskafaxō mĩ ato õimatiromẽ mĩ Jesús chanĩmara faxō? Akka ã fetsafo sharafakĩ ã ato õimatiro ã Jesús chanĩmara fakĩ. ¹⁹ Akka mĩ yoimis iskafakĩ: “Nios fisti, anã ano Nios fetsama,” ixō mĩ yoimis. Nãskakẽ mĩ chanĩmara fai. Nã mĩ chanĩmara fai keskara shara. Akka nã niafaka chakafãferi chanĩmara fakani Nios fistikẽ. Akka chanĩmara fafiakanax rateifinakõikani choakani mãmãi tãpikanax a omiskõipakenakafõ mẽra Niospa ato potaxiaino. ²⁰ Akka mĩ yoimis: “È Jesús chanĩmara fai. Nãskakẽ ã Nios fe nĩpanaka,” ixō mĩ shinãfikĩ, mĩ afaa sharafamisma. Nãskakẽ mĩ shinãsharaima. Akka ã mia yoisharapai. ²¹ Akka nõko xini Abrahamnoa shinãfe. Niospa yoini iskafakĩ: “Mĩ fake Isaaca ea fĩshkoyamafe,” fani. Askafaino Abraham ãfe fake fishkomĩsanima, ãfe fakekõifiano. Nãskakẽ Niospa Abraham õini sharakõi mãmãi nikasharakõiaino. ²² Akka shinãpo. Abraham Nios chanĩmara faxō nã yoiai keskara ani. Akka Abraham yoikĩ iskafanima: “Epa Niospa, ã mia chanĩmara fafiãxō mĩa yoiai keskara ã akima,” ixō yoinima. Askafaino akiki Epa Nios inimakeranima. Abraham Nios chanĩmara faxō, Niospa yoini keskara ani. Nãskakẽ Nios akiki inimakõini. ²³ Taefakĩ kirika kenenifo Abraham Nios chanĩmara fakõinaito. Nãskakẽ Abrahamki Nios inimani. Nãskaxō Niospa yoini: “Mĩfi efe rafepak-enakakĩ,” fani.

²⁴ Nãskaxō mã tãpitiro fetsa iskaito: “È Nios chanĩmara fai,” ifiaxō Niospa yoia keskara akima, askara yorakai Nios fe nĩpaxatiroma. Niospakai, “È mikiki inimai,” fatiroma. Akka fẽtsa chanĩmara fakĩ, Niospa yoia keskara aki, nãfi Nios fe nĩpanakakĩ. ²⁵ Nãskarifiakĩ nã xotofãke Rahab Nios chanĩmara faxō nã israeli rafe ato oneni tsõa ato reteyamanõ. Rahab taeyoi chota feromakõi iyopaoni. Mã askapaonixakĩ, chipo Nios Ifofaax sharakõi ipaoni. Nãskaxō nã israeli rafe Josué ato nĩchini Jericó anoafõ ato õitanõfo onexõ. Nã rafe Rahab ato oneni tsõa ato reteyamanõ. Nãskaxō ato fai fẽtsa nĩchini fotanõfo. Nãskakẽ nã xotofake Rahabki Nios inimani.

²⁶ Mã nõ naano, nõko fero mẽsho nomakinoax tsekeano, anã nõko yora shara itiro. Nãskarifiakĩ nõ Nios Ifofayamakĩ nõ isharatiroma. Nãskaxō Niosxõ nõ fetsafo nõ axosharatiroma. Nãskaxõ nõ tãpitiro nõ Nios chanĩmara faimãkai.

3

Meka shara fisti yoikãfe

¹ Efe yora mĩshtichi, ã mato afara fetsa yoinõ. Mã Niospa meka tãpifixõ nikasharaxoma mã ato tãpimapaiyamakãfe. Akka nõ Niospa meka nikasharaxoma nõ ato yoiaito noko nikakaxõ akairi afara chakafatirofo. Nãskakẽ Niospa ato omiskõimafiakĩ, ato omiskõimasharanima. Akka nokoroko omiskõimakĩ finai. Nãskakẽ Niospa meka nikasharaxoma nõ ato yoitiroma. ² Akka fake yome rama finipai paketiro kerex sharaxma. Nãskarifiakĩ nõko mekapa nõ afara chakafatiro, Nios Ifofasharaxoma. Akka fẽtsa meka chaka yoikĩma meka shara fisti yoifafãini nã keskaratokai afaa fetsa chakafaima ãa kexemesharatiro. Akka shara ifiakani tsoa shara imisma, afara chakafamisfo.

³ Akka shinãkapo. ãfe ifãfe ãfe kamayo renexiti fatiro. Askatari afara pishta aostatiro. Nãskax a kamaki tsoax ifo kafãsatiro. Akka kamayo efapafiano

nā aostamea pishta āfe yora kexetiro nā kapaiyai ari kanō. ⁴ Askatari shinākapo. Kanōa efapanāfāfiano āfe fiti pishtafakeshta. Kanōa efapanāfāfiano āfe fīti āfe ifāfe chiataxō nā iyopaiyai ari iyotiro. Faka faipafāfekē, nā iyopaiyai ari iyotiro ifāfe chiataxō. ⁵ Nāskarifiāi nōko anari efapayamafiano nō yoikī chakakōi nō yoitiro. Nāskarifiakī chii pishta nō kētefaano nefekī chii xoisafatiro. Nāskakī nōko afarafo noko kōatiro. ⁶ Nāskarari nōko ana pishtafiano, nō chakai mekaino, nōko meka efapatiro. Nāskakē nō yorafo chakana fatiro Satanās noko pāraino.

⁷ Akka yoināfo fetsa fetsatapafoya, peyafoya, xōchixaraifori, faka mēra ikafoya nō ifofamatiro. ⁸ Akka nōko anakai tsōa ifofamatiroma noko nikanō. Nōko anā nō mekai chakakōi imis nō itiro. Nā rono pae keskarakōi. Rono paekapato noko chachiano nō omiskōitiro. Nāskarifikī nōko anā yora fetsa mekafakī, chakafakī, nō omiskōimatiro. ⁹⁻¹⁰ Nā nōko ana fistichi nō afara chaka yoitiro. Nāskatari nā nōko ana fistichi nō Epa Nios yoitiro iskafakī: “Epa Niospa, mī sharakōi. Mī nōko Ifo,” ixō nō yoitiro. Epa Niospa keyokōi yorafo onīfani āfe ōiti keskara inōfo. Askafixō nō fetsa mekafakī chakafatiro, askafayamakī Niosnoa meka shara nō yoitiro. Efe yora mīshtichi, meka sharafekai meka chaka osia shara itiroma. ¹¹ Mai mēranoax faka tsekeai shara itiro, askayamai faka pota tseketiro. Nāskax nōko faka fiti anoax faka pota fe faka shara tseketiroma. ¹² Shīko fanax xopaya foaitiroma. Askatari sātera fanax fāraya foaitiroma. Askatari faka fiti anoax faka pota tsekeaino, faka shara tseketiroma, nō mea shara itiroma. Nāskarifikī yōra āfe shinā mēraxō Jesús shinākī fena afaa chaka shināyotiroma.

Nios fistichi noko shināsharamatiro

¹³ Akka fētsa mato mēraxō Niospa meka tāpisharax āfe ōiti keskara shara ikī, nā keskara yōra shara ixō mato axosharafafāitiro. Nā keskara yōra āfe shinā mēra shinākī iskafatiro: “Ē afaayamafixō ē Jesucristoōnoax isharaxō, ē yorafo sharafai,” ixō shinātiro. Askaxō mā noko ōimani Jesús Ifosharafakī. ¹⁴ Akka mā isharaxoma, mā fetsafāfe fiāi keskara mā fipaimis, askatari mā finakōia ipaimis, ato finōpaiyanā mā askaino mato ōiti fekaxtetiro. Nāskax mā isharatiroma. Nā afara chaka fisti mā shinātaifa, askarafo shināi, ini-mayamakāfe. Anori shināi iskayamakāfe: “Ē Niospa meka tāpishara, ē āfe ōiti keskarakōi,” iyamakāfe. Anori shinākī mā yoisharaima. ¹⁵ Mā askara chaka shināito Niospa mato shināmanima. Mā chaka shināi keskara nā Jesús Ifofaafāfema nāskarari shinākani, Satanās ato shināmanaino. ¹⁶ Fetsafāfe fiāi keskarari mā fipaimis, askatari mā ato finōpaimis, askafakī nā Jesús chanīmara faafo fe mā feratenāmis. Askaxori mā ato fekaxtefapaimis. Askatari afara chaka fetsa fetsatapafao mā ato amamis.

¹⁷ Akka Niospa noko mēstesharakōi noko shināmasharakōitiro. Nō shara inō, askatari nō fetsafo fe nō mēnāpaiyamanō, tanaimakōi isharakōixō fetsafo nō noisharakōitiro afara axosharayanā, askatari fetsafāfe noko yoipaiyai keskara nō nikakōitiro, askatari fetsafo omiskōiaino nō noiyanā nō axosharatiro. ¹⁸ Nō afara fanaxō, āfe fimi nō fitiro mā fimiyo. Nāskarifiakī nō isharakōixō a Niospa apaiyai keskara nō shināsharaxō, nō fetsafo shināmsharatiro, tanaima isharakōinōfo.

4

Niospa fichipaiyaima fichipaiyamakāfe

¹ ¿Afeskai mā raenā faatanāsharakōimamē? Akka mato shinā mēraxō afarafo mā chakafapai. Nāskax mā feratenā faatanāpai, ōitifishkiyanā. ²⁻³ Mā afarafo fipaikī fiamax mā ōitifishkikī finakōikī mā fetsafo meepaiyanā mā retepaitiro.

Akka a Niospa mato ināpaiyai mā yōkama. Nāskakē Niospa a mato ināpaiyai mato inātiroma mā yōkayamaino. Nā afama mīshtifo mā apaiyai nā fisti mā shināi, fetsafo shinākima. Askaxō mā afara yōkafiaito Niospa mato ināima, mākōimāi mā afarafo fipaiyaito fetsafo inākima.

⁴ Akka kēro feneyafix feronāfake fetsafo fe imis keskarakōi māri nāskarakōi. “Jesús ēfe Ifoki,” ifixō mā Jesús Ifofakōinama. Nā mā shināi keskara chakakōi. ¿Mā tāpiamamē mā fetsafo feta afara chakafakī, mā Nios noima? A Niospa fichipaiyaima, mā fichipaiyax mā Nios fe rafetiroma māmāi noikaspakī.

⁵ Niospa āfe Yōshi Shara nō mēra naneano nō afe rafepakenaka. Akka shinākapo. Nō afara fetsa noikōikī nō Nios noisharaimano āfe Yōshi Shara shināmitsatiro. Akka Niospa meka kirikaki kenenifo iskafakakī: “Epa Niospa āfe Yōshi Shara nō mēra naneni. Aōxō noko noikī finakōi. Akka nō Epa Nios noisharayamakī nō afara fetsa noikōiaino āfe Yōshi Shara shināmitsatiro,” ixō kirikaki kenenifo. Nāskakē kaxpa noko kenexonifoma. ⁶ Askatari Niospa meka kirikaki kenekī iskafanifo: “Fētsa Epa Nios nikakaspakī āa apaiyai keskara fisti aki āa kakapaiyanā, aa keskara fe kai, Epa Nios afe rafetiroma, akiki inima. Akka fētsa Epa Nios nikapaikī Epa Nios fenai afe isharapakexakī. Nāskakē Epa Nios akiki inimatiro, askara fe Epa Nios rafesharatiro,” ixō kirikaki kenenifo. Nāskakē Epa Niospa āfe Yōshi Shara nō mēra naneano nā fisti nō noikōiaino Epa Niospa noko axoshari nō Ifofasharanō.

⁷ Nāskaxō yoikī iskafakāfe: “Epa Niospa, mīa amapaiyai keskara ea amafe,” ixō yoikāfe. Akka Satanás mato afara amapaiyaito yoikī iskafakāfe: “Satanás, Jesucristo ēfe Ifokī ea fekaxtefakima, emakinoax katāfe,” ixō yoikāfe. Mā askafaino mato makinoax ichotanō. ⁸ Nios Ifofasharakāfe. Mā Nios Ifofasharaino mato fe rafei. Nāskakē mato chaka xatekāfe afaa chakafapaikakima. Akka fētsa Nios Ifofasharapaifikī, Satanásri ifofapai, askatamaroko, Nios fisti Ifofasharakāfe. ⁹ Afara chakafaxō shināchakakōikāfe inimakakima. “Ē afara chakafaax ē rāfikōiaito meei,” ixō shinākāfe. ¹⁰ Nāskakī Jesús yoikāfe iskafakakī: “Jesús mī ēfe Ifofekē ē mīa chakafaki. Ea anā chaka soaxōfe,” ixō yoikāfe. Mā askafaito Niospa mato inimamai. Nāskakē noko yoixii iskafakī: “Ē mia noi. Ē mia anā chaka soaxonō, mikiki inimayanā,” ixō noko yoixii.

Fetsaōnoa yoikī chakafayamakāfe

¹¹ Niospa meka noko yoikī iskafakī Moisés kirikaki kenenī, Niospa shināmanaino, “Nōinā faatanākāfe,” ixō noko yoini. Nāskakē fetsafo pārāyamakāfe, ato chakafakī mekafayamakāfe. Mā ato chakafakī Niospa noko yoini keskara mā akima ato noikīma. Akka, “Niospa meka chakara,” nō fatiroma nikakaspakī. Askatamaroko nō nikakōisharatiro. ¹² Nios fistichi noko yoini afeskax nō isharatiromākī, ares fistimāi xanīfokōixō. Ares fistichi tāpikōia nō afe keskara ikamākī, shara iyamai chaka nō ikamākī. Ares noko ifitiro. Akka noko ifiyamakī omiskōipakenakafo mēra noko potatiro. Nāskakē fetsafo pārāyamakāfe.

Mā kai tāpiama a inōpokoai afe keskara iximākai

¹³ Meka fetsari ē mato yoipai. Ea nikakapo. Mā kai afaa tāpiama fatora penata afara afeskara ifiāito mā yoimis iskafakī: “Na penata nō kayamai, penama nō kai pe xe rasi ano. Anoxō nō xinia fisti akikai. Anoxō nō kori ichapa fixii nōko afarafo minixō,” ixō mā yoimis. ¹⁴ Nāskakē anorima mā shinākōimis. Mā kai afaa tāpiama fatora penata afara afeskara afaiano. Akka fakishpari nai nifi keyopaketiro. Nāskax yamarisatiro. Nāskarifiāi

nō nīpanakama. Fatora penata nō narisatani. ¹⁵ Nāskakē mā yoitiro iskafakī: “Niospa fichipaiyai keskara ē iki. Nāskakē nā apaiyai keskara ē aki,” ixō yoikāfe. ¹⁶ Askatamaroko mā kakapaikōimis. “Ē afara ichapa fii,” ixō mā yoifafāini. Niospa mato amapaiyai keskara mā shināima. Nā mā shināi keskara chakakōifo. ¹⁷ Niospa mato amapaiyai keskara mā tāpifixō mā askara atama mā afarafo chakafamis.

5

Nā afama mīshti ichapayafō Santiago ato yoini

¹ Nikakapo kori ichapayafāfe, mato Niospa omiskōimaxii. Nāskakē oiakāfe mā mā omiskōixikai. ² Māto afama mīshtifo mā payokomea. Māto rapati sharakōifo mā nakaxfāfe pikī keyoa. ³ Māto kori mā mekemis mātonā fisti mā fapaikī. Mā mekeaino mā xinina. Nāskakē fetsafāfe tāpitirofo māto kori mā mekea mā xininaano, toa pishta ināxoma, mātonā fisti mā fapaikī. Mā askafaito Niospa mato ōi. Akka mato yoikī iskafaxii: “Māfi afara fishkomītsamiskī. Mā kai toa noimisma. Nāskakē ē mato omiskōimaxii,” ixō yoixii. ⁴ Shinākapo. A mato yonoxomisfo mā ato afaa ināsharamisma, mā ato feparamis finōmafāi fifiakī. Nāskakē Epa Nios yoimisfo iskafakakī: “Epa Niospa, noko axōfe nōko patoronō noko kopifamismakī,” ixō yoimisfo. Askafaifono Niospa ato nikamis. Akka a mato yonoxomisfo mā ato omiskōimanai keskara Niospa mā tāpikōia. ⁵ Askatari mā afama mīshtifoyax mā isharakōia, afaa yopatama. Afama mīshti ichapayata, ichapa pifāi, rapati ichapayata, nā afarafo mā fipaiyaifo mā fifixō fetsafo mā noimisma. Fetsafo keskarama mā isharakōikē, Niospa mato omiskōimakī finakōixii mā fetsafo noiyamaito. ⁶ Fetsafāfe afaa chakafayamafiakē mā ato pāramis xanīfo yoikī, xanīfāfe ato retemanō. Nāskatari āakai afeskax ifimetirofoma a yorafo.

Omiskōifikī tenekāfe, Nios kīfikāfe

⁷ Efe yora mīshtichi, mā omiskōifi fena fenayamakāfe. Nōko Ifo kachikiri fayamakāfe. Akka nō tarepa xiki fanano fenāmāshta foaitiro. Nāskakē nō fena fenakima. Nō oi manayotiro. Akka mā choshiano nō fisharakōitiro foaisharano. ⁸ Nāskarifikī manasharayokāfe nā nōko Ifo Jesús chaima nokoaitīa. Nāskakē āfe meka kachikiri fakākima, nikasharakāfe shināchakakākima.

⁹ Efe yora mīshtichi, feratenāyamakāfe Niospa mato omiskōimayamanō. Nā nōko Ifo Jesús chaima nokoaitīa nā yora chakafo ato omiskōimaniyoi. ¹⁰ Efe yora mīshtichi, ē mato yoisharapai, shinākapo. Niospa meka yoimisfo Niospa meka yoikani omiskōipaonifo. Omiskōifikani fena fenapaonifoma. Nōko Ifo nikaki finakōipaonifo. Āfe meka yoikī enepaonifoma. ¹¹ Nāskakē Nios atoki inimani. Askatari nōko xini Job omiskōifikī teneni. Omiskōifikī Nios potanima. Nāskakē Nios Jobki inimani. Nāskakē Niospa Job sharafarisafatani. Nāskatari Niospa Job āfe fake fetsafoya āfe ina fetsafori ichapa anā ināni. Nāskakē nōri nō Job shinākī nō tāpisharatiro Niospa noko noisharakōiaito.

¹² Efe yora mīshtichi, ea nikasharakapo ē mato yoinō. Afara chanīma fisti yoifafāikāfe. Nāskakē, “Ēje, ē mia axōi,” ixō axosharakāfe. Akka mā yoikī iskafakī: “Maa. Ē mia axōima,” ixō anori yoita ayamakāfe. Mā askafamiskē keyokōichi tāpitirofo mā chanīkima yoimiskē. Nāskakē iskayamakāfe: “Ē mia pāraitō, Epa Niospa ea omiskōimatiroki,” ixō yoiyamakāfe Epa Niospa mato omiskōimayamanō.

¹³ Fetsa omiskōikī Epa Nios kīfitiro kexesharanō. Askatari fetsari inimai fanāitiro. “Aicho Epa Niosi, mī fāsi sharakōi,” ikax fanāitiro. ¹⁴⁻¹⁶ Askatari nā isinī ikaito Jesús chanīmara faafo āto kexemisfo kenatiro Nios kīfixonōfo.

Nāskakē ichanākaxō a isinī ikai Nios kīfixoxikakī. Taefakī a mā afarafo chakafamis kāimakāfe. Nāskax mā ranā Epa Nios kīfinōnākāfe mato chaka soaxonō, askatari a isinī ikairi sharafanō. Nāskakē a isinī ikai xiniyaxō femākāfe, Epa Nios kīfixoyanā. Mā nōko Ifo chanīmara fakōixō nōko Ifo mā kīfixonaino, nōko Ifāfe a isinī ikai sharafatiro. Askatari afara chakafaino Niospa āfe chaka soaxotiro. Nō Epa Nios chanīmara fakōita nōko chakafori keyokōi kachikiri faxō nō kīfiato noko nikakōitiro. Nō yōkai keskara noko afama mīshti axotiro.

¹⁷ Nā Nios yoimis āfe ane Elías feronāfake noko keskarari ini. Nāskaxō Epa Nios fāsikōi kīfiaino oi inima. Kīfikī iskafani: “Epa Niosi, efe yorafāfe mia kachikiri faafokī, fena oi imayamafe, efe yorafāfe anā mia Ifofayonōfo,” ixō yoini. Askafaino xinia tres ata mā xinia fistiri keyoaino oi inima. ¹⁸ Askata anā Elías Epa Nios kīfini oi inō. Nāskakē oi ranā ikaino fanafo foaisharani.

¹⁹⁻²⁰ Efe yora mīshtichi, fētsa Niospa meka kachikiri fakī anā Jesús Ifofaimano, nā Jesús chanīmara faato yoikī iskafatiro: “A mī afara chakafamis xatefe, anā Jesús Ifofaxii,” ixō yoaino anā Jesús Ifofatiro. Nāskaxō fētsa mā āfe chakafo xatemanano, Niospa āfe chaka soaxoxii. Nāskakē nā feronāfāke afara chakafapaoni Niospa āfe chaka soaxō, anā Niospa shināchakaima fētsamāi taefakī āfe chaka xatemanano. Nāskakē a omiskōipakenakafo mēra kaima. Nāskakēri mā ato yoisharatiro anā Jesús Ifofanōfo. Nā tii.

Santiago

Pedro Jesús Chanĩmara Faafu Kirika Kenexõ Fomani

Pedro Jesús Ifofaafu paxkanãnifono ato kirika kenexõ fomani

¹ Ëkĩa Pedro. Jesucristo ea nĩchini aõnoa ã ato yoimis inõ. Niospa mato katonu afe yorafo mã inõ. Akka mato potaifono mã Jesúsnoax paxkanãnino ã mato kirika kenexõ fomai mã tãpinõ. Ponto anoafu fomata, Galacia anoafu fomata, Capadocia anoafu fomata, Asia anoafu fomata, Bitinia anoafu fomata, ã mato fomai. ² Epa Niospa taefakĩ mato katonu mã afe yorafo inõ, ãfe Yõshi Sharaõxõ nã mato amapaiyai keskara mã anõ, mã Jesucristo nikasharakõinõ. Akka ãfe Fãke Jesús mato nãxonu ãfe imiõxõ mãto chaka mato soaxoxiki. Niospa mato noikĩ mãto õiti mato sharafaxonõ ixõ ã matoõnoa shinã.

Jesucristoõnoax nõ Nios fe ipaxatiro

³ Nãskakẽ nõko Ifo Jesucristo ãfe Apa Nios nõ aicho fatiro: “Mĩ fãsi sharakõi,” ixõ nokomãu noikõiaino ãfe Fake Jesucristomãu nõkoõnoax naax anã otonikẽ. Nãskaxõ fake yome rama kãia keskara shara noko imai õiti fenasharayakõi. Nãskakẽ nõ afe isharakõipakenaka. ⁴ Nãskaxõ noko ikisharapakenaka nõ afe ipaxanõ. Akka nõ ãfe fakekẽ nã nai mẽraxõ noko mekexona nõkonãri ixii. Nã Niospa noko mekexona afanã afeskafatiroma, chakanari atiroma, askatari keyotiro. Charofo keskarama. Charofo sharashtafiax chipo otsi fetsetiro. Nãskakẽ nãfo Niospa noko mekexona nõkonã inõ. ⁵ Akka mã Nios chanĩmara fakẽ, Epa Niospa ãfe sharaõxõ mato kexesharafafãini nã Jesús oaitĩa mã omiskõinõma, nã oaitĩa afe isharapakexakĩ a mato itipinĩshara faxonu ano.

⁶ Nãskakẽ mã inimai finakõikakaini, omiskõifi nono mai anoax. Mã omiskõifiax chipo Jesús fe mã isharakõipakenaka. ⁷ Akka mã Jesucristo chanĩmara fakõini mã oa oro keskara. Akka kooaito mã õitiro orokõimãki, chakaya osiyamaito. Nãskarifiakĩ Niospa noko tãpitiro nõ chanĩmara faimãkai, akka oro sharafiano nõroko finõinĩfofana. Akka nã oro sharafiax keyotiro. Akka mã Epa Nios chanĩmara fasharakõiyannã mã Jesús potayamaino Jesús anã nãmã matoki fotoax inimasharakõixii. Iskafakĩ mato yoixii: “Aicho, mĩ ea chanĩmara fakõimis. Mĩ efe isharakõipakenaka,” ixõ mato yoixii.

⁸ Mã Jesucristo noisharakõi õiyamafikatsaxakĩ. Askatari iskaratĩa mã chanĩmara fakõini õiyamafikatsaxakĩ. Nãskakẽri mã inimai finasharakõiyannã mã tsoa yoisharatiroma. ⁹ Nõmãu chanĩmara fasharakõiax, nãskax nõ afe isharakõipakenaka.

¹⁰⁻¹¹ Nã Niospa meka yoimisfãfe a inõpokoai yoikakĩ Cristoõnoa meka shara yoipaonifo, Niospa Yõshi Sharapa ato shinãmanaino. Iskafakĩ yoinifo: “A noko noikĩ noko ifimis nokoki oxii, mato omiskõioxoxiki mã aõnoax isharanõ,” ixõ kenenifo. Ato askafafiaino tsõa tãpisharapaonima afeskaxoma tãpisharapaipaonifo. ¿Tsoamẽ noko ifimis ixiai afetiãri oximẽ? ixõ shinãpaipaonifo. ¹² Akka Niospa Yõshi Sharapa ato tãpimani a inõpokoai yoiaifo keskara, akka afãfe niyokaxõ õiyonifoma. Akka afãfe õiyamafiaifono mãroko mã mã õia. Akka na meka shara Jesucristoõnoa keyokõichi mã nõ nikamis. Noko yoiaifãfe Epa Niospa ãfe Yõshi Shara atoki nĩchini nai mẽraxõ Jesucristoõnoa noko yoinõfo. Nã mã nikamis keskarari Niospa ãjirifãferi tãpipaikõikani.

Epa Niospa noko yoini Jesucristo keskara shara nõ inõ

¹³ Nāskakē itipinīsharakāfe shināsharakōiyanā. Nā Niospa noko noikī noko afara shara ināxiatīa Jesucristo oaino. Nāskakē manasharakōikāfe. ¹⁴ Māfi Niospa fakefoki. Nāskakē Epa Nios nikasharakōikāfe. Mato amapaiyai keskara mā tāpiyopaonima. Mā afara chakafapaoni keskara anā ayamakāfe. ¹⁵ Askatamaroko afaa fetsa shinātama isharakōikāfe. Akka Nioskai afaa chakaya osiama. Niospa mato katonī a keskara shara mā inō. ¹⁶ Akka Niospa meka kenekī iskafanifo Niospa ato shināmanaino: “Ē isharakōimiski. Nāskakē isharakōikāfe,” ixō Niospa ato shināmanaino kenenifo.

¹⁷ Shinākapo. Mā Epa Nios kīfikī Epa mā famis. Nāskax nō āfe fakefokē noko ōi. Akka a āfe meka nikamisfo Niospa ato shara fai. Akka a nikamisfoma ato omiskōimatiro. Ares fisti Epa Niospa noko ōimis mēstekōi. Nāskakē isharakōikāfe nono nāmānoax. Nāskaxō Nios shināsharakāfe meseyanā. ¹⁸ Akka māto xinifāfe mato tāpimapaonifo keskarato mato nimapakexatiroma. Māto xinifo Nioski mesepaonifoma. Āakōi ipaonifo. Nāskakē māri ato keskara ipaoni chaka shināi. Mā askaito Niospa mato ifini mā anā chaka shināyamanō a mā ipaoni keskara Nios shināmax. Akka shinākapo. Mā mā tāpia a oro sharakōi mā Nios ināx mā aōnoax nīpaxatiroma. Askatari kori exe mā ināx aōnoaxri mā nīpaxatiroma. ¹⁹ Akka Cristo fistichi noko nimatiro. Atokai afaa chakafamisma, nā oveja fake meema keskara sharakōi. Jesús noko nāxoni āfe imi foni noko imasharapakexakī nō anā chaka inōma. ²⁰ Epa Niospa mai onifatama āfe Fake Jesús katonī noko nimapakexanō. Nāskafekē fetsafāfe tāpiyopaonifoma, akka iskaratīa Epa Niospa mā mato tāpimana. ²¹ Jesucristoōxō mā Epa Nios chanīmara fai, Epa Niospa Jesucristo otoax akiki inimakōini. Nāskakē mā iskaratīa chanīmara fakōini, Nios manakōiyanā afe ipaxakī.

²² Akka mā mā Jesucristoōnoa meka shara nikakōixō anā afaa chaka shināyamakī. Mā mā isharakōixō mā fetsafo noikōi. Nāskakē māa ranā nōinā faatanāsharakōikāfe māto shinā sharafoyaxō shināsharakōita. ²³ Nāskakē nā mā rama fake kāia keskara shara mā. Akka māto epa feta māto ēfa mato fake fifiakanax chipo natirofo. Akka Niospa āfe meka sharaōxō fena keskara shara noko ima, nā keyonakama. ²⁴ Akka kirika ano kenekī iskafanifo:

Keyokōi yorafo fana keskarrafo, sharakōifikanax nā charofo keskarrafo.

Akka nā fanafo naino āfe charofo keyopaketiro. Nāskarifiāi keyokōi yorafo nīpaxatirofoma, keyokōi natirofo. ²⁵ Akka nōko Ifāfe āfe mekakai keyonakama, ixō kenenifo. Nā mekaōnoa Jesucristoōnoa fetsafāfe mato yoimisfo mā afe ipaxanō.

2

¹ Nāskakē nā mā afara chakafamisfo xatekāfe. A mā ato pāramisfo, askatari a mā ato feparamisfo: “Noko sharara fanōfora,” ixō nāfori xatekāfe. Nāskatari a fētsa fiaī tii fipai fekaxtemis iyamakāfe. Askatari fetsafo ato chakafapai chanīmis iyamakāfe. ²⁻³ Askatamaroko nā fake rama kāiato yosixiki chocho apaiyai keskafakī, māri Niospa meka shara fichipaikāfe, oa fake yomē chocho aki yositiro keska shara ixikakī. Mā mā tāpiaki nōko Ifāfe mato shara faxōaito. Nāskakē nā Epa Niospa mato amapaiyai keskara fisti akāfe.

Cristo nā tokiri mitsisipa keskaraki

⁴ Nō pexe fakī tokiri mitsisipasharakōi nō fenatiro, pexe mitsisipa sharakōi inō. Akka tokiri mitsisipakima nō pexe faano pexe shara itiro. Nōko Ifo Jesucristofi nāskarakī oa tokiri mitsisipakōi keskara shara. Nāskaxō afama mīshti fatiro. Nāskafekē tsōa chanīmara famisma, nōko Ifo fichipaimisfoma. Nāskaxō yoimisfo iskafakakī: “Afeskakīkai nō fichipaitiro,” ixō yoimisfo.

Akka Epa Niospa Jesús katonni noikōikī nōko Ifo inō. Nāskakē akiki fekāfe Ifofaxikakī. ⁵ Nāskarifiakī Niospa mato tokiri pexefā keskara faxii mā afe yorafokē. Askatari mā ato Epa Nios kīfixomis inō mato imaxii afaaya osiama sharakōi mā inō Jesúsnoax, Jesúsmāi noko nāxonikē. Nāskakē Nios aicho fakāfe akiki inimakōikāfe, “Epa Niosi, mī fasi sharakōi,” fayanā. ⁶ Akka kirika ano kenekī iskafanifo, Niospa ato shināmanaino:

Ōikapo, ē Cristo ōia ares fisti sharakōi. Nāskakē ē katonni efe yorafo afe yora inōfo. Nā tokiri mitsisipa keskarakōiki. Nāskakē afe yorafo afe isharakōipakenakafo. Nāskakaxō Cristo chanīmara fakaxō anā afaa chaka shināpakenakafoma. Askatamaroko afe inimakōipakenakafo, ixō Niospa yoini.

⁷ Nāskakē nō Jesús Ifofaxō nō shinākī iskafatiro: “Jesúsfi nā tokiri kerex keskarakōikī, nāskax sharafinakōiaki,” ixō nō shinātiro. Akka a Jesús Ifofaifāfema askara shinākanima: “Oa tokiri shara nō potatiro,” keskafakani. Akka aōnoa yoikī kirika kenekī iskafanifo Niospa ato shināmanaino:

Oa tokiri pexe famisfāfe tokiri efapa shara potafono, pexe ifāfe ato yoitiro iskafakī: “¿Afeskakī na tokiri efapa mā potaimē? Potayamakāfe, efapa sharakī. Ē fichipaikai ē akiki pexe fanō,” ixō pexe ifāfe yoitiro, ixō yoinifo Jesúsnoa yoikakī. ⁸ Askatari kirika kenenifo iskafakakī Niospa Yōshi Sharapa ato shināmanaino:

Tokiri efapafai nēxpakīa rakano tsōa ōiamax akiki otisikaini paketirofo keskakani. Nāskarifiakani tsōa nōko Ifo chanīmara fakanaxma, oa pakeai keskarakanax fenokanax Epa Nios ika ari fopaifikani nā omiskōipakenakafo mēra fokani, ixō kenenifo. Niospa anori yoifinino Cristoōnoa nikayamakanax fenopakenakafo. Nānori kirika kenenifo, Niospa ato shināmanaino.

⁹ Akka māfi askaramakī. Niospa mato katonni afe yorafo mā inō. Nāfi nōko Xanīfokōikī mā yonoxotiro, fetsafori mā ato kīfixotiro Jesúsnoa ato tāpimaxiki. Noko aa keskara shara imaino mā afe yorakōi itiro. Nāskaxō aōnoa fetsafo mā yoisharatiro iskafakī: “Epa Nios sharafinakōia afara noko sharafaxomis,” ixō nō ato yoitiro. Epa Niospa mato katonni afe yorakōifo ikax xafakīakōi shara mā afe ipaxanō, anā fakish mēra ika keskara mā inōma. ¹⁰ Akka mā kai Nios shināyopaonima, afe yorakai mā iyopaonima. Akka iskaratīa mā afe yorafo, taeyoi Niospa mato noifiaino mā tāpiyopaonima. Akka iskaratīa mato noikōiaito mā mā tāpia.

Nō Niospa yorafo ikax nō shara itiro

¹¹ Efe yora mīshtichi, ē mato yoisharapai ea nikasharakāfe. A Nios Ifofaafo-mafo fe nō ato fe ikax oa yora fetsa keskara nō iki. Askafiax nōkai ato fe ipanakama. Akka nōroko Epa Nios fe īpanaka. Nāskakē nā Epa Nios Ifofaafoma keskara iyamakāfe. A mato shināmapaiyaifo keskara shināyamakāfe. Mā ato keskara itiroki, Satanás mato chakafamapai kiki. ¹² Nāskakē ato mēranoax Jesús Ifofaax isharakōikāfe. Akka afāfe mato yoikī chakafamisfo fanīrira mato mekakakī. Nāskakē ato kopiyaamakāfe. Tanaimakōi ato mēra ikāfe. Mā askaito mato ōinōfo mā afaa chakafatama mā isharakōikē a Niospa keyokōi noko ichanāfaitīa mā mai keyoaino. Nāskakē mato iskafakani: “Aicho, na yorafo fāsi sharakōifo, nō ato chakafafiaino noko kopikanima, Niosxō noko shara famisfo. Fāsi Nios sharakōi,” ixō yoinōfo.

¹³⁻¹⁴ Nōko Ifo Jesús fichipaiyai keskafakī, xanīfofo nikasharakōikāfe. Askatari a noko īkinā nōko xanīfo finakōia nikasharakōikāfe. A xanīfo fetsafori ato nikakāfe. Nā xanīfo finakōiato ato xanīfo imakī, afāfe nā afara chakafaifo ato omiskōimanōfo, askatari a afara shara famisfo ato

yoisharanõfo. ¹⁵ Nāskakē Niospa fichipaiyai keskafakī mā fetsafo afara shara faxõfafāikāfe. Nā afaa tāpiamafāfe shara shināmisfomakī, askatari Niospa meka tāpiafomakī õikaxõ anā mato mekafatirofoma māmāi ato shara faxõaito a Niospa fichipaiyai keskafakī.

¹⁶ Jesús fisti mātō Ifokōi, akka afaa fetsa shinātama isharakōikāfe. Niospa mato amapaiyai keskara fisti shinākāfe. Mā askax afaa fetsa mātō ifo itiro. Afaa chakafatama Nios yonosharaxõfafāikāfe. ¹⁷ Nāskakē keyokōi yorafo shināfafāikāfe. Nā Jesús Ifofaafori ato noikōikāfe. Niosnoa shinākōikāfe iskafakī: “Ē Nios noikōi nā ea yoiai keskara ě nikakōi. Ēkai nikayospapaima ea omiskōimanõma,” ixõ Niosnoa shinākāfe. Nāskaxõ mātō xanīfofo nikakas-payamakāfe, ato nikasharakāfe.

Cristo noko omiskōixoni keskai nōri nō aõnoax omiskōitiro

¹⁸ Ato yonoxomisfāfe mātō xanīfofo ato nikasharakōikāfe. Nā mato sharafafos shinākakīma. Nā yora chakafāferi mato yonomamisfoki ato nikakāfe. ¹⁹ Mā afaa chakafayamafiakē mātō xanīfāfe mato omiskōimanaino Nios shināki tenekāfe. Mā askaito Epa Niospa matoõnoa yoisharai kiki. ²⁰ Akka mā afara chakafakē mātō xanīfāfe mato omiskōimanaino, Niospa mato iskafakī yoitiro mā teneaito: “Mī afara sharakōifaa,” ixõ mato yoitiro mā māmāi afara chakafakē. Akka mā afara sharafaino mato omiskōimanaifono mā omiskōifināfikī mā tenekē, nōko Ifo Niospa matoõnoa yoikī: “Sharakōifo,” mato fatiro. ²¹ Cristo nokoõnoax omiskōikōini, nāskakē nōri aõnoax nō omiskōitiro. Nāskax nō aa keskara shara itiro. ²² Cristokai afaa pishta chakafamisma, askatarikai toa pishta pāramisma. ²³ Fetsafāfe mekafakakī ĩchafiaifono, atorikai kopikī toa ĩchamisma. Askatari omiskōimanaifono, “Ēri mato kopixii,” ixõ ato yoinima. Askatamaroko Apaõnoa shinākī iskafani: “Epa, mī eõnoa tāpiaki. Nāskarifikī mī ato tāpikōia. Nāskakē a mī ato chipo omiskōimaxiai chanīmakōi,” ixõ Apa shināni, Apamāi mēstekōi ikē. ²⁴ Cristo cruznoax noko nāxoni, nōko chaka noko soaxoxiki. Nāskakē nō anā fanīrira shinātiro oa yora naa keskara nō itiro mā noko chaka soaxonano nō afe isharapakexanõ. Māraki yora naato afaa shinātiro. Nāskax mēstekōi nō isharakōitiro. Nā noko omiskōixoniõnoax nō isharakōipakexanõ. ²⁵ Akka mā taeyoi oa oveja fenoa keskara mā iyopaoni afara chaka shināi. Akka iskaratīa mā Cristo Ifofasharakōi, mato kexesharano oa oveja kexemisto āfe oveja kexetiro keskafakī. Nāskaxõ mato kexesharakōiaino mā afe yora iki.

3

Afeskax fene fe kēro isharatirofomāki Pedro ato yoini

¹ Nāskarifiakī māri kērofāfe, mātō fenefo nikasharakōikāfe. Nā Niospa meka shara chanīmara faifāfema mā isharaito mato õikakī Niospa meka shara chanīmara fanõfo, mā afaa yoiyamata mā isharakōiaino õikakī. ² Mātō fenefāfe mato yoiaifono ato nikakaspakakīma ato nikasharakāfe. Mā Jesús keskara shara ikaito õikakī nōko Ifo chanīmara fanõfo. ³ Akka mā samasharakōi safexõ, foarome sharakōita, teoti sharakōi safeta, parotameti sharakōi mā safekē, mato tsõa tāpitiroma mā õiti sharaya iyamai mā õiti chakayakē. ⁴ Akka mā Cristo Ifofasharakōixõ mā ato õimasharakōitiro. Mātō õiti mēraxõ shināsharakōita, meka mitsisipato mā ato yoitiro, tanaima sharakōi mā itiro. Fetsafo õikī ato yoisharakāfe, ato fe isharakāfe. Mā askaito õikī Niospa mato iskafatiro: “Na kērofo sharakōifo ě õi,” ixõ Niospa mato yoitiro matoki inimayanā. ⁵ Nāskakanax kērofo ranāri Nios Ifofasharakanax isharakōipaonifo. Nāskakaxõ āto fenefo nikakōisharapaonifo. ⁶ Akka nā Sara āfe fene Abraham

nikakōisharapaoni, “Ēfe ifora,” fayanā. Nāskax mā isharakōiax, askatari mā meseyamax Sara āfe fenafo keskara mā itiro.

⁷ Akka māri feronāfakefāfe, māto āfifo ĩkisharakōikāfe. Nā kērofokai mit-sisipafomakī mato keskara. Nāskakē ato kexesharakāfe, mato feta Nios Ifofaafoki Niospa ato noikī atori ifiakī afe ipaxanōfo. Nāskakē māto āfifo ato noisharakāfe. Mā ato noimax ato kexesharaxoma mā kīfaiato Niospa mato nikasharatiroma.

Afara ato sharafaxōkani omiskōitirofo

⁸ Nāskakē isharakōixō keyokōichi nānori fisti shināsharakāfe. Oa mato fe yora mā noiai keskafakī ato fe nōinā faatanāsharakōikāfe. Ato shinākī ato axosharafafāikāfe. Askatari, “Nā yora afaa tāpīamafo ē finakōia,” ikaifo keskai askayamakāfe. ⁹ Fētsa mato chakafaito kopiynamakāfe. Askatari mato ĩchaito kopikiri ĩchayamakāfe. Askatamaroko ato noisharakāfe, akka Niospa noko katonikī noko sharafakī. ¹⁰ Niospa meka yōra kenekī iskafani, Niospa Yōshi Sharapa shināmanaino:

Mā isharapaikī afara chakafo yoyiyamakāfe, fetsafo pārāyamakāfe.

¹¹ Afara chakafo fishtayamakāfe, ato makinoax fotakāfe. Askatamaroko afara sharafos akāfe. Afeskax mā isharatiromākī nāskax isharakōikāfe fetsafo fe. ¹² A Niospa meka nikasharakōipaiyaifono Niospa ato kexesharakōifafāini, kīfiaifāferi ato nikakōimis. Akka a afara chakafamisfo Niospa ato nikatama ato tāpimatiro ato chakafakī, ĩxō yorafāfe Niospa mekaōnoa kenenifo.

¹³ ĴMā afara ato axosharaino, akka tsōa mato chakafatiromē? ¹⁴ Akka mā askafiaino mato omiskōimanaifono inimai finasharakōikāfe. Nāskakē atoki meseyamakāfe, askatari shināchakayamakāfe. ¹⁵ Askatamaroko nōko ōiti mēraxō nōko Ifo kīfikī iskafakāfe: “Cristo, mīfi ēfe Ifokōiki. Mīkai afaa chakafamisma, mī sharakōi,” ĩxō yoikāfe. Askatari fetsafāfe mato iskafaiifāfe: “ĴAfeskaxō mī tāpīamē mī Nios fe ipanaka?” ĩxō mato yoiaifāfe ato yoixikakī ĩkisi itipinīsharakāfe ato tāpimasharaxikakī. ¹⁶ Akka māroko isharakōita ato nikasharakōikāfe, mato ōinōfo mā shara ikaito. Māto ōiti fekaxtefayamakāfe. Akka mato chakafakī mekaifāifāfe iskafakī mato yoikanax: “Na Jesús Ifofam-ĩfāfe afara chakafamisfo,” ĩxō mato yoifikanax rāfitirofo māmāi isharakōikē. ¹⁷ Akka nō afara shara faino fetsafāfe noko omiskōimanaifono nō teneaino Epa Nios nokoki inimatiro. Akka nō afara chakafaax nō omiskōiaino nokoki inimatiro.

¹⁸ Akka Cristo nokoōnoax omiskōiax nani nōko chaka noko soaxoxiki. Anākai nanakama nai fistini. Sharakōifiano retenifo. Akka nō chakakōifokē noko nāxoni. Apa Nios ano noko imapakexakī. Akka mā nafīax āfe fero mēsho nanima, anā otoni Āpa Yōshi Sharaōnoax. ¹⁹ Akka mā naax āfe fero mēsho Niospa Yōshi Sharaōnoax a namisfo mēra kayoni a toa tseketiroma ano, anoxō yoikai. ²⁰ Akka nāfo nayokanaxma taeyoi nikayospakōi iyopaonifo. Nāskaifono Noéri nāno ato fe iyopaoni. Nāskakē Epa Niospa Noé manayopaoni kanōanāfā fayofaino, Noémāi Epa Nios Ifofakē. Āfe fakefori afe inifo, āto āfifo fe. Ocho inifo. Nāskakē ato fāka āsanima Epa Niospamāi ato kexesharakē. Akka nā nikayospafo ato fakafānē āsakī mitoni. ²¹ Faka faipafāino kanōanāfā mēra ĩkīax Noé āfe āfi fe āsanima. Āfe fakefori āto āfifo fe afe ĩkikanax āsanifoma. Ocho inifo. Nāskarīfiakī fētsa noko maotīsafakī faka mēra noko ĩkimaxō, noko fininīfofanaino nō yorafo ĩspai nō Jesús Ifofakī nōko chaka noko soaxonō nō afe ipaxanō. Akka nā noko maotīsafafōxokai nōko choshta nō soatiroma. Askatamaroko nō Nios yōkai nōko chaka noko soaxonō noko ĩkipakexanō Jesús māi mā naax anā otonikē. Nāskaxō nō anā shināchakatama Jesucristoōxō nō shināsharakōi Nios fe ĩpaxakī. ²² Jesús Apa ari nai mēra kani Apa Nios fe

xanĩfokõi ixiki. Nãskakẽ ãjirifãfe ãto xanĩfofõfãfe Jesús finõtiroma nã yõshifãferi. Askatari nã yõshifãferi xanĩfofiakaxõ Jesús finõtirofoma Jesúsmaĩ finakõikẽ.

4

Epa Niospa noko ãfe shara inãĩ keskafakĩ fetsafori nõ sharafaxotiro

¹ Nãskakẽ nã Cristo ãfe yora omiskõini keskai, mãri nãskai omiskõixikai itipinĩsharakãfe. Akka nã omiskõiato anã afaa chaka shinãtiroma mãmãĩ ãfe chaka xatexõ. ² Isharakõixõ nã mã apaiyai keskara mã atiro, nã Niospa mato amapaiyai keskara mã atiro. ³ Mã xini ichapa finõa, nã Jesús Ifofafãfema apaonifo keskara mã ayopaoni. Nã mã afara chakafapaiyai keskara fisti mã ayopaoni. Mãto ãfimafo mã fichipaipaoni. Kẽrofori askapaonifo. Askatari mẽxotaima mã pãepaoni, ato fe ichanãx afarafo chakafayanã ayakĩ finakõiyana. Askatari afara fetsafo mã noikõipaoni nã Nioskõi noitama. ⁴ Akka mã anã ato fe rafeyamaxõ mã anã ato feta afaa chakafayamaito õikakĩ. Nãskaxõ mato yoikĩ iskafatirofo: “Õikapo. Na yorafãfe anã nofeta afaa akanima,” ikaxõ mato chakafakĩ mekafatirofo. ⁵ Akka ato askafaiãfe Niospa ato yoixii iskafaki: “¿Afeskakĩ mãto chaka mã xatekaspakĩ na fetsafo mã ato chakafamismẽ?” ixõ ato yõkaxii. Ato askafata ato omiskõimaxii. A niyoafoya a namisfo Niospa ato omiskõimaxii, tsõa Ifofatama ãto chaka xateyamafono. ⁶ Nãskakẽ Epa Niospa ãfe meka yoimisfo nõchini yorafãfe nayokaxoma Jesucristoõnoa meka shara nikanõfo. Nã namisãfe niyokaxõ nikayopaonifo. Akka mã keyokõi nanifo. Nãskafikẽ fatora fetsafãfe Jesús chanĩmara fakẽ Epa Niospa nã nia keskara ato imapakenaka afe ipaxanõfo.

⁷ Nãskakẽ meka fetsari ã mato yoinõ. Nikakapo. Mã chaima mai keyoi kiki. Nãskakẽ shinãsharakãfe, afaa chaka shinãtama. Epa Niospa mato shinãmapaiyai keskara fisti shinãkãfe. Nãskaxõ Epa Nios fisti kũfifafãikãfe. ⁸ Nãskax noina faatanãkõikãfe nõ noinãkõia sharaki. Fetsa noikõixõ nõ rae fatiro, a noko chakafai keskara anã shinãnõma. ⁹ Fetsafo mãto pexe ano nokoaito akiki inimayanã mãto pexe anoxõ ifikãfe, ato mekafakĩ chakafaxoma. ¹⁰ A Niospa ãfe Yõshi Sharapa noko tãpimanai keskafakĩ nõri fetsafo axosharatiro fetsafãferi Nios Ifofanõfo. Nãskaxõ fetsafo afara shara faxokĩ xateyamakãfe. A Niospa afe yorafo noikõiai keskafakĩ mãri ato noikõikãfe. ¹¹ Mã Niospa meka yoi, nã Nioskõi mekai keskaraõxõ ato yoikãfe. Mãto shinãmã shinãxõ ato yoikakĩma. Askatari mã Niospa Yõshi Sharaõxõ mã afarafo ato shara faxõfaito õikakĩ yorafãfe iskafakĩ yoitirofo: “Aicho, Epa Nios sharakõi. ãfe Fake Jesucristoõxõ afama mĩshtifo fatiro,” ixõ yoitirofo. “Epa Niospa ares fisti afarafo shara famis, atokai afaa chakafapanakama. Ares fisti ãfe Yõshi Sharaõxõ afama mĩshti fapanaka,” ixõ yoinõfo.

Nõ omiskõifikĩ nõ tenetiro nõmãĩ Jesucristo chanĩmara fakĩ

¹² Efe yora mĩshtichi, omiskõifikĩ rateyanã shinãchakayamakãfe. Mã askaito Epa Niospa tãpitiro mã Jesús Ifokõĩ fakẽ. Nãskakĩ shinãkĩ iskafayamakãfe: “¿Afeskai ã omiskõimẽ?” ixõ anori shinãyamakãfe. ¹³ Askatamaroko inimakõikãfe Jesucristo omiskõiai keskai mãri omiskõifikĩ. Askatari chipo mã inimasharakõixii Jesucristo anã nai mẽranoax fotoaino. Nãskakẽ keyokõichi õixikani ãfe sharafoya nai mẽranoax fotokẽ, nõko xanĩfo finakõi ixiki. ¹⁴ Akka mã Cristo Ifo shara faino Cristoõxõ mato ãchaifono inimakõikãfe. Nãskakẽ Epa Niospa ãfe sharafoya ãfe Yõshi Shara matoya rafemani kiki. ¹⁵ Akka fatora mã fẽtsa mã afaa chakafamiskẽma mato omiskõimanaifono tenekãfe inimayanã. Askatari yometsoyamata, askatari afara chakafakĩ finata iyamata, askatari fetsafãfe afara yoipaiyaifo keskara ato feta ayamakãfe omiskõixikãkima. Ato keskara iyamakãfe. ¹⁶ Akka nõ omiskõi Nios Ifofaax, nãskakẽ rãfiyamakãfe.

Askatamaroko Epa Nios yoikāfe iskafakī: “Aicho Epa Niosi, ě mī Fāke Jesús afe yora. Nāskakē nā chanīmara faafāfema ea omiskōimanaifono ě Jesúsnoax omiskōi. Aicho,” ixō yoikāfe.

¹⁷ Akka Epa Niospa yorafo keyokōi tāpimaniyoi afe keskara ikafofomākī. Tafakī noko ōikī tafaiyoi nōmāi afe yorafokē. Akka chipo nā Jesús chanīmara faafomafori ato yoixii afe keskara ikafofomākī. Akka iskaratīa nō omiskōiyoi, anākai nō omiskōinakama nō isharakōipakenaka, Epa Nios fe nai mēra. Akka chipo nā Niospa meka nikakaspamisfo omiskōi finakōixikani, afokai anā nīpanakafoma. ¹⁸ Niospa meka yoikī iskafakī kenenifo: “Nā Nios chanīmara faifo isharakōimisfo, Nios ari foyokanaxma omiskōiyotirofo. Nāskafikanax mā Nios ari nokokanax anā omiskōinakafoma. Akka nā Nios chanīmara faafāfema afara chakafamisfo nāfo omiskōi finakōipakenakafo,” ixō kenenifo. ¹⁹ Nāskakē nā Niospa mato yoiai keskai mā omiskōifikī shināchakayamakāfe. Nāato mato onifaniki. Nāskakē yoikī iskafakāfe: “Epa Niosi, mī ea amapaiyai keskara fisti ě apai. Meres fisti mī ea yoitiro,” ixō yoikāfe. Nāskax isharakōikāfe nā mato yoiai keskara amiski.

5

Afeskax isharatirofomāki a Nios Ifofaaf Pedro ato yoini

¹ Akka nā Niospa meka nikakani ichanāfono ato kexemisfo, ě mato yoisharapai ea nikasharanōfo. Nāskaxō mato shinā mēra ěfe meka nane-sharakāfe. Ěri nā Jesús chanīmara faafo ě ato kexemiski. Nōko Ifo Cristo omiskōiaito ě ōini. Anā oaino ěri afe isharapakenaka. Tsōa a keskara ōimisma sharakōi keyokōichi ōixikani. Ěri ōixii a keskara sharafinakōia. ² Nāskakē ě mato yoi nā Jesús chanīmara faafo ichanāifono Niospa mato yoini keskafakī ato kexesharakāfe. Ato Niospa meka yoisharakāfe isharanōfo. Nāskaxō shinākī iskafayamakāfe: “Ooa, ě afara fetsafapaifikī ě Niosxō ato kexei,” ixō shināyamakāfe. Askatamaroko a Niospa fichipaiyai keskafakī ato kexesharakāfe ato noiyanā. Nāskakē, “Ea Niospa ato yoimanaino ě ato yoikaspai,” ixō yoiyamakāfe. Anori shināataroko inimasharayanā Niospa meka ato yoisharakāfe. “Ě ato yoiaino ea kori inākani kiki,” ixō shināyamakāfe. Anori shināataroko ato Niospa meka yoisharakāfe inimayanā. ³ Nāskata āto xanīfo ipaikakīma ato ōimasharakāfe afeskaxō Jesús Ifofasharax isharatirofomākī. ⁴ Mā askaito a noko kexemis, nōko Ifo Jesucristo anā nāmā fotoxō mato ōisharaxii. Nāskaxō mato afara shara ināxii a keyonakama. Nāskakē mā afe īpanaka.

⁵ Nāskarifiakī māri naetapafāfe anifofo yafi a mato Niospa meka yoimisfo nikakōisharakāfe. Naetapafāfe anifofo fe isharakōikāfe. Nāskata mā ranā axoshara faatanākāfe. “Ě xanīfoki,” iyamakāfe. Akka, “A xanīfo nipaikani kakapaimisfoki Nios atoki inimaima. Akka a kakapaimisfomaki Nios atoki inimayanā ato afara axosharai ato noikī,” ixō kenenifo Niospa meka yoikakī. ⁶ Epa Nios finakōixō afama mīshti famis. Nāskakē kakapaimis iyamakāfe. Anori shināataroko iskafakāfe: “Epa Nios finakōia. Ě afaa tāpiama,” ixō yoikāfe kakapaimis ikakīma. Mā askaito Niospa ato mânăo mato nīchixii xanīfo keskara mā inō. ⁷ Askatari afaa shināchakayamakāfe. Afaa shināataroko Nios yoikāfe mato kexesharanō. Niospa mato noikī mato kexesharaino anā mato ōiti fekaxtefayamakāfe.

⁸ Shināsharata mēste shinākāfe. Satanás noko noikaspakī noko chakafapai kiki, oa poomā fonāiki kafāsakī yoinā fenai keskaraxō. Satanás chakata noko afara chakafapaimiski Niosnoa tsōa shinānōma, Satanás ato chakafamaino afe yora inōfo. ⁹ Nā mā omiskōiai keskariai nā nōko

Ifo chanĩmara faa fetsafori maitio anoax omiskõikani. Nãskakẽ Satanás mato afara chakafamapaiyaito nikayamakãfe. Mãto Ifo fistiroko chanĩmara fakãfe. Afara chakafayamakãfe. ¹⁰ Niospa mato noikõikĩ mato katonĩ, Cristo ika ari mã afe isharakõipakexanõ nã sharařinakõia ano. Nono mai ano mã iyoax mã aõnoax omiskõiyoi. Mã askaino Epa Niospa mãto õiti mato kerex faxõĩ. Nãskaxõ afara afeskara afiaino mã tenekõixõ mã Jesucristo Ifofasharakõixii. ¹¹ Nãatofi afama mĩshtifo fapanakaki. Nã fistichi atiro keskafakĩ tsõa askafatiroma. Nã fistichi askafãpanaka.

Mã mekai xatekĩ Pedro ato meka shara yoini

¹² Ëfi Silvano shinãkõimis. Ë tãpia nã Niospa amapaiyai keskara amiskẽ. Akka nã ã mato yoipaiyai anori ea kirika kenexoni. Na kirika ichapama ã mato kenexoni mãto õiti mato inimamasharakõixonõ mã shinãsharakõinõ. Ë mato yoi chanĩmakõĩ Niospa noko noikõĩ. Nãskakẽ nãnori fisti shinãkãfe fanĩrira shinãkakima.

¹³ Jesús chanĩmara faafo ichanãmisfo mẽraxõ Babilonia anoafãfe mato yoisharakani. Ëfe fake Marcosri mato yoisharapai. Nãfori Niospa katonĩ afe yora inõfo, noko akai keskafakĩ. ¹⁴ Mãri mã nõinã faatanãĩ yoinõnãsharakãfe. Mã Cristo yorakõifokĩ, nãskakẽ inimasharakõikãfe. Nã tii.

Pedro

Pedro Jesús Chanĩmara Faafo Afianã Kirika Kenexõ Fomani

Pedro Jesús Ifojafo ato kirika kenexõ fomani

¹ Ëkã Simón Pedro, Jesucristo ã yonoxomis. Aõnoa yorafo ãfe meka shara ã ato yoinõ ea nĩchini. Nãskakẽ ã mato kirika kenexõ fomai, mã mã nõko Ifo Jesús mã chanĩmara fakĩ finakõiano ã akai keskafakĩ. Nã nõko Ifo Nios feta Jesucristo noko ifimis nã ã chanĩmara famis nãmãi isharakõimiskẽ.

² Akka Epa Nios yafi nõko Ifo Jesús mã tãpikõikẽ matoõnoa shinãkĩ mato inimamakõikĩ mato õiti mato inimamaxotiro tanaima sharakõi mã inõ.

A Nios Ifojafo afeskax isharatirofomãki

³ Niospa noko katonĩ a keskara shara ikax nõ afe ãpaxanõ. Nãatofi afama mĩshti fatiroki. Nõ Nios tãpikõikẽ afara nõ yopaito ãfe kerex sharaõxõ noko inãxii. Nãskaxõ noko amapaiyai keskara nõ anõ. ⁴ Nãskakẽ noko yoiyoni keskafakĩ ãfe kerex sharaõxõ afara sharakõifo noko axoxii a keskara sharakõi nõ inõ. Akka a nikakaspafãfe nã afara chakafapaiyaifo keskara fisti amisfo. Nãskaifono Niospa noko imasharai nõ ato keskara inõma. ⁵ Nãskakẽ nã mato imapaiyai keskakãfe, chanĩmara faax a keskara sharakõi ikãfe. A keskara sharakõi mã ikaino, Niosxõ mato amapaiyai keskara fisti tãpikãfe. ⁶ Akka nã mã apaiyai keskara fisti shinãkakĩma, kexemesharax aõnoax isharakõita afara afeskaraino tenekõita Niosnoa fisti shinãfafãikãfe. ⁷ Askatari keyokõĩ yorafo sharafata oitsifaxõ ato noifafãikãfe.

⁸ Mã askafakĩ nõko Ifo Jesucristo mã tãpikõitiro. Nãskaxõ nã mato amapaiyai keskafakĩ mã yonoxosharakõitiro. ⁹ Akka mã askafayamai oa fẽxo keskara mã itiro, õisharaima. Nãskakẽ mato chaka mã mato soaxofiano mã anã shinãima, mã mã shinãmakiax. ¹⁰ Nãskakẽ efe yora mĩshtichi, Niospa mato ifikĩ mato shinãmani mã afe yorakõifo mã inõ. Nãskakẽ afe yorakõi isharapaikõikãfe. Shinãsharata isharakõikãfe. Askafaax mã anã afara chakafo ifofaima. ¹¹ Mã askaito õikĩ mato ifisharakõixii a ika ano mã afe ãpaxanõ nõko Ifo fe. Nõko Ifo Jesucristo noko ifimis.

¹² Nãskakẽ ã mato shinãmafafãini, mã mã tãpifekẽ, nãskakẽ iskaratĩa na meka shara mã mã tãpixõ nã fisti mã shinãkõimis. ¹³ Akka ã nayoxoma ã mato yoisharafafãini, ¹⁴ mãmãi nõko Ifo Jesucristo ea tãpimanano ã chaima naino. ¹⁵ Nãskakẽ mẽxotaima ã mato yoirifai mẽ naano nã ã mato yoimis keskara mẽxotaima mã shinãfafãinõ.

“Cristo Niospa Fake chaxapakekafanaito ã õini,” ixõ Pedro ato yoini

¹⁶ Nõ mato yoimis nõko Ifo Jesucristo ãfe kerex sharaõxõ afama mĩshti fatiro. “Anã nokoki oxii,” ixõ nõ mato yoimis. A yorafãfe yoipaonifo anori nõ mato yoimisma. Akka nõko ferokõichi nõ õini, nõko Ifãfe chaxapakefofãnaito. ¹⁷ Askatari ãfe Apa Niospa iskafakĩ yoini: “Nafi ãfe Fakekõikĩ ã aõ noisharakõi, ã akiki inimakõi,” ixõ yoini. ¹⁸ Nõkõi nikani nai mẽranoax mekai askaito. Nã mãchifã ano nõko Ifo fe nõ ini, nã mãchifã anoxõ nõ nikani anoax Nios mekaito.

¹⁹ Akka a Niospa meka yoipaonifãfe a inõpokoai keskara yoikakĩ Jesúsnoa kenenifo keskara nõ chanĩmara fakõitiro. Nãskakẽ mãri mã na meka mã chanĩmara fakõitiro. Oa rãparinĩ fakish mẽraxõ chaxatiro keskafakĩ, akka mã penano xafasharakõitiro. Nãskarifikĩ mã Niospa meka nikasharaino Epa Niospa mãto õiti mẽra oa pena keskara mato fatiro. ²⁰ Akka taefakĩ iskara

tāpikāfe. A Niospa meka yoipaonifāfe āa āto ōiti mēraxō shinākaxō kenepaonifoma. ²¹ Askatari āa āto shināmā shināxō yoipaonifoma. Askatamaroko Niospa Yōshi Sharapa ato shināmanaino nānorikōi ato yoipaonifo. Nāskakaxō a Niospa Yōshi Sharapa ato shināmanai keskara kenepaonifo.

2

Fetsafāfe chanī fisti ato yoipaonifo (Ju. 4-13)

¹ Akka, “Nō Niospa meka mato yoinōra,” ixō āa nōko xinifo ato pārapaonifo. Nāskarifiakī mato mēraxō mato pāramisfo, “Nō Niospa meka mato yoinōra,” ikaxō. Afāfe mato pārakani fanīrira mato yoikani mā anā shināsharanōma. Akka nōko Ifo Jesús ato nāxoni afara chaka āto ifo inōma. Nāskakē a nōko Ifāfe noko tāpimapaoni keskara chanīmara faafoma. Nāskakē nāfo Epa Niospa ato omiskōimarisafaxii omiskōipakexanōfo. ² Nāfāfe afara chakakōifo ato tāpimanaifo keskafakī yora ichapafāfe ato nikamisfo. Nāskakaxō atoōxō Niospa mekaōnoa chakakōi fatirofo. Nāskakē a Niospa ato shināmapaiyai keskara shinākanima mā fenoafo. ³ Nāskakaxō kori fisti noikōimisfo, “Nō mato yoinōra,” ixō mato pārakani. Akka a afara chakafaifo keskara mā Niospa tāpia fatora penata ato tāpimani omiskōipakexanōfo. Afetīama Niospa shināyoni a yora chakafo ato omiskōimapakexakī.

⁴ Epa Niospa āfe ājirifo āto chaka ato soaxonima afara chakafaifāfe. Askatamaroko chiifā mēra ato potani, anoax fakishifā mēra ĩpaxanōfo kaninānā ato metexkere axō. Nā ato ichanāfaitīa ato yoixō ato omiskōimaxii. ⁵ Nāskatari nā yorafo Noé niyoatīa Niospa meka nikakaspafono Niospa āto chaka ato soaxonima. Askatamaroko oi kaya imani faka faipafaxō a yora chakafo ato āsakī mitonō. Akka Noé fisti āsanima. Nā Noé ato yoiyopaoni iskafakī: “Nios sharakōikī mato chaka xatekāfe a keskara shara ixikakī,” ixō ato yoipaoni. Nāskakē Noé āsanima afe yora sietefo fe Niospa ato kexesharano. ⁶ Nāskatari Niospa pexe rasi Sodoma yafi Gomorra pāoakī fetsaxō kooakī mitoni, mapokōifakī. Nāskakē nā rama chipo ixiaifāfe tāpinōfo yora chakafo keyokōi Niospa ato omiskōimaxiai. ⁷⁻⁸ Akka Lot fisti nanima Niospa nimasharakōini. Nā feronāfakemāi sharakōikē, nāato ōipaoni yorafāfe anoxō chaka shināifāfe. Nā Lot fekaxtekōini, nā yora chakafo askaifāfe ōi. ⁹ Nāskakē nōko Ifāfe afe yorafo kexesharatio afarafo ato chakafamapaiyai keskara anōfoma. Nāskaxō nā afara chakafamisfo ato omiskōimakī nā omiskōipakenakafo mēra ato potaxii anoax omiskōipakexanōfo.

¹⁰ Nāskakē Niospa ato omiskōimaxii āa shinākaxō afara chakakōi famisfono, nōko Ifāfe āfe meka sharari nikakaspamisfono. Afāfekai afaa tāpiafoma. Mesetamakōi ato ĩchamisfo a nō ōimisma nai mēranoa xanīfo finakōiafo. ¹¹ Akka nā ājirifo xanīfokanax afokai askamifoma. Afāfe tsoa ĩchamisfoma nōko Ifāfe ferotai. Askatamaroko yoikī iskafamisfo: “Āa Niospa ato tāpimanō omiskōimakī,” ixō shināmisfo āfe ājirifāfe a yora chakafāfe chakafafiaifono ato afeska fapaimisfoma.

¹² Akka na yorafo yoinā keskarafo, afaa tāpiafoma. Afaa shināima ikafo. Nāskakē achixō retetirofo. Afāfe afara chaka yoimisfo ōiyamafikakī, nāskakē afori naxikani na yoināfo natirofo keskakani. ¹³ Fetsafo omiskōimakatsaxakakī afori omiskōixikani. Afāfe afarafo chakakōifo fakakī sharakōimeyokani. Akka nā mato pāramisfo mato fe ichanāfo Jesús nikayamafikatsaxakakī. Anoxō mato feta piyanā mato pārapaikani. Akka māfi askaramakī mā noināsharakōita ano fisti ichanāxō mā piisharamis. Mā askafiaito a ato pāramisfo mato fe ichanāpaikani mato fanīrira chakafo yoipaikani mā anā shināsharanōma.

Inimakōiyanā nā mato pārapaiyai fisti yoipaikani. ¹⁴ Askatari kēro fetsa ōikakī akiki nokofenepaikakī chotapaimisfo, chaka fisti shināmisfo. Akka kēromā Jesús Ifofayamaxō ato fichipai ato fe ixiki. Askatari a chanīmisfāfe Jesús Ifofasharamisfoma ato chakafamapai ato feta afarafo chakafanōfo ato ōikakī. Askatari ato afama mīshti ato fichipaimisfo mā askara feyafamisfo. Niospa nā keskara yorafo ato omiskōimani omiskōipakexanōfo, yora chakafomāiano. ¹⁵ Nāfo fofāsakani mā fenoafo, Niospa meka shara kachikiri fakanax nā Balaam ipaoni keskarafo. Nā Balaam Niospa meka yoimis iyopaoni, Beorpa fake. Mā Niospa meka yoipaofinixakī kori kaya fichipaini, afara chaka shinākī. ¹⁶ Niospa yoiaino Balaam āfe burro nā yora mekai keskani. Nāskaxō āfe ifo iskafakī yoini: “¿Afeskakī mī ea koshaimē?” ixō nā burropa yoini. Askafaito nikai Balaam oa yōra shināsharaima keskarakōi ini.

¹⁷ Na feronāfakefo faka fiti anoa faka netsoa keskarafo. Afaakai tāpiafoma, nāskaxō Niospa meka shara noko tāpimatirofoma. Askatari mā oi fei kiki ixō, nai kōi choshta nō ōifiaino, nēfe nai kōi potatiro keskarafo. Nāskarakaxō noko pāratirofo: “Niosnoa nō mato yoirā,” ikaxō āa shināi imisfo Niosnoa yoikōimisfoma. Nāskakē Epa Niospa ato potaxii fakishifā mēra ipaxanōfo. ¹⁸ Nāfo chanīkani kakapaimisfo. Nāskaxō yoimisfo iskakani: “Nō tāpia keskafakī tsōa tāpiama. Nā tsōa atiroma keskafakī nō tāpikōia,” ixō āa yoikani chanīfinamisfo. Nāskakaxō a rama Nios Ifofapaikakī āto chaka xatepaiyaifo ato yoitirofo iskafakakī: “Mī fētsa āfe āfi fe ika sharakī, nāskax mī afe inimakōitiroki, nō anō kafe,” ixō fētsa iyotiro afara chakafamaxiki. ¹⁹ Afāfe iskafakī yoimisfo: “Mā afara shara faōnoaxkai Nios fe mā ipaxatiroma. Akka nā mā afarafo apaiyai keskafakāfe. Nā mā apaiyai keskafaino tsōa mato xatematiroma inimayanā akāfe,” ixō ato yoikakī anorima ato yoikani. Afori isharamisfoma, āa pāramemisfo. Afara chakafo āto ifo, nāfo Satanās ināfo. Nāskakē shināsharakanima. Chaka fisti shināmisfo. ²⁰ Akka nōko Ifo Jesucristo nā noko ifimis, nō nikakōixō nā nikaiāfema afara chakafaifo keskafakī, anā afaa chakafakanima. Nā afara chakafo makinoax paxkatirofo anā āto ifo inōma. Akka anā afara chakafaifono afara chakakōi ato mēra nanetiro a ipaonifo keskara chakafinākoia inōfo. ²¹ Akka afo shara ikeranafo Jesús nikayamakatsaxakakī. Akka a meka shara mā nikafikatsaxakakī chipo anā kachikiri faifono ato omiskōimaki finakōixii. ²² Akka nōko xinifāfe Niospa mekaōnoa kenekī yoikōinifo iskafakī: “Paxta nā imis keskai ori kafāsayotiro. Chipō anā a anāpakea ano otiro. Nāskariai kochiri mīfamā raish iyotiro, nāskax fakanaki kaax choki sharata, mā choki sharafīax anā chipo mīfamā raish itiro.” Nāskari akani Niospa Yōshi Sharaōxō āto chaka potakanamax Satanās āto ifo iki. Āto chaka xatepaifikanax afianā afara chaka mēra paketirofo.

3

Nōko Ifo Jesús anā fotoxii

¹ Efe yora mīshtichi, anā ē mato kirika kenexō fomai. Taeyoi ē mato manamayonixakī, nā kirika kene rafeoxō ē mato shināmarsharapai mā shināsharakōinō. ² Shinākāfe, a Niospa meka yoimis sharafāfe afetiama mato yoipaonifo anori. Askatari a noko ifimisto nōko Ifo Jesús ato yoiāto a aōnoa yoimisfāfe nikakatsaxakakī nānori mato yoipaonifo keskara shinākāfe.

³ Nāskakē ē mato yoinō shinākōikāfe. Mā chaima Jesús oaino nā yora chakafo matoki fekanax nāfo matoki kaxemetsamapaixikani kiki āakōi askara chakafo shinākanax. ⁴ Nāskaxō mato yōkaxikani iskafakakī: “A Niospa yoini keskai, ¿afeskai Cristo oimamē? Akka nōko xinifo nanifo chāikai afaa afeskaito nō ōimisma, keyokōi nāskara. Nā Niospa mai onifani chāi afaa

afeskaito nõ õimisma,” ixõ yoixii. ⁵ Akka nõ yorafãfe mã täpifikaxõ shinãkanima, afetiãma Niospa nai onifafianino Niospa yoiaino fakafã nẽxpakãa mai onifani, taeyoi fakafã iyopaoni. Nãskakẽ Niospa ãfe mekapa fakafã nẽxpakãa mai onifarifatani. ⁶ Askatari fakafaipafakã mai maiyaino keyokõi yorafo ãsai mitokomeni. ⁷ Akka mai yafi nai iskaratãa ato mekeyoa, chipo ato koofakã mitokõixii. Niospa yoiaino askai fetsexii. Nã Niospa ato ichanãfaitã na chiifãnẽ ato koofakã mitoxii nõ yora chakafo ato omiskõimanaitã.

⁸ Nãskakẽ efe yora mĩshtichi, shinãmakiyamakãfe. Nõ õimiski xiniachãikõi. Akka nõko Ifãfe õia pena fisti xini ichapa keskara, askatari xini ichapa pena fisti keskara õi. ⁹ Nãskakẽ shinãkã iskafamisfo: “Nõko Ifãfe yoiyoni keskara ikamano, akka mã yoini keskara mã finõkõia,” ixõ shinãmisfo. Askatamaroko Niospa noko noikõikã a omiskõipakenakafo mẽra ato potapaima. Fena fenakima ato manasharamis keyokõichi ãto chaka xateyonõfo ãfe meka shara nikaxikakã omiskõipakexakãima.

¹⁰ Akka nõko Ifo nokoki nokorisai tsõa manasharayamaino nõ yometso nõko pexe ano oaito nõ täpitiroma keskai. Nãskarifiakã tsõa täpiama afetiãra nõko Ifo nokorisai, itipinĩsharafomano. Mã nõko Ifo nokoaino chãa itakõixii. Nãskaino nai mẽranoafo koofi keyokõixii, nãskatari nono mai anoafori koofi keyokõixikani.

¹¹ Nã ã mato yoiai keskai keyokõi keyoxii. Nãskakẽ täpisharakõixõ nõko Ifo nikasharakõikãfe. Mã mã itipinĩsharakõixõ a mã apaoni keskara anã mã akimakai. A mato amapayai keskara fisti mã akikai. Epa Nios shinãkã finakõiax sharakõi ikãfe. ¹² Fatora penata Jesús nokoi kiki manashara fafãikãfe. Nãskakẽ fetsafo Jesúsnoa yoisharakãfe täpisharakõinõfo, ãto chaka xatekaxõ mã chaima Jesús oi kiki. Mã Jesús oaino nai mẽranoafo koofi mẽsho mẽshokõixikani. ¹³ Akka nai fenashara nõ manai, mai fena yafi a Niospa yoiyoni keskafakã afo sharafai. Akka afara chakafo ano itiroma, nõ sharafos ano itirofo.

¹⁴ Nãskakẽ efe yora mĩshtichi, mã Jesús manakã manasharafafãikãfe. Mã askaito Niospa mato õi kiki ãfe Fãkeõnoax mã isharakõikẽ. Nioski mesekãma iskafakã shinãfafãikãfe: “Epa Niospa ãfe Fakeõxõ ea noi. Ëri Epa Nios noi afe rafepakexakã,” ixõ anori shinãfafãikãfe. ¹⁵ Nãskakẽ mãri fekaxtekãkima. Shinãsharata isharakõikãfe. Õikapo. Nõko Ifo samarakamis fena omisma yorafãfe ea Ifofanõfora ixõ shinãmis Epa Niospa. Nãskarifikã nofe yora Pablo mato kirika kenexoni Epa Niospa shinãmasharaino. ¹⁶ Nã kirika keneai tii nõko Ifo anã oxii kiki ixõ aõnoa yoikã mato kirika kenexoni Pablo. Akka a atiri yoikã kenei afokai nõ täpisharatiroma. Akka a Niospa meka täpiamafãfe ãa fanĩrira yoimisfo a Pablo yoikã kenei anori tsõa yoimisma. Nãskarifiakã Niospa mekakõi yoitama, fanĩrira yoimisfo. Nãskakanax omiskõipakenakafo.

¹⁷ Efe yora mĩshtichi, a ã mato yoiai keskara mã mã täpiaki. Nãskakẽ õisharakãfe, a chanĩmisfãfe mato yoipaiyaifo anori mã ato nikaxikima. Mã Jesús nikakõiaito mato kexesharakõitiro. Akka a fanĩrira yoimisfo mã ato nikaxõ anã mã shinãsharatiroma. Nãskaxõ fanĩrira mã shinãtiro. ¹⁸ Akka a noko ifimis nõko Ifo Jesucristo nikasharakõifafãikãfe täpisharakõixikakã. Mato sharafapayai keskara a keskara shara ixikakã. Mãto õiti mẽraxõ a mato täpimapayai keskara täpisharakõikãfe. Nã fisti nõ yoikã iskafatiro: “Mĩ nõko Ifo, mĩõxõ afara shara nõ atiro, meres fisti mĩ sharakõi,” ixõ iskaratãa yoita a inõpokoai keskara nõ yoipakenaka. Nãskakõipakexanõ. Nã tii.

Pedro

Juan Jesús Chanĩmara Faafõ Kirika Kenexõ Fomani

Jesús noko nimasharaino nõ afe ãpaxanõ

¹ Ëkĩa Juan, ã mato kirika kenexõ fomai mã tâpinõ. Jesucristo ã õimixaki ã mato yoi mãri mã tâpisharanõ. Nã Jesucristo nõko Ifokõi tae fenakõi Nios fe iyopaonixakĩ. Akka Niospa afama mãshti onifamatai afe iyopaonixakĩ, chipo nãmã fotoxõ noko yoiaito nõ nikamis. Oa yorakõi keskara nõ õimis. Mã õikĩ feyafaxõ nõ ramãti nõko mãfi. Nãskakẽ noko yoiaito nikayamexakĩ ã mato yoi, noko imasharanõ nõ afe ãpaxanõ. ² Apa Nios ariax nokoki Jesús fotoni. Fotokẽ nõ õikĩ feyafani. Nãfi afeskapishta nakama, nãfi nĩpanakakĩ. Apa Nios fe ikatsaxakĩ nokoki fotoni. Nãskakẽ nã nõ õia keskara nõ mato yoi. ³ Nõ õipaonixakĩ nõ mato yoi noko yoiaito ãfe meka. Nãskakẽ nofe rafexõ nõ nõ shinãi keskarari mãri mã shinãtiro. Nios feta ãfe Fake Jesucristo shinãi keskafakĩ nõri anori nõ shinãi, nõ ato fe rafekõitiro. ⁴ Nãskakẽ ã mato kirika kenexõ fomai nã kirika kene õiax mã inimakõinõ.

Nios xafakĩakõi ika oa luz keskara

⁵ Akka noko Cristo yoi, anori ã mato yoinõ. “Oa xinĩ chai chaxaino fakishtroma keskara, xafakĩakõi Nios ika. Afaa chaka afe rafemisma,” ixõ Cristo noko yoimis. ⁶ Akka anorima shinãi yora fetsafo iskakani: “Ë Nios fe rafea,” ifiaxõ a Niospa yoi, anori shinãima ãa chanĩ anorima yoi. ãfe õiti sharama xafakĩakõi ikama, fakish keskara a Niospa yoi, anori shinãyamafi. ⁷ Nios xafakĩakõi ikakĩ, afaa pishta chakafamisma. ãfe õiti mẽra oa fakish keskarama, xafakĩa sharakõi ika. Akka nõri afe rafekõixõ, nõ ãfe meka nõ mẽra nanekõixõ, Niospa shinãi keskafakĩ nõri nõ shinãtiro. Nõ askara shinãx, nã Ifofaafõ fe nõ ato fe rafetiro. Nãskax nõ xafakĩakõi nitiro, Niospa Fake Jesús mãi noko nãxonikẽ. ãfe imĩ nõko chaka noko soaxõfafãini keyokõi.

⁸ Akka nõ yoikĩ iskafamis: “Ë afaa chakafamisma,” ifiax nõa nõ pãramemis. Nãskax nõa nõ chanĩkõimis. Nõko õiti mẽra Niospa meka naneama. ⁹ Akka nõ afara chakafaxõ nõko chaka nõ soapaikĩ, nõ Nios yoi, anori nõko chaka noko soaxotiro. Keyokõi noko soaxotiro noko raefakĩ, Nios mãi mẽstekõi isharakõixõ. ¹⁰ Niospa yoimis: “Keyokõi yorafãfe chakafamisfo,” noko famis yoikõikĩ. Noko askafafiaino, “Ëkai afaa pishta chakafamisma, ã chaka shinãima,” ixõ yoikĩ nõ Nios chanĩmara faima, “ãa chanĩra,” nõ Nios fai. Nãskakẽ ãfe meka nõko õiti mẽra naneima.

2

Jesús Apa Nios noko yoixonĩ

¹ Efe yora mãshtichi, ã mato shinãi. Mẽ mato Jesús Ifofamaxõ ã mato fakefai. Mato fakefaxõ ã mato kirika kene fomai, mã anã afarafo chakafanõma, shinãsharata mã inõ. Askara Niospa fichipai. Akka nõ chakafaino Niospa fichipaima. Nãskakẽ nõ anã afara chakafaxõ nõ nõko Ifo Jesucristo nõ yoitiro anã nõko chaka nõ soapaikĩ, nokomã nikaito. Noko nikaxõ Apa Nios noko yoixonĩ iskafakĩ: “Epa, ã ato nãxonĩ. Eõxõ ato chaka soaxõfe, ãto chaka soapaikani kiki,” Apa fatiro. Nã fistimã mẽstekõi ixõ, afaa chakafamisma. Nãskaxõ Apa Nios noko yoixotiro. ² Noko nãxonĩ nõko chaka noko soaxoxiki. Noko fistima, keyokõioñoax noko nãxonĩ. Nõko Ifo Jesucristo noko nãxonĩ. Nõko chaka noko soaxõfaini nani.

³ Nāskakē Cristo noko yoiai keskafakī nō nikakōixō nō tāpisharakōitiro nōmāi afe rafexō. ⁴ Yora fetsafo isakai: “Ē Cristo fe rafea,” ifiaxō āfe meka nikama, āa akikiri kētapamis, mēstekōi ikama. ⁵ Akka nō Niospa meka nikakōikī nō aō noikōi. Nāskafaxō nō tāpitiro nō afe rafekōia, Nios fe. ⁶ “Mē Nios fe rafekōiaki,” ixō yoi, a Jesús imis keskara ikāfe.

Noko meka fena shara yoini nō nōināsharakōinō

⁷ Efe yora mīshtichi, ē mato yoisharakī ē mato kirika kenexoni. Na ē mato yoiai keskafakī taefakī mā mā nikamiskī. Jesús noko yoia keskafakī ē mato kenexonō. ⁸ Mā mā nikafimiskē, ē mato anā fenafakī yoinō chanīma. Jesucristo noko noikōi. Nāskari fakī nō fetsafo noikōi. Fetsafo noikī, nōko ōiti mēra xafakīakōi iki. Anā fakish keskara ikima. ⁹ Akka, “Ē Nios fe rafea ē xafakīakōi ika,” ixō nō yoifixō nofe yorafo nō noikaspamis, nōkai xafakīakōi ikama. ¹⁰ Akka nōroko nofe yorafo noi, nō xafakīakōi iki. Nō shināsharata nō ikax, nō anā fenotiroma. Nāskakē nō xafakīakōi iki, afaa pishta chaka shinātama. ¹¹ Akka a afe yorafo noikaspaifo, afokai sharama. Fakish mēra niafo keskara. Afaakai shinākanima. Āto chaka xatekaspakani. Askafikaxō afaa tāpiafoma, fenokōiafo.

¹² Efe fakefāfe, māto chakafo Jesúsxō Epa Niospa mato soaxonano, nāskakē ē mato shinākī ē mato kirika kenexoni. ¹³ Afaa oniataima Epa Nios fisti iyopaoni. Efe anifo tiito, ē mato kirika kenexoni, afe keskaramāki mā mā Epa Nios tāpiakī. Mā mā tāpixō mā chanīmara famiski. Naetapafāfe, matori ē kirika kenexoni, Satanás chakata mato afara chakafamapaiyaito mā mā finōfakī. Nāskakēri naetapa tiito ē mato kenexō fomai, mā Satanás chaka finōano. Efe fakefāfe, ē mato yoikī kenexona māmāi Epa Nios tāpikē.

¹⁴ Efe anifo tiito, matori ē kirika kenexona, mā mā tāpiakī, afaa oniyataima Epa Nios fisti iyopaoni. Naetapafāfe, matori ē kirika kenexona, māto ōiti kerexkōifafāi Epa Nios āfe meka shara nikakōiyanā mā mā Satanás chaka finōfakī.

¹⁵ Akka a Niospa fichipaiyamai, nōri fichipaitiroma. Afo fichipaikī nō Nios shinātiroma. Afarafo na yora chakafāfe āto shinā mēraxō shināifo keskara afo fichipaiyamakāfe. Afo fichipaikī mā Nios shinātiroma. ¹⁶ Akka a Nios shināifoma nono nāmā ikafo āa shinākani iskamisfo: “Ēa ē shināxō nā ē apaiyai keskara ē atiro. Afara ōikī ē fichipaikī ē fitiro. Ē tsoa keskarama. Ē afama mīshti shināi. Ea keskara tsoama,” ixō fētsa yoitiro āa chanīkī. Aato Niospa meka shināima, āa shināx askatiro. ¹⁷ Akka na afe keskararāfo Niospa ōikaspaifo mā afo mitokomei. Nāskatari a yora chakafāfe fichipaiyaifo mā afori mitokomei. Akka nā Niospa yoiai keskara nikakōiax nō Nios fe nīpanaka.

A yora chanāifo nō nikatiroma

¹⁸ Efe fakefāfe, mā chaima Jesucristo anā nāmā fotoiyoi mā nō nika. Nāskakē Jesús nāmā fotoyoamano, akka nā yora chakafāfe Cristo shināmisfoma āto xanīfo finakōia oi taei. Nāato, “Ē Cristora,” ixō noko pārapaixii. Mā mā tāpia nāato Jesús noikaspamis. Akka iskaratīa, “Ē Cristora,” ikanaifo yora ichapakōifo. Nāskakē mā nōri tāpia nā Cristo kayakōi samama fotoi. ¹⁹ Nā Cristo noikaspaifo nofe iyoafo, mā noikaspakani nomakinoax tsekeafō. Afokai noko keskarafoma. Cristo anā shinākanima, mā kachikiri faafo. Nāskax nomakinoax tsekeafono nō tāpitiro afāfekai Cristo Ifofaafoma. Akka a Cristo āto Ifokōikē nomakinoax tsekekeranafoma.

²⁰ Akka Cristo āfe Yōshi Shara māto ōiti mēra nanea. Nāskakē keyokōichi mā mā tāpia Niospa Yōshi Sharapa mato tāpimapaiyai keskara. ²¹ Nāskata Jesucristo mā tāpikī finakōiakī. Tāpixō mā mā chanīmara fakī. Nāskakē ē

mato kenexoni. Nāskaxō afara mato pāraifāfe mā chanīmara faima. Mā tāpia Jesucristo ramashara anorima ato yoimisma, nāfi chanīmakōikī. ²² Yora fetsafo iskamisfo: “Cristokai Niospa nai mēraxō nīchinikeroko, akai Niospa Fakekēroko,” ixō yoimisfo. Askafakaxō Epa Nios yafi āfe Fake Jesús chanīmara fakanima. Afāfe Cristo noikaspakōikani. ²³ Akka nā Cristo noikaspaifāfe iskafakani: “Jesús Niospa Fakema,” fakanax Epa Nios fe rafemisfoma. Afokai Niospa yorafoma. Akka a yoikī iskafaifo: “Jesús Niospa Fakekōi,” fakanax nāfo Nios fe rafekani.

²⁴ Nāskakē Jesúsnoa mā nikakī taefani keskafakī, āfe meka shara shināmakiyamakāfe. Nā mā nikakī taefani keskafakī, mā shināmakiyamax mā nikakōisharaino Epa Nios fe āfe Fake Jesús mato fe rafekōipakenaka. ²⁵ Nāskakē Jesús noko iskafakī yoiyoni: “Ea yafi ēfe Epa mā Ifofaax, mā nofe nīpanaka, anā mā nanakama,” ixō noko yoini.

²⁶ Akka na yorafāfe Cristo noikaspaifo afāfe mato pārapaikani. Mato anorima yoipaikani. Nāskakē ē mato yoisharakī kirika kenexoni mā tāpikōinō tsōa mato pārayamanō anorima yoikī. ²⁷ Akka Epa Niospa āfe Yōshi Shara mato ināni mato fe rafekōinō. Nāskakē aōxō mā mā tāpikōia. Mā anā tsoa yopaima mato tāpimanō, āfe Yōshi Sharapamāi keyokōi mato tāpimakē. A mato tāpimanai keskara chanīmakōi, mato pāratiro. Nāskakē nikakōiyanā Cristo fe rafesharakōikāfe, a Niospa Yōshi Sharapa mato yoiai keskai. A Niospa Yōshi Sharapa mato yoini keskai shināmakikākīma Cristo fe rafesharakāfe enekakīma.

²⁸ Ēfe fakefāfe, iskaratīa Cristo nikakōiyanā afe rafekōikāfe, mā nāmā foto-faino nō akiki meseimakai nōmāi isharakōiax. Askatari nō akiki rāfimakai.

²⁹ Mā mā tāpiakī Nios isharakōimiskī afaa chakafatama. Nā isharakōimisfo nāfo Epa Niospa imasharapakenaka āfe fakefo inō. Nafofi Epa Niospa fakekōifokī.

3

Niospa fakefo

¹ Epa Niospa noko noikōi. Shināfāi ikāfe. “Ēfe fakefora,” noko famis. Akka nō āfe fakekōifo. Akka nā yora fetsafāfe Jesucristo shināifoma Nios tāpiafoma. Nāskafakīri nokori tāpiafoma, nō Niospa fakefofiano. ² Efe yora mīshtichi, ea nikakāfe. Nōfi iskaratīa Niospa fakekōifokī. Nāskakē afe keskarara chipo noko Niospa imai nō tāpiama. Cristo fotoaito nō ōiax nā keskarakōi nō iki, āfe ōiti keskarakōi. ³ Niospa fakekē nonori nō yoi: “Ē Jesucristo fe ipanaka. Ē Jesús fe ikaino āfe ōiti keskarakōi ē ixii,” ixō shinākī nō anā chaka shināpaima. Jesucristo shināi keskarari nō shinātiro, anā chaka shināyamakī.

⁴ Akka yora fetsafāfe ato chakafakakī, āto chaka potakaspakani, a Niospa yoiai keskara shinākanima, afara chaka fisti shināmisfo. ⁵ Jesucristo nai ariax nokoki fotoni nōko chaka noko soaxoxiki. Akka nāatofi afaa chakafamismakī. Nā fistifi finakōiakī. Ē mato yoiai keskara mā mā tāpiakī. ⁶ Nāskakē a afe rafeafāfe chaka shināmisfoma. Akka a ōiti chakayafāfe Jesús tāpiafoma, Jesús shinākanima. Jesús fe rafeafoma. ⁷ Ea nikasharakāfe, ē mato yoinō. Fetsa iskatiro: “Ē Niospa meka mato yoinō,” ixō mato yoisharaima. Mato anorima tāpimapai, akka aa nikax mā chaka nitiro. Akka a isharakōixō shināsharamis. Aa keskarafi yora sharakōikī. A Cristo ika keskarari ari isharakōia shināsharakōita. ⁸ Akka nā afara chakafamisfo Satanás fe rafeafo. Nā Satanasmāi taeyoi ōiti chakaya inino, iskaratīari nāskara. Nāskaxō Satanás keyokōi yorafo afara chakafamapai. Nāskakē Niospa āfe Fake nokoki nīchini.

Noko nāxoxiki nokoki fotoni, nōko chaka noko soaxoxiki. Nomakinoa Satanás potatiro noko afara chakafamapaiyaito. Nāskakē Jesucristo Satanás finōinīfofana.

⁹ Akka Niospa āfe Yōshi Shara nōmēra naneano nō Niospa fake itiro. Nō Niospa fakexō nō anā afaa chakafapaima. Nā Niospa Yōshi Shara nōko ōiti mēra ikē nō anā afaa chakafatiroma, nōko ōiti noko fetsafaano. Nōko ōiti noko fetsafaxō, mā Niospa noko fakefa. ¹⁰ Fetsafāfe afara chakafamisfo, afokai Niospa fakefoma. Afofi aa ranā noinākanima. Askarafo Niospa fakefoma. Afofi Satanás fakefoki. Nāskakē Satanás fakefo nō tāpitiro. Nāskafakīri Niospa fakefo nō tāpitiro.

Nōa ranā nō noinātiro

¹¹ Nāskakē taefakī mā Nios Ifofaxō mā mā nikamiskī mato yoiaito: “Nōa ranā nō noināsharanō,” ixō mato yoiaito mā mā nikamis. ¹² Akka nā Caín onefetsa noikaspakī reteni keskara iyamakāfe. Askara Satanás chaka fe rafea. Nāskaxō onefetsa reteni noikaspakī, ē mato yoinō nikakapo. A Niospa yoiā keskafakī onefētsa Nios shināni. Akka Caín askanima. Āfe onefetsaki ōitifishkikī reteni. A onefētsa Nios Ifofaito ōikī noikaspakī reteni, Niosri noikaspayanā. ¹³ Akka māri Jesús Ifofaito, matori noikaspatirofo. “Ē Jesús Ifofaito ea tsōa noikaspaima kiki,” ixō shināyamakāfe. A mā Jesús Ifofaito a Jesús Ifofaafāfema mato noikaspatirofo. ¹⁴ Nō yorafo noikōixō nō tāpitiro nōmāi Niospa fakefoxō. Nāskakē a omiskōipakenakafo mēra katama, afe nō ipanaka. Akka a yora fetsafo noikaspai, afokai Niospa fakema. Nios fe rafeamax afe ipanakama. ¹⁵ Akka a yorafo noikaspaifo afofi retemitsamis keskarafoki. Afo chakakōifo. Askarafo mā mā tāpia Niospa fakefoma. Askarafo Nios fe rafeafoma. Nios fe nīpanakafoma, yorafo noikaspakanax. ¹⁶ Akka Jesús noko noikōikī, noko nāxonī. Āakōi nokoōnoax nani. Nāskarifiakī nō fetsafo noikōiax nō atoōnoax natiro. ¹⁷ Akka afama mīshti ichapayafixō, fetsafāfe afara yopaito nō ato afaa ināmā, askara sharama. Epa Niospa noko noiai keskafakī, nō ato noima. ¹⁸ Efe yorafāfe, ea nikakōikāfe, ē mato yoinō. Fetsafo iskakani, āa chanīkani: “Ēfi yorafo noikai,” ifiaxō ato chakafakani, atokai noikanima. Akka nōfi askaramakī. Nō yorafo noisharakōixō nō ato shara fatiro.

Nō Nios nikasharax nō akiki ranotiroma

¹⁹ Akka nō ato noisharakī nō tāpitiro nō fanīrira chaka shinākīma, Jesús nōko Ifokōimāiyakē. Anori shināi nō akiki meseima. ²⁰ Nāskafixō nōko ōiti mēraxō nō shinākī iskafatiro: “Ē afara chakafaa,” ixō nō shināito Niospa noko ōi. Noko ōikī tāpia a nō shināi keskara. Nāskakē nōko chaka nō soapaiyaito nōko chaka noko soaxotiro. Nios nōko ōiti keskarama. Aato keyokōi tāpia. ²¹ Efe yora mīshtichi, ea nikasharakāfe. Nōko ōitinī nō shināi iskatiro: “Ē Nios Ifofaito ēfe chaka mā ea soaxona, mā ea shināsharamana,” ixō shināi, nō Nios fe rafetiro, nō akiki nō ranotiroma. ²² Nō askaino Epa Nios nokoki inimitiro. Nāskakē nā nō yōkai keskara noko inātiro, a noko yoiāi keskaramāi nō nikasharaito, askatarimāi nō inimamasharaito. ²³ Iskafakī noko yoini: “Ēfe Fake Jesucristo nikasharakōikāfe,” ixō noko yoini. Nāskatari a noko yoini keskaī nōa ranā nō noināsharai. ²⁴ Akka a Niospa noko yoini keskafakī nō nikasharakōiax Nios fe nō rafekōitiro. Askatari Niosri nofe rafekōitiro. Epa Niospa āfe Yōshi Shara nokoki nīchini. Aōxō nō tāpitiro Epa Nios nofe ikaito.

4

Niafaka chakata Niospa Yōshi Shara noikaspai. Askatari Cristo noikaspai

¹ Efe yora mīshtichi, fetsafāfe mato anorima yoiāifāfe ato nikayamakāfe. Iskafakī mato yoipaikani: “Nō mato Niospa meka yoi Niospa noko shināmanaino,” ifiakaxō anorima mato yoimisfo. Askaifono Niospa meka ōikī mā tāpitiro a yoiāifo keskara chanīmamākī. Niospa Yōshi Sharaōxō mato yoikanimakī. Akka afokai Niospa ato afaa yoiama. ² Nāskakē ē mato yoisharai, ea nikakāfe. Fetsafāfe a Niospa meka mato tāpimasharaito mā tāpitiro. Niospa Yōshi Shara a mēra naneano yoiāito mā tāpitiro. Iskara mato yoiāito: “Jesucristo fotoni Apa ariax nai mēranoax. Nāfi yora keskara kāiniki. Aafi yorakōiki,” mato faito mā tāpitiro Niospa shināmanaino mato askafakī yoiāito. ³ Akka yora fetsafāfe anori yoiyamaifāfe nō tāpitiro afāfe Jesucristo noikaspamisfo, Niospa Yōshi Shara āto mēra naneama. Satanās ato shināmamis. Akka a Cristo noikaspai fo noko ano fexikani mā mā nikamis. Akka iskaratīa mā noko ano feafo, afāfe Cristo noikaspamisfo.

⁴ Akka māroko askaramakī efe yorafāfe, Niosfi mato Ifokōikī, māfi Niospa yorakōifokī. Āfe Yōshi Shara mā mato ōiti mēra nanea. Akka a anorima shināifo askarafoma, Satanās yōshi āto ōiti mēra nanea. Akka Niospa Yōshi Shara mato mēra naneano mā Satanās finōkōia. ⁵ Akka fetsafāfe Nios tāpiafomano, nāskakē anorima ato yoimisfo, Satanās ato shināmanaino. Nāskakē Satanās ifofaafāfe ato nikamis Satanāsmāi āto ifokē. ⁶ Akka nōfi Niospa yorafokī. Nāskakē a Nios tāpiafāfe noko nikakōitirofo nō yoiāi anori. Akka a Nios Ifofaafāfema a nō yoiāi anori nikatirofoma. Akka nō tāpitiro ato mēra Niospa Yōshi Shara naneano noko nikasharaifono. Ato mēra nanexō fanīrira ato shināmanima. Akka a noko nikaifoma ato mēra Satanās nanea. Satanās ato mēra nanexō fanīrira ato shināmani. Satanās chanī finakōia. Nāskax ōiti chakaya.

Niospa noko noikōi

⁷ Efe yora mīshtichi, nō noinākōinō, Niospa noko ato noimanō. Nios fistichi noko shināmatiro nō ato noinō, a fistichimāi noko noikī finakōixō. Nāskakē nō ato noikōikī nō Nios tāpia nō afe yora, nōko ōiti mā noko fetsafaano. ⁸ Niospa yorafo noikōia. Nāskaxō ato noikī noko tāpimatiro. Akka a yorafo noiaifāfema, Nios tāpiafoma. ⁹ Niospa āfe Fake fisti nāmā nīchini, nāmānoax noko nāxoyonō. Nāskakē nō afe nīpaxatiro, nāatomāi nōko chaka noko soaxomiskē. Nāskakē Niospa noko ōimani afeskaxō noko noimākai. ¹⁰ Nāskakē nō Nios noi. Akka nō Nios keskarama, nō ato noikī finamisma. Nios fistichi noko noikōimis. Noko noikōikī āfe Fake Jesús nāmā nīchini noko nāxoyonō nōko chaka noko soaxoxiki.

¹¹ Akka efe yora mīshtichi, Epa Niospa noko noikōi. Nāskakē nōa ranā nōri nō noināsharakōikāfe. ¹² Akka tsoa pishta Nios ōimisma. Nāskafiax nō noināino, Nios nōmēra ika. Nofe ixō yorafo noko noimasharatiro. ¹³ Niospa āfe Yōshi Shara nōmēra ikimakē nō tāpitiro nō Nios fe rafea, Nios nofe ikano. ¹⁴ Epa Niospa nai arixō āfe Fake noko nāmā nīchixoni. Āfe Fake nāmānoa nō ōipaoni. Ōipaonixakī nō ato yoimis iskafakī: “Epa Niospa āfe Fake noko nāmā nīchixoni, keyokōi nokoōnoax nanō nōko chaka noko soaxoxiki noko ifiano nō afe ipaxanō.” ¹⁵ Fetsa iskai: “Jesúsfi Niospa Fakeki,” ixō shināi. Aafi Nios fe rafeakī Nios afe ikano.

¹⁶ Niospa noko noikōia mā nō tāpia, nō chanīmara faiyanā, Niospamāi noko noimiskē. Nō Nios chanīmara faito nofe rafexō noko yorafo noimatiro. Akka nō ato noikōiaino Nios nofe ika, afe nō rafekōia. ¹⁷ Nō Nios noi. Nō Nios noikī finakōiax nō inimatiro Jesús anā nāmā fotoano. Anā fotoxō noko iskafatiro: “Nā ea Ifofaafō tii ēfe Epa Nios ari fokani. Akka nā ea Ifofaafoma tii ēfe Epa ari fokanima, nā omiskōipakenakafo mēra fokani,” ato fatiro. Ato askafaino nōkai Nioski meseima. Nō ranoima nō afe rafekōi. Afe rafei nō Jesús keskara

iki, afe òiti keskara nõ iki. Nāskakē Jesús oaitīa nõ akiki meseima. ¹⁸ Nõ Nios noikõiax nõ akiki mesetiroma. Nõko shinā mēraxõ nõ Nios noikī finakõixõ nõ rate potatiro. Akka fētsa mesekī iskafai: “Niospa ea omiskõimani,” ixõ shināi aatokai noikī finakõiamā. Ato noikõiamax Nioski mesetiromo.

¹⁹ Nõ Nios noiyamatai noko noikī taefani. Akka noko taefakī noinikē iskaratīari nõri nõ aõ noi. ²⁰ Akka fetsafo iskakani: “È Nios noi,” iflaxõ a Nios Ifofaafo noima, anorima yoimisfo. Mā afe yorafo õifikī atokairoko noikatsaxakakī, Niosri noisharakanima askara õiroko fakatsaxakakī. ²¹ Niospa noko yoimis: “Ea noixõ nā ea Ifofaafoi noikāfe,” noko famis.

5

Nõ Nios Ifofakē tsõa noko afaa chakafamatiroma

¹ Jesucristo Niospa Fakekõi. Nokoki nīchini noko nimapakexanõ, nõko Ifo inõ. Akka nõ a chanīmara fai nõ Niospa fakefo itiro. Nāskaxõ afe Apa Nios nõ noixõ, afe Fakeri nõ noikõitiro. ² Nõ Nios noikõikī noko yoiai keskara nõ nikai. Nāskaxõ mā nõ tãpia nõ Niospa fakefoi noikõi. ³ Nõ Nios noikõixõ afe meka nõ nikakõikī a noko yoiai keskara nõ nikai nõ fekaxteima. ⁴ Nāskakē nõ Epa Niospa fakexõ afara chakafāfe noko amapaiyai keskarakai nõ atiroma. Niospa Fake Jesucristo chanīmara faxõ afarafāfe noko afara chakafamapaiyai keskara nõ finõtiro. ⁵ Afara chakafo noko amapaiyaifo keskara Niospa noko amatiroma nõ anõma. Nāskaxõ Jesucristo Niospa Fake nõ chanīmara faxõ aõxõ na chakafo nõ finõtiro anā afaa chakafaxikima. Nā chanīmara faafāfe finõtirofo.

Niospa afe Fakekõi noko õimani

⁶ Mā nõ tãpia Niospa afe Fake feronāfakekõi ini. Nā Jesús mā maotisata faka mēra ikipakekafāta kainākafanaino, Epa Niospa yoini iskafakī: “Nafi ēfe Fakeki,” ixõ yoini. Jesús naino afe imi foaino Apa Niospa noko tãpimani afe Fakemāiakē. Afe Yõshi Shara chanīmīsama nõmēra nanexõ noko yoimis Jesús Niospa Fakekõi. ⁷ Nā trespato yoimisfo Jesús Niospa Fakekõi. ⁸ Jesús faka mēra maotisani shināta, askatari naino afe imi foni shināta, askatari Niospa Yõshi Sharapa noko yoiaino, nānorifos nā trespa shināmisfo. ⁹ Akka yorafāfe noko afara yoiaito ato chanīmara fata a Niospa noko yoiairi nõ chanīmara fakī finakõitiro. Akai yora keskarama, afa Nioskõikī. Akka afe Fakeõnoa noko yoiaito nõ chanīmara fakõitiro. ¹⁰ Akka Niospa Fake chanīmara faxõ Apa Niospa aõnoa yoini keskara afe òiti mēraxõ chanīmara fatirofo. Nāskafekē afe Fakeõnoa yoimis keskara tsõa chanīmara fayamaxõ, “Nios chanīra,” fakaxõ yorafo fanīrira shināmapaikani. ¹¹ Nāskakē Nios iskamis: “È mato nimasharapaketiro ēfe Fake Jesúsxõ,” ixõ noko iskafamis. Nāskakē nõ Jesús Ifofaax nõ afe nīpaxatiro. ¹² A Niospa Fake Ifofaifo afe nīpaxatirofo. Akka a Ifofaima afe nīpaxatirofoma.

Mā mekai xatekī ato yoisharani

¹³ Mā Niospa Fake chanīmara faaki. Nāskakē ē mato kirika kenexoni, mā tãpinõ mā afe nīpanaka.

¹⁴ Nõ afara sharafo nõ fichipaikī, a Niospa noko shināmanaino, nõ Nios yoitiro kīfikī, a Niospa fichipaiyai keskafakī. Nõ askakī nõ tãpitiro Niospamāi noko nikasharamiskē. ¹⁵ Nāskakē nõ tãpitiro a nõ Nios yoiaito noko nikaito noko nikaxõ noko afara inātiro nõ yõkaito.

¹⁶ Akka a Nios Ifofaa fētsa afara chakafaito õikī, a Nios Ifofaa fētsa Nios kīfixotiro afe chaka xatenõ. Akka Epa Niospa ato nimatiro isharapakexanõfo. Askafikanax fetsafāfe oa Nios Ifofaafo keskara iyokanax mā potakaxõ chaka shināfafāikakī Nios kachikiri fakõinafo. Askarafokai tsõa ato nimatiroma

nĩpaxanõfo. Naax omiskõipakenakafo mēra fokani. Atoõnoa Epa Nios kĩfixokãfe ixõ ã mato yoiama. ¹⁷ A Niospa noko yoiyai keskara nõ nikayamaxõ nõ chaka shinãi. Askafixõ anã nõ chaka xatepaiyaito õikĩ nõko õiti noko fetsafaxotiro, nõ anã chaka shinãpaiyamanõ.

¹⁸ Mã nõ Nios Ifofaano, noko fakefai. Nõ ãfe fake ixõ nõ tãpia nõ anã chaka shinãpaima, mãmãi noko Niospa õiti fetsafaano. Mã nõ askano Satanás afara anã noko chakafamapaiyaito, Niospa Fakekõichi Jesús noko ifixõ noko kexesharatiro. Noko askafakẽ Satanás noko afeska fatiroma. ¹⁹ Mã nõ tãpia nõ Niospa fake. Akka fetsafãfe Nios nikakaspafono, afo Satanás ato shinãmani ãto ifo inõfo. ²⁰ Niospa Fake nokoki oni. Noko tãpimaniyoi ãfe Apa nõ tãpisharakõinõ. ãfe Apafi mēstekõi ikaki. Akka nõ Jesús fe rafeax ãfe Apa feri nõ rafetiro. Nã Jesucristo Niospa Fake. Nãri Nioskõi. Nãskakẽ noko nimapakexatiro. ²¹ Efe yora mĩshtichi, Nios fisti Ifofakãfe. Satanás mato afara chakafamapaiyaito afe rafeyamakãfe. Askatari afara chakafo mã ifofapaikĩ afo shinãyamakãfe. Nios fisti shinãkãfe.

Nã tii ã mato kirika kenexõ fomai, efe yora mĩshtichi.

Ĕkĩa Juan

Juan Jesús Chanĩmara Faafo Afianã Kirika Kenexõ Fomani

Juan a Nios Ifofaafõ ato kirika kenexõ ato fomani

¹ Ëkĩa Juan, ã Jesús Ifofaafõ ã ato kexemis ã mato kirika kenexõ fomai mã täpinõ. Mã mã täpia Niospa mato katonni afe yorafo mã inõ. Chanĩma, ã mato noikõ, eres fistima, a Jesús Ifofaafõ feta ã mato noikõ. ² Nõ mato noikõ Jesúsmã nofe rafeano. Akka mã Jesús nofe rafepakenaka. ³ Efe yorafãfe, ã mato yoisharanõ. Nõko Epa Nios feta ãfe Fake Jesús noko noikõ. Nãskakẽ noko noikõianã nõko õiti mẽra noko inimamasharai, nõko õiti mẽra nõ inimasharakõinõ.

⁴ Mẽ täpia ã inimaifinakõ ranãri mã isharakõiaino a Epa Niospa noko yoini keskai. Nãskakẽ ã matoki inimakõini. ⁵ Ea nikakãfe ã mato yoisharanõ, mã ranã noinãkãfe. Mã mã nikamiskĩ mã mã Jesús Ifofakĩ taefanitĩ. Akka ãa shinãxõ ã mato meka fena kenexonima, mã mã nikamis. Nãskakẽ mã ranã noinãsharakãfe. ⁶ Nõ Nios noikĩ a noko yoiai keskara nõ aki. Niospa taefakĩ noko yoiaito mã mã nikamiskĩ iskafakĩ yoiaito: “Mãa ranã noinãkãfe,” ixõ noko yoiaito mã mã nikamis.

Ãa anorima yoikĩ ato pãramisfo

⁷ A ãa ato pãramisfo ato mẽra fofãsamisfo. Afãfe, “Na Jesucristo Niospa Fake Apa Nios ariax oni feronãfakekõ ixikĩ,” ixõ yoimisfoma. Afãfe ato pãrapaimisfo Cristo noikaspakata imisfo. ⁸ Mãri ato keskara iyamakãfe. Shinãfai ikãfe ato keskarama. Mã askakĩ mã ato Nios yoisharaimano täpitirofoma, fenotirofo. Akka ato Niospa meka mẽstekõ ato yoisharakõikãfe Nios täpisharakõinõfo. Nãskakẽ mãri afara shara a Niospa mato mekexona mã fitiro, mã Nios yonoxosharakĩ.

⁹ Akka fetsafãfe a Cristo noko yoiai keskara nikayamakaxõ anã shinãkanima, ãa fanĩrira shinãkani. Afokai Nios fe rafeafoma. Akka fetsafãfe a Cristo yoiai anori nikakanax Apa Nios fe rafekõikata ãfe Fake Cristo feri rafekani. ¹⁰ Akka yora fetsa matoki oxõ Cristoõnoa yoisharaima fanĩrira yoi, askara fe rafeyamakãfe. “Noko Niospa meka yoife,” fayamakãfe. ¹¹ Nãskakẽ askara yora mã chanĩmara fakĩ afe rafexõ afeta mã anorima yoitiro chaka shinãkĩ.

Mã Juan mekai xatekĩ ato yoisharani

¹² Ë mato kirika kenexõ ichapa fomapaifikĩ askatamaroko ã matoki nokopai mato fe yoinãxiki. Ë matoki nokoano nõ inima faatanãsharanõ.

¹³ Nã efe yora mĩshtichi, Nios Ifofaafõ nonoax ichanãmisfo afãferi. Nã tii ã mato yoi kirika kenexõ.

Ëkĩa Juan

Juan Gayo Kirika Kenexō Fomani

Juan feronāfake yoisharani, āfe ane Gayo

¹ Efe yorashta Gayo, ĕkĭa Juan. Ĕ xini ichapa amis a Nios chanĭmara faafo ĕ ato kexekĭ. Ĕ mia kirika kenexō fomai mĭ tĕpinō. Ĕ mia noikōi.

² Yamā, ĕ mia noikĭ Nios kĭfixōfafĕini mĭ yonayamanō. Mĕ tĕpia mĭ ōiti sharakōi mĕ mĭ Nios Ifofasharai. Nĕskakĕ ĕ mia kĭfixōfafĕini mia kexesharanō mĭ afeskanōma shara mĭ inō. ³ Mĕ mia nikamis mĭ Nios potakaspakōiaito. Nĕskaxō a Ifofafo mĭ ika anoax ekeki nokokaxō ea iskafamisfo: “Nĕ Gayopa Niospa meka nikasharai,” ixō ea yoimisfo. Nĕ nikai ĕ mikiki inimai finakōi. ⁴ Ĕfe fakefĕfe Jesŭs Ifokōifaifĕfe nikai ĕ inimakōimis. Afara fĕtsakai ea inima-makĭ iskafatiroma.

⁵ Yamā, ĕ mia noisharai. Mĕ nika a Nios Ifofafo yora fetsafo mĭ ato kex-emis mia ano nokoafĕfe, mĭ ato ĭkisharakōia, ato ōiyamafikatsaxakĭ. ⁶ Nĕskakĕ na mĭ ato kexeafĕfe noko yoitafo mia yoikakĭ. Nĕskakĕ na Nios yoiti pexe mĕranoax ichanĕkanax fanĕikani mĕ nō nika mĭ ato noikĭ, mĭ ato ĭkisharakōia. Nĕskata ĕ mia yoikĭ iskafai: Afara ato inĕfe Niospa meka ato yoinōfo pexe tii, Niospa meka ato yoifofĕsafanōfo. Mĭ askafaino Nios mikiki inimai. ⁷ Nĕfo fofĕsamisfo Jesŭsnoa meka shara ato yoifofĕsafakani. Afara yopafĭkĕki a Jesŭs chanĭmara faafoma ato afaa yōkamisfoma. ⁸ Nĕskakĕ a Nios Ifofafo nō ato kexesharatiro afara fichipaiyaifĕfe nō ato inĕtiro. Nō ato askafakĭ nōri ato feta Nios yonoxomis itiro.

Yora fetsa āfe ane Diŕtrefes chaka ini

⁹ A Niospa meka nikapaikani ichanĕmisfo ĕ ato kirika kenexō fomayamea ōinōfo. Akka Diŕtrefes ea nikakaspamis, “Ĕ ĕto xanĭfo finakōia inōra,” ixō. Nĕskaxō ea ōikaspai, efe rafepaima. ¹⁰ Ea mekafakĭ chakafamis, ea yafi a Niospa meka yoimisfori noko chakafai. Askatari a Nios Ifofafo fetsafo ato ifĭkaspamis Niospa meka ato yoiyamanōfo. Fetsafĕfe ato ifipaiifaifono a Diŕtrefes ato ifimakaspamis. “Mĕ anĕ nofe ichanĕtiroma nono ikiax,” ixō ato chakafamis. Nĕskakĕ ĕ matoki nokoxō ĕ mato xafakĭakōi yoi kaikai mĕ tĕpisharakōinō, afeskakĭ ato chakafaimĕkai. ¹¹ Yamā, ōiti chakayafo keskara mĭri iyamafe. Akka a ōiti sharayafo keskara mĭri ife. A ato sharafamisfo Niospa fakefokĭ. Akka a ato chakafamisfo Nios tĕpimisfoma afe keskaramĕki.

Nayora fetsari āfe ane Demetrio shara ini

¹² Keyokōichi a yoisharakani Demetrioŕnoa iskafakakĭ: “Na Demetrio fer-onāfake sharafinakōia,” ixō yoikani. Nōri anori yoimis. Nō anori yoiaito mĭri chanĭmara fatiro, mĕ mĭmĕi noko tĕpixō.

Mĕ mekai xatekĭ Juan ato meka shara fomani

¹³ Ĕ mia ichapa yoipaifĭkĭ ĕ anĕ mia kirika ichapa kenexonima. Kaxō ĕ mia yoisharaxiki. ¹⁴ Akka ĕ mikiki koshi nokosharapai. Ĕ mikiki nokoax mefe yoinōnĕsharaxiki.

¹⁵ Mĭri isharafe, ōiti fekaxteyamaxiki. Na efe ikafĕferi mia meka shara fomapaikani. Mĭri a mefe ikafo noko ato yoioxsharafe. Nĕskakĕ nĕ tii ĕ mia yoi kirika kenexō mia fomai.

Ĕkĭa Juan

Judaspa Jesús Chanĩmara Faafo Kirika Kenexõ Fomani

Judaspa ato kirika kenexoni a Nios Ifofafo

¹ Ëkĩa Judas, Santiago afe exto. Nõko Ifo Jesucristo ẽ yonoxomis. Ẽ mato kirika kenexoni a Epa Niospa mato noikĩ mato ifini tii afeñakõĩ faxiki. Akka Epa Niospa nõko Ifo Jesucristoõxõ mato kexesharafafãini. ² Epa Niospa mato noikĩ, mato inimamasharakõinõ mato õiti fekaxteyamanõ, askatari mato noikĩfinakõinõ.

Fetsafãfe chanĩ fisti ato yoipaonifo (2 Pe. 2.1-17)

³ Efe yora mishtichi, nõko Ifãfe noko nãxoni keskara ẽ yoi, a noko imapaiyai keskai nõ chipo afe ixiai keskaraõnoa ẽ mato kenexopaifikĩ mẽ nika mã meka fetsa yopaito. Nãskakẽ iskaratĩa ẽ mato kirika kenexoni mã Jesucristo nikakõiyana mã shinãfãinõ. Nãnori Epa Niospa afe Fakeõxõ noko tãpimani. Nã afe Fakeõnoa noko tãpimani keskafakĩ nã fisti nõ yopai Ifo sharafaxiki. Akka meka fetsa mato fanĩrira yoipaiyaiãfe ato nikatamaroko nã mato yoini keskara nã fisti nikakõikãfe. ⁴ Yora chakafo mato mēra fõkaxõ anorima mato pãrakani chaka tãpimapaikakĩ. Afokai Niospa yorafoma. Akka nõ afara chakafamisxakĩ nõ Epa Nios yoiaito nõko chaka noko soaxonano nõ afe ipaxatiro. Nãskafekẽ nãfãfe fanĩrira chakakõĩ mato yoipaikani, iscafakĩ mato yoipaikakĩ: “Mã Jesús Ifofaxõ nã mã apaiyai keskara mã atiro, mato afeima fe mã ikaino, kērofori afe fenema fe itirofo. Nãskaxõ nã afara chaka fetsafo mã apaikĩ mã atiro. Mã askafaito Niospa mato omiskõimatiroma,” ikaxõ fanĩrira mato yoipaikani. Nõko Ifo Jesucristo fisti nikakaspamisfo. Nã keskarafoõnoa Niospa shinãmanaino keneyonifo Niospa ato omiskõimakĩ finakõixii.

⁵ Akka mã mã tãpifekẽ anã ẽ mato yoipai nõko Ifãfe Ejipto anoa israelifo ato ifini anã omiskõinõfoma. Akka ato ifinixakĩ chipo a chanĩmara faafoma ato keyokõĩ reteni. ⁶ Nãskatari Niospa afe ajirifo taeyoi Nios fe isharayopaonifo. Nãfãferi Epa Nios yonosharaxoyopaonifo. Nios fe isharafiakatsaxakĩ atirifãfe afara chaka shinãkakĩ anã Nios Ifofapainifoma. Askaifãfe õikĩ Niospa kaninãna metexkereaxõ fakishifã mēra ato nĩchiyoni. Nãskaxõ nã nikamisfoma ato omiskõimanaitĩa ato ichanãfaxõ nã omiskõipakenakafo mēra ato potaxii. ⁷ Nã Niospa ajirifãfe afara chakafapaonifo keskafakĩ Sodoma anoafõ feta Gomorra anoafãfe a peixe rasi ano chaima ikafãferi nãskafapaonifo afara chakafakakĩ. Feronãfakefãfe ato afeimafo chotaifono, kērofãferi ato fenemafo chotamapaonifo. Askatari feronãfakefo ãa ranã chotanãpaonifo, kērofori askapaonifo ãa ranã chotanãkani. Nãskarafo õikĩ Niospa ato omiskõimani, chiifã tokiriya nai mēraxõ atoki potani. Nã askafanioxõ Niospa noko tãpimani. Nã tãpixõ nõ tãpitiro fatorafãfe ato chaka xateyamakanax nãskarifiakani, chiifã mēranoax omiskõipakenakafo.

⁸ Nãskarifiakĩ nã chanĩmisfãfe afara chaka fisti shinãfãikani. Nãskakaxõ afia ato namapa õia keskafakakĩ, nãskakõĩ fakani, ato yora chakanafakakĩ. Askatari Nios nikakaspakani. Nãskakaxori Niospa ajirifori ichamisfo. ⁹ Akka Niospa afe ajiri Miguel xanĩfokõifixõ atokai Satanás ichanima. Mã Moisés naano Satanás Miguel fe feratenãni. Miguel Moisés afe yora maifapaiãino, akka Satanás Moisés afe yora chakafapaixikĩ fipaini. Askafaito õikĩ Miguel afe feratenãfikĩ ichanima. Yoikĩ iscafani: “Satanás, ẽ mia afeskafatiroma. Akka ẽfe Ifo Niospa mia yoinõ mã omiskõinõ,” ixõ yoini. ¹⁰ Akka nã feronãfakefãfe mato

mëra fõkaxõ nã afaa täpiamafikaxõ meka chaka yoimisfo. Askatari nã apaiyai keskara fisti famisfo, nã yoinãto shinãsharatiroma keskarafõ. Nãskakaxõ ãa afarafo chakafakanax omiskõipakenakafo.

¹¹ Ooa. Nã Caín ini keskarato. Caín ãfe onefetsa noikaspapaoni. Nãskakë reteni. Askatari nã Balaam kori fisti fichipaikĩ Nios kachikiri fani. Na yorafori nãskaraforti. Nãfori nã Coré keskarafõ. Nã Coré ãfe xanĩfo Moisés nikakaspapaoni. Nãskakë nikakaspaito Niospa reteni, nãskarifikĩ nã ato pãramisfo Niospa askari faxii omiskõimakĩ. ¹² Akka mã noinãkĩ ayayanã mã pimis nõko Ifo shinãyanã. Akka nã yora chakafori rãfitama mato fe ichanãkaxõ nõko Ifo shinãmisfoma. Fetsafo noitama ãakõi noimemisfo. “Nõ mato yoi mato kexesharaxiki,” ifiakaxõ tsõa afaa yoisharamisma. Nãfo nã nai kõi oimais keskarafõ. Nõ nai kõi fakish õikĩ mã oi feira nõ fatiro inimayanã. Akka oi iyamaino nãfe nai kõi potano nõ shinãchakatiro. Nã ato kexemisfo keskarafõfikanax afãfe nõko Ifoõnoa tsõa täpiama. Nãskatari nã yorafo nã ifi fimimistia fimiyamai keskarafõ. Nã ifi mã nai rafea keskarafõ, mã nakë ãfe tapo tsekatirofo. Nãskarifikĩ nã ato pãramisfãfe tsõa ato Jesús Ifofamatiroma afe nãpaxanõfo. ¹³ Nãfo oa fakafã poo ikĩ fãkox potatiro keskarafõ. Nãskakaxõ afãfe afaa shara yoitirofoma, mẽxotaima afara chaka yoikani rãfimisfoma. Nãfo nã fishi keskarafõ. Mã fishi nãmã pakexõ, anã chaxatiroma. Nãskarifikai nã mato pãramisfo Nios kachikiri fakanax fakishifã mëra fokani, Niospa nã keskarafõ ato täpimãkĩ ato omiskõimakõixii anoax omiskõipakexanõfo.

¹⁴ Nãskatari Enoc chipo fakeni, mã Adán afetãama Epa Niospa onifanino. Akka Enoc ãfe xini ini Adán. Nã Enoc nã chanĩmisfãfe ato pãranõpokoxiaifoõnoa yoini. Nãskata aato ato yoikĩ iskafani: “Nikakapo, ã õia nõko Ifo oi, afe nai mëra ikafo fe ichapakõifo tsõa ato tanatiroma afe fexikani. ¹⁵ Nãskaxõ ato yoipakexii nã niyoxõ amisfo keskara. Keyokõi maitio anoafõ nõko Ifoki fexikani, fatofomãki afe yorafo a afe ipanakafo ato õinõ, askayamai fatoforimãkai a chanĩmara fayamakanax omiskõipakenakafo mëra foaifo. Akka nã nikamisfoma afe yorafoma. Akka nã chakafamisfo tii ato yoita, niyokaxõ Nios nikakaspapaonifoõnoa yoita, keyokõichi mekafakĩ chakafamisfoõnoari ato yoixii,” ixõ Enoc ato yoini. ¹⁶ Nãfãfe yõachepeyanã ato mekafamisfo. Nã chakafapaiyai keskara fisti shinãfãfãimisfo. Askaxori fetsafo pãrakaxõ afara fãpaimisfo ea inãsharakanira ixõ shinãfãfãimisfo.

Nã Nios Ifofafo ato yoisharani isharanõfo

¹⁷ Efe yora mĩshtichi, nã nõko Ifo Jesucristoõnoa mato yoimisfãfe mato yoinifo keskara shinãmakiyamakãfe. ¹⁸ Iskafakĩ mato yoinifo: “Nõko Ifo mã chaima oaino nã Jesús Ifofaafãfema mato kaxemetsama faxikani, Niospa meka nikakaspakakĩ. Nãfãfe afaa shinãtama nã chakafapaiyaifo fisti shinãfãfãikani,” ixõ mato yoinifo. ¹⁹ Nã keskarafãfe mato paxkanã fatirofo, afarafo chakafo shinãfãfãikani. Askarafo Niospa Yõshi Shara ato mëra naneama.

²⁰ Akka efe yora mĩshtichi, kexemesharata isharakõikãfe Niospa ãfe meka shara nikakõiyana. Nãskakë kifikãfe ãfe Yõshi Sharaõxõ mato imapaiyai keskara mato täpimanõ. ²¹ Nãskakë Jesús Ifosharakõifakãfe, Epa Niospa mato noikõiaito mã mã meemiski. Nõko Ifo Jesucristo noko noikõikĩ nõ nafiakë noko nimapakenaka nõ afe ãpaxanõ.

²² Fetsafãfe iskafakĩ shinãifono: “Ëtsa, chanĩma rakikã,” ixõ shinãifono, fenãmãshta ato yoisharakãfe nikasharakõinõfo. ²³ Oa afara chiifã mëra pakeax koofaito, nõ koshi firisafatiro keskafakĩ nãskarifikĩ fetsafãfe afara chakafafono ato noikĩ yoisharakãfe Jesús chanĩmara fanõfo, chiifã mëra foyamanõfo. Akka yora chakafinãkõiafori mã ato noikĩ ato yoisharakãfe xatenõfo,

chiifã mēranoax omiskōiyamanōfo. Nāskatari nō kooyoxō rapati chakana faxō nō anã fichipaitiroma. Nāskatari āto chakafo noikaspaifo keskara iyamakāfe. Ato noikōita nã afara chakafaifo keskafakĩ ato feta ayamakāfe.

Mã mekai xatekĩ Niosnoa ato yoisharani

²⁴⁻²⁵ Nōko Ifo Nios fisti finakōia, nãato keyokōi tãpiakōia. Askatari nãato noko ifimis. Āfe kerex sharaōxō noko kexesharatiro nō fenonōma. Nãato noko inimamasharakōi nō nai mēra kai, afaa chakafamisma keskarax. Nã sharafinakōia, efapakōi, afama mīshti fatiro, tsōa atiroma keskafakĩ nōko Ifo Jesucristoōxō atiro. Nāskarakōi mēxotaima ĩpanaka. Nã tii.

Ĕkĩa Judas

Jesucristo Juan Ōimani Keskara

Afara afeskara ixiai anori Jesucristo Juan tāpimani

¹⁻² Efe yora mīsttichi, iskaratīa ē mato kirika kenexō fomai mā tāpinō. Ēkīa Juan ē mato kirika kenexō fomai. Nai mēraxō Epa Niospa Jesucristo yoini afe keskara a inōpokoaifo nāmānoafo a yonoxomisfo tāpimaximākai. Askafaito nikakī Jesús āfe ājiri ekeki nīchia. Anoxori ea ājirinī yoinō afe keskara ikimākai nāmānoafo. Ea ōimanaito mē ōia a inōpokoaifo xafakīakōi. Askaito ōikī ē kirika kenea a inōpokoaifo anori a Niospa Jesús yoia anorikōi mā tāpisharakōinō.

³ Na ē mato yoiai ikataima. A inōpokoai ē mato yoiai na kirika ano. Nā ōikani fetsafori inimanōfo. Askatari a nikaifori chanīmara fakanax, afori inimaxikani. Nā ē mato yoiai keskai mā samamashta iki. Ea nikasharakāfe.

Juan a ichanāmisfo anoafō siete Nios yoiti pexe anoafō ato kirika kenexō fomani tāpinōfo

⁴⁻⁵ Nā Asia mai anoafō a Nios Ifofaafo tii siete pexefo anoafō ē mato kirika kenexō fomai. A ē mato yoiai anori ōisharakōikāfe. Afetīama Epa Nios niyopaofinixakī iskaratīa nia. Epa Nios nīpanaka. Āfe Yōshi Sharari afe itiani. Nāskakē Epa Nios feta āfe Yōshi Sharapa, āfe Fake Jesucristo mato noikī mātō ōiti mēra mato shināmasharapainō afanā mātō ōiti fekaxtefanōma. Nāskakē nōko Ifo Jesucristo Niospa meka noko yoimis chanīmakōi. Jesúsfi Niospa Fakekōifekē retenifo. Mā retexō maifafafono Apa Niospa anā otofani anā nanakama. Fato fetsa askayomisma. Nāskaxō Apa Nios fe rafexō a xanīfofo maitio anoafō ato ikixii xanīfokōi ixō. Aatofo noko noikōiakī, āfe imi foax noko nāxonī Satanás chaka nōko ifo inōma. ⁶ Nō aōnoax nō Epa Nios afe yorakōi ixō noko yonomapaiyai keskafakī nō anō. Nō askai afe yorakōifo ixō nōri yora fetsafo nō kīfixotiro Epa Niospa noko nikai. Nāskarafoskōi nōko Ifo Jesucristo noko imai. Nāskakē keyokōi yorafāfe aōxō iskafakakī yoipakenakafo: “Aicho, tsoa fetsakai na Jesús keskarama. Nā fisti sharafinakōia. Ares fisti nōko Ifo nīpanaka. Ares fisti keyokōi yorafo ato ikipakenaka,” ixō yoipakenakafo. Askapakexapainō.

⁷ Ōikapo. Oa nai kōi keskara sharakōi nōko Ifo Jesús oaito keyokōi yorafāfe ōixikani. Askatari a retenifāferi ōikani, akiki rāfixikani. Oaito ōikani keyokōi yorafo a Ifofamismamafo, “¿Afeskakī nō Jesús Ifofamismamē?” ikanax oiaxikani, shināmitsakōixikani.

⁸ Epa Niospa yoia: “Afara onifataima ē iyopaoni. Ēfi nīpanakakī. Afetīara na nōko mai keyoai eres fisti ē ato yoitiro. Nāskaxō ē afama mīstti famis. Akka ē niyopaoni. Nāskatari ē nīpanaka,” ixō nōko Ifo Niospa yoia.

Nōko Ifo Jesucristo āakōi oa namakē ōiai keskara Juan ōimani

⁹ Ēkīa Juan, ē mātō ochikōi. Nāskax māri Jesús Ifofaax mā efe yorakī. Askax mā aōnoax omiskōifikī, mā tenemis. Nāskariai ēri aōnoax omiskōifikī ē tenei. Ē Niospa meka ato yoita Jesúsnoari ē ato yoimis. Ea nikakaspakakī, āto xanīfāfe sorarofō ea achimaxō, fakafā nakirafe ea ato nīchimana āfe nāsimā, āfe ane Patmos ano. ¹⁰ Ē mato yoinō, ea nikakāfe. Anoxō iskafani. A Jesús otoni penata, nomīkonō, Niospa Yōshi Sharapa ea ikixō a ea tāpimapaiyai ea ōimana. Oa namakē nō ōimis keskara xafakīakōi ea ōimana. Askata ea kachiorixori fāsikōi oa xāaiti keskarato ea yoiaito ē nika. ¹¹ “Nā mī ōiaifo fetsafo kenexōfe. A kirika kenexō Jesús Ifofamisfo tii ato fomafe. A siete Nios yoiti pexe anoafō Asia anoafō ato fomafe, afāfe ōinōfo. A Nios Ifofamisfo a pexe tii

Efeso anoafo fomata, Esmīrnā anoafo fomata, Pērgamo anoafo fomata, Tiatira anoafo fomata, Sardis anoafo fomata, Filadelfia anoafo fomata, Laodicea anoafori nā mī ōiaifo ato kirika kenexō ato fomafe,” ea faa.

¹² Ea askafaito ē fesoakekafā ē ōia tsōa ea yoimākai ixō. Ē ōia siete oa rāpari efapa ōta keskara oro ē ōia. ¹³ Nāskai rāpari nakirafe feronāfake xanīfo finakōia nia keskara ē ōia. Āfe tari āfe tae fepokōia, āfe sītorari orokōi aō nonexemea ika. ¹⁴ Askata āfe foo oxokōi. Askatari āfe fero oa chii keskara xafakīakōi. (Nāskarifiakī xafakīakōi Jesús noko ōitiro a nō shināi keskara.) ¹⁵ Askatari āfe taeri chaxasharakōia ika. Āfe mekari oa oi kaya feaito nō nikamis keskarakōi. ¹⁶ Āfe pōya kayakai aōri āfe mifi kamaki siete fishi keskara ika. Āfe ana keno chainipa keskara aostamea ika. Askatari āfe femānā fafekōi oa xini nō ōimis keskara ika.

¹⁷ Nāskara ōi ē pakea, oa nai keskara. Ē askaito ōikī ea ramā āfe mifi kayakai aōxori. Ē askaito ea yoia iskafakī: “Rateyamafe. Ē Jesúski. Afara onifataima ē iyopaoniki. Ēfi anā nanakamaki. ¹⁸ Iskaratīari ē nia. Mē nafianixakī, iskaratīa ē nia. Ē anā nanakama. Ē anā afeska pishta nakama. Eres fisti ē ato namata, chiifā mēra ē ato potatiro a ea nikakaspamisfo. ¹⁹ Nāskakē a mī taefakī ōiaifo kirikaki kenefe. Askatari na mī iskaratīa ōiaifori kirikaki kenefe. Askatari a chipo ixiaifori kenefe. ²⁰ Ē mia yoinō afeskai siete fishimē ēfe mēke kayakai aōri; askatari afeskai siete rāpari oro keskara otamāki. Na siete fishi mī ōiai nāato noko shināmamis siete Niospa meka yoimisfo Nios yoiti pexe mēranoa ichanāmisfo. Askatari nā siete rāpari keskara mī ōiai nāatori noko shināmamis siete Nios yoiti pexe mēranoax ichanāmisfo Nios Ifofakanax,” ixō ea faa.

2

Jesús a Ifofaafo Efeso anoafo ato yoini taekōifakī

¹ Jesús ea yoia iskafakī: “Efeso anoxō a ea Ifofaafo a ato Niospa meka yoimisto na kirika ato anexonaito nikanōfo, iskafakī kenexōfe: ‘Ēkīa mātō Ifo Jesús keyokōi yorafo ēfe Epa Niospa meka yoimisfo ē ato kexetaifaa. A ē mato yoiai anori ea nikasharakōikāfe. ² A mā ikai keskara mē tāpia, mē mato ōi. Māfi eōxō fāsi yonosharakōimiskī. Afara fetsa afeskara afiaito mā tenekōimis. A yorafāfe afarafo chakafamisfo anorikai mā tāpipaimisma. Akiki mā inimapaimisma afara chakafaifono, nāskax mā ato fe rafekaspamis. Yora fetsafāferi mato yoikī iskafakani: “Cristo ea nīchia ē mato yoinō,” ixō mato yoiaifāfe, “Nō ato nikayonō,” ixō mā ato nikataifaa. Fanīrira mato yoiaito anā chanīki yoimara mā faima mē mato ōia mā askafaito. Anorima yoi āa chanīmisfo mā mā tāpia. ³ Nāskax mā eōnoax omiskōikī mā tenemis ea potakaspakī. ⁴ Mā anori shara shināfimiskē ē anā meka fetsari yoinō. Taefakī mā ea noiyopaonixakī anā iskaratīa mā ea anā noisharaima. Mā mā ea shināmaki fetsea. ⁵ Shināsharakāfe a mā taefakī shināyopaoni anori. A ea noikī mā taefani keskafakī anā ea noikāfe. Askatari mā ranā mā nōināyopaoni keskakōikāfe. Akka mā ea tanaima, oa chii nokaito nō anā kētefatiro keskafakāfe ea shinākī. Mā ea Ifofasharayamainokai chipo tsōa anā mato tanaima. Mā ichanāi ano anā tsoakai mato fe ichanāima. ⁶ Mā askafixō afara fetsa mā shara famis. A feronāfake āfe ane Nīkoraita fanīrira yoiaito nikakakī atirifāfe mato anoxō nikakaxō, afāferi chakafamisfo keskafakī ēri ato noikaspai. A ē noikaspai keskafakī māri efeta noikaspai. ⁷ Mā pachoyakī ea nikakōikāfe. Niospa Yōshi Sharapa mato yoiaito nikasharakōikāfe. Satanás mato fanīrira shināmapaimiskī. A Satanás finōinīfofā ea kachikiri fatama ea Ifofasharakōiaito, aafi Epa Nios ano ē ikimaxii efe isharpakexanō,” ixō Jesús ea yoia anori Efeso anoafo a chanīmara faafo ato ē kenexonō.

Jesús Ifofaafo Esmīrnā anoafo ato yoini

⁸ Anā Jesús ea yoia iskafakī: “A ea Ifofamisfo Esmīrnā anoafo a ato Niospa meka yoimis ē yoinō ea kirika kenexōfe iskafakī: ‘Ēkīa mātō Ifo Jesús ē mato yoi mā tāpinō. Ea nikasharakāfe. Nā afama mīshti onifataima ē iyopaoni. Iskaratīa ē nīpanaka. Mē nayofinixakī ē anā nanakama. Ē mato nonori yoi iskafakī: ⁹ Mā omiskōiaito mē ōi. Askatari mā afaayafoma. Mā askafiaino ē mato fe ikano, ea keskarari mā shara itiro. Mē tāpia matoōnoa yora fetsafāfe meka chakayoiaifāfe. “Nō judeofo, nō Nios Ifofamis,” ikaxō yoiaifo afokai efe yorafoma. Afofi Satanás yorafoki. ¹⁰ Akka a inōpokoai ē mato yoinō. Satanás ifoafāfe fatora fetsa fisti mato karaxa mēra ikimaxikani mā ea shināmakimākai ōixikakī. A mato mesenifaifono rateyamakāfe. Ea shināmakitama nonori shinākāfe iskafakī: “Ea retēfiaifono ē meseima, ē Nios ari kai. Ēfe Ifāfe ea potanakama. Ē ēfe Ifo noikī finakōifafāini,” ixō yoikāfe. Mā askax, nakē, ē mato īkipakenaka mā efe īpaxanō. ¹¹ Mā pachoyakī nikasharakōikāfe Niospa Yōshi Sharapa mato yoiaito mā Jesús Ifofakī. Fetsa omiskōifikī ea shināmakiyamaito Satanás afeskafatiroma. Nāskax naax a omiskōipakenakafo mēra katiroma,” ixō anori Jesús ea yoia a Ifofaafo Esmīrnā anoafo ē ato kenexonō.

Jesús Pérgamo anoafo a chanīmara faafo ato yoini

¹² Anā Jesús ea yoia iskafakī: “A ea Ifofamisfo Pérgamo anoafo a ato Niospa meka yoimis a ē yoipaiyai anori ē yoinō ea kirika kenexōfe tāpinōfo. Iskafakī kenefe: ‘Ēkīa mātō Ifo Jesús ē mato yoi mā tāpinō. Ēfe meka oa keno chainipa takairafe ikikōiai keskaraxō, ēfe mekapas a ea noikaspaifo tii ē ato chakafatiro kopikī. ¹³ Mē tāpia a pexe rasi Pérgamo ano mā ika. A Pérgamo anoafāfe Satanás nikakōikani. Askaito ōi mā mesemisma, ea Ifosharafai. “Jesús nōko Ifokōi,” ixō mā ato yoimis. A ea Ifofamis fetsa āfe ane Antipas eōnoa ato yoimis ōikī mā reteafo noikaspakakī. Mā reteaifāfe ōfiāx mā atoki meseima, mā ea chai faama. Mātō ōiti mēra mā shināsharakōi. “Noko retēfiaifonokai nōko Ifo Jesús nō chai faima,” ixō mā yoimis. Anori mā shināi sharakōi. ¹⁴⁻¹⁵ Akka nāno afara fetsa a sharama ē mato yoipai. Fatora mā fetsa a Balaam afara chaka yoini keskara mā shināmakikaspai. Akka taeyoi xanīfo Balac israelifo chakana famapaini. Nāskaxō Balaam yōkani: “¿Afeskaxō mī kaifo ē ato chakana famatiromē?” faito, Balaam kemani iskafakī: “Mī ato yoitiro mī fista mēra ato ikikixiki. Nā mā akai keskarari akairi anōfo. Nā nōko niosra ixō afara onifaxō a mā piai mā ināmis. Nā israelifāfe pikanax chakananōfo mātō fista mēranoax. Askatari āto āfima fe ikanax chakananōfo,” fani. Iskaratīari nāskarafori mā fisti rasi chakanāfo nā Nicolaitafāfe ato afara chaka tāpimanaifo keskara ikafo. ¹⁶ Nāskakē anā iskaratīa askafayamakāfe. Nios Ifofakāfe, anā shinākāfe. Mātō chaka xatekāfe shināmitsayanā. Akka mā chaka xateyamaito, ē matoki samamashta nokoxō ēfe mekapa ē mato kopikī chakafatiro mā omiskōinō. Ēfe mekafi oa keno ikiai keskarakōikī. ¹⁷ Mā pachoyaki ea nikakāfe. Niospa Yōshi Sharapa eōnoa mato yoiaito, nikasharakāfe. Satanás mato chakafamapai. Fētsa Satanás nikayamaxō ea kachikiri faamano, nā ē kexesharaxii nā ēfe Epa israelifo kexesharani keskafakī. Shinākapo. Epa Niospa israelifāfe āto xinifo a piaifo ato ināni fonāikaifāfe afaa piamaifāfe Epa Niospa nai mēraxō ato pōtani oa misi keskarafo āfe ane mātō nā pinōfo ato pōtapaoni pena tii ato noikī. Nāskafakīri nā ea chanīmara faafo ea Ifo sharakōi faifo ē ato ināxii ēfe Yōshi Shara isharapakexanōfo. Ea ōiyamafiaifono pena tii ē āto ōiti xafasharakōi faxotiro. Askatari mā ea Ifo sharaifaifono isharakōiyanā mā ea chanīmara faino, akka ē mato ane fetsafaxōi tsōa tāpimisma, nā fiaī fistichi tāpitiro. Tokiri

oxosharakōikī nā tokiriki mā mātō ane kenea mātō ane fena ě mato ināxii. Nāskakē ea tāpisharakōixikani. Mā ōitisharayakōi ixii, ” ixō Jesús anori ea yoia a chanīmara faafo Pérgamo anoafō ě ato kenexonō.

Jesús a Tiatira anoafō a Ifofamisfo ato yoini

¹⁸ Anā Jesús ea yoikī iskafaa: “Ea Ifofaafo Tiatira anoafō Niospa meka ato yoimis a ě yoipaiyai anori ě yoinō ea kirika kenexōfe iskafakī: ‘Ĕkīa ě mātō Ifo Jesús ě mato yoisharapai mā tāpinō. Ĕfe fero oa chii xoisai keskara. Nāskakē ě mato tāpikōia. Ĕfe taeri nā keno fakka fakka ikai keskara. Nāskakē ě mato yoikī iskafai: ¹⁹ “Mē mato tāpia, nā mā afara shara famis. Mā nōinākōi. Askatari mā ea chanīmara faxō mā ea Ifokōi famis. Nāskakē fetsafori mā noisharakōimis ato kexesharayanā. Mā omiskōifikī eōxō mā tenekōimis. Mā ea chanīmara fakī taefanitīa mā fetsafo sharafamis. Nāskakē iskaratīari mā ato noisharataifaa. ²⁰ Mā mā askafimisno afara fetsa ě mato yoinō a ě fichipaiyaima mā anā fichipainōma. Akka kēro fisti mato fe ichanāxō, ‘Ĕ Niospa meka ě mato yoinō, ea nikakāfe,’ ixō mato yoipaikī, ěfe mekakōi mato yoima. Nā kēro Jezabel fanīrira mato yoikī āa mato pāramis. Mā Jesús Ifofafiamiskē mato pāramis iskafakī: ‘Mātō āfimafo chotakāfe; kērofāferi mātō fenemafo chotamakāfe,’ mato famis. Askatari mato yoimis iskafakī: ‘Afara fetsa yora fakaxō, nā nōko niosra ixō, a mā piyai ispaxō nōko nios nō ināira ixō, ano fisti ichanāxō, mā pitiro,’ ixō na kēro Jezabel mato yoikī mato pāramis. ²¹ A kēromā fanīrira mato yoimis mē yoitaifamis anā chakafanōma. Ĕ yoifiaitokai āfe chaka xatepaima. ²² Ĕ yoifiaino ea nikayamaito ōikī ě isinī imaxii rakatsax omiskōinō. Askata a fetsafori a keskara a sharashināifoma āto chaka xateyamaifāfe ě ato omiskōimani. ²³ A kēromā shināi keskarari shināifo ě ato retexii. Ĕ askafaito, ōikani a ea Ifofamisfo mai fetsafo arixō tāpitirofo ě keyokōi yorafo ě tāpisharakōia. Mātō ōitinī a mā shināi anori mē tāpikōia. Tsōakai afaa pishta ekeki onetiroma. Ĕ keyokōi tāpikōia. Nāskakē mā afarafo shara famis ě mato shara faxii kopifakī. Akka a afarafo chakafamisfo ě ato omiskōimaxii kopikiri. ²⁴ Ĕfe yora mīshtichi Tiatira anoafāfe, mā atiri nā kēromā mato fanīrira yoipaiyai anori mā nikamisma. Satanás ato tāpimamis keskara mā anori shināpaima. Askara shara. Nāskakē ě anā mato afaa fetsa yoima. ²⁵ Nāskakē ě anā fistiri mato yoi. Na eōnoa mā tāpimis anori shināmakipaiyamakāfe. Ĕ mato ifiyoai mā eōnoa tāpimis anori shināmakipaiyamakāfe. ²⁶⁻²⁸ Fētsa Satanás finōkōixō, ea fisti Ifokōifaax mā naax nā efe nīpanaka. Ĕ ato xanīfo imaxii. Epa Niospa ea xanīfokōi ima keyokōi ě ato ĩkinō. Nāskarifikī ě ato xanīfo imatiro efeta na maitio anoafō ato ĩkinōfo, mitsisipakōixō. Akka a fetsafāfe ěfe meka shara nikakaspaiifāfe nō ato omiskōimaxii. Oa nō kesho kerexkai nō yamī moshaino moshitiro keskara afeskaxō nō anā shara fatiroma. Nāskarifikī nā nikayospamisfo nō ato omiskōimanaitīa tsoa pishta ato timamatiroma nanōfoma. Mā penaino, fishifā fisti fafeaito, keyokōichi yorafāfe ōitirofo. Aa keskara ě anā oxii ea ōisharanōfo. Ĕ anā nokoxō, ě ato yoixii nā ea Ifofamisfo efe isharpakexanōfo. ²⁹ Mā pachoyakī ea nikasharakāfe. Niospa Yōshi Sharapa mato yoiai keskara nikasharakāfe,” ’ ” ixō Jesús anori ea yoia a Ifofaafo Tiatira anoafō ě ato kenexonō.

3

Jesús Sardis anoafō a chanīmara faafo yoini

¹ Askata anā Jesús ea yoia iskafakī: “A ea Ifofamisfo Sardis anoafō a ato Niospa meka yoimis a ě yoipaiyai anori ě yoinō ea kirika kenexōfe iskafakī: ‘Ĕkīa mātō Ifo Jesús ě mato yoi mā tāpinō. Niospa Yōshi Shara efe ika. Ĕfi Nios

yoimisfāfe āto xanīfokōiki. Ē mato yoi iskafakī: Mā ika keskara mē tāpimis. Yorafāfe matoōnoa iskafakī yoimisfo: “Nafo shara ikafo. Na Sardis anoafāfe mā Jesús Ifofakōinafo,” ixō matoōnoa yoimisfo. Mā isharamis keskara ōikani. Māri shināmis iskafakī: “Nō shara ikara” ifiax mā shara ikama. Mā ea Ifofasharakōiama. ² Akka mā mā ea shināmakia. Askakakīma, anā a mā shināyopaoni anori shinākāfe. Mē tāpia Epa Niospa mato imapaiyai keskara mā isharakōiama. Ē mato yoiai keskara mā akama. Mā eōxō asharayopaoni anā iskaratīa mā anā askafaima. Mā ea shināmakipai. Nāskakē afianā ea shināsharainīfōfākāfe. ³ Nā mā ēfe meka mātō ōiti mēra mā shināyopaoni keskafakī anā shinākāfe. A mā chakafamis keskara shinākakima; ea Ifo shara fakāfe. Akka mā ea shināyamaito ē matoki samama nokorisatiro mato omiskōimaxiki. Oa yometso tsōa tāpiamano āto pexe mēra ikirisatiro keskai, ē matoki nokorisataxii mato omiskōimaxiki. ⁴ Askafiax a mato fe ichanāmisfo fisti rasi a Sardis ano ikafāfe chakafamisfoma. Nōko rapati choshtakōi nō pekaxō fatiro fetsa fena shara safexiki. Nāskafakīri atirito mā chaka shināpaoni keskara mā anā shināima, mā mā pota. Nāskaxō mēstekōi mā eōnoa shināi. Nāskaxō rapati fenasharakōi keskara ē mato ōitiro. Mā askano, mā ea ano nokoaito ē mato rapati oxokōi sharakōi ināxii mā efe ĩpaxanō. Mā isharakōimixakī mā efe rafepakenaka. Nā ē keskara shara ixikākī. ⁵ Tsoa ēfe meka shināmakitama ea Ifofakaxō, eōxō Satanās finōkanax afo efe isharakōipakenakafo. Afori ē ato rapati oxokōi sharakōi ināxii. Askaifāferi ēfe Epa Niospa a ea Ifofaafo tii āto ane tii kirikaki kenea. Nāskaxō āto ane kenea kirikaki a ea Ifofaifāfe tāpinōfo efe nīpaxakākī. Askaifāfe ē āto ane soanakama. Epa Nios feta āfe ājirifāfe ōiaifono ē ato yoixii iskafakī: “Nafofi efe yorafokī,” ixō ē ato yoixii. ⁶ Mā pachoyakī ea nikasharakāfe. Niospa Yōshi Sharaōxō eōnoa a ea Ifofaafāfe yoiaito nikasharakōikāfe,’ ixō anori ea Jesús yoia a Ifofaafo Sardis anoafō ē ato kenexonō.

Jesús Filadelfia anoafō a chanīmara faafo yoini

⁷ Askata anā Jesús ea yoia iskafakī: “A ea Ifofaafo Filadelfia anoafō a ato Niospa meka yoimis a ē yoinō ea kirika kenexōfe iskafakī: ‘Ēkīa mātō Ifo Jesús ē mato yoi mā tāpinō. Ē afaa pishta chakafamisma. Ē shara-finakōia. Ēfe meka chanīmakōi. Nā fichipaiyai afama mīshti sharafo āfe pexe ano fapaoni, xanīfo David. Akka āfe pexe fepoti chamisyano tsoa ikitiroma ipaoni, chamismaisax. Akka ato ikimanaino ikitirofo. Akka ato ikimayamaino tsoa ikitiroma. Nāskarari mā Nios ano ikipai mā ikitiroma ē mato ikimayamaino ēmāi chamis keskaraxō. Akka ē mato ikimanaino mā ikitiro Nios ano. Akka fetsafāfe ikikāfe mato faifono mā Nios ano ikitiroma. Eres fistichi ē mato ikimatiro. ⁸ A mā imis keskara mē tāpia. Mā yora ichapayamafiaxō mā shināsharakōimis. A ē yoimis keskara mā ato tāpimatiro a mā amis keskara eōnoa. A ē yoimis anori tsōa mato xītitiroma. Yora fetsafāfe mato yoiaifo mā metsanima. Mato askafafiaifono ēfe meka mā shināmakimisma. “Na Jesús nōko Ifo,” mā ea famis. ⁹ Fetsafāfe chanīkakī mato yoimisfo iskafakī: “Nō judeofo,” ixō mato yoimisfo. Afokai Niospa afe yorafoma, Epa Nios chanīmara faxoma. Afāfe Satanās ifofamisfo. Nāskakē ēfe Epa fe nō āto kaifoma. Afofi āa chanīmisfo. Shinākāfe. Nā yorafo ē ato yoimaxii iskafakī yoinōfo: “Nōkai shara shināima. Nō afama. Chanīma, Niospa āfe Fake mato noisharakōimis,” ratokonō mai chachikaxō iskafakī mato yoixikani. ¹⁰ A ē mato yoimis anori mā isharakōia omiskōifikī mā tenekōimis ēfe meka nikakatsaxakī. Mā eōnoax omiskōifikī mā tenekōimis. Nāskakē mā ea shināmakimismano ē mato kexesharaxii a omiskōiai nokoaino nā maitio. Keyokōi omiskōixikani ea Ifofayamakanax. ¹¹ Ē anā samama oxii matoki. Ea shināmakiyamakāfe. Mā ea Ifofakī ea chaifayamakāfe. Mā ea chaifayamaino

eõxõ Epa Niospa mato ināpaiyai keskara mato ināi fetsafāfe finõfoma. ¹² Fetsa omiskõikĩ ěfe meka shināmakitama tenekõifai ea Ifo sharakõi faxõ ato Satanás finõkõia. Nāskakē a ěfe Epa Nios ika ano, ě ato imasharapakenaka. Anoax anā faki fonakafoma. Nāskakē ě afo tāpimaxii afomāi Epa Niospa yorafokē. Askaxõ ě ato yoixii iskafakĩ: “Nono Epa Nios ikano, nofe mā ipanaka,” ě ato faxii. A Niospa yorafo, judeofo, Jerusalén ano ipaonifo. Akka iskaratĩa Epa Nios ika ari Jerusalén fena. Jerusalén fena nai mēra. Nai mēra ifiax, chipo nāmā fotoxii. Akka fetsafo ea shināmakikanaxma afo ano ipanakafo. Nāskakē fotoxõ ěfe Epa ane ě atoki nētaxii. Askatari Jerusalén fenapa aneri ě atoki nētaxii. Askatari ěfe ane fenari tsõa nikayomisma ě atoki nētaxii keyokõichi tāpinõfo ě āto Ifokē. ¹³ Mā pachoyakĩ ea nikasharakõikāfe. A Niospa Yõshi Sharapa ato shināmanaino yoiaifo anori nikasharakõikāfe,” ixõ Jesús ea anori yoia a Ifofafo Filadelfia anofo ě ato kenexonõ.

Jesús Laodicea anofo a chanĩmara faafo ato yoini

¹⁴ Askata anā Jesús ea yoia iskafakĩ: “A ea Ifofafo Laodicea anofo a ato Niospa meka yoimis a ě yoipaiyai anori ě yoinõ ea kirika kenexõfe iskafakĩ: ‘Ĕkĩa mātõ Ifo Jesús ě mato yoi mā tāpinõ. Epa Niospa ea amapaiyai keskara ě fakatsaxakĩ āfe meka yoinõ. Epa Niospa yoipaiyai keskara ě keyokõi yoimis. Ĕ chanĩkima yoimis. Epa Niospa onifani tii keyokõi ěfi āto xanĩfokõikĩ. Ĕ mato iskafakĩ yoi: ¹⁵⁻¹⁶ Mā amis keskara mē tāpia. Ea kachikiri fayamakaxõ akka askafixõ ě mato amapaiyai keskara mā fichipaikõia. Askara sharama. Afara matsishara nõ nĩsakĩ nõ inimayanā nõ ayatiro. Askatari afara xana shara mā matsikē nõ inimayanā ayatiro. Askafixokai afara katsa nõ inimayanā ayatiroma. Katsa meei nõ anāpaketiro. Nāskarifiiai ranāri yorafo afara xana keskarafõ. Ea Ifo sharakõi faafo. Akka ranāri afara matsi keskarafõ. Ĕfe meka tāpisharafoma. Ĕ atoõnoax rafanā ikõini. Askafiakx kai mākai xana yafi matsi keskaroma. Mā katsa keskara. Afara katsa meekĩ nõ anāpaketiro keskara ěri mato askafai. Nāskakē ě mato potaxii oa ě anāpakeai keskafakĩ. ¹⁷ Akka mā yoimis iskafakĩ: “Ĕ afara ichapaya. Ĕ afaa yopaima. Ĕ Niospa mekari tāpifinakõia,” ixõ, anori mā yoifiax mā tāpiama mā chaka imis. Ooa. Ea mā yopafikĩ mā kakapaimis. Niospa āfe Yõshi Sharapa mato imapaiyai keskara mā ikama. Mā katsa keskarakĩ. Mā imis keskara mē tāpia. Akka ěkai askara fichipaima. Askafixõ ě matoõnoa shināi keskara mākai tāpiama. Mā nā fēxo keskarafõ. Fēxo afara õitiroma. Nāskarifiiai mārĩ ěfe mekakõi nikasharamisma. Mā yora chitoria keskarafõ. Akka mā tāpiama mā chitoria keskara. Yora chitoriato rapati yopai chitoria ixikima. Nāskarifiakĩ mā ea yopaima keskara ea yopafikĩ. ¹⁸ Akka ě mato yoisharapai mā afara chakafamis keskara mā anā anõma. Ea yõkakāfe ě mato tāpimanõ afeskax mā ea keskara itiomākĩ. Eres fisti ě mato imasharatiro. Akka mā chitoria keskara. Akka ě mato rapati safemasharatiro mā anā rāfinõma. Akka rapati ě mato yoitamaro mā afara chakafamis ě mato yoi. Akka ě mātõ õiti fetsafaxotiro ea keskara shara mā inõ. Akka a afara mā chakafamis ě xafakĩa õia. Mā fēxo keskarakõi imis. Nāskakē ea yõkakāfe ě mato sharafanõ, ěfe meka ě mato tāpimasharanõ. ¹⁹ Akka ě mato noiyamakĩ ě anori mato yoikeranama. Askatamaroko ě mato keyokõi noikõi. Nāskakē ě mato omiskõimatiro tāpimakĩ mā chaka xatenõ. Nāskaxõ nāfori ě ato yoisharapai ea Ifo shara fanõfo. Akka a mā chaka shināmis keskara anā shināyamakāfe. Iskaratĩa ěfe meka nikakõikāfe ě mato yoiai keskara axikakĩ mātõ chaka xatekāfe. ²⁰ Shinākapo efe yora mĩshtichi. Akka a yora pexe mēra ikipaikĩ ĩkisi pexe ifo kenatoshitiro pexe ifāfe ikimanõ. Nāskarifiiai ě mato ano nokoxõ mato yoikĩ iskafaxii: “Ĕ mefe rafepai,” ixõ ě mato yoimis. Fētsa āfe shinā mēraxõ ea nikaxõ ea yoi:

“Ifo, emēra ikife. Ē mia fichipai,” ixō anori yoiaito ē a mēra ikiax ē afe rafei. Ari efe rafei. ²¹ Fētsa afara chakafakī xatexō ea Ifosharafai nā ēfe Epa Nios ika ano efe ipasharatiro. Nāato Satanás finōa. Ēfi xanīfokōikī ari efe xanīfo itiro. Ē Satanás yafi niáfaka chakafo finōkōia. Ēfe Epa Nios ika ano afe xanīfokōi ē ika. Nāskarifiái fētsa āfe chaka kachikiri fakī, ea Ifosharafaxii ē ika anoax ari efe xanīfo ipaxatiro. ²² Mā pachoyakī ea nikakāfe. Niospa Yōshi Sharapa ea yoiai keskara nikasharakāfe,’ ixō ea anori Jesús yoia a Ifofaafō Laodicea anoafō ē ato kenexonō.

4

¹ Akka nā ea taefakī yoia, mē kenekī mitoano, ea anā yoiaito ē nika. Ea iskafaito ē anā ōia nai mēraxō oa pexe fepoti fepekemea keskaraxō. Ē nika afia ē nika keskara xāaiti āfe oi efapa keskarato ea yoia anā ea iskafakī: “Niri ekeki māpeferafe,” ea faa. Oa namakē ōia keskara ē ōia ea iskafaito: “Nafō ē mia ispanō nafō afarafo chipo ixiaifo ē mia ispanō,” ea faa.

² Ea askafaito samama Niospa Yōshi Sharapa ea ōimana āfe tsaoti efapa sharakōi ea ōimana a xanīfāfe tsaoti ano tsaokē ē ōia. ³ A ē ōimismafo ē ōia sharakōifo. Nāskakē ē tāpia. Nioskōiromē ē faa. Askaito ē ōia fafesharakōiaito. Iskara ē ōia. Tokiri rafe āto ane jaspe fe cornālinā nā rafesharakōi fakka fakka sakōini. Nāskara āfe femānā ē ōia. A āfe tsaoti ano oa nāfa fai nana keskara ē ōia fafesharakōiaito. ⁴ Nā nōko Ifo tsaofa ano a kematai veinticuatro tsaotifo ē ōia. A tsaoti kamaki feronāfakefo tsaofa ikafo. Nā feronāfakefo Jesús Ifofamisfo ikafo. Afāfe nā ato chanīmara faifo ato kexemisfo ipaonifo. Āto rapati oxo sharakōifo māmāi ato Niospa āfe chaka soaxonikē. Askatari xanīfāfe maiti keskara oro sharakōi safeafō ika. ⁵ A āfe tsaoti anoax kana peitaitani oa kana piishikai keskara a mēranoa ē nika. A fesoa anori siete rāpari xofisaito ē ōia. A ē ōiaino Epa Niospa ea shināmana iskafakī: “A Epa Nios tsaofano rāpari otaito ē ōia keskara, nāskarifikī Epa Niospa āfe Yōshi Shara nokoki nīchiarokomē nofe rafenō,” ixō ē shinā.

⁶ Askatari a fesoa anori oa fakafā keskara fakka fakka ikaito ē ōia, oke mēra xafakīakōi ika. Askatari a nōko Ifāfe āfe tsaoti ano a onifanifo cuatro ano niafo ika. Askai fero ichapayafo. Takairafe fero neefo. ⁷ Oa poomā femānā keskara fetsa ita, fetsari oa fakka fene femānā keskara ita, fetsari oa yōra femānā keskara ita, fetsari oa tete yoyai keskara ika. ⁸ Askakani āto pei ichapa seis ika, fisti rasi pei ichapayafo. Askai āto fero rasi ato neei fetsea ika. Penachāi fanāita, fakishchāiri fanāiki xatepakenakafoma. Fanāiyanā iskafakani:

Sharafinakōia, sharafinakōia, sharafinakōia, nōko Nios sharafinakōi.

Nōko Niospa afama mīshti famis nā apaiyaifo. Epa Nios niyopaofinixakī, nāskakē iskaratīa nia. Askatari Epa Nios afeska pishta nakama, ikax fanāikaifo.

⁹⁻¹⁰ Nāskakē aōnoax fanāikafo iskakani: “Epa Niosi, mī fisti nōko Ifo. Fato fetsakai na mī ikai keskarama. Mīfi nīsharapakenakaki. Mī sharakōi. Mī afaa pishta chakafamisma. Mī askaito nō mia Ifofasharakōi. Aicho Epa Niosi. Fato fetsakai mia keskarama,” ixō Nios fanākafo. Mā askafono nā Jesús Ifofamisfo veinticuatro xanīfofo nōko Ifo Nios āfe tsaotiki tsaofano a nāmā feopakefofānafo. Feopakefofākata, āto maiti tsekakata feofafo Nios nāmā māmāi askafakatsaxakakī. Nāskaxō yoiafo iskafakakī: “Nōko Ifo Nios mī noko maiti inā keskari fakī nōri miari mini. Mī noko ināfikē nō mia fāsi noikī na maitifo nō mia mini. Meres fisti mī noko ikitiro. Mī noko ifimis. Akka mī nōko Ifokōi itiro. ¹¹ Mī afaa chakafatamaroko mī sharakōifamis. Akka mīōnoa fisti nō yoitiro iskafakī:

Mī nōko Ifokōi. Mī nōko Nios. Tsoa fetsakai mia keskarama shara. Mī isharpakenaka. Mīkai afaa chakafamisma. Nāskakē nō mia fāsi noi. Mī

shināmās mī afama mīshti fatiro. Mī keyokōi onifani. Mī apaiyai keskara mī keyokōi onifani ato nimapakexakī,”
ixō nā Jesús Ifofamisfāfe veinticuatro xanīfofōfāfe yoimisfo.

5

Jesús kirika kataramea tsomaxō ato yoiyoni afeskaximākai chipo

¹ Askata ē anā ōia oa ēfe namapa ōia keskara nā ē mato yoinō. Nā mifi kayakai aōri nōko Ifo Nios tsaono ē ōia kirika kataramea takai rafe kenea ē ōia, siete taxtati aō neekē. ² Niospa ājiri finasharakōia ē ōia. Fāsikōi mekayanā iskafakī yoia: “Na kirika taxtatinī taxta afeskaxō tsōa ōitiro. Nā xanīfo afaa chakafamisma fistichi fēpetiro ōixii. ¿Fato xanīfāfe afaa chakafamismato fēpetiromē nō ōinō?” ixō yoia.

³ Askafixō tsōa fēpetiroma nai mēranoa ikafāferi fēpetirofoma. Askatari a nāmā ikafāferi, Niospa ājirifāferi fēpetirofoma a mēra ōixikakī. ⁴ Nāskakē ē oiai finakōiyanā iskafakī yoia: “¡Ooa! Xanīfo afaa chakafamisma tsōa fichiama na kirika noko fēpexopanā a mēra nō ōipanā,” ixō ē shinā. ⁵ Askata nā veinticuatro xanīfofōfāfe Jesús Ifofamis fētsa ea iskafaa: “Oiyamafe. Ōipo. Nōko Ifo oa ono nia. Cristo fisti nōko xanīfo finakōi. Afama mīshti atiro. Tsoa a keskarakōima. Nōko xinifāfe āto xanīfo ipaoni David āfe fena Jesús. David xanīfo finakōia ipaofinikē, Jesús finōkōia. Keyokōi ato finōa. Satanás finōta, a xanīfo fetsafori ato finōkōia Jesús. Iskaratīa nono Epa Nios fe ika. Nāskakē na siete taxtati Jesús noko fēpexotiro nā kirika nō ōinō. Nāskakē anā oiyamafe,” ea faa.

⁶ Nāskakē nānoa ovejanā fake ē ōia āfe māxo sieteya, āfe ferori nāskara ika. Reteafo keskarafax Niospa tsaoti ano nia ika. Nānoa nā Niospa onifani cuatrofo feta a veinticuatro Nios Ifofaafo xanīfofōfāfe foaketefayakenafo ika. Tsoa fetsakai a keskarama. Nāato afama mīshti fatiro. Nā fero sietefāfe noko shināmani Niospa āfe Yōshi Shara nīchiano keyokōi nā maitio ano inō. ⁷ Akka Epa Niospa nā kirika āfe mifi kayakai aōri tsomakē Jesús fīa. ⁸ Fīxō tsomano nā cuatro Niospa onifanifo fe nā veinticuatro xanīfofo Jesús Ifofamisfo a nāmā feopakefōfānafo. Nāfāfe maneti yafi kechofo tsomafo. Nā kechofo oro fakka fakka ikai keskara mēranoax otano āfe kōi nofe nakas shara nai mēra foai keskara. Nāskarifiai nā Nios Ifofamisfāfe kīfiaifono Epa Niospa nikamis.

⁹⁻¹⁰ Akka nā fanāikaifo tsōa nikayomisma fanāikani, iskakani:

Mī afaa chakafayamafiamiskē mia retenifo. Mī noko nāxoni, mī imi foni Satanás anā nōko ifo inōma Epa Nios āfe fakefo nō inō. Nāskakē mī fistichi fitiro kirika kenea fēpexiki noko tāpimaxiki. Mīōnoax nā mia chanīmara faafo tii maifo tii anofo Niospa yora itirofo meka fetsa fetsatapafāfe mekakani. Nāskakē nāfāferi fetsafo mī meka shara ato tāpimanano, mī ato amapaiyai keskara anōfo. Askatari nā maifo tii anofo xanīfo mefe ixikani, ikax fanāikafo.

¹¹ Askatari ē ōia Niospa ājirifo ichapakōifo tsōa ato tanatiroma ichapakōi fanāikaifāfe ē ato nika. Nios xanīfo tsaoti ano nā Niospa onifaa cuatrofo fe nā xanīfofo veinticuatrofo feta nakifayakenafo. ¹² Fāsikōi fanāikani iskafo:

Niospa Fake Jesús oveja fake keskara yorafo nāxōa āto chaka soaxoxikī. Akka keyokōi nā maitio anofo ato ūkitiro, keyokōi nai mēranoafori ato ūkitiro, nōko mai anoafori āfenā, keyokōi tāpikōiakī, afama mīshti atiro, keyokōichi mī sharakōira fapanakafo. Mī fisti nōko Ifo itiro. Aicho, mī nōko Ifo mī isharakatsaxakī mī nīpanakara, ikax fanāikafo.

¹³ Askata ē nika keyokōi nai mēranoafo tii fanāikaifono, mai anoafori fanāikaifono ē nika. Mai mēranoafori ē nika. Fakafā anoafori fanāikaifono iskakani:

Epa Nios āfe tsaoti ano tsoa, āfe Fake Jesús oveja fake keskara, nā rafe nōko Ifo isharakōimisfo. Keyokōichi mā sharakōira ato fapanakafo. Mares fisti mā nōko Ifo itiro. Mā afama mīshti atiro. Nāskara mā ĩpanaka, ikanax fanāikafo.

¹⁴ Askatari nā cuatro Niospa onifafāfe yoiafo iskafakakī: “¡Aicho! Askapainōra,” fata, nā veinticuatro xanīfofo Nios nāmā feopakefofānafo. Afāferi Epa Nios yafi Jesús yoisharakani.

6

Nā siete taxtati

¹ Nāskata ē namakē ōiai keskara ē anā ōia. Jesús oveja fake keskara nāato noko nāxoni nāato nā kirika āfe taxtati fisti fēpeaito ē ōia. Fēpeaino ē nika nā cuatro Nios onifaa fetsa fāsikōi mekaito nai tiri ikai keskara: “Niri ofe,” ikaito.

² Askaino kamayo oxo chaima nia ē ōia. Nā kamayo kamaki fētsa kati tsomax tsoano xanīfāfe maiti Niospa maimana. Nānoax kamayonō kaa fetsafo ĩkipai xanīfo ixiki. Tsoa pishtakai nētefatiroma.

³ Askata Jesús anā kirika taxtati fetsa fēpea. Fēpeaino nā cuatro Niospa onifani fetsa ē nika iskaito: “Niri ofe,” ikaito.

⁴ Nāskafaino kamayo fetsari ōshi nokotoshia. Nā kamayo kamaki tsoa fetsari ē ōia. Keno chainipa Niospa inā aya katanō maifo tii anoafato ato shināmatanō anā isharanōfoma noikaspa faatanākanax retenānōfo.

⁵ Askatafata Jesús anā kirika taxtati fetsa fēpea. Fēpeaino nā cuatro Nios onifaa fetsa ē nika iskafakī yoiaito: “Niri ofe,” ikaito. Anori yoiaino kamayo fetsa fisokōi nokotoshiaito ē ōia. A kamaki tsoa aō kilo tanati tsomax. ⁶ Nā cuatro Niospa onifani anoax mekaito ē āfe meka nika iskaito: “Kori texe fayamanō, feronāfāke pena fisti yonoxō kori fixō trigo kilo fisti fikī kopifatiro. Askayamakī tres kilo xiki fitiro. Kori texefayamaxō afaa fetsa fitiroma. Nāskakē xini yafi nā uva fimi ene chakanafayamafe. Akka mā texefayamax mā fonāiki omiskōixii,” ixō yoia.

⁷ Askata Jesús anā kirika āfe taxtati fetsa fēpea. Fēpeaino ē nika na cuatro Nios onifani fetsa, “Niri ofe,” ikaito.

⁸ Anori askafaino kamayo fetsa pāshikōi nokotoshiaito ē ōia. Nā kamayo kamaki fetsa tsoa ika āfe ane Ato Namamis. Nāato yorafo namatiro. “Ē yorafo namapaira,” faito, “Ēje. Mī ato namatiro,” Niospa faa. Askafaito nā ato namamisto yora fetsafoya ato retenāmai. Akka atiri ato fonī namai, atiri pae fetsa fetsatapafāfe ato namaxii, atiri yoinā pōfefāfe ato yokakani. Akka yora kayakōi ato namaxiai ē ōia tsōa ato tanātiroma.

⁹⁻¹⁰ Nāskata Jesús āfe kirika taxtamea anā fēpea. Fēpeaino nā Niospa meka ato yoifofāsafafono fetsafāfe ato redefinifono mā otoafato ē ōia. Epa Nios kīfiti mīsa ano nā Jesúsnoax nanifo āto fero mēshofo ichanākanax fāsikōi mekaito ē nika iskai mekaifono: “Nōko Ifo Nios, mī keyokōi tāpikōia. Mī afama mīshti fatiro. Mī shara famis. Mīkai afaa chakafayomisma. Mī chanīmakōi. Nā mia chanīmara faafāfema mai anoafāfe noko retemisfo. Nāskakē, ¿afetīa mī ato kopimē omiskōimakī?” ixō yoiaifāfe ē nika. ¹¹ Nāskakē nōko Ifāfe yoia isfakī: “Manayokāfe. Fena fena kakīma. Fetsafori mato keskarafori eōxō yonomisfo ixikani. Nāfori eōxō nā yora chakafāfe ato retexikani. Akka mā ato reteskī mitoafono mā nakanax mato ano nokoxikani keyokōi. Nāskakē nā ato retemisfo ē ato kopixii ato omiskōimakī omiskōipakenakafo mēra ē ato potaxii afaramāi chakafamisfokē,” ixō nōko Ifo ato yoia. Ato yoita rapati oxosharakōi chainipa ato inā, nāfāfemāi taeyoi nikanifono nā Epa Nios Ifofasharamisfo tii ato inā.

¹² Askata Jesús anā kirika āfe taxtati fetsa fēpeaito ē ōia. Fēpeaino fāsikōi mai naya naya ika. Xini anā pee iyamaino, rapati fisokōichi fepoa keskara ika, fakishkōi. Oxeri ōshikōi imi keskara ika. ¹³ Oa nefe kerexepato nokoki nefekī fana fimi yome mīshti niriatiro keskara. Nāskarifiāi fishifo nai mēranoax mai ano pakei fetsea. ¹⁴ Askatari nai katarameake kafākē ē anā ōiama. Māchifā fe mai toomāfā mai naya naya ikaino, anā ano ikama. ¹⁵ Nāskakē keyokōi mai anoafō ratekōiafo. Yorafāfe āto xanīfofori sorarofāfe āto xanīfofori ratekōiafo; afama mīshtiyāfori, yora mitsisipāfori, āto yonomatīfori, fetsāfori ifomaisfori keyokōi nāfo ratekōiafo. A tiiri mafa kini mēra ikiafo. A tiiri māchi keya ano ichoafō tokirinīfā nāmā oneafō. ¹⁶⁻¹⁷ Askata fiisikafo iskayanā: “¡Ooa! Epa Nios nai mēra ikato āfe Fake Jesús fe iskaratīa nokoki ōitifishkikōina. ¿Nō afeskatīromē omiskōiyamaxiki? Tsōakai Nios timamatiroma noko omiskōimayamanō. Nā māchi keya anoa tokirinīfā nokoki pakepainō Niospa noko fichinōma nō omiskōinōma,” ixō nā nikakaspanisfāfe yoiafo.

7

Niospa ciento cuarenta y cuatro mil afe yorafo kexexii

¹ Nāskata ē anā ōia oa ēfe namapa ōia keskara nā ē mato yoinō. Niospa āfe ājiri cuatro afe nai mēra imisfo ē ōia. Fetsa xini oaikiri nia, fetsa xini kaikiri nia, fetsa xini oaima anori nia, fetsa xini kaima anori nia. Askano nefe nishpapakekafana. Nefe nishpapakekafanaino keyokōi maifo tii anoa nii peifo takka takka ikama. Fakafāri anā poo ikama. ² Nā cuatro Niospa ato yoiaito mai yafi fakafā chakafatirofo. Askata Epa Nios nipanakato āfe ājiri fetsa ē ōia xini oaikirinoax oaito, nōko Epa Nios āfe marakka fati feaito, a afe yorafo aō marakka faxii keyokōichi tāpinōfo Niospa afe yorafokē. Nā Niospa ājiri okī nā cuatro Niospa ājiri fetsāfori fāsikōi ato yoia iskafakī: ³ “Manayokāfe, nā Nios Ifofamisfo īkisi āto femānāki āfe anefo keneyonō nāfāfe Nios yonoxomisfoki keyokōichi tāpinōfo. Nāskakē fena ato chakana fayamakāfe. Mai anoafō fakafā anoāfori, ififo ato chakana fayamakāfe. Chipō ato axikakī,” ixō ato yoia.

⁴ Akka ē nika mā Niospa ājirinī mā ato marakka faano ciento cuarenta y cuatro mil judeofāfe femānāki. ⁵⁻⁸ Nōko xini Israel āfe fakefo feronāfakefos doce inifo. Ato iyoakōichi āfe ane Judá. Judá āfe pefeta Rubén. Rubén āfe pefeta Gad. Gad āfe pefeta Aser. Aser āfe pefeta Neftalí. Neftalí āfe pefeta Manasés. Manasés āfe pefeta Simeón. Simeón āfe pefeta Leví. Leví āfe pefeta Isacar. Isacar āfe pefeta Zabulón. Zabulón āfe pefeta José. José āfe pefeta ato chipō fakekōi Benjamín. Nā doce feronāfake fisti rasi paxkakanax mā kaiafono nā doce feronāfake anoa Niospa ato katoni. Fetsa anoa doce mil faxō ifita, fetsa anoari doce mil faxō ifni. Nāato askafakī fetsa doce mil faxō ato ifiketsani. Nāskakē mā afo yosikanax ciento cuarenta y cuatro mil inifo.

Yorafā rasikōichi rapati oxokōi safeafo

⁹ Askata Epa Nios fe āfe Fake Jesús nā oveja fake keskara nā tsaofō ano yorafā rasi niafo tsōa ato tanatiroma. Nā maitio anoafō fisti rasi anoafō, xoko fetsafo, meka fetsayafo ikafo, rapati oxokōi chainipa safeafo ē ōia fisti rasichi epe pei tsomafāfe. ¹⁰ Nāfāfe fāsikōi yoiafo iskafakakī:

Nōko Epa Nios feta āfe Fake Jesús noko ifimis nōko Ifo Jesús oveja fake keskara nokoōnoax nani nōko chaka noko soaxoxikī nō afe nīpaxanō, ixō yoiafo. ¹¹⁻¹² Nāskata nōko Ifo xanīfāfe tsaoti ano tsaofō āfe ājirifāfe foaketi fayakenafo ikafo. Nāskakē nā veinticuatro xanīfofo fe nā Niospa onifanifo cuatrofo nōko Ifo tsaofō tsaofō ikafo. Nāskafono nā ājirifo nā

nōko Ifo tsaono ratokonō mai chachipakefōfākanax feopakefōfānafo Nios yoisharakakī iskafakakī:

¡Aicho! Chanĩmakōi, meres fisti mĩ isharapakemis. Meres fisti nokori mĩ imasharatiro. Mĩ keyokōi tãpia. ¡Aicho! Nã nō yopai keskara mĩ noko axomis. Keyokōichi sharakōi mia fapanakafo. Mĩ afama mĩshti fatiro. Mĩ nãskapakenaka. Nãskaroko anōkī, ixō yoiafo.

¹³ Nãskata nãnoa xanĩfo fẽtsa ea yōka: “¿Na yorafo rapati oxo chainipa safeafo tsoamē? ¿Fakiax feafomē, mĩ tãpiamē?” ixō ea yōka. ¹⁴ “Maa. Ĕkai tãpiama. Mĩ tãpia. Mĩ ea yoitiro,” ě faito ea yoia iskafakī: “Yorafo omiskōiaifono na yorafori fãsi omiskōinifo. Akka omiskōiaifono Niospa ěfe Fãke Jesús ato nãxoni ģto chaka ato soaxoxiki. Ato chaka soaxō mã ato imasharakōia. Nãskakē ato rapati oxo shara safemana. ¹⁵ Nãskakē Epa Nios ano iskaratĩa afe ikafo. Epa Niospa ato yonomana keskara axopakenakafo. Nãskakē ato kexefafãini afara chaka atoki nokoyamanō. ¹⁶⁻¹⁷ Niospa ěfe Fake Jesús Epa Nios fe imis. Nãato ato kexepakenaka. Nãskakē anã fonãitama, anã nomipakenakafoma. Xinĩri anã ato pipanakama. Jesús ato kexeaino inimapakenakafo. Epa Niospa ģto ōiti ato fepeaxoxii anã oianōfoma,” ixō ea yoia.

8

Nã taxtati mã keyoaino Jesús fẽpea

¹ Mã kirika ěfe taxtati keyoano Jesús fẽpeaito ě ōia namakē ōiai keskara. Nã seis taxtati taefakī fẽpeyoa. Akka iskaratĩari fetsari fẽpea mã keyoaino. Fẽpeano Nios ika ano nai mẽranoax keyokōi nishparakafo. Media hora nishparakayofo. ² Nishparakaifono ě ōia Niospa ěfe ģjirifo siete a ketaxamei niafãfe, nãfãfe Niospa ato yoimis keskara anōfo. Niospa ato tii maneti inã nã ato yoiaitĩa ģto maneti chãi chãisafanōfo. ³ Askata Niospa ģjiri fẽtsa sapa oro fakka fakka ikai keskara tsofax Epa Nios kĩfiti ano nia ě ōia. Akka fẽtsa sapa kamaki nakas otaxō naneaito ě ōia. Nãskaxō Nios kĩfiti mĩsa ano oro kamaki sapa faa. ⁴ Askano ěfe kōi nakas shara nai mẽra foa ěfe mifi kamaki sapa tsofano. Nãskarifiai Niospa yorafãfe kĩfiaifono Epa Nios ika ari nokoaito nikatiro. ⁵ Akka ě anã ōia Epa Niospa ěfe ģjiri yoiaino, mĩsa kamakinoa chii fixō ěfe sapa kamaki chii fospi faa. Fospi fata nai mẽraxō mai ano pota. Askaino mai anoax nai fãsikōi tiiri ika pachakōi ika, kanari piishika mairi naya naya ika. Nãskakē nã chanĩmara faafoma tii ato omiskōimaxii.

Ĥjirifãfe maneti chãi chãisafafo

⁶ Askata Niospa ěfe ģjirifãfe siete nã manetifo Niospa ato tii inã itip-inĩsharafafo chãi chãisafaxikãki.

⁷ Askata fẽtsa ěfe maneti chãi chãisafaino faka matsi tokoro efapafō imia osia nai mẽranoax keyopakea. Chiiri imiya osia nai mẽranoax mai ano pakea. Mãifã kaxke fetsa koofi keyoa ififoia. Akka ranãri texea. Akka fasifo kooi keyokōia.

⁸ Askata Niospa ģjiri fẽtsa ěfe manetiri chãi chãisafaino machi efapa chii xoisai keskara Niospa nai mẽraxō nãmã pota. Fakafã mẽra pakea. Askaino fakafã kaxke fetsa imi keskara ika. ⁹ Nãskakē fakafã mẽranoax fãfĩfo ranãri nafo. Askatari kanōanãfãfori ranãri koofo.

¹⁰ Askata Niospa ģjiri fẽtsa atori ěfe maneti chãi chãisafaino fishi efapakōi xofisai chii keskara nai mẽranoax pakea fakafo mẽra. Akka faka fetsafo mẽrari pakeama. Askatari faka poyo poyo ikai ano pakea. ¹¹ Nã fishifã ěfe ane

Mokara famisfo. Nā fishi faka mēra pakeano, faka moka paekōi ika. Nāskakē nā faka ayakanax yorafo ranāri nai fetseafō.

¹² Askatari Niospa ājiri fētsa āfe manetiri chāi chāisafaino xinī anā chaxasharama. Ōxeri anā chaxasharama. Askatari fishifāferi anā ranārito chaxasharama. Nāskakē penafekē tsōa anā ōisharatiroma. Fakish finakōia ika. Tsōa askara fakish ōiyomisma.

¹³ Ē nāfo ōiaino tetepafā keskara keya yoyaito ē nika. Fāsikōi mekayanā yoia iskafakī: “¡Ooa! Yorafāfe Nios nikakaspakanax omiskōikani finakōixikani. Niospa ājiri tres fetsafāfe āto maneti chāi chāisafaifono mai ano ikafo omiskōifinaxikani,” ixō tetepafā keskarato yoia.

9

¹ Askatari Niospa ājiri fētsa āfe maneti chāi chāisafaino nai mēranoax oa fishi keskara nāmā pakeaito ē ōia. Nāskata nā niafaka chakafo kinīfā fakishifā mēra ikafo ano kaa. Nā kinīfā fepotiya. A mēranoaxkai kāitirofoma. Akka nā nai mēranoax nāmā pakea Niospa chavis inā aato kinīfā fakishifā mēranoa ato kāimanō. ² Fēpeaino mafa kinīfā mēranoax kōinīfā nai mēra foa. Nāskakē xinī chaxasharama. Nai fakishkōi ika. ³ Askata nā kōinīfā mēranoax kōketsere keskara ichapa rasi mai ano fotoa. Niospa ato pōfekōi ima nifo keskara inōfo. ⁴⁻⁵ Ē nika iskaito: “Mai anoa fasifo fanafo ififo chakana fayamakāfe. Akka nā Niospa yorafo femānāki keneafō, ato tekayamakāfe. Akka nā keneamafo mā ato tekatiro. Akka ato reteyamakāfe. Ato retetamaroko cinco oxe ato amakāfe ato omiskōimakī,” ixō ato yoia. Nāskakē kōketserefāfe ato tekafo nā chanīmara faafoma nifo keskara paekōi meafō omiskōiafo. ⁶ Nāskakē kōketserefāfe cinco oxe ato omiskōimana nā chanīmara faafomafo napaixikani, tenetirofoma mekani. Askafikanax nakanima.

⁷ Iskaratīa na kōketserefo afe keskaramākī ē mato yoinō mā tāpinō. Kamayofō itipinī faax a kamaki tsaoux katiro fetsafo reteikai. Nāskarīfiai na kōketserefo nā kamayo keskarafo. Kamayo kamaki tsaouxō fetsafo reteikai keskara īta, xanīfāfe āfe oro maiti maia keskara īta, āto fēso feronāfāke fēso keskara īta, ⁸ āto foo kērofāfe foo keskara īta, āto piti poomānā piti keskara īta, ⁹ āto xochi ano rapati kerexkōi keskara safemanano ato tsakapaiyaifono a mēra ikitiroma īta, āto petafo pei pei ikī kamayonō karo keskara niniaino pachakōi īta, fetsafo retenāifo keskara īta, ¹⁰ keyokōi tsitsisyafō. Āto tsitsisi yora chachitiro nifo pae keskara. Āto tsitsisi yorafo omiskōimatiro. Mā oxe cinco finōano anā ato omiskōimatirofoma. ¹¹ Nā kinīfā fakishifā mēra niafaka chakafo ikafo anoa āto xanīfāfe ane israelifāfe mekapa Abadón famisfo. Griego mekapari Apolión famisfo. Nōko mekapari, “Yorafo Retemis,” nō famis.

¹² Akka taeyoi a omiskōiaifo mā finōfiano, akka nāno raferi a finakōia finōama.

¹³ Askata Niospa ājiri fētsa āfe maneti chāi chāisafaino, Epa Nios kīfiti oro mīsa shara ano fakka māxo cuatro nia ika. Nā mīsa nakirafenoax mekaito ē nika iskafakī āfe ājirinī yoiaino āfe maneti tsoamaxō nika. ¹⁴ “Nā cuatro niafaka chakafo menexemexō nā faka efapa Eufrates anoxō manaifo ato mēpetāfe fotanōfo,” ixō āfe ājirinī yoia.

¹⁵ Nā tsekeafō penata Niospa ato yoiaino ichapakōi ato retenōfo. Nāskakē nā niafaka chaka cuatro Niospa itipinīfani mai kaxke fetsa ano ikafo ato retexinōfo. ¹⁶ Ē nika dos cientos millones sorarofō kamayo kamaki tsaofāfe fetsafo retexikakī.

¹⁷ Askata Epa Niospa oa namakē ōia keskara ea ōimana nā sorarofō yafi āto kamayofō ē ōia iskara. Āto xochi ano oa chii ereai keskara kerexkōi āto xochi

ano safeafo ikafo. Askatari nanakōiri ika, chaxtari ika a aō xorakomeafo. Akka a kamayofāfe āto mapo poomā mapo keskarāfo. Āto āxfa mēranoax kōi fe chii ereai keskara. ¹⁸ Chii fe kōi xofisakī āto āxfa mēranoax kāifaikī ato retepakeafo yorafo ichapakōi ranāri naafo. ¹⁹ Āfe āxfa feta āfe tenēri yorafo retetiro. Āfe tene rono pae keskara. Āfe tene mapoya ika. Nāo yorafo omiskōimana nanōfo.

²⁰ Tsoa nayamafiaxō āto chaka xateafoma Epa Nios Ifofaxikakīma. A niafaka chakafo ifofamisfo xateafoma. Nāskakē oro nimofa fakāta, a kerexkōi fakkai fakkaisai nimofa fakāta, keno āfe ane bronze nimofa fakāta, ifi nimofa fakāta, tokiri nimofa fakāta; nāfo askafaxō, “Nāfo nōko nios. Nō aō noi,” ixō yoimisfo. Afāfe ōiyamafiaifono, askatari mekayamafiaifono, askatari kafāsayamafiaifono, nāskakē afo kīfimisfo. Epa Niospa nā āto kaifo yafi yora fetsafo omiskōimafiaito ōifikanax āto chaka xateafoma Epa Nios Ifofapaikanima. ²¹ Ato retekakī xatemisfoma, askatari koshoiki xatemisfoma, askatari āto āfima chotamisfo, kērofāferi āto fenema chotamamisfo, yometsoriai xatemisfoma nāfo xateafoma. Tsōa āto chaka xateama. Nōko Ifo Jesús Ifofaxikakima. Nāfo chakakōifikaxō āto chaka xateafoma nōko Ifo Jesucristo Ifofasharaxikakima.

10

Epa Niospa āfe ājirinī kirika tsoma

¹ Askata ē ōia Niospa āfe ājiri fetsa mitsisipakōi nai mēranoax fotoaito, nai kōiya. Āfe maiti nāfa fai keskara maia. Āfe femānā xinī chaxai keskara. Āfe kishi rafe chii keskara. ² Kirika fepekemea tsomax nia ika. Āfe tae kayakai aōri fakafā femākīa paia. Akka āfe tae oshkiori mai ano paia ika. ³ Askata āfe meka poomā efapato meka keskara ē nika. Askatari ē nika naitiriki fetseaito. ⁴ Mē nikaxō nā yoiafo keskara ē kenekerana. Akka nai mēranoax Nios ika ano meka fetsa ē nika ea yoiaito iskafakī: “Nā mī nika keskara āto meka keneyamafe. Mī tsoa tāpimatiroma,” ixō ea yoia.

⁵⁻⁷ Askata nā Niospa āfe ājirinī takai fetsa fakafā aōri paita takai fetsari mai ano paixō anā yoia. Epa Nios nā nipanakato nai onifaa. Askatari nai mēra ikafo onifaa. Askatari mai onifaa. Mai ano ikafori onifaa. Askatari fakafā onifaa. Fakafā mēra ikafori onifaa. Nā Nioskōichi āfe ājiri yoia iskafakī: “Epa Niospa ea ōiaino chanīmakōi ē mato yoi. Epa Niospa anā manaima. Āfe ājiri fētsa āfe maneti manekī chāi chāisafaino Epa Niospa axiai keskara āfe meka yoimisfāfe yoiaifo keskara yorafāfe tāpinifoma. Iskaratīa a Nios yoimisfāfe yoinifo keskara mā askakōia,” ixō Niospa ājirinī ea yoia.

⁸ Askata anā nai mēranoax mekaito ē nika ea yoia iskafakī: “Oa Niospa ājiri fakafāki paita mai ano paiax nia ano katāfe. Nā kirika kataramea fēpexō tsoma fiatāfe,” ea faa.

⁹ Askata ē Niospa ājiri ano kaxō ē yoia iskafakī: “Nā kirika pishta ea ināfe,” ē faito, “Nakīa, fife. Ōixō tāpikōife. Mā tāpikōixō mī tāpitiro nā meka chanīmakōi. Niospa meka shara. Askatari mī tāpitiro na meka yoiaifo keskara yorafo omiskōikani. Mīri tāpixō mī fāsi shinātiro,” ea faa.

¹⁰ Nāskaxō ē kirika pishta fita ē ōia. Ea yoia keskara chanīmakōi mē tāpikōia. Nā Niospa meka sharafinakōia. Nāskakē nā inōpokoai yoia keskara yorafo omiskōixikani. Nā ōiax ē shināmitsakōia. ¹¹ Ē askano, anā ea yoia: “Niospa afe yorafo yoipaiyai keskara anā ato yoife. Afarafo ixiai yorafoōnoa yoife, manifetsafoōnoari yoife, xanīfofoōnoari ato yoife,” ea faa.

11

Nōko Ifo Jesús yorafo yoipaiyai anori feronāfake rafeta ato yoixikani

¹ Askata na tanati metro keskara ea ināyanā ea yoia iskafakī: “Nāo Nios kīfiti pexefā anoa āfe chainipa yafi āfe xāki tanatāfe. Anoxō Nios kīfiti mīsari tanafe. Askatari a mēranoax fanā ikanaifo ato tanasharafe afe tiito Epa Nios fanā ixokanimākai, askatari afe tiixori kīfikanimākai ato tanasharafe. ² Akka a ketokonō mapoafō a israelifoma ato tanayamafe; afāfe na Jerusalén anoafō ato chakafakani oa fākka nō afara faanano fākka peamanaino kaitiroma keskafakani ato. Cuarenta y dos oxe amaxō ato askafaxikani. ³ Nāskakē nā feronāfake rafe ē ato nīchixii. Nā rafeta nā ē ato yoipaiyai anori ato yoixikani. Un mil dos cientos sesenta pena ato yoixikani ēfe meka. A rafeta āto rapati chapokōi safexō ato ōimaxikani. A ato chakafamisfāfe, ato ōikakī a afara chakafamisfo shināxikani,” ixō ea yoia.

⁴ Nāskakē Niospa afe yorafo yoipaiyai keskara nā rafeta yoimisfo. A rafe oa ifi olivo keskara. Āfe xini fospia keskariai, a feronāfake rafe Niospa Yōshi Shara ato mēra nanekōiafo. Askatari afia rafe oa rāpari ōtai keskara. Mā fakishkē rāpari otakē nō ōisharakōitiro. Nāskarifikā nā rafeta Niospa Yōshi Sharaōxō ato tāpimaxikani Niospa meka. Mā isharakōikaxō āto Ifāfe meka ato fe yorafo yoixikani. ⁵ Na Niospa meka yoimis rafe fetsafāfe ato chakafapaiyaifono, āto axfa mēranoax chii kaitiro ato koofaxii nanōfo. Nāskakē nā rafe tsōa ato chakafatiroma. ⁶ Epa Niospa ato yoiaino, nā rafeta āto mekapa oi nesefatirofo anā fena oi iyamanō nā ato yoiaifotīa. Askatari faka yafi ĩa āto mekapa fetsafatirofo oa imi keskara inō. Askatari afara afeskarafapaikakī āto mekapas afara meseni fetseaifo fatirofo pae fetsa fetsatapafori fatirofo.

⁷ A feronāfake rafeta mā ato yoikī senēfaafono, a chakakōi mai kinīfā mēranoax Satanás shināmanaino, tsekeinākfā a feronāfake rafe retexii. ⁸ Mā reteafono, fāi nēxpakīa pakeax rakaxikani nā Jesús mastanifo ano, a Jerusalén ano. Nā Jerusalén anoafāfe nōko Ifo Jesús āfe meka shināmisfoma. Nāskakē nō aōnoa yoitiro iskafakī: “Na Sodoma ano ikafo feta Egipto ano ikafāferi, afaa shināpaonifoma. Nāskakē chakakōi ipaonifo anoafō. Nāskarakōi Jerusalén anoafori.” Nāskax nā feronāfake rafe Jerusalén anoax nakanax āto yora fai nēxpakīa rakaxii. ⁹ Nāskakē yora fetsafo a mai fetsa ari ikafāfe, xoko fetsafāferi, meka fetsayafāferi, a feronāfake rafe rakafāfe ato ōixikani. Nāskafono āto xanīfofōfāfe, “Ato fena maifayamakāfe,” ixō ato yoixikani ato noikaspakōikakī. Nāskakē tres nia ato ōixikani. ¹⁰ Askaito ōikani a mai ano ikafo atoki inimaxikani. Askakanax atoki inimakakī fista axikani. Aa ranā kaxpa afarafo inānōnāxikani. Yoikani iskaxikani: “Anā na rafeta noko fekaxtefakanima kiki,” ikanax inimasharakōikani. “Anā nōko chaka noko yoikanima,” ikanax yoināxikani.

¹¹ Askafiaifono mā tres nia oxata nayoafono anā chipo Niospa ato otofaxii a feronāfake rafe. Askaito ōikani a ato mñāno nixaxō ato ōiaifo, afo mesexikani, ratekōixikani, askaifāfe ato ōikani. ¹² Askata nā feronāfake rafe otokāta nai mēranoax mekaito nikakani ato iskafaito: “Niri ekeki māpeferakāfe,” ato faito nikakani a rafe āto ferotaifi ronoinīfōfākani nai kōi mēra māpefainifokani. Askaiāfe a ato noikaspaifāfe ato ōikani. ¹³ Askata samama atoya mai naya naya iki finakōia. Pexefā rasi fisti rasi potaito ē ōia. Askaino siete mil yorafo naafō. A naamafāferi ratekakī Nios yoiafo, “Nios mīfi afama mīshti fatirokī,” faafō.

¹⁴ Mā afo askayoa anā chipo finakōixii.

Niospa ājiri fētsa āfe maneti chāi chāisa faa

¹⁵ Akka Niospa ājirinī chipokōitakī nā sietepa āfe maneti chāi chāisafaino, nai mēra Epa Nios ika ariax fāsikōi mekaifāfe ē nika isakai mekaifāfe:

Iskaratīa na nōko Ifo Cristo xanīfokōi iki nāmānoax nai mēra ika keskarari ixii nāatixō xanīfo ĩpanaka, ixō yoiāfo. ¹⁶⁻¹⁷ Akka nā Jesús chanīmara faafo ato kexemisfo nā veinticuatro feronāfakefo tsaokanax a Nios nāmā feopakefofā nafo Nioski inimayanā iskafafo:

¡Aicho, mī fāsi sharakōiki! Mī afama mīshti famiski. Mī Yōshi Sharapa ato ĩkinā. Afama mīshti onifaaxma mī iyopaonixakī. Iskaratīari mī nia. ¹⁸ A mai fetsa anoafāfe mia noikaspamisfo mikiki ōitifishkikōikakī mefe ikaspakakī. Afama mīshti chakafamisfo. Askaiifāfe ōikī, mīri ato kopikī ato omiskōimaxii atoki ōitifishkikōixō. Akka a mia Ifofamisfo mī ato ināsharakōixii afara sharakōifo. Akka a mia yonoxoyanā mī meka mēxotaima yoimisfo afo mī ato ināsharakōiketsaxii, a mia chanīmara famisfo tii; keyokōi afaamaisfo ita, a xanīfori a afama mīshti ichapayāfori mī ato ināsharakōixii a mia Ifofamisfo tii. Akka nā yorafo chakafamisfo, mī ato omiskōimaxii, a amēranoax, omiskōimisfo mēra mī ato potaxii, ixō yoiāfo.

¹⁹ Askata a Nios kīfiti pexefā nai mēranoax fepekemeaito ē ōia. Nānoa Niospa kafo ē ōia, nā kafo mēra a Niospa israelifo yoini kirika kenea nanea ika. Askatari ē ōia kana pee ikaito nairi tiri ikaito ē nika, mīamāfanēri mai naya naya akaito ē ōia, nai mēranoaxri oi kaya ikaino, oi nami keyopakeaito ē ōia.

12

Kēro yafi kapetafā keskara nai mēranoa Juan ōini

¹ Askata ē afianā ēfe namapa ōia keskara ē mato yoinō a ea Niospa ispaito ē ōiafo nā inōpokoai fo ōikī ē tāpinō a tsōa ōimismafo. Ē kēro ōia āfe rapati oa xini pee ikai keskara safea ika nai mēranoax. Oxe kamaki paiya keskara. Askatari āfe maiti ano fishi doce aō neafo. ² Askata nā kēro mā chaima fake kāikī, fāke pāefai. ³ Askainori fetsari ē ōia a tsōa ōiyomisma keskara nai mēranoax. Nā Satanās oa ronofā keskara efapanāfakōi ōshimāfa, askai mapo ichapayakōi siete mapoya, askai a āto xanīfokōichi maiti sharakōi keskara maiya siete faxō, askatari āfe māxofori diez ika. ⁴ Askata āfe tene fininīfofā nai mēshanānaino nai mēranoax fishi rasi pakea. (Naskarifakī Epa Niospa ājirifo Satanās atiri ato chakana fama ato ĩkipaikī, “Ea ifofakāfe,” ixō ato feparapaikī. Nāskakē a keskara niafaka chakafo ato ĩkinō Niospa nāmā potani nāmāxō ato ĩkinō.) Nāskakē mā kēro chaima fake kāiyaino, a ronofānē kexei āfe fake pīapaikī kāiyaito. ⁵ Askata a kēro fake kāi feronāfake mitsisipakōi. Nāskakē yorafo manifo tii, ato kexesharakōixii āto xanīfo finakōia ixii. Mēstekōi ato yoisharakōixii nikasharakōinōfo. Askafiaito a fake yome rama afa kāiyaito ronofānē pipaiyaino Niospa ifirisafaa nai mēranoax afe xanīfokōi inō. ⁶ Askaito ōifaini afa ichoachāi tsōa istoma ano a Niospa afetiama itipinī faxoni ano Satanās afeskafanōma arixō Niospa kexenō cuarenta y dos oxe akaino Niospa kexesharanō.

⁷ Askatari ē anā ōia Satanās āfe ināfo fe nā ājiri Miguel āfe ināfo nai mēranoax retenāpaiyaifono Satanās ato finōpaiyaino. Nāskaxō Satanās Niosri finōpaini. ⁸⁻⁹ Akka Satanās ato finōpaifikī ato finōnima. Nāskakē fanī itirokēma Niospa nāmā potani āfe ināfoya. Taeyoi ājiri iyopaoni. Nāskaxō nāto keyokōi yorafo maifo tii anofo ato pāramis anorima ato yoikī chaka shinānōfo, chaka nīpaxakakī.

¹⁰ Askaito ē anā nika meka efapato mekai iskaito: “¡Aicho! Epa Niospa mā Satanās nirixō nāmā potaki, mēxotaima āakōi noko fanīrira pārarifaito. Nāskakē

Epa Niospa Satanás finōinīfofana. Nāskakē Satanás anā nōko ifo ikima, anā fanīrira noko shināmanima, Epa Nios fisti nōko Ifokōi iki. Askatari āfe Fake Jesucristori nōko Ifokōiri iki. Nā rafe nōko Ifokōi. ¹¹ Nāskakē Jesús Ifofaxō mēxotaima nō yoimis niri nai mēra oyoxoma nō yoiyopaoni nāmāxō iskafakī: ‘Nōko Ifo Jesús, Niospa Fakekōi, oa oveja fake keskaraxō noko nāxoni nōko chaka noko soaxoxiki,’ ixō nō yoimis mēxotaima. Askatari nō Niospa meka ato yoimis. Nāskai nō meseima, ‘Noko retefiaifono, nō inimasharai,’ ixō anori mēxotaima nō yoimis. Askaxō nō Satanás finōinīfofana. ¹² Nāskakē māri nono nai mēranoax inimakāfe Niosnoax. Nā chanīmara faafāfe Jesúsxō mā Satanás finōkōiafo. Akka Satanás Niospa nāmā potani nai mēraxō. Askafaino ōitifishkiki nāmā fotoxō yorafo chakafapaikōi. ¡Ooa! Yorafo ono mai anoax fe fakafā mēranoaxri omiskōikani. Satanás mā tāpia afetiara Jesús mai ano fotoai tsōa anā afaa chakafanōma. Nāskara mā tāpiax Satanás ōitifishkikōikī keyokōi maifo anoafō ato chakafamapai omiskōinōfo Jesús fe ĩpaxanōfoma,” ixō nai mēranoax mekaito ē nika.

¹³ Mā afo nikakī ē anā ōia afia ē ōiyoa keskara. Mā Niospa Satanás nāmā potano, Satanás shinākī iskafai: “Na kēro ē akiki nokoxō omiskōimanikai,” ixō shināki Satanás chīfafaina. ¹⁴ Nāskakē Niospa nā kēro tetepafā pei keskara inā aō katanō tsōa istoma ano. Nā afetiama Epa Niospa itipinī faxoni ano mā kaxō anoxō piinō cuarenta y dos oxe akī, nā niafaka chakata ronōfā keskarato afeskafanōma. ¹⁵ A kēro ari ikano chakafapaikai Satanás ari kai. Mā kaxō chaima nikaxō āfe axfapa faka siiakī faka faipafānē iyotanō āsapaikī. ¹⁶ Askafaito ōikī Niospa mai kaxkexoni a mēra faka faipafā ikikaitanō a kēro afeskafanōma. ¹⁷ Nāskaito ōi Satanás a kēroki ōitifishkikōina. Nāskax nā kēromā āfe fakefoki kaa ato retepai, nāfāfemāi Niospa meka nikakōisharaifono isharakōiyanā Jesús Ifofasharakōiyanā. ¹⁸ Askata ē anā ōia Satanás fakafā kesemē nia.

13

Fakafā mēranoax yoinā keskara mesekōi kāinākafana

¹ Askata ēfe namapa ē ōia keskara afianā ē mato yoi. Ē ōiaino fakafā mēranoax yoinā keskara mesekōi kāinākafanaito ē ōia. Nā yoinā pōfe keskaraōnoa ē mato yoinō. Ea nikasharakāfe. Nā fistifiax mapo ichapaya, siete mapoya. Askatari āfe māxo rasi diezya. A āfe māxo rasi xanīfāfe maiti maimakī fetsa. Nāskaxō Epa Nios mekafakī chakakōi faa. Āfe femānāfoki ane fetsafo chakakōifo nēta. ² Askai oa poomā keskara āfe yora. Askatari āfe tae oa osopa tae keskara. Askatari oa poomā axfa keskara. Nāskara Niospa ea ōimana ē tāpinō a feronāfāke Satanāōxō tāpikifinakōia, oa xanīfo finakōia keskara ixii nāmānoax. Satanás āfe yōshi ināno ato yoimis ixii, afama mīshti fakī fetsaki ato ōimaxii. ³ Āfe mapo fetsa ano mā māpeafiafono anā otoax afianā nia. Nā mai tio anoxō yora rasichi ōikani askaito: “Kee, ¿afeskax otoamē mā nākōina nō ōia?” ixō yoikani. Nāskaito ōikī ifofaxikani. ⁴ Nāskakē ifofakaxō yoikani Satanás iskafakī: “Mī fāsi sharakōi. Mī afama mīshti famis,” fakaxō ifofakani. “Nāskaxō nā yora pōfekōi inō mī yōshi mī inā nōko xanīfokōi inō. Nāskaxō nō mia chai faima,” fakaxō yoikani. Askatari oa yoinā keskara akiki inimakakī fanāixokani iskafakakī: “Mia keskarakai tsoama. Mī fāsi sharakōi. Miakai tsōa chakafatiroma. Mī fistichi ato finōkōia,” fakaxō yoikani fanāikakī.

⁵ Askatari anā Nios chakakōifakī yoia iskafakī: “Fato fetsakai ea keskarama. Ē Nios finōkōia,” ikax, āa chanī Nios chakafakī finakōimis. Nāskafekē Niospa yoixii: “Cuarenta y dos oxe finōta mī anā afaa fatiroma xanīfokōixō afara fetsafo sharafakī.” ⁶ Nios noikaspakī mekafakī fetsaito ē nika iskafaito: “Fato

Nioskai nai mēra ikama. Anā ano Niosma. Mā kaxpakōi mā Nios Ifofai,” ixō yoia. “A yora namisfāfekai fato Nios Ifofamisma,” ato fakī fetsai. ⁷ Askatari Satanás ifofakaxō ato afara shināmānaino yorafāfe a Jesús Ifofamisfo ato finōpaikī ato retepaikani āto xanīfo ipaikakī. Askatari maitio anoafō, xoko fetsafo, meka fetsafoya keyokōi āto xanīfo ikani a feronāfake xanīfo chakakōi a Satanás yōshi a mēra nanea. ⁸ Askafaxō yoisharaxikani akiki inimakakī: “Mī fāsi finakōia, mī nōko nioskōi,” ixō yoixikani akiki inimakakī. Askafāfe tāpixō nōko Ifo Niospa atoki kirika keneama a Ifofaafāfema ōikī. Mai onifataima mā tāpixō Niospa āto anefo āfe kirikaki keneeni fatofāfe Jesús Ifofaimākai. Akka nā Jesús ovejanā fake keskara noko nāxonī noko īkipakexakī.

⁹ Mā pachoyakī ea nikasharakāfe. ¹⁰ “Nā Satanás ifofaafāfe mato karaxa mēra ikimakaki mato ikimaxikani. Askatari mato kenopa retekakī mato retekikani.” Nāskakē efe yora mīshtichi, shināchakayamakāfe. Nā nō Jesús chanīmara faafo tii nō omiskōifikī, nō tenekōixii nōko Ifo Jesús shināmakitama.

¹¹ Askatari ē anā ōia oa namakē ōia keskara. Mai mēranoax kāinākafanaito ē ōia yoinā pōfe fetsa keskara. Āfe māxo tiixo pishta rafe oveja fakenā keskara. Askai fāsikōi mekai oa poomā keskara āfe meka mēxakōi chai potai. Askaito ē ōia. ¹² Akka nā yoinā pōfe taeyoi fakafā mēranoax kāiyaito afama mīshti atiroxakī nāato yoiaino nā rama oatori afama mīshti atiro nā fētsa aka keskafakīri nāskaxō yorafo tii īkitiro. Keyokōi maifo tii anoafō ato yoia iskafakī: “A yoinā keskara mā mapoki rerafo mā nayofiax afianā mā otoa nā fisti ifofakāfe. ‘Na nōko ifora,’ fakāfe,” ixō ato yoia. ¹³ Afama mīshti tsōa atiroma keskara ato ispa yorafāfe chanīmara fanōfo. Nāskata yorafāfe āto ferotaifi nai mēranoa chii fotomana. ¹⁴ Satanāōxō nāskarifikī yorafo pāra niosra fanōfo. Askafata ato yoia: “Nā yoinā pōfe keskara retefiafono mā otoa nā nimofonōfā faxō inākāfe a keskara faxō,” ixō ato yoia. ¹⁵ Nānori ato yoiaino mā nimofonōfā māpeakano xākaitiroma. Askafiano Satanāōxō xākaima mekanō, askatari a siete mapoya mekayamaifo ato retenō. ¹⁶ Askata anā ato yoia iskafakī: “Maitio ikafāfe āto mēke kayakai aōri kenenōfo askayamakī āto femānāki kenenōfo.” Nā yoinā pōfe keskara fakafā mēranoax kāiato āfe ane keneyamakī āfe número ato kenemana. Keyokōi ato kenemana. Fakefo kenemata, xinifori kenemata, afama mīshtifoyari kenemata, afaamaisfori kenemata, inafomari kenemata, inafori kenemana. Tsoa pishta finōmanama. Keyokōi nā yoinā pōfe keskarato āfe ane atoki kenemana. ¹⁷ Tsōa nā ane keneyamaxō afaa fitiroma. Askatari afaa ināmitsatiroma a piaifori tsōa fitiroma, a rapati yopaifori tsōa fitirofoma.

¹⁸ Nāskakē Niosxō shināsharatirofo nā yoinā pōfe keskara āfe número tāpitirofo. Āfe número tāpixō āfe aneri tāpitirofo. Nā yoinā pōfe keskarafiax feronāfakekōi, āfe número seiscientos sesenta y seis.

14

Jesús chanīmara faafo ciento cuarenta y cuatro mil akiki fanāikani

¹ Askata ēfe namapa ē ōia keskara afianā ē mato yoinō. Nā Jesús ovejanā fake keskara māchifā āfe ane Sión ano nia ē ōia. Askatari ciento cuarenta y cuatro mil afe yorafo afe niafo ika. Āfe ane Jesús yafi Epa Nios āto ane femānāki kenea ē ōia. ² Nāskatari nai mēranoa meka efapakōi ē nika. Faka pōoitifā keskara ē nika, nai tiri ikai keskarari pachakōi ē nika. Meka efapari ē nika yora ichapa fanāikanaifono āto manetiya ichapa rasi fanāikanaifāfe ē nika. Nā manetinī āfe ane arpa. ³ Fana fena tsōa nikayomisma Epa Nios ferotaifi fanāixōafo. Nānoxori nā cuatro Niospa onifanifāfe nikakani. Askatari nā veinticuatrofāfe nikakani. Nā ciento cuarenta y cuatro mil nono mai ano a Jesús ato ifini, nāfāfe na fana fena tāpitirofo. Tsoa fētsakai tāpitirofoma. ⁴ Nā

ciento cuarenta y cuatro mil yorafāfe nōko Ifo Jesús Ifokōi famisfo. Afara chaka shinātamaroko Jesúsnoa shināfafāikani. Aato ato ifimis ato nāxonixakī Epa Nios yafi āfe Fake Jesús Ifokōi fakanax āfe yora inōfo. Ato iyopaiyai ari afe fomisfo. Ato katoa afe yorakaxō ato yoiyai keskara anōfo. ⁵“Nāfāfe chanīkī yoimisra,” ixōkai tsōa atoōnoa yoitiroa. Jesúsnoax isharamisfo. Aōxō afaa chakafamisfoma.

Niospa āfe ājiri trespa yoiāfo

⁶ Askata ē ōia Niospa ājiri fētsa nai mēra ika fāsi keyakōi yoyakī keyokōi yorafo maifo tii anoāfo ato meka shara yoiā. Yorafo keyokōi yoita, xoko fetsafo tii yoita, nā meka fetsa fetsatapafāfe meka yoimisfori yoita, nā mani fetsafo tiiri ato meka shara yoiā. Epa Nios nipanakaōnoa ato yoiā. ⁷ Mekakī fāsikōi ato yoiā iskafakī: “Nios shinākāfe. Nikakōikāfe. A noikōikāfe. ‘Mī sharakōi, mī afama mīshti mī atirora,’ fakāfe. Iskaratīa Niospa nā keyokōi chakafamisfo ato omiskōimani. Nāato nai onifani, mairi onifani, fakafāri onifani, faka sharari onifani. Nāskakē a noikāfe: ‘Mī nōko Ifo Nios sharakōi,’ fakāfe,” ato faa.

⁸ Askata Niospa ājiri fētsa mā mekai keyoano fetsari nokotoshixō iskafakī yoiā: “Babilonia ano pexe rasi iyopaoni. Iskaratīa anā ano tsoa ikama. Nānoxō yorafāfe afara chaka shināpaonifo. Fetsafori afara chaka ato fama-paonifo ato keskara inōfo. Askaifāfe Epa Niospa ato omiskōimani anā ano inōfoma. Nāskakē Babilonia anā anoma,” ixō Niospa ājirinī nai mēra ikato yoiā.

⁹⁻¹¹ Askata afianā Niospa ājiri fetsari nai mēranoax nokotoshixō meka fāsikōi yoiā iskafakī: “Fētsa nā yoinā pōfe keskara yafi āfe nimofa keskara nikakōikī yoimis iskafakī: ‘Nā ēfe nioskōi,’ ixō anori yoikī āto mēkeki kenefo, askayamakī āto femānāki na yoinā pōfe keskarato āfe ane keneafāfe Epa Nios atoki ōitifishkikōixii. Nāfo Niospa ato fāsi kerexkai omiskōimaxii. Chii mēra ato potafianokai keyonakafoma. Jesús āfe ājirifo sharakōifo feta ōiaino a omiskōipakenakafoma mēra Niospa ato potaxii chakamāi famisfono, Nios nikakaspakakī. Pae meekakī xatenakafoma. Tsōa ato ifitiroma, nā yoinā pōfe keskarato āfe ane āto mēkeki keneafono, askayamakī ato femānāki keneafono. Nāskakē pena tii ita, fakishchāi ita, omiskōixikani tenepakenakafoma,” ixō Epa Niospa āfe ājirinī yoiā.

¹² Nāskakē efe yora mīshtichi, māto ōiti inimamasharakāfe. Omiskōifikī tenekāfe. Niospa noko yoini keskara akāfe. Nōko Ifo Jesús kachikiri fayamakāfe.

¹³ Askata ē meka nika nai mēraxō ea yoiāito: “Ē mia yoiāi keskara kenefe. Fatorāfo nōko Ifo Jesúsnoax nai, inimakōixikani,” ixō ea yoiā. “Chanīmakōi. Mā nakanax anā omiskōitirofoma. Epa Niospa ato ama keskara akōikanax, nāskakē inimakōixikani. Nāfāfe fetsafo shara faxomisfono Nios atoki inimasharaxii. Akka Epaki nokoafono ato ināsharaxii,” ixō Niospa Yōshi Sharapa yoiā.

Nā chakafamisfoki Nios ōitifishkikōikī maifo tii anoāfo ato ichanāfai ato omiskōimaxii

¹⁴ Akka ēfe namapa ōia keskara afianā ē mato yoinō. Ē afara fetsa ōia nai kōi oxokōi kamaki feronāfake tsaokē ē ōia. Ē ōikī iskafaa: Xanīfāfe maiti orokōi maiya, askatari keno extea ikikōi tsoma ika. ¹⁵ Akka āfe ājiri fetsa Nios kīfiti pexefā anoax kaxō fāsikōi yoiā iskafakī: “Nā maifo tii ano mā fanafo ōshia. Nāskakē iskaratīa mā fanafo chetekani. Akka mī keno exteato taxtexō ichafafe,” faa. Nānori yoifikī fanakōifoōnoa yoiāma. Niospa yorafoōnoa yoiā iskafakī: “Iskaratīa keyokōi Jesús chanīmara faafo tii ifife Epa Nios fe ika anoax ichanākanax afe ipaxanōfo,” ixō yoiā.

¹⁶ Askata nã nai kõi kamaki tsaoto ãfe kenopa fanafo taxtea keskafakĩ ãfe sharaõxõ a chanĩmara faafo tii ifia afe ìpaxanõfo.

¹⁷ Askata ã õia nai mēranoa ãjiri fetsari Nios kĩfiti pexefã anoax kaito, aatori keno extea ikiai tsomax. ¹⁸ Afianã ãjiri fetsari Nios kĩfiti mĩsa anoax kaa. Nãato Niospa maifo tii anoa koatiro. Nãatori keno extea ikiai tsomax fãsikõi mekayanã yoia: “Nã uva fimi mã pachiaki. Mextexõ ichafafe,” ixõ yoia. Nãskarifikĩ Epa Niospa ãfe ãjiriõxõ a nikakaspamisfo ichanãfaxii. ¹⁹ Nãskata nã Niospa ãjirinĩ ãfe keno extea ikiai tsomaxõ uva xatexõ ãfe tsinĩti mēra nanea ãfe ene fonõ. Nãskarifikĩ Niospa ãjirifãfe nã Niospa meka nikakaspamisfo ato ichanãfai. Akka Nios atoki õitifishkikõixõ ato omiskõimani. ²⁰ Nios ika anoxõ ato omiskõimanama. Iskafakĩ ãfe namapa ã õiai keskara ea õimana. Fetsafãfe ato retexikani ãto imi ichapa foxii. Askara tsõa õiyomisma. ãto imifo kamayofõ tesanãkõixii. ãto imi chaikõi trescientos kilometros foxii. Ato imi noakõi un metro ixii, nakirafekõi. Nãskarifikĩ nã Epa Nios nikakaspamisfo omiskõixikani ato omiskõimanaitã.

15

Epa Nios ãfe ãjiri siete afianã ato yoia mai anoafõ ato omiskõimanõ

¹ Askata anã ãfe namapa ã õia keskara ã mato yoinõ. Afara fetsa tsõa õiyomisma nai mēranoa ã õia. ã ratekõia. Akka Nios nã yora nikayospafoki õitifishkiki. Nãskakẽ ãfe ãjiri siete ato yoia keyokõi mai anoafõ ato omiskõimanõfo. Mã askafafono Epa Niospari ato omiskõimani. Akka anã tsoaki õitifishkixõ, Niospa ato omiskõimatiroma.

² Askata ã õia fakafã feroikima raka chiiya osia keskara. Nãno yorafã rasi niafo ika. Nã yorafãfekai yoinã põfe keskara ifofaafoma; ãfe nimofori ifofaafoma; ãfe numerori ãto yoraki keneafoma. Nãfãfe ato finõkõiafo. Nã fakafã feroikima raka chiiya osia keskara a kesemẽ maniafo. Epa Nios ato tii maneti inãpakea. Nã maneti ãfe ane arpa. ³ Taeyoi Nios yonoxomiskõi Moisés ipaoni. Nã Moisés ãfe rãfifõ finõkõiax fanãini keskara nãskarifikai ãto arpa tsomakaxõ Jesús shinãkakĩ fanãikani a Moisés fanãini keskara iskafakakĩ:

Ifo, mĩfi Nioski. Mĩ afama mĩshti atiro. Mĩ amis keskara sharakõi. Tsoa fẽtsakai atiro. Mĩ mai fetsa anoafõ keyokõiõnoax mĩ ãto xanĩfokõi ipanaka. Mĩ shinãmis keskara mēstekõi ikõina. ⁴ Ifo, keyokõi mikiki mesekakĩ mia nikasharapainõfo. Mĩ afama mĩshti tsõa õiyomisma mĩ atiro. Keyokõi maitio anoafãfe anori yoipakexanõfo. Mĩ fistichikai afaa chakafamisma. Mĩ shara fisti famis. Afetĩara mĩ ato apaiyaitĩa mĩ ato omiskõimaxii a chakafamisfo. Chanĩmakõi mĩ ato askafaxii. Keyokõichi mã fẽkaxõ mia shinãkani inimayanã fanãikani, ixõ yoiaifãfe ã nika.

⁵ Askata afianã ã õia nai mēranoa Nios ika anoa. Ea fẽpexona Nios ika ano ã õinõ. ⁶ Nios ika mēranõax ãfe ãjiri siete ichanãfo. Rapati oxokõi chainipa choshtama fafeai safeafõ, oro õshi keskarato xonexemeafõ. Nãfãfe mai anoafõ ato omiskõimakani omiskõinõfo. ⁷ Nãskakẽ nã cuatro Niospa onifaa fẽtsa Niospa ãfe ãjiri sietefõ ato oro kecho inãakea. Nios nã nipanakato nã Ifofaafoma mai anoafõki õitifishkikõikĩ nã kechofo mēra afara chakafo fospi faa nãskaxõ chipo atoki ãjirifãfe nachiakeafono omiskõinõfo. ⁸ Nios ika mēra kõinĩfã nashfiakĩ keskara. Niospa ãfe kerex shara a mēra fospia. Nãskatari a mēraxõ chaxasharai. Akka mai anoxõ nã Nios nikakaspamisfo Niospa ãjirifãfe ato omiskõimakani omiskõinõfo. Nãskakẽ a ato omiskõimanai xateamano tsoa Nios ika ano ikitirofoma.

16

Nikayospafo Niospa ato omiskōimani omiskōinōfo

¹ Askata Nios ika ariax fāsi mekaito ē nika. Niospa ājirifo siete ato yoia iskafakī: “Niospa a nikakaspamisfo mai ano ikafo atoki ōitifishkikī nā kechofo mēra afara chakafo fospi faa atoki nachitakāfe,” ixō ato yoia.

² Nikakaxō Niospa ājiri fētsa taefakī āfe kecho mēranoa nai mēraxō mai ano nachia. Nāskatari nā yoinā pōfe keskarato āfe ane āto mēkeki keneyamākī āto femānāki keneafō, āfe nimofō keskarari ifofaafō nāfo kooyoi fetsekaxō paekōi meexikani.

³ Askata afianā Niospa ājiri fētsa āfe kecho mēranoa nai mēraxō fakafānaki nachia. Mā nachiano fakafā ōsinātana nā yora reteafono āfe imi foa keskara. Nāskakē keyokōi nā fakafā mēranoax nai fetseafō.

⁴ Askata afianā Niospa ājiri fētsa āfe kecho mēranoa nai mēraxō fakafoki nachia, askatari mai mēranoax faka tsekeafokiri nachia. Nachiaino fakafō fe mai mēranoax faka tsekeafō fe imi keskara osiafo. ⁵⁻⁶ Askatari Niospa āfe ājiri fetsa mekaito ē nika. Nā faka kexemisto iskafakī yoia: “Epa Niosi, mī tosa onifataima mī iyopaoni. Nāskakē nā mī iyopaoni keskarari iskaratīari mī nīpanaka. Mī shara fisti amis. Aicho, iskaratīa nā mia nikakaspamisfo mī ato omiskōimani chanīmakōi. Āto chaka xatekaxō mī Fake Jesús Ifokōi fanōfo, mī meka ato yoimisfori nā Jesús Ifofaafāfema ato reteafō. Nāskakē nā mia Ifofaafoma mī kopikiri ato namai chanīma. Mefe yorafo omiskōimamisfo. Nāskakē ato kopikiri nā mia Ifofaafoma mī ato omiskōimani omiskōinōfo. Chanīmakōi ato omiskōimani,” ixō Niospa ājirinī yoia.

⁷ Askatari Nios nai mēra ika anoa nā kīfiti ano fistixō Epa Nios kīfimisfo anoa ē fetsa nika yoikī iskafaito: “Nōko Ifo Nios, mī ājirinī yoia keskara chanīmakōi. A mia nikakaspamisfo mī ato omiskōimatiro. Chanīma, mī mēstekōi ixō mī ato omiskōimani,” ixō yoia.

⁸ Askata Niospa ājiri fētsa Nios ika arixō āfe kecho mēranoa afara chaka xiniki nachia. Akiki nachiano xini chii keskara ikano yorafo koofafo. ⁹ Xini xanakōiaino yorafo koofafo. Kookani omiskōiafo. Mā tāpiyomisfo Niospa ato omiskōimafiaino āto chaka xateafoma. Nios Ifofatamaroko. Iskafakī yoimisfo: “Niospa noko chakafai. Nios chakakōi,” ixō yoiafo. “Nios shara. Afama mīshti fatiro,” ixōkai tsōa anori yoipaikanima.

¹⁰ Askatari Niospa āfe ājiri fētsa Nios ika arixō āfe kecho mēranoa nā yoinā pōfe keskara chakakōikī afe ikafokiri atoki nachia. Nachiano nā yoinā pōfe keskara ifofaafō ika ano fakishkōi ika. Nāskakē keyokōichi paekōi meafō, aripe iyanā. ¹¹ Nāskai omiskōifikakī āto chaka xateafoma. “Niospa noko iskafai. Nios chakakōi,” ikaxō āto chaka xateafoma.

¹² Askatari anā Niospa ājiri fētsari nai mēraxō āfe kecho mēranoa faka efapa āfe ane Eufrates kamaki nachia. Mā nachiano nā Eufrates netsorisatana. Nāskakē xanīfofo xini oaikirinoax fekani, mā Eufrates netsokōiano, āto sorarofo feta pokeferakani.

¹³ Askatari ē niafaka chakakōifo tres fexko keskara ē ōia. Fetsa ronōfā keskara nā Satanās āfe āxfa mēranoax kāikaina, fetsari nā yoinā pōfe keskarato āfe āxfa mēranoax kāikaina, fetsari: “Ē Niospa meka ē mato yoimisra,” iki, a chanīmisto āfe āxfa mēranoax kāikaina. ¹⁴ Nā tres niafaka chakafāfe tsōa afaa ōiyomisma keskara afama mīshti yorafo ispafo. Keyokōi xanīfofo a ano fokani ato ichanāfanō nōko Ifo Jesús afe yorafo retenōfo. Nāskatari nōko Niospa afama mīshti famisto afe yorafo ispaxii.

¹⁵ Askatari nōko Ifo Jesús ato yoiaito ē nika iskafakī ato yoia: “Ea nikakāfe. Yometso tsōa yoyamano koshikōi pexe mēra ikirisatiro afara onexikī.

Nāskarifikāi ē tsoa tāpimanimā nā ē matoki nokoaitīa. Ē matoki samamashta nokorisai. Mā itipinīsharakaxō ea manasharakanax inimasharaxikani. Akka tsoa itipinīsharayamano ē matoki nokoaitīa keyokōi yorafāfe ea ōikani afāfekai ea Ifofasharama. Nāskakē rāfikōitirofo,” ixō yoia.

¹⁶ Nānori nōko Ifo Jesús yoifiano nā tres niafaka chakafāfe keyokōi xanīfofo maifo tii anoafō ichanāfaa Niospa yorafo retepaikī. Ato ichanāfai nā mai āfe ane israelifāfe meka Armagedón famisfo anoxō.

¹⁷ Askata Niospa ājiri fētsa anā nai mēraxō āfe kecho mēranoa nachia. Mā nachiano Epa Nios meka fāsikōi iska: “Mē keyokōi aka,” ixō yoiaito ē nika.

¹⁸ Askatari fāsikōi kana piishikai ita, afarafo pachakōifo ita, nai tiri iki ikai ita, mai naya naya ita, askarafokai tsōa ōiyomisma. Nā feronāfake onifakī taefanitīa tsōa mai naya naya iki finakōiaito askara tsōa ōiyomisma. ¹⁹ Akka nā Babilonia anoax mai naya naya ikaino mai tres kaxketani. Maifo tii anoari āto peke rasi nā mai naya naya ikaino maokomea. Nā Babilonia anoafō anā Niospa shināni afara chakafamisfono. Nāskakē atoki ōitifishkikōikī ato omiskōimani omiskōinōfo. ²⁰ Nāskatari nā mai toomāfā anoafō yamarisatana. Keyokōi māchifāfori yamarisatana. ²¹ Nāskatari oi nami matsi tokorofo efa-pakōi āfe efe cincuenta kilo nai mēranoax yorafoki pakea. Askafiaito ōikakī āto chaka xateafoma. “Nios chakakōi. Na oi nami efa-pakōi nokoki potai,” ixō yoiaifāfe ē nika.

17

Mai fetsa anoafō kēro feroma keskarafō

¹ Askata anā ēfe namapa ē ōia. Afara afeskara ixiai keskara anā ea ōimana. Nā Niospa ājiri sietepa kecho tsomafo ikafo akka fistichi ea yoia: “Niri ofe. Na peke ichapa rasi fakafāfo chaimashta anoafō chakakōifo. Kēro feromakōi keskarafō Nios nikakaspakani. ² Akka keyokōi xanīfofo maifo tii anoafō ato fe chaka imisfo. Nāskakē atoōnoax afori chakakōifo ikafo. Nā kēro feromakōi keskara ikafo chakafakani. Akka nā Niospa ato omiskōimaxiai keskara ē mia ōimanō,” ixō ea yoia.

³ Ea askafaino ē anā namakē ōia keskara ē ōia. Epa Niospa Yōshi Sharaōxō ājirinī ea iyoa tsōa istoma ano ea iyoa. Nānoa kēro ē ōia yoinā pōfe ōshikōi kamaki tsaokē. Nā yoinā pōfekōi āfe yora tiixō ane ichapato kenea ika. Keyokōi nā anefo kenekī Nios meka-fakī chakafaa. Nā yoinā pōfe āfe mapo sieteya. Āfe māxo diezya. ⁴ Nā kēromā sama chainipa yafi nana ōshi safea ika. Oro fakka fakka ikai keskara safea. Askatari makex keskara fakka fakka ikai sharashta yafi fetsa āfe ane perla oxoshara, nāri safea ika. Nā kēromā kecho oro tsoma a mēra afara chakakōi naneato, a mēra nanea keskara yorafo afara chakakōi fetsa fetsatapafo chakafama. Āto mēra nanexō ato afara chaka shināmana. Ato pāemata, chanīmis ato imata, āto āfima chotamisfo ato imata, āto fenema chotamamisfo ato imata, nāskara chakakōifos ato imamis. ⁵ Āfe femānāki kenea keskara tsōa tāpimisma. Iskara kenea: “Babilonia anoafō tsoa keskarafoma. Nā kēro feromakōichi Nios nikakaspai keskarafō. Nāskakē fetsa fetsatapafo chakafakī finakōimisfo,” ixō kenea. ⁶ Nā kēro feroma keskarato Jesús chanīmara faifo ichapakōi ato retea inimayanā. Nāskaito ōikī tāpia. “Choo, na kēromātsi ato retemiski,” ixō ē shinā. ⁷ Ē askaito Niospa ājirinī ea iskafaa: “¿Afeskai mī ratemetsamaimē? Ē mia yoinō, ea nikapo. Na kēro yafi nā yoinā keskaraōnoa ē mia yoinō. Na yoinā pōfe keskara siete mapoya askatari diez māxoya tsōakai askara tāpiyomisma. Akka iskaratīa ē mia tāpimani. ⁸ Nā yoinā pōfe mī ōiai yoinākōima. Nāfi xanīfo efa-pa chakakōi. Nāato Nios nikakaspamis. Taeyoi niyopaoni. Anā iskaratīa niama. Askafix chipo

nā niafaka chakafo kinĩfā mēra ika anoax kaixii. Nānoax kāifekē Epa Niospa a omiskōipakenakafo mēra potaxii anā anoax faki kanakama. Akka nā taefakī mai onifakī taefanitīa yorafāfe āto anefo Niospa āfe kirika keneni, nāfo afe ipanakafo. Akka a āfe kirikaki āto anefo keneama, afo Nios fe ipanakafo. Nāfāfe yoixikani iskafakakī: ‘¡Kee, ōikapo! Mā nafianixakī afianā mā otoa,’ ixō yoixikani.

⁹ “Akka fētsa Niosxō mēstekōi shinākī nāato nā ē rama kēnea keskara tāpitiro. Nā yoinā pōfeōnoa ē mato yoinō, ea nikasharakāfe. Āfe mapo siete mapokōima. Nā siete mapoxō xanīfoōnoa noko tāpimai. Nā ikafo siete māchifā. Nānori nā kēro feroma ika. ¹⁰ Cinco xanīfofo anā anoma. Mā nanifo. Fisti iskaratīa nia. Fetsari chipo ixii xanīfoi. A chipokōi xanīfoxiā xanīfoi chaima. ¹¹ Nā yoinā pōfe keskara ōshi ē mia yoia, ari yoinākōima, xanīfo chaka fetsa. Nā xanīfo siete ipaonifo keskara nāri chakakōi. A iyopaonikai iskaratīa anā xanīfoma. Nāskakē nāri fetsafo fe omiskōipakenakafo mēra kai anoax anā kāinakafo.

¹² “Askatari nā māxo diez mī ōiai māxokōima. Nāōxō diez xanīfofo noko tāpimani. Nāfo xanīfofo iyoafoma. Chipo mani fetsafo anoax nā diez āto xanīfofo itirofo. Na yoinā pōfe keskara fe xanīfo ixikani. Askafikanax xanīfoi chai samaraka kanima. ¹³ Nāskakē nā diez xanīfofofāfe shināmisfo: ‘Na yoinā pōfe keskara nōko xanīfo iki kiki,’ ixō shinākani. Nāskakē, ‘Mī noko yoiai keskara nō atiro,’ ixō nā diez xanīfofofāfe nā feronāfake yoinā pōfe keskara yoikani. ¹⁴ Nāskaxō nā feronāfake yoinā pōfe keskarato nōko Ifo Jesús afe yorafoya noikaspai, xanīfofo fetsafāferi ato noikaspaxikani. Nā yoinā pōfe keskarato nā diez xanīfofo feta Jesús yafi afe yorafo retapaikani. Retemapaiifaifono Jesús ato kanāxii. Niospa ato katoa afe yorafo kena a Ifofamisfo. Nāfāfe afara afeskarafiaito nōko Ifo kachikiri famisfoma. Nōko Ifo Jesús xanīfo fetsafori ato ĩkitiro. Nōko Ifo finakōixō keyokōi ato ĩkitiro. Akka tsōakai nōko Ifo Jesús finōtirioma,” ixō nā Niospa ājirinī ea yoia.

¹⁵ Askano afianā ea yoia iskafakī: “Na mī ōiai nā kēro feromakōi keskara, fakafā femākīa tsoa nā fakafākai fakafākōima, askatari yorafo mai fetsa anofo, meka fetsayafo. ¹⁶ Nā diez xanīfofo feta nā xanīfo yoinā pōfe keskarato nā kēro feroma keskarakaxō noikaspakōixikani. Keyokōichi āfe afara fīaxikani anā aya inōma. Nāskakē anā tsoa nā kēro feroma keskara fe ipaikanima. Poomānā retexō koshi pikī keyotiro. Nāskafakīri nā diez xanīfofo feta nā xanīfo yoinā pōfe keskarato nā kēro feromakōi keskara chakafaxikani omiskōimayanā. Askafaxō chīi koofaxikani anā ninōma. ¹⁷ ‘Mī noko yoiai keskara nō atiro,’ ixō nā diez xanīfofofāfe xanīfo yoinā pōfe keskara yoikani. Akka Niospa anori ato shināmana a apaiyai keskara fanōfo. Askata taeyoi Niospa yoiyoni nā inōpokoai keskara nāskarakōi ixii. ¹⁸ Na kēro feromakōi keskara mā ōiai kērokōima, akka nā pexefā rasi Babilonia keskara. Babilonia anoa yorafo chakakōifo. Nāfāfe manifo tii anoa ato ĩkināno ato chakafakani ato keskara ikaxō,” ixō Niospa ājirinī ea yoia.

18

Ājiri fētsa yoia iskafakī: “Iskaratīa Babilonia pexe rasi mā keyoa,” ixō yoia

¹ Askata anā ājiri fetsa nai mēranoax mai ano fotoaito ē ōia. Epa Niospa yoia nā xanīfo fētsari afama mīshti atiro. Nāato chaxaito maifo tii anoxō ōikani. ² Fāsikōi yoia iskafakī:

Pexefā rasi Babilonia anofo mā keyoa, anā anoma. Iskaratīa anā ano tsoa ikama, askatamaroko niafaka yōshi chakakōifo ano ika, askatari peya yōshi chakakōifori ano ika. ³ Nā kēro chakapa yorafo ato māmā pae ayamatiro keskafakī, nāskarifiakī nā Babilonia anoafāfe yora fetsafo

mai fetsa anoafato ato afara chakafamafo ato keskara inōfo. Āto xanīfofori ato askafamafo. Askatari afara sharafos fichipaimisfo. Nāskakē a afama mīshtifo ato minimisfo, afara ichapayakōifo, ixō yoiaito ē nika. Niospa inapa askara ato yoia a Niospa keyoxiai a Babilonia anoafato.

⁴⁻⁸ Yoikī askafatanaino nai mēranoax mekaito ē meka fetsa nika iskai mekaito:

Babilonia ano ikafāfe fāsi afara chakafakī finakōiafo. Nā afara chakafamisfo Epa Niospa ato ōia chakakōifaifāfe. Nāskakē ato omiskōimaxii. Nā Babilonia anoafāfe fetsafo afara chakafamamisfono afori. Epa Niospa ato omiskōimakī finakōixii omiskōinōfo. Nā Babilonia ano ikafāfe āto shinā mēraxō mā shināfo iskafakakī: “Nō Nios yopaima. Afara fet-safori nō yopaima. Nō isharakōimis. Oa xanīfokōi isharamis keskara nōri nāskamis, xanīfo keskara. Nōkai oa kēro ifomafa keskarama. Nō omiskōitiroma. Askatamaroko nō isharapakenaka,” ixō kakapaimisfāfe yoimisfo. Akka Epa Niospa ato fāsi omiskōimani omiskōiakī tenēnōfoma. Akka nā ea chanīmara faafāfe, ea nikasharakāfe. Epa Niospa mā ato samamashta omiskōimani anā isharayamanōfo. Atiri ē ato namai, atiri ē ato omiskōimani, a piaifori ato kēyoi. Nāskakē fonāikani. Nāskatari atiri ē ato koofaxii kooi fetsenōfo. Tsōa atiroma keskara Epa Niospa afama mīshti atiro. Nāskakē Epa Niospa mato yoi iskafakī: “Efe yora mīshtichi, Babilonia anoafato keskara iyamakāfe. Ato fe rafeyamakāfe. Ato feta chakafayamakāfe ē ato omiskōimanai keskafakī, matori ē omiskōimanōma,” ixō Epa Niospa ato yoixii kiki,

ājirinī faito ē nika.

⁹ Askano Babilonia kooaino mai fetsa anoafāfe āto xanīfofofāfe ōikakī manoxikani. Nāfāferi Babilonia anoxō afara chakafakī tāpinifo. Nāskakē ato feta Epa Nios chakafakakī potakani afara chakafaxikakī. Nā Babilonia anoa keskarafori afāfe afama mīshti ichapa fimisfo. ¹⁰ Babilonia kooaino nā xanīfofo ratekōixikani chai inoaxri fetsafo mesexikani.

¡Ooa! Babilonia anoafato fato yora fetsafo keskarafoma. Mā tāpikōisharafikē samamashta Epa Niospa mato omiskōimani mā kooi fetsenō. ¡Keexto! Koshikōi Babilonia mā kooi keyoa. Nōri iskayamapainō, ixō shinākani xanīfofofāfe ratekōiyanā.

¹¹ Nāskatari maifo tii anoafato āto afama mīshtifo minimisfo oiaxikani shināmitsakani. “¡Ooa! Mā Babilonia kooi keyoa. Iskaratīa anā nōko afama mīshtifo noko tsōa fīatiroma. ¹² Nōko oro ōshishara fīayamata, a kerexkōi fakkai fakkaisai fīayamata, nōko tokirinī fakeshta fakkai fakkaisai fīayamata, nōko tokiri fetsa āfe ane perla fīayamata, nōko sama sharafinakōia fīayamata, nōko sama nana shara fīayamata, sama fetsa fetsatapafō fīayamata, nōko ifi nakas sharakōi fetsa fetsatapafō fīayamata, tokiri keskara kerexkōi oxosharakōi āfe ane mārfil nāato afarafo onifaa fīayamata, afe keskarara ifi sharakōifo fīayamata, firo shara āfe ane bronze fīayamata, keno fetsa āfe ane firo fīayamata, tokiri āfe ane mārmoōlo fīayamata, nāfo kopikōifo noko anā fīakanima. ¹³ Akka nō pīchamis afama mīshtifoya osixō, nā itsa sharafoya fetsa fetsatapafōya osixō, afo noko tsōa fīatiroma. Askatari a nakas shara āfe ane incienso, fetsari mīrra, fetsari pirofomā, fetsari vinō, fetsari xini, fetsari arinā, fetsari trigo, askatari nōko yoinā inafori ovejari, kamayori, nōko karori, yonomatifori, nāfo noko anā tsōa fīatiroma. ¹⁴ ¡Ooa! Babilonia anofāfe nā afara fetsa fetsatapafō fichipaikakī anā fitirofoma. Keyokōi afara sharafo fichipaikakī mā fimis anā anoma mā fenokōia anā mā fipanā. Mā afaa yopakima mā fimis. Mākai anā fitiroma. Keyokōi nā mātonā mā keyoa,” ixō nā ināmitsamisfāfe yoixikani.

¹⁵ Nā mai fetsa anoa fēkaxō afama mīshti minikaxō kori ichapa fimisfāfe mā noko kaxō chaima nīxō ato ōikani, ratekōiyanā, oiakani, askatari shināmitsakōikani. ¹⁶ Yoikī iskafaxikani: “¡Ooa! Fato fetsakai Babilonia anoafō keskarama. Ato fe yorafāfe rapati sharakōifo safeafo. Rapati ōshi sharafo, askatari oro teoti safeafo, tokiri fakkai fakkaisai keskarari menexemeafo, perlari askari faafo. ¹⁷⁻¹⁹ Koshikōi na afama mīshtisharafo mā keyokōia,” ixō yoixikani.

Nāskarifiāi nā kanōanāfā āfe ifofāfe shinākani, a kanōanāfā mēra fomisfāferi shinākani, a kanōanāfā nexa yonomisfāferi shinākani, a kanōanāfā mēra fokaxō, ato afama mīshti minikaxō kori fimisfāferi shinākōikani. Babilonia kooaito chai ixō ōikani manokakī shināxikani. “¡Ooa! Fato pexe fetsakai Babilonia keskarama. Na Babilonia fistiōxō kanōanāfānē āfe ifofāfe kori ichapa fimisfo. Akka a aya imisfo koshikōi mā keyoa,” ixō a kanōanāfā yonomisfāfe yoixikani.

²⁰ Askaifono keyokōi Epa Nios ika anoafō inimakāfe. Babilonia anoafāfe a Jesús chanīmara faafo ato omiskōimamisfo, Epa Niospa ato kopikī omiskōimaxii. Nāskakē keyokōi a Jesús chanīmara faafo fe, Jesúsxō āfe meka yoipaonifo fe, a Niospa meka inōpokoai yoimisfori inimakāfe.

²¹ Akka Epa Niospa āfe ājiri fetsa mitsisipakōichi tokiri efapakōi fininīfōfāta fakafā mēra potaxō yoia iskafakī: “Na tokiri kerexkai ē potai keskafakī, nāskafakīri Epa Niospa na pexe rasi anoafō Babilonia kerexkai omiskōimana kooi keyonō. Mā keyokōikanax anā ano tsoa ikima. ²² Nāskakē anā Babilonia anoax manetifo, xāitifo, maneti fetsafori, afo anā tooxikama. Askatari anā tsoa fanāikama. Tsōakai anā ato nikatirofoma. Askatari a yonomisfo anā ano ikafoma. Askatari a aō xiki reneaifo nō anā nikatiroma. ²³ Anā luzri ōtapakenakama. Feronāfāke kēro fiaino inimaifāfe mā nikamis keskara anā tsoa askara mā nikapakenakama. Babilonia anoa a ināmitsamisfāfe tāpikōikani. Nāfāfe ichapakōi fimisfo. Askatari koshoiti tāpixō yora fetsafo pāramisfo. Askafikanax mā keyoafo.

²⁴ “Babilonia anoafāfe a Niospa meka yoimisfo, fetsafori a Jesús chanīmara faafo, fetsafori mai fetsa anoafō ato retemisfo Jesús ōikaspakakī. Niospa meka mato yoipaiifaifono mā ato nikakaspamiskē, Niospa mato omiskōimana,” ixō Niospa ājirinī yoia.

19

Nios ika anoax fanāiki iskakani: “¡Aicho! Nōko Ifo Nios sharakōi,” ikaxō Niosnoa afara sharafo fanāikani

¹⁻² Askata nai mēra ikafo ichapakōi āto meka ē nika, fāsikōi iskaifāfe:

A fetsafāfe chakafamisfo Epa Niospa ato omiskōimani. Chanīmakōi, ato omiskōimani. ¡Aicho! Nōko Ifo Nios fāsi sharakōi. Nāato nōko chaka noko soaxona nō afe nīpaxanō. Aōnoa fisti nō yoitiro iskafakī: “Mī nōko Ifokōi. Fato fetsakai mia keskarama afara sharafamis. Mī sharaōxō mī afama mīshti fatiro,” ixō keyokōichi yoipakenakafo. Epa Niospa Babilonia anoafō atoōnoa iskafakī yoia: “Nā Babilonia anoafō nā kēro feromakōi keskarāfo. Nā chakafamisfoōxō maifo tii ano ikāfori ato chakafama. Nāskakē Babilonia anoafāfe ea fāsi chakakōi famisfo. Efe yorafori ato omiskōimakani nanōfo. Nāskakē ē ato kopia omiskōimakī,” ixō Epa Niospa yoi, ixō yoiaifāfe ē nika. ³ Afianā meka fetsari ē nika nai mēranoafāfe yoiaifāfe iskafakakī:

¡Aicho! Nōko Ifo fāsi sharakōi. Afaa chakafamisma. A chakafamisfo chanīmakōi ato omiskōimani. Ato chiifā mēra potano afo kooi nishpapak-enakafoma,

ixō yoiiaifāfe ē nika.

⁴ Askanori Epa Nios tsaosa ano nã veinticuatro xanĩfori nã Nios onifani cuatro a nãmã feopakekafakĩ iskafakĩ yoiiafo: “Askapainō. ¡Aicho! ¡Nōko Ifo fãsi sharakōi!” ixō yoiiaifāfe ē nika. ⁵ Askata Epa Nios tsaosa anoa ē meka fetsa nika iskafakĩ yoiaito:

Epa Nios yonoxomisfāfe xanĩfofōfāfe askatari afamafōfāfe mato Niospa yoiia keskara mã apaikōimis. Mãri Epa Nios yoikāfe iskafakĩ: “¡Aicho! ¡Epa Niosi, mã sharafinakōia!” ixō yoiaito ē nika.

Feronāfake āfiyakĩ fista atiro inimakĩ. Nãskarifikĩ Jesús nai mēraxō noko fista axoxii nokoki inimakĩ

⁶ Askatari ē anã nika yōrafã rasi mekaifāfe nã fakafã poo ikai keskara, askatari fāsikōi nai tiri ikai keskarari ē nika āto meka:

¡Aleluya! Nōko Ifo Nios tsōa atiroma keskara afama mĩshti fatiro. Nã nōko Xanĩfo finakōia. Maifo tii anoafō noko ĩkitiro. ¡Aicho! ¡Nōko Ifo Nios shara-finakōia! ⁷⁻⁸ Akka feronāfāke kēro fiaino nã kēro inimakōi itipinĩsharatiro āfe fene fe fianāxiki. Nãskarifiaino nōko Ifo Jesús fe iskaratĩa afe yorafo afe ipanakafo. Akka afe yorafo mã itipinĩsharato afe ipaxakakĩ. Akka āfinĩ āfe fene inimamapai itipinĩsharatiro. Sama fena sharakōi patsaxō safetiro afe fianāxikĩ. Nãskarifiakĩ nã Jesús Ifofamisfāfe itipinĩshara fatirofo. Epa Niospa ato shara fapaikĩ, ato chaka soaxoni Jesús fe ĩpaxanōfo. Nãskakē nō inimai. Tsoa fetsakai mia keskarama afara shara famis, ixō yoiiafo. Niospa yorafāfe Jesúsxō fetsafo sharafamis. Nãskakē Niospa ato rapati sharafinakōi safemana Jesús fe ipasharanōfo.

⁹ Askatari ājirinĩ ea yoiia: “Ē mia yoiia keskara kenefe iskafakĩ: ‘Ēfe Fake Jesús iskaratĩa keyokōi afe yorafo ichanāfai afe ĩpaxanōfo. “Niri fekāfe,” ato faino, nikakanax inimakōikani. Nãskakaxō ēfe Fake feta pikani afe ipaxakakĩ,’ ixō Epa Niospa yoiia. Nãskakē Epa Nios āfe meka mã chanĩmara fatiro,” ixō ea yoiia.

¹⁰ Ea yoiaino ē a nãmã feopakekafana, “Mĩ fãsi sharakōi,” ixō yoixiki. Ē askafaino ea yoiia iskafakĩ: “Ea askafayamafe. Ēri Nios yonoxomiski mĩ axomis keskafakĩ, a Nios Ifofaa fetsafāferi askafamisfokĩ. Jesús mato yoiia keskara mã kachikiri famisma. Nãskakē Nios fisti nãmã nō feopakekafã yoitiro: ‘Mĩ fãsi sharakōi. Mĩ ēfe Ifokōi,’ ixō anori fisti nō yoitiro. Nã Niospa meka yoimisfāfe yoimisfo keskarifikĩ ěri Jesúsnoa yoimis Epa Niospa ea shināmanaino,” ixō ājirinĩ ea yoiia.

Jesús mai ano afianã oxiai keskara yoi

¹¹ Akka ē anã ēfe namapa ōia keskara anã ē mato yoinō mã tãpinō. Epa Nios ika anoa nai mēranoa ē ōia. Fepoti fepekemea keskara ē a mēra ōia. Nãskara Epa Nios ika ari xafakĩakōi ē ōia. Nãno kamayo oxokōi ē ōia. Nã kamayo kamaki Jesucristo nōko Ifo tsaosa. Āfe ane ichapa. Āfe ane rafeōnoa ē mato yoinō. Fētsa, “Nã Yoia Keskara Akōimis.” Akka āfe ane fetsari, “Chanĩmisma.” Nãato chanĩmakōi yora chakafo omiskōimani. Niospa meka nikakaspamisfono a omiskōipakenakafo mēra ato potaxii. ¹² Āfe fero rafe chii xofisai keskara. Fakishi chii xofisaino yōra ōisharatiro. Nãskarifikĩ nōko Ifāfe yorafāfe āto ōiti mēraxō shināifo keskara tãpia. Xanĩfāfe maiti sharakōifo ichapakōi maiiafo ika. Āfe femānāki āfe ane kenea. Ares fisti nã ane tãpia. ¹³ Rapati chainipa safea. Nã rapati imiki momoa. Nãskara ōikĩ ea shināmana Jesús noko nãxoni. Āfe ane fetsari, “Niospa Meka,” famisfo. ¹⁴ Afe yorafo nai ariax kamayofō oxokōi kamaki āto Ifo kachiori fokani. Āto rapatifo oxokōi chainipa safeafo.

Nā rapati oxokōi rama pātsaxona keskarafō. ¹⁵ Āfe axfa mēranōa keno chainipa ikaikōi ē ōia. Akka āfe kenoma, āfe meka. Āfe mekapas maifo tii anoafō nikayospamisfo omiskōimani. Maifo tii ato ikinā, fetsafō nikayospamisfo ato kerexkai omiskōimakōi. Āfe meka nikakaspamisfono Nios ōitifishkikōini. Akka Jesúsxō ato omiskōimani, omiskōipakenakafo mēra ato potaxii. ¹⁶ Jesús āfe ane fetsa āfe rapati chainipaki kenea mǎnākiri keneta maikiriri kenea iskafakī: “Xanīfo maifo tii anoā āto Xanīfo finakōia, askatari āto Ifo finakōia,” ixō kenea.

¹⁷⁻¹⁸ Askatari ē ōia ājiri fetsa xini ano nīxō fāsikōi yoia iskafakī: “Xanīfofo ikaino, sorarofō āto xanīfofo ikaino, āto xanīfofo fe rafea ikaino, feronāfakefo mitsisipafo ikaino, kamayofō ikaino, a kamayofō kamaki tsaoafō ikaino, keyokōi Niospa meka nikakaspamisfo ikaino, ato yonomatifoma ikaino, a āto yonomatifo ikaino, yora afamafori ikaino, a yora finakōiafo ikaino, keyokōi Niospa ato namaxii,” ixō yoia. Nāskakē ishpifo ato yoia: “Fekāfe āto nami pixikakī,” ixō nā ājirinī ishpifo kena.

¹⁹ Askatari afianā ē ōia a nōko Ifo Jesús noikaspai nā yoinā pōfe keskara yafi maifo tii anoā xanīfofo āfe sorarofoya ēfe namapa ōia keskara ē ōia. Mā ichanāfo Jesús āfe kamayo kamaki tsaokē afe yorafoya retepaikani. ²⁰ Akka ato retetamaroko Jesús ato achia chiifā mēra ato potaxiki. Nā ato pāramisto, “Ē Niospa meka mato yoimis,” ifiax āa chanīmis. Nāato na yoinā pōfe keskaraōxō tsōa atiroma keskara famis Satanās yōshixō. Nāskaxō keyokōi yorafoki kenea nā marakkaōxō yoinā pōfe keskara tāpixikani. Nāfāfe yoimisfo iskafakakī: “Mī ēfe nios. Ē mia noi,” ixō anori yoinā pōfe keskara yoimisfo. Akka nā ato pāramisto yōra atiroma keskafakī afama mīshti faito nāfāfe ōiafo. Nāskakē ato pārakōia. Nā yoinā pōfe keskara fe nā ato pāramis naafomano iriyafi Jesús ato chiifā mēra pota. ²¹ Nā rafeta āto inafō Jesús āfe kamayo kamaki tsaōxō āfe mekapa ato reteaino nai fetseafō. Mā naafono ishpifo atoki ichanākaxō āto nami pikani māyakōiafo.

20

Jesús Satanās achixō nexaxii mil xinia

¹ Askata Niospa ājiri Nios ika ariax fotoaito ē ōia, chamis keskara tsoma. Nā niafaka chakafo kinīfā fakishifā mēra ikafoki atoki fepoti fepoa keskara ē ōia. Nā Niospa āfe ājirinī fepotinī āfe chamis yafi kaninā efapa tsoma ika.

² Tsomaxō nā ronōfā keskara achia. Nā ronōfā keskara nā niafaka chakakōi Satanās. Nā achixō nexa. ³ Nāskaxō kinīfā fakishifā mēra pota. Potata akiki fepokōia mil xinia a mēra inō anā yorafo pāranōma. Mā mil xinia finōano afianā kāimayoxii samarakatama chaimashta anā mai ano kafāsayonō.

⁴ Askata xanīfāfe tsaotifo Epa Nios ika anoā ē ōia. Jesús afe yorafo yoia nā tsaoti kamaki tsaoafono, “Mā yoitiro fatofomākī omiskōipakenakafo mēra foaifoma, akka fatoforimākī a omiskōipakenakafo mēra foaifo.” Askano nānoari ē ōia nā Jesús chanīmara faafo yamī ato textenifo. Ato texteyoafomano yoiyopaonifo: “Jesús nōko Ifo,” fayopaonifo. Niospa meka ifofamisfono, nāskakē ato textenifo. Akka nāfāfekai nā yoinā pōfe keskara yafi āfe nimofō yoimisfoma iskafakakī: “Mī nōko ifo nios. Nō mia noi,” ixōkai anori yoimisfoma. Askatari aō ato tāpinōfo āto mēke yafi āto femānā kenemisfoma. Nāskakē nā yoinā pōfe keskara atoki ōitifishkikī ato textemani. Mā nai fetsefiafono Jesús ato otoani. Mā otokaxō Jesús feta maifo tii anoafō mil xinia yorafo tii ato ikināfo. ⁵ Nāfo mā otoafono mā mil xinia keyoano fetsafori Epa Niospa ato otoaxii. ⁶ Shinākapo efe yora mīshtichi, mato yoiai keskara. Noko Epa Niospa otofakī taefaxii. Noko katoni afe yorafo nō inō. Epa Nios feta Cristo noko yoiai keskara nō fetsafō Epa Nios kīfixomis. Nō

omiskōifikatsaxakī Jesúsnoax omiskōifikatsaxakī naax nō omiskōipakenafo mēra kanakama. Askatamaroko Cristo ika anoxō a feta fetsafo nō ikixii. Nāskakē Jesús keskara shara ikax nō fāsi inimaxii.

Satanás kinīfā chaikōi mēranoa kāimayoi anā yorafo pāranō. Ato askafaino koshikōi anā kinīfā mēra potaxii anā kāipakexanōma

⁷⁻⁸ Askata mā mil xinia finōano Satanás kinīfā fakishifā mēranoa anā kāimayoxii anā maifo tii anoafo ato pārayonō. Askata mā kāixō nā Nios nikakaspaifo maifo tii anoa ato ichanāfai nā Niospa yorafo ato retemaxii. Ichanākani ichapakōifo. Nā Nios nikakaspamisfo tsōa ato tanātiroma. Gog anoax fekāta, Magog anoax fekāta, ikanax ichanāfo Nios nikakaspamisfo. ⁹ Maifo tii anoafo ato ichanāfaxii Niospa yorafo ikafo anoa ato cheteakenōfo ato retexikakī. Ato askafaifono Epa Niospa afe yorafo noikī ato ifixii. Nā yorafo Satanás ichanāfaa ono nai mēraxō atoki chiifā potano nai fetsekani anā tsoa pishta ninakama. ¹⁰ Akka nā Satanás niafaka chakata yorafo feparamiskōikē Epa Niospa chiifā mēra pota. Nā taefakī nā yoinā pōfe yafi nā ē mato Niosnoa mato yoimisra iki a chanīmis ato mērari Satanás niafaka chaka Epa Niospa pota. Nā tii chiifā mēranoax omiskōikani xatenakafoma.

Jesús chanīmara faafoma ato omiskōimaxii

¹¹ Askata xanīfāfe tsaoti oxokōi efapakōi ē ōia. Nāno Epa Nios tsoa. Akka mai fe nai anā ano ikama. ¹² Askata ē ōia nā xanīfofo fe nā yora afamafori nakanax Epa Nios tsoa ano niafo. Nāno niafono Epa Niospa āfe kirikafo fēpea. Kirika fetsari fēpea. Nā kirikaki nā Ifofamisfo atoki kenea. Akka a Ifofamisfoma atoki keneama. Akka nā kirikanā āfe ane Nīpamisfo. Nā nayox-oma apaonifo keskara kirikafo mēra keyokōi Epa Niospa mā keneni. Nāskakē nā afara chakafapaonifo keskara atoki kenexō ato ispai tāpinōfo chanīmakōi ato omiskōimaxii. ¹³ Nā āsamisfo fe mai anoax namisfori askatari fetsafori nafiakanax otoyokanima keyokōi namisfo Epa Nios āfe ferotaifi feafo. Nā chakafamisfo tii Epa Niospa ato omiskōimapakea. ¹⁴ Keyokōi nā Niospa meka nikakaspamisfo Epa Niospa ato chiifā mēra pota. Mā nafianifono iskaratīa afianā ato chiifā mēra potaito ē ōia. Nānoax omiskōikani xatepakenakafoma. ¹⁵ Akka nā kirika āfe ane “Nīpamisfo” a mēra Epa Niospa āto ane kenemisma, nāfo chiifā mēra pota. Nāskara ē ōia Epa Niospa ea ōimanaino a ixiai keskara mai keyoaino.

21

Nai yafi mai fenakōi Epa Niospa onifaxii

¹ Akka nā ēfe namapa ōia keskara Epa Niospa anā ea ōimana. Ē ōia nai yafi mai fenakōi Niospa onifaa. Nā nai yafi mai taefakī onifani yamarisatana. Fakafāri yamarisatana. ² Askano ē ōia Niospa yorafo nāfāfe Jesús Ifo shara famisfo nai mēranoafo Epa Nios ika ariax fotokani. Nāfo ikafo Jerusalén fena ano. Nā Jerusalén fena Nios ika ariax nāmā fotoa nāno ikafo. Fotoaifono ē ōia fāsi sharakōi. Akka kēromā āfe sama sharakōi safetiro itipinīsharaxikī fene fe fianāxiki. Nāskari fakī Epa Niospa nā Jerusalén fena itipinīshara faa sharakōi inō afe yorafo nāno afe nīpaxanōfo. ³ Askano Epa Nios tsoa anoa meka achakōi ē nika. Yoia iskafakī: “¡Aicho! Iskaratīa Epa Nios yorafo fe ixikiki. Ato mēra ixii nāfo afe yorafo inō, nā yora fisti keskara. ⁴ Ato kexesharaxii anā tsoakai omiskōitiroma. Ato noikī oiaifono Epa Niospa ato shināmasharaxii āto fēo tereaxoxii anā shināchakakakima tanaima inimanōfo. Ato kexeaino tsoakai anā natiroma, anārikai manomitsai oiakanima, anārikai paemekanima. Afara chakafo iyopaoni keskarakai anā askanakama,” ixō yoia.

⁵ Askata Niospa āfe tsaoti kamaki tsaoxō yoikī iskafaa: “Ē keyokōi fenafai,” ixō Niospa yoia. “Ēfe meka chanīmakōi. Nāskakē nā mī nikai keskara kenefe,” ixō ea yoia.

⁶ Askaxō anā Niospa ea yoia iskafakī: “Mē aka. Iskaratīa ē yoiyoni keskara mē keyoa. Afara onifataima ē iyopaoni. Afetīara maifo tii keyoai eres fisti ē yoitiro. Ē keyokōi īkinā. Ēfi nīpamiski. Fetsa nōamāikī yoitiro iskafakī: ‘Ē faka fenakōi naxikima,’ ixō yoitiro. Nāskarīfiai fetsa ipaisharapaikōikī yoitiro iskafakī: ‘Ēa ē isharatiroma. Ē Nios yopakōi,’ ixō anori yoiaito ē inimakī ifitiro, efe īpaxanō. ⁷ Fētsa ea kachikiri fatamaroko nā naitīa ea Ifofasharaxō nāato keyokōi nā ē mia yoia keskara fixii. Ē kaxpa ināxii. Ē āfe Nios ixii. Akka ēfe fake ixii. ⁸ Akka fetsa ratei eōnoax omiskōikaspakī ea kachikiri faa, askatari fētsa ēfe meka nikakaspamis, fētsari afara chakafo fetsa fetsatapafo xatekaspai, askatari fetsari retemitsamis, fetsari āto āfima chotamis, askatari kēromāri āto fenema chotamamis, fētsari koshoiti tāpiax nā niafaka chakafo fe rafemis, askatari fētsari ea noitamaroko afara fetsa noikī, ‘Na ēfe nioski,’ famis. Nāskakē askarafo fe nā chanīmisfo afokai efe nīpanakafoma. Chiifā mēra nā omiskōipakenakafo mēra ipanakafo. Anoaxkai faki fonakafoma,” ixō Epa Niospa ea yoia.

Jerusalén Fena

⁹ Askata Niospa ājirinī siete kecho keskara mēra afara chakakōi fospia maifo tii ano nachixii ato omiskōimanō fētsa ekeki oxō yoikī iskafaa: “īōfe! Ē mia afara sharakōi ōimanō. Akka feronāfāke mā āfiyaxō kexesharatiro. Nāskarīfakī Jesús chanīmara faafo afe yorafo ifia. Ofe. Ē mia ōimanō,” ea faa. ¹⁰⁻¹¹ Askano Niospa Yōshi Sharapa ea īkināino Niospa ājirinī ea machi efapa keyakōi ano ea iyoa keyokōi ē ōinō. Jesús chanīmara faafo nā Nios ika anoafō ato chaka soaxona nāfo nai mēranoa Epa Nios ika ariax fotoaifāfe ea ōimana. Na māchifā keyakōi anoxō ea ōimana. Nāfo ika ano āfe ane Jerusalén Fena. A mēra ikafo Jesús Ifo shara famisfo. Epa Niosri ato fe ika. A ato fe ika ano fakkai fakkais isharai. Tokiri fakkai fakkais ikai keskara sharafinakōia. Nā tokiri āfe ane jaspe fēxta shara, tokiri fetsa āfe ane cristal. Shara fakkai fakkais ikai keskara. ¹² Nā tokiri kenea efapa Jerusalén foake tii fayakena. Nā kene keyakōi doce fepotiya. Nā doce fepoti ano Niospa ājiri niafo kexesharaxikakī. Israel iyopaonito āfe fake doce ipaoni. Nā docefāfe āto fakefo paxkanifo. Nāskakē fepoti tii āto anefo doce kenea. ¹³ Nā kene keya āfe fepoti ichapaya. Xini oaikiri tres ikaino, xini kaikiri tres ikaino, xini kaima anori tres ikaino, xini oaima anori tres ika fepoti ichapaya. ¹⁴ Nā kene keyakōi tokiri doce efapanāfā kamaki kenea. Jesúsnoa yoimisfāfe āto anefo nā tokiri doceki kenea.

¹⁵ Niospa ājirinī nā ea taefakī yoiato, nāato tanati oro tsoma, Jerusalén Fena tanaxii, āfe kene yafi āfe fepoti tanaxiki. Nā tanati tafa chainipa keskarafix oro ōshi keskara sharakōi. ¹⁶ Nā Jerusalén Fena āfe kene keya senēsharakōi. Āfe chainipa fe āfe xākī nātixō rafe. Āfe keyari nātixori. Niospa inapa tana dos mil dos cientos kilometro āfe chainipa fe, āfe xākī, āfe keyari. ¹⁷ Āfe kenefo keyakōi a akiki kenea sesenta y cuatro metros. Nā Niospa ājiri yorafāfe tanamis keskari fakī nāatori metropa tana.

¹⁸ Nā Jerusalén Fena sharakōi. Nā manishomo fēxta nō ōimis keskara sharafix ōshi keskara. Nāōxō Epa Niospa Jerusalén Fena onifaa. Askatari a kenea keyakōi nā tokirinī āfe ane jaspe Niospa onifaa. ¹⁹ Tokiri sharakōifo fetsa fetsatapafo Epa Niospa onifaa, nā doce tokiri kamaki nā kene keya tsoa. Taeyoi jaspeki iyoa. Āfe pefeta zafiroki ika. Āfe pefetari agataki ika,

ãfe pefetari esmeraldaki ika, ²⁰ãfe pefetari onĩceki ika, ãfe pefetari cornãlinãki ika, ãfe pefetari crisolitoki ika, ãfe pefetari beriloki ika, ãfe pefetari topacioki ika, ãfe pefetari crisoprasaki ika, ãfe pefetari jacintoki ika, ãfe pefetari amãtistaki ika; nãfo sharakõifoki nã kene Epa Niospa nimaĩfãni. ²¹Nã kene keyapa ãfe fepotifo perla oxo efapa Niospa onifaa. Nã perla tokiri keskara oxo sharakõi. Nã perla fistiõxõ fepoti fisti onifaa. Nãskakẽ doce fepoti onifaa nã perlaoxõ. Nã Jerusalén Fena ãfe fai manishomo fẽxta sharakõi keskara oke rafe nõ õitiro. Manishomo fẽxta keskara sharaflax oro õshi keskara shara.

²²Akka Epa Nios kĩfiti pexefã anoma. Epa Niospa nã afama mĩshti fatiroxakĩ nõko Ifo Jesús noko fe Jerusalén Fena mẽra imisfo. Askatari yorafãfe Epa Nios kĩfiti pexefã nã anã yopanakafoma. ²³Nãskarifikĩ anã xini yafi oxe yopakani Epa Nios fe Jesús ato fe ikano. Epa Nios nãno ato fe ixõ ato chaxaxoni. Jesúsri ato askafaxõi õisharakõinõfo. Anã afaa yopakani. ²⁴Mai fetsa anoaxri fofãsatirofo Epa Niospa ato chãxano. Xanĩfofori Jerusalén Fena mẽra ikikaxõ a aya imisfo afara sharafo inãxikani. ²⁵Nãno fakishri anã ikima. Fakishpakenakama. Akka anã Jerusalén Fena ãfe fepotifo fepopakenakama. ²⁶Akka fetsafori maifo tii anoax Jerusalén Fena mẽra ikikakĩ a aya imisfo ato afara sharafo inãxikani. ²⁷Akka afara chaka nã Jerusalén Fena mẽra ikitiroma. Nã chaka shinãmisfo fe a afara chakafamisfo, a ato pãramisfofori afo ikitirofoma. Akka Jesús ãfe kirika mẽra ãto ane keneano afe ipaxatirofo. Nãfo fisti Jerusalén Fena mẽra ikitirofo Jesús fe ipasharaxikakĩ.

22

¹⁻²Askano ãfe namapa õiai keskara Niospa ãjiri fẽtsa ea õimana afe keskaramãki Nios ika ano. Nios fe Jesús tsaoa anoax faka shara fakkai fakkaisai keskara kafani, fai nẽxpakĩa. Afara choshta a mẽra ikitiroma. Nãno ikafãfe nã faka shara ayapaiyaitĩa ayatirofo, nãskakẽ nomipakenakafoma. (Nãskarifikĩ nãno Niospa noko potapakenakama noko ikipakenaka.) Nãnori fai nẽxpakĩa ifi nia ika. Faka takai raferi nii xokoa ika. Nãno ikafãfe nã nii fimi pipaiyaitĩa pitirofo. Nãskakẽ fonãipanakafoma. Nãskarifikĩ Nios nofe ikano nõ aõnoax omiskõitirofo nõ nisharapakenaka. Nã ifi oxe tii fimimis. ãfe pei tsasimisma xachoko fena shara ipanaka. Nãskarifikĩ nã chanĩmara faafo tii maifo tii anoax Niosnoax meema sharakõi ipanakafo. ³Nã Jerusalén Fena ano Epa Nios fe Jesús nofe ixii. Nõ ato fe yorakõixõ nõ ato noikõixii. Nõ ãto yonoxomiskõi nõ ixii. Atoki fanãisharayanã nõ ato yoisharapakenaka. Akka nõko mai xini ano afara chaka fetsa fetsatapafo imis. Akka iskaratĩa nã Jerusalén Fena ano afara chaka a mẽra itirofo. ⁴Nãnoax nõko Ifo fe ãfe femãnãki õinõnãfãixikani. ãto femãnãki ãfe ane ato nẽtamana. ⁵Nõko Ifo Nios ari ikafo ato penafaxõa. Nãskakẽ anã rãpari yafi xini yopatirofoma. Anokai anã fakishima. Nãskax afe xanĩfo ipanakafo.

Jesús chaima oi

⁶Askata Niospa ãjirinĩ anã ea yoia: “Nõko Ifo Niospa ãfe Yõshi Sharaõxõ a ãfe meka yoimisfo ãto õiti mẽraxõ ato tãpimamis a afara afeskara ixiai keskara afe yorafori ato tãpimanõfo. Nãskarifikĩ iskaratĩa ãfe ãjiri fetsa nĩchia afara afeskara ixiai keskara a yonoxomisfo tii ato tãpimanõ. Nã ã mia yoiai keskara chanĩmakõi. Keyokõi ãfe meka mã chanĩmara fatiro,” ixõ ea yoia.

⁷Akka yoikĩ iskafaa nõko Ifo Jesús yoia iskafakĩ: “Ë nai mẽranoax mai ano matoki nokorisai. Nã mĩ õia a inõpokoai a mĩ nikafori, nãfo mĩ kenetiro. Akka nãfo chanĩmara fakakĩ kachikiri fayamakanax inimakõixikani,” ixõ Jesús ea yoia.

⁸ Ēkīa Juan ē nika, askatari ē ōia ea Niospa ājirinī ōimanaino. Nāskakē ē a nāmā feopakekafana ēfe Ifo keskara shināi. Nāskaxō, “Mī fāsi sharakōi,” ē fakerana. ⁹ Ē askafaito ea yoia iskafakī: “Ea askafayamafe. Ēri mia keskaraki. Mī ikaino, Jesús chanīmara faafo ikaino, āfe meka yoimisfo ikaino, keyokōi nā mī rama kenea keskara chanīmara faafo fe, ēri mato keskara nōko Ifo Nios ē yonoxomis. Akka Epa Nios fisti mī Ifofatiro. Nā fisti nāmā mī feopakekafatiro,” ea faa.

¹⁰ Askata afianā ea yoia iskafakī: “Nā mī kenea oneyamafe. Nā mī kenea keskara samama askakōi. Nāskakē a mī kenea keskara keyokōi yorafāfe tāpinōfo. ¹¹ Akka mā Jesús nokoaino nā nikakaspamisfāfe chakafakī finakōixikani. Yora chakafamisfāferi nāskari faxikani chakakōi fakakī. Akka nā Niospa yoiai keskara amisfāfe nāskarakōi fakakī mimakōi faxikani Niospa yoiai keskara akakī. Nā Jesús keskara shara imisfo nāfori isharakōixikani āto Ifo ifosharakōifakani,” ixō Niospa ājirinī ea yoia.

¹² Nāskaxō Jesús anā yoia iskafakī: “Ea nikasharakāfe. Ē matoki samama nokorisai. Nokoxō ē mato yoiyoa keskara ē mato ināsharaxii. Nā afara shara famisfo ē ato shara fata nā afara chakafamisfo ē ato omiskōimaxii. ¹³ Afarafo onifataima ē iyopaoni. Ēfi nīpamiskī. Ē niixatepakenakama. Nā māto mai keyoai eres fisti ē yoitiro,” ixō ea yoia.

¹⁴ Anā Jesús yoia iskafakī: “Nō Jerusalén Fena mēra ikixō, nā ifi āfe fimi pipaiyaitīa nō pitiro. Nāskarīfiai nō Epa Nios fe ikaino ares fisti noko nimapakexatiro. Nā Jesús chanīmara faafo ato chaka soaxona nāfo fisti Epa Niospa ato ikimatiro afe īpaxanōfo. ¹⁵ Nāskakē nā yora chakakōi paxta pōfe keskarāfo fe, a koshoiti tāpiafo, nā koshoiti chanīmara faifori, feronāfāke āfe āfima chotamis, kērofāferi āto fenema chotamamisfo, retemitsamisfori, Nioskōima noikī ifofamisfori, chanīmisfori, nā chanī noimisfori, askara yorafokai Jerusalén Fena mēra ikitirofoma.

¹⁶ “Ēkīa Jesús, ēfe ājiri matoki nīchia ē mia yoia keskara nā ea Ifofaafo tii ichanāfo anoxō ato tāpimanō. Ēkīa David āfe fena. Ēfi nā fishi efapa penaino ōimisfo keskarakī. Nā fishi ōikī nō tāpitiro mā penaino. Nāskarīfiai mē chaima oaino tāpikanax itipinīsharatirofo Jerusalén Fena mēra efe ipaxakakī,” ixō Jesús ea yoia.

¹⁷ Askano Niospa Yōshi Shara feta Jesús afe yorafāferi yoikakī iskafatirofo: “Jesúski fekāfe,” ato faifono, fetsafāferi nikakaxō ato yoitirofo: “Jesúski fekāfe,” ato fatirofo. Fētsa nōamā ikī faka yopai, faka ano katiro mā ayax anā nōamā itiroma. Nāskarīfiai fētsa āfe chaka xatepai, Jesúski otiro Epa Nios fe ipaxakī. Afaa inātama Jesús chanīmara faax, afe ipaxatiro.

Juan mā mekai xatekī Jesús yoiai keskara keneni

¹⁸ Ēkīa Juan, afara ixiai keskara ē mato kenexona. Ē mato kenexonai keskara chanīmakōi. Nā meka ē mato yoiai nikasharakāfe. Ē mato kenexona keskara akka fētsa afianā meka fetsa shinākī keneax, na kirika mēra kenea mā ōiai keskara omiskōipakenakāfo chanīmakōi Epa Niospa keyokōi nāfo omiskōimaxii. ¹⁹ Askatari a afara afeskara ixiai keskara ē kenea fētsa na meka atiri soakē Epa Niospari āfe ane soaxii āfe kirika mērana. Nāskakanax nā Jerusalén Fena shara mēra ikitirofoma. Ē kenea keskara soakanax nā Epa Nios afara shara yoiyoni keskara, aya ipanakafoma.

²⁰ Jesús yoia keskara nānori ē mato kenexona. Nāato yoikī iskafaa: “Chanīma, ē matoki samama nokorisai,” ixō yoia. Askapainō. Nōko Ifo Jesús orisapainō.

²¹ Mã Niospa yorafo. Afara afeskara afiaino nõko Ifo Jesús mato noixõ mãto õiti mato fẽpeaxosharapainõ. Askapainõra. Ëri mato fãsi shinã. Nã tii.

Ëkã Juan